

清
實
錄

高宗純皇帝實錄(九)

卷六二八至卷七二五
乾隆二十六年至二十九年

清實錄

第一七冊

中華書局影印

清 實 錄

(第 一七 冊)

高 宗 實 錄 (九)

•

中 華 書 局 出 版

(北京王府井大街36號)

北京市中國書店發行

中國建築工業出版社印刷廠印刷

•

787 × 1092 毫米 1/16 • 683/4 印張

1986年 2月第1版 1986年 2月北京第1次印刷

印數 0,001—1,500 冊

統一書號: 11018 • 1355-17 定價: 51.00 元

清實錄第一七冊目錄

高宗純皇帝實錄(九)

卷六二八	乾隆二十六年正月上	一
卷六二九	乾隆二十六年正月下	二
卷六三〇	乾隆二十六年二月上	三
卷六三一	乾隆二十六年二月下	三四
卷六三二	乾隆二十六年三月上	四九
卷六三三	乾隆二十六年三月下	六二
卷六三四	乾隆二十六年四月上	七二
卷六三五	乾隆二十六年四月下	八六
卷六三六	乾隆二十六年五月上	一〇〇
卷六三七	乾隆二十六年五月下	一一〇
卷六三八	乾隆二十六年六月上	一二一
卷六三九	乾隆二十六年六月下	一三四
卷六四〇	乾隆二十六年七月上	一四六
卷六四一	乾隆二十六年七月下	一五五
卷六四二	乾隆二十六年八月上	一六九

卷六四三	乾隆二十六年八月下	一八八
卷六四四	乾隆二十六年九月上	二〇〇
卷六四五	乾隆二十六年九月下	二二三
卷六四六	乾隆二十六年十月上	二三六
卷六四七	乾隆二十六年十月下	二三六
卷六四八	乾隆二十六年十一月上	二四八
卷六四九	乾隆二十六年十一月下	二五九
卷六五〇	乾隆二十六年十二月上	二七七
卷六五一	乾隆二十六年十二月下	二八九
卷六五二	乾隆二十七年正月上	三〇〇
卷六五三	乾隆二十七年正月下	三〇八
卷六五四	乾隆二十七年二月上	三一七
卷六五五	乾隆二十七年二月下	三三七
卷六五六	乾隆二十七年三月上	三三七
卷六五七	乾隆二十七年三月下	三四八
卷六五八	乾隆二十七年四月上	三六〇
卷六五九	乾隆二十七年四月下	三七二
卷六六〇	乾隆二十七年五月上	三八五
卷六六一	乾隆二十七年五月下	三九四

卷六六二	乾隆二十七年閏五月上	四〇四
卷六六三	乾隆二十七年閏五月下	四一三
卷六六四	乾隆二十七年六月上	四二四
卷六六五	乾隆二十七年六月下	四三五
卷六六六	乾隆二十七年七月上	四四四
卷六六七	乾隆二十七年七月下	四五四
卷六六八	乾隆二十七年八月上	四六四
卷六六九	乾隆二十七年八月下	四七三
卷六七〇	乾隆二十七年九月上	四八二
卷六七一	乾隆二十七年九月下	四九五
卷六七二	乾隆二十七年十月上	五〇七
卷六七三	乾隆二十七年十月下	五一九
卷六七四	乾隆二十七年十一月上	五三三
卷六七五	乾隆二十七年十一月下	五四五
卷六七六	乾隆二十七年十二月上	五五五
卷六七七	乾隆二十七年十二月下	五六八
卷六七八	乾隆二十八年正月上	五八一
卷六七九	乾隆二十八年正月下	五九四
卷六八〇	乾隆二十八年二月上	六〇三
卷六八一	乾隆二十八年二月下	六一八
卷六八二	乾隆二十八年三月上	六三一
卷六八三	乾隆二十八年三月下	六四〇
卷六八四	乾隆二十八年四月上	六五一
卷六八五	乾隆二十八年四月下	六六三
卷六八六	乾隆二十八年五月上	六七五
卷六八七	乾隆二十八年五月下	六九〇
卷六八八	乾隆二十八年六月上	七〇二
卷六八九	乾隆二十八年六月下	七一三
卷六九〇	乾隆二十八年七月上	七二四
卷六九一	乾隆二十八年七月下	七三九
卷六九二	乾隆二十八年八月上	七五五
卷六九三	乾隆二十八年八月下	七六四
卷六九四	乾隆二十八年九月上	七七五
卷六九五	乾隆二十八年九月下	七八五
卷六九六	乾隆二十八年十月上	八〇〇
卷六九七	乾隆二十八年十月下	八〇六
卷六九八	乾隆二十八年十一月上	八一四
卷六九九	乾隆二十八年十一月下	八三一

卷七〇〇	乾隆二十八年十二月上	八三〇	卷七一九	乾隆二十九年九月下	一〇一四
卷七〇一	乾隆二十八年十二月下	八三六	卷七二〇	乾隆二十九年十月上	一〇二七
卷七〇二	乾隆二十九年正月上	八四五	卷七二一	乾隆二十九年十月下	一〇三四
卷七〇三	乾隆二十九年正月下	八五一	卷七二二	乾隆二十九年十一月上	一〇四四
卷七〇四	乾隆二十九年二月上	八六一	卷七二三	乾隆二十九年十一月下	一〇五三
卷七〇五	乾隆二十九年二月下	八七一	卷七二四	乾隆二十九年十二月上	一〇六三
卷七〇六	乾隆二十九年三月上	八八二	卷七二五	乾隆二十九年十二月下	一〇七七
卷七〇七	乾隆二十九年三月下	八九三			
卷七〇八	乾隆二十九年四月上	九〇六			
卷七〇九	乾隆二十九年四月下	九一七			
卷七一〇	乾隆二十九年五月上	九二七			
卷七一一	乾隆二十九年五月下	九三六			
卷七一二	乾隆二十九年六月上	九四五			
卷七二三	乾隆二十九年六月下	九五二			
卷七二四	乾隆二十九年七月上	九六三			
卷七二五	乾隆二十九年七月下	九七三			
卷七二六	乾隆二十九年八月上	九八四			
卷七二七	乾隆二十九年八月下	九九四			
卷七二八	乾隆二十九年九月上	一〇〇三			

大清高宗法天隆運至誠先覺體元立極敦文
奮武孝慈神聖純皇帝實錄卷之六百二十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處纂

文部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄一次 慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部部務事務

世襲騎都尉軍功加九級隨帶加二級又加二級 董誥內大臣戶部尚書鑲黃旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆二十六年辛巳春正月辛丑朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○壬

寅

上詣

皇太后宮問安○幸瀛臺○紫光閣落成賜大

學士公傅恒以下畫像諸功臣並文武大臣

蒙古王公台吉等一百七人宴回部郡王霍

集斯等葉爾羌諸回城入覲伯克薩里等哈

薩克汗阿布賚來使蘇勒統卓勒巴喇斯等

十一人並令與宴○召大學士內廷翰林等

茶宴以紫光閣落成賜宴聯句○命藏得勝

靈燾及西師俘獲軍器於紫光閣○諭去歲

湖南所屬之零陵新田祁陽東安寧遠耒陽

常寧等七州縣因夏間缺雨偶被偏災已據

該撫照例散賑該省累歲豐收此數州縣秋

成偶歉民氣雖不至大傷第念閭閻業已被

災日用究多拮据計例賑既畢尚屬青黃不

接之時著加恩將此七州縣無論極次貧民

再行加賑一個月該撫其善為經理務使得

需實惠用副朕軫卹至意該部即遵諭行○

又諭。甘省連歲承辦軍需。兵民俱為出力。其民間應徵錢糧。已節年蠲免。而昨歲雨暘時若。穡事大豐。閭閻諒紓拮据。惟是滿漢各營。歷年餽解馬匹。尚有預借銀兩。雖屢次加恩。豁免至八十餘萬。今猶有九十餘萬之多。本應於各該營俸餉內扣還。第念兵弁等日用攸資。按限坐扣。必致艱窘。茲大功既歲。惠愷宜宣。所有預借銀兩。著再加恩。悉予豁免。用示朕體卹兵力至意。○甲辰。諭上年淮揚徐海等處。偶被水災。業經加恩陸續賑卹。諭令地方有司。實力查辦。務使窮黎得所。茲當東作方興。例賑將停。而麥收尚遠。農民生計。恐不無拮据。著再加恩。將被災較重之阜寧。安東。桃源。高郵。泰州。興化。寶應等七州縣。無論極次貧民。俱加賑兩個月。其被災次重之清河。鹽城。甘泉。睢寧。海州。沭陽等六州縣。無論極次貧民。俱加賑一個月。以資接濟。該部即遵諭速行。○安徽巡撫高晉奏。安徽藩司向

駐江寧。撫臣每歲前往。會同督臣盤查藩庫。因將每年秋審。亦在江寧審辦。今藩司既回。駐安慶。無庸前往江寧盤查。所有每年秋審。皆安省應辦之事。且臬司同城駐劄。請照江西辦理秋審之例。將各屬人犯。就近解至安慶。會同藩臬審辦。仍將冊移督臣覈題。再安省督撫學臣。均不同城。向例甄別俸滿教職。學臣於按試各棚就近驗看。將考語密行藩司存案。俟督撫於江寧秋審時會驗。請嗣後先送督學。二臣驗看。再歸撫臣會覈辦理。無庸行司轉報。得旨著照所請行。○乙巳。上詣皇太后宮問安。○諭。昨已降旨將湖南省被災之零陵。新田。祁陽。東安。寧遠。耒陽。常寧等七州縣。於例賑之外。各加賑一個月。以資接濟。但今東作方興。麥秋尚遠。災民生計。仍恐不無拮据。著再加恩。將此七州縣。無論極次貧民。再予加賑一個月。用示朕惠愛黎元至意。

該部遵諭速行。○諭軍機大臣等。安泰等奏
稱烏魯木齊所有馬匹頗多。須蒙古兵丁牧
放。請旨於內地調取等語。現在伊犁設立牧
場。蒙古兵丁甚多。則烏魯木齊馬匹牲隻。皆
可解送伊犁。交與阿桂編羣孳息。著傳諭安
泰。阿桂等知之。○丙午。享
太廟。遣和親王弘晝恭代行禮。○遣官祭
太歲之神。○

上御紫光閣。賜外藩蒙古王公台吉等。及回部
郡王霍集斯等葉爾羌諸回城入覲伯克薩
里等哈薩克汗阿布賚來使蘇勒統卓勒巴
喇斯等宴。○喀什噶爾辦事都統侍郎海明
奏。臣前奏拏獲逃犯烏朗噶之家屬七口。隨
行文官長保等。令嚴拏烏朗噶務獲。十一月
三十日。據報在沖噶巴什之扣喀爾嶺追及
俱匿山險。官長保等。同布魯特藍翎侍衛蒙
固勒。回人海爾圖等登山。將烏朗噶及家屬
十五口擒獲。據供。因曾管霍集斯家務。今聞

將伊屬人送京。是以挈眷逃走等語。除將烏
朗噶等解送阿克蘇辦理外。謹將此次拏獲
逃犯之官兵回人等。列單具奏。諭軍機大臣
等。官長保從前獲罪。本應正法。姑予革職自
効。此次拏獲逃犯。尚屬奮勉。著加恩授為藍
翎侍衛。沖噶巴什之阿瓦勒比等。甚屬出力。
著分別賞給緞匹。○以湖北黃州協副將許
成麟為江南壽春鎮總兵。○丁未。
世祖章皇帝忌辰。遣官祭

孝陵。○諭。今日劉藻奏到。滇省屬員賢否清摺。
朕以愛必達亦已具奏。爰檢取覈對。見伊等
所注屬員考語。大畧相同。因復將伊等上次
所奏兩相比較。亦毫無參差之處。殊屬可異。
三年大計之外。別令各督撫。密奏屬員賢否。
原欲其覈實別真。以備簡用。是以此等清摺。
朕皆留中。時時披覽。亦不令在廷諸臣與知。
該督撫等。自當各就所見。據實入告。初不必
彼此會同。以示意見畫一。且正惟不必畫一。

而朕於其間。參互審量。益可以得其人之真。若必一督一撫。毫無異同。則與計典之會商。論定者。又何以異。奚事密摺具奏乎。即謂督撫辦事。貴乎和衷。然衷不可不和。而識見則不必盡合。縱使人才不甚相遠。此見為優。彼必不見為劣。而各出衡鑒。分別品題。豈竟無大同小異之處。乃必依樣葫蘆。若此。試思此係兩人會奏之事。抑係各人自奏之事。如必瞻徇雷同。隨聲附和。則嚴覈人材。密告君父之重典。又將沿為故套。豈朕所以寄耳目心。贅之意乎。愛必達等。兩次所奏屬員賢否。何以一例相同。著兩人明白回奏。尋愛必達。劉藻。各陳平日議論屬員賢否。意見尚無參差。以致具奏相同實情。自請交部嚴加議處。得旨該部嚴察議奏。○戊申。諭據楊廷璋奏。提督陝西按察使。○戊申。諭據楊廷璋奏。提督馬龍圖。任意那用存營公項銀兩一摺。提督為統轄大員。自應潔己奉公。表率營伍。乃馬

龍圖以奏定章程。按期動用之公項。不時提取應用。至一千五百餘兩。致將弁等。嘖有煩言。及楊廷璋委員查出虧空。及復輾轉彌補。捏詞支飾。繳出之銀。多在櫃外。其中顯有營私情弊。馬龍圖在總兵任內。即被叅劾。朕加恩復用。至提督。應如何感恩自勵。而下愚不移至此。著解任。交與該督楊廷璋會同巡撫吳士功。嚴審定擬具奏。尋奏。馬龍圖節次侵用水師提標五營存公銀二千五百餘兩。又曾委中營外委朱士俊。赴廣東買辦呢緞。用銀三百餘兩。馬龍圖因呢緞平常。發交中軍收貯。價銀並未發還。經臣楊廷璋察知。密委道員往查。馬龍圖始將侵用之項。湊齊搬至櫃旁。應照知人欲告而自首例。減罪二等。杖一百。徒三年。惟查名例又開。自首不實。及不盡者。以不實不盡之罪罪之等語。今馬龍圖私借公項。除歸還外。尚有動買呢緞等物銀三百餘兩。雖將原物發交變價抵數。並未入

已但究係自首不盡。請革職。照律准徒五年。得旨。楊廷璋不查而馬龍圖即自首。乃自首耳。今聞查而私吐免罪。有如此失出之理乎。汝等視朕為何如主。此必吳士功之意。汝二人據實明白回奏。大謬之極。可惡之極。為之手顫。又批。如此縱弛之案。豈可交部乎。另議奏來。○諭軍機大臣等。據楊廷璋奏。大陳山海面有釣船偷割蝦網。百總徐萬清帶兵往拏。匪船羣起。幫駕飛逃。并兵丁陳雲奇及民船水手九人。帶往不知去向等語。漁船在洋掠竊。已屬不法。及遇巡弁帶兵查拏。復敢倚恃人衆。將過船兵丁水手。駕逃無蹤。似此橫行無忌。深為海洋商旅之患。理應剋日緝拏。按律嚴行辦理。俾匪徒不致漏網。總兵林洛前奏請陞見。已令不必來京。伊有統轄舟師之責。當督率弁兵。密速根追。獲日審明。盡法懲治。以靖海疆。無得稍有疎懈。摺內所奏。應叅將弁。著即一面查明叅奏。○叅贊大臣阿

桂等奏。十一月二十五日。據洪郭爾鄂博守卡委員報稱。有哈薩克八十餘人。帶馬五百餘匹。前來貿易。臣等傳該頭目阿里等進見。詢係哈木巴巴。遣伊子呼都雅爾同來。臣等令都司陳聖謨等。作為商人。以緞布交易。畢於二十九日遣回。報聞。○是日起。

上以祈穀於

上帝。齋戒三日。○己酉。軍機大臣等奏。查阿桂等請買喀爾喀牛羊駝。編設牧羣。經臣等議以。恐礙喀爾喀等生計。仍照原議。從達里剛愛等處牧羣。揀選送往。但路遙不無疲乏。正在遵旨籌議。適將軍成衮扎布來京。會同商酌。據稱。烏里雅蘇台有官駝一千六百隻。牛二千八百隻。羊二萬四千餘隻。蒙古等舊欠牲隻。現在陸續交納等語。臣等擬將阿桂所取。即於前項內揀送。既無礙喀爾喀生計。又可省遠送之勞。至編羣解送。必須間隔行走。不致蹂踐水草。官兵亦易照看。其烏里雅蘇

台缺額。應行文牧羣總管等。照數送補。再從前解送牲隻。請旨特派侍衛等官。今既由烏里雅蘇台解送。即以該處察看水草侍衛數員。扎薩克一員。照看官兵。緩行運送。其抵補烏里雅蘇台牲隻。亦令該總管等。派出官兵。俱照例給與行糧。及整裝銀兩。所有派出在京侍衛。從之。工部議覆漕運總督楊錫紱奏稱。薊運河挑淺。請定章程。查薊糧上關陵樁。每年運薊船到天津。另由寧河縣之新河口入海河。又由海河轉入寶坻縣之小河。然後由白龍港。劉家莊等處。達薊州之五里橋交卸。一路水多淺阻。應如所請。責成寧河縣於每年開凍挑挖。務使潮小亦可通舟。至劉家莊。五里橋等處。流沙易淤。難以豫挑。應責成薊州知州。屆期將淺阻處。竭力疏濬。令直督會同倉場侍郎。一體查察。得旨。直隸總督事務繁多。所有薊運河挑淺工程。著就近令倉場侍郎專管。每歲督率通永道。薊州知州。

隨時相度。實力疏濬深通。以利漕運。○庚戌。上詣南郊齋宮齋宿。○辛亥。祈穀於上帝。上親詣行禮。○詣皇太后宮問安。○壬子。上詣大高殿行禮。○奉皇太后居長春仙館。○詣安佑宮行禮。○幸圓明園。○諭軍機大臣等。樂善堂全集定本。各省現在刊布。其舊本通行各省者。前已定議。行令各督撫陸續收繳。乃距今已逾二年。惟馮鈐奏繳三十七部。其餘各省俱係移文咨繳。經軍機處查明送到數目。亦屬寥寥。在江浙大省。地廣事繁。朕原不責人以所難。令其剋日完竣。但亦豈得藉辭因循。竟爾置之不辦。至事簡小省。較湖南經理更易。何以轉多遲緩。且原本內因朕名屢

見尚存舊邸原文。是以廷臣公請改編。此時各省如不及時收繳。又豈臣子敬謹之義。著傳諭該督撫等。可將各該省先經繳過若干。並現在作何辦理。具摺聲明。仍將續收舊本。隨時奏繳。不得但用咨文移送。○癸丑上奉

皇太后幸山高水長。至己未皆如之。喀什噶爾辦事都統侍郎海明奏。前奉旨查拏搶掠臺站賊黨哈子莫斯和卓等務獲。臣訪得莫斯和卓。逃往霍罕。伊子現在布魯特。即行文額爾德尼伯克。令將莫斯和卓拏解。此次派富虎至布魯特。明伊勒哈處。查拏逃犯烏朗噶。因訪得莫斯和卓之子瑪瑪第斯敏。尼雅斯和卓之長子呼岱巴爾氏。次子阿舒爾藏匿處所。隨同商伯克墨墨氏敏。前鋒校雙星保等前往。將瑪瑪第斯敏等全獲。又據布魯特。沖噶巴什等。回人報稱。貿易至布魯特之薩雅克薩喇巴噶什。遇三十餘人搶掠等語。

臣亦飭富虎查辦。據明伊勒哈遣伊子瑪木伯特等。將為首之瑪爾喀拜。為從之沙巴圖等。盡擒。瑪爾喀拜。情形頑梗。直供不諱。回眾等懇請除此惡賊。因即斬決梟示。沙巴圖。照回法斬其手指。所搶貨物。全行查給商人領訖。諭軍機大臣等。富虎此次因偵緝逃犯烏朗噶。訪得搶臺賊黨莫斯和卓之子瑪瑪第斯敏等。藏匿處所。即領官兵回人前往。全行擒獲。甚屬可嘉。著加恩賞給副都統職銜。又諭曰。海明奏。商伯克墨墨氏敏。托古薩克之密喇布伯克巴巴和卓。俱自備資斧。前往布魯特。為富虎嚮導。安撫眾心。偵獲賊犯等語。墨墨氏敏等。抒誠効力。甚屬可嘉。著加恩賞給各二端。仍候應陞之伯克。缺出補用。○又奏本年六月。邁喇木作亂時。沖噶巴什之烏默爾比。率屬搶掠安集延商人牲隻銀兩。遠遁。及阿瓦勒比。自京轉回。臣委令查緝。今據富虎報稱。聞得烏默爾比。在薩雅克。即行詢

問。據供。原搶銀一千兩。除阿瓦勒比。索回四百兩外。尚存二百兩。其餘係衆人分用等語。將烏默爾比家口。帶至喀什噶爾。臣即派伊什罕伯克。阿布都喇伊木等。向分用銀兩之布魯特等查追。其烏默爾比。係從前擾亂之時。於卡外搶掠。若照瑪爾喀拜。一體辦理。情罪稍有不同。請將烏默爾比之職銜革去。或交阿瓦勒比管轄。或交奇布察克布魯特散秩大臣阿奇木管轄。諭軍機大臣等。海明奏稱。搶掠安集延商人貨物之瑪爾喀拜。已經正法。其從前搶掠安集延之烏默爾比。情罪稍有不同。請革退職銜。交與該管約束等語。所辦非是。冲噶巴什之布魯特。乃喀什噶爾所屬。與外藩回人不同。必宜賞罰嚴明。始足以昭懲勸。即如阿瓦勒比。抒誠効力。既經加恩獎賞。而烏默爾比。乘亂搶掠。自應正法示懲。乃僅請革職管束。甚屬姑息。著將烏默爾比。派員看守送京。○甲寅。

上奉

皇太后幸同樂園。侍早晚膳。至丁卯。皆如之。○御奉三無私殿。賜皇子諸王等宴。○諭軍機大臣等。據尹繼善奏。擬於三月內。將印務交與高晉護理。即赴京陛見等語。八阿哥行聘吉期。已擇於四月十二日。尹繼善自當先期來京料理。現在江西審案完竣。該督自可即回江寧。所有一切應辦事件。上緊清理。俟高晉到日。將總督印務交代。即行起程赴京。○又諭曰。海明辦理回部事務。多未妥協。即如從前葉爾羌伯克等。以鄂對不稱阿奇木之任。請將額敏和卓補授一事。自應嚴行查辦。乃商之舒赫德。方且游移不決。以為可不奏聞。甚屬非是。朕念其甫經辦事。姑從寬申飭。此次又復姑息。是海明竟不能奮發有為。喀什噶爾。地通安集延等處。與布魯特等接壤。較之葉爾羌。雖通已達克山。相距尚遠者。其情形尤為緊要。辦事大臣。必得精明果斷之人。遇

事始能妥協。海明不稱喀什噶爾辦事之任。現命永貴前往。更代舒赫德。但抵任仍需數月。著傳諭舒赫德即赴喀什噶爾辦事。令海明赴阿克蘇。與其衷同辦事務。看來阿克蘇辦理伊犁屯田回人運送什物尚不甚難。俟永貴抵喀什噶爾。舒赫德將現辦章程交代。即行回京。俱著傳諭知之。○乙卯。

上詣

安佑宮行禮。○御正大光明殿。賜朝正外藩蒙

古王公貝勒貝子等宴。召左翼科爾沁和碩親王垂扎布。烏珠穆沁和碩親王朋素克喇布坦。科爾沁多羅郡王和碩額駙齊默特多爾濟。科爾沁多羅郡王喇特納扎木素。敖漢多羅郡王喇什喇布坦。喀爾喀多羅貝勒拉旺多爾濟。喀爾喀多羅貝勒衮布多爾濟。喀喇沁固山貝子多羅額駙瑚圖靈阿。喀喇沁固山貝子多羅額駙扎拉豐阿。阿魯科爾沁輔國公和碩額駙喇什納木扎勒。教漢輔國

公固山額駙羅布藏錫喇布。右翼科爾沁和碩親王固倫額駙色布騰巴勒珠爾。喀爾喀和碩親王成衮扎布。阿巴噶多羅郡王車凌旺布。固子郡王品級貝勒霍集斯。喀爾喀郡王品級貝子達什丕勒。喀爾喀多羅貝勒丹津。翁牛特固山貝子巴勒丹。喀爾喀貝子品級輔國公額爾克沙喇。喀爾喀鎮國公恭格敦丹。科爾沁輔國公固山額駙拉里達。和托輝特輔國公多爾濟車登等。至御座前。賜酒成禮。○勅諭哈薩克阿布賚。阿布勒巴木比特。爾等使人卓勒巴喇斯等。與侍衛納旺。俱安善前來。朕即召見。加恩宴賚。錫宴時。賜爾阿布賚。阿布勒巴木比特。蟒錦緞疋器什芽茶各若干。交使人齎回。其各祇受。並賜來使翎頂冠服。緞疋器什銀兩有差。至爾等所奏朕已鑒悉。從前巴魯克巴圖爾。搶掠烏梁海等。駐劄烏里雅蘇台將軍。欲發兵問罪。朕念爾等素稱恭順。不允所請。特命侍衛納旺前

住。諭令拏送罪人。查還所掠。爾阿布齊即同納旺親行查辦。送還烏梁海人口牲隻什物。又遣使入覲。代巴魯克巴圖爾請寬。朕為天下共主。凡外藩歸附人等。果能自知其罪。改過遷善。亦姑予矜全。惟怙終不悛。始加征討。今巴魯克巴圖爾既惶懼祈求。而爾等又專使奏懇朕恩。尚屬恭順。巴魯克巴圖爾著免其拏送治罪。嗣後爾等惟加意約束所部。各守封疆。善圖生計。勿謂此次有請即允。遂妄圖僥倖。越境盜竊。斯時將軍大臣等奏請發兵。朕亦不能姑息從事。必致擾爾游牧。於爾復有何益。爾等當以朕意偏諭所屬。俾知遵守。再爾等使人拜克奈等轉回。謬言愛呼斯地方已蒙大皇帝賞給哈薩克游牧。經伊犁大臣查詢具奏。從前使人奏請在塔爾巴哈台游牧。朕即諭以不應越境。且載在勅書。而爾等屬人仍造言生事。若此是僥倖之心。尚未止息。已諭伊犁大臣等有哈薩克越境游

牧者。即行驅逐。今卓勒巴喇斯等所奏又有南界綽爾郭。西界沙喇伯勒。中抵勒布西等語。凡此數處。皆厄魯特故地。而爾使謂哈薩克俱有游牧。隱躍其辭。希圖窺伺。更屬僥倖。試思我國家以大兵平定之地。豈可任爾等侵踞。況爾等前為厄魯特所擾。雖現在游牧之處。亦遠徙避去。仍不能免於搶掠。今干戈寧靜。共樂昇平。爾等游牧。並非狹小。乃妄行陳奏。朕必不允。是徒有貪得見小之名。儻妄生窺伺。或轉至失其所有。甚無謂也。至爾等所奏哈薩克全部已為臣僕。願世世子孫永効惇誠。乞賜璽書為券等語。朕嘉悅覽。爾等果能遵朕所頒勅諭。約束部衆。各安生業。自必永綏福祿。垂於萬年矣。又爾阿布齊使人奏云。爾所屬有三人。為烏梁海所獲。乞查出發回。所奏未為合理。即如巴魯克巴圖爾係獲罪之人。理應拏送。尚加恩寬免。此三人既為烏梁海所養。何必瑣瑣校計。如必欲

查還。可將巴魯克巴圖爾拏送前來。朕再降諭旨。適已命爾使傳諭。因附及之。爾等其各宜領悉。

大清高宗法天隆運至誠先覺體元立極敷文奮武孝慈神聖純皇帝實錄卷之六百二十八

實錄卷之六十八

三

大清高宗法天隆運至誠先覺體元立極敷文奮武孝慈神聖純皇帝實錄卷之六百二十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶裕總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級 董誥內大臣戶部尚書鑲藍旗滿洲都統軍功紀錄五次尋常紀錄十四次 臣德瑛經筵講官太子少保工部尚書紀錄六次 臣曹振鏞等奉 敕修

乾隆二十六年辛巳正月丙辰

上御正大光明殿賜大學士尚書等宴（諭軍機大臣等昨有旨令海明赴阿克蘇辦事該處有撥遣伊犁屯田回子解運物料等事亦屬緊要。和其衷在彼。隨同舒赫德辦事。已閱數月。情形諒俱熟悉。著傳諭和其衷諸事協同海明妥辦。不可以海明位尊年長。依違迎合。丁巳諭朕於二月初四日御經筵。所有應行典禮。各該衙門敬謹豫備。○又諭朕恭奉

實錄卷之六十九

一

皇太后祇謁

泰陵巡幸五臺於二月初十日啟鑒所有應行豫備事宜各該衙門照例敬謹豫備。以福建臺灣鎮總兵甘國寶為福建水師提督調福建金門鎮總兵游金輅為臺灣鎮總兵以福建澎湖協水師副將談秀為金門鎮總兵山東膠州營副將焦騰漢為貴州安籠鎮總兵。戊午諭軍機大臣等據五吉等奏稱巴里坤收放之馬已揀選二千匹解送阿克蘇至買補缺額則現在價值頗昂請於蒙古及商販等馬匹內酌量購辦等語巴里坤馬價既昂而烏魯木齊伊犁所易哈薩克馬匹甚多著傳諭五吉將巴里坤缺額馬匹停其購辦仍咨行安泰阿桂等將來該處馬匹漸多即送往巴里坤再多則送至內地以補營伍臺站之缺額均為有益嗣後巴里坤惟購辦牛羊以裕駐防屯田之需○又諭曰安泰等奏自哈薩克來投之厄魯特阿玉什鄂奇勒

等家口騎馱馬四十餘匹除量行變價為伊等製備衣服外餘俱編入牧羣等語伊等既苦哈薩克役使遠道來投所有編入牧羣馬匹仍著給與價值以示體卹○又諭前因舒赫德接濟伊犁口糧妥協交部議敘今據奏稱侍衛齊克慎在北路出兵多年一切公務實心奮勉所有交辦阿克蘇事件皆能領畧妥協願停臣議敘將齊克慎陞用等語齊克慎既効力多年前經辦理進勦回部糧餉今又會同回部伯克等將續送屯田回人糧餉亦俱辦理妥協曾經兩次保題俱降旨於應陞之處開列著加恩授為二等侍衛以示鼓勵○御前侍衛副都統安泰等奏闡展喀喇和卓托克三等處係新疆往來要路請留屯田兵六百名仍量留供應差遣兵餘俱發往烏魯木齊陸續前往伊犁其空地畝賞給吐魯番公素賚瑞所屬分種所積糧石借給貧乏回人以為籽種俟秋收後還倉照時價

出糶歸入正項銷算得旨軍機大臣議奏尋議安泰所奏俱係酌照臣等原議辦理惟開展等處屯田兵遷移後空出地畝皆係官為開墾所留兵既不敷耕作應召募回人承佃不便無故賞給回人請交安泰德爾格等查明空出地畝若干作何召募承佃交納官糧之處再議具奏從之○庚申諭軍機大臣等尹繼善履奏乾隆二十四年蕪湖關稅贏餘短少摺內稱是年江浙兩省各有被災之處

江楚油豆等貨過關者少是以贏餘較上屆短少等語江浙被災以乾隆二十年為甚統計兩省災地共一百一十一州縣而是年該關贏餘尚有六萬七千餘兩今乾隆二十四年江浙災地僅九十三州縣且被災分數較輕而該關贏餘何轉不及二十年之數所奏未免仍屬故套著傳諭尹繼善令其再行嚴加查覈據實履奏○又諭哈薩克使人入覲轉回應派員護送納旺三濟扎布對齊往返已

及一載不必再令前往著乾清門侍衛烏爾圖納遜帶領使人行至烏里雅蘇台交成衮扎布等另派妥員送伊等過烏梁海游牧抵其本境即行轉回○辛酉軍機大臣等議覆黑龍江將軍綽勒多疏稱據黑龍江副都統傅玉墨爾根城副都統鄂博付呼倫貝爾副都統銜總管卓哩雅等查報由副都統溫布等各隊撤回官兵原領各項軍器半因打仗損傷應如所請呼倫貝爾打牲烏拉二處官

兵損壞軍器應行補造之箭鐵鎗頭腰刀烏鎗旗纛畫角綿甲弓撒袋等件交武備院工部內務府照例製造移咨該將軍派員領取用過價銀即著落該官兵等限三年清賠其黑龍江齊齊哈爾墨爾根三城兵丁等損壞軍器伊等遇便來京儘可製辦亦著落該兵丁等限二年照數製辦歸款得旨此項應賠軍器自應坐扣伊等俸餉製造但索倫等行軍數年甚屬奮勉著施恩應賠軍器從寬免

其扣餉均動官項備造此係朕格外殊恩不得援以為例○又議准黑龍江將軍綽勒多奏稱西北二路撤回兵倒斃馬匹甚多應照原給額數於伊等俸餉內坐扣賠補其陣亡病故各兵應賠馬三百七十餘匹無可著追請豁免從之○壬戌諭據步軍統領衙門奏稱審訊護軍德春蒙固住同將民人李容喚往家內毆打李容並不輸口自行捶打脫衣聽毆一案請將德春等發遣李容充軍其往

救李容互毆之曾文舒枷責完結等語曩時民間有似此不肖之徒早經嚴禁乃德春蒙固住均係滿洲染此惡習情殊可惡而李容一聞德春等呼喚即行隨往脫衣聽毆並不輸口且自行毆打以為好漢情亦可惡德春蒙固住李容俱著永遠重枷遊示各門以為眾戒曾文舒因伊表兄李容被毆入救互相毆打猶與光棍有間應如所奏完結至滿洲等素性醇樸當差勤慎居家節儉且護軍尤

係查拏惡棍之人今漸荒廢騎射清語惟以飲酒奢侈為事已屬不堪且復仿效光棍蹈染惡習此皆該管大臣等不加約束教導之所致著將該管大臣官員等俱交部嚴查議奏將此通飭八旗并於各門堆撥及進班之處偏行曉諭俾眾知之○吉林將軍恒祿等奏吉林所屬兵遇緊急差務因官項不敷支借往往貸諸舖戶認息二三分不等請嗣後遇差而用度不敷者准於庫貯該年錢糧及地丁雜稅內豫行支借仍令本旗本佐領出具保結按應得錢糧酌借年終覈算抵銷再吉林各官向惟白事支借四個月俸請嗣後遇紅事亦准豫借三個月俸得旨著照所奏行○癸亥諭曰永貴現在出差傳森著署理左都御史○以鑲黃旗漢軍副都統官保為刑部右侍郎○甲子諭曰御史呂光亨奏請京員於察典之外照外省督撫分別屬員賢否例令該堂官各行密陳一摺所奏自屬近

理三年舉行京察在部院大臣自無不和東商確詳慎甄別其是否允當亦俱在朕洞鑒之中。惟是該司員等在署服官有目共見其賢否衆著者雖有私心愛憎斷不能不為公論所屈。若其意見參差又不必強同。今令於循例考察外俾得各抒所見以備參考不獨可以校覈人材即大臣之衡鑑公私瞭然可覩於闢門達聰之道不無裨益。但摺內所稱每歲入告未免太繁應定於京察前一年舉

行一次。又部院官屬衆多主事筆帖式等以下尚在造就儲才之列可毋庸列入嗣後具摺密陳自郎中員外以上始著為例其如何酌定章程該部悉心詳議具奏尋議各部院郎中員外以上俱令各堂官詳加察看填註切實考語分一二三等遵旨於京察前一年十月內具摺密奏不得會商附和至內閣侍讀與員外一體較俸陞轉雖秩止六品應由內閣具奏科道由都察院密奏宗人府副理

事官以上由宗人府密奏編修檢討以上由掌院密奏贊善以上由詹事府密奏其坐補原部及在部辦事候補人員應一體列入使知懲勸。盛京各部及內務府

陵寢等衙門凡有員外以上等官者悉照此辦理再京察時到任未及半年者例不填註考語然既在署辦事賢否已約畧可見亦應於摺內聲明附奏其堂官到任未及三月者准展限於本年十二月內補奏至府尹所屬之治中雖係五品然係應陞員外之員毋庸入奏從之。乙丑諭軍機大臣等據陳宏謀奏請陞見已於本月十一日起程一摺殊屬不必摺內已批諭矣現在高晉回南查勘下河諸事朕令其會同陳宏謀一體商辦是該撫現有應辦之事且開歲即屆南巡相見不遠正何必於此時汲汲赴京朕從前所謂言非出於誠亦即為此伊在督撫中尚屬能辦事而生平好名習氣始終未除若從此自知前

改雖遠任封疆不啻日侍左右其遵朕訓誨已多不然即一歲數見亦何益耶伊即來京請訓朕亦別無可訓示之處著傳諭該撫於何處奉到諭旨即回以署兵部侍郎旌額理為鑲白旗滿洲副都統署正黃旗蒙古副都統扎拉豐阿為正白旗漢軍副都統浙江乍浦右翼滿洲協領滿色為杭州右翼副都統鑲黃旗漢軍印務叅領范宜中為西安左翼漢軍副都統成都蒙古協領偉善為西安右翼副都統丙寅諭軍機大臣等據德爾格奏哈密解送羊一千五百隻內實倒斃六百七十二隻解員賠補一百七十隻僅及四分之一現在行文楊應琚永寧等作何賠補等語此項羊隻係解往牧放孳生非專候食用急需趕解者可比到哈密時既屆十月天寒草枯自應酌量於附近處所暫留牧放俟春融再行起解乃並未停歇即行趕送在永寧等不過以羊隻一經出境即與伊等無涉

殊非急公辦事之道至解弁所稱羊隻跋涉遠途不能飽食以致倒斃亦係一面之詞難以遽信著傳諭楊應琚將解弁張文學所解羊隻沿途倒斃實在情節并應作何著落賠補之處速即查明具奏并将此傳諭永寧等令其明白回奏以兵部尚書梁詩正署翰林院掌院學士丁卯戶部議覆直隸總督方觀承疏稱延慶州康熙三十二年間歸併永寧衛協濟學糧銀一百一十七兩零向於每年奏銷冊內開報徵收支用今徹底查明並無實在地糧地方官循舊捐解虛徵虛支已閱六十餘年應如所請豁除糧額從之○山東按察使沈廷芳奏竊惟聖廟明禮追崇於吾道光昌之會儒林配享釐定於斯文炳蔚之辰維曾子列於四配其及門十有二人子襄得大勇之傳陽膚受哀矜之訓公明儀契文王我師之吉公明高推大舜孝子之心孟儀克修厥身姑畧夫邁豆

之事。檀子最善於禮。又纂夫論語之篇。嚴內厲外折之防者。公孟子高也。漂虧體辱身之戒者。樂正子春也。公明宣樂憂並摯。單居離悅學交深。至若沈猶行之從師。雖非述聖公之傳道。溯其淵源所自。同居弟子之行。青簡分標。難統同而予之妥侑。黃流合薦。宜別異而享以苾芬。幸密邇聖人之居。總綿延君子之澤。遐稽夫昔亦越於今。揚公論於寰瀛。湯斌與陸隴其而並重。煥易名之典禮。文正荷

聖天子之隆施。聞曩時疊有臚陳。謂儒流之宜從祀。廼禮臣猶加封駁。指經術之少發明。顧集中屢貽清獻之書。相與析夫疑義。及晚年尤宗晦菴之學。轉涵養乎新知。粹然心得言宣。允矣躬行實踐。請從

文廟同升。行見真儒輩出。得旨增祀之事。議論紛如聚訟。亦無實濟政要。故不為也。○以湖北宜昌鎮總兵田金玉。河南河北鎮總兵吳宗寧對調。○戊辰

上奉

皇太后居暢春園。諭軍機大臣等。昨據沈廷芳請增從祀

文廟一摺。所奏無關緊要。已於摺內批示訓飭矣。身為臬司。自有職任。應為之事。所當實力辦理者。從祀增損。本無裨於實政。昔人紛紛聚訟。已屬無謂。乃撫拾經生家言。連篇累幅。徒為條奏塞責。可乎。國家激勸人才。現在信賞必罰。應之者尚恐不能。捷如影響。況以已往之人。用虛名進退遽望。其轉移風尚。真所謂不揣其本而齊其末耳。沈廷芳向來原有好名習氣。觀此奏可見。積習未除。其平日居官究竟何如。著傳諭阿爾泰令其據實奏聞。如果在任。徒務虛文。不知盡心職業。該撫即行叅劾。毋少迴護。尋奏沈廷芳人本迂腐。自以出身鴻博。每拘牽文義。喜尚虛文。於政事未能實力殫心。且有好名習氣。兼時有疾病。一切察吏明刑。終難望其整飭得旨。既無

大過或可姑容。若實下愚不移。秋間再劾可也。○參贊大臣舒赫德奏。本年派出駐防伊犁健銳營前鋒校一員。驍騎校一員。前鋒三十七名。察哈爾總管一員。佐領一員。兵八十九名。厄魯特兵二十四名。効力之原任總管舍通額等四名。共官兵一百五十八名。照例給馬駝鹽菜銀兩。口糧羊隻。每五人給帳房一架。并軍器等物。又伊犁屯田都司一員。守備一員。千總二員。把總二員。外委把總二員。

兵四百名。其鹽菜口糧等項。與駐防兵同。因伊犁等將來造屋居住。每十人。先給帳房一架。其馱載口糧軍器籽種農具等項。酌給牛駝馬匹。此次官兵及屯田回人俱辦理已竣。派副都統伊勒圖侍衛棟保蘇魯克沁雅賽帶領。自阿克蘇送往伊犁。所有撥往屯田回人戶口什物及護送起程之伯克等職名列單呈覽。報聞。○浙江巡撫兼管鹽政莊有恭疏報。石堰場墾復卅地二萬七千五百十畝有

奇。○已已。諭軍機大臣等。上年舒赫德等辦理伊犁屯田回人起程。朕於回部各城急公協助之伯克等。特命分別賞賚。其回人等蠲免常賦十分之一。令續派回人五百戶。著傳諭舒赫德將急公協助之伯克回人等俱照前例辦理。○軍機大臣等奏。據海明奏。稱舒赫德新柱額敏和卓等。請將阿爾虎之阿奇木伯克布魯特散秩大臣阿奇木。調授塔什密里克之阿奇木伯克。查布魯特阿奇木。現在游牧頗遠。不能兼管。令伊弟前往署理。臣正在留心偵探。至塔什密里克等處。並非要路。阿爾虎自本年八月以來。布魯特吐魯番烏什貿易人等行走六次。若伊等所見過當。又安敢以係臣所管。妄生拘泥。祈勅下新柱額敏和卓嗣後辦事。可否與臣商確辦理等語。欽奉諭旨。交臣等察議。查從前舒赫德咨商新柱以塔什密里克等處。與布魯特接壤而散秩大臣阿奇木係布魯特人。隨臣兆惠

臣富德等實心効力。曾奉恩諭。俟有布魯特接壤之伯克缺出。補授是舒赫德等所奏。原不因布魯特等往來行走之多寡也。今海明因現辦喀什噶爾事務。而新柱等未經咨商。遂行陳奏。未免分別彼此。又有偵探阿奇木之語。似此無故猜疑。更恐滋事。但業經聖明洞鑒。命舒赫德暫往喀什噶爾辦事。候永貴交代海明調赴阿克蘇。應請行文該辦事大臣等嗣後。惟計於公事有益。不可稍分畛域。

得旨。依議。海明著嚴行申飭。直隸總督方觀承。議覆御史七十五奏。稱多倫諾爾糧米。皆資遠販。貿易貨物。較前雖增。而情形與八溝迥別。內地茶布。俱自張家口販往。毋庸重徵。惟庫掄恰克圖各處貿易貨物。及克什克騰木植。其在多倫諾爾售賣者。應如所請一律增收課稅。以杜私販。下軍機大臣等議行。○四川總督開泰。陝西巡撫鐘音。奏四川永寧道張再齡。赴任路過褒城縣青橋驛時。並

無多索夫役。喝打鋪戶之事。惟任聽家人與鋪戶爭鬧。究屬約束不嚴。請交部嚴加議處。得旨。自是御史張大其事。張再齡無大過。可寬也。咨部知之。○葉爾羌辦事都統新柱等奏。葉爾羌和闐大臣官兵等。共二千五百四十七人。所需鹽菜銀。四萬四千八百兩有奇。口糧等項。一萬四千二百一十七石有奇。其葉爾羌徵收普爾錢文。共三萬三千六百騰格。糧石二千八百帕特瑪。又入官地畝收租一

千餘帕特瑪。和闐徵收錢除支用外。共九千零二十五騰格。糧石一千五百帕特瑪。總計二城徵收錢。可作銀三萬零四百兩有奇。放給鹽菜銀兩。仍不敷一萬四千三百兩有奇。但二城糧共五千八百帕特瑪。有奇。以一帕特瑪。準五石三斗。共得三萬零七百四十五石。除支給口糧外。仍餘一萬六千五百二十石有奇。酌照時價。可補銀缺。此外若仍有餘存。即可留為修造軍裝之用。報

聞○庚午。

上詣暢春園。問

皇太后安○還宮○諭軍機大臣等大陳山洋

面匪船掠竊。將兵丁水手載逃一案。已降旨

嚴緝查辦。並令林洛往拏務獲。今據王無黨

摺奏查出。晉江吳添思供知此情。鎮臣若詳

加駁。詰自當逐一供吐。乃不亟推求確情。未

得顯露等語。據林洛摺稱。林洛因該犯吐出

情由。即遴選弁兵押赴根緝。若論辦理。不過

如此。而王無黨所云不亟為推求云云。殊有

歸咎林洛之意。或係該提自因陳奏遲緩。聊

以藉詞卸責。抑或林洛實有查辦濡滯不力

之處。著傳諭楊廷璋。令其詳悉確查。並將此

案匪犯曾否全獲。及現在辦理情形。即行據

實奏聞。尋奏鎮臣林洛於此案發覺後。四路

委員懸賞偵緝。復親出洋巡訪。訪得吳添思

隸籍閩省晉江。在大陳石塘等處。代人守網。

原籍親族來往釣捕者頗多。或可望其探知

蹤影。其實原無証據。是以止令具認指拘。並

非不肯推求。而提臣王無黨以吳添思既肯

具認根拏。必知匪船著落。不計虛實。即行奏

聞。其陳奏遲緩。聞報遽奏之處。難逃洞鑒。臣

仍一面嚴飭沿海各屬。於各島嶼海口。委員

密拏務獲。得旨。所奏林洛之事。自係公論。至

此案何日久尚未緝獲。耶宜速行設法嚴緝。

以靖海面。又諭曰。德爾格奏稱托克三喀

喇和卓等處。空出地畝。賞給吐魯番回人耕

種。已飭交素齊瑞等語。近因安泰奏賞給餘

田一事。經軍機大臣議。以此項地畝。皆官為

開墾。未便無故賞給。應召募附近回人。承佃

想寄信未到。故德爾格照前辦理。今應否向

回人撤出。及作何酌量辦理。著傳諭舒赫德

令其查覈具奏。禮部題。朝鮮國王李昫遣

使表賀。

萬壽冬至元旦三大節。及進歲貢方物。賞賚筵

宴如例。○豁除浙江西路黃灣三場。坍沒漲復沙埕

三千二百三十三丈額賦是月湖廣總督蘇昌奏新任湖北布政使亢保人尚質實本色無外官虛浮習氣言論亦明白直爽得旨所見似之又奏近年動用錢糧及工程報銷各案現已陸續題銷未完者檄飭嚴催勒限完結得旨二十四五等年之案或尚可至於二十一年尚未完之案則太遲矣速即辦完其遲誤之員亦當叅處湖南巡撫馮鈐奏零陵新田祁陽東安定遠耒陽常寧等七州縣奉旨加賑兩個月查賑項例應銀穀兼撥但附近水次州縣倉穀上年已多撥賑餘應存俟平糶未便再撥其相距遠處溪河又艱輓運請於二月內賑錢一次三月內賑銀一次查照前議章程妥辦得旨覽奏俱悉山東巡撫阿爾泰奏東省各屬水利河工臣親往查勘上緊董率以期速竣至汶上縣之何家壩遵旨落低二尺使汶水北多南少其壩下支河兩岸隄埝必須加高培厚庶不漫

溢民田業經相機妥辦其沂州府屬蘭郯境內積窪之區應開之武城等溝河二十五道由江南邳州一帶入運臣逐段履勘飭屬董勸鄉民并力挑濬要工均已報竣得旨可謂盡心乃職殊可嘉也陝甘總督楊應琚奏哈密為新疆南北兩路之總匯所需柴薪向採附近山場暨荒灘所產瑣瑣木今則漸採漸遠離城每至二百餘里商民購買維艱又緣烟戶日繁城內竟無隙地居民堆積柴薪頻遭火患臣聞距城一百二十里之他石克山產有煤塊即飭招商訪採節據採獲煤三十五萬餘觔該處場廣線旺價值自必日平較之柴薪實多省節其各屯防處所亦請一律察勘開採得旨好○兩廣總督李侍堯奏廣東欽州所屬東興街地方與安南所屬砵街相距一河上年十一月有夷匪一二百人至砵街焚屋劫財雖查明並無漢奸附從惟所隔之河本係海汊潮長需船駕渡潮退即

可步涉邊圍重地守禦宜嚴查乾隆五年因交夷內訌曾於龍門協撥兵帶往東興街守護茲仍擬於該協暫撥兵八十名前往貼防又思勒一汛係海口出入要區方擬撥兵防護統俟察看情形再行撤回報聞

實錄卷六百二十九

二十一

大清高宗法天隆運至誠先覺體元立極敷文奮武孝慈神聖純皇帝實錄卷之六百二十九

大清高宗法天隆運至誠先覺體元立極敷文奮武孝慈神聖純皇帝實錄卷之六百三十

監修總裁官經筵講官太子太傅文淵閣大學士文淵閣領事領侍衛內大臣稽察欽奉上諭事件處管理吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領事稽察欽奉上諭事件處管理刑部戶部庫書務世襲騎都尉軍功加十九級隨帶加二級又加二級臣董誥內大臣戶部尚書鎮江蘇州都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆二十六年辛巳二月辛未朔遣官祭

關帝廟○諭軍機大臣等今冬入覲回子前降旨令於年終抵京今思本年十一月恭逢皇太后七旬萬壽聖節入覲回子亦應令其一體叩祝行禮著傳諭舒赫德酌量程途令回子等先期到京○壬申諭各處教習三年期滿引見並無一二等之分惟國子監有之此例徒足開士子捷徑於實政殊無裨益將謂一等者為優則該監之列在二等者初不謂之劣而一則歸本班銓選一則留學以知縣

即用且留學三年。既以知縣即用而又豫為聲明。遇揀發時一體挑選。是名為學校收課士之效。而實為上下其手。啟速化之門耳。於教學用人俱無實濟。嗣後此例著停止。毋復滋僥倖。其如何詳定章程之處。該部定議具奏。尋議。嗣後國子監教習三年期滿。該堂官照各處教習之例。出具切實考語。帶領引見。或用知縣。或用教職。恭候欽定。毋庸分別等第。並毋庸留學三年。其奉旨以知縣用者俱

令歸班候選。從之。○癸酉。

上詣

雍和宮行禮。○臨大學士蔣溥第視疾。○諭前李侍堯題參陸川縣知縣應斯鳴等縱賊害良一本。朕以鄂寶身在粵西。何以毫無聞見。降旨令其明白回奏。今據鄂寶覆奏。巡檢陸廷相受賄縱賊。毫無證據。語多迴護。如果原控情節屬虛。則鄂寶先不當與李侍堯會銜題參。且稱案犯現在正需研審。又何以遽將

事主舉監。徑行咨革。前後辦理殊屬舛謬。鄂寶著交部嚴加議處。此案令馮鈴就近前往查審。定擬具奏。○諭軍機大臣等。前李侍堯題參陸川縣知縣應斯鳴等縱庇竊賊。苦累事主一案。降旨詢問鄂寶身在本省。何以毫無聞見。今據鄂寶回奏。該縣巡檢等並無縱賊受賄情弊。果爾。則從前李侍堯題參時。該撫何以遽爾與該督會銜。且據奏此案人犯現今正需究審。又何以先將事主舉監先行

咨革。種種迴護。案情亦未明晰。鄂寶已交部嚴加議處。並令其來京候旨。著傳諭馮鈴奉到此旨。就近前赴粵西。即署巡撫印務。提齊案犯。秉公詳悉查審。李侍堯原題及鄂寶覆奏摺。俱著鈔寄。其前後矛盾迴護情節。逐細詳察具奏。湖南巡撫印務。即著布政使永泰暫行署理。鄂寶俟馮鈴到粵西。將印務移交。即行來京。馮鈴俟此案審明。即將巡撫印務交布政使葉存仁護理。仍回本任。將此一

併傳諭知之。○又諭內務府護軍統領英廉交辦事件較多著加恩賞給二品職銜。○命廣西巡撫鄂寶來京候旨。以江寧布政使託庸為廣西巡撫調蘇州布政使彰寶為江寧布政使。以內務府主事蘇州織造安寧為蘇州布政使。○甲戌以舉行仲春經筵遣官告祭。

奉先殿

傳心殿

上御文華殿講官暨侍班之大學士九卿詹事等行二跪六叩禮分班入殿內序立直講官四人出就講案前行一跪三叩禮復位直講官伍齡安秦蕙田進講孟子舜明於庶物察於人倫由仁義行非行仁義也四句講畢上宣御論曰明以識事物之理察以盡人倫之詳察雖若精於明然事物原不出人倫之外也處人倫之間而能盡仁義之詳者莫過於舜故孟子曰由仁義行非行仁義也蓋由仁

義行則仁義與已為一行仁義則已與仁義為二仁者安仁無所勉強而所行無非仁能仁而安有不能義者乎知者利仁則是知其為利而行之者其視從容中道由仁義而行渾然無間不待用力者則有別矣易曰同歸而殊途一致而百慮不察於人倫之間而盡仁義之詳者烏足與言內聖外王之道也耶講官暨侍班官跪聆畢興直講官介福劉綸進講周易益動而巽日進无疆二句講畢

上宣御論曰修己治人之道莫善於日新莫不善於自畫動而巽不惟學者作聖之功實王者體乾之德蓋不震動則不能奮發有為不巽入則不能遜志涵養遜志則雖有為而亦不鄰於躁奮發則雖涵養而亦不入於弛以之修己則德崇以之治人則業廣文王之於穆不已周公之無逸作所胥是道也豈徒學問之益云乎哉講官暨侍班官跪聆畢大學士傅恒等奏曰

皇上聖本生安功符健順從容中道盡性至命之原莊敬日強時敏修來之業合天人而一貫措民物而咸宜臣等幸侍

講筵親承

聖訓不勝榮幸奏畢諸臣出就拜位行二跪六叩禮禮成

上還宮賜講官及侍班官等宴於協和門遣官祭

先醫之神○廣西按察使申夢璽以徇庇屬

員降調以河南南汝光道曹繩柱為廣西按察使○乙亥諭曰楊應琚奏請將現在屯所之甘提標左營守備馬得亨調補西寧鎮標中營守備所遺員缺即以西寧鎮屬鎮海營千總趙印補授等語已有旨允行矣西陲新疆初聞屯務方興現住屯兵服勤率作殊可嘉尚況於屯政尤所熟諳遇本處缺出即行補授在該員自必益加奮勉而公事亦屬有裨嗣後遇缺需人應令管理屯務大臣即於

所轄人員內揀選陞用不必移咨該督另行揀補其內地缺出在屯員弁作何與內地應陞人員酌量分缺按次補用之處軍機大臣會同該部詳議具奏尋奏查論俸推陞由兵部通計內外人員具奏至題補保舉則係該督撫辦理自應將內地營伍及屯田人員一體分缺間用方為公當請交陝甘總督嗣後內地應行題補人員缺出務將在屯員弁一體較其資俸淺深行走優劣於本內聲明備查其保舉人員亦宜秉公查辦庶勞逸適均而陞轉有階於屯政尤有裨益從之○賜卹出洋漂溺之浙江黃巖鎮標右營守備張書紳如例○是日起

上以祭

社稷壇齋戒三日○丙子諭朕此次巡幸五臺著莊親王和親王大學士來保協辦大學士鄂彌達在京總理事務其月選之文員內通判州縣等官武員內八旗護軍校驍騎校及

外省送到之補放水手官驍騎校等官弁并年滿千總俱著王大學士照從前之例驗看可傳諭該部知之○兵部議准山東兗州鎮總兵素保奏稱各省運京銀銅鉛等項沿途需兵護送請令本省督撫除照例填給兵票外即於咨行前途各省文內聲明應派兵丁數目以便轉飭僉派押解從之○丁丑祭先師孔子遣和親王弘晝行禮○諭軍機大臣等據五吉等奏稱巴里坤支給官兵口糧由肅州等處運送殊多煩費請將闡展等處出糶糧石及烏魯木齊等處餘糧俱就近雇商人往隻運送巴里坤以備支給等語所奏甚是年來官兵口糧由內地不時運送者亦因巴里坤等處無可接濟耳今屯田收穫既有贏餘即照五吉等所奏辦理仍傳諭闡展烏魯木齊辦事大臣於商駝回空之便酌量雇覓起運○軍機大臣等議奏據內務府大臣和爾精額會同署理綏遠城將軍舒明奏

稱將城內鋪面房空間料估補修為兵房六百八十八間應如所奏於房租銀內動支興工竣後交八旗滿洲都統照每人二間之數派馬甲養育兵三百四十四名前往駐防查八旗滿洲馬甲養育兵額數不甚懸殊每旗應派四十三名擇其成丁有家室者帶本身錢糧發往當差從之○兵部議准原署江西巡撫常鈞奏稱各省文武大吏恭齋奏摺其未蒙賞給奏匣而用夾板者僅以紙袋緘封綾幅包裹奉批之後亦即原封拴縛領回長途往返私啟無難請於夾板之外用紙封固接縫處粘貼本職印花再用綾袱包裹其發回批摺請用兵部印花至奉差官員請於出京時酌量應用印花若干於咨取勘合文內聲明兵部照數給發從之○授和碩怡親王嫡長女郡主塔科爾沁三等台吉敏珠爾多爾濟為郡主額駙○以故輔國將軍永馨子綿銓襲封奉國將軍病休奉國將軍珠隆嗣

子普順襲封奉恩將軍○戊寅祭

大社

大稷

上親詣行禮○詣暢春園問

皇太后安○幸圓明園○軍機大臣等議覆巴

里坤辦事大臣五吉等奏稱安西兵三千五百名現議令於巴里坤城內建造兵房將眷屬一同移駐其哈密所駐之二千兵應裁但查巴里坤現只駐兵千餘除看守倉庫牧場

卡座外所餘兵二三百名又有新建工程及往阿克蘇烏魯木齊等處運送牲畜各役不敷差遣而哈密之二千兵又俱情願留駐請酌量調往巴里坤以供添派各項差役俟竣事仍令撤回應如所請於哈密所駐兵內指派一千名前往從之○已卯諭烏魯木齊等處屯田兵丁不比尋常當差之人僅照例支給口糧恐其不敷食用著加恩於春種秋收之時照例給口糧外每人按日加賞米麵五

合以示體卹○諭軍機大臣等烏魯木齊屯田兵丁已諭於例給口糧之外每人日加米麵五合至伊犁屯田回人亦與綠旗兵丁同事耕作自當一體加恩著傳諭阿桂將伊等應否加給或一二年後視其効力如何再行辦理之處酌議具奏○又諭曰定長等奏去年昌吉羅克倫等處屯田兵三千五百名每二人給馬一匹因哈薩克馬匹不習耕作倒斃將半復以三人給馬二匹為額俟巴里坤

解送牛驢至日仍將馬匹撥回牧羣等語哈薩克馬匹除屯田外無他差遣就令驟難服習亦何至倒斃如許恐有私宰情弊定長等並未查覈甚屬疎忽除馬匹額數照所奏補給外前次倒斃馬匹仍行查覈倘有別項情節即從重治罪嗣後仍宜加意辦理毋致傷損○吏部議覆山東布政使崔應階奏稱各省解送餉鞘有按站行走地方官撥護仍致疎虞者亦有潛行小路地方官不知餉鞘經

過無從防範者。向例文武官承緝處分殊未畫一。應如所請。嗣後係經由大道。仍致刼失者。照定例從重處分。其有解送官潛行小路失鞘者。解官照例革職追賠。其承緝之地方文武官。均止照盜案疎防例議處。從之。○戶部議覆署江西巡撫常鈞奏稱。漢軍之出旗為民者。往來各省。向未定查驗之法。其是旗是民。無由察覈。恐與逃旗相混。應如所請。令該管州縣於入籍後。查明年已成丁者。均各給鈐印手票。收執隨帶。其由京赴各省入籍者。令各該旗給照。至入籍地方。繳銷換給手票。再八旗另記檔案。養子開戶人等。其往來他省經過地方。均干盤詰。應令本旗并各該地方官一體給照備驗。從之。○又議准四川總督開泰疏稱。綿州竈民開淘鹽井二眼。雲陽縣竈竈加產餘鹽八十八萬五千餘觔。應配水引一百三十張。陸引三百十張。請於乾隆二十五年餘引內動給行銷。按例權課。從

之。○參贊大臣舒赫德奏。軍機大臣等遵旨將北路守卡及看閱水草侍衛等減撤二十三員。其所得分例。經領侍衛內大臣等揀選人員遣往伊犁。阿克蘇葉爾羌等處以資差遣。除在途病故二員外。其達春等二十一人擬派伊犁六員。阿克蘇六員。葉爾羌六員。查喀什噶爾亦應派侍衛三員。與軍前年久侍衛等陸續更換報聞。○以故河南儀封縣世襲國子監學正孔繼緒嗣子廣遠襲職。○湖南巡撫馮鈐疏報。巴陵臨湘華容三縣蘆洲新漲地二百五十四頃八十畝。有奇。旌表守正被戕之四川璧山縣民田大朋妻任氏。○庚辰

上奉

皇太后自圓明園啟鑒謁

泰陵西巡五臺 詣

皇太后行宮問安

皇后千秋令節停止行禮筵宴 遣官祭黑龍

潭

昭靈沛澤龍王之神玉泉山

惠濟慈佑龍王之神○軍機大臣等議覆副都統廣成奏請八旗出青馬匹限定倒斃數目一摺查近年八旗出青馬匹俱送至石片子放給打圍兵丁均係兵部奏定額數照額交納倒斃全數完繳恐蒙古等不無拮据請嗣後此項馬每百匹准倒三匹仍照例將耳尾存驗報部如數買補若牧場人等用心牧放並無倒斃且肥壯者將官兵交部議敘倘牧放不善倒斃浮額者該官兵賠補仍照例議處從之○吏部議覆山東布政使崔應階條奏四氏學規制一教授應由撫臣會同揀選查撫臣原有稽覈教職之責請嗣後四氏學教授令衍聖公將揀選人員移送撫臣驗看咨部具題領憑時毋庸重驗一教授不應於貢生內揀選查由附生捐貢者例不選用教職至廩生捐貢與歲貢出身無異陞用教

授原屬合例應仍准與就教之進士及舉人一體揀選一學錄不應止於生員內揀選應如所請嗣後於孔氏歲貢及廩生捐貢與生員現係廩生者一體揀選一學錄陞轉應請明定條例查品級考載四氏學教授由四氏學訓導陞用而四氏學止有學錄其陞轉例無明文則四氏學訓導即係指學錄而言應將四氏學教授定為學錄陞缺並准於六年俸滿時照例一體揀選陞補教授惟品級既較訓導為優不便照各學訓導例陞用各府州縣佐貳從之○又議覆廣東布政使宋邦綏奏稱領憑赴任官員恃有違限三月以上中途取有地方官印結咨報部科亦准免議之例因而繞道回籍或逗留他省虛捏之弊實所難免應如所請如實係中途患病許呈明該地方官驗實具報督撫咨明任所病痊給予印結倘捏稱患病逾限三月以上降二級調用四月以上降三級調用五月以上革

職其率行出結之地方官降二級調用轉詳官罰俸一年至同知以下官員向未定給假省親之例請嗣後實係順道呈請省親者俱照道府例准給假二十日逾限議處從之○以戶部左侍郎吉慶署步軍統領○是日駐蹕黃新莊行宮○辛巳

孝康章皇后忌辰遣官祭

孝陵○軍機大臣等議准御史七十五奏稱多

倫諾爾商賈日衆其由張家口來者已經納稅定議不復重徵其由古北口來者原未納稅恐商販故避納稅繞行古北口請將出古北口及自庫倫恰克圖盛京運至多倫諾爾貨物一體均納落地稅再克什克騰等處木植運至多倫諾爾者該處山近價廉未便照內地例辦理請按大木每根四分小木二分徵納得旨販至多倫諾爾木植均係蒙古等砍運無庸徵稅餘依議○以江南壽春鎮總

兵許成麟江西南贛鎮總兵王綬對調○是日駐蹕牛壁店行宮○壬午

上詣

皇太后行宮問安○諭朕恭奉

皇太后展謁

泰陵乘便巡幸五臺所有直屬經過州縣及山西經過駐蹕地方本年應徵額賦均著加恩蠲免十分之三該督撫即行查明妥協辦理務令農民均霑實惠○是日駐蹕秋瀾村行

宮○癸未遣官祭昭忠祠○諭曰山西太原

鎮總兵丑達在軍前年久著和成前往更換令回原任其直隸宣化鎮總兵員缺著福勒黑調補福勒黑未到任之前著巴爾品暫行署理○所遺湖南永州鎮總兵員缺著黃士俊補授○諭軍機大臣等據阿桂奏副都統伊柱報稱領兵驅逐哈薩克人等所有附近布木察罕烏蘇勒布西等處游牧之哈薩克等俱已遵檄遷移現派侍衛官員查勘額密勒

齋爾塔爾巴哈台等處有無哈薩克游牧相機辦理等語。哈薩克等遵檄即行遷移。尚屬恭順。宜酌加賞賚。以示撫卹。著傳諭阿桂等將遵檄遷移之哈薩克等部落名目查詢存記。伊等有來伊犁貿易者。即行曉示云爾等恭順情形。業經陳奏。奉大皇帝恩旨嘉獎。並加賞賚。嗣後惟謹守本境。不可踰越。仍酌量賞給遣回。○都統侍郎海明奏查乾隆二十五年七月起二十六年六月止喀什噶爾英

吉沙爾二城大臣官兵通事臺站回人共二千二百餘人計需鹽菜銀三萬五千七百兩有奇。糧石雜項一萬三千一百四十石有奇。查二城正項徵收普爾錢文三萬六千四百騰格。作銀二萬六千兩。尚不敷銀九千七百兩有奇。徵收正項糧及入官地畝共糧二萬六千五百餘石。除支給公用外。餘糧一萬二千三百六十石有奇。合之徵收棉花紅花共折價錢二萬八千九百二十騰格有奇。作銀

二萬六百兩有奇。扣抵不敷之項。仍餘銀一萬九百兩有奇。二城所出足敷公用。且有贏餘。可以接濟別城報聞。○是日駐蹕梁格莊行宮。甲申春分朝。

日於東郊遣和親王弘晝行禮。

上奉

皇太后謁

泰陵。未至碑亭。即降輿。慟哭步入

隆恩門。詣

寶城前行禮。躬奠哀慟。王以下文武大臣官員隨行禮。詣

皇太后行幄問安。諭軍機大臣等。據大學士蔣溥奏密查海疆匪民一摺。現在法紀肅清。海疆寧謐。即有一二匪竊犯案。封疆大吏無不奏聞緝治。以示創懲。至摺內所稱奸民結交往來諸弊。諒亦思患豫防之意。第恐有司奉行例禁日久。易弛且偶有見聞。轉慮上官責其多事。或致遲迴瞻顧。不能及時舉發。督

撫等有除莠安良之責濱海要地尤宜殫心稽察固不得狃於無事但博生鎮之名亦不得稍涉張皇以滋胥役擾累一切應防微杜漸慎密經理將原摺鈔寄江浙閩廣各督撫閱看并詳悉傳諭知之○大學士蔣溥奏內閣漢中書向例由進士舉人考取錄用試卷糊名並不易書士子因有筆跡可認易滋物議現屆會試之期請卽於各房薦卷中除中式外擇其文理尚通詩律亦妥者不拘省分查照上次考定名數另填一榜照例帶領引見挨次選用嗣後凡值需人之時令內閣先期咨部照例辦理得旨此奏是該衙門議奏○吏部議覆四川學政陳荃奏稱捐納貢監責成州縣約束其造冊送學之例久經停止教官無憑稽查而失察處分仍與生員一例議處似覺無所區別應如所請嗣後捐納貢監有窩竊唆訟貪頑不法等情將不行查報之州縣照失察平民例議處有心徇庇降三

級調用毋庸將教官查叅從之○是日駐蹕東北岐大營○乙酉賜扈從王公大臣並直隸官員等食○諭軍機大臣等原任按察使圖桑阿自派往葉爾羌以來一切公事頗知奮勉著加恩賞給同知職銜仍隨新柱辦事原任都統富昌派往阿克蘇照管牧羣解送牲隻俱屬奮勉今舒赫德又令其駐劄賽哩木辦事著加恩授為三等侍衛○葉爾羌辦事都統新柱等奏從前副將軍富德等收服沙爾呼勒伯克時查該處原管五百戶舊例每戶徵收黃金一錢後經霍集占等擾亂逃散僅存二百餘戶今漸次安集據伯克穆喇特稟稱情願照舊按戶納金臣等查覈酌定二百戶上年十二月交黃金二十兩貯庫俟本年交收後彙送京師嗣後戶口日增隨時查覈辦理報聞○吏部等部議覆兩江總督尹繼善疏稱江寧添設布政司應照蘇州布政司之例設理問庫官各一員請將常州府

經歷江寧府都稅大使。二缺裁改其安徽布政司移駐安慶舊設之經歷庫大使應隨同移駐至安徽查無倉庫其庫大使一員應仍隸江寧布政使管轄並應分鑄江南江淮揚徐海通等處承宣布政使司之印江南蘇松常鎮太等處承宣布政使司之印理問經歷庫官等印分別鑄給均應如所請至各直省布政使養廉從前各照本省額徵耗羨酌定但事務繁簡不同自宜多寡適均今江寧新

設布政使應給養廉銀八千兩其直隸江蘇兩省原定各一萬兩應各裁減一千兩山東河南福建陝西廣東五省原定各一萬兩應各裁減二千兩山西原定九千兩應裁減一千兩湖南原定八千三百兩應裁減三百兩雲南原定八千四百兩應裁減四百兩至江西原定七千二百兩應增八百兩貴州原定四千五百兩應增五百兩廣西原定五千五百二十兩應增四百八十兩其安徽湖北四

川三省原定各八千兩浙江甘肅兩省原定各七千兩應仍其舊從之戶部議准廣東巡撫託恩多疏稱豐順縣屬東邊角鉛山招商復採礦砂試有成效請准開採照李樹灣之例抽課從之兵部議准閩浙總督楊廷璋奏稱臺灣澎湖三處叅遊都守等官自改例二年報滿調回內地各員以報滿甚易未免希心速代於營務難望整飭請照鎮協大員及文職之例仍定為三年俸滿保題調回

內地候陞從之以故四川松茂道屬水草坪土巡檢蘇文炳孫永盛襲職安南國王黎維禕故嗣臣黎維禕遣陪臣陳輝泌黎貴惇鄭春澍等進本告哀附貢方物下部知之以故安南國王黎維禕之姪黎維禕禰襲封安南國王尋差翰林院侍讀德保大理寺少卿顧汝修往封並致祭故安南國王黎維禕是日駐蹕隆善村大營

大清高宗法天隆運至誠先覺體元立極敷文
奮武孝慈神聖純皇帝實錄卷之六百三十

實錄卷之六百三十

吉

大清高宗法天隆運至誠先覺體元立極敷文
奮武孝慈神聖純皇帝實錄卷之六百三十一

監修總裁官總纂官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加一級尋常加二級軍功紀錄一次臣 廣桂

總裁官經筵講官太子太傅文華殿大學士淵閣領事稽察欽奉 上諭事件處管理刑部主庫事務

世襲騎都尉軍功加十九級隨帶加二級又加二級臣 董誥內大臣戶部尚書鑲藍旗滿洲都統軍功紀錄五

尋常紀錄十四次臣 德瑛經筵講官太子少保工部尚書紀錄六次臣 曹振鏞等奉

敕修

乾隆二十六年辛巳二月丙戌

上詣

皇太后行幄問安○參贊大臣舒赫德奏臣等
同新柱海明額敏和卓等通籌葉爾羌等城
交官正項及入官地畝錢糧足敷公用尚有
贏餘以錢折價可當銀一萬餘兩但回城錢
不能如銀之流通且喀什噶爾等城距阿克
蘇頗遠難於運送若久貯庫恐於回人日用
有礙查本年派往伊犁馬兵三百名來年綠
旗兵一千名俱由各城協助牲隻今葉爾羌

等城有庫貯餘錢應請酌購回人及外藩貿易牲隻即外藩不收錢文亦可購買布疋什物兌換倘牲隻一時不能足額又以餘錢為雇覓價值庶公務辦理裕如而回人益安生業報聞○是日駐蹕五郎村大營○丁亥諭畿輔各屬上年秋收豐稔應徵額賦踴躍輸將惟宣化一郡節年積欠銀糧為數稍多但念該處山多土瘠且二十三四年連值偏災元氣難以驟復若令新舊並徵小民生計深恐未免拮据著加恩將宣化萬全懷安懷來西寧蔚州延慶保安等州縣自乾隆八年以後十八年以前民欠未完改折銀六千三百餘兩地糧銀九千五百餘兩屯糧三萬三千九百餘石概予蠲免以紓民力該督方觀承查明出示通行曉諭並嚴飭各屬妥協經理如有不肖官吏以完作欠侵蝕中飽即行嚴叅治罪用稱加惠黎元之至意該部遵諭速行○諭軍機大臣等厄魯特三等侍衛策

伯克前在軍營甚屬効力今隨永貴於中途病故深可憫惻著賞治喪銀五十兩并查該員有無子嗣具奏請旨○陝西道御史駐朝棟奏主考及內外簾官子弟親族向有迴避之例查鄉試入闈之大臣官員其子弟親族多有本籍可歸不難早為之地惟會試四方雲集數千里外翹首觀光本年恭遇皇太后萬壽恩科會試士子倍加踴躍請將應行迴避之卷一體收試特派大臣秉公校閱其確係可錄者酌擬進呈請旨得旨此奏要譽著該部嚴察議奏○是日駐蹕東都亭大營○戊子
上詣
皇太后行幄問安○是日駐蹕龍村大營○已丑諭軍機大臣等據明德奏甘省錢價現已大平所有湖南湖北每歲各協濟錢八萬串請概停撥解以免輓運之煩等語從前因甘肅錢價昂貴且在辦理軍需之際是以降旨

令川楚兩省就近撥解協濟以裕民用今軍務既已告竣而甘肅錢價又已大平且湖廣距甘遠遠水陸轉運約四五百里計其運腳所費轉多於甘省現在市價自應酌量停止以省糜費著傳諭該督蘇昌及湖南湖北二撫除已經起運在途者仍照舊轉運至甘外其未經起運及原定每歲協濟錢文概行停其撥解可也○戶部議覆貴州巡撫周人驥疏稱古州等鎮營兵糧向由粵西撥運米七千石今准部咨督臣以粵西近年價昂奏請歸黔就近籌辦查各營公糧原可全行折色其餘稍可買食之汎每年請本折各半難買之汎折支三二月不等計共折米四千二百餘石自乾隆二十六年為始每石折銀一兩四錢其應放本色米二千五百餘石令都勻黎平二府屬採買可以全停粵運應如所請分別辦理至所稱如遇歲歉於附近常平倉借放分年買補查常平原以接濟民食倘兵

米亦准借放漸至倉額有虧應令委員赴近省買足補放不得動支倉穀從之○舉行乾隆二十五年大計直隸不謹官二員浮躁官一員罷軟官二員才力不及官三員年老官十四員有疾官二員直隸河員才力不及官二員奉天年老官二員山東年老官三員有疾官一員才力不及官二員罷軟官一員河南不謹官一員罷軟官二員年老官二員有疾官三員浮躁官一員浙江不謹官三員罷軟官一員浮躁官二員才力不及官六員年老官五員有疾官二員江蘇不謹官四員罷軟官二員浮躁官五員才力不及官四員年老官二員有疾官二員安徽才力不及官六員年老官九員江南河員才力不及官二員年老官一員有疾官一員浮躁官一員

河東河員才力不及官一員年老官二員有疾官一員湖北不謹官一員罷軟官二員年老官四員有疾官三員才力不及官一員浮躁官一員湖南不謹官一員才力不及官三員年老官五員有疾官三員廣東不謹官二員罷軟官一員年老官四員有疾官一員浮躁官一員廣西才力不及官二員年老官一員有疾官一員福建不謹官二員罷軟官一員年老官三員有疾官三員才力不及官二

員四川不謹官三員年老官五員有疾官四員才力不及官三員雲南才力不及官一員浮躁官二員不謹官二員年老官二員有疾官三員貴州不謹官一員罷軟官一員年老官一員有疾官一員分別處分如例○旌表未婚守節之滿洲正白旗護軍格通額聘妻舒穆祿氏○是日駐蹕王快大營翼日如之○庚寅吏部議准巴里坤辦事大臣五吉等奏稱巴里坤脫逃各犯情罪不同承管官員

限緝處分亦應區別請嗣後在配脫逃者應以脫逃之日起扣限百日追捕無獲將專兼統轄各官查叅仍限一年緝拏不獲查叅如係尋常罪犯及攜帶妻子脫逃者照例二叅議結其情罪更重者於二叅限滿後再限一年不獲照重罪流犯之例分別議處數案人犯同日脫逃仍照例併案叅處至隣境官弁拏獲巴里坤逃犯應准於審明報部之日按照名數起數分別議敘從之○辛卯

上詣

皇太后行幄問安○諭朋楚克旗護衛巴哈圖爾糾合六七十人行劫李二海等將伊等殺害尸骸掩埋情殊可惡彼時綽勒多即應親赴該部落會同該盟長緝犯審辦乃並未親往徒動文移互相推諉遲至數載未能結案殊屬非是綽勒多著交部查議現在副都統諾木琿赴翁牛特等處審辦事件著將此事交諾木琿由彼馳驛前往車臣汗會同盟長

嘛呢巴達喇該部落副將軍德木楚克將案犯逐名查拏從重治罪以為頑惡者戒再蒙古扎薩克與封疆大吏互相推諉殊為惡習蒙古人等俱有現成弓箭鳥鎗最易糾眾行劫若尋常竊盜案件人數無幾尚可循例咨提審辦如糾集搶掠至二三十人之多該處將軍大臣即應親身前往會同該盟長扎薩克等擒拏審辦勿使一名漏網嗣後如遇有此等事件附近將軍大臣等如不親身前往會辦著該盟長即報部轉奏若該盟長扎薩克推諉或至稽遲著將軍大臣等即行叅奏治罪將此傳諭沿邊將軍大臣及眾蒙古喀爾喀扎薩克等知之○又諭理藩院奏請安來京之厄魯特公巴桑扎薩克台吉阿布達什於回游牧時行抵塔山三義廟地方俱因出痘身故等語公巴桑台吉阿布達什著各賞銀一百兩交綽勒多於該處銀兩動支給伊家屬收領伊等應襲之爵即著揀選奏補

嗣後該處請安人員其未出痘者不必來京俱著由蒙古地方前赴熱河朝覲將此曉諭眾厄魯特等知之○是日駐蹕法華村大營○壬辰諭軍機大臣等前據德爾格奏稱哈密解送羊隻在途倒斃六百餘隻當即傳諭楊應琚等令將解弁張文學所解羊隻沿途倒斃實在情節查明速即具奏今據永寧等奏稱千總張文學自哈密起程由臺站行走四站後乃由戈壁取道前往倒斃六百餘隻直至今年正月始到關展等語此項羊隻由哈密解送開展計程共祇十一站何不可行而必取道戈壁且戈壁較站路更近一日之程何以遲延至二月之久究係逗遛何處且前行四站所倒僅三十隻而後此六站轉倒至六百餘隻之多其中顯有偷賣匿飾情弊著將張文學革職拏問交與該督楊應琚嚴審具奏不可稍有瞻徇務得實情○是日駐蹕大教場大營○癸巳

上詣

皇太后行宮問安。遣官祭賢良祠。吏部議廣西巡撫今來京候旨之鄂寶應降三級調用。得旨鄂寶著降三級調用。兵部議覆御史呂光亨奏稱驛站向設驛丞經各督撫議定裁留錢糧馬匹統歸州縣管理臣典試粵西馳驛湖北湖南粘貼印花時有用驛丞巡檢印記者辦理殊未畫一等語查各省酌留之驛丞及分駐之巡檢如果不與驛站之事自不必仍留管驛之名但州縣距驛遠近不同若概裁驛丞令州縣粘貼印花恐各省情形不同應請通行各督撫將所留驛丞應否裁汰或改設巡檢之處詳議具覆至所奏擺站徒犯係州縣撥驛服役而偶爾脫逃即以驛丞巡檢為專管官州縣為兼管官處分輕重未協應發配在城驛站交州縣就近管束之處亦請令各督撫一併議覆從之○刑部議覆廣東巡撫託恩多奏稱凡繼母戀姦情

密因前妻之子女有礙姦夫往來起意謀殺或暗令姦夫下手以獲罪於夫義絕應離之婦仍冠以繼母名分止科以故殺子孫律擬徒其致令本夫絕嗣者方擬絞抵似未允協請不論本夫有無子嗣悉照凡人謀殺人造意加功律分別定擬斬絞監候等語查律無以母償子命之法故繼母罪止加生母一等擬徒惟致令絕嗣者始擬絞首非以償子之命重在絕夫之嗣也若竟如該撫所奏悉照

凡人定擬在姦婦因姦造意謀殺其子實屬兇淫因為情罪允協其有姦夫造意姦婦被脅勉從者姦夫已擬駢首又將繼母與凡人一律擬絞揆之各律所載期親總麻尊長謀殺卑幼為從俱得減等擬流而繼母轉與常人無別殊與辨尊卑之義不符請嗣後繼母因姦將前妻子女致死滅口如姦夫起意本婦為從而其夫尚有子嗣者仍照謀殺卑幼為從律科斷若係姦婦起意本夫已故者不

論有無子嗣亦照毆故殺前妻之子致令絕嗣例擬絞監候從之○叅贊大臣舒赫德奏穆素爾嶺有塔木噶塔什噶克察哈爾海二臺較各臺差務繁劇所有臺站官兵酌擬一年更換以應陞之缺陞用其委署筆帖式於涼州莊浪駐防官兵內挑選綠旗兵由陝甘各標營派出但現屆更換之期請暫調阿克蘇滿洲綠旗兵前往來年更換官兵應於班期前三月到臺學習行走其哈密至回部各臺站官兵定為二年更換仍回該處操防又各處駐劄大臣有字識差遣等兵亦請二年一換照例於甘肅涼州等處選派於班期之前學習其換回各兵行文本處量加獎賞得旨軍機大臣議奏尋議軍營所設臺站酌量繁簡隨時增減移撤則更換之期未便定以年限如繁劇之地或一年或半年更換一次俱屬可行現在伊犁及回部各城滿洲綠旗甚多臺站差務乃伊等奮勉之路令其更換

行走本屬近便或有在軍前年久應行更換者亦可隨時奏報將京師滿洲及陝甘綠旗兵再行選派以均勞逸所有涼州莊浪滿兵及陝甘綠旗兵丁分年派出之處應毋庸議其換回官兵議敘陞用或量加獎賞等事應如所奏辦理從之○以翰林院侍講蔣楙充日講起居注官○議敘擊勦和卓木霍集占得功之一等散秩大臣鄂齊爾等六十四員二等委署前鋒叅領官明等七員三等前鋒叅領委署翼長那進泰等八員分別給予功牌有差○是日駐蹕臺麓寺行宮○甲午諭刑部審訊製造庫被竊金兩一案將看庫披甲德義等擬以杖徒完結所辦甚屬錯誤庫金被竊所關綦重非將正犯務獲治罪無以示儆披甲德義等身司典守本難辭責且安知其非即偷盜之人自應悉心根究不得徑援不能覺盜之律減等發落况律條所載亦必其已獲正犯審明治罪始可將值更者以

不覺盜減罪三等今正賊並未得實亦應將玩誤之人圈禁追詰仍一面根緝正犯方為允協乃僅以並不知情一語草率完結而緊要案件轉籍通緝卸責可乎向來偷盜重案多致懸擱莫結未必不因此等辦理因循釀成也著將德義等嚴行監禁不時設法訊問並移行步軍統領及五城順天府各衙門嚴加躡緝俟獲有正賊再將伊等按律治罪刑部堂官著傳旨申飭○諭軍機大臣等據伊勒圖等奏稱解送伊犁屯田馬牛駝隻令都司觀德守備王成學加意牧放乃所送五百四十九隻倒斃二百有奇其餘亦多疲乏請將觀德王成學交部嚴加議處並將臣等一併議處仍著落賠補等語損傷牲隻過多乃該解員等牧放水草不得其宜之所致與伊勒圖等無涉至阿桂據觀德所報即撥給馬匹接濟更屬辦理妥協著將觀德王成學交部嚴加議處餘俱不必處分○陝甘總督楊

應琚奏肅州威魯堡安插吐魯番回人現有二百五十戶一千五十餘名口承種熟地一萬五千三百六十餘畝戶口日增地畝有限伊等聞爪州回人遷回故土其年老者亦有思歸之意臣前晤額敏和卓亦云願接濟口糧帶回安插擬即於本年秋收後令該千戶瑚如拉等帶領仍委員照看起程送至哈密并先期知會吐魯番公素賚瑞前來接濟其所遺地畝招募承種於內地民生亦有裨益

得旨軍機大臣議奏尋議肅州所住回人自雍正四年內附

世宗憲皇帝賞給安插不徵賦稅至乾隆二年生齒日繁又賞可耕荒地減半給籽種農具但所有戶口較初附時已增一倍自當籌畫久長今西域蕩平吐魯番已成樂土且可耕之地尚多應照爪州回人例准回故里但所奏知會額敏和卓之子素賚瑞之處臣等愚見該千戶瑚如拉之祖托克托瑪木特與厄

閔和卓俱被準夷凌虐。先後來歸。今既遷回。應交該督等酌量附近闢展之吐魯番。可以耕牧之地。於今年秋收後遷往。並即於千戶。珞如拉百戶。厄閔和卓三人內。揀選一員。授為伯克。以一員副之。將來賦稅。即由闢展大臣徵收。至沿途照料。交該督妥辦。從之。○是日。駐蹕菩薩頂行宮。至丁酉。皆如之。○乙未。遣官祭

歷代帝王廟。○賜扈從王公大臣。並直隸山

西官員等食。○諭朕恭奉

皇太后巡幸五臺。一切供頓。俱頒自內府。絲毫。不以累及閭閻。而除道清塵。未免有需民力。所有山西省經過及駐蹕地方。本年應徵額賦。前已降旨蠲免十分之三。更念五臺一縣。治當臺地。恩施宜渥。著將乾隆二十四年該縣未完民借緩徵常社義三倉穀一千四百餘石。乾隆二十五年民借常社義三倉穀四千三百餘石。通行豁免。其各屬二十四年夏

秋偏災之石樓。陽曲等州縣。緩徵各年舊欠銀三千一百餘兩。糧五萬一千八百餘石。穀八百餘石。亦悉予加恩豁免。至夏秋偏災。案內蠲剩應分年帶徵二十四年分銀一十九萬四千四百餘兩。並著加恩蠲免十分之三。該撫鄂彌查明出示曉諭。嚴飭屬員。妥協經理。務俾小民均沾實惠。用示朕愛養黎元有加無已之至意。該部遵諭速行。○丙申。孝昭仁皇后忌辰。遣官祭

景陵。○丁酉。

上詣

皇太后行宮問安。○諭會試士子。由舉人而拔為進士。衡鑒之司。較鄉闈倍宜慎重。適閱該部請派同考官一本。所列率多考鄉試主考。時列在三等未用。及向不知名。聊且充數之員。雖例載黜過試差及曾充房考者。俱不開列。似屬公道。而不知其實為典校者一大弊端也。蓋鄉試簡差。皆迴避本省。其在籍子弟

親屬仍可入場邀中。若禮闈房官定例子弟均應迴避。其託故扣除者。想已不少。而又公然以為格於例。不復開列。獨留劣等數人。俾以掄才。安望春闈之得佳士哉。且鄉試既不礙桃李之收。而會試又可邀宗族之中。將世所稱名實兼收與孜孜為利。孰有甚於此者乎。即如駐朝棟甫有請去迴避之奏。而分校已不列名。是平日之自號讀書。方欲立朝持人短長。而顧身蹈猥鄙之見。不以為恥乎。嗣

後凡遇會試。著將考鄉試等第全單。隨本呈送。以備檢派。庶於重文衡杜迴避。兩有裨益。并將此通諭考官。舉子並知之。○諭軍機大臣等。前據御史駐朝棟奏。請將今科會試迴避舉子。另行考試一摺。事屬要譽。已降旨該御史交部嚴察議奏矣。著傳諭熊學鵬。將凡應行開列總裁大臣。及內外簾執事各官。應行迴避之子弟親族。逐細查明。開具清單奏聞。○吏部議准雲貴總督愛必達貴州巡撫

周人驥疏稱。雲貴兩省五年俸滿之道府同知。通判州縣各缺。請照湖南之例。於俸滿時查明才守兼優者。保題以陞銜留任。俟再滿三年。察其政績卓著者。題請陞用。從之。○戊戌賜扈從王公大臣並直隸山西官員等食。○軍機大臣等議。覆山西巡撫鄂弼鹽政薩哈岱等奏。籌辦鹽務事宜。查河東自鹽池被淹後。產鹽不敷配運。成本日重。商力難支。以致引多課缺。運商視為畏途。民食亦不能接

濟。鹽池近雖漸涸。而收刮新鹽。必不能遂敷舊額。應如所請。將二十五年額引三十六萬餘道。寬至來年六月清繳。俾得漸次疏銷。其續增餘引十四萬道。內准暫停領七萬道。俟將來旺產暢銷。酌量增復。再現在鹽觔成本每觔較從前定價後。增銀六釐。有零。是民間一觔之鹽。已虧商人六釐之本。若於定價內照數加增。又恐民間食貴。亦應如所請。每觔加價一釐。俾商人於成本之外。少獲錙銖。分

之雖少。積之則多。俟三年後。如果場價平減。奏明裁刪。從之。○又議覆署綏遠城建威將軍舒明奏稱。大青山之哈爾吉勒等十五峪地方。乃土默特蒙古喇嘛等祈福之山。且六十二位領蒙古官兵歸化城之七處喇嘛等。牧獵滋息。及綏遠城之八旗滿洲官兵演習射獵。牧放官駝馬要地。該處辦事大臣屢請封禁。將私收地租之蒙古治罪。偷種之民人驅逐。積年總未辦妥。今鄂弼欲將山內蒙古牧場三百餘頃。准原私墾之民承種。租銀分賞蒙古。惟是此項租銀無多。土默特之無業蒙古喇嘛甚衆。勢難徧給。且偷種之田。散在十五峪中。窮鄉僻壤。恐有奸宄藏匿生事。現據土默特叅領三扎布等呈稱。情愿於納穆爾扎等處。換給未墾地三百餘頃。與民墾種。酌定年限徵租。似屬可行。其蒙古等應徵額糧。仍令照舊交納等語。查哈爾吉勒地方所居百姓。豈皆私往遽占蒙古牧場。必係蒙古

希冀獲利。募佃取租。若如三扎布所請。將客民全行移赴納穆爾扎等處。恐哈爾吉勒不過徒存一牧場之名。一二年後。仍復圖利招耕。且驅現住之民。盡令移徙。棄數十年所墾熟田。赴納穆爾扎另墾。不特無裨生計。移撥亦殊不易。其應否指地換給。抑或嚴立章程。仍留耕種之處。請令鄂弼舒明查明妥議。得旨。此事著兆惠馳驛前往。會同鄂弼舒明查辦。○賞原任吏部侍郎田懋之母扁額。級正

○是日。駐蹕臺麓寺行宮。○己亥。清明節。遣

官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○

上詣

皇太后行幄問安○諭從前兩次巡幸五臺帳

殿周廬隨常頓宿今春恭奉

皇太后前詣臺山巡撫鄂弼於菩薩頂側建蓋

行宮並於臺麓寺旁添設坐起數楹以備安

憩雖臣子之誼各盡其誠而詢其工料所費

乃出自伊等養廉夫朕既不許派累百姓而

各官養廉原為辦理公務及薪水之資今以

之捐建行宮則甚不可著於存公項內撥賞

銀二萬兩以供鳩工飭材之用○吏部等部

議准調任河南巡撫胡寶瑤疏稱郭店亢村

博望林水保安五驛均距縣城四五十里

不等請將五驛驛丞均令兼管巡檢事務並

分別換給條記從之○戶部議准山西巡撫

鄂弼疏稱綏遠城搭放兵糧積年借動城倉

豫備軍需穀四萬八千九百餘石均未買補

目下市價漸平請動支地丁銀給該同知於

歸化城及薩拉齊地方乘時買補從之○以

故湖南添平所世襲千總柳宏道子河圖世

襲把總文國學子顯舉襲職○蠲免山東濟

寧州蘭山郟城二縣乾隆二十五年水災額

賦○豁免渡黃漂沒之江西安福所幫旗丁

曹伏受船糧一千石有奇並卹淹溺副丁如

例○是日駐蹕大教場大營○是月署兩江

總督安徽巡撫高晉江蘇巡撫陳宏謀勘議

尚書嵇璜奏請於邵伯運河東岸之金灣淤

壩下開挖引河一摺查金灣壩上承諸湖之

水為歸江要路緣壩下引河仍應入金灣六

閘宣洩不暢易至於阻應如所請另開新河

一道俾減下之水由董家溝直捷注江又董

家溝石羊溝廖家溝三壩均歸江尾間現在

壩底尚高亦應如所請各改低三尺與芒稻

西閘之底相平臣等復查金灣壩舊祇寬四

十丈不獨壩面覺小形勢亦覺背流請於壩北展寬十丈以順其吸川建瓴之勢又迤下東灣西灣舊設滾壩兩座減洩湖河之水直注石羊溝歸江緣西灣壩下引河僅長二百二十餘丈即與東灣河合非特水壅不流且阻東灣之水倒漾出運應將西灣壩下引河取直加挑三百二十丈至太平橋始與東灣水合其董家溝壩舊祇十八丈應展寬十二丈石羊溝壩舊有耳閘兩孔應將磯心拆去

即以閘牆為滾壩裏頭舊壩只三十二丈應展寬五丈四尺廖家溝壩口原寬十六丈連年刷寬二十八丈應就現寬丈尺於東牆修建裏頭共寬四十四丈各壩既經改低又復展寬其壩下引河凡有高仰淤灘積土酌量水平一律挑切寬深得旨諸凡皆妥如所議行○又議覆侍郎錢汝誠條陳高寶甘泉西鄉一帶低窪地畝豁免錢糧改輸蘆課一摺查江南各州縣下游地方頻遭水患低窪田

畝積潦難消徒有賦課之名而無徵糧之實與其常年報災致啟無知業佃望賑之端不若豁減糧賦使民各知久遠謀生之計但查錢汝誠所奏僅指高寶甘泉三州縣係在運河西岸其東岸極窪之地及淮徐海各屬濱臨湖河逼近海蕩之田亦復不少現在確勘情形詳察累年報災輕重或應減則或應豁糧指示各地方官分別辦理其雖經涸出祇可栽植蘆葦者即照該處科則折算安省之鳳泗等屬亦一律飭查勘辦得旨好詳籌妥辦為之○江蘇巡撫陳宏謀奏常熟縣福山地方為江海出入要口由福山塘河抵縣三十餘里兩岸支河港汊七十餘道潦則積水由此出海旱則引海水入河分資灌溉祇因海潮帶河而入漸致淤積淺阻該處工段綿長請借項於汛前興工按年扣徵還款得旨如所議行○浙江巡撫莊有恭奏杭州府屬之東西兩防塘工自上年霜降後江流弱小

不能衝刷南沙。以致逼溜北趨。將北岸漲沙刷卸。現在西塘境內之翁家埠老鹽倉馬牧港一帶。刷去老沙。自三十丈至一百三十餘丈不等。東塘境內自胡家兜以下。新漲沙塗被刷無存。其南岸漲沙。自蜀山西至文堂山脚。河寬五百丈。至九百七十丈不等。又巖峯山脚漲沙之外。復起中河一道。寬二百餘丈。其文堂山西脚中河一道。寬長丈尺。較上冬又有加增。逼溜日益向北。幸本月上游各屬

連得透雨。江水迅駛。足抵潮頭。將來江流旺發。南沙日漸衝刷。仍可期掣溜向南。惟是北岸與巖峯斜對之老鹽倉。為柴石兩塘交接之區。雖直出老沙。尚有一千八百餘丈。而自柴塘頭斜向東南。抵潮溜埭灣處所。僅寬二百七十四丈。細察情形。大潮由海寧城外逼於蜀山脚外。滙溝東北。新漲陰沙。潮頭由曹殿盤頭折向西北。則老鹽倉實為潮溜頂衝。該處柴塘停修十有六年。今去埭灣處所。不

及三百丈。自應先事豫防。現飭屬採運柴薪。並購辦椿木器具。豫解工所。以資搶護。得旨。覽奏俱悉。○湖廣總督蘇昌奏。湖北按察使沈作朋。委署布政使事。雖勤慎自持。而一切未能展拓。循謹有餘。振作不足。得旨。卿可傳旨申飭。彼在軍機處。非不能辦事。今至外任。即圖安逸。是不能承受朕恩矣。若再不改。即行叅奏。○陝甘總督楊應琚。議覆署陝西提督額爾額條奏。軍前隔營挑補兵丁事宜。一

摺查綠營辭退兵內。如有復挑補名糧者。例作新兵。惟是陝甘兩省綠營兵。派往軍營。暨留駐屯防者。遇有缺出。步拔馬。守拔步。不論營分。通融辦理。但營分隔遠。不特眷屬支領糧餉。跋涉維艱。即該兵回營。或以父母年老。或為家室所累。未能遠離。又不得不以本營及附近糧缺。酌予改補。若竟作新兵造報。似非優恤之意。應如所請。凡軍前効力兵。隔營改補。其原食錢糧年分。暨効力行走之處。准

予統算得旨著照所請行。○又奏西陲大功告成軍需奏銷事竣後蘭肅兩局即須裁撤嗣後口外各處每年採辦收支一切經費錢糧請令口外辦事大臣查明款案造冊移交督臣轉飭甘肅布政使確查會覈題銷得旨如所議行。○又奏安西以西各站塘遞馬歲需豆六千餘石由肅州採運需費不貲即安西以東支領折價各站亦因向不產豆購運頗費周章查該處氣候漸暖可以試種豌豆現於倉貯豆內擇堪為籽種者一千三百餘石借給淵泉敦煌玉門等縣農民廣為試種俟有成效即可將額徵之糧酌改豌豆而塘運馬料亦可就近撥支無須由肅輓運得旨甚好。○甘肅巡撫明德奏巴里坤等處遣犯遇有脫逃地方官自應上緊查拏無如甘省幅員遼濶稽查稍疎即難免其透漏惟嘉峪關為內外往來咽喉盤詰最易但兩旁土築邊牆年久殘缺請動項粘補完固撙節辦理

嗣後再有逃犯審係由關度越者將嘉峪關游擊嚴加議處得旨所見甚是如所議行。○雲貴總督愛必達奏安南國沙匪郡尋即滾尋越入內地滋擾前經移咨該國王迅飭興化鎮目丁文坦督兵圍拏一面檄飭開化府及鄰交之臨安廣南二府文武員弁親至壩灑邊界巡查堵禦並委員豫備牛羊等項酌量犒賞查郡尋嘯聚上游地面結連匪黨賊城堅厚各路俱有礮臺又築水城周圍俱挖壕溝節經丁文坦用攢牌車輪火攻燒燬水城現在齊集各路先鋒會議攻破卡道即可進逼賊巢報聞

大清高宗法天隆運至誠先覺體元立極敷文
奮武孝慈神聖純皇帝實錄卷之六百三十一

實錄卷之六百三十一

奉

大清高宗法天隆運至誠先覺體元立極敷文
奮武孝慈神聖純皇帝實錄卷之六百三十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務管理
吏部理藩院事務正黃旗滿洲都統世襲騎都尉軍功加七級隨帶加一級尋常加級軍功紀錄次 吏部
總辦官經筵講官太子太傅文華殿大學士文淵閣領閣事稽察欽奉 上諭事務管理理部 部 庫事務
世襲騎都尉軍功加九級隨帶加二級入加二級 吏部 吏部尚書鑲黃旗滿洲都統軍功紀錄次
尋常紀錄十四次 吏部 吏部經筵講官太子太保工部尚書紀錄六次 吏部 吏部尚書鑲黃旗
敕修

乾隆二十六年辛巳三月庚子朔諭前因甘

省軍務未竣且歲事尚屬歉收所有免死減
等發往巴里坤安插之犯暫行停止以免兵
役押解及沿途口食之繁今大功已經告成
該省年穀時熟新疆屯田收穫亦為充裕自
應仍照前例改發俾投諸遠方者既得力耕
自給而腹地匪類亦可日就減少不致漸染
居民此舉實為兩得惟從前所議條例為數
稍多著軍機大臣會同刑部堂官詳覈各犯
案情酌量刪減著為定則奏請通行尋奏前

議發遣人犯各就其罪名相等列款請發條例未免稍多。茲會同詳覈擇其桀驁難馴。屢懲屢犯。如強竊盜賊。及搶奪發塚兇徒等項。漸染甚易。馴化又難。請照原議發巴里坤給種地綠旗兵丁為奴。其餘仍依各犯本律應配地方。分別充配從之。○是日駐蹕法華村大營。○辛丑

上詣

皇太后行幄問安。○諭據明德奏嗣後巴里坤

逃犯請於拏獲本省地方審明正法。不必遠解甘省一摺。所奏甚是。前於直督方觀承摺奏拏獲巴里坤逃犯王燈山一案。曾降旨令就本處正法。不必再行解甘。而各省辦理並未畫一。此等匪犯原屬去死一間之人。乃復悍然脫逃。恐不畏死。即解至甘省亦法無可緩。而長途押解易致疎虞。且徒滋兵役派送往返之繁。嗣後凡有發遣巴里坤等處逃犯。經原籍及路過省分盤獲者。一經移訊明確。

即由各省督撫自行奏聞。於拏獲處所正法示衆。以省弊累。○諭軍機大臣等據熊學鵬奏到應行開列總裁等官迴避舉子清單。現已留覽。第昨所派司衡各員多有不在開列之內者。著再傳諭熊學鵬令於入簾之日。按照所派各員將應行迴避舉子逐一查明。速行開單再奏。○都統侍郎海明奏二月十五日據駐卡人員報稱。住阿賚之希布察克布魯特額穆爾比遣人呈稱。前隨侍衛托倫泰同布拉呢敦等攻取葉爾羌。後聞布拉呢敦欲相殺害。因率四百餘戶逃往安集延。續知大兵平定回部。願率所部來歸。適與伯克額爾德尼有貿易之約。遣弟阿瑞前往。忽為所拘。今決意歸誠。懇請指地游牧等語。臣准其代奏。并賞給來使羊隻口糧。仍詢公噶岱默特。散秩大臣阿奇木。俱言情節屬實。擬將來使穆魯特與輪班入覲之伯克等同行報聞。○是日駐蹕王快大營。○壬寅。禮部議覆大

學士蔣溥奏請定考試中書之例一摺。查考取中書。閱字與閱文並重。既係本人書寫。不無跡涉嫌疑。今據奏稱。於會試薦卷中挑取事屬可行。但考官所校。僅在文義。似未可以場中所取之數。概行授官。應請不拘省分。以四十名為額。再備取二十名。隨同新進士引見。恭候欽定。再中書若專用舉人。遇會試之年。恐俱願入闈應試。辦事必至乏人。應於新進士引見時。請酌用數員。與舉人中書一體補用。從之。○湖廣總督蘇昌疏。報建始縣勸墾中則地六頃七十畝有奇。○豁免渡湖漂沒之江西南昌衛前幫旗丁海鐵裏船糧一千一百石有奇。並卹淹溺水手如例。○是日。駐蹕楊家莊大營。○癸卯。

上詣

皇太后行幄問安。○諭前周於禮參奏永寧道張再齡在陝西青橋驛多索夫役。喝打鋪戶一摺。彼時以御史奉差回京。意在建白。或屬

一面之詞。適高琦自川赴京。陛見。隨便詢及。據稱在途所聞。言之鑿鑿。是以令軍機大臣傳旨。詳細詢問川陝督撫。令其確查具奏。及開泰。鐘音等先後奏到。實無其事。復令高琦據實回奏。乃伊覆奏。遽稱索夫喝打之事。實係在伊途過之後。並未聞知。特因天威之下。中心畏懼。奏對未曾明晰等語。試問高琦如果無所聞。或到京後始知其事。即據實陳奏。朕豈加之責備。何必掉此大謊。且朕若非因

高琦所奏。又何必詢問鐘音。開泰耶。即此可見高琦之漢軍浮滑習氣。深屬不堪。著交部嚴察議奏。尋部議上。得旨。高琦本無勞績。祇因其在武弁中年久。是以用為總兵。然歷任以來。未見其格外効力之處。今於此等無關輕重之事。偶爾詢及。輒敢於朕前掉說。設遇伊任內緊要重務。亦復如此。率意妄陳。豈尚可膺專閫之寄。漢軍浮滑習氣。甚屬不堪。高琦著照部議革職。○諭軍機大臣等。阿桂奏

稱遵旨傳諭厄魯特侍衛碩通來京挈眷於伊犁居住。據稟情願乘時効力。俟將來再行挈眷等語。碩通在軍前宣力有年。不以挈眷為急。甚屬可嘉。著加恩授為頭等侍衛。仍聽其隨便來京。○又諭據吉慶奏。拏獲竊賊張大。即張鬍子等六犯。交送刑部嚴加審訊。查案計賊。分別定擬等語。此等皆係積匪猾賊。與尋常穿窬者不同。計案自二三次至七八次不等。且有充徒遞回。仍挾軟梯小刀。賊具累累。以視強盜執杖。僅屬一間耳。若第就案計賊。分別定擬。則就數案之中。取一案賊數最多者。科斷。轉為伊等避重就輕之地。未免寬縱。著傳諭刑部堂官。將所有現獲各賊。統其行竊賊數。積累科算。定擬罪名。俾匪徒知所懲儆。○軍機大臣等議。覆葉爾羌辦事都統新柱等奏。稱葉爾羌乃回疆大邑。共二十七城村。魚之安集延布魯特教漢瑪爾噶朗巴達克山。博羅爾等部落之伯克。遇有事件。

皆遣人前來與臣等商酌。土伯特安集延。商賈亦雲集往還。行旅衆多。現在居民夾雜。竊恐奸宄藏匿。請照哈密吐魯番一體編立保甲等語。查從前安西吐魯番等處回部。編立保甲。究以附近內地。尚易仿行。今葉爾羌喀什噶爾等城。乃新定之區。可否照內地一體編立保甲之處。必須體察回民情性。熟酌地方情形。始為有益。今舒赫德總理回疆事務。請令會同新柱。額敏和卓等悉心妥議具奏。從之。○是日駐蹕樺皮村大營。○甲辰。諭軍機大臣等。據楊應琚奏。張文學倒斃羊隻情由。及將所倒羊隻。令不行留牧之永寧淑寶等名下照數賠補一摺。此奏似屬不實。前據永寧查奏。該弁於行走四站之後。輒由便道行走。以致經由戈壁。倒斃過多等語。業已傳諭楊應琚。令其嚴行查辦。該督具摺時。想尚未接到。總之自哈密至闐展。不過十一站。若云經過戈壁。並無水草。何以從前之四萬餘

隻皆以嚼食葦柴陸續解到。獨至此次所解羊隻遂至葦柴無遺。例斃六百餘隻之多。其中顯有捏飾情弊。即所奏驗明割存兩耳腦皮亦不過據一守備所查。該司勒爾謹並未親往查驗。何足憑信。而該督竟以此為據。並欲著落永寧淑賓名下賠補足數。尤屬不公。從前所以傳諭永寧責其不行留歇。即日趕辦者。原指全行未解而言。今四萬餘隻俱已解過。則末起千餘羊隻自應一併解往永寧。

等之不令留牧。未為非是。即論賠補亦當於解弁名下著追。今以微弁不能賠補而加罪於永寧等。令其賠補。則所見小而大不公。揆之情理亦未允協。朕之辦理一切。豈專為錢糧起見。楊應琚豈不知之。著傳諭楊應琚遵照前旨。再行確查。務將實在情節秉公根究。嚴行審訊。據實具奏。毋得稍有迴護。○是日駐蹕正定府行宮。翼日如之。○乙巳。上幸正定府北門外閱兵。○祭。

先蠶之神。遣妃恭代。

皇后行禮。○賜扈從王公大臣並直隸官員等食。○兵部等部議准。浙江巡撫莊有恭奏稱海塘營伍原以修護隄防。現在江海正溜。全由北大疊出入。額設千總一員。把總二員。外委三員。兵一百八十三名。不敷調遣。請將原撥杭協中營守備一員。千總一員。把總二員。外委四員。兵二百名。均行撤回。再添設外委一員。內以千總二員。各帶外委二員。分駐最要之尖山。翁家埠二處。其該處前設把總二員。外委二員。移駐次要之念里亭。戴家石橋二處。各設一汛。再撥把總一員。外委一員。一駐海鹽之激浦。一駐平湖之乍浦。守備一員。帶同把總一員。外委一員。駐海寧城。專責修防。各汛員弁均聽杭防道統率從之。○以刑部侍郎熊學鵬為會試知貢舉。協辦大學士吏部尚書劉統勳為正考官。戶部侍郎于敏中兵部侍郎觀保為副考官。○豁免渡湖漂沒江西廣信幫旗丁。

陳順六。李伏四。二船糧一千一百石有奇。並
卹淹溺水手如例。○丙午。

上詣

皇太后行幄問安。○諭軍機大臣等。從前辦理
回人莽噶里克後。因伊屬人無所統束。暫令
安插吐魯番。交額敏和卓管理。今大功告成。
回部皆朕臣僕。自應各率其屬。不相兼并。朕
意將此項回人內。擇其賢能者。授為伯克等
職。仍安插原處。查明舊日賦役。照例供辦。又

阿里衮前因追賊。至羅布諾爾。所收回人。亦
應照此辦理。著傳諭舒赫德。即與額敏和卓
商酌具奏。請旨。○知貢舉刑部右侍郎熊學
鵬奏。查會試及順天鄉試。例應將擬中前十
名元魁卷。豫期另謄進呈。請自本年會試為
始。所有擬中元魁十名。即將硃卷封固進呈。
其向外簾取謄錄生進內另謄之例。應停得
旨。所奏甚是。如所請行。著為例。○是日。駐蹕
趙村大營。○丁未。吏部議准。兩江總督尹繼

善疏稱。江寧蘇松常鎮淮徐海。四巡道及各
府州屬同知。通判。州同。州判。等員。其兼管地
方水利者。請一例兼銜。並各換鑄關防。從之。
○葉爾羌辦事都統新柱奏。葉爾羌形勢。毗
連戈壁。雨水亦少。全賴引水溉田。是以設有
密喇布伯克。專司其事。查回部舊例。凡怠於
灌溉。及紊亂成規者。俱有罰項。以充公費。無
庸另給。惟引水時。須派撥丁役。從葉爾羌河
源。逐次查勘。行二日至愛濟特呼。其密沙爾
等七處。俱須於一日內。分道行走。現任密喇
布伯克邁達雅爾。係和闐人。未帶丁役。懇照
報聞。○鑄給直隸固安縣管河縣丞霸州淀
河州判關防。固安縣管河主簿鈴記。從總督
方觀承請也。○是日。駐蹕定州行宮。○戊申。

上詣

皇太后行宮問安。○諭軍機大臣等。據吉慶奏
稱。扎傷伊母之張黑子一摺。已降旨照所請

正法。但該犯之醢酒忤逆。伊母首告到官。已
經四次。若使該縣早為嚴加懲治。該犯或可
知所悛改。此亦整頓地方風化者之責。乃僅
予枷責。以致釀成兇逆。該縣辦理未協。豈能
辭咎。此事曾否詳報府尹衙門。著傳諭熊學
鵬等。令其查明叅處。以示懲儆。○又諭曰。成
衮扎布等奏。從前準噶爾未平。喀爾喀等邊
卡。皆向阿爾台山梁安設。今準夷回部。俱入
版圖。向時戍守之區。俱成內地。實為亘古所

無。請將扎哈沁。烏梁海。喀爾喀等卡座展拓。
庶耕牧有資等語。展拓卡座。於伊等生計有
益。所奏阿爾台邊卡以外。指定耕牧處所。著
准其辦理。可傳諭伊犁。烏魯木齊。巴里坤等
處大臣。與成衮扎布等。將彼此作何聯接。安
設卡座之處。會商妥辦具奏。○又諭曰。成衮
扎布等奏。遵旨解送伊犁駝一千隻。牛三千
隻。羊三萬隻。業已編羣分起。所派杜爾伯特
扎哈沁人等。於行糧外。各賞銀五兩。其派出

官兵。俱支給一歲錢糧。現在烏里雅蘇台軍
營。尚餘駝六百隻。羊四千餘隻。牛二百餘隻。
請將缺額羊隻。仍於來春由牧羣送補。外餘
俱暫為停止。俟需用時。再行支給等語。成衮
扎布等辦理伊犁牲畜。甚屬妥速。今烏里雅
蘇台牲畜。既尚足用。除羊隻外。俱著暫停補
額。并傳諭巴爾品知之。○故江南河道總督
白鍾山遺疏。聞得旨。江南河道總督白鍾山
熟諳河務。宣力有年。前以老病。懇請解任。曾

經降旨。俾其在任調攝。今聞溘逝。深為軫惜。
著加贈太子太保。所有應得卹典。著該部察
例具奏。○以安徽巡撫高晉為江南河道總
督。調廣西巡撫。託庸為安徽巡撫。以刑部侍
郎熊學鵬為廣西巡撫。○是日。駐蹕高玉鋪
大營。○己酉。賜扈從王公大臣。並直隸官員
等食。○諭曰。舒赫德奏。稱於喀什噶爾等處
駐劄辦事大臣二員。請令伊勒圖。奎喀什噶
爾。協同永貴辦事。其所管阿克蘇。健銳營兵

丁。交侍衛楊桑阿管轄。再侍衛訥齊訥。本年秋間。應行回京。其所帶索倫兵丁。即交換班之侍衛額勒登額管轄等語。舒赫德此奏甚是。俱著照所請行。○賞蓮池書院進獻詩冊之肄業生張郝元等十四人緞疋。○是日。駐蹕保定府行宮。翼日如之。○庚戌。

孝賢皇后忌辰。遣官祭

陵寢。○諭軍機大臣等。永寧奏。准劉順咨。調哈密兵丁四百名。往巴里坤建造房屋。其哈密房屋。俟來年安西兵到時。再行建造等語。哈密房屋。與其守候安西兵丁。不若招募回人。俾赴工作。則官房既得速成。而伊等生計。亦有裨益。著傳諭永寧等。須與玉素布商酌。是否可行。亦不必勉強從事。○又諭曰。素勒坦和卓。前因富德等。令往巴達克山。甚屬奮勉。已加恩賞給四品頂戴。孔雀翎。授為阿奇木伯克。此次隨明仁額勒登額等。奉使外藩。又著勞績。著加恩賞給三品頂戴。以示獎勵。○吏

部議。御史睦朝棟。有心要譽。甚乖職守。應照溺職例革職。得旨。吏部察議。睦朝棟。照溺職例革職。一本。所以留中不發者。朕意以為若總裁大員中。查無應行迴避之人。則該御史所奏。不過博一時虛譽。其罪尚屬可原。今據知貢舉熊學鵬查奏。應行迴避。士子則有總裁劉統勳之胞弟胞姪二人。于敏中之堂姪一人。劉統勳。于敏中。既係軍機大臣。而睦朝棟。現係軍機處行走之員。此次劉統勳。于敏中。二人。不令隨駕。外間已揣其與典試事而軍機處之人。固不待言矣。况朕向劉統勳等。曾面諭及之。睦朝棟。豈有不知之理。則其所奏。顯屬迎合上官。此風斷不可長。前明師生堂屬。黨援門戶之弊。往往假公濟私。害及朝政。最為言路惡習。我

皇考十三年以來。大加整頓。風紀肅清。朕臨御二十有六年。於臺垣章疏。苟有一二可採者。未嘗不見之施行。若其意有所屬。瞻顧徇私。

者亦斷難逃洞鑒。睦朝棟何人而敢以此等伎倆巧為嘗試乎。此在諸科道尚屬不可。况該御史之在軍機行走者乎。今歲恩科會試已屬格外曠典。臣工得與文衡已可云寵榮逾分。而更欲為宗戚倖中。是於不知足之中。又加甚焉。號稱讀書者。宜如是乎。此於政體官方士習。均有關係。睦朝棟革職不足蔽其辜。著交刑部治罪。劉統勳于敏中之授意與否。姑不深究。然致屬員之如此假言獻媚。則二人亦不得謂無咎。其劉統勳于敏中之弟姪應行迴避者。概著罰停鄉會試一次。以示儆戒。○兵部議准甘肅巡撫明德奏稱甘省驛馬工料向因河東諸物平賤。每馬日支銀五分。河西料草昂貴。每馬八分。但今昔情形不同。自應量為調劑。請將河西各驛馬二千二百六十三匹。每匹日減銀七釐。其河東中路十五站馬七百五匹。每匹日增銀二分。再河西沿邊之花馬池等五驛馬二十匹。每

匹。例支銀四分。應增三分三釐。口外安西以東十塘軍臺馬二百匹。每匹例支銀八分五釐。應增五釐。從之。○科爾沁和碩親王扎木巴勒扎木素故。遣官致祭如例。○以革退喀爾喀扎薩克固山貝子旺沁扎布弟二等台吉貢素。噶扎布。降襲扎薩克一等台吉。○賑貸安徽宿州。鳳陽懷遠。虹縣靈璧。鳳臺。泗州。盱眙。天長。五河等十州縣。鳳陽長淮。泗州等三衛。乾隆二十五年水災飢民。並緩應徵額賦。○辛亥祭先農之神。遣顯親王衍潢行禮。○上詣皇太后行宮問安。○諭軍機大臣等。胡寶琮所奏江西省軍屯城工二事。已於摺內批諭矣。此等地方要務。即素有幹濟之能者。尚恐不能經理盡善。況阿思哈在巡撫中。不過中材乎。從前清理軍屯。原以杜民戶欺隱。屯軍典賣為卹丁濟運之長策。而摺內不免舊額有

加一語。似有難於質言之處。殊不明晰。江西民俗。素為刁悍。定議伊始。自多浮議。若任事者。因此而旋議更張。成何政體。但如直隸查辦民典旗地一事。令伊等自扣錢糧俸祿。置為已產。且定有私行典賣治罪之條。而旗人尚未必實能受益。今以官贖之地。徒手給與疲惡之丁。將來隨手花消。適以助其飲博靡費。何所底止。此項清出屯糧。或應另行招募殷實良丁。或應存貯公所。遇糧艘有應用之項。於此請給以資辦公。方為妥協。應如何酌定章程。及卹丁濟運。作何通盤籌畫。示之節制。俾公私交便可以永遠遵行。著該撫悉心妥議。奏聞。至城工一項。現在既已辦理。自無容更議。但士民踴躍趨事。如其數至數千金以上者。亦應照好善樂施之例。酌量分別奏請議叙。以示獎勵。將此傳諭胡寶瑤知之。○吏部等部議。准直隸總督方觀承奏。稱通惠河南北兩岸。各四十里。應分四汛。請將慶豐

通流兩閘。開官改為河缺。自大通橋至平下閘。南岸各工。歸慶豐閘官管理。為南岸上汛。自平下閘至通州北關外葫蘆頭。又自分閘至南浦北岸各工。歸通流閘官管理。為北岸下汛。其南岸下汛。北岸上汛。請將古北口石塘路兩處經制外委改駐。每汛設兵二十名。均歸務關同知管轄。該同知既添轄通惠河工。其北運河東岸三里淺汛。工長二十七里。勢難兼顧。請改歸楊村通判。就近管轄。從之。○是日駐蹕端村行宮。○壬子。上幸平陽淀行圍。○禮部議覆御史范棧士奏。稱國子監學正學錄。向由考取記名。今內閣中書既議於會試薦卷中挑取。應請一例辦理。於取錄中書額數量為寬。取數名。不必豫定款項。統俟引見錄用等語。查取錄中書名數。議准六十名。其年力老成。宜於課士者。請於引見時量用數員。交部以學正學錄選用。無庸另定取額。嗣後國子監需人。先期咨部

辦理從之。○是日駐蹕趙北口行宮。○癸丑上詣

皇太后行宮問安。○兵部議准兩江總督尹繼善疏稱江西撫標南昌鎮標等六營應令遇大操之期一體會操撫鎮二臣每年公同較閱一二次其九江協並所轄之南康南湖二營就近歸南昌總兵統轄袁州協並所轄之樟樹營就近歸南贛總兵統轄從之。○駐劄聞展郎中德爾格奏聞展喀喇和卓托克三

共貯糧二萬五千石計歲需不過四千石其餘一時難於出糶應運至巴里坤接濟兵丁口糧查聞展雇覓回空商駝若照肅州哈密解糧之例自聞展至巴里坤七百七十里每石共需運費三兩八錢三分七釐有奇較內地運送似為省便得旨軍機大臣速議具奏尋議從前由肅州哈密至巴里坤所運糧以官價運費合算約十有餘兩今以聞展糧運計之所費不過三分之一自應如此辦理請

將歲需之數約存三年以內餘俱運送巴里坤其運費於兵餉內動用從之。○廣西南寧府屬歸德土知州黃世周告休以子昌襲職

○喀爾喀右翼固山貝子阿拉布坦故遣官致祭如例。○旌表守正捐軀之河南睢州民張玉林女張氏。○是日駐蹕紫泉行宮。○甲寅諭軍機大臣等海明奏稱查出布拉呢敦離異之妾受什阿哈察所生子薩木薩克將伊乳母及收養之回人博羅特索丕解京等語薩木薩克尚屬童稚不應緣坐送來京師惟加恩養育可耳即博羅特索丕留養舊主之子情亦可矜俱著照例安插但聞布拉呢敦尚有二子或藏匿回地亦未可定著傳諭永貴等以留養薩木薩克一事曉示回衆仍留心訪察其餘子嗣毋任藏匿。○又諭曰德爾格奏聞展餘糧運送巴里坤一事已定議准行矣因思哈密安西等處俱有官兵所需口糧多由肅州等處運送著傳諭楊應琚查

明內地運至哈密等處。每石約需運費若干。若照開展運送巴里坤之例。由吐魯番一路送來哈密。安西。每石約費運費若干。如較內地運往之費。大有節省。固不待言。即令所費相等。而內地多留一石之糧。即閭閻受一石之惠。其為利更溥也。即著詳籌妥議具奏。○又諭曰。阿桂等奏由阿克蘇派往伊犁之綠旗兵丁。撥馬三百匹接濟。令三等侍衛鄂鐸索倫。駢騎校署。參領伊爾第。領兵前往照管。

平定二十二年

書

以迄回營。無一傷損等語。鄂鐸等此次行走甚屬可嘉。鄂鐸著加恩陞授二等侍衛。伊爾第著交部議叙。兵丁等酌量獎賞。○軍機大臣等議覆。前鋒統領努三。瑪璫奏稱。左右兩翼。每翼前鋒八百餘名。現雖輪撥隨圍。然必數年後始得行走一次。向來前鋒營。以鳥鎗緊要。一半作為鳥鎗前鋒。於馬上一次施放鳥鎗。一次演習馬箭。今但演習步箭。恐日久馬上生疎。應如所請。每翼拴官馬五十匹。於

此次騎回官馬內。揀留一半。給前鋒騎往隨營一半。留備操演。如有倒斃。本營通融辦理。至每旗護軍。約二千名。請比照前鋒營數目。每旗撥馬一百匹。以備操演。得旨。前鋒營每翼著拴馬一百匹。餘依議。○參贊大臣舒赫德等奏查伊犁所派綠旗兵。已足二千名。今秋遷移回人二百戶。亦足一千戶之數。惟額林哈畢爾噶為伊犁要路。現在開展等處。裁兵俱送烏魯木齊。請於本年秋收時派兵一

平定二十二年

書

千名。於瑪納斯揚巴勒噶遜。安集海。晶河等處酌量駐屯。則地當伊犁烏魯木齊之中。聲勢聯絡。接濟臺站亦便。至開展自大功告成。無承辦軍需之事。留兵六百名已足。惟哈喇沙爾為開展阿克蘇適中之地。又與珠勒都斯之空閑游牧相近。有多倫回人游牧。請駐兵八百名。將現有官兵七百名內汰其老弱廢疾。以開展餘兵補額。其今秋應派伊犁馬兵。綠旗兵。及葉爾羌等處駐兵額數。仍會同

各駐劄大臣等議奏從之。○御前侍衛烏魯木齊辦事副都統安泰奏正月初三日准阿桂咨伊犁屯田由烏魯木齊調取辦餉知縣一員縣丞一員又屯田馬一千匹及籽種口糧農具貿易緞疋鹽菜銀兩令總兵金梁帶領於本月二十六日至鄂伯勒齊爾因尼楚滾登努勒台等處雪大另從博囉布爾噶蘇嶺一路修鑿冰雪阿桂復遣侍衛鐵柱接濟協助已於二月初七日行抵伊犁計馬一千匹又厄魯特七十餘口騎馬一百餘匹駝一千餘隻及馱運各項俱交金梁收訖臣於十六日起程回烏魯木齊報聞○調工部侍郎錢維城為刑部侍郎以鑲紅旗漢軍副都統范時紀為工部侍郎○命刑部左侍郎錢汝誠兼管順天府尹事務○旌表守正捐軀之山東東平州民王玉妻馬氏○是日駐蹕涿州行宮。

大清高宗法天隆運至誠先覺體元立極敷文奮武孝慈神聖純皇帝實錄卷之六百三十二

大清高宗法天隆運至誠先覺體元立極敷文奮武孝慈神聖純皇帝實錄卷之六百三十三

纂修總纂官是據官太子太傅文淵閣大學士文淵閣領閣事領侍衛內大臣稽察欽奉 六部事件奏理

吏部理藩院事務正黃旗滿洲都統世襲騎都尉軍功七級隨帶加一級尋著加二級軍功紀錄次臣慶桂

總纂官是據官太子太傅文華殿大學士文淵閣領閣事稽察欽奉上諭事件處管理刑部部庫書

世襲騎都尉軍功十九級隨帶加二級又加二級重陸內大臣戶部尚書鑲藍旗滿洲都統軍功紀錄次

尋著紀錄十四次臣德興是據官太子少保工部尚書紀錄六次臣曹振鏞等奉

敕修

乾隆二十六年辛巳三月乙卯諭曰熊學鵬

已補授廣西巡撫著速行赴任其知貢舉事

務著程景伊入場接辦○諭軍機大臣等安

泰奏辦送屯田官兵馬駝糧餉器具全抵伊

犁等語此次辦理妥協甚屬可嘉著將安泰

金梁及隨同送馬官員等俱交部議敘兵丁

賞給一月鹽菜銀兩其金梁所領綠旗兵內

逃走三人既即時查報著加恩免其議處脫

逃兵丁嚴緝務獲○又諭據納世通奏稱派

往伊犁屯田之多倫回人等因玉古爾至穆

素爾嶺地多戈壁牲隻疲乏將籽種口糧借

供飼秣旋准和其衷咨已向阿克蘇回人通

融辦解今准阿桂咨仍少籽種三十五石暫

將口糧內大麥抵補再行辦送等語納世通

初次辦理殊未妥協至多倫回人係甫經招

撫安插庫爾勒非各城回衆之馴服者可比

嗣後宜留心約束固不當苦累亦不得過於

姑息著傳諭知之○兵部議准湖廣總督蘇

昌疏稱襄陽鎮駐劄穀城每年出巡路經三

郡閱十一協營若照舊例一次巡察不無周

章請嗣後令該鎮於每年春季巡察下游中

左右前襄陽城守荆門安陸各營汛冬季巡

察上游均州鄖陽竹山竹谿房縣保康各營

汛俾得詳慎考驗署中公務亦不致曠廢從

之○調江南河庫道何燭赴京引見○以故

貴州都勻府屬都勻正長官司吳德仁姪鐔

襲職蠲免直隸宣化萬全二縣乾隆二十

五年雹災額賦是日駐蹕黃新莊行宮○

丙辰

上迴鑒奉

皇太后居暢春園○幸圓明園○丁巳

上詣

安佑宮行禮○諭軍機大臣等據吳達善奏鹽道衙門撥借鹽勛每包議有公費既未詳明亦無案據現飭提商究問一摺已於摺內批諭從前借撥衛廠蘆鹽原為暫濟民食何得藉詞公費名色致滋擾累况一切陋規久經革禁此項公費既無詳案私相授受其中謂無侵牟誰能諒之著傳諭吳達善將撥借過鹽包若干收過公費銀兩若干逐一徹底嚴查如歷任道員藉端肥橐亦即詳悉根查具摺參奏至該撫摺內所稱提商逐究一節商人議辦公務必以總綱為政人數本屬無多吳達善現在傳詢自毋庸紛紛提究以致波累衆商致乖政體若因有此旨而稍存瞻顧意可調停了事亦難逃朕洞鑒將此一併傳

諭知之○戊午諭軍機大臣等據吳達善奏豫省衛輝等廠暫借蘆鹽一案曾議每包出銀一錢以充鹽道衙門公費並未詳明又無案據現在提商究問等語此項公費既無詳案即屬有干功令其中是否侵牟已批飭該撫嚴查矣從前蘆鹽通融撥運乃係官著任內之事所有蘆商按包出費情節金輝甫經到任諒未深悉著傳諭方觀承令其將從前借撥鹽包若干作何議有公費並一切緣起就近詳悉查明據實具奏尋奏河南省各屬分行河東長蘆兩處引鹽嗣因河東鹽池歉收奏明借運蘆鹽後緣趕運不及各商議於衛輝廠已運未銷蘆鹽內通融借買按包出費統計積年借買六萬九千二百餘包陸續交鹽道衛輝府及通判汲縣延津縣各衙門公費銀一萬七千五百餘兩其衛輝夥商有無浮捏或天津坐商尚有隱漏應請交河南撫臣查辦報聞○又諭據吳達善奏豫省衛

輝等廠。晉商暫借蘆鹽。後議每包出銀一錢。以充鹽道衙門公費。既未詳明。亦無案據。現飭提商訊究等語。鹽務陋規。久經禁革。乃藉詞公費。按包出銀。並無詳案。其中謂無侵牟。誰能諒之。但此項起自乾隆二十三年十月。正在胡寶琛任內。其事究竟緣起若何。所有歷任道員。是否藉端肥己。該撫向來尚屬精察。豈竟無所見聞。著傳諭胡寶琛。令其據實詳悉具奏。毋稍迴護。尋奏。此事計其年月。在

道員朱若東任內。嗣該道丁憂回籍。接任係鄧錫禮。均未查出稟聞。是否藉端肥己之處。現在督臣吳達善提商訊究。必得實情。惟臣既失察於當時。復未能查出於事後。有同聾瞶。負疚實深。得旨。已。即命方觀承徹底查出。再無可辨。汝竟不知。朕亦為汝不解。因公處分。固所不免。但朕為汝愧。為汝恨。○又諭。據和其衷奏稱。布魯特之齊哩克齊等。趕至烏什。售賣羊隻。每羊一隻。價銀二兩五錢。共買

獲羊一千一百六十二隻。作為官兵口糧等語。布魯特羊隻既肥且大。伊等將此項羊隻。作為官兵口糧。分給時。是否亦照內地解往羊隻一體分給。抑係作何分給之處。著寄信詢問。和其衷等。再內地解往羊隻。中途無水草之處。俱係飼餵草豆。內地買羊一隻。需用價銀若干。解送中途。自何處飼餵草豆。所需草豆。及支給解送人等口糧等項。折價合算。每羊一隻。自內地採買。解至各部回城。共需銀若干。以羊若干隻。作為兵丁一月口糧之處。著寄信與楊應琚等。查明詳加覈算。奏聞。再巴里坤採買喀爾喀羊隻。每羊一隻。需價銀若干。如何作為兵丁口糧之處。著一併查明具奏。尋奏。寧夏府等屬。解羊至庫車。阿克蘇。葉爾羌。喀什噶爾等處回城。自出口後。因需用緊要。或值天寒草枯。由安西。哈密。一帶臺站者。統計各項用費。併原買價。一兩。每羊一。需銀四兩零。如值夏秋水草豐茂。由安西

以東之橋灣取道北路草地行走雖豆草畧省亦需銀三兩零各處支給兵丁向係以羊二抵一月口糧其巴里坤採買羊每隻需銀一兩八九錢至二兩不等報聞○大學士蔣溥以病奏請解任得旨不必解任善為調攝○已未

上詣暢春園問

皇太后安○諭軍機大臣等楊應琚請徹南路臺站改歸北路安設一摺所奏哈密不必駐

官等語甚屬非是軍機大臣遽照覆定議亦於事理未協前南路設臺原因捕勒逆回而起此時軍務全竣仍議改歸北路其事原屬可行至欲將哈密各項事宜均歸巴里坤大臣承辦而開展一帶屯務交烏魯木齊大臣稽查毋庸再行駐官之處則所見殊屬紕繆哈密乃新附各回部總匯必由之地將來安集延巴達克山布魯特等回人往來貿易必得特派統轄大臣為之彈壓料理方能持國

體而悉夷情在隨同駐劄弁兵人等或以為數衆多隨宜減徹固無不可若將任事大員徑行徹去諸事一歸巴里坤承辦毋論道里紆遠鞭長莫及且將來該處經理之員勢必由督撫等派委武則副將文則道員此等不晚外藩事宜中朝政體非辦理張皇即因循推諉有不蹈準噶爾貿易之轍而損威失馭者乎楊應琚向知任事何乃並不計及其中或因永寧等在彼辦事未免掣肘因為此改歸之奏則伊等非徹回內地即移駐遠邊而於國家要務竟將諉諸不能勝事之有司封疆大吏似此存心吟域豈朕委任重寄之意乎若永寧等果有徇私舞弊之處何妨直參其人然不可徹此一任也至請停駝運開展等處餘糧一事所引僅屬安西駐防綠營一處折價未可概以為例此項運糧乃為現在哈密巴里坤等處一應辦事官兵口食及將來接濟之計若果可與綠營駐防者一例辦

理朕豈轉不樂從而必斤斤豫籌輓運乎。乃該督祇緣折色二兩二錢之價。累長較短。亦所謂不揣其本而齊其末矣。所有該處辦事一切官兵等現在作何支放及所存七萬糧石。實在足敷幾年供支。此外倘有不敷。又將作何接濟。俾將來無事再籌運糧之處。摺內並未通盤籌畫。著將此傳諭該督令其悉心確覈妥議具奏。○以故湖北慈利縣麻寮所櫻桃隘世襲把總鄧永爵孫長明。靖安隘世襲把總向慶力嗣子祚華襲職。○庚申工部議覆原任江南河道總督白鍾山疏稱。豐蕭碭廳屬黃河南岸王家莊地方。因兩年伏秋大汛。黃流南趨。對岸長出灘嘴。逼溜直射該處。致外灘刷盡。水壩隄根急宜估計興工。下埽鑲壓。應如所請從之。○哈喇沙爾辦事大臣按察使銜納世通奏。上年十月初二日。王古爾多倫回人。將總管阿奇木伯克阿布都賚勒索伊等。緞足牲隻列款呈告。因阿布都

賚前往伊犁未回。臣與庫車大臣等會商。俟該伯克回日。派員押送。並率同吐魯番公素賚瑞審訊具奏。此時先令素賚瑞署理。王古爾等處阿奇木事務。報聞。○辛酉。諭曰。五福不必兼管光祿寺事務。著福隆安管理。○諭軍機大臣等。軍機大臣會同刑部覈定發遣巴里坤條例。奏請通行。已降旨依議。此等發遣人犯。本屬去死一間之匪類。以之投畀遠方。既不致漸染腹地民俗。而現在新疆屯墾處所在。在豐收。該犯等到彼。又可力耕自給。實為一舉兩得。前降諭旨甚明。第各省督撫遣送此等罪犯。亦須隨宜調度。經理盡善。如每次起解人數太少。簽派差役。既恐滋繁。若彙積過多。又恐沿途食用頓宿。不免壅滯。均屬未協。各督撫等應量其人數。或十餘名。至二十名。內外分作一起。節次轉送。乃為合宜。至甘肅為遣犯總匯之地。而西安尤其切近上游。該撫等於各省遣犯解到時。相其多寡。

緩急為之酌劑通融零星者頓蓄之叢集者疏導之兩省巡撫既彼此先後知會而該督又為之統轄照應至既到遣所之後該處辦事大臣更當嚴加約束俾得盡力耕作勿令游手滋事則辦理不致失當斯真能奉行良法者著將此詳悉傳諭各省督撫將軍並駐劄巴里坤烏魯木齊開展等處辦事大臣知之○旌表守正被戕之雲南永善縣民王啟文妻趙氏○壬戌軍機大臣等議覆都統多

爾濟奏稱西寧邊外多巴等處係民人貿易之所向例自棟科爾至尼蘭錫蘭山以內許客民來往山外係青海地方禁止越山貿易今準夷蕩平回部向化請令內地商人各隨所願裹帶茶葉布疋等項前往青海貿易使柴達木等遠處貧困蒙古得以牲畜售換於邊疆生計大有裨益但恐不肖奸民借端出口與蒙古等結伴偷竊應如所奏嗣後令商人呈報地方官由西寧駐劄大臣給蒙古漢

字印照填寫名數守邊官兵嚴加稽查驗照放行其微末商人仍照例禁止如官兵疏於查察致無執照或帶禁物出口者獲時交地方官治罪外並將守邊官兵議處仍飭衆扎薩克等與商人公平貿易事竣即令入口倘蒙古內有扣留商人者查出將該扎薩克等一併交部治罪從之○旌表守正捐軀之江蘇新陽縣民褚玉成女褚氏○癸亥上詣暢春園問

皇太后安○福建巡撫吳士功奏水師提督馬龍圖揭參提標參將姚應夢勒索洋船陋規該參將任所贓財業經委員查封並解犯到省審究得旨彼罪尚未定而亟亟於查封贓財所見小矣又批馬龍圖揭參人而已又被人參其中必更有別故應詳悉嚴查定案毋縱毋枉可也仍宜速奏○以湖北施南協副將路戎為四川建昌鎮總兵○賜卹因公淹溺之哈爾噶里克坐臺委署筆帖式格呼勒

圖如例。○甲子。諭軍機大臣等。向來交直隸餵養馬匹。尚多臃壯。近來臃分。較前漸減。此或因領餵日淺。尚屬可原。更聞有領馬交馬時。並不實領實交。而彼此津貼銀兩。私相授受者。此等弊端。方觀承當嚴密查察。務使杜絕。嗣後如仍有此弊。別經查出。即方觀承亦不能辭其咎也。將此傳諭知之。○吏部等部議覆。四川布政使吳士端奏稱。上司之子姪親戚往來任所。經過所部境內。拜謁地方官。張揚聲勢。地方官有意趨承。甚至餽送宴會。向無處分明條應。如所請。上司之子姪親戚有官職者。經過屬員境內。拜候往來。屬員趨承供應。均照不應重私罪律。降三級調用。其無官職者。照不應重律。杖八十。上司未能查察。別經發覺。照約束不嚴例。降一級調用。知而不舉。照徇庇例。降三級調用。倘有夤緣賄囑等事。分別革職治罪。從之。○禮部以會試中額請。得旨。滿洲蒙古取中四名。漢軍取中

二名。直隸取中十七名。奉天取中一名。山東取中十二名。山西取中十名。河南取中十名。陝西取中十名。江南取中三十四名。浙江取中三十名。江西取中二十一名。湖北取中八名。湖南取中五名。福建取中九名。廣東取中九名。廣西取中五名。四川取中八名。貴州取中七名。雲南取中五名。○署江西巡撫常鈞疏報。寧州南昌新建進賢靖安萬載吉水萬安廣豐鉛山萬年皇子南康定南等十四州縣。勸墾老荒及新生田地。山三十項。六十四畝。有奇。○乙丑。諭軍機大臣等。如松奏綏遠城挑選烏里雅蘇台換班滿兵五十名。俱照派往軍前之例。支給馬駝鹽菜等項銀兩等語。所辦未免過當。伊等不過駐防更換。非進剿可比。應酌量賞給。嗣後派往伊犁葉爾羌等處駐防兵丁。將應給各項照進剿兵丁酌減賞給。○丙寅。諭軍機大臣等。阿桂奏稱內地購辦牛驢較之哈薩克馬價。一牛可值馬

四疋一驢可值馬二匹。現在伊犁、烏魯木齊貿易馬匹既多，且耕作原屬可用。請將內地購辦牛驢之處停止等語。從前伊犁經畫伊始，故從內地辦送牲畜。今貿易馬匹甚多，自當酌量辦理。著傳諭楊應琚、永寧、五吉等，除現在購辦牲畜仍即解送外，嗣後陝、甘、哈密、巴里坤等處不必購辦伊犁牲畜。○吏部等部議准。陝西巡撫鍾音疏稱：葭州屬之高家堡請改隸神木縣管轄。建安堡改隸榆林縣管轄。榆林縣屬之下方連等村莊改隸葭州管轄。從之。○戶部等部議覆：陝西巡撫鍾音疏稱：漢中府同知同州府通判韓城、洋縣二縣丞各缺業經裁汰，其漢中府各屬水利改歸該府通判兼管。商茶歸併該府就近盤驗。同州府各屬水利鹽法改歸該府同知兼辦。韓城、洋縣二縣糧務各歸併該縣兼管。應如所請。從之。○荊州將軍嵩椿奏：撫臣周琬談論風生，似屬忠直，細察其人言行矛盾，矯飾

外貌，小有聰慧，往往恃才用巧，漸染外任陋習。一切奏報俱不以實。臣仍與之外相洽比料理地方事務，斷不致有貽誤。得旨：汝之所奏尚為公正。伊昨來京較前亦異，朕亦微疑此時伊果有行私舞弊之處，即行參奏。如無大故，俟朕徐徐處置。密之。○旌表守正捐軀之安徽懷遠縣民吳懷西姪婦崔氏。○丁卯上詣暢春園問

皇太后安。○還宮。○諭曰：阿桂奏稱伊犁、烏魯木齊貿易哈薩克馬匹漸多，准舒赫德咨取馬二千匹，與其從巴里坤解送，不如在伊犁所得馬匹內除屯田足用外，挑選一千匹送往阿克蘇。其餘從烏魯木齊辦送至伊犁所換哈薩克騾馬一二年間即成大羣。請將巴里坤等處馬匹仍於本地牧放等語。阿桂等辦馬匹甚屬妥協，俱著照所奏辦理。仍加恩授為內大臣。嗣後宜益加奮勉，以副優眷。○又諭曰：端濟布前在軍營頗屬効力，今患病

溘逝著加恩特贈都統職銜賞治喪銀五百兩應得卹典著該部察例具奏再端濟布因軍前得傷回京病故雖與陣亡官員有間念其久在戎行身嬰鋒鏑殊可軫惻著加恩准照陣亡例入祀昭忠祠以示優卹○軍機大臣等奏查各省將軍名號皆按駐防處所編定惟京口將軍向稱鎮海將軍綏遠城將軍向稱建威將軍今鎮海將軍之缺既經裁汰其建威將軍請嗣後於奏事行文俱稱綏遠城將軍並請改鑄印信頒給報聞○是日起上以孟夏享

太廟齋戒三日○戊辰諭軍機大臣等前據海明奏希布察克布魯特額穆爾比願率所部內遷令伊弟穆魯特貢獻土物并據稟稱伊弟阿瑞為額爾德尼伯克所拘等語額穆爾比誠心向化甚屬可嘉著加恩賞給三品頂帶仍賞緞二疋額穆爾比既與布魯特阿奇木同族即一處安插亦可伊弟穆魯特著於

回部伯克入覲之便來京現在穆魯特若求向霍罕索取伊弟即告以前次之事皆爾等素不和睦所致且在歸附以前不便代索俱著傳諭舒赫德知之○以直隸按察使喬光烈為河南布政使山西冀寧道趙孫英為直隸按察使○蠲緩江蘇山陽阜寧清河桃源安東鹽城高郵泰州江都甘泉興化寶應銅山沛縣蕭縣陽山邳州宿遷睢寧海州沐陽等三十一州縣淮安大河徐州等三衛乾隆二十五年水災田地十四萬九千七百頃有奇額賦○已已諭從前記名副都統人員將次用完著滿洲大學士領侍衛內大臣尚書滿洲蒙古漢軍都統等照從前保薦之例不論旗分品級祇擇其能勝副都統之任者各保一員與舊記名之員一併帶領引見○調正黃旗漢軍副都統伍岱為鑲紅旗滿洲副都統以總管內務府大臣德保為正黃旗漢軍副都統○南掌國王蘇嗎喇薩提拉准第

駕公滿遣掌事使官以電整代率以閤納等表賀

皇太后萬壽。

皇上萬壽。並貢方物。頒勅宴賚如例。○頒賜南

掌國王

御書象郡抒誠扁額並特賞人縵緞。禮瓷器等

物。○是月署兩江總督兼管河道總督高晉

奏清口以上之運口設頭二三壩口門從前

以四丈為率量分湖水以足敷濟運而止迨

後陸續刷寬計五六丈不等湖水入運未免

過多現在清江以至高寶運河水深俱及丈

餘糧艘逸行順利毋需湖水過於入運擬俟

糧艘尾幫過後即將三壩口門照舊收窄仍

以四丈為率庶高寶一帶可無漫溢之虞得

旨覽奏俱悉。○湖廣總督蘇昌奏湖北徵收

漕糧南米餘耗一萬三千八百餘石變價得

銀一萬三四千兩除撥補咸寧等州縣不敷

水腳一千九百餘兩餘俱解充養廉公用查

湖北各官養廉現於耗羨鹽規商稅項內動

支有贏無絀其咸寧等處不敷水腳亦有各

屬本款餘剩銀儘可撥給惟通省常平倉穀

統計不滿百萬請將前項南漕耗米易穀貯

各州縣每年共增二萬七千六百餘石得旨

如所議行。○陝甘總督楊應琚陝西巡撫鍾

音甘肅巡撫明德奏新疆大功告竣秦關望

幸彌殷請舉西巡之典以慰羣情所有西安

同州一帶駐蹕處所已詳加勘定先為籌備

得旨且俟旨而行。○陝甘總督楊應琚奏甘

省新疆展拓以來於伊犁烏魯木齊等處分

駐官兵廣籌墾種已有成效至安西肅州一

帶遙控新疆界當總匯昔為沿邊屏障今成

腹內要衝生聚既繁田疇宜闢查肅州金塔

寺等處可耕荒地一萬餘畝業經奏明招墾

茲復查安西所屬淵泉縣之四道溝等處玉

門縣之頭道溝等處可耕荒地一萬餘畝勘

係平行之區又有泉源引灌現在招墾試種

酌借籽種。俟秋收後。分別糧則。另議升科。得旨。好。

大清高宗法天隆運至誠先覺體元立極敷文奮武孝慈神聖純皇帝實錄卷之六百三十三

大清高宗法天隆運至誠先覺體元立極敷文奮武孝慈神聖純皇帝實錄卷之六百三十四

監修總裁官理夏禮官太子太傅文淵閣大學士文淵閣領閣事領侍衛內大臣稽察欽奉 上諭事件處管理

文淵閣院事務正黃旗滿洲都統世襲騎都尉軍功加七級隨帶二級尋常加二級軍功紀錄一次臣等謹

總裁官理夏禮官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書履歷滿洲都統軍功紀錄次

尋常紀錄十四次臣等謹將理夏禮官太子少保工部尚書紀錄六次臣等謹將等奉

敕修

乾隆二十六年辛巳夏四月庚午朔享

太廟

上親詣行禮 幸莊親王允祿第 幸大學士

蔣溥第視疾 詣暢春園問

皇太后安 幸圓明園 辛未

上御勤政殿聽政 諭曰莊有恭奏曾經保舉

副將之撫標參將安廷召自保舉註冊後一

切營務率多漫不經心請將該員降補遊擊

等語所見甚是督撫保舉人員原以其有志

向上盡心職業是以登之薦牘然其中未必

無奮勉於前。以圖薦擢。及既經保舉記名後。自以為陞用在即。遂視本任如傳舍。不復實心自勵者。而各督撫往往以既經保舉不免意存迴護。聊且姑容。則何以使人才知所激勸。莊有恭於該叅將始則以其奮勉而保之。繼則以其怠弛而劾之。封疆大吏持正率屬之道。固應如是。諸大吏果皆如此用心。何慮察吏之不得實耶。因念各省保舉堪勝知府人員內。各員之初終易轍。與舉主之前後瞻庇。諒亦俱所不免。此尤當隨時體察。以飭吏治者。嗣後各督撫於已保人員。務宜實心察看。秉公彰瘡。勿以薦列在前。遂稍存姑息。將此通諭知之。莊有恭著交部議叙。安廷召昨已掣補台州副將。今著以遊擊降補。其撫標中軍叅將員缺。著李杰龍補授。又諭前吳達善奏。豫省衛輝等廠。借撥河東鹽觔。每包出銀一錢。以充鹽道衙門公費。均未具詳立案。現在提商究問等語。隨傳諭方觀承令其

就近訪查具奏。今據奏到事屬確實。鹽商陋規。各省久經革除。乃該鹽道等並未詳明。遽私行派項。其中顯有侵牟情弊。所當徹底根究。以肅功令。鄧錫禮著即解任。併丁憂在籍之原任鹽道朱若東一併提至河南交吳達善將案內人等嚴行訊明具奏。至撫臣有察吏之責。若以未經詳出遽可諉為不知。則凡地方有司科派肥橐。亦將置之膜外。可乎。此案調任巡撫胡寶瑒已傳諭令其覆奏。前撫圖勒川阿其時曾否在任。並著吳達善查奏俟定案時分別叅處。所有四川按察使員缺著蔡長灃補授。其江南驛鹽道員缺著程燾補授。○又諭曰。薩喇善係獲罪之人。派往伊犁効力贖罪。理宜作速起程。乃以患病生瘡不能前往。伊子恒璜具呈請代。此特沽名之舉耳。漢人中有似此者。朕曾降旨訓飭。恒璜身屬滿洲。且係宗室。豈宜出此。乃軍機大臣並不斥駁。竟爾據呈轉奏。如出於無心。尚可

若以薩喇善係傳恒姊夫。瞻徇情面。乃為代奏。則更非矣。即如傳恒。朕亦因其平日謹慎。奮勉。是以格外優待。否則朕恩豈可長恃乎。軍機大臣此奏。愛之適以害之耳。此等情節。豈能逃朕洞鑒。再此事若在他。人患病不能前往。朕或施恩寬免。至薩喇善則斷難寬貸。薩喇善著仍發往。伊子恒璜著革去侍衛。隨伊父前往。旌表守正捐軀之雲南尋甸州民杜雙得妻普氏。壬申軍機大臣議覆歸化城都統舒明奏。右衛裁撤佐領額缺。請將應裁之員調補等語。應如所奏。於應裁之滿洲蒙古漢軍佐領防禦內。論翼揀選步軍協領二員。步軍校八員。專管步軍。其步軍錢糧。仍交佐領辦理。嗣後步軍協領步軍校缺出。仍於應裁佐領防禦內。揀選調補。俟應裁之員用完後。再論翼揀選應陞之員。此時步軍協領步軍校所有得項。請照佐領防禦支給。再協領兼管佐領。雖係舊例。但協領與佐領

所司之事。迥異。今每旗止一二佐領。若仍兼攝差務。不敷。亦應如所奏。協領等俱不准兼管佐領。現在十二員。協領所兼佐領十二缺。俱裁。此應裁之十二佐領。與調補步軍協領所出佐領二缺之兵。即分於現在佐領管轄。其防禦驍騎校。亦分於現在佐領下管兵。當差。其未裁之十佐領官員。照常辦事。俟缺出。續裁將兵。撥入應留佐領下分管。其應裁佐領下之領催等。俟缺出。裁汰。俱挑馬甲。其鐵匠箭匠。缺出。酌裁。不必挑補。又查前次裁右衛佐領時。議將所裁各員。於綏遠城右衛二處缺出。對品補用。此次應裁各員。亦請照前辦理。再應裁之二十四佐領旗幟。盈甲。各按旗分顏色。不同。應交該將軍。俟將佐領裁畢。時報部另辦。從之。癸酉。上詣暢春園。問皇太后安。還宮。諭軍機大臣等。前據吳達善奏。陝省衛輝等廠。借撥河東鹽。勦每包出

銀以充鹽道衙門公費等語此事已有証據查係丁憂在籍道員朱若東任內之事現今吳達善提訊將來如審有侵肥情弊自應按數追繳著傳諭馮鈐將伊本籍家產先行查封勿令隱匿俟此案完結再行辦理如此旨到日馮鈐已回湖南即著護撫葉存仁遵旨查辦可也○又諭豫省鹽道衙門收受商人公費一案前已降旨胡寶瑑令其據實具奏並令方觀承就近訪查此事已有証據查係陞任道員鄧錫禮任內之事現今吳達善提訊將來如審有侵肥情弊自應按數追繳著傳諭胡寶瑑將伊本籍家產先行查封勿令隱匿俟此案完結再行辦理○四川總督開泰等奏金川土司郎卡稟稱我本天朝土司惟與衆土司不和衆土司因將不法之事向內地官府前控告如今止求作主剖斷情願恪遵絲毫不敢多事等語臣等思金川與革布什咱構釁以致各土司圍堵兩載

有餘郎卡既不獲逞其吞并之謀且數經挫衄稟求剖斷若仍令各土司駐防攻守既不能剋日奏功將恐日久生懈隨委諳練員弁前赴綽斯甲布丹壩金川一帶會同各土司所遣大頭人宣揚恩德切指郎卡罪惡明白剖斷將金川在丹壩界上所修碉卡押令拆毀侵占丹壩山地全數退還并差弁員前赴布拉克底令將金川所助番兵悉回巢穴然後傳知各土司將各處土兵及土練次第徹收惟是革布什咱兩被金川蹂躪殘破良多而巴旺毗連布拉克底人少力單仍留弁兵十餘名在革布什咱巴旺中間章谷地方駐劄以為聲援昨綽斯甲布丹壩革布什咱巴旺小金川沃克什梭磨卓克采從噶克九土司以土兵均徹陸續遣人赴省請安臣等諭以郎卡為人狡詭目下雖已竣事仍當時刻留心不可墮其詭計郎卡亦遣人來臣等嚴行教誡諭以

天朝之於土司正如雨露之於草木無有二致自己向順即享安全自己作孽即受災禍惟郎卡自擇之頭人又稱上年沙羅奔已死郎卡懇求換給印信臣等復諭以郎卡止見有罪未見有功即使分當承襲亦應照例取具各土司印結由地方官詳報請題方能換給印信頭人又稱郎卡因沙羅奔之死欲遣人赴藏熬茶求給路票臣等復諭以熬茶本係善事郎卡應遣大頭人虔誠豫備將隨去人數若干報知該管地方官轉稟覈辦該頭人俱領諾而去至前此所需犒賞臣等會同奏請將總督及布政使養廉各借支半年於邛雅汶灌等州縣購買餘茶酌量行銷所獲茶價除歸還借支之數餘作為賞需今除已經動支及扣還借支外尚餘六七千兩發交打箭鑪及雜谷兩處各二千兩購買穀麥青稞貯倉備用餘銀仍存藩庫以為夷務之需報聞○是日起

上以常雩祀

天於

園丘齋戒三日○甲戌諭會試揭曉後中式舉子應赴廷試近以試卷到部磨勘覆勘有需時日是以酌量展期但念午節向爰多士挾策駸墀典制未為適協計會試中卷不過二百餘名若於榜發次日即令京堂科道翰詹等官及覆勘大臣於朝房各分坐處同時按遞檢閱隨勘隨覆自當刻日就理不致稽延所有一切事宜各該衙門速行豫備於四月二十日或二十五日可以傳臚竣事其請派各員職名該部即速開列具奏不必俟發榜○諭軍機大臣等據常鈞奏亳州因瘋弑母之姜會監斃戮屍並請畫一辦理一摺所見甚是向來各省間遇此等事件有奏明請旨正法者亦有徑自杖斃不以上聞者殊不知似此蔑倫孽惡之人雖為沴氣所偶鍾然以天下之大生民之衆即有之亦何足為諱是

奏聞正法。原屬辦理之正。特恐候旨治罪。時日未免有稽。其中或因病瘵死。或畏法自戕。轉致倖逃顯戮。又於憲典未協。嗣後各州縣設遇有此事。稟明督撫。一經查實。即照常鈞所奏。在省城者。即請出王命。在外屬者。即委員齋令箭前往。將該犯立行按法凌遲處死。一面具摺奏聞。其或案情另有別項牽涉。仍行照例查辦。將此傳諭各督撫知之。○乙亥。

上詣

南郊齋宮齋宿。○諭。乾隆十七年壬申恭遇

聖母皇太后六旬萬壽恩科。曾經格外加恩。於下第舉子中揀選引見。量予錄用。其年在七十以上者。並分別賞給職銜。本年恭遇

皇太后七旬萬壽。數天同慶。特開

萬壽恩科。所有未經入彀舉子。應照前例一體加恩。按其科分名次先後為序。派出大臣。詳慎簡選。擇其年力壯盛。可以及時錄用者。大省四十人。中省三十人。小省二十人。帶領引

見分別以知縣試用。教職銓補。不得專取年少新科之人充數。並著軍機大臣會同該部查明應試舉子中。有年在七十八以上者。於揭曉後列名具奏。候朕加恩降旨。以普慈恩而光盛典。該部即遵諭行。俾眾舉子共知之。○丙子常雩祀。

天於

園丘。

上親詣行禮。○詣暢春園問

皇太后安。○辛圓明園。○丁丑諭曰。楊廷璋。吳士功。奏審擬馬龍圖私用存公銀兩一案。輒引自首例減等定擬辦理。錯謬已極。此案馬龍圖如於未經查叅之前。即豫為彌補。據實檢舉。謂之自首。尚屬有因。今既聞敗露。始多方攢湊抵項。且將登記數簿扯毀焚燒。另造私冊掩飾。則於先侵後吐之外。又增一舞弊之弊矣。此而謂之自首。凡前此所辦侵貪重案。歷歷可數。誰非於發覺後。冀圖那補卸罪。

者何不皆以自首貸之。有如此失出之理乎。方朕御極之初。此種伎倆。尚不肯為其所愚。今臨御二十六年。辦理案件。一切情偽。知之熟矣。乃欲以三尺之章。不能售其欺者。竟敢於朕前嘗試。將視朕為何如主乎。從來外省。參案例稱督。參撫審。此案立意。必先出自吳士功。而該督楊廷璋。遂因而附和之耳。獨不思博虛名。而弛法紀。朕豈能置之不問者。吳士功縱不自惜。楊廷璋又何為自以身命徇之乎。此案斷無兩人一口同聲之理。究係先出何人之意。著傳諭該督。撫令其逐一據實明白。回奏。毋許互相推諉。捏飾。亦不得彼此調停認罪。以圖分過了局。並著六百里會摺速行馳奏。所有馬龍圖一案。即速另行定擬。原摺擲還。○諭軍機大臣等。據楊廷璋奏。明春浙省需用馬匹。直隸未經撥解。請動項豫購一摺。殊未會辦理之意。前令直隸撥往浙省之馬。原以南巡改期。是以傳諭該督暫行

停解。並非直隸無馬可撥也。今該督請動馬價銀七千兩。赴口購買。未免徒多輾轉。儘可不必。此時天氣向炎。青苗在地。撥解恐未相宜。應俟節交秋。令仍於直隸撥馬五百匹。交浙應用。其撥缺之馬。即令於招烏達。現牧馬匹內。給還歸額。著傳諭方觀承。楊廷璋知之。○戊寅。諭曰。松阿哩案內。有兵丁違例借債。應追入官本銀三千八百餘兩。例應一年限內追完。但念此項借銀。原於各兵餉內。分年扣還之項。今於一年限內。追繳兵力。未免拮据。著加恩。將伊等應追入官本銀。分作十年攤扣。以示體卹。該部即遵諭行。○諭軍機大臣等。阿桂奏。稱葉爾羌。喀什噶爾。阿克蘇。烏什等城。有舊在伊犁耕種。回人二三千名。今聞開設屯田。願來効力者甚多。若添駐回人。即可裁減綠旗兵丁。但該伯克等。或以錢糧缺額為詞。惟停止協助之費。并照派出回人戶口。減其糧額。則眾皆樂從等語。所奏甚是。

伊犁再增回人千餘。生齒更覺繁盛。亦於伊犁生計有益。且裁減綠旗兵丁。既省內地之加。而回人田作。亦較勝綠旗兵。可將阿桂奏摺錄寄舒赫德等閱看。定議具奏。又諭曰。永寧等奏稱。遵旨將安插移往塔勒納沁屯田兵丁。添蓋房間。雇覓回人工作。傳諭玉素布。據稱情願。派伊所屬供役。不敢領受工價等語。玉素布年來甚屬奮勉。此次急公趨事。尤見惓誠。深可嘉尚。著加恩賞大緞四端。大荷包一對。小荷包二對。至修造兵房。回人即不領工價。亦當加給口糧。著永寧等從優酌辦。又諭。據鍾音奏稱。西安將軍衙門。凡事俱將軍一人獨斷。副都統不得與聞。如放官挑甲等事。將軍擬定之後。副都統不復重行揀選等語。外省設立將軍。副都統原欲其互相贊助。和衷集事。倘副都統內有不能辦事者。將軍原可據實參奏。豈得視若贅疣。彼身為副都統。不思自盡職分。惟事附和。亦必係

驚鈍無能。方甘如此。看來此等惡習。不但西安為然。餘省亦必有似此者。著將此通行曉諭各駐防處所。嗣後將軍副都統。凡事宜和衷商辦。將軍不得專擅。倘副都統恃有此旨。有心立異。致多阻撓。朕亦決不寬貸。○己卯。大學士蔣溥遺疏。聞得旨。大學士蔣溥居心純正。奉職恪勤。簡任綸扉。綜理農部。兼領翰苑。久直內廷。敬慎小心。從無少懈。前因患病。增劇。屢賜醫藥。朕親臨看視。尚冀就痊。遽茲溘逝。深為軫悼。著加贈太子太保。入祀賢良祠。並賞銀二千兩。治辦喪事。朕於十三日親往奠醊。以示恩眷。所有應得卹典。仍著該部察例具奏。○諭軍機大臣等。西路駐劄大員。有辦事數年者。應行更換。著伊勒圖更換。伊柱旌額理更換。安泰阿思哈更換。定長溫敏更換。五吉鄂寶更換。書山達桑阿更換。納世通。伊犁既有阿桂豐訥亨在彼。伊勒圖到後。伊柱即行來京。安泰定長五吉書山納世通。

各有承辦事務。著俟更換人到後。交代明白。再行起程。○軍機大臣議覆。欽差副都統安泰等奏。請於瑪納斯庫爾喀喇烏蘇晶河等三處屯田。查本年三月。舒赫德奏。請派綠旗兵一千名。於羅克倫以外。瑪納斯等三處屯田。今安泰等所奏相符。應將派兵撥餉。給與籽種農具等項。令其通融酌辦。再安泰等前有自伊犁。至烏魯木齊。安設二十四臺站之奏。臣等因伊犁駐兵屯田事宜。俱在阿克蘇辦理。議未准行。今瑪納斯等處。既開設屯田。則所奏現有索倫兵三百名。應如何添派。合為馬兵五百名。往來巡查。其安臺處所。每臺用滿洲馬兵綠旗兵若干。辦給馬匹牲隻。俱交安泰等會同阿桂永貴酌辦從之。○吏部議覆江寧布政使彰寶奏。請嚴地方官承辦欽部事件。遲延處分等因。查屬員事件遲延。該管府州不行揭報。例應分別議處。不及一月者。罰俸三個月。一月以上者。罰俸一年。其

有遺漏不行查叅者。應如所奏。將遺漏請叅之府州。於揭報遲延處分外。再照不行詳查例。罰俸六個月。遲延不行查叅之府州。照徇情例。降二級調用。府州查叅。而司道不行開報。將該司道亦照府州例。分別議處從之。○湖廣總督蘇昌疏報。勘實保康鶴峰二州縣乾隆十五年分。開墾旱地二十頃七十五畝有奇。○庚辰

上詣暢春園。問

實錄卷六三四

十七

皇太后安。○以病休之廣西思州土知州黃觀璉子繁襲職。○辛巳。諭軍機大臣等。舒赫德等奏稱。葉爾羌領隊大臣公豐安。因有派往伊犁馬兵三百四十名。懇請帶往効力。若蒙俞允。現在喀什噶爾。有護軍統領德爾素。富虎。俱係副都統職銜。請簡一員領隊。其派往伊犁綠旗兵一千名。請照阿桂咨調。交副將國柱帶領等語。豐安既願在伊犁効力。著照所請前往。葉爾羌領隊員缺。著德爾素調補。

其派赴伊犁綠旗兵亦准令國柱帶領約束前往。○又諭曰舒赫德奏稱吐魯番回人向無租賦自安西移駐以來借官穀一千石為籽種每年交穀四千石因與官兵分種故穀石未能足額今官兵既經遷移請將吐魯番開展等處屯田酌足留兵之用其餘賞給回人令將穀石照數交納等語昨據德爾格奏將此項地畝賞給回人未將從前曾借官穀之處聲明朕以開展等處屯田係官為開墾不便無故賞給著舒赫德查辦今既查有應交穀石著加恩將開展托克三喀喇和卓等處遷移兵丁間曠地畝除酌留足用外餘俱賞給吐魯番回人耕種其數年來所缺官穀理應照數補還但恐有妨伊等生計亦著加恩豁免仍宣諭回人嗣後官穀四千石務宜如數交納不可似前虧缺俱著傳諭知之。○又諭曰舒赫德奏稱希布察克布魯特額穆爾比從霍罕來投恐霍罕額爾德尼伯克有

實錄卷六十四

十一

使人前來如但索伊所給額穆爾比回人即查出給還若額穆爾比在霍罕有為匪情事又經來文叙及似未便安插辦理等語前據海明奏額穆爾比遣使歸誠朕即降旨嘉獎賞給頂翎令與散秩大臣阿奇木一處游牧以伊並非霍罕屬人不過因回部擾亂暫時依倚今西域蕩平俱為臣僕其在霍罕與來喀什噶爾相同額爾德尼伯克果遣人索取即當以此曉示舒赫德所奏其意蓋不欲如此辦理在準噶爾未亡時尚可藉口今視霍罕亦如準噶爾乎此特漢人恐啟邊釁之習氣由今觀之有何邊釁之可啟耶著傳諭舒赫德等仍遵前旨將額穆爾比令與阿奇木一處游牧所領回人內果有霍罕所屬自當查覈發還但不可聽一面之辭即行給付若額爾德尼伯克遣使索取額穆爾比則諭以額爾德尼伯克與額穆爾比俱屬輸誠內附並無分別如額爾德尼伯克欲投來內地亦

實錄卷六十四

十一

即加恩安插俱著遵照辦理○福州將軍舍圖肯奏福州駐防漢軍兵出旗為民一案前經軍機大臣議准暫行存留遣閒散滿洲人等操練俟熟習者多再行陸續改補等語現將三江口水師營漢軍兵弁照原奏陸續出旗但查駐防兵一千名內甲缺尚不敷挑實無撥往水師營操演之人三江口水師營漢軍兵弁請照原議暫留數年後另戶滿州生齒日繁俟其年力強壯可得五十名時另行奏請以五十名為一隊前往水師營充補如不敷照原奏將漢軍人等出旗調撥閩省綠旗水師營即以此缺挑補閒散滿洲由滿洲內將可以彈壓兵丁者揀派一員暫行遣往水師令其操練遇水師營員弁缺出充補其水師營六百十名兵照此辦理得旨著照所奏行○吉林將軍恒祿奏伯都訥副都統傳良咨稱查伯都訥旗民雜處盜賊人命頗多向無監獄罪人分於四門堆房看守易致脫

逃請設立監獄由驍騎校內擇平素勤慎之人管理得旨依議行○山東巡撫阿爾泰疏報新城高苑博興等三縣乾隆二十四年勸墾水田六頃三十三畝有奇○以廣西按察使曹繩桂福建按察使富明安對調○壬午上臨大學士蔣溥第賜奠○癸未上詣暢春園問皇太后安○諭軍機大臣等據吳達善奏儀封縣馬家店料廠失火延燒工料一摺此事實河工向來所未有該處險工甚多貯料豫防最關緊要典守官自應加謹守護即偶然失火而料廠附近水次亦何難及時撲救竟至延燒一百五十三垛之多看來其中必別有情弊非官弁等有挾仇傾陷等事即該通判自有虧空難於彌補借此以為掩飾之計此等弊竇與尋常疎防者不同其風斷不可長所有被燒料物照例著落該通判賠繳自不待言仍傳諭吳達善務將延燒實在情由詳

悉究出。據實具奏。○又諭曰。楊應琚奏。哈密巴里坤二處。尚存糧七萬餘石。可敷二千官兵。暨過往員役六七年供支。此外附近哈密屯田。歲收糧數千石。又可接濟至安西官兵向來止撥本色數百石。現在各該縣倉糧充裕。有備等語。前諭該督等籌運糧石。原為哈密巴里坤等處官兵接濟之計。今既稱充裕。即停運關展等處餘糧。亦無不可。而該督復有嗣後各回部往來貿易。寧使多為運貯之

平定奏卷三十三

語。又未免因前降諭旨。意存遷就。朕辦理庶務。惟以隨事制宜。歸實際為要。初不拘執成見。如果內地需糧接濟。即當輓運屯田餘積。若本不需用。而必強符前說。致糜運費。又何如即留之本處。不必官為經理之。尤得乎楊應琚所奏。安西折價一摺。現今軍機大臣議奏。此摺所奏。亦未甚明晰。著一併傳諭該督知之。○甲申月食。○諭廷試為策士鉅典。上年因朱嵇條陳議定章程。引見前列十名。

親定甲第。並先期令讀卷官會集文華殿。悉心校閱。其制已為周備。惟是增派王公大臣及御史等監試一節。在讀卷諸臣有事讀卷而從而監之者。終日坐視。此不過防其爭執。把持耳。然各人意見。時有不同。勢難禁其折中商榷。亦無取其同聲附和也。若云把持獨斷。則今日尚覺鮮有其事。即果有之。亦非監試數人所能察。諸事朕惟務實。有名無實。不如不為。自後王公大臣御史。均毋庸如朱嵇所云增派。因思諸臣讀卷。向俱各加圈點。分別標識。其間即各有參差。不過如上之適中。中之適下。品題不無互見。當不至相去懸絕。其或相去懸絕者。必各存成見。有高下其手之弊。應自本科為始。俟臚傳事竣。禮部即將讀過試卷。請旨另派大臣覆行察看。如有標識懸絕者。即行指明。進呈候旨。庶諸臣不敢稍以私意抑揚。鑑別益昭。公慎。又讀卷官所進策目問條。向有由內閣豫擬之陋。例漏洩。

平定奏卷三十三

揣摩不可不防其弊。應一概禁止。屆期令讀卷官密擬策問進呈。候朕裁定。發齋刊刻。著為令。諭軍機大臣等。西路効力贖罪之員。向無得項。但俱以大臣職銜到彼辦事。若廉俸全無。難免拮据。鄂寶、阿思哈俱著賞給一半養廉。著為例。又諭曰。楊應琚奏稱。由寧夏等處採買羊解送庫車。阿克蘇、葉爾羌、喀什噶爾等城。每隻需銀三四兩不等。由巴里坤採買喀爾喀羊。每隻需銀二兩等語。從前由內地買羊解送各該處。原因巴里坤等處採買維艱。今巴里坤既可購買喀爾喀羊。且較內地省價一倍。不如向彼採買。著傳諭楊應琚、五吉等。嗣後庫車、阿克蘇、葉爾羌、喀什噶爾等處口糧羊。俱由喀爾喀採買。不必取給內地。再現在支放各處駐劄官兵口糧。彼處米石雖屬充盈。然官兵不得肉食。亦覺難堪。一年之間。八月支放米石。四月散給羊隻。甚為妥協。固不可因羊多即行多給。亦不可

減於此數。將此并傳諭各該處辦事大臣遵行。○叅贊大臣舒赫德奏稱。臣等奉諭。酌將葉爾羌等城官兵移駐伊犁。本年已派阿克蘇等處馬兵一百五十名、綠旗兵四百名前往。俟麥收後。將葉爾羌等城馬兵移駐三百四十名。來年再於各城選派綠旗兵一千前往。其各城仍應留兵防守。查葉爾羌馬兵六百八十七名。酌派官四員、兵一百八十名。喀什噶爾兵五百名。酌派官二員、兵一百名。英吉沙爾兵一百六十名。酌派官一員、兵六十名。通計派出滿洲兵四十名、索倫兵一百名、察哈爾兵二百名。前往伊犁。其阿克蘇馬兵三百名、魯特兵四十三名。僅足差遣。毋庸派撥。又查綠旗兵、葉爾羌九百四十名、喀什噶爾八百四十一名。俱酌留六百名。英吉沙爾三百八十六名、和闐三百名。俱酌留二百名。餘兵八百六十七名。尚不足兵一百三十三名。酌將烏什兵二百五十名。派出一百名。庫車兵三百

名派出三十三名發往伊犁其阿克蘇綠旗兵六百餘名賽哩木拜一百五十餘名毋庸派撥其馬兵騎馱牲隻之例官給馬三駝一兩兵合給馬三三兵合給駝一至葉爾羌等處補額馬匹請將巴里坤送馬二千調撥一千前往又續調之綠旗兵所需軍裝馱載請於各城餘糧內購辦并雇覓協濟其行糧既有臺站豫備仍酌給羊隻自可不需裹帶得旨軍機大臣議奏尋議葉爾羌等城回人自歸附以來尚屬守分安生無需多兵駐劄應就近調往伊犁今舒赫德遵諭酌量抽調所有撥給馬駝調取補額馬匹等事俱應如所奏辦理惟原議調往綠旗兵一千近據阿桂奏請若多調回人一千即可減綠旗兵之額現交舒赫德等酌議仍俟奏到日請旨從之

實錄卷六百三十四

三

大清高宗法天隆運至誠先覺體元立極敷文奮武孝慈神聖純皇帝實錄卷之六百三十四

實錄卷六百三十四

三

大清高宗法天隆運至誠先覺體元立極敷文奮武孝慈神聖純皇帝實錄卷之六百三十五

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣廣桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部三庫事務

世襲騎都尉軍功加十九級隨帶加二級又加二級量指內大臣戶部尚書鑲黃旗滿洲都統軍功紀錄次

尋常紀錄十四次臣德璉經筵講官太子少保工部尚書紀錄六次臣曹振鏞等奉

敕修

乾隆二十六年辛巳四月乙酉諭本年恭逢

聖母皇太后七旬萬壽普天同慶特開

萬壽恩科所有應試舉子年在七十八十以上

者雖未經入彀而耆年宿學恭遇

盛典宜沛渥恩以廣

慈福八十以上之李勉王問政張揆紫麥國樹

黃賢瑚王浩戴王訓俱著賞給翰林院檢討

職銜七十以上之盛大業陳士玉張叙李珩

胡寶璣王天權謝勅典桂繼良周惟邁黃師

圖楊步青孔傳桂呂烜王玠黃淑尼張雄圖

程秉禮魏需牧俱著賞給國子監學正職銜

○直隸總督方觀承疏報勘實薊州良鄉乾

隆十五年分報墾熟地二頃六十一畝有奇

○予故江南河道總督白鍾山祭葬如例諡

莊恪○丙戌

孝端文皇后忌辰遣官祭

昭陵○諭軍機大臣等前據吳達善奏秦河南

鹽道衙門收受公費一案當經降旨即令徹

底根查今據該撫奏到歷任道府廳縣得受

銀兩已屬確實現在拘提質審所有伊等任

所原籍貲產家財著各該撫即速查封以便

將來完交贓項毋使稍有隱匿寄頓將此傳

諭知之○丁亥諭朕恭奉

皇太后慈輦南巡途次建設行宮不過足供頓

宿原無事過於勞費乃揚州所建行宮從前

吉慶為鹽政時其繕葺已覺較華而普福任

內必求爭勝於吉慶今聞高恒所辦則又意

在駕普福而上之踵事增華長此安窮朕向

來巡幸所至一切供帳俱取給於內帑從無絲毫累及閭閻前後諭旨屢經諄諄及之中外臣民所共悉者商人亦吾赤子豈於百姓則恤之而於商人則累之耶雖伊等抒誠裏事實皆出於至誠亦應量為節制以省糜費至於兩淮鹽務經費浩繁商力不無拮据如豫提餘引一事從前吉慶係派之通綱而普福高恒則擇其奮勉辦事者以為酬獎之地其中即不能允協羣情其應作何立定章程著軍機大臣會同尹繼善吉慶高恒等詳悉妥議具奏尋議兩淮鹽銷額引一百六十八萬五千四百九十二道嗣因不敷逐年增餘引二十萬至四十萬道不等初次均攤衆商現在祇給辦差各商以致利澤不均臣等公議酌定章程餘引仍請均攤通綱各商行銷。外支銀宜分別樽節查乾隆六年議定每綱設外支銀四萬八千兩除辦貢一萬二千兩外餘三萬六千兩作為公用往來應

酬助恤等項亦取給於此查此項原為辦公而設交際私情未便濫銷嗣後辦公有餘歸入下年舊管數內一切應酬不得開銷。兩淮鹽政所辦常貢銀從前在間款項下提取無定數前議定一萬二千兩每季取辦貢物價呈報查覈如有特交辦物件許其在外支銀動給造冊呈報。兩淮鹽政衙門費用從前並無定數自雍正十二年酌定鹽政養廉銀一萬五千兩總理鹽政總督養廉銀三千兩鹽運使六千兩查總督養廉前經楊超曾任內奏准作為本衙門公用運使養廉已於乾隆十二年裁減二千兩歸公至鹽政每年辦貢已有外支銀一萬二千兩所有養廉亦請酌減五千兩歸公。各處辦鹽匣商漢口為最漢口匣商取用銀並在衆商派出鹽課內扣派往往指稱公用任意開銷嗣後鹽政運使宜加意查察如有必需公札到日方准開銷。行銷鹽引宜分別綱食不得濫行

通融其綱鹽行銷江廣者。仍照江三廣七之例銷售。各處設立卡商。首在助官緝私。川卡尤為緊要。川卡查緝不嚴。則川私全入楚地。而私鹽走漏。其弊首在場竈。鹽場各官。及各口岸營汛。務須實力稽查。毋令偷越。如卡商故縱私販。即以官法究處。從之。○又諭。河南鹽道衙門。收受公費一案。前經降旨。令該撫詳悉根查。今據吳達善奏。歷任道府廳縣等官。及書役家人。得受銀兩。俱屬確實。請旨革職。以憑提究等語。著照所請。將朱若東。鄧錫禮。蘇壽寧。張任莘。王執玉。商思忠。王家憲。俱著革職。交各該撫押解赴豫。以便質審。其通判張任莘。捐陞候選在部。參革知府金樹屏。現經回籍。亦著一併解往。○吏部議覆。陝甘總督楊應琚疏稱。前議裁大通衛。歸德所之衛備。查大通在西寧府治西北。東西二百七十餘里。南北四百三十餘里。幅員甚廣。衛備既裁。距各屬州縣。並皆寫遠。自應遵旨

另設州縣等語。應如所請。將距西寧寫遠之北川。新添堡等處十八村莊。撥歸大通管理。改為縣治。知縣之外。應設訓導典史各一員。查高臺縣現設教諭訓導各一員。該縣留教諭一員。其訓導移新設之縣。請添設典史一員。改設之縣。地處極邊。請定為沿邊繁難要缺。在外於現任知縣內揀選調補。至歸德所距西寧三百餘里。請改設西寧縣丞分駐。該處亦係臨邊要地。所改縣丞員缺。應請於現任縣丞經歷內揀選調補。從之。○戶部議覆。雲南布政使顧濟美奏。請離任官員。有應追銀。於原籍通省內確查結報。方准題免等語。查離任官。凡有應追之項。令任所督撫查明。並無隱寄。取具印結。移咨本旗。本籍確查後。本旗。本籍加結題免。定例已屬周詳。若如該布政使所奏。於原籍通省一一關查。恐承追之員。恃有此例。得以卸責。隣封轉致查追不力。應毋庸議。得旨。依議。部駁甚是。此等行追

之項。原因貪婪無恥之輩。詭計寄頓而設。彼既無恥詭寄。即不必過而問之。亦未嘗不可。然國家設法。不得不防其濫。亦惟在督撫。及承追地方官實力查察。倘有司奉行不力。該督撫原可據實參奏治罪。若必多設科條。關查通省。究亦不過具文塞責。於實政有何裨益耶。○戊子。

上奉

皇太后幸靜宜園駐蹕。至辛卯。皆如之。○諭軍

機大臣等。據書山等奏。庫車。沙雅爾。每年交納官糧。及官借籽種。所收糧數。共三千一百四十餘石。除支給官兵口糧。飼秣臺站馬駝外。尚餘一千餘石。以備接濟往來官兵等語。庫車既有餘糧。諒各城自不少。往來官兵。未必需用如許。與其存貯虛耗。或酌量減價。折給官兵鹽菜銀兩。既於伊等日用有益。而官糧亦不致陳積。朕意伊犁回部各駐劄大臣。俱當照此辦理。若該處情形不便。亦即據實

陳奏。著傳諭舒赫德。通籌各處情形。是否可行。酌議具奏。○軍機大臣議覆舒赫德等奏。稱由回子地方馬兵內揀派三百四十名。步兵內揀派一千名。遣往伊犁外。其餘馬兵一千三百七十名。步兵二千七百六十七名。共計兵四千一百三十餘名。分駐各城。視各城之大小。酌量辦理。其伊犁添設兵。亦量彼處收穫數目。陸續移駐等語。現在回城駐兵。即

營兵六百名。喀什噶爾馬兵四百名。綠營兵六百名。英吉沙爾馬兵一百名。綠營兵二百名。阿克蘇馬兵三百名。綠營兵六百名。和闐綠營兵二百名。烏什綠營兵一百五十名。庫車綠營兵二百六十七名。賽哩木。拜城綠營兵一百五十餘名。各守倉庫城郭。以備出卡差委。將揀派馬兵三百四十名。俟收麥後。遣往伊犁。得旨依議。速行。○戶部議准漕運總督楊錫綬疏報。袁州衛幫旗丁王吳。船糧於

湖口縣洋江梅家洲遭風漂沒無存請照例豁免從之。○蠲緩湖南常寧耒陽零陵祁陽東安道州寧遠新田郴州永興桂陽臨武等十二州縣乾隆二十五年旱災額賦○以故科爾沁和碩親王扎木巴勒扎木素子恭格喇布坦襲爵○予故輔國公三都克扎布故輔國公巴桑並祭葬如例○予追贈都統品級端濟布祭葬如例并入祀昭忠祠諡壯節○旌表守正捐軀之江蘇高郵州民靳雄妻

趙氏河南襄城縣民盛國士女盛氏○已丑甘肅巡撫明德奏前奉旨撥運川楚錢解甘協濟兩年以來已撥到錢四十餘萬串正月內因河東錢價大減業請將湖南湖北兩省停撥今河西錢價大平川錢亦請停撥得旨著照所請行○以大學士來保協辦大學士鄂彌達劉統勳兵部尚書梁詩正左侍郎觀保刑部尚書秦蕙田左侍郎錢汝誠都察院左都御史劉綸入覲兩江總督尹繼善為殿

試讀卷官○山東巡撫阿爾泰疏報勘實蘭山縣乾隆二十四年分開墾旱田共一百三十六頃九十六畝有奇○豁除山東鄒平魚臺冠縣館陶蘭山等五縣砂石荒下地共四頃八十三畝有奇額賦○旌表守正捐軀之山東利津縣民張文生女張氏○庚寅上閱健銳營兵○策試天下貢士陳步瀛等二百一十七人於太和殿前制曰朕寅奉天命式承丕基緬惟古昔帝王制治求寧履謙

持泰載稽典策如見其心朕早作夜思勤求邇理而撫躬省治弗敢自安乃者集慶迂麻諸福駢翕疆宇頌其式廓雨暘順以節宣當康永懷惟增祇惕爾多士際

慈壽之維祺應賴薪之雅化魚魚闕下當必有明於經術通於吏道審悉乎程材訓俗之端者其誦厥志以達予聰夫學者載籍極博必原本於六經易有四尚詩有六義書有古今禮有經曲春秋有三傳能舉其大義詳其條

貫歟。注一也。而有曰傳。曰箋。曰學。曰集解之別疏。一也。而有曰釋。曰正義。曰兼義之殊立。博士者。或十四人。或十九人。先後何以不同。立石經者。或一字。或三字。紀載何以互異。多士亦能洞悉其源流。而畧陳其梗概否也。朕崇尚經術。時與儒臣講明理道。猶復廣厲學官。靳得經明行修之士而登之。其何以克副期望之意歟。致治要在審官。考課之方。代詳其制。論者謂自漢以前。大率詳於外吏。而畧

於京朝。然觀成周六計弊吏。而日要月會。歲計不遺六官之屬。兩京以六條察二千石。丞相御史。雜考郡國計書。而在三府者。光祿勳。歲行進退。至唐京官之考。主之郎中。外官之考。主之員外。其後先法制同異。可晰言之歟。邇者慎簡長吏。既令督撫舉堪任郡守之材。武途副將以上。甄擇入告。其在京曹司。復飭堂上官於會同察計外。各疏其賢否。用資校覈。何道而使人揚其職。羣僚敦行實。大臣稟

虛公也。進士一科。得人為盛。伊古然矣。卿尹大夫。皆由此其選。始進能無慎乎。乃行之既久。而文體或猶未盡淳。士習或猶多浮尚。豈風會使然歟。抑法制有未盡善也。臨軒策士。要以遴拔真才。是在司事諸臣之共襄公慎耳。然而以水濟水。其何能益。和而不同。古大。臣每矢勵厥心。見諸言論事績者。可舉似一二端歟。今既更易舊制。宜積習肅清矣。又何以使崇實去華。科名稱極盛歟。服勤尚儉者。

民生風俗之原也。比歲海膺

鴻貺。閭閻應時。西域新疆。屯收充羨。食貨可幾漸裕矣。而年豐易滋游手。糶賤兼恐傷農。生穀止有此數。服食侈靡者耗之。法制禁防既難盡及。迨頓積居奇。而耗於商賈者半。採買翔湧。而耗於吏胥者又半。司民牧者。將開源節流。使生者不匱。而用者不奢。道果安在。凡此數端。溯經籍之源流。察官聯之課最。士尚先資拜獻。農知務本力田。諸生講肄有年矣。

其以所得者悉之究之。朕將親為裁擇。且覘夙抱焉。○諭軍機大臣等。據高晉奏。雲南委員唐思等解運京銅。於清河縣地方沉溺八萬七千觔。經協運委員馬昌業雇募水夫。共撈獲正耗銅八萬八百六十餘觔。其未獲銅觔。照例回滇賠補等語。銅船偶遭沉溺。地方官自應協同委員督率夫役打撈淨盡。方為實心辦事之道。此項沉溺之銅。既已撈獲八萬有餘。則此七千餘觔。何以化為烏有。難保無夫役乘機偷竊之弊。況委員雇募之夫。呼應既已不靈。當其打撈時。安知不留銅水底。謊報撈完。俟銅船開行之後。逐漸撈出。售賣不然。或係解員船戶等。已經沿途盜賣。借詞撈失。以少報多。亦未可定。種種弊端。皆情理所有。惟在地方官悉心查辦。如果夫役偷竊。固當設法嚴懲。即解員盜賣。亦應根究著實。若以賠補有例。即據申報了事。設或夫役有弊。何以服解員之心乎。從前吉慶陳奏稽察

解員銅船船戶一條。朕所降諭旨。最為明瞭。若督撫等僅如此辦理。是又屬虛應故事之具文矣。此項未獲銅觔。是否夫役偷匿。抑或解員盜賣。著該督詳細查明具奏。將此傳諭高晉知之。○又諭曰。楊應琚請停運闡展等處餘糧一事。並未計及哈密。巴里坤等處官兵口食。及將來接濟之法。僅援引安西駐防一處折價與駝運脚費較短。絜長。辦理全未中窺。軍機大臣已經議駁。今又據納世通奏。哈喇沙爾一年收穫米穀九千餘石。除支用外。可餘四千餘石。請照烏魯木齊例。雇覓回空商駝運送巴里坤等語。是裒屯田之糧。節內地之費。實為一舉兩得。而楊應琚所奏。則援綠旗兵折價二兩二錢之例。欲議概行停運。試問哈密等處辦事大臣官兵。豈可盡照綠旗兵例。專給折色乎。將來安西官兵移駐巴里坤。若從內地裹帶前往。此二兩二錢之數。是否半本半折。抑係全給折價。并合之借

給購辦孳生牲畜。每石合價若干。且向據地方官奏報糧價。肅州安西等處。每石不下五六兩有奇。今折給之數。不及三之一。此數年來。官兵等但恃此不足糴食之折價。亦豈能支。此處朕殊不解。且與其令伊等向內地糴買。拮据何若。就便於闡展等處。轉運之為得乎。楊應琚所奏。全未明晰。著再行傳諭。令其詳悉確數具奏。○辛卯。軍機大臣議覆。叅贊大臣舒赫德等奏。請給闡展哈喇沙爾庫車。

烏什。和闐。英吉沙爾六處印記等語。臣等前奉旨用清漢篆文。及回字。鑄給新疆駐劄大臣關防。其伊犁。烏魯木齊。葉爾羌。喀什噶爾。阿克蘇。業經鑄給外。闡展等六城。雖較伊犁等處城小事簡。而辦公則一。應如所奏。亦用清漢篆文。及回字。鑄給印記六顆。從之。○署湖北巡撫周琬疏報。乾隆二十四年分。宜昌縣首墾下則旱地六頃三十四畝。○壬辰上奉

皇太后迴暢春園。○諭曰。尚書李元亮現在患病。著解任調理。李侍堯著補授戶部尚書。來京供職。兩廣總督員缺。著蘇昌調補。愛必達著調補湖廣總督。吳達善著補授雲貴總督。其河南巡撫員缺。著常鈞補授。溫福著補授倉場侍郎。李侍堯即速來京。不必俟蘇昌交代。○諭軍機大臣等。據德爾格奏。雇覓回空商駝運送米麪六百餘石至巴里坤等語。前因德爾格籌運闡展餘糧。經軍機大臣議。比較肅州運費。節省三分之二。是以行文交辦。嗣據楊應琚奏。哈密巴里坤糧石充裕。又經行文停止。著傳諭德爾格。嗣後不必運送。遵照續降諭旨。減價扣抵官兵鹽菜銀兩。其或不便。亦即據實具奏。○又諭據阿桂奏。護送伊犁屯田回人之阿克蘇回人頗拉特等事。竣後行至濟爾哈朗河脫逃。已行文嚴緝。但準噶爾舊例。伊犁逃出回人。嚴拏治罪。回人逃來伊犁。即行安插。若頗拉特係仍至伊犁。

可否照舊辦理等語。伊犁既向有此例。著照前辦理。但此內有從回地犯罪。逃來伊犁者。仍當究明嚴懲。不可姑息容留。并傳諭舒赫德等知之。○直隸總督方觀承奏。延慶衛並無漕政。衛備議裁。所有一切事宜。歸并附近

之延慶州管轄。查昌平州判本任無專管事務。請移駐居庸關。改為延慶州分防州判。兼管驛務。衛備衙署作為州判衙署。地丁錢糧。令新設之延慶州州判就近代徵。居庸關

等處常社義三倉米穀。亦令該州判就近看守稽查。該衛回贖民典旗地租銀公產地租。均令該州照案辦理。現在節年屯糧。應歸該州存貯。其延慶衛學訓導係昌平訓導改設。今應仍歸昌平。其延慶州訓導改為延慶州鄉學訓導。移駐居庸關。其所進文武生額。及考補廩貢。悉照舊辦理。文武生童考試。另編鄉學字樣。歸并宣化府考試。延慶衛原設額引八百三十七道。照舊行銷。其奏銷考成。悉

歸該州考覈。延慶州知州一缺。原議銜難中缺。今延慶衛既經歸并。請改為銜繁難要缺。註冊在外揀選調補。其新設延慶州州判。應鑄給延慶州分防州判銓記。亦以要缺註冊。在外揀選調補。下部議行。○癸巳。

上詣暢春園問

皇太后安。○還宮。○御乾清宮。召讀卷官入。閱殿試進呈十卷。親定甲第。○諭曰。愛必達已調補湖廣總督。著即赴新任。其雲貴總督印務。著劉藻暫行署理。常鈞俟託庸到日。再赴河南。吳達善俟常鈞到豫交代後。再赴雲貴總督之任。○諭軍機大臣等。李元亮現在患病。已降旨解任調理。伊子李侍堯補授戶部尚書。著即來京省視矣。但恐部文到粵有需時日。著將諭旨鈔寄李侍堯。接到日。即行束裝起程。不必守候部文。○又諭豫省鹽道衙門收受商人公費一案。前已降旨。將鄧錫禮原籍家產查封。今據胡寶琮查奏該員家中

所有田產房屋無幾。此外別無留存物件。鄧錫禮久任道員。所有未必止此。或係攜帶任所。亦未可定。著傳諭開泰將伊任所一切貨財。嚴行查封。以抵完繳贓項。倘有隱匿寄頓情弊。惟該督是問。○又諭前吳達善奏儀封縣馬家店料廠失火延燒工料一事。恐其別有挾讎傾陷。及該通判借以掩飾虧空情弊。因令其查明實在情形具奏。今據奏到查無挾嫌掩飾等弊。實係河兵林有才吃烟失火所致。現飭該通判嵇瓚認賠辦理等語。河工貯料最關緊要。自應先事豫防。加謹守護。方免疎虞。迨至失火貽誤。即將該管員弁著落賠繳。如遇嵇瓚尚能即時完繳者。雖不致虧帑項。罹重罪。而其人已受累。物力亦可惜也。若因此而不令賠補。滋弊必甚。國家亦無此體制也。此案失火之河兵林有才著該撫嚴行治罪。以為衆戒。嗣後各處河工凡有防險貯料等所。傳諭該河督等務須嚴飭典守員

弁不時往來巡查。毋許守夜河兵等任意喫烟。致有貽誤。倘奉行不力疎忽玩視。即將該弁丁等從重叅處。以示懲儆。著將此傳諭吳達善并方觀承高晉張師載等知之。○又諭曰。吳達善查奏蘆鹽公費一案。據開應奏叅各職名。分別叅處。所有歷任失察之巡撫。祇有圖勒炳阿及護撫劉燧而未及胡寶瑤。此案雖起於圖勒炳阿任內。劉燧亦經兩護巡撫篆固有應得處分。但胡寶瑤撫豫三年。漫

無覺察。亦難辭咎。將來定案之時。著一併叅奏。交部議處。○廣西巡撫鄂寶疏報勘實乾隆十九年分鬱林州開墾水田六頃三十九畝有奇。○甲午

上御太和殿傳臚。賜一甲王杰胡高望趙翼三人進士及第二甲蔣雍植等六十六人進士出身三甲沈琳等一百四十八人同進士出身。○辛圓明園。○乙未刑部議准兩江總督尹繼善奏請嗣後審理盜案除大盜情

法俱無可寬。仍照定例。不分首從。悉擬斬決。外其尋常盜劫。未經傷人之夥犯。或轉糾黨羽。持火執械。塗臉入室。搜索財物。到案誣扳良民。及上盜已至二次者。與首犯一例擬斬立決。其止在外賸望接應。并被脅入夥。及年未成。丁或止行劫一次。照情有可原例發遣。再強盜內有為首傷人。傷輕平復。自行投首。改擬斬監候。至江洋大盜。較陸地劫奪更重。請無分首從。均擬斬立決從之。○丙申

上御勤政殿聽政。○詣暢春園。問

皇太后安。○諭曰。按察使阿永阿著遣往哈密。更換永寧。阿永阿到時。永寧著暫留彼處。俟今年入覲。回子過後。再行回京。○諭軍機大臣等。鐘音題叅在籍。知縣馬馨違禁滋事。一本既請革去職銜。復請交部察議。而內閣竟依樣票擬。均屬錯謬。夫所謂交部察議者。即指降革而言。若業已革去職銜。則當云交部治罪。尚何察議之有。且馬馨以職官身犯賭

博。復容留匪人。招搖撞騙。如果情節確實。自有應得之罪。亦非僅予察議所可了事。鐘音歷任年久。於此等具題事件。亦當詳慎檢點。何憤憤若此耶。此案馬馨已降旨革去職銜。交該撫審擬具奏。鐘音著傳旨申飭。○四川總督開泰等奏。金川土舍旺扎勒係郎卡之弟。投誠後。補授裏塘額外副土司。前因金川與革布什咱構釁。臣等以打箭鑪逼近革布什咱聲息易通。將旺扎勒押赴泰寧協駐劄之化林坪。交副將等收管。該番自抵化林坪。甚屬守分。本年二月赴省來見。臣等思革布什咱夷務已竣。若將該番遣回裏塘。該處既有正副土司。轉成贅設。且裏塘遠隔邊外。照料難周。臣等會同商酌。請將旺扎勒即安插化林坪。仍將裏塘每年應得額外土司養贍。照數撥給。俾各番知歸順者獲享安全。更為有益。至布拉克底土舍德租已死。其兄安多爾接管地方。聞安多爾及屬下番民。俱不願

與金川聯絡。臣等以土司狡詐難信。仍諭該處員弁隨時體察。不得以夷務已竣遂為忽視。報聞。○以原任倉場侍郎雙慶為內閣學士兼禮部侍郎。○以署鑲紅旗蒙古副都統鄂爾奇達遜為正黃旗蒙古副都統。○豁除陝西朝邑縣水衝地八十七頃一十四畝。廣西鬱林州沙石田一頃八十三畝。有奇額賦。○丁酉諭熱河現有應辦厄魯特及各蒙古喇嘛事務。富當阿恐不能勝任。著額勒登額補授熱河副都統。所遺正藍旗蒙古副都統員缺。著富當阿來京調補。○軍機大臣議覆。吉林將軍恒祿奏請派理藩院官員前往伯都訥辦理蒙古盜賊事務等語。查伯都訥地方人命盜賊事務簡少。非庫倫恰克圖青海哈密等處可比。況理藩院司官有限。而各處差使甚多。豈能按年遣往。應請交理藩院由筆帖式內揀選能員。授為額外主事。三年一換。若三年之內。辦事妥協。該將軍保奏實授。

主事如行走平常。叅奏治罪。至吉林僅有重大事務。應如所奏。派理藩院司員馳驛會同刑司辦理。再伯都訥有巡檢一員。每年除經收地丁錢糧外。並無餘事。且滿蒙雜處之區。令漢巡檢居住。於地方無益。應如所奏。裁去此缺。其地丁錢糧。交副都統衙門承收。照例送交將軍衙門。將巡檢所居之屋。即給派往官員居住。再查由理藩院前往哈密瓜州青海庫倫恰克圖等處。辦理蒙古回子事務。司官等皆酌量道路遠近。每日給盤費銀二兩一兩五錢。及一兩不等。今伯都訥地方以筆帖式授為額外主事。遣往。請照駐劄青海等處司官。應給一兩五錢銀內減半。每日給銀七錢五分。即由地丁錢糧銀內支領。從之。○戊戌諭曰。定長未到之前。兵部右侍郎事務著總管內務府大臣德保署理。○是月倉場侍郎裘曰修。蔣炳議覆。查薊運大河現在深通。並無淤淺之處。自可毋庸挑濬。惟白龍港

至薊州五里橋計程一百四十餘里河道北高於南每年糧船經過必俟五六月間山水長發時始可進行抵次否則流沙壅塞隨挑隨淤即使大加挑濬亦屬終於無益請嗣後薊糧船隻定限令於三月下旬抵新河南口四月初旬即出北口二十日以前抵白龍港一俟山水長發即乘水輓運前進既抵水次定限於五日內開兌十五日內按限兌竣統計抵次至回空總不得逾二旬以外開兌時或兌不足數或米色不純以致不能交兌誤限責令該地方官隨時揭報如地方官有藉端勒指遲誤定限等弊許領運押運各員并揭報查叅臣等屆期遴委妥員監收得旨所奏是依議○又奏自撤去天津巡漕後天津以南漕務歸并濟寧巡漕濟寧距天津一千四百餘里勢難兼顧請於通州漕臣寧泰朱續經二員中欽點一員駐劄天津辦理一切俟全漕過天津後仍回通州奉硃筆點出朱

續經○江蘇巡撫陳宏謀奏寶蘇局鑄務向歸駐劄上海縣之蘇松道總理隔遠難以稽查請改委蘇州按察使就近總理得旨如所議行○江南河道總督高晉奏查山安廳屬北岸之高家莊上年大水外灘潰塌現於該處工頭相機儼下藏頭埽一個以備挑水進埽之用將工尾兜水浮灘隨勢挑切大溜逐漸開移并嚴諭專管廳弁時刻加謹防護務期有工不致誤事無事不使生工得旨二語實至當最要關鍵當善守力為之○江西巡撫胡寶瑤奏河南鹽道衙門私派公費一案臣毫無覺察罪無可逭請將臣革職治罪得旨汝實不為無罪但朕不以一過棄人長汝其勉之若復有似此之過則朕亦不能為汝寬矣○山東巡撫阿爾泰奏濟寧州之牛頭河納鉅嘉濮范等州縣之水自西北而來由河歸湖為上游尾閭向無隄岸今於東岸築隄遏水南流以入於湖又築橫壩以防倒灌

蘭鄯二縣境內有續挑之響水層河等溝河二十五道導窪地之水入於沂沭武燕等河由邳州入運並已工完報竣得旨嘉獎○山西巡撫鄂弼奏太原省城駐防滿營城守尉一員歲僅支俸銀一百三十兩米一百三十斛今春駕幸五臺荷蒙詢及令酌給養廉今議照直隸保定城守尉例歲支養廉二百兩得旨如所議行○陝西巡撫鍾音奏前因軍興將內地額設驛馬由先後撥協馬五百一

十四匹今應如數撤回但各處駐劄大臣並有齎遞事件請於沿邊各站酌留一半其一半撤回報聞○甘肅巡撫明德議奏查從前遞解遣犯屢有脫逃緣甘省地廣站長州縣之有監獄者即行收禁其餘各站皆係住宿坊店易致脫逃今請於沿途各驛酌添閒房二三間作為監房遣犯一到即行收禁今在驛書役協同看守其有營汛處所即令該員弁巡查如有疎虞照州縣例叅處得旨所議

甚是依議○又奏查巴里坤哈密安西三處遣犯甚多難以安頓嗣後各省遣犯請停止分發巴里坤等三處酌發闡展烏魯木齊屯所到配之日即令分派各屯照例給與口食得旨如所議速行○貴州巡撫周人驥奏查古州鹽埠自新增引五千九百餘道後約需成本萬有餘兩商力不給現有省城鑄局餘錢例應易銀歸款請將此項借資古埠商本報聞○又奏黔省白鉛原議每年酌撥二百

萬觔運赴漢口售供各省鼓鑄之用自後遞加至三百四十萬觔現今漢局鉛觔充裕請將加運之一百四十萬觔停止仍照原議每年撥運二百萬觔或有不敷即於新開河道所辦樂助福集二廠運漢鉛內分銷報聞

大清高宗法天隆運至誠先覺體元立極敷文奮武孝慈神聖純皇帝實錄卷之六百三十五

實錄卷之六百三十五

元

大清高宗法天隆運至誠先覺體元立極敷文奮武孝慈神聖純皇帝實錄卷之六百三十六

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加九級隨帶加二級又加二級 董誥內大臣戶部尚書鑲藍旗滿洲都統軍功紀錄五次
尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆二十六年辛巳五月己亥朔吏部議准

署安徽巡撫常鈞奏請嗣後銅鉛船入境或有沿途偷盜謊報沉溺等弊一經發覺將該地方官及派委員弁照失察盜賣漕糧例議處一起罰俸六個月二起罰俸一年三起降一級留任四五起以上降一級調用知情故縱叅革審究委員不親往稽查混差書役捏結搪塞者照徇庇例降三級調用一年內如能獲盜賣銅鉛人犯亦照拏獲盜賣漕糧例議敘從之○庚子

上詣暢春園問

皇太后安○內閣翰林院帶領庚辰科散館修撰編修庶吉士引見得旨修撰畢沅編修諸重光王文治補行散館之編修梅立本俱已經授職其清書庶吉士曹文填宋銑劉權之俱授為編修田玉成蔣曰綸芮永肩俱授為檢討其漢書庶吉士童鳳三王燕緒張世祿袁鑑王中孚張光憲裘麟俱授為編修藍應元張翥富森泰蕭芝陳夢元李臺劉經傳陳本敬俱授為檢討王顯曾錢受穀劉墀李瑞岡姜錫嘏孟邵孟超然俱著以部屬用魏大文達椿彭紹觀史大勳俱著留館教習謝敦源著歸進士原班銓選○諭安省之宿州鳳陽等各州縣衛節年未完各項銀糧應於二十五年完納以去秋間被偏災暫行緩至本年麥熟後徵收今該省二麥收成現在豐稔理應按數輸將但念新舊一時並徵民力仍未免拮据著再加恩將宿州鳳陽等處未完

地丁正雜銀兩並漕倉銀米以及民借籽種口糧俱於麥收時先徵一半其餘一半緩至秋成後再行徵收俾小民得以從容輸納以示體恤該部遵諭速行○又諭向來直省秋審成例相沿巡撫率同司道赴按察使衙門會同查審雖一切豫備陋規久經斥禁然以巡撫率屬並會司署隨帶員役究不無供應之煩非所以慎刑章而清吏治今常鈞奏明本年安省秋審現在會赴撫署辦理所見甚是嗣後各省均照此例行著為令○諭軍機大臣等常鈞奏請秋審人犯應在撫署辦理一摺事屬近理已降旨允行至所奏宿州鳳陽等各州縣衛未完各項銀糧緩至秋成後徵完一摺未免不能詳度情形有涉沽名之意安省上年雖間有偏災現在麥收豐稔民力不甚拮据地方有司自當隨時酌量調劑使逋欠不致壅積况該處民情視麥熟較秋收為重若於民力充裕時不令照例輸將遲

至秋成。設豐歉不能遽必。而轉責其全數完納。是非愛之。而適以困之矣。常鈞初任巡撫。諸事正當實心整頓。且此時將赴新任。更不應留此奏為悅人之舉。現已降旨酌量加恩。准其緩徵一半。可將此詳諭該撫知之。○又諭曰。高晉叅奏。桃源同知張樹玉。有覈減銀一萬八千三百餘兩。又賠補火燬蕩柴銀三千二百餘兩。均未完繳。請革職勒限嚴追。並著落該管上司分賠等語。河工向來積弊相沿。朕曾命劉統勲等徹底清釐。力為整頓。其事近在數年之內。一切發帑查工。自應遵奉章程。實用實銷。何得遽有任意浮開。覈減銀數。多至二萬餘金之事。看來必係前任河督白鍾山。與河道王鴻勳。及廳員張樹玉。俱係漢軍。其中不無彼此瞻徇。釀成此事。而王鴻勳以本道專管錢糧。承上接下。是尤為此案關鍵。高晉何得僅請將廳員奏請革追。而於浮冒覈減緣由。竟爾置之不問。且據奏著落

該管上司分賠一節。未免有自居膜外之意。試思上司為誰。在白鍾山固不能辭其責。而高晉獨非簡任副總河有年者乎。即尹繼善亦以總督兼管河務。雖比總河較輕。亦豈能袖手事外。况高晉乎。高晉著傳旨申飭。其此案該員因何冒領於前。上司等既毫無節制。並該員因何任意開銷於後。而上司等又不隨時查察。以致帑項虛懸之處。著高晉逐一根究確實具奏。毋得少有迴護。尋奏。查白鍾山平日於料物錢糧。甚屬小心。而張樹玉歲搶工段。辦理失宜之處。即嚴行覈減。復於大計案內。與臣商定。以才力不及糾參。河道王鴻勳於該員交代限滿。將未清錢糧查明。據實呈報。似均無瞻徇情弊。至臣身任副總河。而督臣尹繼善亦兼管河務。將來該廳覈減銀兩。若限滿不清。俱應一體分賠。前奏內並未聲明。實屬糊塗。得旨。謂後之揭報查參。非瞻徇可也。而前之姑容。亦非瞻徇乎。但白鍾

山已故。汝故為此和事老人之舉耳。若事事如此甚非朕所望於汝者。慎之。辛丑。

孝誠仁皇后忌辰遣官祭

景陵○諭軍機大臣等。據高晉奏江南標營現今應行買補倒缺馬匹。請仍照上屆之例。於明年例倒馬價內酌量通融借支。委員領票出口採辦等語。著照所請。令其自行動價採買。循照前例辦理。務於營伍差務均有裨益。可將此傳諭高晉知之。○壬寅諭據如松奏

稱各省操演陣勢皆照舊例不足以壯軍容。請將新定式樣賞頒遵照操演。再由健銳營前鋒內善過馬者派遣四名訓練綏遠城右衛兵丁等語。大閱操演陣勢係軍容所關。各省駐防兵丁理宜一體操演。著照如松所奏。交該部將二十四年操演陣勢奏摺及新定式樣一併頒發各省。令駐防兵丁一體操演。至過馬原係技藝之一端。與摺跤打鎗騎射騙馬等無異。儘可聽各處擇人訓練。其健銳

營過馬前鋒不必遣往。著如松即由本處擇人訓練。○諭軍機大臣等。據明德奏甘省河州皋蘭靖遠三州縣沿河水車損壞民間無力修補。請於司庫現存扣留運送賑糧腳價餘平內借給銀七千三百兩。俾得乘時修造。分年扣納還項等語。現在已交夏令大田正需灌溉。該撫等既查明皋蘭等州縣水車損壞。自應如所請及早辦理。至稱此項餘平銀兩免其撥用。即存貯司庫。以為每年借修水車之項。所奏非是。既田水車雖有關農工。究係民間私置之物。借帑修整。此在一時權宜則可。若必每歲借銀辦理。則無力農民將視為官辦。而不乘時自行修補。且將此項銀兩存貯在官。轉滋侵蝕混冒之弊。於民事究無裨益。著將此傳諭該撫知之。○又諭曰。舒赫德奏稱阿桂咨送奏稿。請派舊居伊犁回人一千戶。可減綠旗兵丁一千名。查從前所派回人雖已陸續起程。尚未完畢。若再行增加

恐不無勉強從事者。轉啟新附人等猜疑。請飭各城阿奇木等隨其所願。不必定以年限等語。所奏甚是。昨據阿桂請添派回人。朕意伊等既願來伊犁屯田。自可省內地兵力。命舒赫德酌定。今按奏內情形。知回人等甫經安集。不盡情願遷移。阿桂亦未能深悉。著將奏派回人。停其前往。仍令該伯克等查有願往屯田者。隨時遣發。其原派伊犁綠旗兵一千名。仍照舊辦理。○舉行乾隆二十五年大計。直隸、奉天、山東、河南、浙江、陝西、甘肅、江蘇、安徽、江南河員、河南河員、湖北、湖南、廣東、廣西、福建、四川、雲南、貴州、卓異官共一百四十員。分別陞賞如例。○癸卯禮部議准。山東布政使崔應階奏稱。每科殿試題名。係坊間市賣籍貫名次。傳寫多訛。恐滋別項弊端。請於殿試後。將金榜知照各省藩司。留為案據。至新進士引見錄用之後。吏部將用過幾員。歸班候選幾員。亦按照省分。開列名單。咨行各

省藩司立案。再順天鄉試中試舉人。除北員外。南北中皿貢監生中式者。各省藩司無可案據。嗣後請於順天鄉試榜後。行令順天府尹將各省中式舉人。副榜按照省分。開明籍貫名次。通行直省藩司立案。再拔貢朝考後等第名次。知照各學政外。亦請行知直省督撫存案從之。○甲辰。

上詣暢春園問

皇太后安。○諭據鄂弼奏。介休縣土棍郝士雄等聚眾械鬪一案。該縣陳之銓即帶領壯捕拏獲首從各犯。現在審訊得實等語。匪棍聚眾逞兇。最為風俗之害。有司遇此等案件。果能及時力捕。則重犯不致遠颺。而地方自然帖息。乃庸懦無識者。因循畏縮。反致釀成事端。其視陳之銓相去不已遠乎。陳之銓著該部行文調取來京引見。○諭軍機大臣等。大陳山洋面匪船掠竊。將兵丁水手載逃一案。前已屢降諭旨。令該督設法拏究。並令林洛

密速報追。乃至今未據查獲奏聞。豈訪緝已
經數月。尚無蹤跡耶。此案匪徒在洋玩法橫
行。若不及早緝獲懲治。何以儆兇惡而靖海
疆。著再傳諭楊廷璋等。嚴飭弁員。速即實力
根拏。究擬具奏。毋得任其延緩。○乙巳。諭前
據楊廷璋奏。大陳山洋面匪船掠竊。將兵丁
等駕逃無蹤一案。曾令該督嚴行緝究。今據
奏稱。總兵林洛得受網戶錢文。派兵代為守
網。以致淹沒兵民。並非因追拏匪船被掠等
語。林洛著解任。交與該督會同巡撫莊有恭
秉公審擬具奏。○諭軍機大臣等。前楊廷璋
奏。大陳山洋面匪船掠竊一案。曾令該督并
總兵林洛密速查拏。嗣因提督王無黨摺奏
該鎮不亟為推求。似有歸過林洛之意。復經
降旨。令楊廷璋確查具奏。已據查奏。林洛尚
無他故。今楊廷璋續叅林洛受網戶錢文。撥
兵代為看守。以致滋事淹沒兵民。並非因追
拏匪船被掠。現將該犯等解交浙省藩臬兩

司嚴究。並請將林洛解任質審等語。海疆關
係緊要。林洛身任總兵大員。如果納賄派兵
滋事於前。又復捏報支飾於後。自當重治其
罪。以儆綠營惡習。但前此王無黨既經具摺
諉過林洛。而此案重犯。又日久未獲。安知非
地方文武。因現在不能緝兇完案。轉借王無
黨原奏為由。附會巡兵生釁。計圖了事耶。此
案如僅交兩司審擬。恐不無承奉上官。從中
觀望之意。朕辦理案件。必須徹底根究。不使
稍有漏網。亦不使稍有屈抑。已有旨令林洛
解任。令楊廷璋莊有恭會審。該督未到浙省
之先。莊有恭可將此案緣起實情。一面密速
體訪。一面即將解到人犯。先行研訊。奏聞。仍
俟楊廷璋到浙後。會同秉公審擬具奏。將此
傳諭該撫。原摺並鈔寄閱看。并傳諭該督抵
浙時。會同莊有恭悉心秉公確審。務在研究
實情。毋得稍存成見。○丙午。旌表守正被戕
之福建武平縣民林華慶妻范氏。○丁未。

上御勤政殿聽政。○以協辦大學士吏部尚書劉統勳為大學士兼管禮部事務。兵部尚書梁詩正為吏部尚書。協辦大學士都察院左都御史劉綸為兵部尚書。禮部左侍郎金德瑛為都察院左都御史。○以吏部尚書協辦大學士梁詩正兼管翰林院掌院學士。○以修撰蔡以臺充日講起居注官。○戊申。諭刑部侍郎員缺著安泰補授。安泰未到京之前著阿永阿暫行署理。○諭軍機大臣等。阿桂奏稱。哈喇沙爾派出屯田回人係總管阿布都齊帶領前來。今准納世通移文現被屬人首告。隨派員押回該處。并將阿布都齊所具訴呈譯奏等語。阿布都齊係玉古爾總管阿奇木。其有無勒索情弊。自當秉公究審。倘係所屬誣告。亦應嚴行治罪。以遏刁風。若所告屬實。則阿布都齊係庫車回人。不便留於本處。酌量發往葉爾羌。阿克蘇等處安置。并將所訴呈詞錄寄。以便質訊。○又諭。據安泰等

奏稱。雇用烏魯木齊貿易商販駝驢。馱運彼處米麪二百餘石。於四月二十日起程運送。巴里坤等語。烏魯木齊。闕展等處。贏餘糧石。從前雖議定運送巴里坤。後因楊應琚具奏。經軍機大臣等議。以此項贏餘糧石。仍貯各處。不必運送巴里坤。昨據德爾格奏到。將闕展。贏餘糧石運送巴里坤六百餘石。朕即諭令闕展。烏魯木齊。嗣後不必運送。遵照前旨。較時價畧為減少。抵放兵丁鹽菜銀兩。安泰等尚未奉到此旨。復將烏魯木齊米麪二百五十石運往巴里坤。著傳諭安泰等。將已經起運米石。仍行運送外。嗣後將烏魯木齊穀石停止運送。○以光祿寺卿督達禮為太常寺卿。○調湖南永州鎮總兵黃士俊為浙江黃巖鎮總兵。以湖南辰州副將五忠阿為永州鎮總兵。○己酉。

上詣暢春園。問

皇太后安。○定邊左副將軍成衮扎布奏。臣等

前奏解送伊犁駝一千牛三千羊二萬奉諭
即派貝子品級公額爾克沙喇公扎木禪等
挑選牧羣及喀爾喀游牧賠補牲畜。照奏定
數。即於四月二十八日起程。由阿爾台等處
擇水草之地過夏。緩行前往。復將烏里雅蘇
台所貯各色布。五萬六千疋。茶。四萬四千觔。
駝。層八百副。酌量馱載。并將原價知會伊犁
駐劄大臣。查原派解送牲畜官兵三百八名。
續因照管什物。添派喀爾喀兵一百名前往。
得旨。派出各官兵。著一體照例賞給。○命都
察院左副都御史張泰開提督直隸學政。○
以鑲白旗漢軍副都統公明瑞為正白旗漢
軍都統。○庚戌。諭據薩哈岱奏。河東二十五
年鹽課。本年六月。業屆奏銷之期。現在更換
新商接辦。尚未到運。所有應完課項。懇請展
限等語。該處未完鹽課。前已加恩展至本年
六月清完。今該鹽政奏稱。現更新商領運。著
再加恩。緩至本年九月。以紓商力。該部即遵

諭行。○諭軍機大臣等。江蘇上年收成豐稔。
民間食用充裕。所有糧石時價。自應平減。今
據安寧奏到。上米二兩五分。次米一兩八錢。
麥一兩一錢。註明俱屬貴價。此等價值。既係
昂貴。則比較日常平減之時。每石實價若干。
摺內並未詳開。所奏殊不明晰。且三月糧價。
至此時始繕摺具奏。亦屬延緩。著傳諭安寧。
將春季米麥價貴。及現在是否平減各情形。
查明據實具奏。尋奏。查蘇城米價。以每石二
兩上下為貴。一兩五錢上下為中。一兩上下
為賤。麥。每石一兩為貴。七八錢為中。五六錢
為賤。上年春季米。每石二兩五錢以外。今茲
二兩五分。已不為貴。現在四月分米麥價。較
春季少長四五分。然民間尚以為平價。得旨。
以後諸事留心。勉力毋得圖逸苟安。○又諭。
據薩哈岱奏。河東未完課項。現屆新舊各商
更換之時。難以如期題銷。懇請展限三個月
等語。已有旨諭部矣。其遴選新商一事。該鹽

政於本年二月奏請。經軍機大臣會同該撫等議准。何以遲至數月之久。祇據送到劉衷一人。其餘王之緒等五名。並未到運。此在該商等。未免意存觀望。而地方官亦視為無甚要緊之事。未能上緊辦理。著傳諭鄂弼嚴飭各該州縣。所有未經送到之王之緒等五名。令其迅速申送。頂補辦運。毋得藉詞延緩。至薩哈岱以二月之事。今始奏到。甚屬遲誤。並著傳旨申飭。○吏部議覆。閩浙總督楊廷璋等奏查臺灣府屬鳳山縣之阿里港。在縣治東北五十里。南距萬丹二十餘里。北通臺邑之羅漢門。東接傀儡山。逼近生番。且該地流民聚處。搶竊頻聞。又諸羅縣之斗六門。與彰化縣虎尾溪接壤毗連。石龜溪等四十三莊。向多游匪出沒。離縣寫遠。均需設立專員。查鳳山縣縣丞駐劄萬丹。民淳事簡。請移駐阿里港。又臺灣縣所屬之新港。司巡檢駐劄郡城。盤查海口小船出入。並無巡防地方之責。請

移駐諸羅縣之斗六門。管轄石龜溪等四十三莊。其查驗船隻事。責成臺灣府經歷兼管。至阿里港斗六門。應建衙署。現有萬丹新港舊署。儘足估變酌移。毋庸動項。均應如所請。從之。○辛亥。遣官祭關帝廟。○壬子。諭軍機大臣等。愛必達等奏滇省銅廠自加價採辦後。多獲餘息一摺。據稱二十五年。青龍等廠共辦過銅一百餘萬。計多獲息銀二萬九千餘兩。但此項銅餉。是否全數發賣。抑係將現存之銅。統計覈算息銀。共有此數。其湯丹大碌等各廠二十四五兩年。辦銅二千六百餘萬。共得額課息銀五十餘萬兩。此內除去額課及起運協撥各項銅餉外。實在多餘銅若干。并該督所稱清完廠欠。究係作何歸補。是否於二十四五兩年內全數清完。摺內尚未明晰。著傳諭劉藻令其一併詳查具奏。尋奏查原定銅價。每百觔給銀四兩。自乾隆二十五年後。兩次增至

六兩。廠民工本漸裕。足資採辦。獲銅加倍。計銅一百萬。觔有零。該價銀九萬二千餘兩。計除給過廠民原價。及廠費腳價銀共六萬二千五百餘兩外。該餘息銀二萬九千餘兩。並非發賣獲息也。至湯丹大碌等廠。二十四五兩年來。實餘銅二百四十萬有零。得額課銀二萬一千六百五十餘兩。至各廠舊欠。自增價後。廠力漸舒。已於乾隆二十二三四五等年。將積欠銀十一萬餘兩。陸續追完。報聞。○

旌表守正捐軀之山東清平縣民徐照妻杜氏。○癸丑。授一甲一名進士王杰。為翰林院修撰。一甲二名胡高望。一甲三名趙翼。為翰林院編修。○吏部議覆四川總督開泰疏。稱川省越舊雷波二衛。德昌。迷易。鹽中。黃螂。四所。部議裁汰。所有一切事宜。請改設通判。管理。查寧遠。保寧二府。俱有同城通判。缺簡事少。應將寧遠府通判移至越舊。其所管建昌。會川。九道溝。寧番。四口稅務。改歸寧遠府管。

理。再將保寧府通判改駐雷波。其保寧督捕事務。令該府分駐南部之鹽政同知兼管。該通判等責任較重。應於原設養廉銀四百兩外。各添銀二百兩。并請各添設照磨一員。其越舊原設之大樹堡經歷。即令越舊通判管轄。黃螂所。添設巡檢一員。令雷波通判管轄。除雷波尚未設學外。越舊衛學教授。改為廳學教授。訓導照舊。又寧遠府屬之德昌所。去西昌縣止三十里。應改隸西昌縣。迷易所。至

會理州界一百里。應改隸會理州。各設巡檢一員。鹽中所。請添設縣丞一員。以上巡檢三員。縣丞一員。照磨二員。每歲各給養廉銀一百五十兩。額設常平社倉。即令各駐之巡檢縣丞。就近經理。統歸該管州縣冊報。各所均未設學。應試生童。即附入該管州縣彙送。均應如所奏。從之。○葉爾羌辦事都統新柱等奏。查大兵凱旋後。所留葉爾羌之滿洲。索倫綠旗兵。除看守城垣倉庫。及辦事處差遣外。

餘俱於城外駐劄。後因帳房日久損壞。分居城內。逃走。回人舊屋。遇有差務。一時不能齊集。今年派兵移駐伊犁。其數愈減。現在辦事公署大門內地面寬濶。請即於該處添建房屋。報聞。○以大學士來保兼管禮部事務。大學士劉統勳兼管兵部事務。

實錄卷六三七

三

大清高宗法天隆運至誠先覺體元立極敷文奮武孝慈神聖純皇帝實錄卷之六百三十六

大清高宗法天隆運至誠先覺體元立極敷文奮武孝慈神聖純皇帝實錄卷之六百三十七

監修總纂官經筵講官太子太傅大學士文淵閣領閣事領侍衛內大臣稽察欽奉上諭事件處管理
吏部理藩院事務兼管旗滿洲都統世襲騎都尉軍功加七級隨帶加一級尋常加級軍功紀錄次子世佳
總纂官經筵講官太子太傅大學士文淵閣領閣事稽察欽奉上諭事件處管理刑部戶部三庫事務
世襲騎都尉軍功加十九級隨帶加二級又加二級尋常加級軍功紀錄次子世佳
尋常加級十四次臣德齡經筵講官太子少保工部尚書紀錄六次臣曹振鏞等奉
敕修

乾隆二十六年辛巳五月甲寅

上詣暢春園問

皇太后安○還宮○諭據楊廷璋奏請將浙江玉環營水師叅將陳啟燦陞補福建臺灣水師副將一摺兵部議覆本內既稱隔省陞用有礙成例應無庸議矣及閱夾單通列外海水師人員內原有陳啟燦之名陳啟燦既得入夾單請用則非必不應用人可知而該部辦理此案意在守例事乃矛盾並未將緣由詳悉聲明甚屬非是即吏部向來於文職

人員議准。議駁亦不無拘泥成例。事涉兩歧之處。嗣後遇有此等奏請題調人員。實係人地相宜者。即應準情酌理。畫一定議。毋得過事膠執。即云守例。亦應聲明。兩請陳啟燦已照該督所請。准其陞補臺灣水師副將。仍將此諭令吏兵二部知之。○諭軍機大臣等。舒赫德奏稱。從前阿里衮收服羅布諾爾回人千餘戶。及安插闡展附近之沙呼里回人百餘戶。又莽噶里克所屬回人均請交與德爾格。選派幹員帶領吐魯番回人二名前往查辦等語。德爾格甫經任事。恐未能諳悉情形。著舒赫德仍於歸途之便。前往辦理。即此時德爾格已經起程。辦有頭緒。舒赫德仍須再加查覈。妥議具奏。○又諭前據楊廷璋吳士功審擬馬龍圖一案。錯謬已極。業經降旨令該督撫等逐一明白回奏。並由六百里馳遞。乃距今一月有餘。未據奏到。何以遲緩至此。著再傳諭該督等。令其速行具摺奏聞。○是

日起

上以夏至祭

地於

方澤齋戒三日。○乙卯軍機大臣議覆陝甘總

督楊應琚奏稱。皋蘭縣屬騷狐泉之礮廠。久經封閉。現在各標營火藥不敷。查該廠礮砂旺盛。仍請招商開採。應如所請從之。○丙辰內閣翰林院帶領新科進士引見。得旨。新科進士一甲三名王杰。胡高望。趙翼。已經授職。

蔣雍植。顧震泰。承恩。汪為善。謝啟昆。曹仁虎。金雲槐。黃騰達。馬人龍。嵇承謙。陳步瀛。胡翹元。儲秘書。沈士駿。張應曾。汪上林。官志涵。丁榮祚。吳玉綸。馬曾魯。葛正華。劉焯。毛業溥。卜祚光。嵩貴。郭潔。邵庚。曾田。均豫。李松齡。余廷燦。劉校之。馮昌紳。陳于疇。楊中選。鄧大林。俱著改為庶吉士。項淳。吳壇。陳嵩。年。裴直。方松齡。沈琳。孫嘉樂。銀文昭。俱著分部學習。徐紹鑑。王宓。孫景燧。張元泰。顧駟。姚榮。許法震。徐

珩俱著以知縣即用。王兆麟、白凌霄、歐陽欽俱著以教職即用。餘著歸班銓選。○又帶領會試取中，以中書學正學錄用之舉人引見。得旨：湯上選、姚士煥、章崇、陳彬、戴觀、余瑚、吳襄、王宸、李調元、王文湧、凌家梧、胡子襄、徐天驤、劉鳳翔、孫麟徵、沈世燾、董潮、阮葵生、張梅、朱光星、李廷欽、徐廷第、蘇去疾、金以埏、韓朝衡、汪大榮、梁景陽、陳觀光、葉文馥、丁履仁、沈杰、王嵩、桂倪、昭、麥佑、蔣國萃、甘澍、王仲芬、周延、祁劉光第、王家賓、張廷元、高菱、張秉謙俱著以中書學正學錄遇缺補用。如有願回籍者，聽缺出時如應補之人已經回籍，即以其次挨補。所有回籍人員遇別項考試，仍准其一體赴考。○丁巳夏，至祭

地於

方澤

上親詣行禮。○詣暢春園問

皇太后安。○章圓明園。○諭曰：署總兵曹瑛奏

請陞見一摺，但知襲用故套，實為不近人情之至。曹瑛於朕巡幸五臺甫經隨營，名見即遲至年餘，再將緣由聲明奏請，朕不惟不加責備，且深許其合宜，乃為時僅踰兩月，輒率引三年依戀之詞，又不將前由一言申叙，是不過聊以塞責耳。所請尚出於誠心乎？以摺奏切已之事，尚虛假如此，則其辦理營伍大畧可見矣。曹瑛著解總兵之任，令其來京供職。額僧額現署固原提督，其大同總兵事務著該撫遵員署理。○戊午諭：前據楊廷璋吳士功會審馬龍圖私用存營公項銀兩一案，輒引自首例減等定擬，悖謬乖張，迥出情理之外。朕即知此案立意必先出自吳士功，而楊廷璋從而附和，因降旨令伊兩人公同明白回奏。今奏到定案時，雖係楊廷璋主稿，而督叅撫審吳士功實為主政，往來商榷具有原札可覈，果不出朕所料。吳士功身為巡撫，以提督大員營私舞弊，此何等重案，乃敢妄

逞伎倆。欲從中高下其手。且明目張膽。冀於朕前直售其欺。居心尚可問乎。即據札內所稱幕友據引例文云云。欲楊廷璋酌定之處。尤堪駭異。楊廷璋吳士功為封疆大臣。即馬龍圖亦提督大臣。豈有二人胸中竟無定見。悉藉幕友主張。此語豈可覲顏告之同官。奏之君父者。其曲意幹旋。不問可知。況原審內有事前彌補之說。朕覈叅將姚應夢供內該犯定媳送聘借銀五百兩。曾於養廉項下扣清此項銀兩。於未經叅奏之前。豫為彌補。尚可自稱事前至買辦燕窩等銀一千餘兩。俱係盤查時攢湊抵項。且杜燒數簿。以私冊掩飾。其為事敗假捏。更何待言。如此而猶欲以自首脫罪。有此理乎。朕臨御二十六年。歷事不少人之情偽。素所洞悉。吳士功本係張廷玉用人。其生平貌為直慤。而城府甚深。亦眾所共曉。第以其人尚小有才。且歷外任年久。巡撫缺出。一時不得其人。因而擢用。乃伊一

得志。又以閩省去京稍遠。即肆無忌憚。即如伊向因與張廷玉甚厚。未免有得罪史貽直之處。今又與史奕昂修好。以冀解前恨。則其人之居心邪正。從可知矣。朕本欲為之隱惡揚善。而伊乃敢顯為此攬權嘗試之計。此而付之不問。朕又將何以用人。昨胡寶瑤於河南任內。道員等收受鹽規。漫無覺察。具摺自請治罪。朕以其實出無心。即為姑宥。若吳士功之有心欺謾。情甚可惡者。其相去又可以道里計乎。吳士功著革職。發往巴里坤自備資斧。効力贖罪。楊廷璋身為總督。隨聲附和。咎固難辭。但究係為吳士功所賣。尚非發謀可比。著革職從寬留任。八年無過。始准開復。馬龍圖著拏解來京。交三法司嚴審定擬。餘著三法司覈議具奏。並將該督等前後奏摺。及批諭廷寄。一併鈔發。將朕辦理庶政。輕重大小。不容纖毫朦混。並大臣等公罪私罪。一切聽其自取。亦不能纖毫假借之故。俾中外

臣工共知所懲勸○又諭曰定長著補授福建巡撫其兵部侍郎員缺著永寧補授定長未到之前其巡撫印務著楊廷璋暫行兼署○已未諭軍機大臣等安泰奏據貿易哈薩克頭目稟稱上年伊等部落二十人行圍遇瑪哈沁百餘人被害又烏魯木齊貿易三次內有一次來人歸途亦曾被害伊等欲率衆追捕阿布賚云此等恐係內地逃人當順便請示隨告以內地並無逃人爾等所遇即宜勦捕等語阿布賚情詞甚屬恭順嗣後伊等若再及此事仍行明白曉示令其隨遇即行勦捕若擒獲時即解送駐劄大臣處質審再伊等頭目云曾告知烏里雅蘇台官員布達勒但成衮扎布未經具奏并傳諭令其附便奏聞○庚申

上詣暢春園問

皇太后安○諭軍機大臣等前據吳達善參奏豫省衛輝等縣於借撥長蘆鹽勦案內每包

議派鹽道等衙門公費一錢不等已將歷任道府等交該撫審擬具奏矣晉省食鹽向來專自河東辦運其借用長蘆特係偶爾緩急今道府等居然按包派費事出情理之外論者或以前此河東運鹽時原有此項陋規今改食津鹽尚沿此取收亦未可定果爾則係因改食而收相沿之陋規雖未經稟明上司咎無可諉尚與憑空科派者有間若食河東鹽時並無此項陋規則其罪實難逭矣其中情罪輕重甚有關係不可不徹底查究著傳諭鄂弼令將從前食河東鹽時實在有無此等公費陋例詳悉秉公確查即速奏聞毋得稍存瞻顧朕不肯姑息亦不肯屈一人該撫其善體朕公明之意詳悉速奏并著傳諭吳達善令將前辦河東鹽勦果否有此陋例秉公確查研審務得實情以昭平允將此詳諭知之吳達善不可因有此旨而為解仇和事姑息從寬亦不可因已所參而吹求從嚴惟

應據實公明存心詳悉查奏○辛酉

孝恭仁皇后忌辰遣官祭

景陵○諭向遇祭祀特派大臣稽察齋戒人員原欲使各盡誠敬向來稽察俱在夜間後因弘曉條奏齋戒人等請晝夜不時稽察亦慎重祭祀之意是以允行今稽察大臣等並不以為事往往於散朝之便已午之間稽察一次夜間反不稽察不肖人員俟察過後因得伺隙回家反藉口稽察過嚴以至不遑退食甚為惡習與其如此有名無實不若仍照舊例夜間稽察其白晝稽察之處著停止吏部題大學士劉統勲應兼殿閣及尚書銜得旨劉統勲著為東閣大學士兼禮部尚書○調兵部右侍郎謝溶生為禮部左侍郎以內閣學士張映辰為兵部右侍郎○以署正藍旗滿洲副都統諾木渾為鑲白旗漢軍副都統○壬戌諭軍機大臣等據天津總兵常復奏查重運漕船每多間斷脫空詢之運弁因

山東河道淤淺所致一摺前據張師載奏稱江廣船身重大因將古城溜一帶引渠開寬並加挖二三尺俾湖水增多以資接濟等語東省運河既經該督等開濬深通則重運漕艘自當足資浮送況今歲春夏時雨霑足較往年大不相同河水諒應充裕何以山左尚有膠淺滯運之處著傳諭張師載阿爾泰等令將東省漕河實在情形詳悉確查或實有間段淤淺處所抑係一律深通運弁不無遲延飾詞之處據實奏聞尋奏查今年東省運河水勢充盈漕船並無淺阻前於五月望後接准天津鎮臣常復咨北上各幫間有脫空詢據運弁覆稱緣山東河道水淺不能跟幫等情隨飛飭查勘各處河道深通並無淤淺處所報聞○又諭現在烏魯木齊至伊犁烏里雅蘇台至烏魯木齊及回部所有臺站俱經酌量移設其官兵馬匹牲畜歲需錢糧若干較之從前有無減省仍合之伊犁等處所

駐兵丁。共需錢糧若干。較之哈密巴里坤安西駐兵防邊之時孰多孰少。著傳諭舒赫德於歸途之便。親行查覈其各路亦俱行查彙奏。俟伊到京時。與軍機大臣等會覈具奏。再據五吉等奏報。採買駝隻數目。今新疆所用駝隻。不過運送什物。且成衣扎布。又辦駝千餘隻。解送伊犁牧放。尊息自屬有餘。并著舒赫德查覈各項駝隻。足用與否。若不須採買。即行文巴里坤烏嚕木齊哈密辦事大臣等。停其辦理。○癸亥。諭據開泰等奏。川北鎮總兵西琳藉口整頓軍容。為債主銷售帽纓。勒屬強派。於季餉內坐扣。請旨解任質審等語。西琳身膺專閫之寄。不能表率營伍。乃勒動各營公項。為債主銷售私貨。甚屬卑鄙。西琳著革職。交與該督等審擬具奏。○旌表守正捐軀之廣東開平縣民雷亞長妻張氏。

甲子。

上詣暢春園問

皇太后安。○諭曰。戶部尚書李元亮老成勤慎。宣力有年。前因患病。特予解任調理。遣御醫診治。並令伊子李侍堯即速來京省視。以冀痊可。今聞溘逝。深為軫惜。著加恩賞銀一千兩。辦理喪事。派散秩大臣一員。帶領侍衛十員。往奠茶酒。所有應得卹典。該部察例具奏。○又諭此次西陲隨同將軍等出征之綠營將弁。其中有奮勉効力。曾經保列一等者。自應與內地保薦人員一體陞擢。以示鼓勵。今將軍等俱已回京。而將弁等或留駐新疆。或撤回腹地。難以分別遴選。所有現在葉爾羌等處。副叅遊都守等官。著交與駐劄各該處大臣。按照原定考語。曾經列入一等者。逐一查明。送部引見。如已撤回內地營伍者。交與該督。揚應琚亦照此查明。辦理。候朕酌量簡用。○諭軍機大臣等。據揚應琚奏。稱現在庫貯硝磺。不敷各營需用。而邊外無硝磺處所。又復咨取等語。從前軍需硝磺。俱取之庫車。

等處並不專籍內地即如從前準噶爾之人亦有鎗礮其所用火藥不過本地所產豈有取之內地之理乎著傳諭楊應琚嗣後火藥各宜查訪出產硝磺之區採辦使用不必取之內地即間有一二不產硝磺處所亦宜由附近地方取用庶可省內地輓運之力將此通諭各處遵行○以甘肅慶陽協副將馬彪為四川北鎮總兵○乙丑

上御勤政殿聽政○諭軍機大臣等據吳達善審擬豫省收受蘆鹽公費一案摺內尚有未能詳盡之處如宋邦綏前在署鹽道任內如實不知此項陋規並未收取則該撫將伊列入失察人員是為過刻伊非各道之上司也若彼時曾經染指是雖任事日淺其罪即與鄧錫禮朱若東等不過少為區別可耳安得隨圖勒炳阿胡寶琮等之末一例開叅失察乎又張任萃既為此案罪首其貪黷科派亦應俟到案確訊方可定案乃單內既未錄供

摺內又未定罪而取信於他人一面之詞又何以得全案前後確情耶再蘇壽寧因聞護道稟出始將所得公費退還其事已經敗露更不待言此與知人欲告而首之例相去何啻霄壤該撫既准不枉法職論罪又何必曲為牽引多此一番幹旋昨因此案無端科派事不近情恐前此河東辦運時或原有相沿陋規亦未可定已傳諭該撫令其詳悉查明有無此等情節分別情罪秉公辦理想吳達善具奏時尚未奉到朕於辦理此等案件從無成見惟期毋枉毋縱務得實情一歸平允著傳諭吳達善將此一併詳悉研究如僅係相沿陋規則河東長蘆不過異名同實尚可稍從末減若竟係伊等憑空科派有意侵牟自當俟各犯到案質訊明確按律重治其罪以示炯戒吳達善固不可因原叅已重意在稍存迴護更不可以業經陞任視同五日京兆急圖草率完案以釋怨解紛則非大臣所

為大不是矣。亦豈朕所望於該撫者。此摺案犯供看不全。未成信讞。難以交部。仍著發回。并詳諭該撫知之。尋奏。查豫省鹽商舊有規。禮雍正四年。經田文鏡奏請歸公。至乾隆五年前。撫臣雅爾圖復查出未盡陋規。概行歸公。現在各商照舊致送。至乾隆二十年。因河東缺鹽。奏准於長蘆存鹽內通融撥借。晉商赴天津運鹽。從未致送規禮。嗣因天津買運維艱。就近在衛廠蘆商餘鹽內借運。衛輝通判張任莘索取蘆商公費銀。每包一錢一分。張任莘又向蘆商等議給鹽道。衛輝府汲縣各衙門。每包二錢。此並非舊有之陋規。實因改食蘆鹽。新派得旨覽。又奏。前因宋邦綏曾署鹽道事。是以列入失察內。現查伊並未染指。定案時毋庸開叅。又批。如此則汝因陞任而諸凡草率之處。更不問而益明矣。○又諭。前據方觀承奏。乾隆二十四年。永清縣應徵香燈地租銀兩。因永定河漫水被淹。題請蠲

免。所有應行撥補之項。即於司庫耗羨銀內解交等語。此項租銀。雖屬每歲備給香燈之用。但所用有贏有缺。俱可聽內務府自為存貯支撥。何必泥於定額。遇有蠲項。復就司庫動撥。嗣後該地方官。但將徵取租銀實數。儘收儘解。知會內務府查收。不必沿習陋套。輒轉撥解符額。以省案牘。○以詹事宗室良誠為通政使。○以兵科給事中寶麟為光祿寺卿。○丙寅。諭此次平定準噶爾回部官兵。均各奮勉。今大功告成。理宜加恩。給與世職。將軍等。朕已加特恩。其格外奮勉。曾得功牌大臣官兵內。未經賞給官職者。應如何給予之處。著軍機大臣等會同該部察覈辦理具奏。○丁卯。諭軍機大臣等。據劉墉奏。沛縣監生閻大鏞。抗糧拒差。誣官逃走。旋經拏獲。未結一案。因其情形異常桀驁。隨查出該犯詩稿二紙。並伊祖閻爾梅伊伯閻圻稿本。及閻爾梅犯罪時文移一本。粘籤進呈。並查該犯家

內無伊詩稿存留揆其情理必係悖逆之詞。曾經銷燬等語。閩大鑪以監生抗糧拒差情屬可惡。治以應得罪名。已無可寬貸。至查出稿本各條。以朕觀之。不過愚賤無知。尚無悖逆之語。若牽引伊祖伯等詩文。遽以悖逆定讞。而先置本案為輕罪。又不切究其燒燬滅蹟之由。是既不足以服本犯之心。而議者或轉疑為刻覈。非朕用法平允。務得實情之意。且銷燬之語。亦屬揣度之詞。該犯平日果係

居心悖謬。形之筆墨。即使本人豫事銷燬。而天理不容。斷不令其毫無蹤影。脫然漏網之理。非有一二銷滅不盡。即有留遺他處。使之旁出敗露者。此正案中喫緊關鍵。該督撫果肯實心詳悉研鞫。自無不明之理。若實有悖逆本朝形蹟。即應嚴處。以肅刑章。而懲匪類。著將原摺鈔錄。并粘籤稿本。交與高晉。陳宏謀。令其確切嚴訊。並悉心躡訪。及該犯悖謬詩文。有無留遺在外之處。秉公推勘。按律定

擬具奏。尋高晉奏。據藩臬兩司訊報。閩大鑪曾刻有侯侯集詩文。內有沛縣誌記一篇。因該犯之母少寡守志。未經列入節孝。文內譏刺不公。為人呈首。經修誌之原任知縣李棠。拘訊。將書板追繳。及已印詩集。一併追燬。並無別項悖謬詩文等語。但揆之情理。殊難憑信。現飭司道府縣。再行確切嚴訊。務得實情。得旨是。陳宏謀奏。查該犯所刻之侯侯集。業經銷燬。其中恐有悖逆之處。必須追取原書。

方可憑信。現飭府縣搜查躡訪。務將該犯前刻及續作詩文。盡行追出。以憑察驗。得旨覽。汝不為此足矣。汝肯從嚴辦理。此等人乎。○又諭曰。阿桂奏。稱搜捕瑪哈沁之叅將蘇尼勒圖。侍衛烏魯木等。至巴柴河之素魯圖伯勒齊爾。拏獲瑪哈沁。博卓壘等十三人。據供在阿勒坦特布什。隨頭目色布騰居住。查色布騰若果係戕害德舒之賊。甚關緊要。即令伊柱領兵一百三十名前往搜捕。至博卓壘

並未拒捕。且係烏魯木舊屬。請免其正法。酌量歸并安插等語。阿桂聞色布騰藏匿處。所即派兵往捕。所辦甚是。烏魯木亦屬奮勉。著加恩授為頭等侍衛。仍傳諭阿桂。若能擒獲色布騰。即嚴拏解京。博卓壘等俱照例安插。○叅贊大臣舒赫德奏。臣等風聞布拉呢敦逃入巴達克山時。曾將幼子三人携往。今據素勒坦和卓贖回之葉爾羌回人台里布和卓。密告臣額敏和卓云。布拉呢敦三子一名和卓阿什木。一名阿布都哈里克。一名和卓巴哈敦。現在巴達克山居住。所有照管養育之人。俱甚窮苦。且慮傷害。臣等詳議。若向素勒坦沙索取。恐伊藉端居奇。正在籌議間。適奉到養育薩木薩克之恩旨。臣額敏和卓即密傳台里布和卓。詢得實情。隨飭親信屬人什丕同葉爾羌伯德爾格回人數名前往。因貿易之便。通知養育布拉呢敦三子之回人等宣示。

聖恩。令其帶領來投。再經過霍罕部落之要隘。亦行文該處阿哈拉克齊密爾莽蘇爾。令其照管前來。一切俱以臣額敏和卓之意為詞。其台里布和卓等俱酌加獎許。令其相機辦理。報聞。○贈故戶部尚書李元亮太子太保銜。并入祀賢良祠。○是月。江南河道總督高晉。江蘇巡撫陳宏謀。奏揚州府屬之高寶興泰等州縣下河地方。積年被淹。緣天妃閘迤南之丁溪小海。迤北之上岡北草堰陳家沖等五閘。數年以來。漫成平陸。竟閉而不用。查各閘之下游。有王家港水深丈餘。寬十四五丈。又有射陽湖寬深更甚。若將丁溪小海二閘河疏濬。另開一引河。灌入王家港歸海。再將上岡草堰陳家沖三閘河疏濬。亦開一引河。匯入射陽湖歸海。以防倒灌。得旨甚應行。之事妥協辦理可也。○甘肅巡撫明德議奏。阿拉善郡王羅布藏多爾濟前於邊外之占茂山建立喇嘛廟宇。查該處雖在民界之內。

業蒙賞賜廟名。未便復令拆移。請嗣後不許添建。并令地方官分定界址。埋石立界。廟界以內禁止民人砍伐樹木。界外不許喇嘛越界砍伐。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之六百三十七

大清高宗法天隆運至誠先覺體元立極敷文奮武孝慈神聖純皇帝實錄卷之六百三十八

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
經筵官經筵講官太子太傅文華殿大學士文淵閣領閣事稽察欽奉 上諭事件處管理刑部三庫事務
世襲騎都尉軍功加十九級隨帶加二級又加一級臣董誥內大臣戶部尚書鑲藍旗滿洲都統軍功紀錄
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十六年辛巳六月戊辰朔吏部議准

陝甘總督楊應琚疏稱裁汰赤金衛守備衙署。請改為新設五門縣衙署。衛千總衙署改為典史衙署。靖逆衛千總衙署作為訓導衙署。從之。○已巳

上詣暢春園問

皇太后安。○諭。昨閱陳宏謀將荆溪縣知縣紀澄中違例題請實授一本。吏部祇將該縣議駁。不准實授。而於率行題請之該撫並不奏請議處。因令檢查成例。而該部僅引違例題

請陞調之案。枝梧覆奏。朕以陞調實授情形迥不相同。憶前此曾經降旨隨諭再行詳查。始將原旨錄奏。復以原旨內似專為年限未滿者言。而於現有叅處之員。竟未畫一辦理。此非特膠柱鼓瑟之見。直司員等故為強生分別。而該堂官竟為所朦混。而不知耳。直省以不合例之員。題請陞調者。原為要地需人起見。若署事之員現屬在任。其人復何所需。既有叅處。自不妨少待。是實授之員。絕非陞調者可比。而處分之與年限未滿。其為不合例則均。此理宜人人共曉。乃該部奉旨以後。含糊辦理。十數年。直待朕憶及原降諭旨。始行查出。其一例兩辦。或出自拘泥。情尚可寬。至逡巡不即查奏。既經指出。又支離遷就。其說則不謂之有心迴護。而何朕日理萬幾。且成命久頒。而必欲於此等事件待朕一一條分縷析。豫防過計。有是理乎。著將奉旨後。所有率覆各案。及首先專辦各司員。查明分別

嚴加議處。其歷任未經察出之堂官。亦著一併議處。○諭軍機大臣等。據鄂弼奏河東召募新商。本人現俱出外。因該鹽政差押家屬赴運。以致殷戶等輒生畏避等語。該省鹽法現在定議增價展限。自可漸次通融調劑。所有新募各商。原非墮銷欠課之人。該鹽政祇須剴切曉諭。俾知赴公趨事足矣。况商人之責。惟在出名認辦。若領運行銷等事。亦不能用商夥。薩哈岱竟將伊等的屬差押誠屬孟浪。無可置喙。但既有此情節。鄂弼不妨據理諭止。止而不從。亦不妨據實叅奏。至於辦理鹽務。若地方官與鹽政各存畛域。在鹽政既恐無從措手。及鹽法不能盡善。而撫臣又不能不先任其咎乎。試思朕之任鄂弼與任薩哈岱孰重孰輕。今該商等甫當應募。觀望之時。正當各秉虛公。從長計議。若鹽政有任情過當之處。朕固不能為薩哈岱寬。倘巡撫意見未化。致薩哈岱辦運貽誤。朕又能為鄂弼

解乎。著傳諭鄂爾令其彼此實心籌畫會商妥辦不得稍存成見致妨公事。並令薩哈岱知之。○庚午諭前經降旨令旗丁餘米准其在通變賣以資日用。今年米價甚平所有抵通漕艘於正供兌足後旗丁多餘米石聽伊等酌留食用如有情願出售者仍照前例即准其就通糶賣於旗丁等既屬便益而地方糧石亦愈得流通充裕該部即遵諭行。○刑部議覆湖北布政使亢保條奏一妻妾過失殺夫及家長者不許轉嫁閨幃幽隱曖昧莫測若不明定禁例弊端不可究詰應如所奏嗣後妻妾過失殺夫及家長依例決杖贖流外禁令不許改嫁其實無親屬可依不能自存准族保呈報當官嫁配一兩家互毆各斃一命例得免死減軍之犯請一體追給埋葬銀查應償人命罪囚遇赦者例追銀二十兩給與被殺家屬至兩家各斃一命之減軍人犯以均係屍屬亦同屬苦主是以並無此例

但一家之內雖屬至親有並非同居者名為一家實則各戶凡遇喪葬各自經營如此等類既因親屬同傷殺人致四不償命又令死者之家自備營葬未為平允亦應如所奏嗣後除兩家實係同居無庸議追埋葬銀外其一家而兇手及被殺之人實係各居者均於免死減軍該犯名下照定例追銀二十兩從之。○辛未諭據恒祿等奏稱松花江下游伯都訥所屬地方旗民驛站人夫口外蒙古等設網打魚率多爭競請分定邊界計網徵稅以杜訟端等語吉林伯都訥等處滿洲蒙古民人多藉漁獵為生越界捕魚事所不免著派貝子瑚圖靈阿馳驛前往與恒祿傳良及該盟長等秉公查勘分定地界嚴禁越境捕魚以杜訟端以資伊等生計。○壬申

上詣暢春園問

皇太后安。○諭軍機大臣等原任延榆綏道王鐸業已病故伊名下應還官項除節次恩免

外現在尚有未完借帑本息銀共二十二萬二千兩前據該撫查奏伊鹽窩房地衣飾等項約有三十六萬餘兩等語王鏜効力年久並無過愆今已物故若將前項銀兩責令伊子一時按數清還則所估雖屬有餘而一經變售所存無幾將來或致難以資生深為不忍著傳諭鄂弼轉飭地方官善為曉諭伊子將所有鹽窩內加恩仍令其照舊妥協營運酌量每年樽節足支用度外約可得交官銀若干通盤計算分定限期逐年完繳俾帑項既可漸次清完而於伊子家計亦不致拮据該撫其留心籌度辦理無庸抑勒從事以副朕格外矜全至意○又諭曰阿桂奏范時綬由烏魯木齊送羊一萬三千隻全抵伊犁辦理妥協又懇於辦送回空駝隻後仍來伊犁効力等語范時綬前因解送阿克蘇羊隻妥協曾賞給叅領職銜此次更屬奮勉著加恩授為頭等侍衛烏魯木齊亦有應辦事務仍

在原處行走不必又往伊犁其在事官員著交部議敘兵丁等賞給錢糧一月○癸酉諭國子監將教習期滿之沈若木帶領引見摺內既引吏部原議或以知縣或以教職候欽定等語乃又將該員係進士曾經有旨歸班以知縣選用之處聲敘明係有心取巧令該員必得知縣耳進士歸班銓選知縣不過相沿舊例至得缺之日必須九卿驗看覈其哀庸或人材無能不堪膺民社之任者以教職改補亦有於引見時經朕特旨改教者是沈若木之應得知縣與否尚在未定而該監堂官隱躍其辭竟坐實以知縣選用若以為不當復以教職用者然如此用巧必由陸宗楷與沈若木同係江浙科目其為曲意瞻徇情蹟顯然觀保全魁庸懦無能為其所愚而不覺夫士子躁進網利之心為司鐸者尚宜抑而斥之今且朋比為奸其何以正人心國子監堂官著交部嚴加議處○吏部議准直隸

總督方觀承疏稱。薊運河之白龍港江窪口。並有汛員管轄。惟自江窪口至北塘海口。計水程三百三十里。又北塘海口至大沽口新河。計三十里。均係寧河縣所屬。並無專員管轄。查有該縣蘆臺巡檢。附近河干。便於照察。請改為兼河之缺。令其管理新河。仍兼地方事務。從之。○甲戌。諭軍機大臣等。成衮扎布奏。驍騎校博達勒等護送哈薩克使人。行抵邊境。見上年在特穆爾綽爾郭等處過冬之哈薩克等。俱遠移游牧。殊屬恭順。歸途遇哈薩克等。告稱。前有二十人打牲。至和博克等處。被賊戕害等語。近經烏魯木齊大臣等奏。哈薩克貿易人等告稱。伊等二十餘人被害。恐係內地逃人所為。朕即降旨。將來貿易人等。若再行言及。即告以內地並無逃人。明係厄魯特瑪哈沁其言語衣服。與內地大不相同。嗣後爾等若再與相遇。即行勦殺。果係內地逃人。亦即擒拏。但不得驚動往來商旅。可

將此徧行傳諭知之。○浙江巡撫莊有恭奏。林洛受賄一案。現已飭提說合過付之何兆守。程宏嗣等嚴訊。據供實係與林洛之子林輔國說合。隨提訊林輔國。極口招承。朦蔽伊父。私行納賄。然究難憑信。俟提到林洛後。臣與督臣秉公詰訊。務得實情。不使稍有漏網。屈抑得旨。甚是。又稱。總之林洛之罪。在於聽情納賄。據呈捏報。又批。此言更公當之極。○乙亥。

上詣暢春園問

皇太后安。○諭軍機大臣等。莊有恭摺奏。訊過林洛之子林輔國等供。俟提到林洛會同督臣秉公詰訊。據實定擬。不使稍有漏網。屈抑等語。所見公當處。已於摺內批諭。惟所稱林輔國。極口招承。朦蔽伊父一節。則不可不加意體勘。以杜避重就輕之弊。林洛以總兵大員。納賄屬實。即罪在難逭。至伊子不過一監生耳。若以求索受賄。一切誣諸林輔國。則林

洛之咎止於聽情失察而伊子又以身非職官得從輕典且於人子不失孝道其為一舉數便誰不知之殊不思國家設立刑章當以肅官箴懲漏網為正若陳編所載緹紫請代父罪只可為文詞稱謂之具其有執法之任者又安得徇私情廢公義耶著傳諭楊廷璋等令將林洛實在案情悉心詳鞠務得確據慎勿稍存因循之見急圖遷就完結致乖明允○旌表守正被戕之四川健為縣民彭永應女彭氏○丙子諭軍機大臣等索倫副總管尼布齊喀曾於軍前奮勉効力今在英吉沙爾病故著加恩賞給恩騎尉准伊子承襲一次仍賞銀一百兩○叅贊大臣舒赫德等議奏查哈密吐魯番皆仿內地之例十家設一甲長巡緝稽察但該二處設官分職皆與旗民相似至回部各伯克凡一切事務俱係分員專管尚屬嚴密若改編保甲勢必裁汰舊缺轉覺紛更且伯克等不得其人則保甲

亦屬具文應請仍照舊制責成阿奇木伯克等將各村莊頭目遴選補授即如各村莊之噶匝納齊一缺管轄地方甚為緊要倘有疎防故縱等情即行革退分別查處或地方遼濶即酌量添設該管大臣等仍與阿奇木不時巡察從之○以河南開歸陳許道觀音保為貴州按察使○丁丑諭據楊廷璋奏查訊商人程宏嗣等供與林洛說合婪贓屬實林洛著革職交與該督撫等將案內有名人犯會同一併嚴審定擬具奏○諭軍機大臣等昨莊有恭奏查訊林洛婪賄一案已傳諭該督等令將伊子林輔國供認一節加意體勘不得任其避重就輕以致劣員諉卸漏網茲據楊廷璋奏到訊過商人程宏嗣等多供詞內有林洛於該商進見時告知另撥官兵與網戶巡查必須查案方可辦理是已明示以指勒求索之意矣復稱欲下教場有話去對伊子講說蹤蹟隱躍其為掩耳盜鈴又屬顯

然。試問說事之初令商人謀之伊子而受財之後伊子轉不令伊父豫知有是理耶此中確情正須詳悉根究務令水落石出執法嚴懲以示炯戒不得稍存含糊遷就之見昨諭緹縈請代父罪非事理之正且在漢世或妄自稱誦此時設有其人朕亦安能廢法而曲徇之也將此并諭楊廷璋莊有恭等知之○又諭曰楊錫紱摺奏濟寧回空漕船至武城縣地方有舵水人等拴去村民及遣承差查視復混行毆打等語糧船旗丁舵水人等途次滋事最為向來惡習屢經整頓懲創始得漸就肅清今濟寧漕幫乃有擅行拴縛村民之事甚至漕督承差奉派往查又復悍然肆毆不顧則其強橫藐法尤非尋常可比此案已據該督移交阿爾泰審擬著傳諭阿爾泰嚴提各犯逐一詳悉研訊看來其中必有旗丁為之主使理應究明盡法示儆不得但將現在舵水人等聊且薄懲草率完案致長刁

風所有在船督察不嚴之弁員著一併附參嚴加議處毋得寬縱○陝甘總督楊應琚奏請改撥軍臺糧料口外度濟應肋巴泉至蘇魯圖等七臺應需馬料向由哈密所屬之塔勒納沁屯糧內運往但查塔勒納沁至蘇魯圖等七臺計程自一千一百四十里至六百一十里不等需馬料五百餘石照例每石每百里連加增回空腳價三分之一應給銀七錢九分零共需腳價銀三千三十八兩零其哈密至蘇魯圖等六臺計程自九百二十里至三百九十里不等需口糧一百八十餘石共需運腳銀九百三十兩零在當時各臺附近處所產糧無多故由哈密等處撥運現在屯墾較廣口外地方在在糧石充裕查開展至蘇魯圖等臺計程自六十里至六百六十里不等所有各臺糧料若改由開展撥運每石給腳價銀四錢九分零共需銀一千二百八十九兩零嗣後除各臺官兵應需鹽菜銀

兩。照舊由哈密支領外其口糧馬料請改由
關展撥運得旨如所議行○戊寅諭軍機大
臣等據喬光烈奏河南省城於六月初一日
得雨寸餘如得普渥之澤晚禾均可播種齊

全等語看來豫省河北一帶正有望雨情形
但喬光烈具奏經今已及一句此時曾否續
得需足著傳諭吳達善令其即行詳悉查奏
再京師自月初得雨後日來同雲時作亦在
待澤之際直隸山東地方雖據該督撫奏報

得雨分寸不等而現在各屬何處已得優渥
何處尚需繼需並於大田有無妨礙之處可
一併傳諭方觀承阿爾泰即速查明奏聞尋
吳達善奏查各屬稟報自五六月以來連得
透雨早秋暢發晚秋亦已播種惟濟源修武
安陽內黃四縣稍高尚未得有透雨得旨覽
奏俱悉方觀承奏直隸六月初旬各屬俱報
得雨三四寸至五六寸不等田禾無妨現在
保定時作雨勢並無旱象得旨覽奏俱悉批

摺之際亦即廉纖細雨而亟待優霈不覺瞪
發勞也阿爾泰奏東省小暑後各處連得雨
澤需足麥子高粱暢茂晚秋亦俱播種得旨
欣慰覽之○己卯

上詣暢春園問

皇太后安○諭軍機大臣等現據吳達善查奏
鹽包公費銀兩並非晉商蘆商舊有陋規實
因改食蘆鹽起自張任萃創收之項等語前
據鄂弼兩次奏明派員查訪今豫省既經查
明晉省何以尚未覆奏現在查辦若何著傳
諭該撫即將實在有無陋規情弊速行奏聞
毋再延緩尋奏查河東鹽商運銷池鹽本重
利微除正耗及火耗外並無規禮覈之底賬
訪之輿論如出一口後因池鹽缺產奏准於
衛輝等廠買鹽蘆商給與鹽票領回銷賣並
不知豫省衙門有何規禮至晉省從前本無
陋規現在借運蘆鹽運腳更重更無餘力使
費報聞○又諭曰蘇昌奏拏究石門縣奸徒

投遞捏造逆單一摺。於事理殊未明晰。所辦不免張皇過當。地方果有逆匪重案。一經發覺。自應嚴拏速究。毋令稍有漏網。但此案既稱陳九友自認捏造字單。圖害唐覺思等。而該州縣復經查明。唐覺思實係土著。並無為匪匿藏悖逆字蹟情形。是仇陷已有確據。其中果有別情。自應另行查究。陳九友若果有代認消案之意。不妨再拏其餘。若情節不過挾仇。即應治陳九友誣害之罪而已。不必波及無辜也。乃今單內首列之唐覺思。已無蹤蹟可疑。而復將全單羅列各姓名。一一關行兩省。輾轉搜拏。縱令到案審明。即予昭雪。其為株累不已甚乎。在奸徒設計誣捏。原以希圖陷害為快。今乃根拏擾累。反墮其術中。此等措置失宜。直所為過猶不及者。若不善會朕指。而遇真正逆案。或稍存顧慮。則又膠柱鼓瑟。無怪乎曉人難得矣。著傳諭該督等。令其將投文之張老。捏造逆單之陳九友等。

各正犯。徹底根究實情。從重定擬。即速完案。毋得牽累無辜。致乖明允。並令周琬馮鈴。知之。○戶部條奏銅運事宜。滇銅每年正加四運。每運委派同知通判。知州。知縣等二員。均分起運。不必委用佐雜為協運。仍遵奏准起程日期。先後開船。依限抵邇。裝銅上船。時請飭該省督撫。即設木牌填註銅餉數目。船身入水尺寸。並令沿途督撫。嚴飭地方官。查照木牌填註數目。實力稽察。以杜減載。多裝夾帶貨物等弊。並照催漕之例。不許停泊。其有守風守水之處。總以三五日為準。不得過期。各廠積存銅渣。令鑪頭隨時淘洗。所得銅餉。於每年年底奏明。即於次年附卯添鑄錢文。解部搭放兵餉。無庸積存各廠。運員自滇黔運京。途遠費多。起程時。該撫祇將水腳雜費。及一半養廉銀覈給。不敷所用。雖有餘剩銅鉛。除交崇文門稅課外。所剩無多。向例銅鉛船沿途所過各關。該監督查明船。

身丈尺。銅鉛觔數填註蓋印給運員收執到京後。所有沿途經過各關應徵稅項一併赴崇文門交納。以致歸途無資請嗣後各員餘剩銅鉛除交崇文門本關稅課外其應納沿途各關稅銀俟運員差旋在於藩庫應領一半養廉銀項下照數扣存彙搭解部免致運員拮据。一搭放兵餉宜令戶工二局鑪頭分放。查戶部寶泉局鑄錢原以搭放兵餉工部寶源局鑄錢則專為給發工價嗣因工部錢給工價外尚餘二十萬串奏交戶部搭放兵餉令寶泉局鑪頭往工部代放以一局兼兩局餉錢往往顧此失彼請嗣後八旗兵餉除戶部應收數目金銀庫票傳寶泉局鑪頭解放外其工部應放錢令其自領金銀庫票傳寶源局鑪頭赴節慎庫自行放給從之。○刑部議覆江西布政使湯聘奏查律載同謀共毆人致死者以致命傷為重下手者絞餘人杖一百又同謀共毆殺人者當究明何傷致

死以傷重者抵竊思兩人共毆傷皆致命一至抵償一止杖責輕重懸殊而向來州縣祇以擬抵一犯解勘餘人取保以致輾轉朦混不得實情等語應如所奏嗣後同謀共毆之餘人除無致命傷者仍照例辦理外如驗明傷皆致命身死者無論當時過後將先後下手之犯一併收禁解審俟巡撫審定後發回該地方取保從之。○庚辰上御勤政殿聽政。○以協辦大學士吏部尚書梁詩正充經筵講官。○以翰林院侍講學士周惲為內閣學士兼禮部侍郎。○以正藍旗蒙古副都統富當阿山海關副都統舒泰對調。○辛巳諭軍機大臣等原任知州佟世表前在宿虹同知任內有承挑朱家閘引河未成應賠銀四千九百餘兩而該旗以無案可稽遷延移覆現經工部叅奏但此項工程緣起究應查明原案分別辦理從來引河工程原以分洩水勢以免頂衝於河防原屬有益

其承辦之員有因奉派照例開挑其後或因經理未善以致流淤道改不能收效著落賠項者其人尚屬公過不過令其完帑而止若係奸滑之徒朦稟上司計圖開工侵冒以致糜費誤公則不但責令分賠且當明治其罪此中情事迴殊未可概以追賠完局也且據該員辯稱此工非伊一人專辦等語其言亦並無可據著傳諭高晉令其將此案前後始末逐一確查是否該總河委令承辦抑或該

平錄卷三二

員自行詳請興工并因何覈叅令其賠補及案內同辦更有幾人之處即行詳悉奏聞尋奏查佟世表在江南宿虹任內經前任淮徐道姚廷棟等詳請委辦朱家閘引河估銀四千九百二十二兩九錢嗣緣流勢變遷未能開成經白鍾山於報銷冊內將此項聲明尋准部駁以閱久尚未開放成河糜費錢糧即令著落原辦之佟世表名下追賠查當時並未另委別員同辦雖非該員詳請興工而河

未成工例應承辦之員賠補得旨覽奏俱悉○又諭曰高晉奏現在提解閭大鑪俟人犯到齊會訊一摺內有該犯因母未入節孝作沛縣誌記譏刺不公曾刻俟俟集內乃原任知縣李常既據書吏呈送僅將該犯拘喚訓諭並將書板及已印詩集追繳銷燬了事李崇身令一縣遇此等藐法劣監正當嚴行究治何得曲意調停如和事老人之為者況即譏刺縣記一文該犯自干橫議其情已屬可

平錄卷三二

惡李崇不惟置之不論且將伊全集盡行追燬欲使惡蹟消滅無遺其代為掩覆非與於逆惡之甚者乎若就此一節徹底根究則全案關鍵未必不勢如破竹也李崇現在革職回籍著傳諭高晉令其速即提到嚴訊務俾水落石出毋任稍為游移隱匿將此並諭該督等知之○又諭工部議駁常鈞請停代賑城工一本內稱安徽省乾隆二十四年被災案內請以工代賑之潛山太湖二縣城工何以

不即興舉接濟飢民。及遲至二十六年始行請帑興修。應令該撫據實查叅等語。已降旨依議矣。以工代賑原屬地方偶爾被災。隨宜調劑之一法。常鈞所言固未免因噎廢食。但如原摺所指安省舊案。則事理實不可解。試思被災之年。既經題准。自應及早興修。以資災民口食。即云勘估請帑需時。亦不過旬月間耳。何以遲至三年始議舉行。且其年正值豐收。何名代賑。尤足令人失笑。高晉前任安

晉錄卷六三八

三

撫素屬曉事。何以竟不自覺耶。著傳諭該督令將前後辦理緣由明白回奏。尋奏查潛山太湖二縣城垣於乾隆二十四年。因該二處秋禾被災。案內附請興修。嗣因該二縣城垣原估之後。續有坍塌。詳請一併估修。當即勘估需銀二十餘萬兩。較原估錢糧數倍。恐有浮冒情弊。駁飭藩司另委妥員確估。臣去冬奉召入都。尚未詳到。是以不及辦理。此等實情未經呈奏。咎實難辭。請將臣嚴加議處。得

晉錄卷六三八

三

旨該部察議具奏。○以內閣侍讀學士溫敏為詹事府詹事。○壬午諭軍機大臣等。成衮扎布奏據護送哈薩克使人之喀爾喀兵朋楚克告稱。哈薩克使人卓勒巴喇斯已回游牧。我等歸途於五月十二日。在薩哩山陰之鏗格爾烏里雅蘇圖。遇五十餘賊。鎗傷官兵梅楞達什敦多布。已圖致斃。惟我一人脫出。等語。昨阿桂奏伊柱於四月初八日。在巴柴拏獲瑪哈沁數口。據供同行之色布騰被大兵擊斃。欲入俄羅斯。今又移向阿勒坦特布什。伊柱即領兵往剿。或此次賊人即色布騰黨類。亦未可定。成衮扎布已派兵三百令車木楚克扎布等前往搜捕。並著傳諭阿桂轉飭伊柱加意奮勉。一經拏獲。即將朋楚克所告情節詳加查詢。再朋楚克等告稱。因駝隻疲瘦。向哈薩克換取肥者。並未給與等語。伊等係微小部落。原欲沾我餘潤。轉向彼希圖便益。甚屬見小。嗣後護送哈薩克使人等當

擇能知大體者派往再於乾清門行走之察
哈爾侍衛等派出二三員令其照看著軍機
大臣即查辦具奏○軍機大臣議覆陝甘總
督楊應琚奏稱安西提標官兵移駐案內議
撥靖逆兵二百名瓜州兵三百名移駐哈密
但瓜州營兵餉原定折價每石二兩二錢靖
逆協一兩八錢今兩處合駐一營折價未便
參差查布隆吉營折價亦係二兩二錢請改
撥布隆吉額兵二百名同瓜州兵移駐哈密
等語應如所奏至稱布隆吉撥缺之數即將
原議之靖逆兵二百名歸補並以靖逆兵一
兩八錢之折價合之布隆吉二兩二錢之數
攤算每石統計價銀二兩零四分一體折給
等語查本年四月內該督原奏安西提標五
營悉照每京石二兩二錢之例改給折色並
未聲明內有多寡不齊之處所奏前後不符
應令詳悉確查具奏從之

實錄卷之三十八

三

大清高宗法天隆運至誠先覺體元立極敷文
奮武孝慈神聖純皇帝實錄卷之六百三十八

實錄卷之三十八

三

大清高宗法天隆運至誠先覺體元立極敷文奮武孝慈神聖純皇帝實錄卷之六百三十九

監修總纂官經筵講官太子太傅文淵閣大學士文淵閣領事領侍衛內大臣保參奏奉 上諭事件管理吏部理藩院事務正黃旗滿洲都統世襲騎都尉軍功七級隨帶加一級尋常加二級軍紀錄一次臣履陸總裁官經筵講官太子太傅文華殿大學士文淵閣領事領侍衛內大臣保參奏奉 上諭事件管理刑部三庫事務世襲騎都尉軍功十九級隨帶加二級又加二級臣董誥內大臣戶部尚書領侍衛內大臣保參奏奉 上諭事件管理尋常紀錄十四次臣德麟經筵講官太子少保工部尚書紀錄六次臣曹振鏞等奉

敕修

乾隆二十六年辛巳六月癸未

上詣暢春園問

皇太后安○諭據愛必達等奏滇省新興州江川縣兩處於四月內地震所有倒塌民房傷壓人口請照例賑給等語該州縣地震成災雖經該督撫等照例分別賑給但念被災過重窮黎尚多拮据所有賑卹銀數著加恩照乾隆十九年恩卹於常例之外加一倍賑給該督撫務督率屬員實心妥辦俾災民均沾實惠該部遵諭速行○諭軍機大臣等成衮

扎布等奏護送哈薩克使人官兵等歸途遇瑪哈沁五十餘人被其戕害等語現在額爾克沙喇等解送伊犁牲隻在途伊等領兵行走諒不致疎虞但得聞信息順便查拏安知不就擒獲成衮扎布曾知會與否未經奏及著傳諭額爾克沙喇扎木禪等此次瑪哈沁傷損官兵信息伊等曾否聞知牲隻在途仍須加意防範遇有瑪哈沁等即查拏訊究據實奏聞○叅贊大臣阿桂等奏伊犁屯田回人一千戶現有八百戶餘二百戶原議秋收後送到今阿奇木公茂薩同衆伯克告稱本年春夏田功甚好必獲豐收請將回人二百戶於六月盡送來伊犁以助收割情願助給口糧至秋收後再支官項等語臣即行文阿克蘇庫車等處大臣速為派送祇需給以行糧農具其坐糧籽種俱於伊犁辦給報聞○予故刑部左侍郎伊祿順祭墓如例○甲申上以皇八子永璇婚禮還宮禮畢幸圓明園○

諭軍機大臣等阿桂奏伊柱領兵往捕瑪哈沁色布騰等至五月初尚未得信息伊柱起程時曾飭以窮追務獲此時必奮往搜勦所帶一月口糧應速為接濟已派侍衛鄂鐸等領兵七十名前往等語阿桂此次辦事奮勉妥協深屬可嘉計伊柱此時已擒獲色布騰等矣若臨陣勦殺賊首則已否即員創亦必派員解京又搶掠護送哈薩克使人官兵等或即係色布騰一起擒獲時著詳訊具奏朕因嘉悅阿桂親製詩章書呈以賜嗣後宜益加奮勉○乙酉諭曰劉統勳何國宗所辦皇輿西域圖誌著交與軍機處方畧館辦理○諭軍機大臣等成衮扎布等奏據派送哈薩克使人被瑪哈沁搶掠脫出之兵丁多爾濟所告與朋楚克不符其哈薩克不肯易換馬駝情節俱係捏造等語派送外藩使人即兵丁亦當擇其強幹曉事者似此鄙瑣見小之人濫行充數乃成衮扎布等識見不到之處

已諭此後特派乾清門侍衛等直送至邊界成衮扎布處派官兵隨往亦宜加意遴選毋得仍前濫派○軍機大臣等奏安泰等奏稱成衮扎布等以伊犁回部平定中外一家請將奈曼明安至度濟察罕布爾噶蘇所設卡展至烏魯木齊駐劄派喀爾喀公朗衮扎布烏梁海內大臣察達克等查勘今據呈稱自巴顏珠爾克卡至烏拉克沁伯勒齊爾及烏魯木齊可設卡者十五處俱以相隔百里為率臣等會議自烏魯木齊至烏爾圖布拉克賽音塔喇納哩特吉木薩四卡由烏魯木齊派出官兵馬匹牲畜接續駐劄其蘇伯昂阿至烏拉克沁伯勒齊爾十一卡交成衮扎布覆查如水草俱佳即將奈曼明安等十六卡遷移駐劄所需錢糧等項從前俱由烏里雅蘇台支領現在道路既遠而烏魯木齊積貯甚豐應酌量於兩處就近分領等語臣等議得新經查勘展拓之十五處既可設卡應將

奈曼明安等舊卡達移但千里長途喀爾喀難於兼顧應請將附近烏魯木齊四卡派出索倫綠旗等兵駐劄從阿克蘇派侍衛等員管領其餘十一卡俱令就近分領錢糧應如所奏辦理又查近據成衮扎布奏烏里雅蘇台至烏魯木齊既經新設臺站十八處將遞送西路一應事件俱由烏魯木齊分發其薩拉布拉克巴里坤所設臺站二十四處俱裁其新設之十八處每站除章京外派兵八名仍派台吉管理從之○丙戌諭前因各省藩臬於地方政務陳奏寥寥曾經降旨通飭而近來具摺言事者自雨雪情形外亦不過擬拾條例內一二無關輕重之文虛應故事迨下部議覆則其事之可行與否彼又若不與其責者然豈朕重官常飭吏治之義即如福建按察使富明安來京陛見朕詢以馬龍圖之案據稱彼時原知減等定罪之非且曾稟明督撫因楊廷璋商之吳士功遂有幕友查

例之說曾不思臬司職任刑名當日既見及此果能力為揀正吳士功等皆可免於罪譴所全國多即或堅持不聽亦應據實奏聞俾獄典得無撓枉其與尋常條奏塞責者相去何啻霄壤乃臨事委蛇既內懾上官之勢又外博長厚之名及至朕前復借此為自明諉過之地國家又安用此藩臬者為耶且今日之兩司即將來之督撫設皆如此居心無論其身任封疆不足以資倚任即此時現膺方面品秩不為不優於督撫公事並非不應參與者何得俯仰趨視同隔膜朕撫御臣工從無偏任伊等共襄職業亦豈肯教之苟立異同使為藩臬者有意取巧或藉越俎陳言冀得行其傾陷是徒自取罪戾安能制人若不以官守為重而惟以緘默為善藏以模稜為得計其為阿附督撫則一耳曠官廢事莫此為甚倘將來竟相沿成習設遇關係重案辦理乖張同僚不知共濟將督撫獲罪朕亦

不能置兩司於不問也。直省藩臬兩司著通行申飭。并將此傳諭中外知之。○丁亥。

上詣暢春園問。

皇太后安。○諭軍機大臣等。河東召募新商一事。前據鄂弼奏稱。因該鹽政差押家屬赴運。以致輒生畏避。當經傳諭鄂弼。令其彼此實心籌畫。會商妥辦。不得稍存成見。今據薩哈岱奏到。並無差拏家屬之事。該撫所爭不過因縣令黃道鎔奉鹽政檄。即行催傳。未經先稟鄂弼請示。該撫遂爾不無芥蒂。則所見甚小。設使該鹽政於商人已經到運承辦之後。或別有勒捐苛累情事。自不應聽其率意妄行。若此時不過為引地虛懸。急於需人起見。催傳稍急。尚屬情理之常。該撫身任地方。自應和衷協濟。俾無掣肘。乃轉將該縣嚴行申飭。有司無識。仰承意旨。又誰肯實力催令赴運乎。朕之任用鄂弼與薩哈岱。其輕重分際。該撫豈不知之。若以微嫌致生畛域。殊非朕

所期於鄂弼者。倘由此執而不化。將該縣據拾他故。有意苛求。是又自取罪戾。亦斷不能逃朕洞鑒也。將此傳諭知之。○又諭。據薩哈岱奏到。遴選新商一摺。已降旨傳諭鄂弼。令其和衷協濟。勿稍存畛域之見。以期無誤。辦公至該鹽政亦不可因有此芥蒂。遂致辦理牴牾。務須籌酌情形。會商妥辦。並將此傳諭薩哈岱知之。○又諭。前蘇昌奏拏究捏造逆單一案。閱其情節。不過陳九友挾嫌誣害。唐覺思若因此輾轉株求。波累無辜。適長奸徒傾陷之心。是以降旨令該督撫等究明誣陷實情。速即完案。今據馮鈐奏到。稱逆單內前後語氣不同。非出一人之手。其自詩句以上。顯屬舊存逆劄。且以馬朝柱為名。即當從該犯追究逆黨蹤跡等語。該犯陳九友所造逆劄。既有可疑。或即係馬朝柱逆黨。藉此惑眾為匪。情事自應逐細根究。又不得但以讎陷草率完結。著傳諭馮鈐。速提該犯到省嚴行

訊鞫務得逆詞來歷毋少寬縱以致漏網但不得稍涉張皇轉滋紛擾並將此諭令愛必達知之○戊子軍機大臣等議奏據傅玉奏稱查黑龍江水師營內原設水手領催八名水手四百一十九名內年老殘廢者三分之一查應挑此項領催水手額缺之間散壯丁八十名內除有年老殘廢者四十三名外尚存應挑者三十七名今若不將應挑壯丁豫先多為籌辦遇有差遣水手恐有不敷等語

查黑龍江設立戰船即由發遣吉林之罪人子孫內挑選水手給以糧餉按時操演原為與俄羅斯水路相通特加防範起見其船內應用水手必須挑選強壯之人聽用查乾隆二十四年正月內將軍綽勒多等奏稱黑龍江各該處原本人數較少其另記檔案等人皆係生長本地若將此項人為民移居他處則地方之人尤為加少且伊等素日與本地另戶人等一同種地收放捕魚打牲相習日

久請將此項人等仍附各旗註冊遇有閒散壯丁人少之旗分佐領內有馬甲拜唐阿缺出倘不得人即由此挑選強健者充當等語經臣等議准在案今該副都統請將此項附入旗分佐領之另記檔案及開檔之一百四名於該旗佐領冊內開出附入水師營壯丁檔案俟有水手缺出挑選強壯者充當再現有食兵餉者六人皆曾在軍營出力亦應如所奏暫准其照常當差食餉從之○命禮部左侍郎兼管翰林院掌院事務介福兵部尚書劉綸教習庶吉士○己丑雲南學政李中簡奏各府州縣育才之地書院外有義學書院之師官為延請至義學僻在鄉村地方官耳目不及各聽鄉塾之便以致學行未優者亦得徇情延請嗣後請責成該地方官非文行兼優者不得濫充並將各處義學教習姓名出身咨呈學政如有以監生武生等混行充選者聽學臣記過咨明督撫存案得旨著

照所請行。○庚寅遣官祭

大神廟。○諭御用馬匹有致祭馬神之典。從前並無主祭人員。嗣後凡遇應祭之期。由該衙門具奏。派內務府大臣一員。上駟院卿一員。前往致祭。○諭軍機大臣等。陳九友捏造逆單一案。昨據馮鈴奏稱。單內前後語氣不符。顯屬舊存逆劄等語。果爾則與前此蘇昌所奏專為捏造傾陷者不同。已詳悉傳諭該撫提犯到省。訊鞫實情具奏。今閱提督李勳奏到搜查陳九友家中對聯。內有朱朝吏部尚書並影內封為大夫等字樣。是其悖逆字跡。非出臨時編造。益見馮鈴所奏尤為信而有徵。現據周琬奏明。自赴長樂督率查拏。就近究審。著再傳諭該督等。令於提犯到案時。即行悉心研究。執法定案。不必稍存畛域之見。此時各犯如已經解赴湖南。馮鈴自當遵照前旨。嚴審定擬。倘尚未起解。則周琬於刑名之事。素屬諳練。亦當隨獲隨究。不必輟轉。

關提咨解。徒存外任形跡。以致時日遷延。重犯久稽顯戮也。將此通諭該督撫等知之。○

又諭曰。吳達善奏據署汲縣知縣呂文光稟稱。吉林轉發軍犯程三。在正定地方向伊夥計楊棟賄買替解。經汲縣典史任學淵查出。現在嚴訊等語。已傳諭方觀承。令將正定地方官查明嚴參。至該典史不過照例轉遞點驗之員。而遇事留心。即可肅清弊竇。可見地方任事與否。各存乎其人。此案係典史轉稟。抑係該縣會同查明。著傳諭吳達善將該署縣及該典史平日居官如何之處。即行查明。據實奏聞。○刑部議覆。山西巡撫鄂弼奏。西省本年秋審。本揭裝敘新舊案情。問供積至一尺數寸之厚。殊屬繁冗。請照舊造黃冊。簡括案情。隨本進呈。另造清冊送部。並請於疏內僅開本年秋審犯名起數。其餘案情問供。概行刪除等語。若如該撫所奏。本揭裝敘犯名起數。不敘情節。日久無憑查考。且黃冊裝

敘案情較屬繁多請嗣後本揭仍依舊例無庸改造黃冊其本內舊事緩決三次者止敘案由未及三次者摘敘簡明畧節新事照舊備敘案情加具看語依次彙題所有問語供詞悉行刪除毋庸另定程式從之○辛卯上詣暢春園問

皇太后安○還宮○諭軍機大臣等鍾音奏查辦王鍾家產貲財一摺所辦非是已於摺內批飭該撫等豈不知王鍾効力年久並無過愆非如朱若東鄧錫禮等之貪婪可比何至籍其家貲竟與侵貪不法人員毫無區別殊不可解朕從前降旨令該撫等訪查照料者原因伊子年幼且有未完帑項若任親串夥計乘機侵費公私兩無裨益所有王鍾引地貲財昨已詳諭鄂弼善為開諭令其自行經理酌量分年分數次第完繳於歸帑既可從容而生計亦為優裕今鍾音所辦若此是以朕始終矜卹之意轉為該道全家之累獨何

心乎近來督撫大吏往往不問事理之輕重專以寧失之數無失之縱自為立腳地步而從寬出自上恩積漸相沿竟成惡習此等若徒謂之不曉事矯枉過正猶不足以盡其弊也王鍾貲產在山西者鄂弼可遵照前旨妥協料理其榆林存貯王鍾貲財著鍾音即行給還並將此傳諭該撫等令其轉諭其子知之○又諭曰吳達善奏吉林轉發軍犯程三在直隸正定縣向夥計楊棟買替代解至河南汲縣查出現在嚴審等語軍犯遞解沿途發遞之處理應詳慎點驗若可任意更換則李代桃僵勢將無所不可國法安在○所有府縣等官因何並不查明年貌任其賄買公行緣由著傳諭方觀承令其逐一究明嚴行叅處○軍機大臣等奏據安泰奏稱奉諭烏魯木齊等處屯田餘糧不必解送已里坤酌量減價折給兵丁扣抵鹽菜銀兩查官收米麪減價折銀自屬兵丁所願但食用不盡者必

籌轉售之法。今烏魯木齊等處商人。曾有以貨物易換兵丁米麵之事。若令其交銀現買。似亦可行等語。應如所奏。酌將兵糧一石。定價九錢。每次給與五斗。扣銀四錢五分。至商人則較兵丁加增。照時價稍減。酌令交銀一兩五六錢。給糧一石。從之。○壬辰。

上御太和殿視朝。文武陞轉各官謝恩。○辛酉。明園。○諭軍機大臣等。據高晉查奏閩大鏞摺內稱。該犯刺機憤激。甚至不避。

廟諱。並有狂悖不經語句。如此情節。可惡自當。照呂留良之例辦理。已於摺內批示矣。復又將原書閱看。其悖逆尚不至如呂留良之甚。雖其不避。

廟諱。猶可云村野無知。但該犯書內筆舌詆毀。毫無忌憚。若姑容寬縱。則此等匪徒。不知悔改。反因此次查辦。益肆其怨誹。充其所至。必將入於呂留良一派。該犯斷不可留。著傳諭高晉等。勘得確情。即將閩大鏞按律定擬。速

行完案。此外不必似呂留良之案。輾轉推求。以致株累。○又諭曰。永貴奏稱。審訊阿布都。春。刑逼多倫。回人什物。信用親戚。瑪穆爾。縱令侵漁。請旨革職治罪。又瑪穆爾曾隨布拉呢敦逃走。請即行正法等語。阿布都。春。係久居吐魯番之人。加恩令其管理多倫。回衆。理宜正己率下。乃貪酷敗檢。若此。不可留於回地。著傳諭納世通等。派員押解來京。助惡之瑪穆爾。著即行正法。其妻子著發往伊犁賞給厄魯特等。○豁免江蘇句容。元和。吳縣。昭文。金山。上海。丹徒。丹陽。金壇。江都。銅山。睢寧。太倉鎮。洋寶山。海州。蘇州。衛。句容。衛。等十八州縣。衛。坍荒田地。額賦銀八千三百八十六兩有奇。米麥。豆。共三萬二百七十石有奇。○癸巳。諭曰。尹繼善奏。江省額設經制十把外。委。每因不敷。派調酌添。額外外委。一體差違。請明定章程。照經制外委一半之數。添設報部備案等語。前因吉林將軍恒祿奏。請添設

差委員弁。朕以此等額外增給頂帶之員。並非體制。如果必需添派。自應報部定額。現已行查盛京等處。另行酌辦。今尹繼善復有此奏。可見外省似此通融添設者。所在皆是矣。外委已有經制定數。而督撫提鎮等。於數外又復自行添委。並不報部備案。此等員弁。雖微。均關名器。若竟任意派用。無憑稽覈。將來冒濫之漸。何所底止。在督撫不過為調遣足用起見。而微末無知。恃有護符。動致滋事。亦勢所不免。何如通行確覈。明定章程。於官制辦差。均為有益。著該部行文各省督撫等。查明本處實在有無添設情形。據實報部。該部將各處營分大小名數之多寡量為酌定。並將添設人員。如何拔補經制外委。以及一切報部稽查事宜。詳悉定議具奏。○諭軍機大臣等。據察哈爾總管齊哩克特奏。稱所屬正紅旗察哈爾海拉蘇台等處。忽有蝗蝻。雖於蒙古地方無害。但恐飛颺內地。有妨民田。

現在督捕撲滅等語。所見甚是。蝗蝻既有萌蘖。若不及時撲捕。日久必至蔓延。口外地方縱不為害。而附近內地田禾。所關綦重。地方官應及早悉心體訪。實力防範。務絕根株。方為妥協。著傳諭方觀承。鄂弼等。令於殺虎口。張家口等處。速行飭屬體察。其現在有無蝗蝻情形。著即據實查明具奏。尋鄂弼奏。查有蝗蝻處所。現據各路稟報。俱搜捕無餘。惟蒙古草地最為遼廓。聞亦有蝗。現在嚴飭道府文武督兵搜捕。得旨。地方文武之稟報。全不可信。汝及藩臬大員中。何無一往者。切不可入外省養高習氣。慎之。○又諭據楊應琚奏。烏魯木齊辦事大臣兩次咨取硝磺等因。前經降旨。令軍營大臣等。如用火藥。即於本處採取硝磺。間有一二不產硝磺處所。亦宜由近地取用。既省輓運。兼屬便易。著寄信駐劄烏魯木齊大臣等。嗣後仍遵前旨。各就附近地方採用。不必取給內地。○甲午諭曰。陳光

裨著來京陛見。福建建寧鎮總兵員缺著黃正綱補授。○諭軍機大臣等據陳宏謀題參紳衿顧孫古道說戶欠糧一本已降旨革職令該督嚴審矣。劣紳恃符抗糧最為地方惡習。自雍正年間嚴加整頓後漸知安分守法伊等若在彼時斷不敢似此刁抗無忌。此皆近年以來地方官未免瞻徇情面有意優容遂致釀成若此其風斷不可長。著傳諭該督撫嚴行辦理並將顧孫古道所有資產查明以備抵欠外如有地方辦公之項即從重示罰毋得稍為寬縱以為劣紳頑抗者戒。○又諭曰舒赫德奏稱沖噶巴什之布魯特烏默爾比搶掠安集延貿易人等業經治罪其家屬八名口請分賞各城阿奇木伯克等語烏默爾比係恩賞游牧附卡安插之人仍不改舊習肆行搶掠應如所奏將家口分賞各城伯克為奴阿瓦勒比聞知烏默爾比不法即行呈報甚屬恭順哈爾噶齊從前亦著有勞

績著加恩免其分賞回部伯克即賞給阿瓦勒比等此係格外施恩若該部落人等再有似此不法者斷不姑貸著舒赫德等徧行傳諭衆布魯特知之。○乙未

上詣暢春園問

皇太后安。○諭本年江歇漕船所有運丁例支一半月糧但念該丁等當歇運之年未免生計維艱著加恩於應支一半月糧外再行賞給一分以示體恤該部即遵諭行。○予故太子太保戶部尚書李元亮祭墓如例諡勤恪。○丙申諭軍機大臣等熊學鵬奏查廣西鹽務現在商辦情形較前辦理在官時稱便惟在實力緝私等語所論極見公明嗣後該省自應循照新定章程妥協辦理。○是月署兩江總督高晉奏沛縣抗糧監生閻大鏞現在搜查伊家及該犯親友處有從前刊刻續經燒燬之供候集詩文中有譏刺官吏憤激不平甚至不避

廟諱更有狂悖語。句謹粘籤呈覽。得旨如此可惡。當引呂留良之例嚴辦矣。○山東巡撫阿爾泰奏。查新城縣烏龍河之西有積窪荒地。現飭築塍開漏。引水歸田。先後開墾稻田。共一百四十餘頃。青州屬之高苑縣地勢亦窪。業將極窪處酌改稻田。西南有麻大湖。及小清河引麻大湖之水。以廣來源。洩入支脈溝。以為尾閘。現在洩出稻田十餘頃。至博興縣亦濱臨小清河。地勢更窪。陸續改墾三百餘頃。現於小清河築草壩收蓄河水。水少則引水以灌田。水多即圻壩洩水入河。再萊州屬之濰縣。其南北台地濱臨堯丹等河。亦極窪下。今開溝築塍。引大小于湖之水開墾稻田一十三頃。得旨可嘉之至。勉力以實為之。○陝甘總督楊應琚奏。巴里坤官廩備調馬三千匹。請改撥各營驛。以備騎操。現據安西標營。就近願領七百匹。肅州鎮領五百匹。甘提涼鎮各四百匹。涼州滿營三百六十匹。莊浪

滿營二百匹。餘三百二十匹。聽附近塘驛領買。俱令照例繳價。得旨著照所請行。○陝西巡撫鍾音泰臣等遵旨至原任延榆綏道王鏜署中。查看伊財物。將箱籠木匣衣包逐一點明。并飭榆林府知府暫行收管存貯。并傳齊該道長子王德淳及家人等。當將欽奉皇上因王鏜病故。所有財產難免家人等隱匿。尅漏。令訪查照料。不過呈還官項。不同查封家產之諭旨。明切宣揚。王德淳俯伏叩頭感涕零。應否將伊等解往原籍同查出家產一體辦理之處。候旨遵行。得旨此事爾等所辦皆太過不合宜。試思王鏜非犯貪侵之罪者。何故查其家產乎。將朕為伊之苦心而反致為過嚴。寬人之惡舉。是何心哉。○又奏請嚴禁打造銅器。以杜私銷。得旨未免滋擾。且現今錢價既平。何必為此。且將導之使私銷耳。密之。○廣西巡撫熊學鵬奏。桂林城守營官兵向隸提標管轄。查該營駐劄省城。與提

臣駐劄之柳州。隔三百餘里。請嗣後桂林城
守營兵。令撫臣一體驗看操演。技藝生疎者。
咨明提臣辦理。其餘一切事宜。則仍聽提臣
專辦。巡撫不得攬越。得旨。如所議行。○貴州
巡撫周人驥奏。湖南巡撫馮鈐議。准按察使
嚴有禧。請停民苗結婚之例。奉諭。允行。竊思
黔楚情形不同。黔省民苗錯處。往來洽比。結
婚以來。數十年相安無事。一旦復申禁令。轉
致驚疑。且恐兵役藉端挾詐。更滋煩擾。可否
懇恩。將黔省民苗結親之例。概免查禁。得旨。
所見甚是。如所議行。

軍機大臣等

奉

旨

大清高宗法天隆運至誠先覺體元立極敷文
奮武孝慈神聖純皇帝實錄卷之六百三十九

實錄卷之六百三十九

臣

大清高宗法天隆運至誠先覺體元立極敷文奮武孝慈神聖純皇帝實錄卷之六百四十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件總理
吏部理藩院事務正黃旗滿洲都統世襲騎都尉軍功加二級隨帶加一級尋常加二級軍功紀錄次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部稽
世襲騎都尉軍功加十九級隨帶加二級又加一級重誥內大臣戶部尚書鑲藍旗滿洲都統軍功紀錄次
奉書紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十六年辛巳秋七月丁酉朔享

太廟遣果郡王弘瞻恭代行禮○諭朕此次巡幸木蘭著裕親王和親王大學士來保協辦大學士鄂彌達在京總理事務其月選之文員內通判州縣等官武員內八旗護軍校驍騎校及外省送到之補放水手官驍騎校并年滿千總等官并俱著王大臣照例驗看至外省督撫提鎮等奏摺著照例自啟鑒之日為始俱齎赴在京總理處加封交內閣隨本呈送行在候朕批示隨本發回仍於在京總

理處交齎摺人祇領該部通行傳諭知之○諭軍機大臣等五吉等奏稱阿克蘇大臣咨取食羊八千五百隻已派官兵解送但羊隻原係辦給各城滿洲官兵若將所有官兵一概支給四箇月口糧羊隻既非伊等素習轉使米麪陳陳相因又虛糜購辦之費等語所奏甚是凡辦理庶務須斟酌時宜從前曾諭支給各城官兵口糧惟滿洲兵於一年之內酌給四箇月羊隻而海明等仍籠統奏請又據軍機大臣議如購辦羊隻有餘將綠旗官兵酌給一兩月亦可不足則已今五吉海明皆新疆辦事大員而所見之明昧不同若此海明能無愧乎著將五吉奏摺錄寄各處大臣閱看嗣後即遵照辦理○戊戌

上御勤政殿聽政○以侍講學士哈靖阿充日講起居注官○己亥

上詣暢春園問

皇太后安○諭軍機大臣等納世通奏本年五

月哈喇沙爾河水忽長三尺流至城下已將屯田處所築隄二千四百餘丈親赴督率防護幸保無虞等語隄工為屯田要務辦事大臣等自應親往查勘以時修築今派達桑阿往代納世通伊初至新疆恐未能熟諳情形著傳諭納世通將屯田水利事宜細為達桑阿指授此次被水田畝或係官地抑係回人產業俱著勘明具奏○軍機大臣等議覆欽差副都統巴圖濟爾噶勒疏稱達理剛愛牧廠現除照額存留外尚餘羊五萬一百餘隻馬二千九百六十七匹駝五百八隻請將疲瘦羊照時價售賣馬駝增廠收放等語查羊既疲瘦自應售賣至馬駝若請增廠不惟糜費且無需用處因思本年木蘭秋圍及明年隨往南巡兵弁所乘官馬往返不無損傷應即以此項餘馬抵補未抵補之先暫分各廠收放其駝應委員送至烏里雅蘇台妥協收放俟廐力肥壯陸續解送伊犁從之○庚子

諭廣東粵海關稅務向係督撫兼轄託恩多著即會同尤拔世管理○辛丑諭曰戶部尚書兆惠著協辦大學士事務刑部尚書員缺著舒赫德調補工部尚書員缺著阿桂補授舒赫德未到京之前刑部尚書事務著兆惠署理工部尚書事務著阿里衮署理俟舒赫德到京後兆惠仍行署理工部事務○又諭曰傅森著在京總理事務○壬寅上詣暢春園問

皇太后安○諭本年恭逢

皇太后七旬萬壽聖節著加恩八旗及京城文武各官有應扣公項及罰俸者展限一季再行扣罰○諭軍機大臣等現在樂器需用特磬按十二律大小為差江南靈璧縣素產磬石著交與高晉託庸遵照發去畫樣十二紙並寬厚尺寸件數如式採取石料每塊四邊俱寬留一分以數琢造並令該督等選擇石質純淨無虧爛疵結者依式照數妥辦務於

九月初一以後十五以前解到交樂部成辦方可無誤冬至應用之期可將此傳諭該督等令其速行趕辦毋得延緩如其不能全得先將黃鍾律四塊解來其餘以次辦送此關大典即用正項辦造亦可毋得累民○軍機大臣等議覆綏遠城將軍如松疏稱右衛滋生銀兩所得利息不敷官兵紅白事宜請再撥銀作本等語查該處原有滋生銀一萬兩應再於房租及公庫項內撥銀一萬兩令作本滋生從之○刑部議准安徽按察使王檢奏稱沿江乘危搶奪之案向例杖一百徒三年為從各減一等未足示懲請嗣後除有殺傷照例問擬外其但經得財未傷人者首犯杖一百流三千里為從滿徒邊海有犯亦照此辦理從之○癸卯大學士九卿議覆刑部左侍郎錢汝誠奏稱舊例每年自四月至七月農忙停訟地方有司至期懸牌曉示推原例意原為兩造俱農民所控須丈量踏勘有妨

農務是以緩期聽斷若戶婚等事不必盡出農人當速審結請嗣後農忙期內地方官遇詞訟事件確查兩造實係農民詳明展限至八月審斷餘俱令隨時完結并請停有司懸牌等語應如所奏再浙省尚有蠶忙停訟之例地祇嘉湖數郡為期不久照舊例辦理從之○甲辰諭軍機大臣等阿桂奏稱伊柱領兵追勒瑪哈沁色布騰等行至和博克薩哩鏗格呼克因馬乏暫回此等瑪哈沁雖有投入俄羅斯之勢或於額爾齊斯附近山僻藏匿亦未可定擬於七月親往搜捕即巡查哈薩克邊界等語瑪哈沁等雖非要犯但情甚可惡昨將護送哈薩克使人之喀爾喀兵丁朋楚克等槍掠即此等黨類阿桂雖領兵前往但伊等出入無定必兩路夾攻方不致逃脫成衮扎布已派車木楚克扎布前往可即知會令其速至額爾齊斯與阿桂會合窮追務獲再據捉生詢問供稱色布騰等上年曾

槍掠哈薩克二十人等語。從前哈薩克亦經稟告。並著成衮扎布等。以前項情節。曉示哈薩克等知之。○又諭曰。阿桂奏。護軍叅領蘇尼勒圖。二等侍衛烏魯木等。詢知色布騰在阿勒坦特布什藏匿。自應即行掩襲。乃僅將瑪哈沁鄂里克等夥黨擒獲。即逗留不進。請將蘇尼勒圖。降為副叅領。烏魯木降為三等侍衛。仍令其隨營効力。以觀後效等語。蘇尼勒圖著革職。令其自備資斧。効力贖罪。烏魯木。係厄魯特人。未諳軍紀。昨因伊擒獲瑪哈沁博卓壘等。曾授為頭等侍衛。阿桂若已得旨。即加恩曲宥。或得旨而尚未傳諭。則令伊仍以二等侍衛。効力行走。並將叅奏得旨情節。曉諭知之。○又諭。此次搜勦瑪哈沁隨侍衛翹蘇爾之索倫馬甲額爾德木圖臨陣得傷。仍射殺一賊。奮勉可嘉。著加恩授為驍騎校。賞戴藍翎。賜號哈坦巴圖魯。仍賞銀一百兩。馬甲鄂勒椿巴扎爾著阿桂酌量獎賞。

翹蘇爾亦頗著勞績。著賞緞二端。○軍機大臣等議覆。叅贊大臣舒赫德奏。稱葉爾羌喀什噶爾和闐英吉沙爾四城官兵鹽菜銀向係折錢。猶待購買。莫若以穀折給。於生計更為有益等語。應如所請。交各城大臣將羨餘穀。每月錢穀各半支給從之。○乙巳

上詣暢春園問

皇太后安。○諭曰。李勲奏湖南常德府之新口橋易家隄。各岸因雨水稍多。間有浸塌之處。廬舍田園被淹。督臣已經查勘撫卹等語。今年雨水在在充足。該處得雨過多。沿隄居民田舍。猝被淹浸。殊深軫念。著該督撫等。星即遴委幹員。將衝塌房屋淹斃人口。分勘詳查。所有應行賑卹之處。即速照例賑卹。其田禾被水之處。成災與否。亦即確勘分數。據實具奏。毋得稍有遺漏。至所坍隄岸。一面上緊堵築。以資捍衛。副朕軫卹閭閻至意。該部遵諭速行。○諭軍機大臣等。李勲奏常德府之新

口橋。易家隄。各岸。因雨水漫溢衝塌。其沿隄廬舍田園多有被淹。現同督臣查勘撫卹等語。已諭部加意軫卹矣。該督現已到常德。目擊水勢情形。會同查勘。而現在未見奏到。想因督辦之初。匆猝尚未就緒耶。所有衝塌房屋淹斃人口幾何。即速查奏。並慎委妥員協同地方官詳細確查。照例賑撫。毋令不肖官吏侵漁滋弊。致沿隄居民稍有失所。現在田禾被淹者。成災與否。亦即覆畝確勘分數。勿使遺漏。該省係一歲兩熟之區。此時甫屆秋初。倘晚禾尚可補植。即飭該廳縣等諭令小民及時趕種。被衝隄岸。亦作速飭屬堵築。以資捍衛。該督等其悉心妥協經理。並將現在辦理情形。一面速行具奏。將此傳諭愛必達知之。○又諭。今年各處雨澤霑足。近日同雲彌望稠密。其勢皆自東南一帶而來。因思山東之德州直隸之景州地勢素屬窪下。別處雨纔透足。該地方即不免淹浸。著傳諭方觀

承阿爾泰。呈即查明各該處。及附近村莊。現在雨水情形若何。田禾霑足之後。有無停積過多之處。速行據實馳奏。以慰懸切。○又諭。曰。蘇昌泰。荊州八旗牧馬廠地坐落江陵潛江。石首監利。枝江等縣一帶沿江地方。從前原係民間拋荒地土。後因設立滿洲官兵。即圈作馬廠。近日居民漸次報墾升科。旗人稱為侵占廠地。民人指係納糧產業。彼此爭競不息。現在會同將軍定界造冊。以息兵民紛爭等語。牧廠關係營伍。而糧地亦民間生計所資。自必明定界限。始可永遠杜息爭端。現在沿江之地。如果牧放久經圈用。勢在必需。而民人從中計圖侵種。自應按照前此界限查出歸旗。若僅係附近馬廠四旁。原無礙於牧放。民人又已墾熟升科。亦應仍給民人管業。蘇昌已經調任。此事著即交與愛必達會同該將軍秉公妥協勘辦。務令兵民相安。彼此有益無損。毋任有司旗員各存袒護。致乖

平允之道。將此傳諭該督等知之。○兵部等部議奏。查原議裁之湖廣德安所。浙江衢州所。兩千總缺。經各該撫議覆。有專管漕運事務。均准存留。至浙江之湖州嚴州二所。山東之德州衛左右二所。千總據各該撫查與杭嘉衛德州衛相近。請將湖州所。歸併嘉興衛。嚴州所。歸併杭州衛。德州衛左右二所。歸併德州衛。裁去千總。令各該守備管理。均應如所議從之。○丙午。

孝懿仁皇后忌辰。遣官祭景陵。○丁未。諭據大學士蔣溥之子蔣樞陳奏。八月初旬。扶送父櫬回籍。著照從前伊祖大學士蔣廷錫之例。沿途文武官弁。在二十里以內者。俱至櫬前弔奠。并差人護送。俾長途安穩。早抵故里。其輕車都尉世職。即著蔣樞承襲。蔣樞著由京起程回籍。不必趨赴行在謝恩。抵家後料理喪事畢。仍著來京在南書房行走。○協辦大學士刑部尚書鄂彌達遣

疏聞得旨。鄂彌達數歷中外。宣力有年。今聞溘逝。朕心深為軫惜。著加恩賞銀二千兩。辦理喪事。仍派散秩大臣一員。帶領侍衛十員。往奠茶酒。所有應得卹典。該部察例具奏。○戊申。

上御勤政殿聽政。○以詹事府詹事溫敏為通政使。○以貴州安籠鎮總兵素誠為正藍旗漢軍副都統。○己酉。

上詣暢春園問

皇太后安。○軍機大臣等議覆。參贊大臣舒赫德等奏。稱庫車以西。至喀什噶爾各城。駐劄官兵。應給口糧羊隻。現在購辦充裕。惟本年已逾半載。毋庸多給。滿洲蒙古兵各支給兩月。綠旗兵各支給一月。儘數養贍。請嗣後定為每年滿洲蒙古兵支給三月。綠旗兵支給一月等語。查各回城購羊。多寡難以豫定。如限於成數。遇採買不敷之時。礙難辦理。除本年羊隻充裕。應如所請外。嗣後每年惟視購

買之多寡酌量辦理多則滿洲蒙古兵支給四月綠旗兵酌給一兩月否則滿洲蒙古兵酌給三兩月綠旗兵止給米麪從之○以喀喇沙爾辦事大臣按察使銜納世通為工部右侍郎○以工部尚書阿桂為鑲藍旗漢軍都統四等侍衛雅郎阿為鑲紅旗蒙古副都統○庚戌諭曰阿桂現在伊犁辦事其鑲藍旗漢軍都統著果親王署理○軍機大臣等奏平定準噶爾回部後陝甘等處裁撤之綠旗兵臺站及滿漢營馬每年於三四月牧放合計可節省銀六十二萬兩有奇所有伊犁葉爾羌等處大臣等養廉官兵鹽菜銀請即於節省項下動撥報聞○又議覆喀什噶爾辦事都統海明等奏稱阿克蘇烏什賽哩木拜四城本年羨餘穀為數無多暫行收貯俟次年積貯豐裕再行抵放官兵鹽菜銀等語應如所奏辦理從之○戶部議覆貴州布政使徐垣奏稱各省鹽道庫例係督撫親查惟

糧驛二道庫責成藩司盤查加結由巡撫覈題藩司與道誼屬同官保無瞻徇容隱請統歸督撫親查等語應如所奏但藩司亦不得輕卸其責應令覈明款目於督撫未查之先加結詳送倘督撫查有虧缺仍照例分賠議處從之○辛亥中元節遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○諭據張師載奏報六月下旬連次大雨汶水陡長東平寧陽汶上一帶民堰多有漫刷現在晴明水勢消退近河

要工俱各保護平穩等語。今年直隸山東等省雨澤在在透足。惟夏末秋初雨勢稍稀。低窪地畝未免有淹浸田禾之處。昨已諭令阿爾泰據實查明具奏。今日方觀承奏到。永定河北岸亦有汕刷淹及附近田禾。摺內以非因漫水為患。未便另議賑卹。此皆地方官相沿故套之詞。殊不思以直省頻年重邀

天貺甘膏霑渥。此一隅近河沮洳之鄉。浸溢見告。原不足為屢豐之累。司民牧者若意存文飾。且或以今歲恭逢

大慶。不欲以此瑣瑣入告。則大非朕勤民懷保之意。方觀承已有旨令其留駐固安。查勘經理。著再諭該督並巡撫阿爾泰。令其各就沿河窪地悉心查勘。有應行賑卹者。一面即速奏聞。一面飭屬妥協辦理。不得稍有諱飾。副朕軫念閭閻至意。○諭軍機大臣等。據方觀承奏永定河北岸隄工坍塌。以致河水漫溢。一摺。已交部察議矣。該督往看情形。雖稱並

未奪溜。溢水無多。輟鑲即可斷流。但口面已寬至十八丈。亟須加緊搶築。剋期完固。方可不致汕刷。著傳諭方觀承。令即留駐該處督率屬員。多集兵夫趕辦。以期迅速。竣工不必前來接駕。所有隨圍應辦差務。藩臬兩司向俱熟諳。自可飭委辦理。方觀承俟該處工程完畢。再赴熱河。○軍機大臣等議覆。參贊大臣舒赫德會同陝甘總督楊應琚奏。稱威魯堡回人擬於八月內遷居吐魯番。查附近開

展之里野木齊木等處。現有熟地八千餘畝。可以安插耕種。應令千戶瑚如拉率回衆住里野木齊木。百戶厄閑和卓率回衆住闢展。並請授為五品伯克。其回衆公舉之瑪瑪古爾班呼岱巴爾底。授為六品副伯克。各居分地。管轄回衆等語。應如所奏。從之。○又議覆陝甘總督楊應琚奏。稱陝甘營馬按期牧放。每歲節省草料銀九萬兩。將來新疆歲需經費。請將此項就近酌留撥用等語。應如所請。

從之。○兵部議覆陞任河南巡撫吳達善奏稱豫省營汛應行改隸事宜。一延津縣向隸開封府。該地汛防係開封營撥千總駐劄兼防封邱。原武、陽武三縣撥河北左營外委駐原武。衛輝營外委駐封邱。開封本營外委駐陽武。均係延津汛千總為專管。嗣延津改歸衛輝府。而防汛仍隸開封營。似為未協。請改歸衛輝營。以該營存城千總移駐。作為專汛。原撥封邱縣外委。撤回。原設延津千總移駐封邱。兼防陽武。仍令開封營都司兼轄。一衛輝營之胙城汛。本係縣治。嗣裁胙城。歸併延津。因將胙城外委。歸衛輝營之新鄉縣把總為專汛。今延津既撥衛輝營千總移駐。請將胙城汛歸隸延津縣千總。毋庸更屬新鄉縣把總。一王祿營守備駐劄滎澤。與開封營中軍隔黃河。該營拔募兵丁。向由河北鎮標中軍遊擊驗看。於開封營無涉。應即歸該遊擊兼轄。至原武汛。距王祿營甚近。并請以該汛外

委仍駐原武。作為王祿營協防。併歸河北遊擊兼轄。一盧氏縣向與嵩縣同屬河南府。是以盧氏汛撥嵩縣營把總分駐。嗣盧氏改隸陝州。而汛弁仍係嵩縣守備管轄。嵩縣守備又移駐伏牛山之孫家店。益覺地廣難周。查陝州屬之靈寶縣設有把總。又有外委千總協防。請將該縣之外委千總移駐盧氏縣。歸於靈寶縣把總為專汛。令陝州營都司兼轄。原設盧氏汛把總撥孫家店守備操防。各等語。均應如所請。從之。○喀喇沁貝子瑚圖靈阿等奏。松花江一帶旗民蒙古人等因捕魚爭界。屢致相控。查松花江下游內岸屬伯都訥。拉林外岸屬蒙古。應令各於本岸捕漁。不得互越。其按網徵稅事宜。除拉林十網。曾給閒散滿洲蒙古十二網。亦經分給該處。均不徵稅外。伯都訥十八網。每網按年徵稅銀二十兩。從之。○旌表守正捐軀之河南遂平縣民范金堂妻孫氏。

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十

實錄卷之六百四十

十九

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十一

監修總纂官經筵講官太子太傅文淵閣大學士文淵閣閣學事項禮部尚書稽察欽奉 上諭軍機處管理

吏部理藩院事務正黃旗滿洲都統世長騎都尉軍功加七級隨帶加一級尋常加二級軍功紀錄次應建

總裁官經筵講官太子太傅文華殿大學士文淵閣閣學事務稽察欽奉 上諭軍機處管理刑部戶部運籌務

世襲騎都尉軍功加九級隨帶加二級又加二級軍功內大臣戶部尚書理藩院滿洲都統軍功紀錄次應建

尋常紀錄四次臣漢理經筵講官太子少保工部尚書紀錄六次臣曹振鏞等奉

敕修

乾隆二十六年辛巳七月壬子諭今歲恭逢

皇太后七旬萬壽所有慶典自應次第舉行現

在刑部辦理秋審案件內緩決人犯其罪不

至情實而亦難遽從矜減者閱時既久淹繫

遂多應酌量查辦以清讞牘該部將朝審秋

審各犯緩決至三次以上者覈其情罪分別

請旨減等發落用昭推廣

慈恩矜卹祥刑至意諭軍機大臣等今日高

晉陳宏謀所進奏摺由驛四百里馳奏朕意

現在正值時雨普降恐河工或有汕刷關係

地方緊要之事。及閱之。不過審擬閭大鋪一案。暨調補知府而已。此等事件。照常遣人齎進。亦不至遲緩。何必輒動驛馬。殊為不知輕重。高晉。陳宏謀著傳旨申飭。近日京師雨水稍覺稠密。江南一帶情形若何。所有該處低窪地方。是否不致妨礙。著查明即速奏聞。尋奏。江南夏季內。雨水調勻。七月間。猝遇風暴。沿海沿湖低窪地方。間有被淹之處。高阜仍屬有收。以通省計之。尚無妨礙。報聞。○補行

乾隆二十五年分大計。江西省。不謹官一員。罷軟官一員。年老官七員。才力不及官二員。山西省。不謹官一員。罷軟官二員。年老官六員。有疾官三員。才力不及官四員。分別處分如例。○補行乾隆二十二年分軍政。陝西省。卓異官五員。年老官一員。有疾官三員。甘肅省。卓異官四員。年老官一員。分別陞賞。處分如例。○癸丑。

上以秋獵木蘭。自圓明園啟鑾。時逢雨澤。命誠

親王允祹恭扈

皇太后駕。俟天晴擇吉啟鑾。○諭。朕此次巡幸木蘭。沿途經過地方。本年地丁錢糧。著加恩蠲免十分之三。再。今歲自七月以來。直隸各屬雨勢連綿。高田固資暢茂。低窪田地。或不免有被水減收之處。已屢次降旨詳詢。著再傳諭該督等。督率有司。實力稽查。隨宜撫卹。務俾貧民不致失所。以副朕懷保黎元至意。○是日。駐蹕南石槽行宮。至乙卯。皆如之。○

甲寅。直隸總督方觀承奏。永定河漫口十八丈。圍做輦鑲。應加長七丈。七月十五日。已築成二十二丈。忽大雨。漫口被刷深八尺。須俟雨止。再行加埽合龍。得旨。覽奏俱悉。今合龍否。速奏。以慰懸切。至數日內。雨甚大。有傷禾稼否。○乙卯。直隸總督方觀承奏。畿南各河漲發之水。多歸兩淀。大清河宣洩不及。鳳河覺有倒漾之病。應行查勘。得旨。目今已晴霽。大勢如何。即速奏來。○黑龍江將軍綽勒多

奏索倫巴爾虎呼倫貝爾地方展設卡十六處。除令巴圖魯和紹等分駐六卡外。餘十卡請將西四卡令附近之車臣汗部落派人居住。東六卡令索倫巴爾虎等官兵居住從之。○丙辰諭軍機大臣等現在天氣晴霽河水漸消著傳諭兆惠飭地方官趕緊築橋梁工竣時一面派誠親王恭請

皇太后啟鑒一面奏聞。○又諭曰成衮扎布等奏稱護送哈薩克使人卓勒巴喇斯等之驍騎校納爾賽等回至銕格爾遇瑪哈沁百餘人為首者名色布騰將伊等掠至薩哩山得脫等語。昨據阿桂奏領兵往額爾齊斯搜勦色布騰朕即謂從前搶掠朋楚克者皆其黨類。曾諭車木楚克扎布領兵會同阿桂兩路夾攻。今又搶掠納爾賽等情甚可惡。今納爾賽等既知瑪哈沁等藏匿處所願為嚮導著傳諭成衮扎布等將從前所諭車木楚克扎布之旨於何時發往伊等現至何處不時探

聽一得實信作速奏聞。○又諭曰新柱奏謙珠特伯克黑斯婁遣伊子貢金隨酌量賞給又據告稱伯克訥格爾吉勒梯亦願附進土物等語外藩小部落輸誠入貢固不當較其貢物之厚薄但必親身前來或遣其子弟始足以昭忱悃若僅遣使人即當酌量辦理至訥格爾等與黑斯婁一體乃懇其代進將來行之日久便成黑斯婁之屬人矣此風斷不可長嗣後若有浼人附進者非但不加賞賚亦不必收受著傳諭新柱等知之。○西安將軍嵩椿奏西安兵七千名前用兵時每名養馬三匹嗣奏准每名養馬二匹今西師告成需馬無多請令每名養馬一匹合計得馬七千足備調用從之。○是日駐蹕懷柔縣行宮。○丁巳駐蹕密雲縣行宮。○戊午定中和韶樂用鐃鐘特磬大學士會同禮部議覆總理樂部事務莊親王允祿等奏稱金石為八音綱紀故笙鑠擊拊著美虞廷雅頌所傳虞業

特備。自漢以來各史樂志俱載有鐃鐘特磬。惟明代樂懸未興。嘉靖時太常卿張鶚建言。請設特鐘特磬。因黃鍾律度未得不果。我朝中和韶樂契合元音。前者得西江古鐃鐘。考定黃鍾真度。上下損益更鑄為鐃鐘十二。竊以條理宜備。始終請仿周禮磬氏句博股鼓依律長短之法。制特磬十二。虞與鐃鐘俱為特懸。以備中和之盛。其樂懸位次。奏樂儀節。考古制。鐃鐘在東。居編鐘之左。特磬在西。居編磬之右。皆北向。凡樂作起。柷鐃鐘一鳴。編鐘繼之。樂闋擊特磬一。乃奏。故凡大祭祀大典。禮悉依應月之律。各設鐃鐘特磬一。虞等語。按周官鍾師掌金奏。鄭康成曰。金謂鐘及鐃。賈公彥曰。此擊不編之鐘也。磬師掌教擊磬。劉敞曰。宮懸有特磬十二。陳暘曰。磬與鐘相待。以為用國語金石以動之是也。磬有編有不編者。明堂位。叔之離磬。虞書鳴球。皆特懸之磬也。爾雅大磬謂之鼗。大戴禮磬一懸。

而堂特則明有特磬也。惟鐃鐘大小之制。及賈疏磬無不編之說。辨論紛紛。朱子云。鐘磬有特懸者。有編懸者。其特懸者器大而聲宏。雜奏於八音之間。絲竹皆為所掩。故但於起調畢曲時擊之。以為作止之節。其論與孟子始終條理之旨相合。則特磬與鐃鐘固均重已。應仿周禮磬氏句博股鼓依律制特磬十二。虞以儷鐃鐘。至樂懸位次。奏樂儀節。現今樂部編鐘編磬。久列東西。特懸應各從其器。其北向之處。考儀禮大射樂懸之法。編鐘編磬之外。又有所謂其南鐃者。鐃即鐃也是。特懸鐘磬。東西定位。北向。自古而然。其所稱大祀大典。設應月本律之鐃鐘特磬各一。考宋仁宗時詔定大樂。馮元等言。鐃鐘考擊之法。十二鐘依辰列位。隨均為節。以便合樂。其說最允。今奏樂依應月之律。洵合古制。從之。御製鐃鐘銘曰。自古在昔。功成作樂。辨物涓吉。鑄此鐘鐃。

皇祖正音中和大備詎獨是遺或存

深意績底西旅瑞出西江考制象器協和萬邦

一虞特懸用起律首編鐘繼奏蕭韶成九寬

橫樂舞必考必精慎遵

前憲敢或損增宣陽導陰立均出度萬事本根

百王桀黷繫于小子蒙業

重熙賴

天者定惟曰際時範器識年悉新已盛銘無溢

辭惕乾懋敬特磬銘曰子輿有言金聲玉振

一虞無雙九成遞進準今酌古既製鐃鐘磬

不可闕條理始終和闡我疆玉山是矗依度

採取以命磬叔審音協律咸備中和泗濱同

拊其質則過圖經所傳浮嶽涇水誰誠見之

鳴球允此法

天則地殷二鼓三依我繹如獸舞鸞髯考樂惟

時

乾禧

祖德翼翼繩承撫是萬國益凜保泰敢或伐功

敬識歲吉辛巳乾隆○吏部議覆陝西按察

使柏琨奏稱直隸州自審案件有由道覈轉

者亦有徑解司者道里遠近不同例限自難

畫一今陝省直隸州共六缺所審本境案件

係徑解司並未由道覈轉應將道轉分限刪

除遲延查叅議處等語應如所奏並通行直

省一體遵辦從之○兵部議准黑龍江副都

統傳玉奏稱外省世管佐領及世襲官員缺

出揀選正陪送京補放并將應列名人員同

咨送來京而列名人員中無力進京者頗衆

查例載京師世職官員缺出有調取各省駐

防者惟將正陪調取其列名人員願來者聽

不願者不必咨送請嗣後外省世職缺出照

此辦理從之○是日駐蹕要亭行宮○己未

軍機大臣等議覆叅贊大臣舒赫德奏稱阿

克蘇等處鼓鑄之錢宜派給回人行使錢法

始可流通請將鑄得之七千餘騰格以四分

存公六分派給回人來春收回人租稅以錢

折價於十分內抽回二分續鑄亦照此辦理。應如所奏從之。○直隸總督方觀承覆奏永定河漫口於七月十七日合龍被淹地畝早禾仍屬有秋晚苗不無傷損俟水勢稍退委員勘辦得旨所奏固當但外省習氣總屬虛飾恐有司不盡心又復圖逸不身親查察安得不欺汝。○又覆奏鳳河倒漾渾水不能暢下自七月十九日渾水由北埵宣洩上游水漸平減加以晴霽各工現皆穩固得旨覽奏

稍慰○是日駐蹕兩間房行宮。○庚申。

皇太后自圓明園啟鑾幸避暑山莊○

上遣侍衛額勒登額赴密雲縣

皇太后行宮問安○諭軍機大臣等。

皇太后今日啟鑾蘭溝河浮橋業經築就本日即可至南石槽其懷柔縣北河浮橋亦已於二十三日工竣惟密雲縣浮橋尚未築成著傳諭兆惠富德會同明瑞上緊辦理或今日不能辦竣明日

皇太后由南石槽啟鑾至密雲亦須午刻此時至明日午刻定可築成倘水勢急溜構橋維艱即豫備大船恭請

慈駕登舟渡河兆惠富德須小心趕辦斷不可誤○又諭曰阿桂奏現在喀爾喀烏梁海等展拓游牧若哈薩克等由塔爾巴哈台至新設卡座甚為徑直倘與北路商販等貿易則伊犁烏魯木齊等處難於得馬應豫為禁約等語所奏甚是外藩貿易一事原應官為經理若聽其與北路商販往來則新疆難得馬匹而伊等債負爭鬪之釁皆從此起可傳諭成家扎布行文各駐劄大臣扎薩克及卡座侍衛台吉等嚴禁私向哈薩克貿易即哈薩克等以牲畜前來卡上人等當告以本處游牧頗饒不必貿易遣令轉回該大臣等仍不時巡察如有不肖之徒私行貿易者一經察出即從重治罪並將侍衛台吉等叅奏亦傳諭阿桂知之○軍機大臣等議覆叅贊大臣

阿桂等奏稱伊犁烏魯木齊之間有瑪納斯庫爾喀喇烏蘇晶河三處安設村莊駐兵屯田原以省額林哈畢爾噶一路臺站輓運口糧之加瑪納斯酌派屯田兵二百名庫爾喀喇烏蘇晶河每村派兵三百名人各墾地十五畝所需籽種農具駝隻由烏魯木齊巴里坤取用其分駐馬兵五百名請以范時綬總管又烏魯木齊至伊犁共設二十一臺每臺馬兵五名人給馬二匹綠旗兵十五名人給馬一匹每臺駝四隻晶河以西歸伊犁管轄托多克以東歸烏魯木齊管轄應如所奏從之○是日駐蹕常山峪行宮○辛酉

上遣侍衛福靈安赴密雲縣

皇太后行宮問安○諭據將軍德敏奏馬甲五十七醉後喧嘩被佐領德隆鞭責越數日殞命請將德隆治罪又據舍圖肯奏奏協領孟梓責斃馬甲曾保與德敏奏之事相同所辦俱屬拘泥兵丁不安本分經該上司約束

猶抵觸不服始行鞭撻是在彼有應責之咎即被責殞命亦由自取該上司何罪之有德敏舍圖肯所辦非是著申飭但此指兵丁不服約束者而言若另有別情該上司以素日有隙假故凌虐以至殞命是乃有意致斃該將軍大臣不但當據實奏並當按法擬抵不得因德敏等被飭遂槩置不論將此通諭各省駐防將軍大臣等知之○是日駐蹕喀喇河屯行宮○壬戌

上駐蹕避暑山莊至八月庚寅皆如之○前署廣西巡撫馮鈐疏報乾隆二十五年分靈川蒼梧懷集宜山武緣歸順等六州縣開墾水旱田地一百七十二畝有奇天保縣開墾田埜二百四十三埜一什○以故雲南鄧川州青索鼻土巡檢楊丕昌弟榮昌襲職○癸亥諭今秋恭奉

皇太后安輿巡幸木蘭啟行日適當雨潦乃所過橋梁皆不能修整船隻人夫亦未先時豫

備以致

慈駕稽延數日。經朕沿途派大臣侍衛及官兵等周視籌辦。始克進行。而途次所見地方官。竟寥寥無幾。及至需員應用。甚至不得一人。惟潮河尚有遊擊德慶率兵備料。然此特係武弁。其文員所司何事。朕向來巡省所經。辦理道路。即有不周。從未加罪地方官。然地方有司。因朕時為寬恕。竟生膜視。以至玩忽規避。若此。則事出情理之外矣。該督方觀承。身

在河工。雖難以兼顧。但不能先事董率。自有應得之咎。著交部察議。其餘地方各員。即交該督逐一查明具奏。交部嚴加議處。○又諭。今年入秋以來。直隸各屬雨水稍覺稠密。其與永定河附近地方村莊田畝。未免淹損。該處雖皆一水一麥之地。但既已種有秋禾。收成失望。農民未免拮据。著加恩將固安永清東安武清四縣被淹地畝。照永定河撫卹之例。查明貧乏之戶。計食口多者。每戶給米四

斗少者。給米三斗。穀則倍之。其早能涸出。尚可及時佈種秋麥。有地無力之戶。按畝借給倉穀五升。以資易換麥種之用。仍寬期俟明年秋成後。免息還官。至消涸稍遲之地。僅可佈種春麥者。屆期一例借給。仍同各處被水地畝。確勘情形。分別蠲賑。該督務董率屬員。實力奉行。毋令胥吏侵蝕中飽。俾閭閻不致失所。副朕軫念貧民至意。○八旗王大臣等議覆。副都統范時紀奏。稱養育兵糧。每月例給二兩。嗣又定二兩內減五錢。增額養贍。俟出缺挑補時。陸續辦理。今為時已久。尚未辦竣。請擇其年已及歲者。考其騎射滿洲蒙古挑取馬甲。漢軍挑取馬甲鄂爾布。及步甲。其不能騎射及年幼者。即裁銀五錢。務令半年辦竣等語。應如所請。惟所稱限以半年一節。查養育兵糧。凡老弱廢疾及孀婦等。皆得請領此項人等。雖予展限。半年後仍須議減。應即裁銀五錢。勻出錢糧。將應增之缺挑補。不

必以半年為限。報聞。○陝甘總督楊應琚奏。安西氣寒。豆非地產。向由內地購運。路遠費繁。今春令民試種。悉皆成熟。各處收成。八分以上。既可省內地採買輓運之煩。並可將額徵之糧。改徵豌豆。得旨。甚妥。甚美之事。○甲子。

上遣侍衛額勒登額。赴常山峪。

皇太后行宮問安。○諭曰。三寶著以道銜。前往哈密辦事。其直隸布政使員缺。著觀音保補。

授同德。在巴里坤辦事。已經數載。於採買羊隻等事。俱辦理妥協。著補授貴州按察使。永寧著以侍郎銜。前往巴里坤辦事。同德俟交代後。再行來京。○江南河道總督高晉。江蘇巡撫陳宏謀。奏。七月以來。洪澤湖水勢加長。五壩過水。匯歸高寶湖河。高郵南關車邏等壩。封土三尺。僅出水面數寸。如再加長。即當開壩過水。但下河田疇。正值刈穫。早稻過水太早。不免被淹。隨於封土之上。加高二尺。俾

下注之水。遲過一日。則下河田畝。可得豐收。得旨。如此擔任。朕當為下河之民。感激汝等。嘉是之外。無可批諭。○乙丑。諭曰。永貴等奏。稱阿克蘇以司員銜行走之夔舒。隨印辦事。俱能實心奮勉。已經三載。尚係虛銜等語。夔舒因按察使任內。辦理案件。錯謬。革職發往北路軍臺効力。續以司員在回部辦事。既知。詎勉著加恩。授為戶部員外郎。遇缺即補。○兵部等部議准。閩浙總督楊廷璋疏稱。福建澎湖水師左營戰船。往臺灣運載兵米。出洋飄沒。應免賠補。飄沒兵程。廷宏等二十二名。照例給與祭葬銀。從之。○陞任河南巡撫吳達善疏報。濟源洛陽鄧州等三州縣。乾隆二十三四兩年。分開墾成熟地二頃二十四畝。有奇。○以署正紅旗滿洲副都統奉恩輔國公永璋。為鑲藍旗漢軍副都統。正紅旗滿洲參領長保。為乍浦副都統。○予故協辦大學士刑部尚書鄂爾達祭葬。如例。諡文恭。○丙

寅。

上奉

皇太后駐蹕避暑山莊。○諭據常鈞奏河南祥符等州縣河水漲發。水與隄平。民舍田廬間有淹損。現在設法堵禦等語。看來此番被水較重。著派侍郎裘曰修馳驛前往。會同該撫常鈞查勘一切撫卹並疏濬諸務。俾災黎均霑實惠。毋致失所。戶部漢侍郎在京辦事乏人。即著錢汝誠暫行兼署。○又諭曰新柱奏

片內有滿蒙漢字樣。甚屬非體。向來滿洲蒙古漢軍及綠旗兵丁。皆係對音譯書。乃有沿襲省文牽連捏寫者。最為陋劣。屢經飭諭。何尚不知省改。嗣後不得再蹈陋習。致乖體制。著將此通諭知之。○諭軍機大臣等。據常鈞奏河南黑堽口河水漫溢。漸逼省城。又蘭陽各堡缺口甚多。汜水武陟等縣山水沁黃並漲。人口田廬難免損傷。現在設法堵禦查勘等語。已於摺內批示。河南雖值連歲豐

收之後。今年秋雨過多。以致黃沁二河。及山水漫溢。朕心深為軫念。常鈞初任河南。於河工尚未熟諳。侍郎裘曰修前此曾經派往河南等處。一切疏挑水利。皆所身歷。著將原摺鈔寄閱看。不必前來請訓。即馳驛速赴豫省。會同常鈞悉心料理。所有應行疏濬堵禦之處。詳悉相度。及時上緊妥辦。其被災地方。並著會同該撫查勘。即行撫卹。無使貧民失所。仍將查辦情形。先行奏聞。以慰懸念。再常鈞摺內所稱前此奏報一摺。何以至今未到。著並令該撫一併查明具奏。將此傳諭裘曰修。并常鈞知之。○又諭曰常鈞奏到祥符等處河水漫溢一摺。先有旨令裘曰修馳驛前往。會同查辦。茲據張師載摺奏黃河上游異漲。以致各工蟄裂情形。已於摺內批示。今年雨水盛旺。該省隄工遼濶。被溢之處。多係舊日工程。一經諸水匯積。自非人力所能自主。張師載人素謹慎。未免張皇過甚。易致失措。常

鈞又初任豫省。河務尚未諳悉。表曰修於河務水利。曾經派辦。全河經緯。自有成竹。著將此摺再行鈔寄。令其與該督撫。公同商榷。妥協籌畫。現在捍禦疏濬事宜。固當悉心相度。及時興舉。即前此所有挑築各工。既有此番漫溢。恐易致淤。過轉棄前功。表曰修係專派統辦之人。諸宜通盤熟計。務俾一切溝渠。俱歸通利。則將來或遇尋常水潦。自可無虞。表曰修與該督等。其善體之。○又諭。據常鈞。張師戴先後奏報。豫省黃河漲漫。水勢甚大。已有旨令表曰修前往。會同該督撫。相度堵濬矣。但江省淮徐等屬。為黃河下游所趨。今上游水勢既旺。則其流注南河。勢必更甚。此朕所深慮念者。著傳諭高晉。現在江省黃河水勢若何。於淮徐隄工。不致有礙否。速行查明。據實奏聞。以慰懸切。○又諭曰。高晉等奏。七月十九。二十等日。風雨驟猛。高郵。甘泉等。六汛隄工。石面衝卸。漫溢過水。請交部治罪等

語。該處既因風水被災。所有衝卸隄工。及淹浸田畝。著交與尹繼善。高晉。陳宏謀。速行會同妥辦。應修築者。即相機督率經理。以資捍禦。應撫卹者。加意撫卹。毋致災黎失所。至因風雨暴至。致有漫溢。則非司事者有心貽誤。該督等具摺請罪。或係照常引咎之詞。抑承辦工員。不能先事豫籌。果有疎防。誤公實蹟。摺內亦未明晰。再今年水勢。究與去年情形若何。現在連日晴霽。曾否消減之處。並著傳諭尹繼善。高晉等。一併作速查明。據實奏聞。以慰懸念。○又諭曰。馮鈐奏。湖南武陵。澧州等屬各村莊。因河水盛漲。俱有被淹。而於田禾收成。尚無妨礙。並據周琬奏。湖北低窪處所。亦間有被淹之處。看來該省地濱洞庭。且經連雨水漲。窪地自不免被淹。但該撫等所奏。未甚明晰。其意不無尚存粉飾。地方一經雨潦。雖隨長隨落。而水過之處。田禾分數稍減。生計即不無拮据。司民牧者。自當加意督

勘撫綏。俾無失所。該撫等倘以今歲恭逢

慶典。前此已報有秋。此時畧存迴護。殊非朕軫

卹民瘼之意。所有該處被水地方。雖現在成

災分數。不能遽定。然其地究係該屬十分之

幾。應即逐一查明確數。據實具奏。有應行撫

卹者。一面辦理。一面奏聞。著並諭該撫等知

之。○又諭。夏秋以來。雨水過多。因念直隸山

東等省。低窪處所。不無積潦。致損田禾。屢經

降旨詢問。旋據該督撫等先後覆奏。於秋成

字卷六四一

十一

並無大礙。今據河南巡撫常鈞奏報。祥符等

縣河水漫溢。田廬俱有淹損。看來該省水勢

盛長如此。則直隸山東一帶。雖有頓積。旋即

消退。無礙田廬者。猶屬上游之勢可知。但當

七月十八等日。雨水稠疊時。所有毗連豫省

地勢窪下之處。恐亦難免淹浸。著即傳諭方

觀承。阿爾泰等。令其詳悉查勘。實在情形。即

速據實具奏。如有被水村莊。即行妥協辦理。

一面具摺奏聞。方觀承不必以來熱河為亟。

著詳查地方被水一切善後事宜為要。即木

蘭迴蹕時接駕亦何妨。蓋朕所經過道路。地

方官已誤。然既過矣。若復誤水利民瘼。其過

更將誰諉。尋方觀承奏。直隸大名。廣平。二府。

毗連豫省。七月中旬後。漳河疊漲。大名府屬

之大名縣。廣平府屬之廣平縣。磁州。成安縣

境內。均有被淹之處。現在確查辦理。得旨。此

番霖潦。實非尋常水災可比。一切竭力妥為。

毋負朕望。阿爾泰奏。漳衛異漲。致臨清衛大

營西隄。及館陶縣之漳河北安隄。間有漫溢。

現在興工修築。並委員分赴被水村莊查勘。

撫卹報聞。○又諭。永定河漫工。雖已據奏合

龍。而下游之水。無所宣洩。且當此積雨之後。

溝渠俱有餘潦。現在天氣晴爽。時復間有陰

雨。所有各處隄工。更宜加意防範。至薊運河

一帶水道。細而且曲。頻年易致汎溢。此時情

形若何。深為軫念。著傳諭方觀承。令將目下

實在情形。速行查明奏聞。其有應行籌辦者。

亦即一面籌辦。不必亟亟趕赴熱河。前於摺內已批諭矣。尋奏永定河經搶護穩固。下游水亦漸退。惟北岸遙埵內渾水尚須相度經理。至薊運河勢甚紆迴。大雨後水勢增長。近日晴霽乃漸消退。附近村莊皆無恙。得旨覽奏俱悉。○又諭河南收受鹽務陋規一案。已據該撫審擬摺奏。將來具題到日。自交法司覈擬。但摺內朱若東鄧錫禮二人均擬絞候之處。尚未悉協。據朱若東供詞。稱到任後。聞及通判張任莘知有此項。是其授意屬員收受陋規。且在鄧錫禮之前。鄧錫禮則係相沿收受。其罪在不行詳揭。究與朱若東次第有間。若鄧錫禮應擬絞候。則朱若東當以斬候定擬。方為平允。著傳諭刑部堂官。於此案題到時。悉心確覈定擬。不得輕重稍有失宜。以成信讞。○又諭曰。馮鈴奏芷江縣知縣閔從隆緝獲餉鞘一摺。粵東解滇餉鞘雖在芷江疎失。但該縣即能設法購緝全獲。尚屬能事。

之員。與臨事漫不經心者迥別。若不明示獎勵。何以使衆人知所奮勉。著該撫查明該員平日居官若何。據實具奏。候朕降旨。其兵役人等亦著該撫飭查。量予加賞。尋奏閔從隆平日居官尚屬勤勉。但任內未有勞績可紀。且年逾六旬。殊非精明強幹之員。報聞。○葉爾羌辦事都統新柱等奏庫克雅爾卡座送到巴勒提部落頭目烏蘇完遣使愛哈瑪特至葉爾羌貿易。臣等因該部落上年屢經遣使恭順誠切。加以撫慰。報聞。○是月直隸總督方觀承覆奏景州地窪本易積水。近年將境內之洋河及田間各溝渠。豫於春月內挑濬深通。水至旋消。并無停積。得旨覽奏稍慰。○湖廣總督愛必達覆奏。臣抵武陵縣。正值河漲。會同提臣李勲查勘。令多備舟楫。濟渡高阜。人口均無損傷。惟倒塌瓦房二百三十五間。草房二百五十二間。俱給與修費口糧。一面調道府各員前來辦理。續據龍陽澧州

安鄉。湘鄉。四州縣稟報。亦經被水。幸消涸迅。速。不致淹損。俱經照例賑卹。被淹田禾。借給籽種補植。衝塌隄坑。堵築完固。得旨。覽奏俱悉。○河南巡撫常鈞彙報。秋禾被水情形。得旨。豫省屢豐盈虛之理。有必然者。但安辦撫卹之事。毋致災黎失所。更為要務耳。○山東

巡撫阿爾泰覆奏。東省自七月初間。雨勢極大。德州附近各府屬窪地。俱有積水。是否成災。查明辦理。得旨。自然成災。不可諱飾。但安辦撫卹之事。可耳。○廣東巡撫託恩多奏。起解餉銀。定例十萬兩以上。委同知。通判。五萬兩以上。委州同。州判等官。是以各省同知。通判。解餉。有多至二十餘萬者。在江浙等省。舟車俱便。稽察尚易。至雲貴川廣山路居多。必須人夫轉運。委解愈多。用夫愈衆。一時照料難周。易致竊取奔逸。請嗣後雲貴川廣等省。運餉。同知。通判。以十萬兩為率。州同等官。以五萬兩為率。得旨。甚是。如所議行。○廣東布

政使史奕昂奏。粵東塘汛舊制烟墩。砌以碎石土磚。望樓。用木建造。嗣經原任藩司石柱令俱改換青磚。日久風雨飄淋。仍易坍塌。徒滋糜費。請仍遵舊制。得旨。石柱原不曉事。如汝所議行。

大清高宗法天隆運至誠先覺體元立極敷文奮武孝慈神聖純皇帝實錄卷之六百四十一

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十二

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處掌院

史部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄一次慶隆

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞尋奉

教修

乾隆二十六年辛巳八月丁卯朔。

上詣

皇太后行宮問安。○祭

先師孔子。遣和親王弘晝行禮。○直隸總督

方觀承奏。永定河下口清渾水道緊要。臣親

赴遙埝及南北埝察看。遙埝地廣而窪。渾水

初經足資蕩漾。過北埝上汎四十里外。即與

清水相併。渾水至此。勢弱留淤。俟水落後。將

淤處疏通。再挽流令歸舊道。得旨。汝當親在

彼相機指示料理。不可以來此為急也。○戊

辰祭

大社

大稷。遣裕親王廣祿恭代行禮。

上奉

皇太后幸卷阿勝境。侍早晚膳。至甲戌皆如之。

○賜扈從王公大臣。並蒙古王公台吉等食。

至甲戌皆如之。○以翰林院侍讀學士景福

為詹事府詹事。鑄給雲南鎮雄州彝良州

同威信州判。關防。從布政使顧濟美請也。○

己巳。諭昨據常鈞奏。豫省祥符黑堽口等處。

河水漫溢。已命裴日修前往會同辦理。今據

奏報。現在漫水日就消退。地方城郭。可以無

虞。雖因稍慰。但河溜奪趨尉氏縣賈魯河舊

流淤淺。斯於河防最關緊要。著大學士劉統

勳協辦。大學士公兆惠。星速馳驛赴豫。督率

查辦。○又諭河南祥符等縣。河水漫溢。已特

派大臣馳驛前往。會同該撫等相度經理。所

有被水村莊。並令加意撫綏。朕思被水情形。

與被旱不同。蓋旱形可以豫知。地方官先事詳查戶口。造冊彙報。上司覈定。委員監放。尚不需時。至於水災。猝至。室廬一空。災民嗷嗷。豈能遽待。著大學士劉統勲等會同該撫常鈞。嚴飭地方各官。遇應行加賑之地。隨查隨賑。無俟彙齊冊報。輾轉稽延。並於被災較重州縣。各按四鄉。分設粥廠。俾得就近餬口。不致失所。副朕加惠貧民至意。但不得因有此旨。不行實力察勘。致令吏胥從中冒濫滋弊。可耳。該部遵諭速行。○又諭曰。吉慶奏楊藻控告固安縣知縣。抑勒伊父。諱強為竊。且將事主跪鎖梭櫟一摺。縣令身任地方之責。乃遇盜不能力緝。甚至有心諱縱。酷虐被刦之家。所為收民之義安在。著派署刑部侍郎阿永阿前往會同該督方觀承。秉公查審。如所控屬實。即將該縣嚴參。按律究擬。倘係虛捏。亦應將楊藻治以誣控之罪。以儆刁健。毋得稍存意見。致乖平允。○諭軍機大臣等。尹繼

善奏南河上游黃水陡落六七尺。遣人查探。聞知山東曹縣北岸隄工漫溢。豫備調撥南河官弁前往協助等語。具見留心。已於摺內批示。頃據常鈞摺奏。豫省黃河現在奪溜趨賈魯河。此事最關緊要。已派劉統勲兆惠前往督辦。及時堵築漫口。河東河員諳練之材甚少。非協濟委員。安能集事。著傳諭尹繼善。即會同高晉。於各河營弁將兵丁內。加意挑選。先期速行調往。以便劉統勲等一到。工所即可濟用。其所奏下河勘辦各事宜。並著即行悉心妥協經理。仍將被水輕重。及作何撫卹情形。一面奏聞。○又諭曰。高晉等奏徐城黃河兩岸漫灘。現已斷流。鎮洋等縣海潮消退。各工搶護平穩。所有被淹低窪田畝。照例撫卹一摺。現今河南各屬被水較重。黃河漫口。於賈魯河奪溜。則淮徐一帶地處下游。黃河水勢自平。工程俱無妨礙。此朕之所憂不在江南。而在河南也。但高晉等亦不可不董

率屬員加意防護。其高郵甘泉漫口。昨已降旨令尹繼善會同高晉等妥協籌辦。應即上緊堵閉。以利運道。所有下河各屬被水災民。應行撫卹者。並即善為撫卹。毋致失所。至豫省黃河堵築疏濬工程較多。已令尹繼善會同高晉。於南河熟諳樁埽弁兵。選撥協助。著再傳諭高晉。即速調往。以濟急需。想該督仰體朕意。斷不稍分畛域也。○又諭曰。常鈞奏報省城浸水消退。各缺口亦漸次斷流。惟楊橋大壩一帶。連接大隄。黃溜奪出楊橋。直趨賈魯河。舊流淤淺等語。河南此次被水較大。昨已派侍郎裘曰修前往會同該撫將一應疏洩撫卹事宜。妥協辦理。現今隄工漸就平穩。但黃河奪溜一事。於河道民生最關緊要。現派大學士劉統勳協辦。大學士公兆惠馳驛前赴該處。將引溜歸槽之事。專司督辦。並諭尹繼善挑揀南河熟練官員兵丁調赴豫省應用。但該撫等此時即應一面詳悉相度。

實力籌辦。不得因派有欽差。因循坐守。如目下已經辦有成局。欽差未到之先。河流可復。該撫可行文知會劉統勳等。令其即回。再裘曰修奉差在前。如劉統勳等到豫。自應專任董辦奪溜之事。裘曰修即將該省一切幹支各河水利。并山東曹縣一帶漫溢處所。悉心經理。務期保護前工。為一勞永逸之計。至該省現在工程撫卹需用甚多。所有藩庫存貯銀兩。是否足敷應用。並著即行查明。如有必需接濟之處。奏聞動撥。著將此傳諭裘曰修。張師戴常鈞等知之。○又諭。據河南巡撫常鈞奏報。豫省賈魯河奪溜一摺。已有旨令劉統勳等前往董率查勘。並據尹繼善奏。南河上游黃水陡落。探聞山東曹縣北岸隄工亦有漫溢等語。該省地處河南江南承上接下之交。該撫何以並未奏到。著傳諭阿爾泰。即將曹縣北岸隄工漫溢情形。及現在作何上緊籌辦之處。速行奏聞。並有旨諭劉統勳兆

惠等到豫後酌量查勘。如可一人督辦。即分一人前往東省會同查辦。阿爾泰不必俟欽差著即速前往相機速行妥辦。○封閉廣東大埔縣打禾坪鉛礦。從巡撫託恩多請也。○庚午遣官祭

關帝廟。○諭據張師載奏請議處河工疎防各員一摺。此次河水較大。非人力所能豫備。但其中有工程甫經修理不應遽有衝決之事者。與尋常疎防有間。著欽差大學士劉統勲等會同該總河查明分別交部議處。至運河水道隄工。現在保護平穩。承辦各員亦著酌量奏請議叙。俾衆知所勸懲。○諭軍機大臣等。張師載續報漫溢處所及缺口淤閉情形一摺。所奏殊未明晰。山東曹縣北岸十四堡。於七月十九日漫溢。先據阿爾泰奏到。黃流於二十日戌刻衝及城武縣北門。而張師載奏稱二十一二兩日水勢消落。漫口漸見淤閉。則城武之水來源既斷。自可不致為害。

何以復有衝及縣城之事。其豫省賈魯河奪溜一節。奏內何以並無一語聲明。豈具摺時尚未據所屬稟報耶。現已先後派令裘曰修劉統勲兆惠馳驛前往豫省相度堵禦。速俾河流復舊。并令尹繼善於南河熟諳椿掃弁兵遴選發往協力幫助矣。看來此番水勢甚大。非人力所能自主。張師載惟應會同常鈞阿爾泰悉心相度實力經理。不得過事。張皇轉致失措。至張師載此摺既限日行六百里。則應由驛遞馳奏。何以復差二人自齎沿途即可更換馬匹。而該差豈能不輟晝夜疾行六百里。勢必轉致遲誤。殊屬糊塗。今此旨及彼摺皆由驛速發。其所差二人命至熱河。悉問情形。後發回。將此並諭知之。○又諭曰。阿桂奏稱詢問從哈薩克來投之厄魯特等。據供伊等係輝特屬人。為色布騰所擒。中途拋棄。今色布騰已入俄羅斯等語。所奏殊未明晰。昨據阿桂奏。伊柱未曾追及色布騰。伊親

領官兵。於七月初旬。前往額爾齊斯等處搜捕。此時曾否起程。何以未見奏及。今色布騰等已入俄羅斯。諒阿桂等必速往追索。著傳諭阿桂。嗣後辦理一切事件。務宜明白具奏。不可稍有含混。仍將現在辦理情形。作速奏聞。○軍機大臣等議覆。陝甘總督楊應琚奏。布隆吉撥缺兵餉。攤勻折給。請仍照前議一摺。查前奏稱。布隆吉撥缺兵數。以靖逆兵二百名歸補。其折色銀兩。攤減布隆吉兵二兩二錢之有餘。撥補靖逆兵一兩八錢之不足。統以二兩四分折給。臣等原議。以事關兵食。在靖逆兵。以少加多。自屬有益。而在布隆吉兵。舊定折價。忽減。未免拮据。恐日久又費周章。是以行令該督再議具奏。今該督稱。布隆吉距靖逆止一百四十里。將折價稍為勻減。尚不至艱買食。均勻攤給。正為熟籌久遠。俾同城兵丁。折價初無歧貳等語。是與原議並無妨礙。應如所請從之。○又議覆。左都御史

永貴奏稱。回人入覲。請豫將伊等人數。行知地方官。酌派官兵護送。其所乘馬。遠來必致疲乏。請於抵哈密時。換給驛馬。原乘之疲馬。令該處大臣派兵弁及哈密回人頭目牧養。俟歸時給還等語。均應如所請從之。○辛未。諭軍機大臣等。據方觀承奏。霸州南崔家房漫口一摺。今年秋霖較大。南淀地處窪下。易致積潦浸溢。現在淀河長隄。既經漫刷。一切堵築宣洩。及備料撫卹事宜。正當及時加緊。督率妥辦。該督久任直隸。河防素所諳悉。非豫省黃河奪溜。必須特派大臣董理者可比。可即駐工所。相度經理。不必亟亟趕赴熱河。即迴鑾時。該處尚需料理。不及來迎。該督於工竣之後。十一月亦應進京。自可面陳一切。惟應速妥。不可稽遲。草率至撫卹一事。更應竭力妥為。將此傳諭知之。○又諭。據安泰奏。烏魯木齊收穫糧石甚多。除足敷兵丁口食外。儘有餘積。即減價糶賣。亦屬無幾。明年請

酌留三千兵。分派墾種。差操等語。已交軍機大臣議奏矣。該處連獲豐收。糧石自多貯積。但因售買乏人。遽議酌減兵數。則現在墾熟地畝。坐致荒廢。前功甚屬可惜。將來或酌令兵丁家口。陸續遷往開墾就食。或令腹地願往無業流民。量為遷移。則墾闢愈廣。內地既可稍減食指之繁。而該處糧石亦不致陳積自屬一舉兩得。著傳諭楊應琚。令其將如何招募前往。俾墾種日就展拓。兵民漸次蕃庶。及作何令其分起派往之處。詳悉妥議具奏。○豁除陝西興平縣被水衝坍灘地六頃三十二畝。有奇額賦。○壬申遣官祭昭忠祠。○諭。今歲直隸各屬麥收豐稔。秋禾暢茂。綠七月間雨水過多。濱河及低窪地畝。遂被淹浸。已降旨將固安、永清、東安、武清四縣照例撫卹。並酌借麥穀。俾涸出之地得以及時佈種。其文安、大城、霸州、保定等屬。因漫口被淹各村莊。並著照前旨一體查辦。至同時被潦之

寧河、寶坻、薊州等屬。雖所損不過十之一二。但現在天晴水涸。正可乘時補種晚稼。及明年春麥。並著該督方觀承查明有地無力之戶。酌量借給倉穀。俾貧民力作有資。以裨生計。該部遵諭速行。○又諭曰。叅革總兵林洛得受網戶錢文。派兵代巡滋事。以致淹斃兵丁。反捏報匪船劫掠一案。初據該督奏到。謂係奸徒在洋不法。已諭令嚴緝重治。以靖海疆。及提督王無黨訪查摺奏。多有誣過林洛之語。夫派兵巡洋。亦鎮將職守。應辦之事。該提督或因重案要犯日久未獲。藉口巡兵生釁。速圖完案。則於林洛即不無屈抑。是以降旨楊廷璋令其秉公確查。嗣據楊廷璋查明。叅奏復命撫臣莊有恭會同悉心審擬。無存成見。蓋尚恐提臣既有先入之言。司讞者執而不化。則無以服林洛之心。此無縱無苛之諭。所以不啻再三也。今法司覈覆奏案。則林洛始而勒索受賄。繼而捏報掩飾。各情罪。柄

據鑒鑒以總兵大員貪污狡詐且致淹斃多命。至於此極。此而可寬。國法安在林洛依擬。應絞著監候秋後處決。餘依議。朕慎重刑章。雖一介民命。必虛心審量。俾無稍遺憾。況職係大員。如未得情。豈惜平心研究。今林洛罪狀既定。國憲其所自干。益見朕前此履行傳諭該督等之旨。原屬鑑空衡平。且未免因慮林洛向隅。轉致不憚諄復也。著將前後奏摺及所降諭旨一併鈔發。俾衆共知之。○軍機大臣等議覆。欽差副都統安泰奏稱。烏魯木齊穀石極豐。折給官兵。願領者少。查該處屯田有綠旗兵三千名。請以二千差操。一千屯田互相更換等語。烏魯木齊穀石贏餘不量加變通。久貯必致紅腐。但如安泰所奏。僅以一千兵屯田。則已經墾熟地畝。致使荒蕪。亦屬可惜。查該處兵俱係三年一換。並不挈眷。若聽兵丁等移家居住。或募內地流民遷往給地耕種。則生計益裕。穀石亦可變通。除招

募內地流民。已奉旨交楊應琚辦理外。其烏魯木齊兵。請令安泰查明有願携家遷駐者。移咨楊應琚辦送。俱酌量官為料理。前往到彼時。兵丁給鹽菜口糧。其內地糧餉奏裁無業流民。將屯種不盡之田。撥給作產。閑地任其墾種。至賞給籽種農具。及分別納糧事宜。交安泰等酌量情形。定議具奏從之。○河南河北鎮總兵田金玉奏。駐劄之懷慶府於七月十四至十六日大雨。丹沁兩河同時暴漲。官衙民舍悉被淹浸。人口不免損傷。現同地方官設法宣洩。得旨所損幾何。據實奏來。○癸酉諭直屬被水各州縣。節經降旨加意撫卹。今據該督方觀承查奏。永平廣平等府所屬州縣雨水亦已消退。不致為災。惟冀州衡水武邑三州縣因近滹沱被水較重。窮民生計未免拮据。著加恩照固永等縣一體撫卹。俾災黎無致失所。該部遵諭速行。○諭軍機大臣等。前方觀承奏順義縣知縣李學虞

違抗誤工。請革職留直。於疏消積水工程處効力。已照所請行。但朕駐蹕石槽時。地方官並不見一人。經總理行營大臣傳詢。李學虞尚親身應答。及次日啟程。伊亦在道旁掃除。是該令較之始終規避各員。尚屬有間。而該督查奏以李學虞為抗誤之首。必因其分內應辦差務。有視同膜外之實跡。特於朕前一見。計圖塞責耳。即如行宮前貼近橋梁。亦並不豫備。即其明驗。予以革職。原屬咎所應得。然以此覈之密雲。則該縣吳元楷於橋船夫役種種貽誤。又復匿跡潛蹤者。其罪豈反輕於順義耶。今僅交部察議。恐該員以既置吏議於地方公事。益致任意懈弛。尤不足示懲儆。著傳諭方觀承。將吳元楷參奏革職。所有境內橋梁船隻。責令賠補修造。俟明年巡幸木蘭經過時。再行請旨。其密雲縣知縣缺。即將正定縣知縣廣寧奏請調補。仍一面先飭該令前來辦理差務。廣寧所遺之缺。於發往

試用人員內。再行遴選題補。○又諭。昨因納世通在哈喇沙爾年久。派達桑阿前往更換。但達桑阿係初辦回部事務。恐未能熟悉。現在闡展有德爾格等辦事。著道員蘇凌阿前往哈喇沙爾協辦。○又諭。曰額敏和卓數年辦事軍前。伊長子素齊瑞次子茂薩俱承辦公事。其吐魯番等處事務。係伊第三子鄂羅木咱布管理。今據永貴奏。伊辦理游牧。約束屬人。俱甚妥協。著加恩賞戴二品頂帶孔雀翎。以示鼓勵。○以乍浦副都統長保。福州副都統明福對調。○甲戌。諭。八旗滿洲俱係朕世僕。効力行間。乃分內之事。猶將稍有勞績者。因年老患病。不能當差。休致後。賞給俸祿。此國家格外之殊恩。古所未有。但風氣日下。眾不知此為格外之恩。乃竟視為當然矣。即如上年伊勒圖所奏。護軍校素朗阿軍前受有潮濕。懇請休致。給與全俸。其意以出兵為奇勳。藉此妄冀得俸。是以朕未賞給。至伊勒

圖所奏非是之處。亦經降旨通行曉諭。今弘昉具奏之護軍校五十七。雖係戍兵。若僅一二年。自不應賞給俸祿。今五十七曾出兵八載。又在素克阿爾達呼地方截殺賊衆。且僅稱眼疾不能當差。呈請休致。非若素朗阿有在軍前得殘疾之語。據此。則衆皆因朕曉諭。不敢妄以出兵為奇勳矣。弘昉理應照例將應否給俸之處請旨。乃竟行作為不應給俸。則又非矣。伊意以為朕之從前未給素朗阿俸祿者。係欲節省帑項。有意迎合。具奏殊屬卑鄙。朕豈如是主乎。朕之加恩旗僕者。所費帑項。寧止千萬數人之俸所費幾何。在大臣等辦理此等案件。應否賞給俸祿之處。理應援例請旨。候朕加恩。乃竟行議定具奏。可乎。弘昉不論事之可否。糊塗辦理。甚屬不堪。著交部嚴加查議具奏。將此通行曉諭。八旗知之。○又諭。據總管內務府大臣等奏。壽安宮正殿前簷遮陽簾片失火。延燒緣由。閱摺內

火班叅領既稱是夜三更後。見宮內火亮等語。此時一應工匠久已散出。若果係工匠所遺火種。斷不應遲至三更。明係該班太監不能小心火燭。或吃烟所致。其為掉詭推卸無疑。內務府大臣何不就此詰問。且魏珠奏內所稱首領九十三。說是同太監李世福。無點引燈黑影巡查之語。其為心虛迴護已屬顯然。著內務府大臣等。將是夜如何失火之處。逐一研究。令其明白供吐。如敢誑供狡賴。即加以刑訊。務得實情。再內廷首領等。彼時既盡行酣睡。及已聞叫門。復託言慎重。不肯開視。其不致有貽誤者。亦萬幸耳。即此一節。其罪已無可逭。將此一併諭令知之。○諭軍機大臣等。前據張師載奏。報漫水。以日行六百里。由驛馳奏之摺。專差外委二人。僅日行一百二百里。以致遲誤。辦理甚屬糊塗。已降旨飭諭。今傳詢齎摺之人。亦但稱由蘭陽工次。令其起身。該處楊橋漫口情形。亦未確見。惟所

過山東曹單金鄉等縣。途間多係坐船。田禾亦有淹浸之處。著傳諭張師載將現在賈魯河奪溜地方。水勢消減若何。一面即行具奏。一面乘此節交白露。天氣晴明之時。加緊督率搶護。遵照前旨。不得因有特派大臣。稍生觀望。其東省積水地方。雖非豫省上游緊要。可比。亦河臣分內之事。應與阿爾泰會商妥辦。前已有旨詳諭矣。今將前遣二人。令兵部發回。並傳諭張師載知之。尋奏賈魯河漫口以南淤灘顯露。水勢已屬消退。臣現駐楊橋。督率疏築。至山東曹單金鄉一帶積水。此時大半涸出。仍當與阿爾泰會商妥辦。報聞。○又諭曰。張師載齋捐人至熱河。詢據經過直隸景州一帶。至富莊驛地方。大路積水有坐船至新城縣換馬之語。前該督覆奏景州並無積水。當在未經節次連雨之前。不知現在該處道路情形。究竟若何。附近田禾有無浸溢成災之處。著該督方觀承速行查奏。以慰

朕懷。至古北口外緣邊所屬。禾黍彌望。豐穎歲事可望有收。其口內地方。現有被水各屬。該督應合計通省豐歉輕重。分數截長補短。將其中成災者。十分之幾。有收者。十分之幾。一一詳查速奏。並熟籌口內倘有需用穀石之處。及今可令熱河道良卿。於刈穫之時。不動聲色。酌量妥協購備。以資協濟。將來如果無須此項。則已。設有緩急應用。即可就近調撥。亦挹彼注茲之一策也。將此詳諭方觀承知之。尋奏景州七月中旬後。雖雨水稍積。仍於道路無礙。近日東省漫水。流入景州。道路迂阻。又阜城之劉林橋。交河之富莊驛。獻縣之臧家橋。滹沱泛溢。大道之水。直至河間城南五里鋪。現挑濬疏消。水過處田禾不免淹浸。但大道多窪。水易停積。田間則平漫無多。不至甚損禾稼。至通省光景。以成災村莊計之。約十分之二。以收成分數計之。約在七八分之間。今年古北口外秋成大稔。而內地將

來賑借需用米穀正多。宜乘時購備。請將本年應需

陵糴粟米。令熱河道良卿委員往口外採買。於冬月運赴遵薊備用。將來豫東漕運

陵糴船到。即於附近南運河被水州縣截留分派。以充賑借。得旨。覽奏俱悉。如所議行。○乙亥。

太宗文皇帝忌辰遣官祭

昭陵。○諭。前據吳達善奏。吉林轉發軍犯程三

在正定地方賄買替解至河南。汝縣點驗查出。當經降旨。令將查出之地方官據實奏聞。

今據奏稱係署汝縣知縣呂文光典史任學

淵查出該員等平日辦公勤慎。任事實心等

語。呂文光任學淵俱著該部行文調取來京

引見。○戶部議覆雲南巡撫劉藻疏稱。雲南

府昆明縣兩倉徵收昆明及近省之安寧晉

寧昆陽嵩明宜良呈貢富民河陽新興江川

等十州縣稅秋糧米現定半徵本色半徵折

色。但該府縣兩倉濱臨昆池。地氣潮濕。請將安寧等十州縣每年應徵本色。以兩年運穀一年運米。應如所請從之。○欽差大學士劉統勳協辦大學士公兆惠奏。臣等行過保定中途所見低窪處間被水淹。高阜田禾無礙。得旨知道了。爾等從大名入河南。大名亦有被淹處。有災重者。即飭地方官善為撫恤。並體察百姓得受實惠否。○丙子。

上奉

皇太后幸卷阿勝境。侍早晚膳。○賜扈從王公大臣並蒙古王公台吉等食。○諭據薩哈岱奏。河東鹽池因山水陡漲。漫開隄口。衝刷禁牆。現已堵築斷流。請將專管工程之運同陳克鎡從重議處等語。秋初各處雨水過多。以致隄口漫溢。非人力所能自主。該運同係防守專員。未能先事豫籌。自有應得之咎。但所刷禁牆各工已在保固限外。既請勒限賠修。陳克鎡著交部照例議處。薩哈岱吳雲從俱

著從寬免其交議。○叅贊大臣阿桂等奏。商人及官兵。所種二麥。收成得三萬餘石。實屬豐收。得旨。欣慰覽之。○丁丑。

太祖高皇帝忌辰。遣官祭。

福陵。○諭軍機大臣等。常鈞奏籌畫各處決口事宜一摺。於河道源流。辦理要緊之處。全無定見。已於摺內批示。河流奪溜。直歸賈魯河。勢將漸趨東南。為害非細。則此時急堵楊橋漫口。為第一喫緊要務。乃該撫摺內先請將

南岸各漫口。逐段補築。方可徹溜。合龍。此語尤為大謬。曾不思各漫口。盡行補築。則大溜勢益湍急。全趨缺口。工程更難措手。此尋常情理。所易曉。而常鈞於河道情形。既未諳悉。張師載亦臨事茫無端緒。幸朕於初報時。即命裘曰修。劉統勳。兆惠等。先後赴豫。董辦。伊等可乘時會同相度。或不致因循貽患耳。朕通檢看河圖。賈魯河。由尉氏等縣。經江南頓。壽。各屬。與淮流通。倘上游不塞。勢必直趨洪。

澤湖。將淤留水壅。其害更可勝言耶。是河南決口。早塞一日。即杜一日之患。尤其確然無疑者。常鈞等。在黃溜初奪時。全局端委。或未及體究。今為時將近一月。而於河流之起徑。歸宿。及現今決口。緩急若何。大溜現抵何處。各情形。摺內並無一語剖晰。此等大工。其將何以集事。著傳諭裘曰修。劉統勳。兆惠。督同該撫等。加緊速籌。妥辦。總以堵築歸槽。為全河利害關鍵。仍一面將河溜各情形。詳悉繪圖貼說。迅速奏聞。○撫卹湖北漢川。京山。潛江。沔陽。天門。雲夢。江陵。公安。監利。黃岡。並沔陽。衛。武昌。左衛。荊州。衛等十三州縣。衛本年水災飢民。○戊寅。

上奉

皇太后幸卷阿勝境。侍早晚膳。至辛巳。皆如之。○賜扈從王公大臣。並蒙古王公台吉等宴。至辛巳。皆如之。○諭前蘇昌密奏。周琬情性乖張。奏事倒提月日。掩飾已過一摺。朕以其

事無實跡。或係督撫意見不合。尚未遽信。今愛必達於到楚後。留心體察。據實查奏。今奏稱周琬遇事偏執。與蘇昌有意掣肘。於地方要務及保題委署等事。係蘇昌曾經酌定者。必欲反其所為。以致司道等恐致遲誤。說以並未稟過督臣。為詞其接見屬員。如意所私喜者。則竟日閒談。而實有公事。急需面稟之員。或屢日不得一見。又如今歲天門。潛江。沔陽等各州縣。五六月間。因雨水被潦。例應於夏災案內奏報。而周琬竟以為每年常有之事。匿不上聞。於歸州知州趙泰交誣竊為盜。宜昌府知府佛保住酷刑妄斷一案。則意存曲庇。種種行為。乖謬等語。周琬由刑部司員。因其尚有才具。歷加簡擢。用至巡撫。理應感激奮勉。乃竟於地方政務。不能和衷共濟。任意妄行。而徇庇劣員。玩視民瘼。尤為深負委任。周琬著革職。發往巴里坤。令其自備資斧。効力贖罪。蘇昌愛必達。摺併發。湖北巡撫員

缺著湯聘補授。河南現有堵築隄工。及經理賑卹之事。胡寶瑒撫豫日久。一切情形。均所熟諳。著仍補河南巡撫。其江西巡撫員缺。即著常鈞調補。胡寶瑒速赴新任。俟胡寶瑒到豫。常鈞再往江西。此時巡撫印務。湯聘暫行署理。俟常鈞到日。再赴湖北之任。湖北巡撫印務。著愛必達暫行兼管。○諭軍機大臣等。常鈞已有旨調補江西巡撫。但新任河南巡撫胡寶瑒未抵豫省之先。所有河工撫卹事務。常鈞現在承辦。應照常上緊經理。慎勿以既調江西。遂視非身任之事。以致稍生觀望。俟胡寶瑒到後。再赴新任。○又諭曰。張師載奏籌辦堵築漫工一摺。總未達治河緊要關鍵。已於摺內批諭。昨據常鈞奏到時。已詳諭劉統勳。兆惠。裴曰修。及該撫等矣。南北兩岸各漫口。固應隨時修築。然楊橋奪溜之處。所關尤重。如必待各漫工告竣。始議引溜歸槽。其在決口下游者尚可。若勢處上游。而一例

急塞不且愈助大溜之衝。自致棘手乎。看來現在惟以楊橋大工為喫緊要務。至於堵築引導二者。為治水必需之法。然分疏引河。先殺水勢。以便乘機搶築。其奏功尤為便利。已於園內河身曲處。用硃筆指畫。如該處可以設法挑挖。引河令決口上游。先分急溜。令其徑注舊日原河。則大工既易合龍。而河身逢灣取直。又可免兩岸數處險工。豈不一舉兩得。但不知該處道里遠近。地形高下。若何。難以遽為懸定。著傳諭劉統勲等。及該督撫。速行相度情形。商榷籌辦。一面具摺奏聞。圖并發至張師載單內數條。并交劉統勲等酌量辦理。此內雇覓人夫一事。現在工程重大。勢不得不資用民力。今倣以工代賑之例。令附近被水各州縣。傳集人夫。計工給值。災民既得餬口。工務亦可速竣。於公私皆有裨益。但不得令吏胥人等。從中滋弊。致閭閻被水之餘。復以苛派貽累。此事專交與常鈞妥辦。將

來如有未協。惟該撫是問。○又諭。豫省黃河漫口。由尉氏縣賈魯河奪溜南趨。水勢甚重。若不及時堵截。則賈魯河一帶。與江省潁壽等屬下游淮河相接。甚屬可虞。是豫省決口要工。實係全河要害。凡身任河防之責者。自難稍分畛域也。昨常鈞等報到。已有旨令劉統勲等前往董辦。看來該處搶堵工程。勢難刻緩。江南情形。現在因上游漫溢。水落勢平。尚無甚重大之工。高晉久任南河。諸事熟諳。著傳諭尹繼善等。令其酌量情形。高晉如可分身前往。即著率同所揀河弁兵丁。星赴豫省。協助經理。如本省實有難以兼顧之處。則慎選河工大員中之能事者。帶領赴豫。聽劉統勲等調用。務期協力共濟。俾速竣大工。以副朕望。○又諭。曰。富明安奏路過河南。所見河水漫溢情形。一摺。該員以道途所經。留心入告。深可嘉尚。且其摺內。稱楊橋奪溜。不可不速挽狂瀾。歸之故道。及濬築兼施。成功較

易云。俱為切中肯綮。惟所稱相地之宜。善籌永利之處。以現在緊要關鍵言之。恐及時堵漫歸槽之外。亦別無善策也。日來因該撫等奏到。已諄切傳諭。想劉統勲等。自可次第接奉遵辦。看來此番水勢甚大。豫省決口。倘不加緊搶截。不獨下游水勢所趨。恐其混入清淮。必致洪湖淤墊。而大河以南。田疇民食。無一不關深計。是豫省急工。實係全河利害。現已降旨高晉。令其度量南河。如可分身。即自帶諳練之人。前來協助經理。否則揀選大員能事者。率同弁兵。以資接濟。著將富明安。捐鈔寄劉統勲等。及張師載。常鈞。閱看其應如何相度緩急。濬築兼施之處。著即遵照前旨。會同悉心妥辦。將此一併傳諭知之。○又諭。據張師載奏。衛河水盛。深入臨清。迤北東岸一帶。又曹縣漫水。瀉入微山湖。現經運河道堵築宣洩。水勢消減等語。河員疏濬捍築。是其職守。今秋雨水過多。各處並有漫溢。其

實在疎防者。固應照例議處。而保護出力者。亦當加以獎勵之道。運河道李清時。既能督率屬員。上緊堵築。設法宣洩。自應予以議叙。使益知勸勉。著傳諭張師載。即將該道李清時。並查明在工地方。廳汛各員。分別奏請交部議叙。○又諭。工部奏。殺虎口監督期成額。應徵大青山木稅額銀。並無絲毫報部。一摺。此事殊不可解。該處稅項。七千六百餘兩。係歷年常額。各監督相沿承辦。無異何獨期成額一人。竟無絲毫報部。即云可採之木甚少。亦應俟承辦經時。始有成規。又何以於甫經到任時。即將木無可採。請繳原領部票。尤情理所必無者。看來其中。非係監督自圖中飽。豫為先聲動人。即係胥吏等有心侵隱。從懇期成額。為此咨報。均未可定。著傳諭鄂弼。令其密訪嚴查。併將該監督期成格。各項木稅底簿。調齊確覈。一有弊端。即行據實覆奏。尋奏詳覈底簿。詰訊胥吏。實因山木砍盡。積

年相沿以戶稅贏餘抵解工部木稅并無徵多報少情弊。但前任監督按季抵解期成額於前三季並未申解。經部嚴催始將四季木稅於二十六年八月任滿時支戶關盈餘解部至其呈繳部票因到任之初適前任監督福勒寶以山木已盡將原領部票呈繳請銷節經部駁仍行發領期成額見部票無人肯領稅額必致懸缺是以於到任後呈部請示係承前任達部之案繳票報聞。軍機大臣等議覆左都御史永貴奏稱回部蕩平所設阿奇木等伯克請照各邊省土司之例給與印記等語。查回部葉爾羌等城辦事大臣俱已鑄給印信其阿奇木等伯克自應一律鑄給圖記但圖記式樣宜加酌定以別等威查回部設立阿奇木共三十一城計其大小酌為三等。葉爾羌喀什噶爾阿克蘇和闐為四大城烏什英吉沙爾庫車闐展為四中城沙雅爾賽哩木拜庫爾勒玉古爾牌租阿巴特

塔什巴里克哈喇哈什克勒底雅玉隴哈什齊爾拉塔克阿斯騰阿喇圖什阿喇古玉斯騰阿喇圖什英額奇盤巴爾楚克沙爾呼勒魯克察克托克三喀喇和卓洋赫克勒品為二十三小城俱給與阿奇木伯克圖記其大城圖記分寸視內地佐領中小等城以次遞減從之。○已卯
萬壽節遣官祭
太廟後殿○遣官祭
福陵
昭陵
昭西陵
孝陵
孝東陵
景陵
泰陵○遣官祭
孝賢皇后陵○遣官祭
顯佑宮

東嶽廟。

城隍廟○

上詣

皇太后行宮行禮○御澹泊敬誠殿。扈從王公大臣官員及蒙古王公台吉等行慶賀禮○庚辰諭軍機大臣等尹繼善等奏高郵甘泉漫工堵閉將竣一摺。因未將前旨詢問今年水勢較去年輕重若何。據實覆奏。已於摺內批示。及閱所奏查辦各處被災分數摺內。則稱各屬被水較上年受傷實輕。而前摺內並未先將另摺專奏之處。分晰聲明。此於事理雖屬無礙。而該督等行文未能明晰。不可不知。至江南現在黃河水勢。因豫省楊橋奪溜。是以徐城一帶消落甚速。但經此番上游漫溢。一路停淤必多。將來南河桃伏大汛。一切隄岸工程。亟應豫為籌畫。是江南應行先事綢繆之計。不在今年而在明年。尤當加意周防也。著將此傳諭知之。○又諭曰。高晉覆奏江省黃

河水勢。摺內稱曹縣北岸漫工。前已奏明派委弁兵馳往聽用。擬俟高郵甘泉漫工一竣。即親往協助等語。現在東省漫口。張師載等先後摺奏。漸已消減。尚易從事。惟河南楊橋奪溜。實為全河第一關鍵。急宜及早堵築。先已降旨令高晉酌量情形。如自揣可以分身。即星赴河南勸理大工。俾及時告竣。實為緊要。今高晉既稱南河工畢。可以前往東省。則與其協助已經消滅之處。又何如速往楊橋協力共濟。使大溜刻期歸槽。之為得也。高晉此時想可奉到前旨。著即遵照速辦。以紓朕懷。○又諭覽尹繼善等所奏各摺。並有旨詳諭矣。此時高郵甘泉一帶被水之處。不過因秋初風暴所致。與豫省漫口大工不同。所有現辦工程。亦將次第就緒。然度量地方辦工。辦賑情形。於明年南巡差務。實在有無妨礙。即確查據實奏聞。不得稍存粉飾之見。○河東河道總督張師載覆奏。山東曹縣十四堡

隄工前於七月十九日漫溢。城武縣適當下游。地本低窪。相距又只百里。二十日戌刻。因衝及該縣城北門。至二十一。二兩日。水始漸消。得旨覽奏俱悉。○陝甘總督楊應琚奏。肅州威魯堡回民遷移開展。有餘存麥穀六百餘石。帶往彼處。路遠費繁。請就近交貯肅州倉。俟伊等到闢展時。即於該處餘糧內按數給還。再該回民遷移到彼。諸事創始。請借給明春口糧籽種二十石。分年交還。得旨好。○

貴州巡撫周人驥疏報都勻鎮寧黃平威寧正安安南餘慶甯安婺川玉屏青谿綏陽等十二府州縣。乾隆二十五年分開墾田土坡地三百八十五畝有奇。○辛巳。諭河南黃衛等河。因秋初雨水過稠。隄工多有漫溢之處。瀕河各屬被災較重。已命大臣會同巡撫等星速查勘。加意撫綏。更念本年該省起運漕糧。當此田禾間段被淹。即不被災。地方徵辦亦未免拮据。而將來一切賑借平糶需米正

多。著加恩將該省本年應運漕糧悉行停運。所有成災州縣分數輕重不同。其中有應蠲應緩之項。著該撫等一面查明分別具奏。請旨。現在均著暫行一體緩徵。副朕軫念災黎至意。該部遵諭速行。○諭軍機大臣等。常鈞奏豫省賑卹事宜一摺。已交部速議。內有援引乾隆二十二年折價一節。則於事理未協。蓋是年因河南積年成災未報。閭閻困苦已極。是以特旨加恩增給。初非成例。應爾今年漫口情形。乃係倉猝被水。但得及時搶築。將來異漲一過。春麥仍有可收。且豫省屢年豐收。民間不致無蓋藏。是今昔情形各異。此時速查優卹。經理已為周備。即有不敷。亦當候朕酌量降旨。該撫乃將此條叙入摺內。將使無知小民視同定則。轉啟非分之望。於民可使由不可使知之道。全無體會。至常鈞現在調補江西巡撫。所有豫省緊工。仍當實力肩任。妥速籌辦。不得因五日京兆稍生觀望。昨

已有旨詳諭並於摺內批示可將此一併傳諭知之○軍機大臣等議覆侍郎五吉奏稱巴里坤有屯田綠旗兵一千名雖經墾種而地寒霜早僅收青稞該屯兵仍須給鹽菜銀及粟麥所費頗多安西兵三千餘名計日遷移止折給糧價不需支食青稞是此項屯田兵竟可撤回將安西兵派出屯田以節冗食等語又陝甘總督楊應琚奏稱巴里坤原設之屯田兵撤回派安西兵五百名及巴里坤

實錄卷六百三

三

遣犯四百八十餘名給與口糧同往屯田儘足敷用該處地氣雖寒試種豌豆亦皆成熟加以人力糞治並可種麥等語臣等酌議巴里坤屯田所收青稞不敷官兵等支食今安西兵又移往該處所支銀米尤多即云試種豌豆有收亦未必常年如是查烏魯木齊現設有駐防兵該處屯田收穫極為豐稔且相距不遠若於巴里坤留兵千餘人餘俱移駐烏魯木齊情形尤便應行建屋整裝各事宜

請交楊應琚五吉等會商妥議具奏其巴里坤酌留安西兵及遣犯屯田之處應如所奏辦理從之○以廣西按察使富明安為江西布政使調陝西按察使柏琨為廣西按察使貴州按察使同德為陝西按察使直隸按察使趙孫英為貴州按察使安徽按察使王檢為直隸按察使以江南驛鹽道程燾為安徽按察使○以貴州布政使徐垣湖北布政使亢保對調

實錄卷六百三

三

大清高宗法天隆運至誠先覺體元立極敷文奮武孝慈神聖純皇帝實錄卷之六百四十二

大清高宗法天隆運至誠先覺體元立極教文奮武孝慈神聖純皇帝實錄卷之六百四十三

監修總裁官理藩院太子太傅大學士阿彌敦額等謹將內大臣稽察欽奉 上諭事件彙理
吏部理藩院事務兵部刑部工部禮部戶部等衙門欽奉 上諭事件彙理
世襲副都統軍功加十九級隨帶加二級又加二級量場內大臣戶部尚書錢謙益等欽奉 上諭事件彙理
世襲副都統軍功加十九級隨帶加二級又加二級量場內大臣戶部尚書錢謙益等欽奉 上諭事件彙理
尋常紀錄十四次臣德麟謹將官太子少保工部尚書紀錄六次臣曹振鏞等奉
敕修

乾隆二十六年辛巳八月壬午諭軍機大臣

等楊應琚奏遷居吐魯番回人現已自肅州起程出關沿途料理護送等語前據該督奏將來回人起程後所遺熟地肅州民人俱願認墾升科經軍機大臣議覆令於回人起程後丈明確數按則升科該督此時自應遵照前奏確勘妥辦其從前瓜州回人所遺熟地現在作何辦理之處著一併查明具奏尋奏肅州回民遷移後所遺熟地丈明共一萬二千十一畝經肅州民人認種升科其從前瓜州

回民所遺熟地二萬四百六十畝改為民地給種升科得旨覽奏俱悉○欽差侍郎裴曰修奏臣抵豫由黑堙口前赴楊橋查得南北兩岸漫口二十餘處均已掛淤易於辦理惟楊橋缺口寬至數百丈需料過多定例河工買料每百觔價銀九分今當災餘非平日比必大為加增每百觔作銀一錢八分庶料物易集大工速竣再查疎防道應除應得處分外所費錢糧例係銷六賠四此次漫決處分蒙區別新舊工程辦理已屬格外若僅銷六賠四未足示儆請將辦料加增一倍之銀於凡有漫口之道廳名下均攤賠補得旨所見得要如所議速行又奏歸德下游前此二十二年挑濬各河係黃水去路皆須往看為疏消地步得旨正為此即河歸正溜之後此等處必受淤仍須妥治也○癸未諭據尹繼善等奏高郵甘泉二汛漫口六處酌量水勢大小分別緩急次第施工今碾子頭黑魚塘二

口俱已合龍其攢軍樓南廟腰鋪荷花塘四處均可剋期告竣等語此次在工人員辦料鳩工俱能奮勉迅速漫口得以及早竣工所有在事文武員弁著交與該督等查明分別交部議敘以示鼓勵（甲申）

上奉

皇太后幸卷阿勝境侍早晚膳翼日如之○賜扈從王公大臣並蒙古王公台吉等食翼日如之○諭軍機大臣等據阿爾泰查奏濟東

曹充等府被水各屬內惟曹縣城武成災較重其次則濟寧金鄉魚臺等縣勘明就通省覈計不過十分之二等語今據崔應階摺奏內有臨清館陶等屬因漳衛二河水漲民捨各有漫溢之處朕甫閱時似崔應階所奏該處別有漫口情事及覈之該撫奏摺即係在濟東等屬被水之內早經阿爾泰奏報並非兩事然崔應階之言似災重而該撫則稱通省尚有七分收成又似大端無礙總之撫卹

事宜阿爾泰宜悉心妥辦斷不得稍存粉飾之見著將此傳諭阿爾泰知之○九卿等會議江蘇巡撫陳宏謀題民人張百受因教棋毆傷呂蘭身死一案以該犯祖母周氏母郭氏兩代孀居家無次丁題請留養三法司議該犯因教棋起釁用磚擲傷呂蘭鼻梁以致身死將留養之處議駁經御史周於禮奏以事屬偶戲傷非致命請照該撫原議臣等細覈情節呂蘭業經身死傷即非輕未便遽請留養得旨九卿所議甚是留養一事原係國家法外之仁從前屢降諭旨甚明此案該撫陳宏謀亟亟陳請法司議駁而御史周於禮又復往返簽商均屬有意姑息求名殊昧明刑弼教之義況撫臣在外具奏而言官從而附和之於政體官方俱有關係此風斷不可長好勇鬪狠者流一年之居幽何不可待之有而必為是嘵嘵者哉周於禮陳宏謀俱著嚴行申飭○陝甘總督楊應琚奏塔勒納沁

屯兵三百名。足以敷用。原派黃墩營屯種兵二百名。為數不敷。應於哈密遣犯內派撥。其從前減撤邊卡改撥屯種之兵二百名。俱行撤回。得旨如所議行。○調雲南鶴麗鎮總兵譚五格為貴州古州鎮總兵。以江南督標中軍副將七十一為鶴麗鎮總兵。鑄給哈密辦理糧餉事務大臣印信。從辦事侍郎永寧請也。○乙酉。欽差大學士劉統勲協辦大學士公兆惠侍郎裘曰修會同河東河道總督張師載調任河南巡撫。常鈞覆奏河溜由楊橋直下。擬於上游原河身內先挑引河一道。分減缺口水勢。臣兆惠原擬馳赴曹縣。今曹縣浸水已經掛淤。無需前往。楊橋決口緊要。應一體駐工督辦。得旨覽奏。俱悉。總以速堵決口為要。朕日夜望之。○丙戌。諭軍機大臣等。據劉統勲等奏堵築楊橋漫口及籌辦賑務各摺。已於摺內批諭其開挖引河掣挽大溜以殺水勢。尤為切中。竊要朕前於張師載

所進河圖內用硃筆標指。即係此處。可謂不約而同。正當乘此天晴漲落之時。加緊趕辦。迅速合龍。方為妥協。劉統勲等度量情形。約計何時可以堵築斷流。大溜歸還故道。先行確勘奏聞。以慰懸切。至辦賑一事。不得因常鈞已奉調任之旨。一任承辦官役人等乘此時值倥傯。或致懈弛滋弊。現在胡寶琛已令速赴新任。計日亦當抵豫。並著劉統勲兆惠等會同實力督辦。副朕軫念災黎至意。○又諭曰。阿桂等奏軍營官兵補領錢糧賞項向俱行文哈密巴里坤查覈支給。今准永寧等咨駐劄各處官兵補領錢糧均由本處支給。在哈密等處雖省查覈之繁。於官兵究無裨益。已將伊犁官兵應領之項仍照舊辦理。咨覆永寧楊應琚等語。所奏甚是。官兵補支錢糧俱由哈密等覈給。既可省內地運解而所需什物。即就便平價市買。更有益伊等生計。若如永寧等所辦。均由本處支給。先已多一

運解之費。且新疆物價昂貴。伊等支銀入手。只顧目前。轉致不能接濟。是永寧等惟知脫卸查覈之責。而於公事有益與否。全未籌及。況辦理此事。即變更成例。亦當具奏。乃徑行定議。甚屬錯謬。著通行傳諭各處駐劄大臣。所有官兵補支錢糧。仍照舊辦理。並詢問永寧等。令其明白回奏。○戶部等部議覆。山西巡撫鄂弼奏。稱歸化城原設七協理通判。今將善岱。崑都崙。二協裁汰。併入歸化。和林格爾。清水河。托克托。城薩拉齊。五廳管理事宜。一。五廳通判。各將分撥村莊。清立界址。一。崑都崙巡檢。改歸和林格爾廳管轄。一。善岱巡檢。改歸歸化城廳管轄。移駐色爾登。並建衙署。一。各該通判。巡檢。關防印信。均另鑄給。一。歸化城等五廳。改為正銜通判。其俸銀應照內地通判支給。一。各協理通判。每員歲給養廉六百兩。今改為正銜通判。每廳加二百四十兩。於所裁善岱。崑都崙。二協廳養廉內勻給。一善。

崑。二廳。原設因糧冰炭等銀。酌給歸化等五廳。一善。崑。二廳。額設鋪司。改歸五廳酌量地方分設。一善。崑。二廳。額設清字繕書。分添歸化城。和林格爾。二廳。一五廳內歸。和二廳當極衝之地。每廳原設馬六匹。實屬不敷。應各添設馬四匹。各等語。均應如所請從之。○丁亥。遣官祭賢良祠。○諭直隸毗連豫省之開州。長垣。東明等州縣。及附近運河之景州。清河。二屬。因秋雨過多。田禾間有淹浸。所有被水貧民。深堪軫念。著該督方觀承。照固永等屬之例。一體加意撫卹。並各先給口糧。以資安頓。毋致失所。該部遵諭速行。○諭軍機大臣等。熱河於本月十九日以來。連日陰雨。關內相距不遠。朕心時為懸切。頃詢之自京來人。京師十九日雨亦甚大。王大臣等並未奏聞。在京所理何事。著傳旨詢問。令其據實具奏。○又諭。今歲近京各屬雨水過多。前據方觀承及錢汝誠等節次奏報。低窪處所。雖間

有被淹。而高阜禾苗尚無妨礙。今自本月十九日以來。熱河連日復有陰雨。京城相距甚近。朕心深為軫念。著傳諭錢汝誠等。將近日畿輔晴雨情形。速行查奏。其大興宛平等屬。實在收成分數若何。並著傳諭查明奏聞。尋奏京城於八月十八日戌刻。雨勢稠密。然逾時即止。十九二十一日兩日雨。餘俱晴朗。田禾實無妨礙。霰之近畿各州縣所報。大畧相同。大宛各屬收成已報到者。自十分至七八分不等。得旨覽奏欣慰。○又諭直隸漫水各處該督方觀承。現在工次。量率料理。節據奏報情形。已俱於摺內批諭。但永定河雖已合龍。而崔家房等處據奏尚在催辦。不知何時可以竣工。現在熱河又復連日陰雨。關內相去不遠。各該處是否亦有雨水。甚為軫念。著傳諭方觀承。令其確查速奏。以慰懸切。至今歲直隸地方秋收分數究竟若何。全省通計究有幾分。並著詳悉查明實在情形。一併具奏。

尋奏崔家房漫口。九月初旬內可以竣工。文安霸州固安十九日大雨。天津涿州保定十八十九日連雨。二十一日以後皆已晴朗。至秋收通計全省約在七分。得旨覽奏稍慰。○又諭東省黃河漫口。該撫奏報已經掛淤。頃據方觀承奏稱德州運河現有漫溢之處。計該撫此時自當上緊相機堵築。但自本月十九日以來。熱河連日陰雨。不知該處天氣陰晴若何。於搶築漫口疏通積水工程有無妨礙。著傳諭阿爾泰。令其查明據實速奏。以慰朕懷。○又諭昨據劉統勳等奏報楊橋漫口及撫卹事宜一摺。已有旨傳諭上緊趕築。其撫卹事宜亦令會同查辦。今熱河自八月十九日以來。又復節次陰雨。不知豫省近日天氣如何。不致有礙工作否。雖南北相隔陰晴未必盡同。而朕心深切廛念。著傳諭劉統勳等。令將該處比來晴雨及催辦工程若何速行奏聞。尋奏豫省八月以來天氣俱晴。於工

作並無妨礙。得旨覽奏稍慰。○又諭。前據愛必達查奏周琬摺內。有知州趙泰交酷刑妄斷一案。該府佛保住草率覈轉。而周琬捏稱派委該府會審。其為徇庇劣員無疑。已降旨將周琬革職。發往巴里坤効力贖罪。今閱周琬叅劾趙泰交本內。既稱由府招解。又稱據宜昌府知府佛保住揭報前來。尤為自相矛盾。今愛必達叅奏佛保住之疏亦至。不知周琬何以明知佛保住之非。且經該督諄諄札商。而始終曲為袒護。若此。此時周琬尚未起身。著傳諭愛必達。將各情節詢問周琬。令其逐一明白登答。據實覆奏。○戶部議准甘肅巡撫明德疏稱。環縣中衛靈州。擺羊戎西寧碾伯等六廳州縣。上年被雹水偏災。應免銀糧草束。查甘省乾隆二十五、六兩年額賦節奉恩旨蠲免。請俟壬午年補豁從之。○烏什阿奇木阿布都拉等捐助遷往伊犁回人牲隻什物。命酌量獎賞如例。○戊子。

上詣

皇太后行宮問安。○諭軍機大臣等。今秋雨水過多。直隸山東運河水勢必大。現在各省糧艘陸續回空。恐沿途運丁等因糶贖餘米藉稱風水阻滯。以致耽延時日。著傳諭沿途督撫等。簡派妥員。於回空船隻入境時設法照料。催儻令其迅速過境。不得任其停泊濡滯。庶各省冬兌之期不致稽誤。○軍機大臣等議覆陝甘總督楊應琚奏稱。巴里坤哈密屯糧向來互相接濟。但相距三百餘里。雇車轉運未免糜費。查哈密防兵現應全撤。其防所額設駝四十隻。此時已無需用。莫若交與哈密協收放。冬春照例酌給草料。俟巴里坤需用粟米時。由哈密用駝轉運。到巴里坤時即將存貯炒麵。用原駝運回哈密。等語。應如所請。又據奏稱。哈密防所額設馬一千餘。前議定撥留屯耕備用。外尚餘馬數百。亦請交與哈密協收放。以備供應。等語。查哈密防兵已

徹額設馬已據酌留若復將餘馬悉留該處收放似覺為數稍多應令該督再行詳擬具奏從之○己丑

世宗憲皇帝忌辰遣官祭

泰陵○工部題准晉兩廣總督廣東巡撫託恩多咨稱粵東歲需硫磺前於乾隆十七年奏准在英德縣屬貓耳峽等處開採二十一年採畢封礦今將次用完請照前開採從之○浙江巡撫莊有恭疏報定海上虞龍游永嘉緡雲海寧等六縣乾隆二十五年分開墾田地漲沙地二十頃二十二畝有奇以頭等侍衛常岳為鑲藍旗蒙古副都統○庚寅

上詣

皇太后行宮問安諭軍機大臣等據鄂弼奏晉省今歲秋收豐稔各屬倉糧亦屬充裕擬於蒲解等屬倉糧內碾米十萬石運豫協濟等語豫省今秋因河水盛漲被災較重然係在二麥收成之後且該省連歲豐收民間尚

有蓄藏現在水退涸出地畝亦可補種秋禾及明歲春麥則將來接濟當不致有缺乏但既據鄂弼稱晉省倉糧充裕已密咨常鈞豫籌接運亦挹彼注茲之一策晉傳諭劉統勲兆惠等會同該撫酌量籌度如可無需此協濟則已倘體察災屬情形尚需籌辦即一面咨會鄂弼妥協經理一面奏聞尋奏豫省連歲豐收偶經被水尚不致缺乏但賑務既撥倉儲將來尚須補額藉有協濟穀石於倉儲賑務益徵充裕現擬於晉撫密咨到日將接運事宜移咨妥辦報聞○又諭曰阿爾泰奏德州迤北草壩運河漫溢村莊間被淹浸城垣倉庫可保無虞等語前據方觀承奏報德州運河漫溢致京州一帶大路水深數尺當已傳諭該撫令其上緊堵禦今覽阿爾泰所奏看其情形稍重現在糧艘陸續回空帆檣絡繹若不迅速堵禦何以儼行無滯著傳諭阿爾泰即行董率屬員上緊趕辦其道路村

莊之積水。則更當設法疏消。以利行旅。而資補種。至於曹縣十四堡等處。黃河漫工。現在豫省。賈魯河奪溜。尚未歸槽。則此處工程。似較易於為力。自當與運河均為急務。所有撫卹事宜。並即確勘妥辦。毋致災黎失所。並將兩處情形。速行明白奏來。○又諭曰。陳宏謀奏南河挑選赴豫協助弁兵。請於堵築告竣後。酌留十數人於豫東兩省補用等語。所見甚是。南河弁兵。俱係熟諳橋埽大工。自非豫東二省工員所能及。若酌留在彼。指授教習。實於河務有裨。著傳諭劉統勳等。於此次大工告成後。可否擇其奮勉出力者。酌留十數員名。即於豫東兩省補用。以資河東河兵學習。但須妥辦。不可使出力教人之人。反似還流失所。則大不可。若可無須如此更張。亦不妨據實直奏。尋奏南河弁兵。於工成後酌留豫東兩省補用。以資河東弁兵學習於修防實屬有益。報聞。○又諭曰。高晉陳宏謀所奏

淮徐等屬。豁糧減則之戶。可否與該地災民一體給賑一摺。已於摺內批諭。此等低窪地畝。年年常在水中。額賦既歲需蠲免。而戶口復應行查賑。是以廷臣有請改種蘆葦。豁除糧則之奏。彼時尚未即行降旨。適高晉來京面詢情形。亦稱現在查辦。今糧則既已豁除。而又請與未經豁糧之戶一體給賑。是從前轉覺多此一舉矣。至於乏食貧民。實在應為軫卹。而又不至徒有減則之名。惟在該督撫等之辦理得宜與否。乃復以此具奏。請旨朕將何以批示。如果該督撫等另有所見。亦何妨據實陳奏。而必為隱躍其詞耶。○以故廣西思恩府屬興隆土巡檢韋玘兄璣襲職。○辛卯秋分夕。月於西郊。遣履親王允禔行禮。○上奉皇太后自避暑山莊放鑾幸木蘭。○是日駐蹕中關行宮。○壬辰

上詣

皇太后行宮問安。○遣官祭黑龍潭

昭靈沛澤龍王之神玉泉山

惠濟慈佑龍王之神。○諭軍機大臣等舒赫

德等奏察噶爾伯克之兄子孟克薩爾巴噶

什伯克之兄子雅木古爾齊俱願隨布魯特

明伊勒哈入覲並恭進馬匹請旨遵辦等語

孟克等輸忱入覲著准其來京所進馬匹如

果堪充上駟即遇便送京若本屬平常何必

遠煩人力即留於阿克蘇備用。○叅贊大臣

舒赫德等奏葉爾羌喀什噶爾地大近邊阿

克蘇回城總匯切近伊犁俱事務繁多擬設

隨印辦事司官各一員筆帖式各二員專辦

回人事務司官筆帖式各一員由陝甘同知

通判內派出管糧官各一員庫車哈喇沙爾

地當要路錢糧亦多擬設筆帖式各二員由

陝甘縣丞主簿內派出管糧官各一員烏什

及喀什噶爾所屬之英吉沙爾葉爾羌所屬

之和闐皆地僻事簡烏什酌設筆帖式一員

餘城令該駐劄大臣等酌量派委具奏至卡

座牧羣及差務均需侍衛擬派葉爾羌喀什

噶爾各十五員阿克蘇十員以上各員俱照

例三年更換並准保舉議叙其侍衛等照例

揀選引見司官筆帖式等交軍機大臣揀選

引見派往得旨如所奏行。○浙江巡撫莊有

恭疏報定海緡雲青田松陽平陽永嘉宣平

龍游等八縣乾隆二十五年分開墾積荒田

地五十七頃一畝有奇。○豁免江西南昌衛

運船遭風漂沒米一千一百四十石有奇并予

淹斃副丁魯學深水手胡有成等卹賞如例

○是日駐蹕波羅河屯行宮。○癸巳諭曰郭

貴人薨逝著追冊為嬪所有一應典禮該衙

門照例辦理。○欽差大學士劉統勲等覆奏

楊橋大溜必先挑引河以殺水勢硃筆指畫

處所實為緊要關鍵至業已斷流之乾河亦

應挑挖淤阻俾將來合龍後順流通暢所發

張師載單內數條。現經會同籌辦。需用人夫。業於附近州縣雇覓。得旨覽奏俱悉。○葉爾羌茂特色布伯克塔里布。以輪班入覲中途病故。命賞給治喪銀。○是日。駐蹕張三營行宮。○甲午。

上詣

皇太后行幄問安。○行圍。○諭軍機大臣等。刑部奏。秋審廣西省陳布統故殺黃父亦案內之陳父悔。九卿議改情實。惟實光鼐堅執不肯畫題等語。會識大典。惟期準法持平。原非一人臆見。所可意為出入。實光鼐原不甚曉事。豈可以其持議參差。徒事哢哢爭執。有乖政體。著傳諭刑部堂官審辦各案。一切惟悉心持正。不必因兩議轉滋紛競。如伊執而不化。將來招冊進呈時。是非自難逃朕洞鑒。刑部堂官慎毋因噎廢食。以致稽延。譴典也。○又諭曰。方觀承奏。直隸應需賑米二十萬石。請於漕船尾幫截撥一摺。朕前因直屬被水。

需用米石。已降旨倉場侍郎等。令其查明酌運北倉備用。今據溫福等覆奏。廣信等尾幫八萬三千餘石。可令各船帶回北倉備用。其通州西倉存貯米石。亦甚充裕。如將來賑糶不敷。即照數酌量撥給。已於摺內批諭允行。所有需運米石。將來應如何交卸接收。及一切經理事宜。彼此一面熟商妥辦。一面具摺奏聞。將此傳諭該侍郎等及該督知之。○是日。駐蹕阿貴圖大營。○乙未。

上行圍。○諭軍機大臣等。劉統勲等奏。堵築漫口事宜。已於摺內詳悉批諭。該處自九月初興工計算。既稱約得五十日可以告竣。現在天晴水落。趨辦自易。為力漫口早得合龍一日。則地方少受一日之害。況南河弁兵已到。高晉亦將抵工。劉統勲等自可會同迅速董率從事。能於十月二十日以前完工。尤為妥協。至摺內所稱按日進埽三個之處。如係兩岸同時俱鑲。則不應有單數。再搶築壩臺。原

為進埽而設。至既鑲數埽以後。勢必離臺漸遠。向後又如何續行下埽。此等處。非目擊情形。不能懸揣。著傳諭劉統勲等。將一切籌辦工程。覆奏繪圖貼說時。一併附摺聲明。尋奏前者覈計工段。每岸日下一埽。力尚有餘。若下兩埽。力又不足。意欲一日兩埽。次日一埽。以均力役。摺內所稱。蓋將兩邊工程錯綜合計。而詞不達意。遂稱作三個。其實就一邊論。乃是兩日三埽。隄堰甫築時。先用柴土填實。

平定人方曰二

三

名為壩臺。及進埽加鑲後。隄堰已成。可以立脚。儻工亦呼為壩臺。至於或用輓鑲。或須下埽。惟視水勢深淺。淺則輓鑲。深則下埽。兩無妨礙。現在漫口隄岸。加緊儻築。所挑引河九。月二十日可竣。至期。再加撈濟。俾層疊就下。於漫口水勢增長時。開放。約在十月初五以前。引歸正溜。缺口易塞。適湊合龍日期。得旨好。○阿克蘇阿奇木伯克色提巴勒氏等。捐助遷往伊犁回人牲隻什物。命酌量獎賞。如

平定人方曰二

三

例。○是日。駐蹕海拉蘇台大營。○是月。直隸總督方觀承奏。崔家房漫口。水深二丈有餘。難就口門堵築。今擬出隄外數丈。漫水稍淺處。圍築包越。現備料趕辦。其積水疏消之路。有子牙河為尾間。得旨。總以速辦為要。秋麥固不能播種矣。若誤明年春麥。其誰之咎。○兩江總督尹繼善奏。江省黃河秋漲。徐城之韓家山。埽工墊陷。隨搶護平穩。旋報邱睢廳屬之南岸衛工頭地方。水漲漫隄。幸消落迅速。限令補築。以半月畢工。得旨。覽奏稍慰。河南則被大災矣。○江南河道總督高晉覆奏。高甘運河漫口。以次合龍。仍有荷花塘一工。地勢較寬。急宜堵築。約九月初旬告竣。臣俟工竣。即酌帶兵弁赴豫報聞。○安徽巡撫託庸奏。黃水由毛城鋪漫入睢河。即前往親勘。至練潭驛。據稟報。七月二十三日。睢河水勢陡消一二尺。各工穩固。又接淮兩江總督尹繼善札。二十二三兩日。徐州黃水陡落六七

尺不勝忤慶因回署辦事得旨可謂不知河
務之極又批汝固忤慶豫省非吾民乎何能
慰懷○調任江西巡撫胡寶瑤奏江省有漕
各州縣除濱湖傍江數屬外有四十餘縣水
次河淺漕艘難到向於省城另設漕倉各州
縣剝運至省貯倉再行交兌較他省多一番
轉折押運人役派累偷盜為蠹滋甚今專委
縣丞押運仍委員分道巡查得旨告之常鈞
令其加意為之○山東巡撫阿爾泰覆奏曹

平錄卷六十四

縣十四堡二十堡先後漫溢猝入曹縣城武
縣臣親往籌辦二十堡興築月隄月內即可
完竣十四堡應於隄根再加鑲埽約九月初
旬竣工得旨覽奏俱悉○又奏城武縣猝被
黃水以致濟寧荷澤定陶鉅野金鄉等州縣
皆被淹浸現竭力防護得旨目今情形復如
何於通省秋成有礙否據實速奏不可諱
飾尋奏近日水勢消落地畝漸次涸出秋成
惟曹充二屬之曹縣城武被災較重其餘州

縣均係漫流入境或十數里至六七里不等
除被淹外餘俱有收得旨覽奏曷勝欣慰總
之今年豫省獨當其重是汝省微倖之福然
曹充二府被災之民則不可不為撫卹也
○又奏范濮二州縣被黃水淹浸臨清州因
漳衛合汶河流異漲將老崖汕刷坍卸民捻
均竭力堵築得旨覽奏俱悉堵築缺口及撫
卹災黎均為要務一切勉力妥為之○又覆
奏德州運河漫溢飭屬加緊堵築八月中旬

平錄卷六十五

以來天氣晴霽雖間有微雨無礙工作得旨
覽奏稍慰○山西巡撫鄂弼奏汾州平陽蒲
州太原四府屬并絳解二直隸州屬因秋雨
河漲被水凡二十州縣細查被水村莊一州
縣內不過一隅現查辦撫卹再姚暹渠暴漲
漫開南隄解家灣直抵鹽池業會同鹽臣堵
築平穩得旨覽奏俱悉其有成災者斷不可
諱飾須撫卹妥協毋致失所○四川總督開
泰奏川省市錢撓混久恐有礙錢法但急切

禁止。悉歸無用。於民亦屬未便。臣飭屬照市價。官為收買。解局改鑄。鑄成仍照市價易銀。以還收買之費。覈計不致折耗。而錢弊可除。報聞。

實錄卷六四三

五

大清高宗法天隆運至誠先覺體元立極敷文奮武孝慈神聖純皇帝實錄卷之六百四十三

大清高宗法天隆運至誠先覺體元立極敷文奮武孝慈神聖純皇帝實錄卷之六百四十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭軍機處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭軍機處管理刑部都察院
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十六年辛巳九月丙申朔

上詣

皇太后行幄問安。○行圍。○諭軍機大臣等成
衮扎布等奏稱。貝子品級公額爾克沙喇等
選牛三千隻。前往伊犁。中途因時疫倒斃一
百五十八隻。應著喀爾喀四部落賠補等語。
解送牛隻倒斃例應賠補。但此次因時疫所
致。並非牧養疎忽。著加恩將伊等應賠牛隻
減半賞給價銀。○是日。駐蹕呼魯蘇台昂阿
大營。○丁酉。

上行圓。○諭。朕前降旨。於乾隆二十六年。恭奉聖母皇太后南巡。適江省各屬。去秋偶被偏災。因展期於二十七年。今秋高寶數邑。入秋遇有風暴。窪下田禾。不無傷損。恐地方有司。查賑辦差。難以兼顧。傳諭該督尹繼善。令其查奏。毋得稍事粉飾。今據該督撫等奏稱。江省今歲秋收。大勢豐稔。高寶等處。早稻已有收穫。被水亦較去年為輕。應賑卹者。不過數州縣。儘可從容辦理。而差務一切事宜。早經豫備。恭達。

聖母七旬萬壽之後。行慶施惠。望幸彌殷等語。所有明春南巡典禮。著照例舉行。○又諭。今年秋審情實各犯。著停止勾決。○又諭。昨刑部奏。九卿會審。將廣西省陳布統案內之陳父悔。改入情實。而竇光鼐立意兩議之處。具摺奏聞。已有旨傳諭該堂官等。令其虛心持正定議。不必彼此徒事爭執。今復據奏稱。竇光鼐將本案故殺之陳布統。并欲改入緩決。

並將貴州省羅阿扛一案。牽引比擬。並鈔錄原發附摺具奏。會識大典。理應虛公覈定。果有擬議未協。不妨平心商榷。務歸明允。即使意見不能強同。原可兩議具請。候朕酌奪。今觀竇光鼐議帖。因已見叅差。竟至以筆舌忿爭。嘵嘵不已。此等習氣。在前明弊政時。視為固然。以致各立門戶。大壞朝政。今當綱紀肅清之日。一切案牘。朕無不折衷裁處。竇光鼐豈得逞臆。侈騰口說。致乖政體。但發內稱刑。

部刪去黃父防赴村探聽一節。則係本案是否竊賊要據。招冊何以不入。又羅阿扛一案。何以定議緩決。與前案輕重不符。以竊賊殺人而議緩。何以服守禾殺賊而改實者。朕觀竇光鼐雖不無氣質用事。口舌紛爭之失。而刑部先後兩奏。跡似豫為張本。其中情節曲直。亦或有不足服竇光鼐之心者。著將各摺交與大學士來保。史貽直。協辦大學士梁詩正。將兩案審擬各原稿。詳悉確覈。秉公定議。

具奏○諭軍機大臣等。據尹繼善奏。豫省黃河漫水。現入潁郡渦淝等河一摺。已於摺內批諭。江南潁壽等屬。毗連豫省。今漫水既入渦淝等河。自將由淮河匯入洪澤湖。朕前批閱河圖。早慮及此。惟奏內所稱湖水加長。必由山盱五滾壩減洩。仍入高寶諸湖等語。則下河各屬。及淮揚運河。勢必均受其害。此大不可者。閱高晉所奏。亦大畧相同。朕意洪湖水勢既盛。惟有大開清口東西二壩。俾湖水暢流。庶為急則治標之要策。況清口兩壩之設。原以蓄清敵黃。今上游黃已入清。正當就清口擴其去路。而黃河斷流之處。容納尤有餘地。看來必應如此辦理。若聽其由五滾壩宣洩。則不獨洪澤湖已受黃淤。而高寶諸湖及下河一帶。豈不慮及在在淤墊耶。著傳諭尹繼善。高晉令其會同商榷。速行妥辦。仍將清口東西二壩開放水情形。迅即馳奏。尋尹繼善奏。高晉已赴豫省。近日洪澤湖水勢

大落。作清色。黃水漫入湖者無多。潁屬渦淝等河及下游淮河。水亦漸消。清口東西二壩前已留寬口門。暢洩湖水。此時可無庸再展得旨。自應如此。又稱黃水消長無定。設將來水長。即當大開東西二壩。俾湖水暢流。免其由山盱五滾壩洩入高寶諸湖。得旨。甚是。○又諭。據觀音保摺。奏。景州北界水勢汪洋。平地深一二三尺。至丈餘不等。因即前往東省德州四里屯工所查勘。現在漫口尚有十八九丈。未經堵閉等語。景州等屬。毗連東省。漫水自德州而下。經由三百餘里。至天津青縣。方可洩入運河。如該處漫口一日不閉。則景州之水。一日不能消涸。今既據稱未堵工程。止餘十八九丈。施工已易為力。一切堵禦事宜。自應星速趕辦。無致鄰境久淹。著傳諭阿爾泰。張師戴。飭屬妥速趲辦。約於何時可以竣工。速行奏聞。以慰軫念。並諭觀音保知之。○是日。駐蹕納喇蘇台大營。○戊戌。

上詣

皇太后行幄問安○行圍○是日駐蹕都穆達烏拉岱大營○已亥。

上行圍○諭軍機大臣等書山等奏稱沙雅爾回人錫哩布阿三曾任阿奇木伯克為霍集占所逐隨鄂對在和闐守城拒賊今又協助叅將繼善守備鄭國卿等辦送前往伊犁回人亦屬妥協等語錫哩布阿三著加恩賞給四品頂帶協同阿奇木瑪哈默特辦事○是日駐蹕巴顏布爾噶蘇台大營○庚子。

上詣

皇太后行幄問安○行圍○調任河南巡撫常鈞奏辦災不難於查地畝而難於查戶口蓋村莊被水民多寄居易滋書役濫開之弊現令委員攜戶口冊赴鄉如水涸村莊逐戶點驗其現在被淹未復故居者先驗民戶再赴災民棲息所分戶以驗口數則戶與口俱實又被浸倉廩自難存貯請先以此項米穀煮

粥散賑并作現給口糧之用得旨覽奏俱悉

○調綏遠城副都統興昌為莊浪副都統以廣東碣石鎮總兵七十為綏遠城副都統○是日駐蹕巴顏溝大營翼日如之○辛丑。

上奉

皇太后閱馬戲○喀喇沁郡王喇特納錫第等侍

上膳○諭軍機大臣等昨據阿桂議奏塔爾巴哈台等處駐兵事宜具見實心籌辦惟遷移

杜爾伯特扎哈沁游牧一事不便允行前經巴蘭泰奏將杜爾伯特部落遷於舊游牧之額爾齊斯續又內移未免紛擾今隨圍之該部落人等俱言現居烏蘭固木之地甚好生計較前富足可見伊等安土重遷巴蘭泰所奏殊屬未協至扎哈沁現在展拓卡座游牧寬廣又將伊等遷於塔爾巴哈台必非所願雖此地竟置之閒曠恐有哈薩克等越界游牧但前此越界之人一經發兵驅逐即已移

回則是尚知畏懼。即暫不駐兵。每年巡查一次。有越界者。照前驅逐。稍有違玩。即收其所。有以示懲戒。諒可無虞。朕意塔爾巴哈台。雖終須駐兵。此時不必太速。伊犁官兵。在外日久。俟新兵更換後。耕牧漸有積蓄。再行議及。始為有益。著軍機大臣議奏。阿桂在軍前日久。今派明瑞領換班官兵至伊犁。與阿桂交代。其伊犁事務。俱照阿桂所定章程辦理。阿桂來京。休息數年。再注代明瑞。此時塔爾巴哈台。正可駐兵屯田。是此事始終。皆阿桂之勞績矣。伊既於七月起程。追捕色布騰。並傳諭阿桂。將現在情形。作速奏聞。○又諭曰。厄魯特。回部。蕩平。烏里雅蘇台事務。較前甚簡。雖有供應哈薩克來使。及照管積貯糧餉。祇須酌留官兵。不必多為駐劄。至卡座侍衛。前已減半。今伊犁。烏魯木齊各駐官兵。亦應將此等侍衛撤回。以省浮費。現在該處所貯糧石雖多。但不豫籌接濟。必又煩內地之力。烏

里雅蘇台。雖不便屯田。而科布多向屬可耕之地。若令成衮扎布。仍駐劄烏里雅蘇台。另派叅贊大臣。在科布多屯田。數年後。將官兵移駐。將來塔爾巴哈台。額爾齊斯。等處駐兵。便成犄角之勢。著傳諭成衮扎布等。將烏里雅蘇台。現在糧石若干。足敷官兵若干人之食。或裁兵。或折價。又可省出若干。可否全徹卡座侍衛。及科布多駐兵屯田之處。詳議具奏。○軍機大臣等議覆。叅贊大臣舒赫德奏。稱。羅布諾爾。有兩部落。一為喀喇庫勒。一為喀喇和卓。喀喇和卓。又分為五處。而喀喇庫勒。僅一伯克。約束難周。請將該伯克。授為總管。再增一員。協辦喀喇和卓。五處各一伯克。不相統屬。請將五伯克中。派二員為總管。再增二員。協辦。再各該處。每年賦役。應派一員承辦。請授為小伯克等語。應如所奏。喀喇庫勒。喀喇和卓。總管伯克三人。授為五品伯克。其舊伯克三人。及新補協辦伯克三人。與承

辦賦役伯克一人。俱授為六品伯克。五品缺出。由闡展大臣奏請補授。六品缺出。即行補授。具奏。所交常賦。照前辦理。從之。○壬寅。

上詣

皇太后行幄問安。○行圍。○以通政使溫敏為左副都御史。○豁除安徽貴池縣水衝砂壓田地一十七頃三十七畝。有奇額賦。○是日。駐蹕鄂爾楚克哈達大營。翼日如之。○癸卯。上行圍。○諭。據阿爾泰奏。曹縣二十堡工程。及時趕築。已於八月二十七日一律完竣。十四堡埽工亦經就緒。又崔應階奏。德州四里屯漫口。合力償堵。亦於八月二十四。五兩日合

龍臨清等處漫口亦堵築完竣。各等語。此次東省在工人員。辦料鳩工。俱奮勉從事。阿爾泰。董率得宜。漫口及時早竣。著將阿爾泰。崔應階等。及在事文武各員。交部一併查明。分別議敘。以示鼓勵。○又諭。曰。熊學鵬題參平樂府知府松柏。違例妄縱。平樂縣知縣姜

國城。擅離職守。俱請革職一本。所辦不分曲直。甚屬錯謬。知府松柏。縱容家人。辱詈職官。該縣情理難堪。赴省訴之。撫臣安得謂之擅離職守。此而不問。是非與知府一併効參。則劣員之逢迎上官。數數入省。奔競干謁者。何不見以擅離職守被參耶。熊學鵬所奏。頗存意見於事理。大為顛倒。甚不知朕辦理一切。惟期公正之意。著交部察議。至內閣於此等情節。理應夾簽聲明。請旨。似此依樣畫諾。誰則不能。著傳旨申飭。此案松柏著革職。其違例妄縱情由。及本內有名人犯。該撫一併嚴審定擬具奏。該縣姜國城。仍著留任。所有從前保舉松柏卓異之該上司。並著該部查明。照例議處。○諭軍機大臣等。前據刑部先後具奏。副都御史寶光。鼎會審兩議一事。已降旨。交大學士來保等。令其將各案詳悉確覈。秉公定議。今寶光。鼎奏到。兩案情節。與前此該部附奏。簽商原摺。大畧相同。而去其憤詈。

之語著交與大學士來保等一併詳悉覈定具奏○又諭刑部具題緩決人犯本內有雲南省絞犯盤石毆嫂鄒氏身死一案該犯因姪女摘豆爭角母護其女自係常情乃致擗折鄒氏腕骨又復毆跌斃命以細故起釁輒肆兇毆且嫂叔究關長幼名分與常人鬪毆有間若照該撫定擬緩決殊未得情法之平著傳諭刑部堂官於明年秋審時將盤石一犯入於情實以昭平允○戶部等部議准吉林將軍恒祿等疏稱寧古塔地方城外有草蓋倉廩五間年久朽爛請拆移城內建造改用磚瓦從之○陝甘總督楊應琚奏哈密附近之蔡把什湖有地一萬三千餘畝除一萬畝給回民種穫外其三千畝曩撥哈密防兵耕種今哈密防兵陸續撤回該協移駐兵少難再分屯應於安西提標步兵內酌撥一百名歸入哈密協令往蔡把什湖屯種仍於哈密協兵內每年輪流更換如再不敷即於哈

密遣犯內酌撥年力精壯者令隨耕作得旨如所議行○豁除浙江海寧仁和錢塘平湖等四縣坍沒沙地及營兵義塚田地一百六頃三十四畝有奇額賦○甲辰

上行圍○賜扈從王公大臣並蒙古王公台吉兵等食○駐劄烏魯木齊副都統安泰等奏烏魯木齊五村屯田大小麥收成約四萬五千九百石有奇又厄魯特等報知昌吉產硝特訥格爾產磺隨飭配造火藥尚屬可用報

聞○以浙江鹽驛道張逢堯為雲南按察使○是日駐蹕扎克丹鄂佛囉大營○乙巳上行圍○諭軍機大臣等據謝溶生奏泰和縣逆犯李雍和投遞狂悖呈詞一案著將原摺鈔錄并搜出各單交與署撫湯聘令其將該犯因何前後造作逆詞並此外有無別項悖逆事跡逐一徹底嚴行根究定擬具奏至該犯李雍和既赴學政衙門潛遞逆詞又自書平日曾在各省衙門投控有收有不收之語

豈於江西地方官轉有不行赴控者。湯聘久任藩司。新署撫篆。斷無見聞不及之理。或彼時僅以為跡類瘋狂。遂爾屏斥不問耶。然此罪猶小。今逆跡已露。若該署撫因謝溶生未經會審合參。遂欲含混了局。或以該犯曾經具控。未曾奏出。今欲自行迴護。則取戾不可問矣。著湯聘一面嚴細審擬。務將歷來不行奏出實情。一面據實速奏。尋奏。臣任內未據具控實無聞見。其餘一切情形。現在徹底根究。報聞。○又諭曰。謝溶生奏泰和縣逆犯李雍和潛遞呈詞一摺。謝溶生身膺學政。遇此等狂悖之徒。自應奏聞嚴究。以正刑章。但地方有此重案。亦當知會撫臣提訊會奏。倘告之撫臣。伊或別存意見。即將撫臣一併摺參。何不可者。乃汲汲據為己有。若欲自行表見。且輒用限行五百里馳奏。如此居心行事。欲地方官與之和衷共濟。能乎不能乎。李雍和一犯已有旨交署撫湯聘嚴審定擬。謝溶生

著傳旨申飭。○又諭曰。學政謝溶生摺奏。江西泰和縣逆犯李雍和。前名李必亨。潛遞狂悖呈詞。搜出家中各單。該犯於乾隆十九年由四川遞解回籍。其所開控過各衙門有湖北省開大人字樣。雖自稱所控各處有收有不收之語。但既經該犯具控。當時豈有竟不省視之理。此在他人或可開泰其可乎。或彼時僅以其跡類瘋狂。遂屏斥不顧耶。此係向來地方官消彌錮習。實足釀成重案。為害不小。著傳諭開泰。令其將該犯從前如何投告及該督因何不行查辦緣由。詳悉查明據實具奏。毋得稍有迴護。尋奏。逆犯李雍和並未遞過呈詞。報聞。○山西巡撫鄂弼疏報繁峙縣。乾隆二十五年分。開墾沙山地一頃八十七畝有奇。○是日。駐蹕依綿峪大營。○丙午。上詣皇太后行幄問安。○行圍。○諭昨江西學政謝溶生奏到。泰和縣逆犯李雍和。潛遞逆詞。狂

悖不法一摺。朕以悖逆大惡。學臣一有見聞。原應據實入告。但事繫地方重案。即當與撫臣會審合奏。該學政乃據為已有。輒由驛五百里馳奏。見小乖方。不協事理。已令軍機大臣傳旨申飭。將本案交署撫湯聘。嚴審定擬具奏。今據湯聘摺奏。則不但謝溶生具摺之前。並不知會撫臣。且湯聘既聞知府等稟報。即會同臬司親提審訊。而謝溶生將該犯搜出逆詞。始終秘而不發。其情尤不可解。學臣職司課士。使遇地方重大公事。皆如此有心掣肘。讞案何由而定。向以謝溶生不過好事自用。不達大體之人。今觀其居心行事。任私謬戾若此。其於官方政體。均有關係。又豈獨急欲見長。不能和衷集事已耶。謝溶生著交部議處。尋議應照例降三級調用。有加一級應銷去。加一級。仍降二級調用。得旨。謝溶生著銷去。加一級。仍降二級調用。○又諭。據總兵田金玉奏。懷慶府駐劄衙署。因七月間丹

沁兩河水漲。所有存貯各書籍旗牌等項。俱有淹損。請照數頒給。並嚴加議處等語。鎮署猝被水淹。並非疎防貽誤。可比田金玉毋庸交部議處。其所請旗牌書籍等項。著該部查明。照數補給。○戶部議覆漕運總督楊錫紱疏稱。山東嶧縣漕糧。例派濟寧前幫。赴臺莊水次兌運。查臺莊係東省極南之區。經過八閘。水急費多。韓莊已出八閘外。水勢既平。至嶧縣程途。亦與臺莊相等。請嗣後嶧縣漕糧。改赴韓莊兌運等語。應如所請。從之。○又議准。閩浙總督楊廷璋疏稱。福建惠安場墾復鹽埕三百三十二坵。應徵課銀。照例徵收。從之。○湖南巡撫馮鈐覆奏。查明武陵。龍陽。澧州。安鄉等州縣。六月內。河水被淹地畝。均不及十分之一。其撫卹事宜。照例妥辦。得旨。覽奏稍慰。○江蘇巡撫陳宏謀疏報。靖江縣。乾隆二十五年分。新漲折實平田三頃二十七畝有奇。○豁除江蘇靖江縣。乾隆二十五年

分。水衝坍沒地二十頃六十畝有奇額賦。○是日駐蹕博羅莫林大營翼日如之。○丁未上行圍。○功臣館第一集書告成議叙收掌以下等官加級紀錄有差。○豁免江南江淮衛漕船遭風漂沒米八百七十二石有奇。○戊申。

上詣

皇太后行幄問安。○行圍。○諭曰尹繼善等奏高郵甘泉等屬運河漫工六處於九月初六

實錄卷六十四

一八

日。全行合龍等語。該處堵築各工乘時興舉次第告竣。所有在事文武員弁前已有旨交與該督等查明分別送部議敘。尹繼善高晉陳宏謀等董率有方完工迅速甚屬可嘉並著交部議敘以示優獎。○諭軍機大臣等。昨劉統勳摺內聲明。襄曰修現赴歸德陳州一路查勘該處一切河渠疏洩事宜。襄曰修自應審度源流通盤籌辦。但一切工程緩急及應行撫卹事宜亦當隨勘隨奏以慰厯懷。今

劉統勳等到工以來已摺奏數次而襄曰修自八月中旬奏事後何以迄今未見奏到著傳諭襄曰修將所有查勘過各處水利現在作何商辦並各地方官經理賑務是否妥協之處一併詳悉速奏。○又諭昨據河北鎮總兵田金玉奉硃批回奏稱丹沁二河水勢暴漲直入懷慶府城被衝民房六萬九千八百餘間淹斃一千三百餘人等語前劉統勳等查奏豫省被水各屬僅將州縣數目分列清單而於房屋人口俱未經逐一詳奏朕以為猶待細查也今久未詳查確奏在懷慶府水已進城易入難出自與開封之水未入城者不同則損傷房屋人口亦惟此處為重別屬未必皆然但劉統勳等董辦賑務常鈞則有地方之責至今查勘日久此等被淹之數雖一面照例撫卹亦當將詳細情形分晰奏聞以慰厯念此時常鈞想已赴江西之任著傳諭劉統勳等令將懷慶賑卹事宜並其餘各

實錄卷六十四

一九

屬有無似此應行查卹之處。即速據實具奏。尋奏豫省被災州縣輕重不同。惟懷慶府之河內縣為最重。鎮臣田金玉所奏坍塌房屋淹斃人口。合鄉城而計。實有此數。臣等俱經詳查被災戶口。給一月口糧。房屋給修費。淹斃給殮費。此外皆不至如懷慶之甚。惟朱仙鎮最重。均經按其輕重。加之撫卹。得旨覽奏俱悉。○命兵部右侍郎張映辰知武舉。禮部右侍郎程景伊為武會試正考官。翰林院侍講學士吳鼎為副考官。○是日。駐蹕庫庫英圖大營。翼日如之。○己酉。

御書江蘇淮安府直隸廩

龍王廟扁曰。靈佑清淮。徐州府

龍王廟扁曰。彭城保障。○賜扈從王公大臣

並蒙古王公台吉兵等食。○諭大學士來保

等奏覆。副都御史竇光鼐與刑部秋審兩議

之陳布統等二案。詳覈原稿。折衷各犯情罪。

實為允協。如陳布統雖以防竊起釁。而一聞

黃父亦放火燒村之語。有意連戡斃命。實屬故殺。其應情實何疑。至陳父悔之加毆鄧亞弄骨折。其傷雖重。要非有心致死。即令改入情實。朕亦不即予勾。刑部所議。原未免過當。乃竇光鼐因欲爭一緩決。輒援別省已入緩決之羅阿打。亦欲改入情實。甚至輾轉自生支節。並欲將故殺之陳布統而概緩之。則是以會讞大典。不肯平心商榷。徒用筆舌相攻。任氣謾罵。不特有乖政體。而分門樹幟之弊。尤不可不防其漸。前降諭旨已明。此事在刑部集議時。或執成見。以排衆論。致竇光鼐不能心服。然其過未彰。而竇光鼐則發駁紛呶。斷斷不已。且自奏摺內。將憤詈言語盡行抹。然而羅阿打定入緩決。竇光鼐已經畫題。何以復議改情實。其故殺之陳布統。又何以議改緩決。而彼奏摺中。又未詳晰聲敘。是竇光鼐忿爭失體。既不可為訓。及陳奏時。自知於理不勝。因取長畧短。巧為掩飾。以上情節著

實光鼎據實明白回奏。○諭軍機大臣等。熊學鵬奏。請鄰省收成。互相知會。一摺。所見亦是。地方年豐穀賤之時。鄰封倘需糴買濟用。商民等自無不訪探營運。但各督撫等於本省收成分數既定。隨時轉相知會。以便酌量採購調劑於民用實為有益。其事亦屬可行。著將該撫原摺鈔錄。令於各督撫奏事之便。傳諭知悉。○調任河南巡撫常鈞奏豫省各州縣積水。設法疏消。衛輝彰德懷慶河南四府屬及開封府屬之汜水滎澤大槩涸出。惟祥符等處及陳州府屬因楊橋奪溜漫水尚未消退。現當種麥之期。地畝先涸出者已播種發生。惟甫涸出之地不能驟乾。難用牛力翻犁。訪有犁鏤及撒裂種二法。犁鏤之法。兩人代牛牽鏤。一人扶鏤輕搗種從底出。即已入地。撒裂種之法。水退地涸。裂縫必多。握種播颺。撒入縫隙。二者專種濕地不用牛犁而生苗甚速。現諭各屬仿照辦理。得旨甚好。○

廣西提督王進泰奏。粵西營汛向例不屬鎮轄之協營。提督三年親閱一次。其左右江兩鎮所轄協營聽總兵巡閱。提督並不親查。請嗣後不屬鎮轄之協營。每年親閱一次。其左右江兩鎮所轄之協營。地濶難遍。請分年巡查。得旨。如所議行。○豁免湖南運船遭風漂沒米八百四十五石有奇。并淹斃副丁謝江勝。水手張啟龍。賞卹如例。○旌表守正捐軀之安徽旌德縣民江士愷。聘妻呂氏。○庚戌

上詣

皇太后行幄問安。○行圍。○欽差侍郎裘曰修奏。黃河由賈魯惠濟二河下灌。倘下游不能容納。恐又旁決。臣從開封府沿隄至歸德府之柘城鹿邑及江南之亳州太和阜陽復溯流而上。從沈邱回豫。查得賈魯河所受黃水下入大沙河。達江南之阜陽潁上。由正陽關入淮。惠濟河所受黃水下入渦河淝河。於江南之太和亳州一帶。分路入淮。下流既得所

歸是以不致旁潰。再歸德屬商虞夏永前此二十二年挑濬各河。皆未受楊橋浸水。下游江南宿州之睢河。自不致淤阻矣。得旨。此所謂不幸中之幸耳。○又奏。河南彰德衛輝懷慶等府。被水之處。業已疏消種麥。惟開封陳州歸德所屬州縣中。濱臨賈魯惠濟兩河者。現為楊橋黃水所占。即使趕緊合龍。亦在十月以後。種麥逾期。目前糧價尚平。今冬明春當豫籌接濟。豫省存倉麥多。為撥借籽種動用。撫卹又銀米兼放。臣意。趁此糧價尚平時。賑項概給折色。所有存剩倉儲。留為春間平糶之用。如尚不敷。光州固始產米之區。亦可及時採買存貯。撫臣胡寶瑤。已於本月初十日。到豫。應交安辦。再各處城垣坍塌甚多。遲早皆應辦之事。宜急覈估。於明春興工。彼時賑期已畢。貧民可以借工代賑。得旨。如所議行。○又奏。臣由豫至江南。潁亳一帶。查勘黃水去路。皆無阻格。惟上游缺口未塞。則潁亳

被淹地畝。種麥無期。此時糧價雖平。冬春恐致騰踊。臣意。亦令一概賑卹。給與折色。其潁屬各州縣倉貯。留為來春糶借之用。此數州縣糧價不增。則河南光州固始出米之鄉。別無搬運。於豫省災黎有益。得旨。甚是。即應如此辦理。交地方官。又稱。黃水至潁亳。已無甚泥濁。自此達泗州。入洪澤湖。尚有八百餘里。愈遠愈清。洪澤湖可無受淤之患。得旨。此論目前耳。若久之必受害。故朕督催必令速築決口者。以此。○是日。駐蹕依遜薩勒巴爾哈達大營。

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十四

實錄卷之六百四十四

三六

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級 董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十六年辛巳九月辛亥

實錄卷之六百四十五

上行圍○是日駐蹕安巴完和羅昂阿大營○

壬子

上詣

皇太后行幄問安○行圍○諭禮部朕惟壽共

福臻宜懋祝釐之典名因德顯聿崇歸善之

文矧茲四海之昇平悉蒙

慈蔭爰合萬方之歌頌肅晉

隆稱慶節宏開徽章式煥欽惟

聖母崇慶慈宣康惠敦和裕壽純禧皇太后厚

德凝禧深仁錫福協安貞而應地道備坤儀
勗宵旰以勤民治登泰運春暉徧煦九州之
民物恬熙愛日常懸萬國之冠裳忭舞茲以
一陽之月恭逢

萬壽之期進花甲之初週更逢十稔喜履長之
叶慶駢集千祥當鶴算之頻增正鴻圖之益
壯梯山航海望金闕以抒誠東賁西琛奉
璇闈而祝嘏爰稽典禮用展悃忱敬加上

聖母皇太后徽號曰

聖母皇太后徽號曰

崇慶慈宣康惠敦和裕壽純禧恭懿皇太后寶
冊輝騰龍文光耀鞏金甌而永祚占玉晷以
迎和垂裕方隆欣太平之有象承庥未艾祝
聖壽以無疆其應行典禮爾部敬謹詳議具奏
○又諭今歲山東濱河各屬因雨水過多秋
禾間有被淹之處所有應徵新舊錢糧已查
明分別蠲緩而漕糧漕項例不在緩徵之內
但念該處被水歉收若令照常完納恐民力
未免拮据著加恩將被災較重之曹縣城武

二縣應徵本年漕糧及隨漕銀米緩至壬午
年再分作三年帶徵次重之金鄉濟寧魚臺
荷澤單縣濮州定陶鉅野范縣陽穀壽張德
州館陶夏津武城邱縣臨清恩縣汶上嘉祥
等二十州縣除有收之地仍令照常徵輸外
所有被災地畝應徵漕糧漕項俱緩至壬午
年再分作二年帶徵以紓民力該部遵諭速
行○諭軍機大臣等據安泰定長奏稱由烏
嚕木齊起程至喀喇和卓奉到會議遷移兵
丁招徠戶口之旨復回烏嚕木齊等語安泰
等駐劄日久熟悉情形故令與旌額理等會
議此外別無他事議定具奏後即行來京不
必在彼守候○直隸總督方觀承奏崔家房
漫口於九月初七日工竣永定河下口挑挖
停淤壩口合龍及堵築北埵數日即可竣事
得旨覽奏俱悉○賑貸湖北沔陽天門潛江
荊門江陵公安監利歸州沔陽衛荊州衛荊
州左衛等十一州縣衛本年續被水災飢民

並予緩徵○是日駐蹕僧機圖博勒齊爾大營○癸丑

上行圍○

御書涿州拒馬河

龍神廟扁曰澤流畿甸○是日駐蹕永安湃昂阿大營翼日如之○甲寅

上行圍○吏部議覆廣東按察使來朝奏稱地方官失察假印之案例降一級調用但其中情節不同有吏役私雕本官印信者有奸民

私雕官員印信者有在此縣雕刻攜往彼縣行用者有潛匿雕刻並未行用者失察吏役私雕較之失察奸民私雕更重應降二級調用而未經行用較之已經行用稍輕應減為罰俸一年餘俱如例等語應如所奏從之○

乙卯

上行圍○諭據清保奏八月初一日致祭

陵寢副管領兼防禦孟德到時甚遲請將孟德交部治罪等語

陵寢官員祭祀是其專責理宜恪謹將事且每月祭祀二次何至遲誤伊等在彼皆經賞給世職當益加奮勉乃孟德竟敢於祭祀之日遲到甚屬可惡孟德著革職其防禦員缺不准承襲嗣後有似此者所有賞給世職皆不准承襲將此諭該處人等知之○又諭曰寶光鼐與刑部秋審兩議一案已經大學士來保等秉公確覈定議因寶光鼐憤爭過當且具奏時未將陳布統并欲改擬緩決及羅阿扛於畫題後旋復改議緣由詳悉聲敘是以令其明白回奏今據奏到其於集議言辭忿激抵牾自知難以辭咎至前此欲議更張摺內未經入奏之處則以到班簽商不知刑部以為口實先已密行入告自解此事在刑部以兩議未奏之案節次具摺誠未免有先發制人之意但國家會識大典寶光鼐竟氣質自用甚至紛呶謾罵而不自知設將來與議者尤而效之國憲朝章尚可為訓耶是刑部

所有不合。究不若竇光鼐之甚。竇光鼐著交部嚴察議奏。刑部堂官並著交部察議。竇光鼐摺併發。○諭軍機大臣等高晉奏籌辦清口二壩情形。摺內既稱下游黃水斷流。復云回空糧艘已出口渡黃。行文殊未明晰。朕前因豫省漫口。方慮上游舊道斷流。江廣漕艘不無淺阻之患。今此已過楊莊之漕船一千四百餘隻。何以能徑渡斷流之黃。或係彼處黃流尚有停蓄。抑仍藉濟於清口之水。著傳諭尹繼善、高晉令其詳悉覆奏。再楊橋奪溜之水。雖距洪湖尚遠。但漫水下趨。究以入湖為歸宿。其要策當以清口暢其流。不當以五壩過水。貽下游之害。此決然無疑者。先因尹繼善等奏到。已詳諭之高晉。想尚未奉到耳。著一併諭令知悉。尋奏。江省黃河自豫省漫口奪溜。下游早已斷流。今楊莊出口之漕船。實藉濟於清口之水。並非黃流尚有停蓄。報聞。○兵部以武會試中額請得旨。這考試漢

軍取中二名。直隸取中十二名。陝西取中七名。廣東取中五名。河南取中四名。山東取中五名。江南取中四名。山西取中五名。湖北取中二名。湖南取中一名。四川取中二名。廣西取中一名。福建取中三名。浙江取中二名。江西取中三名。雲南取中二名。貴州取中一名。○以廣東澄海協副將葉相德為廣東南澳鎮總兵。○是日駐蹕布都爾昂阿大營。○丙辰。

上詣

皇太后行幄問安。○諭軍機大臣等。昨據方觀承奏。稱於本月十五日。自工次起程。趨赴行在。但聞該督現在患病。不知近日病體如何。此時已經出哨。並無緊要交辦之事。原可不必亟亟趕赴熱河。該督惟宜善為調治。即於口內所至地方。靜攝數日。俟朕迴鑾進口時。再於途次接駕。亦可。著傳諭該督。並令將現在病勢。曾否少間之處。先行奏聞。以慰廬念。

○又諭曰。成衮扎布等奏杜爾伯特王車凌烏巴什烏梁海內大臣察達克等呈稱。伊等生計近漸饒裕。嗣後輪班隨團情願自備馬駝。扎哈沁公扎木禪之子們特什亦行呈請等語。車凌烏巴什等所請具見忱悃深屬可嘉。但伊等生計較前雖稍有起色。未必饒裕。若准其自備馬駝。尚恐不無拮据。著傳諭成衮扎布等辦理。杜爾伯特烏梁海扎哈沁人等輪班隨團。仍照前給與馬駝。俟數年後生計果足。再如所請停止官辦。仍將加恩伊等之處曉示知之。○江南河道總督高晉覆奏清口東西二壩前因湖河盛漲。五壩過水業經開展五十一丈。旋聞豫省漫水流入潁屬之渦淝等河。有由淮匯歸洪澤湖之勢。隨將清口暫停收束。今下游黃水無阻。上游淮水極清。五壩已有兩壩斷流。洪澤湖水勢暢利。足資宣洩。清口東西二壩似可暫緩開展。若霜降後湖水大落。又當將兩壩次第收束。得

旨總以五壩俱斷流。然後可言束清口。若束清口。令從五壩出水。甚非計。此最易曉者。爾等不可固執前說也。○陝甘總督楊應琚奏。巴里坤種獲豌豆。試有成效。該處商民願認墾荒地。請給與執照。聽其開墾。得旨甚好。應廣為勸墾者。○以故喀爾喀頭等台吉索諾木喇布坦之子喇嘛扎布襲職。○是日駐蹕布克大營。○丁巳遣官祭

歷代帝王廟。○遣官祭

都城隍之神。○賜扈從王公大臣及蒙古王公台吉等食。○諭軍機大臣等。據方觀承奏北運河東岸之馬家莊孤雲寺。于家莊三處隄埝漫溢。汕刷一摺。該處係南北運河交錯之區。關係緊要。亟宜上緊堵塞。該督現已回至通州。親往查勘。應即速率屬協力償辦。務期刻日竣工。所有附近被淹村莊。一面即行查明。照例撫卹。毋致失所。將此傳諭知之。○又諭曰。高晉奏籌辦黃運湖河善後工程。約

估需銀四十萬兩。請就近酌撥等因。一摺。甚非覈實辦工之道。今年江省運河一帶。雖有風暴漫溢之處。然黃河大勢。實因豫省上游奪溜下游。得以不致盛漲。是江南所有工程。迥非楊橋可比。從前所降諭旨。特令其於賈魯河散漫下游處。所先事防範。遇隄工殘缺。汕刷亦不過間段補築。俾足資捍禦可耳。何至需用如許浩繁。在豫省重險要工。現在需用不下三百萬。朕亦何所靳惜。但欲以此例之江省。則輕重大為失倫。南河歲修已有定款。今即因此番增修。應需撥帑備用。亦何至與常年大相懸殊。且國家經費有常。今年豫省工賑各項所費不貲。為大臣者。理宜通盤籌算。悉心調劑。摺內以隄岸各工。概議加高培厚。謂之善後。於工程緩急。全無差等。況覈之現在堵築各口所用。又不在此數。尤非情理。向來河員積習。惟以工多帑費為得計。而工係水土。亦難確覈。高晉初任總河。未免為

屬官慫恿。尹繼善久任江省。何以不行詳覈。遽會詞陳請。高晉現赴河南。所有江省實在應辦各工。著交與尹繼善令其另行通覈。加意撙節。妥議奏聞。並將此摺因何如此估辦緣由。一併聲明。到日再降諭旨。○陝甘總督楊應琚覆奏。烏魯木齊招募內地流民墾種事宜。查安西肅州甘涼一帶地隣烏魯木齊。應就近招募。今於安西肅州二處。招得貧民百戶。情願挈眷前往。擬分為兩起。給以車輛口食衣服。派員照料起程。其自哈密以西沿途俱無旅店。請於軍需餘帳房內酌撥帶往。到彼交還。初到時。按給口糧。屆明歲麥熟後。停止至烏魯木齊。官兵有願將家口遷往者。現移咨安泰查明。俟移覆到日。辦送得旨。好。○以光祿寺卿宗室寶麟為通政使。○旌表守正捐軀之甘肅寧州民馬生才妻王氏。○是日駐蹕濟爾哈朗園行宮。○戊午上詣

皇太后行宮問安。○諭軍機大臣等。胡寶瑤奏原任刑部主事余騰蛟詩辭狂悖。請旨即行正法。一摺。朕初閱摺內所敘事屬大逆。已批三法司覈擬。及檢閱詩文各稿。即原首及簽出各條。率多蹈襲舊人惡調。語句蹇駁。不得謂之誹謗。悖逆。胡寶瑤或有鑒於從前胡中藻之案。以為既經首出。不得不嚴行處治。且入告少遲。又焉知不為謝溶生先得居奇。是以如此具奏。殊不知逆惡大罪。國法不容。胡中藻狂悖實跡種種。朕不能為之貸。若此等詩辭。豈可從一例論耶。看來余騰蛟自恃曾為職官。武斷鄉曲。如余豹明所控幫助爭田等事。實所不免。然此亦自有應得之罪。若撫拾詩句。吹毛求疵。置之重辟。不獨無以服其心。即凡為詩者。勢必至不敢措一語矣。朕明慎用刑。一切扞網之徒。輕重惟其自取。從來不設成見。況摺內既稱余豹明素屬健訟。倘將余騰蛟竟行嚴辦。刁陷之風。又可長乎。胡

寶瑤現已到豫。著將此案交與常鈞。令其詳悉研審。將余騰蛟所有居鄉恃符爭訟各本罪。按律定擬具奏。原摺鈔寄閱看。並傳諭胡寶瑤知之。○吏部等部議准。調任湖廣總督蘇昌等疏稱。湘陰縣縣丞移駐林子口。零陵縣縣丞移駐冷水市。湘潭縣黃茅驛醴陵縣涑口。清泉縣新城市。添設巡檢。俱應改建衙署。從之。○河東河道總督張師載奏。楊橋漫口。現隨同劉統勲等駐工催築。其楊橋以下南北兩岸各漫口。當此黃河將歸故道之時。急宜趕築。以資攔截。已飭屬分限辦理。得旨。楊橋不愁無人。汝竟宜急赴下游兩岸督辦各工。仍與劉統勲等聲息相通。以期全善。無虞。勉之。○命內閣學士周煌提督江西學政。○是日。駐蹕波羅河屯行宮。○己未。諭軍機大臣等。昨高晉奏。南河善後工程。估需銀四十餘萬一摺。已有旨詳諭尹繼善。令其確覈具奏。今細思高晉此奏。於事理全無體會。乃

係專為屬員所愚。不獨應行搏節。竟可無庸置議也。豫省賈魯河。既經奪溜。則上游斷流。下游之勢自減。南河工程。方當藉以節省。前旨所云先事防範者。不過就本河所有額兵。正項豫為整理。如獾窩鼠穴。加意補苴。以備不虞足矣。倘因此而概議增卑。培薄需用。浩繁若此。則自楊橋而下。邈迤河東兩省。直至雲梯關入海。凡一路隄岸。處處必須大興工作。勢將無所底止。有是理乎。即以江省而論。

前此若張家馬路等處決口。豈全河隄工。皆緣此一例增修乎。向來河員陋習。惟利於有事。可以冒銷肥橐。而水土之工。亦難於稽覈。邇歲安濶日久。伊等無所施其伎倆。今因此故智復萌。而高晉又初任總河。誤認前旨為應行大修之意。劣員遂乘間慫恿脅制。乃墮其術中。而不自覺耳。著再傳諭尹繼善。令其將高晉所奏各工。究係如何查勘。如何估計。以致工多用費。並聽何人慫恿緣由。逐一確

查據實覆奏。河工原有歲修定項。應力持定例。屏斥浮言。毋得為其所動。聊作覈減調停之策。並不得以原奏曾經會銜。稍有游移迴護。○又諭曰。都統豐安等駐劄新疆日久。應派員更換。著派副都統鄂津。前往伊犁更換。豐安副都統曹瑛。更換豐訥亨。副都統常岳。前往喀什噶爾。更換富虎。副都統素誠。前往烏什。更換永慶。副都統扎拉豐阿。前往烏里雅蘇台。更換扎隆阿。副都統雅郎阿。更換福祿。○又諭曰。海崇阿現在病痊。著以總兵官職銜。前往喀什噶爾。更換楊寧。○軍機大臣等議覆。定邊左副將軍成袞扎布奏稱。烏里雅蘇台有馬六千八百餘匹。又喀爾喀四部落官馬亦多。現在需用處少。請量撥四五千匹。送內地牧羣等語。該地既需馬無多。自應撥解。但內地牧羣馬亦足用。議派給八旗及聽直隸兵民購買。再來年往伊犁回部換班官兵。須給馬巴里坤官馬六百餘匹。尚不敷

用。請將此項官馬量撥四五千匹。送巴里坤牧放備用。從之。○是日。駐蹕中闕行宮。○庚申。

上奉

皇太后駐蹕避暑山莊。至甲子。皆如之。○詣

皇太后行宮問安。○諭曰。傳景著前往西藏。更換集福。於明春起程。○諭軍機大臣等。山西省所辦本年秋審。九卿從緩決改入情實者。至有六起之多。且其中如詐財害命。誣良致

斃。挾嫌兇殺。糾夥搶奪等案。皆屬兇惡不法之徒。無可寬貸。何以概列緩決。於情罪甚未允協。此在他人。尚不應出此。况鄂弼曾為刑部堂官。尤非未諳讞牘者可比。或係初任封疆。會鞠時僅係草率致誤。已不可為訓。若意欲博寬厚之名。以致任情開脫。則深負委任。將來恐不能承受朕恩也。鄂弼著傳旨申飭。○吏部等部議覆直隸總督方觀承疏。稱灤州地濶政繁。該州耳目難周。舊設州判與知

州同城。專司河汎。此外並無應管事務。請將該州判移駐於州南之胡家莊。兼司巡檢。并建衙署。頒給灤河管河州判兼胡家莊巡檢條記等語。應如所請。從之。○禮部奏本年十一月二十五日。

皇太后七旬萬壽。時值齋戒期內。請豫行慶賀。禮得旨。著於二十二日行禮。○辛酉。諭曰。汪騰龍著往葉爾羌。與定柱更換額僧額著往英吉沙爾。與福永更換。○諭軍機大臣等。據永寧奏稱。駐劄各處官兵。應行補領錢糧。經總督楊應琚咨會各該大臣。以哈密無冊籍可稽。不便據官兵等呈詞給發。應由本處支給。今奉飭諭。謹將緣由回奏。請將官兵補領之項。令各該處造冊知會等語。所辦亦是。軍需關係錢糧。若無冊籍可稽。僅據官兵呈稟。即行支給。必致冒銷滋弊。又費催追之力。公私俱屬不便。嗣後各該處大臣。凡遇官兵補領錢糧。務即出具印照。以備查覈。並著通行

傳諭知之。○兵部等部議廣東崖州營外海哨船遭風漂沒。應免賠補。淹沒步兵李奇芳。照例卹賞。從之。○壬戌。

孝慈高皇后忌辰。遣官祭。

福陵。○諭接駕進獻詩冊之馬。占鰲陳顧。潞葉藩俱著賞緞一匹。○軍機大臣等奏。回部歸誠。伯克等輪班來京。已成年例。若每次官給牲隻。轉覺勞費。請嗣後每年入覲之回人。若係賞物。行裝牲隻不敷。派員代辦。至自帶什

物。則皆以原來馬駝馱載。毋庸官為辦理。從之。○兵部議覆。青州將軍宗室額爾德蒙。額等奏。稱革職協領奇車布。犯事原案。罪非貪婪。現派印房効力。實心辦理。請援廢員挑取披甲。改過奮勉。於應陞處列名之例。以驍騎校錄用等語。查奇車布。於參革將軍色克慎等貪婪徇庇案內。侵用馬價。并指稱部費攢銀入己。是所犯已非公罪。再例載革退兵丁。准其挑甲。如果改過奮勉。於應陞處列名。係

專指革退兵丁。廢員不得援以為例。得旨。部駁。是依議。奇車布從前犯事。如果因公獲罪。尚可援例聲請。量為錄用。今經該部查明原案。係侵用馬價。復指稱部費攢銀入己。既非因公。里誤。且與復經挑用兵丁。應陞列名之例不符。何得復以罪非貪婪。以驍騎校朦混保奏。甚屬不合。額爾德蒙等俱著交部察議。○癸亥。諭曰。良卿歷任道員。辦理一切差務。頗屬諳練。奮勉久欲簡擢臬司。因熱河道缺緊要。未經陞用。著加恩賞給按察使銜。仍管熱河道事。○諭軍機大臣等。口外熱河地方。人烟輻輳。日用浩繁。比來柴薪一項。採購既多。市直頗貴。聞附近山場多有產煤之處。而地方有司。向慮聚眾滋事。寧持封禁之議。未免因噎廢食。不知興利防弊。惟在董事者。經理得宜。自足以資彈壓。如京師西山一帶。煤廠甚多。何未見生事耶。著交總督方觀承。令其查勘明確。酌定規條。試行開採。以裨生

計。所有應行責成地方官及一切經理事宜。悉心妥議具奏。○又諭曰。劉統勲等奏開放引河形勢已成。勢甚通暢。等因。一摺。辦理皆中機宜。已於摺內批諭。看來此次劉統勲等所辦楊橋工程。較之從前張家馬路漫工。竣事更為迅速。可見大工之集。全在董理得人。則事半功倍。非必帑費工多。始堪奏效也。昨者高晉摺奏。南河善後工程。概議增高培厚。甚至估需銀四十餘萬。非獨不知辦工緩急。

次第。且於事理全無體會。必如高晉所奏。因一處漫口。全河並須興作。則現在自楊橋而下。綿亘數千里。直至雲梯關入海。其將何所措手。若以尋常修防。動費帑金數十萬。勢又安可為繼。與其以此妄費於下游無事之處。更何如用濟楊橋急工之為得乎。想劉統勲等亦必聞其言而非笑之。前寄尹繼善諭旨。已極明悉。可一併鈔寄劉統勲等閱看。令其面詢高晉。伊將何以自解。著於奏事之便。附

摺奏聞。○甲子。

孝敬憲皇后忌辰。遣官祭

泰陵。○乙丑。

上奉

皇太后自避暑山莊迴鑾。○詣

皇太后行宮問安。○軍機大臣等議覆叅贊大

臣阿桂奏。稱塔爾巴哈台。與俄羅斯哈薩克

相近。應駐兵屯田。請從伊犁派領隊大臣一

員。馬兵及屯田兵一千名。前往駐劄。自輝邁

拉呼至都圖嶺。設卡二十一所。酌派官員侍

衛等帶兵分駐。查現在侍衛止餘六員。請再

派十五員。並遷移杜爾伯特。扎哈沁部落。以

壯聲勢。再伊犁存糧現餘萬石。請俟此次換

班兵到齊。再行派撥等語。除塔爾巴哈台駐

防業奉旨。俟伊犁積蓄充裕再辦。其遷移杜

爾伯特等部落。亦有旨停止外。所有調取侍

衛之處。既暫停駐兵。毋庸多派。擬揀選四員。

交明瑞等帶往。至現在伊犁等處駐防換班

兵查前據阿桂奏請伊犁駐馬兵三千名。經臣等議准。今塔爾巴哈台暫停駐兵。亦毋庸多設。應設兵二千五百名。又葉爾羌馬兵五百名內酌留三百名。裁二百名。喀什噶爾馬兵四百名內亦留三百名。裁一百名。其英吉沙爾。阿克蘇各駐兵二百名。烏魯木齊駐兵五百名。仍照舊額。合計兵四千名。今屆換班。應派京師滿洲兵二千。黑龍江滿洲索倫兵一千。察哈爾。厄魯特兵一千。前往更換。此等

兵僅係防守。應照征戰兵減半賞給。滿洲兵二千。人給馬二匹。二人合給駝一隻。得旨。葉爾羌事務甚簡。有馬兵二百名。即已足用。著將酌留之三百名內。再撥一百名。駐伊犁。其察哈爾。厄魯特等兵。著富德。巴圖濟爾噶勒。馳驛前往揀選。再此次換班兵丁行走甚緩。沿途宜加意牧養馬駝。從前征戰兵丁馬駝倒斃過多。尚須賠補。若伊等不知愛惜。則是自取罪戾。著明瑞及領隊大臣將此通行傳

諭官兵等知之。○賑貸山東齊河。濟陽。禹城。臨邑。長清。德州。平原。德州。衛惠民。陽信。海豐。樂陵。商河。霑化。金鄉。魚臺。濟寧。嘉祥。陽穀。濟寧。衛。荷澤。城武。定陶。鉅野。聊城。冠縣。臨清。恩縣。夏津。武城。東昌。衛。臨清。衛。東平。汶上。曹縣。單縣。濮州。范縣。壽張。東阿。德平。東平。所陵縣。館陶。邱縣等四十五州縣。衛所本年水災貧民。並予葺屋銀兩。○賑貸河南祥符。陳留。杞縣。通許。尉氏。洧川。鄆陵。中牟。陽武。封邱。蘭陽。儀封。鄭州。滎澤。河陰。汜水。寧陵。鹿邑。虞城。睢州。考城。柘城。安陽。湯陰。臨漳。內黃。汲縣。新鄉。輝縣。獲嘉。延津。滑縣。濬縣。河內。濟源。修武。武陟。孟縣。溫縣。原武。洛陽。偃師。鞏縣。孟津。宜陽。澠池。新野。淅川。淮寧。西華。項城。沈邱。太康。扶溝等五十四州縣。本年水災貧民。並豁免漂失倉穀。○旌表守正被戕之山東昌樂縣民馬二妻徐氏。○是日駐蹕喀喇河屯行宮。○是月直隸總督方觀承覆奏北運河東岸漫

口三處。馬家莊。于家莊。水僅數尺。兩日內即可竣工。孤雲寺地稍寬。十日內亦可竣工。至隄外一帶。悉係水鄉。並無村莊。其天津武清境內。先經滙水淹及之處。業經查明撫卹得旨。具圖來看。更覺明白。○江蘇巡撫陳宏謀奏。淮徐等屬。豁糧減則之戶。既不報災。自不應給賑。惟是向來有糧之地。被水成災。例應賑卹。凡同在成災之村莊。一切無業貧民。均得徧給。今擬將豁減之戶。其不住糧地成災

平定人三〇二

之村者。既不報災。原不查賑。若現居糧地成災之村。實係乏食者。似應與災地無業貧民一體賑卹。再此等窪地。當未經豁減以前。幾無不災之年。亦無不賑之歲。今業蒙豁減。請將成災甚輕者。無庸給賑。是較之從前辦理。已有分別。得旨。正自不然。然傷惠於民。猶可。若徒飽貪官污吏。則將來必有受其責者。爾等慎之。○湖廣總督兼署湖北巡撫愛必達覆奏。湖北省。六七月間。被水之處。除京山。雲

夢公安黃岡。歸州等五州縣。勘不成災。外。沔陽。天門。潛江。成災稍重。江陵。監利。次之。漢川。荊門。又次之。其沔陽。武左。荊州。三衛。屯田。被水情形。亦與民田相等。均照例分別辦理。得旨。覽奏俱悉。○廣西提督王進泰。奏。官兵營伍。實力考驗。整飭得旨。若所奏皆實。則汝在江省。應無不整飭之營伍矣。何齊斌。又有似汝。此初到任之奏。則汝等之不實。可知矣。慎之戒之。○雲貴總督吳達善。雲南巡撫劉藻

平定人三〇三

奏。安南沙匪。郡尋竄入內地。焚劫村寨。疊經該國發兵協剿。茲據該國具報。九月初五日。於清波地方。將郡尋生擒。當即飭令解送內地。審辦得旨。是。○貴州巡撫周人驥。奏。黔省鼓鑄。採買滇銅。定例大興金釵。二廠。高低對搭。而金釵。廠銅色低薄。難以配鑄。若令滇省全撥高銅。勢又不能。查川省近年銅廠甚旺。商賈多販入黔省。威寧一帶。售賣。應就近採買。價脚不增。而銅質純淨。試買一年。再行接

辦得旨照所議行

實錄卷六百四十五

三六

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十五

大清高宗法天隆運至誠先覺體元立極敷文
奮武孝慈神聖純皇帝實錄卷之六百四十六

監修總裁官經筵講官太子太傅文淵閣大學士

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次

總裁官經筵講官太子太傅文華殿大學士文淵閣領閣事稽察欽奉上諭事件處管理刑部

世襲騎都尉軍功加九級隨帶加二級又加二級重誥內大臣戶部尚書鑲藍旗滿洲都統軍功紀錄五次

尋常紀錄十四次臣德璉經筵講官太子少保工部尚書紀錄六次

敕修

乾隆二十六年辛巳冬十月丙寅朔享

實錄卷六百四十六

太廟遣裕親王廣祿恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○頒乾隆二十七年時憲書○諭戶部議駁長蘆鹽政金輝鹽課緩徵一摺自屬按例定議但念該處鹽場今秋雨水過多商力未免稍艱著加恩將長蘆本年未完鹽課四十二萬兩准其緩至明年奏銷後分作五年帶徵以示體卹○諭軍機大臣等金輝奏直豫二省鹽包被淹請將本年及下年引課概請分作五年帶徵一摺甚屬非是現經部臣按例議駁已降旨將本年未完課銀加恩作五年帶徵矣金輝身任鹽政於權課恤商均當慎持成例方為稱職此等因災緩帶之項本因一時商力不足國家格外體恤之仁況下年正課尤非本年可比該鹽政何得因目下被水而豫將明歲豐收之鹽課一概並請緩帶看來金輝不免為商人愆愆竟墮其術中而不覺此在初任時尚可從寬免其深究倘將來

實錄卷六十六

三

不知省改或致有意市惠以博虛譽朕斷斷不能稍貸也金輝著傳旨申飭並將此傳諭知之○大學士等會同刑部議覆左都御史金德瑛奏稱秋審緩決冊內改輕改重多在新事而陳案鮮有能軒輊者例與新案一體會審按名宣唱徒襲具文應如所奏嗣後秋審各督撫仍造全冊送刑部存案俟九卿會審時將招冊分送以緩決三次為斷已及三次並無更改者不必印送其有一二案尚待推鞠該部摘冊印送會議至進呈本仍將緩決三次以上案犯會審時一體念稿畫題各省官犯及朝審案犯無多仍照舊辦理從之○吏部議覆浙江學政李因培奏稱訓導中衰朽者十居七八不便任其因循供職應請行令直省學政不必拘六年八年甄別之例隨時察覈咨部開缺從之○兵部議覆浙江學政李因培奏稱武舉恃有護符不赴會試惟以欺凌武斷為事請定議查辦等語應如

實錄卷六十六

三

所奏嗣後武舉中式後三科不會試者地方官查明果因親老事故出具冊結送學政察覈報部如無故三科不會試且在籍滋事者各該學政嚴查仍照武生例小則戒飭大則詳請題革又稱武舉違限不赴學臣衙門填寫親供請議處等語查武闈發榜後正值學臣新舊交代中式舉子散處通省未能依限赴填嗣後榜發該布政司即頒親供式樣行各州縣令中式舉子就近親填仍送布政司同試卷解部磨對如仍故抗不填地方官即詳叅處從之○是日駐蹕常山峪行宮○丁卯

上詣

皇太后行宮問安○諭軍機大臣等明德奏請停止武威縣笈笈灘地方兵丁截渠種地以濟民用一摺所奏尚未明晰笈笈灘雖踞黃渠上游民人所租營地交租不過二百餘石而下游民田數至一千四百餘頃多寡相懸

豈止千倍即使上游並不截流而以租地所需無幾之水謂足資下游如許灌溉之用安能有濟若遇泉源盛旺時即令上游盡力攔截已田必致為壑又安能利己害人皆事理所必無者其中爭鬻必有別情著傳諭楊應琚會同明德即赴彼處詳查確勘悉心妥議具奏朕辦理庶政惟理明事實即為先行倘以撫臣而偏於為民督臣而偏於為兵伊等當自諒難逃洞鑒也尋會奏笈笈灘營地需水無多原與黃渠民田無礙緣租別渠民人王明等佃種黃渠農民疑多截渠水彼此爭執請將該灘地畝即令黃渠農民分種仍照前輸糧給兵得旨甚是○阿克蘇辦事都統侍郎海明等奏據阿克蘇阿奇木伯克色提巴勒氏等稱本年收穫豐裕請將現收穀公派五百石建倉貯備俟積至五千石即停等語應如所請報聞○叅贊大臣舒赫德等奏至闕展會同德爾格傳詢沙呼里烏默特回

人據稱安插已久不願移往額林哈畢爾噶其莽噶里克所管回人亦願照舊安插等語請將莽噶里克屬五百餘戶設四品伯克一員總管五品伯克二員協辦六品伯克五員分管其沙呼里等屬七十四戶即以沙呼里為五品伯克總管烏默特為六品伯克協辦俱歸闡展大臣統轄報聞○副都統安泰等奏巴里坤地寒霜早若將屯田兵移於烏嚕木齊實為有益其現駐兵詢據稱請俟收穫後回籍挈眷現咨會陝甘督臣楊應琚從安西等處按程給車輛口糧於明年三四月前來報聞○是日駐蹕兩間房行宮 戊辰諭朕明春恭奉

皇太后聖駕南巡著照丁丑年例於江浙兩省冬兌漕糧內各截留十萬石在水陸駐蹕地方分廠平糶著漕運總督及各該督撫會同妥協辦理該部遵諭速行○以告休雲南開化府土經歷周天成子震襲職○除江蘇常

熟丹徒二縣坍沒田地一百二十二頃四十七畝有奇額賦○除廣西宜山縣墾不成熟地五十九頃五十畝有奇額賦○豁甘肅皋蘭等三十二廳州縣乾隆二十四年水衝田畝銀三千四百兩有奇糧二千九百石有奇草四千二百束有奇其山丹通渭平羅安定碾伯等縣撥運被衝糧一百七十石有奇並予豁○鑄給阿勒楚喀倉監督關防從吉林將軍恒祿請也○是日駐蹕要亭行宮○已

上詣

皇太后行宮問安○諭今秋河南祥符等州縣猝被水災已命欽差大學士等會同該撫查明撫卹其應徵錢糧照例分別蠲緩但各屬被災雖有輕重不同而收成既已歉薄民力自不免拮据著加恩將曾經報過被水之祥符等五十四州縣無論成災與不成災所有本年出借及遞年民欠未完常平漕社各項

穀石均緩至明年秋收後免息徵還以紓民力。該部遵諭速行。○軍機大臣等議覆定邊左副將軍成衮扎布奏請減烏里雅蘇台兵以節糜費。屯田科布多以省糧運等款。應如所奏。派叅贊大臣一員領綠旗兵百名往科布多屯田。仍領喀爾喀兵百名以備差遣。本年收穫後再將喀爾喀杜爾伯特扎沁人等派往俟積貯日豐漸次將烏里雅蘇台官兵移駐展喀爾喀游牧與塔爾巴哈台額爾齊斯互為犄角至各卡應留侍衛供差請於新到侍衛內揀留四員餘俱徹其各卡應留台吉俟再議得旨烏里雅蘇台既留侍衛四員著再留二員派往科布多以備叅贊大臣差遣餘如所議行。○刑部議奏本年秋朝審停勾照例將冊內侵帑婪贓之官犯林洛等五名請旨正法得旨這所奏朝審秋審情實案內情罪重大之官犯林洛朱若東張任莘馬龍圖俱依議即行正法鄧錫禮情罪雖屬

較重究係為從沿受鹽包銀兩與朱若東等有間著牢固監候。○左都御史永貴等奏從前額德格訥阿濟畢等與霍罕額爾德尼伯克因搶掠貿易人等成釁嗣霍罕搶割額德格訥田禾額德格訥人等又乘霍罕與霍集雅特部落相攻搶掠報復續因畏勢遣額勒韜第請往諭霍罕經臣等據理斥責並檄霍罕令各守疆界不得滋事再額爾德尼伯克從弟阿布都爾瑞與霍集雅特之丕色勒伯克交通謀害額爾德尼事洩被殺霍罕因攻霍集雅特額爾德尼被圍有伊等兩部落之大阿璉講和暫已息兵報聞。○叅贊大臣阿桂奏喀爾喀梅楞達什敦多布等追瑪哈沁被掠遇哈薩克游牧之彰固斯得釋復派兵協助尚屬恭順應量加獎賞但據達什敦多布等稱哈薩克等又越境來塔爾巴哈台之布庫什河游牧請俟瑪哈沁勦竣領兵驅逐仍收牲隻示懲報聞。○是日駐蹕密雲縣行

宮○庚午諭軍機大臣等據裘曰修奏沁水隄埝民工其天師廟尋村二處及各段大小缺口皆為急不可緩之務現據該府縣估需銀四萬兩士民籲請借領庫項亟為動工分作十年清還等語此等隄埝雖係民修現經被水之後秋成未免歉薄若借給庫項乘時修築事屬可行著傳諭胡寶瑑即照所奏速為辦理但工程用至四萬兩雖由士民借領亦必須專派一地方大員董率稽查庶隄埝可期穩固而銀兩亦歸實用裘曰修僅稱知府沈榮昌估計其將來興工時應作何派委大員總司經理之處摺內未經聲明並著交與胡寶瑑一面揀員督辦一面即行奏聞並諭裘曰修知之尋奏隨揀糧道歐陽永禔總司經理仍令專轄之河北道率該府等督辦臣不時親查得旨嘉獎○欽差侍郎裘曰修奏沁水出五龍口正流而外鑿山為廣濟永利利豐三洞迤下開溝成渠貫輸濟源河內

武陟孟溫五縣境內分資灌溉現勘各洞門暴漲淤阻恐來春雨少澀滯關礙田禾請暫動項二千兩興工疏濬仍於各戶分三年徵還得旨如所議速行○河南巡撫胡寶瑑奏豫省支幹各河惟巴溝一幹黃水不及其賈魯惠濟渦河均經漫注各支河亦多連及賴有數河通流不致甚溢現在黃水漸遠漸清第既退之後淤墊必多自應通身查修使復寬深舊制得旨朕所慮正為此○是日駐蹕

南石槽行宮○辛未

上迴鑾奉

皇太后居暢春園○詣

安佑宮行禮○幸圓明園諭曰尹繼善奏新

授鶴麗鎮總兵七十一請留江辦理差務俟事竣再赴新任等語已照所請行其雲南鶴麗鎮總兵印務著吳達善於通省副將內揀選一員暫行護理○壬申

上詣暢春園問

皇太后安。○以陝西神木協副將德興為福建建寧鎮總兵。○癸酉諭。比因直隸需賑糶米石。已降旨令後至漕艘尾幫及通倉酌撥糧共二十萬石運赴備用。現在各省漕儲全數抵通。綜計太倉歲入至為充裕而直屬附近被水偏災之地當青黃不接時更宜從優豫籌貯備俾地方穀多價減於民計尤為有裨著於通倉內再行撥米二十萬石交與直隸總督方觀承會同倉場侍郎等照前次成例酌令需米州縣赴通領運以資接濟。○諭軍機大臣等永貴等奏照管屯田回人伊斯拉木因回人台因和卓之妻辱詈起釁刺殺台因和卓并傷及其妻與弟不應引照回經出財抵罪應依鬪殺律擬絞等語伊斯拉木以兵刃鬪毆致有殺傷按律擬絞情罪允當但據奏稱伊從前隨副將軍富德在阿喇巴捉生始知將軍兆惠等堅守信息曾賞給翎頂而回經又有死者之家如願受普爾一千

騰格免其抵償等語著詢問死者親屬情願與否如不願受財仍將伊斯拉木論抵此案特因伊斯拉木稍有勞績是以格外加恩否則按律定擬斷不姑寬仍曉示回衆知之。○甲戌諭。今歲各省全漕抵通綜計太倉儲積甚為充裕直屬已疊降諭旨加恩截糧四十萬石以備賑糶平價之需因念山東所屬今秋被水偏災之處雖非豫省可比但循例撫卹之外亦應多為儲備俾青黃不接時小民得資接濟著於本年應運漕糧內截留十萬石存貯該省備用其豫省本年漕糧現今概行停運除應行蠲免外所有現在緩徵應行補徵起運者並著一併留貯該省隨時酌量應用以示軫卹。○乙亥諭。各省督撫將俸滿副將送部引見其是否堪勝總兵之處從前疊經降旨令該督撫隨本聲明今送部引見俸滿之袁州協副將田遜署督高晉祇出具考語並未將該員是否堪勝總兵之處註明

殊屬不合。著飭行。其田遜能否勝任總兵。及該督因何不行聲敘緣由。並著明白回奏。尋奏。臣署督任內。考驗該員在副將中可列一等。不勝總兵。下部知之。○丙子。

上詣暢春園。問

皇太后安。○詣

大高殿。

壽皇殿行禮。○還宮。○諭前據楊廷璋奏稱建

寧鎮總兵陳光祖。年老龍鍾。麤鹵糊塗等語。

是以降旨令其來京陛見。今看來該總兵年力實屬衰邁。難以表率營伍。陳光祖著原品休致。○諭軍機大臣等。成衮扎布奏車木楚克扎布等報稱領兵追捕瑪哈沁。色布騰等。於八月十九日在和爾沁河尋蹤前往。二十五日抵額爾齊斯。哨探人等捉生詢問。知色布騰等已入俄羅斯。隨追至俄羅斯之銕格爾圖喇。向瑪玉爾等索取據云。色布騰等男婦一百六十餘口投來。已行文吉納爾衙門。

俟回文到日再定等語。色布騰等攜帶家口行走。若果速行追襲。何至便入俄羅斯。且俄羅斯邊界並無城郭。果直入搜捕。自必弋獲。車木楚克扎布莽古賚。辦理遲延甚屬錯謬。著嚴行申飭。賊人既入俄羅斯。天氣漸寒。官兵不必久駐。即回烏里雅蘇台休息。此次哨探行走之杜爾伯特。烏梁海等捉生探信。殊為出力。杜爾伯特貝勒巴桑著賞給緞疋。兵丁等俱酌量賞賜。以示鼓勵。○刑部議覆廣西巡撫熊學鵬奏稱。臬司與撫臣近在同城。遇有軍流等犯已經解司者。應即隨詳解院覆訊。不得憑詳批結等語。查各省軍流人犯。臬司於審結時例應詳報督撫覈案咨部。如案涉疑似。原可隨時駁飭提審。若概令解送。令督撫親理案件繁多。轉不能從容推鞠。請嗣後臬司審詳之日。將人犯暫停發回。候督撫察覈。有應行覆鞠者。即就近提訊從之。○轉禮部右侍郎程景伊為左侍郎。以內閣學

士何國宗為禮部右侍郎○以給事中耀海為光祿寺卿○鑄給浙江海塘兵備道及復設守備等關防從巡撫莊有恭請也○丁丑諭曰第穆呼圖克圖奏查訪裏塘第巴阿木布木之孫生時異兆甚衆喜誦梵經計距哲布尊丹巴呼圖克圖涅槃甫及十月疑即其呼畢勒罕等語哲布尊丹巴呼圖克圖為衆喀爾喀等尊信甚深涅槃時曾有百年後轉回本處之語遍訪無蹤茲據奏正與前言相符朕甚欣悅除遣沙克都爾堪布等赴藏面問先將此諭喀爾喀汗王公台吉等知之○諭軍機大臣等劉統勲等前奏楊橋地形河勢約計工程做至十月初十即可計算合龍日期計自十月以來天氣晴霽僭工應為較易且據稱九月內所做工程兩岸合計每日總有五六丈不等現存口門在百丈之內迄今已幾半月按日計工此際自當奏效也其現在堵築情形若何并合龍定於何日著傳

諭劉統勲兆惠等即行詳晰奏聞以慰厯念○軍機大臣等奏玉古爾阿奇木伯克阿布都賚因需索多倫回人革職今據納世通等解送來京查從前海明等解送掠奪商人之沖噶巴什烏默爾比來京時賞給馬甲錢糧歸入回人佐領安插請旨辦理得旨阿布都賚著照烏默爾比辦理○豁貴州險灘溺沉乾隆二十四年運京鉛七萬三千觔有奇○戊寅上御乾清門聽政○諭朕在養心殿召見滿漢大臣向例俱由乾清門行走惟御前內廷軍機大臣等由內右門行走第念滿漢大臣中有年逾七旬者雖神明不衰而筋力亦宜體卹自後遇朕在養心殿召見時俱令其由內右門出入以昭優眷○又諭今秋山東濱河州縣因隄岸漫溢田禾不無被淹之處所有勘明成災地畝應徵額賦已照例分別蠲緩其勘不成災者定例不在蠲緩之內但念該

處被水歉收。民力究屬拮据。著加恩將德平、陵縣、平陰、寧陽、堂邑、博平、茌平、清平、莘、縣、高唐、高苑等十一州縣勘不成災地畝及齊河等四十三州縣衛所內被災五分以下地畝應徵本年未完地丁銀兩及各年未完銀穀籽種等項一體加恩。緩至明年麥收後起徵以示體卹。該部遵諭速行。○命署兵部右侍郎德保充經筵講官。○己卯御史朱嵇奏往歲恩詔頒下。督撫檄布政司轉飭州縣宣布。例止於城門張示。窮鄉僻壤傳聞互異。保無吏胥逗遛舞弊。本月內減免停緩恩旨請敕各督撫於頒到日即用黃紙刊印徧諭。仍將徧布日期咨部查覈。得旨允行。○調吏部右侍郎五福為工部右侍郎。以原任兵部左侍郎彭啟豐署吏部右侍郎。俟服闋實授。○庚辰旌表守正被戕之甘肅玉門縣民崔秀妻劉氏。

大清高宗法天隆運至誠先覺體元立極敷文奮武孝慈神聖純皇帝實錄卷之六百四十六

大清高宗法天隆運至誠先覺體元立極敷文奮武孝慈神聖純皇帝實錄卷之六百四十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處總理事務處

太僕寺卿理藩院事務黃旗滿洲都統世襲騎都尉軍功七級隨帶加一級尋常加二級軍功紀錄五次建柱

總裁官經筵講官太子太傅文華殿大學士前閤領閣事稽察欽奉 上諭事務處管理刑部戶部庫事務

世襲騎都尉軍功加十九級隨帶加二級又加二級重誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等

敕修

乾隆二十六年辛巳十月辛巳月食 葉爾

美辦事都統新柱等奏辦理鼓鑄以錢五十

文為一騰格除兌給三城回人仍存三萬六

千餘騰格查回人兌支普爾錢文近將七十

之數增加三十頗累貧戶請嗣後以盡收普

爾錢文為止不必勒限報聞 豁江蘇常熟

昭文二縣乾隆二十年築塘占廢田地民欠

銀一千九百兩有奇米豆五十六百石有奇

○壬午軍機大臣等議奏盛京刑部侍郎朝

銓密奏所屬員外郎各員等因查京察年分

令各堂官密奏者專指六部而言至盛京各

部司員無多非六部可比提督衙門太僕寺

員外本少內務府司員俱色衣官職翰詹衙

門係翰林承辦事件嗣後均著無庸密奏其

內閣宗人府六部都察院理藩院仍照原議

令各堂官密奏從之○吏部奏據總管內務

府咨稱調任安徽巡撫常鈞奏主事寅保之

子唐釗逃走請旨治罪得旨唐釗係色衣下

人乃敢屢次潛逃在外妄行甘墮招搖撞騙

惡習情屬可惡著銷去旗檔發往伊犁賞給

種地回人為奴該管大臣嚴行管束如再不

安分即行奏明正法 癸未禮部議覆山西

學政邵樹本奏稱附生幫補廩增例由府州

縣轉詳第各衙門並無冊籍據文申轉無由

覈其當否請嗣後補廩由本學徑詳學臣覈

冊批學准補仍將姓名日期行該府州縣註

冊具批准補增專令學臣行學無庸轉行再

生員歲科試卷向皆註明廩增附等字恐因

成見遷就嗣後卷面祇註府州縣學及所習
經廩增附等字概除均應如所請從之○廣
東巡撫託恩多疏報乾隆二十五年分開墾
廣州府屬額內荒蕪稅一項三十畝有奇廣
潮肇高雷嘉六府州屬額外荒蕪稅七十項
四十五畝有奇○甲申

上詣暢春園問

皇太后安○幸圓明園 乙酉諭豫省本年漕
糧前已降旨加恩分別蠲緩該省尚有應解

交內務府麥一萬石該撫胡寶瑤摺奏請於
未經被水州縣應完粟米內改徵運解但念
通省漕運俱停何必為此一項仍復行輓輸
著一體並停運解所有內務府明年應需麥
石暫令自行採買應用該部遵諭速行○諭
軍機大臣等據劉統勲等奏楊橋漫工因東
風倒吹衝刷無力漫口溜漸湍急勢需多費
工力等語口門愈小則水勢愈急若兩頭相
對直接合龍則正溜湍急下埽自屬更難或

量避急衝用參差襟抱之勢俾水流曲折稍
緩既易於掛淤而中間夾空隨勢堵斷將來
亦不過添埽填鑲庶為妥便著傳諭劉統勲
等如此時原可計日竣事則已否則竟用通
變之法行之可將朕所指硃筆片一併寄看
○兩江總督尹繼善覆奏本年黃河盛漲隄
工多有汕刷又七月間異常風暴堰盱高寶
臨湖磚石等工掣卸甚多河臣高晉蒞任未
久遇各處險急且聞豫省漫口被災甚廣將
黃運湖河各工親勘請修為善後之計因不
詳加斟酌將急工而列為善後復將緩工而
併入急修致需費四十餘萬之多臣兩奉訓
旨細心體察除黃河工程俟另行籌辦惟堰
盱糧河四廳風暴案內實在應修之工有今
冬須先辦料俟明春興工者有今冬亟須趕
辦者而四廳只有搶修並無歲修向來磚石
等工俱係另案請帑茲將工段逐一確覈共
需銀二十三萬餘兩覈之高晉原奏已減十

七萬餘兩並無虛浮得旨高晉且不能回南
即照所議速行又諭軍機大臣等據尹繼善
覆奏高晉籌辦黃運湖河估需工程銀兩一
指已於摺內批諭所稱現在緊要工程共需
銀二十三萬餘兩著即照所請覈實妥辦如
現在該處所存公項足敷即行動用倘有不
敷著速奏再由部動撥可也尋奏河庫無項
可支請於江安蘇松二糧道庫項照數撥解
得旨著照所請速行○廣東巡撫託恩多疏
報乾隆二十五年分墾復廣潮肇雷廉五府
屬額內遷移稅五十二頃四十九畝有奇廣
肇二府屬屯田遷移稅三十畝有奇廣潮肇
連嘉五府州屬額外水田及沙坦稅一百三
十四頃五十五畝有奇○增給河東本年續
增餘引七萬道從鹽政薩哈岱請也○丙戌
調河南按察使蔣嘉年為陝西按察使以原
任廣西按察使梁翥鴻為河南按察使 丁
亥

上詣暢春園問

皇太后安○還宮○諭曰胡寶瑤奏閩鄉縣草
役馬現龍因搶奪賈世錫銀兩不服縣差拘
訊糾約劉建業等持械拒捕傷死差役數人
該縣知縣李鏊聞信即親往將首犯拏獲其
聞風逃散之要犯劉建業等經潼關同知李
豫拏獲解閩等語馬現龍以草役白晝搶奪
復敢號召兇夥拒殺官差不法已極知縣李
鏊即日親往擒獲首犯甚屬勇往同知李豫
奉檄速緝四犯不致遠颺亦屬可嘉著各該
撫出具考語送部引見地方遇有聚眾抗官
重大之案為有司者果能奮勉緝治不獨讞
牘可以無羈且法立知懲眾皆知所炯戒所
全不少從來養奸誨盜皆闖冗選輓之吏實
釀成之朕時加留心整頓該撫胡寶瑤能體
朕意是以此案辦理迅速如此俟審奏定擬
外先將此諭眾知之○諭軍機大臣等胡寶
瑤奏查拏閩鄉縣聚眾拒捕一案旬日之間

將首從各正犯先後弋獲甚屬迅速可嘉其該縣知縣李鏌及潼關廳同知李豫俱能勇往緝拏已有旨諭部調取來京引見矣此案馬現龍以革退捕役輒敢糾約匪黨持械拒捕傷至多人不法已極自應盡法處治至該處地居山僻界連山陝村民等竟為馬現龍嚇逼以致附和脅從其為民風刁悍不問可知若不嚴行懲究無以儆克頑而靖惡俗當國家法度清明之時朕留心整頓該撫又能深體此意惡匪自無從漏網設任地方庸劣有司一切姑息即可釀成事端所謂涓涓不息流為江河彼前明李自成等獨非裁汰驛卒乎此所關於風俗人心者甚大著傳諭胡寶琮將案內從犯逐一嚴究從重辦理共局外旁觀者原自無從株累若跡涉附和之輩其人本非安分即多處數人大示懲戒亦不必畧為瞻顧其馬現龍家屬並著盡法重處總之懲治此種兇徒斷不可稍存姑息之見

也○又諭曰成衮扎布奏車木楚克扎布等呈稱俄羅斯鏗格爾圖喇瑪玉爾等伊奉吉納爾衙門來文將瑪哈沁色布騰等一百餘人及軍器馬匹等物全行送出等語車木楚克扎布等駐兵鄂林候俄羅斯信息曾經降旨訓飭今俄羅斯既行送出即已竣事色布騰雖係俄羅斯遵約呈獻非伊等擒獲但遠道追捕亦與有勞績車木楚克扎布莽古賚著加恩賞緞四端杜爾伯特貝勒巴桑烏梁海散秩大臣圖布慎領兵追捕喀爾喀協理台吉恭格向俄羅斯索取頗屬出力俱著賞緞三端此次派出官兵及杜爾伯特烏梁海等官兵仍酌量賞賜以示鼓勵色布騰著嚴行押解來京○兵部議覆臣部右侍郎張映辰奏稱內場點名冊例於入場後書吏請外場監箭原冊照寫殊不慎密應如所請令照臣部司員記箭冊繕寫同試卷送入其監箭原冊不准給看至分東西坐號時止令監試

提調等官密拆親印卷面封固俟受卷彌封後始拆閱分別雙單好及合式字樣交入內簾從之○賑長蘆屬滄州南皮鹽山青縣衡水海豐等七州縣嚴鎮海豐蘆臺豐富國興國濟民等七場被災貧竈○戊子諭軍機大臣等陳宏謀覆奏乾隆二十五年分許壑關徵收稅額盈餘短少一摺稱該年各處豐收商販無利以致米麥豆貨等船稀少等語該關為南北商船流通總匯之區乃歲歉既易致短少而歲豐又以商販無利過船稀少為辭然則必如何始當足額耶向來比較總視雍正十三年為準著傳諭尹繼善令其密提該關雍正十三年親填底簿查明是年所過米麥豆雜貨船隻數目實在若干即速據實奏聞毋任關員稍有含混尋奏飭員密提該關印簿年遠無存覈對底冊實較雍正十三年徵額短絀訪因過船稀少並無徵多報少情弊報聞○又諭豫省堵築楊橋漫工已

將就緒可以指日合龍現有劉統勳等在彼督率經理無需多人協辦高晉所管南河如高郵甘泉等曾被風暴之處現有應行相度辦理工程且南巡在即差務亦應料理著傳諭高晉令其即回南河總河之任不必留駐豫省○又諭前據多爾濟奏請將從前羅布藏丹津游牧之洮賚郭勒等處給與青海扎薩克等游牧經理藩院議駁此等游牧係羅布藏丹津舊地伊逃叛之後久經入官不應再給扎薩克等但念此時新疆展拓非舊日之比即酌給伊等游牧亦無不可惟是洮賚郭勒等處是否牧放官馬抑係向來閒曠之地無妨撥給著傳諭楊應琚令其籌度如尚可查給該扎薩克等即應酌辦不必過於拘泥俟奏到再降諭旨○刑部議覆調任江西巡撫胡寶瑤奏稱江省農民涉訟多在農忙即為農工而起遇有灌陰啟閉及界址等事不急為斷理轉妨耕作應如所奏令該州縣

隨准隨勘即赴該處審斷無庸票拘至城俾免羈候並令直省督撫一體辦理從之○已丑諭今歲恭逢

聖母皇太后七旬大慶在籍老臣進京稱祝雖出誼分情願第念年齒既高之人即筋力未衰而林下優游日久非夙夜在公者比朕視事甚早日以為常耆耋懸車者每晨待漏奏名節令屈寒殊非朕優老引年之意可傳諭諸臣令其間數日一至宮門俾得從容頤養以示體恤○又諭曰熊學鵬奏湖南湘鄉縣人鄧廷賢等冒充零陵縣差役私刻印票在廣西興安縣各鄉需索知縣張家熹盤獲各犯究出輾轉經過武岡州城步綏寧等縣掛號各情一摺熊學鵬辦理甚是粵西壤接湖南為苗疆重地匪徒滋事最為地方之害尤當加意整頓此案冒差假票之犯雖發自廣西而首從多係楚人歷經楚省州縣沿途掛號所過地方有司所司何事馮鈐並未查奏

該撫身任封疆亦豈毫無聞見耶著傳諭該撫令將該犯所經各州縣是否尚有此等刁徒潛蹤漏網及牧令等因何漫無知覺緣由一併據實覆奏○諭軍機大臣等前劉統勲等奏楊橋漫口合龍約在本月二十日嗣因東風溜緊需費工力覈計二十五日以前必可合龍俟擬定日期即行飛奏等語當即降旨并將指出硃片寄示刻下又已逾時約計合龍之期未見奏到深為廛念著傳諭劉統勲兆惠等速將近日工程情形如何究係何日必可合龍及應否需用所指通變辦理之法即行據實具奏○又諭曰馮鈐奏該省加卯鼓鑄錢文充裕請酌分於衡州常德二府暨長沙府屬之湘潭縣設局易換每錢一串易銀一兩一錢六分一摺錢文既多錢價自平民用實為便利但前此加卯原為興修城垣而設今既減價其於成本有無虧缺或尚有餘利足敷城垣工程之用與否且現今市

值較乾隆十一年漸減。通覈鼓鑄成本餘息。尚有若干。該撫現籌分發別屬易價。該處錢法諒已流通。或將湖南所有餘錢。就便從糧艘搭運至京。是否尚可平減市價。以資利用。亦裒多益寡之一法。著傳諭馮鈐。令其詳悉酌籌。一併具奏。若不能行。不必勉強。尋奏楚南地屬苗疆。原估應修城垣。再遲卅額愈甚。如以鼓鑄餘息。合銅價砂稅。修益陽等十八處城工。足資興築。若將餘錢全數運京。既多耗費。而餘息較少。工竣需期。應留本省出易。充修城之用。得旨允行。○工部左侍郎范時紀奏。臣部掌印人員。例與各員一體派辦。工程該員為一司主持。若派差務。轉難留心。稿案請嗣後祇派散走司員。其四司兩庫掌印人員。應停派。遇保題處。先儘保送。又前經陞任尚書秦蕙田奏。准司員到任。未及一年。不_入差委。此等扣除人員。豈一年外差務即能熟諳。嗣後除緊要大工。不派其滿郎中員外。

一百兩以內。主事五十兩以內。筆帖式三十兩以內。如查估驗收各工。准籤派得旨允行。○卹賞廣東巡港遭風被淹兵丁陳文友。梁美。方得煥。何捷。榮龔。時達等如例。○庚寅。諭兵部奏。高晉保列一等之副將陳蔡鰲。該督尹繼善。又稱其不勝總兵之任。彼此互異。而高晉於咨送陳蔡鰲五年期滿時。不將是否堪勝總兵之處聲明。自屬不合。已有旨令其將因何不行聲敘緣由。明白回奏矣。至保列一等之員。而尹繼善稱為不勝總兵。原自並行不悖。蓋該員即不勝總兵。而在副將中原。可保列一等。初非一等之副將。必當勝總兵之任也。是尹繼善辦理原無不協。亦無與高晉互異之處。該部未免誤會。前旨著將此通諭各省督撫知之。○諭軍機大臣等。成衮扎布等奏。瑪哈沁色布騰等供稱。上年在齋爾地方見一

起瑪哈沁蹤跡沿途住宿約安六竈向西行走或藏匿額林哈畢爾噶山僻之處亦未可定已知會駐劄烏魯木齊大臣等語著傳諭阿桂等俄羅斯已將色布騰送出無庸搜捕可於回兵便道將色布騰所供賊人留意查拏如不能弋獲即回伊犁辦事前據阿桂奏已抵額爾齊斯其如何搜捕瑪哈沁之處一併奏聞○御史毛永燮奏直屬撥米充裕賑卹外應兼平糶向例地方官於赴糶者限以升斗祇許零糶乃狡獪行戶誘無賴窮民給零值令糶糶得仍入行舖以圖倍利且有串通經手胥役朦混官司者請勅直隸督臣飭地方官於平糶時查有行戶影射收買者照例治罪胥吏串通并嚴懲得旨著照所請速行○賑浙江仁和歸安烏程長興德清武康會稽諸暨餘姚上虞等十縣湖州一所仁和曹娥金山下砂頭二三等五場被災貧民軍竈○辛卯

上御乾清門聽政○策試天下中式武舉於太和殿前○諭本日引見理藩院官員內有四人不但清語生疎甚至有不能者伊等皆滿洲官所辦又係滿洲事務不諳清語何以辦事看來別部院官員似此者必多清語乃旗人本務豈容荒廢從前各部院官員稟事登答皆以清語今則不知所重甚屬非是著諭各該堂官於屬員中平日留心試看清語熟習者加以策勵生疎者加以訓誡屆明年京察時辦事妥協之員必兼清語熟習者方許保列一等否則辦事即妥亦不許保舉倘視為具文至京察引見時經朕詰問有不能者惟該堂官是問又諭據巴爾品齊凌扎布奏雲騎尉烏爾津扎布等本年解送木蘭羊隻沿途私賣一摺前因齊凌扎布在軍前効力且係蒙古是以授為總管牧羣事務是其專責該委員擅賣羊隻皆由平時管束疎懈殊不稱職著來京仍在散秩大臣上行走所遺

員缺著奇成額補授巴爾品仍著兼理○諭軍機大臣等御史毛永燮奏請嚴行戶冒糴之禁一摺已照所請速行矣今秋直隸附近各屬先後截漕四十萬石以資賑糶第恐地方狡獪行戶影射誘買聚少成多希圖重利此種弊端總在有司實力稽查嚴拏究治小民庶得均霑實惠著傳諭方觀承令其飭屬悉心查辦不得但委之胥役人等以致奸牙從中滋弊有妨善政○又諭據楊應琚奏安西提督劉順腿疾增劇氣血漸衰等語劉順係明年輪派駐兵巴里坤之員今現在有疾辦理安西事務且難支持豈復能前往巴里坤駐劄該督祇籌及量派大員協辦本任而於移駐一節尚未通盤計算著傳諭楊應琚將明年派往駐兵大員或於附近提督內如閔相師等悉心酌議一員具奏到日再降諭旨○戶部等部議覆閩浙總督楊廷璋奏臺民搬眷期滿酌定防範各條一船主澳甲治

罪宜嚴也查偷渡出洋由廈門大擔口正路者多船主舵工頂冒水手招無照之人私往其由青浩栢榔等嶼小路者係客頭先於海澄龍溪等縣招集小船由石碼潛出廈門搭載大船請嗣後遇拏獲攬載船隻將各船戶照客頭色攬過臺例為首者發邊衛充軍為從者杖一百徒三年并究原保澳甲及開張歇寓者一體枷杖一夫察偷渡處分宜定也查臺屬淡水廳及臺鳳諸彰四縣所轄各小港均進臺捷徑嗣後如獲犯即究出入口岸將失察之該管文武員弁照議處本籍地方官例覈數查叅一獲犯賞例宜優也原議在洋獲犯十人以上賞銀二兩嗣後請加為四兩每十名以上照數遞加若尚未出洋別汛兵目澳甲盤獲者減半賞均應如所奏辦理其現在過臺戶口該督即飭地方官編入保甲安插管束仍將期滿停搬緣由曉示禁絕私渡從之○陝甘總督楊應琚奏報高臺縣

毛目等處勸墾水田五千二百畝有奇○又奏報肅州安西高臺等處先後募民三百戶送往烏嚕木齊屯田報聞○以翰林院侍讀學士張若澄為內閣學士兼禮部侍郎○士辰

上御紫光閣閱中式武舉騎射○諭今年恭逢聖母皇太后七旬大慶在籍諸臣來京叩祝具見惻忱獻歲之初朕恭奉

安輿時巡南服諸臣甫及旋里復當出境迎鑾

僕僕道途於林下高年諸多未便可諭諸臣今冬曾經赴闕者明春無庸越省候接在兩浙者不必至江南在江南者不必至東省如沈德潛即於蘇州錢陳羣即於嘉興餘均視此為例副朕體恤至意○諭軍機大臣等裘曰修查勘豫省河渠災賑事宜已將次就竣此後應辦之事儘可交與胡寶瑤妥協經理且聞伊子裘麟病故伊母年高未免轉增倚問之望著傳諭裘曰修令其即行回京任事

可也○又諭曰鐘音奏陝省本年歲事有收

益藏充裕請於附近渭河州縣撥米麥二十萬石運至陝州以資豫省加賑一摺河南秋水盛漲工賑所需不無有資隣省前鄂弼奏請撥糧協濟已令酌量舉行至陝西距開封較遠現在截漕撥運亦經屢為儲備著傳諭劉統勳等就河南情形悉心量度如無需用則已倘該處尚待濟用一面咨會鐘音兩省妥協派員經理接運仍一面具摺奏聞并將此諭令鐘音知之尋會奏豫省截漕撥運備明年糴借已屬寬餘又經侍郎裘曰修奏採辦光州等處米麥足資濟用無庸陝省接運報聞○禮部奏冬至慶賀禮儀得旨奉

皇太后懿旨今年冬至著停止行禮○癸巳

上御紫光閣閱中式武舉技勇○諭軍機大臣等方觀承奏安肅縣查出創濩案内解陝流犯劉祥即杜三畏係撫寧縣人杜明頂替現將該犯解回吉林將軍衙門嚴究等語該犯

杜明雖自供代姪認解其人既係匪流焉知現在所供其中更無捏飾規避情事未可遽以為信已傳諭恒祿令其嚴行審究但由直隸解回吉林道里甚長此等狡獪之徒中途尤不可不嚴為防範著方觀承專派妥員沿途加意押解倘致疎脫責有攸歸將此傳諭知之○戶部議覆江蘇巡撫陳宏謀疏稱銅山睢寧二縣本年猝被水災請先賑貧民一月其餘高郵甘泉揚州三州縣衛較重山陽桃源清河安東寶應泰州沛縣等七州縣次重及稍輕之鹽城江都興化豐縣蕭縣碭山宿遷海州沐陽淮安大河徐州等十八州縣衛均無庸賑卹祇須酌借籽種統俟來春各借一月口糧屯衛災軍隨坐落州縣查辦再長洲常熟昭文崑山新陽華亭婁縣青浦太倉并衛鎮洋蘇州鎮海鎮江等十四州縣衛災分較重上海南匯金壇溧陽嘉定寶山金山幫等七縣幫次之係一隅偏災均可無庸

賑給惟應將災田應徵糧項銀米按分蠲免又被災稍輕之本年漕項銀米緩至明年麥後啟徵又勘不成災田地二十七年漕糧及節年舊欠均緩至明年秋冬徵還應如所請辦理得旨依議高郵等州縣本年災田應徵漕糧漕項銀米蠲剩銀米并被災稍輕之鹽城等州縣衛及淮揚徐海等屬勘不成災田地二十七年漕糧應徵節年舊欠災緩漕糧等項俱著照該撫所請速行○又議覆安徽巡撫託庸疏稱壽州鳳陽并衛懷遠靈璧鳳臺阜陽潁上亳州太和泗州并衛盱眙天長五河長淮等十六州縣衛本年水災請將新舊錢糧節年民借籽種及供支牛草各項暫停徵靈璧縣耿工墊卸猝衝先賑一月口糧應如所題其懷靈等屬節欠漕項漕糧係災田帶徵之款請俟明年秋成照限分年徵運得旨依議懷靈等屬未完節年舊欠漕項漕糧著照該撫所請速行賑湖南武陵龍陽

安鄉三縣本年水災貧民並分別蠲緩額賦

○甲午

上詣

奉先殿

壽皇殿行禮○御紫光閣覆閱中式武舉騎射

○諭軍機大臣等據劉統勲等奏楊橋漫工現在水勢平緩口門相距無多定於十一月初一日辰刻合龍等語看來該處堵口工程已可剋期告竣合龍後大溜順軌即無需欽

軍機大臣等

三

差在彼督辦著傳諭劉統勲兆惠將一應加築穩固事宜交與張師載胡寶瑒妥協經理劉統勲等即於初三日一面具摺奏聞一面起程回京可也○是月欽差侍郎裘曰修奏查勘鄭州蒙澤河陰皆係偏災汜水偃師因汜洛河流灌入縣城房屋多有坍塌四鄉多高山地畝間段有收居民避水至隣境者聞賑來歸均令該縣查明并入賑冊至此等異漲非因水道阻塞且兩邊灘坡已寬不宜另

築隄埝致束急生潰得旨甚是甚通之見覽

奏可嘉之外無可訾諭○直隸總督方觀承

奏直省議裁名糧現未扣足如遽停各營生

息不敷賞需請俟來年停得旨如所議行○

又奏各屬災廣糧貴請暫停捐義穀得旨甚

是○兩江總督尹繼善覆奏洪湖水勢較前

漸消若因現在五壩斷流遽為收束恐水復

漲清口宣洩不及現於東西二隄口門留寬

四十五丈俾資暢洩得旨甚是○湖南巡撫

軍機大臣等

三

馮鈐奏各營盈甲年久虧損請動鼓鑄息銀製造得旨如所議行○河東河道總督張師載等奏抵曹縣勘十四堡經漫溢後南岸淤灘愈高逼溜北注應於南岸坐灣之劉家莊地方安立河頭挑引河一道由埤口南直入大河使十四堡一帶隄埝化險為平得旨所奏甚當○陝甘總督楊應琚奏哈密防所額馬千匹除撥應差屯耕尚餘三百餘匹請交哈密協牧放備各項供支得旨如所議行

雲貴總督吳達善奏滇省局錢積五萬六千餘串請自壬午年為始加錢二成搭放兵餉得旨如所議行○貴州巡撫周人驥奏黔省近年多種棉苧仁懷廳等處魚放山蠶結繭數萬試織繭紬各屬倣行漸知機杼得旨嘉獎

實錄卷六四十七

三五

大清高宗法天隆運至誠先覺體元立極敷文奮武孝慈神聖純皇帝實錄卷之六百四十七

大清高宗法天隆運至誠先覺體元立極敷文奮武孝慈神聖純皇帝實錄卷之六百四十八

監修總纂官是議官太子太傅文淵閣大學士文淵閣領事領侍衛內大臣稽察欽奉上諭事件處管理
吏部理藩院事務正黃旗滿洲副都統世襲騎都尉軍功七級誥贈加級奉直大夫直隸按察使臣
恩毅官理是議官太子太傅文華殿大學士文淵閣領事稽察欽奉上諭事件處管理刑部
世襲騎都尉軍功加七級誥贈帶加二級又加二級臣董誥內大臣戶部尚書領侍衛內大臣稽察欽
奏常紀錄十四次臣德瑛經筵講官太子少保都察院御史臣曹振鏞等奉
敕修

乾隆二十六年辛巳十一月乙未朔

上御太和殿傳臚賜中式武舉一甲段飛龍李銓楊培樞三人武進士及第二甲余大進等五人武進士出身三甲趙廷魁等五十二人同武進士出身諭軍機大臣等原任副都統伊靈阿前因獲罪革職發往阿克蘇効力今據永貴等奏伊諳悉回部事宜請派往巴爾楚克管轄駐劄兵丁著加恩授為藍翎侍衛丙申戶部左侍郎吉慶緣事革職調刑部左侍郎安泰為戶部右侍郎以署刑部左

侍郎阿永阿為刑部右侍郎（以湖北荊州右翼蒙古協領旺保為荊州右翼副都統）加賑直隸固安永清東安武清文安大城霸州保定冀州衡水武邑開州長垣東明景州清河蠡縣東光滄州南宮新河隆平寧晉深州武強天津寶坻薊州寧河清苑新城博野望都祁州雄縣安州高陽新安河間獻縣肅寧任邱交河青縣靜海南皮鹽山慶雲平鄉廣宗鉅鹿唐山任縣永年邯鄲成安曲周廣平雞澤威縣磁州元城大名南樂清豐蔚州豐潤玉田定州等六十九州縣被災貧民屯竈並緩各屬已未成災本年應徵錢糧及節年舊欠○豁除湖北監利縣築隄挖壓田地二十七頃三十八畝有奇額賦○丁酉

上詣暢春園問

皇太后安○幸圓明園○諭軍機大臣等明德奏學政鍾蘭枝於成縣小川子地方檢得逆書一紙現委按察使文綏前往根究一摺甚

屬非是地方遇有此等悖逆亂民人人皆當髮指況明德身為巡撫既經學臣移咨應即親往速緝逆犯方可及早伏辜試問臬司與撫臣聲勢孰輕孰重伊乃高居簡出視同尋常案件可乎向來外省督撫散亂習氣經朕屢行飭諭近日如胡寶瑤於親捕聚衆傷差之事殊為能於其職明德何得習懶若此鍾蘭枝奏到逆詞一紙著封寄該撫依筆跡行蹤嚴速根緝現在曾否就獲一面具摺奏聞倘再遲延不振以致逆犯遠颺則惟明德是問○以內務府護軍統領英廉為總管內務府大臣旌表守正捐軀之直隸唐山縣民段志學妻秦氏○戊戌諭軍機大臣等託庸奏蕪湖道沈世楓以該關乾隆二十五年短少盈餘銀一萬七千餘兩情願率同關書等照數完補一摺所奏尚未明晰盤查關稅惟以實在有無弊竇為重無弊者固不必責其分賠有弊者亦豈得僅以一賠了事在沈世

楓曾任藩司。屢經緣事議降。復加恩錄用。養廉本屬寬裕。今自願認補。以贖前愆。尚情理所應有。至書吏何人。亦令籠統賠補。則所謂並無弊竇。轉不足深信矣。況此內沈世楓自賠若干。關書分賠若干。又並未分晰聲敘。著將託庸摺鈔寄尹繼善。令其詳悉確查果否。別無他故。即係實情。亦應據實分晰。將該道賠項存留。其出自書吏者。均行發還。以存政體。仍將查辦緣由。即速具奏。并諭託庸知之。

尋奏調詢該道。據稱蕪關本年木植較少。致絀盈餘。應捐補贖。愆別無他故。遵將該道自賠銀一萬兩貯庫。其關書所繳。俱發還得旨。是。吏部議覆御史王啟緒奏稱。例內生監捐免保舉。始准加捐京外正印官。捐貢無異生監。向與恩拔等貢同列正途。並不捐免保舉。殊不畫一等語。應請於豫工例內。凡捐貢加捐京外正印者。一體捐免保舉。其捐分部分發及前經得缺。離任赴補者。均令捐免保

舉。始准選補。不願加捐者。停選正印。以佐貳改補。並嗣後現任人員內之捐貢出身。俟捐免保舉後。准陞正印。現任道府尤不便未經保舉。即膺方面。應令補捐。再監生捐貢銀數較多。應視監生酌減從之。又議覆陝甘總督楊應琚等奏。稱商州屬龍駒寨距城百里。水路直通襄陽。五方錯處。需員彈壓。查興安州州同與知州吏目同城。無專司事件。應裁添商州州同一員。分駐龍駒寨。又興平縣屬店張鎮省西孔道。節次過兵旅客。就此住歇。稽察維艱。該縣係專衝簡缺。請將該縣丞移駐店張鎮。遇有竊盜等事。令該州同縣丞就近管理。龍駒寨州同衙署將興安州州同舊署估變。建造店張鎮驛丞舊署。作為縣丞衙署。均應如所請。該二缺定為要缺。註冊缺出。該督等在外揀調從之。己亥。

上詣暢春園問

皇太后安。還宮。諭據劉統勳兆惠等奏。楊

橋漫工於十一月初一日巳時合龍是日天氣晴朗風恬浪靜大溜迴旋順軌目覩麻徵倍欽

神佑請建立

河神專祠以昭靈貺等語楊橋漫水奪溜工程重大朕特派大臣前往督同堵築今大工告竣為期迅速固由在工諸臣奮勉集事而風日晴和安瀾順軌覽奏欣感允宜上答神佑永衛民生著照所請即於工所建立

河神專祠歲時祭享落成時該撫奏請御書扁額以展誠敬大學士劉統勳協辦大學士公兆惠河道總督高晉張師載巡撫胡寶瑤董率有方刻期竣事俱著交部議敘侍郎裘曰修往來查勘通省各工亦屬勤勞並著交部議敘所有在工文武各員弁俱著查明交部一體議敘以示鼓勵尋

御書扁曰肇佑金隄○庚子諭軍機大臣等沈德潛來京進所選國朝詩別裁集求為題

辭披閱卷首即冠以錢謙益伊在前明曾任大僚復仕國朝人品尚何足論即以詩言任其還之明末可耳何得引為開代詩人之首又如慎郡王以親藩貴介乃直書其名至為非體更有錢名世在雍正年間獲罪名教亦行入選甚至所選詩人中其名兩字俱與朕名同音者雖另易他字豈臣子之誼所安且其間小傳評註俱多紕謬沈德潛身既老憤而其子弟及依草附木之人慙思為此斷不可為學詩者訓朕顧可輕弁一辭乎已命內廷翰林逐一檢刪為之別白正定矣至朕自來加恩於沈德潛者特因其暮年晚遇人亦謹愿無他是以令其在家食俸加晉頭銜以示優恤然莊有恭前任蘇撫時曾奏及伊子不知安分時為規戒俾不至多事累及伊父此正莊有恭存心公正所以保全沈德潛者不少現在詩選刻已數年陳宏謀則近屬同城尹繼善雖駐江寧亦斷無不行送閱者使

能留心如莊有恭據理規正不但此集早知檢點即其子弟等羣知約束安靜居鄉其所裨於沈德潛者豈淺鮮耶陳宏謀無足論而尹繼善佯為不知之錮習雖朕屢經諄諭尚執而不化耳著將此傳諭尹繼善陳宏謀令其知所省改○兵部奏請補放直隸石塘路都司得旨直隸石塘路都司員缺著七十布補授其原得之翎係因軍前出力獎賞非循例戴翎者可比著仍准其戴用嗣後俱以此為例○河東鹽政薩哈岱奏鹽池地窪全恃姚暹渠為宣洩近因渠身日高今秋水漲漫開南北隄堰請乘水涸時亟動項疏濬使東來水達五姓湖趨入黃河免致衝決又禁牆內黑河實產鹽之本年久淺溢旱滯堪虞應俟來歲興工挑挖又涑水河迤西虞鄉縣之邱家營曾家營等村北高南下倘涑水泛漲南趨浸灌各村姚渠衝決鹽池保護益難請咨撫臣飭河東道令該州縣查勘涑河同時

挑濬又五姓湖西口自漢時橋經孟明閘頭等橋達黃河湖為衆水所匯倘不疏通下游恐逆行為患應并咨撫臣飭永濟虞鄉等縣會勘舊址一律開通又虞鄉縣所轄之營平樊橋等處為姚渠尾閘最易淤塞去運城寫遠偶遇水發運同一員搶救莫及應移會撫臣飭該縣防護至河東各工例屆三年輪修殊多耽誤請嗣後逐年秋冬地方官擇淤淺處所傳兩堰居民給半價挑濬照搶修例報部得旨允行○緩福建淡防廳屬拳頭母山乾隆十九二十二十一年未完應徵供粟二千五百石有奇○建四川會理州屬披砂地方土堡城樓外委衙署從總督開泰請也○辛丑軍機大臣等議奏各省將軍都統副都統均非冗員應照舊設立惟歸化城土默特每翼原設都統一員副都統二員應裁都統一員綏遠城原設將軍一員副都統二員右衛副都統二員應各裁副都統一員察哈

爾新設都統請駐劉張家口即令轄該處弁兵無庸京城八旗都統兼管其副都統二員就左右翼游牧邊界駐劄應得之項照綏遠城將軍副都統例辦給並請鑄給鎮守察哈爾地方都統管理察哈爾左右翼四旗副都統等印得旨依議歸化城都統舒明綏遠城副都統七十右衛副都統素玉等缺著照所請裁汰改設之西安副都統常清陳世泰二缺俱著裁青州將軍一缺轄兵無多并著裁所有察哈爾都統緊要著嵩椿調補所遺西安將軍員缺著如松調補所遺綏遠城將軍員缺著舒明補授豐安未到之前舒明仍署歸化城都統事務七十常清俱著調補察哈爾副都統素玉著調補青州副都統青州將軍額爾德蒙額副都統萬福西安副都統陳世泰俱著來京另補應得之項照右衛辦給著為例○又議覆理藩院尚書富德等奏稱此次派察哈爾兵及新舊厄魯特等効力新

疆挈眷前往非換班兵可比應如所奏派察哈爾總管副總管等官護送所需整裝等銀照派出索倫兵例量加支給並於達里剛愛商都達布遜諾爾牧羣內抽撥馬匹應給駝隻行文西林郭勒盟長等揀送從之○吏部等部議覆江蘇巡撫陳宏謀等疏稱金山縣泖橋司巡檢移駐金山縣城請改為金山縣金華巡檢司並給印記令管海塘巡緝諸務攢典一名弓兵四十五名照舊存留又金山縣縣丞裁改寶山縣縣丞駐劄寶山所城居民甚少且有把總駐劄該城東南有高橋鎮烟戶繁多應將縣丞改駐其與鎮一橋相通之上海縣屬二十二堡離城寫遠并令就近兼理寶山縣江東一帶海塘及所城礮臺墩房俱責成防護並鑄給寶山縣分防高橋鎮縣丞鈐記再該縣丞原由金山縣縣丞改駐照額募用吏役仍於顧運司改歸七浦司二十四名弓兵內撥二名歸縣丞差遣又寶山

縣顧逕司巡檢改為太倉州七浦司巡檢請給印記該鎮為海口要隘凡船隻出入隨時查察仍聽太倉州州同督率其七浦閘座啟閉該巡檢董率閘夫經理均應如所請從之○欽差侍郎裘曰修河南巡撫胡寶瑤覆奏豫省有漕之祥符等四十三州縣災形更重請將十分九分者全蠲八分七分者免十之六六分五分者免十之三其應徵分數作三年帶徵至成災州縣內有地畝未經被水與災地毗連者均俟次年麥後徵收下部議○壬寅諭軍機大臣等據楊應琚奏甘肅提督閔相師巡閱營伍於十月十一日回甘調理等語前因劉順調養未愈業經降旨令該督豫為計算明歲移駐巴里坤之員或於閔相師等酌議一員具奏今閔相師調理又需時日著再傳諭楊應琚不知閔相師至期能去與否若不能可將總兵內酌議一員具奏令其前往移駐○吏部等部議覆浙江巡撫莊

有恭疏稱青田縣縣丞改駐龍泉縣安仁莊請嗣後竊賊賭博保甲事宜責成該縣丞查辦移縣審理並鑄給龍泉縣駐劄安仁莊縣丞鈐記其員缺定為在外調補均應如所請從之○蠲緩河南封邱縣本年水災官莊地十八頃有奇額賦○癸卯蠲山西陽曲苛嵐嵐縣臨縣石樓應州大同懷仁山陰靈邱陽高朔州馬邑平魯寧武五寨靜樂代州崞縣保德河曲臨汾襄陵洪洞太平曲沃翼城汾西解州安邑夏縣平陸芮城絳州稷山河津聞喜絳縣等三十八州縣并大同管糧豐鎮大同左等十四廳團操乾隆二十四年水災蠲免隨徵耗銀○甲辰遣官祭先醫之神○諭今歲豫省楊橋等處大工所有下橋進埽及看守工料各兵夫雖經大學士劉統勲等量加犒獎但念伊等晝夜供役甚屬勞力現已合龍工程迅速著該督撫等查明再為酌量賞賚以示鼓勵○江蘇巡撫

陳宏謀奏據布政使安寧詳稱江省錢糧積年未能歸款緣州縣案卷任書承攜貯私室致殘缺無查應嚴飭各州縣將卷宗粘連蓋印存署報司查考仍造入交代冊咨部至江省用款繁多州縣自不免借墊嗣後即令隨時詳請抵兌如過四個月不詳在百兩以上者叅處遲至一年照易結不結并府州題叅均應如所議得旨行 乙巳

上御乾清門聽政 諭前據侍郎兼管順天府

府尹事錢汝誠等奏稱恭逢

皇太后七旬萬壽普天同慶順屬紳士虔設經

壇共申頂祝等語今歲

聖母七袞大慶海宇臣民同登壽域歡騰遐邇

敬效嵩呼而京師首善之地近仰

慈暉抒忱彌切允宜特沛渥恩以光盛典所有

順天府屬恭與祝

釐各紳士等著照乾隆十六年之例休致候補候選及現在原有職銜者俱著各加一級革

職者復還原銜俾邀章服之榮用普福祥之

澤 諭軍機大臣等據明德奏到拏獲成縣

投遞逆書要犯王獻璧取名王寂元一摺此

等惡逆之徒不但編造歌謠肆行煽惑且膽

敢將逆書向學政投擲現在既訊供直認不

諱向來甘省民風尚稱淳樸似此逆徒妖言

倡惑於地方甚有關係非盡法懲治無以示

儆著傳諭明德即將該犯因何齎投緣由並

平日有無同惡黨羽及曾否招集何人之處

逐一詳細嚴鞫明確速將該犯正法庶足儆

愚頑而彰風教並諭楊應琚知之 丙午諭

據徐垣奏黔省新開南明河徒勞無益請查

勘停止此奏似屬公論但具奏於調任之後

其意乃在取巧向以藩臬陳奏多屬具文屢

經降旨申飭任兩司者宜無不明體朕意凡

遇地方政務督撫辦理未能悉協者所見既

確即當力為規正倘固執不從亦當自行奏

聞方為無忝厥職且今日之藩臬即將來之

督撫使一時依違附和而離任之後始以非其所屬乘間自明異同其情視緘默者相去有幾在督撫以調任糾叅屬員或可謂不避嫌怨在兩司以調任摺奏督撫之事得謂之不畏上官乎自以為巧適足見輕於朕耳此事已交該督查辦徐垣著傳旨申飭該部知道○諭軍機大臣等據徐垣奏黔省新開南明河徒勞無益請查勘停止一摺已有旨諭部前此周人驥奏請開河原為運鉛而設若仍不利舟行且於官民均有未便自不應復行迴護前說貽累地方但愛必達前任總督數年此事原委諒必深悉何以未行奏聞著將該處河道實在情形若何及該撫前後辦理有無意存迴護之處一併據實奏覆並著傳諭吳達善令其秉公確勘實在情形即行據實妥議具奏尋愛必達奏此河前經撫臣親往察閱果易開修會摺奏准隨委員辦理試運嗣臣赴楚過黔詢據撫臣稱河道現無

阻滯須歲修可久至黔省各處河道均一錢溪流今由新河運鉛實較川江為穩惟遠雇水手未悉路徑不免淺阻耽延得旨覽此語究屬迴護吳達善奏現自滇赴黔勘明另奏得旨周人驥辦事究竟如何據實奏來○丁未

聖祖仁皇帝忌辰遣官祭

景陵

上詣

奉先殿

壽皇殿行禮○諭戶部議覆豫省漕糧漕項分別蠲緩一摺自屬照例定議第念該省今秋被水較重閭閻生計未免拮据自難概拘成例所有祥符等四十三州縣漕糧漕項蠲緩分數著加恩准照侍郎裘曰修等所請行○諭軍機大臣等永貴奏稱回部伯克等往往戕削所屬其奸徒又喜造言生事搖惑衆心請遍行曉諭嗣後大小回人倘事有欺飾除

按情定罪外量其事體之輕重生計之貧富酌量罰取性隻什物歸公遇有廉謹之伯克頭目良善之回人加以獎賞等語化導回人遷善改過有犯必懲自屬應行之事若事有欺飾即定為罰項既非贖錢之義不過徒滋繁瑣耳且所罰性隻什物或辦理不善致有侵蝕反貽回人口實尤為非體總之辦理回衆事務宜因其性情風俗而利導之非可盡以內地之法治也即內地人等豈竟全無欺飾耶回人等果係奸惡自當明正典刑不止罰贖若欺飾之事安能保其必無惟應懲創者懲創之應約束者約束之如謂區區性隻什物遂可以賞善罰惡於政體人情均不可行著傳諭永貴知之○吏部議覆江西按察使石禮嘉奏稱佐雜人員自六品至未入流與督撫藩臬接見甚稀地廣人衆考察難周該管州府縣以素所親近過計典時曲從寬假應如所請嗣後各督撫於此等人員接算

前後俸滿六年者悉調驗甄別衰老者勒令休致才庸不勝任者斥革勤慎供職者准咨部留任其未及六年之員屆滿照例辦理如有貪劣怠玩者即不得拘年限始行糾劾至所稱其中有人材出衆堪膺保薦人員亦應如所奏該督撫出考送部引見歸卓異班以應陞缺陞用從之○戊申

上詣暢春園問

皇太后安○辛圓明園○諭曰原任侍郎錢陳

羣久歷卿貳兼直內廷年逾七旬學問優裕前以養病回籍有旨在家食俸用資頤養今來京慶祝召對之次見其神明不衰而居鄉素稱恪謹著加恩賞給尚書銜以昭優眷○己酉

上奉

皇太后還宮○

上還宮○諭朕恭奉

聖母皇太后御大安輦還宮所有奉

輦之校尉俱極恭敬整齊

慈體安豫朕心深為悅愉著加恩照乾隆十六年之例交該堂官查明賞賚○吏部議覆江西按察使石禮嘉奏州縣自理詞訟多拖延不結請按季叅處等語查未完案件例於每月底彙奏恐日久漸弛應再行各督撫飭該州縣務將每月循環號簿造送府州查覈並令巡道提驗如逾限不結移司詳報督撫咨叅仍勒限速結於下月冊內查銷該管道府不查催開叅督撫分別叅處從之

乾隆二十八年

三

大清高宗法天隆運至誠先覺體元立極敷文奮武孝慈神聖純皇帝實錄卷之六百四十八

乾隆二十八年

三

大清高宗法天隆運至誠先覺體元立極敷文奮武孝慈神聖純皇帝實錄卷之六百四十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務正黃旗滿洲都統世襲騎都尉軍功加七級隨帶加二級軍功紀錄一次

世襲騎都尉軍功加十九級隨帶加二級又加二級重慶內大臣戶部尚書領藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆二十六年辛巳十一月庚戌

上奉

皇太后幸壽安宮侍膳至癸丑皆如之 辛亥

諭曰孔昭煥嵇璜沈德潛錢陳羣俱著各賞

緞六疋程元章田懋齊召南莊存與蔡新范

燦鄒一桂武進陞俱著各賞緞四疋葉一棟

陳浩程盛修朱必堦徐以烜袁承寵吳煒彭

樹葵許王猷俱著各賞緞二疋 又諭各省

來京叩祝之在籍文武大臣等以次推恩賜

賚現在時屆仲冬其中半係年老之人

慶典既成自當早令俶裝俾資頭養可於二十

二日行禮後隨便擇日起程回籍以示體卹

諭軍機大臣等蘇昌等奏酌辦夷情一摺

其於啖咭喇夷商投遞番文懇求釋放洪任

輝及請免歸公規例等事該督持正駁回辦

理甚當第不准夷人進見及擬發回文詞語

未免跡涉選懦尚失嚴正剴切駕馭外夷之

道夷商來粵貿易惟在該監督等飭令行商

公平交易不可圖占便益俾得速為銷售早

整歸棹若該商等稍有不知安分之處仍宜

嚴加約束示之體制至國家四海之大內地

所產何所不有所以准通洋船者特係懷柔

遠人之道則然乃該夷來文內有與天朝有

益之語該督等不但當行文籠統駁飭并宜

明切曉諭使知來廣貿易實為夷眾有益起

見天朝並不藉此些微遠物也若伊果有面

稟監督之事原不妨令其進見以通夷情若

拒而不納轉似有所顧忌並致行商通事人

等得以乘間滋事殊多未協該督等既欲俟夷船歸國給發回文著將此詳悉傳諭蘇昌託恩多尤拔世令將回文改寫得體再行給發○戶部議准前署兩江總督高晉等疏稱山陽阜寧清河桃源安東鹽城高郵泰州甘泉興化寶應銅山沛縣蕭縣碭山邳州宿遷睢寧徐州衛海州沐陽等二十一州縣衛勘明水沉地畝終難涸復請自本年為始減徵民屯田地一萬四千六百一十頃有奇并豁免其屯學田湖蕩草灘四千七百六十頃有奇額賦其逐年冬勘田畝應徵銀米并豁免其冬勘從之○壬子以上

崇慶慈宣康惠敦和裕壽純禧皇太后尊號遣官告祭

天

地

宗廟

大社

大稷○諭今年恭逢聖母皇太后七旬萬壽普天同慶在京及各省在籍人員懇請設立經壇共申慶祝經禮部及軍機大臣等先後具奏共一千數百人該員等或尚在需次或已就廢閒並非現任可比且有跋涉遠來者宜敷渥澤以廣慈恩所有休致及候補候選降調現有職銜之員俱著加一級其革職大員除錫特庫盧焯二員外文職三品及在京四品以上武職二品以上者俱著各降二等賞給職銜其餘革職文武各官俟查明緣事公私情節再行分別降旨用昭錫類推仁盛典○諭軍機大臣等安泰駐烏魯木齊二年每年辦理哈薩克貿易數次本年自五月貿易後迄今未來哈薩克等見小貪利若概從優渥則難乎為繼或過示減省則遠人疑阻惟在大臣等悉心籌酌調劑得宜今旌額理等接辦時宜加意體察固不可刻覈以阻歸順之忱亦不可虛

康以啟覬覦之漸總之內地貨物有餘而邊境馬匹最要化無用為有用莫善於此但不可因朕此旨遂不知節制著傳諭旌額理等悉心妥協辦理○軍機大臣等議覆副都統安泰等奏稱瑪納斯庫爾喀喇烏蘇晶河三處屯田需綠旗兵八百名請派駐防都司守備各一員千總三員把總六員查瑪納斯距羅克倫較近堪令該處巡檢兼管糧務晶河等處派員辦理仍令范時綬駐劄三屯中往來巡察官兵鹽菜銀兩瑪納斯等處由烏嚕木齊支領晶河由伊犁支領需用馬駝按照情形支給均應如所奏從之○以山西按察使索琳為浙江布政使調河南按察使梁翥鴻為山西按察使以甘肅肅州道輔德為河南按察使○癸丑恭上

皇太后奏書

上禮服於中和殿恭閱奏書畢

上升輿由右翼門至永康左門降輿大學士捧

奏書由中路前行至慈寧門下

上由東階升至門下東旁立

皇太后禮服升慈寧宮座儀駕全設中和韶樂作

上詣正中拜位跪大學士捧奏書在左跪進

上受奏書恭獻授右旁大學士跪接置正中黃案上宣讀官捧起跪宣奏書訖

上九拜禮成奏書曰福祿德致名以實歸德垂裕而彌崇名顯揚而莫罄徽章允協慶典宜

隆欽惟

聖母崇慶慈宣康惠敦和裕壽純禧皇太后中和敘福仁厚延禧愛日高懸煦陽和於四海慈雲普覆覃膏澤於萬方藉福蔭而景運攸隆版圖式廓協

天心而鴻庥畢致第祿永綏茲逢七袞之開祥正際一陽之應候添晴暉於彩線萬年之化日方長占協氣於璇璣三極之鴻鈞乍轉瑞符駢集純嘏彌增拜慶萱幃萃東賁西琛而

獻祝稱觴蘭殿宣金泥玉檢以騰輝鉅典攸昭崇稱永煥伏祈

聖鑒俯賜

慈俞不勝拳拳之至謹奏○諭本日尚書伍齡

安讀加上

皇太后尊號表文舛錯甚多復不相連屬本年皇太后七旬慶典天下臣民同深歡躍執事人員自應倍加敬慎伍齡安前因贊讀較優加恩擢至大員此次讀表並不敬謹嫻誦致有

舛錯實屬怠忽非尋常失儀可比著革職賞給贊禮郎銜仍在贊禮郎上効力贖罪○又諭據揚應琚覆奏安西提督劉順現在尚需調理明歲已里坤移駐無可派之員請以肅州鎮總兵五福署理提篆等語著照所請劉順准其暫行解任調理其安西提督印務即著五福署理並令帶兵移駐已里坤○諭軍機大臣等許松佶奏該省鳳潁泗等屬因今歲豫省中年漫口尚未合龍下游積水至今

不能消涸恐明歲二麥失收等語楊橋漫口經朕特派大臣會同該撫等及時董率辦理已於本月初一日堵築工竣想許松佶具摺時在未經合龍以前是以尚有此奏今上游既已堵塞鳳潁泗等一帶自應日就消涸著傳諭託庸令將初一日以來該處水退後涸出地畝是否無礙補種二麥實在情形詳悉覆奏○又諭前因回人舊習凡伯克等多賸削所屬是以賞給各城阿奇木伯克等錢幣地畝及供役之人俾得奉公自愛近聞葉爾羌伯克鄂對喀什噶爾伯克噶岱默特等頗知安分無苛擾回人之事深屬可嘉念伊等歸誠日久効力有年著於官給六百騰格外再加二百以示鼓勵此次係出自特恩不可援以為例○甲寅恭上

皇太后徽號冊寶

上禮服於太和殿恭閱

冊

寶畢奉安

綵亭上前行

上升輿隨後由右翼門至永康左門

上降輿行至慈寧門外東旁立

冊

寶仍設正中黃案上

皇太后禮服升慈寧宮座儀駕全設中和韶樂

作

上詣正中拜位跪左旁大學士捧

冊

寶依次跪進

上受恭獻授右旁大學士跪接置正中黃案上

宣冊官宣寶官跪宣

冊

寶訖

上九拜禮成

冊文曰瑤樞垂曜普天樂化日之長寶冊凝徽

薄海仰慈雲之蔭祝九如之純嘏舞效嵩呼

合六宇之歡心誠孚葵向恩覃中外慶洽邦家欽惟

聖母崇慶慈宣康惠敦和裕壽純禧皇太后陞

下德合安貞功符厚載純粹中正垂內教於

椒庭富壽康寧集殊祥於箕範大安祇奉羣

欽恭穆之型長樂早朝每領寬仁之誨廿六

載疇咨政治稟

懿訓以維勤二萬里式廓販章承

慈庥以徧被茲屆七旬之大慶恰鄰南至之嘉

辰玉琯迎陽三百六旬之干支伊始璇闈迪

吉億萬斯年之福祿逾增璧合珠聯紀瑞聿

徵於元日天花法雨延釐遙應乎文殊獻益

地之瑤圖來從懸圃奏鈞天之廣樂響叶仙

韶翠輅親扶荷春暉之久照霞觴跪捧樂湛

露之均雷惠澤浹於寰中齊上延洪之頌尊

養隆以天下宜加顯懿之稱庸定桑章虔申

忱悃謹告

天

地。

宗廟。

社稷率諸王貝勒文武羣臣恭奉

冊。

寶上徽號曰

崇慶慈宣康惠敦和裕壽純禧恭懿皇太后伏願修齡永茂嘉祉丕膺申錫無疆與清寧而並壽含章有慶昭符瑞以常新謹言○諭禮部尚書員缺著永貴補授永貴未到京之前

著阿里衮署理○諭軍機大臣等阿爾泰奏登州鎮南汛二五兩號戰船及東汛七號船船現屆拆造之年驗明船板釘錫尚屬堅固毋庸拆造應請大修一次等語甚得覈實辦公之道向來各省於修造船隻徒循大小修及拆造例限初不問其實在應行修造與否在承辦者利於開銷而上官亦但知歲月相符並不悉心查勘此皆故套相沿於公事視同膜外最為惡習前此已經傳諭各省矣今

阿爾泰能力破流弊加意釐正洵可為各省法式著將此摺鈔寄各該督撫將軍等令其一體實力查驗照此辦理毋任稍有冒濫致滋弊竇仍令每次具摺奏聞○乙卯以加上崇慶慈宣康惠敦和裕壽純禧恭懿皇太后徽號禮成頒詔天下詔曰帝王恭膺景命孝治當先肅奉徽儀恩施用溥際泰平之上理溯源必始於宮闈昭色養之隆文行慶逮周於海寓萬國被康寧之福千秋揚頌禱之聲顯

號遐宣蕃釐茂集欽惟

聖母崇慶慈宣康惠敦和裕壽純禧皇太后陛下仁心篤慶懿德凝庥含章允協於坤元厚載常昭於泰運

恩垂啟迪勗宵旰以維勤業廣敷施勅幾康於無斁託慈雲之普覆闡澤羣靈仰愛日之長懸陽和徧煦壽宇開而版圖式廓春臺陟而嘉應駢臻茲逢辛巳之仲冬恭慶七旬之聖壽自天申命聿昭保定之符率土騰懽特著

尊崇之義爰祇告

天

地

宗廟

社稷於乾隆二十六年十一月二十日率王公

文武羣臣恭捧

冊

寶加上

聖母崇慶慈宣康惠敦和裕壽純禧皇太后徽

號曰

崇慶慈宣康惠敦和裕壽純禧恭懿皇太后
弟祿永綏光啟壽昌之運彝章具舉化敦
敷錫之原鉅典攸昭隆恩式展所有應行事
宜開列於後一歷代帝王陵寢先師孔子闕
里應遣官致祭著察例舉行一五岳四瀆等
祀應遣官致祭著照例舉行一王妃以下奉
恩將軍之妻以上俱加恩賜一滿漢大臣命
婦年六十以上者俱加恩賜一外藩王妃以

下公妻以上俱加恩賜一在京滿漢文武各
官俱加一級一內外大小各官除各以現在
品級已得封贈外凡陞級及改任者著照新
銜封贈一在籍休致告假官員來京慶祝
萬壽除從前已經得過封典毋庸另給外其現
在京師者著加恩准其一體照原銜請封一
凡試俸各員俱准實授一滿洲兵丁原係披
甲効力行間因疾病年老閒住者著加恩賜
一八旗滿洲蒙古漢軍兵丁及內扎薩克喀
爾喀等蒙古年七十八九十以上者分別賞
賚至百歲者題明給與建坊銀兩一軍民年
七十以上者許一子侍養免其雜派差役八
十以上者給絹一疋棉一觔米一石肉十觔
九十以上者倍之至百歲者題請給與建坊
銀兩一滿漢孝子順孫義夫節婦該管官細
加諮訪確具事實奏聞禮部覈實以憑旌表
一各省儒學以正貢作恩貢次貢作歲貢一
國子監貢監生及各官學教習免坐監期一

個月。一凡嶽鎮海濱廟宇有傾頽者該地方官估計價值具奏修葺以昭誠敬。一歷代帝王陵寢有毀壞者該督撫察明具奏修葺。一直省有坍沒田地人戶逃亡其虛糧仍相沿追納者該地方官查明咨部奏請豁免。一各省道路橋梁間有損壞者地方官查明修理以利行旅。於戲介慈釐而錫福萬年之景祚彌長崇慶典以推恩四海之懽心畢洽布告天下咸使聞知。
上詣慈寧宮侍

皇太后宴綵舞奉觴親王皇子皇孫額駙等以次進舞禮成。諭曰高恒奏兩淮商人等呈稱世享昇平受恩優渥明春恭遇省方盛典行慶施惠情願公捐銀一百萬兩以備賞賚等語明歲朕恭奉

聖母安輿巡幸江浙一應推恩錫賚俱經各衙門照例動用正項豫備第該商等素稱踴躍急公今既抒誠籲懇情詞懇切著於此內撥銀三十萬兩交與尹繼善辦

理差務即賞給兩淮二十萬兩為伊等修理行宮等項之需酌留十萬兩以備賞賜其餘四十萬兩著解交河南巡撫胡寶琛備充工程賑卹之用該商等並著交部議敘以示嘉獎。丙辰
上以二十五日詣

南郊齋宮齋宿豫行慶賀

皇太后聖壽節詣

壽康宮行禮王大臣於

慈寧門眾官於午門行禮

御製

聖母皇太后七旬萬壽連珠書屏恭進

皇太后曰臣聞山川納祿厥彰祥源苞衍延洪

斯引福紀是以泰筴執契推貞恒於

璇庭洛文則書敷元吉於

瑤祀臣聞士以任養乎物坤珍既闡申以重巽

乎命天庥是滋是以璿流毓慶歲陽聿徵

大德金根兆祉支位用輯

繁禧臣聞予半肇統斯天地見於復律元正候

則鍾呂還為宮是以迎長日之至履端撓甲
求中聲之先萌祗伶筦臣聞軒瑟調徽帝絃
暢其驛攬義畫觀象天數諧乎掛探是以上
瓊緯之曼壽探萬萬以介

大年溯錦悅之誕祥合五五乃叶

令節臣聞一六乘數七得相生之始萬億基算
十為遞成之積是以

寶籙駢美而凝祚譬諸章啟部元璣籌搏總以
迓釐時其圖衍疇策臣聞四府統元蠓蠕懷

而煦嫗五德盛木勾萌鬱以蓂茂是以

承天育物則堪堪登春安土長人乃穰穰

綏壽臣聞鴻化烟煴亭育博其愛醇意彌浹恩

勤大其慈是以合萬國之歡惟殷祈頌依

三春之暉敢曰報施臣聞融風翕習八絃歛於

大順協氣氾濩六幕蒸為太和是以挹

祥輝者式金玉之度誦

德音者譜韶韻之歌臣聞燠沐垂溫布德孔時

徽柔導訢孚心有惠是以

恩紀渥洽邇澤懷其子良慶駢豐施遐光函其
愷悌臣聞居敬直內允儷乎方儀作肅秉心
載錫之純佑是以盤盂之琢由

戢孔訓而安珩璜之型惟

服周銘則壽臣聞通復有源含萬而立恃載所
積得一以疑是以德淵懇款為

聖人之本景撰悠遠惟

至誠之徵臣聞符乾婉吳乃以時行齊日得天

曰惟久照是以華鐘景興

躬表獲於求衣銅漏課勦先勛心於問燎臣聞

示本於俗太素扶其質崇儉於上皇風播其

徽是以

訓垂國闡不侈罰斬之御道端

宸掖惟曳繻練之衣臣聞霄雲佑德彪褭洽於

化光虹樞迪熙醴粹乎乎旭卉是以薦

吳絳之祐靜言申虔稟

淵謐之槩覆惟寅畏臣聞有邵詒慶殿初顯昭

周原建家克昌基本是以

思齊式禮嗣音於徽牒懷福履綏纘順於

懿壺臣聞坤輿厚載廣輪資其大生箕範敷錫

繇條用以蕃庶是以

泰元富釐德亨乎品物圓舒麗象好從乎風雨

臣聞澍潤般裔鳴鼓時應甘滋震灑滿缶有

吉是以徽

琯御而節步速委雲於靈霽降鈿砌以達忱大

嘉貺於太乙臣聞三益效功美利其溥六駟

興事前典斯弘是以鞠衣時薦分繭練以令

辰桑壇歲臨濯龍宣夫

徽詔臣聞星軒承曜順彰皇闡蘭掖景化職懋

彤史是以

母範作則四教迪穆雍之祥內政式序九御憲

令善之軌臣聞文母貽緒麟振其趾幽室衍

支瓜綿其瓞是以

含長樂之飴兆千億以蕃盛環

大安之輿裕雲初而愉悅臣聞族雲垂於霄瑤

蔭匝磐石榮光燭於宿海潤盈玉潢是以為

善之樂甄埴乎

誼美展親之隆泳翔乎

德洋臣聞蘋澗淑化漸訖九服雁塞熙度靖共

六珈是以油駟朝正拜

堯舜於宮椒殿燕喜合中外為家臣聞鞞譯萬

里宣徽則通淵竈億臣慕義斯至是以干呂

入律占

慈仁而奉琛航解梯嶂聞

錫類而獻贄臣聞叩籠雖嶮稜武可驚榮木雖

廣嘉信所懷是以饒礪櫓而鞠旅威暢作激

素

璇畧而底績格先千階臣聞來庭肇功常武昔

諧於乙亥款關拓疆都護初置以戊己是以

掃伊犁之穴竹書紀而符吉銘格登之崖

鴻稱熙而歸美臣聞蒲類以西鑿空所未度蒙

汜之濱仰流則偕徕是以橐弓定勲版圖既

綜隸屬國磨盾告捷雲物乃象

禧觀臺臣聞瑤池彈璫必陳充庭之樂蘭陞協

律廣集介雅之章。是以鞞鞫新歌。貢音於僭。
裔。花門小部。列伎於舞場。臣聞寶盈丹邱。露
甕。琢瓊珍簪。若水桂實。纂棗。是以于闐繅英。
三采。則擢藥碧樹。筠沖匭甘。四核。則扇芬蕙。
草。臣聞金萱榮庭。億葉煌彪。星筠周阿。貫時
粦。與。是以敬。

高闐而翼祺。則薦其慶鞏。

慈宮以欽福。有那其居。臣聞閭風暢於崑崙。九
光燭彩。恒春藹於巒雉。四序佇馥。是以。

西那所都。松竹秩其芋寧。

南陔載循。堂室劑以涼燠。臣聞虞磬九成。儀足
節以樂心。萊綵五色。舞瀾編以隆養。是以。

鈞庭辯華進。

千萬壽而燕衍。曾城苕亭。奏十二安。而音電臣
聞履安之吉。靜而充符。恒固之應。動若操券。
是以。

頤性時泰。備庥徵以用康。

提躬日強。叶亨衢以行健。臣聞萬八千歲之朔。

攝提貞孟。三百六旬之首。羲和授圖。是以朝
元。

長信率臣。案而拜閭闔上壽。

慈寧具家慶。而飴屠蘇。臣聞搏桑照溫。候晷知
贏。昭華棣通。歛琯依永。是以揣稱愛日。駐輪
於鼂陽怡。

頽獻春調。饁於初景。臣聞農祥慶其豐。鳧藻翔
洽。夫億兆泰簇。鳴其豫鳳。噦雖喈乎二六。是
以洞庭斯張。導緡。

軒樞幽堂。用躋壯情。文囿臣聞鼇炬冠山。爛若
霞。電龍燭輝。夜燭如星。虹是以月宇。

嘉娛。鰖鶴騰上。而彪彪霄崢。麗賞火蛾綴空。其
熊。熊。臣聞寢賓亭午。引年以昌。陽九節長。贏
般仲延。錄以雜組。萬縷。是以迴嶼。蟻鷄玉繪
羅於。

蓬池撇波。躍龍金支。颺於。

華渚。臣聞洞淵之藹。藹。瑛琢其鄂。昆流之苓
窞。窞。珠垂其房。是以。

文疏引薰澤芝醴於五沃芳盥調露冰蕩侑以
千常臣聞三五而盈璧燭朗乎澄顯八千為
秋桂宵衣其古柯是以

慶霄延望舒之規琅磬鏘韻修齡酌臯塗之液
金罍穆波臣聞菊潭滲甘滋其永年莢林綴
朱佩以陽日是以芳醴匱節則九英載馨粉
資飫豐則萬寶咸實臣聞玉積縣圃不若北
陸互澤鴻戲鏡海奚翅南溟培風是以太液
磑即國俗循而習武嘉平儲與

慈懷莅而旌功臣聞繚垣規圓惟南乃以建其極
襟苑宅與非海莫能喻其大是以飲池鹿馴彪
斑麟之車比屋鱗次翼

儀鸞之蓋臣聞高山天作度其隰原豐水東注
自彼沮洳是以掖

輦長白則駢苞之樹森遡澗混同則圓折之珠
出臣聞霞砂瑟泉溫池滌滌雲根呀谷古嵐
靈霽是以氣霽波籟

葆生之承既長翠積巖館

都福之庭斯在臣聞脩序冲景暄清所以均節
秀臯清區與塏所以承豫是以鍾峯嘉涼升
眺昭其宜鏡波澄華

憩遊得其助臣聞懷瓊之獸呦而林衡告獮蕭
雲之駟同則圉奚載鑾是以

鏤象導夫金郊邁彼甫草珍庖尚以馨饌藐乎
上蘭臣聞填星貫於中央標建珠緯密門詠
乎太室簡儲石函是以胥庭俶瑞啟洞天之
六

交路展衛呼曼齡者三臣聞東為羣物之始虞
狩肆覲岱惟方嶽之長魯瞻奄有是以青社
班春詡蒼祇之榮滋日觀賓暘晞若華之曜
久臣聞岷江導源川增其長勾吳茂俗富媪
於地是以藻舟翼泛權鼓奉

安愈之祺鱗隰穡秀簷茨拜溫給之賜臣聞東
南之美竹箭楠蠹斗牛之野桑麻鋪荼是以
陟虎林而績湖則八繭搗錦臨樟亭而祝海
則千巖蔚雲臣聞臺懷懸居妙持清涼之宇

室利演乘普現吉祥之雲是以曇霏金花最
上應瑞乎香界鬘涌寶卍無量同

壽乎祕文臣聞一和扶榦階符繁其蔭三雍育
才黌市榮其枝是以嘉植承琳乎絳旬協洽
開秩喬柯兆苑於豐雅棧撲誦詩臣聞金方致
環佻來琳館梁鄒即鹿祝嘏畝邱是以

甲子周綺稱兕麋至於象譯庚辛婉純靈麾馴
伏於塞秋臣聞鈞鈴之潤可以在玉衡之平
旗翼之壽可以窺瑤光之正是以溟嶽和晏

筦運乎

璇極蓋輿清怡囊括乎金鏡臣聞豐融晷於穹
宰而農扈告稔盈冲卉於柔祇而富媪披英
是以陰陽蒞敷則調燭布其大洽柯穗埴塏
則普淖誦其宗生臣聞錫羨阜運則衢多期
頤之嬉含淳敦風則居有萃睦之協是以閩
耆腴樂皆

熙光所陶陝閭烝義實訢藹所浹臣聞重光協
乎鳳紀次先甲之三已盛苞乎星序際正陽

之四是以嶠西

介景百昌若時而悉新弧南表瑞萬物成章以
方熾臣聞軒闡祚繇萬區陶珍於昬鼎祁幄
祉錫九寰斟醴乎衢尊是以景飈融祝

鏐檢躋而流慶湛濯覃澤鵠書翔而建恩臣聞
霽蔭之垂不遺被褐祥風所灑暨乎室衡是
以作人左右倬為章於壽考宣譽先後薦惟
德於周京臣聞萬年賡麻拜嘉於召虎三壽頌
眉延喜於子魚是以

弗祿引康輿羽集彼藹吉熾昌式燕黃髮宜茲
樂胥臣聞以天下養者膺提孔厚惟庶民從
者吹愉大同是以臺萊統

尊臚稱闡夫蒼赤川阜增嘏臚惟訖於瀛濛臣
聞大圜彪列羅圖輯於堯紀泰鴻環均藻華
昌乎姬籙是以三光同衡以肇祚覲祥

表增七政比躔以搞耀儷緯詞屬臣聞家載忻
忻九域均禧偉兆郁郁億齡展盛是以沔中
無疆

慈善膺洪算之茂誕昇多益保佑錫

純嘏之慶○諭曰翰林院編修傅王露檢討職

銜周中規並年登耄耄遠來京師獻冊慶祝

洵屬昇平人瑞俱著賞給贊善職銜並各加

賞緞二疋○諭軍機大臣等永貴等奏回部

各城阿奇木等伯克俱由辦事大臣給與印

信執照開載職掌造冊報明軍機處等語軍

機處承辦頗多理藩院專理蒙古事務尚可

兼辦回部著將理藩院五司內派出一司專

辦回部事務其酌擬司名及應設官員數目

承辦事宜該部詳悉定議具奏○又諭曰海

明等奏阿克蘇阿奇木伯克色提巴勒氏同

衆伯克回人帶領百歲男婦等恭進

皇太后聖壽節貢物此等年老回人地處荒僻

輸誠進獻甚屬可嘉著寄知海明等令加倍

賞賚並諭伊等知之○又諭曰永貴等奏原

任布政使傅靖在阿克蘇喀什噶爾効力贖

罪頗知勤慎等語傅靖著加恩賞給七品筆

帖式職銜○以吏部左侍郎勒爾森為左都

御史署兵部右侍郎德保為吏部侍郎○以

戶部尚書李侍堯兼理正紅旗漢軍都統○

以上駟院卿九十七署正藍旗滿洲副都統

工部右侍郎納世通為鑲黃旗漢軍副都統

○丁巳軍機大臣等議准戶部侍郎明瑞奏

明歲派滿洲索倫察喀爾等處兵前往葉爾

羌喀什噶爾換班請官給鎗箭俾整軍容再

出派守卡之索倫察哈爾兵照常訓練其滿

洲兵亦應照健銳營例隨時操演從之○是

日起

上以冬至祀

天於

園丘齋戒三日○戊午諭軍機大臣等富明安

奏粵西臨桂等州縣鹽埠歸商各官養廉不

敷辦公請於商人餘引中捐幫一摺甚屬非

是富明安從前在京召見詢及粵西情形特

以鹽歸商辦各員所得比前此贏餘自當畧

減其本分養廉公項原無另為刪除之處也
乃富明安竟執此為辭有心巧於市惠形之
奏牘殊不思國家授督課績本有常經而各
省大小繁簡自應區別若藉口辦公而於額
定章程之外嘵嘵爭多競寡成何事體況粵
西地處偏僻應辦事務不多此豈江浙等大
省可比前此鹽務本非官辦其時州縣將竟
不辦理公務乎現在鹽務章程即李侍堯所
酌定頃令軍機大臣將摺內情節詢問據稱
官埠歸商之後已有公捐鹽規銀七千九百
餘兩幫補各官地方公務實屬加添足用而
商人所得餘利乃其辦運疏消積欠之資倘
復令議捐未免偏累事屬難行等語可見富
明安不過因已經調任江西因將前任事宜
取巧具奏而舊屬聞之必為歸功於已朕數
次簡用富明安初不料其居心鄙瑣若此著
將此詳諭並傳旨申飭摺發還已未
皇太后聖壽節遣官祭

太廟後殿

上詣

南郊齋宮齋宿庚申冬至祀

天於

園丘

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵

端慧皇太子園寢詣

皇太后宮問安奉

皇太后幸壽安宮侍宴至癸亥皆如之辛酉

調刑部左侍郎錢汝誠為戶部右侍郎以副都御史張泰開為刑部右侍郎仍留順天學政之任以廣東糧儲道蔡鴻業署刑部右侍郎廣東惠潮嘉道梁國治署左副都御史○士戍諭軍機大臣等前因額敏和卓玉素布皆回部舊人若令伊等更替駐劄辦事於新疆有益去年玉素布來京曾諭令在哈密休息年餘今額敏和卓當還吐魯番休息以玉素布往代玉素布著即整裝候此次入覲回人等還至哈密時即同護送之乾清門侍衛等帶領前往玉素布至葉爾羌額敏和卓即回游牧候來年入覲回人等經過吐魯番時再同侍衛等來京玉素布亦授為叅贊大臣應得公項照例支給伊子伊勒巴喇伊木看守游牧著加恩賞戴孔雀翎 大學士等議奏據內務府郎中戴保住控侍郎吉慶前署殺虎口監督傳察納承辦西直門石道工程浮銷八千九百餘兩審係傳察納代吉慶彌

補賠修之項輒於奏銷時浮開吉慶係總理大員明知冒銷不行查問均罪無可寬應將吉慶傳察納照監守自盜例擬斬監候秋後處決副都統傅景接管石工訛不知情但扶同吉慶叅奏戴保住應照都統將軍貪婪副都統不行糾叅發覺審實例降三級調用不准抵銷得旨吉慶傳察納俱依擬應斬著監候秋後處決傅景現派駐藏著加恩照所降之級從寬留任俟差竣回京視其如何奮勉出力之處再降諭旨 戶部議准廣東巡撫託恩多疏稱豐順縣屬地腳下曠厥年久曠盡應封閉從之 建江蘇昭文縣移駐白茆司巡檢衙署從巡撫陳宏謀請也 癸亥軍機大臣等議覆葉爾羌辦事都統新柱等奏稱回人以普爾錢文兌易新錢不能全交等語查葉爾羌鑄錢一年得八萬餘騰格阿克蘇又開局鼓鑄與舊普爾叅雜行使自可流通無庸亟為收舊俟新錢鑄至十萬騰格時

舊錢收盡自當停鑄或尚有舊錢仍行添鑄以盡收舊錢為度每月不限定數至局鑄無多量減工役一半均應如所奏從之 左都御史金德瑛奏告祭古帝王及嶽瀆例遣侍郎三四品京堂十七員第壹女媧成湯二陵在平蒲二府渡河即關中西安府十三陵可并遣一員致祭湖廣有二陵開封河南二府有八陵由豫順道湖廣二使可并為一江浙祭禹陵明陵路過山東少吳帝堯陵及闕里可兼祭長白山混同江由廣寧涉營巫閭之趾即可兼舉其禮祭浙江南鎮由山東則泰山沂山東海之祀可兼復由浙至廣東祭南海三使可并為一祭四川江源及陝西華嶽西鎮者可兼路出山西而北嶽中鎮西海河瀆亦可兼祭衡山者路經河南則嵩山淮濟又可兼應請減遣數員以省夫馬供億下部議行 甲子

皇太后幸壽康宮賜

上膳 諭前因西陲平定新疆廣闊所有移駐大臣官兵歲需養廉經費比前或致增多是以特命在外辦事大臣等詳查奏聞頃據舒赫德覆奏軍機大臣通行較覈則葉爾羌喀什噶爾等城駐防應需各項合之陝甘節省諸費視未用兵以前不但絕無所增實可減用三分之二其屯墾自給之糧既可不糜運費且將來種地日開所入倍當充裕又不在此時約計之內此皆一一指數可按者前用兵之初庸愚無識之徒好生浮議朕固不屑深辯今武功大定又或以長駕遠馭不無多耗內地物力為疑今經查覈不但未曾多費而且有所節省夫天子不言有無國家有當用者雖累巨萬不可惜也朕非錙銖較量但因西陲用兵始末所關不得不詳為剖晰以曉庸衆俾知此番武定並非耗帑勤遠之為將此通諭中外知之 又諭曰署刑部侍郎蔡鴻業未到任之前其侍郎事務仍著錢汝

誠署理兼辦行在刑部事務阿永阿不必隨往江浙○是月兩江總督尹繼善奏楊橋漫口合龍黃水已歸故道恐溜勢驟至易壅兩岸埽工現飭員防護至洪湖五壩久不過水今湖水日消應將口門量為收束已令淮陽道勘辦得旨甚是○安徽巡撫託庸奏六安州屬單家埠盤獲豫省逃犯現提省率司審辦并咨豫撫臣緝拏得旨此等均宜嚴究自然閭閻無事所奏具見留心○安徽按察使程燾奏捕緝盜兇事在迅速每有玩弛之員報案纍纍恃係因公呈誤降調猶可抵銷祇以上緊比緝一語搪塞應請不俟限期即揭督撫題叅得旨甚是仍宜時時留心為之以實○閩浙總督楊廷璋奏水師戰艦緊要全在航工得人現就各營甄別擇能駕駛趕繒大船熟諳沙線礁路屢往澎臺無誤者列優等增給戰糧一分外委缺出准考拔如僅能駕艍船小船年力稍壯者列次等照例給餉

炊仍不時弔驗如奮勉向上拔優等給糧其年力衰老駕駛生疎者分別汰革降副舵學習不給舵炊並請嗣後舵工年逾六十概汰不准戀充得旨甚是○浙江巡撫莊有恭奏海寧柴石二塘交接處水已臨塘迤西老沙仍多坍卸本月朔汎僅存護沙二十九丈亟應續鑲得旨覽奏俱悉○湖廣總督愛必達奏會同將軍德敏勘荆州八旗馬廠地界址井然惟正黃旗廠內月牙湖熟田百餘畝在廠心有礙牧放應令歸旗撥廠旁荒地給民墾種仍間半里築一土墩立界責令理事同知並地方官查察再各廠內湖地雖係民管業僅產蘆草請嗣後每年二三兩月令旗牧馬餘聽民刈蘆毋許滋事得旨如所議行○陝甘總督楊應琚奏哈喇沙爾葉爾羌庫車烏嚕木齊哈密等處試種胡麻有收足濟本地磨油之用得旨嘉獎○雲貴總督吳達善奏校閱各營將弁惟普洱鎮游擊劉得用等

弓馬稍遜緣該員等屢經出師著有勞績是以暫緩効參仍勒限學習得旨此即姑息之漸綠旗之兵一味張大其言其實有何奮勇勞蹟之足稱

大清高宗法天隆運至誠先覺體元立極敷文奮武孝慈神聖純皇帝實錄卷之六百四十九

大清高宗法天隆運至誠先覺體元立極敷文奮武孝慈神聖純皇帝實錄卷之六百五十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務黃旗滿洲都統世德訥都尉軍功加七級隨帶加一級尋常加一級軍功紀錄次日慶隆
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事務世襲騎都尉軍功加九級隨帶加二級又加二級 董誥內大臣戶部尚書鑲黃旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十六年辛巳十二月乙丑朔諭今年

豫省秋霖過多所有被災各屬已疊降諭旨分別蠲賑但地方穀價較向年增長兵丁買食未免拮据開春之後更恐不敷接濟著加恩將乾隆壬午年八旗駐防官兵額支俸餉粳粟米石自二月起至六月給與半年本色其中例應加閏者亦著一概給予以示體卹○吏部等部議覆江蘇巡撫陳宏謀等疏稱蘇州府屬元和縣角直鎮界連崑山新陽二縣支河汊港宵小出沒請將該縣縣丞移駐

兼轄崑新二縣附近該鎮村莊元和縣周莊鎮地廣河多即將用直鎮巡檢移駐改為周莊巡檢司再崑山縣主簿並無專司事件應改隸元和縣專管水利各缺均定為要缺在外揀調又松江府屬上海縣濱海民戶原設縣丞主簿典史各一員均駐同城吳淞江巡檢駐劉法華鎮分管八保地方遼濶請將該巡檢原管近城二十五保歸在城主簿管轄附近海濱二十三保歸本縣管塘縣丞統轄該巡檢仍改為簡缺歸部銓選又鎮江府屬丹徒縣東門外都天廟起南城至西門外排灣一帶水陸要衝漕艘民船擠泊需員催儹該縣管糧主簿係閒曹請移駐西門外京口驛前攢典一名應添充向設門子等役不敷派巡應於丹徒縣額設馬快八名內撥二名歸該主簿督率又丹徒縣城外西南一帶達金壇溧陽要道兼通句容茅山匪類潛蹤向屬該縣典史管轄稽察難周請將該縣管糧

主簿移駐縣城西南珥陵鎮添設攢典一名仍撥丹陽縣馬快二名協巡城內主簿原署改為向未建署之該縣典史衙門並鑄給元和縣分防角直鎮縣丞元和縣周莊巡檢司等印丹徒縣城外糧捕主簿丹陽縣珥陵鎮糧捕主簿等鈐記均應如所請從之丙寅上詣

皇太后宮問安 幸瀛臺 諭今日所進通本內有巡撫熊學鵬以粵西紳士呈請恭祝

皇太后萬壽於省城壽佛寺誦經一本此甚非體本年恭逢

皇太后萬壽聖節普天同慶自屬臣子至情若建壇誦經等事為大吏者本不宜辦即眾情難阻亦祇宜據情摺奏朕可隨宜批答何必專具題本視同典禮耶此在

聖母萬壽之年尚不妨俯順輿情為之轉達至朕六十壽辰則此等據呈具摺並可毋庸踵事為之矣又上年朕五十誕辰本年

皇太后七旬大慶各督撫等未免以進獻稱祝務求備物將敬之意此亦不可不防其漸上年以藩臬等官階未至已疊經降旨申諭其外廷及學政各員即奏摺亦不令送覽此衆人所稔知惟是分屬大僚上下聯情勢難概斥伊既奏進自不得不量存一二其實內府之儲何所不有豈在此區區貢物之有無朕任用大臣亦惟視伊等平日宣力何如又寧問其所進之豐嗇以為人才高下之衡鑒此

雖至無識者皆當共曉第恐習而不察或因此生誇多鬬靡之計則於官方政體均有關係因熊學鵬此奏並諭及此令皆知所省改○吏部議覆四川布政使吳士端奏稱士民捐輸社穀經督撫題請議敘給頂帶者遇開捐事例請照捐職人員一體報捐應如所奏辦理惟此項議敘人員應由部給照而或領或不領聽其自便殊不畫一嗣後令各督撫照議敘海洋運米例查各該員年貌履歷籍

貫造冊送部填照封發該督撫轉給收執從之○刑部議覆福州將軍舍圖肯奏稱旗營軍器為防護揀演之用近有兵丁擅行私當開當之人明知違例收當取利請嚴加禁止等語查私當軍器例無治罪專條應請嗣後軍人軍官私當夜甲旗幟者照軍人私賣例減一等杖一百徒三年至收當之人即照私有軍器計數治罪律減一等問擬每一件加一等止杖一百徒三年軍器及當本利均入

官失察之該管地方及將領各官分別議處從之○丁卯諭據吳達善等奏滇省江川等縣附近地方於十月初十等日均有地震之處而江川新興二屬較重現委道府各員照例分勘賑卹等語江川新興二州縣本年四月內地震已降旨於常例外從優撫卹今一年之內兩次被災頗重深堪軫念著加恩將該二屬應行賑卹之項加倍散給其乾隆二十六年分所有二州縣應納備公銀兩及撥

運兵米等項。並概予捐免。至毗連之寧州。河西等屬被災雖輕。亦著從優撫卹。該督等董率屬員。實力妥辦。務俾災黎均霑實惠。該部遵諭速行。○又諭曰。成哀扎布奏喀爾喀親王德沁扎布病故。德沁扎布雖未宣力戎行。辦事多年。頗為奮勉。茲聞溘逝。朕心軫惻。著加恩賞銀五百兩治喪。仍派侍衛烏勒登。馳驛往奠茶酒。應得卹典。著理藩院具奏。○大學士等議奏。盛京五部侍郎。每年支用單俸不敷。請於戶工等部飯銀內撥給一千五百兩。作為養廉從之。○禮部奏。二十七年元旦慶賀。

皇太后筵宴儀注得旨。是照例行禮奉

皇太后懿旨。停止筵宴。○戊辰諭朕前次南巡。有臨海訓導章知鄴。以學政竇光鼐不准進獻詩冊。妄欲捏辭叩閣。經學政等訪聞。奏奏當令傳赴宮門考試。其詩俚淺荒鄙。不堪入目。且檢閱呈內。有西陲用兵久稽成功情願。

從軍云云。其狂誕姿意。論罪本無可逭。姑念無知微末。從寬革職。命侍衛伊德帶往。關展効力。俾伊悉知軍營情形。果如所言。否。比因軍務久竣。此等無知之人。別無可効用之處。因傳諭安泰。查伊在彼。果能痛知懲警。安分悔過。即傳旨加恩。令其回籍。如有字蹟。即一面看守。一面奏聞。另降旨定奪。乃據查到章知鄴筆扎紀載。叢雜乖張。如妄引關帝文昌鬼神夢囈之談。已足為人心風俗之累。然其詞猶不過止於荒誕。至所稱討奸邪。竇光鼐一篇。則竟捏造悖逆之言。一皆託諸竇光鼐之口。伊轉為之加以駁詰。是其居心奸險。計圖栽害。此等如鬼如蜮伎倆。豈能逃朕洞鑒乎。竇光鼐不過一庸懦之人。且現居官。斷不敢為此。即使竇光鼐有此言。亦初未筆之於書也。而章知鄴則已明目張膽。公然列之著錄。詎非惡逆之尤著。照軍機大臣等所議。將該犯章知鄴。即於開展地方正法。示眾以儆。

奸頑並將此通行傳諭知之○諭軍機大臣等據託庸覆奏鳳穎二屬積水已漸消退無誤種麥其極窪地畝乾涸稍遲然為數無多現在分別挑挖等語鳳穎二屬因豫省楊橋漫口未堵不無渙溢之水前據許松佶奏到深為厯念是以降旨託庸令其查奏今已值上游工竣日久茲據查明現在涸出之地大概俱可無誤春麥稍為慰藉但小民當此被水之後是否能資力作抑或尚有應為酌議調劑之處著傳諭託庸令其據實奏聞○吏部議覆雲南布政使顧濟美奏稱滇省礦廠人雜每有匪類潛藏經調任督臣愛必達奏准令廠員嚴督課長容長硃長鑪頭將人役清冊開報稽查自定例後鮮有盤獲人犯皆由恃無處分所致應如所請嗣後廠員務督同課長人等嚴密稽查如課長人等有怠弛徇隱者即按法究治廠員能盤獲盜首及通緝要犯照拏獲隣境盜首例每一名加一級

如係盜首及要犯藏匿廠員未經查出別發覺者照不知情不申報例降一級留任如知情容隱不解犯事地方官審理者照故縱例革職其廠內未設專員歸地方官管理者照例辦理從之○戶部議准雲南巡撫劉藻疏稱昭通府大關屬椒子壩產有鐵礦堪鑄農器請開採從之○調西安副都統范宜中為京口副都統以原任西安副都統陳世泰為西安副都統○旌表守正捐軀山東即墨縣民安明吉妻韓氏○已已上御太和殿視朝文武升轉各官謝恩○詣皇太后宮問安○幸瀛臺○諭朕恭奉皇太后鑾輿巡幸江浙於明歲正月十二日起程著誠親王和親王大學士來保尚書舒赫德在京總理事務其月選之文員內通判州縣等官武員內八旗護軍校驍騎校及外省送到之補放水手驍騎校等官弁並年滿千總俱著王大臣照從前之例驗看可傳諭該

部知之○吏部議覆廣東巡撫託恩多奏稱
調補瘴地各員甚有苟且廢事坐待俸滿推
陞者邊徵要區徒為庸員陞遷捷徑應如所
奏嗣後果有才守兼優卓著政績者於俸滿
調回內地時該撫等保題照例陞用如祇年
力強壯將應陞處註銷仍補原官照腹俸陞
轉其衰邁因循者即查叅勒休該管道府不
時加策勵俸滿又捏填混保照徇情例降二
級調用再各省烟瘴俸滿在任候陞之員報
滿時如係循分供職及年力尚堪驅策照武
職展限考驗例展限一年如奮勉向上仍准
題陞從之直隸總督方觀承覆奏口外熱
河廳屬犍牛窖等六處四旗廳屬添財溝等
七處喀喇河屯廳屬虎道哈溝鵠溝二處
八溝廳屬高兒廠等三處塔子溝廳屬栢樹
溝等三處皆有煤苗請將各山場分界設窑
募殷實民戶取地方官印結送熱河道給票
開採俟煤旺時地方官詳司給帖准充納稅

該管道及各廳仍親查彈壓得旨允行 庚午

孝惠章皇后忌辰遣官祭

孝東陵

上詣

雍和宮行禮 諭近京西山一帶產煤之處甚

多現在已開窑口率以年久深窪兼有積水

以致刨挖維艱京城煤價漸為昂貴著工部

步軍統領順天府等各衙門會同悉心察勘

煤旺可採之處妥議規條准令附近村民開

採以利民用 山西巡撫鄂彌奏晉省倉儲

久懸請乘本歲豐收買補第各屬穀價止尙

嵐等二十七州縣每石八錢至一兩以內其

太平等四十三州縣自一兩一錢至一兩七

八錢不等如照部定一兩以內為準採買無

多應定為一兩二錢收買得旨允行 賜安

徽墓墩二程子朱子祖居祠

御書扁曰洛閩溯本 旌表守正捐軀之直隸

長垣縣民王德成女王氏○辛未諭曰安西提督劉順前曾隨征金川頗屬奮勉此次平定西陲雖未身列行陣而安西一帶設臺穿井諸務具見實心經理今聞溘逝深為軫惜著加恩晉贈太子少保再賞銀一千兩所有應得卹典著該部察例具奏○軍機大臣等奏據俄羅斯送出之瑪哈沁色布騰等解京訊係前在阿勒坦和碩戕害庫車辦事布政使德舒等屬實交刑部正法報聞○戶部議覆漕運總督楊錫紱條奏漕運各款○各省糧艘開行俱有經管衙門給限單臣又同巡漕諸臣督押各關止司收稅並不催漕蕪湖潁潁等關為漕運經由未設限單惟板閘臨清天津三關相沿給發請領繳銷徒滋胥吏指勒應裁○水次收兌米色攪雜例議處州縣及監兌官不及知府因不實力查察甚有袒護屬員與糧道齟齬者嗣後州縣收漕有潮潤攪雜知府不先揭報照失察例議處如

涉徇庇該督撫題參一奸徒鑽充各衙門書役抗避僉丁衛所差拘各衙門庇護不發嗣後不論大小衙門書役官承概勾僉已身不能出運令子弟承頂至書役仍聽充當該州縣查係衛籍即不准出結如以衛籍冒民籍圖避僉選朦混出結糧道查出照例議處一領運旗丁雇頭舵水手有身工已足私脫逃者苦累旗丁且妨漕運嗣後有脫差者通行各幫及原籍並沿途地方官嚴緝獲日解交糧道會同臬司訊明咨部發邊衛充軍均應如所請從之○刑部議覆大學士等奏據鑲紅旗蒙古都統奏稱察哈爾逃犯護軍車布登係察哈爾蒙古非厄魯特等語察哈爾蒙古逃人例無治罪明文伊等俱蒙古旗分之人如有逃走或一月内外自回或被拏獲悉照逃旗例發遣黑龍江其歸并察哈爾之舊厄魯特年久逃走者即照察哈爾蒙古等辦理至新歸之厄魯特如有逃走除於拏獲處

即行正法外不論年月自回者概發廣東廣西雲南貴州烟瘴地方倘不安分即就彼處正法應行文值年旗嗣後均照辦理從之○豁江蘇吳江縣坍荒公占田地乾隆十八年至二十一年民欠銀糧○蠲江蘇南匯吳江長洲元和上海海州等六州縣乾隆二十三年永旱災地漕鹽等銀一萬三千兩有奇米麥豆九千四百石有奇○壬申

上詣

大高殿行禮○軍機大臣等奏八旗官員遇婚喪事件例借支俸銀乃不肖之徒假捏具呈或該親族本非承辦藉名指借八旗並無專司察覈之處嗣後每月底戶部將各旗借俸之案彙咨步軍統領衙門查訪如有冒支本員叅奏治罪失察之都統等分別議處並著為例得旨依議著半個月一次彙送稽查○戶部議准兩江總督尹繼善疏稱鹽城縣范公隄外舊有公樵草灘七百五十六頃嗣因

民竈爭訟另於伍佑新興二場淤灘照數撥給竈樵恐日久私墾請每歲春間令該縣及鹽大使親勘出結倘徇情失察知府分司查揭叅處從之○以故一等男色楞子僧格多爾濟襲爵○以甘肅肅州鎮總兵五福為安西提督調四川川北鎮總兵馬彪為肅州鎮總兵以陝西西鳳協副將索柱為川北鎮總兵○癸酉

上詣

皇太后宮問安○兵部議覆江蘇按察使蘇爾德奏外省郡縣城門鎖鑰請歸地方官掌管等語門禁啟閉係武員專職間有分防僅千總微弁因歸州縣管理若將鎖鑰概令文職執掌一事兩歧轉多牽制嗣後有從前有司沿習掌管者一併歸城守營從之○甲戌諭軍機大臣等海明等奏稱自葉爾羌至關展共計五十餘臺每臺回人十名按月各給鹽菜銀九錢今各城餘糧甚多除葉爾羌喀什

噶爾各臺俱經折給錢文外。其阿克蘇所屬各臺回人口糧請於來年正月起按照時價動支餘糧折給等語。前因各城糧石不敷暫以銀兩折給。今積貯有餘。若使回人得支本色。既與伊等生計有益。又可省內地運送之繁。除阿克蘇各臺照所奏辦理外。其葉爾羌等處亦應酌看情形一體支給。著通諭各城駐劄大臣等知之。○軍機大臣等奏據副都統旌額理奏請將派往伊犁索倫兵內調撥一百名駐防烏魯木齊等語。查烏魯木齊等處較伊犁回部更成內地。既經議派滿洲察哈爾兵駐防。無庸再調得旨。著照旌額理等所請調伊犁索倫兵一百名駐劄烏魯木齊。○戶部議准雲南巡撫劉藻疏稱東川新局正鑄已歷九載。積息銀至四十萬餘兩。請自二十七年為始酌減一半。合加鑄半卯。湊五十鑪從之。○陝甘總督楊應琚等奏新疆奏銷錢糧宜定章程。請將伊犁烏魯木齊喀什

噶爾葉爾羌阿克蘇庫車哈喇沙爾闡展八處每處為一案。分八本具題。其英吉沙爾附喀什噶爾內和闐附葉爾羌內烏什附阿克蘇內至各處奏銷經納世通奏准差官齋蘭往返遲誤嗣後應停差齋。此次奏銷臣明德將底冊咨該處照造。該大臣覈明鈐印由塘送蘭。即督藩司覈題。並請自明歲起每年內地供支新疆各項統為一案。限次年六月奏銷。哈密巴里坤二處各統為一案。限次年十月奏銷。遲逾叅處得旨允行。○以戶部左侍郎于敏中兼管錢法堂事務。○賑貸山西文水榆次徐溝太原汾陽孝義臨汾猗氏虞鄉解州安邑夏縣絳州等十三州縣被災貧民口糧籽種。○乙亥諭曰刑部侍郎員缺著安泰補授。安泰未到任之前著阿永阿暫行署理。○丙子諭嗣後吏部帶領卓異正薦官員引見時將從前曾經正薦次數俱著於履歷摺及綠頭牌內詳悉註明以備簡覈。○宗人

府奏請以故奉恩將軍啟昭庶子鵬智襲職得旨此奉恩將軍著鵬智承襲但定例降等遞封至奉恩將軍雖無可降之等然未經出缺以前其嫡妻所生之子年已及歲即考試封奉恩將軍是多一奉恩將軍矣殊覺太優嗣後此等奉恩將軍之子應封時暫行賞給五品虛銜仍食原錢糧俟應襲之奉恩將軍缺出再行承襲將此永著為例建甘肅秦州移駐三岔鎮州判衙署從巡撫明德請也

丁丑

上詣

皇太后宮問安○工部等部議准江蘇巡撫陳宏謀疏稱銅山縣西門向無城樓請添建從之○命授喀爾喀親王車布登扎布為副將軍郡王車木楚克扎布為副盟長戊寅諭前熊學鵬奏廣西興安縣緝獲湖南湘鄉人鄧廷賢等私刻印票冒差需索一摺以該犯楚人經歷楚地該撫馮鈐並未奏聞傳旨令

其查覆今據奏到自請交部議處並將藩臬道府州縣等二概列叅未免惶遽失措且以隣省獲犯不無中存芥蒂均非封疆大臣持正奉公之道督撫統轄全省地方偶有匪徒越境滋事在本縣本府自不能辭失察之咎至司道以上所轄既廣即不當盡干嚴譴况在撫臣朕豈即以一二緝案督辦不前定其殿最耶諒中外臣工所宜共喻者是馮鈐所奏過當之處於率屬已不得其平若因此而歸咎熊學鵬自生嫌隙則於政體官方所繫尤為重大督撫同駐省會凡事固當和衷共理即地屬隣封其中會咨協濟之處在國家並非二事如馮鈐於此案知會到省方當深服熊學鵬嗣此每有見聞共期實心欣助所見方為遠大設以私心未化因而膜視掣肘幾置公事於不問在督撫為不知大體在朝廷亦安用此大臣從前鄂爾泰等在封疆中已為不數見之材然以意見不和遂與李衛

等抵牾生釁特因朝綱整肅勢不能成黨援門戶之漸然自來外吏畛域相持久成惡習不可不深引為炯戒也將此通諭各省督撫知之○諭軍機大臣等阿桂等奏稱伊犁屯田八千畝收穫大小麥糜粟青稞等穀共二萬七千一百石有奇約二十分以上等語伊犁屯田豐收皆官兵勤於力作所致所有屯田各官員俱交部議敘兵丁等著阿桂酌量賞給以示鼓勵○又諭伊犁屯田回人八百

戶收穫大小麥約二十分以上糜粟青稞約四十分以上合算每人收穀四十石應令其各交米二十石定為成額則回人益知勤動嗣後人給籽種一石五斗以交糧十六石為率所種四項穀石有豐歉不齊亦可通融抵補等語回人等著與兵丁一體酌量賞給管理屯田回人之前鋒叅領等俱著交部議敘其定額交糧之處俱如阿桂等所請行○戶部議准江蘇巡撫陳宏謀疏稱范公隄外墾

熟地六千四百餘頃除伍佑一場聽其放荒餘悉照梁梁場輸課從之○工部等部議准陝甘總督楊應琚疏稱安西提標官兵移駐巴里坤應建兵房從之○鑲藍旗蒙古都統奏阿爾錫陣亡所遺雲騎尉世職將伊子尚凱姪鄂勒哲依圖擬正陪請襲得旨這雲騎尉著尚凱承襲嗣後此等世職本員如止一子即將一人帶領引見不必以姪擬陪如以姪為嗣准其承襲著為例○遣內閣學士富

德致祭長白山等處遼太祖陵宗人府府丞儲麟趾致祭西嶽華山等處黃帝軒轅氏等陵吏部右侍郎恩丕致祭東嶽泰山等處少昊金天氏等陵

先師闕里吏部左侍郎董邦達致祭中嶽嵩山等處太昊伏羲氏等陵副都御史竇光鼐致祭南海太僕寺少卿志信致祭北嶽恒山等處女媧氏等陵○已卯諭今年恭祝萬壽之草職文武各員現據查明緣事公私情

節其文員中之鎖柱卓林羅布藏平安胡在
惠赫柱塞勒阿三泰三多四德九格白為公
舒文彰古禮龍光昱胡惟正楊文玠李鑲施
奕學顧邦英廖運芳宋載楊聯捷李法孟楊
玘楊國華孫輅相王槃靳國佐陳璋錢清徐
崇熙興海張世禧隆依哈塞勒克張騰齡費
我衡王光含王溶繆繩祖武員中之開泰瑪
爾德八龍李祿范宜恭治繼鈞白鍾驤等四
十八員俱著該部帶領引見其餘文職戴文
等一百二十八員武職通舒等二十七員七
品以上者俱降一等賞給職銜八品以下者
俱賞給原銜用廣

慈恩以光盛典○諭軍機大臣等前據熊學鵬
題叅平樂府知府松栢違例妄縱并將員屈
之知縣姜國城一併叅劾所辦不分曲直頗
存意見已明降諭旨並將該撫交部察議此
案距今已閱數月該撫因何如此辦理緣由
並未見具摺覆奏著傳諭詢問熊學鵬令其

即行奏聞○以故三等男布喀從弟宗魁
襲爵○旌表守正捐軀之江蘇蕭縣民張欽
公女張氏廣東英德縣民李緝易妻范氏

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十

大清高宗法天隆運至誠先覺體元立極敷文奮武孝慈神聖純皇帝實錄卷之六百五十一

監修總裁官經筵講官太子太傅文淵閣大學士文淵閣領事內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七次隨帶加一級尋常加級軍功紀錄五次慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部二庫事務

世襲騎都尉軍功十九次隨帶加二級又加二級軍功內大臣戶部尚書領侍衛內大臣副都統世襲騎都尉軍功五次

尋常紀錄四次臣德瑛經筵講官太子少保內閣學士臣曹振鏞等奉

敕修

乾隆二十六年辛巳十二月庚辰

上御乾清門聽政○諭據倉場侍郎溫福等奏

開歲南巡

皇太后由運河水路回鑾所有北上糧艘酌量

迴避一摺著將原摺鈔寄楊錫綬令其查照

事理悉心妥議俾河道既無妨礙而糧艘亦

不致稽延一切善為經理仍先行具摺奏聞

尋奏前准部咨謹將南漕船籌計令首進船

於夏初趕抵天津以便西沽一帶迴避二進

船於洪澤湖之太平河養馬灘等處迴避三

進船於高郵之金灣六閘揚州之三汊河常州之高橋等處迴避俟

皇太后由順河集回鑾後再催趲北上無誤糧

運得旨允行○又諭曰大學士史貽直年逾

八旬著加恩令其於紫禁城內乘轎以示優

體老臣之意○工部議覆四川總督開泰奏

稱地方官及紳士商民有捐貲修城者請與

捐穀貯倉一體酌獎應如所奏嗣後現任地

方官捐修五十兩至一百五十兩者遞記功

三次聽督撫自行辦理二百兩以上者准紀

錄一次三百兩以上者紀錄二次士民捐修

十兩至五十兩以上者遞賞花紅匾額獎勵捐

至三四百兩者奏給八品頂帶從之○以故

一等公岱吞子德勝一等子夏冕孫瑞三等

男孫保住子報國等各襲爵○以兵部尚書

阿里衮戶部左侍郎于敏中充經筵講官○

以鑲黃旗漢軍副都統安泰鑲黃旗滿洲副

都統永瑞對調○正藍旗蒙古副都統舒泰正

白旗蒙古副都統老格對調○予故吏部尚書汪由敦編修王懋竑入祀本籍鄉賢祠○辛巳

上詣

皇太后宮問安○諭向來寧夏駐防官員每歲所支粳米一千餘石俱係官為採買辦供今據吳紹詩奏請將夏朔三縣額徵應輸粟米內量收粳米作抵夏朔等縣既非出產粳米之區採買抵輸均屬煩擾該處駐防官員為

平糶奏

數無多著一體供支粟米不必另辦粳米給發○諭軍機大臣等據方觀承奏順義縣革役張全家孥獲聚賭領催和隆阿不服拘孥持刀行兇一摺和隆阿身係旗人與縣役等聚賭已為無恥乃於查拏時復敢持刀肆橫砍傷兵丁甚屬不法著傳諭方觀承令其即速嚴審從重定擬不得僅照賭博拒捕之案辦理以昭炯戒○禮部議覆雲南學政李中簡奏稱滇省各郡向因入試童生不多即以

平糶奏

府屬教授考試送府今人文漸盛應試較增關防自宜加密應如所請將昭通東川二府照開化廣南等府例歸府城二縣考試其廣西元江鶴慶順寧鎮沅五府不與州縣同城應於縣試時飭調所屬最近州縣赴府考試永北府童生歸同城之同知考試麗江府童生令不同城之同知通判赴府考試照州縣例造冊送府至景東蒙化二府係以同知掌府印無府佐州縣可委照直隸州例令掌印同知考試申送學臣無庸調取別屬從之○陝甘總督楊應琚奏請自哈密至烏魯木齊各處軍臺添蓋塘房羈守遣犯報聞○以故一等男六十五子福倫襲爵○壬午諭軍機大臣等朕前者載舉南巡問俗省方無非民事而河工海塘尤為捍衛民生之重計是以淮徐一帶臨視不憚再三惟尖山塘工蹕路稍紆未經親勘比年以來中壘潮勢漸次北移殊繫宵旰已擬於明春赴浙時詳閱情形

與地方大吏講求規畫適覽莊有恭奏現在
攢辦工程俟來年臨閱請訓一摺意似待朕
巡浙已屆回鑾始於該處豫備者然果爾則
是朕於西湖左右遊覽既畢乃旋旆及之於
勤民之義謂何在該撫所夕侍朕斷斷不設
是想即江浙士庶亦不皆好生議論者然此
既非朕心所能安即非巡典所宜有今定於
初抵杭州行宮次日朕即前往閱塘
聖母皇太后留憩省城先可近覽吳山仰承

慈豫不越三晉朕即迴奉

安輿幸西湖行宮則於典禮人情均為允愜而
自杭城之海寧水陸皆通行之路較之原議
由石門何家橋過壩取途周折尤為近便著
傳諭莊有恭知之○又諭曰淑寶等奏哈密
辦事之寧夏防禦雙明等年滿請再留一年
以應陞之缺即用等語昨據永慶奏請將隨
伊行走之前鋒廣保等即用一摺朕曾諭以
大功告成伊等所辦事務非軍前効力可比

且三年更換與內地各員勞逸適均不必過
於優敘著酌量給予陞轉之途以示鼓勵今
淑寶所奏與前事一體雙明等著再留一年
酌示鼓勵不必以陞銜即用○癸未諭軍機
大臣等此次入覲之伯克阿里瑪和卓等甚
屬奮勉阿里瑪和卓特穆爾遜都拉和卓素
勒坦和卓著賞戴孔雀翎阿布都賚賞戴藍
翎古爾班和卓阿布都拉墨墨氏敏伊斯邁
勒等著交與永貴等以應陞之缺即用○戶

部議准山西巡撫鄂彌泰大青山十五溝墾
熟地四百四十三頃七十五畝零請每年編
徵粟米撥充綏遠城滿營兵糧從之○兵部
等部議覆四川總督開泰奏稱石砫一司界
在川楚間與內地州縣接壤幅員千餘里土
著流寓錯雜經臣前議暫移同知駐劄官民
究不無觀望不若竟設流官俾歸畫一應如
所請將該土司改為直隸石砫同知量設佐
雜汛防分管其應襲世職照苗疆例改授土

通判不許干與民事該土司原有另徵草籽秋糧等銀即定為正額以抵同知增添養廉從之○以平郡王慶恒為宗人府右宗正予齋勅哈薩克迷途被害之把總秦子雲等十員議卹如例○甲申軍機大臣會同刑部奏馬甲佟銘盜用都統印文冒領宗人府生息銀叅領王士儀不即拘拏致令逃脫應請革職照應捕人知罪人所在不即捕律擬加號得旨王士儀曾任副都統乃於此等要犯

不即據報拘拏延挨駁詰以致遠颺情屬可惡著發往吉林披甲當差兵部議覆山海關副都統富當阿奏稱旗人進關向無印票稽察無由恐有逃匪混入查吉林黑龍江拉林阿勒楚喀等處旗人進口俱有該管官印票關防請畫一辦理應如所奏嗣後盛京旗人進關附近省城居住者用將軍印票在各小城居住者即用該管官關防圖記從之○刑部議覆四川總督開泰疏稱叅革川北鎮

總兵覺羅西琳任內勒借屬員銀兩又為債主銷售私貨貪黷不法請照枉法八十兩律擬絞監候應如所題得旨西琳依擬應絞著監候秋後處決以上駟院卿九十七為鑲黃旗蒙古副都統○賑湖北漢川縣武昌左衛本年水災飢民並緩勘不成災之黃岡雲夢京山公安等四縣額徵○鑄給江南江寧府茶引所兼管都稅司印從總督尹繼善請也○乙酉

上詣

皇太后宮問安○諭工部奏各省卓異官引見後向例文職賞給朝衣武職賞給蟒袍由工部領銀製造轉發該員等不能久候親領易致書役等冒領隱匿諸弊嗣後請停止賞給一摺卓薦人員旌以章服雖沿仿車服以庸之義第行之日久漸成具文司事官吏等領值既有虛浮工料又非精好及由提塘分發輾轉弊生不惟本員實用無裨且恐轉致勒

索停其製給實屬允當但遽請議裁伊等循績既昭雖回任候陞自應即示獎勸嗣後著加恩循照內官京察一等者令於引見准其卓異時各准加一級仍註冊回任候陞著為例○軍機大臣等議覆吉林將軍恒祿疏稱拉林阿勒楚喀地方原設副都統二員駐劄分管第相距百里文移會商諸多不便應如所請令該副都統二員按左右兩翼管理各設協領一員副協領一員佐領八員管兵四百六名再於拉林筆帖式四名內撥二名移駐阿勒楚喀即以阿勒楚喀協領舊署作為副都統衙門並添給阿勒楚喀副都統印協領等關防從之○丙戌諭軍機大臣等金輝奏估修天津船塢一摺此項工程年久傾圮自應照例修理但據摺內所開物料工價等項不下一二萬金即非尋常粘補可比向來地方官往往藉端興工以為冒銷之地徒致虛糜帑項於工程毫無實濟著傳諭金輝令

其留心實力稽查將來倘有草率浮冒之處該鹽政不能辭其咎也○又諭曰阿桂等奏稱烏里雅蘇台送到孳生羊二萬隻若令兵丁等牧養或因更換有期不甚愛惜請分給居住伊犁之厄魯特回人等令其加意照管計羊十隻每年取孳生三隻有餘者量加賞賜不足則令其賠補其續送牛羊俱一體派撥等語辦理甚屬妥協著照所請行○丁亥諭軍機大臣等託庸奏請興修臨淮西壩橋工程一摺該處既係九省通衢行旅往來刻不可緩自應及早奏明修葺乃稱二十五年夏間雨水衝損直俟一載有餘始行具奏已屬遲延原摺交部速議第此等要工非專派大員責成經理有司胥吏等即不免乘間草率冒銷事無實際李永標現授廬鳳道該地正其所轄已令即速赴任專司此項工程著傳諭該撫督率妥辦無任滋弊仍將因何請修遲延緣由查明隨便奏聞○戊子諭曰永

貴在外年久應遣員更換納世通現照料入
覲回人著俟明年即帶領伊等前往喀什噶
爾更換永貴回京○吏部議覆直隸總督方
觀承奏稱東安縣知縣張儼係臬司王檢中
表兄弟向無迴避之例第外官上下衙門事
多關涉設為寮屬不免瞻徇嗣後外官職司
考覈衙門遇有內外兄弟為其屬官令官小
者迴避應如所請從之○己丑
孝莊文皇后忌辰遣官祭

昭西陵○

上詣

皇太后宮問安○軍機大臣等議准盛京兵部
侍郎果爾敏奏小凌河驛站地窪遇河水漲
溢站房被衝請將該驛移設雙楊店地方從
之○庚寅正白旗蒙古都統奏進呈永襲佐
領家譜得旨這四姓輪管佐領前因世系莫
考作為公中佐領但此內有承襲數代者若
概作為公中佐領殊無分別嗣後此等佐領

內如有承襲五代者遇有缺出不論同族有
無官職與該旗應補人員一體揀選數人帶
領引見其未及五代者均著作為公中佐領
遇有缺出將族人之主事驍騎校等六品
以上官員一併揀選帶領引見如無六品以
上等官止選旗員補放下次出缺時其族人
內如有官至六品者仍一併揀選帶領引見
補放將此通行八旗遵照辦理永著為例○
是日起

上以歲暮禘祭

太廟齋戒三日○辛卯河南巡撫胡寶瑤奏中
牟縣境內賈魯惠濟二河均逼近楊橋經黃
水下注合龍賈魯舊河淤平黃水初衝時即
將河身南徙現自鄭州交界灰池口經白沙
十里鋪繞城南至祥符縣時家岡仍歸賈魯
故道抽刷成河寬至二十餘丈不等祇須疏
淺使深再就兩岸挑渠納民田積潦其祥符
緊接處不須大工自成河道至惠濟河自兩

聞至岡頭橋淤斷岡頭橋迤下至祥符縣間
段尚有新衝河形應挑淤築堰使入故道並
於十里鋪建滾水壩以備節宣分賈魯河之
勢請動項儼辦得旨事半功倍之為甚妥○
壬辰以歲暮禋祭遣官祭

太廟中殿

後殿○諭向來巡幸所需車輛例由順天府用
官價豫為雇覓應用其中胥役人等多有乘
機藉名抑勒需索諸弊為累聞閭此次南巡

啟鑾伊邇順天府自己照例豫備著步軍統
領衙門簡派員役查察如有滋事情弊即行
拏究以儆刁猾嗣後有應備車輛著交內務
府總管大臣交會計司所屬大糧莊頭等設
法官辦既可供應無誤又可永斷因差滋弊
根株其悉心妥議具奏○諭軍機大臣等兵
部奏稱來京候旨之察哈爾總管色楞係騎
都尉職銜衮布車楞係世管佐領高亮係騎
都尉職銜兼世管佐領請以本身職銜在該

旗効力等語色楞等係加恩補授察哈爾總
管之員自應實心供職訓練所部乃嗜飲偷
安若所屬羣相效尤有關該旗風俗因諭令
來京其員缺已另行揀選補授矣伊等既不
勝總管之任若令其仍在該旗行走則適如
所願轉得家居安樂非所以示懲創但其罪
尚不至革職色楞衮布車凌高亮著分發伊
犁阿克蘇喀什噶爾三處効力行走以贖前
愆○癸巳禋祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○遣官祭

太歲之神○軍機大臣等議准烏什辦事副

都統永慶疏稱烏什每年應供阿克蘇鼓鑄

銅觔地不產銅須派人往拜城刨挖道遠妨

農應請輪派從之○甲午

上詣

皇太后宮問安○御保和殿筵宴朝正外藩左

翼科爾沁和碩親王固倫額駙色布騰巴勒

珠爾多羅扎薩克圖郡王納旺色布騰固山

貝子多羅額駙班珠爾鎮國公固山額駙索

諾木色楞輔國公固山額駙拉里達輔國公

諾觀達喇和碩額駙敏珠爾多爾濟固山額

駙鄂爾吉納一等台吉喇特納二等台吉巴

勒珠爾三等台吉濟克濟扎布阿巴噶親王

品級郡王索諾木喇布坦教漢多羅郡王垂

濟喇什輔國公多羅額駙桑濟扎勒固山額

駙旺扎勒翁牛特多羅貝勒朋蘇克多羅額

駙班珠爾固山額駙車布登烏珠穆沁多羅

額爾德尼貝勒達什衮布輔國公敦多布色

楞阿巴哈納爾多羅貝勒達什敏珠爾蘇尼

特多羅貝勒甘珠爾喀喇沁固山貝子多羅

額駙扎拉豐阿鎮國公丹津達爾扎輔國公

溫都爾湖扎薩克公品級一等他布囊齊齊

克扎魯特鎮國公納遜額爾克圖巴林輔國

公和碩額駙德勒克歸化城土默特輔國公

喇嘛扎布土默特和碩額駙納遜特古斯奈

曼固山額駙敦多布右翼喀爾喀扎薩克圖

汗多羅郡王巴勒達爾和碩親王多羅額駙

桑寨多爾濟親王品級多羅郡王車布登扎

布輔國公密什克公品級台吉佛保扎薩克

一等台吉達瑪琳扎布達爾巴圖翰克海都

布厄魯特多羅郡王羅布藏多爾濟鎮國公

衮楚克公品級台吉達木拜綽羅斯多羅郡

王羅布扎回子郡王品級貝勒霍集斯輔國

公和什克額色尹圖爾都公品級台吉漢咱
吧爾扎薩克一等台吉瑪木特土爾扈特多
羅貝勒羅布藏達爾扎土默特固山貝子哈
穆噶巴雅斯呼朗圖和碩特輔國公色布騰
扎薩克一等台吉特默齊青海扎薩克一等
台吉旺舒克喇布坦吐魯番郡王額敏和卓
子鄂羅木薩布等召左翼科爾沁和碩親王
固倫額駙色布騰巴勒珠爾阿巴噶親王品
級郡王索諾木喇布坦科爾沁多羅扎薩克
圖郡王納旺色布騰敖漢多羅郡王垂濟喇
什烏珠穆沁多羅額爾德尼貝勒達什衮布
喀喇沁固山貝子多羅額駙扎拉豐阿科爾
沁固山貝子多羅額駙班珠爾右翼喀爾喀
扎薩克圖汗多羅郡王巴勒達爾和碩親王
多羅額駙桑寨多爾濟親王品級多羅郡王
車布登扎布厄魯特多羅郡王羅布藏多爾
濟綽羅斯多羅郡王羅布扎回子郡王品級
貝勒霍集斯土默特固山貝子哈穆噶巴雅

斯呼朗圖等至

御座前賜酒成禮○諭欽奉

皇太后懿旨貴人拜爾噶斯氏霍卓氏淑慎敬
恭克勤內職宜加冊禮以著柔嘉俱著封為
嬪欽此所有應行典禮各該衙門察例舉行
○是月江蘇巡撫陳宏謀奏常熟昭文二縣
濱海從太倉州境接築土塘嗣開白茆河徐
六涇三口建閘啟閉本年潮漲閘口內外衝
激石牆傾圮該建閘處係沙土難資經久應
請改為滾水壩閘夫十四名并裁得旨如所
議行○浙江巡撫莊有恭奏本月初五日省
城得雪近省杭嘉湖紹各府屬同時普霑盈
尺得旨欣慰覽之京師亦於是日得盈尺之
天澤蓋所罕逢也○湖廣總督愛必達等奏武
昌省保安門外荻麥灣一帶江水頂衝隄脚
沙土原建石岸土隄節次坍塌經前督臣蘇
昌議用石斜砌形如梯級稍容水勢但石體
究沉江流衝激易陷應仍修築土隄較有濟

益其收麥灣第五段土岸。現卸三十餘丈。請
做第一段工。式填石加土堅築。仍深釘排樁。
用筏纜絆緊。以資捍禦。嗣後如有坍塌。俱一
律照辦。得旨如所議行。○河東河道總督張
師載奏。下北河廳陳蘭防汎額兵六十名。槍
工不敷。每調別汎兵幫護。把總呼應不靈。請
於黃沁廳武榮汎兵一百八十名內撥三十
名。協防陳蘭汎報聞。○又會同河南巡撫胡
寶瑒奏。河內縣九道堰之竹絡壩。係石子堆
砌。下留九孔。每視草束填塞之疎密。定水勢
盈縮。不嚴為稽查。居民易滋盜淺。現飭該縣
管河縣丞。於每歲四月至六月。移駐堰旁之
許良集。就近查辦。報聞。○河南巡撫胡寶瑒
奏。河北鎮營旗纛帳房各項。本年被水淹損。
請借項製造。得旨如所議行。○河東鹽政薩
哈岱奏。豫省食河東引鹽。洛陽等十州縣。衝
沒鹽一萬七千餘包。請俟明年新鹽贏餘補
運。得旨如所議行。○陝甘總督楊應琚奏。報

巴里坤勸墾地三千七百餘畝。照水田例升
科。得旨嘉獎。○又會同甘肅巡撫明德奏。闢
展地方田土較少。將來各省發遣人犯正多。
未便仍與烏魯木齊一體分發。查烏魯木齊
除本屯外。原有昌吉羅克倫二屯。且明年於
烏魯木齊以西瑪納斯等處。又設三屯。地寬
兵多。易為防範。請嗣後遣犯概停分發。闢展
俱解烏魯木齊酌量安插。報聞。○廣東布政
使史奕昂奏。南海神廟在省城南中隔海口。
計程八十里。遇欽差告祭。風濤間作。蠲吉愆
期。勘陸路可通。飭修橋梁。以便經行。又
文廟祭器樂器闕畧。逐加修整。添製并選樂
舞生。按照演習。得旨好。具見留心。○廣西巡
撫熊學鵬奏。隣省採辦銅鉛。經過例不奏報。
請嗣後各省督撫。照運京銅鉛。遇有事故。奏
聞。外其並無疎失事故。仍於歲底將某省採
解若干。勦並委員出入境期彙奏。得旨具見
留心。○是年。迫于準噶爾出師陣亡之叅領

車凌旺布等四員祭葬贈卹如例千總趙國威等把總宋奇等外委楊玉柱等馬步守兵梁成等一百九十二員名卹賞俱入祀昭忠祠○旌表孝子江西等省王志珍等三名孝女浙江胡氏等二口守節合例八旗滿洲銓住妻納喇氏等八十五口蒙古噶爾桑妻尼楚古特氏等二十口漢軍井應泉妻王氏等二十口內務府鑲黃等旗百喜妻蔡氏等四口奉天等省駐防薩爾泰妻阿巴哈納爾氏

實錄卷五十二

三

等三十七口直隸等省蔡琮妻劉氏等四百零二口夫亡殉節山西等省張值為妻劉氏等五口未婚守志浙江等省陶日升聘妻沈氏等七口百歲壽民婦直隸等省裴復炳妻劉氏等一十八名口各給銀建坊如例○一產三男直隸等省王喜名等五家會計天下民穀數各省通共大小男婦一萬九千八百二十一萬四千五百五十五名口各省通共存倉米穀三千四百七十二萬三千一百

七十五石二斗七升七合五勺

實錄卷五十二

三

大清高宗法天隆運至誠先覺體元立極敷文奮武孝慈神聖純皇帝實錄卷之六百五十一

大清高宗法天隆運至誠先覺體元立極敷文奮武孝慈神聖純皇帝實錄卷之六百五十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履柱

總裁官經筵講官太子太傅文學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午春正月乙未朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○丙

申。

上奉

皇太后幸重華宮侍宴○諭今春朕恭奉

皇太后鑒興巡省江浙取道閱視河工海塘與

封疆大臣講求吏治民生諸要務念昨冬恭

遇

慈恩覃被之餘正東南士民望幸情殷之候翠

華所過宜沛隆施益光

慶典著將江蘇安徽浙江三省自乾隆二十二

年起至二十六年止所有節年災田緩徵及

未完地丁各欠項照二十二年例概予蠲免

該督撫等其嚴飭所屬悉心覈實奉行俾閭

閭膏澤均霑毋致吏胥中飽副朕錫類推恩

至意該部遵諭速行又諭上年河南祥符

等被水州縣已疊降諭旨令該撫等率屬實

力詳查分別應蠲應賑加意撫綏第念該省

當大功告成去冬各屬屢經得雪轉瞬東作

方興而一屆春和例應停賑小民生計未免

猶覺拮据。著再加恩。將該處被災極重者。加賑兩個月。次重者。加賑一個月。該撫等董率屬員。悉心妥協。經理務令均霑實惠。稱朕軫念災黎至意。該部遵諭速行。○又諭安徽上年被災各屬。視河南雖屬較輕。但念被淹窪地。陸續涸出。處所現在難即翻犁播種。將來麥收尚難豫定。民力未免拮据。著加恩。將此等災地。漕糧漕項。照豫省之例。概行停緩。分作三年帶徵。以示軫念災黎至意。○丁酉。

上詣

皇太后宮問安。○諭曰。理藩院奏敏珠爾多爾濟旗呈請借支俸銀一摺。近歲以來。該旗連值荒歉。生計維艱。朕心甚為憫惻。著加恩。按照十年俸銀。由科爾沁倉貯米石內賞借米石。俟該旗豐收時。再行歸款。○又諭遣喀爾喀王車布登扎布赴藏。照看達賚喇嘛之呼畢勒罕坐牀。車布登扎布著賞銀一千兩治裝。○諭軍機大臣等。據閏相師奏。自揣病勢

漸覺增劇。急難全愈。請解任調理等語。已批諭且俟之。著傳諭楊應琚留心體察。該提近日病勢究竟如何。於一切營伍事務。尚不致貽誤否。速行據實奏聞。○戊戌。諭曰。各省駐防將軍。品階例在總督之上。地方官雖非專屬。而尊卑異等。相見自有一定之儀。載在令典。遵行已久。今嵩椿調任來京。因問及地方政務。據奏別省尚循舊制。陝西一省地方各屬。接見將軍。並不照接見督撫之例。是則甚非政體。國家於省會分駐重兵。將軍職司統轄。有司不循禮節。匪獨體貌攸關。在官必生文武之嫌。在下易滋兵民之事。不可不深防其漸。著通諭各省。俾知恪遵定制。無得稍渝。並令總督楊應琚巡撫鍾音。將該省因何沿習違式之處。查明據實具奏。仍一面悉心整頓。以肅官聯。○又諭。上年北省秋雨過多。如直隸之大名。天津。山東之德州。曹州等濱河各屬。被災雖不及豫省之重。而秋成分數歉

薄。已疊降諭旨。令該督等加意撫綏賑卹。現在東作方興。小民正在青黃不接之時。生計未免竭蹶。著總督方觀承。巡撫阿爾泰。就上年被水地方。體勘輕重情形。有應行展賑者。一面奏聞。一面率屬妥協經理。使閭閻均霑實惠。該部遵諭速行。○又諭曰。額爾德蒙額。著仍在散秩大臣上行走。○是日起。

上以祈穀於

上帝。齋戒三日。○己亥。享。

太廟。遣誠親王允祕恭代行禮。○遣官祭

太歲之神。諭去年近畿秋雨過多。收成分數稍減。現在京城米價。雖未致甚昂。但恐青黃不接之時。市值易致增長。應豫為籌畫。以裕民間口食。著在京總理王大臣。於啟鑾後。酌量市肆情形。於應行平糶時。一面具奏。一面循照前例。於京倉內量撥米石。給五城地方。設廠分糶。令派出之德保。五吉。觀保。書山。阿永。阿錢。維城。納世通。范時紀。廣成。和爾精。

額等。會同該城御史。督率妥協經理。毋使牙僧從中國積。居奇滋弊。俾閭閻均霑實惠。○庚子。

上詣

南郊齋宮齋宿。○諭曰。楊應琚奏。甘肅提督閔相師。病勢有增無減。請暫行解任。調理一摺。閔相師効力戎行。備著勞績。克勝專閫之寄。今既患病未愈。著准其解任。回籍調理。並加恩准食全俸。以示優眷。甘肅提督員缺。著武進陞補授。○辛丑。祈穀於

上帝。

上親詣行禮。○

世祖章皇帝忌辰。遣官祭

孝陵。○諭軍機大臣等。成衮扎布等奏。哈薩克阿布勒巴木比特等。遣使入覲。正月初可至。軍營等語。著派乾清門侍衛等。馳驛前往。遇見使人時。即帶赴南巡行在。仍先期奏聞。○壬寅。

上詣

皇太后宮問安。○御紫光閣。賜蒙古王公台吉回部郡王霍集斯葉爾羌諸回城伯克阿布都哩野木等宴。○諭。向來打牲烏拉採珠人等。間有淹斃。並無恩賞。嗣後著照恩賞兵丁白事例。加一倍賞給。○禮部奏。此次南巡。先經臣部奏請致祭

山川。

先聖先師。並請將乾隆十六年二十二年致祭過先儒名臣等祠墓。照例遣官致祭。伏思先儒名臣。究非

嶽鎮海瀆。

先聖先師可比。今酌議先儒名臣等祠墓二十七處。此次毋庸讀文致祭。屆期臣部奏派扈從大臣一員。拈香奠酒。至兩江總督尹繼善續報銅山縣

河神廟。係二十二年勅建。亦應照祭

山川之例。遣大臣讀文致祭。報可。○閩浙總

督楊廷璋奏。浙省乍浦營原建軍器局一所。以軍裝器械。與火藥同貯。防範未為嚴密。應令別建藥局。諭部知之。○山東巡撫阿爾泰奏。東省各屬現在穀價。每石自八錢至一兩二三錢不等。雖未甚昂。但向前青黃不接。應豫為調劑。請將平糶穀價。每石九錢至一兩者減銀五分。一兩以上至一兩二錢者減銀一錢。至一兩三四錢者減銀二錢。如九錢以下。則價值尚平。無庸減糶。至春耕之時。貸給籽種口糧。應將存倉商社麥穀先行出借。其常平所貯性不耐久之高粱麥豆。酌量借糶兼行。報聞。○癸卯。

上詣

大高殿行禮。○甲辰。

上召大學士及內廷翰林等茶宴。以玉盤聯句。○乙巳。立春。順天府進土牛春山寶座。軍機大臣等議奏。新設察哈爾都統副都統等應辦事宜。一各省將軍都統均給填名勅書。

凡應行應管事件繕入遵行察哈爾初設都統應交內閣編纂填名勅書頒給。又前奉旨命太同宣化總兵聽察哈爾都統節制並入勅書奉行。仍交該部頒給令箭勘合火牌滿洲蒙古條例各一分再旗幟應用何色請旨頒給。一都統副都統俱有關防應添設隨印筆帖式四員以在京八旗滿蒙候補筆帖式補用。六年照例更換都統衙門仍設左右司給關防分辦事件其掌關防及幫辦各官俟嵩椿到任後於察哈爾旗及張家口官員內揀選具奏往來行文傳事亦派官兵設臺站辦理。一張家口理事同知一員照各省駐防例屬都統管轄遇滿蒙民人交涉事件會同左司官員審辦大計年分都統會同總督辦理。一張家口距京甚近都統每年年終奏請陛見候旨遵行副都統每年輪流一人來京總管三年來京一次應來京時都統報部再總管既有統轄分轄仍不准奏事惟至京准

照別城城守尉例奏請聖安。一補放官員總管將應行開列人等由副都統出具考語送都統衙門擬定正陪送該旗帶領引見承襲官爵副都統按家譜揀選送都統衙門閱看年終咨赴該旗帶領引見挑補兵該總管半年一次造冊具報都統該副都統備查。一領俸餉各總管造冊送該副都統用印行都統衙門右司查對彙造總冊用都統印行都統領應行事件各總管呈該副都統行都統該司具稿用都統印咨行。一總管平日照常操兵外本翼副都統量為巡查都統按年每翼巡查一次並訓練行圍一軍政年分照各省駐防例辦理其軍器亦照駐防例該都統三年一次查閱具奏再左右翼八旗事務向係綏遠城將軍及熱河副都統兼管今設都統副都統專管應將前二處勅旨撤回裁去兼管字樣另繕給從之。○又議覆喀什噶爾辦事尚書永貴等奏稱烏嚕木齊一路及回部

各城屯田兵。除烏魯木齊五千名。哈喇沙爾七百餘名。毋庸議裁外。其庫車阿克蘇葉爾羌。喀什噶爾英吉沙爾。和闐烏什等處。或當要路。或近外藩。所駐兵亦應仍舊。惟闡展兵五百四十名。酌留三百名。賽哩木拜兵一百五十名。酌留五十名。應如所奏。將所減兵數汰其老弱廢疾。撥回原營。其空出地畝。令回人承佃。再闡展辦事郎中德爾格奏吐魯番應交官糧四千石。已完。應照原議。每百石賞布五疋。茶五包等語。查現在葉爾羌等處。交納官糧。並無賞賚。事非畫一。若竟行裁減。或無知回人。妄生他議。今闡展餘糧甚裕。兵丁又已議裁。與其解送茶布備賞。不若稍減糧額。應請照賞給價值。減糧五百石。仍傳諭回人。毋得虧缺正額。得旨。吐魯番應交官糧著加恩減免一千石。○丙午。

上奉

皇太后南巡。車駕發京師。○詣

皇太后行宮問安。○賜扈從並送駕王公大臣

直隸地方官員及回部郡王霍集斯。葉爾羌

諸回城伯克阿布都哩野木等宴。○諭察哈

爾都統旗纛作為鑲黃左翼副都統旗纛。作為正白。右翼副都統旗纛作為正黃。○諭軍

機大臣等據熊學鵬奏。隣省辦運銅鉛經過

地方。請照運京銅鉛之例。一體稽查。隨時具

奏一摺。向來各省於運京銅鉛經過。已降旨

令將該境內有無偷漏盜賣情弊。查明具奏。

至隣省銅鉛經過。事同一例。歷來並不奏聞。

辦理原未畫一。嗣後凡遇隣省採辦銅鉛經

過。飭各州縣一體實力稽查。如有偷盜沉溺

情弊。隨時具摺專奏。若查明並無事故者。祇

令於歲底將某省辦運銅鉛若干。並入境出

境日期。彙齊摺奏。各該督撫其留心飭查。妥

辦。毋得視為具文。著於各督撫奏事之便。傳

諭知之。○是日。駐蹕黃新莊行宮。○丁未。諭

朕因巡幸江浙。前經降旨。著照丁丑年之例。

於江浙兩省冬兌漕糧內各截留十萬石豫備臨時平糶之用所有此項減歇漕船向例止給一半月糧於該丁等生計未免拮据著再加恩於應給月糧之外再賞給十分之二該部遵諭速行○又諭朕此次南巡所有經過直隸山東地方本年應徵地丁錢糧俱著加恩蠲免十分之三此內該二省上年偶被偏災處所著蠲免十分之五該督撫等董率屬員查明妥協辦理務俾小民均霑實惠該部遵諭速行○是日駐蹕涿州行宮○戊申廣西巡撫熊學鵬奏慶遠府屬之河池州州同分防三旺南寧府屬之土忠州太平府屬之土思州各州同控制交夷均邊地要缺非知州同城佐貳可比向無關防應補鑄給下部議行○以吏部左侍郎董邦達為左都御史內閣學士程巖為吏部左侍郎起原任禮部侍郎莊存與為內閣學士兼禮部侍郎加賑直隸文安大城天津津軍冀州武邑衛

水長垣八州縣廳并固安霸州保定安州開州東明清河新河南宮武強隆平寧晉寶坻武清高陽新安肅寧交河東光滄州大名元城永年成安廣平雞澤威縣深州二十八州縣水災村莊饑民○是日駐蹕紫泉行宮○已酉上以上元節詣皇太后行宮進宴○廣東布政使史奕昂奏向來外省鄉試應列官卷皆據本生呈報該府州縣造送其父兄實居何職無案可稽且京外各官或陞擢降調及京官改授外任有應於官卷內填入扣除者外省不及周知難免歧誤應請按應得官卷定例將現任在籍文職京官自京堂以上及翰詹科道外官自藩臬以上武職自提鎮以上查明開單知照各本省存案嗣後遇有陞遷事故并呈誤後蒙恩賞復原銜各官均於奉旨後隨時移咨各該員原籍鄉試之年提調衙門將各官有無

子弟入場。按冊行查。有混入官卷者。造送各官議處。下部議行。○廣西巡撫熊學鵬覆奏。查平樂府知府松柏。縱容家人。辱詈知縣姜國城。該知縣並未遵例揭報。輒自來省哭訴。辭官。臣時看其情狀。誤認有賴前代惡習。遂併與松柏題叅革職。遵奉諭旨訓示。始知辦理錯謬。方惶悚自責。是以未敢冒昧覆行。瀆奏。至姜國城。於部文到日。已遵令回任。松柏不行約束家人。違例妄縱。并多索屬縣夫役等款。俱審實。另疏具題。得旨覽。○是日。駐蹕趙北口行宮。

大清高宗法天隆運至誠先覺體元立極敷文奮武孝慈神聖純皇帝實錄卷之六百五十二

大清高宗法天隆運至誠先覺體元立極敷文奮武孝慈神聖純皇帝實錄卷之六百五十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣廣佳

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午正月庚戌諭軍機大臣

等海明等據阿克蘇阿奇木色提巴勒氏等呈稱現在採銅回人一百戶伯克二員不敷差遣請添設伯克一員回人二百戶每年交銅二千八百三十餘觔等語著照所奏辦理至採銅回人所有應交官糧准其豁免俟鼓鑄既足停止採銅時再行按戶徵收不必分派回人等代為完納○是日駐蹕思賢村行宮○辛亥

上詣

皇太后行宮問安○諭此次南巡所有直隸山東派出辦差兵丁著加恩賞給兩月錢糧○軍機大臣等議准伊犁叅贊大臣阿桂奏稱前定回部伯克品級時曾將都管等六伯克俱定為七品上年因遣駐伊犁屯田各加一級准戴六品頂藍翎以示獎勵但六品哈子密喇布伯克缺俱由七品都管伯克等揀選未免等威無別應請除此次賞給六品頂帶伯克等令照常行走外嗣後缺出另補仍用本身品級頂帶再各城阿奇木伯克俱經議給圖記今阿奇木伯克茂薩承辦伊犁屯田事務應兼鑄滿洲托忒回子三體字樣圖記頒給一切事件令伊什罕噶匝納齊等伯克列名呈遞咨行從之○又議覆開展辦事郎中德爾格泰稱吐魯番公素賚瑞屬下回人所役厄魯特男子二名攜帶鳥鎗逃走現行文查拏並聞回人役使厄魯特男婦頗多時有逃者恐流為瑪哈沁前次將肅州厄魯特

發伊犁時。曾因伊等。告有眷屬在回人處。給與官銀取回完聚。請照此例。交各回城駐劄大臣。傳諭回人家有厄魯特願交官者。給價取回。應如所請。仍酌定大口。給價七兩小口。給價三兩。其價即於該回人應納賦稅內扣抵。如無交官之項。即給現銀贖取。發往伊犁安插。從之。○是日。駐蹕太平莊行宮。○壬子。駐蹕紅杏園行宮。○癸丑。賜扈從王公大臣直隸地方官員及回部郡王霍集斯等食。○

是日。駐蹕新莊大營。○甲寅。諭去秋山東被水偏災各屬。雖不至如豫省之重。但現在時當青黃不接。例賑又應停止。小民生計未免拮据。因傳諭該撫阿爾泰。令將各處被災分數查明具奏。今據奏到被災較重之曹縣。城武。德州。濟寧。魚臺等五州縣。著加恩無論極貧次貧俱行加賑一個月。其濱河次重之齊河。金鄉。嘉祥。荷澤。單縣。定陶。鉅野。濮州。范縣。臨清。邱縣。館陶。恩縣。夏津。武城等十五州縣。

成災在八分以上。所有貧民及衛地貧軍亦著加恩展賑一個月。以資接濟。該撫其董率屬員妥協經理。務俾閭閻均霑實惠。副朕軫念窮黎至意。○又諭豫省去秋被水成災之地。已疊降諭旨。加恩撫卹所有災地。借給牛種銀兩。例應於今年麥熟後徵收。其乾隆二十二年舊欠未完牛種銀兩。亦應按年帶徵還項。但念災後貧黎。新舊貸項。同時輸納。未免拮据。著加恩將乾隆二十二年分。祥符等

州縣舊欠未完牛種銀五萬六千餘兩。概予豁免。其二十六年分民借牛種銀兩。並著分作三年帶徵。以紓民力。該部遵諭速行。○又諭曰。理藩院侍郎納延泰病故。所遺員缺著多爾濟補授。多爾濟在西寧辦事年久。著副都統容保前往更換。○青州副都統素玉奏。青州駐防將軍裁汰。酌定副都統衙門各事宜。一副都統既住將軍衙門。其舊署應交地方官估變報部。一原設筆帖式三員。應留二

員裁一員。查此係由委署前鋒考取已列職員。應候驍騎校缺出。咨行兵部。及該旗帶領引見補放。除應得四十名衙役工食外。將軍衙門原設印務處左司右司書辦各二名。阜隸礮手傳送文書共十四名。皆必須人役。請照舊留用。一。理事同知一員。仍令山東巡撫與副都統兼轄。俾不致往返推諉。一。額設馬十五匹。每年應領草豆。除夏秋出廠五個月。餘七個月。半本半折。於青州府庫關支下。部議行。○是日駐蹕德州行宮。○乙卯。

上詣

皇太后行幄問安。○諭去秋豫省堵築楊橋漫工所用稽料價值。特照常例加倍增給。原所以加惠附近貧民。俾踴躍辦運工程。可以速竣。今據張師戴胡寶琮奏。應賠加給銀兩。於該督撫道廳養廉內按數分年扣補。此大非朕准令加價本意。况胡寶琮係因幹事調往。漫溢時並未在豫。自無庸分任賠工。著將加

價一項。概准作正開銷。免令各員分賠。至疎防應賠之項。乃河工定例。自不得概予寬免。致啟工員玩誤之漸。此與加價免賠出自特恩者不同。并諭該督撫等知之。○又諭曰。沈廷芳向在道員任內。奉職尚能。黽勉。因臬司缺員。即予簡擢。乃自任事以來。一味因循。獨善於刑名。讞牘並未實心經理。而上年忽條陳曾子孟子門人請增入祀。並將本朝湯斌從祀學宮。似此捋撻浮文。何濟實政。國家信賞必罰。明示彰瘅。尚未能使天下之人盡皆知所省惕。而猥以已往之人。用虛文進退。謂足轉移風俗。能乎不能。此皆明季相沿陳腐惡習。朕所深惡。且沈廷芳身任臬司。在臬言臬。律例之因革。應言者不少。而喋喋以此為事。其職任曠誤必多。當即降旨。阿爾泰令其留意體察。嗣據覆奏。沈廷芳於所辦事件。並經董率督催。雖無貽誤。而觀其才。具實在難。以勝任。朕批諭以既無大過。尚可姑容。俟南

巡時再行察看。今日召見東省藩臬。見其精力衰頹。已有老病之態。詢以地方政務。亦惟隨人唯諾。並有猶豫懷疑之意。其所見既屬悠謬。重以觀望。心尚冀其力為驅策。克副兩司之職乎。沈廷芳著以原品休致。山東按察使員缺。著閔鶚元補授。俟試事畢。即行任事。現在印務。暫交阿爾泰委人署理。○是日。駐蹕李劉莊大營。○丙辰。諭軍機大臣等。旌額理等奏稱。發往烏嚕木齊屯田違犯等。請先給屯地十二畝。與兵丁一體計畝納糧。伊等亦有攜眷者。酌給地五畝。自行開墾。其未收獲以前。官為養贍家口等語。著照所請。行。伊等俱係免死減等之犯。理宜嚴加管束。果能知罪守分。盡力耕作。尚可姑容。若生事脫逃。自當於本處正法。即尋常闖毆等事。亦不可照內地之例辦理。著即傳諭知之。○陝甘總督楊應琚奏。據張掖山丹東樂等縣詳報。招戶民二百戶。共男婦大小七百八十餘

名口。經咨准烏嚕木齊辦事大臣旌額理等覆稱。本處於二月內種麥。稞三月種粟穀。此項續招民戶。須於三月初旬到屯。始副耕期。隨分四起起程。第一起於正月十六日抵肅。十七日出關。餘三起。間日續發。委都司安德等接起護送。並咨辦事大臣查照。得旨嘉獎。○是日。駐蹕位家莊大營。○丁巳。

上詣

皇太后行幄問安。○諭。此次南巡。經過直隸山東二省。所有辦差文武各官。住俸罰俸降級之案。俱著加恩。准其開復。如無此等參罰案件者。各加一級。○又諭。此次接駕進獻詩冊之胡紹鼎。李宗素。王誠。吳燦。英著各賞給大荷包一對。小荷包二個。○諭軍機大臣等。傳玉奏。派往伊犁等處更換之黑龍江等城官兵一千名。或候欽派大臣帶領。或即令本處協領委營總等送至烏里雅蘇台。再於該大臣等內。出派帶領等語。此次官兵係派出駐

防。非征戰可比。毋庸派出內地及軍營大臣。著即用該協領營總等。送至烏里雅蘇台。成衮扎布等。再派嚮導一員。帶領前往伊犁。○調涼州將軍蘊著。為綏遠城將軍。以原任青州將軍額爾德蒙額。為涼州將軍。○是日。駐蹕崗山大營。○戊午。遣官祭

東嶽。○遣官至曲阜。祭

元聖周公。

先師孔子。○諭。東省去秋被水偏災各屬。已

疊降恩旨。多方撫卹。茲朕鑒輿臨幸。體察民依。雖閭閻氣象和樂。而災黎元氣始復。深為廑懷。該省尚有歷年未完民欠常平商輸等穀。及籽種麥本牛具等銀。例應照數徵收。還項。著再加恩。將惠民商河霑化金鄉。魚臺濟寧州。濟寧衛。荷澤單縣。城武曹縣。定陶范縣。館陶臨清衛等。十五州縣。衛自乾隆十年至二十四年民欠常平商輸等穀三萬七千餘石。及金鄉。魚臺。濟寧等三州縣。二十二三四

等年。民欠籽種麥本牛具等銀一萬四千九百餘兩。概予豁免。俾民力益加寬裕。足資耕作。副朕嘉惠災黎至意。該部遵諭速行。○諭軍機大臣等。談秀奏。前赴江浙地方接駕。摺內。叙前次奏請。陞見緣由。有敬錄硃批。稟請總督之語。甚為舛謬。談秀雖係武夫。然豈有奉朕硃批。乃稱稟請總督之理。何不知大體。一至於此。著傳旨申飭。○是日。駐蹕靈巖寺行宮。○已未。

上詣

皇太后行幄。問安。○諭。上年徐垣奏。黔省新開南明河。徒勞無益。請行停止一摺。伊以在黔身經之事。至調任湖北後。奏請未免取巧卸責。然所奏自屬公論。即降旨交吳達善秉公查覆。今據勘明覆奏。該處多係峭壁。一線河流。洶湧直瀉。現在巨石滿河。船不能行。地方官押令苗民。終年負運。荒廢農功。甚為苦累。請將巡撫周人驥。及委勘之古州兵備道四

十七。混請歲修之費。陽府知府胡邦祐。交部嚴加議處等語。周人驥四十七。胡邦祐俱著嚴加議處。封疆大吏經理地方河運事宜。即始議籌畫未周。工程難以興舉。自應據實奏明改正。本無大咎。若以通省官民兼累之事。而固執已見。始終迴護遂非。則其居心行事。大不可問。況該省地屬苗疆。現在邊圉永靖之時。苗人雖有苦累。亦為安分隱忍。然巡撫竟漠然聽其屈抑而不顧。尚能識安撫之義乎。周人驥前在浙江獲罪。復經朕棄瑕錄用。自當益加奮勉。實心圖報。乃逞其剛愎之見。有心文過若此。不可復留巡撫之任。周人驥著來京候旨。古州道四十七。係委勘大員。惟知迎合慇懃。不惜地方勞費。深為溺職。貴陽府知府胡邦祐。迎合上司。不恤民瘼。俱著解任來京。其餘承勘承修承運各員。均著交部查明分別議處。其開河糜費各項銀兩。俱著於各該員及該管各上司名下照例按數分

賠。至徐垣雖屬取巧。但此事究由伊舉發。姑從寬免其交部。貴州巡撫員缺。著喬光烈補授。輔德著補授河南布政使。其按察使員缺。著郭一裕補授。○諭軍機大臣等。徐垣前奏南明河一摺。雖係地方公務。而奏請於調任之後。未免取巧。當即有旨傳諭。並令吳達善查奏。今據勘覆。該處工程。斷無可辦之理。則周人驥之剛愎遂非。各員之慇懃誤事。更不待言。已有旨諭部矣。在徐垣所言。固不為謬。但在任時既不救正於前。而取巧陳奏。且請以節省冀免分賠之項。則巧為他人開脫。更巧為本身卸責矣。本應交部議處。顧此事究由伊而發。姑為寬免。其應賠之項。不但前任藩司本分按數著賠。如此案各員名下尚有無力完繳者。亦令徐垣代為完繳。則取巧輕重分數。適如其所自取。將此一併諭令徐垣知之。○又諭曰。新柱等奏三等侍衛蘇魯克沁在葉爾羌病故等語。蘇魯克沁病故。雖非

陣亡可比。但伊前在軍營甚屬効力。著加恩賞給恩騎尉。准伊子承襲一次。仍賞銀五十兩。所遺員缺。即交領侍衛內大臣。將曾經揀選侍衛內酌派一員前往。不必再行引見。○又諭。據新柱等奏稱。已達克山之蘇勒坦沙。遣伯德爾格等互通貿易。甚獲裨益。來年欲多攜馬羊物件前來。看其情形。頗為恭順。其使人貿易事畢。始行回巢。乘此可以額敏和卓之意。告知使人。令將布拉呢敦三子獻出。等語如此。辦理甚屬妥協。著即作為額敏和卓之意。令來使回告蘇勒坦沙。從前伊思沐皇仁。曾獻霍集占之首。大皇帝深加嘉賞。屢沛恩施。今聞布拉呢敦三子俱在汝處。布拉呢敦汝之仇讐。其三子將來稍長。安保不別生事端。與其留之時加防範。不若獻之大皇帝。必鑒爾等悃誠。特加賞賚。伊如肯獻。送至此處。我當代為轉奏。如此曉諭去後。仍即奏聞。○又諭。昨武備院將察哈爾官兵到京遲

誤之處。叅奏已降旨。令舒赫德查辦。但此項官兵未到。事在啟鑒之前。何以至今始行奏聞。又未將遲延之故聲明。該院所司何事。安得辭其咎責。旺扎勒。福隆。安老格等。俱交領侍衛內大臣察議具奏。尋奏。察哈爾官兵於正月十三日接奉咨文。即行來京。計扣日期。並無緩滯。實由武備院行文遲延。兵部辦理錯誤。所有支給該兵丁幫銀路費等項。業經領用。難令交還。應著落武備院賠交六分。兵部賠四分。得旨。應如是辦理者。○是日。駐蹕小新莊大營。○庚申。駐蹕魏家莊大營。○辛酉。

上詣

皇太后行幄問安。○諭曰。甘肅提督閔相師久歷戎行。克嫻武畧。隨征西路。奮勇策勲。前因患病。准令暫行解任。并賞給全俸。俾得盡心調攝。以冀速痊。遽聞溘逝。深為軫惜。著加贈太子太保。并賞銀一千兩。治辦喪事。所有應

得卹典。仍著該部察例具奏。○諭軍機大臣等。據楊應琚奏報。提督閔相師已經病故。其提督印務。現在自行兼署等語。所奏甚是。閔相師提督員缺。前已有旨。令武進陞補授。但武進陞到任。尚需時日。該督因員缺緊要。不避小嫌。即自行兼署。深得總制邊圍大臣之體。甚屬可嘉。武進陞未到之前。其提督印務。即著該督署理。留心整飭營伍。著將此傳諭知之。○駐藏辦事大臣集福等奏。衛藏北沿邊一帶。西自阿哩起。東至喀喇烏蘇。安設十三臺站。乾隆二十三年。將軍伯伍彌泰奏。裁經軍機大臣等議。以現值進兵葉爾羌。喀什噶爾。防逆匪竄越。令照舊設。俟應徵時再奏。今大功告蒞。外夷寧謐。實與內地無異。復據噶隆公班第達等呈稱。準噶爾。葉爾羌等。俱蒙聖化。安享太平。衛藏臺站。可無庸設。但徵後。各處邊界。仍合稽查。今酌議。嗣後嚕托克。齊木。納克藏。騰格哩諾爾等處。交本處第巴。

頭目等。每年派人巡察。穆什哲爾根。珠噶哩瑪爾。阿哈雅克等處。每年於棟科爾達木之蒙古官。各派一員巡察。俱令於草萌時往。大雪後回。將原設臺站裁。仍令照所議辦理。得旨嘉獎。○是日。駐蹕中水大營。○壬戌。賜扈從王公大臣。山東地方官員。及回部郡王霍集斯等食。○諭曰。南昌鎮總兵成元震。陞見入京。養病。兗州。來行在接駕。見其年力漸衰。病亦未全愈。南昌要缺。恐難勝任。著解任。回籍調理。成元震久任總兵。尚為熟練。武弁中可以擢任者甚少。將來宿疾全瘳。雖年非少壯。尚可以北省事簡之鎮。酌量任用。成元震即可自行來京。奏請差使。現在南昌鎮總兵員缺。著馬全署理。○是日。駐蹕泉林行宮。○癸亥。

上詣
皇太后行幄問安。○諭軍機大臣等。俄羅斯薩納特衙門咨稱。接准令伊等清查邊界咨文。

請派大臣。與其畢爾噶底爾會同辦理等語。著行文俄羅斯薩納特衙門外。並傳諭桑寨多爾濟等。此事著派三都布多爾濟。隨諾木琿前往。務照原定疆界圖樣。視俄羅斯現立木柵。如在彼界內。即聽照舊設立。如踰越侵占。宜照彼來文所稱。即行拆毀。不必游移。再查看卡座。收納稅務等事。亦著諾木琿順便清查辦理。○宗人府奏。應行襲封宗室等。已照例考試。恭候欽定。得旨。亮慶。謨亮。亮魁。俱授為三等鎮國將軍。璦寧。授為二等奉國將軍。永珂。亮炷。俱授為三等奉國將軍。永悌。授為一等奉國將軍。永增。授為奉恩將軍。亮煥。授為三等輔國將軍。○以西安協領阿爾薩蘭為荊州副都統。○是日。駐蹕東京堡大營。○甲子。駐蹕楊家莊大營。○是月。直隸總督方觀承奏。直屬上年水災。糧值增昂。向前青黃不接之時。尤宜豫籌減糶。現酌量本年情形。應請照乾隆二十五年例。每石一兩五錢

至八錢者。減銀一錢。一兩八錢至二兩者。減銀二錢。二兩一錢以上。統減銀三錢。其一兩五錢以下。仍遵定例。得旨。依議速行。○陝甘總督楊應琚奏。陝甘二省軍裝。向聽各營承造。規式參差。又自詳允修補後。將備委之弁目。弁目聽之匠工。草率不堪適用。現查蘭涼甘肅一帶各營。所存鳥鎗弓箭等項。未能一律銛利。且今大功告成。各營撥缺軍裝。并需補製。請照閩浙例。於兩省提鎮駐劄處。各設公局。遇應製軍裝器械。確估造報。督臣覈移該提鎮。遵委標員。同該協營員弁。於局內監匠如式妥造。製成。呈提鎮驗發。該協營應用。如違式及減料。參追另造。得旨。甚好。如所議行。○又會同甘肅巡撫明德議覆。布政使吳紹詩奏。請將乾隆二十六年民借倉糧各色准抵查甘省地寒。歲止一收。民間種植。各隨土宜。必令交還原色。勢致售此易彼。輾轉虧折。應如所請。原借上色者。准以小麥粟米

抵交下色者。准以大豆青稞抵交至豌豆一項。河西地方。皆駐重兵。需用既多。民間又皆磨麪作食。價值與米麥無異。應准與米麥併抵河東各屬。不得援此為例。又二十六年。折借銀二萬餘兩。現歲豐民有餘粟。亦應令願完本色者。照時價改徵。願交銀者聽得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之六百五十三

大清高宗法天隆運至誠先覺體元立極敷文奮武孝慈神聖純皇帝實錄卷之六百五十四

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭戶部管理吏部理藩院事務正黃旗滿洲副都統世襲副都統加七級隨帶加一級尋常加二級軍功紀錄一次臣慶桂總載官經筵講官太子太傅文華殿大學士文淵閣領侍衛內大臣稽察欽奉 上諭軍機處事務世襲騎都尉軍功加十九級隨帶加二級又加二級量諸內大臣戶部尚書領滿洲副都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午二月乙丑朔

上詣

皇太后行幄問安。○以正黃旗滿洲副都統努

三兼前鋒統領。是日駐蹕橋頭大營。○丙

寅賜扈從王公大臣江南山東地方官員及

回部郡王霍集斯等食。○是日駐蹕郊子花

園行宮。○丁卯。

上詣

皇太后行幄問安。○祭

先師孔子遣平郡王慶恒行禮。諭上年曾

降旨於兩淮運庫內撥銀三十萬兩。交與總督尹繼善辦理差務。但恐尚有不敷。著高恒於運庫內酌量再撥銀二十萬兩。以為添補辦差之用。○諭軍機大臣等。據洋海奏通州自北而南船隻應悉行迴避一摺。所見甚屬紕繆。運河為南北往來通衢。將來

皇太后迴鑾時。商民船隻遇有支河汊港原可暫引迴避。即無可避之處。亦令附泊傍岸。不致妨礙。緯道可耳。若專為關防起見。則御舟

舵工水手。在外執事者。且不令其迴避。何況行人而先期盡行禁阻可乎。洋海人本拘泥。全未通曉事理。著傳旨申飭。并傳諭倉場侍郎。河道總督等。及摺內咨行各該處。一切照常放行。毋得稍有攔阻。○命兵科給事中蔣元益提督山東學政。○是日駐蹕龍泉莊大營。○戊辰祭

大社。

大稷。遣果親王弘瞻恭代行禮。○遣官祭

河瀆。

淮瀆之神。並遣官至故河道總督靳輔等合祠拈香奠酒。○諭朕清蹕時巡。聿昭慶典。所有江浙二省派出辦差兵丁。著加恩賞給兩月錢糧。以示恩賚。○又諭朕恭奉

皇太后鑾輿。巡省江浙。前已特頒恩旨。將該二省積欠地丁全行豁免。茲入疆伊始。慶澤宜行。所有江南浙江水陸經過地方。本年應徵額賦。俱著加恩蠲免十分之三。此內或有去

秋被水歉收者。蠲免十分之五。該督撫等其董率屬員。實力奉行。稱朕子惠黎元至意。該部遵諭速行。○又諭宿遷一帶州縣地方。濱臨大河。向來歲收率多歉薄。現在巡行省視。見閭閻氣象較前似覺稍舒。而生計未能優裕。時值春和。農功肇舉。尚需加恩接濟。著該督等從優酌借籽種。俾從容東作。以冀有秋。該部遵諭速行。○諭軍機大臣等。額爾德蒙額補授涼州將軍。著即赴新任。不必前來行

營請訓○戶部議准山西巡撫鄂弼奏稱綏遠城駐防官兵糧餉每歲不敷本色粟米二萬石從前係於歸化和林格爾清水河托克托城薩拉齊寧遠豐鎮等七廳草折地租銀徵解綏遠同知豫行採買民既售米完銀官復將銀採米輾轉紛煩請自乾隆二十六年始改徵本色以抵不敷之數長遠停止採買其徵解運腳每石每百里准銷銀一錢從之○以正黃旗滿洲副都統努三為鑲藍旗蒙

中書卷之二十二

古都統○以署固原提督肅州鎮總兵五福為安西提督○予故喀爾喀親王德沁扎布祭如例○予故鄂爾多斯輔國公扎木巴勒多爾濟祭如例○是日駐蹕順河集行宮○已巳

上詣

皇太后行幄問安○諭朕巡省江浙所過地方並未禁止行旅將來旋蹕時

皇太后御舟由水路進京程途尤為穩便昨巡

漕給事中洋海乃先期奏請自通州南下船隻悉令迴避所見甚屬紕繆運河為南北通津舟楫往來相望即屆

聖母御舟經過時旁有支河汊港自可暫行引避設其地別無可避亦第附泊傍岸不致妨礙緯道足矣若豫事盡行飭禁則自春涉夏為日頗長以千里長河使行者久羈道路於事理全未通曉已傳旨申飭並傳諭經行各處一切如常放行但江浙二省水程更多有

江北卷之二十二

司不能曉事或有似此拘泥辦理者並著各該督撫即飭知沿河各地方官凡商民船隻均令照常行走毋得稍有禁阻將此通諭知之○又諭上年江省被災各州縣已疊頒諭旨加恩賑卹但念時值春和東作方興民力不無竭蹶著再加恩將高郵寶應甘泉泰州山陽安東桃源清河銅山沛縣睢寧等十一州縣無論極次貧民俱加賑一月至安徽省之太和亳州阜陽潁上靈璧等五州縣亦著

一體加賑一月。以示惠養。黎元至意。該部遵諭速行。○諭軍機大臣等。據楊廷璋等奏。請豫備食物果品一摺。此等原為賞賜筵宴充用。豫備亦無不可。但次數不必如此之多。應較上次酌量減省。大約於石門及西湖行宮。每處各備一次足矣。至進膳一節。朕從前皆不准行。該督撫等更無庸計及。將此即行傳諭知之。○又諭曰。旌額理等奏。阿思哈於前往查勘瑪納斯等處屯田之便。酌帶兵丁往額林哈畢爾噶搜捕瑪哈沁。領隊侍衛薩木坦。告請効力。已一同起程等語。薩木坦在烏魯木齊。已逾三載。自應令其回京。現在軍營侍衛足敷差遣。亦無需用。乾清門侍衛之處。薩木坦回營時。即著來京。○又諭曰。成衮扎布奏。喀爾喀達什朋楚克等官兵。同杜爾伯特扎哈沁兵丁五十名。護送伊犁牛羊駝隻。於二月起程。本年即可轉回。似不必給與一年錢糧等語。喀爾喀係舊臣僕。著照所請行。

杜爾伯特新附。且人亦不多。從前既有豫支錢糧之例。此次著仍行賞給。○是日駐蹕林家莊大營。○庚午。遣官祭關帝廟。○諭軍機大臣等。馮鈴奏。宜章縣拏獲兵部役滿書辦黃景運。在外滋事。並搜出與原任鎮守備蔣鰲行賄陞官等事。不法已極。應徹底根究。以正刑章。現已諭尹繼善。即將蔣鰲押解楚省質訊。並交舒赫德李侍堯。在部確查嚴究矣。所有該撫現審詳細全供。可即彙鈔密行寄京。以憑查辦。至案內應行提訊之馬元齡。並著解任調省質對其餘應審人犯。俱著該撫研審定擬。即行解部治罪。勿得稍存姑息。至該犯黃景運等解京時。務宜遴選妥幹員役沿途慎密防範。毋致疎脫。其宜章縣知縣張時棟。留心盤獲其人。頗為能事。如平日居官果能盡職。即於此案審辦完結時。出具考語送部引見。將此一併傳諭知之。○又諭曰。馮鈴奏。宜章縣拏獲兵部

役滿書吏黃景運並搜出攜帶湖廣省經制冊檔且有與鎮守備蔣鰲行賄謀陞遊擊都司一案其事不法已極已令提犯徹底根究以正刑章但內部庫貯冊籍何至為役滿書吏竊取招搖且其中不無經承在京作弊分遣同司之人出外色攬情事而蔣鰲於乾隆二十四年掣籤陞任於選法有無情弊即可於職方司逐一根究使該犯同夥不致漏網著傳諭舒赫德李侍堯令其密速嚴查該犯於何年在部充吏何年出部並同時同司辦事者尚有何人并確覈該司選法及掣籤各簿詳悉查辦具奏現已降旨馮鈐令其將全供錄送可先將該撫原摺清單一併鈔寄閱看尋奏查黃景運係古北口提督衙門已革書役蔣鰲係邊俸報滿推陞實無攬越湖南經制冊現存惟據職方司經承黃贊中供稱伊兄黃在中前充湖南科經承曾鈔寫一過黃景運所攜應即鈔本並據領催何書供

有蔣鰲賄囑黃在中一節查黃景運係黃在中之叔代為赴楚索銀包攬撞騙情事顯然報聞○又諭曰蘇昌等奏審訊陽江縣姚見等貼揭罷考分別定案一摺擬議尚有姑息之處已令軍機大臣會同該部覈擬速奏姚見護兄咆哮縣庭造謀貼揭恐嚇罷考實為案內罪魁應明正典刑以懲不法乃稱在逃病故而開棺驗屍不過有司憑取仵作填格為據此等狡獪匪徒詭詐百出其中必有潛蹤免脫買尸捏飾情事況該犯之兄姚嗣勝殺人買充已成習慣伎倆又焉知姚見之用其故智設計俾免此案何得僅以憑信報案率爾完結現在法司定議將該犯戮屍梟示使真犯尚在脫逃一聞此信則自防日疎蹤跡易露正可乘機躡緝著傳諭該督撫等悉心密行根究務俾就獲兇頑不致漏網稽誅倘該犯潛匿他處亦即密咨附近如福建廣西江西等鄰省令其一體留心協緝但不

得張皇其事。轉令聞風遠颺。將此詳諭知之。

○命兩江總督尹繼善為御前大臣。○以湖北按察使沈作朋為布政使。督糧道高誠為按察使。○葉爾羌阿奇木伯克等辦送回人一百三十戶。和闐伯克等辦送回人二十四戶。前往伊犁屯田。命賞如例。○是日駐蹕魯家莊大營。○辛未。遣官祭昭忠祠。○賜扈從王公大臣。江南地方官員。及回部郡王霍集斯等食。○以司經局洗馬史貽謨充日講起居注官。○是日。駐蹕徐家渡大營。○壬申。上至河岸祭

河神。○奉

皇太后渡河。○詣

皇太后御舟問安。○閱清口東壩。惠濟閘。○諭原任左都御史梅穀成。以康熙間舊人。服官有年。休致在籍。今前來接駕。雖齒踰八秩。而神明不衰。居鄉亦復安靜。洵屬昇平耄瑞。念其家計清素。諸子內亦無通籍之人。著加恩

將伊長子梅斌賞給舉人。一體會試。以示優眷。○命兵部尚書阿里衮為御前大臣。兩江總督高晉為內大臣。○是日。御舟駐蹕直隸厥。○癸酉。諭古北口提督吳進義。宣力戎行。足膺表率。以年踰大耋。特加恩。顧茲聞患病。溘逝。深為軫恤。著晉贈太子太保。加祭一壇。其所有應得卹典。仍著該部察例具奏。○又諭。此次接駕進獻詩冊之梁奇通。吳祖修。陳顧澐。俱著各賞緞一疋。○諭軍機大臣等。據達桑阿奏。哈喇沙爾現有試用官四員。効力官一員。請照現任官員例。以三年為限。視其行走何如。再准更換。其現任道員蘇凌阿。請旨定限等語。前經舒赫德等定議。三年更換之例。今達桑阿所奏。自屬循照辦理。但伊等究係試用。及効力人員。與現任官員有間。若行走平常。理應仍留二三年。再行請旨。其蘇凌阿。係命往辦事之員。著候三年限滿。奏請派員更換。又諭。曰。達桑阿奏。玉古爾庫爾

勒之伯克等因阿克蘇採銅伯克等加倍交納銅觔。情願增派採銅回人四十名等語。阿克蘇地廣。需用錢文處多。因允該伯克等所請。添派採銅人戶。玉古爾較阿克蘇甚小。若多採銅觔。恐滋紛擾。可不必添派。○調江南提督齊斌。為古北口提督。以壽春鎮總兵王綏為江南提督。調雲南鶴麗鎮總兵七十一為壽春鎮總兵。以陝西城守營副將左秀為鶴麗鎮總兵。○是日。御舟駐蹕平橋。甲戌。

上詣

皇太后御舟問安。○

皇后千秋令節。停止行禮筵宴。○遣官祭

先醫之神。○諭軍機大臣等。永貴等奏英吉

沙爾阿奇木伯克素勒坦和卓呈稱本年秋

收頗裕。與眾伯克等議。除原定糧石五百四

十帕特瑪外。多收五十一帕特瑪。仍係十分

取一。嗣後查覈多出之數。即行呈報等語。素

勒坦和卓勤於勸課。既足糧額。復有盈餘。甚

屬可嘉。永貴等已給與蟒緞一端。著再加恩賞緞二端。但豐年既多收糧石。若遇歉收之年。亦應酌減。方為平允。嗣後著據實呈報。因時增減。副朕體恤回人之意。○是日。御舟駐蹕海棠巷。○乙亥。

孝康章皇后忌辰。遣官祭。

孝陵。○諭軍機大臣等新柱等奏稱葉爾羌喀

什噶爾和闐三城回人等。每月以普爾換易

新錢。已令減半交納。請俟新錢流通時再為

酌減等語。換易普爾。不過使回人通用新錢。

自應酌量情形。何必限以成數。況以兩普爾

易一新錢。行之已二三年。諒所收普爾亦足

供鼓鑄。若仍照前例。恐有妨回人生計。著加

恩以一普爾易一新錢。則回人無所虧損。而

舊普爾亦必盡收。著傳諭新柱等。嗣後遵照

辦理。○又諭曰。開泰等奏金川請襲土司莎

羅奔之缺。無庸取具土舍頭人暨隣封土司

甘結一摺。在該督等如此辦理。意在直截簡

便且不令土司等復因此通同附和。所見固是。然不為卽卡等明白宣諭。恐此等土舍不知懷畏。轉疑開泰等有意遷就。一似徇其所請。竟不待各處甘結者然。或致潛生驕縱。殊非控馭之道。著傳諭開泰岳鍾璜。卽行曉諭卽卡等。謂鄰近土司與爾素無嫌隙。今因承襲之事。照例取結。伊等定不樂從。今據爾懇求。竟免其輟轉取結。以示加惠土司之意。但襲職之後。在爾與鄰境諸部。既不能相協。而封疆大臣亦斷不肯為爾少貸。如此方足令其知所儆惕。於體制亦為允協。○是日御舟駐蹕崇家灣。○丙子。

上詣

皇太后行宮問安。○諭朕此次南巡。所有江浙二省辦差文武各官。任內罰俸住俸降級之案。俱著加恩准其開復。其無此等參罰案件者。著各加一級以昭慶典。○又諭據楊應琚奏興漢鎮總兵金梁現丁父憂。該員駐劄伊

犁。現有承辦經理事務。請暫停開缺等語。金梁在伊犁實為出力得用之人。著賞給伊家銀五百兩。令伊弟料理喪事。並照該督所請。令其在任守制。仍留伊犁。不必開缺。○諭軍機大臣等。熊學鵬奏。汛兵鄧一喜。砍死私販硝觔尹志遠一案。兵丁果以秉公盤詰私硝。格殺拒捕之人。自當照例辦理。今鄧一喜初因尹志遠許給錢文。既已欲為容隱。則此後之格鬪。其中或有別情。不得徑以罪人拒捕論矣。且私販之人已死。焉知拒捕之言。非誣賴乎。雖供詞內有聽從鋪司文經烈之言。改悔捕毆。但僅係一面之詞。豈可遽行憑信。看來該撫所稱講索不遂及致死滅口各情節。定屬應有之事。著傳諭熊學鵬。令其悉心研訊。務得毆斃實情。按律定擬。不得但因錢未入手。遂爾遷就完案也。○禮部題朝鮮國王李昫遣使表賀。

萬壽冬至元旦三大節。及進歲貢方物賞賚筵宴。

如例。○兩廣總督蘇昌等奏廣西太平府屬分駐明江同知帶管之土上石西州。龍州通判帶管之土下龍州。及寧明永康左各州。有官租銀一千三百一十四兩七錢零。穀二百二十七石六斗。係從前土司收為雜用之項。改流以後。邊地公用無出。仍令頭目收取。支給。繼因頭目侵漁加派。始官收官辦。查沿邊設有卡隘排柵塘房。及巡防之隘目保練人等所需歲修工食。皆取給此項。應飭造冊報部立案。嗣後責令道府按年查明實支實給數目具冊申送院司覈銷。有餘另解充公。該廳州縣濫派及浮報叅處。下部知之。○閩浙總督署福建巡撫楊廷璋疏報閩縣侯官屏南永福南安將樂建安建陽浦城上杭霞浦福鼎福安漳平龍巖寧德羅源莆田南靖長泰歸化壽寧同安長汀等州縣。乾隆二十五年分共開墾水旱民屯山園地四十八頃七十五畝有奇。○建浙江青田縣縣丞移駐龍泉縣

安仁莊署。從巡撫莊有恭請也。○是日。駐蹕天寧寺行宮。至戊寅。皆如之。○丁丑。哈薩克使臣策伯克等入覲。

上召見。賜冠服有差。賜扈從王公大臣江南浙江地方官員及回部郡王霍集斯哈薩克使臣策伯克等宴。○諭軍機大臣等。據如松將西安馬甲阿納泰點驗具控一案。審明定擬具奏前來。前閱鐘音奏此案摺內詞意含糊。既謂嵩椿所言太過。復不明白聲叙。彼時朕即降旨申飭。今閱如松所奏。與鐘音相符。則嵩椿前奏殊屬非是。阿納泰既欠民人張茂祺銀兩。安有不許其追索之理。即張茂祺剝去伊衣。亦從索欠起見。阿納泰輒至撫署點驗具告。何得如此妄為。自係嵩椿平日縱容所致。著申飭。並傳諭如松。此等惡習。斷不可長。將阿納泰從重治罪。以示懲儆。嗣後辦理諸事。惟當秉公持正。不可稍存瞻徇姑息之見。○戊寅。

上詣

皇太后行宮問安。○遣官祭

江瀆之神。並遣官至周泰伯祠。吳季札祠。先

賢言子祠。宋臣宗澤韓世忠范仲淹及故大

學士張玉書尚書趙申喬總河陳鵬年巡撫

湯斌張伯行潘思渠等祠。拈香奠酒。○賜扈

從王公大臣等食。○諭朕此次南巡。省方問

俗。翠華所過。慶典時行。念兩淮竈戶。僻處海

濱。生計殊為艱苦。所有從前帶徵未完折價

增補卷六五五

二八

銀九十餘兩。著加恩一體豁免。以示優恤。

又諭朕此次南巡。所有兩淮商民承辦差務。

皆能踴躍急公。宜沛特恩。以示獎勵。其已加

奉宸院卿銜之黃履暹洪徵治江春吳禧祖

各加一級。已加按察使銜之徐士業汪立德

王鼎俱著加奉宸院卿銜。李志勳汪秉德畢

本恕汪燾著各加按察使銜。程徵榮著賞給

六品職銜。程揚宗程均吳山玉汪長馨俱著

各加一級。○又諭兩淮商民現已加恩優叙

更念該商等銷引辦課。歲額通完。而於承辦

差務。尤能踴躍急公。深堪嘉予。著再加恩。自

壬午綱為始。綱鹽食鹽每引加賞十觔。不在

原定成本之內。以二年為限。庶民食既足。而

商力亦紓。用示恤商愛民之意。○己卯。賜扈

從王公大臣江南浙江地方官員及回部郡

王霍集斯哈薩克使臣策伯克等食。○禮部

議准四川學政陳荃奏稱茂州及所屬保縣

增補卷六五五

五

學額各十二名。松潘廳越嶲衛學額各八名。

該處均屬邊徼。向學者寡。致有隣縣之人假

借糧名應試。又資州八名。眉州十名。新寧四

名。則額少人多。不無偏枯。應請將茂州保縣

各減四名。松潘越嶲各減二名。於資州酌加

四名。眉州酌加二名。均足十二名之數。新寧

酌加四名。尚餘減去之二名。俟松潘等處人

文漸盛。奏請增給。從之。○封回部扎薩克頭

等台吉圖爾都為輔國公。○以喀爾喀陣亡

之二等協理台吉津扎布子根敦扎布承襲

頭等台吉。○是日駐蹕高旻寺行宮。

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十四

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功級錄一次建康陸

總處官經筵講官太子太傅大學士文淵閣領閣事稽察欽奉 上諭事務處管理刑部主事奉

世襲騎都尉軍功加十九級隨帶加二級又加二級軍功內大臣戶部尚書鑲黃旗滿洲都統軍功級錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午二月庚辰

實錄卷之六十五

上至京口祭

江神 奉

皇太后渡江 閱京口水師 詣

皇太后行宮問安 遣官祭黑龍潭

昭靈沛澤龍王之神玉泉山

惠濟慈佑龍王之神 諭自京隨來水手網

戶各賞一月錢糧江南水手頭目各賞一兩

重銀銀二個水手各賞一兩重銀銀一個拉

緯河兵一千名各賞一月錢糧 是日駐蹕

金山行宮翼日如之○辛巳

上幸焦山○閱京口水師○諭朕奉

皇太后鑒與南巡江浙行慶施惠愷澤洪敷而優老引年推

恩宜渥所有江浙二省及經過地方男婦年七十以上者俱著加恩照前恩詔例一體賞賚以廣

慈福○又諭朕稽古省方推

恩錫福其江寧京口杭州乍浦等駐防旗人男

實錄卷六五五

二

婦年七十以上者亦著照從前恩詔例一體賞賚以敷慶澤 壬午

上詣

皇太后御舟問安○諭軍機大臣等向來巡幸所至間有豫備燈船烟火殊覺繁俗適在揚州不過為哈薩克陪臣入覲瞻仰聊示內地民情和樂之意在朕初不以此為事至幾餘適情則江山勝覽豈不足供吟眺何用多此煩費為耶倘浙省不知亦仿

照豫備更屬不必現已降旨停止恐部文到彼稽遲先將此速行傳諭知之○

又諭曰阿桂奏哈薩克阿布丹素旺鄂拓克之哈喇圖魯什遣伊子弟前來貿易送出厄魯特男婦大小四十四名口已酌量獎賞布帛等語哈喇圖魯什聞伊犁安插厄魯特即將所收男婦送出固見誠悃亦不無希冀賞賚著加恩照前賞之數各增一分遇便頒給仍以朕

實錄卷六五五

三

旨宣示○又諭曰阿桂奏稱上年驅逐哈薩克兵回後仍有潛來過冬者因遣伊勒圖豐訥亨帶兵三百餘名由庫克托木嶺將潛來巴柴勒布西之哈薩克捕獲三四人收其馬羣解送伊犁查訊擇其人尚明白者釋放令回傳諭等語所辦甚為妥協哈薩克性喜微倖伺我兵撤回乘間駐牧皆事所必有姑念伊等業經歸附此次再行寬免著傳諭阿

桂將哈薩克人等擒至伊犁即諭云大皇帝
屢經降旨謂哈薩克不當越境游牧我等復
三次驅逐仍不悛改因拏獲數人請旨解京
治罪奉大皇帝旨謂我等奏請究辦甚是但
念哈薩克歸附未久性復愚蒙不忍即行治
罪仍加恩姑從寬免嗣後如不知畏懼有擅
入游牧者即照我等所奏辦理此大皇帝格
外施恩不可再得傳諭後量給口糧遣回仍
將續辦情形具奏○軍機大臣議覆陝甘總

書錄卷五十五

四

督楊應琚奏稱前青海辦事大臣多爾濟請
將青海入官曠地撥給該扎薩克等游牧查
羅布藏丹津入官之地係與西寧甘肅等提
鎮地界毗連原奏所指察罕鄂博伯勒齊爾
廟洮賚郭勒等處現係西寧甘肅等提鎮牧
放官馬廠地其巴爾敦郭勒特爾懇達坂等
處現有黃黑番族住牧安插日久且每歲貢
馬納糧均未便議撥惟素拉郭勒西爾噶勒
金二處東西五百餘里南北三十餘里現聞

曠且與該扎薩克等游牧相近堪以賞給至
西爾噶勒金過河即係產礦山場曾經開採
嗣封禁應指明定界飭交該扎薩克就近看
守應如所請並畫定北以山梁為界西以河
為界河東聽其駐牧河西嶺山即照青海察
察寧楚爾鉛礦之例飭交看守毋許越界盜
採從之○在京總理事務和碩誠親王允祕
等奏遵旨於京倉內酌撥三色米五萬石分
給五城設廠平糶並會同該城御史赴廠稽

書錄卷五十五

五

查其每石官價各減市價大制錢一百文所
糶錢交戶部搭放兵餉報聞○是日御舟駐
蹕三義閣○癸未兵部議准原任綏遠城將
軍署歸化城都統舒明奏稱歸化城都統裁
去一缺現止都統一員統轄從前土默特左
右兩翼關防二顆未便鈐用請改鑄頒給從
之是日駐蹕政成橋大營○甲申遣官祭
賢良祠○賜哈薩克阿布勒巴木比特阿布
勒比斯沙呢雅斯蘇勒統罕和卓博羅特蘇

勒統勅書曰爾等遣策伯克等入覲朕適巡幸南服特遣侍衛護送爾使人等至行在加恩宴賚今遣令起程所賜爾阿布勒巴木比特等緞疋綢綾器什及使人冠服器什銀兩各有差從前爾等所告搶掠哈薩克之瑪哈沁查明首惡係色布騰等我兵追入俄羅斯該部落盡行縛獻訊出傷我官兵情事俱已正法至伊犁駐兵凡塔爾巴哈台巴爾楚克等處與爾等游牧相近既為朕臣僕當聽將軍大臣等約束不可越境游牧致遭驅逐又去年送爾等使人之喀爾喀梅楞達什敦多布邁瑪哈沁被掠至爾沙呢雅斯蘇勒統所屬章呼斯巴圖爾巴雅木拜之地即派沙爾噶勒岱等護送轉回具見爾沙呢雅斯蘇勒統恭順之忱朕甚嘉悅故於常賜外賞賚有加章呼斯巴圖爾等亦俱賞賜沙爾噶勒岱此次親來又加賞銀兩其各祇受爾等惟約束所部永矢惇忱以受無窮之澤 四川成

都副都統富椿奏成都駐防兵向給官房馬甲每名三間匠役二間其步甲礮手未給計初設駐防至今四十餘年生齒漸繁步甲礮手缺出俱以滿洲幼丁挑補閒散者尚六百餘名每名步甲家屬四五口至六七口不等皆於隙地壓蓋草房易致朽爛查現無官房者四百四十八名請動馬厰開墾窪地租銀二千餘兩於滿城西南附近教場空地建瓦房一百四十四間分給每名二間再此項地租每歲收銀八百餘兩並請嗣後三年一次奏請添建約至六次步甲礮手等皆得棲止得旨著照所請行 是日駐蹕十里亭大營

○乙酉

上詣

皇太后行宮問安 賜扈從王公大臣等食諭扈從南巡之漢大臣籍隸江浙二省者著於迴鑾時酌量道途所便請假歸省 諭軍機大臣等據將軍成衮扎布等奏俄羅斯畢

爾噶底爾咨文內稱烏梁海逃人二百餘名竄入喀喇薩尼雅爾地方業經拏獲請遣大臣至彼領取等語前瑪哈沁色布騰等竄入彼地即行擒獲解送前來今復將逃人送出甚屬遵守定約前自彼處逃來之玉爾喜內等亦當送還著寄信額勒登額酌派兵丁並於布林所屬厄魯特內擇其技藝好者數人帶往將玉爾喜內等送至恰克圖會同桑寨多爾濟等明白交付內有已經病故者亦著

實錄卷一百一十五

記明告知其領回逃人著額勒登額解京交部審辦勿使一名脫逃再彼處現無事體額勒登額副都統印務即交協領暫行護理○又諭曰俄羅斯咨請領取逃人三都布多爾濟徑以該處尚未具報俟查明後再行派人往領等語咨覆此事有何應查之處設非內地逃人彼安有假稱內地逃人送來之理三都布多爾濟妄存狐疑遇事推諉著交部嚴加議處成衮扎布知而不斥其非但奏請飭

莫尼扎布查辦甚屬非是成衮扎布及彼處叅贊大臣俱著申飭廣東巡撫託恩多奏近年創獲人犯多發遣雲貴兩廣定例在配脫逃獲日改發黑龍江等處為奴但此輩或係盛京等處旗民及直隸山東流寓若照例改發反近鄉里與加等之例意未符應請嗣後雲貴兩廣此等人犯均改發開展烏魯木齊等處給種地兵丁為奴得旨著照所請行○是日駐蹕蘇州府行宮丙戌諭此次跟

實錄卷一百一十五

隨人等雖俱加恩賞賚但內地行走與邊外不同所用之項皆須少增著交總理行營王大臣等將此次跟隨並留王家營各項人等如何加恩賞給之處分別定議具奏其賞銀在兩淮鹽政庫貯公項內動用尋奏查乾隆二十二年南巡隨從人等照十六年總理行營大臣等議定各條賞給此次應仍照十六年例得旨莊親王著賞銀五百兩簡親王額駙色布騰巴勒珠爾傅恒著各賞銀四百兩

扎拉豐阿、兆惠、阿里衮、富德著各賞銀三百兩。劉統勲、旺扎勒、努三、福隆安、劉綸于敏中著賞給一年正俸，留住王家營人等減半賞給。餘依議。○吏部議：新開南明河糜費累民之原，任貴州巡撫周人驥照撫綏無術例革職。得旨：周人驥著革職。○兵部議：准雲貴總督吳達善奏稱：滇黔兩省各標協營每兵千設藤牌五百提督撫標兵多，藤牌尚成隊伍各鎮協營兵有分防汛守護餉鞘等差，藤牌兵少且不用，請以七成改為烏鎗手三成，改為弓箭手從之。○蠲免河南祥符、陳留、杞縣、通許、尉氏、中牟、陽武、封邱、蘭陽、儀封、鄭州、滎澤、汜水、鹿邑、虞城、睢州、考城、柘城、湯陰、臨漳、內黃、汲縣、新鄉、輝縣、獲嘉、延津、滑縣、濬縣、河內、濟源、修武、武陟、溫縣、原武、偃師、鞏縣、孟津、淮寧、西華、項城、沈邱、太康、扶溝等四十三州縣。乾隆二十六年水災錢糧有差並緩徵勘不成災之洧川、鄆陵、河陰、寧陵、安陽、孟

縣、洛陽、宜陽、澠池、新野、浙川等十一州縣本年額賦。○旌表守正捐軀之浙江江山縣民王兆貴妻徐氏。是日駐蹕靈巖山行宮翼日如之。○丁亥

上詣

皇太后行宮問安。吏部議覆順天府府尹羅源漢奏稱：向例順天府屬自治中通判至大宛兩縣印佐各官京察之年府尹出具考語咨送部科。大計之年復由督臣附疏會題考

覈。雖勤轉成故事，查治中通判經歷照磨司獄滿漢教職等官皆府屬府尹知其賢否，應歸京察其保列一等者准同部院司員一體引見。大宛兩縣印佐各官所辦事件與京外各官無異，應歸大計聽直隸總督會同府尹舉劾。又崇文門副使一員專司稅務嗣後京察應令崇文門監督出具考語徑送該管大臣覈辦均如所奏。再查奉天府屬城內官員向與順天府一例亦應令該府尹查明何官

專歸京察。何官專歸大計。分別辦理從之。
戊子。

上詣蘇州府

文廟行禮。○諭軍機大臣等。佟銘冒借宗人府銀兩一案。前因該犯脫逃。曾經降旨令提督衙門五城順天府嚴行查拏。今經日久。何以未見獲報。著傳諭舒赫德。即將佟銘一犯。曾否弋獲。並現在如何躡緝辦理之處。即速查明具奏。○又諭據正白旗都統奏。派往綏

遠城駐防巴延布。行至延慶州。逞兇持刀扎傷五人。現在該州監禁。應行文地方官審明。遞解綏遠城正法示衆等語。巴延布係派往駐防兵丁。乃敢於途次持刀逞兇。連扎五人。情甚可惡。若審明之日。遞解前往。恐致途中免脫。著傳諭方觀承。令其遴選幹弁。將該犯拏解綏遠城。交與該將軍即行正法示衆。以昭炯戒。○是日駐蹕蘇州府行宮。至庚寅昏如之。已丑春分朝。

日於東郊遣恒親王弘晈恭代行禮。遣官祭海神廟。

禹陵

南鎮會稽山神

江海潮神並遣官至吳越王錢鏐唐臣張巡許遠陸贄宋臣岳飛明臣于謙故大學士徐本蔣溥尚書徐潮等祠墓。拈香奠酒。諭曰。習寓許王猷各賞緞二疋。諸錦梁同書許集朱桓邵齊燾陸樹本許煒柏謙毛詠郭孫順

沈齊禮馮秉彝唐淮沈咸熙趙升言如洙嚴源燾章有大孫宗溥馮浩孫岐福俱各賞緞一疋。其進獻黃山圖之員外郎許蔭材進獻龍井見聞錄之舉人汪孟錫俱著賞緞二疋。陝甘總督楊應琚奏前經奏定安西提標中左右三營官弁帶兵一千五百名移駐巴里坤。於二月底起程查提標與所屬各協營現在巴里坤屯防聽差單身兵不下八九百名。若皆撤回。由三營內更換往返繁費。屯防

聽差。又悉易生手。且現在彼處兵以田土日
闕。生聚日繁。又自軍興以來。疊蒙體卹。咸願
留駐報効。應將此項按數截留。以抵該標應
移之數。其截留之數。即在該標應移兵內。就
近撥還。各協營補額得旨。甚是。○又秦准阿
克蘇辦事大臣海明等咨稱。葉爾羌解送阿
克蘇威遠。駁十七位。挑三位。解送伊犁。留四
位。阿克蘇防守。餘十位。送內地。酌分哈密。巴
里坤等處。查該處至哈密。巴里坤。長途繁費。
今安西提標前後二營。定議移駐烏魯木齊。
駁所必需。應令阿克蘇辦事大臣。由伊拉里
克。就近運貯。備用得旨。嘉獎。○庚寅
孝昭仁皇后忌辰。遣官祭
景陵。○禮部尚書陳惠華奏。
歷代帝王廟正殿。為景德崇聖之殿。舊制。覆
殿頂瓦。用青色琉璃。簷瓦綠色琉璃。考
文廟大成殿瓦。前奉特旨。改用黃色琉璃。今
帝王廟正殿。所祀三皇五帝三代帝王。皆以

聖人在天子位。亦應用王者之制。現值繕修。
除兩廡。仍循舊制。其正殿覆瓦。請改純黃。得
旨。所奏是。著改葢黃瓦。以崇典禮。烏魯木
齊辦事副都統旌額理等奏。陝甘總督楊應
琚。送到人戶。指給地畝。開墾。應需馬力。現在
市易哈薩克馬。約有三等。請將骨格小者。戶
給一匹。折銀八兩。同前奏。明賞給葢房銀。折
交米麪一石。分年完納。其兵五百名。原議。照
巴里坤造房例。每名日給米八合。麪四兩外。
加鹽菜銀三分。但所給米麪。尚覺不敷。請將
鹽菜銀兩之半。折給米麪。有益兵食。亦可稍
節帑項。得旨。如所請行。旌表守正被戕之
甘肅河州民。脫有德妻馬氏。○辛卯
上詣
皇太后御舟。問安。○諭軍機大臣等。內務府奏。
懷來縣快頭李洪印等。將莊頭張永暘所拴
官車驃馬套去一摺。向來地方官每遇大差。
承辦車輛。胥吏人等藉端滋擾。是以降旨。改

令內務府派委大糧莊頭等承辦。乃莊頭等甫經拴車。而蠹役竟敢藉勢搶拏。是為地方官代辦之事。而惡徒轉以肆橫。是誠何心。此等棍役。斷不可留於內地。貽累小民。著傳諭方觀承。令其嚴訊明確。即將該犯發往伊犁。以示懲創。其該縣知縣有無知情。故縱並著據實查明。辦理。速行奏來。尋奏查明李洪印攔拏莊頭官車。屬實。遵旨將該犯發遣伊犁。至知縣左世壽。訊係前期送兵公出。非知情。故縱。第失察。請交部議。得旨左世壽從寬免。其議處仍通行各屬。嚴禁胥役騷擾地方。是日御舟駐蹕吉慶寺。壬辰。御舟駐蹕石門鎮。癸巳。遣官祭。

歷代帝王廟。諭三吳兩浙文風素盛。前此清蹕時巡。嘉惠膠庠。頻增試額。茲朕敬奉

皇太后安輿。載蒞南服。仰惟

慈惠之綿臻。益廣作人之雅化。宜循舊典。以示渥恩。其將江蘇安徽浙江三省本年應試文

童。府學及州縣大學增取五名。中學增取四

名。小學增取三名。各該學政務宜詳加校閱。

遴拔真才。稱朕樂育甄陶至意。又諭朕稽

古省方。乘春布令。而清理庶獄。矜卹尤深。用

沛德音。式昭慶典。所有江蘇安徽浙江三省

軍流以下人犯。俱著加恩。各予減等發落。凡

親民之吏。其諄切告誡。俾知改過自新。共享

太平之福。又諭曰。王無黨現患目疾。著解

任調理。浙江提督員缺。著李國柱補授。所遺

衢州鎮總兵員缺。著永泰補授。軍機大臣

等議准。葉爾羌都統新柱奏稱。葉爾羌和闐

臺站回人。俱耕種附近閒田。所獲糧足敷支

領。若將鹽菜銀折給糧石。臺站距村莊甚遠。

即令糶賣。亦無購買之人。轉致徒為積貯。請

將每月應折糧交阿奇木伯克照時價糶賣。

分給錢文從之。是日御舟駐蹕塘棲。是

月直隸總督方觀承奏永定河北岸三工黃

字四號求賢村減水草壩。乾隆四年建金門

海墁灰土剥裂上年秋汛過水衝刷翻露見底椿草多朽應另建但北岸減壩祇此一處相度形勢應仍在三子移上一號建設其減下之水即歸舊壩引河循隄東去現勘悉如舊壩成式金門寬十六丈壩面海墁深五丈並迎水出水海墁俱用灰土排築堅實壩下開引河長二百七十五丈寬十二丈至八丈六丈不等壩外圍築斜埝一道長二百九十丈接舊壩土埝令減下水不致旁溢得旨如

平定奏字十五

所議行○陝甘總督楊應琚奏哈密巴里坤從前雇民車運送口糧物件俱照向例給與腳費自乾隆二十二三四等年因軍興經巴里坤辦事大臣阿里衮甘肅巡撫吳達善先後奏准不拘常例逾格加增今大功告成屯田日闢此時需運但紙張藥材綢緞銀兩等項非軍糧可比應停止加增之例並行文口外各處辦事大臣嗣後悉照向例支發得旨是○護理福建巡撫印務布政使德福奏閩

省修造戰船自交營日始三年小修再三年大修再屆三年雖限應拆造如驗係尚堪修理仍止准再大修一次與山東現辦情形略同惟屆小修大修之船向止扣滿三年該營即駕交廠員照例估報從無呈請緩修者請嗣後凡遇應修之期由各鎮協營查驗如完好船隻不得扣年交廠應飭該營再行駕駛一年限滿另驗如混行交廠及廠員扶同請修叅處得旨如所議行 哈喇沙爾辦事大

平定奏字十五

臣達桑阿奏哈喇沙爾逼近凱都河地勢窪下河水皆與岸等至伏汛盛漲田畝多被淹浸查現在壩座因上年水溢倉卒搶修未能如式應加築高廣各二三尺其險溜之處亦照內地河工下埽又沿河溝渠淺狹並有平地疊土為岸尤易衝漫應開寬二丈及一丈五尺並挑深五尺加修閘座亦照內地式設木板以便啟閉現屯田亟須水利應飭先濬渠次築壩於四月上旬工竣得旨嘉獎

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十五

平定回疆

三

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十六

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院掌印給事中黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鎮湖廣滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午三月甲午朔

上詣

皇太后行宮問安○諭軍機大臣等據永貴等
奏稱自平定回部以來內地商民經由驛路
並回人村落彼此相安無犯坐臺回人又挑
引河渠開墾田地往來行人並無阻滯若將
此曉諭商民不時往返貿易即可如哈密吐
魯番與官兵亦有裨益等語回部既已平定
內地商販自應流通但貿易一事應聽商民
自便未便官辦勒派今永貴既稱民人經由

回人村落彼此相安無犯。且坐臺回人挑引河渠開墾田地沿途牲畜水草無缺並無阻滯等語。著寄信楊應琚將此傳諭商民若有願往者即辦給照票聽其貿易。若不願亦不必勒派。如此行之日久商販自可流通矣。並著寄信永貴等知之。兵部議准江南河道總督高晉奏稱河營兵目生長河干諳練橋埽而定例本營兵目不准拔補本營千把恐用違其材請嗣後千把總缺出如別營無可用揀選准以本營考補從之。直隸總督方觀承奏萬全縣之張家口上堡圍城東為舊日水洞乾隆十二年於水口西岸修築石隄下接荆固壩二十一年水漲衝去荆固更於舊石隄下接築又築片石隄復遵旨於未至山根之上游開引河一道上年夏秋雨甚口外山水奔湧至水洞夾束激射不東循山麓而西撼隄根致舊石隄衝塌八丈三尺片石隄衝塌四十八丈應修復舊規報聞。闕展辦

事郎中德爾格奏准軍機大臣議覆闡展屯田兵裁二百四十名所遺地畝原派吐魯番額敏和卓所屬六十戶住闡展九十三戶住里野木齊木威魯堡如拉所屬六十戶住里野木齊木二十七戶住洋赫每戶給田五十畝今酌將額敏和卓人戶全歸闡展如拉人戶全歸里野木齊木以便約束仍有餘田三十畝令素賚瑞派給莽噶里克沙呼里回人墾種至裁兵所遺牲畜未免閒曠現威魯堡回人尚乏屯田牲畜請量估價值分給使用各項農具亦俱作價分給於二年內納糧抵銷報聞。喀什噶爾辦事尚書永貴等奏查回人地畝俱藉山水灌溉凡溝渠深淺圩堤厚薄舊有定式因回人不知守護修葺以致淤陷夏凜冬水行旅亦滯現派伯克等率所屬遍閱詳勘其應濬渠築堤及路徑橋梁務期堅固仍行文各駐劄大臣一體酌辦報聞。○予故安西提督贈太子太保劉順祭

葬如例。諭壯靖。○是日駐蹕杭州府行宮。○
乙未

上至海寧閱海塘。○諭據湯聘奏湖南盤獲黃
景運。究出兵部役滿書吏黃在中與武員營
謀作弊一案。內有襄陽鎮總兵章世鵬及副
參遊擊等皆屬武職大員。乃與書吏關通賄
囑營求。於營伍官方大有關係。黃在中現經
浙省拏解赴楚質訊。所有總兵章世鵬等俱
著解任交該督愛必達會同該撫馮鈐逐一

嚴審定擬具奏。○是日駐蹕海寧縣行宮翼
日如之。○丙申

上閱海塘石隄。諭朕稽典時巡。念海塘為越
中第一保障。比歲潮勢漸趨北大壘。實關海
寧錢塘諸邑利害。計於老鹽倉一帶柴塘改
建石工。即多費帑金為民間永永禦災捍患
良所弗惜。而議者率以施工難易彼此所見
紛歧。昨於行在先命大學士劉統勳河道總
督高晉巡撫莊有恭前往工所。簽試樁木。朕

抵浙次日。簡從臨勘。則柴塘沙性溢汕。一棧
甫下始多扞格。卒復動搖。石工斷難措手。若
舊塘迤內數十丈許。土即宜樁而地皆田廬。
聚落將移。規石工毀斥必多。欲衛民而先殃
民。其病甚於醫創剜肉矣。朕心不忍。且井外
塘棄之乎。抑兩存而贅疣可乎。以茲蒿目熟
籌。所可為吾民善後者。惟有力繕柴塘得補
偏救弊之一策耳。地方大吏其明體朕意。悉
心經理。定歲修以固塘根。增坦水石。簍以資

擁護。庶幾盡人事而荷

神庥。是朕所宵旰屢懷不能刻置者。至繕工
欲固。購料不得不周。現在採辦柴薪。非河工
林葦之比。向為額定官價所限。未免拮据。應
酌量議加。俾民樂運。售而官易集事。其令行
在戶部。會同該督撫詳悉定議以聞。朕為浙
省往復咨度之苦心。其詳具見誌事。一詩督
撫等可並將此旨於工次勒石一通。永志遵
守。毋忽。○丁酉

上詣

皇太后行宮問安。○諭尖山塔山之間，舊有石壩。朕今親臨閱視，見其橫截海中，直逼大溜，猶河工之挑水大壩。實海塘扼要關鍵，波濤衝激，保護匪易。但就目下形勢而論，或多用竹簍加鑲，或改用木櫃排砌，固宜隨時經理，加意防修。如將來漲沙漸遠，宜即改築條石壩工，俾屹然成砥柱之勢。庶於北岸海塘永資保障。該督撫等其善體朕意，於可興工時，一面奏請，一面動帑償辦，並勒石塔山，以誌永久。○兵部議准，山西巡撫鄂弼奏稱，晉省巡檢原設弓兵，經布政使宋邦綏奏請，概以十名為額。查各屬巡檢僅司一隅緝捕者，四十三員，俱增減如數。惟解州鹽池長樂安邑縣聖惠三司巡檢專管鹽池，巡查透漏，為地較廣，應酌設弓兵二十名差遣。從之。○調刑部左侍郎鑲黃旗漢軍副都統官保為正黃旗滿洲副都統。山東巡撫阿爾泰疏報乾

隆二十五年分，新城縣開墾無糧水田地一十九頃二十四畝有奇。○加賑湖北潛江沔陽天門荊門江陵監利等六州縣并沔陽衛荊州衛荊左衛乾隆二十六年水災飢民。○是日，駐蹕杭州府行宮。○戊戌。

上閱兵。○諭浙江進獻畫冊之監生朱方藹童生呂師說言永世俱著賞緞一疋。○又諭由京城隨從水手網戶人等各賞給一月錢糧。江南水手頭目等各賞給一兩重銀鏹二個。水手等各賞給一兩重銀鏹一個。管河兵守備等各賞給金牌一面，銀牌二面，千把總等各賞給銀牌二面，六班河兵等各賞給一月錢糧。○是日，駐蹕聖因寺行宮。至乙巳，皆如之。○己亥。

上詣

皇太后行宮問安。○遣官祭先農之神。○諭據熊學鵬奏，冊封安南正副使德保顧汝修將在安南來往文移，錄送備

案內有顧汝修單銜致責該國王之書鈔錄呈覽一摺該撫於德保等奉使回程將一切往來文移留心體察據實入告甚得封疆大臣之體朝使持節冊封所以示懷柔而昭威信如該國王儀節少愆即當據禮面飭俾知所遵循無稍假借若既恭順將事則一切無關緊要體式並可無庸介意乃在伊境內時姑為隱忍既出境復致書相責此適足以形見小氣怯耳此非可以謬託不辱君命也該

國世篤奉上之誠且遠在海外無足重輕不知顧汝修此舉為何事誠屬可鄙顧汝修本非通達事務之人況出使外藩並不會同正使擅自移書詰責而所爭執者又不識大體著交部嚴加議處德保既為正使何以並不攔阻聽其單銜徑行著明白回奏其熊學鵬所奏鈔檄著並發○諭軍機大臣等安南世為本朝屬國凡遇朝使冊封至伊國內自應遵行三跪九叩頭禮乃該國王狃於小邦陋

見與冊使商論拜叩儀注原屬無知經德保顧汝修援從前抗奕祿等指示成例始知恪遵外藩不諳體制部臣應預行宣示著傳諭禮部存記嗣後遇有安南冊封等事即將應行典禮并雍正六年及此次業已兩次遵行三跪九叩首之處告知派出之正副使令其永遠遵循無愆儀節○庚子諭曰明瑞現帶兵前往伊犁駐劄在京戶部辦事之人其侍郎事務著英廉署理○又諭巡撫官階雖屬

二品但係統率通省大員嗣後各省巡撫著一體穿用大紅雨衣○又諭前經降旨將江浙安徽浙江積欠地丁概予豁免而浙江一省積欠較少今翠華莅止體察民情宜再加恩以示鼓勵著將浙省所有乾隆二十三、四、五、六等年災緩帶徵未完地丁屯餉等銀五萬三千餘兩災緩未完及二十五年以前民欠未完漕項銀十一萬餘兩並水鄉竈課未完銀十萬一千餘兩通行蠲免俾閭閻得以

均需渥澤。該部遵諭速行。○辛丑諭巡幸之年。理藩院大臣多半扈從。在京雖簡員署理印篆。究於該院事務未能諳悉。嗣後該院應奏事件。著與行在大臣會銜具奏。又諭從前傅良奏吉林兵丁借支庫銀內有因老病已革。曾經出兵打仗得有功牌及得傷者應寬免。其雖經出兵並未打仗或將其子孫及姪挑補本缺。仍令交還庫項一摺。經部議以定例內載老病已革兵丁無論有無兵次所借庫銀俱准寬免。將傅良所奏議駁。朕以部議甚是。但未知吉林如何辦理。或恐與京城不同。曾經降旨恒祿詢問。今據奏到。乃但引現在辦理之例。其該處與京城同異。及部駁是否之處並未詳晰聲明。殊屬糊塗。著傳旨嚴行申飭。○大學士公傅恒等議奏查海寧柴塘工程。從前柴價每百觔部定則例准銷六分。乾隆七年復因不敷購辦。奏請加增銀三分。今酌於原定九分之數再加一分。每百

觔統以一錢報銷。將來柴價漸平。該督撫隨時酌減報聞。○吏部議准陝甘總督楊應琚奏稱蘭州同知駐劄河州城內所管番民七十一寨一十五族計一萬四千餘戶俱散處邊外之循化保安起臺三營地方距城寫遠難於控制。查該丞從前兼管河司茶務嗣裁應請移駐三營適中之循化營城內至該廳收納番糧係支各寺喇嘛口糧之用除口外寺二座仍赴廳支領外其口內一十九座請於河州應支循化等營兵糧內支給。循化等營兵糧即今在該廳番糧內支發從之。○戶部議准直隸總督方觀承疏稱南運牙三河乾隆二十六年夏秋冬三季並本年春季兵餉例於景州交河等州縣二十六年地糧銀內派解。該州縣上年水災錢糧分別蠲緩所有應解兵餉請於二十五年地糧銀內改撥開徵抵還從之。○禮部奏准朝鮮國王李昫遣同知中樞府事邊憲齋咨到部內稱該

國三水府加乙坡鎮奸民金順丁等七人出沒江邊現在拏獲六人按治其在逃李元三一人嚴飭搜緝等語事關越邊其有無在內地滋事並逸犯逗遛之處應行文盛京將軍清保吉林將軍恒祿一體查報從之○雲貴總督吳達善奏南明河修費銀兩著落承辦官及各該上司分賠無力者遵旨著落湖北布政使徐垣代賠得旨覽但其人已故照例辦理無可深求○以雲南楚雄鎮總兵馬乾

宜河南河北鎮總兵田金玉對調○加賑山東齊河濟陽禹城臨邑長清德州平原德平陵縣德州衛惠民陽信海豐樂陵商河霑化金鄉魚臺濟寧嘉祥陽穀濟寧衛荷澤城武定陶鉅野聊城冠縣臨清恩縣夏津武城東昌衛臨清衛東平汶上曹縣單縣范縣壽張濮州東阿東平所館陶邱縣等四十五州縣衛所乾隆二十六年水災飢民並緩徵蠲剩銀兩○壬寅

上幸觀潮樓○閱福建水師○諭朕奉

皇太后安輿莅茲南服所以省方觀民勤求治理其各處舊有行宮清蹕所駐為期不過數日但須掃除潔淨以供憩宿足矣固無取乎靡麗適觀也而名山勝蹟尤以存其舊規為得自然之趣從前屢降諭旨至為明晰迺今自渡淮而南凡所經過悉多重加修建意存競勝即如浙江之龍井山水自佳又何必更興土木雖成事不說而似此踵事增華伊於何底轉非朕稽古時巡本意且河工海塘為東南民生攸繫朕屢懷宵旰時切紓籌地方大吏果加意修防永資捍禦則茲之親臨閱視其欣慰當何如者而田疇豐潤井里熙恬即所以博朕愜覽不在彼而在此也嗣後每屆巡幸之年江浙各處行宮及名勝處所均無庸再事增葺徒滋糜費即圯場裱飾不至年久剝落亦可悉仍其舊此實不僅為愛惜物力起見也該督撫等其各善體朕諭敬相

遵守○又諭江南蘇松鎮為水師要缺總兵黃錫申年力衰邁難以表率營伍著以原品休致其蘇松鎮總兵員缺著馬銘勲調補所遺員缺著段秀林補授○又諭據蘇昌奏高州鎮總兵劉康年逾六旬氣血衰減近染弱疾步履維艱又據劉康奏稱病難勝任請賜罷職等語劉康著准其解任調理俟病痊之日來京請旨其高州鎮總兵員缺著黃正綱調補所遺員缺著眉綬補授○又諭浙江進獻詩賦考取一等之進士孫士毅舉人汪孟銷俱著授為內閣中書遇缺即補沈初王鑾俱著特賜舉人授為內閣中書學習行走與考取候補人員挨次補用其二等之李旦華等十三名著各賞緞二疋○又諭發遣伊犁及烏魯木齊等處人犯定例祇有發給種地兵丁為奴字樣至已到遣所給與何項兵丁及作何分別辦理之處從前未經議及伊犁等處兵丁非若黑龍江之土著設換班回將

携其人歸來乎著軍機大臣會同該部詳悉另行定議具奏尋議定例發各省駐防為奴人犯不准典賣他所從前發遣人犯俱隨屯田兵耕作現在察哈爾兵移駐伊犁及烏魯木齊應將遣犯令該管大臣勻撥此係永遠屯駐毋庸議至綠營兵既非土著其給與人犯在烏魯木齊以外者聽伊犁及烏魯木齊辦事大臣酌發其某犯給某營兵丁令該管官記檔至換班時交接班兵為奴或撤回及調他所亦另撥給附近種地兵隨同力作從之

癸卯

上詣

皇太后行宮問安 奉

皇太后臨視織造機房 甲辰

孝賢皇后忌辰遣官祭

陵寢○諭此次南巡兩淮辦差商衆業已降旨

獎賞而浙商亦有承辦差務巡省所至宜一

體加恩。以數慶澤。著將嘉松寧紹等所運銷引鹽。每引各加五觔。以一年為限。俾民食足而商力紓。稱朕恤商愛民至意。○乙巳清明節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。丙午。

上奉

皇太后自杭州迴鑾。諭浙江敷文書院和詩之翟灝朱大勲成城王誥李旦華孫士毅汪孟銷邵昌臯徐延茅德芬祝德麟阮慶榮俱

著各賞荷包一對。○是日御舟駐蹕石門鎮。○丁未

上詣

皇太后御舟問安。○諭本年巡幸江浙降旨截留漕糧以備平糶。所有此項減歇漕船業已加恩於一半月糧之外。賞給十分之二。而各省因災減歇漕船。向例俱止給一半月糧於該丁等生計。未免拮据。亦著加恩各於應給月糧之外。賞給十分之一。該部遵諭速行。○

又諭曰。尚書銜錢陳羣原係刑部侍郎。著加恩賞給刑部尚書銜。○又諭此次進獻唐詩之李清馥著賞緞二疋。○諭軍機大臣等。納世通英廉奏西直門南邊城牆一段坍塌四丈九尺。原估新磚二進舊磚四進。今拆卸查看。外面僅只整磚一進。背後俱係碎磚填砌。儘數選用。不過得舊磚二進。應再添新磚二進等語。是舊磚已少三進。其為前此興工時浮冒開銷無疑。本朝百餘年來於一切工程。

率經修葺。此項城工決非專沿前明之舊。所有前次承辦何人自有檔案可考。縱或年代久遠。本人已故。即查伊子孫治罪亦可。微從前以戒將來。俾浮冒者皆知所懲。創著傳諭。納世通英廉即行遵照。查明辦理。不得稍有含糊。又諭曰。永貴等奏本年換班官兵前來所有馬匹牲隻。未免損傷。應行補給。其一切差遣及臺站卡座舊兵遣回時。亦應豫備等語。似不僅為換班官兵起見。官差行走及坐臺守卡人等。原有額設之項。且倒斃自有准銷成例。不過酌量添補。奏內約計喀什噶爾、葉爾羌、阿克蘇三城。需馬一千三百匹。并採買牛隻。未經分晰款項。殊屬含混。著傳諭伊等查明詳悉具奏。又諭昨旌額理奏乾清門侍衛薩木坦告請前往額林哈畢爾噶搜捕瑪哈沁。曾諭以薩木坦在軍營年久。回烏魯木齊之後。即著來京。倭昇額與薩木坦一同派往者。亦著回京。伊等係以領隊大

臣派往烏魯木齊辦事之員。今該處大員足敷辦理。不須再為補缺。或有需用侍衛之處。旌額理再行請旨。又諭曰。旌額理呈奏哈薩克貿易人等所齎阿布勒巴木比特托忒字奏章。大意謂我兵收伊屬人牲隻。有懇求給還者。復被毆擊等語。近據阿桂奏遣伊勒圖等驅逐越境之哈薩克。此時未必即回想。仍係去年所辦事屬。既往伊等尚以為言。此次復行驅逐。自必更加畏懼。著傳諭阿桂遵前旨。將伊勒圖等收來屬人牲隻。派豐安帶侍衛二員管押送交阿布勒巴木比特。即宣諭云。因爾等哈薩克違禁越境游牧。伊犁大皇帝以爾等新附之人。降旨寬宥。此次所有拏獲牲畜。悉令賞還。嗣後須約束游牧人等。安居本界。如仍妄行踰越。即照大臣等所奏辦理。並著傳諭旌額理、貿易人等復來。亦告以收取游牧之事。大皇帝業經洞鑒。復行加

恩爾等宜感戴皇仁。毋得越境滋事。○是日御舟駐蹕吉慶寺。○戊申。吏部議准。直隸總督方觀承奏稱。順天府屬順義縣。原定為衝繁二項中缺。歸部選。該縣差務殷繁。初任不能諳練。多罹叅處。三年間官經四易。吏民積玩。亟須整理。應請改為衝繁難兼三要缺。在外調補。從之。○又議准。原任貴州巡撫周人驥奏稱。遵義府通判分駐仁懷舊城。地險孤懸。難於防守。請裁大定府司獄。改設遵義府照磨一員。與通判同駐。所裁司獄事務。歸併大定府經歷兼管。其俸工養廉。即改給照磨支領。並添設照磨門子馬夫各一名。所需工食。抽減仁懷民壯二名。改給從之。○陝甘總督楊應琚奏。分發伊犁烏魯木齊暨各回城。換班官兵供支事宜。一領兵官員及隨伺之人。調撥放廠營馬乘坐。往來繁費。應於安西提標營移駐巴里坤。隨帶馬內酌留三百匹。按起撥送。其往烏魯木齊者。直至巴里坤就

近歸廠。其由哈密分途往南路各回城者。即由哈密趕歸本營。一安西倉儲甚裕。官兵自肅州出口。應令止帶至安西口糧。其自安西至哈密。令於淵泉縣接支。並嗣後出口進口官兵。俱照此辦理。一軍興以來。口外需用糶米。由內地採運。此時半已動用無存。應令官員經過地方。准將粟米白麪抵支。得旨。如所議行。○又奏。安西提標中左右三營移駐巴里坤兵。酌分十起。於二月二十八九等日陸續起程。提督五福駐劄南山口。照料稽察。俟末起過後。尾至巴里坤。妥協安插。報聞。○是日。駐蹕蘇州府行宮。至庚戌皆如之。

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十六

實錄卷之六百五十六

三

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午三月己酉

十

十

上詣

皇太后行宮問安 諭軍機大臣等馮鈐查審
黃景運一案據稱應質之人多在楚省所有
黃在中現在咨浙徑解湖南與黃景運及各
武員三面質審等語前湯聘奏到時已有旨
交莊有恭速將黃在中訊供遴員解楚質對
并諭愛必達速行回楚會審如該犯解到時
愛必達業已回任即行會同辦理倘該督尚
未到楚馮鈐本屬首先查辦之人案內事理

原所深悉。即可一面先行審訊。不必拘泥坐待。以致時日稽延。且啟透漏消息。串供狡飾。諸弊將此并諭。愛必達馮鈴知之。○又諭曰。兵部書吏黃在中一犯。前在省城時。已令會同審供。委員即速解楚質訊矣。但該犯在浙。並無質對之人。雖有確供。豈能遽吐。現據馮鈴奏到。黃景運供內。與黃在中干涉之處甚多。實屬此案要犯。恐一路押解前往。中途自知罪重。或設計免脫。或畏罪自戕。甚有關係。

著傳諭莊有恭。令其嚴飭押解之弁。沿途加意防範。或再添差幹員。星赴協解。務令迅速抵楚。倘有意外疎虞。則惟該撫是問。○又諭。湖南查出兵部書吏。在楚勾通作弊。婪賄一案。其要犯黃在中。已令浙撫莊有恭。即速拏解赴楚。審擬現據馮鈴奏到。應行質訊之降調副將察倫泰。及領催何書武。舉劉汝敬。應一併押解來楚等語。著傳諭兵部堂官會同鑲黃旗漢軍都統。速將察倫泰。何書武。遴員嚴

密解楚。並一面查拏東直門外住居之武舉劉汝敬。一併押解前往。倘查辦不能詳慎。致該犯等先事聞風遠颺。及沿途稍有疎縱。責有攸歸也。○庚戌遣官祭明太祖陵。並遣官至晉臣卞壺祠。宋臣曹彬祠。明臣徐達墓。常遇春墓。李文忠祠。方孝孺等祠。拈香奠酒。○諭。此次進獻詩冊。入選之梁同書。沈成熙。孫宗溥。嚴源燾。馮浩。陸樹本。邵祖節。趙升。汪憲。汪師韓。王世芳。唐淮

吳謙。銑。已經賞賚外。其吳省欽。周大樞。著各賞緞一疋。○辛亥。

上詣

皇太后御舟問安。○諭軍機大臣等。今日有仁和縣民。在蘇州地方叩閭控告。蠲免積欠一事。從前所頒恩旨。舊欠在乾隆二十六年以前。均予蠲免。但錢糧截數。以奏銷為限。二十六年之奏銷。乃二十五年之正賦。若二十六年之正賦。其奏銷當在二十七年。此時尚未

截數。又何得謂之積欠。在該撫莊有恭條例。自所明悉。而刁健之民。膽敢嘵嘵滋事。其中或係衙門蠹役播弄。慫恿或別有主使之。人均應徹底根究。大示懲創。已交尹繼善慎委妥員解浙審訊。毋令中途疎脫。並傳諭莊有恭於解到時。即行詳悉嚴究。務得實情。按律定擬具奏。○又諭新柱等奏稱額里齊城回人尼雅索丕。盜馬逃來阿克蘇。被伯克額肯阿克薩哈拉盤獲。送交伯克帕察沙布看守。又復脫逃。今為和闐巡街回人拏獲。請照回例治罪等語。尼雅索丕既經拏獲。交伯克帕察沙布看守。復行疎脫。海明自應一面拏緝。一面將疎防之伯克叅奏。若謂該伯克諱匿不報。現在新柱奏內。又有疎防伯克經阿克蘇大臣斥革之語。則伯克等之去留。尤伊所當奏聞者。著傳諭海明等。將從前辦理此案。不行具奏緣由。明白回奏。額肯阿克薩哈拉盤獲賊犯。審出情節殊屬可嘉。著加恩賞緞。

二端以示鼓勵。○湖北巡撫湯聘奏楚省常平倉每年於三月望後借糶。今歲遇閏。節候較遲。加賑將竣。現飭於三月初旬開倉。再上年被水州縣展賑後。餘穀無幾。並飭各府倉就近撥運協濟。按該地情形。或糶十分之七。或糶十分之五。不拘存七糶三舊例。又被災州縣中有經部覆領銀修城。令刻速興修。以工代賑。報聞。○以貴州銅仁協副將康世昌為湖北襄陽鎮總兵。予故甘肅提督贈太子太保閔相師祭葬如例。謚桓肅。○是日御舟駐蹕十里亭。○壬子御舟駐蹕政成橋。○癸丑御舟駐蹕三義閣。甲寅上奉皇太后渡江。○詣皇太后行宮問安。○諭自京隨來水手網戶。著各賞一個月錢糧。江南水手頭目等各賞一兩重銀鏤。二銕水手等各賞一兩重銀鏤一銕。其河兵一千名。各賞一個月錢糧。駕馭渡。

江榮船兵二十八名。著加倍各賞兩個月錢糧。○甘肅巡撫明德奏。安西五衛及肅高二州縣。捐監糧額。經前撫吳達善奏請酌減。部議准行。並令將每年收過數目。有無較前多寡成效。歲終奏聞。今查安西府屬淵泉。敦煌。玉門。三縣。肅州。並所屬高臺縣。乾隆二十六年分。共收京斗監糧一萬四千九百二十八石有奇。較二十四五兩年。每年僅收數千石。已有成效。報聞。○旌表守正捐軀之安徽當

塗縣民劉起進妻陳氏。○是日。駐蹕金山行宮。○乙卯。諭直隸保定等處駐防兵丁。本年夏秋冬三季兵米。例應給發折色。但念各該地方。上年俱有被水之處。米價未免稍昂。兵丁買食維艱。去歲截留東省漕糧五萬三千餘石。今除賑糶之外。尚存米一萬七千餘石。著加恩將保定。雄縣。及東安。采育。霸州。良鄉。順義。七處駐防兵丁。應領乾隆二十七年夏秋冬三季兵米一萬四千二百餘石。即於此

項餘剩粟米內。全數動撥。在兵丁可以不與問問爭糶。市集糧價亦可不致翔湧。於民食兵糈。均有裨益。該部遵諭速行。○戶部議准直隸總督方觀承疏稱。永定河南北兩岸。石景山。三角淀。西淀等處。乾隆二十六年夏秋冬三季。及本年春季兵餉。例於霸州。文安等州縣。二十六年地糧銀內派解。該州縣上年水災。錢糧蠲緩。請將未解兵餉。於二十五年地糧銀內改撥。開徵抵還。從之。○直隸總督

方觀承奏。直屬濬築各工。如文安大城等縣之千里長隄。霸州之六郎隄。天津西沽等處之疊道南運隄。埝。並牯牛。中亭。豬龍宣惠。濬滄會流。清羊各河。工程較大。災地難以勸用民力。請照興工代賑例。每土一方。給米一升。鹽菜錢八文。令貧氓於停賑後赴工就食。查續撥通倉漕米二十萬石。賑糶外尚有贏餘。應飭司照約估土方數目分撥。得旨。如所議行。○是日。駐蹕龍潭行宮。○丙辰。諭軍機大

臣等著傳諭兩江總督尹繼善。凡各馬頭地方。只許鋪棕毯。不許鋪紅黃等毯。○又諭曰。馮鈐奏。兵部書吏撞騙滋事一案。研審明確後。將該犯等解京治罪等語。現在案內人犯多在楚省。其應行質訊者。亦就各處陸續解楚。交與該督撫會同嚴審定擬。京城更無牽連待質之人。該督等但於審案既定。分別各犯情罪。將應行正法者。具本題請。即於該省正法示衆。不必復行遠道解京。轉恐中途防範疎虞。徒滋僉派員役之累。將此傳諭知之。○又諭。昨經降旨。額勒登額。由俄羅斯領取逃人。將為首之端多克等。派員即行送京。其餘人等。續解交部。但此項逃人為數過多。若全行解京。不但行走繁費。且審明治罪之處。烏梁海亦無由知。著寄信額勒登額。如端多克為首各犯。仍遵前旨。先行解京外。其次情罪難追者。多查數名。由彼押送烏里雅蘇台軍營正法。即傳首烏梁海。俾知所警畏。不敢

恣意脫逃。其餘罪不至死。應遣人犯。仍嚴行解京。交部審明。定擬發遣。○吏部議准。山西布政使宋邦綏奏。稱歸綏道遠。駐歸化城外。綏遠同知庫在綏遠城內。察覈難周。今綏遠副都統裁汰一員。應將所存衙署。改為道署。令道員移駐。同知經管倉庫。免收支放。均令該道親臨監看。事畢。用印封固。仍責成察查。其靖遠。歸化。二營。領回兵餉。照舊歸道庫寄貯。按月監散。原設盈寧庫大使。近在同城。可兼顧彈兌。看庫兵。應於歸化營就近派撥。將原撥靖遠營兵。發回差操。再新設歸化營都司。未建衙署。應即以歸綏道所遺舊署。改為都司署。外羣房作為兵房。如尚不敷。酌量添建。其新改道署。所需庫藏及吏書科房。照舊署式增設。從之。○吏部等部議。失察水手生事之江蘇布政使安寧等各官。俱照例罰俸。得旨。安寧係地方大員。失察自雇水手生事於本省。自有應得處分。著依議。罰俸六個

月。至常恒。穆昇額陸燿乃係自京隨行扈從。船本不由自雇。水手何從約束。其情節迥非地方官可比。俱著免其罰俸。○兵部等部議准。兩廣總督蘇昌疏稱。海陽縣長美橋。自揭陽至普寧縣。百里橋水程一百三十里。為閩廣通衢。從前未設塘汛。致有奸匪剽掠。請於鰲門山及方坑。楓口。竹橋等處。各添一汛。又竹橋下之藍兜一汛。兵房坍塌。應修復除藍兜汛原有派兵外。新添四汛。每汛應派快船一隻。兵八名。以四名防守。四名配船巡徼。查潮州城守營之烏石。轉水。二塘。饒平營之銀溪。鄭均。二塘。各有快船一隻。兵四名。該處河道平坦。可裁添設於鰲門山汛。其方坑等三汛所需兵。於潮州鎮右營分防揭陽縣存城兵內。抽出十六名。礮臺汛兵內。抽出八名。分置再鰲門山汛。歸潮州城守營管轄。藍兜汛。歸潮州鎮右營管轄。方坑等汛。應抽原防普寧縣城外委一員。移駐適中之楓口。往來巡

查。從之。○以貴州鎮遠府屬告休土同知何毓杞子經襲職。○是日。駐蹕棲霞行宮。翼日如之。○丁巳祭

先蠶之神。遣妃恭代。

皇后行禮。○諭吏部議處安寧等失察水手生事一案。已有旨分別議免。至原參摺內。將冠軍使常恒列於中書陸燿之前。本無譌舛。而部本拘例顛倒書寫。將中書列於冠軍使之前。可謂無識膠柱。如云。此因吏兵二部會稿所致。果爾。則文職丞倅等。可列於武職提鎮之上乎。自後除疎防等事。文武自為一條者。仍各行按次分敘。其文武同屬一事一案者。俱按官階為後。先以昭秩序。○諭軍機大臣等。向來地方官辦理盜案。於分別法無可貸情。有可原之處。不免多所遷就。致兇頑不知懲創。自上年大學士九卿等議准尹繼善條奏。分別辦理以後。遵行已及一年。著傳諭該部。查明各省題報之案。其間事件若干。及決

犯數目若干。與前此未經定例之前。逐一較量。明悉具奏。○又諭在京總理王大臣等奏平糶減價一摺。所見不通。已於摺內批諭。自來發米平糶。原期市價就減。市價既減。則官糶可停。此理人所盡曉。如市價雖畧減而尚貴。原應再減官價。以期平市價如常而即止。今並不詳悉奏明。但稱依市價已減之數。再減官糶之價。似此屢減不已。何所底止。如此則屢出官米減官價。使市價至石米一錢。能乎否乎。至京城入春以來。雨水情形。前因王大臣未經奏及。已降旨詢問。昨府尹羅源漢及各處奏到。近京地方。自三月初三十三等日。連次已得雨澤。而王大臣又並不具奏。轉以此等絕不知要之事。自謂塞責可乎。著傳旨申飭。○戊午。

上詣

皇太后行宮問安。○諭軍機大臣等。昨馮鈐奏請將兵部書吏舞弊一案。審明解京治罪。已

有旨傳諭該督撫。令於審擬定案後。應正法者。即於該省正法。又另摺所奏。就本案根究。從前通緝未獲之茹勝謙一節。具見留心任事。雖據黃景運供稱。與茹勝謙素不識認。而伊姪黃在中。既與該犯同充武庫司書吏。供役有年。自應知其去向下落。此輩狡獪伎倆。必然聲息連絡。從此徹底根尋。或可得其蹤跡。著傳諭愛必達。馮鈐。俟黃在中解到之日。一併將茹勝謙下落。嚴行詰訊查究。勿得但

以就案完案。稍存歧視之見。○戶部議准。湖廣總督愛必達疏稱。漢陽安陸荊州城守水師等營兵餉。向係本折兼支。該處州縣上年被水偏災。恐本年米價昂貴。兵丁買食維艱。請照乾隆十七年例。將各該營米折銀兩。豫發一季。飭各營弁購貯。於米貴時支放從之。○又議准。甘肅巡撫明德疏稱。安西廳屬之瓜州。踏實堡。小灣。奔巴爾圖等處屯田。先經督臣楊應琚。於乾隆二十四年。奏請改為民

地招佃認種。現查明各該處屯民共七百七十五戶。新舊開墾水旱地四萬六千三百二十一畝。據墾戶呈稱。該處不產穀草。所有每畝應納草束。統照原奏改為小麥三升。隨正糧同納。其安西柳溝二衛二十四年業經題報升科地。亦請一例改納。再該處招佃多係口內民人。既經改屯升科。即為伊等世守之業。應令地方官發給印照。詳開戶籍並地畝段落。俾收執以杜爭冒。從之。○四川總督開

泰奏。邛雅灌汶等處。每年額辦茶一十一萬餘引。給商配運於松潘。打箭鑪。行銷近各園戶。因茶產日滋。額引外每有餘積。而口外生齒漸繁。銷茶愈廣。現在茶商殷實者少。未便遽增引目。但園戶餘茶亦應調劑。查川省城多坍損。前奏准於寶川局舊鑪外添鑪鑄錢出易。以餘息為修城之用。自乾隆二十年迄今收銀二十三萬餘兩。第通省各城工需費不貲。專恃此項未免稽緩。請將園戶存茶於

節年鼓鑄餘息項下借支銀二萬兩。交鹽茶道查明按價購買填給印照。會同松茂建昌各道督率行銷。所獲餘利與鼓鑄餘息俱充城垣修理之費。得旨如所議行。○雲南巡撫劉藻奏。浪穹縣境內寧湖鳳羽瀾茨諸河之水匯於三江口。由普陀崆以達鄧川。其西岸白澗挾沙入河。夏秋之間每淤塞倒漾。淹浸田廬。澗口北首舊壩東抵河岸。沿河排列木籠木椿。蘭阻沙石。但壩身壩頂高厚均止五

尺。難資保障。應培築高一丈二尺。壩頂加厚一丈。脚加厚三丈。除舊壩土方九百零三丈五尺外。又新添五千七百六十八丈五尺。至西岸白澗水流入河之處。有沙洲一區。應請全行開挖。其取出沙石即用以築壩。報聞。○是日駐蹕江寧府行宮。至庚申皆如之。○已未。

上親祭明太祖陵。○奉
皇太后臨視織造機房。○閱兵。○幸兩江總督

尹繼善署。○諭軍機大臣等。阿桂等奏稱。伊勒圖豐訥亨驅逐越界游牧之哈薩克。拏獲和莽伯凱等五人。收其馬二千餘匹。前來伊犁。將為首二人暫留候旨。其三人釋回。令齎書曉示阿布賚等語。阿桂辦理甚屬妥協。著賞給荷包二對。伊勒圖豐訥亨著各賞荷包一對。拏獲之和莽伯凱等。理應治罪示警。但伊等性本愚蒙。歸附日淺。不深知內地法度。昨已降旨不必解京。即釋回部落。其馬匹亦著給回。豐訥亨此次驅逐哈薩克。熟悉伊等情形。即著傳旨曉諭。其原派之豐安不必前往。○又諭曰。旌額理等奏稱。從烏魯木齊辦給瑪納斯庫爾喀喇烏蘇晶河屯田兵丁馬匹糧餉。俱全抵各該處。現在水土滋潤。三月份。前後可盡行播種等語。此次派往屯田兵丁。衝寒行走。照管車輛馱載。奮勉可嘉。著旌額理等酌量獎賞。以示鼓勵。瑪納斯等處既編設村莊。應駐大員總辦。烏魯木齊已有旌額

理永德著阿思哈即駐劄庫爾喀喇烏蘇。辦理三屯事務。俱著傳諭知之。○又諭。據新柱等奏稱。接奉諭旨。命額敏和卓以己意札寄蘇勒坦沙。令將布拉呢敦三子解送前來。額敏和卓業經遵諭辦理等語。朕前因額敏和卓在葉爾羌日久。故遣玉素布前往代令回歸游牧。今既以此事與蘇勒坦沙約。如遽行更換。已達克山人等必生疑慮。著寄信額敏和卓。玉素布如尚未至。即令其暫往阿克蘇居住。仍辦叅贊大臣事務。俟已達克山將布拉呢敦三子送來。辦理就緒時。再行知會前往。亦著傳諭玉素布知之。○以原任禮部尚書伍齡安為正紅旗蒙古副都統。庚申上詣

皇太后行宮問安。○諭朕恭奉

皇太后安輿。臨幸江浙翠華所至。蠲賚疊加。而省會駐蹕之地。宜循茂典。載沛渥恩。其將江南之江寧蘇州浙江之杭州附郭諸縣。本年

應徵地丁銀兩。悉予豁免。用昭行慶施惠。省方勤民之至意。該部遵諭速行。○又諭吏部開具在京部院三品以上官。請旨甄別。以重察典。現在新疆辦事之尚書阿桂。永貴。宣力西陲。懋著勞績。著交部議叙。在內之協辦大學士尚書兆惠。梁詩正。尚書李侍堯。阿里。劉綸。舒赫德。秦惠田。富德。侍郎明瑞。于敏中。俱勤慎稱職。著一併交部議叙。侍郎何國宗。內閣學士世貴。總管伊拉齊。太常寺卿督達。禮俱年力就衰。著以原品休致。實光勲識見。迂拙自是。不宜副都御史之任。著以對品另用。餘著照舊供職。○又諭督撫為封疆大吏。其優劣皆朕所深悉。原不必待京察之期。始行甄別。今吏部開列名單進呈。如總督中之方觀承。尹繼善。楊廷璋。愛必達。楊應琚。開泰。高晉。楊錫紱。巡撫中之陳宏謀。莊有恭。胡寶瑤。阿爾泰。並宣力有年。各稱厥職。俱著交部議叙。以示優獎。餘著照舊供職。○辛酉。諭今

年京察屆期。吏部開列在京各部院三品以上及各省督撫等具奏。已降旨甄別。大學士職長班聯。例不列名第。念傳恒等。叅贊綸扉。兼領部務。敬慎恪恭。克稱厥職。宜加優叙。以獎勤勞。大學士傅恒。來保。史貽直。劉統勳。俱著交部議叙。○又諭江蘇安徽進獻詩賦諸生。考取一等之進士吳泰來。陸錫熊。郭元澄。俱著授為內閣中書。遇缺即補。程晉芳。趙文哲。嚴長明。徐步雲。錢襄。俱著特賜舉人。授為內閣中書。學習行走。與考取候補人員挨次補用。其考列二等之劉潢等十四名。著各賞緞二疋。○又諭陽湖縣書役湯懷德。許勝。侵蝕官租。唆肇各佃。叩閣求豁。以圖掩飾。其欺罔狡詐。實屬奸蠹之尤。已審明按律治罪。所有該犯家內字跡書札。自應詳悉查檢。乃知府永會遽稱並無來往書札字跡。所有破爛刻本舊書。並無關係。夫以慣行作弊之積蠹。於乘輿臨幸。尚敢唆眾突仗。豈有平日反無

一字作弊之理。此事將誰欺。明屬有心迴護。急圖了事。規避自己處分。外省欺罔之習。於此可見一斑。而該督未經寓目。又何以即為憑信。不行駁察耶。朕親行巡省。地方積弊惡吏。肆行無忌。知府尚欲草率結局。則伊等平日支飾積習。尚可問乎。永會著交部議處。尹繼善並著傳旨申飭。其該犯家內著該督另委賢員再行徹底搜查。據實具奏。毋得稍存含混。○是日駐蹕棲霞行宮。○壬戌。

上至七里港祭

江神。○奉

皇太后渡江。○詣

皇太后行宮問安。○是日駐蹕金山行宮。○癸亥。諭朕車駕所經。惟橋梁道路。葺繕掃除。為地方有司所宜修補。其綵亭燈棚。一切飾觀之具。屢經降旨斥禁。今江浙兩省塗巷。尚有踵事因仍者。此在蘇揚鹽布商人等出其餘貲。偶一點綴。本地工匠貧民得資力作。以需

微潤。所謂分有餘以補不足。其事尚屬可行。若地方官專欲仿而效之。以為增華角勝。則甚非奉職之道。嗣後督撫等其實力禁止。一切屏去浮靡。以崇實政。如有仍蹈故習者。將惟該督撫是問。著通行傳諭知之。○又諭朕巡幸所至。凡地方豫備一切飾觀之具。殊覺繁俗。已屢降旨概行斥禁。因念迴鑒直隸時。節令適近端陽。恐地方官不無點綴節景。或於趙北口有供備龍舟之事。著方觀承先期實力飭禁。毋得稍踵靡文。以副朕意。○諭軍機大臣等。鄂弼奏據樂平令陶鏞稟報。涼州將軍額爾德蒙額。由豫赴任。其家人劉愛張黑子。從山西至樂平栢井驛。持有兵部車票。戶部糧單。支取車輛口糧草束。已將該家人等查訊。有無假冒。并將車票糧單解部查驗等語。額爾德蒙額既由河南赴陝。何以伊家人等又令從山西行走。違例折取車輛口糧。沿途騷擾驛站。額爾德蒙額不但卑鄙不堪。

抑且全然不曉事理。著傳諭該將軍令其明白回奏。○又諭曰。刑部彙題。王世傑冒領寡婦銀米。又珠寶醕酒逆母一本。所擬發遣之處殊屬非是。已降旨改遣矣。此等事件。自應專摺具奏。該部執行列入彙題。豈以朕南巡途次。未必留心細檢及此。冀可從寬彙題完結耶。此本非朕逐案詳閱。幾至情罪失當。舒赫德秦蕙田不應如此辦理。著傳旨申飭。○又諭。昨新柱等審訊盜馬回人脫逃一案。有疎防伯克帕察沙布。業經阿克蘇大臣斥革。朕以伯克等之黜陟。理宜具奏。降旨詢問。但回部伯克甚多。大小不等。若一概具奏。亦覺繁瑣。嗣後伯克等有陞遷降革等事。五品以上。著各該大臣專摺具奏。六品以下。著年終彙奏。○予故多羅信郡王德昭祭如例。謚曰愍。○緩徵安徽靈璧阜陽潁上亳州太和天長等六州縣民衛所地畝。乾隆二十六年分水災額糧。○是日。駐蹕天寧寺行宮。○是月。

江西巡撫常鈞奏。查前撫阿思哈清理軍屯委員勘丈時。令將各屯田地繪畫圖形。仿民田魚鱗圖式。彙造成冊。嗣前撫胡寶瑤奏准。令經徵各州縣詳開坵段四至。造入交代一事。兩冊久易滋弊。今酌將四至段落等項併入鱗圖冊內。擬名鱗圖四至冊。以歸畫一。報聞。○又奏。前撫阿思哈奏准。鄉試監臨提調監試。須用科目出身者一員。今江西壬午科鄉試查司道中。現無科目人員。應權宜辦理。報聞。○山東巡撫阿爾泰奏。准兵部咨。隨駕拜唐阿兵丁等官馬。留東餵養。以備回京乘坐。已飭該地方官安設棚廠。豫備第恐有在途倒斃。未經交棚者。酌於額外備馬五百匹。於順河集伺應。仍咨明行在兵部。查明上駟院。及拜唐阿等馬匹倒斃者。記檔給與紅單。令東省照單撥給。并咨明直督。於德州照數豫備替換。臣仍派員於德州替換後。交還紅單。聽本人齎單赴部。查銷檔號。得旨嘉獎。○

河東鹽政薩哈岱奏。現修姚遷渠。酌將渠北民堰開寬四五尺。以廣渠身。其側去民堰。照舊築還。所占民地。計畝給值。其上游之李綽堰。受王峪口刁崖溝等處六峪之水。上年盛漲。衝刷過甚。若俟十月題估。恐夏秋難資防護。應飭一體勘修。又安邑西至虞鄉。居民於渠上建石橋三十餘處。內有橋座卑矮。洞口窄小者。並改加高廣。以防壅阻。報聞。

實錄卷六五七

事

一

大清高宗法天隆運至誠先覺體元立極敷文奮武孝慈神聖純皇帝實錄卷之六百五十七

大清高宗法天隆運至誠先覺體元立極敷文奮武孝慈神聖純皇帝實錄卷之六百五十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鎮邊將軍滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午夏四月甲子朔享

太廟遣履親王允禔恭代行禮○是日駐蹕天

寧寺行宮○乙丑

上詣

皇太后御舟問安○諭軍機大臣等據楊應琚奏請將開展上年種獲菜子。胡麻。分借回民種植。收穫後扣還籽種。其餘准其量為交官。以抵應輸額賦等語。上年屯兵所種菜子。胡麻。雖已試有成效。但回地向來種植。未嘗有此。恐非回民所素習。若必強令分種。轉非隨

俗從宜之道。著傳諭德爾格酌量回民之能種與否。如果伊等樂於承種固善。否則不必拘泥。該督來咨責令勉強從事。再烏魯木齊地方廣濶。現在開墾三屯。或即於該處播種菜子。胡麻。以濟用。亦無不可。傳諭德爾格並令楊應琚知之。○是日御舟駐蹕崇家灣。○丙寅。諭軍機大臣等。張師載。胡寶瑤等奏。楊橋河勢止存北段。由引河兜水壩南。順勢東趨。全黃大溜。改趨北岸。化險為平等語。殊深欣慰。今又數日。想益順軌北趨。可以永慶安瀾。至該省上年未經被水地方。入春以來。曾否得有雨澤。足資播種。其被水涸出地畝。現在曾否普行趕種春花。今京畿山東皆得雨澤。何以胡寶瑤尚未奏到。著速行奏聞。以慰廑念。○是日御舟駐蹕海棠巷。翼日如之。○丁卯。以寧夏協領常阿禮為寧夏右翼副都統。○戊辰。

上詣

皇太后御舟問安。○諭軍機大臣等。在京總理王大臣覆奏平糶一摺。據稱減糶後。市價畧就平減。較之平日尚屬昂貴。現今市價仍與三月中旬相同等語。市上時價長落無常。三月中旬之價如此。其為貴價平價。究難意定。應將上年三月糧價先行較對。方可折中。以定行止。著傳諭在京王大臣前後比較。如果上年三月較今尚減。則官糶未便即停。倘與現在平糶後價值相等。則市價已平。毋庸再為減糶。著即查明具奏。尋奏上年三四月米價較今尚減。官糶未便即停。報聞。○是日御舟駐蹕平橋。○己巳。諭此次進獻詩畫冊之金長溥。方元醴。張曰謨。江舟。秦震鈞。俱著賞緞一疋。○又諭江南瀕臨河湖沮洳之區。南則高寶。甘泉。北則宿清。海沐。各屬最稱窪下。每遇伏秋大汛。霖潦堪虞。而下游蓄洩機宜。惟洪澤一湖。尤為橐鑰關鍵。朕早夜勤思。為澤國生民求保障安全之計。疇咨所及。中外

臣工持議各憑所見。非親巡規畫。難定折中。昨駐蹕蘇城時。先命大學士劉統勳。協辦大學士兆惠。會同督撫。河臣將歸江歸海各路。詳勘標誌。朕回鑾。取道按閱。講求指示。其在高寶一帶。應宣導歸江者。自邵伯以下。如灣頭閘。壁虎橋。鳳凰橋等處。河身寬展。足資分洩。惟金灣滾壩。寬五十丈。而新挑引河。僅寬十五丈。底寬八丈。未能暢達。應再為展寬。以河底十丈為率。迤下地勢稍仰。並一律挑濬。深通。俾成建瓴之勢。又東灣滾壩。前年已改落低三尺。而西灣壩尚仍其舊。諸臣議請一體落低三尺。朕量該處洩水情形。致為便捷。應將西灣壩再加落一尺。共低四尺。則平日已有尺水入江。循序而進。庶可豫減暴漲之勢。其河頭亦加挑寬深。以資利導。設遇落水過多。運河間有淺澁。即宜將淺處深挖。以視小小切埂撈淤。從事於河中者。不猶愈乎。其金灣六閘。應拆去中二閘。添建石壩。接築土

隄。並量挑引渠。以備盛漲。湖水自無閼壅之患。然此節節措置。特為三湖旁疏。曲引起見耳。若其溯源挈要。為釜底抽薪之策。則莫如廣疏清口。乃及今第一義。現在測驗洪湖高堰五壩。高於水面七尺。及七尺五寸不等。清口口門。現寬二十丈。當即以此酌定成算。將來俟兩壩之水。如再增長三尺。清口不必議展。仍存其蓄清之說。設如由三尺長至四尺。即將清口拆寬十丈。湖水以次遞長。則清口以次遞寬。總以上壩增一尺之水。下口加開十丈之門為準。其或入夏後水勢一時不常。旋長旋落。則不必以口門既展。急事堵塞。以過秋汛為定。逐漸收清口。仍至二十丈。或十數丈。如此則全湖勢暢。以視求助於分支別派者。其功奚啻倍蓰哉。脫以清口拆堵費工。鯁鯁過慮。獨不思湖水浸溢下流。所費更當何似。以彼絜此。其間輕重大小。不待握算而知也。至駱馬湖水。由永濟橋東注。為六塘河。

源流既遠。所受支河甚多。河中淤埂。阻滯溜勢。一遇暴漲。猝難容洩。田廬易致漫淹。應視兩岸中間窄狹者。再加寬展。切去河中淤埂。俾游波寬緩。不至出槽。隄身淺缺單薄者。量為修補。以資捍禦。其六塘河尾閘橫經鹽河。由東岸武障等河。下洩入海。原設條石滾壩。為過水之準。其旁並設草壩。水小則蓄水運鹽。水漲則拆壩消水。商利蓄而民利消。彼此各爭其便。當每年權其緩急利害。立定期限。

以時啟閉。庶於渠政有裨。其草壩以下。各有引河。及六塘河北岸之丁家溝。南岸之馬家河。鮑營河。形勢迂曲阻塞者。均如諸臣所勘。估挑辦理。務使通流。以達於海。第六塘河修防事宜。向無專設之員。即鹽河各壩。亦非鹽務微員所能相機經理。該督撫可於通省事簡同知通判缺內。議移一員。駐高家溝達中地方。仍應選能勝此任者。奏聞補授。俾專司水利。及修防啟閉之事。地方水利各員。聽其

調遣。仍歸淮徐海道總轄。亦聽總河節制。務令宣防無誤。而蓄洩合宜。此皆朕目擊深維。集衆議而取裁定制如此。地方大吏。其善體朕意。實力奉行。所有應添石壩土隄及一切挑挖疏濬各工。該督撫。河臣。會同鹽政。悉心確估。覈議以聞。○諭軍機大臣等。永貴等奏稱。准軍機大臣議。覆德爾格奏。將回人收養之厄魯特官為買出。送伊犁安插。因詳加察訪。有實受回人苦役者。即給價贖取。有為家

主信用。妻孥牽累。不願贖身者。各隨其便等語。從前辦理此事。原因厄魯特等受回人折挫。與其畏懼脫逃。流為瑪哈沁。不如贖出。與現在伊犁之厄魯特等。一同安插。以靖地方。此亦視伊等情願與否耳。若伊等果能相安無事。不致遁竄為匪。又何必勉強贖出。著傳諭永貴。即如所奏辦理。并傳諭各駐劄回部大臣等知之。○又諭曰。永貴等奏稱。霍罕額爾德尼伯克。因從前沖噶巴什布魯特搶掠

貨物未經全還。懇求補給。所開銀數。與邁瑪喇伊木原報不符。將前後情節。復書曉示等語。覽永貴等復書。詞氣太弱。霍罕人等來喀什噶爾貿易。所攜不過土產。豈有齋銀四萬餘兩之理。此特該部落人等。見給還貨物。轉生僥倖。事理易明。永貴等應即向來使斥責云。爾等貿易往來人數。及所攜貨物。誰不知之。安得有齋銀數萬之事。況搶掠爾等之烏默爾。比業已解京治罪。前次查給貨物。爾等屬人。俱感激領回。不便復據一面之詞。再行辦理。似爾貪得無厭。將欲誰欺。如此明白宣諭。方為妥協。乃區區致書分析。殊為失體。著傳諭永貴等。嗣後遇此等事。須加意果斷。毋得稍露怯弱之意。○予故古北口提督吳進義。祭葬如例。謚壯愍。○是日。御舟駐蹕直隸廠。○庚午。常雩。祀

天於

園丘。遣裕親王廣祿恭代行禮。○

上至淮河。祭

淮神。○閱高家堰。○祭

河神。○奉

皇太后渡河。詣

皇太后御舟問安。○諭。朕閱視高堰隄工。自武

家墩迤北。於乾隆二十二年。命建甌工以來。

整繕堅緻。足資保障。惟由濟運壩。至運口。五

百餘丈許。尚仍土隄之舊。未免間有汕刷。自

宜一律接建甌工。至燒造甌塊。尤宜較前寬

厚。以期鞏固。俾全湖均藉安瀾。副朕軫念民

生至意。河道總督高晉。即遵諭行。○諭軍機

大臣等。新柱額敏和卓奏。稱葉爾羌和闐所

積穀石甚多。如酌量有餘之數。以二折交

錢文。採買牲隻。八折交紬布。運至伊犁。換

易哈薩克馬匹。既於公事有益。而該城伯克

等亦俱樂從等語。折交穀石。既屬公私兩便。

自應如此辦理。但回城伯克。每多巧取。若指

稱公事。科歛其下。尚屬有限。此等折交錢布。

所及者廣。最宜留心查辦。即如鄂對阿什默特二人。鄂對尚可信。無巧取之事。然此特因額敏和卓在彼有所顧畏耳。今以玉素布往代。雖同屬舊時臣僕。而資望少減。恐鄂對不無玩忽。額敏和卓於鄂對宜從容開導云。爾當勿改初心。我暫歸一二年。再來駐劄。仍可相見如故。庶伊知所謹凜。將來與玉素布交代時。亦宜告知。俾得留心辦理。凡遇回部伯克等。俱當詳悉訓戒。務期正己率屬。以挽頽

風。○葉爾羌辦事都統新柱等奏。葉爾羌所鑄新錢。共十萬三千。騰格有奇。除易普爾錢外。尚存四萬餘。騰格普爾漸次短少。雖將新錢如數相易。亦未即流通。適值阿桂咨商。以布准糧。解送伊犁。與哈薩克交易。查葉爾羌布價甚賤。計四萬餘騰格。即可買四五萬疋。每疋折銀一兩。利已加倍。不獨省內地運解錢亦流通。衆伯克無不欣感。報聞。○以廣西梧州協副將李星垣為廣西右江鎮總兵。○

是日。御舟駐蹕徐家渡。○辛未。諭據素玉奏。稱德州滿洲兵內。有索倫察哈爾人等十六缺。現今此十六缺內。另戶兵十二人。開檔兵四人。每月俱給十口糧米。開檔兵丁。給與十口糧米。殊屬非是。請將現任專管防禦驍騎校等。交部嚴加議處。城守尉伍什布。兼轄之前任將軍。副都統。專轄之德州。歷任城守尉等職名。并應賠多給糧米官員名銜。俟查明另行咨部等語。德州索倫察哈爾兵丁開檔

人等。照依另戶。給與十口糧米。殊屬非是。但此事非現今所辦。乃係歷任大臣官員遵循辦理。年分已久。今更正自屬當然。尚不至查參。歷任大臣官員。其現任官員。著交部查議。多領米糧。加恩免其賠補。○又諭。據如松等奏。稱西安滿洲二旗副都統。俱有田園二十晌。惟漢軍二旗副都統。並無田園。請將裁汰滿洲一旗副都統之田園。給與現留之漢軍副都統等語。同一副都統。將現餘地畝。給與

無地之副都統。非為不可。但陳世泰人本平常。原係裁缺留京之員。朕念其母老。特恩將范宜中調任。復補用西安副都統。如松此奏。特為將此地畝與彼。而陳世泰即當陳說。阻攔將軍之奏。方是。乃並不阻攔。且與聯名具奏。甚屬糊塗卑鄙。陳世泰著交部查議。如松將陳世泰職名入奏。亦屬非是。如松著飭行。此項地畝。不必與陳世泰。其租銀著暫存公用。俟陳世泰出缺。另放有人時。再行給與。○

又諭曰。恒祿從前查奏傳良所奏吉林烏拉兵丁賠補滋生銀兩一案。並未詳細聲明。經朕降旨訓飭。今據伊具摺請罪。愈覺不堪。是何意見。令人不解。前因此事。傳良所奏。與部駁孰為是非。令伊明白具奏。乃恒祿並不將此詳細聲明。是以降旨訓飭。今恒祿具摺止自行請罪。並稱此後諸事留心辦理。仍未將孰為是非。聲明具奏。殊令人憤懣。恒祿著嚴行申飭。此事究竟孰是孰非。著恒祿明白回

奏。不得仍前含糊請罪了事。○諭軍機大臣等。永貴等奏稱。回部鼓鑄錢文。仍須採礦。方足應用。現派員役。率領回人三十名。在碩爾布拉克等處試採。得銅頗旺。復添派回人。裹帶口糧。前往採辦等語。昨據達桑阿請多採銅。勅曾諭以恐累回人。不必添派。今永貴之意。與達桑阿相同。回部新鑄錢文尚多。採銅原非急需。著暫緩辦理。○又諭曰。伊勒圖奏稱。阿克賽游牧布魯特之伊穆喇特。比及阿哈拉克齊三人。率所屬二百戶。移於雅賽游牧。與指給之地不合。因行文曉示。俟秋收後。仍令移回等語。布魯特等離指給之地。任意遷移。固屬不合。但伊等性本愚蒙。惟知水草之利。今諭以內地定制。未必通曉。轉生疑懼。且雅賽距阿克賽僅隔一站。現屬閑曠。亦於事體無礙。著傳諭永貴。伊勒圖。嗣後辦理布魯特等。祇宜加意約束。俾安靜無事。雖不可縱令伊等任意游牧。至於逐水草遷移。相去

不遠者不必過於拘泥。○吏部等部議覆兩廣總督蘇昌等奏稱潮州府屬海陽縣城南三十里之浮洋市商賈絡繹最易藏奸請添設巡檢一員查潮州府原設永豐倉大使一員事務甚簡請改為海陽縣浮洋市司巡檢其原管倉務歸併該府司獄兼管又豐順縣離城七十里之湯坑市直通外海奸匪出沒亦請添巡檢一員查附近之大埔縣原設三河大產烏槎巡檢三員烏槎司只轄二甲可裁改為豐順縣湯坑市司巡檢其原管古源一甲撥歸三河司兼管源高一甲撥歸大產司兼管并請鑄給海陽縣浮洋市司巡檢豐順縣湯坑市司巡檢印二均如所請從之○吏部議奏大理寺少卿顧汝修奉使安南於出境後擅用單銜移書詰責該國王有乖大體應照例革職得旨顧汝修著革職○以正黃旗漢軍副都統容保為江寧將軍理藩院郎中留保佳為正黃旗漢軍副都統○是日

御舟駐蹕林家莊○壬申

上詣

皇太后御舟問安○遣官祭銅山縣

河神廟○諭軍機大臣等楊應琚奏請將烏魯木齊貿易換獲馬匹撥補新疆移駐各營倒缺一摺業經軍機大臣覆准并議將肅州各營每年倒缺一體通融酌補等語著再傳諭楊應琚將肅州各營協每年倒馬缺額若干向例領銀採買每匹價值若干若似此轉移酌辦較之每年採買共可節省銀兩若干一併查明具奏尋奏肅州各營協每年約准倒馬五百七十餘匹巴里坤烏魯木齊各營協二百七十餘匹安西提標所屬協路各營三百六十餘匹至各營協向例採買每匹定價八兩似此轉移辦理約每匹可省價四兩共可節省銀四千六百餘兩報聞○是日御舟駐蹕順河集○癸酉

上詣

皇太后御舟問安。○命莊親王允祿等恭奉皇太后由水程迴鑾。○

上登陸。取道徐州。閱河。○諭軍機大臣等。楊錫紱奏鳳陽衛旗丁苗必秀叩閭。現提卷犯質訊一摺。該犯所控霸占盜賣軍田。如係駕虛妄告。則刁健已極。固應從重治罪。即使情節屬實。固不妨秉公清理。而該犯身係旗丁。即有冤抑。先當赴該管衛弁陳訴。倘不為申理。亦尚有總漕衙門可控。乃敢悍然不知畏法。輒爾突仗叩閭。其本罪斷不可稍為寬假。該督當嚴行詰訊明確。若苗必秀果係理直。將本案照例完結外。仍將該犯按衛突儀仗律處治。以示懲警。可傳諭楊錫紱知之。○是日。駐蹕王家莊大營。○甲戌。定將軍總督班次。諭各省將軍總督班次。因將軍銜大。俱在總督前。此定例也。但總督未兼別銜者。理應如此。若有加恩兼銜者。即當照銜序定。即如尹繼善兼御前大臣。高晉兼內大臣。其銜俱在

將軍上。自應在將軍前列。嗣後有朕加恩兼銜者。其班次俱照此前列。著為例。○諭軍機大臣等。據高恒奏辦理拏獲私鹽車船變價充餉一摺。船隻既可裝運鹽觔。斷無一船僅變價二三錢之理。明係該地方官一任書役估變。不行稽查所致。該鹽政已咨商督撫。將各該處拏獲船隻。印烙解交運司。驗明原船之堅固朽爛。酌量辦理。但各省皆有緝私之責。車船變價。猶其小者。如此相沿陋弊。必因漫不經心。私鹽充斥。職此之由。著傳諭各該督撫。嚴飭所屬。嗣後務宜實力拏獲私販。其車船務須詳驗明確。從實估變。如州縣官暨胥役等。或有變多報少。與將原獲車船轉售私梟等弊。即行查明叅處。高恒摺著鈔寄閱看。可於直省督撫奏事之便。傳諭知之。○叅贊大臣阿桂等奏葉爾羌等城回人。續請移居伊犁者二百十四戶。現交阿奇木伯克茂薩等安插。年力精壯者。給籽糧牛具。令往屯

田。老弱有疾者。暫交該伯克養贍。年幼者。俟其長成。補屯田之缺。再此項回人。若俱令在河北固勒扎等處屯田。亦尚可容。但不如兩岸俱有莊屯。於觀瞻既協。而接濟穆素爾嶺臺站。更為順便。因於霍濟格爾巴克。海努克兩處。各編設一屯。報聞。○是日。駐蹕周家莊大營。○乙亥。諭軍機大臣等。據愛必達等。查審黃景運一案。此內牽涉武職大小員弁甚多。其飭法營私之徒。固應徹底根究。不得稍為寬貸。而事關牽連人衆。辦理必應嚴明簡捷。一經得實。即予定案完結。在各犯既不得苟冀遷延。滋串供拖累諸弊。而此等武夫。亦不得藉口滋蔓株連。妄行怨憤。總在承審者酌量輕重。於案情關鍵處。務在悉心究明。辦理。若其餘轉相攀引。無干緊要之人。則不必多方窮治。或致別滋事端也。將此詳諭愛必達。馮鈴知之。○又諭。曰。鐘音覆奏。陝西地方官接待將軍嵩椿。不遵定制一摺。所奏殊屬

顛預。從前因嵩椿面奏及此。朕以體制所關。是以降旨詢問鐘音。令其飭查。如果實無其事。不妨據實具奏。朕何難詰問嵩椿。若該司道等實有傲慢失禮於將軍之處。即當查明。係何官何人。在某地某事。逐一覆奏。乃該撫僅敘列儀制浮文。並以嗣後謁見將軍。悉照督撫體制。為曲意調停之舉。殊屬非是。鐘音著傳旨申飭。並令再行確查據實具奏。○軍機大臣等議覆。喀什噶爾辦事尚書永貴奏。稱。回疆事務紛煩。請於各城滿洲兵內。擇其辦事妥協。字畫端楷者。賞給六品頂帶。以示鼓勵等語。應如所請。喀什噶爾。葉爾羌。阿克蘇。各額設六缺。烏什。英吉沙爾。和闐。各額設二缺。從之。○是日。駐蹕雲龍山行宮。翼日如之。○丙子。上閱黃河岸新隄。○諭。徐州迤西之毛城鋪石壩。向遇黃流盛漲。隨時啟放宣洩。第司事者經理或未協宜。既恐分減水勢。難以併力刷

沙且過水太多有妨民田廬舍前南巡時籌度指示令河臣等慎重封閉毋得擅啟比年以來中泓刷深現至九尺三寸成效已著銅沛各屬生計亦均改觀第念水束流深自屬經常不易之法其一時偶值暴漲不無漫灘出槽積久遂成淤墊議者欲於北岸新隄改建石壩以資減洩不知有洩則必有淤其為微湖荆橋等處之患尤不可不為深慮今迴鑿取道再行規畫與督撫總河諸臣悉心講求自蔣家營傅家窪等形勢不宜節宣當如常堅閉外惟毛城鋪迤東之唐家灣向有倒勾引河可以酌量分洩然不詳定水誌工員無所遵守應遵洪澤湖開放清口現定之規於唐家灣引河亦視徐城水誌長水一丈一尺無庸開放若長至一丈一尺五寸以上再將引河開放俟漫灘水落即行堵閉仍令該督撫河臣於按誌應放時一面奏聞一面辦理清口並照此例行其睢河為唐家灣下游

如遇減水稍淤隨宜相機挑濬俾引河減出之水無致壅滯○軍機大臣等會同兩江總督尹繼善江蘇巡撫陳宏謀議奏蘇州布政使安寧奏稱各州縣修城一千兩上下之工均令州縣分年設法籌辦二千兩以上始准請帑等語查城工至一千兩上下若令地方官自辦恐勉強奉行有名無實且易藉端派累請嗣後城工在三百兩以內令地方官自辦其在千兩上下報司勘估動帑興修從之

○丁丑

上遣額駙福隆安赴新開河

皇太后御舟問安○閱嶧山湖○諭曰介福扈從前來在途病故殊堪憫惻加恩賞給都統銜並賞銀五百兩准其靈柩進城治喪○以原任禮部尚書伍齡安為禮部左侍郎○河南巡撫胡寶瑒疏報乾隆二十五年分武陟內鄉裕州盧氏開墾水旱荒地五十三頃有奇○是日駐蹕信義莊大營○戊寅諭軍機

大臣等。永貴。海明。和其衷等奏稱。阿克蘇所添採銅回人。因豁免伊等應交糧石。呈乞代奏謝恩。又稱各城回人等。添採銅觔。以四年為限等語。採辦銅觔。原以裕官兵回人之用。自當從容辦理。惟就現在所得之銅。源源鼓鑄。即稍有遲滯。亦無甚關係。何必添派回人。勒定年限。昨諭達桑阿等。不必添採銅觔。永貴似尚未奉到。故如此陳奏。至永貴等所奏回衆僉稱。情願連年添採銅觔之處。大臣等面詢回人。伊等焉敢以不願為詞。即謂回人愛重新錢。亦事之所有。但既非鑄錢賞給伊等。且仍收其普爾。又令其採銅為鼓鑄之資。謂皆出於本願。恐未必盡然。凡事當權其輕重。緩急。不可張皇欲速。著傳諭永貴等知之。○工部議覆。直隸總督方觀承奏稱。楊村廳屬五家莊前。縷隄。經上年汛水異漲。直射隄身。請添建草壩抵禦。又楊村以南。河崖被水衝刷。僅寬一二尺。鎮店房舍堪虞。請建草壩。

攔護。又三里淺。河身東徙。大溜直射草壩之南。請於壩南。接築草壩。均應如所請。從之。○又議覆江南河道總督高晉奏稱。桃源廳屬黃河北岸陳家莊。向無埽工。上年伏秋大汛。黃水異漲。大溜北趨。直射隄根。隄外即係運河。甚關緊要。請添建寬厚埽壩。應如所請。從之。○蠲緩浙江仁和。歸安。烏程。長興。德清。武康。會稽。諸暨。餘姚。上虞等十縣。湖州一所。仁和。曹娥。金山。下砂。下砂二三等五場。乾隆二十六年。水災額賦有差。○是日。駐蹕石家莊大營。

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十八

高宗實錄卷六五十八

三

大清高宗法天隆運至誠先覺體元立極敷文
奮武孝慈神聖純皇帝實錄卷之六百五十九

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理
吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午四月己卯吏部等部議

高宗實錄卷六五十九

准安徽巡撫託庸等奏稱前於移駐安徽藩
司案內以安慶府署為司署今請於城北將
軍府官地建府署從之○是日駐蹕澤山大
營○庚辰

孝端文皇后忌辰遣官祭

昭陵○

上至鄒城北詣

孟子廟拈香○至曲阜展謁

先師廟○賜衍聖公孔昭煥表裏各四端○

諭軍機大臣等。湯聘奏。流犯王珍佑。詳請捐贖一摺。內有照例將犯屬取保。並咨戶工二部之語。向來贖罪之案。果屬與例相符。原准奏明辦理。但必俟具摺後。交部覆准。始可照例完結。乃該撫於未經奏請之前。先將犯屬取保。並一面咨會二部。若事在必行。毋庸復候進止者。然。倘各省習以為常。將來辦理此事。又焉知其不以奏請為具文。竟至視同外結案件。此風尚可長乎。湯聘摺。已有旨交部議奏。並著於各督撫奏事之便。將此詳悉傳諭。令其知所遵守。○是日。駐蹕泮池行宮。○辛巳。

上謁

孔林至墓門降輿。步入墓前。北面跪。三酹酒畢。行三拜禮。○諭。禮部侍郎員缺。著張泰開調補。仍留學政之任。刑部侍郎員缺。著葉存仁補授。蔡鴻業著補授副都御史。仍辦刑部侍郎事務。其副都御史事務。即著葉存仁辦。

理。○諭軍機大臣等。楊應琚奏。伊犁烏嚕木齊等處。現在貿易接踵。所需綢緞。恐有不敷。請令三處織造。豫先織辦解肅等語。前已降旨。三處織造。令其豫備。酌量貿易所需各色綢緞。織造數千疋。以資撥用。著將楊應琚此次所開色樣數目。寄知江寧。杭州。蘇州。各織造。即行照數速辦解肅。○又諭。據楊廷璋。德福奏。查閩縣民楊魁等。假捏偽寶敕書。承襲世職一案。先經呈投撫標効力。原任巡撫吳

士功。收標食糧等語。吳士功身為撫臣。敕書既經自驗。何以懵然不省。撫署內又豈無檔案。可以查覈。一任惡犯玩弄。若此。其所司果何事耶。著傳諭巴里坤辦事大臣。永寧等面詰吳士功。令其據實登覆。一面具摺奏聞。○又諭。據楊廷璋。德福奏。拏獲私造敕書偽寶一案。實為大干法紀。已令軍機大臣會同行在法司覈擬矣。案內陳孝統一犯。與郭名思等。輾轉說合。商同購買。是明知偽造情節。已

屬顯然。何得任其狡賴。意存開脫。至楊魁。係買偽敕襲替之正犯。亦何以未經定罪。再供內有鄒文等。先於乾隆九年。捏造劄付。賣與莆田蔡保海。至今伊家內。尚有現存劄付木板。並兵部堂司各假印。則該犯之慣行偽造。歷時已久。各任督撫何人。竟漫無覺察。至此著傳諭楊廷璋等。令其逐一查明參奏。至德福訪查速辦。此案頗是。而通案何以不即擬定罪名。即云別案尚有質究未明之處。而此等奸惡之犯。一案既確。其罪自無可增加。著該督撫等。即行嚴審定案。不得稍存姑息。亦不得輾轉耽延。致重犯得稽顯戮。○又諭曰。郭一裕。由巡撫緣事革職。因非大罪。復加恩用為河南按察使。今赴行在召見。其年雖非衰老。而識見舉動。漸就頹墮。著傳諭胡寶瑤。令其留心察看。果能加意黽勉。尚可無誤職守。則已。如其不克勝任。臬司所關綦重。非可稍事姑容。該撫即行據實具奏。○護福建巡

撫德福奏。各省軍流人犯。向解應遣省分之巡撫衙門。分別安置。嗣經條奏。照道里表徑解。應遣府分安置。查福寧一府。人犯至二百餘名。緣道里表所載。各府屬人犯。應解福寧安置者較多。遂至日增月積。此等本非善類。聚處不宜。福寧僻處海陬。防範尤為不易。請嗣後仍解交巡撫衙門。通融安置。其已到配者。亦容查明均勻改發。從之。○以刑部右侍郎阿永阿。兼正紅旗滿洲副都統。正紅旗蒙古副都統扎隆阿。兼鑲藍旗護軍統領。○賑卹甘肅安定。平涼靜寧。莊浪。華亭。平番。靈州。西寧。大通。成縣等十州縣。乾隆二十六年。雹災飢民。并予緩徵。○是日。駐蹕魏家莊大營。○壬午。上遣侍衛五福。赴朱官屯。皇太后御舟問安。○上至泰安府。岱廟拈香。○巴里坤辦事都統永寧等奏。自

安西挈眷赴巴里坤駐防官兵一千五百名。現已到齊。查巴里坤差務需員。現到三營大小官二十員內。除撥往屯田及本營差委外。餘不敷用。請留舊駐都司守備各一員。千把總十員。聽候差遣。其餘官員兵丁。皆面為交代。令回原營。所留官員。照各城例。三年一換。此後或有自營撥回。或裁減差務之處。再行酌辦。報聞。○以雲南布政使顧濟美廣西布政使永泰對調。○以江蘇按察使蘇爾德為

湖南布政使。江蘇糧儲道胡文伯為江蘇按察使。○以故四川建昌道屬瓦迷更平長官司白馬七立子格戎七亨襲職。○鑄給烏魯木齊同知烏魯木齊通判關防。昌吉巡檢司。羅克倫巡檢司印。從陝甘總督楊應琚請也。○豁免山東齊河。濟南。濟陽。禹城。臨邑。長清。德州。德州衛。平原。東平。東平所東阿。惠民。陽信。海豐。樂陵。商河。霑化。金鄉。魚臺。濟寧。嘉祥。汶上。陽穀。壽張。濟寧衛。河澤。單縣。城武。曹縣。

定陶。鉅野。濮州。范縣。聊城。冠縣。臨清。邱縣。館陶。恩縣。夏津。武城。東昌衛。臨清衛等四十四州縣衛所。乾隆二十六年水災額賦。○是日駐蹕泰安府城西大營。翼日如之。○癸未諭軍機大臣等。阿桂等奏稱。由哈薩克布魯特來投之厄魯特等。安插伊犁。此內攜有牲畜。可以自給者。居其大半。其餘多屬貧乏等語。來投之厄魯特等。求安生業。居住伊犁。於耕牧之事。頗知奮勉。但甫經安插。一切俱須料理。應酌量稍為資給。俟地畝成熟。牲畜孳息。始可接濟。著加恩將生計稍可者。各賞銀一兩。貧乏者。大口賞布二疋。小口布一疋。仍賞銀一兩。其各處收集之厄魯特等。亦著一體給賞。各頭目等。酌賞緞疋。此次係朕特恩。著阿桂等明白曉示。令嗣後益加鼓勵。以裕生計。○軍機大臣等議覆。陝甘總督楊應琚奏。稱。請將南北兩路換班撤回索倫察哈爾兵。照前赴新疆換防官兵之例。皆走邊外。較為

省便。應如所請。其自南路回京之滿洲官兵。該督請由烏魯木齊行走。如有疲乏馬匹。即於該處酌換之處。查烏魯木齊馬匹。業經奏准。令換防之索倫察哈爾兵。到彼撥換。此外尚有馬若干。是否足敷更換。應令妥為經理。從之。○甲申。諭曰。德保。顧汝修。奉使安南。顧汝修。於已離該國。輒自致書詰責。見小乖謬。德保。雖稱曾經勸阻不從。然伊既為正使。所司何事。且並不據實叅奏。今復命行在。德保身係滿洲翰林。又何至遲到在。顧汝修之後。雖據稱先至靈巖寫摺。而朕至靈巖。伊並未跪接。至晚始交奏摺。其巧辯無能。更不待言。顧汝修。已經革職。德保。著交部嚴察議奏。尋議。德保。照徇庇例。降三級調用。不准抵銷。從之。○以國子監祭酒全魁。為內閣學士。兼禮部侍郎。太僕寺少卿。覺羅志信。為太常寺卿。○舉行乾隆二十七年分京察。罷軟官三員。年老官四員。有疾官五員。才力不及官七員。

分別處分如例。○是日駐蹕靈巖寺行宮。○乙酉。諭安南世守藩封。夙昭恭順。朕心素所嘉予。乃者國王黎維禔新嗣。特遣使臣德保。顧汝修。持節往封。自受冊以迄禮成。該國王深知感戴。中朝恩禮。敬謹有加。乃副使顧汝修。於起程之後。自行移書詰責。且不與正使聯銜合劄。朕以其見小乖謬。罔知體要。已有旨交部處分。至該國王於使臣蒞境時。先請商五拜之儀。必待使臣駁定。始克如禮。未免狃於鄙俗。實為弗當。但念該國王一經使臣指示。即遵定制。亦可從寬。弗論矣。該部可傳諭該國王。俾知永遵三跪九叩之儀。毋再隕越。至其送使臣之物。亦止應用該國土產。如食品布幣之類。已足將敬。所有例備程儀銀兩。究屬非體。嗣後永行停止。此次雖在未禁以前。亦應發還。俟該國王謝恩使回之便。令其攜往。禮部詳悉行文該國王知之。○又諭兩淮綱商。舊習相沿。一切交接應酬甚多。公

然餽遺而往來之人頗有因此漁利者鹽政運使竟習以為常而不之禁不肖之人且有吹噓授意者於政體風俗大有關係上年尹繼善高恒來京令軍機大臣會同定議所有前此交往私用止聽該商各就親戚朋友情誼酬應原所不禁不得派出公項名色動支現經該鹽政奏明雖照議定章程辦理第恐日久奉行不實或仍有授意衆商以為往來官員資助者則是累商力而徇私情當惟於

該鹽政運使是問○是日駐蹕潘村大營○丙戌諭軍機大臣等據行在步軍統領衙門奏於泰安拏獲隨營偷竊匪犯張三訊供前經犯案遣解至鳳陽府所屬顧鎮地方因解役只剩兩名遂與同解竊犯張禿子砸鎖脫逃等語解送遣犯自應慎重飭差沿途盡心防範乃張三等遣犯五名止有二役押解以致積猾乘機免脫玩忽疎縱莫甚於此地方官所司何事江省州縣積習於此等遞解要

件竟視同具文較他省為尤甚不可不力行整飭著傳諭尹繼善託庸查明張三等各犯接解脫逃之各州縣及專轄之鳳陽府知府一併具摺嚴叅不得少為姑息○是日駐蹕陳家莊大營○丁亥諭曰託庸奏鳳陽水利同知梅長遇等承挑睢河工程河身淤淺多未挑挖虛費玩工請旨革審等語河員積習惟以草率工程冒開帑項為事為上司者不能實力查辦何以使錮疾得瘳託庸據實叅

奏甚屬可嘉所有同知梅長遇及協辦委員州同州判等俱著革職交與該撫會同尹繼善高晉審明後除伊等現在承辦工程不准開銷外仍令戴罪留工所有明年工段著落加緊挑濬以懲積玩李永標亦著查明叅奏○諭軍機大臣等烏什城與布魯特接壤安集延人等時來貿易事務頗多著派副都統素誠前往烏什更換永慶素誠係新經任事之員恐一人不能獨辦現在庫車事簡有鄂

實已足辦理。著圖勒炳阿前往烏什。同素誠辦事。○又諭曰。永貴等奏稱阿克蘇阿奇木伯克色提巴勒氏。因伊舊居烏什。祖父墳墓在彼。請將從前房產之入官者。稍為撥給。遣三四戶人前往守視。所給官項。由阿克蘇抵交等語。色提巴勒氏前在軍營。頗屬奮勉。已加恩授為散秩大臣。阿奇木伯克奉職亦屬盡心。今以先塋之故。請派數戶前往守視。自宜允行。所有給與田產。著加恩賞賜。不必由阿克蘇抵交。著傳諭永貴等遵照辦理。并曉示色提巴勒氏知之。○又諭曰。馬乾宜奏謝調補河北鎮總兵一摺。內有假期已滿。隨自靈州起程。赴楚姚本任。途次西安。接讀調補恩旨。順赴河北新任之語。前馬乾宜以伊母年老。懇請改補近省。因降旨將伊調補河北。伊自知奏懇在先。豈有不聽候諭旨。假滿仍赴楚姚原任之理。明係在途觀望。為此飾詞取巧。不脫綠營卑瑣惡習。馬乾宜著傳旨嚴

行申飭。○又諭曰。託庸奏查看毛城鋪引河之唐家灣。高低地勢。恐將來一開草壩。水性直注洪畦。請添建深水石壩。並接築子堰等因。一摺。著即鈔寄尹繼善高晉。令其確覈情形。會同詳悉。妥議具奏。尋奏唐家灣係近河灘地。漲坍無定。草壩可隨時鑲修。斷難建立石壩。相機啟閉。亦不致有直注洪畦之慮。至請倒勾河以東。接築子堰。查倒勾河以東。向留空地百餘丈。以洩漫灘之水。入唐家灣引河。若築子堰。則漫水無歸。必致淹浸民田。託庸所奏。均毋庸議。得旨。朕早料汝等議駁也。○是日。駐蹕李劉莊大營。○戊子。皇太后登陸。至德州行宮駐蹕。○上詣皇太后行宮問安。○定西陲文武員弁赴任。憑限吏部等部議覆。兵科給事中范宏賓條奏。安西口外新陞文武員弁。請酌定赴任憑限。查例載自京至肅州。憑限八十五日。巴里坤

哈密等處均在肅州迤西離肅六百餘里及三千餘里不等應照程途遠近分別加增臣等酌定自京至安西給限一百日哈密一百十五日巴里坤一百二十日烏魯木齊一百四十日至在外推陞由原任地方領憑赴任者按照里數填給從之○是日駐蹕德州行宮○巳丑

上恭送

皇太后登舟由水程還京○江西巡撫常鈞疏

稱奉新萍鄉蓮花萬安永新玉山廣豐鉛山

興安南康等十廳縣乾隆二十五年分開墾

荒地三頃五十六畝有奇○旌表守正捐軀

之安徽太和縣民康有倫女康氏山東長清

縣民韓某女韓氏○是日駐蹕新莊大營○

庚寅

上遣額駙福隆安赴秦家莊

皇太后御舟問安○諭曰顧汝修奉使冊封安南回途輒自單銜移書詰責該國王見小乖

謬已極閱其書藁見可鄙可笑之處不一而足如開章臨別贈言一語以尋常友朋之誼例朝使與外藩已全不識立言之體其他更何足指摘第以顧汝修猥瑣之見或自許為不辱君命欲將此藁誇耀入集則不可付之弗問也安南叢爾邊藩世奉朝貢今以嗣封請使其恭順自不待言而見即因其接詔之初咨商儀節以該國敬天五拜為請正使德保與顧汝修移文斥之該國王即恪遵三跪九叩可謂成禮歲事矣至以該國築館曠野多陳兵衛以為蔽人之明塞人之聰近於曖昧此成何語下國方以備物備儀崇奉節使乃謂之任術自小如欲加害者然無論該國接待使臣原無別術之可施即果欲加害試問伊等二人自揣輕軺褻博之人勢比縛雞何異且安南加害伊二人欲何為乎至叢爾外國本無可採訪之處伊二人又何有聰明之可塞可蔽乎甚至見其衢設三象旗綵盈

路幾致喪胆驚疑。是又怯懦小夫所不應出此者。朕以使臣不達事理。若此未免貽嗤。僻遠是以交部議處示儆。不知者或謬頌朕恐啟邊釁。則大不然。朝廷中外一家。西陲數萬里。新疆式擴。悉主悉臣。其強弱大小較之安南為何如。且以顧汝修移檄詆訶。曾不顧慮之區。而朕轉斤斤恐其生事哉。故凡不辱君命見幾而作之語。皆非所論於汝修。可鄙可笑。此為者特以其支離悠謬。迥出人情之外。因各於本條縷悉指示。顧汝修如將此付梓。可備錄此諭。及硃批一併刊刻。俾寓目者皆知別白。倘敢私自單行。異日發覺。朕必重治其罪。用昭欺世盜名之戒。批藁並發。○諭軍機大臣等。楊廷璋等奏。詔安縣有訛造謠言。居民驚竄之事。該縣馬禾並未立時查拏。稟辦一摺。奸匪捏造謠言。擾惑人心。最為地方風俗之害。況海濱民情。素多刁悍。所關尤非淺鮮。此案一經發覺。即應嚴查速緝。務將首

先倡言之人究出。盡法重懲。即定擬過當。其所保全者不少。毋得稍存姑息之見。至該縣不即具稟。固罪無可辭。而該管道府見聞實為親切。遇此等案件。當一面稟知。一面實力根究。方克副親臨之職。楊景素任該省道員日久。蔣允焄亦由縣令特拔之人。伊等平日尚稱能事。何竟憤憤若此。况德福既由漳州司獄赴省。詢知此事。則為時已非一日。伊等通稟。必非急難遽達。乃俟該督等飭委之後。始行草率具覆。希圖消弭諱飾。全不問事理輕重。而該督等亦豈得以叅處一縣令了事乎。著將楊景素蔣允焄一併嚴行查叅。仍務獲案犯。勿任遷延漏網。其司獄俞燦尚能留心地方事務。並著給咨送部引見。將此傳諭該督知之。○大學士劉統勳直隸總督方觀承山東巡撫阿爾泰會奏直隸景州連年被水。臣等遵旨會勘。因本處無地宣洩。上游德州運河一遇大汛泛漲。遂至波及。查恩縣四

女祠壩座形勢分水減溜最為得力。惟壩門窄狹。請寬展四五丈。即見通暢。再山東運河臨清迤北。惟藉四女祠及哨馬營兩處宣洩。必宜疏通。以防盛漲。兩壩支河均會老黃河入海。綿長三百里。經山東直隸十數州縣。向無專員管理。愚民各顧其私。遇淤灘即希種植。一阻礙即致漫溢。請將德州州判移駐兩支河交匯之邊陵鎮。俾不時巡查。有應修估之處。即移會河道坐落之州縣公同辦理。但州判官微。河道關係兩省。恐呼應不靈。查山東糧道駐劄德州。稽查甚便。請將一切疏築事宜責成該道董理從之。○是日駐蹕紅杏園行宮。○辛卯諭朕巡省江浙畿輔所過地方。應徵賦額前已特頒恩旨。分別蠲免。但念各屬尚有節年民欠未完之項。因災分年緩帶錢糧。尚應按數徵收。茲迴鑒沿途體察民依。宜敷惠澤。著再加恩。將乾隆十二年至二十五年大興靜海龍門宣化懷安萬全西寧

懷來蔚州四旗等十州縣廳未完地糧銀七千一百餘兩。改折銀六千六百餘兩。屯糧一萬六千餘石。概予豁免。其自十九年至二十五年各屬因災緩帶地糧銀八萬六千七百餘兩。改折銀九千一百餘兩。屯糧六萬三千餘石。並著加恩於本年起限。再分作三年帶徵。俾民力益舒。得資耕作。用稱愛養黎元至意。該部遵諭速行。○吏部議奏安徽石埭縣知縣史萼前由邠州學正保舉知縣。茲以貪婪革職。其從前濫行保舉之陝甘總督楊應琚前任學政現任兵部侍郎張映辰。照例降一級調用。陝西布政使方世雋按察使楊纘緒均照例降二級調用。楊纘緒已休致。應降去頂帶二級。得旨楊應琚著降二級。從寬留任。張映辰自為侍郎碌碌無能。著降一級調用。方世雋著降四級。從寬留任。楊纘緒著降去頂帶二級。○以國子監司業吉泰為太僕寺卿。○鑄給停前鎮巡檢司帶管驛務小里

潭巡檢司兼理水利印二。從湖北巡撫湯聘請也。○是日駐蹕太平莊行宮。○壬辰定繁缺道府犯貪獲罪議處原保堂官例。諭曰劉藻題參永北府知府馬淇珣營私不職一本向來保舉官員陞任後遇有貪贓不法之款審實時將原薦舉各上司分別議處而部員三年俸滿堂官保道府一項向未議及第思司員中分別簡缺保送者其等差非特薦可比該堂官尚可從寬免議若既定為繁缺則必素信其堪勝艱鉅而保之與薦舉更何差別而該員犯貪獲罪竟不懲舉主以肅官方非情理之平也此案馬淇珣俟貪贓審實即查取原保繁缺之該堂官交部議處自後並將此通著為例。○又諭曰葉啟豐奏部院堂官於京察前各將司員分等密陳一摺意以事屬無裨何不請停止而乃隱躍其詞以謂似應裁酌更當如何裁酌耶上年呂光亨條奏原為甄別人材立法不嫌詳備既以覈

屬員政守之賢否兼可覘堂官衡鑑之公私且恐舉察時各部或因兼攝大學士及尚書一二人為政而侍郎等輒謂不能自主未免退而藉口是以敕議允行昨閱各該堂官所奏仍係大同小異於察典實無所增損已欲降旨罷其事矣蓋京員辦事一堂優劣原所共見與外省情形不同無論正卿等本不敢任意自專侍郎等亦無從爭衡高下即使果有力能主持之大學士尚書料侍郎等亦不過人云亦云隨聲附和而已倘遇同堂實有瞻徇枉撓情弊侍郎等據實指參豈非朕所深望而不易得者然試問卿貳中如思不彭啟豐程景伊觀保張映辰輩又何能獨具卓識起而佐其不逮乎是密陳既不足備參稽則公察自當一循舊制以省繁文至其中激揚或不能允當待引見定奪亦自不爽矣所有京察前一年各堂官密陳司員賢否之例著停止葉啟豐摺并發。○是日駐蹕思賢村

行宮。○癸巳。

上遣侍衛五福赴胡楊莊。

皇太后御舟問安。○諭前因直屬辦理車輛地方胥役人等不免從中滋弊。是以降旨改令大糧莊頭拴車備用。今據方觀承奏稱恐有以民車冒充官車串通影射請定稽查之法以杜弊端等語所奏甚是著照所請行。但地方有必需辦車事務雖不能不雇諸民間必當嚴定章程始有稽覈在莊頭固不得包庇

民車冀免差役而地方官亦不得一任胥役混行拏雇嗣後著該督隨時察覈年終將用過車輛數目彙摺具奏庶民車不致擾累於官民均有裨益。○是日駐蹕趙北口行宮。○是月江南河道總督高晉奏臣送駕後回至徐州即赴毛城舖之唐家灣相度情形查唐家灣引河內間有淤灘土埂應一律挑除已飭道廳趕辦臣復由黃河挨查兩岸遵旨將應行落低之壩展寬之河詳細勘估俟秋汛

後償辦惟西壩落低四尺及壩下展寬之河

最關緊要已派員分段承修勒限報竣報聞

○閩浙總督楊廷璋奏臣送駕後即馳赴海寧至塔山查勘壩外漲沙標記三處均有增漲至老鹽倉一帶柴塘工長九百四十五丈已修過二百七十丈其未修者現面諭海防道趕辦務於秋汛前一律修固塘外遵旨安設竹簍以護塘根可無埝蟄再前修竣之柴工近日蹲埝一二三尺不等因少用腰底面

椿不能簽釘現在拆修之柴工俱加增椿木修築堅實以免滲漏至舊大石塘未築坦水之處俱遵旨增建條石坦水以期塘方鞏固報聞。○河東河道總督張師戴山東巡撫阿爾泰會奏上年汎水異漲細察情形恩縣四女祠向有滾水壩一座下有支河係減洩漳衛汶異漲之水惟壩門僅寬七丈宣洩不暢請并支河一律展寬以資吞納又魚臺縣西隄辛莊橋北舊有洩水口二處秋水漲時分

洩入昭陽。徽山二湖。春間堵閉。蓄水濟運。每年需費既多。而口門日刷。日深。在運河既難。以節制。兩湖受水過大。亦非長策。請另擇就近堅硬處。建滾水壩一道。既可一勞永逸。入湖之水。亦有節制。從之。○陝甘總督楊應琚奏。安西府境當衝要。額設差馬百匹。不敷供應。向在提標五營內酌撥。今已分駐巴里坤。烏魯木齊。安西城守。兵數無多。馬數亦減。查安西營屬之百齊堡。設把總一員。兵一百名。馬六十匹。該處并非要隘。請移撥安西府城。以供差遣。從之。○四川總督開泰奏。查松潘建昌等處各營。及佐雜官分駐地方。皆以堡為衛。或石或土。歲久未修。半就傾圮。而工程零星。未便動帑。查寶川局錢。有應出易以平市價者。原議庫平紋銀一兩。給錢九百五十文。較市價為多。各鋪戶希圖餘潤。竟有將所易錢文。潛運他省者。雖行嚴禁。陽奉陰違。因飭成都府官為設局。做常平倉平糶例。視市

價隨時量減。自上年六月。至本年三月。計盈餘銀五千兩有奇。除支給一切人工飯食。及傾銷等項。又於官地修建房屋二十餘間。為往來差務公廨外。尚餘銀二千餘兩。請將此項銀。嗣後俱存貯司庫。以為修葺松潘建昌等處各堡之用。從之。

大清高宗法天隆運至誠先覺體元立極敷文奮武孝慈神聖純皇帝實錄卷之六百五十九

大清高宗法天隆運至誠先覺體元立極敷文奮武孝慈神聖純皇帝實錄卷之六百六十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣董誥內大臣戶部尚書鎮湖廣總督軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午五月甲午朔諭曰鄂爾

奇達遜經朕施恩在乾清門行走甚為奮勉

新來之厄魯特即能如此殊屬可嘉伊本係

台吉之後本日拏獲叩閣之人亦甚勇往鄂

爾奇達遜著加恩賞給三等伯爵○賑卹安

徽壽州鳳臺鳳陽懷遠泗州盱眙五河七州

縣及鳳陽長淮泗州三衛乾隆二十六年被

水災民並蠲緩額賦有差○是日駐蹕紫泉

行宮○乙未

上至涿州哈薩克陪臣阿塔海等入覲於涿州

城南跪迎

聖駕賜冠服有差○諭軍機大臣等今日行次

涿州甘霖霑足雨勢甚為溥徧前過山東泰

安一帶土脈微覺乾燥農田尚需雨澤著詢

問阿爾泰數日以來東省各屬曾否得有透

雨速行查明奏聞以慰厯念○賑卹長蘆屬

滄州南皮鹽山慶雲青縣衡水海豐等七州

縣及嚴鎮海豐蘆臺豐財富國興國濟民七

場乾隆二十六年水災竈戶并蠲緩額賦有

差○是日駐蹕涿州行宮○丙申

孝誠仁皇后忌辰遣官祭

景陵○諭曰方觀承因蠡縣逆犯劉起鳳一案

請將該縣劉苞麗革職該督及臬司道府一

併交部嚴加議處該犯從前既曾持刀入城

罵街犯案懲治此等惡匪自應嚴加約束毋

許出境乃該犯復遠赴新城地方持鎗叩閣

則該縣之平日不能約束咎實難辭劉苞麗

著革職留於直省差遣効力俟數年之後如

果奮勉該督再行請旨方觀承等皆係統轄之員所屬地方遼濶其查察未周之處尚屬可原俱著從寬免其交部○是日駐蹕黃新莊行宮○丁酉

上迴鑾○詣

安佑宮行禮○幸圓明園○貴州都勻府麻哈州屬樂平長官司土官宋漢因病告休以其子聖宣襲職○戊戌諭今日顧濟美奏請貤封並舍圖肯等為遊擊任景代請貤封二摺

均著照所請准其貤封第念內外臣工得遇覃恩據情奏懇非格於定例者其事率宜允行惟是京員三品以上例得自請餘俱由吏兵二部查覈彙奏而外官文自藩臬武自副叅以下一一皆以專摺具奏待朕降旨陳牘紛繁殊於政體未協自後除督撫提鎮等仍循例自行摺奏請旨外其藩臬副叅以下各員著詳報督撫提鎮覈明與例相符彙齊具奏仍勅交吏兵二部覈覆准行則大員具候

朕裁衆職亦均歸畫一將此通著為例○己亥

上幸同樂園賜哈薩克陪臣阿塔海等茶果○諭今歲鄉試屆期所有各省正副考官著將應行開列人員照例通行考試以備簡用該部即遵諭行○諭軍機大臣等今日馬負書奏詔安縣訛造謠言居民驚竄一摺此事前經楊廷璋等奏到當即傳諭令其實力嚴查速緝今已逾時首先倡言之人曾否就獲一面即具摺覆奏此案如初發時及早根究要犯何能免脫若遲延至今尚無端緒而辦理過事張皇必致奸民益堅其潛蹤匿跡之謀而無辜亦轉多株累豈戢匪安良之道蓋此等狡獪伎倆急則決計遠颺緩或端倪易露尤當從容體訪相機躡緝此時該縣已經革職道府等亦當遵旨嚴行查叅該督等可於各員缺慎擇明敏幹練之員先行接署設法妥辦務期緩急合宜俾該犯不得軌法漏網

方為允協。將此再行詳諭該督等知之。○庚子諭軍機大臣等。明瑞奏稱永貴等所定各城滿洲索倫兵數。喀什噶爾二百一十名。葉爾羌阿克蘇英吉沙爾等處各一百四十名。必致離其本旗。難資管轄。查換班滿洲兵。每旗正數皆一百五十名。請按滿洲兵六百索倫兵三百正數。喀什噶爾派滿洲兵二百。索倫兵一百。葉爾羌阿克蘇各派滿洲兵一百五十。索倫兵五十。英吉沙爾派滿洲兵一百。索倫兵一百等語。前永貴將各城兵數瑣細分派。已覺過當。今明瑞又斤斤較量。所奏亦未明晰。此項官兵。非盡駐劄本城。兼有臺站卡座差遣。即令稍為撥補。亦無不可。著傳諭明瑞等。彼此通融商酌。不必過於拘泥。○以故貴州思州府屬都坪司土官何道煌子型襲職。○辛丑。

皇太后自水程迴鑾。
上至黃莊問安。奉

皇太后居暢春園。○諭八旗都統副都統雖有一二品之分。然與尚書侍郎無異。俱有管理旗務之責。理宜和衷共濟。都統之缺。或有以王兼攝者。蓋因一時不能得人。於諸王內擇其能事者。命其管理。此亦舊例。欲王等習學事務之意。王等理宜盡心旗務。不可倨傲。大臣等亦不可謂其占據陞途。但日久風靡。二弊皆所不免。再王爵雖貴。若居都統之任。即與都統無異。豈可以王爵自大。或副都統內有不曉事之人。妄為逢迎。及叅佐領趨奉諂媚。不但於旗務無益。於國家體制亦有關係。大非朕簡用諸王之意。嗣後王等兼攝都統。但依都統職分。盡心旗務。以副朕簡任之意。將此通諭八旗知之。○又諭曰。吳達善叅奏永北鎮總兵何燦斗向叅革知府馬淇珣。借銀索債。彼此齟齬。兼有違例坐轎。考拔徇私。歲修汎房。濫派夫草。縱令弁兵飲酒宿娼。並增減買賣價值。罔利情事。請革職嚴審等語。

總兵係專閫大員。理應潔已奉公。為營伍表率。乃行事種種卑鄙。營私至於此極。實屬深負委任。何燦斗著革職。交與該撫並案內有名人犯一併嚴審。究擬具奏。○陝甘總督楊應琚奏。甘省現有情願攜眷告駐烏魯木齊弁兵二百八十一員名。已造具營分花名清冊。移咨該處辦事大臣。并飭令沿途地方官妥協照料。現俱陸續自肅起程出關。得旨。知道。了。外域竟成樂土。實堪欣悅。當益為鼓勵招徠。以開其路。○以正藍旗蒙古都統巴祿為涼州將軍。○賑卹湖南武陵龍陽澧州安鄉等四州縣。乾隆二十六年水災貧民并蠲免額賦有差。○旌表守正捐軀之直隸行唐縣民李亮妻薛氏。○壬寅。

上詣暢春園問

皇太后安。○諭軍機大臣等。據常鈞奏。玉山縣知縣饒晉均。盤獲轎內投有妄誕字跡之林志功。准浙江常山縣移提。將該犯解往一摺。

此等匪徒。居處兩省聯界地方。一遇犯案。自謂逃竄甚便。最為從來惡習。該犯林志功。是否。在浙先行敗露。是以匿跡潛赴玉山。其常山縣知縣。又何以先知該犯。已被玉山縣拏獲。亟亟差役前往提取。其中有無彼此迴護。諉卸情事。著傳諭楊廷璋。莊有恭等。現在該犯已解浙省。可速將此案嚴審定擬。仍將兩縣因何差提解送緣由。查明奏聞。尋奏。匪犯林志功。素患瘋症。節經地方官交屬收管。今春該犯乘家屬防範少疎。潛行逸出。該縣張又泰。查知蹤跡。飭差拘緝。嗣聞已被江西玉山縣拏獲。當即關提移解到案。研訊通報。該犯實係在浙先行敗露。該縣等委無迴護。諉卸之處。報聞。○又諭。據常鈞奏。玉山縣知縣饒晉均。盤獲轎內投有妄誕字跡之林志功。准浙江常山縣移提。將該犯解往一摺。此等蹤跡不明之人。未必不因在浙犯案。因而竄入江西。向來兩省聯界地方。久成惡習。玉山

縣既經獲犯。即當嚴密根查。乃一准常邑差提。並不訊該犯確情。遽行解送。焉知其不為匪黨狡計所愚弄耶。看來該縣令必一庸懦無能之人。遇事輒圖推卸耳。現已傳諭浙江督撫等。將林志功一面即速查辦。其饒晉均因何不將該犯根究。率行解發浙省之處。及平日居官何如。著傳諭常鈞。令其查明據實具奏。尋奏。饒晉均盤獲匪犯林志功。正欲訊明解省。緣常山縣專差守提。遂將該犯解往。

歸案審訊。實非推諉。至該縣平日居官尚屬勤勉。地方事務並無貽誤。報聞。○調鑲紅旗漢軍副都統曹瑛為西安副都統。以三等侍衛倭盛額為鑲紅旗漢軍副都統。○癸卯。諭軍機大臣等。前據阿桂奏。將阿布賚具奏表章譯出閱看。表內除遵旨世世安居數語。實係阿布賚之詞。其餘俱係阿塔海之事。筆跡亦不一色等語。今閱阿塔海齎到阿布賚表章。除奏請朕安外。俱係阿塔海捏造。自請賞

給頂帶。及求索人口牲隻等事。如因此即不

賞賜。令其回去。恐阿布賚及各哈薩克等不

知此情。妄啟疑懼。是以姑為不知。照例筵宴

賞賜。本欲派侍衛與阿塔海一同前往。將賜

阿布賚之勅書。及所賞物件。覲面交付。但恐

阿塔海恐阿布賚知其詐偽。竟於途次。或將

遣去之侍衛戕害。偽稱途遇瑪哈沁侍衛等

俱被戕害。所賞物件。俱被劫奪。則又滋一事

端。且無可考查。因將賜阿布賚之勅書。及賞

賚物件。仍付阿塔海等帶回。著傳諭阿桂。俟

阿塔海到伊犁時。仍照前看待。俟伊去後。假

託一事。遣阿坦保。謨星阿二人。再派熟習彼

處情形一人。統領。仍再添派厄魯特侍衛一

人。一同到哈薩克。將此等情由。及恩賞物件

曉諭阿布賚知之。阿坦保等。與阿塔海同來

同往。一切俱所深悉。前往哈薩克。曉諭阿布

賚。阿布賚如質問阿塔海。則阿塔海即欲捏

造妄言。有阿坦保等為証。足可窮詰其妄。若

遣他人前往。非惟不知往來之事。即阿塔海在阿布賚前狡賴。亦無憑窮詰。再此次如係阿布賚所遣之使尚可。前次策伯克等來時。並無阿布賚所遣之人。此次遣使。尚屬當然。如係薩尼雅斯所遣。則伊前遣使臣與策伯克同來。俱尚未回。何以又復遣使。則大有可疑。并著傳諭阿桂知之。再阿坦保謨星阿均係年滿應徵回人員。俟伊等前往哈薩克回時。阿桂即遣伊等來京。伊等到時。諸凡詢問伊等。即可知矣。○又諭曰。阿塔海起身之日。經朕召見。阿塔海奏稱。前年投降之厄魯特等帶來馬匹。係伊之物。為厄魯特所掠。懇恩賞還。朕諭以前自哈薩克投誠之厄魯特十四名。據駐劄伊犁大臣詢得內有一婦。係汝之妻。即賞還於汝。至伊等帶來之馬。因係厄魯特之物。仍分與厄魯特。今汝奏稱係汝之物。真偽無憑稽查。汝既諄懇。朕即傳諭駐劄伊犁大臣。轉詢前歲投誠厄魯特等。如果係

汝之物。即當賞還。如係厄魯特之馬。則不能與汝著傳諭阿桂。俟阿塔海到伊犁時。即行曉諭伊等。奉到朕諭。阿塔海之旨。詢問厄魯特等。實係厄魯特之馬。不能與汝。伊等若仍固執前言。亦不過於投誠之厄魯特內派數人豫行指示。與阿塔海質對。即可絕其妄念。自然不復懇請。再明瑞此時帶兵行走。不能迅速。阿塔海係馳驛到伊犁。必在明瑞之先。即明瑞先到。此事尚係阿桂所辦。阿桂亦可暫留。俟阿塔海到後。與明瑞一同辦竣。此事再行回京。○大學士等奏。漢軍中書八缺。向遇缺出。行文吏部。咨取應考人員。臣等會同吏部堂官。在臣衙門考取正副二員。帶領引見補放。但往返行文稽察事故。每致耽延。懸缺久待。請嗣後照考取滿中書例。遇考試時。豫為考取數員。咨交吏部注册。挨名補授。從之。○豁除安徽虹縣泗州盱眙泗州衛泗州縣衛水占民衛窪地五百十八頃九十四畝。

額賦減徵虹縣靈璧二縣次窪地五百三十
九頃七十三畝則賦○甲辰諭曰蘇昌等奏
嘆咭喇夷商咆嘯等以絲觔禁止出洋夷貨
艱於成造籲懇代奏酌量准其配買情詞迫
切一摺前因出洋絲觔過多內地市值翔踴
是以申明限制俾裕官民織紝然自禁止出
洋以來並未見絲觔價平亦猶朕施恩特免
米豆稅而米豆仍然價踴也此蓋由於生齒
日繁物件不得不貴有司恪守成規不敢通
融調劑致遠夷生計無資亦堪軫念著照該
督等所請循照東洋辦銅商船搭配綢緞之
例每船准其配買土絲五千觔二蠶湖絲三
千觔以示加惠外洋至意其頭蠶湖絲及綢
綾緞疋仍禁止如舊不得影射取戾○諭軍
機大臣等蘇昌奏已故運同馬兆登任內商
欠積至一十餘萬之多伊子馬世榮私充商
夥交結往來以致糜費匱乏請將馬世榮題
叅解粵并已咨浙查封家產等語此案欠項

積盈鉅萬非尋常虧空可比馬兆登平日既
不能潔己辦公又縱子冒充埠商種種倚勢
漁利虧商本而逋國課至於此極且其子所
管本埠亦積欠六千餘兩若不一併究追抵
補何以示儆該撫接到蘇昌咨會可即一面
遴委妥員押解馬世榮赴粵質審一面將該
犯家產嚴密查封此等狡猾之徒一有風聞
必詭計匿隱寄頓倘此時查辦疎漏致將來
追項難於抵償地方官不得辭其咎也可即
詳諭莊有恭知之○乙巳

上御勤政殿聽政○諭曰旺扎勒內廷行走宣
力有年茲聞溘逝深為憫惻昨已賞陀羅被
著加恩賞銀二千兩治喪派阿哥綿德帶領
侍衛十員齋茶酒前往賜奠○以兵部右侍
郎觀保兼翰林院掌院學士○丙午遣官祭
關帝廟○

上詣暢春園問

皇太后安○還宮○諭軍機大臣等楊廷璋奏

奸民邱子位等假造偽勅案內有直隸廣平營遊擊高必威接買轉售陳光陳喜等現在提訊屬實請將高必威革職解閩審擬等語高必威身係職官胆敢向鄒文邱子位接取偽劄輾轉售賣豈尋常干犯法紀者可比著傳諭方觀承即將高必威革職鎖拏慎選幹員速押赴閩質審務令解員加意嚴密防範毋致稍有疎虞倘該犯乘機中途免脫或畏罪自戕惟於派員是問該督迅即遵辦勿稍

延緩○又諭據莊有恭奏三官堂迤西一帶老沙每汎仍多坍刷而尖塔二山壩外漲沙現在日益高寬一摺新漲之沙日見增長尖山壩工雖足資鞏固但迤西老沙更有坍刷通計彼此長落分數不知孰多孰少其勢是否相當抑或有所得不償所失之處該撫未經詳悉聲明著將原圖寄莊有恭此時兩處漲落實在丈尺多少各自分晰補貼細注即行奏聞尋奏石壩為簍工外衛三官堂老沙

為柴工外衛以丈尺計石壩所漲不敵柴塘所坍以得失計則石壩為海寧城東扼要橫截海口必沙漲而後壩固柴塘則增修簍坦可為內固之謀且不受頂衝其坍亦將有止謹將兩處漲落丈尺繪圖簽注具奏報聞○又諭曰鐘音覆奏陝西地方官接見將軍不遵禮制一摺糊塗不堪更甚已於摺內批示前因嵩椿面奏伊在西安曾有道旁呈遞手本並不跪接之員甚非體制是以降旨飭查而鐘音並不實言其事之有無一味顛預但稱酌改儀注妄意調停了事所見已屬大謬復經明切傳諭雖甚愚懵者亦當了然洞悉矣該撫如果徧查所屬實無其人何難據實聲覆請旨詰問嵩椿即嵩椿所言不實亦何難治以捏奏之罪今乃輾轉執迷不悟所奏竟至出人意表如稱前此司道接待歷任將軍俱相沿舊習非敢於將軍嵩椿之前傲慢失禮又有蒙恩不加嚴譴仍令確查云云一

似朕庇護嵩椿。為之爭論體統。此則成何言語。夫嵩椿何人。鍾音乃於朕前奏事。竟有敢與不敢之辭耶。試問方今。即有舉朝重臣。及欽差大吏。倘欲稍示威福。令地方有司委曲承奉者。朕寧肯少假借之。又何有於嵩椿。此皆萬無可置論之事。而鍾音憤憤若此。何以能勝巡撫之寄。可見封疆中。處非其據。苟冀無事善藏者。不少。朕轉不能不為深慮矣。鍾音著傳旨嚴行申飭。仍將此事有無虛實。究屬如何。令其據實回奏。○以四川按察使蔡長濡。為兵部右侍郎。○丁未。以故四川松茂道屬松坪土百戶韓聯英子喜襲職。○戊申。上御太和殿視朝。文武陞轉各官謝恩。○幸圓明園。○吉林將軍恒祿奏查吉林官兵年老殘疾告退者。如有子孫食糧。所借庫銀。扣本免利。若無食糧子孫。本利俱免。雖與京城之例稍有不同。然未論及出兵與否。若照傅良所奏。得有功牌者。始准寬免。是未出兵者。尚

得寬免。而出兵未得功牌。轉不得邀恩。部駁傅良前奏甚是。臣前於奉旨詢問時。未於請罪摺內。詳悉聲明。實屬糊塗。請交部嚴加議處。得旨。該部嚴加查議。尋議。恒祿請照官員不據實回奏例。降一級抵銷。從之。○調吏部右侍郎海明。為理藩院右侍郎。兵部右侍郎觀保。為吏部右侍郎。以陝西巡撫鍾音。為兵部右侍郎。調山西巡撫鄂弼。為陝西巡撫。甘肅巡撫明德。為山西巡撫。江西巡撫常鈞。為甘肅巡撫。以原任浙江布政使明山。署江西巡撫。○以正黃旗漢軍都統扎拉豐阿。為正白旗領侍衛內大臣。調鑲白旗漢軍都統兆惠。為鑲白旗滿洲都統。以鑲黃旗漢軍副都統納世通。為鑲白旗漢軍都統。理藩院左侍郎多爾濟。為正藍旗蒙古都統。

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十

實錄卷之六百六十

元

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十一

監修官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣處桂
繼教官經筵講官太子太傅文學殿大學士文淵閣領閣事稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣重誥內大臣戶部尚書兼監察御史滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

較修

乾隆二十七年壬午五月己酉

上詣暢春園問

皇太后安 諭軍機大臣等據楊錫紱奏審究
鳳陽衛旗丁苗必秀呈控苗儀等霸占軍田
一案該犯所控既已屬實其情尚有可原非
逞刁捏飾妄控者可比著從寬將苗必秀酌
量以枷責發落示懲其本案事即著照例完
結可將此傳諭楊錫紱知之○以山東糧儲
道顏希深為四川按察使○庚戌諭軍機大
臣等前鐘音覆奏西安屬員接見將軍不遵

定制一事。並不據實確查具奏。一味支飾糊塗。已有旨詳諭。今詢之嵩椿。據稱初赴任時。即有潼商道屠用中。僅用官銜名帖。不投手本。及抵省城。又見有同知署府事者。亦並不跪接。各員之大率不循禮節。已可概見等語。屬吏儀制有乖。不過相沿舊習。要非干犯功令可比。朕傳旨飭查。亦不過意在得實而止。並非庇視嵩椿。亦非欲罪鐘音。何難據事詳查。而紆迴執迷。竟如大案者然。誠屬可笑。今

已詢問指實。可再傳諭鐘音。令其遵照前旨。逐一明白查奏。毋稍含混。○又諭前鄂弼赴行在時。有交議停生息銀兩一事。就晉省弁兵俸餉內通融籌辦。於營務既為有益。去生息之名。亦且名正言順。今該撫已有旨調任西安。可於遇見明德時。將伊現在作何酌畫規條。詳悉告知。以便酌量妥辦。如有未便之處。亦不必勉強從事。○以編修王紹曾為雲南鄉試正考官。檢討何曰佩為副考官。御史

蔣和寧為貴州鄉試正考官。翰林院侍讀邊繼祖為副考官。○辛亥。旌表守正捐軀之安徽祁門縣民吳升統妻倪氏。○壬子。上詣暢春園。問

皇太后安。○吏部帶領京察保送一等之內閣侍讀圖桑阿等四十九員引見。得旨。圖桑阿。瑪璘。僧圖。盧明。楷圖。豁布。錢大昕。錢載。博明。饒學曙。翁方綱。俱准其一等。賽尚阿。雅爾圖。薩布。徐紹洵。趙鏌。國申布。五章阿。穆克登泰。重祿。格圖肯。錦格。素楞額。薩靈阿。珠隆阿。翰圖。富顯。陳東鑑。張元長。王昶。毛周。藻。睦。騰額。宗室懇特。宗室平泰。宗室五壯。宗室巴哈岱。宗室炳文。珠隆阿。慶善。章寶傳。珠魯納。邁拉遜。倪高甲。吉郎阿。海林。覺羅揆衆。格木德。善福。曹國墉。明遠。俱准其一等。加一級。○烏魯木齊辦事侍郎旌額理等奏查烏魯木齊屯田農具。皆由內地運送。未免繁費。訪之舊厄魯特等。聞喀喇巴勒噶遜。昌吉。河源等處。向

曾產鐵。隨飭吐魯番公素賚瑪派回人採鐵沙百餘觔。鑄試尚可供用。但伊等僅能鎔鑄犁鏵。錘鍊刀鎌等器。未為熟習。因行文楊應琚。調取匠役數名前來製造。俟屯田兵丁等熟習後。即行發回報聞。○癸丑。以原任鑲紅旗蒙古副都統倭赫為總管內務府大臣。○甲寅。冊封。

慎嬪。

容嬪。命協辦大學士戶部尚書兆惠為正使。

禮部侍郎伍齡安為副使。持節冊封拜爾噶斯氏為

慎嬪。冊文曰。朕惟椒庭衍化。良資翊贊之功。蘭掖承恩。式重柔嘉之則。溫恭有恪。既內職之勤修。淑慎無違。用榮封之特晉。爾拜爾噶斯氏。宅心端謹。賦質淳良。度協珩璜。職襄蘋藻。六宮雅範。夙蒙紫綬之褒。九御崇班。宜贊玉璽之禮。茲仰承

皇太后慈諭。冊封爾為慎嬪。列丹輯以耀采。載

沛恩綸。記彤史以流芬。益勤令德。欽承鳳詔。永荷龍光。欽哉。命兵部尚書阿里衮為正使。禮部侍郎五吉為副使。冊封霍卓氏為容嬪。冊文曰。朕惟二南起化。丕助鴻猷。九御分官。共襄內治。珩璜叶度。既仰贊夫坤元。綸綍宣恩。宜特申夫巽命。爾霍卓氏秉心克慎。奉職維勤。壺範端莊。禮容愉婉。深嚴柘館。曾參三縑之儀。肅穆蘭宮。允稱九嬪之列。茲仰承

皇太后慈諭。冊封爾為容嬪。法四星於碧落。象服攸加。賁五色於丹霄。龍章載錫。尚敬承夫恩渥。益克懋夫芳徽。欽哉。○諭曰。原任侍講蔣耦。原因伊父蔣溥屬疾時。奏懇准令在南書房行走之員。現在入直內廷。自應加恩。准其一體給俸。並著交吏部。遇有侍講缺出。即行奏明署理。服闋再請實授。○又諭曰。阿爾泰奏。萊陽縣民宮立朝。捏造逆詞。誣陷宮立矩等。謀為不軌一案。已交法司覈擬。速奏。至

該縣孫洪瑞。一得匿名首帖。即迅速密查。拏獲犯證。該縣辦理此案。可謂能事。地方匪徒潛蹤。逞奸滋事。為有司者。果能親身密速查辦。非獨本犯不得遠颺。良善免遭株累。即承辦獄牘。何致稽延莫結。可見吏治之懈弛。皆州縣官闡茸養安。有以釀成之也。該縣孫洪瑞。平日居官何如。著阿爾泰即行據實聲明。並將該員送部引見。候朕酌量降旨。○又諭曰。楊廷璋等前奏臺灣換班兵丁。經過詔安

縣。有人訛傳官兵根究陳作賴石各舊案。居民驚疑遷避一事。當即傳旨令該督撫飭緝首先倡言之犯。以儆刁惡。不得多有株連。乃查辦日久。首犯未獲。朕復慮地方有司。張皇其事。必致累及無辜。是以詳悉傳諭。令其毋庸嚴切根究。轉滋紛擾。今據該督將知縣馮禾。遊擊章奏功。僅請交部議處。此則狃於尋常定例。未知此案要犯。稽延漏網。皆該縣等實有以致之也。地方有此等不法之徒。首造

謠言。初發時。有司果能迅速查拏。自可得其端緒。乃因循玩誤。致狡犯蹤跡日遠。日迷。獄牘不能速結。而伊等又止以承緝遲延。輕置吏議。豈足示懲。馮禾章奏功俱著革職。仍令該督等將伊等平日居官何如。出具考語。送部引見。其道員楊景素。知府蔣允焄。駐劄伊邇。為伊等專轄大員。並不一面具稟。一面董率所屬。即行嚴緝。咎亦難逭。著交部嚴加議處。○又諭。已故藩司常亮前在江蘇任內。有

應追分賠等項銀二千餘兩。該員因丁憂回旗。前往伊犁辦事。旋經身故。非獲罪革職之員可比。今其子年幼孤寒。無力完繳。殊為可憫。且常亮前任司道時。尚屬黽勉。所有應追分賠銀兩。著加恩寬免。○諭軍機大臣等。工部議覆。黔省各員分賠開河糜費銀兩一本。因該督原奏。將廷寄諭旨敘入。該部即照錄具題。甚屬非是。向來外省章疏。有將廷寄諭旨敘入者。屢經傳旨飭諭。吳達善久歷封疆。

豈有不知之理。況此等奏摺例應交部議覆。何不行檢點。若此著傳諭申飭。○以吏部右侍郎恩不為鑲白旗滿洲副都統。○予故鑾儀使兼副都統巴格半葬。○乙卯。

上詣暢春園問

皇太后安。○諭軍機大臣等。明德奏請減配茶封一摺。已飭部議覆准行。但思茶商等照例完課。何以配運茶封轉願減少。即云近議搭放兵餉。地方行茶日夥。是以不樂多配。而兵

丁所支之茶。出售是否果有餘利。兵利贏餘。則官茶不無損價。若官茶但利疏消。又豈能抑派兵丁勉強從事。其中必無兩利俱存之理。且現在庫茶實在積有若干。其最陳者起於何時。近來搭放兵餉之外。是否尚多存積。無可支銷。應行設法調劑之處。著傳諭楊應琚。逐一通盤覈計。妥協籌辦。期於公私交有裨益。此時新疆地方。生聚漸繁。米糧蔬果物產。在在豐裕。惟茶餉一項。必取資於內地。各

處濟用。自屬多多益善。惟遠運多需脚價。仍屬有名無實。或臺站往來之便。可以量為攜帶分貯。俾日久積少成多。則不動聲色。而其事易集。其利亦普。即今年明瑞所領各處換班兵三千餘名。皆應裹帶鹽菜口糧。或兵丁一路實在需茶。而庫積亦有多剩。可以酌量搭放。俾資日用之處。目下明瑞約已抵肅。楊應琚亦可會同商榷。果於兵丁有益。即一面辦理。一面奏聞。並將此速行詳悉傳諭知之。

○鑄給扎哈沁一旗總管阿爾台烏梁海七旗總管唐努烏梁海四旗總管滿洲蒙古字各印。從定邊左副將軍成衮扎布請也。○丙辰。

孝恭仁皇后忌辰。遣官祭

景陵。○刑部議奏。福建按察使曹繩柱奏稱。受賄頂兇之犯。除贓至滿貫。照例從重定擬。其計贓在八十兩以下。應與代說過付各犯。不論贓數。俱照知情藏匿罪人減罪人罪一等。

律。各杖一百。流三千里等語。查此等頂兇人犯。罔顧法紀。情罪重大。請嗣後無論成招與否。不計贓數。照禁卒解役賄縱罪囚例。按本犯之罪。一律全科。其本犯尤應嚴創。斬決絞決者。毋庸置議。其原犯應入情實者。即擬立決。入緩決者。擬入情實。軍流等罪。各加一等。其代說過付之犯。如所奏行。從之。○丁巳。

上詣暢春園。問。

皇太后安。○諭。前因吳士功在巡撫任內。審擬。

馬龍圖一案。瞻徇乖謬。是以降旨革職。發往巴里坤。令其効力贖罪。續又有閩人楊魁。冒襲世職一案。吳士功亦毫無覺察。似此身任封疆。並不實心任事。自屬罪有應得。今據駐劄巴里坤大臣永寧等奏稱。吳士功自到巴里坤之後。深知惶恐感激。但年力就衰。無能出力報稱。情願捐銀贖罪。交直隸藩庫修理城工等語。吳士功歷任大員。身罹罪譴。若於斥退之後。即得優游事外。則虛糜廩祿。不思。

奮勉者。轉自以為得計。且此輩歷任所得養廉。無非國帑民膏。捐贖贖罪。情法亦屬允協。

豫省現有應修城工。即係伊桑梓之地。此項捐贖銀兩。即交與河南巡撫胡寶瑔收存。藩庫以為辦理城工費用。吳士功著加恩准其回籍。○吏部帶領京察保送一等之戶部郎中諾穆親等五十五員引見。得旨。諾穆親。塔章阿。長安。郝碩。熊學驥。顧光旭。何逢傳。富勒渾。色明阿。馮光熊。樂廷鈐。索柱。福參泰。忠泰。

恒寧。嵩阿禮。德珠。福柱。德爾炳阿。寶明。西蘭。圖朗阿。永寧。五爾勒。景福。福興。五靈阿。富德。阿敏爾圖。色欽。發哈。滿岱。永福。和隆鄂。伊清額。德克進。瑞敏。明福。屏治。靈泰。覺羅永德。素赫琛。梁兆榜。明安。德寧。梁永年。圖桑阿。寧安。覺羅福勒。賀書隆。阿清德。俱准其一等。加一級。覺羅圖思德。楊大鵬。色倫。奇臣。俱著改為二等。○以湖廣靖州協副將穆秉常為雲南永北鎮總兵。○戊午。諭。朕前因御史葉啟豐。

之奏。降旨停京察密奏。雖已曉諭其無足重輕之意。昨引見京察一等各員。覈之各該堂官保列名單。其中等第參差。率不甚相遠。惟吏部郎中阿敏爾圖。各堂官俱列一等。而彭啟豐獨列為二等。則不免有心示異。非偶然品題高下之比。阿敏爾圖係滿洲世族。朕習見熟知。伊果有出衆長才。堪膺重任。外而封疆。內而卿貳。當已早經擢用。豈尋常曹司。必待留心甄擇而定者。況京察等次。不過就本

任職守而言。並非即為一生定評。即如阿敏爾圖。在部郎內。安分供職。而又能持正無私。顧惜顏面。若選司之銓務。銀庫之出入。以該員素守論之。實可信其無他。彭啟豐之意。不過以其族望所在。非特為區別。何以知其獨立不懼。彭啟豐人不如其學。學不如其文。亦從無一言建白。一事指陳。乃欲於隨衆具摺之中。小示異同。如此獨立。誰則不能。朕衡量人材。如各部院兼攝之大學士。尚書侍郎等。

亦祇令竭其分量。各抒已見。並不倚為黜陟。其間或同或異。原不加之責備。試問吏部各堂官。列阿敏爾圖於一等。是保為封疆乎。卿貳乎。即彭啟豐之斤斤示異。若此為京察大典乎。為取巧市名乎。其事固不煩言而易曉。第恐不得見用之人。妄生議論。以為即如彭啟豐之不與人同。究可謂能自立崖岸。或又謂因有此奏。始有此旨。中外得悉朕甄材用人之意。然朕之勤政與否。能識人與否。廿七年於此矣。天下宜共悉。固不待朕之朝綸暮綍。以口舌化天下也。將此明諭中外。俾共知之。○又諭曰。御史趙佑奏。商船舍許墅關而繞走海關。係規避該關需索。請飭督撫等查禁一摺。於事理全未通曉。徒以游言妄希無識者之稱譽耳。吏役需索。何關無之。若他處無而一處有。則亦人所共知。為督撫者。不據實查奏。安用是督撫哉。前安寧以許墅關稅額日短。查緣各商爭赴海關。避重就輕所致。

奏請加增海關稅則。經軍機大臣會同該督撫尹繼善陳宏謀議欲准行。朕以事屬加課。概不允。因酌定違禁私越處分。俟行之年餘。比較歲額再定。此經理始末。衆所共悉。諒亦更無遺議矣。今該御史不諳樞務。哓哓以需索為辭。設朕亦因此不求實政。徒徇名高。何難將原摺通勅查禁。而該督撫等亦不過文告相沿。覆一摺。出一示。以為體恤商民。其於興利除弊之道。究何裨益。因令詢問該御史。

以某人某地為需索確據。以便按法懲治。伊既毫無指實。又令問以兩關稅額。孰輕孰重。較然明白。商賈趨避之源。伊豈一無知識。乃竟不揣其本而求其末。伊亦無以自解。可見該御史特藉建言為名。撫拾浮誕不根之說。猶從前物論。以安寧私放米石出洋。及訪查屬虛。衆始無從置喙也。此等市名惡習。朕方欲力行挽回。而轉肯為其所動乎。然趙佑既有此奏。仍當問之尹繼善陳宏謀諸關吏役。

有需索否。或諸關皆無。許關獨有之處。著即確實查明速奏。○已未

上詣暢春園。問

皇太后安。○還宮。○是日起

上以夏至祭

地於

方澤。齋戒三日。○庚申。諭軍機大臣等。據阿桂

奏稱哈薩克人等。負性愚昧。賜阿布賚。阿布

勒巴木。比特勅書。若遣大臣齋送。恐哈薩克

等。妄生疑慮。只須派明白侍衛二三員。即將

賞去馬匹。一同送往等語。所見甚是。著照所

請行。但勅旨已經書寫。發交阿桂。阿桂如尚

待此摺。未曾發去甚善。前曾傳諭阿桂。哈薩

克使人到伊犁時。仍照前看待。俟阿塔海去

後。假託一事。派阿坦保。謨星阿。二人。再令一

熟悉彼處情形之人統領。仍添派厄魯特侍

衛一員。前往哈薩克。今勅書既未送往。即可

作為一事。並傳諭阿桂。將勅書豐訥亨之名

削去。派何人與阿坦保等同往。即填寫何人之名。至阿布勒巴木比特游牧。相距甚遠。所賜勅書。即交阿布賚。令其差人轉送。如勅書內字畫難改。著阿桂即仿照另書分發。或竟不必發給勅書。可將勅書內詞指。詳悉告知派出之人。及阿坦保等。令其熟記。俟到哈薩克時。口諭阿布賚知之。至阿布勒巴木比特。亦令阿布賚傳諭知之。○又諭曰。周人驥在貴州巡撫任內。辦理南明河一案。乖謬回護。已准部議革職。今伊現在來京。若竟令其回籍優游。何以為溺職員恩者戒。周人驥歷任封疆。久糜廩祿。自當酌令効力。以贖罪愆。直隸為伊桑梓之地。所有慶雲等縣城工。著傳諭方觀承勘定。應修城垣。派令周人驥酌量出貲。修理完固。仍將估修實數。具摺奏聞。○吏部帶領京察保送一等之兵部郎中福勒賀等四十八員引見。得旨。福勒賀。曠善。魏椿。年。五霖。布。本忠。圖敏。郭鵬。聃。素澄。色爾布。興

安。伊克坦布。誠泰。五德。根長。多善。喀寧阿。四達。觀文。鄂忻。覺羅法明。杜玉林。尹嘉銓。張若溍。盧謙。陶其悛。孫孝愉。海成。穆精阿。伊蘭泰。李師敏。臺履善。泰寧。德永。五查里。勒爾遜。舒吉泰。寶格。坤祿。長齡。蘇沖阿。圖巴扎布。翰班。五格。薩哈布。柏齡阿。書世德。俱准其一等。加一級。佛爾慶額。德慶。著改為二等。○辛酉。吏部帶領京察保送一等之工部郎中忠德等五十員引見。得旨。忠德。常海。德成。薩木哈。武崙布。魯治亢。朝璧。范澍。禮。巴克唐阿。慶安。達齡阿。玉寶。那需。柏慶。瑪勒洪阿。悟勒穆濟。星額布。邁拉遜。靈保。查克善。錦齊顯。慶福。佛存。巴達爾虎。八十五。永太。福爾德赫。柏璜。諾木圖。圖桑阿。色楞德。興。瑞泰。耀泰。福章阿。閻循琦。朱續經。陳大化。噶勒炳阿。善著。薩哈禪。阿隆安。福順。世昌。明福。鳳翔。蔡觀瀾。俱准其一等。加一級。薩靈阿。永寧。伍雲珠。著改為二等。○壬戌。夏至。祭

地於

方澤。

上親詣行禮。○詣暢春園。問

皇太后安。○幸圓明園。○是月。直隸總督方觀

承奏。正定城西南。舊有護城土隄一道。以禦

滹沱北漾之水。嗣經奏明。於隄外加築迎水

埽。鑲草工。長與隄土等。以資外護。上年伏秋

異漲。衝齧埽根。致將草工墊陷。此時甫經墊

定。亟應加鑲完整。現飭道廳確勘趕辦。幸工

作無多。數日即可完竣。得旨。但應堅固。欲速

節省。冒銷。皆不可。○又奏。五月二十七日。保

定省城。得雨五寸。又自二十八日辰刻。至二

十九日巳刻。雨勢連綿。未免過多。未刈之麥。

間恐變青。已刈未斂者。須防生黴。今得晴霽。

猶可無損。得旨。京師亦如此。但望快晴則佳

矣。○山東巡撫阿爾泰奏。泰安一帶。土脈微

乾。奉旨。垂問雨澤。查泰安府屬。四月下旬。連

得透雨。五月初三日。會城又得密雨。均屬霑

足。得旨。此語恐不實。五福迴至。泰安時云。遇

雨。不過寸餘。何得深透耶。○又奏。今歲二麥

豐收。登場後。小民罔知撙節。恐致狼戾傷農。

秋成豐歉難定。民欠常平商社等穀。應乘此

設法輸將。以清積欠。請以麥六斗。抵穀一石

交倉。得旨。欣慰。覽之。如所議行。○陝甘總督

楊應琚奏。肅州金塔協。及附近之清水等六

營堡。向年兵糧。除折色外。約領本色倉斗三

千餘石。俱遠赴高臺縣支領。需費繁多。查肅

州金塔寺等處。近墾荒地一萬七千餘畝。又

附近之威魯堡。有新升科地一萬二千餘畝。

請先將威魯堡。應徵糧四百三十餘石。就近

撥給兵糧。尚有不敷。又有毛目城九家窩。每

年運肅平分倉斗糧一千七百石。免其運肅。

各就近改撥。並暫將肅州採買。及收捐監糧

估撥。將來金塔寺等處。新墾地畝。全數升科

後。又可估撥。庶歸省便。從之。○廣東布政使

史奕昂奏。向例具結請封。於祖母與母下。聲

註某人室女。並無再醮等語。原所以勵名節。惟再醮二字。為巾幗所羞稱。尤人子所不忍道。且既稱室女。非再醮可知。請嗣後加結節。去此二字。得旨嘉獎。下部議行。

實錄卷六六二

十

大清高宗法天隆運至誠先覺體元立極敷文奮武孝慈神聖純皇帝實錄卷之六百六十一

大清高宗法天隆運至誠先覺體元立極敷文奮武孝慈神聖純皇帝實錄卷之六百六十二

皇極經世一書。經世一書。太子太傅文淵閣大學士文淵閣領閣事領侍衛內大臣稽察欽奉。上諭事件。處管理。吏部理藩院事務。正黃旗滿洲都統。世襲騎都尉軍功。加七級。隨帶。加一級。尋常。加二級。軍功。紀錄。一次。臣。履。桂。世襲騎都尉軍功。加十九級。隨帶。加二級。又。加二級。臣。董。誥。內。大臣。戶。部。尚。書。欽。奉。上。諭。事。件。處。理。刑。部。戶。部。三。庫。事。務。尋。常。紀。錄。十。四。次。臣。德。瑛。經。世。一。書。太子。少。保。工。部。尚。書。紀。錄。六。次。臣。曹。振。鏞。等。奉。

敕修

實錄卷六六二

十

乾隆二十七年壬午閏五月癸亥朔喀什噶爾辦事尚書永貴等奏從前喀什噶爾查出布拉呢敦等果園因伯克等初次呈報不無遺漏臣等曉示令其首出免罪續據阿奇木伯克噶岱默特等續報出果園二十九處該伯克等始雖瞻徇一奉曉示即盡行呈首情尚可原因酌量賞還數處以為伯克等來城住宿之地其餘入官果園內向產苜蓿草每年可得二萬餘束定額徵收可供飼牧俱造具印冊遵照從之○以盛京將軍清保署正

白旗漢軍都統調福州將軍舍圖肯為盛京將軍廣州將軍福增格為福州將軍以乍浦副都統明福為廣州將軍○甲子

上詣暢春園問

皇太后安○諭軍機大臣等據方觀承奏直屬連日雨水稍多今已有晴意等語京城近日雨勢相同正在望晴之候但畿南各屬未割之麥雖經雨畧多尚屬無妨惟已割未收者不免濕蘊霉沔著詢問方觀承現在天氣曾

奉天奏摺

上

否開霽所有已割之麥實在有無妨礙之處詳悉查明速奏○吏部議奏福建按察使曹繩柱奏稱地方官失察械鬪向奉部議降一級留任畏蒞之員往往瞻顧考成避重就輕照共毆致死之案辦理是因有失察之例轉開諱飾之門請嗣後械鬪事發能嚴拏在場各犯按法懲治者免其失察處分倘有心故縱照例從重叅處等語應如所請其未能全獲案犯者仍照例議處以示區別從之○乙

丑吏部帶領京察保送一等之吏科掌印給事中佟琳等三十八員引見得旨佟琳耀成

范宏賓法良塘古泰額勒登布庚音善吉納達哈布照玉鐘亮德格寶山黑光圖起海明

張宏漢沈業富紀昀秦鸞謝墉趙翼圖勒炳阿福善伍秀雅蘭泰佛佑阿昌阿諾穆澤富

貴訥清額和明李世裕奇拉渾素楞額俱准其一等加一級楊述曾伍佛保左衢著改為

二等○調杭州副都統舒景阿為乍浦副都

奉天奏摺

上

統以廣州水師營協領富德為杭州副都統○丙寅吏部帶領京察保送一等之光祿寺署正格森等三十二員引見得旨格森班齊泰伊昌阿伊三承基道保陳孝泳什勒密興福保佳喜常路銓白士傑承德福保惠祿通明瑪興阿固琳博純覺羅法海色赫訥奇他拉張桂德風姚成烈孫琦筠嗣吉勒彰阿俱准其一等加一級素敏積忠額寧保俱著改為二等○以翰林院掌院學士觀保充日講

起居注官。○以散秩大臣二等伯永慶為鑲黃旗漢軍副都統。署理藩院侍郎福德為鑲藍旗滿洲副都統。○河南按察使郭一裕以老病休致。以陝西延榆綏道周景柱為河南按察使。○丁卯。

上詣暢春園。問

皇太后安。○諭曰。駐藏大臣原為照料達賴喇嘛。如遇蒙古王公等熬茶等項。仍照舊遵行。倘關係公事。應詳報部院。雖達賴喇嘛班禪

下奉旨

旨

額爾德尼。均不應干與。即使呈報駐藏大臣。亦應明白告知。此非我等應辦之事。令其報部。前集福接青海郡王衮楚克達什呈訴。伊姪達什達爾濟係達賴呼圖克圖之呼畢勒罕。應令其出家。伊子索諾木多爾濟應令承襲王爵一事。集福代為具奏。甚屬非是。因係初次。不知誤奏。姑從寬貸。著傳諭駐藏大臣。倘遇此等事件。伊等不必管理。嗣後往換之人。轉相傳諭遵行。○兵部議覆直隸總督方

觀承奏稱。山永協屬撫寧。榛子二汛。地當孔道。向在榆關。沙河二驛。各設經制外委一員分防。但未設兵。該外委不能協辦往來差務。請將榆關汛外委。改設距撫寧縣四十里之深河驛駐劄。同沙河驛外委。在撫寧。榛子二汛內。各撥馬兵一名。守兵五名。再於石門。建昌二路。各撥馬兵一名。守兵三名。并建給官房。應如所請。從之。○蠲緩湖北潛江。沔陽。天門。荊門。江陵。監利等六州縣并沔陽。荊州。荊左。三衛。乾隆二十六年水災額賦有差。○戊辰。諭從前準噶爾部落素不安分。憑陵衆蒙古。自噶爾丹時。即肆跳梁。侵擾喀爾喀西藏。是以我

皇祖。

皇考。不惜帑金。先後興兵征討。數十年來。上煩聖慮。伊等野性難馴。喜相爭奪。以致自生內亂。互相殘滅。爰有車凌等。各率所屬歸誠。朕以機會可乘。特選將出師。掃除兇逆。大兵所至。

勢如破竹。不一二年。平定其亂。肅清疆宇。擬欲撫綏其衆。俾各安生計。詎伊等無福承。受數應滅亡。復生叛亂。是以更遣偏師。殲除醜類。平定伊犁。至回人素為準夷役使。兩和卓木。俱經拘禁。額林哈畢爾噶。我兵勦定伊犁時。念兩和卓木。均係派噶木巴爾後裔。特命釋放。送歸原處居住。乃小和卓木霍集占。受朕深恩。毫不知感。輒敢反噬。傷我王臣。因降旨。令凱旋官兵。乘勢將葉爾羌。喀什噶爾。諸回城。悉行收服。追勦兩和卓木。直抵巴達克山部落。該回目即將霍集占。斬馘進獻。此皆伊等罪惡貫盈。上干

天譴。是以軍行所過。降服者撫之。兇逆者殄之。數十載未竟之緒。五年以來。悉為底定。拓地二萬餘里。均照內地兵民。駐劄屯墾。誠自古罕有之奇功也。在事奮勉諸臣。現經部臣查奏請旨。應得世職者。約五百餘人。朕以敵愾奏功。勞績克著。酬庸之典。即稍從優渥。亦非

賞賚無節者比。雖其間實有奮勇出衆。及隨營効力之不同。但宣力行間。均屬勤勞王事。正不必過為區別。此內除達勒當阿。哈達哈。皆債事獲罪。無庸議給世職外。其餘諸人。俱著照部臣所奏。一體加恩。賞給世職。各於本身兼帶。此等皆滿洲世僕。得此恩賞。世職俸薪。養贍家口。更覺充裕。而八旗添設世職五百餘員。旗人生計。亦大有裨益。並將此通諭知之。○又諭。朕辦理庶務。信賞必罰。一秉至公。即如此次平定厄魯特回部。因官兵著有微勞。特命軍機大臣。查出五百餘人。俱各賞給世職。昨努三等。奏鑲藍旗蒙古印務章京。指名冒借宗人府滋生銀兩。朕即交軍機大臣。將案內人犯。審訊治罪。並恐別旗有似此等事件。特派大臣。將八旗徹底清查。此皆各視其所為。以行賞罰。毫無偏倚。旗人內如有奮勉可嘉之處。雖人多至千百。亦不惜費。將施恩之處。少減。倘若犯法。無論何人。亦必

按法治罪。不以人衆稍為姑息。然亦不至連累無辜也。將此通諭八旗知之。○己巳。諭八旗都統。有教訓旗人釐正風俗之責。自應諸事留心。於旗人內善者勸勉。惡者懲治。不可稍存觀望。從前

皇考。因都統等並不實心辦事。一味推諉。時時召入。面加訓諭。顧安於積習。不能仰體

皇考教誨之意。

訓諭之後。不知痛改。惟支吾塞責。曷嘗實意奉行。此皆朕素所深知。現在都統等朕何難時時召入。面加訓諭。然於事何裨。

皇考諭旨。伊等豈真不知領會。誠能痛改推諉之習。諸事奮勉。則屬員則而效之。風俗自臻於善。朕令開戶另檔人等出旗。亦因旗人生齒日繁。欲將伊等之缺。挑補另戶。俾得多支糧餉。有裨生計。並非欲裁去額缺。節省糧餉。稍有人心。自應感朕曲成之恩。遇已經出旗復賄求入者。該大臣自應不時稽察。官員亦

當隨時拒斥。稟明重懲。今西寧等處盡天良。希圖微利。將已出旗之人復入旗籍。實屬意外之事。旗人風俗頹敝。一至於此。此皆由八旗都統平日不以為事。一味推諉。因循所致。若不痛改。風俗攸關。除交現派出查旗之王大臣等查辦外。并著通諭八旗都統。嗣後務宜諸事實心辦理。以復旗人舊規。○旌表守正捐軀之江蘇阜寧縣民張朋妻費氏。○庚午。

上詣暢春園。問

皇太后安。○諭軍機大臣等。昨據方觀承奏。懷來通濟橋工一摺。朕見圖內橋洞稍小。恐遇水長之時。不能暢流。易致衝墊。工程仍屬糜費。已令三和馳驛前赴該處。相度情形。或將橋洞酌展高大。使湍流得以暢達。庶於往來孔道。永有裨益。著傳諭方觀承。令其與三和一切會商熟籌。妥協辦理。務令工歸實用。再京師現在時霽。時雨。望晴甚切。不知近京各

屬情形。是否相同。此時二麥收割。尚未全完。值此連陰。不無妨礙。著并諭該督。速將各處陰晴光景。及麥收實在如何之處。即行詳查。明晰馳奏。以慰廑念。○戶部議奏。江西布政使富明安奏稱。五年編審大典。今昔情形迥異。丁糧但據康熙五十年丁冊為額。永不加賦。又雍正五年。將丁銀攤入地糧內徵收。愚氓咸知不至加納。何須隱避。況查部議通行保甲規條。立有戶口冊籍。凡一户之男女老幼。殘廢丁僕。靡不具載。又設循環二簿。令保甲隨時登載。按季交官。時屆編審。本可按冊而稽。乃地方官沿習故套。傳喚糧里頭人。率領鄉民。赴縣聽點。徒使老幼奔馳守候。更易滋胥役勒索之端。請將一切故套。概為省除。惟嚴督州縣。平日力行保甲。臨時按冊編丁。應如所請。從之。○辛未。諭軍機大臣等。成衮扎布奏。准科布多副都統扎拉豐阿報稱。哈薩克阿布賚。遣使貢馬九匹。所帶馬匹四百

餘。已派台吉等禁止貿易。護送入覲等語。哈薩克來使。著派出為首者數人。緩行前往。熱河候旨。伊等所帶馬匹頗多。自必乘便貿易。從前阿桂請禁哈薩克北路貿易。蓋慮伊等貪程途近便。遂不肯遠至伊犁。但伊犁。烏里雅蘇台。皆屬內地。如過示區別。亦於體制未協。惟應禁止私市。概從官辦。而稍增物值。減其馬價。伊等無利可圖。自必專向伊犁。即令其仍貪近便。情願減價。則烏里雅蘇台官庫緞疋等物。尚有雍正年間收貯者。與其徒為朽腐。即以易馬。或就近收放。或酌量撥解。亦無不可。成衮扎布接奉此旨。若業經禁止貿易。即以朕旨傳諭。准其一體開市。伊等若謂物價較伊犁有加。亦諭以蒙古地方。價值情形。難與伊犁一例。至卡座臺站人等。私行交易。斷宜嚴禁。有犯必懲。并傳諭阿桂知之。○又諭。據成衮扎布等奏。稱哈薩克阿布賚。所遣使臣塔瑪頭等。台吉導拉特和呼等。二十

三人跟役七人。至烏里雅蘇台時。先酌派數人。由驛赴京等語。朕本年巡幸木蘭。七月十五前後。可至熱河。若令伊等來京。未免徒勞。不若由彼遣赴熱河為妥。著傳諭成衮扎布。曉諭哈薩克使臣塔瑪等云。前曾具奏。令爾等由驛赴京。奉旨現當夏令。京師過熱。恐爾等不宜。朕於七月至熱河。往木蘭行圍。爾等徐行至彼朝見。派侍衛妥為照料。從容行走。可於七月前後。令至熱河入覲。如伊等已到烏里雅蘇台。不欲久待。情願來京。亦不必勉強。○壬申。

上詣暢春園。問

皇太后安。○諭前楊廷璋德福奏。拏獲私造勅書假冒世職一案。查出鄒文等。先於乾隆九年。即有捏造劄付轉賣之事。則該犯等玩法作奸。已非一日。歷任督撫。豈竟漫無覺察。因令查明叅奏。今據該督將前任失察之各督撫奏到。此內除業經身故之那蘇圖等毋庸

置議外。楊廷璋既飭令該司德福行查。此案始得徹底根究。俾奸頑不致倖逃憲典。楊應琚莅任未久。且在陝甘任內。辦理諸務。實心出力。並著從寬免其議處。吳士功現已贖罪自効。亦著免其復行交議。所有失察之鍾音陳宏謀俱著交部照例議處。○又諭曰。平郡王慶恆。朕因其年輕。尚可造就。令其管理旗務。自應諸事留心。乃上年伊所管之旗。有馬甲佟銘等冒領宗人府銀兩之案。而本年署理鑲藍旗蒙古。又未查辦。西寧冒領銀兩等案。諸事推諉。毫無振作。非尋常失察可比。慶恆著罰王俸五年。不必管理旗務。○烏魯木齊辦事侍郎旌額理等奏。安西移駐烏魯木齊兵一千八百餘名。約需住房三千六百餘間。臣等於去年十月。派員挑選屯田兵五百名。查定各屯住址。伐木刈葦。分造房屋。計本年八月內可竣。報聞。○旌表逼嫁捐軀之安徽宿松縣民朱起瑞妻劉氏。○癸酉。諭軍機

大臣等據順天府尹錢汝誠等奏宛平縣巡檢朱斯獻押解赴楚候審要犯華九如於四月初五日起程。今接湖撫馮鈐五月二十六日來咨。尚未解到。請將朱斯獻革職。仍一面行查一摺。已照所請行。押解待質要犯中途自應嚴密迅速。乃遲至五十餘日。尚未到楚。如謂犯人。或解員。途次患病濡遲。則應報明所在地方官。轉行詳報。何至並無音耗。倘該犯在途。或有疏脫。以致巡檢微員。亦復畏罪

躲匿。則其事尤關重大。著傳諭直隸。河南。湖北。各督撫。速飭沿途經過州縣。嚴密追查該委員及該犯。實係於何處逗遛。抑或中途別有情弊。並著查明據實具奏。○以禮部尚書永貴兼鑲紅旗漢軍都統。○旌表守正捐軀之河南舞陽縣民鄭寒時妻惠氏。○甲戌上詣暢春園。問

皇太后安。○諭軍機大臣等。前方觀承奏。修通濟橋工一事。觀其所繪舊橋圖樣。橋洞離橋

面甚遠。因思恐遇水長。不能暢流。工程仍無實濟。故令三和前往勘度。今閱三和所繪舊橋圖。則橋洞離面。本不甚遠。洞門亦不甚窄。即照三和現議加展。其高寬亦不過在一二尺之間。乃知方觀承前圖。特未將尺寸較量明晰耳。著傳諭該督。可據實在情形。悉心酌量。如三和議展新式。費工不致甚大。則尚可參酌為之。倘一經拆造。必致工程浩繁。所費倍蓰。不若仍其舊而修築之。蓋前功試用有

年。行旅亦俱稱便。原無庸必事更張也。○翰林院侍讀學士博通阿。充日講起居注官。○乙亥。諭軍機大臣等。朝銓奏。民人王格等聚賭械鬪一案。皆係清保年老。諸事廢弛。以致盛京有此等事。朕因降旨。著清保來京。其將軍印務。著朝銓署理。又命阿永阿。會同審訊此案。著傳諭朝銓。阿永阿到時。即會同詳悉審訊。其奏請大查私墾地畝一事。亦著會同阿永阿查辦。至拏拘人犯。朝銓係該部侍

郎又署將軍印務。皆所應辦。阿永阿未到之前。將應拏人犯。勿致一名漏網。俟阿永阿一到。即行會同審奏。朝銓雖係暫署將軍印務。一切應辦事件。俱宜悉心妥速辦理。不得以五日京兆。稍存推諉之意。○調阿勒楚喀副都統敦柱。為三姓副都統。以吏部郎中綽克托。為阿勒楚喀副都統。○旌表守正捐軀之直隸容城縣民劉七十。聘妻張氏。○丙子。

上御勤政殿聽政。○都察院叅奏失察西寧等處。得旨。所有專派查旗之科道佛倫。西通額。任事年久。乃西寧等任意侵盜。舞弊種種。毫無覺察。所司何事。俱著交部嚴加議處。至署理之科道德明圖。廣明。任事已在四月九月以上。著交部照例議處。○以禮部左侍郎伍齡安。充經筵講官。○命吏部右侍郎翰林院掌院學士觀保。教習庶吉士。○丁丑。以翰林院侍讀學士秦大士。為福建鄉試正考官。御

史毛輝祖。為副考官。翰林院侍讀錢大昕。為湖南鄉試正考官。修撰王杰。為副考官。編修積善。為四川鄉試正考官。御史丁田樹。為副考官。御史王懿德。為廣東鄉試正考官。編修汪新。為副考官。編修童鳳三。為廣西鄉試正考官。刑部主事王士榮。為副考官。○旌表守正捐軀之直隸雞澤縣民秦三妻申氏。

大清高宗法天隆運至誠先覺體元立極敷文奮武孝慈神聖純皇帝實錄卷之六百六十二

大清高宗法天隆運至誠先覺體元立極敷文奮武孝慈神聖純皇帝實錄卷之六百六十三

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午閏五月戊寅

上詣暢春園問

皇太后安。○諭鑲藍旗蒙古叅領等同謀侵蝕公項銀兩分肥入已將開戶為民之人復入另戶冊內挑補錢糧情殊可惡已將西寧富珠里等審明正法其知情之三達色等擬以發遣而印務叅領佛保等雖未染指亦屬知情知而不舉視同局外實為惡習旗人俱世受國恩乃闔旗通同舞弊罔上行私殊不可問設都統等竟蓄異謀伊等亦附和之乎此

等旗員不可不嚴加懲治從前

皇祖聖祖仁皇帝巡幸吉林見烏拉齊習氣甚惡曾將闔省官員俱行罷斥另選人員補放今除鑲藍旗蒙古閑散官員及無執事之佐領外其印務章京叅領副叅領等俱知西寧舞弊情事著派和親王兆惠舒赫德會同該旗都統查明審訊治罪伊等員缺著於上三旗內遴員補放俟數年後該旗人員痛自愧悔再加恩將本旗人等照例棟放○又諭派

出查旗王大臣等奏稱稽察八旗另記檔案開戶人等應將歷年丁冊並現在食餉檔案細覈等語向令查明另記檔案人等為民原因此項人等與正身旗人有間俟查明辦妥時勻出錢糧可養正身是以如此辦理非欲裁缺節省錢糧况查明伊等出旗時年壯者挑補直隸山西等省綠旗兵丁途次賞給車價口糧並給安家銀兩其餘人內復棟一千名仍食原餉遣往福州廣州駐防其不能自

贍之老幼殘疾人等。亦各予以賞賜。雖令伊等為民。而民人亦有上進之階。並非輕賤伊等。何得尚存不足之想。乃鑲藍旗蒙古有業經為民之另記檔案人等。復入旗籍挑補馬甲。拜唐阿。冒食糧餉者三百餘人。今正白旗蒙古。又查出開戶人等。由此觀之。別旗亦必有似此者。皆由該都統等。不知朕體恤旗人之意。惟沽名市惠。苟且因循。而另記檔案人等。又係愚昧小人。貪圖錢糧之所致。本應照

王大臣等所奏。詳悉查出。重加治罪。朕今格外加恩。再給十五日限期。令伊等自行出首。如限內。或該管官員查出。或本人自行首報。即將從前朦混之罪。均予寬免。若限滿不行首報。必照王大臣所奏辦理。稽查此事。亦屬不難。覈對檔案。自然可得。彼時朕必不照尋常朦混治罪。即留其軀命。決不止枷責。輕之又輕。亦必發遣伊犁等處。伊等寧不知辦理西寧之事耶。將此旨著王大臣等通諭遵行。

其現查出之正白旗蒙古另記檔案人等。不得入於此內。仍著治罪。失察官員。亦俱著議處。○又諭曰。方觀承查奏本月十四日辰刻。天氣朗晴。並雨後察看各處。瀝水悉歸淀河。不通溝渠者。道旁小苗。間有淹浸。秋禾異常暢茂。一摺。近京一帶。邇來時霽時陰。雨水不免過多。朕心深切軫念。是以屢諭該督查奏。今據奏秋苗日見長發。大田固無妨礙。而夏至前後。二麥尚未全收。遇此連陰。晚穫者分數必減。雖經該督訪察。未至成災。而其中低窪地畝。夏熟不無缺望。著傳諭方觀承。悉心查勘。有實係歉收較重之地。即照例查辦。有需補種晚禾。而力量不足者。並酌借籽種。以資接濟。再景州附近窪地。北來者多言積水未能即涸。其作何設法上緊疏消。並隣近田畝情形若何。應否酌量撫綏之處。著一併詳悉奏聞。該部遵諭速行。○又諭曰。顏希深來京陞見。問知伊母年老。尚欲隨任赴川。伊亦

不敢奏請。改補近地。似此母子俱知大義。情實可嘉。轉用惻然。顏希深著調補江西按察使。其四川按察使員缺。即著石禮嘉調補。○叅贊大臣阿桂奏。上年臣駐兵塔爾巴哈台。查勘設卡地方。擬自輝邁拉呼至愛呼斯。招摩多。自阿勒坦額默勒至伊犁河岸十七處。立木為記。對伊犁河四處。壘石為記。今春派護軍統領伊勒圖等。前往安設訖。又據厄魯特等告稱。特穆爾里克有準噶爾所埋大銅

礮及礮子。臣委護軍統領伊勒圖等。前往辦理。據報掘得大銅礮四。衝天礮筒八。大小礮子萬餘。陸續運回。收貯備用。俟塔爾巴哈台駐兵時。再將所立木石記號之處。酌量設卡。報聞。○已卯。諭刑部奏各省州縣命案。毋庸先據初供報部。又同謀共毆致死人命之案。仍請止將正兇解審一摺。所奏甚為允當。俱依議行。國家設定律例。歷經斟酌損益。條分縷析。已屬周詳。近來各省臬司新任。輒於律

令內。撫拾一二。奏請增改。其中固有舊例於情事未盡。彙括應隨時酌量變通者。而未能通徹律意。或就一時之見。率請更易者。亦復不少。在該部不過因陳奏之詞。尚近情理。難於概行議駁。而其實多設科條。徒虛案牘。既無當於政簡刑清。且轉滋窒礙難行之處。不知刑名案件。情偽微曖。變幻百出。若事事曲為逆億。雖日定一例。豈能徧給乎。惟在司刑憲者。臨事詳審案情。叅酌令典。期於平允協

中。設徒總總然各逞己見。議改議增。適以變舊章而滋紛擾。於獄獄之道。有何裨益。著將此傳諭中外。問刑衙門知之。○又諭。據陳宏謀奏。蘇州布政使安寧病故。安寧年力未衰。正堪任用。遽爾身故。甚屬可惜。著賞給內務府總管大臣銜。蘇州布政使員缺緊要。著蘇爾德調補。即接任辦事。不必來京陞見。其蘇州織造及葭墅關稅務。著金輝前往管理。巡視長蘆鹽政。著達色去。○諭軍機大臣等。阿

桂等奏稱。新來伊犁換班之滿洲。察哈爾。侍衛官兵等。自本年八月起。一年內應支食羊三個月。共需一萬三千餘隻。除收放及孳生羊隻外。仍需羊七千五百餘隻。可否交巴里坤大臣辦送等語。著照所請。傳諭該大臣等。將喀爾喀等往巴里坤所售羊隻。照數採買。選派官兵沿途加意收放。送往伊犁。○以廣東按察使來朝。為湖南布政使。○庚辰。諭今歲直隸各屬麥秋。原可望豐稔。近因雨水稍多。致減分數。且道途泥濘。各鄉糧食車輛。或有阻滯。現在京師設廠平糶。並降旨賞給八旗閏月甲米。即令開倉支放。米石既多。價值自可無慮騰踊。惟麥麩一項。將來恐不無昂貴。豫東二省氣候較早。二麥俱報豐收。著該撫等。各於麥熟最多之州縣。酌量採買五六萬石。由水路陸續運京。以備接濟。現今重運糧艘。漸次抵通。所有豫東二省販麥船隻。並諭令轉運流通。毋得稍有禁遏。該部即遵諭

行。○諭軍機大臣等。近日京城麪價稍昂。因降旨令豫東二省。於麥熟最多之州縣。採買麥石。運京接濟。以示糧食充足。市儈不致居奇。但念豫省去歲瀕河被潦。東省亦有偏災。當此二麥豐收。閭閻可資充裕。恐採買過多。麥價或致驟湧。於民間生計。不無少礙。可傳諭阿爾泰。胡寶瑑。酌量該二省現在情形。籌辦購備。各於就近水次存貯。俟必需運京時。再行降旨起運。此時不得過事張皇。該撫等其善體朕意。○又諭曰。永慶奏稱。布魯特車哩克齊游牧人等。以貿易前來。據卡上查報。所攜烏鎗三桿。及事畢起程。又查出烏鎗十七桿。及腰刀棉甲等件。與原數不符。業將軍器扣留。給還原價等語。布魯特等與回人接壤。彼此以軍器交易。必相沿已久。有何關係。如謂伊等心懷叵測。豈買得烏鎗數桿。遂能生事。似此辦理。轉覺瑣屑。但向例禁止與否。亦未可知。著傳諭阿克蘇等處駐劄大臣等

會同查覈具奏。○吏部等部議覆兩廣總督蘇昌奏稱潮州運同距省遙遠其就近之潮嘉汀贛等處行銷引地及產鹽場柵皆歸運同專管并配掣引鹽給商領運皆在潮州之盤查所掣放運同事繁往往不能赴所配掣委之家人親友易滋弊竇查東平場委員與雙恩場同駐一城事務甚簡儘可歸併一員請將東平場委員裁併改為盤查所委員以專責成再運同衙門出納錢糧向未設立庫官查有知事一員儘可兼管庫務請將知事兼銜管理均如所請從之○以湖南糧儲道赫昇額為廣東按察使○辛巳

上詣暢春園問

皇太后安○諭續文獻通考館纂進稿本朕閱宗廟考一門內附入致祀歷代帝王及本朝臣下家廟顧名思義於輯書體例何居蓋既以宗廟冠部則惟太廟時祫典有專崇方稱經常不易至

奉先殿之禮重家庭

壽皇殿

安佑宮

永佑寺之虔奉

神御於宗廟考中敬從附載尚為不失禮以義起之文若撫入歷代及臣下非獨其制絕不相蒙揆之分門本意亦復何取即云永用宋臣馬端臨原編舊式而往世儒生之識於大典未克折衷盡善類此者政復不少又豈得違禮而曲泥之朕意當於宗廟考專門備詳定制外其餘不應附入者別立羣廟考一門隸之俾名義既得所安而其書亦足垂遠館臣可錄朕旨併登卷中○定王公之女子封例諭王公之女子封食俸乃敦敘九族之典但年久宗室漸多而親屬亦漸疏遠若不立定節制則親疏無由區別嗣後除親王郡王之女仍著照例外貝勒以下止封嫡出一女其餘俱照庶出例庶出者照媵妾所出例著

永著為例。○以故四川建昌道屬迷易所土千戶安世祿子瑞鳴襲職。○壬午。諭曰。和親王等。查審鑲藍旗蒙古印務章京等摺內奏稱。平郡王慶恒。署理該旗事務時。飭查有無冒借宗人府滋生銀兩一事。西寧等曾將假託姓名借銀之處稟知。慶恒原欲叅奏。嗣因調任。欲待新任都統辦理。因而未曾查辦。又佐領百福。聲稱。福寧保指伊之名。冒借滋生銀兩。具控於納延泰。納延泰祇令福寧保交銀。代百福支借。其餘未曾查辦等因。取具叅領佛保。佐領百福口供前來。慶恒。納延泰。敢如此欺罔隱匿。實堪駭異。昨西寧等冒借銀兩一案。慶恒署理旗務時。未經查辦。朕猶謂彼實出於不知。失於覺察。故於伊明白回奏時。權其應得之咎。罰俸五年。據此。則是有心貽誤國事。不知伊意欲何為。慶恒身為王爵。朕又加恩。令其辦理旗務。不意乃敢如此。真堪駭怪。慶恒降二等。作為貝子。但伊所襲王

爵。係伊祖上所立。承襲已久。今若因伊獲罪。永遠降等。朕心不忍。慶恒本身作為貝子。出缺再襲時。仍襲郡王。仍停貝子俸十年。納延泰在日。於西寧等種種作弊之處。未經查出。雖追削都統職銜。并追繳立碑等項。而所賞伊子主事之銜。尚未追奪。今觀西寧等。於百福具控。冒借銀兩時。伊竟未曾辦理。情殊可惡。伊如一息尚存。朕必將伊正法。今雖物故。若含糊了事。無以示懲。著將納延泰家產查抄。所賞伊子惠齡主事之職。亦著斥革。仍令在筆帖式上行走。○癸未。諭王公一切事務。俱係宗人府承辦。伊等之女。指婚請封。自應咨報宗人府查覈。轉行禮部照例辦理。今各由本家直報禮部。殊屬不合。嗣後俱著咨報宗人府查覈。果於例相符。再行轉報禮部。奏請予封。前此各由本家咨部。或有以庶出為嫡出。以媵妾所出為庶出。濫邀恩澤者。著交該衙門查明具奏。○諭軍機大臣等。集福等

奏稱。駐劄匝勒沙木守卡巡查人等。俱由每年賞藏採買物件銀五百兩內賞給。今既撤卡。不必賞給。其派出巡查地方人等。請仍依舊例賞給等語。巡查地方人等。自應賞賚。但既撤卡。自有節省之項。著存庫以備公用。一年節省。雖屬無幾。然積久成多。又可省內地運送之費。著傳諭集福巡查地方人等。仍照舊賞賚外。其餘悉令存公。毋得以節省之項。任意虛糜。○又諭。據恒祿奏稱。派佐領赫善等。往查朝鮮民人。由何地越邊之處。赫善等面詢朝鮮國會寧府長官。據稱三水府之嘉義普正地方。距白山之西。有三四日路程。與盛京所屬地方相直。看來朝鮮國民人。係由盛京所屬地方越邊等語。前經禮部具奏時。朕即降旨。令清保。恒祿清查。嗣據查奏。該屬並無朝鮮越邊之事。復飭禮部確查。經禮部奏稱。朝鮮國越邊民人。俱係三水府嘉義普正之人。該國咸鏡道所管。地近吉林等語。因

復降旨。令恒祿嚴行查明具奏。今恒祿所奏。朝鮮國三水府嘉義普正地方。與盛京所屬內地相直。從前清保所查。必有未周。著飭朝鮮將伊國民人。究係由何處越邊之處。務須嚴飭查明具奏。○甲申。諭。前吏部議處詔安縣。訛造謠言。稟報遲延一案。將該道府議以降調。照例抵銷。已降旨。照所議行。今據楊廷璋奏。該道府楊景素。彼時尚未到任。知府蔣允焄。相距二百餘里。以致稟報遲延。現均實力訪緝。已將正犯張別拏獲。并稱該二員。久任閩疆。才情幹練。瀕海要區。未便驟易生手等語。督撫委任封疆。身經體察。所見自必親切。即係奉旨之事。其中果有委曲情節。理應據實陳奏。至於要地。必須幹員。尤當加意愛惜。以收得人之益。如但一味模稜。於地方人材。視同膜外。又安賴此督撫為耶。楊廷璋此奏。雖尚未知該道府等降調之案。業准抵銷。而能聲明緣由。備悉陳請。深得大臣實心任事。

之道殊可嘉予。除知縣馮禾。俟引見時再降諭旨。知府蔣允焄。降調抵銷該道楊景素。既到任在聞謠驚避十日之後。所有處分著加恩寬免。○諭軍機大臣等。據楊廷璋等奏。臺灣淡水營兵丁鄭戕等藐法聚眾。擒毆同知衙役。現嚴飭該鎮道逐一究明。押解赴省。從重定擬等因。臺灣為海外重地。在營兵丁乃敢抗官挾制。聚眾擒毆。大干法紀。且衙役十三人俱各毆有重傷。則其肆行逞兇。必不止鄭戕等五人。應逐一根究。毋使漏網。併即在於本處地方正法示眾。俾愚頑知所懲戒。若於省城結案。則該處之人。逃聽風聞。究不如目擊警心者之更為悚惕也。該犯鄭戕等若業經解赴省城。自不便遠隔重洋。復行解往。如尚未經起解。該督提等即遴委大員前往會同該鎮道嚴行究審。根究黨惡。從重分別定擬。在於臺灣地方正法梟示。此等兇徒。即多處數人情法亦所允當。嗣後設遇此等案

件。俱即於犯案處所審明辦理。不必遠行提解。著將此傳諭楊廷璋等知之。○乙酉。諭現在清查另記檔案人等有欲上自康熙年間徹底搜查者。大臣等並未喻朕意。從前屢次降旨。飭令另記檔案之人自首。今又降旨。賞限十五日。如或自首。免其治罪。此特指乾隆二十二年查出另記檔案業經為民。又復入旗。侵占旗缺者而言。非欲連二十二年以前者釐剔。倘如此清查。年限久遠。而各旗冊檔不全。何時了局。况二十二年另記檔案之人。如果遵旨自首。朕尚施恩准其為民。今此等業經為民後復又入旗人等。果於十五日限內自首。亦不過無賞無罰而已。大臣等祇當將二十二年以後清查。若於十五日限內自首者。不必治罪。仍令為民。若隱瞞不報。至限滿時。經大臣等查出。即從重治罪。此內有於二十二年未經報出。能遵此旨自首者。照前次施恩獎賞。准其為民。再阿里衮等查奏。正

白旗蒙古另記檔案內。中書達賚等十五人。俱係二十二年。前即入另戶之人。並非業經為民。後復入旗者。著加恩免其治罪。其家產妻子賞與王大臣之處。悉行停止。仍著為民。現在八旗。如有似達賚者。俱照此辦理。再達賚等。既加恩免其治罪。其失察之歷任都統官員等。亦著加恩。免其交部議處。著再曉諭八旗遵行。○丙戌。

上詣暢春園問

皇太后安。○諭軍機大臣等。今年夏至以來。時霽時陰。雨水不免過多。自閏五月十九二十以後。暢晴不過三四日。今二十三日入夜。陰雨復稠。至本日尚未晴霽。不知保陽一帶。光景較京師若何。著傳諭方觀承。將附近各屬。呈即查明。邇來晴雨情形。及田禾現在有無妨礙之處。速行具摺奏聞。再永定河當此連雨之時。各處工程若何。一併附摺馳奏。以慰廑念。○以江南糧儲道錢度。為安徽按察使。

○丁亥。調廣東瓊州鎮總兵解遜。為山東兗州鎮總兵。兗州鎮總兵素保。為浙江處州鎮總兵。處州鎮總兵張國標。為瓊州鎮總兵。○旌表守正捐軀之河南永城縣民常牛聘妻鮑氏。○戊子。諭節年以來。屢經降旨。令旗丁餘米。准其在通變賣。以資日用。現在各省漕艘。陸續抵通。於正供兌足後。旗丁多餘米石。如有情願出售者。仍照前例。即准其就通糶賣。於旗丁等既屬便益。而地方糧石。亦愈得

流通充裕。該部即遵諭行。○諭軍機大臣等。據阿爾泰奏。東省今歲麥收豐稔。酌量採買分貯。近河州縣。以資隣境接濟等語。昨經降旨。令該撫於麥熟最多之州縣。酌購五六萬石。俟京師應需接濟時。再為起運。今既據稱麥價甚平。現在採買分貯。著傳諭阿爾泰。即照前旨購辦五六萬石。由水路運京儲備。其作何接遞交收之處。俱著照例速行辦理。○己丑。

上詣暢春園問

皇太后安。○戶部議覆雲南巡撫劉藻奏稱。昭

通府屬大關。魯甸。恩安。三廳縣額徵稅。因

兵荒。係折銀放給。無處支銷。於乾隆六年題

請。照折給兵荒之價。每石徵銀七錢三分充

餉。經部議駁。令仍收本色。就近撥入常平項

下。以裕倉儲。遵行二十二年。該廳縣常平倉

儲。較定額已多數倍。有敝無散。紅腐堪虞。請

仍照前議。自本年為始。將該廳縣額徵稅。荒

折銀徵解。應如所請。從之。○庚寅。諭軍機大

臣等。據解遼奏。瓊郡孤懸海外。距省寫遠。鎮

屬兵額稍單。請將雷州協改歸瓊鎮統轄等

因一摺。雷州一協。現與瓊鎮相近。而其所屬

之海安營。僅隔海面八十里。順風兩時可達。

自宜將雷協改歸瓊鎮統轄。俾外海鎮協聲

勢聯絡。於營伍地方。俱為有益。著將原摺鈔

寄蘇昌。令其將實在情形。悉心詳查。妥議具

奏。○辛卯。諭。昨因承襲信郡王德昭王爵。將

伊諸子帶領引見。俱不能清語。拉弓亦屬平常。無王貝勒子嗣體度。王爵至貴。必能說清語。儀表可觀。方為無忝厥祖。而克稱厥位。非福薄之人。所克承當。是以朕復令於原立王爵多鐸子孫內。揀選人員。與德昭之子一同帶領引見。今觀該衙門所揀選者。俱優於德昭之子。而德昭諸子內。竟有年逾四十。不能清語。不能拉弓者。豈可令其承襲王爵耶。此皆信郡王德昭在日。惟圖安逸。耽於麴蘖。並不教訓子弟所致。德昭王爵。原不應令其承襲。但係伊祖軍功所立。若不令其承襲。朕心殊為不忍。如松優於德昭之子。且係承襲有分之人。因令如松承襲。如松現襲公爵。加恩著德昭之子修齡承襲。著傳諭王等。各宜加意教誨子弟。倘襲爵時。不能清語騎射。朕必照此辦理。毋貽後悔。○以察哈爾都統嵩椿為西安將軍。正黃旗漢軍副都統巴爾品為察哈爾都統。○是月。直隸總督方觀承奏。本

月十九日雨止。已獲連晴。二十三四等日。又復連夜傾注。景州河間水道疏消有路。尚不至存蓄。惟任邱雄縣新城一帶濱河大道。未能減落。而千里長隄。無處起土。只可暫行停修。再相機辦理。得旨覽奏俱悉。甫晴兩日。今復陰雨。朕甚憂之。○河東河道總督張師載奏。上北河廳屬陽武一帶隄工。多係飛沙流土。不惟遇水易汕。晴久遇風。即易飛動。該處灘面甚高。非盛漲不浸。鑲修旱地防風。稽料無水浸養。最易腐斷。若顧惜工料。不為豫辦。河水驟至。再遇南風。則尺寸皆屬險要。料物不備。又恐鞭長莫及。去歲黃流泛漲。高踰隄頂。水落後。灘面停有淤泥。其性膠粘。非沙土可比。因飭承修各員。揀擇紅色淤土。於大隄臨河處。普面包裹。嗣後遇有土工。依此例揀土增培。可望化險為平。每年鑲修旱地防風。亦可逐次節省。得旨甚好。所謂日計不足。月計有餘。○陝甘總督楊應琚奏。查安西府建

設戈壁之內。米糧食物。咸仰給於河州。稽之志乘。漢晉皆以河州為敦煌郡。唐設河州刺史。元為河州路。蓋河州為關外第一沃壤。即體訪輿情。亦咸以府治軍臺。移設河州為便。且用繩丈量。自河州至哈密。較之安西。實近一百六十里。各臺運費。既可節省。而應設軍臺。亦可量減。請將安西府治軍臺。俱移設河州。洵於公私交有裨益。但事關重大。臣擬於六月內。親往勘明。再將移設各事宜。妥議另疏。得旨嘉獎。○又奏。孳生馬匹。最為邊儲要務。西寧鎮孳生馬廠。軍興以來。動撥外。僅存馬一百三十五匹。以水草豐厚之區。任其閒曠。殊為可惜。查甘州提標牧廠。尚存節年考成過兒騾驢馬。并產獲馬駒。四千七百餘匹。儘堪分撥。請酌撥一千一百四十六匹。趕赴西寧。又涼州鎮孳生馬。七百十九匹。本廠水草平常。亦請就近改撥。連西寧現存之馬。共二千匹。派撥諸練弁目。加意收養。自必日見

蕃盛得旨甚好。如所議行。○陝西巡撫鄂弼奏。西安二麥。楊花結穗時。原有八九分收成。惟四五月間。雨水微缺。結實不能飽滿。幸遇閏節氣稍遲。日內得雨。尚可趕種秋禾。得旨。覽奏俱悉。西安望雨。此處則甚望晴矣。

大清高宗法天隆運至誠先覺體元立極敷文

奮武孝慈神聖純皇帝實錄卷之六百六十三

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十三

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級謹將內大臣戶部尚書鑲藍旗滿洲都統軍功紀錄五次
尋常紀錄十四次臣德瑛等謹將太子少保工部尚書紀錄六次臣曹振鏞等奉

敕修

乾隆二十七年壬午六月壬辰朔諭軍機大

臣等成衮扎布等奏奉到辦理哈薩克貿易
諭旨。隨酌量曉示該使人。據稱因道遠多帶
馬匹。並非專來貿易。若有願售者。亦可變價
等語。哈薩克全部。均為臣僕。其在西邊游牧
者。與伊犁。烏魯木齊相近。自應在彼貿易。至
阿布賚游牧。與古爾班察爾相近。在北路行
走為便。伊等情願來烏里雅蘇台貿易。亦無
不可。至盜賊爭鬪等事。惟派委幹員。照料約
束。自然安靜。其貿易之處。可不必停止。○禮

部議奏廣西巡撫熊學鵬奏稱舉報節孝。本
家具呈鄰族具結。由州縣及該學徑詳督撫
學政彙題。查知府藩司皆有整飭維持之責。
而彰善大典。轉不與聞。未免疏於查覈。於體
制亦覺未符。請嗣後俱由府司覈轉等語。應
如所請。從之。○癸巳。

上詣暢春園。問。

皇太后安。○諭軍機大臣等。科布多新開屯田。
特派扎拉豐阿前往。伊至彼處。即應將一切

情形。一面報知將軍。一面具奏。迄今數月。雖
將墾田二十頃之處。呈報一次。此時地土肥
饒。雨澤應時與否。及禾苗若何滋長。並未奏
及。伊係叅贊大臣副都統。又專辦軍屯。有事
自應入告。著成衮扎布等傳諭扎拉豐阿。令
將前項情形。明白具奏。○甲午。諭京師閏五
月以來。雨水稍多。近雖晴霽。而道路泥濘。商
販馱運。未免紆遲。豆價現在增長。官員兵丁。
日所必需。自宜酌量調劑。著戶部於豫備支

放豆石內。通融籌撥。陸續交與五城米廩。以
資平糶。現已降旨。令奉天山東二省。一面速
運豆石。接濟京倉支放之用。該部遵諭速行。
○又諭曰。愛必達等。審擬兵部書役撞騙婪
贓一案。已交三法司覈擬。速奏。惟摺內將那
蘭保雅隆阿。察倫泰。擬罪之處。過於輕縱。實
出情理之外。武弁與書役交通舞弊。已屬大
干法紀。況那蘭保身係滿洲。即不知畏法。亦
當稍顧顏面。何至與下賤書役。直以兄弟相

稱。卑鄙無恥。至此已極。我滿洲中。豈宜有此
臣僕。那蘭保著削去戶籍。發往伊犁。給與厄
魯特為奴。雅隆阿。係和碩額駙伊林沁之子。
又曾任侍衛。在內廷行走日久。豈不知朕整
飭吏治。官弁陞除。非么麼猾吏所能高下其
手。乃竟傾心與之行賄作奸。恬不知恥。而察
倫泰。身為副將大員。甚至手持書役字札。分
致屬員。抑令各出已貲。均為玷辱滿洲。情難
寬貸。雅隆阿。察倫泰。俱著拏解來京。交與刑

部從重治罪。以示懲創。朕前令八旗人員。簡用外任。原以伊等克守滿洲淳樸素風。共知自愛。且人材弓馬。均有可觀。足為外省綠營表率。並非僅為伊等。疏通進用之途。多得廉俸起見也。乃那蘭保等。並不思朕造就之恩。自顧行止。竟至甘為敗類。若此。今姑示薄懲。若再有似此者。必致將外用之制。罷而不行。此案定罪。在馮鈴隨同率擬。已屬不合。而愛必達。以滿洲世臣。且專主定讞。見此等寡廉鮮恥之徒。其視尋常旗員。倍當髮指。乃竟漠然不動於中。思僅以薄罰完結。豈朕平日倚任之意。愛必達著交部嚴加議處。馮鈴著交部察議。並將此通諭八旗知之。○諭軍機大臣等。京師近因雨水稍多。豆價增長。已令戶部於豫備支放豆石內。酌撥五城平糶。奉天山東二省。上年豆石收成豐稔。著傳諭該府尹。巡撫等。就本省通融酌辦。於粟米改徵豆石內。儘數籌撥。或有不敷。就近設法購買。總

以每省各得五萬石為率。山東由運河水次奉天。即由海道一面迅速運京。以補該部應行支放之數。毋稍遲誤。○又諭曰。愛必達等奏審兵部書役撞騙婪贓一案。已交三法司覈擬。其摺內原擬錯謬之處。並降旨詳諭矣。至另摺所奏。訊問順天府押解華九如。由臺莊水路逗遛一節。此則明係該犯用計愚弄解員。希冀取道附近家鄉。以便與親故暗中通同作弊。或藉以消弭向日奸詭蹤跡。巡檢微員。遂墜其術中耳。該督等理應將華九如逐細嚴加刑鞫。務得實情。何得潦草支吾。任其狡飾。至脫逃要犯茹勝謙。係伊等同鄉同事。必當深知下落。此等俱係積年蠹役。譎詐性成。若不加以嚴刑。豈肯遽行吐露。況伊等現係身獲重罪之犯。即嚴刑致死。又何足惜。而乃詰駁數語。遂謂別無遁情耶。該督等。徇於外省習氣。實所不解。著傳旨嚴行申飭。愛必達。尤朕向來深所倚任。何亦輕率從事。若

此著即詳諭該督等。令即嚴行究審。毋得稍存姑息。致狡犯匿情玩法。以昭懲創。愛必違此時。即已回任。亦著速赴湖南。會同辦理。尋奏。臣奉旨後。馳赴湖南。會同馮鈐提審。緣華九如起解時。正患瘧疾。解官朱斯獻年老不能乘騎。又向該犯借銀二十兩。解役亦索得盤費十兩。故聽從該犯由水路行走。以圖彼此安逸。並非希冀繞道家鄉。逗遛作弊。至如勝謙下落。該犯供稱。雖同在兵部。司分不同。平素並無交往。且如勝謙脫逃已逾二年。實不知其蹤跡。臣等反覆開導。再三刑訊。該犯供詞始終如一。現在飛咨沿途。查拏朱斯獻到案。審明時。另行具奏。得旨。足見汝等外省化有為無之習氣不改也。不知慚懼可乎。○乙未。旌表守正捐軀之廣東番禺縣民龐集喜妻馬氏。○丙申。

上詣暢春園問

皇太后安。○諭軍機大臣等。宋邦綏奏。蒲縣監

生任光。以微嫌遣人勒斃。任作山。並重利盤剝鄉民一案。地方土棍。剝民斃命。實為不法之尤。自當按律嚴行治罪。以昭憲典。所有該犯家產。亦應查明。留充地方公用。至所請將該犯放出。利債糧石銀兩。減半追出一節。則可不必。蓋該犯借給各戶之項。原屬重利盤剝。鄉里久受其累。自當概行免追。以示兇徒。欺壓貧民之戒。○軍機大臣等議。覆副都統富德條奏。旗務各款。一。八旗向無衙署。都統印信。俱貯私宅。今衙署已建。嗣後都統印信。俱存署。印鑰令各都統佩帶。遇用印日期。照部院特派監印章京。同印務叅領公同監印。該都統不時進署稽察。一。各省駐防滋生銀兩。向咨各旗報銷。旗員辦理。未能熟悉。嗣後俱歸戶部覈銷。一。左右兩翼。設立幼官學。向每翼只派章京四員兼管。未能周悉。查滿洲旗員較多。請每翼各旗派叅領一員。章京二員。輪班到學。其蒙古漢軍旗員較少。俱不必

兼管學務。旗人私債。急宜清釐。方可漸裕生計。請交八旗都統。徹底清查。應如何歸償之處。酌動官項完結。於伊等俸餉內陸續歸款。清查之後。再有不知撙節。仍行賒欠者。嚴加懲治。均如所請。從之。○以故喀爾喀扎薩克親王德沁扎布子公諾爾布扎布襲爵。其公爵。以其子車登扎布承襲。○旌表守正捐軀之河南閭鄉縣民李茂。妻蔣氏。○丁酉。諭派出查旗之王大臣等。將八旗另記檔案。業經為民。復行入旗。及抱養人等。並請覈對部中檔案。今經限滿。派出之王大臣等。將自首人等分別具奏。有二十二年查後。復行入旗者。亦有二十二年以前。未經查出者。伊等俱於限內自首。著加恩將二十二年查後。復行入旗人等。寬其治罪。悉令為民。其二十二年未經查出。今聞朕旨。即於限內自首者。尚屬可矜。若將伊等辦理。則匿而不首之人。反得僥倖。著加恩俱作為另戶。各當原差。再二

十二年以後。經此次查辦。或猶有不自首者。查出時。斷難寬恕。即照鑲藍旗蒙古之案。辦理。悉發往伊犁。其二十二年以前。閱年已久。無憑查覈。著無論有無情節。亦悉加恩免究。均令作為另戶旗人。即有出首之人。亦不必查辦。但都統等有稽察專責。宜不時悉心嚴查。數年後。朕仍派王大臣等查覈。若有復行入旗。及以民人為子等事。一經查出。除將本人從重治罪外。定將該旗都統等。一併從重治罪。決不姑貸。著通行曉諭八旗遵行。○又諭。三法司覈擬黃在中等。交通武員營謀作弊一案。該督撫原擬。將案內應發烟瘴充軍之劉煊。馬元齡。因係旗人。照例解部完結。經法司覈擬。不准折枷。請發黑龍江當差等語。從前定例。旗人犯軍流徒罪。均准枷責發落者。原因國初滿洲習俗淳樸。顧惜顏面。京師多留一人。即得一人之用。自宜格外培養。又恐遣發外省。地方官或轉有不能如法約束。

之處。是以定有此例。乃近來八旗生齒日繁。漸染惡習。浮靡蠹薄。殊失國初渾厚之風。即如此案之那蘭保等。以滿洲職官。竟至與盡吏弟兄相稱。交結往還。無恥已極。此尚可以從前風俗情理論乎。況伊等每以銓補外任。希圖便安。幾與漢人無異。獨至獲罪應遣。則過於區分。亦非大公之道。至於漢軍原係漢人。凡得缺陞轉。均屬一體並用。其犯法應遣。更無庸另立科條。而若輩向來恃有此例。轉以為身係旗人。即遇罪譴。仍可室家保聚。不至投畀遠方。是非所以愛惜保全。適長其遂非怙終之習。而輕於扞法也。且使此等倖逃法網之人。聚集京師。尤為有損無益。嗣後凡滿洲犯有軍流遣罪。如係尋常事故。仍照舊例枷責完結。倘有似此寡廉鮮恥之徒。其人既甘為敗類。又何必復以滿洲成例待之。自應削去戶籍。依律發遣。其如何完結之處。該部逐案聲明請旨。庶不致日久高下其手之

弊。其漢軍人犯。無論軍流徒罪。俱即斥令為民。照所犯定例發遣。不必准折枷責。著為例。所有此案之劉煊。馬元齡。即著發往烟瘴地面充軍。並將此通行曉諭知之。○蠲免直隸固安。永清。東安。武清。霸州。保定。文安。大城。宛平。寶坻。薊州。寧河。灤州。清苑。新城。博野。望都。蠡縣。祁州。雄縣。安州。高陽。新安。河間。獻縣。肅寧。任邱。交河。景州。東光。天津。青縣。靜海。滄州。南皮。鹽山。慶雲。津軍廳。平鄉。廣宗。鉅鹿。唐山。任縣。永年。邯鄲。成安。曲周。廣平。雞澤。威縣。清河。磁州。開州。大名。元城。南樂。清豐。東明。長垣。西寧。蔚州。豐潤。玉田。冀州。南宮。新河。武邑。衡水。隆平。寧晉。深州。武強。定州。曲陽等七十四州縣廳。乾隆二十六年。水災額賦有差。○戊戌。

上御勤政殿聽政。○諭朕此次巡幸木蘭。著裕親王。和親王。大學士來保。尚書舒赫德在京總理事務。其月選之文員內。通判州縣等官。

武員內八旗護軍校驍騎校及外省送到之補放水手官驍騎校并年滿千總等官弁俱著王大臣照例驗看至外省督撫提鎮等奏摺著照例自啟鑒之日為始俱齎赴在京總理處加封交內閣隨本呈送行在候朕批示隨本發回仍於在京總理處交齎摺人祇領該部通行傳諭知之○湖廣總督愛必達奏湖北各營兵米除鄖陽荊門二協營全支本色其餘督撫兩標及武昌襄陽等二十二標協營向係本折兼支并有全支折色者內除衛昌營每石折銀七錢復於耗羨下寬給三錢餘營俱僅折七錢生齒日繁糧價日貴實不敷買食查寶武局每年鑄錢除搭放兵餉外尚餘五萬七千餘串例發售以平市價請即於此項下照每營折色銀數每發錢一串較之發銀每兩可餘一錢七八分藉以多買米糧扣存米折銀兩即還鑄本至此項局錢每串作銀一兩除去成本猶有餘息而改給

米折之外尚餘錢二萬餘串再合之加卯所鑄仍得隨時出易以便民用從之○以愉郡王弘慶為宗人府右宗正○己亥諭據正白旗滿洲奏稱墨爾根城副都統鄂博什在軍前効力曾賞給雲騎尉今又議賞三等輕車都尉其所得雲騎尉應居何等現在咨查該部等語此次平定伊犁回部有軍功出衆者一經奏報即交部議敘給與世職原屬鼓勵戎行之意今大功告竣通行查覈從前曾賞世職人員該部自應分別辦理蓋世職之崇卑視軍功之大小現在議給之職若大於從前所賞者即銷去前職尚屬可行至前後功次畧同俱令留襲既屬太過或將前次功牌註銷專論後來功賞亦未免偏枯此間權衡較量必通計前後所得功次應給何職酌量定議方為平允著該部將此次議給世職各員通行查覈畫一辦理具奏○諭軍機大臣等前因京師豆價昂貴是以降旨令於奉天

各屬購買五萬石。由海運搭解來京應用。今據侍衛瑚什奏稱奉天一帶亦因雨水稍多。道路泥濘。現在田禾間有被淹之處等語。朕思奉屬既多雨水。即本地採買。或亦未免艱於運送。著傳諭朝銓等酌量情形。通盤籌算。倘購辦稍有未便。即不必拘泥前旨。竭蹶辦運。至該處現在雨水多寡。及有無傷損田禾。並目下曾否晴霽之處。著一併作速奏聞。以慰廛念。○旌表守正捐軀之廣東東莞縣民

陳儀錫女陳氏。○庚子。諭軍機大臣等。前據方觀承奏。月朔以來。已得連晴。秋禾旺發。道水漸消等語。近復雨晴相間。未知直屬一帶情形若何。今日三和。自熱河回京。見淋溝一帶地方。有以禾苗飼馬者。詢問緣由。據稱被水田禾。不能長發等語。看來低窪地畝。秋禾已有失望之處。自應及時補種。苡麥為要。其無力貧民。艱於力作者。前曾降旨酌借籽種。該督可即速查明。應給發者。即行給發。俾資

接濟。再永定河等處。近日水勢有無長落。及畿南景州一帶。積水曾否疏濬消退。又情民不肯鋤苗。以待天晴。陰雲何不可鋤。應廣為勸諭。仍屬為彼穡務也。並著傳諭方觀承。據實速行奏聞。○辛丑

上詣暢春園。問

皇太后安。○諭軍機大臣等。今日游金輅奏報臺灣雨水情形一摺。於兵丁鄭我等聚眾毆役之事。竟無一語提及。朕以為或該總兵具摺在前。而兵丁等生事在後。及檢查楊廷璋奏摺。稱係五月初一日。據臺灣鎮總兵游金輅等咨稟。則游金輅封發奏摺時。此案久經發覺矣。總兵膺專閫之寄。遇地方有事。即應據實奏聞。況管轄兵丁。尤其專責。而臺灣一鎮。孤懸海外。更與內地不同。今游金輅於此等事件。僅以咨稟督提了事。而於奏牘中。竟不復置一詞。是全不知節鎮大員職掌所係。若以兵丁滋事。恐於考成有礙。不敢直陳。則

識見尤為鄙陋矣。至於雨水情形。不過地方大員隨時陳奏之事。游金輅乃專以此斤斤入告。遂謂可以塞責耶。游金輅著傳旨嚴行申飭。○旌表守正捐軀之四川射洪縣民彭為乾妻劉氏。○壬寅諭。據吏兵二部將此次南巡接駕人員查開履歷案情具奏。朕詳加檢閱。除從前已經賞給頂帶職銜。並情罪較重者。毋庸辦理外。所有編修沈齊禮。胡紹鼎。張坦。湯大紳。邵齊燾。毛詠。喻煒。陸樹本。檢討潘乙震等九員。俱係因考試休致。尚可酌量錄用。其有情願來京考試者。准其自行來京。候朕考試定奪。至因事降革之馮鎬。趙通經。趙屏。晉金文宗。朱辰。靳樹椿。徐炳。王心銘。段宏深。韓墉。鍾和梅。戴泰暉。田僖等十三員。覈其緣事情節。尚屬因公。與行止卑污。及有贓私罪蹟者不同。著該部行文調取來京引見。再降諭旨。并將各員原叅情由查明。於引見時。一併附摺聲奏。○諭軍機大臣等。據永貴

等奏稱。布魯特比瑪木特呼里。阿爾雜默特。欲合兵往攻額爾德尼。遣人會商齊哩克齊特木爾占。齊哩克齊阻回等語。薩爾巴噶什比齊哩克齊特木爾占。皆係新附之人。瑪木特呼里等。欲與額爾德尼構兵。遣人會商。伊等開諭阻止。和睦隣封。甚屬可嘉。永貴雖經各賞緞一疋。為數過少。齊哩克齊從前業經賞戴三品翎頂。著加恩再加賞緞二疋。特木爾占。已賞給五品頂帶。著加恩賞換花翎。所賞緞疋。即由彼處所存緞疋內賞給。著傳諭永貴遵照辦理。仍將朕施恩之處。曉諭齊哩克齊等知之。○癸卯。諭軍機大臣等。前因佟銘冒領宗人府銀兩脫逃一案。令軍機大臣行知河南湖北二省偵緝務獲。嗣據該撫等覆稱。訪查並無其人。復經諭令江西巡撫常鈞一體協緝。今據該撫亦以並無蹤跡覆奏。此等玩法重犯。一經通緝。輒致漏網稽誅。成何政事。現在躡緝之後。奸徒或因事過防備

漸弛轉得乘隙潛蹤均未可定著傳諭明山湯聘胡寶瑤仍通飭所屬嚴密體訪務令就獲不得因已查覆以通緝了事並自護前說竟爾疎縱也○又諭曰鑲紅旗漢軍馬甲佟銘冒領宗人府銀兩事露脫逃一案先因承緝各官不能及時上緊查拏致該犯遷延免脫屢經降旨徧行嚴緝至今尚未弋獲並據江西及湖北河南等省節次奏報亦稱現在並無蹤跡以玩法重犯懸緝日久輒至漏網稽誅成何事體且此等狡獪匪徒安知不以各處通緝轉於近京之地匿影潛藏自為得計現飭提督衙門於京城內外一面嚴密體訪至於直隸鄉屯邨僻及口外八溝塔子溝等處種地民人叅錯尤易為遁逃之藪著傳諭方觀承飭屬密訪嚴查務令就獲亦不得過事張皇致令聞風遠颺○旌表守正捐軀之山西長治縣民馮成貴妻崔氏○甲辰上詣暢春園問

皇太后安○以左副都御史梁國治為江西鄉試正考官編修梅立本為副考官吏部左侍郎彭啟豐為浙江鄉試正考官編修李宗寶為副考官右中允翁方綱為湖北鄉試正考官編修彭冠為副考官○乙巳諭軍機大臣等蘇昌題叅賀縣知縣朱三元貪婪不職致斃民命一本朱三元身為縣令不能廉潔自持乃以借欠京債屢次勒索商埠紳士銀兩致令何朝相畏刑斃命此等情罪非尋常貪婪可比著傳諭蘇昌會同該撫熊學鵬即將朱三元及案內有名犯證速行嚴審定擬具奏○又諭曰達桑阿奏稱庫爾勒王古爾伯克等貢獻馬匹緞疋等物謹派員齎送等語庫爾勒王古爾等回人遷居甫定其生計自屬不足且回人等欲有所獻亦當視其品級以昭體制若小頭目等皆准入貢則各城互相倣效殊覺非體且伊等果出於誠悃或當入覲來京時行之尋常何必瀆獻上年

皇太后萬壽大慶。回人恭効祝釐。俱已計值賞賜。嗣後會逢盛典。回人等所進方物。該大臣等察收具奏。此外不必允准。現在所進馬匹什物。既經收受。著計值頒賞。并通諭各城駐劄大臣。曉示該伯克等知之。○丙午。諭直隸自閏五月以來。雨水稍多。看來近京一帶。低窪地畝。不免有積水被災之處。應需米石撥用。自宜豫為籌備。現在漕船未經抵通收兌者尚多。著總督方觀承。於尾幫所過之天津北倉以南。附近水次各州縣。分別酌量情形。約共截留漕糧二十萬石。以備將來撥用。並諭漕運總督。倉場侍郎等知之。○諭軍機大臣等。據阿永阿。朝銓奏稱。清查盛京開墾地畝。每年冬三月及春季二月間。方可按畝清查。請賞限三年。清查完結等語。即照所請。但查覈既需三年之久。阿永阿不必在彼守候。著即回京。其查覈開墾事件。交朝銓等辦理。將此傳諭知之。

大清高宗法天隆運至誠先覺體元立極敷文奮武孝慈神聖純皇帝實錄卷之六百六十四

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午六月丁未諭據弘昞奏

平定回疆方略卷五十五

稱鄭家莊領催滿常因向民人馬福廷賒布
不與令披甲保明指稱買鐵與馬福廷等鬪
毆一案城守尉圖畢赫並不會同地方官辦
理只聽滿常一面之詞將民人馬福廷等擅
責百餘鞭請將領催滿常披甲保明民人馬
福廷等交刑部審擬外該城守尉佐領等交
兵部俟滿常等定擬後分別議處等語凡駐
防旗人內有不安本分妄生事端者該管官
自應責處示懲若民人自有地方官管理即

或犯罪亦當交與地方官審明按例查辦旗

員豈可即將民人拏往擅責果爾則旗人設

遇鬪毆之案地方官亦可拏往責治矣成何

事體今領催滿常因向民人馬福廷等賒布

未得致相鬪毆而城守尉圖畢赫既不管教

滿常等亦不將民人送地方官審理轉袒護

旗人令佐領阿明等將民人馬福廷等拏往

違例擅責百餘鞭恣意妄行罔知法紀阿明

百福附和奉行情亦可惡何必更待滿常等

定罪完結所有城守尉圖畢赫佐領阿明百

福即著革職其領催滿常披甲保明民人馬

福廷等俱交刑部審明定擬仍將此通行曉

諭八旗及各省駐防知之○軍機大臣等議

奏宗人府滋生銀兩借給旗員取息一分原

為宗室等婚喪事件賞項旗員藉此銀兩又

可免重利負貸但係正項絲毫不能拖欠須

按季坐扣又遇婚喪事件賞借俸銀下季即

全行坐扣借項時雖可接濟扣還時實不免

平定回疆方略卷五十五

七

拮据不得不另為籌畫。查宗室等婚喪賞項。一年約需銀三萬五六千兩。八旗官員婚喪借俸。一年約需銀二萬五六千兩。請在宗人府撥銀二十萬兩。戶部撥銀三十萬兩。交兩淮鹽政高恒。分借商人。一分起息。解交戶部。為宗室等賞項。及旗員借俸之需。其旗員借支滋生銀兩之處。即行停止。至未完滋生銀兩。免其利息。借過俸銀。展限坐扣。以示體卹。得旨。宗人府滋生銀兩。著停止借給。其未完舊欠。及借過俸銀。著加恩免息。展限坐扣。但旗員俸銀無幾。養贍家口。行走差使。恐已不敷。如遇婚喪事件。更慮拮据。嗣後竟停止借俸。量加賞項。其如何賞給之處。軍機大臣速行議奏。○又議覆。欽差刑部右侍郎阿永阿等奏。稱奉省所屬錦。復。熊。蓋等處。沿山濱海。山多柞樹。可以養蠶。織造繭紬。現在山東流寓民人。搭蓋窩棚。俱以養蠶為業。春夏二季。放蠶食葉。分界把持。蠶事畢。則拋線度日。聚

賭鬪毆之事。不一而足。此等民人。應交該處旗民官查明。編為保甲。設立棚長牌頭管束。倘有生事不法。分別情罪辦理。其自山東航海來者。若無票船隻。及有票而票內無名之人。一併嚴查。照例治罪。應如所請。從之。○戊申。

上詣暢春園。問

皇太后安。○諭本年夏至以來。雨水過大。京城一帶。牆壁多有倒塌。物價昂貴。官兵日用。未免拮据。昨朕加恩。令軍機大臣議奏。將官員所欠滋生銀兩。俱免息。展限扣還。若照現議。自本年扣起。則官員仍復不得全俸。著加恩。將本年秋季應扣各項。併所罰俸銀。俱展一季。自明年春季扣還。其兵丁。拜唐阿等。著加恩。借給一月錢糧。分六月扣還。○己酉。軍機大臣等議奏。八旗官員婚喪賞項。文職副都御史以上。武職副都統以上。俱係大臣。毋庸議賞。公。侯。伯。子。照一品。男。照二品。三品至五

品文武各員。各照品級。喪事賞俸四個月。嫁娶賞俸三個月。六七品官員。俸銀較少。六品官喪事。請賞銀二十五兩。嫁娶賞銀十五兩。七品以下喪事。請賞銀二十兩。嫁娶賞銀十兩。世職俱照職俸賞給。從之。○又奏。繕書房向無額缺。乾隆十五年。始設立。委署主事二缺。在戶刑二部。各撥筆帖式十缺。又設立繕譯官二十缺。原欲作養人材。以收實效。乃設立以來。繕譯就成者絕少。且轉視為捷徑。請將委署主事二缺裁汰。筆帖式十缺。仍撥歸原衙門。繕譯官俱行走多年。仍留書房。俟出缺時。裁汰十員。嗣後應需人員。在部院現任筆帖式內挑取。如果奮勉。五年後奏請擢用。以示鼓勵。平常者。即行駁回。從之。○參贊大臣阿桂等奏。伊犁建闕帝廟。每年春秋致祭。因念原任將軍班第。參贊大臣鄂容安。在伊犁竭忠全節。應請於廟後房屋設位致祭。候旨遵行。從之。○庚戌。

諭。向來八旗官員。支借宗人府滋生銀兩。遇有婚喪事件。復借給俸銀。原欲資其生計。但旗員支借銀兩。用於正項者甚少。且婚喪事件。支借俸銀。於下季即行扣完。或連遇數事。重複支借。即須數季。方能扣清。支借銀兩。不過數日。食用充裕。至扣還之時。仍復拮据。是以交軍機大臣。詳議停止。并將所借。免息展限。坐扣。復於婚喪事件。停止借俸。特加恩賞給銀兩。此內借俸過多者。復交部旗查明。三分扣一。伊等每季扣項無多。且不久即可扣完。旗員由此俱得全俸。於生計大有裨益。此皆朕委曲矜全之至意。各宜深知感激。務思節儉。不得恣意奢靡。私借重債。以致拮据。著將此再通諭八旗知之。○諭軍機大臣等。海明等奏。稱烏魯木齊。送馬一千二百匹。至阿克蘇。全無傷損等語。烏魯木齊。至阿克蘇。中間踰越山嶺。經行戈壁。解送馬匹官兵等。善為照料。不致傷損。殊屬可嘉。著將在事官升

等。交部議敘。兵丁照例給賞。○旌表守正捐軀之安徽阜陽縣民李振妻朱氏。○辛亥。

上詣暢春園。問

皇太后安。○諭。巡捕三營兵丁。著照八旗兵丁

賞借之例。加恩賞借一月錢糧。○諭。軍機大

臣等。元保奏。解餉請定銀數。並分期起行一

摺。據稱。各省撥解雲貴餉銀。每鞘需夫二名。

黔省額設站夫。止有百名。不敷撥用。未免派

累苗民等語。著照所請。嗣後凡撥解雲貴餉

銀。酌量以每起不得過五萬兩為率。並分起

委解。即有後起。亦令間五日先後啟行。毋任

解員合併前進。著傳諭各督撫。彼此知會。妥

協經理。庶站夫得以從容供運。而苗疆亦不

致滋累。○壬子。

上御勤政殿聽政。○諭。今夏因雨水過多。恐畿

輔一帶。麥收分數。不無減少。是以前經降旨。

令河南山東二省。各採買麥石。運京平糶。昨

據阿爾泰奏報。東省麥石。已於六月十三起

運在途。今胡寶瑤奏報。豫省麥石。現亦分起
催攢前進。合計均可刻日抵通。著傳諭倉場
侍郎等於二省麥石將到水次。即豫備接遞
運京。以便交發五城米廠。陸續平糶。仍即一
面妥酌規條。隨到隨辦。俾市價日減。而民食
益充。副朕軫念閭閻至意。該部遵諭速行。○
癸丑。諭曰。楊錫紱等奏。安慶後幫旗丁倪李
黃船糧。於六月初八日。在海河神廟地方。陡
遇暴風。米石漂沒。船身止存底板一片。所有
該旗丁。應賠糧六百七十三石零。請令於癸
未年新運。一併運通。船隻仍著賠造接運等
語。內河糧艘失風。非江湖黃河可比。定例均
應責令賠補。第念該幫艤泊海河。猝遇暴風。
難施人力。運丁偶遭蕩析。力量拮据。殊堪軫
念。著格外加恩。將應賠糧石船隻。一併豁免。
以示體卹。○禮部議奏。貴州學政湯先甲奏。
稱。都勻府屬荔波縣。向未開設廩增。請自乾
隆二十八年為始。開設廩增各二名。四年一

貢。應如所請行。從之。○工部議覆江南河道總督高晉奏稱山安廳屬安東汛高家莊一帶因對岸生長大灘河溜北趨。加以上年伏秋大汛全黃直射兜灣。灘崖盡塌。直逼隄根。危險堪虞。請建築埽壩挑溜護衛。應如所請。從之。○予故內大臣理藩院左侍郎旺扎勒祭葬如例。謚恪慎。○旌表守正捐軀之山東堂邑縣民劉祥妻蘇氏。河南滑縣民劉成名妻胡氏。○甲寅遣官祭

火神廟。○軍機大臣等奏八旗都統查報旗人并無借放私債之事。請交八旗都統傳集旗人等。令將並無私債在各名下畫押存案。此後如有控告債負。不准歸還。并將放債之人照訛詐例從重治罪。諭近因富德奏請查辦旗人私欠。命軍機大臣等議交八旗都統清查。原欲伊等據實呈報。按其輕重酌量加恩。乃以並無借放私債為詞。殊未識朕體恤之意。此非特旗人無知。隱瞞不敢呈報。明係

八旗都統等拘泥歷年奏報並無借放重利私債之事。勒令不報。希圖避罪。全不念旗人生計一味含糊。此等習氣甚屬可惡。豈復冀其養育旗人耶。見朕此旨。當自懷慙耳。伊等既稱並無借放私債之人。著即照軍機大臣所奏傳知八旗外。并交步軍統領出示通行曉諭知之。○諭軍機大臣等。旌額理等奏稱內地送到屯田民人四百餘戶。俱知勉力耕作。因雨澤稍歉。又有野鼠食禾。被災自一二

分至七八分等語。內地民人頗知力作。偶值偏災。伊等俱係新遷。並無積蓄。若不加以接濟。則伊等拮据口食。不能盡力耕耘。現在烏魯木齊尚有餘糧。其作何加給升斗。俾無失所。著傳諭旌額理等一面辦理。即行具奏。○戶部議奏。月選文武各官在京支借養廉。原欲使該員無重利稱貸之累。乃近日月選各官仍有逋欠累累。致釀事端者。況查借過養廉各員。或遇事故。有展限扣繳者。有通省攤

扣者。帑項既易虛懸。同官轉致受累。請嗣後豫支養廉之處。概行停止。從之。○乙卯。上詣暢春園。問

皇太后安。○諭。前因直隸雨水稍多。低窪地畝。不免有積水被災之處。曾經降旨於天津以南附近水次州縣。截留漕糧二十萬石。以備撥用。但念現在被水各屬。收成不無歉薄。將來需米之處尚多。前次所截糧石。恐不敷用。著再加恩。於抵津各幫內。截留十萬石。一併

存貯北倉備用。該部遵諭速行。○以戶部右侍郎錢汝誠為江南鄉試正考官。編修戴第元。為副考官。御史吳綬詔為陝西鄉試正考官。編修王燕緒為副考官。○丙辰。戶部議奏八旗積存地畝一萬五千餘頃。請擇可編官園者。分設整分半分莊頭數百名。即於現在莊頭子弟內。選擇安放。得旨。戶部所有八旗積存地畝一項。摺內酌議分設莊頭之處。著照所請行。但安放莊頭。需地不過三四千頃。

所餘尚有一萬頃之多。此等皆係老園旗地。且發帑贖回者。十居七八。原係應行入官地畝。徒交地方官徵解。適滋胥吏侵肥。旗與民兩無裨益。著將此項。交內務府派員。經理徵收。俟原帑按數歸清之後。即將地畝賞給八旗。作為恒產。其將來如何酌定章程。妥協辦理之處。臨時著該部會同內務府八旗大臣。悉心詳議具奏。現在內務府查辦時。並著八旗各派幹員會同經理。將來該員等亦俱熟練。即可接手承辦矣。○丁巳。諭天津地勢低窪。近因雨多積水。柴米價值稍昂。兵丁買食未免拮据。著加恩將存津左右城守三營現操馬步守各兵。每名借給米一石。俾資接濟。於明年應得餉米銀內。再行分作四季扣還。以示體卹。○又諭。據巴爾品奏稱。勅書內有大同宣化二鎮。聽伊節制之語。請將應如何節制。及與督撫如何會辦之處。交部詳悉定議等語。從前令大同宣化二鎮。聽察哈爾都

統節制者。原因綏遠城將軍。有節制二鎮之例。新設察哈爾都統。駐劄張家口。與大同宣化。二鎮。駐劄地方。相距甚近。若倉卒有事。易於調遣。今已無事。徒存節制之名而已。所有二鎮事務。應呈報總督提督者。仍著照舊呈報。不必另行定議。○諭軍機大臣等。高晉奏。伏汎水勢情形一摺。所稱嗣後洪湖水長。即將清口東西壩。以次拆寬。此係遵朕今春諭旨辦理。但今夏黃水倒漾。勢又不同。此因江南雨澤較少。湖水不能盛旺所致。此時雖力量充足。可以敵黃。而黃流一經倒漾。流沙運河。即不無淤滯。朕意與其拆東西壩。莫若於天妃閘入運之水。相機多為節宣。令積淤盡滌。乃現在應行相機辦理者。可傳諭高晉。勘明實在情形。熟籌妥辦。總期運口淤沙。既毫無停壅。而湖水勢益暢流。庶為兩有裨益。所有應行啟閉事宜。著該督一面斟酌辦理。一面奏聞。○旌表守正被戕之浙江松陽縣民。

魏文瑞妻周氏。○戊午。以故四川建昌道屬下臨卡石土百戶納期弟林青扎什襲職。○己未。

上詣暢春園。問。

皇太后安。○庚申。諭各省漕糧。向例於交納正供外。每石有應交倉餘米。上年江蘇。浙江。各州縣中。有因秋雨過多。米粒潮潤者。旗丁兌運在途日久。不無折耗。若令照例交納。回空未免拮据。著加恩將松江九幫。浙江二十一幫。應交倉餘米。緩其交納。令於癸未年新運。一併帶交。俾回空旗丁等食用充裕。以示體卹。該部即遵諭行。○是月。江蘇巡撫陳宏謀奏。六塘河築隄。現已興工。臣在工所。督率道府分段查催。層土層礮。期於堅實。已完者發試。未完者趕築。七月內可竣。鹽河草壩。已開入海。尾閘通暢。駱湖之水。循河東流。可以容納。即或漲發。有隄足資捍禦。得旨欣慰。覽之。○江南河道總督高晉奏。清口東西壩口門。

秋汎後收窄時。層土層料。鑲壓堅實。方免蟄陷。拆寬時。廳營辦理不善。不能直拆到底。往往有名無實。且啓除剗挖。器具不利。臣飭廳營將所需鈎鑊斧鋤等器。另選鋒利重大者。備貯工所。今湖水遞長。已於六月十七日。週逾五壩水誌一尺。遵旨先將清口拆寬十丈。用新置各器。頗為得力。此後再看水勢。以次拆寬。得旨。近又有商酌運口之旨。總在汝相機辦理。毋拘泥也。○又奏。六月十七日。高堰

平水志卷五

五

一

五壩水誌。計逾一尺。已將東壩拆寬十丈。湖水連日遞長。二十二日。又逾水誌一尺。遵旨再將清口拆寬十丈。連前所拆。并舊存口門。共寬四十丈。湖水直抵惠濟祠後。會黃東注。宣洩甚暢。得旨甚好。天妃閘運口內。以下有淤淺否。或經清水刷深否。速奏來。○湖南巡撫馮鈐奏。前經奏准寶南局加鑄錢。以餘息充修益陽等十八處城工之用。近因礦廠開採年久。銅苗未能全旺。局內餘銅。僅敷本年

平水志卷五

五

一

加鑄。來年只供正卯。及撥協北省之用。若因加卯。又向別省採買。再加運費。則餘息無幾。計二十六年加鑄起。至本年底。可得鼓鑄餘息銀七萬四千餘兩。加司庫原存銅價砂稅等銀。共有銀十三萬二千餘兩。以之充修安仁。耒陽等十二處城垣。并茶陵等三處。護城隄岸。已足敷用。惟益陽。攸縣。平江。三處城工。需費無出。但俱在腹地。尚可稍緩修理。請將癸未年加卯。暫行停止。每年正鑄錢文。除搭放兵餉外。尚得餘息八千餘兩。連每年所收銅價砂稅銀一萬四千兩。積至四年。即可將益陽等三處城垣。陸續修整。從之。○河南巡撫胡寶瑤奏。夏間雨水過多。道塗間有積水。現嚴飭疏消。幸秋禾尚屬無礙。若此後多晴數日。使得豐收。各工次亦可無驟漲之虞。得旨。今京畿自六月十五晴定。想河南不致過慮矣。今若何。○山東巡撫阿爾泰奏。六月二十四日。衛河水陡長。又兼風浪震撼。搶衛

不及。德州衛民捻。衝汕二十餘丈。臣隨星赴漫溢之處查勘。高粱尚無妨礙。穀豆已被淹浸。現督同運河道。將漫口竭力搶修。得旨。其有成災者。善為撫卹。不可諱飾。○陝西巡撫鄂彌奏。西安各屬回民。素相聯絡。每恃心齊力衆。欺凌漢民。強橫無禮。盜竊公行。閭閻實受其害。偶有發覺。不過照常完結。甚且庸懦有司。遇回民相毆。未致傷命。遂不通報。以致養成兇橫。查回民聚族而居。各村必有教長。不無讀書明理之人。臣現將回民所犯各案。并治罪律例。刊刻告示。發交各村教長。令在教堂縣掛。并責成教長。如遇種種不法。能先期首報。按次優賞。若徇隱不舉。先將教長治罪。至此等兇頑。惟有從嚴懲辦。若有司匿不通報。從嚴叅處。得旨。甚是。然應為之以徐。而持之以久。不可操切欲速。

平定回疆方略卷五

五

大清高宗法天隆運至誠先覺體元立極敷文奮武孝慈神聖純皇帝實錄卷之六百六十五

實錄卷之六百六十五

六

大清高宗法天隆運至誠先覺體元立極敷文奮武孝慈神聖純皇帝實錄卷之六百六十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午秋七月辛酉朔享

太廟遣和親王弘晝恭代行禮○

上詣

安佑宮行禮○諭軍機大臣等託庸奏含山縣

丐僧道省用符咒叫人生魂並續獲李文顯

等現在嚴審究擬示諭沿江地面來往客商

不准單身雇船等語所辦雖是於事理尚有

未盡地方遇有此種蠱毒魘魅邪術害人者

自應密速躡拏黨惡并嚴究符咒來歷傳自

何人按律盡法懲治以靖地方然辦理自當

鎮靜詳慎若概於所屬責令保甲出結並示

諭客商人等不得隻身雇船未免迹涉矜張

無識愚民不知事理緣由轉因此易生疑惑

亦恐惡犯聞風潛竄且使商旅阻滯不前殊

非戢匪安良之道著傳諭該撫令其嚴密根

究務盡根株毋庸徒事張皇或滋紛擾○豁

免江蘇靖江縣乾隆二十五、二十六年分坍

沒折實平田七百三十頃有奇額賦○壬戌

諭軍機大臣等朝鮮國民由何處

進邊三水府之嘉義普正地方係屬何省無

憑可查等語前禮部奏朝鮮國咨稱逃人越

境一事即傳諭盛京吉林將軍等嚴查嗣據

恒祿奏三水府嘉義普正與盛京所屬地方

相值等語恐伊等察勘未周因諭朝銓詳查

今覽朝銓所奏復互相推諉朝鮮邊境與盛

京吉林接壤不出於彼即出於此況朝鮮咨

文內稱有三水府嘉義普正奸民沿海滋事

看來朝鮮民人過江即入嘉義普正其地與

盛京相值。即盛京所屬。與吉林相值。即吉林所屬。有何難查之處。而乃彼此推諉。惡習相沿如此。試思今縱查出。不過得失察之咎耳。因避小處分。而隱匿欺罔。致干大戾。孰輕孰重。伊等何不知之。此事雖小。不可不明白查辦。著交恒祿布顏達賴。伊二人親赴朝鮮邊境。詳加查勘具奏。朝鮮國逃人李元三。現在境內與否。飭地方官嚴行緝捕。此案盛京吉林將軍等。雖未奏聞。曾否報部之處。亦著查明具奏。○軍機大臣等議准。喀什噶爾辦事尚書永貴等奏稱。哈密回人頗知守法。前派輪班辦事之理藩院司官筆帖式冗員應裁從之。○旌表守正捐軀之山東堂邑縣民姜義泗妻丁氏。○癸亥。

上御勤政殿聽政。○諭。豫東等省麥豆俱已陸續運京。交與五城米廠平糶。原派之侍郎觀保。隨駕木蘭。錢汝誠現在出差。所有監糶事務。著派蔡鴻業羅源漢接辦。米廠一應事宜。

俱關涉戶部。著派李侍堯綜覈查辦。但戶部事繁。李侍堯不必時常赴廠。○蠲免安徽壽州。鳳臺。鳳陽。懷遠。靈璧。阜陽。潁上。亳州。太和。泗州。盱眙。天長。五河。鳳陽。長淮。泗州等十六州。縣衛乾隆二十六年被水田地二萬五千三百九十六頃有奇額賦。○甲子。

上詣暢春園。問。

皇太后安。○還宮。○諭。前降旨將八旗官員所有應扣應罰俸銀等項俱已加恩展扣。俾得

按數全支。第念領俸之期。應在八月初旬。為時尚早。再著加恩。令將應支本年秋季俸銀俸米均改於七月十五日起。即行支放。所有滿漢大臣官員俸給俱一體早放。以資接濟。該部遵諭速行。○以陝西潼關協副將福寧為延綏鎮總兵。○乙丑。

上御太和殿視朝。文武陞轉各官謝恩。○辛酉。明園。○諭。前因直隸夏間雨水稍多。低窪地畝不無積水被災之處。已疊經降旨截留漕

糧三十萬石。以資撥用。第念豫籌米石。不妨寬裕存貯。庶為有備無患。著加恩於北倉再行截漕二十萬石。倘各幫現在俱過天津。著該督方觀承。即就天津以北附近水次地方。酌量截留。該部遵諭速行。並傳諭漕運總督楊錫紱知之。○丙寅。諭軍機大臣等。前因京師豆價昂貴。曾經降旨。令於山東奉天二省。各購買五萬石運京備用。豫省亦係產豆之鄉。因該省去歲收成稍歉。是以未令買運。今據胡寶瑤奏。今年入秋以來。早穀登場。糧價平減。該省所產豆石。自必豐裕。著傳諭胡寶瑤。令於各屬產豆州縣。購買五萬石。由運河解京。但須酌量地方情形。妥協採買。不必勉強從事。仍一面與倉場侍郎等知會辦理。○直隸總督方觀承奏。正定鎮總兵楊朝棟稟報。六月二十六日。兵丁朱得名。拾獲紙包。內有字帖。言詞悖逆。紙尾開有姓名住址者十一人。雜見逆詞內。有姓名無住址者三十一

人等語。當令廣平府周元理。正定府鄭大進。鞠訊拾獲情由。一面委按察使王檢清。河道揆義密訪查拏。臣即日起身赴清河迎駕。得旨。卿宜速回辦理此案。仍將逆詞呈覽。豫備差務。可委觀音保。王檢亦即帶回審事。又諭軍機大臣等。今日方觀承所奏正定府奸民妄言一案。已即於摺內批發矣。著再傳諭該督。可即率同臬司王檢前往。上緊查辦。如有應至永平府查問者。即就便往查。至其逆詞未據進呈。並著速行封奏。○以御史羅典。為河南鄉試正考官。編修王中孚為副考官。編修諸重光。為山東鄉試正考官。編修衛肅。為副考官。編修施培應。為山西鄉試正考官。編修沈業富。為副考官。○丁卯。諭奉天直隸海船往來運販米豆雜糧。向有例禁。今夏近京一帶。雨水過多。市價未免稍昂。而奉屬連年豐稔。若令商販流通於小民生計。甚有裨益。著暫開海禁一年。俟明歲秋收後。再行停止。

至商販船隻出入應行驗票稽查其由京往奉省者令於步軍統領衙門給票由各州縣往奉省京者於奉天將軍衙門給票各州縣往奉省者於直隸總督衙門給票庶彼此察覈有憑可杜冒濫諸弊著直隸總督奉天將軍府尹會同酌定章程妥協經理○諭軍機大臣等熊學鵬奏從前隨德保顧汝修往封安南之官兵役人等所得該國程儀概行追繳發還一摺所請不免過當朕前降旨令將該國

程儀發還向後著例永行停止者原以崇朝制而示遠人專為使臣而言若隨往微末人等即該國沿例稍有餽犒於大體無甚關係非持節專員可比必於事後斤斤置論不已所見轉為瑣細著傳諭該撫此時竟可置之不問無庸逐一先發後追以滋紛擾即將來再遇遣使時除正副使臣外其餘隨從人等固不當恣其設法需索亦不必有意過事吹求庶事理輕重有衡亦不為已甚之一端也

可將此詳諭知之○軍機大臣等議覆察哈爾八旗都統巴爾品等奏稱鑲黃正黃二旗各牧廠虧缺牛羊額數應著落該管各員賠補其無力之一百四人將伊等所食之餉酌借買補俟扣完日議罪至護軍校兼牧長噶勒桑吹喇什所管十廠虧缺尤多請將伊二人并妻子發往伊犁給厄魯特為奴此十廠所剩羊隻歸別廠看守俟補足後再設牧廠均應如所奏從之○戊辰

上以秋獮木蘭奉

皇太后自圓明園啟鑾○詣

皇太后行宮問安○諭朕巡幸木蘭向來恩免所過地方錢糧十分之三此次沿途省覽見今夏雨水過多之處田禾分數歉薄所有經過地方本年地丁錢糧著加恩蠲免十分之五以示優卹○又諭前因天津地勢低窪雨多積水柴米價值未免稍昂兵丁買食維艱曾降旨將存津左右城守三營馬步守各兵

每名借給米一石。因思該處滿洲駐防兵丁口食自亦拮据。並著加恩。每名借給餉米一季。亦於明年應得餉米內分作四季扣還。以示體卹。○以陝西延綏鎮總兵定柱署鑲白旗蒙古副都統。○是日駐蹕南石槽行宮。○已巳工部議准。江南河道總督高晉奏稱。運河廳屬王家溝開座坍卸。應於舊開迤上五十丈地方改建三孔石閘一座。從之。○陝甘總督楊應琚奏。安西兵移駐烏魯木齊。酌分五起。第一起定於九月初二日起程。間日一行。報聞。○是日駐蹕密雲縣行宮。○庚午孝懿仁皇后忌辰。遣官祭景陵。○上詣皇太后行宮問安。○是日駐蹕要亭行宮。○辛未諭軍機大臣等。阿桂奏稱。新疆所駐索倫察哈爾官兵。現在阿克蘇以西。今因換班撤回。索倫兵過烏里雅蘇台。察哈爾兵過烏魯

木齊各歸游牧。甚近。應令其先至伊犁。由邊外轉回。即末隊稍值冬寒。亦可在伊犁度歲。等語。所見甚是。撤回兵丁。非派出征勦者可。比惟視其行走便利。方為有益。且更代兵丁。亦係緩行。則撤回者。不妨在伊犁少為休息。於來年二三月遣回游牧。著傳諭永貴。楊應琚遵照辦理。○又諭曰。方觀承奏。司道等訊問兵丁朱得名拾獲逆詞緣由。該兵丁堅供實不知情。現與拏獲人犯一併收禁。覆訊等語。造作逆詞。棄擲道旁。多係奸民陷害仇家。所為兵丁朱得名拾獲首報。或係實不知情。亦未可定。據奏逆詞內書寫各犯姓名住址。別字甚多。看來必係粗知字畫。不曉文理之人。從此根究。凡平日間稍識字迹。而不安本分者。留心密訪。庶可得其端倪。至封口印信。既係僧道符籙。並有天齊廟等字樣。亦正可因此尋訪蹤跡。務在緝獲正犯。毋使漏網。若現在牽涉有名之人。如果實係誣陷。毫不知

情。自不當輟轉根究。株累無辜。總在該督悉心查究。迅速妥辦。可將此傳諭方觀承知之。

○是日駐蹕兩間房行宮。○壬申上詣

皇太后行宮問安。○諭向來文武各員在任在差病故者。俱按其品級給與夫馬船隻資送回籍。其雲貴川廣等遠省微末員弁亦定有資給之例。以示優卹。因思哈密巴里坤以外新疆廣濶。官吏日增。文武員弁之屯駐其地者。較雲貴等省更為遙遠。如遇在任在差病故之員。尚未設有資送回籍之條。深堪憫惻。嗣後新疆各處辦事人員。設有病故等事。俱著照雲貴川廣之例一體支給夫馬。如未設夫馬之區。即按程折給。聽其自辦。該部即遵諭行。○又諭曰。段起賢著來京陛見。其廣西左江鎮總兵員缺著蔡卜年補授。○諭軍機大臣等。各省首領佐雜等官。歷俸已滿六年者。該督撫調取驗看。分別革留。咨部彙題。向

例因仍已久。今據蘇昌等奏稱將廣東省已滿六年之首領佐雜等各員照例分別一面具奏一面咨部。此外未滿六年人員內有年力就衰不堪供職者。現在咨部勒休未便因有六年甄別之例稍為姑息等語。蘇昌等所辦甚是。各省督撫何未如此奏聞耶。首領佐雜等員職分雖屬卑微而佐治臨民亦有地方之責。若拘於成例遇有怠惰偷安衰庸不職之員必待六年俸滿始行考覈甄別則此六年中因循姑息貽誤正復不少。嗣後凡佐貳雜職等官已滿六年者照例咨部外仍著專摺具奏其未滿六年實不可姑容者並著隨時咨革。照蘇昌彙奏之例辦理可於各督撫奏事之便傳諭知之。○直隸總督方觀承奏逆詞案犯已獲李朝界王成龍王思公關祿曹寬閔發六人由此根究首惡當即就擒將來獲犯審實之日請欽派大臣監看行刑得旨不必派人前往卿自盡法處置可也又

諭軍機大臣等。昨方觀承奏到。正定兵丁拾獲逆詞一摺。未見逆詞。祇以為或係捏造。陷人。如指稱馬朝柱散布匿名帖之類。是以照摺內情節。傳諭該督查辦。今閱所進逆詞。乃橫肆狂悖。從來未有大逆之尤。看來傳播確有其人。並非造詞嫁禍他人之案。該督既經見逆詞。宜當即推究其理。於拾獲兵丁。更復何涉。何以不一體會。輒即加之刑訊也。現在捕獲已有六人。自可按其端緒。並文義印封。

蹤跡逐一嚴行搜查追究。必得首逆黨羽。當照今夏辦理逆民之案。盡法處治。毋令稍稽顯戮。方為允協。再詞內有四月十五出令五月端陽聚會之語。按其時。正當前此逆犯劉起鳳肆橫治罪之際。則該犯必係此案黨惡之人。而蠡縣又與該處壤地相接。此皆朕審度而得者。該督從此悉心體勘。尤易得其端倪。至該兵以檢呈逆詞。此案實係因之而發。乃轉罹刑訊。固由審官粗率所致。而其屈抑

之情。亦可憫念。並令該督酌賞銀二三十兩。量拔外委等官。以示優卹。再昨發硃點名單。以其別字錯出。因批示該督查究。尚應隨摺附奏。以便檢覈。餘已於摺內批諭矣。○又奏逆詞內首先開出之王太尹文英高得貴三犯。現俱拏獲。據供有彭城鎮李懷林。閆景成。慣造匿名歌詞。或挾仇陷害等語。隨添派標員速拏務獲。訊供具奏。得旨。此事似近然總宜詳盡真情。不可有就案了事之心。夫以懷恨平人而忍心為大逆不道之言。為人臣者。宜何如視之。尚可存他計慮乎。又諭軍機大臣等。今日方觀承奏查獲逆詞案內六人一摺。即有旨傳諭該督嚴速辦理。封發後。復據奏到。訊出彭城鎮李懷林。閆景成與案犯王太等素有嫌怨情節。其事諒屬近似。已於摺內詳悉批示。此等非常大逆。從來未有。凡為臣子。無不髮指。該督自當屏去成心。悉力根究。盡法治罪。毋令首從各犯稍有漏網。至所

奏逆詞。凡有人心。不忍寓目。已令軍機大臣
燒燬。所存印跡及附印年月姓名趙李字樣
大小具在。可即封寄該督。覈對筆跡。以成信
據。○又諭曰。方觀承奏到。正定府兵丁拾獲
逆詞一案。已諭該督迅即嚴行根究。並據現
在查拏。獲有六人。可以逐一窮治矣。但閱詞
內有清茶教字樣。及做買做賣。人不見與到
北京之語。此等大逆肆惡。多係樹立會教。散
布謠言。其間不無先遣黨羽。於近京地方潛
行鼓煽情事。可密諭舒赫德。令其悉心設法
躡訪根究。俾逆犯即行就獲。以正典刑。雖此
案罪大惡極。更尚非前此胡二引進等專用
邪教惑人可比。然因此等在近京設教聚會
之類。詳細體察。未必不可得其端緒。著將原
詞一紙。并密寄舒赫德。使知就中蹤跡。以便
尋蹤接緝。看畢。即行燒燬。毋涉張皇。毋稍疎
懈。一面即行嚴速查辦。○又諭今日方觀承
奏查獲逆詞案犯一摺。即有旨密諭舒赫德

頃復據該督奏到。訊出李懷林父子。與案內
王太等。素有嫌怨情節。已諭該督實力根求。
盡法治罪。可將此摺及硃批。一併鈔寄舒赫
德閱看。俾尋蹤體訪。更得其詳。而支流餘孽。
間有竄跡別處者。亦可務盡根株也。○是日
駐蹕常山峪行宮。○癸酉。諭軍機大臣等。昨
方觀承奏。王太等供出彭城鎮李懷林。閻景
成。素行奸惡。慣造匿名歌詞。且與伊等素有
嫌怨情節。但思李懷林居住磁州。既欲造詞
陷害。何不即於本處附近地方傳播。而必遠
赴正定拋擲。此中情事。殊不可曉。其或遣人
潛投。或正定本有逆黨散布。均須悉心研究。
務在情真事確。勿得稍存遷就。了案之見。著
將此傳諭該督。並將前此批諭。節次逐一根
求。慎勿稍有疎漏。將正犯即委妥員。解至行
在軍機處。○又諭曰。永德在烏魯木齊有年。
著派訥蘇懇往代。永德即著來京。○軍機大
臣等議覆。陝甘總督楊應琚等奏辦沙州一

帶移設事宜。據稱沙州在安西府西南二百餘里。氣局團聚。土沃產饒。其地利形勢。非安西可比。查自肅州出關至玉門縣屬之靖逆營。即係分途前往安西沙州之總路。由靖逆自沙州抵哈密。較之靖逆歷安西至哈密。實近一百六十里。且水草豐裕。道路平坦。應請令安西知府帶同經歷教授俱移駐沙州。酌議靖逆以西沙州以東。於八道溝充葫蘆武布忒沙撓絲兔樹溝沙州共設軍臺六處。沙州以西至哈密。於可可沙石青墩硤井子博羅特口大泉酤水。喀什布拉克柳樹泉共設軍臺七處。統計移設軍臺十三處。較行走安西計少軍臺一處。應裁塘遞馬二十六匹。第自沙州至可可沙石之八十三里中。有砂磧三十五里。恐馬力不繼。應於適中之黃墩堡設腰站。又自酤水至喀什布拉克一百三十里。亦應於適中之紅柳硤設腰站。除以天生墩腰站原設馬騾移撥外。尚應安設馬五匹。即於

應裁塘馬內酌撥等語。均應如所請。從之。○是日駐蹕喀喇河屯行宮。○甲戌上詣

皇太后行宮問安。○哈薩克汗阿布賚遣陪臣蘇勒統都勒特克呼等入覲。○兵部奏山東省各營錢糧馬匹年終一併保題。查各直省於年底將存貯軍器取結保題。其經管錢糧馬匹向未開載。請嗣後俱照山東省一體辦理。從之。○旌表守正捐軀之河南新野縣民張希勝媳信氏。○是日駐蹕避暑山莊。翼日如之。○乙亥中元節遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○諭軍機大臣等方觀承奏訊明逆犯李懷林等供詞確鑿一摺其造詞狂逆情事已無疑義案內所有逆黨人等自應盡法治罪以正刑章至首犯罪惡貫盈前已有旨令於質審定案之日即行解交行在軍機大臣辦理今該犯年逾七十該督遵員押解在途尤宜從容妥協毋得以催趨約束過急以致道斃倖逃顯戮也前降諭旨已詳該督可即遵照妥辦將此傳諭方觀承知之○又諭前因方觀承摺奏逆詞案內有清茶教及買賣到北京字樣是以傳諭舒赫德令於近京地方悉心設法躡訪根究今方觀承奏到究出正犯李懷林等訊供明確現在定案治罪可傳諭舒赫德無庸復於京城附近尋緝查辦致衆人觀聽生疑也○又諭曰永貴等奏稱額德格訥阿濟畢所屬鄂斯等

處為額爾德尼占據親來懇請遣使持書往諭因酌給印文令其自行傳送等語額爾德尼自恃力強侵擾鄰部若將額德格訥所屬占據不還未免滋事永貴等措詞未為嚴厲伊等豈能警動此時額爾德尼若將所據之地給回固善如稍涉游移永貴等即派幹員諭以致書係我等私意欲保全爾等游牧尚未陳奏今欲視為無足重輕則當奏聞請旨夫以強凌弱乃大皇帝所深惡萬一天威不測命我等興師問罪雖後悔無及矣似此剋切曉示伊等自必信從所遣使人歸日即將該部落情形具奏○又諭自達什達瓦屬人移駐熱河牧養為生去年因滋生牲隻不敷加恩賞給羊三千隻近日伊等生計較前頗有起色若再加恩賞賚則更當饒裕著傳諭巴爾品於牧廠內挑揀羊三千隻解送熱河交副都統額勒登額分給厄魯特三旗

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十六

中集卷六十六

圭

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十七

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午七月丙子

上奉

皇太后自避暑山莊啟鑒幸木蘭。○詣

皇太后行宮問安。○是日駐蹕中關行宮。○丁

丑諭軍機大臣等海明奏稱員外郎夔舒在新

疆行走四年本年十一月又一年屆滿主

事七十一等從乾隆二十五年正月扣至本

年十二月亦滿三年請豫派人員更換等語

夔舒已滿四年自應更換至七十一等又何

必亟為奏請派遣伊等辦事特予以奮勉之

路以臣僕之義論之。雖多駐一二年。本情理之常。原不必計算年限。即限年更換。亦必計其任事之日月。乃并奉派起程之時。俱行算入。則往還即滿三年。又何暇辦理公事。若司員等有意請求。即係顧戀私家。不知大體。或大臣等為之陳奏。更屬沽名邀譽。致長澆風。甚覺紕繆。著傳諭各該駐劄大臣等。凡派出人員。必任事三年。再行奏請更換。不得似此豫行具奏。○吏部議准。山西按察使梁肅鴻奏稱。近見辦理盜案。率多遲延。請嗣後盜犯到案。供確贓明。無論首從緝獲幾名。即以前案日起限。不得俟續獲始行起限。亦不得以逸犯無獲。就現犯審結日起限。若承審期內。遇有續獲之犯。在五個月限內。即一併審擬。毋庸展限在限外。另行完結。稽延照例叅處從之。○是日。駐蹕波羅河屯行宮。○戊寅。

上詣

皇太后行宮問安。○諭軍機大臣等。永寧在巴

里坤和其衷在阿克蘇辦事均逾三年。著德福往代和其衷。鍾音往代永寧。曹瑛仍回西安副都統任。其協辦伊犁事務著伍彌泰前往。○是日。駐蹕濟爾哈朗圖行宮。○已卯。諭軍機大臣等。據胡寶瑒奏。拏獲逆詞案內孫耀宗一犯。并搜出逆書一本。現已解直併案審結一摺。前因方觀承奏。究出係李懷林所為逆詞。跡涉挾仇誣陷。自當將正犯研訊確實。明正刑章。其砌害無辜多人。原可概置不問。今豫省拏獲之孫耀宗。即係單內有名之人。使其果無悖逆情節。自當予豁。乃豫省從該犯家內查檢。已得逆書。則其他名列逆詞者。顯有立教聚眾情事。斷非無因構陷。盡屬子虛之理。該督前於王太尹文英高得貴等。但據供挾嫌起釁。未及詳悉研訊。安知非本屬逆黨。另有別項情節。因而攻擊敗露。抑或逆犯以一人承當。冀救其餘黨耶。可見此等喪心狂悖之尤。人世所不容。是以王太等即

能狡詞詭脫。或將家存字跡。先行消滅。而不能禁別處之不發覺。追求也。今逆詞既經查出。該督即應徹底根究。斷不可謂首犯既得。罪有攸歸。稍存一就案完案之心。轉使邪教蔓延。所貽害於地方者。更大。況豫晉二省。皆有案內之犯。現已傳諭明德。胡寶琮等實力緝拏。如更有夥黨。決不能倖逃法網。該督此時縱欲將就了事。又安能保餘黨之不由他省供首而出。豈不大可畏乎。總之此等邪教逆案。一有蹤跡。務令絕其根株。稍涉遷就。則屈法適以養奸。大非辟以止辟之義。此案除李懷林一犯。仍即速行解交行在外。其王太等各犯。可將孫耀宗一節。加緊質訊。即重以嚴刑訊問。亦案情理當如此。並非事外苛求。一有定供。亦陸續解來候審。所有逆詞。著一併封寄。令其逐一嚴審具奏。○又諭前正定兵丁拾獲逆詞一案。先令舒赫德於近京地方。設法躡訪。續據方觀承奏到。此案實係李

懷林等挾仇誣陷。是以復經傳諭。無庸再行查辦。今日胡寶琮摺奏查獲案內有名孫耀宗一犯。現在搜出逆詞一本。且據供出皇天道收元教。種種名色。且流傳豫晉二省。則是李懷林詞內牽涉多人。非出無因。而邪教輾轉煽惑。已確有明證矣。近京一帶地方。又安保無惡黨潛蹤竄跡之事。著傳諭舒赫德。令其仍遵初次所降諭旨。悉心密訪嚴查。無得稍有疎懈。○又諭曰。胡寶琮奏拏獲逆詞案犯孫耀宗。并搜有逆詞一摺。此案在直隸初審時。跡涉奸民挾仇誣害。所列姓名。其人似屬無辜。既經方觀承將正犯李懷林拏獲。自可定案治罪。今據該撫所獲孫耀宗一犯。現已搜得逆詞。並供出夥黨。歷歷有人。則是該犯並非為李懷林誣扳。其平日立教聚會。實有逆惡明徵。而舉一以例其餘。凡逆單內有名者。並非受誣株累可知。已有旨令方觀承逐一詳細研究。無令稍有漏網。並令明德將

在晉省人犯。按名查捕矣。可見此等喪心惡逆之徒。肆行鼓煽。在直隸雖未訊出端倪。而他處亦必敗露。其事為人世所不容。封疆大臣。尤當執法。實力辦理。不得存遷就完案之見。養奸民而貽世害也。著傳諭胡寶琛將供內有名各犯。速行躡緝。務獲。先行取供。奏聞。一面即解直審擬。諒勿以事關兩省。稍存歧視也。○又諭曰。明德奏。親往高平縣搜拏直省逆詞案犯李真祖一摺。同日適據胡寶琛

奏到。拏獲此案人犯孫耀宗。搜有逆詞。並供出皇天道。收元教等名目。其事起自山西長子縣壬戌年。曾將教首張金斗正法。田金台孫耀宗。擬徒。而該犯仍於前此犯案陳武家鈔得此書。可見當時不過就案完案。而餘犯竟多開脫。是以根株未盡。芽孽又生。非封疆大臣實力安靖地方之道也。此案狂悖肆惡。迴非尋常逆案可比。著傳諭明德將李真祖嚴拏務獲外。並密將長子縣屬前後邪教黨

羽。徹底悉心根究。毋稍顛預了事。○軍機大臣等議覆。喀什噶爾辦事尚書永貴奏。稱伯什克勒木官田。招貧苦回民耕種。交納騰格錢。應如所請。至數年後。地畝全行耕種。或交納糧石。或增加騰格。應令永貴等屆期籌定具奏。從之。○是日。駐蹕阿穆呼朗圖行宮。○庚辰。

上詣

皇太后行幄問安。○行圍。○諭軍機大臣等。方

觀承奏。審孫耀宗一犯。與李懷林另案歸結一摺。意存遷就。希圖完案。所見大非。已於摺內詳悉批示矣。孫耀宗係李懷林軍內有名之犯。且查出逆書。則其為李懷林案內黨惡。要犯無疑。正當歸併。詳細審訊。以究根株。乃該督轉據閭景成供詞。謂該犯避仇遠出。實不知情。遂謂與本案毫無關涉。殊不思果係實不知情。何以藏帶逆書。安知非李懷林指使散布。糾合黨與者乎。夫以現獲有據要犯。

尚欲分案辦理其餘未獲各犯必將潛為消弭試思如此逆案僅將一垂死之李懷林承當了事該督自問於心安乎再同名之王成龍據奏令其指認彼此不識等語此亦未可憑信現在閔景成已有意開脫孫耀宗安知李懷林非故為詭詐救其餘黨乎總之該督遵照屢降諭旨悉心嚴鞫斷不可少存將就了事之心負朕委任本意况李懷林等二犯另有旨速解行在該督此時如不實力嚴究或解到時究出端緒或別由豫晉二省發露恐該督難以承當也○是日駐蹕布克大營○辛巳

上行圍○諭軍機大臣等河南拏獲逆犯孫耀宗歸併於李懷林案內審鞫昨已有旨詳諭該督矣細思此案情節孫耀宗一犯據該督奏稱該犯於乾隆十六年即因畏避閔景成他往其移住臨漳亦已兩年有餘等語若李懷林不過為王太等欲錢起釁即極其誣陷

之情不過王太尹文英高得貴三人而已何至無端將離家十餘年之人填砌姓名若云與孫耀宗有仇又何必牽連王太等今既並列單內王太等雖無悖逆蹤跡孫耀宗則果藏有逆書其為一案人犯斷無可疑該督所奏另案辦理之處愈覺非是著再傳諭方觀承令其悉心體察務在得其真情勿得任奸黨狡供朦混以致仍涉含糊也所有現在審訊各犯情節並著速行奏聞○大學士九卿等議覆御史紀復亨奏綠營世職其祖父襲過子孫現尚未襲者查明實係嫡派取結送部承襲已襲之員限一月內取具宗譜送部如有從前承襲時影射頂冒等弊准其自首免罪應如所請從之○吏部議河南衛輝府通判張任革婪索案內失察之原任布政使蘇崇阿等應照例降調得旨依議此等失察屬員之案事近因公其人平日材堪稱職者朕多酌量從寬留任本案失察之宋邦綏永

泰向來辦事尚知勉勵。即無加級抵銷。亦當
加恩留任。至嚴有禧。蔣嘉年在臬司中。不獨
循分供職。且係尸位素餐之員。非宋邦綏等
可比。宋邦綏著銷去加二級。永泰著銷去紀
錄八次。俱免其降調。嚴有禧著降二級調用。
蔣嘉年著銷去加一級。仍降一級調用。此朕
因材甄別。辦理並非行圍在途。竟照發進止
者。其因失察屬員婪贓。不行揭報。議以降調
之圖桑阿。詢問新柱等如何奮勉之處。奏聞
到日。再降諭旨。○戶部議准前署貴州巡撫
吳達善疏稱。都勻縣永勝坡鉛廠出鉛有限。
請封閉從之。○以故鄂爾多斯扎薩克一等
台吉衮布喇什子旺扎勒車布登多爾濟襲
職。○是日駐蹕巴顏陀羅海大營。○壬午
上詣

皇太后行幄問安。○行圍。○吏部議准貴州布
政使亢保奏稱。布政使庫大使鹽場大使。例
不迴避本省。但恐日久不無弊竇。請照地方

官例迴避從之。○是日駐蹕哈里雅爾昂阿
大營。○癸未

上行圍。○以山西歸綏道五訥璽為湖南按察
使。山西平陽府知府秦勇均為陝西按察使。
○是日駐蹕濟林烏里雅蘇大營。○甲申
上詣

皇太后行幄問安。○行圍。○諭軍機大臣等。淑
寶在哈密辦事已逾三年。著楊應琚於陝甘
道員內揀選一員。前往辦事。淑寶即著來京。

○又諭索倫馬匹前經出兵乘騎。及每年倒
斃。現在牧養甚少。於伊等生計恐有妨礙。應
為之籌畫。今官牧羣內馬駒充足。著加恩借
給索倫兵糧二千分。即以馬匹撥給於伊等。
應支餉項內酌定年限扣還。至索倫地方滋
生馬匹。以何種為宜。需得若干。匹始能敷用。
著傳諭綽勒多會同各城副都統定議具奏。
再黑龍江並無滋生牧廠。今若於官牧羣內
撥往數千匹。在彼設廠派餘丁牧放。每年將

滋生之馬選擇佳者解送京師餘即留於彼處則索倫牧養日蕃於伊等生計大有裨益著傳諭綽勒多若能辦理甚妥或勢有不能亦無庸勉強旌表守正捐軀之廣東開平縣民戚欽源妻梁氏是日駐蹕齊爾伯庫昂阿大營○乙酉

上行圍○諭曰刑部定擬徐可鳳因姦威逼人致死案內將姦婦趙氏僅照尋常軍民相姦律擬杖的決此但知墨守成例而不為原情定罪於倫常風化殊有關係趙氏先與徐可鳳通姦廉恥已喪乃以伊媳任氏礙眼復囑徐可鳳并姦任氏致氏投井身死是平日不能正身以率其媳其大虧姑道已不待言甚至計圖抑媳同陷邪淫以恣其欲則其喪人心而壞風俗實為從來姦案所希有非重加創懲何以維持名教著該部將徐可鳳按律治罪外所有犯婦趙氏另行準律揆情從重定擬具奏○又諭曰伊柱補放副都統後頗

覺自滿不知奮勉著革去副都統作為二等侍衛以觀後效○諭軍機大臣等方觀承查奏奉恩將軍阿朗阿於三月間因患病留住灤州莊頭席恕家至閏五月起身出關一摺此僅據支吾一面之詞並未飭屬確查於情理尚未能得實阿朗阿果係患病留滯在內即應呈明宗人府本旗在外知會盛京衙門而灤州亦當自有報案豈有各處皆無證據直至逾限已久竟自潛行出關之理或係因自己莊頭家內可以任意久住以致游蕩逗遛並囑莊頭捏稱患病亦未可定在莊頭為阿朗阿家奴阿朗阿居住伊家雖外貌將順料非其心之所願其中情事詢問莊頭必能得其確實該州為通水道所轄著傳諭方觀承可即委該道明琦前往詳悉查明具奏尋奏阿朗阿因病留滯經通水道明琦親往查明並無游蕩別情但逾限不報實屬違例得旨該衙門嚴察議奏○又諭曰方觀承奏究

訊逆犯孫耀宗夥黨李朝界等各犯一摺始
終欲以逆黨邪教判為兩案歸結殊屬迴護
孫耀宗之敗露並不先發於邪教而發於李
懷林逆詞名單之內自胡寶琛接咨查拏始
鈔出該犯邪教字書則其為李懷林黨惡更
無疑義今由該犯查出夥黨姓名若李朝界
李美馮玉成關祿閻發閻悅曹寬等又即係
李懷林軍內所有倘非與李懷林聲息相通
安能一一昭合若此即先已到案之王太等
獨非列名逆單者乎乃該督不能謂李朝界
等非原軍有名之人而於王太等則堅執為
挾嫌被誣之犯竟據該犯等前此避罪狡脫
之供並不實力究詰於情理甚不可解蓋由
該督前此摺奏欲以李懷林耄年將斃之一
犯完結重案而於案內各犯或指為被誣開
釋又分出邪教一案可以別為枝節籠統了
事此乃該督豫存迴護成見執而不化是以
前後如出一轍自相矛盾若此豈封疆大臣

執法鋤奸之道乎此案方觀承不能審明矣
著將孫耀宗供出各犯並王太等皆帶至行
在究問實在情節定案該督遵諭速行是
日駐蹕僧機圖大營○丙戌

上詣

皇太后行幄問安○行圍○諭曰英泰在鑲藍
旗蒙古副都統任內多年失察額爾奇木等
冒領滋生銀兩著照部議革職天津都統員
缺著清保補授正白旗漢軍都統事務著如

松署理○是日駐蹕安巴完和羅昂阿大營

○丁亥

上行圍○賜扈從王公大臣及蒙古王公台吉
等食○是日駐蹕伊綿和羅昂阿大營○戊
子

上行圍○軍機大臣等奏遵議各處撤回兵丁
應給口糧請照從前北路撤回兵丁之例給
與其由口外行走者如遇嚴寒不能前進計
其過冬日期量予接濟從之○是日駐蹕扎

克丹鄂佛囉大營（己丑）

上詣

皇太后行幄問安（行圍）是日駐蹕巴顏溝

西大營（庚寅）

上行圍（諭軍機大臣等近將軍功人員交部覈對功牌賞給世職因三等侍衛扎奇勒圖阿勒丹察等功次平常未經議給此二人在兆惠軍前殊屬奮勉而出入重圍冒險請援尤為勞績懋著雖伊等得官後功牌較少而

前在兵丁分內所得之功牌甚多足以相抵自應格外加恩扎奇勒圖阿勒丹察著授為二等侍衛賞給騎都尉令伊等本身隨帶（戶部議覆陝西巡撫鄂弼奏稱督撫藩臬設有養廉原以供養贍家口之需無庸復給家口隨糧應如所奏各省督撫藩臬衙門凡有額設家口親隨馬匹餉乾等款概行裁汰所裁餉乾銀兩撥充兵餉本色糧料勻給綠旗營至督撫衙門筆帖式俸廉微薄其家口隨

糧請留給之處亦應如所奏從之（禮部奏覆童生例由縣府試後彙送學政如不由府州縣正考直至學政考棚捏稱患病遊學請補考者概不准收至考試首嚴匿喪若於府縣考時未經服闋即係不應考試之人亦不得於學政按臨時補送從之○是日駐蹕鄂爾楚克哈達大營○是月盛京刑部侍郎署將軍事朝銓奏盛京所屬海口商船雲集於民用有裨惟該地方旗民官員均有稽察盤驗之責若勒索留難勢必擾累查錦州蓋州牛莊等處海口均有副都統管理三處請即交各該副都統稽察倘有情弊即咨叅究治該副都統等或任地方官欺隱朦混一併叅處得旨如所議行（直隸總督方觀承奏臣節次欽奉諭旨查李閏二犯原與孫耀宗熟識又據閏景成供出王太假託孤仙為人治病誠如諭旨原非無因構陷李懷林孫耀宗案內各犯彼此糾連仍係一案現在悉心研

勦。頗得其情。得旨。如何。若非朕屢次嚴旨。汝竟將王太出脫矣。再深究。必更有別故。總將各犯分別帶來會同行。在大臣等嚴審。為是。

○陝西巡撫鄂弼奏。乾隆二十一二十五兩年清查各旗分。應行出旗為民戶口。至今六年間。出缺裁汰官兵二百五十餘員名。尚未裁汰者一千二百五十餘員名。且彼時幼丁俱成壯丁。仍住滿洲城度日者。共有一千七百九十九名。旗人實多重累。查綏遠城右衛駐兵有移往綠營食糧之例。請將西安現應出旗之壯丁挑驗於省城督撫標及近省之提鎮各營步守兵缺出與綠營餘丁間補至。現在當差尚未出缺裁汰之官兵。應照原議俟壯丁挑往補完日陸續移往。得旨甚好。如所議行。

○雲貴總督吳達善奏。滇省西南徽外緬甸連年內訌。不靖鬼家宮裡雁與落腳仇殺率眾奔孟坑等處。被孟連土司刀派春招去勒索銀物。押令歸降。鬼家忿恨於閏五

月十四日夜。放火劫殺孟連家口二十六人。又殺死救護男婦夷人六十三名。口宮黨於次早奔往猛養孟坑四散竄匿。查孟連土司剝削降酋。以致鬼匪起意焚害。原非外夷擅入邊疆。劫殺然宮裡雁在緬甸構釁多年。今復流毒孟連。該酋一日不除。恐滋事端。即飭永順鎮府迅督耿馬猛猛兩土司呈述訪拏。探知宮裡雁在石牛地方。隨設法拏獲。及其妻婢黨從共九犯。於七月初六日已解到耿馬。俟到省辦理。得旨好出力之土司等酌量犒賞。

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十七

實錄卷六十七

一

大清高宗法天隆運至誠先覺體元立極敷文
奮武孝慈神聖純皇帝實錄卷之六百六十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹註

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣謹註內大臣戶部尚書鑲藍滿洲都統軍功紀錄五次

尋常紀錄十四次臣謹註經筵講官太子少保工部尚書紀錄六次臣曹振鏞等奉

敕修

乾隆二十七年壬午八月辛卯朔

上詣

皇太后行幄問安 行圍 諭曰朝銓等奏佐
領楊玉琯派解犯人並不親往又副領催馬
進福派解竊賊將同派往之馬甲六格等三
人留住遠道至賊家歇宿以致要犯脫逃請
將楊玉琯交部議處馬進福枷號示衆等語
盛京官員兵丁係滿洲臣僕一切差役倍應
奮勉近來習俗甚屬不堪楊玉琯派解罪犯
竟不親往毫無法紀交部議處不足示懲楊

玉琯著革職。枷號三個月。在十四城輪流示衆。馬進福六格等。有意存留歇宿賊家。致要犯免脫情殊可惡。枷責不足蔽辜。馬進福六格鄂遜蘇崇阿著發往伊犁充當苦差。俟拏獲脫犯時。另行請旨。將此旨通行盛京各城。令滿洲臣僕。明悉大義。如仍不知悛改。此後必當從重治罪。○吏部等部會議護山西巡撫宋邦綏奏。稱保德州屬河曲縣僻處萬山城週七里。戶僅千餘。離城七十里之河保營一鎮。亦設有城。切近黃河界連草地。兵民雜運。形勢緊要。設參將駐劄。文員祇一巡檢。不能彈壓。請將知縣典史移駐河保。巡檢改駐縣城。縣署以巡檢署擴充。其經費將縣署變抵巡檢。即居典史舊署。應如所奏從之。○貸給浙江江山縣本年被水貧民口糧籽種并修葺銀兩。○是日駐蹕巴顏溝大營。壬辰上行圓。遣官祭黑龍潭昭靈沛澤龍王之神。玉泉山。

惠濟慈佑龍王之神。○工部議准江南河道總督高晉疏。稱外河廳屬清口東西二壩湖水漲發宣洩不及。請將東壩接長三十三丈。西壩接長六丈。從之。○喀什噶爾辦事尚書永貴等奏。覆各城盈餘糧減價折給官兵鹽菜銀。現在各處有收糧價益賤。應暫停折給。其應給銀以普爾錢扣抵報聞。○是日駐蹕巴顏布爾噶蘇台大營。癸巳上詣。

皇太后行幄問安。行圓。○是日駐蹕都穆達烏拉岱大營。甲午。

上行圓。遣官祭關帝廟。諭軍機大臣等。朝銓奏奉旨查勘嘉義普正地方適值布顏達賴辦差。他出於趕回後。即起程前往。此事因奉旨飭查。始行具奏。從前亦未咨報。禮部等語。布顏達賴除伊副都統任內之事。有何別項差務。他往即或有之。亦應詳細聲明。乃含糊具奏。殊屬朦

混此案既未曾報部伊等自有應得處分著傳諭朝銓查明叅奏。又諭曰朝銓奏被劾科欵銀兩之牧廠翼長車木布解送盛京刑部時仰藥而死請將案犯及解員嚴審定擬伊亦交部查議等語車木布係滿洲奴僕既獲罪譴不待審擬仰藥而死甚為非理朝銓深悉彼處陋習車木布既已被叅即應嚴飭解員妥協防範乃並不留心致伊乘隙自斃殊屬疎忽前以朝銓尚屬能事是以補授盛京刑部侍郎自署理將軍後事務較繁遂至張皇失措著將朝銓交部議處仍傳旨嚴行申飭。浙江巡撫莊有恭疏報乾隆二十六年分定海鎮海臨海黃巖寧海麗水雲和等七縣開墾額外田地蕩塗沙塗水漲沙地民竈塗田共四百八十頃有奇。豁免浙江海寧縣乾隆二十六年被潮坍沒民竈沙地并新漲沙塗地共四百一頃有奇額賦。旌表守正捐軀之安徽亳州民蔣某女蔣氏。是

日駐蹕烏拉岱伯勒齊爾大營。乙未上詣皇太后行幄問安。行圍。遣官祭昭忠祠。是日駐蹕呼魯蘇台大營。丙申秋分夕月於西郊遣顯親王行潢行禮。上行圍。諭軍機大臣等據金輝奏蘇州織造每年額定辦差銀三萬兩於許墅關盈餘銀兩內動支遇閏月之年止將十二個月所取銀三萬兩開銷奏解餘出一月銀二千五百兩存貯織造庫內並不奏解嗣後請遇閏月之年即以十三個月計算奏解毋庸扣留一月銀兩等語金輝所辦是著傳諭薩載照依金輝所奏將從前所餘閏月銀二萬兩催清解交外嗣後遇閏月之年俱照此辦理其總催舒文原係安寧奏請派往協理織造事務之員是以前經降旨薩載令其留蘇幫辦今金輝奏額設人員足敷派委令舒文回京當差等語與從前安寧奏派之意又屬互異舒

文果否與織造事務實在有益抑或另有別情不便令其久住蘇州以致金輝奏令回京或金輝與彼有不合之處亦未可定薩載現辦織造事務是否需用舒文及舒文在蘇如何之處並著一併據實具奏至金輝所奏安寧短少庫貯閏月銀一萬二千三百餘兩有現存綢緞并木漆等項貢物冊開價銀六千餘兩可以存留添配陸續恭進即於應領得養廉內抵補等語安寧此項短少銀兩既現存有貢物可抵自應照冊收存按價歸款金輝現經離任即著薩載將金輝所開物件照數接收以為將來陸續貢項之用可也尋奏閏月扣留銀兩及安寧短少庫貯欽遵諭旨辦理至金輝奏稱令舒文回京緣金輝向在造辦處行走熟悉差使且專辦織造事務非安寧之兼管藩司必需幫辦者可比金輝與舒文並無不合之處亦非另有別情至臣於奉交差使尚未諳悉查舒文在蘇一年頗為

熟悉得此一人協辦於織造事務實屬有益得旨覽又諭據金輝奏江寧蘇州織造承辦絲勛每年俱照浙省地方官結報市價採買報部經部照額定價值覈減行令經發經收之織造照數歸款乾隆二十六年江寧織造彰寶接受託庸交代絲勛比部價多用銀六千九百四十餘兩仍於前任織造託庸名下追回歸款今金輝接受安寧採買絲勛亦比部價多用銀一萬一百餘兩除安寧陸續補過銀三千三百餘兩尚應補銀六千七百餘兩應於安寧名下追回歸款等語歷年絲勛價值市價與部中所定原未必盡能畫一向來織造等採買織絨必有通融籌辦之法若盡如金輝所奏按年賠補若干該織造等安所得如許銀兩彌補此項著傳諭尹繼善將該織造等從前如何設法辦理不致賠墊今又因何賠累若干之處詳細查明具奏順天鄉試以府尹羅源漢為監臨官協辦大

學士尚書梁詩正為正考官兵部左侍郎觀保為副考官○是日駐蹕塔哩雅圖昂阿西大營○丁酉祭

先師孔子遣和親王弘晝行禮○賜扈從王公大臣及蒙古王公台吉哈薩克陪臣等食○諭曰多爾濟病故所遺理藩院侍郎員缺著福鼎補授仍令福德署理正藍旗蒙古都統員缺著如松補授仍署理正白旗漢軍都統事務○諭軍機大臣等胡寶瑤奏近患痰

症一摺深為厯念已於摺內詳諭矣胡寶瑤辦事素能奮勉今患病將及一月以至形諸奏牘看來決非偶抱微恙者雖據稱旬日之間即可復舊未審現在已全愈否著傳諭該撫速即據實奏聞至科場事務自應照例交與布政使代辦以便安心靜攝速冀痊愈○又諭曰熊學鵬奏外省城垣坍塌皆由地方官不肯留心經理所致現在飭行各屬查辦一摺所奏甚是地方城垣隨時保護粘補本

屬有司專責而聞葺之吏平日視為具文以致坍塌日久居民竊用磚土遂至工程浩大不得不多糜帑項最為近來惡習不獨粵西一省為然著將原摺於各督撫奏事之便鈔寄閱看令其通飭各屬實力防護隨時修理毋致壞工滋費○浙江巡撫莊有恭疏報乾隆二十六年分寧海仙居太平麗水常山等五縣開墾田地共一百八十五頃有奇○旌表守正捐軀之河南魯山縣民趙海玉妻任氏○是日駐蹕張三營行宮○戊戌祭

大社

大稷遣裕親王廣祿恭代行禮○

上詣

皇太后行宮問安○是日駐蹕波羅河屯行宮

○己亥

太宗文皇帝忌辰遣官祭

昭陵○諭每年蒙古王公等進京其餽養馬駝草豆等項原因伊等或未能深悉京城物價

是以向例俱係內外馬館支領本色應用邇來蒙古人等俱與內地旗人無異原可給價聽其自行購買今據舒赫德查出馬館該管員役尅落偷賣甚至坑埋藏變四百餘石之多似此侵蝕冒領弊竇叢生轉不如概行給發折色為便嗣後蒙古王公等進京凡一應需用柴薪草豆等項俱著改給折色其應如何折給之處該部定議具奏諭軍機大臣等阿桂等奏原任主事富魁帶領匠作於固

勒扎格登山監造御製碑文事竣可否量予獎賞等語富魁前因獲罪留於軍營効力今既將固勒扎格登山碑文俱監造妥協富魁著加恩授為前鋒仍在本旗行走兵部等部會議巡視天津漕務給事中陳作梅奏運弁宜給印信等語應如所請各省領運千總每幫給印一出運時恭領到船回空日令隨幫千總帶回交下年運員收管從之葉爾羌辦事都統新柱等奏臣等與衆伯克議勸

課回人織布一年可得五萬餘足以庫貯餘錢購買錢法既可流通回人生計更有裨益隨飭辦理糧餉之圖朵阿等凡回人以布易錢即照時價給發毋許尅漏報聞是日駐蹕中關行宮庚子

上詣

皇太后行宮問安參贊大臣阿桂奏伊犁城垣公署於二月二十五日起工七月初八日告竣回人等在固勒扎建造城垣與烏哈爾里克城相倣所造房屋亦俱竣工報聞尋欽定烏哈爾里克城曰綏定城門東曰仁熙南曰利渠西曰義集北曰寧漠固勒扎城曰安遠城門東曰景旭南曰嘉會西曰環瀛北曰歸極是日駐蹕避暑山莊至九月己巳皆如之辛丑

太祖高皇帝忌辰遣官祭

福陵諭軍機大臣等莊有恭奏七月初七日風大潮湧致將海寧縣緩修搶修石塘內有

揭落面石並間段坍卸之處等語雖經該撫馳赴查勘俱各平穩並無妨礙但現屆秋潮大汛從前衝卸隄岸有無接續加坍其搶修處所是否足資抵禦并現在秋汛情形若何著傳諭莊有恭速即據實馳奏以慰廑念尋奏各塘搶修處所鑲築堅實足資抵禦此外並無接續加坍之處得旨覽奏稍慰吏部等部會議調任甘肅巡撫明德疏稱大通衛改設縣治歸德所改設縣丞各事宜一新設

大通縣西寧縣縣丞所管地方仍照大通衛歸德所原轄地界一新設大通縣定為沿邊繁難要缺西寧縣歸德縣丞仍定為邊缺一請鑄給大通縣印信大通縣儒學記西寧縣縣丞分駐歸德兼管屯番糧務關防一大通衛舊守備署改為縣署教職典史新設各建署一所又歸德所向無衛署今改設縣丞應添建一大通衛原設向陽驛應歸大通縣經管均應如所請從之兵部議覆河南布政

使輔德奏稱存城兵少州縣不敷派撥令文職協撥民壯共相看守應如所請通行直省遵辦從之○雲貴總督吳達善疏報乾隆二十六年貴州平越都勻鎮遠思州銅仁黎平歸化開州正安等九府廳州縣開墾民田二百七十三畝有奇山土坡地二百一十七畝有奇○壬寅賜扈從王公大臣及蒙古王公台吉哈薩克使臣等食○賜哈薩克阿布賚勅書曰皇帝勅諭哈薩克阿布賚爾遣使都勒特克呼蘇勒統前來進呈奏章懇請賜以璽書願世世子孫恪守藩服若非老成明達樂善循理何以及此果能常存此心朕必疊沛恩施永遠無斃爾所以矢恭順之忱者在約束所部守分安生但爾屬人等往往恃大國寬容越境游牧我駐劄伊犁大臣等慎固封疆自必嚴行驅逐朕雖欲加恩亦不能廢法曲貸試思爾哈薩克等若非潛來塔爾巴哈台等處我大臣等何嘗有領兵逐捕之

事。爾當傳諭全部俾知朕意。今命爾來使等隨駕木蘭觀圍。加恩賞賚。賜爾阿布春蟒錦及各色緞疋。絀綾器什芽茶。使人歸日。爾其祇受。又賜爾使人品級頂帶孔雀翎衣物器什銀兩。各有差爾所奏使人烏默爾舊居伊犁。今願安插該處。往來行走。已如所請。加恩授烏默爾為乾清門侍衛。准其暫歸。挈眷因將來遷移戶口。別賞烏默爾及伊弟等路費銀兩。併諭爾知之。特諭。陝甘總督楊應琚

奏新疆歲需官茶二萬七百餘封。應陸續運貯。令官兵領買。稍加運費。較之買自商人尚屬減省。將來遇有換班兵吏。更可酌為攜帶。現在巴里坤哈密所有官茶。先行撥運。再由內地運往。下軍機大臣等議行。癸卯

萬壽節遣官祭

太廟後殿遣官祭

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵遣官祭

顯佑宮

東嶽廟

城隍廟

上詣

皇太后行宮行禮。御澹泊敬誠殿。扈從王公大臣官員及蒙古王公台吉等行慶賀禮。奉皇太后御勤政殿侍宴。賜扈從王公大臣及蒙古王公台吉哈薩克使臣等宴。至丙午皆如之。軍機大臣等議覆安徽巡撫託庸奏請於安省開捐貢監暨職銜等項。以為修理城垣之費。應如所請。此例開設之後。如果報捐人多。該省城工可次第興修。並請將此例

通行各省遇有坍塌城垣較多省分均令該督撫陸續具奏請旨從之 甲辰

上詣

皇太后行宮問安 調江西巡撫明山署廣東巡撫湖北巡撫湯聘為江西巡撫以山西布政使宋邦綏為湖北巡撫甘肅按察使文綬為山西布政使 乙巳

上詣

皇太后行宮問安 諭曰黃仕簡奏請來京陛

平集卷六十八

見廣東提督統轄海疆甚為緊要黃仕簡可於明山到任之後著蘇昌派委幹練總兵一員署理再行起程來京 諭軍機大臣等明山奏本年江西軍政尚須寬期考驗請展限舉行一摺明山已調署廣東巡撫伊奉到諭旨時湯聘尚未能馳赴江西新任江西非粵楚督撫同城印篆有所兼署者可比著傳諭明山且不必速行赴粵俟湯聘到任後再赴新任其應辦事務仍照舊上緊辦理粵撫印

務現有蘇昌兼署明山到任稍遲未為不可湯聘著速將撫篆交與愛必達署理後即一面赴江西新任 又諭曰胡寶瑤奏八月初旬嘔吐復發難以辦理場務已照例將撫篆交與布政使暫署等語胡寶瑤前因患病奏請令輔德代辦場務已降旨准行諭令安心靜攝以冀速痊並著將病體光景馳奏以慰廑念今該撫未經接奉前旨已將撫篆交出看來病勢尚未向愈此番交出印務之後正

平集卷六十八

可寧神靜養加意調治過日病狀情形曾否輕減實為懸切著輔德速即據實具奏尋奏撫臣近日病勢稍減惟元氣大虧一時難遽培補現加意調治以冀速痊得旨覽 兵部奏覆遵議各省添設額外外委事宜據各省咨覆內有議添無多者有照經制原額請添一半者有增添一半以上至較原額更多者查經制外委既按兵數為衡額外酌添自應按經制額數為斷向來經制外委與千把等

分汎協防。是以定數較多。至額外增添。不過供應差委。臣等酌議。照經制原額添設一半。已足敷用。令步軍統領各該將軍督撫提督。於兵丁內揀選拔補。按季報部。給與頂帶。仍食本身錢糧。毋庸議給隨糧。照舊隨營差操。勤慎者遇有把總及經制外委缺出。一體拔補。從之。○以山西冀寧道海明為甘肅按察使。

實錄卷之六十八

六

大清高宗法天隆運至誠先覺體元立極敷文奮武孝慈神聖純皇帝實錄卷之六百六十八

敕修

乾隆二十七年壬午八月丙午諭軍機大臣

等永慶等奏稱逆賊布拉呢敦霍集占族人阿塔木和卓現居烏什所屬之喀薩哈無知回人等因伊為和卓木近族俱來禮拜伊又將所收糧食散給貧人以沽名譽若聽其留住於地方無益請將阿塔木和卓及其家屬十三名口送往哈密安插等語阿塔木和卓既係逆賊等近族兄弟且非守分之人永慶所請辦理安插甚是但哈密亦未便容留滋事著傳諭辦事道員三寶等揀派幹員將阿

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

塔木和卓及其家口加意管看解送來京○

丁未賜御前侍衛並軍機大臣等食○命賞

哈薩克烏默爾等銀兩○戊申

上詣

皇太后行宮問安○賜扈從王公大臣及蒙古

王公台吉等食至辛亥皆如之○諭曰蘇昌

奏託恩多離任將巡撫印信交布政使史奕

昂護理一摺此則拘泥成例於事理深屬未

協向命巡撫遇有事故將印信交與布政使

護理原為督撫不同省者而言若同省則督

篆既可交巡撫兼攝豈撫篆轉不可令總督

兼署而必以布政使為重足倚恃乎且封疆

大吏或因此自分畛域彼此意見不和於政

事尤有關係不可不防其漸嗣後凡督撫同

省遇有應行攝篆非旦夕不可緩待者均不

得率交布政使護理將此明著為例○諭軍

機大臣等據明德奏於遼州屬和順縣已將

逆犯趙文太拏獲解直等語該縣卹廷溶實

心躡緝將要犯迅速弋獲甚屬奮勉該員平

日居官如何著明德出具考語將該員送部

引見其在事協緝兵役俱著該撫查明酌量

獎賞以示鼓勵並嚴飭解員沿途小心防範

星速護解勿致疎虞遲誤○己酉

上詣

皇太后行宮問安○庚戌

上詣

皇太后行宮問安○諭軍機大臣等旌額理奏

稱回城駐防撤回滿洲兵若從烏魯木齊至

巴里坤正屆草枯雪盛之時不便行走請將

烏魯木齊豫備馬匹改送伊拉里克以候抽

換取道闢展等語從前撤回滿洲兵雖有由

烏魯木齊至巴里坤之議今旌額理既稱遇

雪難行而新柱等亦奏稱經過回地於官兵

有益著傳諭旌額理即如所奏撤回滿洲兵

不必由烏魯木齊將豫備馬匹改送伊拉里

克換給取道闢展前至肅州並傳諭永貴新

柱。楊應琚知之。○又諭曰。旌額理等奏稱本年由內地資送屯田民人四百餘名到屯以後。所有接濟口糧籽種俱係借給官項。請分別定議。俟伊等收穫有餘。將應還錢糧與從前資送之項。分年令其交納等語。屯田民人從前所領官項。自應照原議分年交納。此次所借糧石。既因伊等甫經耕墾。全賴接濟。且又被災傷。若仍令償還。恐有妨伊等生計。著將續借之口糧籽種等項。加恩賞給以示體恤。○辛亥。

上詣

皇太后行宮問安。○遣官祭賢良祠。○諭軍機大臣等。胡寶瑤奏。五六月來。病勢已退。但調理復元尚非數月不可。河南巡撫事務緊要。請簡賢員補授等語。胡寶瑤此奏。甚非朕之所望。伊現在病體既已向愈。精神自漸矍鑠。甚冀速痊。資伊任事。其巡撫印務業經暫交輔德護理。即使遲之數月。於一切政務諒亦

不至曠廢誤公。胡寶瑤不必解任。開缺惟須安心靜攝。加謹調護。以慰廑念。其藥餌有外間不能得者。奏來賞給。先賜人參一觔。問醫可用方用。不可用莫用。可將此傳諭知之。○軍機大臣等議。覆陝甘總督楊應琚奏。稱金塔寺。威魯堡等處。在邊牆以外。距肅州百餘里。今各該處增闢地二萬七千餘畝。其已經升科之回民遺地。應徵糧石。前經奏准。令王子莊州同就近徵收。其餘回民遺地五千三百餘畝。與金塔寺等處招墾地一萬二千餘畝。此外尚有向在肅州徵收。附近王子莊之金塔寺戶口壩等九壩原額正糧八百五十餘石。俱請交與王子莊州同督率墾種。並收放糧石。又威魯堡內外各地。悉係種地民人居住。不可無就近治理之員。請將該州同照依各州縣分防佐貳之例。將附近各村莊關毆賭博戶婚田土等案。俱責成該州同辦理。疎防失察叅處。俱應如所請從之。○又議。覆

山西巡撫明德奏匪犯田金台傳教惑人已故二十年而現在奸民泰四牛經元等猶歛錢赴該犯家饋送且直隸邪教案內各犯多訊係該犯之徒恐將來萌孽復生蔓延滋害請將該犯之孫田履端田志端押令攜帶妻子解交烏魯木齊大臣安插墾作其幼孫二人年止七歲三歲曾孫二人年止五歲十歲幼穉難以遷往請移住太原省城安插等語實為杜絕萌芽起見但該犯幼孫曾孫留之內地總非端本澄源之道應請一併解往烏魯木齊安插種地從之 壬子諭曰方觀承摺奏正定兵丁拾獲李懷林逆詞一案其事原因總兵楊朝棟咨報而發但該鎮身為地方專閫遇此重大案件即當一面知會該督一面據實入告乃視同尋常關移讞牘一經咨送即若與該鎮毫無干涉者然提鎮所司專以摺奏一二雨水情形虛陳察查營伍遂謂盡職耶著該部傳諭楊朝棟令將因何不

行陳奏之處明白回奏 又諭今年直隸夏雨成澇濱水窪地田禾不無淹損所有積年錢糧帶徵緩徵各屬內今年復被水災之文安大城武清寶坻薊州天津及霸州保定永清東安安州新安青縣靜海滄州寧晉津軍廳十七州縣廳民力自屬拮据其應徵銀八萬二十四百兩零穀豆高糧五千四百石零均予豁免以示優卹至與災重州縣毗連本處復被水災之寧河固安鹽山慶雲衡水五縣所有應徵銀二萬一千五百餘兩穀豆高糧一百八十餘石亦著一體蠲免該督其嚴飭所屬實力奉行務使窮民均沾實惠毋致吏胥中飽副朕加惠黎元至意該部遵諭速行 癸丑

世宗憲皇帝忌辰遣官祭泰陵 調鑲紅旗蒙古副都統雅郎阿為正紅旗滿洲副都統以禮部右侍郎五吉為鑲紅旗蒙古副都統 甲寅

上詣

皇太后行宮問安。○賜扈從王公大臣及蒙古王公台吉等食。至丁巳皆如之。○諭軍機大臣等山西移納山木植。前經英廉會同塔永寧議准。奏請開採。自二十五年三月開山以來。已逾二載。並無交官木植。茲因蒙古奏請禁止。命福德前往查勘。今據查奏該處二年之內。商採木植已至十二萬餘株。該商等盡將所砍木植。故意改短丈尺。以大斷小。恣其運售等語。此項木植。向緣奸商射利偷砍。官吏需索勒詐。弊實叢生。是以降旨開禁。招商採伐。令其輸納稅課。山價責成。該管官設口稽查。以杜侵隱偷漏之弊。今奸商王建中將應行解交官項木植。改削短小。不合在京工料丈尺。希圖私行售賣。情理甚屬可惡。其從前招募此商。係何人主持經辦。准其承商。著明德詳細查明。在該地方大員據呈批准開採。雖未經細加體訪。或不至有不肖情事。其

以下經手承辦各員。若無通同侵漏分肥染指之處。斷不至聽該商等恣意舞弊。漫無覺察。若此。該撫甫莅晉省。前任之巡撫司道等如何籌辦。並經手各員有無滋弊。尚未周知。務須詳加查察。如有弊端。即行據實嚴叅。若從前英廉等定議時。其開採商人。或即由英廉等招定。並著該撫據實陳奏。不得意存瞻徇。其奸商等藐法營私。罪無可逭。所有伊等堆貯砍運木植。查明盡數入官。其家產亦一

併查封。以抵運費。即稍有多餘。均著歸公。仍實發三千里。以示懲儆。尋奏招商一事。英廉並未辦理。塔永寧召充殷戶。開採委無情弊。府縣各官均無賄充情事。報聞。○又諭曰。淑寶等奏安集延回人前來貿易。內緞疋一項。除原價及運費。每疋增加銀二三錢等語。貿易緞疋。俱由內地遠行運送。自應準照原價及運費酌量增加。視其情願交易與否。再為通融減售。乃止議加銀二三錢。此或經手之

員售多報少。甚至將自置貨物。開入官項。冀獲羨餘。行之日久。則貿易一事。又為貪吏徼倖之端。不可不防。其漸著傳諭。淑寶等留心稽查。據實陳奏。○又諭。昨哈薩克入覲。使人有烏默爾者。進呈阿布賚奏章。謂烏默爾情願移居伊犁。伊代為陳請等語。隨詢之烏默爾。情願挈眷前來。因命伊在乾清門行走。已勅諭阿布賚矣。烏默爾又奏稱。伊約於來年三月。自哈薩克起程。請伊犁大臣等派員往彼帶領。著傳諭明瑞揀選通哈薩克言語之厄魯特數人。按期前往。再據烏默爾奏。伊自幼在伊犁生長。心戀舊居。此猶事之所有。至云伊姊已為阿布賚妻。若果如此。何必移居。或伊等私計。烏默爾居伊犁後。哈薩克等設有越境游牧之事。伊犁大臣派兵驅逐。伊得先通信息。亦未可定。但此特懸揣之事。如謂伊果能漏洩信息。則從哈薩克脫出之厄魯特甚多。又豈能一一防範耶。明瑞知此。惟留

意體察。不可稍著形跡。○乙卯。

上詣

皇太后行宮問安。○以健銳營翼長立柱為湖北襄陽鎮總兵。○丙辰。

上詣

皇太后行宮問安。○勅諭察哈爾八旗都統巴爾品等。諭曰。皇帝勅諭察哈爾八旗都統巴爾品及副都統等。朕惟察哈爾地方。向設八旗總管。凡練兵行圍等事。每不能一律整齊。

宜設大員。以專統轄。茲特命爾駐劄張家口。總管察哈爾左右兩翼副都統八旗總管管轄滿洲蒙古官兵及張家口理事同知爾宜持躬公正。律已嚴明。董率屬弁訓練兵丁。練習行圍。以精技藝。整理器械。以壯軍容。所統弁丁有不遵訓令者。聽爾叅處。其選補承襲員缺。詳慎覈定。一應俸餉。確查咨領。尤須加意嚴飭。官兵不許滋事擾民。凡一切事宜。俱照題定事例辦理。至錢穀詞訟。民間情事。俱

屬地方官管理不得干與其宣化大同二鎮附近張家口地方亦聽爾節制爾受茲委任須實心率屬加意訓練如或怠玩曠職責有攸歸爾等慎之特諭○又諭曰由屯奏將軍綽勒多染患疾身故等語所遺黑龍江將軍員缺著國多歡補授國多歡所遺員缺著綽克托調補黑龍江將軍印務著由屯暫行護理國多歡速赴新任○軍機大臣等議覆烏嚕木齊副都統旌額理等奏稱烏嚕木齊

聖鑒事

三

屯田兵四千名挈眷前來者一千八百有奇餘俟換班時派往查挈眷兵內子弟頗多請嗣後換班兵缺出即於餘丁內補放等語所奏自屬通融籌辦但此等換班兵盡以餘丁充補恐戶口不能增益應定以十缺為率補餘丁二名俟內地挈眷兵到人數日多每次遞增一倍至四千額滿所有缺出悉補餘丁再此次內地所派四千兵俱由額缺內派往將來原額無庸補缺從之○丁巳

上詣

皇太后行宮問安諭本年秋獻屆期九卿等將秋朝審各案覈議分別具題所有可矜各犯例應減等杖流但其中有同在可矜之列而情節各殊者如子婦不孝毆詈翁姑而其夫忿激致斃或因該犯之母素有奸夫已經拒絕後復登門尋釁以致拒毆致斃者此等尚因情切天倫一時義忿所致與尋常鬪狠者原屬不同然僅一例減流而終身遠徙不得完聚其情亦堪憫惻著該部會同九卿嗣後遇有似此罪犯案情既確俱量為區別照免死減等例再減一等發落仍逐案隨本聲明請旨副朕矜恤庶獄至意○諭軍機大臣等舒赫德等奏秋審可矜各案內有情切天倫誤罹法網三種人犯請再減杖徒發落一摺其因妻不孝忿激致斃與母素有奸夫已經拒絕復行尋釁毆斃者已有旨諭部矣至救親情切一條其中情節易涉疑似倘豫定

規條罪犯情變百出。保無有父子同毆致斃而飾傷救子者。人已致斃。誰與質証。若概從未減。凡有親之兇惡。恐因此轉滋繫端。殊非矜恤平允之道。此議不可行。著傳諭舒赫德等知之。○又諭曰。蘇昌等審擬賀縣知縣朱三元貪婪不職。致斃人命。擬絞立決一案。此等賊私累累。縱役斃民之劣員。自宜重示懲創。但律應絞候。而該督等擬以立決未免過當。朕辦理庶政務在一歸平允。於此等案件尤未嘗格外苛求。蘇昌原摺已交軍機大臣將朱三元照律改為絞候。發部覈擬矣。至將來秋審時。應否情實自有司憲。諸臣定擬。即本年無及。待至明年列入秋審。亦無不可。著將此傳諭蘇昌等知之。○戊午。諭軍機大臣等。永貴等奏稱。伊什罕伯克古爾班和卓商伯克墨墨氏敏哈子伯克阿布都拉五品伯克伊斯邁勒密喇布伯克巴巴和卓俱係奉旨記名應陞人員。若俱候本城缺出補用。恐

至壅滯。應請不拘何城缺出。即按品級調用等語。陞補伯克若不拘本地。准其調用別城。自屬疏通之法。但伊等內如阿奇木伊什罕噶西納齊等缺。俱承辦要務。若照內地之例迴避調補。則伊等無掣肘之虞。且奉調時尚不覺煩苦。至小伯克等既無庸迴避。徒慮伊等得缺壅滯。調用別城。將來遷移之際。動需費用。恐於伊等生計無益。自應分別辦理。著傳諭各城駐劄大臣等。嗣後補授伯克。應按照品級分別照例迴避。及坐補本處額缺。會商妥議具奏。○己未。吏部等部會議貴州巡撫喬光烈奏稱。黔省偏遠。新任之員往往在途逗留。請嗣後官員赴任。中途患病阻滯。統以三月為限。如在限外。即有文結。仍作逾限議處。其引見差回之員。悉照此辦理。至黔省各郡苗多。民少。性情樸魯。外來匪徒設法哄誘。為害多端。請嗣後黔省拏獲漢奸。應徒罪枷杖者。遞回原籍。通飭各屬備案。如私逃入

黔將本犯及窩留之人從重究擬原籍黔省失察各地方官照私逃入川之例議處均應如所請從之○兵部議覆廣東潮州總兵明達奏各省參遊都守官員請給印信關防千把外委一體應入軍政等語查各省參遊都守等官凡屬獨營及標下中軍一切兵馬錢糧是其專責向例均給與印信關防若左右前後各營其事悉由中軍覈轉分駐獨營由該管上司覈轉並無滋弊之處是以並未議給遵行已久若概行撰給關防似屬繁文應量為區別請參將以下官員如係分駐別城或離本標中軍駐劄遙遠者令各省將軍督撫提鎮擬定關防字樣咨部鑄給至緊給之處無庸議再緣營千總准一體入於軍政把總外委尤為未弁向由督撫提鎮拔補並無伊等推陞員缺應毋庸議從之○是月直隸正定鎮總兵楊朝棟奏兵丁朱得名拾獲逆詞一事據遊擊色克圖等面稟因案情重大

恐有漏洩是以令知府鄭大進親稟督臣方觀承臣隨以巡閱營伍為名親往督辦督臣即將據報具奏之處批覆但臣於具報督臣時不行奏聞實屬糊塗得旨以後諸事認真再不可如此推諉避事○浙江巡撫莊有恭奏七月初七日東西兩塘猝被風潮石塘坍却盤頭潑損查勘海寧縣城東自四里橋至鄭家街一帶塘工外用條石包砌內填塊石本非堅實應改建大石塘一百四十三丈七寸每丈建築一十八層又陳文港東搶修石塘在內緩修石塘在外其工頭兩不相接之處計寬三文五尺應仿照條塊石塘另建柴頭一道至陳文港秧田廟潑却盤頭三座柴土工程難禦潮汐請一律改建三層石坦以省頻年鑲辦之煩得旨如所議行但期工固毋致浮冒可也○湖北巡撫湯聘奏湖廣向設外廉官十六員後南北分闡中額減半而外廉員數相沿未改較為繁冗請照江西湖

南之例。酌減三員。得旨。是。○四川總督開泰奏。川省重慶鎮屬黔彭營馬步兵。每年米折銀兩。向分作二季領給。該營在東南邊僻。田少土瘠。且素鮮商販。兵丁糴買。每虞缺乏。應請於每年秋季。將次年應領折色。豫行支取。隨時購買。按月支放。得旨。如所議行。○雲南鶴麗鎮總兵左秀。奏報接印任事日期。得旨。諸事認真料理。不可為綠旗虛偽之習。戒之。勉之。

大清高宗法天隆運至誠先覺體元立極敷文奮武孝慈神聖純皇帝實錄卷之六百六十九

大清高宗法天隆運至誠先覺體元立極敷文奮武孝慈神聖純皇帝實錄卷之六百七十

駐劄總督官經議官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂
總辦官經議官太子太傅文華殿大學士文淵閣領閣事稽察欽奉 上諭事件處管理刑部戶部工部事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經議官太子少保工部尚書紀錄六次臣曹振鏞等奉

敕修

乾隆二十七年壬午九月庚申朔日食

上詣

皇太后行宮問安 遣官祭

歷代帝王廟。○遣官祭

都城隍之神。○諭曰。陳宏謀摺奏。安寧管關家人李忠。丈量貨船。豫留罰料地步。將正稅變為罰項。名曰重罰漏稅。實則暗虧正課。李忠在關所缺正稅七萬七千餘兩。而罰項轉至四萬九千餘兩之多。將李忠收禁。勒限繳納等語。此等橫行作弊。其事迥出情理之外。

安寧向由獲罪錄用。特因其素日為人遇事尚屬過於拘謹。是以加恩委任。若家人肆無忌憚。若此。伊豈得諉為不知。使伊尚在。必當重治其罪。今即已身故。而玩法負恩。實堪駭異。所有賞給內務府大臣職銜。著即行削去。仍將所有侵漁貲財。嚴行查封。以抵虧項。至陳宏謀素與同城。該關弊壞已甚。為有目共見。伊豈一無見聞。倘安寧在時。據實劾朕。必為之嘉與。乃平日一味瞻徇情面。付之膜外。直至安寧身後。自量不能終隱。始舉發其事。而專以一惡奴為全案罪魁。封疆大臣公正任事者。固如是乎。陳宏謀著交部嚴加議處。尹繼善雖駐劄稍遠。而此弊公行。已非一日。何至毫無覺察。節制之義。安在。尹繼善著傳旨嚴行申飭。此案著該督前往會同陳宏謀嚴行查辦。將惡奴李忠等確訊盡法懲治。並將伊財產查明盡數入官。毋令稍有隱匿。寄頓摺並發。○又諭迎接哲布尊丹巴呼圖

克圖之呼畢勒罕著巴勒達爾前往派侍郎福德一同照料。所過地方准其交易馬匹牲隻口糧。著該部院行文各處大臣扎薩克等遵照。○諭軍機大臣等據陳宏謀奏安寧家人李忠在關肆行作弊。將正稅變為罰項一案。其事甚可駭異。已明降諭旨。令該督等嚴行辦理矣。安寧以屢次獲罪。加恩錄用。今家人肆惡若此。非尋常侵漁舞弊可比。伊平日辦事過於拘謹。豈有竟為家人朦混之理。其廢職負恩。實非意料所及。所有賞銜已經削革。著傳諭舒赫德即將安寧家產嚴行查封。以抵虧項。並將安寧負恩之處嚴切諭知伊弟安泰。陳宏謀原摺一併鈔寄。傳令閱看。○又諭曰。陳宏謀奏查出安寧經營關務家人李忠將正課改為罰料入已。以致額稅轉虧至七萬餘兩一摺。已明降諭旨。令該督等嚴行辦理矣。關權為錢糧重地。即不能不委用家人書吏。亦當慎擇老成可信之人奉法經

理而該監督仍不時防範盡心稽查猶恐或有疎漏致滋弊竇若一任家人等朦混舞弊迨至額稅虧少巧為彌縫一經敗露又復委咎家奴等以為推卸之地負恩溺職莫此為甚至鹽政總理鹺務所轄商人衆多奴隸胥役往來關通尤易滋弊若其中有勾串侵蝕等情及家人使氣陵戾商人以資需索較之關稅舞弊尤甚益宜留心防範加意稽查從前李永標在粵縱容家人等多徵少報苦累客商今安寧家人復有此等肆橫欺侵之事數年之間弊壞如出一轍朕方以伊等係內府世僕辦公倍當謹飭是以加恩委任若似此肆行無忌侵虧動盈鉅萬負恩已極法難復貸伊等不能承受恩典勢必將關鹽各差概不用包衣之人而後已獨非伊等自取乎著傳諭各關監督并該鹽政等及今早為查察以李永標安寧為前車之鑒倘有仍蹈覆轍如惡奴李忠等舞弊侵虧之事應將該監

督鹽政等加倍治罪 辛酉諭曰劉墉奏江蘇省士習官方情形一摺內稱生監中滋事妄為者府縣官多所瞻顧不加創艾既畏刁民又畏生監兼畏胥役既不肯速為審斷又不欲太分皁白科罪之後應責革者並不責革實屬闊茸不堪訟棍吏蠹所以互售其奸不惟目已無學政抑且心欲欺督撫等語所奏實切中該省吏治惡習江南士民風尚多屬浮靡喜事為地方有司者加以耽耽姑息遂致漸染日深牢不可破故近年封疆懈弛之弊直省中惟江南為甚此固非劉墉一人之私言也尹繼善陳宏謀在督撫中別歷最久而素性好以無事為福且更事既多上下睦之風竟成故智其所轄又大半往年舊屬因瀆生玩往往遇事姑容甚至狡猾劣員邇來藉口辦差有意延擱公事者更不一而足積習頹靡罔知振刷此等情狀即問之尹繼善陳宏謀當亦難以自解即託庸之在安

歲雖不如伊等年久而自顧齒非少壯不免人云亦云此兩江督撫率屬辦公大畧相同不可不亟圖整頓者況督撫為庶僚表率大吏不能振作閩屬誰不承風然至上行下效惰窳之勢已成誰任其咎則朕仍惟於督撫是問耳尹繼善等當從此痛除舊習刻自淬勵州縣官有怠玩相沿如劉墉所奏各情節即嚴行體察據實叅處若不知自改而轉以被揭尤人更難逃朕洞鑒○諭軍機大臣等

達桑阿奏稱王古爾庫爾勒回人等今歲屆升科之期派員查勘收成分數據報王古爾大小麥俱已成熟共收穫八千一百餘石庫爾勒所種因蝗蝻傷損僅收三百餘石等語回人所種地畝俱資灌溉之利雖不虞旱澇而蟲鼠為耗致成偏災亦所不免雖不必盡照內地蠲賑之例辦理而視其被災分數酌量減免伊等自感出望外且實與生計有裨此次庫爾勒回人等升科伊始既被偏災其

作何蠲免之處著速議具奏將來各城回人所種地畝有成災者著各該駐劄大臣詳悉查勘收成分數定議辦理俾回眾咸知朕軫念新附之意即其中有捏報災傷希圖免賦者因此履畝確勘亦得杜其徼倖之端著傳諭永貴等知之○壬戌諭曰各省學政現屆差滿山東學政蔣元益於本年任事無庸更換江蘇學政著李因培調補浙江學政著錢維城去安徽學政著梁國治去福建學政著紀昀去廣東學政著張模去廣西學政著葉觀國去湖北學政著朱丕烈去湖南學政著李綬去河南學政著盧明楷去山西學政著景福去四川學政著博卿額去雲南學政著周曰贊去貴州學政著李敏行去直隸學政張泰開江西學政周煌陝西學政鍾蘭枝俱著仍留原任○兵部議准陝西巡撫鄂弼奏稱凱旋後各差俱由南路其北路惟遞送文摺請將原撥協濟邊塘馬撤回再通省均有

遞馬獨宜川安定麟遊三水商南紫陽白沙平利八縣並未額設請於撤回遞馬內視其現足數用之州縣抽出一十六匹將八縣各給二匹即定為額設從之○又議准雲貴總督吳達善奏稱各省副將中軍前經兵部奏准俱改為都司黔省都勻銅仁清江上江因苗疆新聞須大員彈壓未經議改今除都勻銅仁二協原係苗疆分防獨營應仍留遊擊外清江上江二協中軍遊擊與副將同城宜照各省之例一律改為都司從之○改四川夔州府雲安廠同知為直隸石砭同知萬縣市郭里巡檢為石砭照磨從總督開泰請也○添建甘肅肅州鎮中軍衙署從總督楊應琚請也○癸亥

上詣

皇太后行宮問安○諭軍機大臣等從前邪教張銀案內有阿林家奴拴住入教經步軍統領衙門懲責釋放今查拴住於乾隆十六年

帶領伊妻并伊子趙明夫婦逃走迄今未獲此等家奴攜帶眷口潛逃若各該地方官果能認真躡緝何難早就拏獲今逃走已逾十載竟至毫無蹤影但該犯素係邪教案內之人或仍有邪匪餘黨潛行窩藏亦未可定直隸山西河南現有田金台等黨羽尚未淨盡著傳諭該督撫等嚴飭屬員各於本境內留心訪查如有邪教餘孽流傳未改飭屬一體查拏勿得僅以文移往返虛應故事遂謂可以塞責也○又諭曰阿桂等奏本年七月自哈薩克來投之厄魯特巴桑告稱伊係塔爾巴哈沁之人被哈薩克搶掠曾在阿布勒比斯處因充使來京蒙恩賞五品頂帶孔雀翎今願為天朝臣僕將在哈薩克所有之牲畜棄置與妻室來投等語厄魯特巴桑棄其所產業挈眷來投誠悃可嘉著賞銀五十兩緞二端巴桑既經恩賞品級頂翎著歸入厄魯特佐領下照原品給與職銜○軍機大臣

等奏。審得逆犯李懷林閔景成攢砌大逆詞語。陷害無辜。並究出孫耀宗傳播邪教各情節。請將李懷林閔景成凌遲處死。孫耀宗斬決。即行正法。其應斬決絞決各犯押回本籍。正法示衆。得旨。李懷林閔景成俱著凌遲處死。孫耀宗著即處斬。俱於熱河即行正法。李楷李大良李二良李三良李四良俱著即處斬。陳武李張氏俱著即絞決。王太田道濟依擬。應絞著監候。秋後處決。著按察使王檢將各犯押回各本籍。正法示衆。其餘家屬並年幼子女俱加恩免死。著發往葉爾羌賞給額敏和卓鄂對等為奴。餘依議。○參贊大臣阿桂等奏。派往伊犁官兵。應令與臣等駐劄處相近。以便操練。馬仍令兵丁領回牧養。報聞。○豁除陝西盤屋武功扶風朝邑四縣乾隆二十六年水衝沙壓民屯廠地六十四頃額賦。○甲子諭曰。朕閱刑部秋審招冊內有參革四川綿州知州程嘉當婪贓妄斷一案。該

督開泰擬入緩決。九卿改定情實。初以為原擬姑息邀名。已失司憲之正。又詳覈全牘。開泰於定擬後。復將該犯限內完贓聲請減等。此則謬戾乖方。殊出情理之外。於獄典尤有關係。前以汚吏虧帑情罪重大。陳臬者率引限內完贓減等之條。使不肖劣員平日既可恣意侵漁。事犯又可出貲末減。使不為執法嚴懲。是視帑項為重。而弼教為輕。豈國家慎重刑章。轉為言利起見。所降諭旨甚明。夫蠹國與腹民為害維均。而因事魚肉窮簷其罪視盜臣尤重。程嘉當與家人婪索陝民季興詩贓銀入已至六百兩之多。是藉聽斷為肥橐之謀。而置民事於不問。九卿覈駁以情與枉法無異。實為百喙難辭。開泰乃曲為議貸。思以保全墨吏。自謂可積陰德。試問伊自負讀書於陳編所載一家一路之喻。豈尚未之知。而顧欲縱奸頑以長民害。可乎。在開泰原以溺於積習。遂致案情輕重失倫。雖不敢攪

官犯之金巧為開脫。然推其流弊所極無識之徒踵而效尤。勢將賄賂公行。細民含冤莫訴。夫朕之嚴於待墨吏。乃所以安民也。開泰久任督撫。遇此等重案不應出入任意。若此此案設令九卿等依樣畫題。亦自必同干重譴。然使非朕於一切讞案悉心衡量。逐案細閱。在九卿等安知不以模稜塞責。而開泰又安知不以改入情實委其責於九卿。終自以翫法曲全為得計哉。朕於官方民瘼所關。惟慎持三尺。俾情罪一歸平允。決不因若輩妄逞伎倆。稍為遷就以撓定憲。開泰著交部嚴加議處。並將此通諭中外知之。○乙丑

上詣

皇太后行宮問安。○諭軍機大臣等。扎拉豐阿奏稱。科布多屯田約計大小麥收穫在七分。以上惟所種之粟。因氣寒霜早。秀而不實等語。杜爾伯特人等在烏蘭固木耕種。烏梁海人等在布拉罕察罕托輝耕種。俱獲豐收。科

布多相距不遠。從前扎哈沁等亦曾開墾。收成尚好。看來此次或播種稍遲。或霜雪早降。又或土性不宜種粟。著傳諭扎拉豐阿詳詢該處舊日居人酌量辦理。其青稞一種既係蒙古地方所宜。來年自當廣為播種。毋致失時。○兵部議准。陝甘總督楊應琚奏稱。烏魯木齊原派屯田之甘涼西寧河州安西各官兵。今既告駐遷移。請俱歸入烏魯木齊協標兩營管轄。從之。○旌表守正捐軀之直隸定州民彭增明女彭氏。河南項城縣民郭三妻夏氏。○丙寅。諭曰。諸徐孫條奏七品以下官生帽頂不遵定制。緊用素金。請嗣後編檢知縣等官改用蜜蠟頂一摺。所奏原為慎重等威起見。但從前議定頂式。分別銜品。著在儀章差等本為詳備。今因官生等妄意希榮。假借乃不先懲其違例之咎。而轉欲紛更品目。增出蜜蠟一項。則事涉煩瑣。可不必行。但內外督撫部臣俱應留心查察。即需次京城未

登仕版各員亦有步軍統領及五城御史等各衙門可以隨時稽察嗣後倘有故違成式戴用混淆不分金銀花素如該御史所奏者即行叅革治罪以重名器○又諭曰楊錫紱奏請將臺莊開內淤淺之處實力挑挖一摺著交張師戴阿爾泰即行詳悉查明如有必須疏濬段落該處現有應動歲修銀兩可即酌量動支辦理一面具摺奏聞原摺並發○諭軍機大臣等戶部覆奏御史寧泰等原叅錯支銀兩一摺內稱該部原係按例辦理並無錯誤御史等將條例內字樣遺漏舛錯是以摺奏等語著將原摺交在京總理王大臣將該部既未違例御史因何查叅之處一併傳齊詢明據實覆奏尋奏御史寧泰永明等查叅圖米善張秉鈞二案因據鑲藍旗來文開載條例係該旗繙譯時錯寫遺漏致誤會例意叅奏請將該御史及繙譯之章京交部察議得旨寧泰永明已延三著免其交部餘

著交部察議○又諭前因開泰定擬綿州知州程嘉當婪贓妄斷一案情罪失當已降旨宣諭並將該督交部嚴加議處今檢閱刑部所進招冊貴州廣東四川三省原擬緩決經九卿改入情實者共九件而四川一省則有七件之多秋獻大典該督並不加意慎重一味意存姑息是其徇名錮習牢不可破豈久任封疆者所宜出此開泰著傳旨嚴行申飭○又諭曰溫福等摺奏本年經紀應領運米腳價銀兩較少而一切置辦口袋等項均係照常備辦其勻扣項下除抵補外尚不敷銀五千五百餘兩請展限一年俟各項銀兩扣完日再行接扣還項等語本年天津截留備用漕糧雖係臨時酌量降旨而各省所有應留應緩之數則先期可以約畧而知所用口袋自可早為籌備何必年年儘數製辦此在經紀等或可藉口不知豈倉場侍郎及坐糧廳等亦可諉為不知乎此次不敷銀五

千餘兩著加恩准其展限一年嗣後該侍郎等務須先時計算酌量籌辦毋得槩令按照每年常額豫辦徒致糜費周章又諭曰舒赫德查奏安寧家產現存銀已有二萬餘兩其家人李忠亦有二千餘兩之多安寧身任關差即每年養廉稍有存積亦不應如此饒裕其為負恩肥橐不問可知從前金輝奏安寧任內應追採買絲勛多用銀六千餘兩並短少庫貯閏月銀一萬餘兩朕尚以其平日為人拘謹於差務尚知黽勉恐承辦諸事不無墊用傳旨薩載等令其設法辦理今安寧敗露若此其家現擁厚貲何用接任之人代為籌補且安寧虧課漁利薩載現與陳宏謀列名同奏薩載豈不知之其一切應追各項自當於其任所貲財及李忠等各家人所有產業嚴查抵補至安寧在闕所任用者不獨李忠一人此外或有親信書役及買賣舖戶人等領貲營運情事已密諭尹繼善令其詳

悉查辦薩載現係接任尤為切近務須實力會同辦理毋稍徇隱將此一併傳諭知之○山西道御史戈濤奏訪得本科順天鄉試有割卷及謄錄改文之弊乞勅關中主司監臨將各卷查封欽派大臣勘閱得旨著照所請行所有應派大臣官員俟迴鑒後該衙門奏請辦理丁卯諭軍機大臣等近日天氣晴朗想畿輔各屬情形自亦融和方觀承回抵天津經過積水地方及今夏被澇各州縣其水勢曾否消涸所有補種秋禾收成若何至永定河一帶秋汛雖已過期現在水勢有無長落其一應隄埝是否俱各完固該督去後未見陳奏及此深為廬念著傳諭方觀承詳悉查明一併據實速奏尋奏八月以來運水歸漕淀水暢注各屬秋禾大勢有收永定河水減落隄埝完固得旨覽奏稍慰○軍機大臣等奏李懷林案內鈔寫逆詞之趙文太供認不諱應與李懷林等一體辦理得旨趙文

太著即凌遲處死伊妻孫氏子燈山幼女一口俱著從寬免死發往葉爾羌賞給額敏和卓鄂對等為奴餘依議○又議覆定邊左副將軍成衮扎布等奏本年科布多所餘糧石尚敷二百人籽種議於喀爾喀杜爾伯特扎哈沁內派往耕種等語杜爾伯特扎哈沁人等甫經安插不便遷移惟扎薩克圖汗部落公品級扎薩克阿喇布坦屬人現在閒住請派出二百名於科布多耕牧從之○戊辰兵

部議准兩廣總督蘇昌奏稱廣東雷州協並徐聞海安二營向隸高州鎮管轄查雷州協距高州六七百里距瓊州陸路無多海面百里且瓊鎮轄兵不及高州之半請將雷州協及徐聞海安二營撥歸瓊州鎮統轄從之○貸給甘肅隴西靖遠寧遠伏羌安定漳縣通渭安化武威平番永昌古浪中衛花馬池等十四廳縣本年被旱貧民口糧籽種緩徵新舊額賦○己巳諭軍機大臣等阿桂明瑞等

奏稱現在安插伊犁之察哈爾厄魯特兵丁編設佐領給與孳息牲畜仍先給口糧以資接濟等語此項察哈爾厄魯特兵丁除牧養牲畜外尤當以耕種為業今既遷移安插自應代伊等籌畫生計所有新到各戶口俱令其實力開墾餘俱如所議行○軍機大臣等議覆都統巴爾品奏稱察哈爾鑲黃旗右翼四旗副總管及捕盜官不曉清文蒙古語者甚多有名無實應請出缺裁減再命盜案件

俱由都統衙門彙辦請兩翼各設筆帖式一員副都統衙門各設一員均應如所奏從之○叅贊大臣阿桂等奏葉爾羌喀什噶爾送交布疋正賦有餘請嗣後哈薩克布魯特貿易及屯田兵所需俱於此項動支又喀什噶爾布質薄色淺係從回人採買請停辦送報聞○庚午

上奉

皇太后自避暑山莊迴鑾○詣

皇太后行宮問安。○諭軍機大臣等和其衷奏稱。派往喀什噶爾等處官兵。自烏魯木齊起程。有嚮導外委把總丁建業引路。錯誤多行五站。官兵口糧不足。已派德文速辦前往接濟等語。官兵嚮導宜派索倫厄魯特等熟悉道路之人。始免錯誤。乃轉令綠旗兵丁前引。以致馬匹疲乏。口糧罄竭。殊不可解。著傳諭旌額理等。令其明白回奏。外委丁建業甚屬冒昧。該處雖經懲責。嗣後遇應陞缺。出不必列名。以示儆戒。○喀什噶爾辦事尚書永貴等奏。布魯特等購買回城軍器。應令各阿奇木。於各卡執照內。填寫數目。若私行交易及收買過多者。截留報聞。○是日駐蹕喀喇河屯行宮。○辛未。諭軍機大臣等。阿桂等將遣往哈薩克之侍衛翹蘇勒等稟述。阿布賚言詞。併鈔錄阿布賚書呈奏。哈薩克自內附以來。頗知恭順。朕屢次加恩。但伊等貪利性成。罔知大義。宜恩威並示。今年哈薩克越境游

牧。塔爾巴哈台大臣拏獲其人口牲隻。經朕降旨賞還。原因伊等無知誤犯。故格外施恩。乃不知感愧。轉以未經全數給還。作書索討。阿桂答書訓飭甚。是但措詞尚有未當。伊等須峻詞嚴飭。方知畏懼。倘稍形怯懦。反致啟其驕縱。著傳諭阿桂。若哈薩克再差人來當即致書。諭以爾等自歸降後。大皇帝嘉爾等恭順。疊沛恩施。今年潛至塔爾巴哈台游牧。人衆牲隻。俱經擒獲。大皇帝矜恤爾等。無知悉令賞還。爾等理宜感戴厚恩。自知愧悔。乃不知厭足。妄自致書索討。若將原書奏聞。大皇帝知爾等貪利昧義。必加懲責。是以未經具奏。若照例辦理。凡越境滋事者。將人犯治罪外。牲隻等物。悉收取賞給兵丁。前因奉大皇帝恩旨。未經如此辦理。嗣後若復越境游牧。務即照例嚴懲。雖悔無及矣。以爾阿布賚平素恭順。特致書提撕。倘仍不改。我等必行入奏。爾時大皇帝天威不測。興師問罪。爾等

游牧尚能恬然乎。當以如此詞氣責之。○又諭曰。阿桂奏阿布賚懇遣回章奇什等語。章奇什歸附受恩。伊等豈能索取。阿桂致書。乃云為之奏請。太覺姑息。著傳諭明瑞。阿布賚遣使來問及章奇什時。當云厄魯特。哈薩克均係天朝臣僕。章奇什歸附後。大皇帝用為侍衛。汝等何得索取。且汝書云厄魯特。哈薩克。孰嘉孰否。厄魯特臣服已久。悉遵國法。爾哈薩克係極邊化外。是以大皇帝加恩。較厄

平定太

一

魯特為優。即有違犯。亦加寬宥。若恃恩而驕。妄生事端。縱大皇帝憐憫曲宥。我等亦必執法請懲。○吏部等部會議。兩江總督尹繼善等疏稱。六塘河修防向無專員。查有常州府海防同知事簡可裁。請移設六塘河。專司水利。及鹽河各壩。再六塘河綿亘六州縣。須佐雜分管。查清河縣楊家莊主簿。安東縣長樂鎮巡檢。俱可就近兼管。海州惠澤司巡檢。應移駐張家店。沐陽縣縣丞。移駐錢家集。宿遷

縣縣丞。移駐永濟橋。桃源縣古城巡檢。移駐史家集。聽同知調遣。應如所請。從之。○禮部議覆。浙江學政李因培奏。鄉飲賓生監耆民。請分別服色等語。貢監生。照應選之職服用。耆民應穿常服。濫用金頂補服者。飭地方官嚴禁。從之。○又議准。浙江學政李因培奏。稱浙省士子。竄身里役。如莊書。圩長。垌長之類。請一概禁止。埠頭牙行。二項世業生監之家。應令無頂帶者。報名給帖。至社長。應以殷實

平定太

一

農民。承充州縣官。不得濫報生監。應通行各省遵照。從之。○叅贊大臣阿桂等奏。烏里雅蘇台解到孳生駝隻。查照甘省之例辦理。從之。○葉爾羌辦事都統新柱等奏。八月初六日。巴達克山穆喇特伯克前來貿易。告稱。愛烏罕頭目。愛哈默特沙。遣使貢馬。我頭目素勒坦沙。亦遣使隨同入覲。報聞。○以廣西右江鎮總兵書通阿。為阿勒楚喀副都統。○建福建閩安水師右營兵丁營房五百間。從總

督楊廷璋請也。是日駐蹕常山峪行宮。
壬申

上御行殿勾到各省情實官犯及倫紀攸關並雲南貴州四川情實罪犯停決官犯內河南斬犯一人倫紀攸關內直隸斬犯一人安徽斬犯三人江西斬犯二人福建斬犯一人河南斬犯一人山東斬犯一人山西斬犯三人四川斬犯三人雲南斬犯一人又貴州情實斬犯三人餘一百十一人予勾。○叅贊大臣阿桂等奏伊犁屯田用牛較馬為優請將官牧牛給回人令其孳生不准倒斃得旨如所請行。是日駐蹕兩間房行宮。○癸酉

上詣

皇太后行宮問安。御行殿勾到廣西廣東福建情實罪犯停決廣東斬犯二人福建斬犯二人餘一百六十九人予勾。○旌表守正被戕之奉天海城縣民袁鳳瑞妻王氏直隸任邱縣民籍喜然女籍氏。○是日駐蹕要亭行

宮。○甲戌吏部議准盛京禮部侍郎卞塔海奏稱盛京各部庫使例由盛京禮兵二部侍郎將官學覺羅學官生考試挑補請照部院考筆帖式例由將軍派兵防查再盛京將軍總管八旗學請添派將軍會同考試從之。○以直隸天津鎮總兵常復為正藍旗蒙古副都統調山西太原鎮總兵丑達為天津鎮總兵以四川夔州副將台布為太原鎮總兵以故甘肅洮州土指揮僉事晉景瑜子朝龍貴州黎平府古州司正土官楊枝先姪澤遠襲職。○廣東巡撫託恩多疏報乾隆二十六年分雷州瓊州二府屬開墾荒蕪稅地一頃二十八畝有奇廣州潮州肇慶羅定嘉應五府州屬開墾荒蕪稅地四十八頃有奇。○是日駐蹕密雲縣行宮

大清高宗法天隆運至誠先覺體元立極敷文
奮武孝慈神聖純皇帝實錄卷之六百七十

實錄卷之六百七十

三

大清高宗法天隆運至誠先覺體元立極敷文
奮武孝慈神聖純皇帝實錄卷之六百七十一

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午九月乙亥諭軍機大臣

等朕檢閱刑部所進本年秋審招冊內江西
一省經九卿改入情實者共有七件之多常
鈞前在軍營少有勞績是以加恩擢任巡撫
理應益加鼓勵實心奮勉況秋獻大典更當
詳慎覈擬以肅刑章乃該撫一味意存姑息
竟致改駁七案從前見常鈞有漸趨要譽之
意是以將伊調任甘肅今於江西秋審一事
觀之是其漸染沽名惡習已可概見常鈞著
傳旨嚴行申飭嗣後亟宜痛加前改諸事認

真方不負委任封疆至意○旌表守正捐軀之山西祁縣民呂振興妻馬氏○是日駐蹕南石槽行宮○丙子月食○

上迴鑾奉

皇太后居暢春園○詣

安佑宮行禮○幸圓明園○丁丑

上詣暢春園問

皇太后安○諭前因胡寶琮患病降旨令其寬心調攝并特賜葢附以冀速痊今據奏到現

在病勢仍無增減飲食不能加進朕心深為軫念豫省恐一時不得良醫調理或未能速於奏效著太醫院慎選御醫一員并著派乾清門侍衛明仁帶同馳驛前往診視○聞展辦事郎中德爾格奏闕展里野木齊木吐魯番糧石供支有餘應及時出糶報聞○以鑲紅旗蒙古副都統五吉署理藩院侍郎○賑恤山東齊河濟陽禹城臨邑長清陵縣德平平原德州德州衛惠民陽信海豐樂陵商河

濱州利津霑化蒲臺聊城堂邑博平茌平清平莘縣冠縣高唐恩縣夏津武城館陶東昌衛邱縣臨清壽張等三十五州縣衛本年被水貧民蠲緩新舊額賦○戊寅諭京師時屆冬月五城設廠煮賑俾無業貧民得資餬口今歲近京收成稍歉四鄉貧民赴廠就食路途既不無向隅人眾亦易致擁擠著加恩於五城例設各廠外每城各再添設一廠於東壩蘆溝橋黃村清河樹村五處照舊章程一體妥辦再增派滿漢科道各五員會同五城御史督率司坊官悉心經理毋使胥吏侵扣滋弊俾赴食者均沾實惠其都察院堂官仍不時自往稽察副朕軫念窮黎至意該部即遵諭行○又諭舊例王公等甲米原在京倉支放後因通倉糧石陳積部議改赴通倉關支第念往返運費必多虛糜其中或將糧石就通糶賣於八旗口食轉無裨益所有今年五旗王公等甲米及八旗佐領坐甲米石俱

著在京倉支放。嗣後每年通倉貯米酌量敷用。倉場侍郎等即奏明多運京倉。俾王公等甲米支領。既不需跋涉。而於日用益為饒裕。該部即遵諭行。○又諭前降旨借給八旗兵一月餉銀。分作半年扣還。但時屆寒冬。未免拮据。著加恩展至明年四月起限。○己卯吏部議覆前任湖南按察使嚴有禧奏。官員承辦承審承緝事件。封印期內展限一箇月。第人犯在逃。即時拏緝。猶恐隱匿。若以封印寬其督捕。則官役疎懈。點犯得乘機遠遁。嗣後各省承緝事件。停其封印展限之例。應如所請。從之。○旌表守正捐軀之浙江仁和縣民徐士升妻洪氏。○庚辰

上詣暢春園問

皇太后安。○諭貢院為掄材重地。理宜闕敞整肅。用光盛典。而肇建歷年既久。廨舍侈剝日增。雖每科支項增修。所司率係臨時苦補。且未免有冒銷。安能期其完善。今歲夏秋霖雨

稍稠。內外廉官房號舍。並因積淤未滌。湫濕難居。司事諸臣。關防匝月有餘。昕夕辦公。殊堪軫念。其點名搜檢處所。前已飭部定議。新開東西二門。第士子觀光雲集。即分行序進。猶不免需時稽候。至漏下二三刻。未遑竣事。而督察大臣等。亦苦侵晨薄暮。糾防漸懈。幾至屢照生疲。又豈別弊甄才之道。今若於照牆南再建磚門二座。將大門儀門並易三間。為五間。俾士子俱由兩旁四門魚貫分進。實為時半功倍。著交三和英廉會同禮部順天府。悉心通行籌勘。斥蠹材。培圯趾。疏水道。固周垣。務令內外官生一切居處。爽塏謹嚴。允協規制。所有應修各工。即速詳悉定議。以聞。務於明春會試前。歲工再闌。中舊貯書籍。殘缺不完。試官每移取坊間刻本。大半魯魚亥豕。自命題發策。以及考信訂譌。迄無裨益。應將鄉會兩試需用各書彙列清單。就武英殿請領。內府官本。鈐用該衙門印信。備貯應用。

該管官前後檢明入冊交代稱朕興賢闡門至意○又諭曰容保奏副都統鄂岱家人王二平日與旗民結交滋事正欲訪查辦理而鄂岱畏罪令王二自縊等語鄂岱身為副都統縱放家人與旗民結交已屬不合及王二事敗將軍欲行查辦理應將王二嚴究乃反令其自縊其中必有情弊鄂岱著革職拏交刑部審明治罪○辛巳諭本年係屆軍政之期適值冬令著展限至明年四月舉行○軍機大臣等奏臣等審訊老格出兵時擄獲婦女什物種種卑鄙無恥按照軍令即應正法請將老格擬斬監候秋後處決從之○調直隸提督齊斌為江南提督以直隸馬蘭鎮總兵色克慎為直隸提督直隸大名協副將愛柱為馬蘭鎮總兵○壬午工部議覆前任廣東巡撫托恩多疏稱連州坑尾冲煤山煤坑已盡餉項難完請封停豁免應如所請從之○癸未

上詣暢春園問

皇太后安○諭曰善保所遺公爵該旗以應否承襲請旨殊屬未協前慶復等所襲公爵未准承襲者以

孝昭仁皇后

孝懿仁皇后俱係繼立之后非納木圖伯起所襲公爵可比諭旨剖示甚明善保所襲公爵係

孝誠仁皇后之父噶布拉膺賞承襲者

孝誠仁皇后為

皇祖聖祖仁皇帝原配之后其公爵豈可停襲皇祖時不准長泰承襲公爵自有深意

皇考聖諭甚明他人不知莊親王安得不知該旗誤引條例具奏殊屬不曉事體著軍機大臣會同該旗都統等於噶布拉之孫內揀選一人帶領引見○戶部議准前任廣東巡撫托恩多疏稱豐順縣扛猪排牛角袋二處鉛廠石堅礦盡應封閉從之○甲申諭本年大

臣官員秋俸內應扣之項俱已展限一季無俸人員欠項轉令催交拘例太過亦著加恩展限一季○又諭曰理藩院奏貝勒朋蘇克等拏獲搶奪馬匹之賊匪等語朋蘇克等俱著交部議叙內扎薩克等尚知感恩奮勉是以賊匪二十餘人全數拏獲至喀爾喀等遇此等事件往往遷延不力實屬怠玩嗣後逃人賊盜各部落應悉力查拏如果奮勉緝獲不使疎脫朕必加恩若置之膜外以致遷延

朕亦必嚴治其罪將此通諭內扎薩克喀爾喀四部落知之○諭軍機大臣等成衮扎布等奏准阿桂咨哈薩克奈曼鄂拓克多羅特拜等稟稱聞得烏梁海等今春過額爾齊斯驅哈薩克克呼鄂拓克之馬三百餘匹隨追至渡口僅取回百餘匹因斥以此事既與爾等無涉且傳聞未實如果有之俟本人控告再行查辦等語著傳諭成衮扎布車木楚克扎布等轉交烏梁海總管察達克圖布慎等

將有無此等情節即行查明如實有其事則甚屬乖謬從前哈薩克巴魯克巴圖爾搶掠烏梁海等朕特命納旺往諭阿布賚始伏罪乞恩將所掠人口牲隻查還今察達克等自當約束屬人俾不滋生事端乃反竊取哈薩克馬匹致伊等得以有詞殊非體制成衮扎布等即嚴行查禁具奏○又諭曰旌額理等奏烏魯木齊建造城署營房派都司永海革職總兵吳士勝等率領弁兵督催奮勉等語

永海著以應陞之缺即用吳士勝以遊擊補用其千總把總十一人俱著酌量賞給以示鼓勵尋欽定城名曰寧邊曰輯懷堡名曰宣仁曰懷義曰樂全曰寶昌曰惠來曰屢豐○兵部等部會議各省裁汰驛丞或改設巡檢等事宜前經京畿道御史呂光亨條奏兵部議覆令通行各省督撫查議具題今據各省所議福建山東江蘇並無驛丞驛務俱係州縣官管理應毋庸議其原設有驛丞專司驛

務及佐雜兼管驛務。并驛丞兼管巡檢事者。各該督撫或因離城寫遠。或地當孔道。請照舊存留。其原係驛丞請兼管巡檢事者。直隸之雞鳴萬全。雲州。長安。山西之甘桃。柏井。芹泉。太安。江西之通遠。四川之魏城。劍門。武連等。十二驛。其請裁驛丞改巡檢兼管驛務者。湖北之山坡。港口。石橋。孱陵。呂堰。建陽。湖南之橋頭。大荆。馬底。船溪等十驛。其請裁驛丞將驛務歸縣及巡檢兼管者。湖北之東湖。湖南之青岡。山塘三驛。歸縣管理。山西之成晉。歸石嶺關巡檢。湖南之長安。歸城陵巡檢。均移駐管理。又山西史村。仁義二驛丞。前經裁汰。今該撫疏稱。途衝差繁。請將所裁成晉驛丞。移駐史村。兼巡檢銜。裁汰橫嶺背巡檢。移駐仁義鎮。兼管驛務。均應如所請。其應付差使所粘印花。據各督撫查覆。俱未盡一應。令一體粘貼州縣印花。驛站錢糧。俱飭該州縣經理。至湖北撫疏稱。黃岡縣但店鎮。應添設

巡檢一員。即以裁汰東湖驛丞改設。移駐彈壓。雙城巡檢。移駐黃陂要地。應准其添設。移駐所議發驛徒犯。或歸州縣。或派驛站管束。俱因地制宜。應如所議。應換給江西通遠驛兼管巡檢事務記。湖南橋頭司巡檢兼管驛務。大荆司巡檢兼管驛務。船溪司巡檢兼管驛務。馬底司巡檢兼管驛務。長安司巡檢兼管驛務印信。各依所擬字樣鑄給從之。乙酉。

上詣暢春園問

皇太后安○詣

大高殿

壽皇殿行禮○還宮○大學士劉統勳等奏御史戈濤奏順天科場情弊。奉旨派臣等勘閱各卷。實無割換之弊。惟落卷內查出改塗太多。形迹可疑者三本。應交刑部傳訊。查科場例內原有卷尾自注改塗字數之條。近日多不奉行。請勅禮部酌議。請旨遵行從之。丙

戌。

孝慈高皇后忌辰遣官祭

福陵○吏部等部會議山西巡撫明德奏稱潞安府所屬八縣幅員遼濶煙戶殷繁防範不易須兼轄之員移駐各縣適中之地查潞安府同知駐劄府城無應辦之事實屬冗閒請移駐長治縣太義鎮凡各邑交界藏奸之所俱得就近查緝衙署照例添建換給潞安府分駐太義鎮同知關防應如所請從之○丁亥諭軍機大臣等適因老格獲罪查伊什物據供伊之馬畜現俱在富德馬廠內牧放富德馬廠在張家口外第六臺附近地方馬畜並厄魯特男婦人等甚多臺站章京畢齊罕扣代伊管理等語朕以勲舊大臣數家內馬廠牧羣設或有之至富德乃烏拉齊伊何至亦有馬廠牧羣是以降旨交巴爾品查明具奏今據巴爾品奏稱富德牧廠內共有駝一百一十一隻馬五百十五匹牛一百五十五頭

羊三千隻此內除倒斃售賣外現有駝一百一十一隻馬四百七十一匹牛九十四頭羊一千四百六十隻此項馬畜內有少給銀緞等物向扎薩克王公等購換者亦有竟向伊等索取者等語此誠意外之事甚堪駭異近年因蒙古等馬畜較前稀少一切官用尚且停止採買富德係理藩院尚書豈尚不知此而反向伊等購買索取馬畜數千有是理乎且其中雖云購買或竟未給價即使給價以此少銀緞便獲如許馬畜亦與索取者無異富德前在軍營所據馬畜什物正復不少朕豈不知但身在行間稍有據獲索取尚可容恕是以伊等到來時朕並未深究今到京身為該部尚書豈可復向蒙古等混行索取馬畜耶令伊管理藩院便如此向蒙古等索取馬畜若令伊管理銀庫即將國帑私行取用乎富德乃烏拉齊在軍前稍効勞績朕即施恩用為尚書領侍衛內大臣並令在軍機處

行走因伊本係烏拉齊恐勲舊大臣或將伊輕視諸處往往留伊地步畧以殊恩即如去歲阿里衮到京論及伊等前在呼爾璘打仗時富德曾被賊圍阿里衮送馬之便衝入將伊救出伊謂並無此事且在朕前爭論至變顏作勢甚屬非禮若係他人彼時朕必拏問治罪即明正典刑亦理所當然因念伊如禽獸之愚魯烏拉齊故姑容寬宥伊不思感戴朕恩反如此貪婪豈謂身已成功便可肆行無忌乎即以此次大功告成而論亦朕豫為籌畫調兵發往而眾大臣兵丁等俱遵朕指示奮勇前進始能告成豈伊力之所能乎即伊此次稍有勞績朕即格外施恩伊平日果能謹身慎行何至以此賊私被朕聞之若謂諸大臣與伊不合將伊陷害而諸大臣之斷不敢行之於朕前者亦眾所共知也若將此事竟為隱諱不行奏聞始獲伊心豈朕前所能行之事耶即此看來心術不良之人肆行

私弊雖不自行首出

天亦不容必致敗露即如富德寄信嗔責成衮扎布之事朕何由而知亦經成衮扎布具奏朕始得知耳再老格之事與富德何涉因查老格什物供出伊所有馬畜數匹附於富德馬廠牧放等情又查出伊種種貪婪行止此非伊福量已盡不能承受朕恩

天奪其魄惡跡自然敗露而何前因富德微功朕即格外加恩用之顯要之任伊如此行為殊負朕恩著將巴爾品摺鈔寄富德令其明白回奏至蒙古王公原不應私行餽送富德馬畜然富德乃該部尚書若不索取伊等因何餽送此次姑不深究嗣後蒙古內若復有私行餽送該部大臣馬畜者朕決不姑貸必一併治罪將此曉諭御前乾清門行走大臣侍衛等外並通行傳諭知之○是日起

上以孟冬享

太廟齋戒三日 戊子

孝敬憲皇后忌辰遣官祭

泰陵○諭曰富德為理藩院尚書恣意妄為目無法紀實為異事若不訊明治罪嗣後何以用人著安泰福隆安馳驛前往將富德革職拏解來京○江蘇巡撫陳宏謀疏報乾隆二十六年海州開墾荒田一百四十五頃有奇已丑諭曰御史永安奏請簡派京堂科道查察直隸賑務一摺似為慎重民瘼起見而於事理實未深悉今年直隸近京所屬低窪之地夏秋被澇雖較去歲分數為多而降旨截漕五十萬石勅部撥銀八十萬兩以資撫綏加之本省常平倉等穀賑借之用籌備已屬周詳方觀承在任年久一切地方民事亦能體朕宵旰之懷悉心經理徒令信使四出無論於事無裨設使奉命者人眾勢紛其中有一二好事之徒大則別生掣肘小則徒增酬應閭閻豈沾實惠况此尚畿輔近地耳設遇遠省偏災能一一官由中遣乎向來簡派

察賑大員或因旱澇重災或因封疆之吏措置未善致干糾劾是以特旨舉行非可援為成例且羅列多員轉使郵傳載道重為歎鄉滋累也第該督撫等或以朕不輕命使遂謂耳目不能徧及督辦稍有懈弛致胥役侵肥窮黎失所則科道等正當確訪嚴叅重示懲儆又何慮輦轂近地尚有風聞不及之弊耶是又在方觀承之勉副朕望矣將此宣諭中外知之又諭浙江海寧一帶塘工最關緊

要今春巡幸抵杭之次日即赴老鹽倉尖山等處相度指示飭令修築柴塘並建設竹簾坦水各工用資保護今據莊有恭奏查勘工程俱已陸續完竣餘工並皆穩固等語該撫督率各員儻辦歲工甚屬盡心深可嘉予莊有恭著交部議叙所有在工勦事各員並著查明分別咨部議叙以示獎勵又諭曰理藩院奏敏珠爾多爾濟所管旗分被災請借俸銀散賑等語著加恩賞銀三千兩以備賑

用。○又諭曰。新柱補授理藩院尚書明瑞補授正白旗領侍衛內大臣。現在著如松署理。○諭軍機大臣等。莊有恭奏查勘海塘情形。一摺。已於摺內批諭矣。至所稱江溜日益向南。觀音堂東西一帶陰沙起積。漸有漲復情形。自屬吉兆。而塘脚老沙。仍日漸向西坍塌。此蓋為迴溜所逼。若於念股頭用木龍挑溜。使正溜通向南趨。葛畧此或因勢利導之一法。此處能用木龍如法疏濬。尤覺易為見功。其製用之宜。高晉素所熟悉。南河現屆冬季。亦無緊要修防事務。著將圖內硃批之處。一併傳諭高晉。令其詳細籌酌。一面即行赴浙。會同該撫酌量妥辦。并諭莊有恭接到此旨。於高晉未到之先。如以為可行。即將用木龍處。一切應需物料工匠。豫為儲備。俟高晉一到。即可尅日興工。並不致稽延時日也。若彼二人相視。以為勢不可行。亦不必勉強。○又諭曰。湯聘奏彭澤縣民吳華國等毆母至死。

一案。僅將吳華國一犯凌遲處死。而同時在場見聞之吳思民等。乃以次分別定擬。甚屬錯謬。此等倫常逆惡之犯。關繫重大。吳思民等以一母之子。目擊七旬老母為惡兄毒毆。以至斃命。乃既隱忍曲從。又為附和掩飾。似此罪大惡極。實非人類中所應有。尚可意存姑息。令其稍緩須臾。俾得視息於光天化日之下乎。所有案內之吳思民、吳英奇、吳山岳、吳湖傑俱著即行斬決。以正倫紀。而肅刑章。○吏部議准。江蘇布政使蘇爾德奏稱。凡官員革職後。有應追之項。即行嚴追。如不能全完。即照定限。催令速回旗籍。轉咨勒令嚴追。倘逾限不速起程。令該督撫即題參將該員治罪。該管官議處。從之。○戶部議覆江蘇巡撫陳宏謀奏。稱嗣後關榷錢糧出入支銷。及分派人役稽徵稅課等項。仍聽該監督查辦。其地方官呼應不靈。及地棍阻撓滋擾家人書役需索等事。均令督撫就近查察究處。至

開稅缺少。例交督撫查勘覆奏。其逐一經徵銀數。應令監督按月知會督撫。龍江、淮安兩關。歸兩江總督稽查。許墅關。歸蘇州巡撫稽查。應如所請。從之。○又議准。江蘇布政使蘇爾德奏稱。嗣後糧驛二道。遇有新舊交代。各該督撫親往盤查。所有收支實存數目。仍令藩司覈明。加結詳送督撫保題。倘結保後。有虧那等弊。照例分賠議處。從之。○刑部議覆。湖北按察使高誠奏稱。嗣後流罪人犯越獄脫逃。各按律加二等。三犯以次遞加。滿流人犯。改發邊衛充軍。原犯充軍者。照在配脫逃。加等調發。原犯極邊煙瘴充軍者。改發黑龍江等處。給披甲人為奴。均不得以罪止滿流定擬。應如所奏。從之。○實授英廉為戶部左侍郎。○命兵部尚書劉綸。工部尚書歸宣光。戶部左侍郎于敏中。俱在紫禁城內騎馬。○是月。江南河道總督高晉奏。河工向設葦蕩兩營。採運蕩柴。惟是將備武弁。於額料分派。

款項冊籍。多有未諳。兵目盜賣。攪和諸弊。叢生。查河庫道專司收支錢糧事務。尚簡該道駐劄清江。若令就近兼管。洵為妥便。得旨。如所議行。○山東巡撫阿爾泰奏。東省本年歉收。武定府屬之濱海州縣。來歲青黃不接。有需豫籌。若於青萊價平處。採買備糶。輓運為勞。查鄒平、長山、淄川、新城、章邱、利津六縣。本年所徵漕米內。有應運青州滿營兵米一萬七千餘石。供來歲支放。懇令改運武定。以備糶濟。其青州兵米。查青萊屬糧價尚平。請動司庫銀兩採買。得旨。甚妥。如所議行。○山西巡撫明德奏。歸化城五廳地方。土肥田廣。糧裕價賤。如購買積貯。內地遇有需用。可就近撥濟。除托克托城已買貯軍需外。歸化城和林格爾薩拉齊清水河四廳。請每處添設常平倉穀三萬石。得旨。如所議行。○山西巡撫明德。河東鹽政薩哈岱奏。河東鹽池地處低窪。四圍設有隄堰。查夏縣白沙河。為九峪十

八岔水所匯歸河身近山沙土居多所築南北兩岸土堰往往潰決今年閏五月陰雨水漲上游衝決各土在在危急當經趕築堵禦奈終係沙土旋築旋衝大為鹽池之患請將白沙河南北兩岸改建石工得旨如所議行○陝甘總督楊應琚奏新疆各處運送物件均由肅州雇車需費甚繁甘涼等鎮餘存孳生暨雜項駝共三百餘隻請挑撥二百隻交肅州擇廠牧放凡過運送新疆物件即用此轉運得旨如所議行

實錄卷六十二

實錄卷六十一

五

大清高宗法天隆運至誠先覺體元立極敷文奮武孝慈神聖純皇帝實錄卷之六百七十一

大清高宗法天隆運至誠先覺體元立極敷文
奮武孝慈神聖純皇帝實錄卷之六百七十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午冬十月庚寅朔享

實錄卷之六百七十二

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○頒乾隆二十八年

時憲書○以正黃旗滿洲副都統廣成

為正黃旗蒙古都統調正紅旗蒙古副

都統永興為正黃旗滿洲副都統○辛

卯

上御乾清門聽政○詣暢春園問

皇太后安○幸圓明園○諭曰安寧縱容家人

實錄卷之六百七十二

李忠在闕舞弊侵課肥橐一案陳宏謀久在

同城不先劾奏有旨交部嚴加議處旋據尹

繼善等查奏李忠在江蘇所婪貲產至三萬

兩之多是其平日惡蹟昭著已為有目所共

見陳宏謀安坐膜視其意何居該撫向與安

寧不合眾所稔知然以此等關係地方利弊

大事豈有引避小嫌之理陳宏謀果於安寧

在時一一據實奏聞朕必深為嘉予乃既有

心隱徇於前直至事將敗露始乘其身後以

一奏塞責。蓋其模稜頽廢之錮習。一成而不可變。且自揣與尹繼善素號相能。遂爾因循玩愒。日甚一日。若此。則江蘇一切吏治。尚欲望其力為振刷。能乎不能。所有江蘇巡撫著莊有恭調補。熊學鵬著調補浙江巡撫。馮鈐著調補廣西巡撫。湖南巡撫員缺。即著陳宏謀調補。所有降級之處。著照部議。准其抵銷。倘不知痛自創艾。復蹈故轍。則自取罪戾。朕不能更為該撫貸也。可將此通諭中外知之。

實錄卷六十一

三

○諭軍機大臣等。熊學鵬已有旨調補浙江巡撫。浙省現有督辦海塘各工。事關緊要。該撫若俟部文到後始行起程。未免有稽時日。著傳諭熊學鵬接奉此旨。即將本任印篆及一應事務。交與布政使顧濟美護理接辦。星速趕赴新任。兼可與調任巡撫莊有恭面商一切也。○又諭曰。莊有恭已有旨調補江蘇巡撫。其海塘工程。莊有恭籌辦甚屬盡心。且浙省現有查辦災賑事務。亦為緊要。莊有恭

奉到調任之旨。可將巡撫印務暫交索琳護理。其日行事件。照常接辦。惟塘工賑務。仍聽莊有恭專司其事。蘇杭一水之地。案牘往還。本可無虞稽誤。至熊學鵬到浙。其賑務自可妥辦。至海塘工程。自不如莊有恭之輕車熟路。鄰封伊邇。應令兩撫彼此始終會辦。在莊有恭亦斷不因既經調任。稍分畛域也。將此一併詳諭知之。○又諭曰。宋邦綏來京。陛見已面諭令其馳往湖南署理巡撫印務。俟陳

實錄卷六十二

四

宏謀赴任湖南。再回湖北本任。其湖北巡撫印務。現有愛必達兼攝。馮鈐一俟宋邦綏到日。即赴廣西之任。陳宏謀俟莊有恭到蘇交代。即往湖南任事。著傳諭該督撫等知之。○以湖北布政司照磨兼管驛鹽道庫大使事。從調任巡撫湯聘請也。○壬辰。上幸靜宜園駐蹕。閱健銳營兵。翼日如之。○盛京將軍舍圖肯府尹通福壽等奏奉天府治中高錦巡察海船。收受陋規。得旨著派倉

場侍郎蔣炳馳驛前往會同查審○旌表守正捐軀之直隸三河縣民王如林妻金氏廣東英德縣民吳添崇女吳氏○癸巳軍機大臣等議覆雲貴總督吳達善奏鬼酋宮裡雁之妻攆占等焚殺孟連土司刀派春分別審擬一摺查宮裡雁係緬甸頭目與木梳之甕籍牙連年讎殺力難抵禦逃入外夷值孟連土司刀派春招降宮裡雁猶豫未決先令伊妻攆占及頭目撒拉剝歸投自帶妾婢僕從暫駐石牛地方撒拉剝因該土司恣意勒取牲畜器物遂糾衆焚殺刀派春全家與攆占逃逸訊據黨從阿九阿占等供稱宮裡雁實不知情但伊以勢窮避地詭令妻屬歸投致撒拉剝啟釁焚殺罪有攸歸應如該督所擬宮裡雁照酋人聚衆劫殺例擬斬立決傳首示衆阿九阿占訊係知情應照例枷號三個月從重賞給功臣之家為奴其在逃之撒拉剝攆占等嚴飭緬國緝獲另辦刀派春之子

刀派先年未及歲擇本族土舍照管成立後飭令掌管地方從之○甲午

上還圓明園○諭軍機大臣等近日查辦富德家產查出富德各處營運生理又寄銀與瑚爾起放債圖利隨朕南巡時曾帶人淺交與高恒燮賈富德以微有軍功經朕施恩授為尚書御前大臣乃至種種營私罪蹟昭著前命安泰等拏解來京仍念伊有老母其本地所有家產諭令毋庸查辦今看其如此圖利伊回時必有攜帶即著福隆安會同該將軍將伊本處所有家產查明入官伊舊住房屋著賞給伊母居住仍賞給二百兩產業養贍查抄後福隆安即將富德帶赴來京安泰著留盛京會同侍郎蔣炳等審辦高錦事件○乙未

上詣暢春園問

皇太后安○還宮○諭軍機大臣等昨通福壽奏奏治中高錦並自請交部議處一摺已交

蔣炳一併查審。今據府丞歐陽瑾奏高錦行止貪鄙原係革職留奉効力贖罪之員乃通福壽逾格保奏開復旋又令其署理治中通福壽若止為其所愚輒復保請尚屬情理所或有若其中查辦海運亦有豫知情弊或於該員不無受賄徇縱之處則此事關係不小矣。理應徹底根究務得實情現有旨令安泰就近會同蔣炳及該將軍等秉公查辦著傳諭蔣炳到奉天務須先行嚴細審鞫毋得稍有遷就完案之見以成信讞並不可存待安泰審理之意。歐陽瑾摺一併鈔寄。丙申諭京城為輦轂重地輪蹄輻輳並屬通衢修治最關緊要。近來朝陽廣寧等門繕修石道官民均為便利。惟德勝門外至清河一帶地勢低窪一遇大雨時行遂多泥濘此時積水雖消而車馬往來尚多未便現在物價較昂未必不由於此著步軍統領衙門會同兆惠舒赫德和爾精額倭赫選派賢能司員詳加相

度妥協修治其餘各門距從前修理之時亦屬年久或有未能平坦不便行旅之處並著查勘奏明酌量辦理多興土功亦所以養窮民也。○又諭曰普福奏現在淮關委用筆帖式長泰增綬福保等三員俱已期滿可否陸續送京引見一摺內務府官員原有三年考察分別黜陟之例長泰等在關助理業經期滿若仍久留該處無論該員不得陞轉之階且人數不齊安保其中必無以事熟轉生弊端者又何如另易新員俾得黽勉從事乎嗣後各關差委筆帖式等三年期滿即送內務府帶領引見候朕降旨酌量留京分別錄用所需接委人員仍由內務府另揀奏明更替庶於用人辦公均有裨益將此通著為令。○諭軍機大臣等張師載奏天井臨清等關自八月至今共過商販麥石四十二萬八千有餘於地方民食自可以資接濟但此項既係商人自行運販惟以得價為便售賣自無定

所著傳諭方觀承令其留心體訪其糶賣之處。是否沿途隨便求售。抑或願赴近京起卸。雖商情所便。不得強為禁制。而於地方價值之低昂。濟用之多寡。皆可得其實數。可即查明據實奏聞。再直屬被水窪地。此時已屆冬令。非設法疏濬涸出。何以無誤春耕。目下稍事因循。一遇沍寒。便已難施畚鍤。於民生關係甚重。並著方觀承。趁此天時融暖。及早悉心營度。於沮洳附近之土。多方挑挖溝壕。俾積水不致稍淤。而赴工貧民。兼可藉以餬口。實為一舉兩得。可即一面詳悉具奏。一面即行乘時妥辦。尋奏查南北運河。販麥商船。多赴張家灣起卸。由京商轉運至京。足資民食。至疏消窪水。開濬溝渠。已通飭各屬分別籌辦。得旨。惟以速辦為要。地方疲玩之習。不可不亟力整飭。○又諭。據淑寶奏伊犁撤回綠營官兵八百四十五員名。自哈密照例支給口糧等項。令其回肅等語。哈密距肅已近。

且撤回官兵。自非派往官兵可比。其應付口糧等項。向來有無成例。今伊犁撤回各官兵。所有支給口糧等項。伊犁雖自稱照例。其實係照何例。並給與幾日之處。著楊應琚查明具奏。可將此傳諭知之。尋奏。向例官兵口糧。自肅州至哈密。往返均按站支給。二十一日。嗣經裁減二日。此次仍給十九日。第回兵與派往有別。請嗣後再減五日。祇給十四日。得旨。如所議行。○調任湖南巡撫湯聘疏報。乾隆二十四年。建始縣墾額外民田稅二十八頃八十畝。○雲南巡撫劉藻疏報。乾隆二十六年。昆明宜良嵩明羅次易門賓川河西彌勒尋甸祿勸元江永昌麗江會澤鎮沅恩樂恩安大關和曲硯嘉等二十府廳州縣墾額外民屯荒田灘地稅一百二十八頃一十九畝有奇。○予故正藍旗蒙古都統兼理藩院左侍郎多爾濟祭葬如例。謚勤僖。○丁酉。諭工部議覆御史湯世昌條奏廣開溝渠以資蓄

洩事宜一摺。所辦尚未周悉。自古力役一項。載在方策。以其事本為捍衛民生而設。則供官正所以自為。並非徵求無藝也。第如摺內所稱富者計畝出夫。貧者出力餬口。一切並責之閭閻。微特小民久樂昇平。已素不識公旬之令。設使地方不肖吏胥。因而從中高下其手。苛派賄脫。何所不有。轉非因利利民之本意。自宜分晰籌量。如其地與民田。民舍甚為切近。而工程又屬細微。民間願出已力從事者。原可聽其自行疏築。不必繩以官法。外若其工非旦夕可既。而民力更難以全任。則仍當官為酌助口食之資。庶民不艱而事易集。於公私實為兩得。是在封疆大吏。飭屬善為之耳。現在京城外道塗低窪。已降旨特派大臣會同步軍統領衙門辦理。此案南城外應修溝渠道路。亦非五城御史等所能任。並著工部會同步軍統領衙門。悉心確勘妥辦。○又諭曰。朱丕烈奏編修柯瑾罔識例禁。

投遞書函一摺。已交軍機大臣傳詢。據柯瑾稱。有同鄉翰林胡紹鼎之子。與楊姓締姻。後因胡紹鼎休致。背約賴婚。是以致書朱丕烈。冀其為之成就等語。職官悔婚傷化。其事原有關風紀。但胡紹鼎既不自行理直。與柯瑾復何干涉。況此等戶婚事件。在京則有都察院等衙門管理。外省則有督撫為政。於學政更非專管。乃柯瑾不但踵門請謁。又復致書隱躍其詞。安知非意中別有干瀆情事。一經叅劾。遂諱而不言。僅以此等道路不平之事。直為搪塞耶。今即不必再行深究。而柯瑾身係翰林。不能鍵戶讀書。輒將無干已責之事。不避形跡。欲與學政關說。自有應得之咎。柯瑾著交部察議。朱丕烈據實直陳。能破除一切依違瞻徇之陋習。實可嘉予。著交部議敘。至胡紹鼎與楊姓聯姻一事。詢據胡紹鼎稱。實有楊為璧圖賴婚姻情節。其是否僅係一面之詞。著愛必達就近東公查辦。亦維持風

教之一端也。尋湖廣總督愛必達奏訊據楊為璧與胡紹鼎議婚後。因婦女之言彼此負氣以致愆期。無實在賴婚情事。除飭令完娶外。胡紹鼎楊為璧合依不應律。分別苔責。照例納贖報聞。○理藩院奏土默特蒙古丹達哩協同烏爾圖那蘇圖奪占溫得爾庫之妻一案。分別首從。丹達哩擬絞。烏爾圖那蘇圖擬發往寧古塔充當苦差。得旨丹達哩依擬應絞著監候。秋後處決。烏爾圖那蘇圖係蒙古人。若發往寧古塔與伊本處無異。反得安逸。且恐增長惡習。烏爾圖那蘇圖著發往廣東烟瘴地方充當苦差。嗣後審擬蒙古匪犯俱照此例法起辦理。此案殊覺罷軟。著交部察議。○山西巡撫明德奏運送京工木植自穆納山取道黃河沿途水陸趲運得旨此項木植多至十二萬有餘。與其不論大小自穆納山取道黃河。又由豫運通。尚有陸路間隔未免過於周章。不若分別挑揀量其材料足

充京工資用者。派員解送。其餘短小不中程尺之木。即就近變價辦理。則公用既得良材。而運費亦為節省。著派和爾精額馳驛前往會同該撫揀擇妥辦。不得任胥役人等從中侵蝕滋弊。以收實用。○予故黑龍江將軍綽勒多祭葬如例。謚質愍。○旌表守正捐軀之山東濮州民張山菊妻李氏。○戊戌上御懋勤殿。勾到奉天陝西湖廣情實罪犯停決奉天絞犯二人。湖廣斬犯四人。餘一百二十六人。予勾。○貸綏遠城保安拒門二口。本年霜災莊頭口糧。○已亥諭據永寧等奏巴里坤奎素等處向來地氣較寒。一切細糧均難成熟。今屯田試種以來該遊擊王紹宇備李執中叢天祝焦燦等俱能盡心出力。督率兵丁多方培溉。是以初次試種小麥收成已及五分。其餘豌豆等項亦俱有收。再革職副將楊景達到屯効力三載。經理一切勤慎奮勉。並無貽誤。於屯務實多裨益等語。所有王

紹李執中。叢天祝。焦燦等俱著交部議敘。其革職副將楊景達。著加恩以都司用。以示鼓勵。○禮部先期疏請本年冬至應行慶賀禮。得旨奉

皇太后懿旨。今年冬至著停止行禮。○庚子。上御懋勤殿。勾到浙江江西安徽情實罪犯。停決江西斬犯一人。絞犯一人。餘一百八人。予勾。○諭國家秋讞大典。上繫刑章。下關民命。慮囚時設情法。未衷於至當。何以昭弼教之用心。每歲刑部進呈各省情實人犯招冊。朕必將逐案事由。一一披覽。使獄情毫無遺漏。而各案適輕適重。又詳為稱量。比擬有其跡。雖涉疑似。而情尚一線可原者。既於冊內折角存記。即情罪重大於法。萬無可貸不得已。而予勾之案。亦反覆推勘。於所犯實款。隨其節目。次第折角。及勾到前一日。與臨勾之時。必三經檢覈。務俾苗髮無疑。然後予勾。所謂求其生而不得。則死者皆無憾也。夫緩重犯

須臾之命。使被害者銜冤不得自申。婦寺之仁。刑官尚不應出此。何況天下共主。若以既麗三尺。均屬應斷之刑。而不為銖量權衡。將案內細微同異之由。並歸無憾。則此輕掉之心。已乖與衆共棄之本義。此朕自揣兢兢明慎。固不肯稍存寬嚴之見。即督撫九卿已數為擬議。猶未敢稍緣因任者也。第向來勾到事畢。原閱招冊。祇存貯內閣。其問刑衙門。不過與聞臨時商榷之言。而先事全局折衷。所以一再不釋者。未能盡喻。又何以定司憲之準。所有本年各省情實招冊。可於勾到後。即發交刑部。其近今二三年內閣所貯冊。一併檢發該部。俾詳悉披繹。因端領會。庶幾體朕意以求協中。則成牘不為無助。著為例。○諭軍機大臣等。昨審訊富德一案。伊家人積靈阿供出。扈從南巡時。曾帶人獲七觔。交高恒變價三千兩等語。高恒身為鹽政。當富德囑託時。不應允從。即伊敦請不已。亦當據實奏

聞。乃代為售賣。殊屬非是。但查此淺係帶至蘇州變價。尚非高恒所屬地方。且所與價值亦無逢迎多給之處。高恒著傳旨嚴行申飭。加恩仍留鹽政之任。嗣後凡事皆當謹慎。不可復蹈故轍。○軍機大臣等議覆喀什噶爾辦事尚書永貴。陝甘總督楊應琚等奏新疆綠營兵丁換班事宜。一。新疆南北各城綠營兵一萬餘名。除烏魯木齊攜眷移駐兵外。計換班兵七千餘名。應於陝甘各營攤派。查安西提標五營。業經分駐巴里坤等處。哈密一協。兵少差繁。均無庸派撥。其餘各營實兵七萬四千餘名。每千名派往百名。每兵百派千總外。委各一管領。一派出兵。以一營同駐一城。如數不敷。於近營添撥。即以本營員弁領轄。一官兵俸賞。照英吉沙爾換防例。官每員支給俸一年。兵每名支給銀十五兩。一各官騎本身例馬。每匹日支草束銀一分。於馬乾銀內扣還。每兵四名給車一輛。由肅州送至

哈密。其前赴防所兵三名。給駝一隻。折銀十八兩。自購所領駝價。至防所後。交該督等量其道里遠近。酌減扣繳。均應如所請。從之。○又議覆。察哈爾都統巴爾品奏。稱察哈爾右翼地租銀。請照正黃旗例。分賞貧人一摺。查正黃旗地租銀五百九十三兩零。於乾隆二十二年。經巴爾品奏准。將該旗歲得租銀歸公。除公用外。餘銀存貯。俟成總時。查明本旗貧人分賞。在案。現在正紅旗歲租二十八兩零。鑲藍旗二千三百八十二兩零。自應照正黃旗一體辦理。至鑲紅旗租銀一千一百五十餘兩。經前任總管高恒奏准。購買牛羊。孳生為貧人生計。查此項牛羊。倒斃者多。毫無實濟。應請將現存牲畜。均勻分賞。嗣後歲租亦照正黃旗辦理。惟各旗地租多寡不等。必將本旗銀分賞本旗。未免不均。應統計四旗共得租銀。均齊數目。畫一辦理。其每年各佐領修理旗纛帳房。并給戴干寺及本衙門印

房浩齊特游牧主事等項需用若干。餘銀作何存貯分給之處。交該都統查奏另議從之。
○辛丑諭曰。睦朝棟前因妄奏迴避官生。有意沽名。取悅於衆。按律定擬。罪由自取。但尚與納賄營私者究屬有間。即入情實。原不予勾。睦朝棟著加恩准其贖罪。○禮部議覆。江西巡撫明山奏稱。外省陋習。遇督撫經過地方。知府以下。皆跪道迎送。殊失儀制。請嗣後直省府州縣及同知通判等員。凡一切上司經過。非有事傳詢。不許出城跪道迎送。至蟒衣關係章服。尤禁濫用。違者查參。應如所請從之。○以正藍旗蒙古副都統勒克為涼州副都統。吏部郎中額勒景額為正藍旗蒙古副都統。兼署正白旗蒙古副都統。○壬寅上詣暢春園問皇太后安。○辛圓明園。○癸卯諭軍機大臣等。據鄂寶奏稱。拏獲逃犯六十七。審訊即請正法。其疎防之署把總趙隆兵丁陳順等。照例

察辦等語。六十七身係旗人。自鬻為奴。因犯竊發。逮又於中途逃竄。情殊可惡。著照鄂寶所奏。即行正法。把總趙隆等解送犯人中途逃逸。若止照例辦理。不足示懲。著交達桑阿從重治罪。嗣後凡解送發往回城人犯中途脫逃。除將逃犯嚴拏外。解送之人擬以死罪監候。俟拏獲時再行釋放。治以應得之罪。若一年不獲。奏請正法著為例。○又諭據新柱奏稱。愛烏罕汗愛哈默特沙遣使齎表進貢。請令沿途各督撫豫備筵宴等語。愛烏罕係一大部落。其使人初次經行內地。天朝百技俱所未觀。所有經過各省會理宜豫備筵宴。陳設戲具。以示富麗嚴肅。著交楊應琚常鈞鄂弼明德方觀承等整齊備辦。○又諭曰。愛烏罕汗愛哈默特沙初次遣使入貢。使臣回時理宜派出大臣護送。并降旨加恩。著額勒登額齎旨前往。額勒登額熱河副都統員缺著瑪瑞署理。○又諭曰。新柱等奏愛烏罕使

人回時。賞賚物件。請用官駝護送至葉爾羌。照數辦給。送至原游牧等語。愛烏罕使人回時。由京至葉爾羌。自應辦給駝隻。其由葉爾羌至伊游牧。途路甚遙。伊等性情貪冒。初次官為供應。嗣後若不辦給。反啟疑慮。且各城伯克頭目等見之。亦似有所區別。著傳諭新柱。自哈密至葉爾羌。著照所奏。給予駝隻。送往交界之處。不必至伊游牧。其使人途次。若力形拮据。新柱等可酌量協濟。仍將不得援以為例之處。明白曉示。○軍機大臣等議准。兵部侍郎王際華奏。武闡外場。例於箭冊註明雙單好字。及合式字號。至內場閱文。先就雙好字中擇取。次及單好字。其合式一項。中者甚少。竟成虛設。請嗣後武科鄉會試。除雙單好字號外。毋庸另立合式字號。祇於雙單好字號視各省中額較前多挑。以備採擇。從之。○戶部議准。廣西布政使顧濟美奏。稱向例州縣官交代。定限兩月。嗣因倉穀至二萬

五千石以上。錢糧至五萬兩以上。盤查須稽時日。遞予展限。遂致藉端遲延。查州縣倉庫。均應實存新舊稽覈。惟憑冊籍請嗣後於原限兩月內。舊任造冊以二十日為限。新官查覈轉造以四十日為限。其例得展限者。計算分扣。逾限查叅從之。○順天武鄉試。以府尹羅源漢為監臨官。洗馬史貽謨為正考官。翰林院侍讀饒學曙為副考官。以故鎮國將軍祿慶子倫成襲爵。○甲辰諭叅革海州知州鄔承顯之子鄔圖麟等。久未歸旗。一案經該旗叅奏。降旨令陳宏謀明白回奏。今據覆奏。鄔承顯任內有應追贓項未完。著落伊子等繳還。是以未即回旗。再鄔德麟已入含山縣籍。家口仍留福建。舊任鄔圖麟等並請改入河南孟縣民籍等語。似此逗遛規避。實乃漢軍敝習。不可不亟為整頓。伊等既任外官。罷職如有未完之項。自應勒限速完。實係無力追繳。即當歸旗按律治罪。何得任其遷延。

在外籍設措告貸之名任意遊蕩抽豐馴致滋生事端何所不有况該旗已經咨催飾詞延玩此在民人猶不可為訓何况身隸旗籍者乎即以情願改歸民籍而言現在著有定例並未稍為禁阻第伊等或呈請於並無追項之前或聲明於完欠回旗之後皆屬可行若借此巧為趨避懸帑項而廢官方此風斷不可長嗣後外省叅革漢軍人員有應完款項著於定限內催追為數過多酌量展限完納倘逾限不完即將該員等解旗治罪此案陳宏謀既未准其改籍並將鄔德麟等押解回旗該旗可即遵旨辦理將來有似此等者均照此例行○禮部議覆大學士劉統勲奏稱科場試卷向例於每場文末自註添註塗改字數不得過百字其添註字樣係跨格寫眉目易明至塗改字數不能均齊須分晰計算請嗣後覈算字數除塗而不改者計數易了外其塗甲改乙者不重算塗少改多者以

所改之字計塗多改少者以所塗之字計令士子於文末另一行低二格寫添註塗改共若干字違者貼出受卷官失查者察議應如所請從之

大清高宗法天隆運至誠先覺體元立極敷文奮武孝慈神聖純皇帝實錄卷之六百七十二

大清高宗法天隆運至誠先覺體元立極敷文奮武孝慈神聖純皇帝實錄卷之六百七十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鎮邊將軍滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午十月乙巳

上詣暢春園問

皇太后安○還宮○諭伊犁為新疆都會現在駐兵屯田自應設立將軍總管事務昨已簡用明瑞往膺其任著授為總管伊犁等處將軍所有勒印旗牌該部照例頒給○諭軍機大臣等扎拉豐阿奏稱科布多屯田需用青稞籽種一百石尚可向蒙古游牧貿易之商民等購買不須運送等語科布多既有內地商民行走將來生聚必繁今伊犁等處俱建

造城堡若照例興工甚屬有益科布多所有

舊城基址既稱地形卑溼著傳諭扎拉豐阿

伊現在安營於科布多之南哈勒巴山即於

該處擇高燥之地計可容兵民若干不必過

為寬大派屯田綠旗兵從容興築其如何辦

理工程之處會同成衮扎布酌議具奏○又

諭曰成衮扎布奏稱阿桂等前奏烏梁海搶

掠哈薩克馬匹奉旨查詢即派侍衛明成同

烏梁海內大臣察達克至阿勒坦諾爾總管

扎喇納克處詳悉訪察俱稱哈薩克前經搶

掠我等牲畜什物俱蒙恩索還其所掠俄羅斯

斯烏梁海宰桑庫克新等之物並未給還是

以伊等報復曾搶哈薩克牧羣二次等語看

來情形已自明晰著傳諭明瑞遇哈薩克人

等即以所訪緣由明白曉示若哈薩克欲給

還牧羣當向俄羅斯索取與內附之烏梁海

等無涉○丙午

上御懋勤殿勾到江蘇河南情實罪犯停決河

南斬犯二人。絞犯一人。餘一百二十三人。于勾○諭。今日勾到河南省情實招冊內有智洪義。因父智順被趙二毆死。趙二已擬絞候。智洪義藉言報讎。輒殺其子趙倉。律擬斬候。九卿及閣臣以趙二業已減流。將智洪義可否改入緩決之處。夾簽聲明。意雖近似於事理。猶未剖晰。至當儒生牽拘春秋復讎之說。如唐陳子昂甚至欲以一時旌誅並行。固為乖誕。即韓愈柳宗元號稱善駁。大率不越以其父死於法。不死於法為斷。殊不知其父已死於法。則固無可復之讎。即不死於法。亦必其相關而殺者。其情固可矜。而其死固可寬。亦無可復之讎也。乃其子仍推刀讎人之骨。亦豈春秋之法所當予。此在唐代刑制懈弛。其說尚不能無弊。況我朝百餘年來。明罰勅法。審慎周詳。若使生殺不關讞司。而一介不逞之徒。竟爾私行報復。其可乎。且智洪義謀殺趙倉時。毆死其父之趙二。尚以論抵在監。

其時智洪義不得有復讎之說也。以謀殺覈擬情實。自為辟以止辟正義。第統覈前後緣起。智順既為趙二毆死。而智洪義又復抵償趙倉。則是智姓兩命。而趙姓一命。於事會所致。稍覺情有未平。朕是以悉心研究。將該犯停勾。然使徑行改入緩決。則無以杜私復之源。而與謀殺本律亦大相背戾。該犯本年雖已停決。其下次秋審仍應入於情實。俟將來年久。或遇恩例減等之事。再酌量辦理。從前廣東省有曾士標毆死曾會昌。律擬斬候。而曾會昌之子曾朝宗復殺死曾士標之子曾亞二。律擬斬決。朕特降旨改為絞決。蓋其情又與智洪義不同。此皆朕虛心定讞。務期纖微悉協。既不肯因其似而不研究。其真亦豈可以廷議僉同。稍存因任之見乎。將此通諭問刑衙門知之。○諭軍機大臣等。今日富明安奏到各摺。朕初閱其數。陳地方事宜。多用文辭緣飾。已非實心任事之道。即於摺內詳

悉批示。及接閱別摺。亦皆撫拾事件支節。不過飭部議覆。於政務無甚關繫。至閱其請改理事同知一摺。則有心取巧情形。一時盡行流露。始知前批並非逆詐。而此風斷不可開也。向來駐防省分。設有理事同知。以事涉旗民。不得不隨宜立制。若江西向無旗員分駐。無論礙不於倫。即所稱甚密甚速之事。惟伊自辦。覓人代譯為艱云云。試問該省有何重大之事。必須清字密寄速寄。待伊獨行籌畫者乎。其意欲藉是表其盡心而隱以增設滿員。此種伎倆。豈能逃朕洞鑒。富明安著傳旨申飭。仍將批諭處加意猛省。毋再怙非取戾。○又諭據巴爾品等奏稱達什達瓦所屬厄魯特等。應得孳生牲隻。所有解往馬三百匹。牛一百五十頭。請照時價酌減。於伊等俸餉內坐扣等語。此項馬牛價值。例應坐扣。但念厄魯特等。係新附之人。若將俸餉坐扣。伊等生計未免拮据。著施恩賞給。免其扣價。傳諭

額勒登額將此通行曉諭三旗厄魯特。併諭今已爾品知之。○丁未。

上御乾清門聽政。○諭京師五城冬月煮賑。雖已降旨加恩。於附近四鄉增廠散給。比聞村落就食之人。比城內較多。所有每月額支米石。恐尚不敷用。著再加恩。每日每廠各加米一石。其中各廠人數不齊。或將在城之贏餘。協濟在鄉之不足。著都察院堂官等通融酌劑。善為經理。務俾貧民並霑實惠。副朕軫念至意。該部速行。○諭軍機大臣等。據福增格奏稱。遣往福州之另戶閒散滿洲內。挑選水師營五十名。壯丁難以足額。請將舊有水師營漢軍存留一半。其餘一半出缺。俟挑取另戶步甲餘丁。開檔另記檔案之人。操練熟嫻。後再將存留之漢軍出旗。調充綠營等語。福州舊有漢軍官兵。皆係另戶世僕。非開檔另記檔案之人。可比。不可因此輩將正身漢軍反今為民。現在遣往福州之開檔另記檔案

人等著交與福增格先行調充綠營其正身漢軍仍著存留當差俟數年後開檔另記檔案之人陸續出旗該將軍再行奏請由京派遣另戶滿洲如果生齒繁衍再將漢軍人等調充綠營廣州亦有此等遣往之人交明福等一體辦理○以故四川松茂道屬黨壩土長官測旺子倉朗貴州思南府安化縣土主簿楊世正子泰運各襲職○戊申

上御懋勤殿勾到山東山西情實罪犯停決山

東斬犯五人絞犯一人山西斬犯一人餘一百十九人予勾○兵部等部議覆山西巡撫明德奏稱山西南關權店號亭三驛向設驛丞兼巡檢銜管理三驛僅馬十匹無差使文移往來驛丞均請裁又潞安府屬長治長子二縣地廣事繁僅知縣一員耳目難周請各設縣丞一吏役照經制額數即以所裁三驛內弓兵阜役改撥應如所請從之○山西道御史戈濤奏五城司坊缺西北兩城最繁南

城東城次簡中城最簡各官才具不齊履任新舊亦異恐人地未能相宜請照州縣調繁例嗣後遇有西北兩城缺出即於中東南三城揀選調補所遺之缺歸部銓選得旨此奏原為人地相宜起見自屬可行第西北兩城之缺既由各城揀調則揀調所剩之員勢必仍歸中東南各城將來再遇西北兩城揀調時此等人員若復以充選是自相矛盾矣該御史所見尚不能全局忖量俾可通行無礙

現在各城司坊官准都察院堂官等詳慎簡擇奏明調用西北兩城外其挑剩之員作何存記不令再揀西北兩城缺並中東南各城於新補人員內如何妥協選用不致兩妨之處著交該堂官等會同吏部悉心定議具奏尋奏中東南三城司坊官未經揀調之員遇西北兩城缺出准其調補其業經調簡者都察院存記檔案不准再調繁缺如無可調之員咨部於對品候補人員揀選引見至俸滿候

陞向例五城俱以三年報滿今既分繁簡除西北兩城照舊辦理外其餘三城應改為五年報滿從之○已酉諭軍機大臣等范時紀摺奏京南霸州文安等處地勢低窪易致淹浸請設法疏通添築隄埝改為水田一事此不過偶以近來一二年間雨水稍多竟似此等地畝素成積潦之區殊不知現在情形乃北省所偶遇設過冬春之交晴霽日久便成陸壤蓋物土宜者南北燥溼不能不從其性即如附近昆明湖一帶地方試種稻田水泉最為便利而蓄洩旺減不時灌溉已難遍及倘將窪地盡令改作秧田當雨水過多即可藉以潄用而雨澤一歉又將何以救旱從前近京議修水利營田未嘗不再三經畫始終未收實濟可見地利不能強同亦其明驗但范時紀既有此奏著將原摺一條鈔寄方觀承閱看或有可以隨宜酌採於目下疏消之法裨補一二者該督細心籌議具奏將此傳

諭方觀承知之尋奏直屬試種水田潄洄不常非地利所宜惟京南之文安霸州保定所屬之安州新安等處其低窪各村莊遇水潄時令暫種稻田洄後仍聽隨宜播種得旨覽奏俱悉○又諭曰成衮扎布奏搶掠哈薩克馬匹之烏梁海庫克新係平定準噶爾後逃入俄羅斯者據內大臣察達克云辦理伊等頗易但恐與俄羅斯起釁未敢擅便等語庫克新等假我烏梁海之名搶掠哈薩克馬匹情甚可惡且伊等前曾歸附後又隨果勒卓輝等逃入俄羅斯理應問罪今察達克等既願辦理甚屬妥協何必復生疑慮著傳諭成衮扎布如察達克等果欲前往除擒獲為首人等送來軍營其餘俱給與伊等管轄所有俘獲即交伊分賞効力人衆事竣後朕仍加以賞賚但須慎選幹練之人前往辦理即將此曉示察達克等知之○庚戌

上御懋勤殿勾到直隸情實罪犯停決絞犯二

人餘九十四人。予勾○諭軍機大臣等齊斌現在調任江南提督水師營務。每年有出洋操演會哨之事。伊已年逾七旬。恐不能登舟身親督率。若僅委副參以下偏裨奉行故事。何以重訓練而靖地方。該處附近水師總兵尚不乏員。著傳諭尹繼善齊斌如遇應行出洋事務。即著會同慎簡鎮臣一員往蒞其事。以重營伍。○又諭曰。海明等奏稱此次換班官兵有健銳營前鋒參領納晉泰等六員係乾隆二十三年隨征効力。後又留駐防二年。驍騎校布勒庫等十二員亦効力五年。請旨議叙以示鼓勵等語。大功告成。凡換班官兵俱係駐防。非出兵可比。即有分外出力人員。特請議叙。不過量拔一二以勵其餘。若概行保送。則缺少人多。亦與伊等無益。此次所奏尚係出兵人員。納晉泰等六員著送部引見。布勒庫等十二員著以應陞之缺即用。嗣後如專係駐防人員俱照北路軍營之例辦理。

可傳諭駐劄厄魯特回部各大臣等知之。刑部等部議覆湖北布政使沈作朋奏外省督撫指駁各案除案情重大者應令覈轉之知府赴省審理外。其尋常命盜事件祇調原審州縣至省委員會審。如無出入。即由附省知府審轉。仍許原審知府列銜倘原審錯謬。將率轉之知府及承審州縣一併題參。又降級留任處分向例無級可降。微員文職將俸銀分為十分。每降一級扣一分。武職則將俸銀全扣事同一體。而文武懸殊。請嗣後文職微員遇降級留任處分亦照武職例辦理。均應如所請。從之。○以戶部右侍郎錢汝誠兼署刑部左侍郎。○加賑順天直隸所屬霸州保定文安大城涿州良鄉固安永清東安香河宛平大興昌平順義三河武清寶坻薊州寧河灤州昌黎樂亭清苑安肅新城望都雄縣安州高陽新安河間獻縣阜城肅寧任邱交河景州東光天津青縣靜海滄州南皮

鹽山。慶雲。津軍。成安。廣平。大名。元城。宣化。萬全。懷安。張家口。豐潤。玉田。冀州。南宮。新河。武邑。衡水。隆平。寧晉等六十三州縣廳。本年被水。電霜災。飢民分別蠲緩。應徵額賦。旌表守正捐軀之江西湖口縣民周儼妻彭氏。辛亥。以故四川建昌道屬前後山土司羅蘇衣弟士英襲職。○蠲緩江蘇清河安東銅山邳州宿遷睢寧海州沐陽崑山新陽婁縣南匯奉賢青浦大河鎮海金山等十七州縣衛幫。本年水災。新舊額賦有差。○壬子。軍機大臣等奏。伊犁當勘定之初。為新疆總匯。奉旨設立將軍。一切管轄地方。調遣官兵。自應酌定成規。臣等謹議。凡烏魯木齊巴里坤所有滿洲索倫察哈爾綠旗官兵。應聽將軍總統調遣。至回部與伊犁相通。自葉爾羌喀什噶爾至哈密等處。駐劄官兵。亦歸將軍兼管。其地方事務。仍令各處駐劄大臣照舊辦理。如有應調伊犁官兵之處。亦准咨商將軍就近

調撥。開明職掌。載入勅書。從之。○以原任禮部侍郎徐以烜。原任兵部侍郎張映辰。署內閣學士。○癸丑。諭軍機大臣等。本年秋審。由緩改實人犯。如直隸則有張悅于大小劉可興。陳正裡。建宗三。李天玉王六張四閔三王九成等十一案。江蘇則有趙蘭生王阿三趙勳朱種史牛仔金珠等六案。此等罪犯。俱係情節重大。非竊匪拒捕傷人。即淫兇因姦斃命。或家奴犯主名。分攸關。或逞忿謀毆。情罪狼戾。自當即正典刑。共昭懲創。乃俱擬以緩決。必待定讞。改正督撫等。慎持通省憲綱。以法無可貸之獄囚。冀為稍緩。須臾自博虛譽。是長奸頑。而撓國憲。於辟以止辟之義。安在方觀承陳宏謀等在督撫中。敬歷已久。更事亦多。何屢至輕重失倫。若是殊非朕委畀封疆。明罰勅法之意。著傳旨申飭。兵部奏向例奉天寧古塔黑龍江等處發遣人犯。由兵部發往西安荊州杭州成都等滿洲駐防省

城分別當差為奴。此項匪犯集聚一處，每難約束。查現在直隸、江寧、山西、山東、河南、甘肅等省，俱設滿洲駐防，請嗣後奉天等處遣犯輪流編發各省安插，無庸專發西安等四處從之。甲寅諭：本年浙省秋初曾被風潮收成不無歉薄之處，現今收漕在即，各州縣交納米石必須一律乾圓潔淨，閭閻誠恐艱於完納，著加恩將杭嘉湖三府屬所有應徵漕糧准其私稷並納紅白兼收，俾小民易於輸將，以示體卹。該部遵諭速行。○又諭：據額勒登額等奏，普寧寺工程告竣，新添千總兵丁等，請照守護熱河之例，給予地畝等語。普寧寺千總兵丁既同守護熱河千總兵丁一體當差，著施恩照例給予養贍家口地畝。○諭軍機大臣等：昨步軍統領衙門奏有通州飢民張二等四十餘人哀號求賑，訊供住居小海子村，因歉收難度，向州官求賑不能辦理等語。今歲直屬州縣所有被災之處，屢經降

旨，加恩撫賑，重以截漕五十萬石發帑八十萬兩，俾資撥用。又有常平社倉等項為借種平糶之需，在京五城平糶米豆自閏五月至今未停，冬月煮賑又於在城十廠之外增添各鄉五廠，並倍給日發米石，如此疊加籌畫，凡係直屬近光之民，其需恩較之各省不啻倍蓰。苟有人心，自當共喻，即或生齒繁衍，其間自不乏無知之徒，有司等宣布德意，亦應實力經理，並隨時明切曉諭，使知感恩守分，共樂安全。何至有飢民曉曉赴控之事？此等雖屬一時烏合，無賴其中必有首先倡言邀約之人，理應嚴查重究，以昭懲創。然不肖愚氓刁風固不可長，而地方官於賑糶諸務或實有辦理不能妥善之處，亦難保其必無著詳悉傳諭方觀承，令其體朕痼瘵，在念諄切委任至意，感發天良，殫心察覈。此時各屬承辦情形，務令澤必下究，地方不肖胥吏有應叅奏者，即行叅奏。但既有此等刁控之案，亦

必俟究明處治之後再行辦理。不得以未經定案遽將官吏叅劾致失彈壓地方之道。現在張二等已押解通州該督可於觀音保王檢二人酌量專派一員赴通秉公查訊勿得稍有迴護。○又諭據舍圖肯奏稱聞赫木地方有偷蕩人等因派前鋒章京帶領前鋒協同番役往拏伊等擅將番役細縛毆打經總管什格拏獲王惠等十一人其餘韓雲等現俱脫逃等語。此等偷蕩重犯舍圖肯既派官

兵協同番役往拏何以悉被毆打且致多人脫逃著傳諭舍圖肯將現在拏獲之人訊明伊等黨羽若干籍隸何處現在逃往何方逐細研究交該地方官盡數查拏勿使一人漏網。今奉天風氣日頽舍圖肯身為將軍宜極力整頓不可仍前廢弛。○兵部議覆漕運總督楊錫紱奏稱江南浙江二省領運千總員缺向分繁簡查現在情形名實多不相符江南省江安糧道所屬二十四繁缺內如江淮

衛三幫九幫淮安衛四幫泗州衛前幫後幫廬州衛二幫三幫揚州衛頭幫三幫丁力充裕公事易辦均應改為簡缺至所屬三十一簡缺內如江淮衛五幫大河衛前幫長淮衛二幫徐州江北幫長淮衛宿州頭幫二幫或無屯田或屯田居黃河兩岸須幹員經理均應改為繁缺。浙江省九繁缺內如杭州衛頭幫二幫丁力可支亦應改為簡缺其十二簡缺內如處州衛前幫後幫嚴州所幫嘉興白

糧幫皆丁疲難餉亦應改為繁缺仍照例繁缺在外調補簡缺歸部銓選應如所請從之。○賑卹浙江仁和錢塘海寧餘杭石門桐鄉安吉歸安烏程長興德清武康孝豐山陰會稽蕭山諸暨餘姚上虞杭州湖州等二十一州縣衛所仁和曹娥錢清金山青村下砂二下砂三等七場本年水災飢民竈戶并借給籽種旌表守正捐軀之廣東海豐縣民林景謨妻孫氏。乙卯諭各省提督理應節制

各鎮向來補放時亦並無奏請之例獨直隸古北口提督每更新任必自行題本請旨故套相沿甚屬無謂自後提督到任即照各省例節制所有題請之處著停止○又諭向例各省城守尉協領等三年期滿引見後不再送部引見伊等皆係駐防大員其中豈無可用之人若一經引見不再送部將終老於其任臧否無由得知今各省副將三年期滿其有堪勝總兵之任者由總督出具考語送部引見城守尉協領等亦應照此辦理嗣後令各省將軍大臣等於伊等期滿引見回任過六年後城守尉則將堪勝副都統之任與否協領則將堪勝城守尉及副都統之任與否分別出具考語送部引見以備錄用著為例○軍機大臣等議覆黑龍江將軍傅玉奏稱向例黑龍江降調官員遇應得缺出咨旗帶領引見但該處各員俱係由兵丁題補遇事裁俸多無力赴京請嗣後遇應得缺出即具

奏聲明指缺給與半俸三年無過帶領引見坐補等語查降調人員若指缺給與半俸未免過優漫無區別應於此內揀著有勞績材力出衆者與題補之人一同來京引見候旨補放得旨黑龍江因公降級人員遇有應得之缺該將軍即指缺咨京引見候朕簡放回時給與半俸三年期滿著再給與全俸○丙辰上御懋勤殿勾到朝審情實罪犯停決斬犯三人絞犯九人餘二十六人予勾○諭軍機大臣等據明山奏江西連年豐稔積穀充裕如浙省應需協濟請即於江省常平穀內動撥二三十萬石運浙以資接濟等語今秋浙省間被風潮收成稍歉若得江省穀石撥運接濟俾糧價不致昂貴於民食甚為有益著傳諭湯聘酌量於附近浙省倉穀最多州縣內碾米二十萬石協撥應用其如何運送接遞交收各事宜並著熊學鵬會同湯聘咨商安

辦如熊學鵬尚未抵浙即著莊有恭辦理將此傳諭各該撫知之○丁巳

上御乾清門聽政○諭據安泰等奏審訊奉天府治中高錦勒借店戶銀兩詳稱收受陋規一案內稱高錦屢經差委聲名狼籍府尹通福壽不但漫無覺察又復屢次保舉徇縱顯然同時將軍衙門之委查協領伊昌阿等亦俱得過陋規等語通福壽著解任質審伊昌阿著革職此人素不安靜由革職副都統復用為協領不思潔己贖罪如果有婪索弊端狡不承認之處即照所請用刑研鞫佐領西伯知縣齊法尚巡檢周雲路俱著革職嚴審究擬佐領布顏圖石三保著一併革職審訊如有干涉副都統布顏達賴之事即將布顏達賴一併解任質訊○又諭曰德沁扎布副盟長員缺曾將車木楚克扎布補放車木楚克扎布游牧地在極北且又有別項差務德沁扎布副盟長著諾爾布扎布補授○諭軍

機大臣等永貴等奏稱喀什噶爾換班撤回之健銳營官兵辦給馬駝帳房等件又整理弓矢撒袋鳥鎗火藥委副都統品級富虎帶領起程等語此等撤回官兵不過照常來京且道路久屬清淨並無瑪哈沁何必特行辦給軍裝撤回者既如此辦理則前往換班更當何如永貴此次所辦殊為不曉事理嗣後宜加酌量可傳諭知之○禮部先期疏請十一月二十五日

皇太后聖壽節應行慶賀禮得旨是照例行禮奉

皇太后懿旨今年停止筵宴餘依議○戊午上詣

壽皇殿行禮○諭軍機大臣等據朝銓奏西堡漫店民人等偷竄拒捕毆縛番役一案此案衆犯若因畏罪懼捕冀圖脫身猝遇官兵率行抗拒尚屬常情今乃敢網縛番役將人漫給與商人由店房內放出實屬目無法紀若

不嚴行拏獲。從重治罪。何以示懲。昨舍圖肯具奏。曾諭令查明此夥人衆。共有若干。已獲人內。有伊等夥伴幾人。并將現俱逃往何方之處。逐細研訪。現今安泰蔣炳正在盛京審案。即著傳諭安泰蔣炳。會同朝銓等。務將該犯逐一擒拏。嚴審定擬。應正法者。即著正法示衆。○是月。直隸總督方觀承奏。直屬被災地方。應籌平糶。但各屬倉儲多經動缺。計惟口米尚可挹注。查口外八溝廳貯米已經撥充薊州豐潤玉田三州縣借糶。其四旗廳貯米六萬九千九百四十三石。塔子溝廳貯米五萬七千九百七十一石。零原備內地撥用。請乘冬月人畜空閒時。於該處雇車分運通州春融後。飭令附近水次州縣領回。分別定價應糶。仍將糶價存俟秋後補倉。再昌平順義懷柔密雲四州縣來春修道開溝。應需代賑米。即於進口時酌撥充用。報聞。○又奏。天津商船販到奉天粟米高粱甚多。足徵該處

收成豐稔。查乾隆八年九年十六年。節經動項赴奉採買。由海運分撥。現應循照辦理。在司庫旗租項下。暫借銀十五萬兩。委員往奉天沿海地方採買。合計米價運費。每石成本如止一兩二三錢。即儘數買米。倘值價昂。兼買高粱。俟春融由海運津分撥各屬。以供借糶補額等用。其委員赴奉。應需運糶車價薪水等項。統在司庫耗羨項內酌撥。得旨嘉獎。○又奏。查直屬各處積水附近大城全經涸出。惟低窪處所尚有渟聚。霸州六郎堤等七十三村已涸十分之九。所有千里長堤營田圍埝代賑各工。甫能得土。業已趕辦。文安古窪積水由長隄西馬頭村穿渠入淀。擬淀水稍落。兼用戽斗佐以人力。亦可無誤春耕。寶坻寧河東北一帶毗連天津靜海為衆水滯蓄之鄉。驟難減退。須俟春間水落後相度辦理。京南一帶高處現在查勘興工。得旨此際不上緊興工。代賑更待何時。且春融泥滓又

致誤工作矣。宜竭力速辦。○江蘇學政李因培奏請陛見得旨不必來汝有何可訓。但所謂變化氣質一語亦為學之方耳。○調任浙江巡撫莊有恭奏杭嘉湖紹四府本年歉收現照例撫卹。隆冬尚須接濟。查杭嘉湖三府地近江省商販流通。惟紹興一府隔越錢江兼以連年偏災倉儲多半糶借擬於附近之金華蘭谿等州縣各倉撥穀十五萬石碾米運交報聞。○河南巡撫胡寶瑤奏修理城工數在三百兩以內者經部議准令地方官設法辦理聽紳士商民等捐修在案。惟是定例自十兩起賞給花紅三十兩獎以扁額五十兩以上遞加獎勵至三四百金為止奏給八品頂帶查有力之家急公慕義常願獨出多金限定三四百兩未足示勸且若本有頂帶轉無可獎之處請於奏報時聲明捐貲多者優獎其本有頂帶者交部議敘至以十兩為限其好義而力不足者亦不得與應嗣後無

論捐貲多寡將其姓名銀兩統行勒石則羣情益加踴躍得旨如所請行。○河東河道總督張師載山東巡撫阿爾泰等奏臺莊以北湖口閘舊有滾水壩一座現在水勢一丈二尺有餘長河之水深者亦及七八尺惟大泛口鉅梁閘等處四五尺不等查此兩處泉源從山溝流出伏秋水發挾沙帶泥壅入滾壩本年現屆小挑督率道廳各員實力疏濬俾八閘上下一律通暢不致堵塞報聞。○阿爾泰又奏濟寧州城東北當會府河洸河二河之衝遇水漲輒衝及城垣擬於東北隅外用排椿碎石堅築隄岸其洸河兩岸隄埝與馬場湖圈隄殘缺處一律修補加高庶湖水洸河不致旁逸濟城亦資鞏固又鄒縣白馬河為洩水要渠每泗河水發時由新泗河引入白馬河以洩其勢但二水橫截不能下注輒致泛溢應將白馬河另挑支河一道引歸獨山湖為新泗河入運之路使白馬河不與新

泗交涉兩路暢流。又汶上縣馬莊地方有廢泉十餘道。附近地數百頃。名稻屯。因泉流故道久湮。以致漫溢。遂成沮洳。現擬疏濬溝塍。墾作水田。并令兗沂各屬近水處所一體辦理。得旨。一切留心。可謂知本。○山西巡撫明德奏。綏遠城滿營官兵馬匹歲需料豆一萬八千餘石。現存豆僅敷支至明秋。若俟完後採買。恐致價昂。應先時備貯。擬將黑豌豆牽算購辦。每石酌發銀一兩三錢。採買一萬五千石。得旨。如所議行。○甘肅巡撫常鈞奏。甘省民務力田。不善經營。每秋成後。稍有餘糧。即思出糶。非官為採買。必致囤戶居奇。應於糧多價平地方。不拘上下色樣。飭各屬乘時採買。價銀於減糶糧價內酌量撥發。得旨。如所議行。○調任廣西巡撫熊學鵬疏報雨水情形。得旨。欣慰覽之。今用汝為浙江巡撫。宜速赴新任。一切實心經理。毋為過當之事。模稜固不可也。至海塘一事。汝與莊有恭和

衷共理。彼甚留心。汝應取濟一切勉之。

大清高宗法天隆運至誠先覺體元立極敷文奮武孝慈神聖純皇帝實錄卷之六百七十三

大清高宗法天隆運至誠先覺體元立極敷文奮武孝慈神聖純皇帝實錄卷之六百七十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午十一月己未朔河東河

道總督張師載山東巡撫阿爾泰奏德州城

外西方庵運河距城甚近外逼大溜直刷隄

岸城垣受險請於對岸上自魏家莊起下自

新河頭止抽挑引河一道計長四百九十五

丈於汎水長發時引大溜下注不使衝汕城

隄得旨如所議行 庚申

上詣暢春園問

皇太后安○幸圓明園○軍機大臣等議覆察

哈爾都統巴爾品奏稱察哈爾右翼地租銀

前經議准通計四旗畫一辦理查右翼租銀

每年共四千一百五十餘兩除給戴千寺及

總管印房游牧主事各衙門紙筆銀兩外餘

銀三千二百餘兩應按各旗佐領多少均勻

分派正黃旗給銀一千四十一兩零正紅鑲

紅鑲藍各七百二十三兩零交該總管修補

旗蠹等項計每佐領下有甲之護軍領催披

甲等七十名蠹各二旗各七五人合給帳房

一均於此項支銷其餘存貯通計四年後每

佐領約餘銀一百二十兩即查明貧乏戶

口分賞等語應如所請并令該都統等將每

年所收銀及需用存貯數目造冊咨部從之

○辛酉諭伊犁等處已授明瑞為將軍自應

設叅贊領隊大臣協同辦事伊犁叅贊大臣

著愛隆阿伊勒圖補授領隊大臣著伍岱補

授愛隆阿伍岱賞銀各一百兩馳驛前往伊

勒圖亦由喀什噶爾調赴伊犁所遺領隊副

都統員缺著揚桑阿補授協同永貴辦事

諭軍機大臣等阿桂奏本年伊犁屯田綠營官員所種禾苗為田鼠損傷較去年收成分數稍為歉薄計一夫所獲尚有二十餘石等語屯田稍被災傷而收穫尚未甚歉薄所有承辦官員頗能勸課著加恩交部議敘○又諭曰阿桂明瑞奏稱哈薩克人等性本頑愚不可以理論今春將拏獲伊等頭目及所有牲畜給回伊等轉謂大皇帝矜憐我等不行治罪復來塔爾巴哈台山陰之哈喇巴哈等處游牧似應示以兵威來春擬同領隊大臣二員分為三路領兵前往驅逐多收其屬人性隻釋放二三人令致書阿布賚其牲畜竟不給還以示懲創等語哈薩克等貪得無厭仍行越境游牧理應加以懲創但自明瑞外領隊之伊勒圖鄂津伍彌泰等俱未為諳練軍務今授愛隆阿伊勒圖為叅贊大臣伍岱為領隊大臣計伊等前抵伊犁已屆領兵驅逐之期明瑞與愛隆阿伍岱分路前往酌派

伊勒圖鄂津伍彌泰隨行學習此次重懲越境人等哈薩克所屬或生畏懼貿易者少或糾眾為匪以圖報復俱未可定然亦不得因此自生顧慮遂爾姑息從事至塔爾巴哈台等處雖未便即駐滿洲綠營兵丁似應將厄魯特兵酌令駐劄防守著傳諭明瑞等將來驅逐哈薩克後作何移駐厄魯特兵丁之處會同妥議具奏○叅贊大臣阿桂等奏遵旨體訪哈薩克使人烏默爾因何願來伊犁居住緣由隨令侍衛碩通訪問與烏默爾相識之厄魯特等據稱烏默爾係厄魯特人伊父在噶爾丹策零時曾唆使厄魯特等騷擾哈薩克與其部眾有怨阿布賚因係伊妻弟恐被傷害特遣為使等語因查阿布賚所奏與體訪情形相符其請人往迎亦係求為護庇之意但哈薩克人等多疑恐因烏默爾復居伊犁於途次加以侵掠議於來年三月內遣人守候烏默爾帶回伊犁并乘阿布賚遣信

之便先行劄知報聞○移甘肅淵泉縣馬蓮井縣丞駐踏實營堡從總督楊應琚請也○以故四川建昌道屬郭布土百戶工布交子工布林慶上蘇阿土百戶達結子納松各襲職○壬戌

上奉

皇太后還宮問

皇太后安○諭新修寶譜及將軍印譜解

送盛京後著安放鳳凰樓存貯十寶之次從

前所修寶譜及將軍印譜或貯庫或貯將軍

衙門著照京師分貯交泰殿內閣之例辦理

○禮部議覆順天學政張泰開奏稱宣化一

府自康熙五十五年定為歲科兩試連考該

處士習因考試迨隔三年試後遂營別業致

文藝生疎取進童生每難足額請嗣後歲科

兩次分考使歲試未進者知所激勵以應科

試文風當益振興應如所請從之○癸亥理

藩院奏蒙古王公等馬匹請酌給草料價銀

自行餵養得旨杜爾伯特等皆係新降之人游牧又遠若折給價銀於伊等不便仍照例代其餵養○是日起

上以冬至祀

天於

圜丘齋戒三日○甲子遣官祭

先醫之神○乙丑

上詣

南郊齋宮齋宿○諭新疆地方所有應進貢物

經由各該省州縣境內行走住宿有司固應

加意照料小心護送若果應付草率以致貢

物損壞稽遲固非地方官辦公之道如已按

照分例給付不致有誤公事而齋送貢物之

員有意騷擾地方則斷不可蓋此等微末員

弁罔識事體或不過以鷗鷹犬馬之類過事

矜張於例應給夫馬廩給之外藉勢多方需

索在地方官以貢物之故不敢與較而新疆

應貢物產歲所常有設將來驛使踵轍遞進

為日正長滋累何所底止此風斷不可長倘有此等滋擾之人該督撫等有所見聞不行據實叅奏經朕察出決不稍為寬宥可將此通行沿途各督撫知之○又諭曰金梁自補放總兵以來雖未著有戰功而駐劄伊犁於一切貿易屯田事務辦理俱屬電勉今聞溘逝殊堪憫惜著加贈提督銜賞銀一千兩料理喪事以示優卹並著楊應琚於伊子中年已長成者挑取一人送部引見候朕降旨加恩所有伊犁駐劄總兵應辦事務甚屬緊要其葉爾羌現有駐防大臣無需總兵大員著汪騰龍前往伊犁接辦金梁事務至葉爾羌事務著楊應琚於副將內揀選一員前往接辦○又諭據增海奏拏獲私行買賣人漫王士學等八人照例治罪完結外將人漫及銀八百三十兩一併入官此項銀兩雖例應入官但不酌賞原拏之人不足以示鼓勵著交增海嗣後拏獲此項人等查出銀兩數在百

兩以內者不必入官即分賞原拏之人如在百兩以外作為三分將二分入官一分分賞其電勉出力者應如何分別賞給之處該將軍酌量辦理著為例○諭軍機大臣等據明瑞奏藍翎侍衛阿克棟阿等稟稱護送哈薩克使臣阿塔海至愛呼斯地方見有哈薩克蘇旺鄂拓克之溫布德衣等游牧居住當經阿克棟阿等驅逐始行移徙出界等語看來哈薩克貪得無厭惟圖眼前小利須痛加懲創前經降旨將伊等勦辦可傳諭明瑞此刻伊若仍前越境游牧即當遵照前旨將伊等牲畜掠取若拏獲頭目即行具奏此內即使有阿布賚亦不妨擒拏俾知儆懼○以光祿寺卿耀海為奉天府府尹○丙寅冬至祀天於圜丘上親詣行禮○遣官祭永陵

福陵。

昭陵。

昭西陵。

孝陵。

孝東陵。

景陵。

泰陵○遣官祭

孝賢皇后陵

端慧皇太子園寢○詣

皇太后宮問安。○軍機大臣等議覆。巡察獨石口等處地方鑲白旗護軍統領弘昫奏稱。獨石口地方額設官七員兵百名。向俱在城居住。其口內不過進班數人。輪替防守。查該處為蒙古出入關隘。駐防員弁相離十數里。不便巡查。擬照古北口例。將舊住官房改造口內。應如所請。從之。○又議奏。各省駐防及東三省世職。向照京城八旗例。年幼未當差者。給與半俸。十八歲以上當差者。給與全俸。內

惟黑龍江之呼倫貝爾世職。給半俸未及歲者。給半俸之半。查此項世職無大差。使照京城八旗食俸未免過優。且給俸之處亦未畫一。請嗣後外省駐防及東三省世職當差者。食全俸。已及歲未當差者。食半俸。未及歲者。半俸之內減半給與。從之。○欽差戶部侍郎安泰等奏。審訊奉天府尹通福壽。徇縱屬員高錦收受陋規一案。查有高錦餽送通福壽銀兩等情。得旨。通福壽著革職。所有收受銀兩情節。著交與安泰等一併嚴審。究擬具奏。○丁卯。戶部議覆漕運總督楊錫紱奏稱。各衛僉選運丁向例由千總呈送衛備加結申詳都司。其時不由道府統轄。是以兼令同知通判查驗。自雍正三年裁革都司衛所。俱歸道府考覈。僉丁事宜應祇令知府查驗。詳道定僉。若仍兼送同知通判。不惟多稽時日。且恐吏胥滋弊。應如所請。嗣後同知通判點驗僉丁之例。概行禁止。從之。○戊辰。諭曰。富

德以烏拉齊微末之人由侍衛洊擢副都統西陲之役初命察勘軍站見其尚堪驅策於大兵分路進勦授領隊大臣晉用叅贊尋畀以副將軍數年來不過稟朕指示奔走服勤實則覈其更事戎行副將軍不如叅贊之久叅贊不如領隊之久而身所涉歷率少險多平易以因人集事此朕非常之功不待非常之人之論與富德福將之品題不自今日始定也前者凱旋懋賞念吉林將領中向無受殊榮膺峻秩之員遂加以侯爵重其職掌若御前領侍衛內大臣兼都統理藩院尚書軍機處行走試問此烏拉齊從來罕邁之曠典即令富德自敘成勞敢謂當此無愧否稍有人心亦必斤斤安分既可自保身名兼可全朕用人顏面詎意富德器小易盈肆行無忌以致隳官箴翫國法竟有出乎計料所不及者本年八月伊請假歸省將軍成衮扎布摺奏富德以其不用咨呈輒自移文呵斥朕特

謂妄自尊大不識部院體制諭令明白回奏奏到種種支離矯飾不具論甚至大言今日之準部非昔日之準部今日成衮扎布之為將軍非昔日額駙策楞之為將軍此則復成何語彼時亦僅降旨交部議處而老格以侵用官駝事敗供出馬匹寄牧富德厰內自來宗親望族猶不能盡有馬厰富德暴貴未幾安得有之隨令巴爾品查奏則厰中牲隻現至數千之夥自軍營私留不交官馬外有直向扎薩克王公等勒取者有少為給值抑令多多購辦者在常人已為簞簋不飭矧其出自專轄外藩之正卿比年以辦理軍務蒙古駝馬雖官用每議增價並停其採買富德豈未之聞而恣意橫索至是老格曾掠回部噶岱默特之媳噶岱默特乃久經歸誠効力之伯克况經訴知富德已為行文詰責旋向老格指名索取自配家人深堪駭異甚且以明知不法之事奏覆狡賴直行欺罔又詢出

富德隨駕南巡時挾帶人淺託高恒發賣已給價三千兩猶囑伊僕有再須多貸數千之語幸高恒不肯在揚覓售而已給之銀息不大浮於本是以但行嚴飭不治高恒之罪若富德以內廷扈蹕大員於驍使腥羶之藪不思避嫌明目張膽行同駢儉其貪饕狼籍迥出情理之外因派員檢查家產乃擁貲至三萬餘金計伊在營不越六七載分例所得每歲不越七八百兩加以先後恩賚即使在家在外不費一錢亦安能委積如許富德若此兆惠阿里衮舒赫德等又當何似此非從人設計婪取即為領兵假威剗畧無疑當令解京派和親王簡親王軍機大臣刑部堂官會審富德知出入之數鑿杓難符始稱出兵時曾令家人攜緞布烟茶牟利所致詰以縱有奇贏寄歸一款不應累盈鉅萬復稱皆用臺站馱裝得省運腳因有倍蓰之獲果爾則侵軍需而載私橐急負販而滯顏行此五年大

功安知非一二年可就竟為此等黷貨因循老師糜餉其罪更何可言軍中兜鑿將卒借裹帶之餘便規什一朕皆早有見聞不為推究何則當官必嚴負乘之誅臨陣不諱詐貪之使理固並行不悖也若輩奮身鋒鏑覬餘潤以自封事本難為責備況當國家

鴻貺應期膚功大定所謂成大事者不拘小節酬庸以外固無須寸寸較量耳富德若非回京封賞之後負恩犯法其事連類而出朕曩者何嘗一言追論及此耶昨富德辭窮思遁又自呈告密一封捏攀兆惠家僕亦有營中賣駝各款其意以素與兆惠等不合今引兆惠等並罹一網非惟足快私憾并可張大讞牘使朕難於速結此尤小人無恥所為朕寧肯黑白不分遽為此等伎倆所動無論兆惠前事無憑而還朝以來臺省典司不少未聞現有不檢如富德所為者然使兆惠果不自愛朕豈靳多治一人朝廷遠有乏材之慮乃

謂富德一經封賞。有事重難。究治充類。至於跋扈不逞。則如之何。朕將曷以用人為也。朕加恩富德。憐其起家寒陋。易為滿洲勲舊。世閱輕視。故遇事必為曲留餘地。意轉不無偏向。此廷臣所稔知。兆惠等即與富德素不相能。豈能乘伊告假。於朕前為嘗試下石之計。倘以富德所為。移之於兆惠。恐其早干嚴譴。翻不能需之一二年。如伊貫盈不已。方始因人發覺矣。昔富德往援兆惠時。中途為賊所圍。會阿里衮送馬適至。得以衝鋒前進。乃對朕口奏。必自匿受困之由。重沒他人。欣助之力。悻悻見於詞色。時雖詫其繆戾。尚或憫其無知。何期驕縱不悛。神祇其魄。敗露一至此極乎。且諸大臣並由朕手自提策。日給使令之人。幸際功成。朕以功臣寵命之。則可。若以陳編所紀汗馬勲高。曲賜保全為例。又夢囈不當出此。漢唐以下崛起之君。與將佐本布衣昆弟。一旦主臣位定。勢疑地逼。上以功忌。

下以功爭。所謂彼一時也。朕旁午焦勞。敬成皇祖。

皇考數十年經營未竟之緒。鉅任獨肩。兆惠等聽朕臨遣。遵朕指揮。祇滿洲世僕之常分。伊等既無可爭。而朕又何所忌。即忌亦必先自兆惠。阿里衮舒赫德等。而何有乎微末之富德。富德即云有微勞。亦已階崇五等。班接六卿。所得不為不厚矣。今使罪狀顯著。猶為曲法隱忍。是小功必賞。大罪不懲。百爾臣工將不知有三尺。天下後世謂朕何如。主哉。茲王大臣等研質明確。所有勒索營私各款。已據供認不諱。至軍前剗畧取財一節。特因現無左証。曉曉不承。然其事與軍營漁利劣蹟。朕原已置諸弗問。豈本罪既無疑義。又必更加刑訊。并煩朕之臨軒親鞫耶。富德著即按律定擬具奏。恐在外庸愚無識之徒。未曉富德孽由自作。始末或疑朕不能破格全其終始。是用明晰宣示。俾眾共知之。○諭軍機大臣。

等永貴等奏霍罕額爾德尼使人巴巴什克稟稱伊處貿易人沙薩伊特有馬八十匹為布魯特之薩魯部人掠去隨飭噶岱默特往查其頭目沙巴圖聞信即盡行取出交還等語布魯特等互相掠奪亦事之所有沙巴圖一聞查取之信即行遵照辦理甚屬恭順著傳諭永貴等酌量給賞以示鼓勵噶岱默特奉委查辦亦能實心奮勉俱著一體賞賜○又諭曰旌額理等奏稱烏魯木齊挈眷屯田民人陸續前來其貿易人等亦接踵而至計開設市肆五百餘間開墾菜園三百餘畝請酌量定額收租以充公用等語烏魯木齊安插兵民漸多貿易人等皆藉官地以謀生計理應稍收租價俾公費有餘即如所奏辦理至伊犁及葉爾羌等城有似此者自當一體查辦著傳諭將軍大臣等將各城商民所居酌定租額既有裨公用亦可就便稽查約束至厄魯特回人向無此例不得藉端巧取○

又諭據永貴等奏呼什齊部落之布魯特比納喇巴圖等因為額爾德尼侵凌率領游牧人衆前來懇賞給游牧安置等語納喇巴圖等既已率衆來投著傳諭永貴即照伊等所奏將納喇巴圖等移於阿拉克圖呼勒等處仍嚴行曉諭務將游牧人衆妥為約束令各安靜居住不得滋生事端○庚午諭曰叅革副將黃世燾叅將海起雲於兵部書辦賄索一案部議革職自屬罪所應得但以武弁受人勒索尚與別項納賄營私者有間念該員等前在軍營尚能出力黃世燾海起雲俱著該部行文調取來京引見再降諭旨○諭軍機大臣等朝銓奏奉省採買黑豆五萬石均已運赴海口現屆大雪海口已經冰凍難以裝運等語今年諭令奉天撥豆運京備用乃六月初所降之旨且經倉場侍郎咨明務於河水未凍之前抵通何以延至此時海口冰凍難行摺內既稱直隸往運船隻未到則其

貽誤。又似不在奉天。著傳諭方觀承令將因何不行催督往運緣由。即速查明具奏。朝銓摺并鈔寄。令其閱看。尋奏接准奉天來咨。後先後雇船八十九隻出口。因水大兼風信不常阻滯報聞。○又諭據成衮扎布奏稱。杜爾伯特盟長索諾木衮布因病昏憤不能辦事。另請簡放盟長等語。杜爾伯特盟長著博斯和勒補授。該部落歸化已久。應照喀爾喀之例補放副將軍。現在既有左右兩翼盟長副將軍應設二員。車凌烏巴什著放右翼副將軍。巴桑著放左翼副將軍。所有頒給印信勅書均著成衮扎布查照喀爾喀之例辦理。○又諭據恒祿等奏稱。巡邊至鴨綠江擒獲朝鮮國捕貂人八名。詢知伊國卡座已徹。是以潛行前來。當交吉林兵丁看守。夜中逃逸四名。請將值班馬甲枷責革退。佐領碩布濶及恒祿等交部查議等語。朝鮮國人私行越境捕貂。拏獲後復令逃逸。疎忽已極。所有看守

兵丁著照所奏枷責革退。碩布濶恒祿俱著交部察議。至該國既於江邊安放卡座。理應長設不宜撤回。以失防範。著交該部行文嚴飭外。併令將逃犯四名查拏治罪。○辛未聖祖仁皇帝忌辰遣官祭景陵。○上詣奉先殿壽皇殿行禮。○諭軍機大臣等。永貴新柱等俱因換班兵丁帶來駝隻設法辦理。永貴請留給本人加意牧放。新柱請分給臺站牧放等語。看來回地不宜駝隻。從前倒斃者頗多。今又留該處牧放。不數年間徒至傷損伊犁。現在牧廠與駝隻相宜。著傳諭永貴等將所有駝隻或今冬或來春草生時派兵緩行送往喀什噶爾葉爾羌俱距伊犁不遠。若有需用之處無難調取。○喀什噶爾辦事尚書永貴等奏前因喀什噶爾舊城地狹奏請修築新

城於本年四月興工八月告竣計四門周二里五分。造倉庫房屋七十八間。所有官兵及錢糧軍裝俱行移駐至臣等公署四百餘間。有布拉呢敦等入官房屋移至新城改建。其兵丁營房據衆伯克等願捐木料三百間。臣等允其所請。俟交收全完。將稅款贏餘酌量賞給。以示體卹。得旨。新城距舊城道里遠近。及駐劄處所。俱著繪圖呈覽。○壬申。諭軍機大臣等。愛必達奏嘉禾縣石匠李洪玉闕堂一案。現在飭司提犯辦理等語。該縣修理城垣匠頭王宴林。因被革拘訊。李洪玉赴縣懇求保釋。未允。輒敢恃衆鬧關。縣堂不法。已極。該州縣雖未能豫為約束。而即時加緊擒拏。要犯不致脫逃。功過尚足相抵。所有各犯。關堂滋事情節。著交與宋邦綏提齊案犯嚴審。定擬具奏。俾地方知所懲創。至此案於九月內發覺。彼時馮鈐尚未赴廣西之任。且該州既經稟明。該撫何以並未奏聞。並著傳諭馮

鈐。令其據實覆奏。尋調任湖南巡撫馮鈐。以前案奏到。得旨。此事汝取巧矣。九月二十一日之事。豈有十月二十四日方奏聞之理。明係知愛必達欲奏。方行奏聞。大不是了。昨已有旨問汝。想汝必云。已經奏聞。此等小伎倆。可行於朕前乎。○又諭。據盛京侍郎朝銓等奏。赫木等處。向來藏匿私濫。委員帶領番役兵丁前往查拏。躡緝該犯等。輒敢拒捕。細打番役。不法已極。現在案內業經拏獲各犯。已有旨交該侍郎等嚴行審擬具奏。其脫逃各犯。多係山東山西之人。此等匪犯。畏罪潛逃。或竄入東三省地方。或仍回本籍。詭跡藏匿。斷不可任其遠颺。倖逃法網。著傳諭山東山西巡撫。奉天等處將軍。飭屬密速嚴拏。務獲。遵委幹員。押赴奉天。一併究擬。將此傳諭。知之。并將未獲各犯名單鈔寄。○又諭。曰。安泰等奏。西堡漫店民人韓五等。拒捕私濫毆縛番役一案。以匪類藏匿私濫。經官役查緝。韓

五等膽敢糾衆拒毆。并將番役細縛。實為不法之尤。當即嚴行辦理。俾衆知懲創。况造意之犯。現已就獲。一經審明定擬。應正法者。即行正法。餘犯自可隨獲隨辦。不得因案犯尚未全獲。拘泥待質之例。致渠魁稍稽顯戮。其應行緝拏之犯。已傳諭山東山西各該撫一體實力躡捕。毋使稍有漏網。至佐領烏林保一聞此等拒捕之事。即應帶領兵役立時追拏。乃直至各犯逃散始行到彼。又並未追捕。應嚴叅議處。以儆玩誤。再此案逃犯既經朝銓開明年貌籍貫。飭令盛京城守尉並該總管等速拏伊等。如果實力查緝。何至解送之犯與案內逃犯姓名無一相合。看來盛京官員近日散戢成習。不肯實力奮勉任事。以致延擱誤公之事。不一而足。將軍等當力為整頓。勿令竟成錮習。致干重戾。所有該城守尉諾爾泰及總管什格等俱著查明交部嚴加議處。前經降旨查獲私濫定有賞格將三分

之一。分賞兵役以示鼓勵。此案內因罪人拒捕受傷之人。自應一體獎賞。至烏林保所帶兵役等。如此因循疎玩。若仍得冒此例邀賞。則大不可。將此一併傳諭安泰等知之。兵部議覆山西巡撫明德奏稱山西平魯一營前因統領朔平井坪二都司額兵千二百餘名。原設叅將一中軍守備一。嗣於乾隆二十六年裁兵案內將朔平營改隸殺虎副將統領。除裁撥兵丁及各汛分領平魯本標僅存兵百四十五名。猶設叅將大員及中軍守備與營制不符。均請裁改。設都司一千總一併歸殺虎副將管轄。至井坪都司營實存兵三十九名。亦於體制不符。應一併裁改。設把總一。仍隸平魯營管轄。均應如所請從之。以陝西波羅協副將王玉廷為陝西興漢鎮總兵。○癸酉上御太和殿視朝。文武陞轉各官謝恩。諭軍機大臣等。向來喀什噶爾葉爾羌等處換班

兵丁皆給與駝隻以資馱載但回地水草向與駝隻不甚相宜現已降旨令將喀什噶爾葉爾羌所存駝隻解往伊犁牧放將來回地換班兵丁竟可無需駝隻著照給與駝隻之例或騾馬驢頭車輛不拘何項酌量改給以為兵丁等裝載之用可將此傳諭楊應琚知之

實錄卷六百十四

三十五

大清高宗法天隆運至誠先覺體元立極敷文奮武孝慈神聖純皇帝實錄卷之六百七十四

大清高宗法天隆運至誠先覺體元立極敷文奮武孝慈神聖純皇帝實錄卷之六百七十五

監修總裁官學士太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午十一月甲戌

上 詣

皇太后宮問安○諭今歲京師夏間雨水稍多

收成致減分數因降旨分廠平糶自春徂冬

未嘗少間以裕民食復令豫東三省採買麥

石十餘萬運京接濟並賞給八旗閏月甲米

糧石既多價值自可無慮昂貴但現在時近

年節糧價未能即就平減著將在京三品以

下滿漢文武各官豫支半年俸米於明後年

春秋四季應領俸米內分扣所有豫支俸米

若令赴通關支未免更需運費。而米石亦易透漏。並著加恩。即准於京倉內按數支放。則京城米石充裕。市價必平。於民食亦為有益。仍著步軍統領衙門派員稽察。○古北口提督色克慎奏。古北口駐防兵。向有滋生銀三千兩。每歲秋成後。動支買米。按月放給。於錢糧內坐扣。嗣經奏停。散給兵銀自辦。該處地方狹小。產米無多。兵衆糴買。奸商每致居奇。請嗣後仍照前例。動支滋生銀。委員向口外採買運營。得旨著照所請行。○以原任廣東巡撫託恩多。署兵部右侍郎。○乙亥。兵部議准。山西巡撫明德奏。稱武職自守備以上。各有董率屬員。訓練兵丁之責。遇事請假回籍。自應依限回營供職。倘值限滿時。患病未能即痊。不便再任展限。致曠營缺。應如所請。嗣後武職告假期滿後。委係患病。該督撫驗明具題開缺。俟病痊引見。以原缺坐補。從之。○丙子。諭軍機大臣等。開泰等奏。金川土酋郎

卡。滋擾黨壩。各土司前往援助。已將所侵兒麥讓地方奪回。現飭守備溫欽等。詰責查辦一摺。未免先事豫設。調停之見。於辦理機宜未能領會。前該督等於乾隆二十三年。奏金川與革布什咱結親。構釁之事。雜谷。綽斯甲布兩路進攻。屢經傳諭。不必繩以官法。惟以蠻攻蠻之策。或相機令綽斯甲布。小金川分據其地。而彼時開泰。岳鍾璜不能體悉朕旨。未免意存姑息。是以但取解紛了事。以致養成驕縱。此時郎卡初為土司。即已垂涎黨壩。其明驗也。殊不知此等鼠子野心。即使目前詰責認罪。又安能保其永遠受約安靜乎。土司內如革布什咱。黨壩等類。其力之強弱。雖殊。然皆可借此以為狼酋之敵。如果因其挾仇攻擊。竟將狼酋吞噬。豈非策之最善者。著傳諭開泰等。現在斷不可有先事部署。官兵協力。欣助之計。致涉張皇。所有鄰近各蠻土兵既集。或即協力勦除。分有其地。止可聽

其各自為計。番境轉可相安。倘各土司不能併力剿除。而郎卡仍怙惡不悛。有必須另行辦理者。則亦非該督提等。以川省綠營官兵所能任其事。開泰等臨時據實奏聞。候朕酌辦。此時止須靜以聽之。不可調派紛紜。徒駭番人觀聽也。○又諭。昨明瑞等奏稱。哈薩克復來塔爾巴哈台一帶游牧。請於來春前往驅逐。收其人口。性隻業經降旨允行。但近據旌額理等奏。左部哈薩克努爾賚遣使入覲。又有烏爾根齊城哈雅布奇齊玉斯別部之巴圖爾亦遣使前來。伊等因見右部哈薩克入覲得霑恩賞。故相率倣倣。念其遠來歸附。自必照例宴賚。是來春正值伊等內向之時。忽聞收其游牧。恐外藩愚頑。轉生疑懼。即遲至明年冬後。年春再行驅逐。亦無不可。著傳諭明瑞等。將收取牲隻之處。暫停辦理。仍照前次曉示逐回。○丁丑

皇太后宮問安。○幸瀛臺。○諭德爾素現在患病。著解任調理。赫赫年逾七十。不必管理副都統事務。仍留內閣學士之任。餘著照舊供職。○軍機大臣等議准。古北口提督色克慎奏稱。營馬分給兵丁。拴養倒斃。賠補艱難。致多缺額。請嗣後各營馬。照向例收集本營交參將遊擊等派員監管。餵養。每年出青時。於節省馬銀內支領買補缺額。從之。○已卯。諭軍機大臣等。據尹繼善題。參夏廷來抽減印領盜用空白冒領兵米一千數百石。現在逃脫一案。已有旨將遊擊張大成等革職審追矣。即此一事。而江南文武吏治。其廢弛竟不可問。營縣同城。乃於支領兵米一任匪徒包攬侵蝕。漫無稽覈。已出情理之外。既經發覺。又不將要犯夏廷來迅速拘拏。以致免脫。該文武員弁玩誤已極。不但如本內所謂如同木偶而已。著傳諭尹繼善。務將逸犯夏廷來躡緝到案。嚴審定擬。立置重典。以昭炯戒。現

在該犯曾否就獲。其中有無員役通同作弊。並作何辦理之處。著一併速行據實奏聞。尋奏。夏廷來。現於江寧城拏獲。訊據冒領兵糧屬實。除提集營縣書役嚴審定擬外。所有侵虧米責。令該管各官。先行賠補。得旨。好。從來無此振作爽快事矣。○戶部議覆。山西巡撫明德奏稱。平垣營分防兵。應給馬匹料豆。向例於蒲州府倉收貯。永濟縣額徵豆數內支領。查該營兵糧。經前撫臣鄂弼奏准就近於分防之平陸等縣。常平倉穀關支。令原解之猗氏。虞鄉。永濟。三縣。照額折徵。移解買補在案。此項料豆。自應畫一辦理。請將永濟縣應解蒲倉支給營馬料豆。嗣後與米一併改徵折色。解交分防各縣買貯給領等語。應如所請。仍令該撫酌定價值。報部備案。著為定額。從之。○庚辰

上詣

皇太后宮問安。○幸瀛臺。○諭曰。莊有恭因前

在學政任內。於丁文彬一案。有應完按年罰扣之項。數年來節次已交十之三四。念其歷任巡撫。俱能奮勉出力。所有未完銀六萬餘兩。著加恩一併豁免。以示獎勵。○諭軍機大臣等。據理藩院奏。翁牛特王布達扎布等呈稱。該旗被民隱瞞地畝。經官清查。感戴天恩。願將餘地進獻一千頃等語。此項地畝。派官清查。原為分給該旗無業貧人以資生計。伊等果能查明均分。俾得安分度日。咸至豐足。朕甚嘉悅。著傳諭布達扎布等。此項餘出地畝。不必進獻。○軍機大臣等奏。內閣所藏寶譜一卷。奉旨照滿漢合璧修造。皇史宬盛京亦令照式辦理。查盛京藏貯十寶。其璽譜序文。亦止有漢文。如仍兼用清文。應復行用寶。始可修造。請派內務府官員。攜帶紙張前往。會同該將軍監看用寶。得旨。盛京所藏寶譜及將軍印譜。均令查取前來。○以吏部右侍郎恩丕。為錦州副都統。○辛巳。以熱河副都

統額勒登額為正黃旗護軍統領署兵部右侍郎託恩多兼鑲黃旗蒙古副都統兵部左侍郎永寧兼正紅旗漢軍副都統鑲紅旗漢軍副都統倭盛額為盛京副都統○壬午上詣

皇太后宮問安○諭今年京師諸物價昂各大臣官員等應扣俸項已施恩展限一季諸王等借俸罰俸等項應行坐扣者亦著於明年春季免其全扣仍支給一半於下季扣抵其竟不得俸銀者如莊親王果親王罰俸一年之處著施恩免其半年○以陝西河州鎮總兵存泰延綏鎮總兵福寧對調○癸未

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門衆官於午門行禮○奉

皇太后幸壽安宮侍宴○甲申上詣

皇太后宮問安○幸瀛臺○諭軍機大臣等胡寶琮覆奏現辦豫省民田道路溝洫一摺其經理甚為妥善國家雖久停力役之征而開挑溝洫實為農田之利通力合作亦小民所宜自為謀也今豫省每一州縣開溝十數道至一百數十道不等田溝因有業戶路溝亦傍民田民間業佃就地施工用力甚便而其事易集行之已有成效直豫地屬接壤乃近年以來偶值雨水稍多遂至積潦瀰漫皆由各該地方官平日不能留心講求及至被水成災又不亟籌疏洩殊不思溝洫深通不特有水之年可資宣洩即雨澤均調之歲更可資灌溉之益著將胡寶琮此摺鈔寄方觀承令其閱看董率所屬倣而行之實因利利民之道也○又諭曰扎拉豐阿奏稱烏梁海內大臣察達克等自備資斧前往辦理庫克新

伊亦領兵五十名前往偵探策應等語。此次察達克辦理庫克新。因庫克新原係伊部落人等。逃入俄羅斯。又指伊等名目為匪。是以自請往辦。原不藉扎拉豐阿之助。乃伊復請自行領兵前往。徒費張皇。於事無益。著成衮扎布等速行傳諭停止。○又諭曰。永貴奏稱外藩所市鷹犬等物。及回人等貢獻者。因為數頗多。特交護軍叅領松年。由驛馳齎等語。近因新疆齎送官物。或有鷹犬之類。官兵等藉端騷擾。曾降旨命督撫等查叅。又軍機大臣議。嗣後新疆年貢。仍由驛馳遞。其隨時微物。如鷹犬之類。俱於齎送金玉之便附來。俱經准行。著傳諭永貴等。此等尋常貢物。不必多為購辦。或有需用。候行文知會。再為附便齎送。不必特派人員。以致滋擾。仍通諭各駐劄大臣知之。○大學士等奏各省督撫慶賀皇太后萬壽本章內。於欽惟後皇太后徽號。俱用黃籤書寫。其恭遇後繕寫之

處未能盡一請嗣後恭進

皇太后萬壽賀本。於恭遇後。俱用黃籤敬書徽號。從之。○賑卹甘肅狄道。皋蘭。金縣。河州。靖遠。渭源。隴西。寧遠。會寧。通渭。平涼。鎮原。涇州。鎮番。武威。永昌。平番。中衛。擺羊。戎。西寧等三十廳州縣。本年冰雹霜災。飢民并借給籽種。○乙酉。諭軍機大臣等。今歲直屬雨水過多。其偏災地方。現已加恩賑卹。并酌量以工代賑。窮民自可不致失所。但明年正二月間。即屆停賑之期。災民口食未免拮据。著傳諭方觀承。查明被災較重州縣之極次貧民。暨被災稍重之極貧各戶。有應行加恩展賑。以資接濟者。速行查明。專摺奏聞。○又諭。今歲東省各屬。泰安以南。收成尚屬豐稔。其泰安以北。濟南。武定等屬。未免有被災處所。民力不無拮据。所有該處歉收地方。一切撫卹事宜。該撫現在如何辦理。將來正二月青黃不接之際。或有應行酌量加恩。以資接濟之處。著

傳諭阿爾泰速行確按情形查明專摺奏聞。
○封閉山西繁峙縣駝背梁虎害山。礦廠二座。從巡撫明德請也。○丙戌。

上御乾清門聽政。○以理藩院郎中伍勒穆集為光祿寺卿。○丁亥。諭軍機大臣等。成衮扎布等奏烏梁海散秩大臣圖布慎之子伊蘇特。在額爾齊斯河渡口。見有兵馬旗幟蹤跡。此處向係哈薩克行走之路。恐因伊等牧羣被烏梁海竊取。或如巴魯克之計圖報復。亦未可定。自當加意防範等語。察達克等曾請自行辦理烏梁海庫克新。今既有此等蹤跡。當候信息明確。酌量行止。昨扎拉豐阿奏請領兵策應察達克等。已諭令不必前往。此次非專辦庫克新可比。著扎拉豐阿同察達克等前往。於偵探策應之處。自可相資為用。再成衮扎布奏伊犁撤回索倫兵。現在扎布堪過冬。著傳諭成衮扎布有調用伊等之處。不過辦給馬匹。亦屬便易。但此事究係傳聞。仍

俟查詢明確。即行具奏。○戶部議覆四川總督開泰奏稱。綿州射洪鹽亭西充等四州縣。新開鹽井一百十三眼。歲產鹽三十一萬七千八百六十觔。榮縣犍為雲陽等三縣。增煎餘鹽九十五萬九千五百九十觔。請添水陸引一千零六張。應如所請。從之。○戊子。

上詣

皇太后宮問安。○幸瀛臺。○皇十六子生逾四年而薨。未命名。○諭據鐵保奏。巡察所屬營兵。看得遊擊阿林泰不能騎射。且辦事遲鈍。守備馬陞騎射生疎。已咨明總督將此二員。叅奏等語。旗員補放綠營員缺。特因滿洲人員。騎射素優。可作綠營官兵表式。並非欲令伊等在外安逸。徒占綠營之缺也。伊等自應加意勤習騎射。可以為法。綠營何至偷安怠惰。馴致騎射生疎。從前朕屢經頒發諭旨。即漢人身為武員。尚不應出此。況滿洲乎。在該管大臣等。理應不時查驗。一遇此等人員。立

即叅奏何以拘泥成例直待將行軍政時始行叅奏耶阿林泰等身係遊擊不能騎射皆由平日任意懈弛不勤練習之所致除將阿林泰馬陞著交部嚴加議處外並著通行曉諭各省督撫提鎮務將所屬武職不時留心察閱令其勤加練習嗣後倘仍有此等不能騎射之人不惟該員等罪無可逭必將該督撫提鎮等一併治罪是月閩浙總督楊廷璋浙江巡撫熊學鵬奏湖州居天目山下游為苕霅兩水交會全藉太湖為尾閘查水出太湖須由七十二淩淩港多屬淤淺過山水驟發宣洩不及便至浸淹現據紳士耆民等懇請分地遠近按畝樂輸以作修濬之費計烏程長興二縣每畝捐錢七文歸安每畝六文德清每畝四文約合銀二萬兩足敷工用不須派撥胥役祇遴選公正老成董事數人責成經理另委大員督辦得旨如所議行○熊學鵬又奏浙省收成稍歉現由江西協濟

倉穀二十萬石同時起運未免紛繁擬咨令分作四起從水路運浙由江省派員監撥運到時酌量各處米價應於某府協濟若干石順便分撥至江省船隻運腳由江省報銷其自江南京口至浙省沿途起撥等費由浙省報銷得旨如所議行○山東巡撫阿爾泰奏袁州所屬壽甯縣有沙趙二河伏秋坡水匯流沙河勢當頂衝從前曾於水勢交會處修建大壩抵禦查沙河下流現已開挖支河應將大壩口門挑開使沙趙二河暢流入運以免渟聚又東平州北之谷家莊州西之馮家等莊地勢低窪今各開溝渠引水入會泉大清河等河濟寧州之馬場湖嶧縣之伊家河均疏濬加寬其由嶧縣臺莊至邳蘭交錯之馬頭地方計一百二十里不通車路飭令該縣等開溝疊道以便行旅並利疏洩得旨諸凡留心本務實屬可嘉○又奏濟南武定二府濱海地低查惠民縣有土河一道疏消坡水

由濱州達徒駭河。德平陵縣有馬河一道亦入徒駭。年久淤塞。均應開挖深通。其濟東等府屬之濟陽平原禹城茌平高唐各州縣低窪地畝。隣近徒駭馬頰諸河。均應開濬溝渠。俾坡水分流。引入大河。現已勘定處所。俟明春勸民舉工。並借給口糧。再衛河大溜經德州恩縣夏津武城臨清館陶各州縣綿亘三百餘里。挾沙帶泥。每至盛漲。多患阻滯。現飭令廳汛。乘冬月煞壩時。多撥兵夫。將所有淤灘概行挑濬。至德州哨馬營。為衛河分洩之區。宜於下游疏消積沙。使無壅滯。均各趕辦得旨。諸凡盡心嘉悅。覽之。○湖廣總督兼署湖北巡撫。愛必達奏。湖北荊州駐防滿兵額米十萬二千餘石。係由各州縣額徵南米撥解。及留貯荊倉漕米搭放。經前督臣蘇昌奏准添買米四萬石備用。分二次動支。司庫銀購辦。查湖北南糧原供兵米之需。遇撥解不齊。以存倉漕米六萬石借給。已敷接濟。若再

添米四萬石。倉儲太多。未能隨時出易。必致霉朽。請於此次應買米二萬石。改買穀四萬石。其下次應買米二萬石。竟行停止。遇兵糧需用。以穀碾米支放。仍按年出陳易新。照常平倉存七糶三例辦理。得旨。如所議行。○陝甘總督楊應琚奏。固原城守營叅將。於本年正月內奉裁。該叅將向隸靖遠協副將統轄。今改歸提標後營遊擊兼管。請嗣後遇地方公務。俱就近呈報提督衙門。再後營遊擊衙署。規制狹隘。後營守備並無衙署。請以所裁城守營叅將衙署。改令遊擊居住。其遊擊衙署。即令守備居住。下部知之。○陝西巡撫鄂彌泰。陝省常社兩倉額貯穀三百四十萬石。最為充盈。現在盤查各屬。除倉內實儲及庫存糶價外。民欠積至八九十萬石。且有欠至四五年以至八九年者。其中不無胥役冒領。及社長侵蝕情弊。飭令各州縣開造戶冊。委員清查。按戶取限交倉。如有侵冒捏欠。即令

監追州縣官或那移抵補並即叅揭其欠戶逃亡及貧苦無追著落接收交代之現任州縣賠補不得勒派里族代償得旨如所議行○又奏川陝接界各屬自寶雞以南由漢中鳳縣褒城寧羌至四川廣元綿長九百餘里悉皆棧道遇山水驟漲泊岸易坍經臣奏准於生息案內動支餘息銀兩為修理之需查乾隆二十一年曾估計需工料一萬七千餘兩未及辦理現委員查勘通計殘缺應修各道實估銀一萬三千餘兩較之從前有減無浮擬於冬春之交興工報聞

平定回疆方略卷五十五

七

大清高宗法天隆運至誠先覺體元立極敷文奮武孝慈神聖純皇帝實錄卷之六百七十五

實錄卷六百七十五

七

大清高宗法天隆運至誠先覺體元立極敷文奮武孝慈神聖純皇帝實錄卷之六百七十六

翰林總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奏常加二級軍功紀錄一次臣履桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董福內大臣戶部尚書鑲黃旗滿洲都統軍功紀錄五次

尋常紀錄十四次臣德慶經筵講官太子少保工部尚書紀錄六次臣曹振鏞等奉

敕修

乾隆二十七年壬午十二月己丑朔

上辛瀛臺○諭本年軍政所有兵部開列請旨之各省將軍都統副都統等俱著照舊供職○又諭浙江提督員缺著武進陞調補所遺甘肅提督員缺著王澄補授其雲南昭通鎮總兵員缺著吳達善於通省總兵內揀選一員調補所遺員缺著劉德成補授○兵部議覆盛京刑部侍郎朝銓審擬牧長古爾泰等侵蝕草折銀兩一案請將失察之調任將軍清保罰俸九個月以紀錄抵銷得旨官員降

罰案件准其抵銷之例原為尋常因公處分而設若清保在將軍任內於地方諸事毫不實心整頓即如一切遣犯並不嚴行管押屢令縱逸且將應行輪班引見協領等遲誤至數年之久並不送部引見諸事任意懈弛竟成錮習以致各員上下相蒙皆清保在任時因循釀成至此此即予以革職亦不為枉何得濫叨紀錄即有亦不過拏獲賭具之類尋常議敘本非分所應得今此案該牧長等敢將空曠草折銀兩分肥入己清保所司何事今不重治其罪已屬從寬似此濫邀之紀錄豈可尚任其存留以為抵銷之地著將清保任內所有加級紀錄全行銷去此案仍不准抵銷○庚寅諭曰大學士史貽直年逾八旬精力雖非強健然在內閣地禁事清朕班聯盛事茲以老病奏請解任情詞懇切因念部務繁劇高年難以兼顧所有工部事務著不必兼攝以示體恤至內閣地禁事清朕

已恩准史貽直以肩輿入直原可毋庸解退自後可令自行酌量或嚴寒酷暑即不必每日進署俾可從容願養副朕優眷至意○諭軍機大臣等雲南曲尋鎮總兵李時升貴州鎮遠鎮總兵諾倫俱於本年六七月間具摺奏請陞見朕以該員等前歲甫經陞見是以批示不必來今相隔已幾二年有餘著傳諭該督等將李時升諾倫二員酌量明年可以進京時即令奏明陞見並傳諭該總兵等知之○又諭提督有統轄全省節制各鎮之責其職任甚為緊要每遇缺出一時難得其人尹繼善愛必達楊應琚楊廷璋等俱歷任封疆最為年久平日於通省總鎮各員尚屬留心甄覈著傳諭尹繼善等於現在所屬總兵及歷任舊屬總兵內看其器宇材畧可勝提督之任者據實密行保奏以備選擇簡用○又諭據傅巖奏稱

孝陵補種樹木二百餘株暫動滋生銀二百餘

兩辦理嗣後或於工部支領或即動用滋生銀兩請旨定奪等語傅巖此奏又屬包衣陋習

陵寢種植樹木所關甚要傅巖惟當留心巡察妥為補種不必為節省錢糧起見果有應用之處皆當動用正項但宜使歸實際不致侵蝕可耳嗣後種植樹木俱於工部正項支領無須動用滋生銀兩將此傳諭知之 以故

四川建昌道屬料林坪土百戶楊家因子之

貴襲職○辛卯諭各省督撫提鎮職任封疆藩臬二司為通省錢穀刑名總匯員缺緊要遇有丁憂事故向俱專差奏報其在近京各省尚不致稽遲若邊遠省分長途齎奏往返需時嗣後雲南貴州四川廣東廣西福建甘肅湖南等省督撫提鎮藩臬等大員遇有丁憂事故著由驛限日行四百里馳奏以便另行簡放庶要缺不致久懸於邊省地方營伍事務均有裨益 又諭曰大學士史貽直已

不兼管工部事務。著於戶部飯銀內。每年賞銀五百兩。○又諭曰。刑部尚書舒赫德著於戶部飯銀內。每年賞銀五百兩。○又諭據安泰奏稱。審訊高錦勑借銀兩案內。副都統布顏達賴。供出伊弟布顏圖。委查海口。亦曾收受陋規。又保舉伊親家伊昌阿為協領。及伊昌阿之子德成為驍騎校。種種徇私等語。布顏達賴係東三省人。朕施恩擢放副都統。不思奉公盡職。反如此徇私舞弊。若不從重治罪。何以整飭惡習。布顏達賴著交刑部一併治罪。○諭軍機大臣等。方觀承覆奏籌酌賑務情形一摺。議請以工代賑。俾壯者工作餬口。其老弱婦孺。於二三兩月。分設粥廠就食。雖可省展賑所需之半。朕思直省今歲被災分數較重。正當實力撫綏。不可因加賑費多。為此酌量調停之議。除另摺所奏。應行分別加賑各州縣。已有恩旨於新春頒發外。其不在另摺展賑之內。及毗連災地之貧民。朕

意應於此中再行分別加恩。其實在不能自存者。量與一體加賑。所餘次貧戶口。則令赴工食力。而老弱婦孺之不能力作者。又以粥廠接濟之。庶貧黎均霑實惠。可以無致失所。著將此傳諭方觀承。令其即速查明詳議。奏聞。候朕降旨。○又諭前因伯什阿噶什身故。將伊弟達瓦濟特子博東齊姪布魯特及所屬四十餘人。移駐通肯呼裕爾安插。今已數年。未知伊等生計若何。著傳諭國多歡等查明具奏。○吏部等部議覆山西巡撫明德奏稱。解州所屬運城縣地多鹽池。歲修隄堰。工程緊要。巡檢呼應不靈。請以解州直隸州州判移駐裁去原設巡檢。改為州判衙署。即以舊駐運城西場鹽大使移駐解州州判衙署。裁缺巡檢額設馬快八名。撥歸州判弓兵十名。撥歸西場大使應如所請。從之。○又議准雲貴總督吳達善奏稱。貴州南籠府屬阿都田驛係安南縣經管地界。則屬普安州差務。

不免掣肘。查該驛距安南九十里。距普安百八十里。應將近驛之斗狼五寨。雞場六寨。長牛上下馬頭十二寨。與阿都田驛地方。均改歸安南縣管轄。從之。○兵部議覆河東河道總督張師載奏稱。山東下河廳五汛。汛各設淺夫二三十名。遇水漲不敷遣用。請於運河泃河捕河三廳內撥兵四十。添設額。外委一員。歸下河廳千總管轄。應如所請。從之。○以正黃旗漢軍叅領李景高為鑲紅旗漢軍副都統。○壬辰。

上詣

皇太后宮問安。○幸瀛臺。翼日如之。○諭軍機大臣等。阿爾泰奏覆東省災屬情形一摺。所有被災極貧之齊河等三十州縣。衛概予加賑一月之處。俟新正有旨諭部。但歲內賑期已滿。若俟降旨後始行加賑。貧民口食恐不能及時接濟。著傳諭該撫於臘底春初即按所加之數。一面先行散給。俾小民餬口有資。

均霑實惠。副朕軫念至意。○兵部等部議覆漕運總督楊錫紱奏稱。湖廣漕運俱由各衛守備僉丁。如荊州。荊左。荊右。沔陽四衛。係以湖北丁運湖南糧。衛備不親出運。僉丁遂多草率。再湖南三幫內有四號旗丁。由武昌左衛僉定。亦係隔省運丁。每致脫逃。請嗣後各衛如有逃丁。將原僉衛守備向例降一級調用。改為降二級調用。不准抵銷。旗丁潛逃除再犯三犯分別軍紋外。其初次逃丁。從重杖一百。枷號一個月。面刺逃丁二字。應如所請。從之。○癸巳。予故喀爾喀扎薩克固山貝子旺扎勒察。葬如例。以其子伊達木扎布襲爵。○甲午。

孝惠章皇后忌辰遣官祭

孝東陵。○諭前因楊寧在外多年。特命海崇阿前往更換。今據永貴奏稱。海崇阿病故。著派台布前往。○諭軍機大臣等。據安泰等將疎縱偷竄。拒捕重犯之總管什格等。叅奏前來。

此輩私挖人淺網打番役甚屬不法該總管等理宜上緊緝捕使無漏網乃因循不力以致正犯脫逃非尋常疎縱可比著照安泰所奏將總管什格翼長富僧佟保署城守尉事務防禦愛什防禦老格城守尉諾爾泰佐領何彥彬等俱著交部嚴加議處盛京積習頽壞已極伊等員缺若仍放彼處之員於公事無益著交部於京師應放人員內揀選帶領引見又諭曰安泰等審擬淺店民人韓五等拒捕毆差一案已交三法司覈擬至梁宗保身為旗兵目擊番役被縛即應協同將兇犯立時擒拏乃稱並未聞查拏私漫甚至幫同韓五等轉將番役指戳斥罵深為可惡此等兵丁理應從重懲治安泰等僅擬以枷號兩月殊未允協已令三法司改擬將此傳諭知之乙未諭軍機大臣等朕閱刑部本內有福建楊守道戳死胞兄江西黃想致死小功服叔二案原俱按律定以斬決而於案內

所敘情節支離之處並不置議推求其故部臣第謂罪無出入無庸逐節研究即令指出駁詰而承審官又謂抑令改易初供是以日久相沿竟成故套而幕客胥吏遂遇事動為緣飾雖經朕屢行訓飭終至迷而不悟也倫常所關綦重犯尊法在必行惟其中實有救父救母萬不得已之真情以及無心邂逅確乎可據者原應據實聲敘以憑覈擬若楊守道之傷死胞兄雖其兄原有回言不受其母斥責之文而於該犯奪刀以下則稱其兄撲打趕近身未穿衣以致戳傷云云果爾則將歸咎死者之赤身自赴刀刃未及衷甲自衛可乎至黃想之父已自攜杖毆人並無身遭困阨情狀乃稱該犯執杖下節頭向裏落其叔為垂杖擊傷致斃是欲為該犯解說直視伊叔為甘蹈杖械之人成何情理殊不知附會假借之言日滋則偽者固可貌真而真者安知不近於偽設遇實有情在可原之犯法

司必以人云亦云目之。是庸有司之虛語寬仁實致釀成刻覈耳。朕慎重刑章。雖尋常案牘務在得情。不肯稍存成見。倘於倫常所繫。不為一一體勘。而使幕胥故智習見公行。下自牧令。上自督撫法司。積案因循。牢不可破。又何以懲干名犯分之徒。且俾一錢可矜者。不致同歸混淆哉。嗣後各省地方官辦理命案。務在直敘確情。如仍蹈襲此種惡道。轉相倣倣。以為長技。朕惟於督撫等是問。可於督撫奏事之便。傳諭知之。○又諭曰。方觀承奏喀喇河屯地方開挑引河。又於山根築壩鑲墊一摺。灤河水勢既逼山根。則於向南挑濬引河。已可分減其勢。若行道稍有紆曲。本不足為累。所有圖中酌擬添壩之處。殊為無濟實用。可不必行。將此傳諭方觀承知之。○又諭曰。湯聘奏江西省協濟浙江米石一項。現在先碾米十萬石。趕運接濟一摺。前據熊學鵬奏江西碾運穀二十萬。覈米應得十萬石。

正屬相符。著傳諭湯聘即照熊學鵬原奏之數碾運。其由長江水運抵浙之處。亦與熊學鵬前奏無異。至一切接遞交收各事宜。並著該撫等彼此咨商。安速辦理。將此傳諭湯聘。熊學鵬知之。○軍機大臣等奏審訊京口副都統鄂岱責令家人王二自縊一案。鄂岱擬依徇縱家人犯贓例。從重革職。得旨。鄂岱身為副都統。乃於家人滋弊事敗。不行送官。令其自縊。如止係尋常致死家人。原無大罪。但查其事蹟內。有戲子在署過夜之事。則其慮為家人供吐攀涉情節。已屬顯然。僅予革職不足示儆。鄂岱著發往葉爾羌効力贖罪。○兵部議准陝西巡撫鄂弼奏稱。新中式武舉向例於本籍各州縣填寫親供。送司咨部。多致不齊。請嗣後於武闈完竣。令武生守候發榜。監臨督同內簾官監驗填寫親供。如筆蹟不符。照例辦理。從之。○丙申。

上詣

大高殿行禮○幸瀛臺○諭軍機大臣等新柱等奏稱克什密爾之呢雅斯伯克遣其頭目古爾班伯克齋進奏章據譯稱呢雅斯伯克係喀什噶爾人在扎那巴特居住因亂遷於克什密爾葉爾羌等各城回衆在彼者約四五百戶俱願內向遷移呢雅斯伯克因率其頭目入覲并欲取克什密爾以獻復書令其速行入覲再定取克什密爾之策又恐將來不取克什密爾則伊心生悔懼請於入覲時將伊留京等語呢雅斯伯克本係喀什噶爾之人懷土思遷原可聽其自便至入覲之後作何辦理臨時自當指示若無故拘留不遣即在厄魯特回部未定之先朕亦不肯出此如謂不允所請或有悔懼之心亦當留心察看俟其形跡顯露再行辦理豈有遽為逆億之理至新柱等以克什密爾路途遙隔土默特鞭長莫及且為愛烏罕愛哈默特沙所有伊現在歸附不必辦理所見尚是但業已不

辦則書中所云俟入覲後再定語涉相欺亦屬失體今古爾班伯克既在葉爾羌守候著傳諭呢雅斯伯克許其入覲候旨不必言及克什密爾之事俟呢雅斯伯克率衆來歸即為整裝入覲俟召見後再降諭旨 丁酉

上詣

皇太后宮問安 諭曰常鈞奏各省藩臬兩司請令迭出巡查所屬一招似為慎重地方吏治起見而於事理未深體究難以定例通行向因督撫為封疆表率乃狃於簡出養安故習遇地方重大之事並不親行察看俾屬吏得所提撕是以降旨訓諭比來雖知用為懲誠然其間行之有無實際尚難概期其效朕所明試有素者如阿爾泰胡寶琛莊有恭數人其出巡時於官方民事頗能實力整飭而一切輕騎減從亦可不滋屬員之累則是督撫偶爾巡行猶未必盡裨政務何況藩臬兩司若遽責令迭出番休竟成事例即有一二

正己急公。矯矯不羣者。未必盡無設施。而其
他奉行故套。文具相承者。將甚衆矣。且大員
所過。即令守法屏除供應。而本轄庶司望風
延接。豈得竟無酬應。矧重以幕僚胥役。稍失
檢察。其為擾累。更不待言。所請酌定巡查之
處。無庸著為定例。但兩司等。惟當殫心實政。
一切共知淬礪。接見屬員。研求案牘中。自有
振綱飭紀之益。原不待郵傳四出。始可為羣
僚法式。若因有此旨。而於應行赴勘災賑事
件。亦致稍存緩視。是自棄官守。朕又肯輕為
曲貸哉。將此通諭知之。○吏部等部議覆。江
西按察使顏希深奏稱。現任文武各官。遇卓
異俸滿。赴部引見。沿途每多逗遛。致曠職守。
請嗣後各官離任。於督撫給咨時。按各省程
限。註定到部日期。如中途有故。取具地方官
印結。以三月為限。逾期查議。應如所請。從之。
○戊戌諭軍機大臣等。前經降旨。令該撫將
被災之齊河濟陽等三十州縣。衛極貧之戶。

再行加賑一月。恐俟新正恩旨。行文稍遲。因
傳諭該撫。一面於歲內先行散給。接濟口食。
復念德州等處。毗連直隸。被災稍重。著將極
貧各戶。前旨加賑一月者。再加恩展賑一月。
其次貧各戶。亦著格外加賑一月。以普惠澤。
至明春東作時。有應行借糶兼施。以資力作
者。仍照例查辦。至此次極貧次貧。普加一月
賑糧。或於新正奉到諭旨後散給。或於年內
豫行接濟之處。著阿爾泰。循照前旨。酌量情
形。妥協經理。將此再行傳諭知之。○又諭據
含圖肯奏。派往巡查私漫之署領催富昌阿
等。行至賽馬集。有郭衛等帶領四十餘人。將
伊等細打。城守尉官忠。比時不即嚴拏。防禦
額爾格訥。不行親捕。止遣領催察罕往拏。以
致全犯逃逸等語。盛京積習。頹壞已極。屢有
此等事件。殊屬不法。逃犯郭衛等。著交該將
軍。開明名姓。年貌。行咨原籍督撫。務期盡數
捕獲。城守尉官忠。防禦額爾格訥。領催察罕。

等俱著革職。解交刑部從重治罪。該管各州縣平日不能約束。臨時又不實力協捕。所司何事。亦交該將軍一併查叅。○又諭曰。永貴等奏稱。霍罕額爾德尼伯克遣使呈書。敘述前後事情。內如呼瓦特係呼什齊布魯特。舊為喀什噶爾阿奇木。後被額爾德尼殺害。伊弟納喇巴圖。近日來投。曾奏准安插。額爾德尼若慮其造言離間。情見乎辭。又如鄂斯等處。本布魯特故地。額爾德尼乃飾辭以為已。有。但書中尚有給還之意。已復書嚴飭。遣挖穆齊圖等往諭。若有抗拒情形。即請備兵征討等語。霍罕額爾德尼伯克與布魯特雜處。互相侵奪。亦所時有。伊自內附以來。尚屬恭順。即所敘各情事。亦未至關係重大。永貴等諭以情理。自必遵行。可以無須用兵。萬一必須兵力。永貴亦祇可辦理軍務。其領隊進剿。仍須愛隆阿伍岱前往。伊等業已派赴伊犁。著傳諭永貴等。候額爾德尼回音。相機辦理。

○又諭曰。永貴等奏詢問從巴達克山來投之回人阿布都喇伊木等。知布拉呢敦妻子現隨摩羅巴喇特摩羅密諾囉斯二人度日。又據素勒坦和卓稟稱。素勒坦沙親信之密爾咱色得克與伊相好。昨曾致書通問。擬於素勒坦和卓覆書之。便作為已意。令密爾咱色得克開導素勒坦沙將布拉呢敦妻子送出。若仍在遲疑。即遣素勒坦和卓前往索取等語。此事前經新柱額敏和卓籌辦。今所奏尚屬可行。但昨已命素勒坦和卓往愛烏罕辦事。永貴諒已遣令前來。俟到京請訓。前往愛烏罕順道至巴達克山索取布拉呢敦妻子。甚屬近便。著傳諭永貴等知之。旌表守正捐軀之河南鄭州民師窪兒妻樊氏。已亥諭曰。山東運河道李清時六年俸滿。總河張師載送部引見。今年東省運河臺莊等八閘現在興工疏濬。乃運河道員專司正省董率經理。張師載等於此時令其離任來京。未

免過於拘泥。李清時著速行回任。六年俸滿。不過照例送部。非刻不可緩之事。即前後通融數月。亦無不可。嗣後年滿引見之道府各官。其任內設有承辦要事。著該督撫等酌量情形。或先期送部。或待事竣再行給咨。不必斤斤扣算。時日轉致有曠職守著。將此通行曉諭各督撫知之。一定盛京將軍節制奉天府府尹。例諭向例盛京將軍管轄旗人奉天府府尹兼理民事。原無統轄。嗣因盛京係滿洲根本之地。所有州縣官員皆定為滿缺。凡應行查拏私濫。經將軍派委官兵前往地方。各官自宜會同查緝。乃近日拒捕毆差之事。不一而足。地方官竟視同膜外。鄉長保甲並不協力擒捕。此皆因將軍府尹不相關涉。各分畛域之所致。是以各屬員亦存旗民分管意見。並不和衷辦理。於地方事務甚無裨益。不可不為變通。在府尹為全省大吏。雖不可便為將軍屬員。亦當令其聽將軍節制。底旗

民事務歸一。一切辦理不致參差。嗣後奉天府府尹著聽將軍節制。遇有應行查拏人犯。該地方州縣官即協同將軍差委之人協力查拏。如仍有似此拒捕毆差以及脫逃等事。將該地方官交部一併治罪。一定簡放東三省副都統。城守尉。例諭盛京吉林黑龍江等處向因風俗淳樸。地方寧謐。是以三省旗員皆放本處之人。即副都統城守尉大員亦有簡放本處者。據今看來。大非昔比。犯人偷竄拒捕種種不法。皆由該管官員平日互相徇縱。不能約束所致。該處大員之缺。若仍放本處之人。彼此迴護。頹俗斷難整飭。嗣後遇有東三省副都統城守尉缺出。或由京師遣往。或於別省調補。著交該部臨時將在京及各省應放應調人員開列職名請旨。著為例。○戶部議准。調任江蘇巡撫陳宏謀奏稱。清河桃源宿遷沭陽四縣地不產米。民間完納漕糧不便。請嗣後照海贛二處例折價官辦。於

每年秋成時赴司領銀採買。令產米各州縣及該管道府加結轉詳覈實徵收。如有浮冒照例查叅從之。○庚子諭軍機大臣等成衮扎布前經奏請鑄給烏梁海總管察達克等印信。軍機處覆准頒行。今成衮扎布請將阿爾台烏梁海等作為兩翼分管游牧著鑄給烏梁海左翼總管印一顆給與察達克其圖布慎係專管右翼亦著鑄給總管印信一顆。所有察達克原領阿爾台烏梁海七旗總管

之印即行繳銷。軍機大臣等議覆黑龍江將軍國多歡奏稱打牲烏拉兵丁應給華生馬匹須按其人數多寡地方相宜之處分別辦理索倫請給驕馬一千匹兒驪馬一千匹呼倫貝爾給驕馬一千匹兒驪馬一千匹齊齊哈爾黑龍江墨爾根呼蘭等四處給驕馬一千匹兒驪馬一千五百匹等語應如所請。交巴爾品分等定價行文該管副都統派兵往牧廠領取至此項馬價限三年於兵丁錢

糧內扣完從之。○刑部議准山東按察使閔鶚元奏稱回民獷悍成習結黨為匪僅照常例辦理不足示懲請嗣後回民行竊但經結夥在三人以上及攜帶兇器者不分首從不計賊數次數悉照積匪例發雲貴兩廣極邊烟瘴地方充軍窩竊分贓之家一律治罪從之。○命雲南提督額爾格圖來京陛見。○辛

丑

上詣

皇太后宮問安。○諭軍機大臣等提督額爾格圖已有旨令其來京陛見伊現在年逾七十近日辦理一切營務精神才力是否尚能周到著傳諭吳達善令其即行據實奏聞尋奏額爾格圖才具老練現在精神健旺無誤營務得旨覽。○又諭據成衮扎布奏稱烏梁海薩瑪喇特等在額爾齊斯地方打圍遇有哈薩克十數人肆行搶掠請旨交哈薩克大頭目辦理或帶兵前往勦辦等語額爾齊斯等

處為烏梁海。哈薩克二處適中之區。彼處小人圖利竊掠。亦屬常事。成衮扎布等若派人巡哨。遇應行擒捕者。擒捕。應行禁止者。禁止。即可了事。又何必將軍大臣等帶兵勦辦。今哈薩克使臣將到。俟其到時。提及此事。便可曉示伊等。妥為約束。不得仍前搶掠。○又諭據永貴等奏。霍罕額爾德尼伯克所復書札。謂前遣使人。奉有諭旨。稱伊為汗。且以喀什噶爾嶺為界。似此種種謬妄。皆永貴等從前

實錄卷六十六

三

給伊之書。詞氣懦弱所致。著傳諭永貴再行發書嚴飭云。向來寄爾之書。俱稱伯克。何得妄自稱汗。又何嘗奉有喀什噶爾嶺為界之旨。爾意以大皇帝諭旨。我等俱不得見。豈知凡有關係外藩事宜。俱傳諭我等知之。何得妄行編造。嗣後往來書札。惟以恭順信實為主。不可仍蹈故轍。致取罪戾。又書內所稱呼什齊捫都斯人等。在鄂斯地方。掠奪九人什物。其喀什噶爾五人之物。已經索還。惟霍罕

四人什物馬匹。並未給發。請向布魯特索取等語。是否確實。併著查明具奏。○兩廣總督蘇昌奏潮州府屬二十九埠商欠銀兩。現已催交過半。查前任運同馬兆登任內。商欠十萬餘兩。伊子馬世榮係捐納知縣。應著落賠交。且馬世榮曾私充埠商。亦有埠欠銀兩。應追現提解來粵審究。得旨。好。餘有旨諭。○又諭軍機大臣等。蘇昌奏潮屬商欠追完過半一摺。已於摺內批諭矣。所有馬世榮名下應

實錄卷六十六

四

追埠欠銀兩。現經著落追賠。但其從前私充埠商。釀成虧欠各情。由該督等現在如何擬議定罪。著一面照例辦理。一面即行具摺奏聞。尋奏馬世榮因伊父馬兆登前任運同。故敢私充埠商。致眾商不服。釀成虧欠。除將馬世榮定擬杖流外。查封家產入官。得旨。覽。○以故四川建昌道屬六翁土百戶都叻。沙子拉衣。貴州貴陽府屬乖面司正土官楊錫祚。子淞各襲職。○壬寅。諭軍機大臣等。莊存

與奏壽辦災賑條款一摺已批交方觀承速議矣朕因今歲直屬被災較重一切截漕加賑各事宜飭令該督悉心妥辦不得稍遺餘力即近日該督查覈極次貧戶與被災稍輕之極次貧戶所有展賑加賑及例不應賑之貧民量賑一月餘並准其赴工就食各條業已詳入恩旨於明年新正頒發特外間尚未之知即莊存與所列條內尚有請寓賑於工一節亦屬早已指揮之事但伊既有此奏可

實錄卷百七十六

五

將原摺即速鈔寄方觀承令其閱看中如有可採取之處即著該督妥速議行尋奏莊存與陳奏各條均早經奉旨遵辦惟謹就現在情形再加籌畫直屬毗連災地各州縣共設粥廠八十九處係官民樂輸年內足敷接濟擬於來春二三月另議動撥官米於各處適中地方不越二十里外增添粥廠使貧民日可往返其離鄉就食者於春融遣散時酌給口糧報聞○癸卯

上御太和殿視朝文武陞轉各官謝恩○戶部議准長蘆鹽政達色奏稱山東郟城樂安二縣地瘠民貧額鹽不能全銷請將兩邑額票各撥一千張令商邱縣商領運銷售從之

實錄卷百七十六

五

大清高宗法天隆運至誠先覺體元立極敷文奮武孝慈神聖純皇帝實錄卷之六百七十六

大清高宗法天隆運至誠先覺體元立極敷文
奮武孝慈神聖純皇帝實錄卷之六百七十七

纂修總纂官經筵講官太子太傅文淵閣大學士文淵閣領閣事領侍衛內大臣錢謙益奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加三級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十七年壬午十二月甲辰兵部議失

下
吏部
兵部
刑部
戶部
工部
禮部
兵部
刑部
戶部
工部
禮部

察聚賭械毆之盛京將軍清保熊岳副都統
瑚嘉保各照例罰俸一年瑚嘉保以紀錄抵
銷得旨清保著罰俸一年前因清保在盛京
將軍任內諸務廢弛是以降旨將其紀錄悉
行銷去今兵部議處失察聚賭械毆一案於
清保則議以實罰而副都統瑚嘉保則仍准
以紀錄抵銷瑚嘉保所得紀錄即如清保尋
常議敘之案耳又豈可獨令存留以為抵銷
之地盛京駐防各官習氣甚屬不堪不可不

加以整飭除瑚嘉保此案罰俸不准抵銷外
並著將該處副都統協領防禦等官從前所
得紀錄一概全行銷去以示懲儆嗣後如果
能漸除舊習實心奮勉遇應行議敘時再予
紀錄以熊岳副都統瑚嘉保阿勒楚喀副
都統書通阿對調以故一等男來保子李
仁源二等男格魯德子賽桑阿各襲爵以
江蘇太倉州故御史陸毅泰州故舉人劉之
涉各入祀本籍鄉賢祠從巡撫陳宏謀請也

下
吏部
兵部
刑部
戶部
工部
禮部
兵部
刑部
戶部
工部
禮部

○乙巳

上御乾清門聽政 諭刑部審奏順義縣役張
有功等強拏官車一案前以直屬有司辦車
不善議令內務府莊頭置車官辦乃因地方
藉官差為名強拏民車故置車官辦欲以便
民也今地方蠹胥仍拏民車不已且轉拏官
車實非情理所應有雖蠹役所為知縣任寶
坊所司何事著交部嚴加議處餘依議第念
此等應差車輛屢經立法調劑而一弊既去

一弊又滋自不得不求其正本清源之道且如官員家屬赴任等事需用之車逐邑應付本屬煩瑣其中已不無沿途收取折價之人與其私自通融不免高下其手又何如官為經理俾得永定章程朕意嗣後驛路一切差務除特旨給予官車及必需車輛事件由該督等奏明仍照例應付車輛外其餘著該部查明定例應給價值即由部計程散給令其自行雇覓不必再給官車倘復有不肖官吏

以尋常事件混行拴拏民間車輛一經訪聞或御史叅奏朕必嚴治其罪至兵部官車一項除解送人犯必資應用外其他有應照此酌量給值可以減省拴車之處該部一併詳議具奏尋奏驛路一切差務除奉旨給與官車及奏明應給車輛事件外餘俱折價為便其價自京至直省末站由兵部覈明程途照直隸定例咨戶部給領過直後令經由各省首站覈計彙給在外令本省管驛衙門及經

過各首站遵照辦理於驛站項下動支報覈從之○諭軍機大臣等刑部審擬順義縣役張有功拏車生事一摺已有旨諭部矣向因地方承辦官車不善經朕諭令內務府大糧莊頭代辦乃不肖有司胥吏轉乘此藉口作奸其事迥出情理之外是以將知縣任寶坊交部嚴加議處前此該督奏准給照烙印諸條不過就事論事為之設法防範耳朕意正本清源不如即照應得車價按程給予尤為

事簡而弊清嗣後除特旨及奏准必用付車之項餘俱一概按照定例給價自可永杜諸累該督於部議通行後一切善為經理使法垂可久乃為允協直隸郵政比他省疲敝特甚嗣後除特旨應給外其他需用車輛之處何項必須由該省奏定給車此外均可折價事宜著傳諭方觀承令其即速籌議奏聞○軍機大臣等議覆庫車辦事大臣鄂寶喀什噶爾辦事尚書永貴奏稱庫車印房貼寫辦

事人員現由涼州莊浪兵內派撥三人請即作為三缺照各城辦事人員例給與六品職銜並盤費鹽菜銀兩如行走勤慎換班時量予陞階懶惰者革退另放應如所請從之○兵部議覆江西按察使顏希深奏稱江西衛所守備千總遇五年軍政俱由糧道與藩司出具考語山東省則惟衛千總歸糧道考覈守備但歸藩司辦理查衛備運務屬糧道專管耳目最切請嗣後東省衛所軍政亦照江西例令糧道與藩司各出考語詳送漕撫覈題應如所請從之○伊犁將軍明瑞等奏據旌額理等咨稱烏嚕木齊屯田多以哈薩克馬耕性不相宜不如用牛之便因本處僅有牛六百餘隻聞伊犁牛甚多商量通融辦理等語查伊犁現有牛三千三十餘隻除歸入孳生牧羣外餘一千九百餘隻計以一千隻屯田餘九百餘隻俟開歲春融派員牧養解送烏嚕木齊報聞○舉行各處駐防軍政吉

林卓異官一員罷軟官三員才力不及官二員獨石口卓異官一員年老官一員有疾官一員杭州卓異官二員罷軟官二員年老官一員有疾官一員荆州卓異官一員才力不及官一員青州卓異官一員罷軟官一員有疾官一員河南卓異官一員四川卓異官一員西安卓異官一員年老官一員寧夏卓異官一員綏遠城年老官一員有疾官三員分別議敘處分如例其曾經出兵打仗之西安年老官一員綏遠城年老官一員有疾官三員賞給半俸全俸有差○以故一等公永謙子景惠三等男舒明子雅尚泰各襲爵○丙午

上詣

皇太后宮問安○諭軍機大臣等卡塔海等奏查辦越境偷打貂皮高麗人金永官等一摺所擬甚屬錯謬朝鮮世為本朝臣僕於藩部中至為藐小該國既不能約束此等匪犯潛

行鼠竊。則將該犯交與治罪外。該國王尚當移文嚴飭。至貂皮等物。雖無足重輕。但一經追出。自應照例入官。何得一併請交該國辦理。重乖國家體制。在伊等不識事理。一切為就事了事起見。且若鯁鯁過慮。惟恐別生邊釁者。然殊不思朝廷駕馭屬國。稍涉遷就調停。所關綦重。況國朝撫戢四裔。其中即有遐荒强悍。什百高麗者。無不震讐受命。遇事惟知執法處治。而又何有於高麗。摺內所議背理之處。已令軍機大臣刪節交部矣。卞塔海等。著傳旨嚴行申飭。並詳悉諭令知之。○丁未。吏部等部議覆。湖廣總督愛必達奏。稱安陸府屬沔陽州。接壤漢陽。地方千里。僅知州一官。照察難周。查州屬之新隄鎮。地濱大江。商賈輻輳。請於該處添設縣治。與沔陽州分地管理。均改隸漢陽府轄。裁去駐劄新隄之安陸府通判。為知縣衙署。改鍋底灣巡檢為典史。沔陽州訓導為縣學訓導。其沔陽州糧

捕事務。歸漢陽通判管理。安陸府糧捕事務。歸安陸同知管理。各改鑄關防印信。應如所請。從之。○又議覆。廣東布政使史奕昂奏。稱教官交代。不過書籍祭器。請定限一月。具結咨部。遇學政考試。及文武鄉試送考時。不得在本任交代者。豫行申報。俟回署之日起。限應如所請。從之。○舉行各省軍政。江蘇卓異官三員。年老官一員。才力不及官一員。浮躁官一員。安徽卓異官五員。年老官三員。才力不及官一員。江南漕運卓異官一員。年老官三員。才力不及官一員。浙江卓異官四員。才力不及官二員。有疾官二員。福建年老官二員。才力不及官一員。湖南卓異官二員。年老官一員。才力不及官一員。湖北年老官一員。河南卓異官四員。才力不及官二員。山東卓異官二員。年老官一員。陝西卓異官三員。年老官二員。有疾官一員。甘肅卓異官五員。年老官一員。才力不及官一員。四川年老官一

員有疾官一員。廣東卓異官六員。罷軟官一員。年老官二員。才力不及官三員。廣西卓異官一員。年老官一員。雲南卓異官五員。年老官一員。有疾官一員。貴州卓異官三員。年老官二員。浮躁官一員。分別議敘處分如例。以左都御史董邦達為工部尚書。吏部左侍郎彭啟豐為左都御史。左副都御史梁國治為吏部右侍郎。仍留學政任署內閣學士。張映辰為副都御史。原任副都御史竇光鼐署內閣學士。○予故工部尚書歸宣光祭葬如例。謚昭簡。○旌表守正捐軀之浙江會稽縣民朱某妻徐氏。○戊申。諭曰。寧郡王弘皎既屬患病。凡遇朝期。俱不能到。著賞給半俸。令其在家養病。○諭軍機大臣等。據成衮扎布奏稱。諾木琿因豫備明年哲布尊丹巴呼圖克圖之呼畢勒罕受戒事宜。與土謝圖汗車登多爾濟等。向喀爾喀四部落內。斂銀一千兩。又檢查呼圖克圖財物。將海龍皮張取去。

等語。此事殊堪駭異。前命諾木琿赴庫倫辦事。原因桑寨多爾濟在彼多有不謹。致哈勒哈齊等控告。是以派伊前往。乃更恣意妄為。尤屬不堪。著派貝子瑚圖靈阿額駙福隆安前往查辦。并傳諭成衮扎布知之。○己酉。上詣皇太后宮問安。○諭據德雲奏稱。前經奉旨賞給為奴人犯。於有無逃逸之處。著每年具奏。伊因屬員等並未稟知。是以遺漏。請將屬員及伊交部嚴加議處等語。賞給為奴人犯有逃走者。令各自申奏。原為此輩匪徒。須加約束。亦因各省都統等並無事務。令其將此入奏。以見留心。與否。德雲遲誤未奏。咎止疎忽。即據實請旨。亦不過將伊罰俸。乃竟卸罪屬員。巧為掩飾。伊以為屬員未稟。伊無由知。此刻又何以得知耶。滿洲臣僕流入此等惡習。凡事惟思避咎。毫無淳樸誠實之心。亦不止德雲一人。京師大臣皆所不免。德雲著交部

嚴行察議。以為飾非卸罪者戒。併通諭八旗。及各省都統副都統知之。○庚戌諭曰。李星垣摺奏。中軍游擊楊錦。差員帶兵遠接。并呈送銀兩。極意逢迎。到任後。查出該游擊有家。人冒食戰糧。私分生息。科派兵丁。侵蝕公項。貪污各款。已揭報督提題參等語。辦理甚屬可嘉。從來綠營陋習。每以巧於彌縫。濟其舞弊。營私之計。各省似此者。恐復不少。李星垣於巡察營伍時。能據實參奏。專轄大員。果能如此振作。積翫何患不懲。李星垣著交部議敘。以示獎勵。○又諭曰。楊應琚奏。伊犁屯務現在需員辦理。而陝甘總兵副將內。熟諳田功者甚少。惟西安城守營參將馬虎。曾於關展等處屯田四載。妥協幹練。堪以派往等語。馬虎著賞給副將職銜。令於明歲帶領換班兵丁。前赴伊犁。承辦屯田事務。其西安城守營參將。並著暫停開缺。俟有陝甘副將缺出。請旨補用。○是日。癸未年立春。順天府進土。

牛春山寶座。○辛亥。兵部以從前賞給世職後。復經議敘給與世職。及在西勒庫爾打仗。重敘各員請旨。得旨。溫布。由屯。巴圖濟爾噶勒。占頗圖。額勒登額。阿第木保。碩通等七人。世職著加恩不必裁減。仍予承襲。俟再出缺時。奏聞請旨。端濟布之子世職。再襲時。亦照此辦理。瑚爾起在軍前並無出色奮勉之處。即前次出征和聞。亦因巴圖濟爾噶勒奮勇方能藏事。豈伊一人之力。况伊曾領富德銀兩。代為放債圖利。甚屬卑鄙。伊所有世職著即裁汰。○壬子。諭軍機大臣等。永貴辦事日久。著納世通前往更換。現在納世通照看入覲。回人前來。俟來年帶領伊等。各回本處。後再往喀什噶爾。更換永貴回京。○癸丑。孝莊文皇后忌辰。遣官祭昭西陵。○上詣皇太后宮問安。○諭軍機大臣等。新柱等奏稱。

巴達克山素勒坦沙統衆搶掠博羅爾游牧圍困城池博羅爾沙瑚沙默特情急求救已遣使將素勒坦沙嚴行斥責若仍不肯止息即當領兵問罪留額敏和卓辦事等語巴達克山博羅爾俱已歸順同為臣僕素勒坦沙不知守分託言欲報舊讎博羅爾因而情急請救若置之不問其何以服衆心如斥責不從自當進剿但新柱向未歷練戎行額敏和卓頗悉回部情事自當同往葉爾羌已有鄂對何必留伊辦事即至巴達克山若必須用兵葉爾羌官兵甚少昨已派愛隆阿伍岱前往伊犁即於彼處派出滿洲索倫察哈爾兵千餘名厄魯特兵數百名撥給馬匹合之葉爾羌等處官兵以三千人為率始能集事現在霍罕額爾德尼亦有占據額德格訥游牧之事當量其輕重緩急相機行止新柱額敏和卓督辦軍務愛隆阿伍岱領隊進剿其和衷商榷妥協辦理併傳諭明瑞永貴等知之

○又諭據阿桂明瑞奏稱哈薩克人等越境游牧明春勦辦後仍須嚴加防範請於愛隆阿伍岱二人內酌留一人帶兵巡哨等語哈薩克等貪得無厭理應重加勦辦但因其使臣現已來京昨已降旨令明瑞且暫緩辦理此際葉爾羌喀什噶爾等處恐尚需用伊犁兵丁即可派愛隆阿伍岱帶領前往○葉爾羌辦事都統新柱等奏臣等遣伯克薩里等曉示素勒坦沙額敏和卓又密行寄書令其悔罪獻俘遂將來使噶巴呢雅爾斥責遣回正在束裝奉到索取布拉呢敦妻子諭旨因思與其密為開導不若顯行索取遂向薩里等及該來使詳悉曉示并云收取布拉呢敦妻子時須詳加辨驗以防詐偽葉爾羌識布拉呢敦妻子之人甚多若辨驗不實則素勒坦沙之罪更重不能再邀寬免該使叩首敬聽遣令起程報聞○烏魯木齊辦事副都統旌額理等奏烏魯木齊屯田係陸續舉行羅

克倫昌吉。又在其西。是以駐劄領隊大臣。今伊犁既建城堡。昌吉距烏魯木齊頗近。所築城已移駐安西提標右營兵。屯田事務。應即交該副將管理。其駐劄昌吉之副都統永瑞。請撤回烏魯木齊辦事。報聞。○甲寅。定移駐伊犁防兵事宜。諭軍機大臣等。前因準夷未平。涼州莊浪等處。為西陲衝要。故將西安駐防之滿洲蒙古漢軍兵丁。派出數千名。分地駐防。今大功告成。已里坤以西。皆成內地。涼

莊既非邊徼。而該處並無行圍習藝之所以致兵丁怠惰偷安。俱歸無用。現在伊犁建造城堡。設立將軍駐防屯田。與其三年一次派兵更番戍守。何如即以涼莊兵丁。挈眷遷移。較為省便。至內地之京口杭州等處。亦不必多駐官兵。從前漢軍人等。原准其出旗撥補綠旗兵缺。此二處兵丁。亦應照例裁汰撥補。將所出額缺分例。揀選索倫察哈爾餘丁。派往伊犁駐防。庶糧餉不致虛糜。而伊等得以

及時効用。差操得所。為國家增一勁旅。著軍機大臣將涼州莊浪官兵。作何挈眷遷移。及裁汰京口杭州駐防。揀選索倫察哈爾餘丁。派往伊犁之處。詳密定議具奏。尋奏涼州莊浪舊駐滿蒙兵三千二百名。現在無須防守。應遵旨令其攜眷移駐伊犁。其餘漢軍兵一千名。照出旗例裁缺。交該管將軍或撥歸綠營。或令為民。杭州額設漢軍兵一千九百名。亦照此辦理。惟京口漢軍兵三千三百名。係

水師營缺。應留千餘名。於江寧滿蒙兵六千名內。擇其熟諳水務者。撥往再將漢軍兵缺裁汰。各項額缺。給與索倫察哈爾餘丁。往駐伊犁。交該管將軍都統。揀選索倫一千名。察哈爾一千名。作為馬甲。照例於應得兵餉外。給與鹽菜銀兩。統計遣往兵丁。共五千餘名。併其眷口。將及二萬名。須陸續派遣。議於所揀餘丁內。派索倫五百名。察哈爾五百名。於春草萌生時。先往其眷口。著後去五百名。攜

帶涼州莊浪滿蒙兵自明年為始分為三起按年起程從之○是日起

上以歲暮祫祭

太廟齋戒三日○乙卯諭軍機大臣等永貴等

奏霍罕額爾德尼占據額德格訥游牧若遷

延不還勢須問罪今新柱等又有辦理巴達

克山之舉應請將霍罕之事暫緩等語所見

尚是伊等駐劄之兵合計祇七八百名必須

派調伊犁官兵方可集事但外藩彼此爭鬪

平定回疆方略卷一百一十五

二

亦事所常有馳書斥責自當遵奉指示即其

間未能全如約束而於大體不失亦可相機

行止伊等惟遵照節次諭旨妥協辦理併傳

諭新柱明瑞等知之○丙辰以歲暮祫祭遣

官祭

太廟中殿

後殿丁巳祫祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

平定回疆方略卷一百一十六

一八

端慧皇太子園寢○遣官祭

太歲之神○愛烏罕使人和卓密爾哈巴達

克山使人阿布都爾阿木咱霍罕使人巴巴

什克西哈薩克烏爾根齊部使人塞德克勒

奇齊玉斯部使人烏克巴什頗拉特回部喀

什噶爾諸城三品阿奇木伯克阿克伯克等

入覲於午門前恭迎

聖駕御重華宮召見愛烏罕使人等賜茶資

冠服有差○諭據瑪瑞奏稱行至今北口因

未攜帶文憑為守關人員阻遏嗣乃移取兵部咨文始得出關等語設立關口原為稽察私行出入之人若瑪琿係二品大臣派往更換額勒登額無人不知豈私自出口者可比從前博勒奔察前往亦曾為關吏所阻伊等之見不過欲使朕聞知以見其留心防範之意此等伎倆豈能逃朕洞鑒著傳旨申飭嗣後再若如此必從重治罪○戊午

上詣

皇太后宮問安○御保和殿筵宴朝正外藩左

翼科爾沁和碩達爾漢親王多羅額駙色旺諾爾布和碩親王固倫額駙色布騰巴勒珠爾固山貝子多羅額駙班珠爾輔國公和碩額駙喇什納木扎勒輔國公瑪哈瑪裕爾哈達固山額駙索諾木多爾濟瑚一等台吉喇特納三等台吉色楞丹巴喀喇沁多羅都稜郡王喇特納錫第鎮國公丹津達爾扎和碩額駙納木扎布一等塔布囊格勒克薩木魯

布翁牛特多羅都稜郡王布達扎布鎮國公恭格喇布坦一等台吉諾爾布扎木素二等台吉巴顏巴圖爾三濟扎布扎魯特多羅貝勒錫勒塔喇鎮國公納遜額爾克圖二等台吉朋蘇克喀爾喀多羅貝勒阿裕爾固山貝子車木伯勒一等台吉桑寨琳沁端多布多爾濟薩木丕勒多爾濟固穆扎布二等台吉巴勒丹多爾濟敦漢固山貝子固山額駙垂濟扎勒輔國公多羅額駙桑濟扎勒和碩額駙密扎特多爾濟固山額駙山津阿爾必特瑚三等台吉色布騰多爾濟鄂爾多斯固山貝子納木扎勒多爾濟巴林輔國公和碩額駙德勒克歸化城土默特輔國公喇嘛扎布和碩額駙納遜特古斯四等台吉巴勒丹多爾濟右翼喀爾喀和碩親王齊巴克雅喇木丕勒親王品級郡王車布登扎布多羅郡王多羅額駙羅布藏多爾濟貝子品級額爾克沙喇鎮國公扎木禪公品級台吉成衮扎布

扎薩克一等台吉納旺車凌綽羅斯多羅郡
王羅布扎。回子郡王品級貝勒霍集斯輔國
公和什克額色尹圖爾都色布騰扎薩克一
等台吉瑪木特茂明安多羅貝勒裕木充青
海固山貝子沙克都爾扎布和碩特扎薩克
一等台吉特默齊及大學士領侍衛內大臣
等宴召科爾沁和碩達爾漢親王多羅額駙
色旺諾爾布和碩親王固倫額駙色布騰巴
勒珠爾喀喇沁多羅都統郡王喇特納錫第
翁牛特多羅都統郡王布達扎布扎魯特多
羅貝勒錫勒塔喇喀爾喀多羅貝勒阿裕爾
科爾沁固山貝子多羅額駙班珠爾教漢固
山貝子固山額駙垂濟扎勒喀爾喀和碩親
王齊巴克雅喇木丕勒親王品級郡王車布
登扎布多羅郡王多羅額駙羅布藏多爾濟
綽羅斯多羅郡王羅布扎回子郡王品級多
羅貝勒霍集斯茂明安多羅貝勒裕木充青
海固山貝子沙克都爾扎布喀爾喀貝子品

級額爾克沙喇至

御座前賜酒成禮。○是月江蘇巡撫莊有恭奏
泰州丁溪小海二閘及鹽城阜寧二縣之山
岡草堰陳家沖三閘前經奏准於該處各開
引河一由王家港入海一由射陽湖入海查
現在情形各閘下游漫沙壅積欲使疏通應
先將閘下引河挑深再為閘上引河之計現
委員勘估興工報聞。○江蘇布政使兼管織
造關務彭寶奏龍江關徵收商稅經前督臣
將銜規茶果照驗單票各陋規革除只收加
一飯銀一萬七八千兩派給家人書役以充
養贍其原定添平水腳銀一萬五千兩為歲
給解費之需於贏餘項下開銷在從前徵收
稅銀十餘萬兩原屬敷用遞年以來正贏稅
銀收至二十餘萬兩解部需用各項增添每
年尚不敷銀數千兩即於飯銀內通融辦理
原屬以公辦公請照舊存留下部知之。○河
東河道總督張師載奏豫省黃河兩岸向來

各照佃戶多寡認夫防隄第經胥役派撥往往有田之戶坐享無事無力之民重疊差擾現在飭令各州縣查明離工二里以內有田人戶五十畝出夫一名按畝遞加其田在五畝以內離工二里以外者不得科派豫先傳集各戶開造清冊註明有田若干出夫若干送廳汎存案不必拘定入伏上工霜降放回之例總於伏秋汎內一遇水漲隄上鳴鑼號召鄉夫齊集分堡駐防俟水落即令散歸

實錄卷六十五

五

得旨亦在汝及道員不時查察耳如此立法即謂能去弊可乎○又奏山東上河廳屬有李海務石閘一座年遠舊工歷被汎水衝刷應行拆修但全閘盡拆未免糜帑擬就東邊之冊卸一面修補將金門展寬使船行順利又洳河廳屬韓莊閘上下西岸隄工外臨大湖內傍運河從前大工案內於臨湖一面修做石工而運河一面仍係土戩每伏秋大汎多有坍汕應一併改修石工照南陽西岸工

程均用碎石修砌需費無多且能堅久得旨嘉獎○河南巡撫胡寶瑤奏州縣額徵河銀前任江南總督高晉奏請統解藩司由司彙解河庫經部議准通行查豫省開歸道與藩司同城河北道距省亦僅百里河務皆可會商各州縣額徵銀兩徑解道庫原屬甚便若一併解司則南岸各州縣赴省解司又須由司解道徒多一番輾轉北岸州縣解司者須渡黃而南及由司解道又須渡黃而北不如

實錄卷六十七

五

均就近解道為捷其河銀考成及歲報夫食各項仍照舊辦理得旨著照所請行○湖北巡撫署湖南巡撫宋邦綏奏郴州桂陽二處抽收各稅錫積至十萬四千餘觔本省鼓鑄正卯二十鑪歲僅用錫一萬五千餘觔郴州二廠每年可收二萬觔儘足敷用查湖北錢局鼓鑄正加二卯歲需錫三萬餘觔現委員赴漢鎮採買遇商販不前價多昂貴應將南省現存錫酌留一萬四千觔其餘九萬觔協

撥北省。祇須歸還錫廠運脚較之採買可節省銀一萬五千餘兩。得旨。如所議行。○是年追予和闐等處回部出師陣亡之委署筆帖式德山等六員。千總趙國威等四員。把總楊殿等十五員。空翎頭目福成一員。及領催披甲。馬步守兵等三百二十二名。卹賞俱入祀昭忠祠。○旌表孝子。浙江等省周茂樞等九名。守節合例。八旗滿洲。額騰額妻舒木魯氏等七十八口。蒙古。衮布妻西勒德特氏等二

實錄卷六十七

五

十二口。漢軍。甯四妻田氏等二十口。吉林等處駐防。喀木尼哈妻墨爾德里氏等七十五口。直隸等省。紀從櫛妻王氏等四百二十九口。夫亡殉節。山西等省。馬繼五妻宋氏等二口。未婚守志。鑲紅旗滿洲。章常住聘妻馬佳氏一口。浙江等省。郁鴻緒等聘妻蔣氏等十九口。百歲壽民婦。奉天等省。連玉等四十一名口。各給銀建坊如例。○一產三男。直隸等省。楊義士等十家。○會計天下民穀數。各省

通共大小男婦二萬四十七萬二千四百六十一名口。各省通共存倉米穀三千四百九萬三千二百七十三石九斗一升七合二勺。

實錄卷六十七

五

大清高宗法天隆運至誠先覺體元立極敷文奮武孝慈神聖純皇帝實錄卷之六百七十七

大清高宗法天隆運至誠先覺體元立極敷文奮武孝慈神聖純皇帝實錄卷之六百七十八

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆二十八年癸未春正月己未朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○庚

申召大學士及內廷翰林等茶宴以歲朝圖聯句○諭去歲直隸各屬雨水過多其偏災

地方已經加恩賑恤並酌籌以工代賑俾窮

黎不致失所但時屆春月例賑將停麥秋尚

遠正當青黃不接之際農民口食未免拮据

深為軫念著再加恩將被災較重之霸州保

定文安大城永清東安武清寶坻寧河薊州

安州新安天津青縣靜海滄州寧晉等十七

州縣之極次貧戶口暨被災稍輕之大興宛

平昌平順義固安涿州新城雄縣香河豐潤

玉田深州昌黎樂亭清苑望都高陽河間任

邱交河景州東光南皮鹽山慶雲冀州武邑

衡水等二十八州縣之極貧戶口均於停賑

之後概予展賑一個月以資接濟並於通倉

所存乾隆二十四年以前積米撥運十二萬

石以充展賑之需該督方觀承其董率屬員

實力奉行務令貧民均霑實惠副朕愛養黎

元至意該部遵諭速行○又諭上年山東濟

南武定等屬間被偏災疊經降旨令該撫等加意撫綏俾小民毋致失所第念時屆春初賑期已滿而田間東作未興猶不免艱於覓食朕心深為軫念著加恩將被災之齊河濟陽禹城臨邑長清陵縣德州德平平原德州衛惠民陽信海豐樂陵商河霑化壽張聊城堂邑博平茌平清平冠縣臨清邱縣高唐恩縣夏津武城東昌衛等三十州縣衛內所有極貧之戶再行加賑一月以資接濟該撫其董率屬員實心經理務令均霑實惠稱朕軫恤貧黎至意該部遵諭速行○又諭伊犁原係厄魯特地方今既築城令滿洲索倫回子居住自應照蒙古例設立喇嘛舉行送巴凌放烏布藏等事固勒扎海努克現有廟宇著寄信明瑞令酌修一所選喇嘛百餘名除伊犁現有喇嘛外彼處蒙古內有情願充當者聽若仍不敷俟明瑞奏到時另行撥往○辛酉諭甘省河西河東各屬去歲間被偏災業

經該督撫等照例撫恤但念該省地土磽瘠在被災地方固屬收成歉薄即其餘各屬夏秋二麥豐歉不一所有歷年借欠各項若概令一併徵還民力未免拮据著加恩將甘省河西河東各屬歷年借欠口糧籽種牛本等項均予緩至本年秋收後完納俾小民餬口有資得以盡力東作稱朕惠恤編氓至意該部遵諭速行○諭軍機大臣等新疆平定有年伊犁應多駐官兵以籌久遠昨諭將涼州莊浪等處官兵攜眷遷移交軍機大臣詳悉妥議因念官兵三四千名合之家口不下萬人所有營房糧餉俱當豫為備辦著傳諭明瑞等將此項移駐官兵作何建造城垣廬舍及給與糧餉之處先行籌畫一面辦理即行具奏尋奏察哈爾厄魯特兵游牧為生應仍其舊索倫亦然過冬自備棚房產業再行議給惟涼州莊浪官兵房屋需七千餘間烏哈爾里克新城僅敷現在官兵駐劄查伊犁河

岸高阜。地土堅凝。可築大城。在新城及固勒扎回城之間。糧運亦便。所產煤薪皆足用。計明春調兵起造。至乙酉年。城屋均可竣現。派伊犁兵游牧至阿布喇勒山伐木。咨遣內地工匠。製器應用。至糧餉。以伊犁收穫。及回人所交糧計之。至丁亥年麥收。可支新舊兵三年食。更請以來年為始。陸續增屯田兵一千五百名。耕獲自有盈餘。孳生牛羊在外。將來塔爾巴哈台駐兵。亦可源源接濟。從之。○又

諭曰。明瑞等奏稱。伊犁駐防屯田官兵。及貿易商民。日以增多。所有附近薪木。俱經取用。樵採之處漸遠。今查勘洪郭羅鄂博。有產煤之地。已傳示兵民等。有願行開採者。聽其前往等語。開採煤窯。以接濟日用。自屬要務。但兵民既皆往採。則羣聚雜處。不能無爭鬪之事。更當留心約束。且伊犁為厄魯特故地。蒙古風俗。以游牧資生。若居處飲食。竟似直省駐防官兵。則日久漸至頹惰。著傳諭明瑞等。

將索倫察哈爾兵丁。令其照常游牧。即滿洲兵丁。亦不宜常居城市。仍令其兼以游牧為事。即可搏節薪芻。而伊等亦不忘本業。甚有裨益。著即遵照辦理。○壬戌

上奉

皇太后幸重華宮侍宴。○諭。上年直隸各屬雨水過多。所有被災稍重之極次貧民。及被災稍輕之極貧各戶。業已加恩展賑。以示惠養。更思被災稍輕之次貧。及勘不成災。與毗連災地之貧民。雖不在定例應賑之內。而其中實在不能自存。有類極貧者。當此青黃不接之時。饔飧不繼。深堪軫念。著格外加恩。將大興等二十八州縣內之六分災次貧。及毗連災地之五分災貧民。其中酌量極貧戶口。一體給賑一個月。以溥渥澤。其餘貧民。均著於現在興修工作之處。准令赴工就食。俾資餬口。該督方觀承。逐一查明。妥協經理。副朕愛養黎元有加無已至意。該部遵諭速行。○又

諭上年山東濟南武定等屬被水災黎業經降旨將齊河等三十州縣衛極貧之戶加賑一月以資接濟更思該省與直隸天津河間災地毗連被水稍重當此東作未興之前間閭生計自多拮据著格外加恩將齊河等三十州縣衛內所有極貧戶口除前加賑一月外再予加賑一月其餘次貧各戶並著通行加賑一月以溥惠澤該撫阿爾泰妥協經理毋致一夫失所副朕軫恤災黎有加無已至意該部遵諭速行○諭軍機大臣等近因巴達克山霍罕使人入覲詢素勒坦沙搶掠博羅爾一事據稱博羅爾沙呼沙默特於上年害素勒坦沙之弟是以統衆復讐並非以舊事支飾又詢額爾德尼伯克搶掠額德格訥一事據稱額德格訥人等曾搶掠安集延額爾德尼始行報復且俱云若遣人曉諭自當遵行等語看來外藩相攻亦互有曲直不得謂之無因永貴新柱等此時當行文曉示不

必張皇辦理但該部落等一切情事自應據實奏報若專云曉示而不問情事之輕重倘有貽誤則伊等當任其咎俱著傳諭知之○
癸亥

上詣

皇太后宮問安○幸瀛臺○諭曰胡寶瑤奏立春以後舊病復發懇請解任等語胡寶瑤不必解任著派侍衛台補帶領原看之御醫張如璠馳驛前往診視○直隸總督方觀承奏

永定河下口寬築遙埝塞北埝水口宜濬舊河身導水東南注使北埝北不受淤鳳河上游受京畿諸縣瀝水易挾泥沙宜分段開挑天津西沽疊道西臨大淀東阻運河舊橋港小不足宣洩最易漫溢滹沱下游支河勢盛正河淤淺害運均宜濬報聞○葉爾羌辦事尚書新柱等奏回人素勒坦沙呈稱領兵至齊特喇爾攻殺讐人以伊弟沙布多爾噶為阿奇木伯克駐守其地查齊特喇爾曾經歸

附。何得擅行殺奪。已遣人問罪。令給還土地。人民若稍抗拒。即領兵進討。諭軍機大臣等。巴達克山。雖應辦理。但宜俟薩里前往曉示。果能遵奉約束。尚可寬宥。其或狡飾延緩。必須用兵。新柱等當遵屢降諭旨。酌調伊犁官兵。務期一舉竣事。即此次素勒坦沙稍有支吾。不妨再遣一使。姑示羈縻。藉以集我兵力。此時不可輕發。○甲子。享

太廟。遣誠親王允祕恭代行禮。○遣官祭

太歲之神。○

上御紫光閣。賜外藩蒙古王公台吉及回部郡王霍集斯等。並愛烏罕使人和卓密爾哈巴達克山使人阿布都爾阿木咱霍罕使人巴巴什克。哈薩克烏爾根齊部使人塞德克勒。奇齊玉斯部使人烏克巴什。頗拉特。回部喀什噶爾諸城三品阿奇木伯克阿克伯克等宴。○乙丑。

世祖章皇帝忌辰。遣官祭

孝陵。○諭駐劄回城大臣等。遵旨定議。回人耕種地畝。遇有偏災。豁免緩徵條例一摺。大臣等俱會銜入奏。獨額敏和卓玉素布未經列銜。蓋因額敏和卓玉素布各有所屬。回人地畝。現係豁免錢糧事件。不便與伊等會議。額敏和卓玉素布乃朕舊僕。且現為叅贊大臣。非他人可比。此等事件。理宜會同辦理。著寄信新柱。將此傳諭額敏和卓玉素布。嗣後一切事件。俱會同辦理。無庸迴避。○以湖南靖

州協副將張和為陝西河州鎮總兵。○丙寅。

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○諭從前各省督提等保舉堪勝總兵人員。業已陸續酌量簡用。其現任副叅以下各員。或尚有才具出眾。可膺專閫之寄者。著各省總督提督及兼管提督之巡撫等各就所知。據實保奏。送部引見。

○宗室公弘昉奏在景運門連班二日。無人換班。得旨。前鋒護軍統領俱有執事。弘昉即多值數班。有何不可以視軍營終年居住者。又當何如。弘昉殊屬乖謬。著交部嚴加議處。

○丁卯。

上大閱於暢春園之西廡。御大西門大幄次。賜諸王並文武大臣。蒙古王公台吉等宴。回部郡王霍集斯等。愛烏罕使人和卓密爾哈巴達克山使人阿布都爾阿木咱。霍罕使人巴已什克。哈薩克烏爾根齊部使人塞德克勒奇齊玉斯部使人烏克巴什。頗拉特回部喀什噶爾諸城三品阿奇木伯克阿克伯克等。並令與宴。宴畢。

上大閱。命各回部使臣等從觀。鑾騎鹵簿畢陳。聲礮三。鐃歌大樂作。奏壯軍容之章。總理演兵王大臣暨八旗領操都統等。率將校軍士甲冑出營成列。

上御幄次前帶帳。豹尾班三旗侍衛分翼列侍。

建黃龍大纛二於帳後。部院大臣具禮服分翼序立。八旗傳宣官騎而列於臺下。乾清門侍衛每翼六人。騎而列於傳宣官之前。

上躬御甲冑。乘馬出。兵部堂官奏請閱陣。

上親閱隊伍。兵部堂官前引。總理王大臣。滿洲

大學士。內大臣侍衛前引。後扈皆探甲乘馬。

上入自左翼。由列陣中路行。經前鋒護軍驍騎

諸隊而南。火器營藤牌兵諸隊而北。周閱畢。

迺還御帶帳。陞寶座。大臣侍衛及諸執事官

咸列侍。兵部尚書奏鳴角。臺下蒙古畫角先

鳴。各旗分列之海螺。以次遞鳴。達營陣。遂擊

鼓。營中海螺畢鳴。分列之海螺。以次退立於

臺下。營中三舉礮。遂行陣。伐鼓鳴螺。舁鹿角。

整列。騎而進。每進以十丈為節。鳴金則止。麾

紅旗則鎗礮齊發。鳴金則止。再伐鼓整列。馳

驟並進。鳴金麾旗發。鎗礮如初。如是者九。第

十進。鎗礮連環齊發。無間。鳴金三迺止。八旗

開鹿角。成八門。首隊前鋒護軍各整列。以次

出至鹿角外次隊並左右翼驍騎隨之火器營兵藤牌兵列於後既成列鹿角門闔八旗齊鳴螺喧呼作勢而進兩翼協隊乘馬斜向前進營中鳴螺迺振旅而退為殿之八旗滿洲火器營礮位烏鎗護軍驍騎及首隊前鋒護軍次隊驍騎各立於本旗大纛之下八旗分鹿角為八行火器軍結隊而退首隊兵殿後兵以次鳴螺而退各列於初成列之地兵部尚書奏大閱禮成

上釋甲冑饒歌清樂作秦皇威之章扈從之大臣侍衛皆釋甲冑具吉服隨駕還聲礮三領兵大臣及將士各釋甲冑歸營賜官兵等饌筵羊豕并薪炭等物如例○諭此次大閱於前一日晚間傳行次日兵丁即全帶器械前往伺候妥協此方不負為滿洲世僕朕嘉悅焉著加恩將大閱內所有兵丁每人賞給半月錢糧其餘雖不在操演之內但聽傳即往亦著加恩每人賞給半月錢糧之半○盛

京將軍舍圖肯奏廣寧縣有生息銀兩脩修呂陽驛至句驪河一帶道路橋梁查句驪河西地勢低窪溪澗復多雨積淹溢差役商賈不便請會同盛京工部奉天府尹選員濬修報聞○以歸化城都統豐安為荊州將軍副都統法起為歸化城都統○戊辰

上詣長春仙館問

皇太后安○還宮○是日起

上以祈穀於

上帝齋戒三日○已已諭據德爾格奏稱據阿克素將酺酒滋事解京之滿洲兵丁跟役楊福等五人遞解前來若將伊等輾轉解京惡奴反得僥倖在家安居其相近伊犁者即發往伊犁相近烏魯木齊者即發往烏魯木齊令其種地等語德爾格所奏是現在伊犁烏魯木齊等處俱有兵丁駐劄此等怙惡不悛跟役等發往伊犁等處皆可又何必輾轉發往黑龍江況此內尚有解回本主家中管束

者二人若將伊等交與本家管束反得僥倖在家安居則此等怙惡不悛之跟役等難保不無希圖回家故意自干罪譴者嗣後各城駐劄官員兵丁跟役內如有此等酗酒滋事者毋庸發遣黑龍江解送京城即照德爾格所奏由彼發往伊犁等處給與兵丁厄魯特等為奴如回子各城內即彼此易地調發與回子等為奴亦可若將伊等發遣之後仍不悛改者著即行正法○賜愛烏罕愛哈默特沙勅書曰爾遠在外藩向慕仁化遣使入覲具見誠悃朕以葉爾羌大臣奏報特派侍衛迎護爾使和卓密爾哈等前來入覲朕疊沛恩施屢申宴賚賜爾蟒錦緞疋紬綾器什使歸日爾其祇受又賜爾使及隨從員役緞疋皮張器什銀兩各有差并諭爾知之覽爾所進表文謂相去遼遠向為準噶爾回部所隔未能通使中國今聞諸部率服不勝欣慰是以入覲朕深為嘉悅至準回諸部朕非利其

土地人民因伊等自相殘害羣生不安是用發兵拯救從前準噶爾達瓦齊乘機自立旋為大兵擒獲阿睦爾撒納已降復叛大兵窮追至俄羅斯遂伏冥誅及回部霍集占兄弟負恩反噬敗逃至巴達克山為素勒坦沙所殺獻馘歸誠今伊犁葉爾羌等處咸入版圖霍罕布魯特諸部盡為臣僕朕寬其貢賦有來修歲事者優加賜賚爾雖遐聽亦應聞知至爾所奏瑪爾塔汗納巴拉池聞爾取扎哈那巴特城鳩其鄰部合馬步各數十萬眾來爭至奇里納勒聞爾領眾前來伊等俱避入帕尼帕特城爾攻圍六月殲其大伯克數十人黨眾十萬餘獲金銀器械無算夫納巴拉池既能鳩合黨眾如許乃未經接戰即入堅城坐待誅戮其事殊不可解爾又云欲往攻布哈爾聞已歸附中國不便侵伐足昭恭順之忱朕為天下共主中外一視賞善罰惡惟東至公爾此次因素勒坦沙抒誠遣使其循

理守分可知。且如爾奏數年來各處攻戰未獲稍安。則爾之屬人亦殊勞苦。尚其和協鄰封。休養部落。俾羣享太平之福。以受朕恩澤於無窮。特諭。○又賜巴達克山素勒坦沙勅書曰。爾所遣使人阿布都爾阿木咱等入覲。朕加恩宴賚。賜汝蟒緞。紬綾器什。又賞爾使人及隨從員役。緞疋皮張銀兩。各有差。並諭爾知之。爾受朕恩深重。應謹守天朝法度。約束屬人和睦鄰封。一切事務俱遵駐劄喀什噶爾葉爾羌大臣等節制。再去歲汝弟為博羅爾戕殺。汝因報復。遂有殺掠。但博羅爾係與汝一體內附之人。汝等雖有仇怨。亦不可奪其土地。人民前據葉爾羌大臣等奏稱。遣薩里等往諭汝歸所掠於博羅爾。朕特面諭汝使汝奉到朕命。宜即遵旨給還。慎勿延緩。庶可以永邀隆恩。若觀望抗違。則葉爾羌大臣等必請旨發兵問罪。悔無及矣。特諭。○又賜霍罕額爾德尼伯克勅書曰。爾所遣使巴

巴什克入覲。朕加恩宴賚。賜汝蟒緞。紬綾器什。又賞來使巴巴什克。緞疋皮張器什銀兩。各有差。汝受朕恩深重。應謹守法度。約束屬人和睦鄰封。一切事務俱遵駐劄喀什噶爾葉爾羌大臣等節制。再額德格訥之人去歲侵掠汝等。安集延商人汝因報復。掠彼鄂斯等地。但額德格訥係與汝一體內附之人。汝雖有仇怨。亦不可妄肆攻奪。前經喀什噶爾大臣移咨令汝給還所掠額德格訥土地人民。今朕已面諭汝使汝奉到此旨。即遵奉歸還。慎勿延緩。則可以永邀隆恩。若遲延不給。駐劄喀什噶爾大臣等必具奏請旨發兵問罪。悔無及矣。特諭。○又賜額德格訥阿濟比。勅書曰。汝遣使色哩庫楚克入覲。朕加恩宴賚。賜汝緞疋。紬綾器什。又賞汝使器什銀兩。各有差。汝受朕重恩。應奉守法度。約束屬人和睦鄰封。一切事務俱遵駐劄喀什噶爾葉爾羌大臣等節制。毋得抗違。庶祇受隆恩。

於勿替特諭。○又賜齊哩克照瑪喇特比衣沙藏比衣勅書曰。汝遣使諾海圖瑪入覲。朕加恩宴賚。賜汝緞疋。絀綾器什。又賞來使緞疋。器什。銀兩。各有差。汝受朕恩。應謹守天朝法度。約束屬人。和睦鄰封。一切事務。俱遵駐劄喀什噶爾葉爾羌大臣等節制。慎毋抗違。庶永邀朕恩。於勿替特諭。○又賜右部哈薩克奇齊玉斯努爾里等勅書曰。汝等仰慕皇風。輸誠表貢。遣使入覲。經駐劄烏魯木齊大臣等奏到。朕心嘉悅。已令護送到都。加恩宴賚。賜汝等緞疋。絀綾器什。並賞來使等翎頂。器什。銀兩。各有差。汝遠在遐荒。未通朝命。聞巴達克山霍罕各部落各部布魯特及鄰近之鄂爾圖玉斯哈薩克阿布賚等俱已歸附。祇受殊恩。汝嚮風景化。願為臣僕。進貢馬匹。具見惓誠。念汝游牧之地甚遠。初通貢使。賞賚特優。汝受天朝大恩。應謹守法度。約束屬人。和睦鄰封。以期永膺休眷。特諭。○又賜右

部哈薩克奇齊玉斯巴圖爾等勅書曰。汝等仰慕皇風。輸誠表貢。遣使入覲。經駐劄烏魯木齊大臣等奏到。朕心嘉悅。已令護送到都。加恩宴賚。賜汝緞疋。絀綾器什。並賞來使等翎頂。器什。銀兩。各有差。汝遠在遐荒。未通朝命。聞巴達克山霍罕各部落各部布魯特及鄰近之鄂爾圖玉斯哈薩克阿布賚等俱已

歸附。祇受殊恩。汝嚮風景。化願為臣僕。進貢馬匹。具見惓誠。念汝游牧之地甚遠。初通貢使。賞賚特優。汝受天朝大恩。應謹守法度。約束屬人。和睦鄰封。以期永膺休眷。特諭。○又賜哈薩克。阿布勒畢斯等。勅書曰。汝等所遣使入覲。朕加恩宴賚。賜汝等緞疋器什。又賞給策伯克。索勒屯。薩呢雅斯。索勒屯。圖庫索勒屯。哈木巴。巴索勒屯等。緞疋器什。又賞來使翎頂。緞疋器什。銀兩。各有差。汝受朕厚恩。宜約束屬人。安居游牧。毋得越境。若恃恩貪利。復潛往塔爾巴哈台等處遷移。則駐劄伊犁將軍大臣等。必申明約束。驅逐出界。傷汝牲畜。朕不能為汝庇也。當謹遵節制。以副恩養。特諭。○庚午

上詣

南郊齋宮齋宿。○諭朕於二月十九日啟蹕。恭謁

東陵。迴鑾耕藉禮成後。即於三月初七日恭詣

泰陵祇謁。所有應行典禮。各該衙門敬謹照例舉行。○又諭朕於二月初六日。舉行經筵。所有應行典禮。各該衙門照例豫備。○辛未祈穀於

上帝

上親詣行禮。○詣長春仙館問

皇太后安。○幸圓明園。○奉

皇太后幸山高水長。至丁丑皆如之。○諭朕於

二月初三日駐蹕南苑。初五日進宮。○諭軍

機大臣等。近因永貴等會議。蠲免回人賦役一摺。未列額敏和卓及玉素布之名。已降旨訓示。今伊等會議。擬補伯克員缺之奏。復然殊不可解。前此或謂所辦係加恩回眾之事。伊等不欲市德署名。已屬無謂。至補授伯克。自應同伊等商辦。復有何嫌疑。不行開列。額敏和卓等俱久隸臣僕。用至叅贊大臣。伊等如意欲辭避。尚宜曉示。令其勿存形迹。且不但此兩人。即鄂對。噶岱。默特等。若身當叅贊。

亦無不同辦事之理。至所辦補授伯克一事。尤未妥協。凡回部六品以下小伯克。伊等可擬定正陪具奏。若各城阿奇木。則總辦事務之員。與內地督撫相似。宜開列應行補授人員具奏。候朕特簡。何得與小伯克視同一例。永貴。新柱等諒不敢專擅。然此實謬誤之大者。俱著傳諭申飭。○壬申。

上奉

皇太后幸同樂園侍早晚膳。至乙酉皆如之。○

御奉三無私殿。賜皇子諸王等宴。○諭曰。阿桂著在軍機處行走。○諭軍機大臣等。前據胡寶琮奏稱。舊病復發。已遣醫馳驛前往診視。令其加意調攝。並於摺內批諭。即開印後。亦宜節勞。以冀速愈。今據輔德奏到。看來尚未能計日痊可。所有河南巡撫印務。仍著交與輔德暫行護理。俾得專心調治。副朕廑念至意。○又諭曰。豐安。勲臣之裔。因在軍營奮勉。授為荊州將軍。近聞豐安打仗出力。而聲

名頗覺平常。授以專閫之任。恐貽重譴。轉非朕念舊成全之意。荊州將軍著富僧阿補授。增海著調補寧古塔副都統。傅良著調補吉林副都統。至伯都訥地方。係滿洲蒙古接壤。副都統員缺。著扎隆阿補授。所遺副都統員缺。即著豐安補授。○又諭前德沁扎布之副盟長缺出。已將車木楚克扎布補授矣。因念伊復有差務。故並授諾爾布扎布為副盟長。非令車木楚克扎布開缺也。若伊前往烏梁海。則諾爾布扎布可以在彼辦理。如車木楚克扎布回游牧時。亦可會同辦事。○又諭曰。達桑阿奏稱。庫爾勒回人五百八十二戶。玉古爾回人五百九十四戶。每年各交官糧七百石。今撥往伊犁之回人一百四十七戶。雖在交糧額內。而阿克蘇和闐已查出多倫回人五十六戶。分送二處補額。其戶口不甚相遠。應仍照舊額徵收糧石等語。撥往伊犁回人雖以多倫回人抵補。但較之原額。究屬不

敷仍令照舊交糧不無攤派著加恩將庫爾勒王古爾回人應交糧石酌減十分之二以示體恤○又諭正藍旗護軍統領員缺著豐訥亨補授仍兼副都統○癸酉

上詣

安佑宮行禮○御正大光明殿賜朝正外藩等宴召科爾沁和碩達爾漢親王多羅額駙色旺諾爾布和碩親王固倫額駙色布騰巴勒珠爾喀喇沁多羅都梭郡王喇特納錫第翁

牛特多羅都梭郡王布達扎布扎魯特多羅貝勒錫勒塔喇喀爾喀多羅貝勒阿裕爾科爾沁固山貝子多羅額駙班珠爾敦漢固山貝子固山額駙垂濟扎勒喀爾喀和碩親王齊巴克雅喇木丕勒親王品級郡王車布登扎布多羅郡王多羅額駙羅布藏多爾濟綽囉斯多羅郡王羅布扎回子郡王品級多羅貝勒霍集斯茂明安多羅貝勒裕木充青海固山貝子沙克都爾扎布喀爾喀貝子品級

額爾克沙喇至御座前賜酒成禮

大清高宗法天隆運至誠先覺體元立極敷文奮武孝慈神聖純皇帝實錄卷之六百七十八

大清高宗法天隆運至誠先覺體元立極敷文奮武孝慈神聖純皇帝實錄卷之六百七十九

監修總裁官經筵講官太子太傅文淵閣大學士文淵閣領事內大臣稽察欽奉 上諭事件處管理

吏部理藩院事務總辦滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書保蘇滿洲都統軍功紀錄五次

尋常紀錄十四次臣德瑛經筵講官太子太保工部尚書紀錄六次臣曹振鏞等奉

校修

乾隆二十八年癸未正月甲戌

上御正大光明殿賜大學士尚書等宴○乙亥諭軍機大臣等上年直隸各屬秋雨過多所有被災地方疊經降旨加恩賑濟並籌議以工代賑復將災重之霸州等十七州縣暨稍輕之大興等二十八州縣極次貧戶口均予展賑一月俾資接濟第此等皆附近畿輔以北州縣至京南之廣平大名等所屬雖據該督將廣平大名等數邑奏明係因河水漫及偏災本輕已經照例賑卹無庸再行加賑近

聞京南地方去秋歲事亦歉正定遼南大不如保定以北光景是該處距京師較遠該督或因其被災稍輕查察未能周悉地方官勘辦亦有未盡之處且開州長垣大名等處前歲因豫省河漲亦經被滯當此連歲歉收之後閭閻口食不無拮据深堪軫念著傳諭方觀承令將京南各屬上年如何分別辦理並現今實在情形若何逐一查明即行據實覆奏尋奏正定以南登麥較早未經潦傷伏秋雨少收成約八九分惟漳水溢及之處村莊間有被淹成安等縣已報偏災分別給賑不便復與霸固等處再邀無已之澤得旨覽奏稍慰○又諭前因赫木等處拒捕獲犯潛逃已傳諭各撫及將軍等各就本處實力躡捕今據阿爾泰奏到現將續獲各犯史姓等七名逮差員役押解前赴奉天所辦甚為迅速可嘉已於摺內批諭山西何未緝獲一犯明德何未奏聞此等重犯於私創事發之後公

然糾衆拒毆不法已極理應嚴拏務獲盡法懲治以儆兇頑著再傳諭各撫將軍等務宜悉心躡捕毋致因循通緝一任遠颺漏網至現獲各犯尤宜小心押解勿令復致免脫○察哈爾都統巴爾品奏察哈爾八旗新附厄魯特等編入旗分已經數年應請與舊厄魯特一體當差照例挑補護軍馬甲俾得錢糧各立器械從之○以輔國公綽和諾為歸化城副都統○丙子諭曰訥爾素因擅責一馬

甲永遠停俸今信郡王如松所責乃

皇太后前引官員較之訥爾素之罪更大姑念其平日小心謹慎免其革去王爵仍著永遠停俸若更不知悔改遂非長傲則是福澤已盡自罹罪譴朕不能為之寬恕也○丁丑大學士等議准湖南巡撫陳宏謀奏稱湖南湘鄉安化二縣所產硫磺官為收買除營中歲需火藥外積存八萬四千餘觔應如所請令隣省赴買流通至硝觔並請於出硝時即動

官項買貯官局定價咨隣省買運民間自無私硝從之○河南巡撫胡寶瑤奏病軀不支開印期近請予解任得旨已有旨了但安心養病不必以辦事為急即如此次之復發未必非因過勞何不為久長出力之圖耶○戊寅諭曰諾木琿係駐劄庫倫辦事之人所有延請呼圖克圖呼畢勒罕領給度牒攢湊銀兩等事即伊所應管亦不過公同與聞而已乃竟從中任性滋事並少給尚卓特巴價值

勒買如許皮張復借貸銀兩至修理伊住房一節理應奏聞官給辦理伊又擅用喇嘛工價並縱容領催及家人恣意索銀甚屬無恥卑鄙不堪諾木琿著革職解來京交刑部治罪○諭軍機大臣等前據成衮扎布奏桑寨多爾濟在庫倫操守平常被人控告朕以其身係蒙古若由內地派大臣隨同辦事自可安靜因命諾木琿前往旋據成衮扎布將諾木琿參奏復派瑚圖靈阿福隆安赴該處

查辦已將諾木琿種種舞弊之處具奏是以降旨革職拏解來京交刑部治罪但二人之事相等著寄信瑚圖靈阿等一併查明再尚卓特巴係承辦呼圖克圖家務之人屢行賄賂先許銀兩又復首告使人隨其術中以濟其專擅之私詭詐已極實喇嘛中敗類至桑寨多爾濟自幼受朕深恩從前喀爾喀等滋事時衆心甚搖伊獨感發天良屹立不動此次朕必從寬免其治罪著瑚圖靈阿等密諭桑寨多爾濟不必疑懼令將尚卓特巴行事一一供出不可稍有掩飾此旨到日瑚圖靈阿等仍在庫倫即遵將尚卓特巴一併辦理如已起程前來此旨亦不必曉諭桑寨多爾濟即帶來京直隸總督方觀承奏永定河南北岸向以天地等字分編十八工河流改後廢去八工舊編次序已失內是字於隄洪字於河非所宜稱擬將南北岸各改稱頭工至六工飭廳汎改記並咨工部註冊得旨甚

是如議行又奏永定河於埝外築月埝並開減河工隸永清東安武清被災村民既可赴工力食而隄工需行礮乃堅夯礮用河兵較熟應日給飯食銀三分得旨以工代賑即宜速辦又奏現在疏消積水為先務幸淀水大落文安大城積水歸淀甚速涸出處已種麥其水深二三尺約四五月始消者亦不誤種秋禾民間稻種不足應請借給或其時不能盡涸即用戽斗助以人力天津東南與寶坻寧河視海水為長落按時開閘排放河間獻縣任邱大城水有阻於官隄者有阻於鄰縣曲防者權其輕重破其畛域或暫為開隄或入於溝渠案內勘定章程長遠除害上年開溝疊道未竟工良涿一路正月畢新雄河景一路二月畢田間溝洫次第經理不妨農不誤公報聞烏魯木齊辦事副都統旌額理等奏烏魯木齊歲易哈薩克馬數不過三千餘匹本年九月至十二月已得四千二

百匹積久增多除撥補新疆額缺及肅州等處標營倒斃馬外擬於烏魯木齊常留馬一千匹應差七百匹備阿克蘇調餘於來年四月牧放巴里坤供安西提標及肅州等處撥補得旨軍機大臣議奏尋議現奉諭旨令索倫察哈爾餘丁及涼州莊浪駐防兵丁續赴伊犁須增收羣先請將孳生馬送往驢馬暫留烏魯木齊備撥如應留馬外仍有餘即續送伊犁此後與哈薩克交易以孳生馬為要

俟新疆足額再撥補內地從之○已卯諭曰蘇昌等奏稱坐補順德縣知縣陳志儀於原缺人地不宜請留東以中簡缺改補一摺所奏殊屬取巧市恩向來外省告假起用官員例俱坐補原缺而必令送部引見者正以觀其才器為分別錄用之地如其人尚堪驅策即降旨令在部銓選得以及時自効至發往原缺省分候補之員率因引見時朕觀其才具本屬平常但以尚無過失不欲遽行棄置

故令在原任地方候補其得缺與否惟聽該員靜待並非亟藉此等人員為國家宣力也然此亦不過百十之一二耳其實令在部銓選者多此在仕籍者所共知也今蘇昌等藉改調之名開補用之捷徑二者相較果孰難而孰易耶且向來官員調簡多因其現任繁劇辦理竭蹶者奏請量為改調俾不致貽誤地方即坐補各員亦必俟得缺後察其不能勝任再行陳奏從未有以正在希冀得缺

之員而過為多方遷就者試問各省督撫現在各省坐補原缺人員中果有材力出眾引見時屈抑其人尚須督撫等為之委曲成全者乎今蘇昌等既稱陳志儀人地不宜恐將來叢勝誤公則何不於未告假之前據實奏請調簡是該督撫等有意瞻徇專為該員得缺起見耳所奏甚為錯謬蘇昌明山著傳旨嚴行申飭並將此曉諭各督撫知之○庚辰諭曰夏廷來盜用空白冒領兵米一案經三

法司覈擬具奏已降旨將該犯即行正法茲據莊有恭奏到夏廷來於正月初三日在監自縊此等重犯一經發覺地方官即應加意防範乃漫不經心任其自縊不得明正刑章非尋常案犯一時疎虞可比所有知縣鄭毓賢著照莊有恭所請革職典史倪宏昌著革職拏問莊有恭一併交部嚴加議處○辛巳諭軍機大臣等莊有恭奏夏廷來在監自縊一摺已於摺內批示并明降諭旨矣夏廷來交通胥役盜領兵米乃積慣舞弊之人且時在正初禁卒等未免懈弛正可乘機施其狡獪伎倆其間寧保無李代桃僵之事其監守之人實在因何疎虞並呈報時曾否將獄吏究詰有無情弊並派委何員檢驗之處均未詳悉奏明著傳諭莊有恭再行密訪嚴查逐一據實覆奏尋奏夏廷來自知罪重強加飲食以懈監者之心縊後經臬司嚴詢印捕家人刑書禁卒供無賄縱承審官不敢瞻徇衆

目難掩實係正犯報聞○又諭前馮鈐奏報流犯高深等聚衆毆弁一案已於摺內批諭令其嚴審速奏茲據王進泰將不能彈壓之守備何國璽奏明會疏題參所辦未免急遽於事理殊未明曉此等藐法兇徒自當盡法懲創其遇事不能約束及稟報遲延之文武員弁則當俟正案審定再行按例叅劾方為合宜若該犯尚未明正刑章遽將該管營員叅斥徒使不逞之徒刁風日長而該管官遇此等案件竊恐身先獲咎勢必至容隱不報是不惟不足示儆適開將來蒙蔽之漸耳馮鈐前奏該縣知縣應行叅議之處亦應俟定讞完案時再具疏舉行將此詳諭蘇昌馮鈐並王進泰知之○陝西巡撫鄂弼奏西安兵上年減退回營長領俸賞銀例於此次派出換班兵扣抵但現在辦裝無措請先扣十分之二餘八分於本營分兩年坐扣其長領車價銀數較現領車價銀僅十分之一應全扣

再咸長二縣承造烏魯木齊等處臺站大鐵瓦車五十輛督臣咨派督撫兩標換班兵自購驟百七十八頭駕往臣恐兵丁不能驟辦飭西同鳳乾四府州屬分購壯驟尅期解省照時價於各兵所領車價銀內每頭給銀一十五兩得旨甚妥知道了餘有旨諭諭軍機大臣等從前派往軍前官兵有中途減撤者所支俸賞銀兩曾諭俟將來屯戍換班時扣還今據鄂弼奏現在換班兵丁先於應給銀

內扣還十分之二其餘分作兩年完結等語為期尚覺太迫著加恩定限四年俾得從容展扣以示體恤至所稱逃兵一項兵丁雖已在逃豈竟盡無家屬乃既玩視軍紀又恃有他人為之代賠情實可惡若一體展限代扣則不法之徒轉以領銀潛逸為得計著傳諭該撫務令嚴行緝獲按數著追毋任漏網○壬午河南巡撫胡寶瑤遺疏聞諭曰河南巡撫胡寶瑤幹練老成恪慎精敏敷歷中外宣

力有年昨因舊病復發遣御醫診視尚冀痊可茲聞溘逝深為軫惜著加贈太子太保兵部尚書所有應得卹典仍著該部察例具奏其遺摺內請入籍江蘇青浦縣之處並著照所請行○又諭曰葉存仁著補授河南巡撫蔡鴻業著實授刑部侍郎蔣楫服制將闕著補授副都御史禮部侍郎事務仍著張若澄署理○又諭曰阿思哈著往伊犁協同明瑞辦事伍彌泰著往烏魯木齊辦事○諭軍機

大臣等愛烏罕愛哈默特沙初次遣使入覲曾降旨各省督撫沿途筵宴今該使臣禮畢回伊游牧地方經過處應供給之項仍當妥協照料不必筵宴○兵部議覆直隸總督方觀承奏稱直省各州縣額設差車共三十二輛惟清苑地當省會應照舊設二輛餘一輛四輛不等請撥增附京之良鄉十六輛通州八輛昌平六輛查差務惟奉旨給官車及奏准應付車輛事照例辦理餘經臣部議定按

程折價給領自雇各州縣額車應請裁從之
○癸未諭軍機大臣等前據成衮扎布具奏
哈爾哈齊等呈控桑寨多爾濟款項甚多是
以令瑚圖靈阿等因辦理諾木琿之事之便
一併查辦據奏詢之尚卓特巴遜都布多爾
濟均稱桑寨多爾濟辦事妥協此事即可了
結瑚圖靈阿福隆安著即來京至諾木琿所
借尚卓特巴銀兩若由京追取償還未免紛
繁著交桑寨多爾濟將諾木琿彼處現有馬
匹牲畜物件酌量作價償還○定邊左副將
軍成衮扎布奏據杜爾伯特親王車凌烏巴
什烏梁海內大臣察達克副管旗章京莫尼
扎布等呈稱聞烏梁海庫克新等投入俄羅
斯又掠哈薩克馬即領兵往擊將軍桑庫克
新等擒戮收取餘衆七十四戶臣等酌將招
撫人戶給察達克等分轄得旨車凌烏巴什
等俱著賞給緞疋其著有勞績之官員兵丁
等著照追捕色布騰之例分別賞給緞疋銀

兩○圍場總管齊凌扎布奏去年被水歉收
新舊駐防兵丁生計拮据請於豐收之達呼
爾掛甲屯波羅河屯土城子等倉借給口糧
分作五年交還從之○甲申諭曰知府史奕
瓌俸滿來京引見以伊父大學士史貽直年
老奏請留京侍養情辭懇切因念史貽直年
逾八旬其子不忍遠離晨夕亦屬至情著照
所請准其留京但知府改用京職例應銓員
外郎史奕瓌著格外加恩以四品京堂補授
用示優眷○又諭曰工部侍郎納世通著授
為叅贊大臣在喀什噶爾總理回疆事務○
安徽巡撫託庸奏正陽關在壽州鄉鎮無城
垣無專營大員多兵監督係廬鳳道署在鳳
陽府城距關遠請將關稅銀庫移設道署本
關及各口岸按旬解交報聞○乙酉直隸總
督方觀承奏運河西隄為通京大道淀水漲
時輒漫溢道上與運河合風浪排激蓄隄尤
甚請增建空木橋七座俾河淀相通相時分

洩報聞○山東巡撫阿爾泰奏濟東屬應挑應濬河渠指日告竣臨清南運河照例挑加寬深其北衛河亦運渠受丹淇湯洹漳各水濁漳挾淤遇曲處易積已令沿河民挑切淤灘引水穿刷臨清等河逼近村莊處於正河旁開引河五道以分水勢得旨覽奏俱悉○丙戌

上詣長春仙館問

皇太后安奉

皇太后居暢春園○刑部議覆浙江按察使李治運奏稱賊犯怙終宜從重治罪而徒犯與軍流當有區別請嗣後在配行竊者不論到官次數賊之多寡徒犯擬以滿流流犯照積匪猾賊例改發雲貴兩廣烟瘴充軍軍犯發伊犁等處與種地兵丁為奴從之○丁亥上詣暢春園問

皇太后安○還宮○諭曰弘昉現在乾清門行走著照考例予以應得品級○軍機大臣等

議覆黑龍江將軍國多歡奏稱索倫兵向無跟役應准挈眷賞項照上年派往伊犁之察哈爾官兵例每戶給整裝銀三十兩駝一隻折銀十八兩人給馬一匹帳房鑼鍋折銀六兩起程時裹帶兩月口糧每丁月給鹽菜銀一兩五錢俟辦給孳生牲隻日停再各賞銀十兩置辦軍器其次起兵丁應於何處過冬及派出筆帖式領催等於喀爾喀選帶嚮導行走俱交成衮扎布酌辦再據察哈爾都統巴爾品奏應派餘丁一千名不必分翼分旗惟選壯者作兩起前往遵旨派達克塔納成果帶領應給行裝產業照例辦理從之○戊子

上詣

雍和宮行禮○山西巡撫明德奏大功告成軍臺文報已減差務均由南路請將邊路十五驛除附府之大同右玉各留馬五十匹餘十三驛各留馬四十匹軍臺二十七站各留十

二匹共徹馬四百五十七匹。於南路量增廿
挑河東同戈三驛。文移差探較繁。各添足九
十匹。餘十八驛各添足八十四匹。榆次縣之鳴
謙驛並非大路。應徹馬二十六匹。該縣王胡
鎮應添一驛。置馬八十四匹。共餘馬十四匹。夫五
名請裁得旨。如所議行。是月直隸總督方
觀承奏。直省六七分災地方。上年十一月
已停賑。望澤甚殷。賑米俟凍開始赴領現飭
各州縣先發領到半銀。薊州應撥加賑米八
千餘石。水運道迂。陸運費重。查薊遵尚有口
米轉輸。全給銀較便。其應添粥廠。統於二
月初一日起。至三月底止。准撥義社米柴薪動
公項報聞。○又秦子牙河近年上游寬深。下
游漸淤。除濬復外。再於閘兒莊石壩上游。建
扇面草壩。挑水歸河。俾不至旁洩過多。蔡家
窪積淤已有唇岸。即以挑河土加培成隄。酌
於無礙處。令與窪水通。不至挾沙灌河。報聞。
喀什噶爾辦事尚書永貴陝甘總督楊應

琚奏。新疆派防兵折給騎駝銀。到防後應扣
繳請照道路遠近分別坐扣。以庫車以西及
伊犁庫爾喀喇烏蘇等三屯為較遠。到日分
二年扣繳十分之三。庫車以東如哈喇沙爾
闢展烏魯木齊等處。分三年減半扣繳。得旨
如所議行。

大清高宗法天隆運至誠先覺體元立極敷文
奮武孝慈神聖純皇帝實錄卷之六百七十九

大清高宗法天隆運至誠先覺體元立極敷文奮武孝慈神聖純皇帝實錄卷之六百八十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級身帶加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未二月己丑朔遣官祭

關帝廟 諭軍機大臣等據圍場總管齊凌扎布奏稱去歲雨水稍多現今糧價昂貴兵丁買食維艱懇將土城子波羅河屯等處倉糧內借給看守圍場兵丁每名各小米十倉石等語已照所請批示矣此項兵丁買食既屬拮据自應速為酌撥以資接濟可將此傳諭方觀承即飭各該倉遵照辦理○又諭近來京師黑豆價值未能平減而官員兵民餽餼牲畜需用甚多雖現在倉儲足敷支放而

平糶一項多多益善著豫東二省於產豆豐收處所每省購買五萬石照依從前運送麥豆之例即速委員由水路運通以備平糶仍一面先行奏聞新任河南巡撫葉存仁尚未到任即著護撫輔德速行妥協辦理可將此傳諭阿爾泰輔德知之 又諭曰鑲藍旗漢軍為承襲佐領將海城縣居住之尚玉函擬陪該縣屬盛京非別省可比然相距亦遠嗣後擬正者著帶領引見擬陪者即於在京別支人內揀選不必拘拘自遠方喚來此旨著交八旗存記○軍機大臣等議覆奉天將軍舍圖肯奏稱盛京遇豐收年不准外運則穀賤傷農請嗣後停禁海運即歉歲價不過昂亦准載運但不得過多以致穀貴傷民請勅下奉天將軍府尹派妥員嚴查從之○兵部議准兩江總督尹繼善奏稱江南江西營運銀十五萬千一百餘兩生息備每年兵賞乾隆十四年奉

聖諭營運生息本非政體所宜有。臣查兩江內地與沿邊情形不同。分防兵可酌裁。以兵丁空餘糧為惠濟兵丁用。無容另籌公帑。應如所請。於該省裁將軍標守兵三百名。督標步兵五十名。守兵五十名。漕標守兵百五十名。提標守兵三百名。安撫標守兵五十名。江西撫標守兵百名。南昌鎮標守兵五十名。贛州鎮標守兵百名。遇缺出。即裁扣足。日前存銀撤回司庫。江西省所扣數不敷。准於江南

撥給賞銀有餘。歲報戶部從之。○庚寅諭。朕閱刑部彙題本內有筆帖式寶祥打死贖身家人玉明暨謝保兒。毆傷騎都尉哈福二案。定議甚屬非是。家主毆死家人。除無別故。不過罪止奪俸。若業已贖身。則與現在服役者不同。擬議自當區別。何得概照主僕成例。致情罪不得其平。至軍民毆傷。非本管官原屬例。應杖徒。然皆指一時邂逅。肆毆以賤犯良者而言。今哈福借謝保兒錢。文屢索不還。則

其釁起於哈福事與尋常。因故鬪毆。無異乃專以良賤之分。苛覈定罪。此端一開。是職官可不償平民之債。而平民亦將失貲束手。莫敢誰何。又豈情理所應有。朕研閱讞牘。不惟專題斬絞重犯。詳慎推勘。即流徒以下。應入彙題之案。亦必一一稱量。務使輕重不爽。銖毫以歸。明允。今刑部司員等以此等事。係彙題。遂爾率行定案。未免有偏向旗人之意。該堂官亦不悉心檢覈。潦草從事。甚為不合。此次姑免深究。著將該堂官傳旨申飭。此二案著另行定擬。并詳定條例。具奏嗣後。倘復有蹈此者。經朕指出。本中司員姓名。具在必當。按名重治。其罪堂官等。亦不能再邀曲貸也。尋議。一旗員毆死贖身。及放出奴婢。並該奴婢子女。請照毆死族中奴婢。降二級調用。例減一等。降一級調用。故殺者。即照故殺族中奴婢例。降三級調用。一軍民毆傷。非本管官除邂逅干犯。及飲酒賭博宿娼。仍照律例定

擬外其別項構釁如負欠不還等事本非理曲因而有犯請各照毆傷應得流徙原律酌減二等問罪其自行取辱之職官交部議處從之○又諭曰開泰奏達州知州郎炳之子郎世琳請改歸民籍一摺辦理甚為舛謬向來漢軍有願入民籍者原屬例所准行郎世琳果於該旗未催回旗之前自行呈請並無不可今以屢催不應轉藉此為名冀遂其自便狡延之計開泰稍揆事理即應據實參奏為歸旗逗遛者戒乃竟據以瀆請是其一意沽名豈封疆大臣辦公之道邇來開泰諸務模稜經朕屢行訓飭而積習終不知改開泰著交部嚴加議處郎世琳著交開泰拏解來京交刑部治罪倘致免脫則開泰當其罪○戶部議奏多倫諾爾稅銀應照八溝定額例以管稅官所報兩年徵數均勻覈算嗣後每年請以一萬六千八百五十八兩八錢為定額有餘儘解從之○兵部議准廣東學政鄭

虎文奏稱武童內場易有代倩之弊請照鄉會試例學臣將人材弓馬實有可觀者儘數挑入雙單好字號准入內場憑文取進毋庸更立合式字號從之○刑部奏臣部司員筆帖式書吏較多各省額解銀不敷公用查臣部有贖罪一條請嗣後具呈時派員驗明銀兩始行具奏奉旨准贖即給執照令赴戶部交納於請領執照時照吏戶兵工等部扣繳公費例每兩出公費銀五分收庫備公項幫貼其有督撫奏請臣部覈覆奏准之案令於本省交銀時照每兩五分交司於解飯食銀時搭解從之○又議覆安徽按察使胡文伯奏稱命案內有減等發落應追埋葬銀請將一年限改為三個月限滿勘明實不能完者即將該犯發配毋任逗遛隨取地隣親族供結州縣官加印結詳免後查出隱匿屍親告發地隣等照不應重律治罪加結官罰俸一年從之○山西巡撫明德疏報乾隆二十

六年分大同縣勸墾荒旱下地十頃升科如例。辛卯

上幸南苑行圍。遣官祭昭忠祠。諭軍機大臣等成衮扎布等奏巡查額爾齊斯等處公多爾濟車登等呈報據烏梁海告稱有哈薩克九人前來殺害烏梁海三人掠去羊馬什物隨究出賊匪游牧前往追捕因恐多爾濟車登等兵力不足令其酌量行止若追捕不及即行轉回等語哈薩克邊境人等乘間搶掠烏梁海情節可惡自應擒治以示懲創且已知賊匪名目何難辦理乃成衮扎布慮兵力不足遣人往阻伊身為將軍派員巡查邊境宜飭令擒拏賊匪而轉於具報之事戒其勿行似此意存怯懦甚屬錯謬莽古齊雅朗阿俱以叅贊協同辦事之人自應規勸亦復隨同附和所司何事俱著傳諭申飭。是日駐蹕舊衙門行宮。壬辰諭去歲雨水過多南苑海戶等生計未免竭蹶著加恩賞銀二

千兩按名分給。又諭曰方觀承奏辦理漳河水利一摺內稱彰德府李訢臨漳縣張光熊妄生異論現派兩省道員會辦等語漳河利弊關繫直隸者多河南地止一邑而上游實關全河之要害自宜兩省通融會辦以資民利地方官倘各自生畛域罔顧以隣為壑宜有司牧民之義此事僅委道員不足以重其任葉存仁現在赴豫著方觀承即速一同前往河南悉心會勘該府縣如果有心梗撓即行據實題叅交部察議。諭軍機大臣等方觀承奏到辦臨漳沙莊水利一摺所稱直隸派夫及令道員會辦之處尚未允協漳河下游關繫直隸數邑民生利病其在上游之接豫省者不過臨漳一邑然地方官果自分畛域不免以隣為壑則不惟工程不集且恐地方易滋事端若論細民但知為己其害苟非身受誰肯踴躍急公況有司倡為異論尤易搖惑輿情僅令兩省監司為之督率恐亦

彼此掣肘於公事究屬無裨已明降諭旨令該督方觀承赴豫會同葉存仁悉心勘辦其彰德府知府李訥臨漳縣知縣張光熊如果係有心市惠阻撓公務應據實會叅交議以示懲創葉存仁向諳河務豫撫又係新任工程緊要自可不分彼此會同該督從長計議俾水道民生均有裨益方觀承原摺即鈔寄閱看將此傳諭該督等知之尋方觀承葉存仁同奏臣等酌議於漫口迎溜向東開引河

一道長三百丈入正河於正河接挑留淤二百丈順溜攔築草土壩比舊壩移上二百十八丈夫役踴躍月內可竣其李訥張光熊二員經臣指示自悔妄論據稱新任不諳查非有心阻撓臣觀承仍擬沿漳河勘至館陶漳衛合流處有淤即挑報聞○又諭曰方觀承已有旨令其前往河南與葉存仁查勘臨漳河道其沿途所過曾經被災地方可即留心察勘將情形一併具奏該督省城辦事應需

大員督率可令觀音保留駐保定至朕祇謁東陵

西陵一切隨營事宜只須按察使王檢一人前來辦理觀音保並不必前來接駕送駕以重地方將此一併傳諭方觀承知之尋奏臣迂道被災地方漫水涉冬春已微弱種麥者十之七八耕作恬嬉緣上春堵築漫口後春麥普種至閏五月汎水漫壩時已全獲南府民食麪全倚麥收秋田雖誤得恩賑即可支持

正順廣大一帶苗長二三寸及四五寸不等本月十五日細雨盡夜良苗懷新得旨南府或資雨而迤北惟望不雨方可耕種爾等所辦不無不到處已大沛恩澤矣其令有司善為經理再不經心責有攸歸也○是日駐蹕新衙門行宮○癸巳

上還宮○諭曰福德著往庫倫辦事即來京請訓其往迎哲布尊丹巴呼圖克圖之呼畢勒罕著派集福即行馳驛前往○諭軍機大臣

等前命瑚圖靈阿等查詢桑寨多爾濟在庫
掄辦事若何雖據奏尚卓特巴稱其辦事甚

好而成衮扎布奏桑寨多爾濟實因尚卓

特巴之言其詭詐反覆可知著傳諭桑寨多

爾濟查實尚卓特巴有無情弊並留於彼處

有益與否或令來京居住亦可至從前行文

俄羅斯令其拆毀沿邊樹立木柵咨覆到日

並現在尚照常貿易與否及動靜若何之處

著桑寨多爾濟詳悉奏聞朕已派福德前往

但此時未能到彼拆毀木柵之事若可待福

德到時公同酌辦更善其餘應辦事件桑寨

多爾濟尤宜毅然辦理○甲午以舉行仲春

經筵遣官告祭

奉先殿

傳心殿

上御文華殿講官暨侍班之大學士九卿詹事

等行二跪六叩禮分班入殿內序立直講官

四人出就講案前行一跪三叩禮復位直講

官伍齡安梁詩正進講大學如保赤子心誠
求之雖不中不遠矣三句講畢

上宣御論曰赤子之在母旁形日近而情日接

然猶待心誠求之而後不中不遠若夫居九

重之上臨兆民之衆勢分相隔委曲莫達其

能洞悉民艱呼吸相關使無向隅之歎而皆

得養育之資蓋亦難矣故禹稷已飢已溺文

王視民如傷用是道也接屋連閣非不麗然

民有掘穴狹廬者弗樂也肥醲甘脆非不美

然民有菽粟不接者弗甘也蓋不樂為修飾

豐亨之說則牧民者或可祛其匿災之心不

肯存惜帑省費之見則持籌者或可杜其節

用之口如是而猶懼有或遺焉庶乎民隱得

通不中不遠曾子舉武王訓康叔之言明立

教之不假強為在識其端而推廣之然吾因

推廣益識其艱蓋齊一家治一國者其分小

其事易而平天下者其分大其事難雖日孜

孜朝乾夕惕猶慮弗克勝任欲不勉強勤求

其可得乎講官暨侍班官跪聆畢興直講官
觀保秦蕙田進講易經咸速也恒久也二句
講畢

上宣御論曰易分上下二經上經首乾坤此天
地之大經大法固不待言下經首咸恒解之
者泥於夫婦之一語於是有少男少女感之
深長男長女倫之正之說是皆以世俗夫婦
之情窺聖人序卦之義並且曲為損益不首
下經之論其去聖人之意蓋已遠矣夫何不

觀於雜卦咸速恒久之說哉且易雖有六十
四卦何一非乾坤乎乾坤者天地之象咸恒
者蓋天地之象之所以示人最深切而著明
者也夫周天三百六十五度天一日而一周
日月五行所不能及是最速者莫如天而咸
象之華嶽有時而損益河海無日而不流而
載之振之者終古無遷是最久者莫如地而
恒象之且彖傳於咸則曰天地感而萬物化
生於恒則曰天地之道恒久而不已一再舉

之語焉而詳實於雜卦之義互相發明所謂
聖人之情見乎辭矣蓋咸恒非不備夫婦之
道而徒舉夫婦之道以闡咸恒之義則不足
以盡之若夫自強不息厚德載物乃君子所
以法乾坤即君子所以法咸恒不息感之速
也厚德常之久也虛受無我立不易方內聖
外王之道於是乎在如是則咸恒一乾坤之
具體其首下經不亦宜哉講官暨侍班官跪
聆畢大學士傅恒等奏曰

皇上念切黎元命基宥密思其艱以圖其易容
保無疆卑法地而宗效天至誠無息用範圍
而不過與上下以同流臣等幸侍

講筵親承

聖訓不勝榮幸奏畢諸臣出就拜位行二跪六
叩禮禮成

上還宮賜講官及侍班官等宴於協和門遣
官祭

先醫之神○諭據舍圖肯等奏稱偷挖私漫

兇犯郭衛等將往捕之領催富昌阿等捆毆脫逃一案除將該城守尉官忠防禦額爾格訥革職及領催察罕一併拏送京城外查郭衛等所住寨馬集係熊岳通判倭陞額所屬地方請將通判倭陞額亦交部嚴加查議等語前因盛京地方最關緊要是以將地方官俱改滿洲凡地方一切盜賊偷挖私濫等兇犯地方官理應會同旗員協力嚴緝無令脫逃今偷挖私濫罪犯郭衛等膽敢拒捕將領催富昌阿等捆毆脫逃不法已極而倭陞額身為地方官視同膜外全不經管其罪與官忠等何異官忠既經革職拏解來京治罪通判倭陞額亦著革職拏解來京交刑部治罪

又諭河南汲縣盤獲遣犯賄替一案前經勅部將該縣等調取來京引見其知縣呂文光已有旨以同知陞用因憶此案雖係知縣督率辦理而其首先發覺具報實由於典史任學淵詢之吏部該員現在掣陞廣西巡檢

典史與巡檢官階相去無幾而其任又僻在廣西不足以示朕鼓勵微員之意任學淵音仍留河南從優以縣丞補用 又諭曰瑚嘉保病故所遺阿勒楚喀副都統員缺著耀成補授 又諭朕前降旨著由京選派副大喇嘛蘇拉喇嘛各一名前往伊犁教訓厄魯特喇嘛人等但厄魯特人不知副大喇嘛名號而敬堪布喇嘛所遣副大喇嘛著添堪布字樣 又諭曰蘊著近日奏摺紕繆甚多朕亦不勝改正此皆清語平常平日並不留心習學之所致也蘊著身係滿洲而清語如此能不愧懼乎著傳旨申飭一定邊左副將軍成衮扎布等奏辦理庫克新事宜差喀爾喀台吉車魯布多爾濟往諭杜爾伯特車凌烏巴什回時聞烏梁海庫木素格等竊盜事即行辦理得旨車魯布多爾濟差往諭車凌烏巴什回時聞烏梁海庫木素格等竊盜事即乘機拏獲甚屬奮勉著加恩賞緞四疋 乙未

朝

日於東郊遣理郡王弘曉行禮○禮部題朝鮮國王李吟遣使表賀加上

皇太后徽號

萬壽冬至元旦三大節及進歲貢方物賞賚筵宴如例是日起

上以祭

社稷壇齋戒三日○丙申諭軍機大臣等吳達

善等奏木梳夷人往搶耿馬現已勦敗擒治

一摺此等荒僻野夷鼠竊狗偷原屬不成事

體亦只可如此辦理惟孟定土司罕大興與

夷匪罕黑至親其初既不抵禦臨時又不通

知耿馬且為罕黑帶往現就賊營拏獲其與

木梳不無同情弊摺內有或係逼脅順從

之語恐徒啟其狡辯之端著傳諭該督等務

令嚴加審訊罕大興果係有心勾結侵擾固

當明正其罪即實有力弱被勒確情其人亦

豈可仍為土司自應發遣遠方以示懲創毋

令雜處近邊徒滋番夷之患又諭曰蘇昌

奏廣西融縣流犯高深等聚眾毆弁將守備

何國璽知縣劉欽擢會叅一摺此案前據王

進泰摺叅守備何國璽時已詳悉傳旨訓諭

在蘇昌雖係尚未奉到故為此奏第辦理此

等案件自當分別次第於事理方無舛謬乃

現在藐法行兇之徒猶未嚴加懲創遽將該

管各員紛紛叅斥彼行險為匪者先以逞毒

本官自鳴得計豈復自顧身家是徒足以增

長刁風而地方官亦恐身先獲咎遇事必至

容隱不報轉開將來蒙蔽之漸耳此案應行

叅議各員著傳諭蘇昌仍遵前旨妥協具疏

辦理毋得急遽失次又諭據海明等奏稱

阿奇木色提已勒氏並眾伯克等助給撥往

伊犁回人牲隻什物等件每戶各一分等語

此次由阿克蘇派往伊犁回人既經色提已

勒氏等捐助遣往著傳諭海明等各照其所

捐物之多寡由該處賞給緞布等物以示嘉

獎大學士等議奏通政使實麟奏稱慶賀

皇太后

皇上表文本內及貼黃純用黃紙面頁用黃綾

黃簽慶賀

皇后箋文本內及貼黃純用紅紙宜如所請惟

面頁面簽臣等擬俱用黃綾其本內既用純

黃純紅色毋庸復行加簽從之軍機大臣

等議覆江寧將軍容保兩江總督尹繼善奏

辦理京口出旗漢軍事宜一咨明旗部銷檔

聽所願赴處入籍考試結婚立業與該處民

人一體進士舉監生員及候補候選降調世

職捐班均入漢班一願補綠營者勻派京口

等二十餘營候補即於該處入籍馬步糧分

照原缺拔補四缺得三各營馬糧少應先補

戰糧一該兵依餉為主除為民者限於四月

內悉令出旗住支外其改補綠營者未得缺

之前暫令食糧俟改補住支一出旗兵向住

官房清查立界分給移駐滿兵不許旗民雜

處其自行添建典出抵換者查實給價一改

補綠營兵有房者給搬移銀二兩無者給賃

房銀六兩閒散內鰥寡孤獨無依者賞銀八

兩一扣存馬價應查給有借項扣還其馬分

給江寧缺馬兵馬價於得馬兵坐扣一移駐

京口兵專用江寧兩翼蒙古兵已數奏定數

撥防差遣亦畫一簡便蒙古筆帖式等官隨

駐辦事一各營員告退為民者聽其應引見

及送部補用與改補綠營者分別辦理一漢

軍三千餘名既出旗一千餘名所有移駐之

蒙古兵數減半額設副都統二應裁一從之

又議奏現在伊犁屯田歲入三萬五千餘

石除給該處官兵外尚有贏餘但本年所派

索倫察哈爾及移駐涼州莊浪兵不止萬人

仍需糧三萬石應請再派屯田兵一千五百

名前據舒赫德等奏回城願遷伊犁人甚多

應令明瑞等議以一千五百人為率不足以

綠旗兵補其蓋造伊犁城署營房請派綠旗

兵一千限三年竣工至添駐之索倫察哈爾等應給孳生羊隻請交都統巴爾品等揀選牧羣牛四千隻羊二萬隻令其陸續帶往或酌派官兵協助作何分給孳生並交明瑞辦理再塔爾巴哈台等處駐兵應俟移駐伊犁軍事竣再辦從之○調雲南普洱鎮總兵雷霖為昭通鎮總兵以維西協副將劉德成為普洱鎮總兵○丁酉祭

先師孔子遣和親王弘晝行禮○江蘇巡撫

平定奏

主

莊有恭浙江巡撫熊學鵬奏海潮入尖山斜趨西北而來海寧城東至念里亭向有土堰以抵潮而遏潑塘之水現勘明接築簍工酌加新土乍塘之獨山東至茆竹寨東向有石塘歲久水啣根石外游塘面內姓應摘段及時拆築從之授和碩誠親王允祕子弘旻為二等輔國將軍戊戌祭

大社

大稷

上親詣行禮○詣暢春園問

皇太后安○辛圓明園○

皇后千秋令節停止行禮筵宴○諭曰方觀承奏疏消窪地積水一摺現在時屆春和農民力作伊始非竭力亟為濬涸何以使舉趾者無誤春畝該督正在赴豫會辦漳河直屬有司辦理尤資督率前永安顧光旭曾經條奏近京水利賬務若令其前往查勘一切自當盡心但所屬地方散處尚恐難以兼顧並著都察院堂官揀派現無別項差使之曉事科道二員即於明日帶領引見同永安等星速馳驛前往分路董司妥辦所有文安大城等處散賑諸務地方官是否實力奉行並著一併悉心體察副朕軫念閭閻至意○又諭曰嵩椿奏稱西安現有滿洲漢軍副都統各一員滿洲副都統所管八旗滿洲兵丁將及七千名漢軍副都統所管止二十四百名數目太懸請將西安副都統維山作為左翼副都

統曹瑛所遺漢軍副都統員缺改為右翼滿洲副都統之缺等語。西安副都統二員分為左右兩翼固是。但必欲將漢軍副都統員缺請改為滿洲副都統所奏非是。滿洲蒙古漢軍俱係朕之臣子何必故示區別。嗣後滿洲蒙古漢軍人員一體補放著將現在西安副都統維山作為左翼副都統。其曹瑛所遺員缺作為右翼副都統。將此永著為例。○陝西巡撫鄂弼奏自乾州以西至長武地瘠民勤鮮刁悍氣習近省地方繁庶俗澆難治自潼關至臨潼縣西同二府所屬畧同蒲城大荔朝邑同州府屬亦繁庶而俗較馴亦知務本地多回民雜處上年大懲後兇毆者漸少地方官守法勤職者不多得或地劇才短現同司道商調長武等處為西陲極衝各驛夫馬額虛及衰弱者查明另參得旨覽具見留心以正藍旗滿洲叅領成德為西安右翼副都統。已亥。

孝康章皇后忌辰遣官祭

孝陵○諭戶部議覆御史顧光旭條奏資送貧民回籍一摺援引前駁成案以此例一開恐致無業之徒混冒虛糜於災黎無益為言是僅推其流弊而未深究夫有名無實之本源無識者將未免仍疑為節省帑項起見非朕軫念窮氓熟籌調劑之苦心也從前臣工等奏請咨送回籍曾經降旨允行者原因此等災民如果本籍自有田廬固不當聽其播遷失業今經日久體驗流民中遠出謀生者悉係故土並無田廬依倚之人而必抑令復還即還其故鄉仍一無業之人耳且無論一領路費潛移別處去而復來有何查驗即責地方有司實力奉行則必押解濫及無辜亦非政體也朕因直屬兩年秋霖過多加恩蠲賑不啻再三又念京師為五方聚處之會令五城加嚴平糶給賑即費正供鉅萬無所靳固又何有於區區資送之一節然已洞悉其一

無實濟而猶曲徇陳言矯情示惠必不出此也且流民故鄉既無生計四出傭趁即揆之古人無常職轉移執事之條未始不可俾之並生並育又何至束縛驅策強以勢所不能堪朕意以為與其資送無實際不如加賑濟之期俾民獲實惠之為愈也救荒無奇策惟以體恤民隱為要設令被災至重甚至有田之戶亦概遠徙則所以籌撫綏必更有大設施者又豈特此資送虛文所能濟其萬一哉

摺內已降旨依議並將此通諭中外使明知朕意○河東河道總督張師載奏楊橋河勢於上游來童寨分二股一直入引河溜勢洶湧一分趨南去勢弱而小約十之二三由十七堡一帶至楊橋大壩西北合流東注全恃引河吞納漸次成河得旨欣慰覽之○庚子
上詣暢春園問

皇太后安○諭曰高其倬之孫高焜現係世職在侍衛上行走因念伊祖從前歷任封疆出

力有年其孫應令學習部務以資造就高焜著加恩以六部郎中用○諭軍機大臣等前軍機大臣議准將涼莊滿兵移駐伊犁所有漢軍人等或入綠營當差或入民籍俱聽其自便已行知該督及涼莊將軍矣該督等此時想久經接到其現在作何飭令移駐及如何按額充補之處著傳諭該督一面作速妥辦一面即行奏聞○辛丑諭軍機大臣等據達色奏長蘆商人沈朝安等呈稱張灣至京

城之廣渠門計程四十七里係大宛二縣引鹽車運通衢近年疊遭坍塌夏秋雨水積聚車運艱難今因各門現在修治道途情願捐銀二萬兩稍勦廣渠門土道工程之用等語已於該鹽政摺內批諭交方觀承派人即行修理矣因思明琦近在通州經管最為妥便著方觀承即將此項銀兩派交明琦承修但該道有地方之責往來督率稽查或有未能獨任之處並令戶工二部內務府各派賢能

司官一員會同該道悉心妥辦可將此傳諭方觀承知之 又諭前經降旨令集福更替福德前往迎接哲布尊丹巴呼圖克圖之呼畢勒罕現在西寧無事不必特派大臣駐劄著傳諭留保住令其自彼處帶領喀爾喀等前往迎接哲布尊丹巴呼圖克圖之呼畢勒罕即令福德仍遵前旨回京請訓以便前赴庫倫同桑寨多爾濟辦事此際福德若已經起程諒亦不遠留保住即馳赴多倫諾爾更

實錄卷六八〇

十一

換福德速行回京集福在何處得此信即回京 又諭曰巴爾品等奏察哈爾八旗總管副總管及官員等去歲捐助移駐伊犁兵丁馬駝此次雖不能如去歲捐助之數現在察哈爾人等呈稱情願出駝二百隻馬一千匹資助派往駐防兵丁等語察哈爾官兵情願捐助派往伊犁駐防兵丁馬駝情詞懇切甚屬可嘉宜加恩獎賞著交巴爾品等將去歲捐助馬駝及今歲捐助馬駝之官兵由彼處

租銀內動用酌量獎賞 湖北巡撫宋邦綏奏糧驛二道經手錢糧款項奏銷交代均責成督撫請嗣後督撫到任與藩庫一體盤查得旨著照所請行 壬寅諭現今物價稍昂此次恭謁

實錄卷六八〇

十一

陵寢隨往官兵應得路費著施恩加一倍發給 又諭前經降旨於五城內外增設煮賑各廠並添給米石俾就食貧民咸資餬口但向年俱於三月二十日停止朕念現在雖屆春和而時值青黃不接貧民生計猶未免拮据所有今歲五城內外各廠著加恩展賑一月以示軫恤 軍機大臣等議奏查西寧特派大臣駐劄原為噶斯一路蒙古兵柴達木等處立卡及照料青海蒙古會盟今準夷回部平定西域各卡兵裁撤青海蒙古番子安靜多年除會盟外平日無事查西寧向係一年一次會盟後經都統衆佛保奏請改為二年青海蒙古等游牧地方距會盟處遠者頗多

如改為三年事體並無貽誤蒙古等亦可省
往返費應遵旨裁西寧辦事大臣交理藩院
至三年會盟之年開列在京侍郎副都統御
前侍衛乾清門侍衛職名具奏恭候欽派馳
驛至西寧由西寧出口令彼處總兵道員照
會盟例所需賞項筵宴緞疋等物撥發派官
兵隨往再查西寧除辦事大臣尚有理藩院
章京一員筆帖式三員轉遞青海蒙古報部
事件迎送藏內來使來京承辦玉舒番子事
件不可無人請仍留辦事章京一其筆帖式
裁二從之○烏魯木齊辦事副都統旌額理
奏烏魯木齊屯田牛馬每年准銷倒斃分數
照巴里坤作二分銷算查屯田非馬力所習
且例不支食料豆傷損者多自一二分至五
七分不等請嗣後馬准銷二分半牛一分半
若數太多仍著賠補至屯田牛為優現存牛
一千餘再將哈薩克等所帶牛補額馬可漸
減報聞○豁除安徽貴池縣乾隆十一年至

實錄卷六十二

七

二十三年未完丁損豆折銀千一百二十兩
有奇米一千六百七十石有奇○癸卯諭刑
部監禁人犯內清馥之子福俊車布登之妻
愛氏子常福著從寬釋放看守製造庫五麟
保之雇工王積黃四亦著從寬釋放其阿睦
爾撒納所部之鄂羅斯托羅拜著賞給功臣
之家為奴永遠監禁之陳朝盛周紹珍康三
著發往伊犁賞給回人及厄魯特為奴○以
鑲黃旗漢軍叅領高廷棟為鑲白旗漢軍副
都統

實錄卷六十二

五

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十

實錄卷六百八十

三十一

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十一

監修總纂官經筵講官太子太傅文淵閣大學士文淵閣領事銜內大臣稽察欽奉 上諭事件管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總纂官經筵講官太子太傅文華殿大學士文淵閣領事銜欽奉 上諭事件管理內閣三庫事務

世襲騎都尉軍功加十九級隨帶加二級又加二級臣並內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未二月甲辰

上詣暢春園問

皇太后安 遣官祭黑龍潭

昭靈沛澤龍王之神玉泉山

惠濟慈佑龍王之神諭軍機大臣等據明

德題叅猗氏縣知縣王封渭疎防脫逃發遣

伊犁人犯伊三太一案已有旨將王封渭革

職矣此等發遣人犯其情罪本屬去死一間

乃從寬減死僅予發遣已係法外之仁今該

犯膽敢詭計脫逃務須拏獲正法以示懲儆

現已令步軍統領衙門嚴行躡緝著傳諭該撫作速上緊躡緝毋任該犯遠颺致逃法網現在曾否弋獲并著具摺奏聞○又諭曰海明在阿克蘇年久著授盛京禮部侍郎卞塔海為正紅旗漢軍副都統前往更換卞塔海接奉此旨即速來京請訓其所遺盛京禮部侍郎員缺著永寧調補永寧所遺兵部侍郎員缺著旌額理補授○兵部議奏查俸滿回任千總壅積多員既礙把總陞途又啟劣員

戀棧請嗣後六年俸滿千總下次甄別改為三年凡係上次甄別平等咨部留任者果弓馬練習較前奮勉准保送引見分別曾否出兵照例錄用其弓馬本平常差操行走亦不勉力者即咨部開缺得旨向來直省俸滿千總於引見發回後定例概應開缺是雖有陞擢之名轉致無任可回情理亦堪憫惜因勅部分別定議優者保送回任候補候推劣者休致其人列平等者俱仍留原任再俟六年

甄別用資斟酌調劑乃近見督撫提臣等自改議留任以來雖隨時分別繕單彙奏其中所舉所黜不過數人餘則均入咨部留任條內在把總既不能及鋒自効即千總亦未免戀棧姑容是救弊適以滋弊皆封疆大吏不肯實力甄別之所致也茲諭該部詳覈前後俸滿各項千總之數則定例以後止有保送已陞者七員休致者三十員而其回任候補候推及平等留任者積至三百九十餘員其

例前候補候推者數又如之以此七八百員陳陳相因非悉心釐剔何以疏陞途而重營務該部奏請嗣後千總等既經俸滿其下次無庸更待六年即改為三年一次據實甄別之處應如所議行第念頻年壅積員數過多現在即應通行甄別而其去留等次又當就年力以為斷蓋武弁所業者弓馬所飭者戎行必年力壯盛始可能於其任非如俸滿教職苟不至暮齒頽唐猶可從容司鐸不當概

以年格限之也所有直省各項年滿千總及例前尚在需次各員著即一併悉心秉公分晰甄別有年在六十以上者候補之員降為候推候推之員降為留任俱俟下次甄別以次遞降至六十六歲即予休致其咨部留任之員一至六十歲以上者概令休致其年雖未及期而技藝生疎人材闕茸不堪造就者並即勒休出缺毋得稍存遷就之見如此則把總陞用之途不致過闕而營政官常亦均有裨益矣著為令○乙巳兵部議准浙江巡撫熊學鵬奏稱浙江海鹽平湖二縣石塘一線危隄風潮衝激請將鹽平二汛堡夫改復守餉塘兵令澈乍二汛把總督率修填仁寧二汛遇要工仍撥赴幫修糧於原裁兵米按支從之○又議准廣西提督王進泰奏稱永寧州係輪派備兵巡防未能實在應增設永寧營分提標千把外委四員改駐以派防兵三百八十名為額兵從之○豁除圍場圍占

撥什庫地一十四頃二十一畝有奇應交萬泉縣額米七十一石七升有奇 丙午上御勤政殿聽政 軍機大臣等議覆察哈爾都統巴爾品奏稱數年來解送伊犁牛羊因牛性不能遠行倒斃過多應如所請嗣後牛一折羊五可得羊二萬交頭起行走察哈爾解再屯田需牛查喀爾喀距伊犁較近請令成衮扎布每年辦牛千隻以內寬期行走從之 戶部議覆各省督撫酌議該省同知通判支給養廉應如所請除山東福建并四川敘永松潘江北鎮同知雲南思茅同知魯甸通判甘肅鹽茶同知江西蓮花廳同知雲南威遠同知及元江等四府四川寧遠等三府廣東鹽務同知潮州瓊州南澳等廳同知通判養廉准其在本處本府州縣耗羨鹽項內坐支仍令該督撫稽查透借餘四川保寧等府江西南昌等府雲南雲南等府廣東廣州等府屬同知通判及廣西湖南山西河南甘

肅等省同知通判養廉均准於藩庫給從之

○以右春坊右庶子國柱翰林院侍講饒學曙充日講起居注官○蠲緩甘肅鎮番縣乾隆二十七年被旱額賦○丁未遣官祭

歷代帝王廟○

上自圓明園啟鑾謁

東陵○諭上年直屬各州縣被水較重所有成災六分以上地畝應徵錢糧業經分別照例蠲緩其五分之一下勘不成災俱例不緩徵但

念農民當積歉之後輸將未免拮据著格外加恩將直屬曾經報災雖勘明不及分數之地所有未完應徵錢糧俱予一概緩至秋成後再行酌量分別啟徵帶徵以紓民力該部遵諭速行○又諭直屬辦理賑務節次遞加而勘不成災各屬正賦復格外停緩前次所撥帑項猶恐尚未敷用著戶部再撥庫銀八十萬兩即交方觀承接濟應用該督其率屬實心經理俾閭閻得霑實惠以副朕懷該部

遵諭速行○又諭去歲直屬窪地被潦附近

米價不免稍昂營兵口糧不能贍給著加恩將通省各營兵丁俱借給兩月口糧分作四季扣還以示體卹○又諭畿輔一帶去年秋霖過多窪下之區現在設法疏消以利東作因思河海為積水委輸之尾閭而地方官或拘於成例僅將五閘宣洩不肯推廣籌辦多開壩口以為釜底抽薪善策著協辦大學士公兆惠速馳驛前往帶同鹽政達色知府周元理悉心確勘情形有應行增開之口即一面奏聞一面辦理務期去路疏暢水消之後補築口門即不無所費而利民實多不必稍為瞻顧也尋兆惠奏津屬地窪日久潦存自滄州青縣靜海而下皆然運河水以塌河淀為歸宿其東南視海為長落五閘水高於海河五六七八寸不等大閘白塘閘舊口寬賀家口何家園灰堆三閘下注未暢應濬新開溝六道惟北塘東口已涸餘宜加寬疊道河

岸高低不一應濬溝與河淤處宜開挖潮汎亦宜防仍設版派兵司啟閉共新舊溝閘十五處足資疏消四月可全涸津邑麥雖不能全種秋禾無誤通州武清均已播種報聞○又諭朕恭謁

東陵途次周諮民隱直屬州縣上年秋霖被災較重深堪軫念前已疊降諭旨概行加賑至本年三月但現在農民東作方興麥秋尚遠口食猶恐拮据著加恩將被災六分以上各州縣無論極次貧民再予展賑一個月其被災五分者例不應賑並格外加恩亦無論極次貧民特予加賑一個月以資接濟至地畝雖經涸出間閭或無力播種者並著查明有可趕種春麥或候種大田者均分別借給籽種一面辦理一面奏聞俾得無誤春畝副朕體恤愛養至意該部遵諭速行○諭軍機大臣等朕祇謁

東陵所過京東地方見去年被水之區情形實

多竭屢悉心為之擘畫已明降諭旨將成災極次貧民及五分災極次貧戶三月之後再行加賑一月其無力不能乘時播種者並令地方官迅速查明分別借給籽種並將勘不成災於例不應緩徵之處一體加恩停緩又恐一切需用不敷並撥戶部庫銀八十萬兩以資應用該督奉到此旨當速飭各屬實力奉行務令澤必下究副朕軫念至所過廣平大名等處該督自己督率籌辦如其中尚有應行酌量加恩之處並著即速奏明辦理可一併傳諭知之○是日駐蹕煙郊行宮○戊申駐蹕白澗行宮○己酉駐蹕隆福寺行宮○庚戌清明節

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

隨行禮○至

孝賢皇后陵奠酒○遣官祭

永陵

福陵

昭陵

泰陵○遣官祭

端慧皇太子園寢○諭直隸去秋被水低窪

地方近因巡省之次復疊降恩旨多借籽種以資東作其定例應賑不應賑極次貧民均予加展一月並加撥部庫銀八十萬兩濟用更念現在青黃未接之際米價未能驟平災黎即格外得銀猶或艱於糴食著再加恩截留河南山東新運漕糧十五萬石分撥水次附近被災州縣俾得銀米兼賑閭閻既餉口有資即市集米價益就平減該部遵諭速行○諭軍機大臣等朕此次恭謁

東陵道經通路見途次車運糧石頗為拮据詢

知即係前此奏明採運塔子溝等處米石一

項今據觀音保奏稱此次米石原辦十二萬

餘石而此時赴通者纔及四萬餘石是雖設

法催趲終屬力勤費大恐於貧民不能速濟

現已明降諭旨令於本年山東河南新漕內

再行截留十五萬石分給附近水次被災州

縣俾得銀米兼賑尤為有濟實用所有口外

米石自可停其趲運以免周章可傳諭該督

等現在尚未起運之米固可存留別用即經

起運亦可酌量於近口之密雲懷來遵薊等

州縣乘便留貯以為賑濟平糶之需方觀承

等其即飭屬妥協遵辦副朕加惠黎元至意

○又諭曰楊廷璋等奏南安縣林時元擲投

詞帖一案已交部覈擬速奏但該督等摺內

以該犯實係病發瘋狂並無為匪實蹟等語

未免仍循外吏陋習並非事理之正試問該

犯如果實係瘋狂自當不省人事何以逐條

登答俱能一二圓融解說其為狡黠更何待言此等自作不靖之徒已知罪難復追見承審官從病瘋一路詰問豈不樂於承認自遂其避重就輕之計乎且地方遇有如此案犯無論瘋之真否均當嚴加刑訊然後明正其罪方足為衆人顯示炯戒著傳諭楊廷璋等勿任詭詞開脫使得倖寬刑訊將該犯一面即行逐細盡法嚴鞫俟接到部覆再行按律治罪可也○陝甘總督楊應琚奏烏魯木齊

為新疆衝要駐兵四千名副將不足以資統率請改為總兵添設鎮標中營並城守營連原設左右營為四營駐兵分隸聽巴里坤提督節制烏魯木齊以東巴里坤以西綠營屯種責成鎮臣就近督率從之○是日駐蹕桃花寺行宮○辛亥駐蹕盤山行宮至乙卯皆如之○癸丑諭軍機大臣等巴祿楊應琚所奏籌辦涼州莊浪滿營官兵移駐伊犁及漢軍官兵出旗各事宜二摺已交軍機大臣議

奏至另摺所請於涼州莊浪申兵三千二百名內查其年老殘廢孤寡幼稚之戶酌留五百名統歸涼州駐劄改設城守尉一員管轄等語朕初閱時以移駐之兵既皆精銳足壯新疆營伍其老弱殘廢之跋涉維艱者自不妨區別酌辦至於遷移帑項不致虛糜猶其後焉者也當於摺內批諭即可併入議行但思設立駐防原為地方起見今新疆開拓二萬餘里涼州莊浪一帶已成腹地是以特准軍機大臣所議將該處駐防官兵移駐伊犁漢軍則令改調綠旗營缺及聽其散處為民而俸餉經費即可挹彼注茲化無用為有用且伊犁屯田豐收水草暢茂尤於伊等生計有益今若因老弱廢疾孤幼等戶遂酌留兵額五百名改設城守尉等官不但非駐防體制而耽逸惡勞安土重遷之徒勢必紛紛託詞規避此風斷不可長即該將軍亦轉覺難於辦理此內果有前項戶口萬不能遠赴伊

犁者伊等原從西安移駐涼州莊浪至今不過二三十年自可體察實情量為酌留仍令回至西安交該將軍歸入佐領就便安插又何必為此委曲遷就之舉耶另摺所奏不必再議仍將此詳悉傳諭巴祿楊應琚知之尋軍機大臣議奏一涼莊滿蒙兵挈眷移駐伊犁辦裝銀官按品級賞俸一年兵每名賞銀三十兩跟役二兩一步兵自涼莊至哈密每二名並跟役給車一輛至伊犁每名給馬一匹折銀八兩到後繳還十分之三分二年坐扣眷口照例給車外每戶添給行李鍋帳車一輛一應需盤費鹽菜口糧照安西提標兵移駐烏魯木齊例分別支給跟役無論多寡准量給一名鹽菜銀不准更支盤費一帳房照察哈爾兵移駐伊犁例給價費具應所本有不准折給一抵哈密後應由開展烏魯木齊臺路前進仍令該將軍總督辦事大臣等遴員沿途照料從之又諭曰巴祿楊應琚

所議涼州莊浪滿營移駐伊犁事宜一摺如加賞整裝銀兩及增給車輛各條業經軍機大臣等議覆降旨允行至所請鍋價二兩之處其事本屬瑣屑非體自當分別指駁在巴祿等不過欲為伊等多得分例起見殊不知伊等每戶既已從優賞給又加以沿途車馬路費所得並不為少何至炊爨之具尚煩餽總過計伊等在涼州莊浪豈家家俱不熟食耶但伊等辦裝之項如先時早為給發兵丁到手既不免任意花消若給發於瀕行之時又恐置備不周而購買亦受居奇之累何如先事官為豫辦臨時散給所餘者留至伊犁分授伊等為長久生計尤為費省而事集耶著傳諭楊應琚一面自往蘭州會同巴祿及莊浪副都統計其必需各件豫行妥備撥用更覺便易即如營中飼馬自拴之費不及槽槽之省此一定之理今一併官為計畫諸事俱得實濟至兵丁駐防日久零星逋欠自所

必有。然屢經盤剝其息亦足數本。此時既當起程。自不應任需索之人。滯留滋擾。其中辦理亦應官為主持。示之節制。將來起程。仍應按時分作三起行走。途次雖有本旗管押官員。即經過地方。亦必有員役料理。而該將軍巴祿。副都統勒克興長等。尤當專任其責。直至伊犁。方為奉職竣事。倘兵丁等途間或不安靜。及有乘間逃回情事。伊三人不能辭咎。逃而不獲。則罪在楊應琚。其拏獲者。一面正

法。一面即行奏聞。大學士等議覆。涼州將軍巴祿。陝甘總督楊應琚。奏涼莊漢軍官兵出旗事宜。一願為民者。准呈明涼莊地方官給印票。行文所往地方。一體考試。婚配立業。一願補綠營者。查係領催馬甲。並有馬匠役頭目。補馬糧係步兵匠兵。養育兵補步糧。就近於甘撫標。陝甘提標及陝提屬之靖逆標。寧夏涼州。西寧肅州。沙州五鎮所屬營。勻補即於食糧處入籍。一調補兵窮苦閒散戶口。

照閩省漢軍調補例。分別給賞。准領回自立馬匹。一出旗官員。分別送部引見。咨部改補。及世職進士舉貢生監。並候補候選降調。捐職銜等員。均歸入漢班考試。補用從之。戶部議奏。山東省并通州。天津二所船因災減歇。暨江安屬之減。則蘇松屬之閏月兵糧。及坍荒等項。減船應請加給一分月糧從之。甲寅

孝昭仁皇后忌辰遣官祭

景陵。諭軍機大臣等。永貴等奏稱。回部六品以上伯克等。四班俱經入覲。今年應再從第一班起。但伊等俱係已經瞻仰之人。而四班尚有留辦事務及因疾未行者。向來入覲約以四十員為率。請先儘此項人員。其第一班再行入覲者。可以酌減等語。六品以上伯克等。既俱經入覲。嗣後亦不必太煩著將四品以上之伯克等。以四年一次分班。五品以下不必入班。或有新經除授者。准其前來。每年

不過二十員。以別等威而示體恤。又諭曰。御史興柱。顧光旭。奏文安大城疏庠積水情形。一摺。看來此事。方觀承派員籌畫。未免稍遲。現在正當加緊董辦。昨兆惠奏報海河大閘口至鹹水沽等處。添開溝道事宜。並稱一面往勘文安大城一帶。想此時正可到彼督率該御史等。尅期將事。但一切雇夫需費。最關緊要。若必俟移知方觀承。會同經理。則恐緩不及事前。已有旨。分撥部庫銀二十萬兩。

解交天津備用。該御史及鹽政所辦工程。各應需用若干。兆惠應即於庫銀內一面先行酌量分給。俾得及時豫備集事。其支領仍歸地方官覈實報銷。以免稽遲。至海河新增洩水溝道。日來是否較前大暢。內地積水。現在涸退尺寸。與布種分數多寡之處。仍即回勘明確。詳細奏聞。以慰懸切。將此傳諭兆惠。并令知會該御史及鹽政等知之。尋兆惠奏查靜海青縣積水宣消計日盡涸。霸州水已退。

地畝無不種蒔。大城文安水較大。村莊未涸出者甚多。下流現開口引放。布政使觀音保同御史興柱。顧光旭。堵築上游漫口。以絕河水倒漾。趕於二十九日合龍。惟河流久溢。堵塞已遲。臣現於艾頭村等處缺口。測量高下。相度應行開溝處。飭知府周元理在隄辦理。並令日報放退若干。由臣轉奏。各工酌給庫銀。並知會御史鹽政一律辦理。得旨。竟遲了。今惟有竭力速行疏導。以望多涸耳。御史顧

光旭。奏臣同臣興柱。已將文安隄辦竣。隨分勘漫水之區。涸出種麥者十之六七。香河寶坻寧河水全消。豐潤玉田開挖東西岔河。於黑龍河尾挖溝。水深處尚二尺。現辦水車庠。徹期於三月全消。臣俟查灤州樂亭回。仍沿途驗水消尺寸。奏聞得旨。嘉獎。○乙卯。諭據葉存仁奏。河南各屬挑濬河道溝渠。俱一律寬深等語。是豫省水利工程已著有成效。因思直隸連年積水未消。現雖多方宣洩。看來

終不如豫省之妥善從前河南疏濬河工皆侍郎裘曰修協同辦理此時裘曰修服制將闕著即馳驛來京督辦直隸水道溝渠事務○諭軍機大臣等裘曰修丁憂在籍無事閒居家累亦多竭蹶現在直屬有開濬溝渠疏消積水之事伊從前辦理河南支河幹河等工於水利尚能諳悉今服制亦已將闕若令前來協同經理於工程自屬有益而伊亦可及時自効現已有旨特命馳驛來京但必俟接到部文起程未免稽遲時日著傳諭裘曰修奉到此旨即可做裝就道勿稍遲滯○禮部議准江蘇巡撫莊有恭奏稱奉賢金山二縣以分縣各建文廟應請以二十八年為始增編祭祀香燭銀從之○兵部議奏各省驛道所管各船屆應大小修之年均照戰船例詳勘據實題修其可展限者不得循例概請並聲明應展限某年從之○署湖北巡撫湖廣總督愛必達

疏報湖北石首縣新墾地八頃七十一畝有奇升科如例○丙辰遣官祭賢良祠○諭曰喬光烈奏永寧州知州郎昌齡稟原任海州知州鄔承顯子鄔玉麟偕姪鄔鳴霄到署進謁捏稱已准改歸民籍經該州察出請咨解治罪一摺應將該犯等即行拏解來京治罪郎昌齡身任地方於此等狡獪之徒能留心訪拏毋任詭避深為可嘉著交部議敘以示鼓勵前此開泰為久不歸旗之郎世琳請入民籍一案甚屬不知事體已經降旨勅部嚴處今以州牧下僚能秉公辦理之事而久任封疆者乃憤憤若此聞之得無汗顏耶將此通諭中外知之○諭軍機大臣等喬光烈所奏永寧州知州查出鄔玉麟等分解治罪一摺已有旨將該州郎昌齡交部議敘其鄔玉麟既經喬光烈移知吳達善現在就獲應與鄔鳴霄即行一併解京治罪著傳諭該督撫等彼此知會務委妥員沿途留心防範倘致

乘間疎脫咎有所歸勿以尋常僉解故套塞責也○又諭刑部議駁吳達善定擬越獄拒捕軍犯賀文龍改為絞決一案所辦甚屬明允賀文龍始以夥竊誣良擬軍輒行賄越獄脫逃屢經肆竊至聞拏拒捕膽敢刃傷官役其為怙終不法豈尋常案犯可比若僅遷就例文完結不足以昭炯戒吳達善原擬未免有姑息之見著傳旨申飭○又諭刑部駁正吳達善定擬賀文龍一案辦理甚屬明允惟案內照擬杖徒之劉應章董珍二人並與該犯知情送信情罪尚覺未當著傳諭刑部堂官將該犯再行按例秉公改擬具奏○又諭據明瑞等奏稱涼州莊浪滿洲蒙古兵移駐伊犁應令不必攜帶長衣竟用短衣於伊等生計甚便請著為例等語明瑞等所奏是著寄信巴祿等曉諭移駐兵丁均照行營之例服用短衣○是日駐蹕大新莊行宮○丁巳諭軍機大臣等據明瑞等奏稱前烏魯木齊

領取耕牛五百隻內不知曾合計庫爾喀喇烏蘇等三屯否因札商阿思哈旋據阿思哈咨覆若解送牛百餘亦屬有益當即選百二十隻送往現在伊犁尚有牛八百餘隻併攬哈薩克所換馬匹均配使用並無貽誤之處等語明瑞等將牛隻通融辦理用於屯田頗合機宜伊犁乃蒙古地方必須設立牧場孳生牲畜方為久遠之計著傳諭明瑞等將伊犁現有牛馬除所用外餘俱著交厄魯特加意牧放孳生不可因現在牲畜無多遂致玩愒果能加意孳生牧養日久自可繁庶其攜眷移駐索倫察哈爾兵到彼亦將此項牲畜令同厄魯特等牧放則孳生益多不但一切地方敷用亦合蒙古生計○給事中溫如玉御史永安奏現由天津以南分赴河間等府屬查辦宣消事宜並確訪各屬村莊賑務得旨一切盡心查察莫辭勞苦勉之○是日駐蹕三家店行宮○是月戶部侍郎錢汝誠奏

鄉會試外簾官責任稽察近日應行開列之
員恐親屬迴避及得處分託詞規避者多所
送率不得人請飭各衙門嗣後將科目出身
人悉行開送恭候欽點得旨所奏是依議行
○江蘇巡撫莊有恭奏江南松太海壩土性
善坍華亭寶山等縣向築坦水坦坡皆不足
恃應仿浙老鹽倉改建塊石簍塘現屆春汛
宜速辦得旨如所議行○浙江巡撫熊學鵬
奏寧海縣距省遠無河道可通新升額米二
百三十一石零應請改折色解省報聞○廣
東學政張模奏廣東南雄韶廉等府及連州
等處皆歲科連試於按時懲勸之法未盡除
瓊州隔海候風仍照舊例餘請按年分試報
聞

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十一

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十二

監修總裁官總纂官太子太傅文淵閣大學士文淵閣領事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官總纂官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣重誥內大臣戶部尚書鎮遠侯滿洲都統軍功紀錄六次

尋常紀錄十四次臣德馨總纂官太子少保工部尚書紀錄六次臣曹振鏞等奉

敕修

乾隆二十八年癸未三月戊午朔軍機大臣

等議覆葉爾羌辦事尚書新柱奏換班兵正
月初起程六月可到查四月水草恐尚不敷
駝馬易損換班與戰兵不同緩行詎能勉期
至下次換班尚遠回京兵無需趕辦請令明
瑞永貴新柱等將巴里坤西四月有無水草
如何於官兵有益議奏再厄魯特回子兩處
情形少異換班兵應自京指定地方庶所用
物件易於備辦回地稍遠嗣後換班兵應分
作頭二三起均如所請再現在伊犁移駐索

倫察哈爾兵各一千復將涼莊滿洲蒙古兵

移駐此後烏魯木齊及回子地方換班索倫

四百名即於伊犁駐防索倫兵內調從之○

刑部議覆廣西按察使栢琨奏稱粵西民苗

雜處苗徭罪犯斬絞情輕者秋審例得減等

恐民人假冒應如所請於定案時取隣保甘

結存案捏混治罪從之○直隸總督方觀承

奏恩截豫東漕米僅敷加賑而籽種口糧無

項可支請加賑全用銀留截漕米為借助用

從之○署湖北巡撫湖廣總督愛必達疏報

湖北竹溪縣新墾地二頃三十二畝升科如

例○葉爾羌辦事尚書新柱等奏據派往巴

達克山薩里等呈稱開導素勒坦沙已交出

布拉呢敦屍骸並伊妻子謹將表文及致臣

等書進呈下部知之表文曰巴達克山伯克

臣素勒坦沙謹奏請

聖鑒自為臣僕受

大皇帝深恩實出眾伯克之上今布哈爾烏蘇

伯克等皆以臣殺害布拉呢敦霍集占等結怨興兵臣雖勉力支持然別無可倚賴所幸為

大皇帝臣僕實心効力整頓部落即身故之日亦必囑付子孫無改臣在日恭順至臣地所埋布拉呢敦屍骸及其妻子僕人蒙葉爾羌駐劄大臣等遣使查取臣不敢遲誤即遣臣親隨密爾咱阿達里布等呈獻併令入覲諭軍機大臣等新柱等奏稱素勒坦沙呈獻布

拉呢敦屍骸及其妻子遣使入覲惟伊侵掠之齊特喇爾尚在致書自辯未即付還仍行嚴飭令薩里等同密爾咱阿達里布前往等語新柱額敏和卓所辦巴達克山事宜甚屬妥協著交部議敘仍各賞御用荷包鼻烟壺薩里等著賞給緞疋以示鼓勵覽傳示素勒坦沙書詞稍覺嚴厲伊進表致書頗屬恭順此次往問侵掠齊特喇爾之事應加以撫慰但業已發行亦自無礙若素勒坦沙盡還侵

掠固善其或尚有遲疑推託亦不必遽示兵威即作速奏聞候旨○是日駐蹕湯山行宮○已未

上迴鑾詣暢春園問

皇太后安○幸圓明園○御史興柱顧光旭奏堵築漫口現已合龍臣興柱往新安安州等處臣顧光旭往寧河寶坻等處分勘有無積水及體察加賑再賑得旨嘉獎○福州將軍福增格奏海關鋪戶多係土著有有力人航海貿易自立坐鋪為登卸貨物計外商亦資銷售沿久相安與潞關鋪戶不同請仍留不禁下部知之○庚申諭上年近京低窪之地如天津文安大城等屬因被秋霖積水未涸已屢諭該督方觀承飭屬設法疏消毋任因循致稽東作在方觀承督理賑務於水利事宜或不能一時兼顧亦當及早相度議奏朕何難派員專董其役以利農功昨因海河五閘宣洩未暢特命兆惠前往督率經理各邑積

水即按日以次消滅。前此地方官設能如此迅速從事，何至遲延若此？非按例示懲，曷以重封疆、勤民莫耶？方觀承著交部察議。○諭軍機大臣等：前命玉素布往代額敏和卓因有辦理巴達克山事宜，仍令暫留葉爾羌。今素勒坦沙既將布拉呢敦屍骸及其妻子獻出，則額敏和卓原可遵諭起程。但現在索還侵掠齊特喇爾游牧，又遣薩里等前往巴達克山。額敏和卓不若俟此事辦理妥協後，再回吐魯番休息。著傳諭額敏和卓及玉素布知之。○直隸總督方觀承奏臨漳引河已成壩工，合龍漳水暢下，全河已復故道。漳性善滲，成安廣平大名元城漫水可全退。已飭該縣全借籽種，俾淤肥地滿種。但考漳水曾會滹入滏，現在滹滏合流，若三水並行，下游害劇。善後事宜最要現飭兩省協力備料貯工，選弁兵輪駐修培，以期壩工墊實得旨嘉獎。○察哈爾都統巴爾品奏八旗察哈爾捐助

移駐伊犁兵駝馬奉旨賞給銀布，請改用銀牌重五錢，得旨：蒙古何必賞給銀牌？賞銀五錢未免過少。著賞一兩。○辛酉

上詣暢春園問

皇太后安。○還宮。○河南巡撫葉存仁奏豫省民樸而愚，最易惑者莫甚於邪教，託於行善動以獲福，民不知為犯法之事，而轉惜邪教陷於刑辟之人。現在飭屬出示，務期淺近易曉，將從前明正刑章之案臚列。飭州縣官隨時隨地開示，著落地保訪報得旨好應。以徐化導，又不可久而忽焉，則得矣。○壬戌諭去秋直屬濱水窪下之區，因秋霖積潦，猝難消涸，恐誤閭閻東作。屢諭方觀承令其乘時設法疏導，以重農功。該督初奏一俟春融再行相度經理，繼復以海不受水為詞，俱於摺內訛諭。毋得稍事因循致誤。地方受累，然猶以方觀承身任總督情形自所熟諳，且當兩年秋雨過多，沮洳之壤未易一蹴施工，兼以

辦賑殷繁亦且難以分身兼顧是以御史永安顧光旭等先後具摺條奏朕尚意伊等身居局外坐言易而起行難設令伊等與方觀承易地而處亦未必能刻期集事轉不無曲諒該督俾肩其責者無掣肘之慮此朕本意也嗣據該督具奏文安大城等處疏濬事宜禁隄車庠從事既苦拮据奏功殊難迅速即令永安顧光旭并添派御史二員前往勘辦既至詢問接駕諸臣以天津海口不應專恃

五閘宣導以致停淤不暢而鹽政達色亦僅圓融其辭以多增數口想係有益無損為對朕知此事非特遣大員不足以收實效因命兆惠馳往相度將各處溝閘開放寬通不過數日之間閘口水落數寸而內地已涸出二十餘里靜海等窪地亦涸出十分之六是豈海之受水適當兆惠到彼時耶可見事在人為前此該督辦理遲誤之愆更無由置喙矣在直屬兩年被潦成災較重為大吏者經營

補苴倍當竭蹶朕委任封疆雖細事必加體恤從不肯以歲時水旱之偏諉過督撫則為督撫者何所顧慮而不為民請命耶方觀承如果不存護短之見悉心早為籌議具奏朕或指示規畫或派員攷助何所不可顧乃一切模稜不惜曠時玩事若此朕安用此督撫為耶昨有旨已將方觀承交部察議今細覈現在積水消涸情形非按例察議所能示儆所有督理之方觀承及布政使觀音保并天

津等各屬俱著交部議處以為玩視民瘼者戒至天津道那親阿霸昌道額爾登布天津府知府額爾登額俱專駐該處之方面大員率屬親民尤為切近一切及早將疏洩事宜據實稟請督臣籌辦如言之不聽不但可以直揭部科即用摺據實密奏朕必深為獎予况朕於道府召對期望造就初不以有司之職待之中外誰不共曉那親阿等以滿洲世僕在部院中尚能曉事是以擢用外任俾知

實心報効乃漸染外吏惡習一味仰承風旨於地方重務視同膜外若不重治其罪何以示各省道府之戒那親阿額爾登布額爾登額俱著革職發往巴里坤自備資斧効力贖罪夫以直隸近在畿輔而道府之承順總督畏首畏尾情狀若此又何論於各省乎嗣後直省監司郡守等員不知儆省有仍蹈此轍者朕必按此例嚴處直屬水利俟表曰修到日會同通行勘辦外現在天津文安大城等屬積水減退情形並各處隄閘工程仍著兆惠同方觀承即速馳往審度經理副朕軫念元元至意○吏部議准甘肅巡撫常鈞奏稱涇州平涼靜寧三州縣地衝差繁應改為調缺在外揀補從之○都察院奏飯廠扣存餘米一百十八石零應歸入展賑用得旨此項存貯餘米不必歸入例賑數內散給所有四月二十日以前應用米石仍准按例赴支俟賑期已竣將此餘米通融籌酌接濟俾貧民

復多得數日之賑不亦可乎○直隸總督方觀承疏報直隸順義懷柔寶坻三縣新墾地五項三十六畝有奇升科如例○署湖北巡撫湖廣總督愛必達疏報湖北咸豐縣新墾地二項六十畝有奇當陽縣新墾地三項九十六畝有奇升科如例○豁免山東齊河濟陽禹城臨邑長清陵縣德州德平原惠民陽信海豐樂陵商河霑化壽張聊城堂邑博平茌平清平莘縣冠縣臨清邱縣高唐恩縣夏津武城東昌等三十一州縣衛水災額賦○緩徵甘肅伏羌安定漳縣安化隴西五縣旱災霜災新舊未完額賦○予故河南巡撫胡寶瑤祭葬如例謚恪靖○癸亥上耕藉詣先農壇行禮更服至耤田所躬耕三推復加一推御觀耕臺命裕親王廣祿果親王弘瞻愉郡王弘慶各五推吏部左侍郎觀保戶部右侍郎

安泰禮部右侍郎五吉兵部左侍郎王際華
刑部左侍郎官保工部右侍郎五福左都御
史彭啟豐通政使孫灝大理寺卿王會汾各
九推畢順天府府尹率農夫終畝賞賚耆老
農夫如例○甘肅巡撫常鈞奏玉門敦煌二
縣耕牛因疫多斃民間無力買補照例借給
銀糧得旨此蓋向來資借便民之事以云利
濟閭閻則可若云因牛瘟而借給則闔縣傳
染皆無牛矣幸而存者誰肯賣與他人雖借
給銀米牛何由而得必期實濟則當於他處
買牛恐無此辦法亦非地方官力所能為一
切朕惟務實空言無補將此登答來看諭軍
機大臣等據常鈞奏稱安西府屬之玉門敦
煌二縣於去年得雪稍遲氣候溫和與牛性
非宜臘正兩月新舊招插戶民所畜耕牛瘟
氣流行每多倒斃照例借給銀糧接濟買補
等語向來資借銀糧等事原因小民日用缺
乏市廛貿遷有無以便民用至於牛瘟乃闔

縣傳染之事該處牛隻既已短少即幸而存
者亦僅能自供耕作誰肯出售他人若云以
此銀糧盡赴他處買牛當此東作方興之日
在在需用耕牛又安所得此牛隻蕃息之地
足敷二縣種戶購買之需不惟小民自辦艱
難即地方官亦難為經理看來資借銀糧之
舉以云接濟閭閻則可若云購買牛隻恐係
託之空言未必實有其事著將批諭常鈞之
旨鈔寄楊應琚看亦令其據實具奏 命禮
部左侍郎程景伊為會試知貢舉刑部尚書
秦蕙田為正考官吏部左侍郎德保兵部左
侍郎王際華為副考官○甲子
上啟鑒謁
秦陵○諭前因直屬去秋被水窪地雖屢經加
恩撫恤但當此青黃不接之際民力猶恐拮
据已降旨將被災六分以上各州縣暨被災
五分者概予加賑展賑一月以資接濟茲恭
謁

東陵

西陵所過通州三河良鄉三州縣其成災分數皆不及應賑之例念其地近輦道上年歲事歉薄閭閻生計維艱著格外加恩將通州等三州縣不應給賑村莊地方官確查實在貧民均予加賑一個月該督其率屬悉心體察毋任胥吏侵蝕中飽俾澤必下究副朕加惠黎元至意○是日駐蹕黃新莊行宮○乙丑諭曰副都統永傑病故所遺京口副都統員缺著書山調補書山所遺鑲紅旗滿洲副都統員缺著瑪瑞調補瑪瑞所遺正白旗漢軍副都統員缺著范宜忠調補京口現有漢軍出旗事宜范宜忠會同書山辦理事竣再行來京○陝西巡撫鄂弼奏本年輪查西安營伍應督臣親往楊應琚駐肅州辦新疆事請代赴各營閱視得旨好將奉旨處移咨楊應琚知之○是日駐蹕半壁店行宮○丙寅廣西布政使顧濟美奏臣署滇臬秋審於風化

所關案誤擬蒙恩棄瑕錄用倍加愧勉得旨汝非無知識者但好模稜圓融無過是汝之病耳○是日駐蹕梁格莊行宮○丁卯上謁

泰陵未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

隨行禮○諭此次接駕之天津縣壽民年一

百三歲李友益著賞給銀牌一面緞二疋伊

子年八十六歲之李三貴年八十四歲之李

三剛年八十一歲之李三強並伊姪孫年八

十歲之李知毅著每人賞給銀牌一面緞一

疋○戶部議准巡漕御史朱續經奏稱直隸

被災州縣應用常平穀賑者請以穀折米聽

民自行碾食不得仍發鋪碾滋弊濱水之區

有先經乾涸民已種麥復被衝淹者地方官

以報種在先不合賑例請查明一體酌借籽

種州縣設留養局收卹老弱貧民其外來流

移貧民例不給賑者請一體入局從之○庫
掄辦事大臣桑寨多爾濟奏喀爾喀人衆初
被厄魯特噶爾丹欺陵將已滅亡蒙

聖祖仁皇帝施好生之仁憐憫收撫臣嘗聞前
輩人言若非

文殊大皇帝洪恩焉能如此優游樂業再臣祖
父所遺臣父之書中有哲布尊丹巴呼圖克
圖土謝圖汗車臣汗王台吉所奏感戴

天恩蒙古字舊稿一件又有部議覆奏移咨呼

圖克圖清字舊稿一件詳加閱看皆係呼圖
克圖汗王等竭誠祝釐感戴

天恩之詞現在呼圖克圖將至喀爾喀之汗王
貝勒貝子公扎薩克台吉等自必往迎伏懇
皇上勅部行文作為如何齊集將天朝憐憫喀

爾喀之隆恩諭大衆及臣祖父舊日輸誠悃
忱曉諭衆喀爾喀等得旨毋庸由部汝會同
福德此次會盟時敬述舊事叩謝新恩與衆

一同具奏可耳○是日駐蹕秋瀾村行宮○

戊辰

孝賢皇后忌辰遣官祭

陵寢○軍機大臣等議准吉林將軍恒祿奏稱
吉林稅務同知一人不能兼顧請派員協查
拉林阿勒楚喀三處倉貯額穀積久易敗除
敷各項支放外請減價出糶價銀報部存庫
並請青黃不接之候按時價每石減銀一錢
賣給官兵閑散滿洲秋收納還拉林已停發
遣人犯庫貯穀價並無開銷亦應將庫存及
遣犯繳銀歸還原款從之○吏部議奏凡外
官職司考覈衙門遇有妻之姊妹夫為屬官
請照例令官小者迴避從之○旌表守正被
戕之山西高平縣民郭文忠女郭氏○是日
駐蹕半壁店行宮○己巳祭

先蠶之神

皇后親詣行禮○是日駐蹕黃新莊行宮○庚
午

上迴鑾詣暢春園問

皇太后安○幸圓明園○江南河道總督高晉奏河工歲修辦料請統於夏秋覈數發辦限年底全數貯工踰限將承辦官照降三級調用例叅處該管道府罰俸一年查明欠在民在蕩交後任押令叅員催完侵虧治罪得旨所奏甚是如所議行○山東巡撫阿爾泰奏青萊二府河湖隄埝工竣恐尚有蓄洩未合機宜應往勘登州環山濱海新少土曠令多種植為飼蠶及薪木計蓮萊棲霞等處有煤礦飭縣訪開高苑博興樂安壽光濰縣等縣濱河湖教以開漏築塍疏渠種稻一切地利海防總於巡察後奏聞得旨嘉獎○辛未諭軍機大臣等齊里克特納旺奏稱帶領翠眷駐防之察哈爾兵丁已抵烏魯木齊等語齊里克特納旺照管妥協著交部議叙○又諭曰旌額理等奏稱原任副都統佟福桂自到烏魯木齊以來頗知奮勉今三年期滿又懇請多留數年効力應請再留二年等語佟福

柱著加恩授為三等侍衛仍留烏魯木齊効力行走○又諭據成衮扎布奏公多爾濟車登等行抵烏登郭勒查詢戕掠烏梁海事哈薩克巴爾魯克巴圖魯交出章台里克為之請命因遣其子弟同來進馬俟其來時即令伊勒噶納押解赴京等語章台里克之奴戕殺烏梁海偷竊牧廠本應將章台里克治罪但巴爾魯克巴圖魯一奉查詢即將罪人交出章台里克亦悚懼自投自稱不能約束下人生殺皆大皇帝天恩願詣天朝聽罪巴爾魯克巴圖魯又為乞命頗屬恭順宜宥其罪且伊等均未出痘現當盛暑長途來京恐生疾病著不必解送至其跟役行兇若不示懲伊等不知畏懼著照蒙古例令章台里克按殺一人罰馬五匹之例共罰馬十五匹給被殺三人家屬領去成衮扎布奉到此旨即曉諭遣回其所進馬並令帶去再多爾濟車登於此事甚覺奮勉著加恩賞緞四疋以示獎

勵○壬申諭據新柱等奏稱辦理葉爾羌印務回人事務員外郎那音圖辦理糧餉印務同知圖桑阿自至葉爾羌以來三年之內竭力奮勉並無過愆可否交部照例議敘遇有應陞之缺即行補用之處請旨併將圖桑阿告稱伊受恩深重不敢仰邀議敘之處聲明等語員外郎那音圖同知圖桑阿在葉爾羌三年奮勉並無過愆俱著該部照例議敘

實錄卷六八三

元

大清高宗法天隆運至誠先覺體元立極敷文奮武孝慈神聖純皇帝實錄卷之六百八十二

大清高宗法天隆運至誠先覺體元立極敷文奮武孝慈神聖純皇帝實錄卷之六百八十三

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務處書辦滿洲都統世襲騎都尉軍功加七級隨帶加一級尋常加一級軍功紀錄一次臣履桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣重誥內大臣戶部尚書鑲黃旗滿洲都統軍功紀錄五次

母常紀錄十四次臣經筵經筵講官太子少保工部尚書紀錄六次臣曹振鏞等奉

欽修

乾隆二十八年癸未三月癸酉

實錄卷六八三

上詣暢春園問

皇太后安○諭軍機大臣等永貴等奏稱陀穆

齊圖等前往霍罕以利害曉示額爾德尼伯

克即謹遵約束將所侵阿濟比之鄂斯等處

交還指給等語額爾德尼伯克頗屬恭順伊

將來若常能如此可以永荷朕恩著納世通

傳諭伊來使等知之再納世通在京奏對曾

有永貴新柱等所辦已達克山霍罕事體稍

覺過當之語今看伊等辦理如此妥協可見

駕馭外藩。若一味姑息。伊等必至驕肆。自當恩威並用。俾先知所懼。則其感益深。足以豫弭滋事之端。并傳諭納世通。伊至喀什噶爾時。遇此等事。當慎持大體。加意辦理。不可苟且塞責。○又諭曰。素勒坦沙遵奉傳飭。送出布拉呢敦屍骸。及其妻子。所進奏章。頗為恭順。朕深嘉悅。著加恩賞給素勒坦沙緞八端。交伊使齋往。并著新柱納世通等。將朕鑒悉素勒坦沙惻忱。加恩賞賚之處。傳諭知之。○

平定回疆

閩浙總督楊廷璋奏臺灣孤懸海外。奏准內地代捐收穀運貯。現在額數已全。應請停下部知之。○江蘇巡撫莊有恭疏報元和婁縣。上海丹徒四縣新墾地八十頃七十四畝。有奇。升科如例。○甲戌諭前因天津文安等處積水停淤。該地方官不能及時疏洩。致誤春耕。是以降旨。將天津道那親阿。霸昌道額爾登布。天津府知府額爾登額。一併革職。發往巴里坤効力贖罪。以為玩視民瘼者戒。在該

員等貽誤地方。咎皆自取。但覈其致罪之由。微有不同。若不量為區別。轉無以儆職守。而示創懲。那親阿駐劄天津。積水情形。日所目擊。乃竟漠不關心。聽其淤遏。實屬罪無可追。額爾登布於所屬疏消事宜。固多延緩。然尚有查勘災賑諸務。一時或難兼顧。知府額爾登額。雖未能早為籌辦。但河務究非其專責。並較那親阿情稍可原。額爾登布。額爾登額俱著加恩。發往甘肅。交與總督楊應琚差遣。

平定回疆

試看額爾登布。以同知委用。額爾登額。以知縣委用。俾各勉勵。自勵以觀後效。又諭適從。

陵寢騎回官馬。自到京之日起。至出廠之日止。著照舊例。每日每馬一匹。給銀一錢。餵養。諭軍機大臣等。明德奏查叅疎脫。遣犯伊三。太之文武各員一摺。所有副將馬麟。該撫平日姑息之處。已於摺內批諭。並將該員等交部嚴察議奏。至外委梁永祿及兵役人等。

疎脫重犯。在未經弋獲時。固應從重定擬。今伊三太業經就獲。則該外委等之罪。自可不至於死。著傳諭明德。將梁永祿等。仍按照疎脫本例完結。倘此本已經拜發。則已令刑部存記。俟本到日照例改擬矣。可將此一併傳諭知之。○乙亥。

上詣

安佑宮行禮。○山西巡撫明德奏。太原府為省會。僅陽穀一邑。額貯常平穀二萬六千石。不足備用。請於省南各屬溢穀撥給二萬四千石。定為額。現有空倉添建三間已足。得旨如所議行。○予故荊州將軍德敏祭葬如例。謚溫愍。○丙子。

上御勤政殿聽政。○諭據刑部奏稱發遣伊犁之逃犯伊三太偷出古北口。請將管口章京議處等語。該章京等從前曾於欽差博勒奔察瑪瑞欲出口時俱行攔阻。今將實在逃犯轉行放出。伊三太並無照票。且係滿洲。其語

言舉動自屬一望可知。理宜嚴詰查拏。乃漫不經心。一任脫逃。怠玩已甚。所有古北口該管章京著交部嚴加議處。其兵丁即交該章京重處。○軍機大臣等議准。天津都統長生奏稱。天津近年草豆昂貴。月給二兩餽養銀不敷。擬留馬三十二匹備差。餘全令出青。每年餽養銀四月至九月發給一兩五錢。十月至次年三月二兩五錢。令兵豫買。不至臨時昂貴。從之。○戶部議准四川總督開泰奏稱。

四川富順射洪開縣三縣開淘鹽井。增煎鹽。勸請增水引二十四張。陸引六百六十張。應權課銀造入鹽課冊內題數從之。○兵部議准直隸總督方觀承奏稱。大興縣白塔村距縣遠。請將天津鎮屬采育營外委撥帶兵二十名移駐沿河口都司屬平羅營汛地。遼濶把總一員不足以資巡防。請撥存營外委帶兵五名移駐王平口。從之。○河南巡撫葉存仁奏。臨漳縣上年漳水入城。緣漳河臨下驟

至縣當其衝護城隄現已加高無隄處仍憂旁溢而入應添築隄五百餘丈得旨嘉獎○寧古塔副都統增海奏寧古塔向無監獄遇人命盜案及挖漫等犯分收於東西二城門堆房令值班兵守多即另覓閑房收禁屢有逃犯請設監獄委驍騎校一員專司勤慎者三年保題情者叅處派兵二十名巡查從之○丁丑

上詣暢春園問

皇太后安○諭現今青黃不接之際諸物昂貴兵丁等四五兩月應扣借項及庫銀俱加恩展限於六月起再行坐扣○諭軍機大臣等新柱久駐葉爾羌應派員更換著副都統額爾景額從容由驛前往此時新柱有遣使巴達克山索取齊特喇爾游牧一事若素勒坦沙遵約查還新柱即與額爾景額交代起程其或仍有候辦情形新柱仍暫行駐劄會同商辦○軍機大臣等議准伊犁將軍明瑞等

奏索倫察哈爾兵摺春移駐伊犁事宜○除所帶馬駝准存留外應給孳生牲隻請按現在牛羊數目每戶派給羊二十五隻二三戶合給牛一隻羊十隻歲交孳生羊三隻牛十隻交孳生牛二隻除伊犁現存羊隻外已議令巴爾品於牧羣辦送四萬隻又成衮扎布奏現有牛五百八十隻喀爾喀折抵應交馬匹計牛四千隻鹽菜銀一年內准支開墾賞籽種收穫前准給口糧大口日八合三勺小口半之一○伊犁新遷察哈爾厄魯特兵一千八百名應分為二昂吉舊有厄魯特兵千餘名應作為一昂吉各設總管副總管佐領驍騎校等官每佐領下領催四名所轄以二百人為率實授官不敷以領催署總管佐領應給關防鈴記○厄魯特兵千餘名食餉僅一百二十名伊等有前隨將軍等効力者有自布魯特哈薩克來投者請增食餉兵八十名從之○河東河道總督張師載奏河內縣

壩工止有管河縣丞未設樁埽兵夫雖係民修未諳河防孟縣小金隄亦民工有主簿分防千總各一額外外委一樁埽兵四十名該處工甚平穩請撥河兵十名令分防把總移駐河內從之○戊寅諭今日御史蔡觀瀾所奏二摺一為粥廠人數加多給賑米石請酌量加增其事自屬應行且朕既降旨加恩展賑各廠均應先事妥辦不獨東壩一處為然凡監賑御史於廠中米石約畧需用時即當告知該堂官豫為咨取更何待散給不敷始行入奏所有各廠應行添支之處即照所請速行至另摺具奏副都御史蔣楬叅處給事中已延三等到廠遲延一案謂蔣楬前後頓殊因將辰刻及辰正二三刻曉曉置辯不惟於事理甚為紕繆并以袒護同官詆呵臺長其所關於官方政體者甚大不得明白宣示以明杜漸防微之義前蔣楬初奏御史到廠遲延時朕方以其不即據實叅處而先為

奏聞請旨之舉已不免姑息却慮及至已延三等因循到遲始行指名叅議實不可謂其察覈之過苛矣况堂官於辰正前後到廠御史不當於辰初前後到廠耶朕夏令御勤政殿視事必在卯正之前然已不啻三竿之日矣辰初到廠何至顛倒無暇乎即此交部察議實不過奪俸數月若有紀錄尚可抵免有何重輕蔡觀瀾乃用此妄生議論謂非有心藉詞報復可乎明季科道惡習徂於官官相護之見過事交彈互擊以致國政日隳不可究詰足為炯鑒我朝乾綱獨攬班列清肅此等伎倆廷臣中諒亦不敢巧為嘗試然涓涓不息將為江河之慮何可不豫為懲儆以彰國紀而正人心蔡觀瀾著交部嚴加議處朕於羣工奏牘虛衷採擇從來不設成見如蔡觀瀾所奏乖方若此而於同日所陳廠中應理事宜固不以人廢言也將此通諭中外使明知朕意○又諭曰福德往庫掄同桑寨多

爾濟辦事。其鑲藍旗滿洲副都統事務著阿永阿署理。○江蘇巡撫莊有恭奏各引河紆回淺阻。加以各鹽場水并灌。尤易壅遏。往往外水高於內水。濬開最急。各工因春雨暫滯。勒限三月竣。大抵淮揚海三屬。通計宣洩。尤要在項家沖。敬仿欽定徐城水誌之法。一俟壩脊過水五寸。即開各草壩。農田鹽運兩便。再臣登雲臺山。該處增漲海塗。不下十餘萬畝。水患初除。腴田未墾復者亦不少。化斥鹵為膏腴。當徐議萬全計。報聞。○己卯諭。去年將官員等秋季應扣各項銀兩。曾經降旨。俱令展限一季。今年春季官員等扣項。該部俱照例坐扣。但今正值青黃不接之際。諸物價值尚未平減。著加恩三品以下官員。今年春季俸銀內。所扣各項銀兩。仍照上年秋季全支之例。俱行找給。下季再行坐扣。○諭軍機大臣等。開泰等奏巴塘地方番民與喇嘛一氣不服土司。聚眾搶取銀物一摺。該督辦理

此事不合機宜。已於摺內批示。堪布為約束喇嘛之人。既縱令徒眾與番民抗掠土司。是其狼狽為奸。實屬教唆滋事之尤。豈可轉令代辦土司事務。此理人所易曉。該督何以措置乖謬。若此。且該處遇有此等不法之案。開泰即應前往辦理。即心懷惡。託詞體統攸關。不勞總督親往。亦當派司道大員前往查辦。現在況有換班官兵一千餘員。名乘便用以辦理彈壓。何所不可。而乃瞻顧調停。徒令二武弁前往了其事。不識事理。一至此乎。開泰向來自負讀書於地方事務。毫無斷制一味姑息。便容朕屢次訓諭。不知悔改。豈朕委任封疆之意。開泰著傳旨申飭。所有案內為首及濟惡之喇嘛番民等。俱著嚴拏按治。明示懲儆。外其堪布喇嘛著即拏解省城。嚴行審訊。究明情罪。請旨辦理。勿得仍蹈故習。希冀模稜了事。並將此詳悉傳諭知之。○旌表守正被戕之直隸定興縣民杜玉妻史氏。

守正捐軀之河南濟源縣民王喜成妻翟氏

○庚辰

上詣暢春園問

皇太后安○諭上年冬間因京師米價未能平減曾經降旨令在京三品以下文武各官豫支半年俸米分作四季坐扣現在序當初夏尚屬青黃不接之時所有今春扣過米石著加恩仍行按數給放展至秋季再行按季分扣其王公等及三品以上大員亦著加恩准

其豫支一季俸米照例按季分扣庶京城米石倍為充裕市價益平於民食尤有裨益該部遵諭速行○緩徵浙江仁和錢塘海寧餘杭石門桐鄉安吉歸安烏程長興德清武康孝豐山陰餘姚蕭山諸暨上虞杭州湖州等十八州縣衛弁仁和曹娥錢清金山青村下砂二三等七場水災額賦○辛巳長蘆鹽政達色奏天津積水自十三處溝閘暢流共涸出地長十七八里寬八九里臣現督縣勸農

播種得旨好頗為勉力再蝗蝻一事更應留心水涸處尤易生此物也○授告退輔國將軍阿敏圖子惠齡為三等奉國將軍○壬午工部議奏各省請修船除戰船站船專案題奏外凡係例限應修無論大小請勅下督撫委員勘估於年終彙奏將奏准招送部仍覈實造冊從之○浙江巡撫熊學鵬奏杭城風俗有必禁者二一婦女不避瓜李之嫌遇進香時或借宿僧寺一喪葬延請僧眾絲竹並奏名曰佛曲可以奪人哀思生其邪僻臣先示禁徐繩以法得旨甚是亟應整頓此不但於風教有關即佛教亦豈宜有○癸未諭向來出征兵丁有自中途及軍營逃回者即予正法所以懲逗撓肅軍紀也若各省營兵在伍脫逃舊例拏獲之日不過除去軍籍加之重杖蓋其情本輕則其罪亦薄惟派往伊犁等處換防種地兵丁較之身列行陣者雖有不同而新疆駐守攸關又與尋常本伍食糧

未攜軍器者有間。繩以軍法。固覺過嚴。若僅照營兵之例。予以責革。亦不足以示儆。前此所定條例。殊未周晰。著該部將出征及在伍脫逃二項。并派往新疆駐守兵丁。遇有脫逃。應如何分覈情罪輕重治罪之處。詳悉定議具奏。尋刑部議奏。派往新疆駐防種地之滿漢各兵。遇有中途及所派地方脫逃。於緝獲日發原派處枷號兩月。遊營示衆。充當苦差。如果悔罪奮勉。十年無過。該將軍大臣等查奏。准各回旗籍。再犯者立行正法。至京外在伍綠旗兵脫逃。俱杖一百。枷號一月。不准入伍。其在京八旗及各省駐防兵脫逃。仍照舊例辦理。從之。○軍機大臣等議。覆前鋒統領瑪瑞奏各兵換馬習技。修補鞍韉。不無所需。令各兵出大錢五十等語。查前鋒護軍所支馬匹餵養銀。及冰鞋等件。年終賚予。皆以資其學技。若因更換馬匹。修補鞍韉。小費至斂兵錢。豈國家養兵之意。合計兩翼八旗。每翼

每旗約加銀五十兩。即於年終賞進班人。及冰鞋等件銀內。提出六千兩足數。兵用從之。○又議。奏前鋒乃精兵。向來缺出。多憑前鋒統領指名挑取。查前鋒統領管轄四旗。何能周知四旗親軍護軍閑散人等優劣。或用章京前鋒校等轉告之人。必多瞻徇。嗣後請行文各該處。咨取應挑人與護軍統領一同試看。騎射挑取其指名挑取之處。停止。倘咨送關冗。或有技藝嫻習者。匿而不送。即參奏治罪。其前鋒參領前鋒侍衛。指名挑取尤不可行。嗣後此二項缺出。照例揀選。帶領引見補放。從之。○陝西巡撫鄂弼奏。西省社倉較常平更易缺額。所缺亦較多。州縣視為民間之倉。借責之社。正副催責之鄉保。官不認真稽查。臣現在與常平倉覈實虧數多寡。缺額處暫緩參處。於窩領保領人著追一月不完。責成交代。州縣雖詭弊甚多。要當盡法推究。得旨。好寬而不縱。應如是者。○旌表守正被戕

之山東城武縣民李四妻史氏守正捐軀之
河南通許縣民師孔女師氏○甲申

上詣暢春園問

皇太后安○禮部以會試中額請得旨這會試
滿洲蒙古取中三名漢軍取中一名直隸取
中十六名奉天取中一名山東取中十一名
山西取中十名河南取中九名陝西取中八
名江南取中三十二名浙江取中二十九名
江西取中十九名湖北取中九名湖南取中
四名福建取中九名廣東取中九名廣西取
中四名四川取中六名貴州取中五名雲南
取中四名○乙酉

皇后行躬桑禮如儀○丙戌諭曰協辦大學士
兆惠侍郎錢汝誠差往直隸宣化府會同該
督方觀承查辦事件著馳驛前往所有帶往
司員一併給與驛馬○諭軍機大臣等明瑞
等奏稱伊犁屯田之厄魯特等已給與籽種
二百三十石請覈計來歲收穫以前食用需

糧若干若所餘足敷本年籽種即停其官給
等語厄魯特等甫經安插生計未裕不便停
給籽種著傳諭明瑞等來年播種之時照常
官為給發○戶部等部議准湖南巡撫宋邦
綏奏稱湖南瀏陽湘潭衡山武陵桃源五縣
自乾隆二十四年始添買常平穀請增建倉
分貯從之○予故浙江提督王無黨祭葬如
例謚莊愍○蠲免江蘇清河安東宿遷睢寧
海州沐陽大河崑山新陽婁縣南匯青浦鎮
海金山等十四州縣衛水災額賦○丁亥
上詣暢春園問

平定志卷之二

皇太后安○還宮○諭軍機大臣等宋邦綏奏
恩施縣查獲劉三元假託夢語繕寫逆詞一
案該犯既能書寫逆詞且能記憶書語真屬
狂悖之尤摺內所叙拘訊逆子鄰保僉供素
有瘋疾之處此等外吏文具相沿竟成錮疾
殊不知此等重犯不行盡法嚴懲而徒以瘋
顛故套欲使罪歸一人易於結案以致逆惡

之徒不知儆懼其貽害於風俗人心何所底止著傳諭該督撫務將該犯嚴行審究並有無別樣逆跡及同謀夥黨之人均一一根查盡法律擬以昭炯戒○又諭曰觀音保奏遵化州刁民因借倉糧率衆闕堂現在分頭查拏俟訊明為首主使及黨惡各犯另行通詳律擬一摺上年因直屬窪地曾被秋潦降旨加恩撫卹前後截漕七十萬發帑一百六十萬展賑直至今年四月而借給籽種緩徵錢糧且破例徧逮五分災及不成災之地籌畫不遺餘力猶恐有司奉行不能盡善屢諭該督等實力董率察勘俾災民不致失所凡屬編氓苟有人心自當循理安分順受恩施即因災重事繁州縣官經理偶有未協亦當赴該管上司聲明飭辦豈有藉借糧之名糾衆闕堂推案擠柵肆行無忌且摺內所稱蜜戶莊頭家人皆內府所轄如此不法橫行憲典安在為大吏者遇此等抗頑重案一獲要犯

訊明情由即當一面通諭衆人以歲事不齊乃閭閻氣數偶絀國家如此沛澤頻仍至再至三若等即有委曲何難據情控籲至一經闕堂開署即屬不逞之尤渠魁法在必行脅從並不滋蔓使小民無不洞悉一面從權請出王命將為首數犯立行正法既可示懲一儆百之義且兇徒不致稍稽顯戮庶為允協著傳諭觀音保星速遵諭妥辦其應治罪者不得因循延案應貸者亦不得輟轉株連總在法信知懲毋庸通詳具題轉致有乖事體亦不必俟方觀承審鞫定擬將此並諭該督知之○禮部議准四川學政博卿額奏稱歲科試提調官有彌封試卷闕防內外之責嗣後遇學政戚族知府改委同知通判直隸州改委所屬知縣從之○是月直隸總督方觀承奏滿營綠營兵於上年七月因災借給米應於本年四季分扣除春季扣繳外現在米價昂貴懇恩寬至秋收後扣還報聞○陝西

巡撫鄂弼奏耀州城身為漆沮二水汕刷節
次將城身那進一二十丈水勢仍逼應先辦
河道以固城根擬於沮水分流處築石隄一
道於城西北因舊石岸築滾壩三道西南築
石隄一道東北築石滾壩二坐東南築長隄
一道石滾壩二坐均用溪中亂石費少基固
俟數年後河徙淤高再議修得旨所議甚是
○四川布政使吳士端奏臣於莊學和濫捐
濫罰王訓狎邪蕩檢不能早覺又不能駁正
問官疎漏實深愧悚得旨覽一切不認真爾
川省故習也何怪於汝將此旨與開泰看○
廣西布政使顧濟美奏臣審理王訓一案錯
誤應議恩免更深愧悚得旨覽巧宦之習終
不改亦何用

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十三

大清高宗法天隆運至誠先覺體元立極敷文奮武孝慈神聖純皇帝實錄卷之六百八十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級通帶加一級尋常加二級軍功紀錄一次臣等謹

總裁官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲黃旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

敘修

乾隆二十八年癸未夏四月戊子朔享

太廟遣誠親王允祕恭代行禮 諭曰梁國治現在出差表曰修著署理吏部侍郎俟赴勘水利回時即在部辦事 諭軍機大臣等昨據宋邦綏查奏逆犯劉三元一案已有旨諭該督撫嚴審定擬具奏今愛必達奏摺內照鈔逆詞一紙現已銷燬不存第此等逆詞照鈔呈覽尚自不妨而外省習氣無論事理輕重動輒假手胥吏其中支離詞句或致轉相傳播徒駭觀聽且非辦事慎密之道著傳諭

該督遇有此等案件即將原詞進呈不必再行鈔錄徒使傳聞惑聽以致別生枝節該督處如尚有鈔存劉三元逆詞底稿亦著即行燬滅 又諭據鐘音等奏叅革副將哈尚德應賠倒斃羊隻尚欠銀一萬二千九十餘兩將伊枷號嚴催至五年之久又分釐未完請交部嚴審一併行查原籍照例辦理等語哈尚德屢經獲罪朕加恩寬宥用至總兵伊又以婪贓革職仍賞給副將職銜効力乃解送羊隻全不經意照管至倒斃一萬五千餘隻之多即應重治其罪朕尚恐購辦官員以疲瘦充數致有屈抑特命黃廷桂行查據奏此項羊隻俱係伊揀選收領始令革職枷號賠補力不能完即久遠枷號亦所應得今鐘音等奏請解部審理不思解部之後該部又將加之刑訊耶若訊無欺隱情節即將伊正法耶此特欲設法送回大概出鐘音之意鐘音歷任巡撫凡事苟且因循乃駐劄巴里坤以

來一味沽名。今又徇庇哈尚德。濫行具奏。甚屬不合。溫敏隨同附和。亦屬非是。著將哈尚德未完銀一萬二千九十餘兩。令鐘音賠補八千兩。溫敏賠補二千兩。其二千餘兩。仍令哈尚德賠補。○是日起。

上以常零祀

天於

園丘齋戒三日。○己丑諭軍機大臣等。鐘音奏現在巴里坤所餘火藥二萬四千餘觔。據提

督五福咨明。楊應琚定議駐防巴里坤中左右三營。應行豫備三年火藥。即於巴里坤現存火藥內支取。已將所有火藥全交五福。以備兵丁操演之用等語。從前既據楊應琚遵照部文議定。即將此項火藥存貯巴里坤備用。而鐘音又云全交五福。以備兵丁操演。所奏殊未明晰。邊疆要地。儲備火藥。自應充裕。此項火藥。既供操演之用。又將何項以為儲備耶。著傳諭楊應琚等查明據實具奏。再巴

里坤現在移駐提督需用火藥較多。其附近地方有無出產硝磺足資採用之處。該督等可彼此咨商。廣為查勘。如能就近採辦。亦可省內地輓運之繁。著一併傳諭該督撫知之。尋奏儲備火藥操演動用後。仍需補貯。巴里坤應貯三年火藥。現在庫貯足數。哈密存火藥甚多。又可隨用隨補。是以臣楊應琚議將巴里坤現存火藥備用。臣鐘音臣溫敏奏明全交五福備操。但動用缺數。例應遞年補額。查安西玉門縣屬牛尾山產有硝磺。已經開採。試鍊工本外。加以運費。較之運自肅州邊外尚有節省。應責成地方官募商採辦。資用報聞。○又諭曰。方觀承奏查出宣化碧天寺邪教一案。所有鈔謄逆詞之曹生泰。已咨山西緝拏解直等語。曹生泰傳鈔逆詞。係此案要犯。著傳諭明德遴委幹員。速即查拏解往宣化交兆惠等嚴行審究。其該犯家中有無存貯悖逆字蹟。一併嚴行搜查。不得稍有疎

忽○軍機大臣等議准據伊犁將軍明瑞等奏稱挈眷駐防之索倫察哈爾兵到伊犁日即將乘騎馬駝給為產業索倫距伊犁尤遠其兵丁抵烏里雅蘇臺時疲乏馬駝應行更換從之○庚寅

上詣

南郊齋宮齋宿○諭曰阿桂現在出差其工部尚書事務著舒赫德暫署○辛卯常雩祀天於

園丘

上親詣行禮○詣暢春園問

皇太后安○辛圓明園○壬辰諭軍機大臣等常鈞奏請動款修理蘭州城工一摺城垣關係省會歲久傾頽理應及時修葺以資鞏固所請各款亦應准酌量動支應用惟監辦工程則須得妥幹道府大員實心經理務使事歸實用帑不虛糜方為允協至摺內所奏西巡經費一款此事並未傳旨豫備特係該省

懸揣之詞固不應列之經費又豈可形諸奏章現在修城一事該撫駐在會城正可隨時自往察勘俾官吏不稍有浮冒可耳若徒恃該部覈銷又馬保工員估報時不已豫留地步耶著傳諭常鈞此案即令其自行確覈妥辦總屬公項銀兩不必分晰名色繕本具奏咨部存案○緩徵浙江仁和長興德清會稽諸暨餘姚上虞等七縣湖州所乾隆二十六年二十七年分水災額賦有差○加賑浙江

錢塘仁和海寧餘杭烏程歸安長興德清武康安吉蕭山諸暨餘姚上虞等十四州縣仁和錢清金山等三場乾隆二十七年分水災飢民○癸巳諭軍機大臣等據觀音保奏審辦遵化州刁民借糧開堂一案辦理殊屬錯謬朱履泰翟三吳大瞎子三犯起意指使固屬此案罪魁其張九思等五十四人俱屬脅從予以滿杖發落亦足示懲惟崔四王相李五王存仁劉萬斗五犯皆係捧碎公案拆磚

砌門夥黨其刁頑充橫情節與朱履泰等無異自應一併正法使無知之徒知所懲儆若僅擬以監候遲至數月始行縲首市曹為時既久附近村愚或轉忘其獲罪之由而無悚惕畏懼動色相戒之意且以此等大案而觀音保於審鞠時並未加以刑訊可見其一味姑息全不識事理之輕重若如此姑息恐將來直隸復有如此事也著傳諭方觀承令其速遴幹練大員將崔四等五犯一併即行正法以昭炯戒至誇喀等既在鄉散賑一聞闕堂情事即馳回州署一面據實稟報一面將各犯拘拏並無應行叅處之咎從前因外省刁民滋事曾降諭旨所有地方各官實有釀成事端應行叅處者尚令無庸於本案驟登白簡以長刁風况誇喀等於此案並無辦理不善之處乎至署遊擊伊桑阿身係滿洲且為駐防武職大員遇此等肆橫刁民既已帶領千把兵丁前赴州署即應將闕關之犯立

時擒拏縱因此格鬪致傷數人亦不為過乃反諭令俟該州公回借給糧石為此婉轉調停之語致令該犯等闕堂砌署毫無忌憚朕令滿洲補用綠營者原欲其遇事勇往不染外省習氣乃竟怯懦無能至此又非僅叅奏交部所可蔽辜者著方觀承將伊桑阿即行革職拏解來京交軍機大臣審擬治罪此案仍照前旨即行完結不必題咨立案 又諭曰馮鈐奏粵西幹盧二廠開採年久出鉛漸少請令湖南仍買黔鉛不必赴粵西購運至粵東一省需鉛無幾仍令赴買一摺各省鼓鑄錢文並需鉛觔應用該撫雖因該省廠鉛稀少奏停湖南採買而以同一總督所轄之廣東則又仍聽購運未免意存畛域所奏殊未允協且摺內稱將楚南二十八年所需白鉛二十萬觔停其買運是湖南需鉛即在本年此時諒已委員赴粵又豈可聽其徒手而回致誤該省鼓鑄耶著傳諭馮鈐與陳宏謀

彼此會商通融籌辦將現在所存廠鉛酌量配給務令兩省鑄局均無貽誤至幹盧二廠現在出產無多或可於該廠之外再為相度設法開採使鉛觔益加充裕更為妥協並將此傳諭陳宏謀知之○山東巡撫阿爾泰奏查勘章邱新城所引明水泉及烏龍河水僅資已墾之田而荒地應併籌辦查有珠龍河一道挑鄭潢溝引水計墾稻田百頃餘引高苑縣大湖之水入小清乾河計墾稻田二頃餘博興稻田除引小清河水開墾外蒲姑城西築塍開壩引祁家漏水計墾稻田五十餘頃壽光縣濰縣窪地尚多挑溝建閘計墾稻田十四頃餘堯丹河入白狼河水口處添閘開放足資壽濰兩邑灌溉濰縣南北臺底引大小于河水計墾稻田二十八頃又青州府屬之淄河萊州府屬之膠萊等河為兩郡河渠關鍵河流湍曲處開引河以分水勢福民落樂五龍白狼等河支脈等溝及登州府境

內潁門南樂沁水沙河等河俱挑淺培隄無虞漫溢得旨覽奏諸凡留心殊可嘉也○豁免江蘇常熟丹徒二縣乾隆十五年至二十四年分坍荒田地灘蕩民欠銀四千二百八十兩有奇米麥豆七千八百八十七石有奇○甲午

上詣暢春園問

皇太后安○諭涼莊滿兵二千二百餘戶現今移駐伊犁涼莊雖屬內地無可守禦之處但

該處係西陲通衢且城垣房屋建立未久若因官兵移駐伊犁將城垣房屋空閒必致倒塌即行人往來亦不足以肅觀瞻西安官兵駐防年久生齒日繁若將西安官兵內酌量移往涼莊居住則現有之城垣房屋既不至空廢於西安兵丁生計亦大有裨益可將西安滿兵內撥二千名移駐涼莊兵數既已無多毋庸設立將軍涼州留副都統一員莊浪設城守尉一員以資管轄其如何移駐之處

著交楊應琚嵩椿定議具奏○乙未諭軍機大臣等湯聘奏審訊羅奮鵬假官誣騙一案內有二十六年十一月內該犯捏名歐陽璋假冒捐納同知在揚州拜謁軍廳解韜以辦差未會等語南巡乃二十七年之事該督等身親辦理又沿路隨從記憶自必甚真豈有隔歲之前地方官紛紛遠出辦差之理且解韜等身為地方官即令公出其署中有此等匪徒款謁豈得竟云毫無見聞著傳諭尹繼善即行逐細詳查是否該犯捏詞並解韜果否外出及因何託言辦差情事一一據實具奏尋奏查據解韜供稱上年冬間並無歐陽璋來拜亦不識羅奮鵬為何人是年十一月奉委邵伯鎮散賑並非辦理差務等語羅奮鵬前供均屬虛捏報聞○又諭據湯聘奏湖北通山縣知縣協同江西武寧縣差役拏獲假官誣騙之羅奮鵬一摺此等匪徒假冒職官在各省輾轉生事通山縣知縣以隣省差

捕之案能留心蹤蹟上緊協拏不使匪徒免脫有司皆能如此急公奮勉地方何憂不靖該縣可謂能事著傳諭該督撫即將該員平日居官如何出具考語送部引見○又諭曰湯聘奏審訊羅奮鵬假官撞騙一案內有二十七年三月內到杭州詭名李春觀假充捐納知府往拜同鄉處州營遊擊曾節基在杭承辦馬差未會等語朕去歲南巡浙省並無應辦馬匹此係該犯信口捏供抑或其中別有情節著傳諭熊學鵬詳悉查明據實具奏尋奏訊據曾節基供上年委辦陸操帳房等項並非馬差所有羅奮鵬詭名李春觀實未認識其人等語臣查辦差舊案有扈從官員乘騎及塘站二項馬匹俱委員承辦未派曾節基該員差竣回營亦無別項情節報聞○福建巡撫定長疏報侯官古田屏南永福南安浦城霞浦福安漳平龍巖福清莆田同安南靖寧德惠安長汀鳳山彰化淡防等二十

廳州縣乾隆二十六年分勸墾田地山園七十五頃二十八畝有奇鳳山縣勸墾官莊田園二甲九分有奇○豁除福建南安建安鳳山等三縣水衝田園地三十四畝有奇淡防廳無徵田園三百十九甲有奇額賦○蠲緩長蘆屬滄州南皮慶雲鹽山青縣海豐衡水等七州縣嚴鎮海豐濟民蘆臺豐財興國富國等七場竈地竈丁乾隆二十七年分水災額賦有差並予賑卹○丁酉諭前經降旨於

五城內外增設煮賑各廠並於例賑之外加展以至四月第念此時雖屆清和而麥收尚在有待著加恩再行展賑一月俾貧民得資餬口以示軫恤○定職官犯罪脫逃治罪例諭昨閱部本議處瑞昌縣知縣劉景福聲敘疎縱叅革千總朱振清脫逃事由因勅查原叅治罪本案則該弁始以侵用旗丁銀米繼復畏罪潛逃情罪甚屬可惡而刑部僅引平民犯罪脫逃例於本罪加等定案又復援赦

減徒執法殊未明允職官與常人地分迴殊常人因逃加等示懲於法已足若既身叨一命即不得藉口不知功令其愧懼當萬倍常人即有大戾亦惟束身歸罪而已乃竟悍然竄蹟行如鬼域藐視刑章若不分別差等俾共知儆惕則君子懷刑之義何在且既為職官自不當與常人一例看守是易致脫逃而教人犯法也此案朱振清著拏交刑部另行治罪嗣後職官犯罪脫逃應如何準情定律

比照平民加重治罪之處該部詳晰定議具奏尋奏律載犯罪事發在逃者加逃罪二等官吏杖一百所避事重者各從重論嗣後職官員罪脫逃除罪應斬決絞決者毋庸議外斬候絞候改斬決絞決軍流改絞候徒改軍杖答改杖一百徒三年朱振清拏解到日即照此例辦理從之○諭軍機大臣等永貴等奏拏穆齊圖等向霍罕額爾德尼索還所侵阿濟比之鄂斯等處額爾德尼即遵約付還

等語永貴伊勒圖辦理妥協著加恩交部議敘員外郎訖穆齊圖侍衛龔庫納亦著議敘同往之伯克阿布都喇伊木著酌量獎賞緞疋○又諭曰永貴等奏稱聞得愛烏罕遣賽特伯克來霍罕問額爾德尼內附情事額爾德尼亦遣使往報不無可疑當留心訪察詢問等語額爾德尼係外藩新附之人不知內地法度且鄰邦通使亦伊等來往之常無庸深究果有結連愛烏罕窺伺回部情形必難

掩覆原可直截辦理此時豫為意料於事無益著傳諭永貴知之○又諭據明德奏宣化邪教案內人犯曹生泰於乾隆四年前赴直隸張家口外華山廟出家未曾回籍一摺該犯既不在介休本籍宣化離口甚近著即傳諭兆惠錢汝誠方觀承速委幹員就近嚴密查拏毋令聞風兔脫摺著鈔寄閱看○軍機大臣等覆奏詢各廠監糶大臣據稱原撥豆五萬石除糶去外尚存一萬六千餘石官員

承買者陸續出倉市價亦漸平減等語查本年豫東奉天等處採運豆四十餘萬石計本年二月至來年三月各項支放所餘尚可存十三萬石請交戶部酌撥存廠備糶得旨現在存倉黑豆計各項備用外為數甚屬充裕著該部即於存貯豆石內每城分撥八千石以資各廠平糶接濟之用○吏部議准吉林將軍恒祿奏稱吉林地方向設理事同知一員通判一員凡旗民案件俱係同知辦理通

判既無專司事務應裁銜署作為漫局從之○禮部議准安徽巡撫託庸奏稱桐城縣明故卒實成當流寇圍桐時被執脅以賺城至城下畢吐賊情賊支解之桐邑得免請從祀忠義祠從之○江西巡撫湯聘疏報乾隆二十六年分南昌新建靖安萍鄉清江蓮花廬陵萬安鉛山鄱陽等十廳縣勸墾老荒續荒新生田地塘十一項二十四畝有奇○喀什噶爾辦事尚書都統永貴等奏薩爾瑞修建

新城工竣後將舊城官房拆卸並回人捐備木料造官房七百餘間報聞○戊戌

上詣暢春園問

皇太后安○諭據知貢舉程景伊奏此次會試外簾官內有年老抱病難於勝任者派員幫辦尚未貽誤嗣後請令各該堂官於開送時將老疾者驗明扣除等語所奏亦是昨經侍郎錢汝誠奏請將外簾執事各官通行開列請點其意原以均勞逸而杜規避是以降旨

准行乃各衙門堂官並未詳加甄選輒將衰疾之員一概闢入致場內另派幫辦殊失慎重之道且以如此易辦事件各該堂官率畧乃爾則其平日遇事不克周詳盡力可知著傳旨通行申飭向來鄉會試開送執事各官以內簾衡文取士視為榮選而畏外簾之易干議處每多却慮此固各官不以公務為急惟以已利自圖然同一承辦科場而使執事之員妄生趨避不若豫定章程免致臨時遷

就嗣後應按外簾應用人數及各衙門員數多寡分別定額足數點用著該部詳悉定議具奏至開送時該堂官等務宜公同驗看不得視為具文僅一二人畫稿行文遂為了事其科場處分舊例皆從嚴密者蓋因內簾去取攸關自不得不嚴設科條以防弊竇若外簾之受卷彌封謄錄對讀等官原無校閱之責即有無心過犯致干吏議者不過失察疎忽舊例所定動致降革原亦未免過重其外簾如何準酌平允寬嚴適中之處並著該部逐一分別另行定議具奏載入條例永遠遵守尋奏嗣後順天鄉試外簾官內閣開送四員吏禮兵工四部各開送四員戶刑二部各開送六員宗人府翰林院詹事府都察院大理寺通政司太僕寺中書科各開送一員如無合例之員行文國子監指定員數開送會試外簾官除中書監丞等應試不開送外吏兵工三部各開送三員戶刑二部各開送八

員院寺等衙門臨期通融開列五員共足三十員之數請派十八員足數點用至舊例處分過重自應酌減凡換卷聯號等弊其字蹟可疑未察出者所官改照失察例降一級留任應貼不貼與不應貼而貼者受卷官改照失於查察例罰俸一年謄錄生改試卷謄錄對讀官不能查明者及謄錄草率錯落謄錄對讀官未經察出者俱改照疎忽例罰俸三個月對讀生私攜墨筆責在搜檢籍貫偶誤受卷官無冊可憑原有處分二條應刪餘仍照向例辦理從之○諭軍機大臣等工部議覆楊廷璋等奏銷南巡動用款項一本因該督等籠統開報未將應用各項詳細聲明駁令據實刪減現已明降諭旨加恩准其奏銷矣此係出自朕之特恩不可視為常例奏銷銀款原宜慎重例係將前後動用各款暨物料尺寸細數逐一分晰造報該部方可據以察覈若但籠統開銷何以信其並無浮冒且

奏銷時既可籠統則動用時必不能加意撙節此在督撫大臣可保其必無染指司道大員受恩簡用即不致因辦理差務混冒肥橐而其往來食用或不免借端取給至於承辦之佐雜等官藉此含糊弊混以為冒銷之地更勢所必有若以從前尹繼善奏銷江南辦差銀兩既降旨准銷今楊廷璋此本又得一例降旨將來遂至視為故事並不按照成例詳晰造冊仍前籠統開報以致不肖官吏得以從中取事一經察出則惟該督撫是問朕巡省所至凡行宮豫備等項已屢經詳諭該督撫等一切務從簡樸從前三次辦理已不免踵事增華儻將來彼此效尤日甚一日何所底止且如朕在京及圓明園每日視事之所雖細如頂格糊飾之類不過隨時黏補不求一律鮮華此亦廷臣所共知若以偶然駐頓之地當上居已經整葺即小有滲剝不過畧加補苴便已妥協何必更增繁費前此地

方官知朕絲毫不肯累民動以商捐藉口殊不知官取給於商而商人所捐孰非民間所給該督撫惟應實力約省凡有需用只許支取例給之項及前此賞用所餘據實冊報查覈其商捐一節著永行禁止又扈從官員並已給船乘載何須豫備公館在扈蹕大臣等朝夕侍直該班既不能四出居停其各衙門官員差使稍緩者即泊舟稍遠亦無難從容退食乃有司等輒以此為名致不肖胥役保

甲等占貼民房勒索滋弊此風斷不可長亦著嚴飭禁止毋得稍為寬假或大臣官員等自需住宿則聽其出貲僦賃不許地方代為購覓以杜擾累此後公館一事亦竟宜停止○戶部議准直隸總督方觀承疏稱東河冷口擦崖子榆木頭青山口龍井關桃林口界嶺口義院口大毛山龍鬚門了頭溝寬城站八溝十三汛旗地額徵糧銀向係四旗通判經徵路遠徵納不便請改歸八溝同知就近

徵收從之○旌表守正捐軀之直隸武清縣民胡玉良女胡氏○己亥

上御勤政殿聽政○諭京師自三月以來間得微雨未能普徧麥田望澤甚殷朕心深為軫念宜申虔禱期沛甘霖著禮部即查照定例敬謹舉行○諭軍機大臣等上年因直隸近京窪地秋霖過多一切平糶借種常平倉穀應行採買補額者頗多現在麥田未得透雨應多方先事豫籌以資儲撥之用奉天山東

河南三省收成俱屬豐稔米石必當饒裕著傳諭該將軍府尹及該撫等奉天購辦米四十萬石山東河南每處各購辦米二十萬石各就本處糧價酌量覈定先行知會方觀承通融計算直隸糧價自屬寬餘除抵給該處市值之外兼可協濟運腳挹注尤為便利所有委員彼此遞運接收事宜俱特派大員並彼此移咨妥協經理仍將所派之員即行奏聞迅速辦理○又諭現在直屬望雨甚殷一

切賑務均須董率經理方觀承為本省大員必當身親督辦於地方尤為有益且近因糧價稍昂已降旨令奉天山東河南三省購買米八十萬石運赴直隸接濟亦須該督豫為籌畫儲撥至審訊宣化邪教一案現有兆惠等專司審鞫且口北道王神保近在同城遇有應交事件儘足以資調遣方觀承著即來京候朕面降諭旨即速前往應行查勘地方專心辦理所有宣化審案方觀承係首發承審之人此後摺奏仍著一體列銜○庚子諭軍機大臣等據兆惠等奏查審宣化邪教案內之曹生泰現未拏獲應將已獲各犯先行治罪一摺此案現獲之犯既據查審明確自應按律定擬先行完結其曹生泰一犯書寫經符筆蹟顯然將來拏獲到案自可續行完結兆惠等不必因該犯未就弋獲在宣久候著將李繼印各犯辦理完後即行馳驛回京至曹生泰雖係遊方靡定察其情形諒亦不

過邊口內外匿蹟潛蹤著傳諭方觀承明德等遴委幹員會同該地方官上緊躡緝拏獲之日即解軍機處查審定罪○辛丑

上詣暢春園問

皇太后安○諭吏部議處疏消積水遲延之天津府同知程健等革職一本地方遇有積水不能即時設法疏濬致妨農業有司自應予以處分但此案辦理不善即方觀承等均難辭咎不獨該員等因循貽誤所致且伊等籌

一書錄卷六八五

七

辦遲延尚非出於有心與御史永安等所叅武清縣知縣黃良棟等縱役累民者有間若概予革職恐各該員現有承辦地方事件一時盡易生手於公務轉無裨益著將伊等居官如何之處詢問方觀承如平日辦事奮勉尚堪造就者即加恩准予從寬革職留任若才具本屬平庸不過循分自守即照部議革職○予故輔國公衮楚克扎布祭如例○壬寅欽差協辦大學士尚書兆惠等奏曹生泰

已於山西天鎮縣拏獲。據供聞拏投首途中。即被盤獲。質之捕役。亦云路遇。自說姓曹。並未諱飾各等語。臣等察其詞色。似屬實情。報聞。

實錄卷六百四

五

大清高宗法天隆運至誠先覺體元立極敷文奮武孝慈神聖純皇帝實錄卷之六百八十四

大清高宗法天隆運至誠先覺體元立極敷文奮武孝慈神聖純皇帝實錄卷之六百八十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書總纂修滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆二十八年癸未四月癸卯

上詣黑龍潭祈雨。○諭直隸被災各屬設厰煮賑。現在例應停止。第念時屆清和。麥田現在望雨。昨京城內外賑厰已降旨加賑。其近京各屬並著再行加恩接展。均動支公帑辦理。俟甘霖普降後再行停止。以示優卹。該部遵諭速行。○又諭近遵化州民人聚集知州衙門肆行該署遊擊伊桑阿並未帶兵擒拏。經朕降旨令拏解來京交軍機大臣明白審擬治罪。今據方觀承奏伊桑阿畏罪自縊身死。

從前以滿洲補用綠營因其騎射好遇事奮勉原令伊等整頓綠營庸劣之習乃伊桑阿身係滿洲世僕且為汛守地方武員於此等匪民肆行即當帶領兵丁嚴行拏獲即偶因拒捕致傷雖非陣亡可比朕亦必念其因公身殞格外加恩似此畏懼自縊究屬一死若奮勇擒拏匪民尚在死與不死之間即使被傷較之如此死者豈不為榮乎滿洲世僕內又豈應有此等庸劣之人乎此風甚陋著通行曉諭各省綠旗滿洲官員嗣後凡一切事務惟勇往奮勉以漸復滿洲舊習痛戒懦弱怯懼之風○軍機大臣等奏講官侍班向來惟御門聽政時開列名單不容更換其餘班次並無一定章程嗣後應照官銜輪派如有託故推諉即行指叅報聞○江蘇巡撫莊有恭奏京口駐防漢軍兵出旗為民情願食糧者就近勻派充伍所需住房請於官田變價充公項內動支建造得旨允行 河南巡撫

葉存仁覆奏豫省購礦向在山西價值運費較湖南更輕毋庸赴楚採買至產硝之地向設官店稽查以供各省採辦從無貽誤本屬無弊不能照湖南礦廠辦理得旨允行 甲辰孝端文皇后忌辰遣官祭

昭陵 旌表守正捐軀之安徽無為州民朱有福妻周氏河南滑縣民張白奇女張氏○乙巳諭昨日因直隸被災各屬煮賑將屆期滿降旨再行接展俟甘霖普降後停止今已得透雨地方官若遵照此旨此時即應停賑非所以承

天惠而厘民依也其概行展賑半月庶田功力作者漸次可以就食而麥秋亦屆矣該部遵諭速行○諭軍機大臣等京師於四月十七八等日甘霖霑沛麥禾及時長發看來同雲彌望被澤甚為溥徧前明德奏山西太原汾州及省北一帶正在望雨直隸晉省地屬接壤不知旬日內該省曾否均霑並能深透否

若未霑足。將成旱災。否其一切綢繆。亦曾豫計。否著傳諭明德。即速查明據實奏聞。尋奏太原。汾州。平陽。平定四府州。及省北大朔。寧三府。歸化城各廳。於四月十六。十七兩日。得雨深透。二麥有益。秋田亦得及時播種。得旨欣慰覽之。○兵部等部議准。河東河道總督張師載疏。稱隄工平險。今昔不同。汛防宜隨時更調。請將河南榮鄭汛把總調駐中年。仍為榮鄭陽中把總。中年汛協防把總。調駐榮鄭。改為榮鄭協防把總。祥符汛千總。調駐陳蘭。改為祥陳蘭千總。蘭陽汛協防。調駐祥符下汛。改為祥符下汛協防把總。虞城下汛千總。調駐商邱。仍為考商虞千總。商邱協防。調駐虞城下汛。改為虞城下汛協防把總。武榮汛千總。調駐陳蘭。改為陳蘭北汛千總。陳蘭北汛協防把總。調駐武榮。改為武榮汛協防把總。山東曹單千總。調駐曹縣上汛。仍為曹單千總。曹縣上汛協防把總。調駐曹縣中汛。

改為曹縣中汛協防。應換劄付。分別給發。從之。○又議覆山西巡撫明德奏。稱疎脫遣犯兼轄文員。既有處分。請定兼轄武職處分等語。應如所請。要犯脫逃。兼轄武職。降一級留任。限一年緝獲。不獲照所降級調用。疎脫二次者。降二級調用。從之。○刑部等部議准。湖南巡撫陳宏謀奏。稱軍流在配。脫逃無查取親鄰供結之例。嗣後原籍地方官。於咨緝到日。取該犯親族鄰保供結。加具印結。咨部及配所存案。仍令保鄰等隨時偵報。知而不首者。照知情藏匿罪人律辦理。親屬照保鄰例。不得援得相容隱之條。他處知情容留者。罪同其率行加結。官自行緝獲者。免議。失於查拏者。降二級調用。他處地方官。不能查出者。罰俸六個月。從之。○補行乾隆二十七年軍政京營卓異官二員。罷軟官一員。年老官二員。有疾官一員。才力不及官一員。江西卓異官二員。有疾官一員。才力不及官一員。浮躁

官一員湖北年老官一員湖南卓異官五員
山西卓異官十員罷軟官四員年老官四員
有疾官二員才力不及官四員廣東卓異官
四員年老官一員有疾官一員才力不及官
一員分別議叙處分如例○丙午

上詣暢春園問

皇太后安○山東巡撫阿爾泰奏遵旨辦米運
直已飭沿河州縣並青萊各屬米價稍平之
處購備起運如有不敷酌動倉穀開明米價

或需豆石定於何處交收咨方觀承商辦其
發價購買雇舟撥運委布政司崔應階總理
遞運接收委糧道商思敏經管仍飭各該管
道府妥速辦理得旨嘉獎○鑄給奉天錦州
屬梨樹溝明水塘清河白土廠四處邊口章
京圖記從副都統恩丕請也○丁未改鑄直
隸提督總兵官印從提督色克慎請也○命
大學士來保劉統勲兵部尚書劉綸左都御
史彭啟豐兵部右侍郎託恩多刑部右侍郎

蔡鴻業禮部右侍郎雙慶內閣學士寶光鼎
為殿試讀卷官○旌表守正捐軀之直隸吳
橋縣民張道賢妻陳氏河南內鄉縣民戴雙
玉妹戴氏○戊申策試天下貢士孫效曾等
一百八十七人於太和殿前制曰朕祇荷

天

祖鴻庥光纘丕緒地大物博際盛思艱上理勤
求永懷考贊深惟心源治蹟道在交修物力
民庸功靳攸濟爾多士資言成信亮所稔聞
尚殫矢陳用酬延竚聖學之傳首崇心性虞
書十六字尚矣大學言心不言性而朱子序
大學言性獨詳中庸言性不言心而朱子序
中庸言心獨詳將非交引互發義即偏而不
舉歟性者心之神明心者性之郭郭是言性
足以統心而道心與人心何以判義理之性
與氣質之性何以歧張載曰氣質之性君子
有弗性者焉然自孟子以性善闢百氏之說
而性惡三品後儒猶事紛呶豈子輿力挽狂

瀾意嚴矯枉雖尼山相近相遠之訓不可以語中人以下歟史有二體紀傳法尚書編年法春秋朱子本司馬光資治通鑑之舊大書分註約為綱目囊括一千三百餘年史事為編年正軌足便覽觀厥後薛應旂有續通鑑商輅有宋元續綱目能不失二書初指否明通鑑纂要本出自官輯與顧錫疇王世貞陳仁錫輩取備兔園冊子不同而隸事詳畧亦未完善已命館臣釐次分進幾暇手批評隲

凡前史義例未安必往復刊定勒為輯覽一編嘉惠來許有志三長之學者夙習發明書法考異集覽諸家之言能研覈折衷而切指其利病否糴糴蓋昉乎古質劑致民遺意考其委積所在若鄉里門閭郊里野鄙縣都厥用曷分後此三倉建置相仍在官在民孰為便利唐之和糴宋之寄糴祿糴等名一切權宜取濟而法隨人弊其戾於前規者安在國家昇平康阜暘雨應時第一隅歉獲偶聞動

需挹注常平社穀所貯既命所司以時貸撥近復出太倉以平市值截漕艘以支給賑且採運奉天豫東羨粟以廣灌輸擘畫不遺餘計然自竅困充牣而或大賈居奇駟牙登壘因緣蠹耗檢舉難周矧事由補救一時非可援為經制則所謂求裕民足食之本策果奚先溝洫所以備水旱時蓄洩也大禹決川距海必兼濬畎距川未聞以墳壤塗泥異制暨周官遂人則捐膏腴匠人則治溝洫且多於

賦意至深遠近世言水猥詳於南而畧於北詎不以南居澤國北處中原又積滯鮮逢歟不知水無所坊旱無所瀦高原之患勢均澤國前者中州山左工已遞興比因畿輔秋霖餘潦濱河下隰之區節宣未嘗屢遣大臣蒞事疏導庶幾消閑遏而利畊毗顧渚津猶可洩尾閭而淀沽或難迴釜底捍田棄地何道之從夫溯鄒嶧之聖涯披唐虞之治境四輔羸而野多秉穗百川滌而田不汙萊隆郅之

圖跋予昕夕久矣爾其誦言所學臚著於篇
毋泛毋隱朕親裁擇焉○諭前據愛必達宗
邦綏先後奏到湖北恩施縣拏獲逆犯劉三
元一案劉三元假託夢話敢行狂悖自應照
大逆律嚴行定擬其家屬人等亦律應緣坐
以彰國憲今據陳宏謀奏已將該犯原籍住
居應行緣坐之弟兄劉先陞劉先選劉先銓
及其兄弟之子劉兆卿等解赴武昌聽候審
訊等語但查閱劉先陞等供詞與劉三元分
居已十有餘年該犯又久經外出其在湖北
書寫逆詞劉先陞等遠隔原籍實不知情伊
等家內亦並無悖逆字蹟皆屬安分務農之
人若俱照律緣坐情殊可憫且該犯喪心病
狂之語託諸夢囈其瘋癲似非盡由捏飾與
有心肆造逆詞者尚屬有間今已罪坐本犯
亦足以昭炯戒所有應行緣坐之劉先陞等
俱著加恩免其緣坐概予省釋○諭軍機大
臣等據陳宏謀奏拏獲逆犯劉三元原籍弟

兄等咨解本省查審一摺已明降諭旨加恩
免其緣坐劉三元書寫逆詞敢行狂悖自屬
法無可貸但其致犯之由託諸夢囈語句不
倫瘋癲似非盡由偽飾且其弟兄劉先陞等
分居既久遠在湖南家中並無悖逆字蹟實
屬安分務農之人是以特為寬宥恐各省督
撫等因有此旨將來遇此等案件即捏造瘋
癲希圖開脫俾實在悖逆重犯雖至敗露不
過罪止一身而應緣坐之人俱得倖逃法網
則非所以彰國憲而正人心矣若覈其形蹟
果不干涉與此案情節相似者原可據實奏
聞候朕酌奪該督撫等斷不得豫存成見遷
就了事可將此傳諭各督撫知之○又諭曰
明瑞等奏稱葉爾羌應徹之索倫兵若於八
九月起程自當在伊犁過冬或夏令即已過
行則度庫克訥克嶺由珠勒都斯一路經過
烏嚕木齊至烏里雅蘇臺回抵游牧已行文
新柱海明旌額理等語各回城徹回索倫察

哈爾兵由伊拉里克至烏魯木齊路多戈壁故皆於伊犁過冬今明瑞等所奏係從阿克蘇以東赫色勒河上游過嶺水草頗饒道路亦近嗣後撤回之索倫察哈爾官兵若值有水草之時自當行走此地即起程稍遲亦不必往伊犁過冬現在各城有積貯糧石隨其所至足資憩息並當取道於此以免紆迴著傳諭明瑞及各駐劄大臣等知之○陝甘總督楊應琚奏烏魯木齊為新疆要區現召募

開墾該處向設副將一缺改總兵添設鎮標中營及城守營合原設左右二營共成四營統聽巴里坤提督節制烏魯木齊以東巴里坤以西之屯種處綠旗兵責成總兵督理巴里坤提督東有哈密沙州西有烏魯木齊居中調度其添設二營之將備千把外委各官即於陝甘二省開僻營分移改得旨允行○以吉林副都統傅良為歸化城都統調鑲黃旗蒙古副都統福珠禮為吉林副都統○已

西諭刑部奏湖北歸州民婦張吳氏犯姦一案供出伊夫張洪舜及伊夫兄張洪貴犯盜監禁其姓名與從前該州知州趙泰交濫刑妄斷案內開釋監犯張紅順等字音相同而後發盜案並未據該省題報前後情事種種可疑請交該督撫另行查審一摺已批示依議速行矣今思此案事隔經年中多疑竇該督撫以至承審各員或有迴護亦未可知若不徹底查究何以清讞牘而雪民冤著派侍

郎阿永阿馳驛前往順道會同河南巡撫葉存仁速赴該省秉公詳悉研訊務得實情覈擬具奏其河南巡撫印務著布政使輔德暫行護理此案審結後葉存仁即由彼處仍回原任不必同阿永阿來京復命○諭軍機大臣等今日刑部奏湖北歸州民婦張吳氏犯姦一案據供伊夫張洪舜及伊夫兄張洪貴因盜案監禁等語查張洪舜等弟兄名姓與從前該州趙泰交濫刑妄斷案內之張紅順

張紅貴字音相同前案審釋未逾數月。如果係良民何以復犯大案且又並未題咨報部。其中情節種種未協請交該督撫逐一查審一摺已批依議速行。仍著該督撫即行摺奏矣。今思此案疑竇多端。若非徹底清查。難分涇渭。特派侍郎阿永阿會同河南巡撫葉存仁前往該省查辦。務得實情。著傳諭愛必達。宋邦綏於阿永阿等未到之前。將此兩案確查。即行詳悉覆奏。此事外間輿論紛紛。一經

欽差查辦。自難絲毫掩飾。愛必達從前不過暫署撫篆。為時未久。宋邦綏更屬新任。皆非經辦此案之人。若從前辦理果係舛錯。不妨據實奏聞。即未能訪聞更正。過非出於有心。尚可不加深責。倘稍存成見。迴護前非。將來審案水落石出。則該督撫取戾更重。朕斷不能為之曲貸也。著將此傳諭知之。○又諭。今日刑部奏湖北歸州民婦吳氏犯姦一案。據供伊夫張洪舜及伊夫兄張洪貴因盜案監

禁等語。查張紅順。張紅貴字音相同。前案審釋未逾數月。如果係良民何以復犯大案。且又並未題咨報部。其中情節種種未協請交該督撫逐一查審一摺已派阿永阿葉存仁前往查辦矣。此案固非高誠任內之事。但伊到任已將一載。豈竟毫無聞見。若從前辦理果係舛錯。何妨告之督撫即予平反。並不妨據實入奏。朕必嘉其能事。乃懸案經年。不讞不結。豈明知此案之非。中多顧慮而模稜取

巧耶。抑漫無覺察。遂爾因循廢事耶。二者必居一於此。著傳諭高誠將此案實在情形專摺密奏。直行己意。不得與督撫相商。如稍存扶同迴護之見。上下聯為一氣。希圖朦混。一經欽差大員審訊確鑿。則是自取罪戾。噬臍無及矣。○又諭。據巡漕御史朱績經奏。天津等處於本月十七八兩日。雖經得雨。尚未敷足。嗣後更得滂沛。大田布種。可以及時等語。昨總兵丑達鹽政達色亦俱奏稱天津得雨

約有二寸。該處情形若何。是否尚需雨澤。其秋禾俱已布種齊全否。著方觀承速行查明。據實具奏。以慰廑念。尋奏天津武清一帶得雨二寸。二麥改觀。秋禾盛發。未種者俱已補種。保定。靜海。香河等處。得雨二寸。及寸許不等。惟津南未得霑渥。得旨覽奏俱悉。○又諭民間米糧交易。向來設立牙行。原以辨物情而權價值。乃駟僮之徒。夤緣投充。肆其壟斷。居奇之弊。糧價轉滋騰踊。閭閻不免貴食之

累。昨召見蘇昌詢及粵東米價。據奏從前市糶昂貴。經督臣楊應琚將米行經紀裁革。通來市價大平等語。但查據戶部。則廣東裁革米行經紀。並未咨部。無憑查覈。著詢問楊應琚。從前粵東米行。果否經該督任內裁汰。及裁汰而未經報部各緣由。逐一詳悉具奏。再方觀承。尹繼善。楊應琚。俱久歷封疆。素稱曉事。所有米糧牙行一項。應否通行酌裁之處。各按地方情形。悉心體察。據實具奏。可一併

傳諭知之。○豁除山東德州。東平。陽信。樂陵。商河。濱州。利津。泗水。城武。觀城。聊城。博平。茌平。臨清。高唐。夏津。東昌。福山。棲霞。寧海等二十州縣衛壑。不成熟地。四十六頃七十七畝。有奇額賦。○庚戌旌表守正捐軀之江蘇儀徵縣民王忞相妻張氏。辛亥

上詣暢春園問

皇太后安。○還宮。○

上御乾清宮。召讀卷官入親閱。定進呈十卷甲

第○諭嗣後殿試進呈十卷。不必豫折彌封。候朕閱定後。再行按名傳齊。帶領引見。○定親老改調近省人員。赴補時引見例。諭向來親老改補近省者。赴補時即照例歸部坐補。原缺得缺後。然後引見。但念該員等在部需次。動輒經年。其材具尋常者。原不妨稍待時日。倘其中或實有出眾之材。坐令淹滯未免可惜。嗣後著照病痊赴補之例。一體帶領引見。候朕酌量降旨分別錄用。又例稱此項人

員內在改補之缺一經卓異即改入陞班免其坐補原缺同一養親而得遇薦剡遂為終南捷徑恐日久漸開夤緣趨避之風將來此等改補近省卓異人員並著該部於引見時將緣由附摺聲明其公當與否自難逃朕洞鑒如此則有用者既可及鋒而試而卓薦者亦可杜干進之門無枉無縱於銓政更為平允著為例○旌表守正捐軀之江蘇甘泉縣民紀尚龍妻許氏○壬子

上御太和殿傳臚賜一甲秦大成沈初韋謙恒三人進士及第二甲董誥等五十五人進士出身三甲魯河等一百三十人同進士出身○幸圓明園○諭查倉特派都統大臣御史原為放米時查察不肖匪徒行私作弊而設乃行之日久所派大臣官員等至期竟有偷安不到者即云本任別有差遣然都統御史中亦必有一員前往蒞事若二人皆不往弊端何由釐剔著通諭派出查倉之都統御史

等嗣後放米之日務須親赴稽查即別有差遣二人中必令一人前往毋許全行曠誤○盛京將軍舍圖肯奉天府府尹耀海等奏承德遼陽海城蓋平鐵嶺錦縣寧遠廣寧義州九州縣粟米價自八錢至一兩四錢不等高粱價自五錢五分至八錢四分不等均可採買運直此項米價及由陸至海運費需銀甚多查將軍衙門存貯備用及地丁等銀不敷購辦請於盛京戶部撥銀二十萬兩仍有不敷應撥何項候旨遵行儻一時不能購足先將奉省旗民倉存米內撥出二十萬石起運秋收買補得旨軍機大臣速議具奏尋奏將軍舍圖肯等請撥庫項購米未免周折現在京畿一帶已得透雨市價平減奉省所辦米石已可不拘四十萬石之數即於旗民倉存米內撥運二十萬石亦足敷用從之○河南巡撫葉存仁奏查豫省常漕各倉儲穀甚多且有乾隆二十六年漕米係例應糶借之項

足撥二十萬石運直。無庸採買。以二十萬石分四運。每運委同知通判州判各一員為總運。佐雜二員分押。河陝道歐陽永禔總辦。運費司庫動支。餘咨方觀承商辦。所需船隻並咨方觀承阿爾泰飭屬備雇。得旨嘉獎。○癸丑諭曰。御史吉夢熊奏劾方觀承玩視民瘼。徇縱天津道那親阿啟開遲延。不能早籌宣洩一摺。此奏方觀承實無從置喙。但前命兆惠等赴勘督辦時。已有旨將該督交部議處。

平集卷之三

三

革職。特因其在直年久。是以從寬留任。則其貽誤之愆。不獨該督難以自文。即朕亦安肯稍為迴護。該御史甫經補缺。即行陳奏。不得謂之無益空言。亦不得謂之事後取巧。至在京科道等員。身膺言責。於封疆大吏。不克早拯民艱。况天津近在畿輔。道路之口。豈竟毫無知覺。乃自去冬以至今春。並不聞有糾彈之舉。而必俟朕巡省時。咨始得刻期濬導耶。是因吉夢熊之奏。而寒蟬之誚。益不能為凡

任言官者解矣。方觀承已經議處。無可再議。摺內所奏那親阿借書吏名色。用輕價承買捐田一節。八旗官員近京置產。原所不禁。但既任本地監司。而圖踞所部之業。則於官方大有關係。那親阿現在尚未起程。著交軍機大臣嚴訊具奏。至所稱訪聞文安大城等縣。因培築長隄。該處胥役鄉老。有至四五十里之外。逼令平民赴工。承辦挑培之事。著裘曰修會同方觀承。即行據實嚴查。奏聞。請旨治罪。○四川總督開泰疏報灌縣奉節青神酉陽等四州縣。乾隆二十七年分勸墾田地二頃九十二畝。有奇。甲寅諭四川重慶鎮總兵博爾和。現在有病。不能勝總兵之任。著留京俟病痊日。該部另行請旨。所遺員缺。著許仕榮補授。○又諭歸化城都統一缺。原係土默特蒙古世襲。因其習染顏敵。無可承襲之人。是以另賞世職。其都統一缺。由京揀選補放。但揀放之員。不諳彼處情形。未能整飭歸

化城事本無多。應將都統裁汰。歸綏遠城。將軍管理。副都統二員分駐。綏遠城。歸化城。二處。協同將軍辦事。其歸化城副都統綽和諾。仍留該處。著福祿來京候旨。歸化城都統。既經裁汰。傅良著以都統銜。仍留吉林副都統任。俟朕另行簡用。其新任吉林副都統福珠禮著留京署理。正藍旗蒙古副都統。○乙卯。上詣暢春園問。

皇太后安。○丙辰。軍機大臣等覆奏。訊據那親阿供。所買地畝。係照原價自買。並未減輕。亦非借書吏名。其時已離天津府任。等語。查原契月日。雖在補放沂曹道後。但未離舊部。與現任無異。顯係違例營私。那親阿已經革職。發往巴里坤。此項地畝。入官從之。○戶部議。准漕運總督楊錫紱疏。稱直省漕船各幫內。有輪減船。原屬虛糜。請裁去長淮。原宿州。廬州。徐州。揚州。泰州。安慶。寧波。紹興。金華。各衛所輪減船六十隻。從之。○欽差侍郎裘曰修。

等奏文安等處隄工。皆附近村民受值供役。亦有四五十里外來者。自願工作。並無逼迫。報聞。○是月。署廣東巡撫明山奏。廣潮二府。有聚眾械鬪。結黨拜盟。盜牛勒贖。諸惡習。實為地方蠹賊。現遵員拏究。從重辦理。期改舊俗。得旨。但實力為之。日久自當有效。勉之。○涼州將軍巴祿等奏。涼莊兵移駐伊犁。給銀辦裝。其糧布等項。先委員於出產地方。豫購存貯。起程時。給辦。省費甚多。仍餘銀十五兩。足資生計。得旨。嘉獎。

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十五

平定縣志卷之六十五

卷之六十五

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書欽差巡視滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未五月丁巳朔禮部等部

議准甘肅巡撫常鈞疏稱靖逆通判移駐哈

密安西同知移駐巴里坤二處俱有

闢帝廟應舉行祀典從之 戊午

上詣暢春園問

皇太后安 諭直隸各屬內上年秋霖歉收之

地米價未免較昂兵丁艱於買食著加恩將

保定雄縣寶坻固安霸州東安玉田昌平良

鄉順義及大興之采育各州縣所有駐防兵

丁本年夏秋兩季應領米折銀兩一概給與

本色即於奉天採買米石內支放以示體卹該部遵諭速行○諭軍機大臣等據方觀承奏永平府屬麥田缺雨恐減分數廣平大名保定一帶向前接種晚禾方需雨澤等語京師連得透雨膏澤現已霑足今畿輔各屬尚有缺雨待澤之處看來四月二十二及二十八九等日之雨或係西北多而東南少未能一律深霑所有缺雨各屬麥秋分數既減其地是否不致成災保定一帶此時曾否播種齊全并各處有無應行設法籌辦情形著該督即行據實查明奏聞尋奏近日各屬多報雨足惟東南一帶未透麥收恐減分數幸秋禾播種齊全保定府屬早禾旺發晚穀晚豆俱可接種永遵缺雨之區秋禾亦係全苗二麥約收五六分不致成災無需籌辦得旨覽奏俱悉○以刑部尚書舒赫德充經筵講官○以通政使寶麟為左副都御史太常寺卿志信為通政使太常寺寺丞諾穆渾為太常

寺卿○已未

孝誠仁皇后忌辰遣官祭

景陵○內閣翰林院帶領辛巳恩科散館修撰編修庶吉士引見得旨修撰王杰編修胡高望趙翼已經授職其清書庶吉士秦承恩郭潔沈士駿注上林葛正華俱授為編修邵庚曾授為檢討漢書庶吉士彭元瑞曹仁虎蔣雍植卜祚光唐淮嵩貴李孔陽劉焯彭紹觀毛業溥俱授為編修金雲槐陳于疇李松齡劉校之吳玉綸田均豫張廷桂俱授為檢討黃騰達馮晉祚陳步瀛趙升儲秘書沈咸熙馬曾魯張應曾達椿那穆齊禮馬人龍俱以部屬用楊中選著歸進士原班銓選○諭軍機大臣等明瑞等奏哈薩克來投之厄魯特台吉巴朗交待衛永平送京或安插京城或在伊母舅車凌烏巴什游牧居住等語巴朗既係車凌烏巴什之甥即著在彼處游牧居住不必送京○以烏魯木齊辦事副都統銜

訥蘇肯為正紅旗蒙古副都統○庚申

上御勤政殿聽政○吏部議准山東巡撫阿爾泰奏稱武定府屬利津縣縣丞稽查沿海商船漁船兗州府屬汶上縣縣丞分巡修防青州府屬諸城縣信陽司巡檢分駐海口責成均重三缺向係部選初選每形竭蹶請改為要缺揀選調補從之○辛酉諭今日圓明園失火衆皆奮力撲救而那木圖那沁兆德保平萬福李景臯等反自尋坐處雖失火不賴伊等撲救亦當隨衆立看保平年老未免站立維艱然此係何等事伊等既不能奮勉出力更圖安逸殊屬不堪那木圖等著交領侍衛內大臣議處鑾儀衛章京伯寧站立廊下由窗內觀看伊身係滿洲不思奮勉視同戲劇其心實不可問本應即行正法從寬革職發往伊犁給厄魯特為奴○壬戌

上詣暢春園問

皇太后安○諭朕於十八日啟鑾前往熱河駐

蹕立秋後由彼處進哨所有應派人員豫備事宜交各該處照例派備○御史王懿德奏翰詹諸臣大考卷向不彌封雖大臣校閱矢公矢慎究未免形蹟之露請嗣後彌封并令閱卷諸臣在文華殿住宿得旨嗣後考試翰詹等官試卷俱著彌封至請在文華殿閱卷之處不必○以貴州按察使趙孫英為四川布政使○癸亥諭朕恭奉

皇太后安輿駐蹕熱河避暑著派誠親王裕親

王大學士來保尚書舒赫德留京辦事大學士劉統勲現派先行隨往熱河俟更換回京後亦著一體辦事所有吏兵二部應行引見官員著於未啟鑾往木蘭之前每月彙齊帶至熱河引見至外省督撫提鎮等奏摺著照例自京啟蹕之日為始俱齎赴留京辦事處加封交內閣隨本呈送行在候朕批示隨本發回仍於留京辦事處交付齎摺人祇領該部通行傳諭知之○又諭曰尚書阿桂著馳

驛前往霸州文安等處會同侍郎裘曰修總督方觀承查辦事務其帶往刑部司員著一併馳驛前往所有工部尚書事務著舒赫德暫行兼署○又諭朕此次駐蹕熱河劉統勳著先行隨往劉綸俟將往木蘭時同梁詩正前赴熱河更換劉統勳回京辦事來保阿桂俱著留京舒赫德著署理步軍統領事務○諭軍機大臣等前據方觀承咨送把總胡萬正到京經軍機大臣詢問據稱遵化州民人開闢時曾令捕役闔門擒拏捕役等以知州公出恐致傷人不敢擒拏等語州縣捕役原為緝匪而設地方遇有橫肆刁民閭閻不法自應立即擒拏勿使漏網即或人衆難以盡獲亦應將為首要犯擒捕數人以儆其餘縱因此格鬪傷人亦豈為過乃藉口知州公出推諉不前及經武職指使仍若置身事外此等巧猾惡習甚屬可惡且捕役即本處人馬知不有交通縱匪之事乎著傳諭方觀承即

將不肯擒拏之捕役查出盡法重處以示儆戒○又諭現在霸州文安等處有查辦事件已有旨派尚書阿桂侍郎裘曰修馳驛前往會同該督辦理直屬應辦之事甚多本月十八日朕啟鑾巡幸木蘭該督方觀承不必前赴行在況口外現有良卿總理其事至口內沿途各務如王檢承辦秋審未竣即派觀音保隨營辦理或觀音保應辦事務尚多即於道員中酌派一員亦無不可著將此傳諭知之○又諭前經降旨於奉天山東河南等省購辦米石運赴直省備用今京師暨直隸各屬陸續已得透雨麥秋仍可收大田亦俱布種民食得以漸次接濟前項麥石自可不必速運頃聞直隸因接運各省糧石封拏船隻恐商販聞風裹足不前致市販不得流通轉於民食有礙其天津等處船隻毋庸豫備之處已令阿桂裘曰修於查辦事件之便面諭方觀承妥協經理並著傳諭奉天將軍等

及山東河南巡撫將前項購辦糧石暫停執
運并諭商民等不得却顧觀望務使市舶造
行源源不絕以裨閭閻食用○又諭曰開泰
奏拏獲構釁之喇嘛堪布等審明解省一摺
堪布不能恪守清規已非循分安靜之喇嘛
可比況於土司生覺復從中教唆挑構滋擾
番民尤為國法所不容貸現在既經緝獲該
督已迎赴打箭鑪即應就近審明於該處速
行正法俾喇嘛番民人等共知目擊心懲何
必仍行解赴省城徒稽時日所見未免拘泥
可將此傳諭知之○以廣東糧驛道熊繹祖
為貴州按察使○甲子諭軍機大臣等直屬
勘理水利河渠端緒既紛地面亦廣裘曰修
一人不惟綜理為艱且會同方觀承籌辦地
方有司不無各存畛域欽差與督臣和衷與
否均難調劑因思阿桂已有旨留京工部事
務暫令舒赫德署理所有一切疏濬修葺等
事宜即著阿桂與裘曰修會同方觀承妥協

相度酌辦則兩人共秉虛公該督自無意見
同異之嫌諸務益易就緒遇應回京時即照
裘曰修之例仍赴部辦事如再應赴勘即將
部務徑交與舒赫德兼攝辦理有應陳奏之
事即具摺送行在奏進阿桂等不必前赴熱
河不獨伊二人每事虛心商榷共期集事即
與方觀承亦不應畧存形蹟廢於水道民生
均有裨益再通判徐大綱復向各部投揭看
其情節雖屬一面之詞但或係方觀承等實
有迴護已見之處抑或該通判慮為上司參
劾為此先發制人之舉不可不詳悉確查使
底裏畢見方足持事理之平著將原揭一併
交與阿桂等令其悉心查明據實繕摺具奏
將此詳諭知之尋奏通判徐大綱所陳啟閉
隄口事不可行至揭臣等於消出地畝以多
報少又稱文安縣知縣程有成侵蝕賑米等
事當與面質俱無確據嚴加究詰據供希圖
動聽錄用并侵蝕工料銀二百兩欲藉此掩

飾等語請將該通判革職照驀越赴京奏告不實例發邊衛充軍從之○又諭曰楊廷璋等奏寧海縣劣監梅世英等窩庇梟犯率衆拒捕潛逃一案鹽梟干犯法紀拏獲之後復糾衆搶奪已屬不逞之尤梅世英等以衿監膽敢挺身窩庇率族拒擒直傷官役且甘心挈眷逃匿以抗王章其情理又豈尋常罪犯所有知縣王連祇知瞻顧考成計圖掩飾知府保全又以庸懦無能不即嚴拏坐令該犯

等肆行無忌地方尚安用此守令為耶著傳諭該督撫等此等兇惡重犯一門濟惡即當按其情罪盡法懲治不得援首從常例僅於其家定擬一人伏法致逆黨稍稽顯戮庶頑孽知所儆惕於法紀人心均為有益該府縣等亦即嚴行查叅以示不職之戒可將此一併詳諭知之○禮部議覆朝鮮國王李昫奏稱臣世子緯早亡復蒙天恩封子愼為世子今又身故臣年及髦儲嗣久虛宗祀孤危旦

夕傷悼愼生有子祿年已十二國計人心繫此一綫伏願曲加矜察頒降封典小邦君臣感激無地等語查李祿年未及歲與請封之例不符而其情詞懇摯殊屬可憫應否准其請封其恭進禮物應否賞收出自聖裁得旨准其請封所進禮物著暫留收貯准作正貢尋遣散秩大臣弘映充正使頭等侍衛廣亮充副使往封刑部議覆陝西按察使秦勇均奏稱州縣相驗必經仵作其未諳洗冤錄者恐致命案出入請令該管上司每年考試一次等語應如所請該府州因公過境就近考試錯謬者責革州縣查叅其五城司坊仵作責成巡城御史照此辦理從之○乙丑

上詣暢春園問
皇太后安○詣

大高殿行禮○還宮○諭曰果親王年幼素不安分往往向人請託習氣最陋已交軍機大臣審訊矣至王府長史乃管一切事務之人

王有過舉自當匡救。今索柱竟視同局外並不匡正。著革去長史交軍機大臣一併訊明定罪。所遺員缺著永興補授。永興即同王之諳達嗣後各事宜盡心辦理。倘王不納其言永興即行參奏。如坐視不能匡正。併將永興治罪。○又諭前刑部奏湖北歸州盜犯張洪舜等於前案業經開釋而後發盜案張紅順字音相同該省並未報部。事屬可疑。因命阿永阿葉存仁馳驛前往會勘。並諭該督撫先行奏覆。乃愛必達宋邦綏奏到。惟以前後文移往返游移之詞種種支飾。而於兩案情節關鍵並無一言別白。此則復成何語。督撫於盜犯重案不問有司詳稟翻覆。祇知按例批飭。已屬不成事體。況即如所奏批飭往復塵案已極紛繁。而何獨先靳於報部之一牘。是其情固不問可知。且使張洪舜果非真盜。從前既負奇冤。又備嘗苦累。豈有甫經昭雪旋甘自陷於辟。為誣讎者實其言此三尺童子

不可欺誑之事。而因循不悟。一至於此。甚乃以後案自認確鑿之盜。甫經錄報。旋復翻供。並以一囚待質。一賊待搜。坐使全案兜渠稽戮至三四年之久。推此以觀。地方吏治尚可言耶。國家將焉用此督撫為也。至宋邦綏蒞任日淺。前案並未承辦。受事之始。既知案情矛盾。又經趙泰交李作楨等具詞赴訴。伊即據實奏聞。朕自必深為嘉予。又何憚而不為。是其一味模稜。不過瞻顧總督徇庇臬司耳。殊不知朕教大臣以同寅協恭。原期奉公體民為重。若似此私心附會。置公事民命於不問。顧可謂之和衷共濟乎。且於同官不惜瞻顧徇庇。而乃敢於朕前支詞朦混。則誠何心。此案情罪輕重。俟阿永阿等鞠訊明確後。該督撫等自有應得之罪。即此一摺之支離牽混。已出情理之外。斷不可不加以嚴懲。愛必達宋邦綏即著交部嚴加議處。看來伊等如此扶同捏飾。非沈作朋從中力護。前非播弄

懲憑亦不至此況盜案枉縱司臬者本屬罪魁沈作朋即著革職拏問交與阿永阿等一併嚴審定擬具奏○諭軍機大臣等鄂弼奏查閱營伍一摺內稱各標營額設弁兵有分派防守及調赴新疆屯種換班之事而副叅遊都守等亦多係遞行委署之員於所轄不能實力訓練等語前此有事西陲官兵丁自不能不資調撥以濟急需今新疆駐防種地規模大定則內地營伍亦應加意整頓鄂弼所奏情形原係前此通融協濟以致不能兼顧尚可毋庸深究看來西安如此則甘肅情形亦大畧可知儻若再不為之經理恐將來腹地營伍或致廢弛不可不為籌度著傳諭楊應琚鄂弼將各該標營現在情形悉心體察或有應行兼併管轄務收實用並有應另議添設之處亦即詳議奏行毋庸少存撙節之見以裨軍實○又諭曰舍圖肯等奏到奉省現撥各倉米石移咨方觀承派船裝運

一摺前因直隸各屬陸續已得透雨麥秋可望有收已有旨傳諭該將軍等令其毋庸速運免致商船轉有阻滯今該省既將現有船隻陸續撥運可傳諭該將軍等令其儘業經起運在途之米運交直督派員接收其餘未運米石仍遵前旨暫停輓運毋庸亟亟籌辦並將此傳諭方觀承知之又諭曰葉存仁奏頭運米石開行一摺昨以直屬陸續已得透雨大田既俱布種麥秋亦可有收所有前項米石已降旨令其不必速運今該省頭運米五萬石現在既可如期抵次自可裝載開行聽直督派員交卸其接續繼運之米則正毋庸剋期趕辦致商船估舶反有阻滯之虞著傳諭署河南巡撫輔德遵照前旨將未會開行之米不必急猝籌辦目下不妨暫停輓運並將此傳諭方觀承知之○授一甲一名進士秦大成為翰林院修撰一甲二名沈初一甲三名韋謙恒為翰林院編修○是日起

上以夏至祭

地於

方澤齋戒三日。○丙寅內閣翰林院帶領新進士引見得旨。新科進士一甲三名秦大成。沈初。韋謙恒。已經授職。董誥。褚廷璋。李調元。蘇去疾。吳省欽。孫效曾。祝德麟。李鐸。董潮。程沆。張秉愚。張壽。姚鼎。祥慶。高墉。孫含中。邱日榮。李廷欽。牟元文。孟生。蕙。陳其煥。白麟。呂元亮。劉徵。泰。易文。基。蔣鳴鹿。周位。唐。黃義。尊。龔。駿。文俱著改為庶吉士。湯萼。棠。蔣。熊。昌。李家麟。蔡履元。楊嗣曾。費淳。戴璐。施朝幹。徐天驥。費南英。高茨。沈世燾。陳燮。馬。葆。善。宗。開。煌。張。鈞。王為俊。著分部學習。商衡。涂。寧。先。曹。煥。袁。樹。著以知縣即用。餘著歸班銓選。○諭曰。鄂弼。參奏鳳翔縣知縣李莊杖斃鋪戶李信一摺。其事甚堪駭異。非尋常劣員情事所應有。而該撫僅援濫刑斃命之例為詞。於律意失之遠矣。州縣官員因鞠訊公事任性乖張。或用

非刑。或責不如法。以致對簿之人。邂逅傷死。此乃謂之濫刑。今李莊以署內需布。令本縣布行平民辦交。復聽信家人。事後抑勒找補。甚至以所求不遂。盛怒疊杖而立斃之。是始以所部賈人。為其魚肉。後以縣官威勢肆其草菅。不獨與濫斃科條絕不相蒙。即以鬪毆抵命常法揆之。彼乃一時起釁。既無勒索重情。兩造平人。又無官民定分。較此猶為霄壤。又豈纒抵監候。足蔽厥辜。李莊著即革職。拏問。交與該督嚴審定擬具奏。○諭軍機大臣等。永貴等奏稱喀什噶爾購馬二百七十九匹。用銀二千七百六十三兩有奇。計每匹銀十兩以內等語。伊犁烏魯木齊貿易哈薩克馬匹甚多。嗣後各回城有需馬之處。俱著奏請調撥。停其購買馬匹。○喀什噶爾辦事尚書都統永貴等奏據伯克噶岱默特稟稱。灌溉回部地畝水道一赫色勒河。出喀什噶爾西喀布喀山中。灌溉東南一帶。托古斯恰特

賽爾們。喀什噶爾哈喇爾多羅特巴克阿爾巴特牌租阿巴特等大小村莊過巴爾楚克歸羅布諾爾一托庸河出喀什噶爾西北托庸山中灌溉東南玉斯屯阿喇圖什阿喇古霍爾干。阿斯騰阿喇圖什伯什克勒木等大小村莊與赫色勒河合流過巴爾楚克。一圖巴里克河出喀什噶爾西南吉斯嶺及西邊烏帕勒山中東流會於圖們上流向東灌溉汗阿里克提斯袞赫色勒布伊等三村莊。下流向東北與赫色勒河合流過巴爾楚克。俱匯羅布諾爾一庫森提斯袞河出喀什噶爾西南英吉沙爾城西羌琿山中灌溉東北英吉沙爾各村地畝散流於戈壁惟赫色勒布伊提斯袞汗阿里克三處分引圖巴里克河水不足用。請自赫色勒河東南濬渠四十餘里引水入赫色勒布伊村。又托庸河水湍急地畝多衝。今添建土石隄壩並鑿山石以弱水勢仍時加修葺。報聞。○丁卯兵部議覆

江西布政使富明安奏稱江西衛所明世職經雍正二年部議停運而頂帶未禁應請革除他省一體嚴禁從之。○戊辰夏至祭地於

方澤

上親詣行禮。○詣暢春園問

皇太后安。○幸圓明園。○諭著於十三日在正

大光明殿考試翰林其現派隨園之員免其考試。○禮部議准江西巡撫湯聘奏稱寧州

武寧靖安進賢奉新新昌永寧德興宜春萬

載十州縣棚童近因查察較密應試者少應

如學臣周煌所請改歸土籍考試從之。○以

山東文登營副將德昌為烏魯木齊總兵。○

已已遣官祭

關帝廟。○諭曰果親王弘瞻以朕幼弟自孩

提養育迄於成人乃不知祇遵朕訓承受朕

恩屢蹈謬尤罔知繩檢如從前開設煤窰占

奪民產並奉命盛京恭送

玉牒謾奏先赴行圍等候種種謬戾乖張難以毛舉朕皆以年幼無知不忍遽治其罪曲加訓飭冀可就悛詎意庸妄日增非法干求蹟更彰著其所關於

家法朝綱人心風紀為甚大有不得不與內外臣工愷切宣示者去年因富德罪案有於隨駕南巡時私託高恒售賣人蔘一節因思法度肅清之日富德以新經任用之人輒爾恣意橫行若此則凡王大臣中保無有同蹈此轍者因召高恒至京面為詢問御前大臣軍機大臣內如大學士公傳恒協辦大學士公兆惠等有無授受情事高恒力言無有及再三嚴詞詰責始奏出弘瞻有責償買賣人江起鐫夙逋令護衛引赴高恒家託其帶往揚州賣蔘牟利經伊正言相却其事深駭聽聞恐平日似此行為不僅止是當命簡親王誠親王和親王會同軍機大臣查訊伊護衛太監等逐一供出不相符合更屬罪無可逭弘

瞻始據實一一開出與所訊之供無異竟至於各處織造關差等俱有畧給價值派辦繡緞什器不一而足其最可異者朕特命大臣揀選官員此何等事弘瞻竟以門下私人關說挑取請託阿里衮雖阿里衮執法力拒而弘瞻冥心干與朝政毫無顧忌一至於此此風一長將內務府旗員之不已外而滿漢職官內而部院司寺勢將何所不有且高恒等於弘瞻尚如此顧忌則將來諸皇子若效其所為誰復有奏朕者朕實為之寒心我

皇考御極之初阿其那塞思黑等狂悖不法並經苦心整頓此王大臣所共知揆厥所由因皇祖臨御六十餘年

聖壽崇高諸王等各為閹僕所播弄分立門戶肆威漁利入者主而出者奴彼此交相傾軋無所不至非大加懲創國法將不可問然以當日前事觀之此果

宗社之福王公卿尹之幸天下士民之樂乎否

乎且如果毅親王在

皇考時任事最久賞賚亦最優諸王中較為殷富弘瞻既得嗣封祖祝所入給用以外每歲贏餘不啻鉅萬何至交結侵漁不畏科條不顧顏面竟至此極耶又其最不可解者本年果親王母謙妃千秋

皇太后諄諭弘瞻令將豫備稱祝之儀陳設宮陞為果親王母妃增輝乃抗不遵循及蒙懿旨屢詢猥以朕並未加賜稱祝不敢自行鋪

張與朕鬪富是則復成何語朕纘承

皇祖

皇考大統凡王公及大小臣工之所有何莫非朕之所賜即何莫非朕之所有而弘瞻乃以鬪富為詞非獨其識見鄙悖抑實緣自知所進菲薄難掩觀瞻是以詭言自文且復逞其私心憤激而已殊不知謙妃位分原非和親王母裕貴妃可比裕貴妃年長於

皇太后朕孝奉

皇太后其次即應致敬裕貴妃是以自六旬以來隆禮稱祝誼固宜爾謙妃年甫五旬朕遵祖

宗成訓向不相見至千秋分例所有何嘗稍缺於供其祝禮之舉或俟之六袞以後則於情理方協弘瞻乃轉以此自託微詞諷朕是誠何心且弘瞻坐擁厚貲於侍奉母妃之道方當竭誠備物以博歡心乃不惟不能自盡孝敬而轉時向母妃多所索取豈為人子者所宜出此耶弘瞻素恃口給恬不為怪如近日園中不戒於火諸王並皆進內弘瞻所居最近而其至轉在諸王之後且嬉笑如常毫不關念又強引到園曾見誠親王巧言爭辯及誠親王以末至相見無解到遲詰之不覺語塞所謂小聰明是大糊塗孰過於此至若和親王與弘瞻恭詣

皇太后宮請

安其儀節僭妄尤非情理所有昔

皇考時

孝恭仁皇后宮諸叔輩皆例不得見

面請

安。今朕諸叔咸在誰非身歷之事朕於和親王及弘瞻推恩悖愛視同一體於此可以自信顧轉恃此不循軌度直於

皇太后寶座之旁膝席而跪坐按以尺寸即朕請

安所跪坐之地也是尚知有天澤之辨哉又

皇考時朕諸叔奏對稱

聖祖仁皇帝並不敢稱

皇考今和親王與弘瞻於

世宗憲皇帝皆得稱

皇考朕待伊等為厚為薄必有能辨之者矧和親王於朕年相若久與朕典學肩隨至弘瞻乃自髻鬣提携至今朕意又何所嫌忌即使有嫌忌之疑亦當先自和親王而歷年體卹矜全毫無芥蒂衆所共悉又何有於弘瞻此

雖天下腐儒以至一介無識者皆不應擬議及此然弘瞻既如此恣肆失檢朕若不加儆誠將使康熙末年之劣習自今復萌朕甚懼焉此即分長如諸叔輩設事干國家政治朕膺

皇祖

皇考付託之重何敢不奉法從事若朕諸皇子不知所鑒或尤而效之則朕之立予示懲固不止如弘瞻矣今王大臣等訊明各款合詞

公請削爵朕覈之弘瞻即請

安無禮及不遵

慈旨謾語相詆二節已應革爵圈禁治罪朕仍推同氣之恩從寬革去王爵賞給貝勒永遠停俸以觀後效其兼攝都統并內廷行走及管理造辦處圓明園各執掌概行解退和親王於

皇太后前跪坐無狀亦著罰王俸三年餘俱如議行並將此通諭中外明示炯戒○諭軍機

大臣等據馮鈐奏請陞見所有巡撫印務交布政使顧濟美護理等語馮鈐准令來京陞見其巡撫印務關係緊要非顧濟美所能勝任現在總督蘇昌已經起身回任著前赴廣西接受撫篆視事馮鈐俟蘇昌到後再行來京將此傳諭知之○刑部議准甘肅按察使海明奏稱監犯患病例委佐雜看驗後因附和出結改委州縣但州縣有相距甚遠者往返鄰封轉誤本務嗣後百里內仍委州縣百里外遴委不同城不同鄉之鄰封佐雜查驗結報扶同率結者叅處從之○以廣西按察使柏琨為湖北布政使○庚午

上詣暢春園問

皇太后安○原任太子太傅文淵閣大學士兼吏部尚書史貽直遺疏聞諭曰大學士史貽直練達老成年登耄耋敦歷中外叅贊綸扉宣力三朝勤勞夙著前以衰老乞休奏請解任朕降旨慰留並令肩輿入直俾得從容頤

養近聞患病遣醫診視尚冀速痊茲溘逝深為軫悼派皇六子前往奠醊著加贈太保入賢良祠並賞銀二千兩治喪所有應得卹典仍著該部察例具奏○又諭據桑寨多爾濟奏稱伯德爾格回人等在恰克圖貿易有商民小院子京張暗中挑唆俄羅斯阻滯買賣而恰克圖辦事主事巴永泰不諳事務與俄羅斯買賣停止後反屢次催喚商人且卡上呈報私出買賣並偷竊馬匹等案巴永泰並不辦理其隨去之領催富珠理復不安分等語著交該部另選賢能司員帶同領催前往更換巴永泰富珠理著交與桑寨多爾濟福德等就近與案內人犯帶往庫倫審明具奏至商民小院子京張乃內地民人反從中挑唆俄羅斯阻滯內地差往之伯德爾格回人買賣情屬可惡亦著交與桑寨多爾濟福德等嚴行拏獲派員沿途用心看守解送京城交刑部嚴審從重治罪勿致疎脫○吏部

議覆廣東按察使赫昇額奏稱命盜案限六個月審結。惟卑幼擅殺期功尊長屬下人毆傷本管官弁妻妾謀死本夫奴婢毆故殺家長等案。倫紀攸關。請限承審官一個月內審解。府司督撫限十日審轉具題。遲延叅處。應如所請。承審州縣於正限一個月未結。即於限滿日。接扣二叅。限期州縣官限二十日。府司督撫仍各限十日完結。逾限叅處從之。○
辛未

上詰

安佑宮行禮○刑部議覆江蘇按察使胡文伯奏稱常人盜倉庫錢糧等物已得財者罪既改擬其不得財者律杖六十未免過輕請照得財擬軍例減一等擬杖徒等語應如所請首犯杖一百徒三年為從杖九十徒二年半從之○直隸總督方觀承奏直隸米行經紀謂之斗行擇誠實鄉民報充官給印斗評價過斛市集人多不能違衆把持民情稱便其

朋充私設壟斷滋弊者早經革除報聞○以內閣學士雙慶為禮部侍郎○以福建按察使曹繩柱為廣東布政使浙江鹽驛道袁守侗為廣西按察使湖南驛鹽長寶道淑寶為福建按察使

大清高宗法天隆運至誠先覺體元立極敷文奮武孝慈神聖純皇帝實錄卷之六百八十六

大清高宗法天隆運至誠先覺體元立極敷文奮武孝慈神聖純皇帝實錄卷之六百八十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未五月壬申諭昨考試滿

洲由別衙門陞用翰詹諸臣既閱其文又驗

其人才分別等次一等哈靖阿一員二等書

翼德爾泰二員三等觀文一員四等索爾遜

一員并不入等之琳昌一員侍讀學士哈靖

阿著加一級侍講學士觀文著罰俸一年侍

講學士索爾遜庶子琳昌俱著休致○又諭

昨於正大光明殿考試翰詹諸臣朕親加詳

閱按其文字優劣分為四等一等王文治周

升桓錢大昕三員二等汪廷璣張曾敫劉星

煒宋銑李汪度邵嗣宗諸重光李宗文楊述

曾朱筠王燕緒李宗寶汪永錫曹文埴汪新

史貽謨博明戴第元十八員三等蔣士銓積

善衛肅李翊翁方綱饒學曙陳荃鄒奕孝圖

谿布熊為霖張闔朱佩蓮梅立本薛宁廷朱

榮元王紹曾泰燾胡紹鼎張光憲畢沅曹學

閔羅暹春劉權之張坦福明安王大鶴柯瑾

鄭岱鍾錢載勵守謙三十員四等艾茂鄭虎

文宋弼吳鼎富森泰金維岱劉亨地焦汝翰

劉天成陳蘭森陳本敬阿肅德昌梁錫璣李

臺額爾登等十六員又未經考試准入四等

之勝格一員編修王文治陞授侍讀檢討周

升桓陞授侍講侍讀錢大昕陞授侍讀學士

檢討張曾敫陞授侍讀侍讀李宗文陞授少

詹事其二等未陞用者記名應陞處題奏內

汪廷璣劉星煒各加賞緞二疋其三等之侍

講饒學曙降為編修庶子錢載中允翁方綱

侍讀圖谿布中允朱佩蓮修撰畢沅中允福

明安。編修勵守謙。俱罰俸一年。編修衛肅。著以知縣用。編修薛寧廷。檢討鄭岱鍾。俱著休致。四等之贊善鄭虎文。著降為編修。侍講學士吳鼎。降為左贊善。洗馬阿肅。侍講德昌。降為檢討。少詹事梁錫璵。降為庶子。候補侍講勝格。降為編修。檢討艾茂。編修宋弼。檢討富森。泰金維岱。編修焦汝翰。陳蘭森。檢討陳本敬。李臺。侍讀額爾登萼。俱著休致。餘均罰俸一年。○諭軍機大臣等。前湯聘奏湖北通山

縣協同江西武寧縣拏獲假官誑騙一案。已降旨將通山縣知縣送部引見。今湯聘續奏。審擬羅奮鵬一摺。又稱武寧縣知縣能聞風差追會緝。是一事兩歧。非明示鼓勵之道。向來外吏習氣。遇承辦案件。兩縣地涉接壤。先發者既得居功。其因人成事之員。但經詳報。亦即令其與名希冀蒙恩陞用。殊不知朕辦理庶政。賞功罰過。事無鉅細。必期鑒別分明。不使稍有模稜。漸滋遺濫。著傳諭該撫等確

查此案委係何縣實力從事。應行優獎。即將該縣平日居官如何據實出具考語送部引見。毋得再將主從先後支語調停。再為含混。○以鑲藍旗蒙古副都統託恩多。為正白旗蒙古都統。仍兼兵部侍郎。調署正藍旗蒙古副都統。福珠禮。為鑲黃旗蒙古副都統。○癸酉。

上詣暢春園問

皇太后安。○諭曰。愛必達等奏按察使司監禁

人犯明亮等。乘夜挖牆脫逃。請將高誠等嚴加議處。一摺。已交部嚴察議奏矣。省會司監關係緊要。尤非郡邑可比。乃一任犯人換鎖穿牆成羣逃逸。陳臬者所司何事。高誠人本無能。今復任意玩愒。若此。若不加之重懲。何以儆曠。瘼而嚴法紀。且前此盜犯張紅順等一案。現今特派大員查審。在司臬者。又豈能辭咎。高誠著即解任候質。其按察使員缺。著費元龍補授。○大學士等奏大考休致編修

宋弼請留續文獻通考館仍充纂修得旨宋弼著罰俸一年仍留編修之任○吏部議准廣東按察使赫昇額奏稱粵東臬司衙門設有照磨一員查照磨並無專司事件應裁從之○補行乾隆二十七年分山西軍政卓異官十員分別議叙如例○以故奉恩將軍謨章子善存襲職○以順天府府丞申甫為光祿寺卿○甲戌

上以秋獮木蘭奉

皇太后自圓明園啟鑒○諭上年因直屬偶被水潦是以巡幸木蘭時所有經過地方向免錢糧十分之三○者俱加恩蠲免十分之五○今歲麥田已獲秋稼雖可望有收第念究係被災之後小民生計尚未免拮据此次巡幸熱河沿途地方仍著加恩將本年地丁錢糧蠲免十分之五○該部即遵諭行○又諭曰高誠履奏歸州張洪舜犯盜一摺錯謬已極前因該州先後兩案盜犯音字相同又事隔經年

並不審訊報部形蹟可疑經刑部叅奏在高誠雖非承辦但伊為臬司到任一載豈竟毫無見聞是以令其據實陳奏今高誠奏到不特種種掩飾支離大失司憲之體且謾過於原任知州秦鐔用刑致斃夥盜馬祥夫州縣官訊鞫重案即刑斃一盜犯亦不得謂之枉濫設以此欲加秦鐔之罪豈伊等縱脫首犯轉得藉口無過乎其意不過以此案由刑部舉發該州秦鐔係尚書秦蕙田之姪妄疑秦鐔通信內部故為此挾嫌砌陷殊不知事屬子虛而秦鐔以捕風捉影之談徇私誣捏潛通消息不獨秦鐔罪無可逭即秦蕙田朕必不稍為姑貸今此案寃良縱盜物議沸騰而通省督撫藩臬上下扶同一氣有心朦混若此秦鐔即直揭部科亦所應得又安得以通信為嫌乎高誠乃謂愛必達署撫篆時每次照詳批示並無迴護宋邦綏到任後聞改委承審亦無牽制之處且謂趙秦交秦鐔辦理

不善不得。不加詳慎。曲為督撫掩飾。而歸過下僚。其居心行事。尚可問耶。高誠著草職拏問武昌府知府錫占。以承審之員。觀望遲疑。甚屬不堪。亦著草職拏問。交與阿永阿等一併嚴訊。此案沈作朋提訊批駁。亦陳臬平反所常有。但既偏執。已見枉縱。於前復巧飾彌縫。力護前非。於後小人情態畢露。不得不加以重譴。耳至愛必達。歷任封疆。辦理大案。不應舛錯。若此。祇以從前曾經叅奏周琬。遂始

終意存迴護。不知周琬之取戾。由於高傲乖張。其不附叅佛保住。特其劣蹟之一節。又何必巧為文飾耶。宋邦綏向來尚屬能事。及用為巡撫。頗不如前。蒞楚後。既知案情矛盾。又經趙泰交李作棋等控訴。乃不奏不辦。一味模稜。瞻徇深負委任之意。督撫錮蔽成風。於吏治民生所關。非小。不便姑容。貽誤愛必達。宋邦綏俱著解任。來京候旨。湖廣總督員缺。著李侍堯補授。湖北巡撫員缺。著輔德補授。

並將此通行曉諭知之。○又諭曰。劉綸著調補戶部尚書。兵部尚書員缺。著陳宏謀補授。著即前往湖北署理。湖廣總督兼署巡撫事務。俟李侍堯到任後。再行來京供職。湖南巡撫著喬光烈調補。布政使來朝暫行護理。○是日。駐蹕湯山行宮。○乙亥。諭曰。劉綸已調補戶部尚書。陳宏謀未到任之先。其兵部尚書事務著劉綸兼署。○又諭曰。阿永阿等奏查湖北盜犯一案。稱後案之張洪舜等即係

李作棋案內縱脫之犯。供證確鑿。並無絲毫疑義。乃沈作朋承辦時。既偏執枉縱。致成冤獄。及至後案舉發。復護前非。暗中牽制。經高誠勸令檢舉。並不回答。且在督撫前聲言兩案俱毫無影響。以致承審之知府錫占承順迎合。不行審辦。遂使重案久懸。良民冤累等語。地方辦理大案。批駁平反。亦司獄之常。即紐於一時臆見。偶爾舛錯。原可據實詳奏。及早救正。以贖前愆。乃沈作朋承辦重案。不思

懲暴安良俾冤抑得以早雪轉從中有意牽制力護前非錫占復迎合意指冀欲淆亂黑白坐致奸良倒置沈作朋錫占實為此案罪魁業經先後降旨革職拏問著阿永阿等將伊二人嚴加刑訊務得實情慎勿稍存瞻顧以紓楚人公憤至監犯張洪舜張洪貴輾轉狡翻希圖漏網且已逭罰二年情罪甚屬可惡不必照尋常案犯辦理此旨到日著於該處即行正法俾奸暴知所懲警看來此案由

該州秦鏐親赴監犯家起贓歷歷指明詳報究屬首先舉發之員能事可嘉秦鏐俟服闋後著以知府陞用督撫藩臬為朕倚任大員乃於地方命盜攸關之案輒敢上下聯為一氣扶同朦混若此吏治尚可問耶此而不嚴加整頓何以澄官方而清案獄宋邦綏甫經簡擢頻易前規初不料其猥瑣無能一至於此愛必達在總督中尚屬朕所信任乃因從前參奏周琬一節竟為沈作朋所愚弄挾制

始終曲護實出情理之外愛必達宋邦綏俱著革職來京候旨以昭炯戒並將此通諭各督撫知之○以山東布政使崔應階為貴州巡撫山西按察使梁翥鴻為山東布政使陝西糧驛道佛德為河南布政使直隸霸昌道裴宗錫為直隸按察使調直隸按察使王檢為山西按察使○是日駐蹕密雲縣行宮○丙子諭軍機大臣等前因沈作朋辦理盜犯張紅順一案乖謬已極業經降旨革職拏問交與阿永阿葉存仁嚴審昨據高誠奏到知府錫占有意遲延是以將錫占革職拏問今據阿永阿葉存仁所奏則沈作朋錫占二人實為此案罪魁在錫占久經承審明知張洪舜贓證確鑿即應將前案一併平反而遲延時日久懸重案其瞻顧沈作朋處分因為苟且了事之意顯然可見至沈作朋既已縱盜寃良肆行妄斷仍敢力護前非其意不過以愛必達曾於此案參劾周琬必不肯自行檢

舉而隱以此為挾制總督之術。是其居心奸險。更出情理之外。著傳諭阿永阿。葉存仁。即將沈作朋。錫占。嚴加刑訊。務得掩護實情。儻以其身任職官。稍存顧惜。顏面之見。朕必親提鞠審。恐阿永阿等亦不能辭其咎也。○是日駐蹕要亭行宮。○丁丑諭曰。愛必達。宋邦綏。昨經降旨革職。來京候旨。但伊等辦理冤獄重案。有心朦混迴護。僅予革職。不足示懲。俱不必來京。愛必達著發往伊犁。自備資斧。

効力贖罪。宋邦綏著留於該省。交該督查有應修隄工。令其認修。果能奮勉出力。三年後再行奏聞請旨。○是日駐蹕兩間房行宮。○戊寅諭。據喬光烈奏。遵義縣知縣王錫蕃。盤獲陝西盜犯文喜。請即行正法。一摺。已交三法司覈擬速奏矣。王錫蕃於隔省犯罪脫逃。漏網十年之犯。留心躡緝。拏獲甚屬能事。王錫蕃著該督等查明平日居官若何。出具考語送部引見。○又諭曰。厄魯特內大臣布林。

病故著加恩賞銀五百兩治喪。俟到熱河時。派散秩大臣一員帶領侍衛往奠茶酒。○陝西巡撫鄂弼奏。寶雞寧羌鳳縣棗城四州縣通川棧道木石工程雨雪易致損壞。非隨損隨修。不能經久。請於西巡經費餘息項內撥銀一萬兩。交鳳漢二府分各州縣生息修理。得旨。如所議行。○是日駐蹕常山峪行宮。○己卯。

孝恭仁皇后忌辰遣官祭

景陵。○諭。據阿永阿等查奏歸州趙啟賢家被盜一案。經該州秦鐸稟明張洪貴兄弟即係李作棋案內釋放之犯。彼時正湯聘身任巡撫。屢次批詳乃扶同朦混。並未據實奏聞。又不咨部。顯有徇庇沈作朋情弊。設以業經離任。竟使脫然事外。何以飭官方而昭平允。湯聘著革職。交與阿永阿等一併嚴訊查辦。○是日駐蹕喀喇河屯行宮。○庚辰諭曰。明德著調補江西巡撫。山西巡撫員缺著和其衷。

補授曹繩柱著即補授福建布政使其廣東
布政使員缺著胡文伯補授諭軍機大臣
等昨閱阿永阿等查審摺內敘述後案發覺
時係湯聘任內承辦惟以一再批司草率了
事並未徹底根查又匿不奏報已降旨將湯
聘草職一併交阿永阿等究審矣此案宋邦
綏批令將李作棋家被盜已結之案另查詳
覆無庸糾纏等語顯有暗圖消滅為愛必達
沈作朋巧為彌縫情弊正須逐細推問而湯
聘辦理此案在宋邦綏接任之先業據該州
秦鏐稟明張洪順等即係李作棋案內開釋
之犯乃竟置之不問有心迴護是伊等扶同
一氣希圖朦混如出一轍但首先起意究自
何人中間懷挾私心不將此案顛倒是非之
處明白究出其實在情形務令盡心研鞠分
別定擬著將此傳諭阿永阿等知之○又諭
曰明德現已調補江西巡撫其山西巡撫員
缺已令和其衷補授和其衷於四月二十九

日自哈密起程來京著明德寄信迎問和其
衷約計程期在旬日內即令和其衷到晉就
近任事一切應辦案件面為交代再赴江西
新任和其衷接任後留辦十數日略有就緒
再行來京若和其衷不能於十日半月內到
晉則明德竟速赴江西不必等候可將此傳
諭知之尋奏和其衷回信六月十五日可到
臣俟交代後赴任報聞○吏部議准山東巡
撫阿爾泰奏稱益都縣之金嶺鎮在縣城西
北七十里為登萊青三府入京大路回民雜
處奸匪易藏又壽光縣之候鎮在縣城東北
五十餘里地近海濱兼有稻田閘座查辦事
務均須駐員管理請將益都縣城縣丞移駐
金嶺鎮壽光縣城縣丞移駐候鎮從之○戶
部議准兩廣總督李侍堯廣西巡撫馮鈐等
疏稱蒼梧縣金雞頭山廠產銅旺盛請募商
採辦銅百觔抽課二十觔餘銅一半商售歸
本一半官為收買從之○兵部議准湖廣總

督愛必達等奏稱湖北武昌城守營與督臣駐劄同城漢陽營僅隔一江黃州協道士洲德安興國四營距省僅二三百里應隸督標荆州城守並兼轄之水師營距省六七百里至宜昌止二百餘里應隸宜昌鎮岳州城守並水師二營雖隸湖南而地在湖北千把皆督臣考驗亦應隸督標又湖南常德城守與提標同城洞庭澧州九澍長沙四營或數十里至三百餘里均近提臣駐處應隸提標靖

州協並兼轄之綏寧長安二營距提標千有餘里至鎮草止四五百里應隸鎮草鎮衡州寶慶二協並兼轄之武岡營距提標有遠至千里者且隔大湖由陸路至永州止二百餘里應隸永州鎮以上各協事務向由該協徑詳督臣並無兼轄稽覈之責請均分隸管轄從之○旌表守正捐軀之河南嵩縣民王尊賢媳朱氏○是日駐蹕避暑山莊至八月庚子皆如之○辛巳諭今日阿永阿等奏到審

訊委員單言揚等供出前後各情節藩司不肯檢舉督撫無意昭雪係湯聘任內之事其力持翻案逼役認贓係周琬任內之事等語可見此案縱盜寃良之首全係周琬沈作朋串通欺蔽則從前周琬之叅趙泰交而不及佛保住者並非曲為徇庇實乃畏其退有後言漏洩真情耳愛必達始則為二人所愚弄其錯誤猶在懵懂繼乃墮其術中輾轉自護遂成迷而不返之勢愛必達向為朕所信任

即前此歷任督撫時亦尚不蹈扶同瞻徇上和下睦之陋習初不料其辦理此案之錯謬前後竟若兩人實所不解其委員陳銓等供出當時各盜稱差役至該犯家起贓搜去自存銀兩一節嚴訊並無其事而周琬沈作朋必要審出著落遂坐於已故之蘇鳳擬徒之宋明身上等語此事尤駭觀聽盜犯被害尚須官為辨雪今出自巡撫臬司逼役認贓幾致覆盆莫白周琬等之罪其可逭乎至沈作

朋錫占朦混枉縱人人共憤通省皆以為藩司若肯檢舉便易辦理而沈作朋漠不關心有意詐欺錫占迎合延緩冀圖消弭二人實為此案罪魁外省官方積弊歷經整頓漸次肅清即稍有舞弊營私等事無不立見敗露今上下扶同弊混肆無忌憚若此地方尚有何事不可為乎此案縱盜寃良已屬法無可貸乃敢朋比迴護非有心欺罔而何周琬先經贖罪閒退著即鎖拏解部嚴審寃擬湯聘

宋邦綏前後承辦掩飾之處已交阿永阿等訊明首先起意及力為把持者究自何人則伊等情罪自見所有委審之單言揚陳銓陳文樞等俱著一併革職究審阿永阿等奉命前往勘審既知湯聘係案內應行訊鞫之人前摺不即叅奏已屬選懦今復奏請令其明白回奏尤為不知事理輕重並著傳旨申飭○諭軍機大臣等周琬前在巡撫任內任性乖張阻撓公務兼有徇庇佛保住一節是以

將伊革職發往巴里坤旋經加恩准其贖罪今據阿永阿等奏到周琬從前題叅趙泰交盤刑逼供一案係於未經具題之先即將案犯親審豫存成見遂致承審之員捏情定案附合盜供等語是周琬實為此案縱盜寃良之首其從前枉叅趙泰交而不及佛保住者並不止於徇庇實則因贓證明確意存迴護慮其退有後言真情敗露耳種種乖謬平日必與沈作朋顯有朋比為奸情事是以串同欺蔽釀成寃獄沉滯至今不可不嚴加審鞫著傳諭舒赫德方觀承輔德查明周琬現在何處速即鎖解來京交與刑部詳悉研審定擬具奏家產一併嚴查至從前叅革知府佛保住係此案內應行證詢之人該員曾否歸旗並著舒赫德一併查明具奏○直隸總督方觀承奏直屬自大興宛平東至通州三河薊州豐潤玉田撫寧一路西至良鄉房山易州涿州一路西南至定興安肅清苑滿城完

縣望都一路東南至新城。雄縣任邱高陽河間獻縣交河阜城一路運河大道武清天津大城靜海青縣吳橋一路共三十二州縣疊道應加夯礮溝渠應添橋座者以次修理得旨是溝渠即河道之脈絡也應聯為一氣方得宣洩之宜○以江蘇江安糧道錢琦為江蘇按察使○壬午

上詣

皇太后行宮問安○諭軍機大臣等輔德已補

授湖北巡撫但葉存仁現在出差輔德護理撫篆地方事務殷繁甚關緊要且湖北巡撫印務尚有陳宏謀在彼兼署著傳諭輔德俟葉存仁回豫後再赴新任○癸未諭朕今歲駐蹕熱河為日稍多所有滿洲兵丁及看守行宮之千總太監等俱著各賞一月錢糧其看守行宮兵丁著各賞給二月錢糧所需銀兩俱於道庫內動支賞給○又諭曰正紅旗漢軍都統員缺著新柱補授新柱未到之前

著那親署理○戶部等部議准兩廣總督楊應琚疏稱南海縣民蔡陳江琛監生黃錫璉由喇吧邏羅等國運米二千餘石回粵糶濟民食請給從九品職銜吏目頂帶以示鼓勵從之○甲申諭行在戶部議覆熱河道良卿奏請本地商貨驗票出口以免重徵一摺尚非永遠祛弊之道古北口向未設有稅局祇係張家口監督差役巡查嗣因奸商遠越偷漏者多前任監督多隆武請於古北口一

體查明徵稅經部議覆准行乃該監督辦理不善以致巡役人等藉端滋擾輒將熱河等處本地有稅之商貨一概重複徵收將來口外貨物必致騰踊殊非立法稽查之本意著派安泰帶賢能司官一員前往將滋弊之巡役人等嚴查懲治即將稅局撤去其失察之該監督並著交部議處嗣後除張家口商貨遠越私行者仍准派役稽查毋致偷漏外其餘悉照舊日章程辦理如有仍前需索等弊

並交與直隸提督就近查察究處。乙酉諭據舒赫德奏將沈作朋等如何縱盜寬良之處查詢已草知府佛保住供稱此案原審職證確鑿兩次招解臬司沈作朋並不追究正盜反將事主李作棋等嚴刑逼供並稱聞得沈作朋與知州趙泰交係鄉親素有嫌隙是以如此辦理等語沈作朋審理盜案初以其錯誤雖出無心而始終迴護致奸良倒置情理已無可恕乃挾同鄉宿嫌竟不顧變亂黑白構成冤獄藉以快其私憤小人無忌憚之尤一至於此其罪尚可逭乎此案前後情節業已洞徹底裏且盜犯俱經正法受屈之事主即予超豁此後應須根究之處全在沈作朋周琬及承審迎合各員現在周琬已令拏交刑部阿永阿等亦不必留楚完案葉存仁著即回任所有案內應行訊質各要犯及知州趙泰交等著阿永阿等一併分別押帶回京交軍機大臣會同刑部嚴審究擬佛保住

著該部帶領引見。丙戌諭曰福德派往庫倫辦事仍帶署理藩院侍郎銜。諭軍機大臣等副都統額爾景額派往葉爾羌辦事著照納世通之例授為叅贊大臣。○刑部議覆湖南按察使五訥璽奏稱親屬受財私和命案日久熬檢可憫請於原定徒罪上加一等問擬等語查私和人命惟受財者最為忍心害理律載受財者計贓准竊盜論常人私和既准枉法論而親屬僅准竊盜殊未允協嗣後親屬私和命案受財准枉法論從其重者定罪從之。○喀什噶爾辦事尚書都統永貴等奏據回人呈告阿克蘇伊什罕伯克頗拉特隱匿回人田地九十戶未辦差糧又伊子七品都管伯克梯尼強占回人田地馬匹臣等飭查屬實。彙集大小伯克摘取頗拉特梯尼頂翎查賽哩木伊什罕伯克密爾頗拉特堪以調署阿克蘇伊什罕伯克事務伊子員缺一併揀選。報聞。○裁甘肅河州茶馬大使

改設按察使衙門司獄以按察使衙門照磨兼管茶馬大使鑄給印信從巡撫常鈞請也○命吏部左侍郎德保協辦大學士戶部尚書劉綸教習庶吉士○是月江南河道總督高晉奏黃運兩河需料查有邳宿迤南孟山等湖產大蘆可用嗣後豐碭道遠仍辦秫稽外銅沛邳睢宿桃運河各廳俱令兼辦大蘆得旨允行○江蘇巡撫莊有恭奏太湖水分疏吳淞江婁江黃浦口三處其間港浦偶塞上流即被淹浸治之之法除泖口挑除蘆墩外吳淞江自龐山湖以下婁江自婁門以下修除冒占疏濬淺滯務令上流所洩之數足相容納即以挑河之土加培隄岸民修官督借項辦理工竣後覈數徵還得旨允行

大清高宗法天隆運至誠先覺體元立極敷文奮武孝慈神聖純皇帝實錄卷之六百八十七

大清高宗法天隆運至誠先覺體元立極敷文奮武孝慈神聖純皇帝實錄卷之六百八十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣書誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣魯振鐸等奉

敕修

乾隆二十八年癸未六月丁亥朔諭軍機大

臣等據楊廷璋奏海寧縣鹽梟拒捕案內窩犯毆官之梅世英等先後拏獲審擬等語辦理甚為迅速梅世英等以衿監窩匿私梟復率族拒捕搶犯直傷官役且膽敢挈眷竄逸其為藐法肆惡行同梟獍似此頑孽兇徒充其伎倆何所不為若不盡法懲治何以儆兇頑而申法紀著傳諭楊廷璋等按其情罪速即嚴審定擬不得援首從常例致濟惡之逆黨稍稽顯戮其緝拏要犯之員能於旬日悉

行弋獲不致兔脫頗屬急公奮勉著該督撫查明首先拏獲之員出具考語送部引見不可循外省習氣以協緝多人籠統開報庶實在出力者得以有所獎勸而因人成事之員不致妄希非分並將此傳諭知之○以山西殺虎口副將德寧為陝西延綏鎮總兵 戊子

上詣

皇太后行宮問安 己丑諭軍機大臣等昨據

方觀承奏安州任邱近淀水窪之內有魚蝦遺子蠕動如蛹者又青縣滄州慶雲等處俱有零星蛹子景州獻縣亦間有生發雖據稱現在督率搜捕但目下是否捕除淨盡近聞鄭州一帶亦間有蛹子當此積潦初涸正宜及時查察不使稍有遺留著傳諭該督將現在如何辦理作速查明奏聞○工部議准湖廣總督愛必達疏稱荊門州屬沙陽下游仙人古月隄外鄭家潭南耳隄緊逼襄陽迎溜

外灘坍卸。難以幫築。應加月隄一道防護。從之。○以太常寺卿諾穆渾。為內閣學士兼禮部侍郎。○以左庶子德成格署日講起居注官。○庚寅。諭軍機大臣等。據舒赫德奏。近畿一帶。麥收豐稔。且山東河南麥石亦絡繹而至。麥價可日就平減。第恐不肖市儈。拘泥近日官價。轉無裨益等語。官價平糶。原屬一時權宜之計。今麥收既屬豐裕。將來民食。自不致缺乏。且設廠以來。已及半載。有餘。不特麥

石無需平糶。即米廠亦應議撤。舒赫德摺內。並稱。阿桂等現欲議請停止。何以未見奏到。著傳諭阿桂。即速確覈五城各廠。現在無需平糶情形。一面辦理。一面奏聞。再阿桂表曰。修派辦直屬河道溝渠。自應不時往來督察。且聞方觀承亦候彼兩人會同查勘。應即起程前往。再直隸毗連山東之景州。吳橋。東光。南皮。獻縣。及鄭州。任邱。滄州。青縣。靜海等處。俱有蝗蝻蠕長。現令該督等。分路督率搜捕。

並著阿桂。表曰。修於所至之處。協同董辦。務期淨盡。不留遺孽。今歲直屬幸獲豐收。若不力為保護。仰承

上蒼嘉貺。殊屬可惜。但地方官習氣。往往心存畛域。互相推諉。經欽差在彼督率。自可杜其掩飾。觀望之弊。阿桂等俱朕親信大臣。既奉命在外。凡一切地方緊要之事。皆當留心。經畫。不獨水利捕蝗。為目前應急之務。諒阿桂等自能仰體朕懷。無事諄諄誠諭也。可將此

傳諭知之。○又諭。直屬安州。任邱等處。俱有蝻蠕長。鄭州一帶。亦間有萌生之處。昨已降旨。令該督將曾否撲除淨盡。詳細查奏。茲據達色奏。山東歷城。長清等縣。境內間有飛蝗。現經該督撫率司道等。親赴各該處。上緊撲滅。其經過直隸之吳橋。東光。南皮。滄州。青縣。靜海。境內村莊。亦均有飛蝗數處等語。看來直隸山東毗連一帶。間段俱有蝗蝻。若不及早搜捕。誠恐漸滋貽害。東省業經阿爾泰

等親率督捕而直屬有蝗各處該督方觀承布政使觀音保亦曾親赴督率搜查否抑係止據各該屬稟報僅委之州縣等官辦理向來外吏習氣每於壤地相接交錯之區即無意存畛域彼此推諉著傳諭方觀承速即督同觀音保分道搜捕不使稍留遺孽並將飛蝗現在是否撲除淨盡據實詳查奏聞○又諭據達色秦山東之歷城齊河禹城平原德州等處村莊俱間有飛蝗現經阿爾泰率屬親身督捕等語目下積潦初涸日氣炎蒸正蝻孽易生之際若不及早撲除必致蔓延滋長貽害地方著傳諭阿爾泰務在董率屬員上緊撲捕不留餘孽並將邇來所屬境內蝗蝻有無生發并如何搜捕俾令淨盡之處詳悉奏聞尋奏臣赴歷城長清齊河禹城平原德州恩縣各州縣凡有螞蚱之處董率文武員弁圍圍焚壓極力捕除無遺田禾亦無傷損司道等分路搜查俱報淨盡第恐遺孽

復萌已飭地方官搜創遺子給錢收買鰥場荒地並令翻犁務除種類不使續生報聞○又諭曰新柱等奏稱伯克薩里等往諭巴達克山素勒坦沙即凜遵約束將伊弟從齊特喇爾撤回其所掠人口牲隻什物俱查明交還等語新柱額敏和卓辦理妥協著交部議叙仍賞大小荷包一對鼻烟壺各一枚薩里阿布拉三甚屬効力薩里著賞三等輕車都尉世職阿奇木缺出列名請補仍賞緞六端阿布拉三於應陞處列名仍賞緞三端素勒坦沙甚屬恭順著先賞大小荷包鼻烟壺仍將葉爾羌庫貯之緞賞給十二端並傳朕嘉悅施恩之意令其知悉○辛卯

上詣

皇太后行宮問安○諭軍機大臣等前派額爾景額更換新柱回京適新柱有遣使巴達克山一事因傳諭令其稍待今素勒坦沙既獻布拉呢敦屍骸及其妻子又查還齊特喇爾

土地戶口。是事已完竣。新柱俟額爾景額抵葉爾羌。即起程回京。且額敏和卓駐劄年久。已派玉素布前往更換。亦因已達克山之事。暫留。令玉素布在阿克蘇辦事。此時額敏和卓亦應起程。但額爾景額甫經受事。額敏和卓仍留住三月。再行文玉素布赴葉爾羌更換。俱著傳諭知之。○壬辰。諭軍機大臣等。前因恰克圖奸商小院子京張等教唆俄羅斯阻撓伯德爾格回人貿易。隨降旨桑寨多爾濟等。令其查拏解赴熱河治罪。續據桑寨多爾濟等奏稱。小院子京張已回張家口復降旨已爾品。嚴緝務獲。今據奏到張家口商民內並無小院子京張其人。惟查有萬盛永記舖內商民趙越人。皆稱為小院子。訊供係汾州府汾陽縣人。伊並不出口貿易。惟伊夥計張宗烜田昌於去年七月九月間先後往恰克圖貿易。舖中亦稱為小院子等語。再查恒裕玉記舖內張朝元向在京城貿易。係昌平

州人。是以人俱稱為京張。隨訊據伊弟張朝相夥計李逢春稱。張朝元於去年七月往恰克圖。其夥計李勝敬亦於十一月前往貿易。至今未回。各等語。小院子京張等俱係內地商民。乃敢教唆俄羅斯阻撓回人貿易。其奸詭不法情罪甚屬可惡。現據已爾品查訊緝拏。尚無著落。該犯等行蹤詭秘。今或聞風匿蹟。若非潛留恰克圖地面。即在口內外沿邊一帶或竄回本籍。均未可定。著傳諭方觀承明德等。迅即遴選妥幹員弁。密速緝拏。務獲解送行在。交軍機大臣嚴審究擬。毋致漏網。○禮部等部議准。調任貴州巡撫喬光烈奏稱。都勻府屬生童向附平越府考棚應試。今生童多至二千餘人。請設專棚考試。從之。賑卹甘肅狄道渭源皋蘭河州金縣靖遠隴西寧遠會寧通渭平涼涇州固原崇信鎮原靈臺華亭靜寧莊浪張掖武威永昌鎮番三番靈州花馬池中衛平羅擺羊戎西寧等三

十廳州縣。乾隆二十七年分水旱霜雹災飢民並緩應徵額賦。癸巳諭軍機大臣等。昨據舒赫德奏新麥豐收麥價已日就平減。因降旨阿桂等將五城各廠平糶即行停止。今阿桂等奏請酌減麥麴價值。想係未經接奉諭旨。故有此奏。去冬因京師米麥等項價值稍昂。是以設廠平糶。原屬通融調劑之計。現在二麥豐稔。市價自無憂騰踊。著仍遵前旨辦理。可將此傳諭阿桂並監糶大臣等知之。

○又諭曰。明瑞等奏現在伊犁駐防及陸續添駐之索倫察哈爾厄魯特兵丁分為四昂吉。每昂吉設總管一員。佐領六員。應照例鑄給關防。鈐記以昭信守。謹擬定字樣請旨等語。著交該部照明瑞所定字樣兼清漢托忒回字成造關防。鈐記頒發。○甲午諭太常寺卿毋庸另放人員。仍著諾穆渾兼管。○軍機大臣等議覆據西安將軍嵩椿陝甘總督楊應琚奏稱涼州擬駐馬兵一千三百名步兵

二百名並派協領二員分左右翼八旗設防禦八驍騎校八筆帖式二歸副都統管轄。莊浪擬駐馬兵四百步兵一百設城守尉一即以莊浪副都統改用並設防禦四驍騎校四筆帖式一歸涼州副都統管轄。各員俱於西安駐防官內移改。其兵分作三起每年移往一起至西安兵移駐後為數無多應裁協領四佐領防禦驍騎校各九筆帖式二等語應如所奏。惟西安協領向兼佐領今移駐亦令相兼。所請涼州設佐領八員止須六員從之。○乙未。

上詣

皇太后行宮問安。○諭據阿永阿等奏審明沈作朋等縱盜寃良各供情一摺。其上司之妄斷迴護屬員之觀望迎合種種有心欺飾。皆不出朕所料。至愛必達在滿洲世臣中尚屬可以倚信之人。朕前降旨將伊革職發往伊犁効力贖罪。尚以其不過為沈作朋所愚。始

終徇庇。因姑示薄懲耳。今閱阿永阿等所稱愛必達於接到秦鑠獲犯詳稟。逐加批駁。並飭臬司委員另審。及沈作朋回任謁見時。言及此案。聞愛必達有就案辦案。及此係臬司之事。伊不必管之語。沈作朋遂堅心播弄。希圖消弭前案。而委員錫占等亦遂承順意旨。扶同玩延。是此案之釀成冤獄。沈作朋。錫占固屬罪魁。而承審各員之觀望。實愛必達有以啟之。其朦混欺罔。在他人已屬罪無可逭。

今愛必達敢於為此。尤出情理之外。而非朕所能逆料者矣。愛必達並著拏解來京。一併審擬治罪。所有承審此案之陳銓。陳文樞。扶同鍛鍊情罪較重。亦著一併拏解來京。與沈作朋。錫占等質訊。另辦其屢次承審之單言。揚張文燾。談羽豐。王正功。雖較錫占等稍屬有間。但其觀望迎合。亦有應得之罪。著阿永阿等查明分別劾叅。亢保為滿洲世僕。前在藩司任內。揭叅趙泰。交附和會銜具詳。亦難

辭咎。不可令其倖免。著解任來京候旨。趙泰交審。理李作楨一案。倒提年月。尚非大過。且被叅以後。屈抑經年。著仍以知州用。令其來京與佛保住一併帶領引見。吏目夏念祖。並著復還原官。仍於應陞處陞用。至秦鑠於張紅貴等犯案後。即同遊擊李華。把總李奇雄。起獲原贓。擒拏盜犯。並將前後案犯確鑿緣由詳稟。上司甚屬能事。已降旨於服闋後。以知府陞用。外遊擊李華。著交部行文調取來

京。引見。把總李奇雄。著拔補千總。以示鼓勵。其奉委承審之知府傅顯。是否審出實情。及臨審告病之知縣胡翼。如何託故規避之處。亦著查明具奏。朕於一切功罪。務期允當。在受誣冤抑者。必急于昭雪。而審斷乖謬。及有心護非。與夫模稜觀望者。亦視其情節之重。輕分別懲治。斷不肯稍有枉縱。至上司下屬。平時紀綱所在。自不可越分干犯。若大員辦理重案。不能公正自持。其中有顛倒黑白之

處屬員為其掣肘何妨直揭部科朕必嘉其直幹此案承審各員是非曲直經朕徹底查辦絲毫不爽凡為屬員者亦可犁然省悟矣何憚而不秉公據實甘為唯阿遷就自取罪戾耶其案內盜犯袁維四著即行正法在逃之盜犯張楚璧王宏義主謀引線法難姑貸著嚴飭地方官密速嚴拏務獲毋使聞風遠颺稍稽顯戮可將此通諭中外知之○又諭曰簡親王現在患病著派御醫施世奇前往診視○予故太子太傅加贈太保文淵閣大學士兼吏部尚書史貽直祭葬如例謚文靖○丙申諭曰亢保前在湖北布政使任內曾扶同附和揭叅趙泰交並會銜濫行保舉陳銓陳文樞等亦有應得之咎著解任來京候旨所遺貴州布政使員缺著錢度補授○諭軍機大臣等據方觀承奏磁州知州莊鈞稟報河南布政使輔德於初一日在安陽縣將周琬鎖拏初二日委員解赴刑部等語著傳

諭舒赫德俟周琬解到即日令其解送行在候審不必在部停留○丁酉諭軍機大臣等昨阿永阿等奏俟湯聘到楚質訊後再行起程等語此案前後情節業已傳諭伊等在楚無應行查辦之處即湯聘到後亦無庸再行質訊至湯聘辦理後案膽徇袒護其情罪雖不至如愛必達之有心欺飾周琬沈作朋之朋比為奸然亦不能輕於宋邦綏著照宋邦綏之例交該督李侍堯於地方應辦工程在二三萬之數者令其認修俟工竣奏聞後再令回籍阿永阿奉到此旨即速起程將案內應行起解各犯押赴行在沿途加意防範毋稍疎虞葉存仁可遵前旨仍回豫撫之任並將此傳諭李侍堯知之○直隸總督方觀承奏安州靜海青縣獻縣滄州南皮故城東光寧津蝗蝻現已撲除惟任邱縣屬七里莊與鄭州相連生有蝻子畝餘景州慶雲與東省接壤地方亦間有生發布政使觀音保即赴

各處督捕。雄縣報有蝗蝻。臣即親往查辦。得旨。汝直隸之事。往往不如山東河南慎之。○以甘肅寧夏道富尼漢為安徽按察使。○戊戌。

上詣

皇太后行宮問安。諭曰。開泰審擬巴塘喇嘛教誘番民聚衆一案。及回奏博爾和患病各摺。支離巧飾。乖謬已極。開泰當喇嘛等滋事之初。並不親往查辦。經朕飭諭。始勉強一赴

打箭鑪。聊以塞責。輾轉遞委之道府知州等官。不待人犯解審。輒借查閱營伍為名。前赴川南。此有何不可緩之事。乃置邊地重案於膜外。轉亟亟於常行事件乎。在開泰不過中存畏怯。託名避去耳。其實似此居心行事。即查閱營伍亦復何裨。初不料滿洲世僕中。竟有庸懦無能如開泰其人者。種種謬誤。深負簡任。著革職。賞給頭等侍衛。自備鞍馬。前往伊犁。隨明瑞辦事。四川總督著鄂弼補授。明

山著補授陝西巡撫。其廣東巡撫著阿思吟補授。明山未到陝西之前。巡撫印務著阿里衮前往暫行管理。鄂弼俟阿里衮到陝西時。即行前赴新任。○又諭。向來各省督撫於地方應辦事務。往往飭委屬員以次轉詳。遂成通例。此於尋常事件則可。若案情重大。督撫自應躬先董率。庶足以資彈壓。而杜欺蔽。乃積習相沿。並不問事理之輕重。動輒批委屬員督撫。既委之司道。司道復委之州縣。層層輾轉。推延初若不與已事者。然夫為通省表率之大員。遇事不能親身奮往。而以責之遞委之州縣。不知州縣官事權本輕。且不免有庸懦無能之輩。混廁其間。安望其必能奮勉集事哉。即如開泰於喇嘛堪布等教唆生事之初。並不親赴該處查訊。經朕降旨申飭。始行一赴打箭鑪。坐辦塞責。旋委道府知州審訊。伊復藉口巡閱營伍。竟往川南一帶查閱。回省其畏葸不堪之態。來摺已自繪其狀。是

其平日養尊處優。若以畧一舉足。即有失督撫之體者。獨不思督撫遇地方要務。不辭勞瘁。親身督辦。所屬官民。豈不益加敬憚。何失體之有。若徒游衍衙署。坐失事機。不真可鄙之甚乎。又如愛必達。徇庇沈作朋。縱盜誣良一案。使愛必達早能親提確訊。不難將案情徹底清釐。何至為沈作朋所愚。弄扶同迴護。自蹈欺罔。以逮罪戾乎。此等耽逸偷安。掩飾朦混之惡習。恐現在督撫中。尚不乏人。幸而未值楚蜀兩省之事。不至盡露其短。若易地以處。亦未必不蹈此覆轍也。朕日閱內外章奏。於尋常案件。何嘗不交部議。若情節稍關緊要。或跡介疑似者。即不憚再三體察。日進軍機大臣。及各部旗大臣。親面諮詢。務使一切政務。無畸重畸輕之失。凡以事必親歷。始得其真。督撫大吏。皆朕所倚任之人。朕尚不敢好逸惡勞。為督撫者。固宜託名敦體。惡勞好逸乎。嗣後務宜各加猛省。痛改前非。毋溺

於宴安酖毒。及以掩飾彌縫為得計。既於政務有益。且可自免愆尤。亦何憚而不加淬勵乎。儻仍不知悛悟。一經發覺。則開泰愛必達之炯鑒。具在。斷不能倖邀曲貸也。○諭軍機大臣等。前准馮鈐陞見。令蘇昌前往粵西。兼管巡撫印務。今明山已有旨補授陝西巡撫。著來京請訓。後再赴新任。廣東省會之地。不可無大員駐劄。蘇昌此時不必前往廣西。即留廣東。兼管撫篆。馮鈐亦不必即行來京。廣東巡撫員缺。已著阿思哈補授。阿思哈回京請訓之後。先赴廣西署理巡撫事務。替換馮鈐來京陞見。俟其回任後。阿思哈再赴廣東新任。將此傳諭蘇昌。明山。馮鈐。阿思哈知之。○戶部等部議覆。兩江總督尹繼善等奏。清河縣治。移駐清江浦。其清江浦地界。與山陽。安東劃分者。計六十二里。縣署以胡璉官房修建。清河縣舊署。以中河通判移駐通判舊署。變價抵修縣署。山陽外河縣丞。裏河主簿。

向駐清江。清江閘官向屬山陽。應併歸清河管轄。外河主簿向駐清河舊治。應移駐王家營。以便護餉過境。教諭移駐清江。貢監生童家在清江者。改入清河縣籍。解犯仍禁舊監。責令中河主簿就近監守。以免黃河阻滯等語。應如所請。惟清河已改銜繁疲難要缺。應增養廉一百五十兩。山陽地狹事簡。應減養廉一百五十兩。從之。○以工部尚書阿桂充經筵講官。○以翰林院侍讀學士汪廷璵侍

講學士錢大昕充日講起居注官。以甘肅涼州鎮總兵達啟為雲南提督。己亥。湖南巡撫陳宏謀奏洞庭一湖橫亘八百餘里。容納川黔粵楚之水。冬春洄出荒灘。夏秋即成澤國。每當諸江水漲之時。賴其浩衍。始免衝溢。自康熙年間。許民各就荒灘築圍墾田。數十年來。築隄數十處。占地二百餘里。遂成與水爭地之勢。現將各圍創開多口。令與湖通。不致阻水。勒碑湘陰。久遠禁止。得旨。所辦甚

是。○廣西巡撫馮鈐奏。臣前在湖南任內。奏准停止加鑄。本年正月。湖南採買粵鉛之員。甫經運回。是以奏請停辦。今接湖南撫臣陳宏謀札稱。該省尚有積存之鉛。並有可開之礦。此後不需粵鉛等語。至廣東除買廣西鉛外。須至漢口採辦。路遠費繁。仍赴粵西採買。為便。現在廣西宣化縣屬之度樓嶺。陰巷嶺。并融縣之古丹山。報產鉛砂。已飭各縣督採。報聞。○庚子。諭軍機大臣等。據陳宏謀奏請

嚴濱湖私築之禁。一摺。所辦甚是。已於摺內批示矣。洞庭一湖。為川黔粵楚眾水之總匯。必使湖面廣濶。方足以容納百川。永無潰溢。乃濱湖居民。狃於目前之利。圍築圩田。侵占湖地。而地方官又往往意存姑息。不行禁止。若湖地漸就堙鬱。則夏秋水發之時。勢必漫衍。衝決為澤國。田廬之患。儻或跨州連邑。所在淹浸。即所有私築圍田。亦安能保無衝沒。利小害大。誠灼然可見者。陳宏謀於此事不

為姁姬之小惠。殊得封疆之體。著傳諭喬光烈。每年親行查勘。間一二歲。即將有無占築情形。詳悉具奏。永以爲例。○又諭。昨閱開泰查審巴塘為匪喇嘛等供詞。其藐視漢官。情形顯露。伊等丞倅州縣職分既輕。且無才識。膽量。所謂辦理夷情。亦不過如昔年辦理準噶爾光景。敷衍遷就。冀圖苟且了事耳。番民等雖兇狡性成。其實中懷畏怯。任封疆者。遇有此不法滋事之徒。果能親身董率。迅速嚴辦。此輩一經懲創。即可長久帖服。若開泰之猥瑣無能。平時既不知示以威重。臨事復遽委微末漢官。全不識事理之竅要。豈綏戢遠番之道。著傳諭鄂弼。到任後。務宜留心。善為整頓。再喇嘛番民等名字。由唐古忒字譯漢。自有一定音釋。乃開泰一任綠營漢員。混行編造入奏。適足貽笑中外。已著軍機大臣更正。再彙列清單。交發總督衙門。向設筆帖式二員。嗣後著於理藩院。熟諳繙譯人員內。揀

選一員。前往補授。一應陳奏事件。如有喇嘛番民等名字。俱著斟酌對音。毋再草率舛誤。將此傳諭知之。○以直隸山永協副將德保為甘肅涼州鎮總兵。○辛丑。諭據傅良奏。吉林失火。燒燬旗房四十三間。民房一百九間。尚能自行修蓋。不致竭蹶等語。旗民房屋。焚燒甚多。恐未能一律修蓋。交傅良詳查。其中間有拮据無力自辦者。著加恩賞賚。

大清高宗法天隆運至誠先覺體元立極敷文奮武孝慈神聖純皇帝實錄卷之六百八十八

大清高宗法天隆運至誠先覺體元立極敷文
奮武孝慈神聖純皇帝實錄卷之六百八十九

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未六月壬寅

上諭

皇太后行宮問安。諭近因貝勒弘瞻妄託織造及稅務監督購買蟒袍朝衣優伶等項。朕曾降旨令諸王等將有無此等事件。明白陳奏。今據諸王奏稱並無此事。貝勒弘瞻如此種種妄為。則諸王所稱俱無此事之語。亦不可盡信。其中實無此事者有之。因無證據。不肯從實陳奏者亦有之。總之或有或無。斷不能逃朕洞鑒。但伊等既稱無有。朕亦不肯深

究。即有此事。朕亦從寬不將伊等治罪。嗣後諸王。惟宜安靜守分。善自檢束。儻因朕此次施恩不究。仍不悛改。有向外任鹽關織造等官。妄行干求之事。經朕知覺。必從重治罪。斷不寬貸。著曉諭王等知之。○又諭曰。阿桂在軍營。殊為出力。且在伊犁辦事。亦甚妥協。著加恩將阿桂一族。由正藍旗擡入上三旗。又諭曰。鄂弼自簡任巡撫以來。實力宣猷。恪勤懋著。昨降旨補授四川總督。正望其及時

効用。忽聞溘逝。深為軫惜。著加恩賞贈尚書銜。入祀賢良祠。所有應得卹典。著該部察例具奏。○又諭曰。鄂弼現在病故。四川總督員缺。著阿爾泰補授。山東巡撫員缺。即著崔應階補授。圖勒炳阿著補授貴州巡撫。圖勒炳阿未到任之先。著劉藻前往署理。雲南巡撫印務。著吳達善就近兼署。○諭軍機大臣等。據方世儒等奏。鄂弼於本月初三日病故。所有四川總督。已有旨著阿爾泰補授。但阿爾

泰由東省赴川。路途稍遠。未免有需時日。現在四川總督事務。仍著開泰辦理。俟阿爾泰到任後。再行交代。前往伊犁。不得因已經革職。諸事視同局外。苟且塞責。儻或稍存成見。謂不過五日京兆。使地方政務愈加闌茸。朕必重治其罪。○又諭。今日據方世儒等奏報。鄂弼於六月初三日病故等語。西安地方政務緊要。阿里衮接到此旨。可即速兼程馳驛前往。將此傳諭知之。○又諭。曰。阿爾泰久任

巡撫。辦理一切。俱屬妥協。今已有旨補授四川總督。著不必來京。即行前赴新任。俟一二年後。再請旨。陛見。阿爾泰精力雖未就衰。但現在天氣炎熱。途中宜量力行走。以副體卹之意。再昨寄鄂弼。有川省應辦事宜。諭旨一道。並著鈔寄阿爾泰遵辦。將此一併傳諭知之。○閩浙總督楊廷璋。浙江巡撫熊學鵬。奏湖屬烏程。長興。二縣。淩港七十二道。為宣洩天目諸山。及苕霅二水。歸湖入海之要道。近

因淤阻。遂致漫淹。紳耆呈請捐貲修濬。前經奏准。現已畢工。河流俱得疏洩。然必計及長久。方資利賴。查各淩港。原建有閘座。早蓄滂洩。藉以無虞。今橋閘損壞一百一處。應將捐用餘銀。俟農隙興工。修理工竣後。責令附近居民。慎司啓閉。再有餘銀。選商生息。以為歲修經久之用。得旨。先行。○貴州按察使趙孫英。奏。新疆苗民。較淳於舊疆。治之之法。在嚴懲漢姦。或入苗寨。唆訟。或種苗地。久占。或開

店誘為盜賊。似此不法。有犯悉遞原籍。則盡去而苗安矣。苗類本多淳樸。惟狎苗譎悍。潛蹤竊劫。猥擢強肆。睚眦逞兇。向照苗例。軍流徒皆折枷完結。嗣後此等苗。語言服飾。與漢人同者。有犯實違。不得仍安巢穴。則莠除而苗安矣。臣又嚴飭近川地方。山深箐密之處。如有村店窩匪者。設法緝獲。各屬皆加意整飭。得旨。好。一切實力為之。○命協辦大學士梁詩正。為大學士。仍兼吏部尚書事務。戶部尚

書劉綸協辦大學士以兵部尚書署湖廣總督陳宏謀為吏部尚書都察院左都御史彭啓豐為兵部尚書禮部右侍郎張泰開為左都御史內閣學士李因培為禮部侍郎仍留江蘇學政任內閣學士張若澄署禮部右侍郎吏部右侍郎程巖提督順天學政○癸卯軍機大臣等覆奏奉旨哈喇沙爾屯田較少現在綠旗兵何以仍有八百名查乾隆二十七年永貴奏回城綠旗兵於哈喇沙爾東至

闕展西至庫車相距千里又有魯克察克吐魯番喀喇和卓托克三庫爾勒玉古爾等城回人居住供應差務請將該處兵丁仍舊存留當經覆准但該城差務雖繁近來辦理已有章程所留之兵自可量為裁減派往烏魯木齊屯田其實應留駐若干令達桑阿酌量辦理報聞○甲辰

上幸簡親王第視疾諭曰許仕榮前於副將任內俸滿來京引見見其漢仗尚好適有重

慶總兵缺出將伊補放今來陞見精神恍惚漸覺龍鍾言語亦不甚明晰總兵為一鎮統率必得精明強幹之員方於營伍有裨許仕榮難勝專閫之寄若以副將用尚可隨營自効著仍留河標副將之任所有重慶鎮總兵員缺著喬冲杓補授○軍機大臣等議覆梅世英一案已革外委池逢春當拏獲鹽船被搶之時即行稟報及王廷佐行賄營求堅拒不受尚知潔已奉公應請開復經歷藍孫璿

見杜章被毆直前喝阻梅世英等因而驚散知府保全到任即將各犯拏獲辦理迅速似應一併免議得旨此案匪徒滋事在知府保全未經到任之前伊於到任次日即親拏各犯全獲經歷藍孫璿喝阻衆人畏懼而散尚知奉公自勉著從寬免其議處池逢春以微末武弁不受王廷佐賄囑亦應示以鼓勵著加恩以把總用餘著三法司覈擬速奏○乙巳諭軍機大臣等據輔德奏查周琬札案內

有寄前任彰德府知府蔣希宗囑令代改呈詞又託安陽縣知縣戴清斷贖賣出地畝各情節業將蔣希宗戴清押送來京與周琬質對俟其到時一併交軍機大臣鞠訊所有查出周琬家中物件其應行解京者即委員解京其應變價者即行變價并其中有應留該省充公之處俱著交與葉存仁接辦至周琬此案內在湖北尚有應查事件著輔德即赴新任辦理可將此傳諭該撫等知之○又諭

前據湯聘奏拏獲假官羅奮鵬一案係湖北通山縣知縣差役緝拏彼時以該縣於隣省差捕之案上緊協緝尚能辦事是以降旨該督將該員出具考語送部引見嗣又據湯聘奏係江西武寧縣知縣聞風差獲等語是一事兩歧明係因該犯在武寧地方緝獲遂將該縣闌入俾得一體邀恩且免處分似此各自居功何足憑信因復降旨傳諭該督等確查此案委係何縣差役緝獲據實具奏毋得

支語調停以致含混茲據宋邦綏覆奏查通山縣原卷係該縣差役夏明至武寧縣沙田地方將該犯拏獲又云武寧縣移文稱係聞風密差捕役盧榮在該縣閔洲巷朱家書館緝拏仍屬朦朧覆奏案情究未明晰著傳諭李侍堯會同明德輔德將此案獲犯緣由秉公詳悉確查據實奏聞想該督撫等俱係新任彼此定無成見不致仍前偏袒使承緝之員妄希僥倖也將此傳諭知之○直隸布政使觀音保奏臣赴天津河間二府查勘蝗蝻俱經該道府督同州縣撲滅阜城景州等處亦經捕除惟故城與東省接壤之處蝻孽生發二三畝至十餘畝不等即時督令該縣多集人夫分路撲盡田禾均無損傷十三日復得甘雨禾稼倍加暢茂除嚴飭該縣等加意防範臣即於十四日前赴東光南皮一帶詳細查勘一有萌動立即撲除不使漸滋貽害報聞○丙午

上詣

皇太后行宮問安。○諭據阿永阿等奏漢陽府知府傅顯承審張紅順等盜案。於去年十一月內奉委會審。今年二月內曾經按察使高誠檄催。始於三月內將後案審明實係贓實罪確。取供詳報。其前案仍未錄供等語。傅顯將後案審明具報。雖非若錫占等有意迎合上司者可比。但既經承審。仍復遲滯數月。設非聞欽差出京。亦將與錫占等同出一轍耳。

且張紅順等於傅顯承審時。業將行劫趙啟賢家情節。供認不諱。則李作樞家之行劫屬實。不問可知。何難一併詳稟。改正從前之謬。乃遲之又久。仍未錄供詳報。則其遲迴觀望已屬顯然。傅顯著交與李侍堯將不能據實審理之處查明。請旨交部議處。並有似此者一併查叅。各直省有司。於承審案件。往往揣合上司意旨。不問案情之曲直。輒轉遷就。遂至顛倒訛謬。是非失實。若不力為整頓。何以

清吏治而肅官常。故朕於此案有心者。特從重處分。其觀望揣摩者。亦不令其幸而漏網。以為有意模稜。不實心任事之戒。該部其傳諭各省知之。○諭軍機大臣等。周琬案內有應行質訊之前任彰德府知府蔣希宗。安陽縣知縣戴清二員。據輔德奏稱。現在委員解送刑部。著傳諭該部。俟其到時。令轉解行在。交與軍機大臣查辦。○又諭曰。納世通奏稱。乾清門侍衛舒常鄂蘭護送霍罕額爾德尼伯克使人行走。並不照管同行。於數日前先已起程。致來使所雇車役潛逃。請將舒常等交部嚴加議處等語。所奏甚是。舒常鄂蘭係乾清門行走之員。特派前往。照看外藩使人。乃任意自便。先期行走。以致失役潛逃。成何體制。舒常著降為三等侍衛。鄂蘭著降為藍翎侍衛。不准在乾清門行走。應更換時著再留一年。○又諭曰。納世通奏稱。霍罕額爾德尼伯克來使已已什克由哈密自雇車輛至

聞展有車戶和尚馬五等將臆壯牲畜乘騎逃走除另辦牲畜送已已什克等起程外並行文駐劄哈密大臣將和尚馬五等嚴拏治罪額爾德尼伯克雖久已投誠究屬外藩部落即在內地回人亦不應出此車夫和尚馬五等竟敢拋棄損壞車輛疲乏牲畜乘騎臆壯牲畜逃走似此妄行不法貽笑遠人情屬可惡務令拏獲從重治罪著交楊應琚三寶德爾格等將和尚馬五等嚴行查拏緝獲時傳集車夫人等即行正法示衆至伊等所有夥計亦不可使之倖免著即將伊等家產鈔沒抵交納世通辦理款項母任伊等疎脫○陝甘總督楊應琚奏粵東山多田少民食半資粵西向於省城佛山二處額設米行聽商投行發賣相安已久迨前督臣班第前撫臣鶴年添設經紀米穀總埠本為平價起見然恃係獨行把持更甚臣抵任裁革緣辦理未有成效是以設立裁汰均未報部臣在粵時

曾飭地方官遇應補倉項在市買糴不得將廣西穀船截買殷實之家聽其收買不得拘泥因積例禁俾西商踴躍轉輸粵東民食充裕至陝甘牙行本少遠來商販人地生疎必藉牙行領售評價與粵東總埠不同無庸議革再陝甘接壤外三面俱無鄰省一遇歉歲輓運無從勢必仰資官粟應於豐熟之年動項收買以備平糴得旨可謂通達時務之論緣蘇昌所奏未晰故有此問若卿所云乃新立之總埠而非舊有之牙行又何必致問耶○丁未山東巡撫阿爾泰疏報新城昌邑濰縣等三縣乾隆二十六年勸墾田地六十五頃二十三畝有奇○戊申諭朕此次駐蹕熱河所有吏兵二部應行引見官員前經降旨每月彙齊帶赴行在引見計八月間巡幸木蘭其吏兵二部月選官著仍照向例文員內通判州縣等官武員內八旗護軍校驍騎校及外省送到之補放水手官驍騎校并年滿

千總等官弁俱著留京辦事王大臣驗放餘俟回鑾後帶領引見○諭軍機大臣等據李因培奏松江府屬南匯青浦二縣文武生員內不乏作奸犯科之徒緣數年以來官吏疊更案多不結以致善惡無所懲勸等語過來江蘇吏治因循闡茸已成痼疾一切應行質訊詞訟不能即時分別勸懲早為完結致使不法劣生從中播弄輾轉滋擾看來此等惡習該省不獨二處為然著尹繼善莊有恭實心整頓嚴飭州縣各官嗣後辦理案件不得任意延緩儻有仍前懸案不結並苟且姑容之事一經察出惟該督撫等是問可將此傳諭知之○刑部議准盛京將軍含圖肯奏稱新例容留逃人於本罪加一等其加等未經分晰嗣後不知情者本罪杖一百加杖六十徒一年知情者本罪鞭一百枷號一月加杖六十徒一年再查漢軍正身犯徒流罪者已改不准折枷家奴折枷之例亦應改不准折

枷實徒滿日仍歸旗管束從之○己酉上詣

皇太后行宮問安遣官祭

火神廟○諭上年直隸偶被偏災屢經降旨將被災州縣及與災地毗連各屬分別蠲緩並令將緩徵帶徵之項槩緩至本年秋成後徵收轉瞬即屆開徵例應按期輸納因念入夏以來雨澤應時二麥均已收穫現在禾黍暢茂大田亦可望有秋但小民當積歉之餘元氣尚未能驟復若令新舊併徵閭閻仍不免拮据著再加恩將應徵二十七年并節年緩徵帶徵未完銀糧緩至來年麥熟後按數徵收以紓民力該督其速飭所屬通行曉諭俾畿輔農民豫聞此旨益加歡慰於乘時力作尤有裨益該部即遵諭行○又諭曰御史朱續經自天津巡漕事竣復命摺奏直隸胥役歛派車船勒索賄放方觀承不能督率屬員力鋤奸蠹等語已傳諭方觀承令其將接

到該御史知會後。曾否嚴查究治之處。據實覆奏矣。地方蠹役。借端派索。原難保其必無。惟在該管官加意稽察。嚴行懲創。若輩自然斂跡。方觀承在直年久。每存息事寧人之見。不免轉務姑容。朕亦不能為之諱。且前此辦理疏消積水事宜。不能及時整頓。經朕察知。特派大臣履勘。業將該督交部嚴加議處。以示懲儆。方觀承屢經訓飭。諒當痛自悛改。而言者動以為歸過之地。在該督身任封疆。於關繫民生事務。並不實力董率。咎固難辭。但直隸通省事務殷繁。又值災歉之後。措置自不無竭蹶。持論者置身局外。坐言易而起行難。使易地以處。恐其所展布。或未必能如該督之勉力支持也。且該督今歲辦理延緩。致有貽誤。尚與不恤民瘼有心。朦混者不同。即各省督撫中。似此模稜觀望。幸而未致周章者。亦或不少。且過而能改。尚可冀其自新。方觀承如自知愧悔。湔滌前非。正宜稍假時日。

以觀後效。倘其因循玩愒。復蹈前轍。斷不能逃朕洞鑒。自必明治其罪。又何能屢邀寬典乎。至該御史請設專司河務大臣。以資辦理之處。尤為非是。直隸曾設立河道總督。亦不過專辦永定河防汛工程。此外全省河渠。原非所屬。至營田水利工程。辦理數年。因南北地勢異宜。亦未著有成效。是以仍令直隸總督兼司河務。現派尚書阿桂侍郎裘曰修往來直隸各屬。會同地方大員。詳勘應行修防濬築事宜。較之設立河員。與地方官立異掣肘者。固屬有利無弊。即嗣後遇有應行修濬之工。隨時特派大臣督理。察勘自足。收相機集益之效。該御史所奏設立專員之處。拘泥成見。實於河務無裨。著不必行。○庚戌。諭據觀音保奏。交河縣境內。於四五月間。蝗蝻生發。該縣並不據實具報。又不上緊撲除。以致蔓延數十里。春麥早禾。俱被傷損等語。地方官遇有蝻孽萌生。即應及時撲捕。殄滅無遺。

庶不致蔓延滋害。況該縣上年積水之後。秋麥未能偏種。全賴春麥早禾速為接濟。乃該縣知縣甘怡。先既不能豫為防範。嗣又不能上緊撲除。并且匿不詳報。實屬玩視民瘼。貽害地方。著革職。拏問。交部治罪。至該管道府所司何事。竟漫無覺察。乃爾。著方觀承查明。叅奏。一併交部議處。至摺稱該縣被蝗之地。現在翻耕另種。農民無力耘鋤。著該督速即查明。酌借籽種口糧。俾得及時趕種。晚稼以

冀有收。副朕惻隱民隱至意。該部遵諭速行。○又諭。向來欽差大臣出使高麗。聞入境時。該國王備輿迎候。此固屬國敬禮天朝。勅使以昭恭順。但滿洲大臣素嫻鞍馬。而身膺使命。四牡宣勤。尤不應乘用肩輿。自圖安適。著該衙門行文該國王。嗣後欽差到境。止須豫備馬匹。其舊用肩輿之處。永行停止。在奉使者。既不至耽逸一時。致忘習勞之義。而外藩亦稍省繁文。以示體卹。著為令。○又諭。據海

明等奏稱。訥蘇肯帶領官兵。由烏魯木齊將馬一千三百匹。妥辦送至喀什噶爾。葉爾羌。阿克蘇。查驗分給。阿克蘇馬四百匹。俱有臚壯三四分。照數收訖。除訥蘇肯受恩深重。無庸另行邀恩外。其餘官員。請照例議叙。兵丁等賞賚。至解送馬匹之原任御史觀成。係効力贖罪之員。應仍照上年之例。無庸議叙。等語。著照海明等所奏。訥蘇肯觀成不必議叙。外其餘官員等。照例議叙。兵丁等酌量獎賞。

諭軍機大臣等。熱河一帶六月以來。屢得陣雨。復於二十一日得雨。深透。聞京師十三日得雨。後天氣頗覺燥熱。未審近日曾得雨否。如已得有透雨。則已。儻尚在望雨。城中現有善求雨之厄魯特回人。可即令其敬謹祈禱。著傳諭留京王大臣等知之。○辛亥。諭曰。弘映前往朝鮮國出差。即由京起程。不必來熱河請訓。但出使外藩。一切務宜示以正大。不可失之猥瑣。入境時。只宜乘馬。不得坐用

肩輿。即該國王備輿迎候。亦不可乘。○壬子。諭曰。簡親王効力多年。茲聞溘逝。深為憫惻。著貝勒弘瞻帶領侍衛十員。往奠茶酒。○癸丑。

上詣

皇太后行宮問安。○甲寅。諭曰。方觀承奏。據熱河道良卿報稱。富貴山等處木植。有木商呂均成。領票砍伐。現經該廳員等查其堆放木植。有在封禁界牌以內者。恐不無越界影射。

書奏

十

情弊。著侍郎安泰帶同工部司官一員。由驛前往。著熱河道派廳官一員。隨往查勘辦理。○諭軍機大臣等。據方世儒奏。西安省城以北。至沿邊一帶。春夏之間。未得透雨。內定邊榆林。懷遠。米脂。四縣。與近省之咸寧等十一州縣。夏禾俱成偏災。又另摺所奏。延安府屬之靖邊縣。秋苗間被雹傷等語。延榆所屬被災州縣。二麥既已歉收。自宜及早補種秋糧。其被雹處所。亦當趕種雜糧。苡豆。以冀有秋。

著傳諭阿里衮。將咸寧及定邊等州縣。查明實在貧乏戶口。於秋糧未收以前。有應借給常社倉糧接濟者。即行照例借給。其被雹地畝。無力農民。並著酌借倉糧。以資工本。阿里衮務須悉心經理。不可使屬員視汝為五日京兆。遂草率了事。以致吏胥中飽。使貧民不得均霑實惠。可將此傳諭知之。尋方世儒奏。五月二十二。三。四。等日。近省西。同。各府。州。暨省北郡縣。均獲甘霖。六月初八至初十日。復得透雨。秋禾長發。未種地畝。補種齊全。得旨。欣慰覽之。○乙卯。諭。據明瑞等奏。稱副護軍叅領七十六扎薩克頭等台吉達瑪林扎布。帶領官兵。自烏里雅蘇臺。補行解送伊犁。孳生羊三萬隻。到日照數交納外。又在途孳生羊羔一萬三千十七隻。俱已交納訖。請將副護軍叅領七十六交部議叙。台吉達瑪林扎布。暨兵丁等。請賞給緞布等語。著照明瑞所奏。將副護軍叅領七十六。交部議叙。扎薩克

書奏

十

頭等台吉達瑪林扎布。暨兵丁。俱分別賞給緞布。所有應賞之緞布。著成衮扎布。照依前次。在烏里雅蘇臺收貯緞布內。動支賞給。諭軍機大臣等。永貴等奏稱。喀什噶爾為總辦回部事務之地。向係挖穆齊圖辦理。續調英吉沙爾總兵額僧額協辦。今挖穆齊圖進京。惟額僧額一人辦事。而奉派總兵台布。恐不如額僧額之熟悉。請即調赴英吉沙爾辦事。又駐劄賽哩木拜之原任察哈爾總管衮布策凌。不甚諳練。請將英吉沙爾侍衛伊凌阿。調往辦事等語。額僧額著仍駐喀什噶爾辦事。台布著調往英吉沙爾辦事。伊凌阿著調往賽哩木拜辦事。○是月。江南河道總督高晉奏。清江束水壩。蓄洩洪澤湖水。為全河第一關鍵。去年春間。口門留寬二十丈。本年留十七丈。而水勢較去年為大。今屆大雨時行之候。湖水有長無消。詳加相度。將清口束水東壩。拆去十丈。連舊口門。共寬二十七丈。

實錄卷一百九

五

上下一律。以資宣洩。得旨。好。正厘念此事也。○雲貴總督吳達善奏。鶴麗鎮之石鼓阿喜二汛兵既酌減。守備外委等員。應撤回鎮。每年於千把內。輪委一員防守。下部知之。

實錄卷一百九

五

大清高宗法天隆運至誠先覺體元立極敷文奮武孝慈神聖純皇帝實錄卷之六百八十九

大清高宗法天隆運至誠先覺體元立極敷文奮武孝慈神聖純皇帝實錄卷之六百九十

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級奉常加二級軍功紀錄一次戶部理

總載官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功十九級隨帶加二級又加二級直隸路內大臣戶部尚書鑲藍旗滿洲都統軍功紀錄五次

奉常紀錄十四次臣德璉經筵講官太子少保工部尚書紀錄六次臣曹振鏞等奉

敕修

乾隆二十八年癸未秋七月丙辰朔享

太廟遣怡親王弘曉恭代行禮○吏部奏大學士梁詩正應兼何殿閣及尚書銜得旨梁詩正著為東閣大學士兼吏部尚書○鑄給山西平魯營都司關防從調任巡撫明德請也○予故四川總督鄂彌祭葬如例諡勤肅入祀賢良祠○丁巳諭日常鈞奏查閱河州鎮營伍情形一摺前經降旨遇各省應行查閱營伍之年由兵部奏請或特派大臣或即著該督撫就近巡閱所以並及巡撫者原指山

東山西河南三省巡撫兼提督者而言若其餘有總督省分巡撫所轄僅撫標數營此外通省武弁皆非其正屬巡撫本不得捺其舉劾也昨鄂彌奏楊應琚遠駐肅州所有陝省營伍難以隨時稽察是以准令該撫巡查今常鈞與總督同在一省情形較鄂彌不同乃亦仿而行之甚屬失當且據奏稱遊擊史自龍高元龍二員年逾六十僅能騎射誠恐暮齒因循致滋貽誤囑令鎮臣張和察看等語常鈞現經查閱而於將弁賢否仍不能示以勸懲於營伍究何裨補恐各省中似此者尚不能免若遇喜事之人或借此越俎干與而似常鈞之虛應故事者又不過潦草塞責毫無實濟殊非整飭戎行之意且所至徒費供億酬應於地方營伍亦有損無益著通諭各督撫嗣後除山東等省仍聽巡撫查閱外其現有總督之省著歸總督辦理或總督不能與巡撫同駐一城如廣西等省相離寫遠一

時難於徧歷者。亦著隨時酌量。會商具奏請旨。不得仍前徑行。徒滋紛擾。○諭軍機大臣等。明瑞奏涼州莊浪移駐伊犁官兵。仍領滋生紅白賞銀一摺。現在移駐官兵。籌辦業已豐裕。毋庸再議賞給。今西安官兵陸續移駐涼州莊浪。著傳諭楊應琚將此項滋生銀兩。留存該處。俟官兵等移駐涼州莊浪後。即作伊等紅白賞賚之用。戊午。諭軍機大臣等。熊學鵬奏查沈作朋家產供詞內。有將伊子

沈煥。用刑夾訊一節。辦理甚屬錯謬。沈作朋縱盜寃良。有心欺罔。自有應得之罪。原與伊子無涉。且其獲罪。亦非同悖逆重犯。必應坐及妻孥。今因詰訊。有無寄頓情由。將伊子刑夾。殊非情理。況該撫所稱用刑夾問。亦不過虛應故事。於紙上敷衍成文。以見其辦理之認真耳。不知其虛偽之術。自以為巧於嘗試。而其實欲蓋彌章。已難逃朕洞鑒。即如摺內所稱沈作朋家產。有伊兄沈作梓當鋪一所。

共銀一萬三千餘兩。內沈作朋祇有本銀一千兩等語。沈作朋歷任監司藩臬。現據伊子從任所帶回銀數千餘兩。交他處典鋪生息。置買貨物。豈有自己當鋪。止存銀千兩之理。且沈作朋置辦產業。俱係伊兄經理。安知非沈作朋明知有此案敗露。早於伊兄沈作梓名下。豫留地步乎。此中應行研究處。轉不詳悉。推問。輒將伊子夾訊。徒示嚴求。其誰欺乎。熊學鵬前在廣西巡撫任內。題參知府松柏

一案。顛倒錯謬。經朕降旨訓飭。今復如此飾說。試問該撫此等伎倆。能於朕前行之乎。所有沈作朋財產變價銀兩。著解交內務府查收。熊學鵬著傳旨申飭。並將此傳諭知之。○已未。

上詣

皇太后行宮問安。○諭軍機大臣等。據莊有恭等奏訪聞金山衛生員徐筠。南匯縣生員徐周柄。俱從楊維中學習邪教。喫素誦經。並於

各犯家中搜出金剛彌陀經及懺圖冊。訊係彌勒邪教支派。現在分別審究。並咨明熊學鵬一體嚴查會辦等語。地方匪徒傳播邪教惑人聚衆。最爲人心風俗之害。徐筠等身列青衿。亦私藏經懺。受其蠱惑。則愚民之轉相煽誘。流入邪匪。更不待言。該撫等自當嚴行查究。將傳經設教之首犯。按律定擬。以示懲儆。至其餘案犯。如訊明止係喫齋誦經。並無歛錢傳播等事。即分別予以懲創。照例完結。不必輟轉株連。再此等設教開堂之人。敢襲爲誕妄悖謬。實屬倡邪首惡。既經敗露。自當杜絕根株。但邪匪支派流傳。愚人易爲誘惑。恐各處未經發覺者。尚復不少。嗣後如有續獲邪教。其傳播首犯。即訊無悖逆情節。罪不應死者。俱著酌量發往烏魯木齊等處。安插當差。不可仍留內地。以致蔓延貽害。亦不可使奸胥蠹役。借搜查邪教名色。羅致干連。徒滋紛擾。將此傳諭。莊有恭等並令熊學鵬知

之。又諭據德爾格奏稱。開展屯田所收穀石。自二十六年十一月起。至本年三月止。共糶銀二萬八千兩有奇。本年六月。又糶銀一萬二千三百兩有奇。已歸入正項動撥等語。聞展屯田收穫。支給官兵外。仍節次盈餘至四萬餘兩。辦理甚善。若增兵開墾。糶價充公。可省內地解費。殊爲有益。但該處屯田無多。又經裁撤兵丁。何以有餘。若此。著傳諭德爾格。所餘穀石。作何出糶之法。收穫再多。俱能如此。出糶否。派兵增墾。尚可容若干人。即查明具奏。再烏魯木齊屯田多。而商賈衆。哈喇沙爾亦有屯田。若能照開展出糶更善。併傳諭旌額理達桑阿知之。○又諭曰。新柱等奏稱。伯克薩里。此次前往巴達克山。索取齊特喇爾地土人戶。甚屬奮勉。現在阿克蘇伊什罕伯克頗拉特解任。請以薩里補授。其隨往之阿布拉三。亦請賞給緞疋等語。新柱等昨將巴達克山遵檄送還侵掠一事具奏。已賞

給薩里世職。阿布拉三緞疋。薩里著照所請補授。阿克蘇伊什罕伯克。阿布拉三。仍遵旨記名陞用。○又諭曰。新柱等奏稱。往諭巴達克山素勒坦沙。即將所掠齊特喇爾土地戶口什物。俱已交還。但從前強詞飾辯。仍有應得之罪。現將來使暫留葉爾羌。候旨遵行。再博羅爾頭目沙瑚沙默特。因所屬復還故地。感激天恩。遣使奏謝。可否准其入覲等語。素勒坦沙。因大臣等檄責。強詞飾辯。乃外藩初附。未諳體制。及薩里往諭。即凜遵約束。尚屬恭順。不必深究。昨已加恩賞賜。即著來使齋回。至沙瑚沙默特。遣使謝恩。著准其隨同本年輪班入覲之伯克等前來。俱著傳諭知之。○補行乾隆二十七年分軍政。廣東省年老官三員。福建省罷輟官一員。盛京罷輟官二員。江南省罷輟官一員。年老官一員。黑龍江罷輟官一員。分別處分如例。其曾經出兵打仗之年老官七員。賞給全俸半俸有差。○予

故和碩簡親王奇通阿。祭葬如例。謚曰勤。庚申。諭曰。英廉現丁父憂。所有戶部及三庫印鑰事務。著舒赫德暫行管理。其錢法堂印鑰。著劉綸暫管。戶部堂官現在人少。劉綸著留部辦事。不必隨往木蘭。又諭據楊應琚等奏。平涼等州縣稟報。護軍叅領宗室松年沿途需索銀兩不遂。踢傷管號家人等語。松年由新疆奉差回程。輒敢騷擾驛站。到處需索。并踢打州縣家人。賒欠綢緞價值。種種肆行無忌。殊屬不堪。該督撫據實叅奏。即將松年留肅候旨。所辦甚是。松年著革職。此等不法之員。本應永遠枷號示衆。但宗室向無枷號之例。著即在肅州永遠圈禁。不得令其出入。凡有一切差遣過肅官員。即令往視。並曉諭伊等。松年沿途騷擾勒索。因係宗室。僅予革職圈禁。若常人。有似此者。定行永遠枷禁。俾往來奉差人員。觸目警心。共知省惕。○諭軍機大臣等。近年以來。發遣新疆等處人犯。

有在途脫逃者。拏獲之日。將本犯立置重典。緣此等罪人。皆係作奸為匪。不可容留內地之犯。其情性本屬兇狡。又憚於出口遠行。不遵王法。乘間潛逃。僉差遞解之地方官。理應加意嚴緊。慎重派委。方不誤事。其因僉差不慎。致有脫逃之員。向來未經定有處分。易致怠忽從事。現據託庸吳達善題報。發遣巴里坤烏魯木齊等處。逃犯之失察各員。已交該部另議辦理。並著傳諭各督撫。嗣後各省將

一年內發遣新疆人犯。查明有無脫逃。及已未拏獲之處。於年終彙摺具奏。○又諭據楊應琚奏。現在三處織造。辦理烏魯木齊等處綢緞。已足敷今歲貿易之需。但每歲需用各項綢緞。其應行織辦之色樣。及數目多寡。均難豫定。請嗣後凡下年應需綢緞。於本年將各項數目色樣。先期奏明。請勅下三處織造。照依辦送等語。著傳諭該織造等。嗣後辦理運送烏魯木齊等處綢緞。俱俟該督奏聞後。

將各項數目。及色樣清單。交與該織造等。即行如數照式。豫備製造。俾辦理各項綢緞。不致有多寡參差之慮。而於回人貿易亦有裨益。○刑部議准。陞任貴州按察使趙孫英奏。稱奸淫人妻。本夫素不知情。一旦敗露。姦婦羞愧自盡者。將姦夫拏獲審實。例應止科奸罪者。改為杖一百。徒三年。從之。○又議覆陞任貴州按察使趙孫英奏。稱凡遇搶奪財物。無論白晝黑夜。聚至十人以上。又執持亮器。

即照糧船水手例。為首者依強盜律治罪。為從。減一等。又稱搶奪財物。或因事主指認。或懼告發。頻起殺機。立斃其命。為從之犯。幫同下手。即科以圖財害命之條。亦屬罪所應得。請嗣後事主未經格鬪。或雖經格鬪。臨時有意故殺者。為首。及下手加功之人。統照圖財害命例治罪。均應如所請。從之。○辛酉。調鑲藍旗漢軍都統阿桂。為正紅旗滿洲都統。以吉林副都統傅良。為鑲藍旗漢軍都統。鑲黃

旗蒙古副都統福珠禮。為吉林副都統。吏部郎中阿敏爾圖。為鑲黃旗蒙古副都統。○豁除江蘇長洲。元和吳縣。太湖廳太倉鎮。洋上海等七州縣。廳坍沒占廢田地銀二百七十兩。有奇。米。豆。三百一十石有奇。○壬戌諭曰。沈作朋等縱盜。寃良一案。經欽差阿永阿。葉存仁等審明各情節具奏。竟係湖北通省前後辦理之督撫藩臬。上下聯為一氣。終始扶同。公行欺蔽。坐致奸盜久稽顯戮。良民寃

累經年。為通省人民所共憤。而有司莫敢為之舉發。昭雪者。似此肆行罔上。實為從來罕見之事。是以命將沈作朋。周琬。愛必達等官犯提至熱河。親加研鞫。據愛必達供實係辦理錯誤。若因後案發覺。再將前案翻改。惟恐有礙顏面。所以未經推求。此則復成何語。朕初以李作棋家被盜一案。愛必達為屬員。朦混。咎在懵懂。是以僅予革職。發往伊犁効力贖罪。既經查出趙啟賢家盜案。秦鏞原報詳

文。愛必達輒將詳內無關緊要之處。逐層批駁。則是有心迴護矣。愛必達身為總督。欲顧自己顏面。竟置奸良不問。現今審出實情。身罹法網。顏面更復何在。愛必達為滿洲世臣。乃負恩欺蔽至此。其罪尚可逭乎。周琬前為刑部司員。頗稱強幹。今於此等緊要盜案。惟聽信沈作朋之言。扶同徇庇。既經親自提訊。仍任盜犯狡翻。轉將趙泰交叅劾。其朋比為奸。情弊已屬顯然。至其平日任性乖張。亦幸

而未與後案耳。設令其仍在巡撫之任。其堅護前非。存心枉縱。更不知何所底止。親鞫之下。周琬已俯首無辭。至沈作朋縱盜寃良於前。復播弄阻撓於後。始終釀成寃滯。實為此案罪魁。且現供失入強盜。關係四命。若失入事主。罪止軍流。夫宜誅之強盜。四命何妨。不宜罰之寃民。一家已破。設司臬者皆如此存心。天下可以無盜。但輕罰告盜者。閭閻尚得安居乎。錫占係知府大員。專委承審重案。乃

有意遷延致沉寃積年未白。陳銓、陳文樞單言揚等逢迎鍛煉均罪無可貸。但寃係受上司挾制。覈其情罪與沈作朋、周琬有間。高誠明知前案寃抑。乃辦理遷轉。不即據實具奏。實為庸懦無能。但將後案實情定讞。尚無有心欺飾。以上各情節。經朕親訊。無不水落石出。所有各官犯應得之罪。著行在太學士九卿定擬速奏。並將此通諭各督撫知之。尋奏沈作朋等縱盜寃良。朋比欺罔。按律定擬。沈作朋、周琬愛必達應斬立決。錫占應發伊犁當差。單言揚、陳銓、陳文樞均應發巴里坤當差。得旨。沈作朋著即處斬。周琬著從寬改為應斬監候。秋後處決。愛必達著從寬改為應絞監候。秋後處決。餘依議。○諭軍機大臣等。沈作朋等縱盜寃良一案。經朕親行廷鞠。無不一一供吐。水落石出。已明降諭旨。令太學士九卿定擬具奏矣。據趙泰交供稱。湖北省向有紹興作幕人徐掌絲弟兄及盧培元等

盤踞多年。串通一氣。與地方官交接往來。徐掌絲在臬司沈作朋署內。伊弟即在愛必達署內。伊妹夫盧培元即在巡撫湯聘署內等語。是此案各衙門批駁俱出伊等數人之手。其為彼此關通。朦蔽情節顯然。在督撫藩臬等身為大員。承辦此等大案。竟至顛倒是非。行私罔上。固不得諉過旁人。稍為寬宥。但此等劣幕。輒敢暗通聲氣。從中把持。為地方之害。不可不明正其罪。俾凡作幕者共知儆惕。著傳諭李侍堯查明該犯等現在何處。或潛往他省。速即行文鎖拏。解交刑部會同軍機大臣審訊。如或已經回籍。即著熊學鵬查明解京。毋得延緩。致令聞風兔脫。○廣西巡撫馮鈐疏報。貴縣宣化永淳歸順博白勸墾水旱田地塘共稅一頃九十四畝有奇。天保勸墾田埤一百二十八埤一百一十一伍有奇。○以少詹事李宗文為內閣學士兼禮部侍郎。○旌表守正被戕之四川南部縣民何長

清妻何氏。○癸亥。

上詣

皇太后行宮問安。○諭曰。劉統勲著隨往木蘭。梁詩正不必來熱河。著留辦內閣吏部事務。○又諭。湖北盜犯張洪舜等前後兩案。承辦之上司屬員。種種扶同欺蔽。實為情理所不容。歷來所罕見之事。前後所降諭旨甚明。朕之所以弗憚諄諄告誡者。不特為楚省整綱飭紀。亦正為直省各督撫提撕警覺耳。國家

立法。弭盜所以安良。乃沈作朋等輒將賊真盜確之犯。立意翻案縱脫。轉致冤累良民。及後案復發。仍輟轉護非。並欲消弭前案。天下豈有甫經開釋之盜犯。旋即彫剗敗露。而仍疑前案之尚非真盜者。此雖三尺童子。亦知其斷無是理。乃轉於此吹求駁詰。是誠何心。若論反坐常例。未的決者。原問官得減等定擬。此在州縣微末之員。承辦偶爾舛誤。或可依例稍從末減。若督撫藩臬。為地方倚任大

僚。案情由其覈定。乃敢上下聯為一氣。掩蔽欺朦。幾致覆盆莫白。況事主李作棋等冤累經年。一家已破。豈得復借決與未決為解免之詞。伊等之縱盜寬良。鉗制屬員。朋比為奸。天下所共知。本不待更訊。所以親加鞠訊者。特示嚴懲。以申國法。而抒民憤。且使天下司憲者。知善良不可濫寬。讞牘不容淆亂。於明罰勅法之中。寓懲一儆百之意。昨訊沈作朋供。強盜關係四命。事主罪止軍流。此語尤為

喪心病狂。夫審理盜案。亦祇論賊盜之真確否耳。既已賊真盜確。即按律多誅數人。亦法紀之所應得。若無辜之百姓。雖一笞一杖。亦不得妄加。何得較量科罪之重輕。概置黑白於不問。朕於各省臬司陞見時。每剴切訓諭。及之初不料沈作朋等竟藉口於人命攸關。轉以縱盜寬良為得計。甚至趙啟賢家被刦盜深。以前案事主坐罪為鑒。不敢赴控。若非秦錄之立時獲盜起賊。稟詳切實。則強刦得

以肆行無忌。問問尚可安居乎。且秦鑠及遊擊李華搜拏賊盜時。當盜犯之家。先令捕役脫衣搜檢。以防他日栽誣地步。正以愧前案枉縱之上司。而伊等猶恬不知恥。仍欲售其朦混消弭之故智。不畏功令。不恤人言。公行欺罔。若似此而不為之整頓。地方尚有何事。不可為乎。此案沈作朋實屬罪魁。立即正法。愛必達護非欺罔。周琬朋比為奸。本均應正法。但以案中尚未寬及人命。故從寬改為監

候。此後各督撫藩臬等。俱當觸目警心。共知鑒戒。毋蹈覆轍。著將此通諭中外知之。○又諭曰。李祜以孫承祖其稱名仍作世子。於義似屬未妥。著交禮部考據經書。及歷代史冊。自來有無世孫名號。並檢查會典。該國從前曾否有似此立孫之事。務令悉心詳細稽考。折衷一是。具摺奏覆。○諭軍機大臣等。據永貴等奏稱。住居吹地烏瓦克部落之阿哈拉克齊雅納什拜。年近七十。率伊子愛圖干等

告稱。向未經行回地。因向慕天朝威德。幸及此身尚存。特來瞻仰。並呈獻馬匹。已賞緞遣回等語。吹塔拉斯沙喇伯勒俱在伊犁以西。此吹地未知即附近塔拉斯之吹否。若果即其地。原係厄魯特游牧。我師平定準夷後。駐兵伊犁。恐地方遼濶。或有右哈薩克布魯特潛來厄魯特境內游牧。亦未可定。前阿桂、明瑞等於塔爾巴哈台等處。雖加意巡查。其吹阿勒和碩尚未前往。著傳諭明瑞等酌派人

員。率同熟諳地理之厄魯特。前往吹塔拉斯阿勒和碩沙喇伯勒等處巡查。若哈薩克布魯特等仍有越境游牧者。即曉示該頭目。速行驅逐。不可令伊等闖入內地。○補行乾隆二十七年分軍政。江寧省罷職官一員。年老官一員。雲南省貴州省年老官三員。有疾官二員。才力不及官一員。四川省年老官三員。才力不及官二員。分別處分如例。○甲子。諭曰。明德審擬洪洞縣民鄭凌。放鎗捕賊。致傷

繼母身死一案擬以凌遲具題。三法司以本內所敘情形事由捕賊放鎗時適伊母在房靠牕窺矚鎗砂散開誤傷殞命黑夜之中實屬思慮所不及覈其情法尚屬兩歧駁令該撫另審妥擬等語。擬議尚未盡允協。夫所謂過失殺者其在平人固無可議即以本家親長而論亦祇於伯叔兄弟尚可量從末減若子孫之於祖父母父母即使實出無心原情定擬試問為子若孫者尚何心偷生視息覲

顏自立於人世乎春秋許世子止之義深可味也。但究係犯時不知準情酌理自當免其凌遲已屬寬典即定以縲首立寘於法庶為平允著刑部另將律文斟酌定議奏准頒行至此案鄭凌致死繼母陳氏放鎗雖由捕賊然既係繼母又同院居住豈不知伊母卧房所在輒向放鎗致死尤不當令其苟活人世致乖倫理著三法司覈擬具奏尋議查向例子孫過失殺祖父母父母止擬杖一百流三

千里實未允協請嗣後子孫有過失殺祖父母父母者擬絞立決毋得仍照舊例並通行各省載入例冊從之○乙丑

孝懿仁皇后忌辰遣官祭

景陵○補行乾隆二十七年分江南廣東雲南貴州省軍政卓異官十一員分別議敘如例○旌表守正捐軀之直隸唐山縣民王忠子妻李氏○丙寅

上詣

皇太后行宮問安○諭軍機大臣等方觀承奏正定府管河通判員缺請以良鄉縣知縣張若瀛陞署一摺前因張若瀛辦理諸事頗稱強幹是以交該督記功註冊遇有陞遷酌量題擢不應僅將河倅間曹奏請陞署且該員係知縣今以題陞通判俟三汛後方得實授是名為遷擢而轉致淹滯所謂非曰愛之其實害之甚非所以示鼓勵著傳諭方觀承俟有同知知州缺出時即以張若瀛陞用其正

定府管河通判著另揀合例之員奏補。又諭據楊錫紱奏天津一帶田禾種植者約計不過十分之六七。交秋得雨後止可補種。收麥秋成未免歉薄等語。天津地勢低窪。又因放水稍遲。已誤春耕。今田禾復不能遍插。秋成恐致歉收。若不及早趕種。收麥雜糧貧民其何以資接濟。未審該督現在作何查辦。看來直屬地方夏間得雨稍遲。蝻孽間發。雖經飭令分路上緊撲捕。禾稼恐不無損傷。未知各處田禾光景究竟若何。將來不致有礙秋成否。並著方觀承作速查明據實奏聞。以慰廑念。毋稍粉飾。將此傳諭知之。尋奏天津一帶窪地水涸後無不趕種。晚禾最後始種。收麥莖豆其已涸不種者。綠濱海地多荒。城惟產城草。狀如檉柳。紅者名黃鬚草。綠者名鹽蓬。紅者結子榨油和麪可作餅食。綠者以幹為薪。以枝葉燒灰入水。漚為城塊亦偶出。鹽百姓藉為自然之業。尺寸必爭。楊錫紱所見

當是此種城地頗類拋荒。故稱所種不過十之六七也。臣細詢府縣。此種荒地青草生則城氣退。乃可試種。至蝗蝻生發處。所田禾間有損傷。補種收麥仍望有收。近日各屬得雨早晚禾稼無不茂碩。天津各屬皆有八九十分收成。得旨覽奏俱悉。刑部議覆。江西按察使顏希深奏稱。每年正六八月立決重犯。定例俱不行刑。州縣於停刑期內雖奉部文亦必匝月後始行處決。衙署距監獄不遠。釘封公文尤為吏胥所屬目。意料無難漏洩。最易應如所奏。嗣後臬司奉准部文按計程途日期。如由府轉行州縣在停刑期內即將部文密存司署。俟計算行至州縣已非停刑日期。即釘封專差馳遞辦理從之。又議准顏希深奏請。嗣後監犯患病除輕病旬日即痊者仍照例毋庸展限外。如遇病重州縣將起痊月日及醫生醫方先後具文通報。成招時出結送府州於審轉時查察加結轉送。准展

限一月。倘係假病立即報叅府州扶同一併開叅。其委員驗看取結一概刪除從之。丁卯諭軍機大臣等據陳宏謀奏武昌府屬馬蹟嶺地方離城寫遠有吳姓一族盤踞為匪。歷經懲創怙惡不悛。請將舉族遷徙各縣城內編入保甲管束等語。此等積匪既恃巢穴險峻肆竊無忌。久為地方之害。自應遠徙他處以絕根株。但該族三十餘戶男婦大小將近百人。其鼠竊狗偷習慣已成。自然若祇令徙入武昌咸寧各城安插縱管束甚嚴。安保其不故智復萌。貽累閭里。莫若將該族分徙安西瓜州為一處。巴里坤為一處。烏魯木齊為一處。使敗類析居。羽黨四散。庶不致聚集為匪貽累地方。現在陳宏謀諒已離楚。著傳諭李侍堯即行妥辦。俾匪巢一清而險僻之區永得安堵無虞。并將該族等分作數起。遴選幹員押解前往。無致中途疎縱滋事。戊辰諭據留保住奏稱青海地方西南界連川

藏沿邊與內地合州沙州接壤。凡民人唐古忒交涉命盜及玉舒番子扎薩克等支領俸餉承襲官職並徵收巴彥囊產等部落馬匹賦稅辦理藏使行糧等項。非給與印信恐致滋弊貽誤。應請頒給西寧辦事章京關防等語。前因西寧無事不必專駐大臣。是以將副都統撤回。止留部院章京一員帶領筆帖式一員在彼辦理事務。今因大臣撤回。地方官員即有妄行給票舞弊情事。看來必須仍設大員。諸事方有裨益。七十五著賞給副都統職銜。前往辦事。該處現在乏人。七十五不必來熱河請訓。即於京師領帶撤回原印馳驛前往。所有該處一切事件俱著照舊辦理。以理郡王弘曉為宗人府宗令。旌表守正捐軀之雲南文山縣民李良材女李氏。已上詣皇太后行宮問安。諭據喬光烈奏遵義縣知

縣王錫蕃拏獲盜犯吳爾祿請旨即行正法一摺已交三法司覈擬速奏矣。王錫蕃前將盜犯文喜盤獲看來尚屬能事曾經降旨著該撫等查明該員平日居官如何出具考語送部引見。今該員復能於山硎無人之處持火進內搜查將盜首吳爾祿拏獲似此遇事奮勉實心出力之員殊屬可嘉著該撫即將王錫蕃送部引見。又諭據李侍堯查奏會緝假官羅奮鵬一案實由被誑之武寧縣生員葉光嘉先已扭獲送官適脚夫余道學路遇通山縣捕役告知該犯已經就獲為之引路趨認而武寧之捕役亦聞風趕至協同帶犯稟解其該二縣知縣均非首先緝獲之人無庸議敘等語所奏甚是地方官果能出力首先拏獲要犯自當予以優獎若如湯聘之強分主從為含混調停之見轉非所以示鼓勵所有前降諭旨將該縣送部引見之處不必行。富明安亦同日奏到此案始末與李侍

堯畧同但又稱先發差查實力從事委係通山縣不敢因江省屬員稍存迴護等語是顯有引嫌推讓之意且該犯先在通山縣已經拘獲旋復脫逃富明安何得轉為歸功該縣深屬取巧富明安著傳旨申飭向來州縣官遇有拏緝案犯迅速弋獲朕必降旨或予議敘或令引見陞用正欲懸優格以獎能事之員並為闡葺者激勸耳即如喬光烈奏遵義縣知縣王錫蕃親向山硎拏獲盜犯吳爾祿已降旨令其送部引見若使因人成事者亦得濫邀獎勵是適啟其僥倖非分之想朕斷不肯稍為遷就也可將此通諭知之。又諭據舍圖肯奏稱錦州副都統恩丕諸事推諉不辦佐領德隆等將滋生銀兩於應用款項外違例浮用三千三百餘兩將鋪張更改恩丕明知並不行文辦理反欲圖息事遣人向伊討問主意請將恩丕交部察議併將德隆等交盛京刑部等語德隆等擅敢將滋生銀

兩多用更改鋪張恩丕理應即行嚴查辦理
乃意圖消弭遣人向舍圖肯討問主意甚屬
不堪恩丕著革職案內所有德隆等俱交舍
圖肯審明具奏○諭軍機大臣等據觀音保
奏滄州飛蝗甚盛禾稼多有損傷查係大城
飛來現在撲捕等語頃聞安肅縣地方亦生
蝗擊間有食及穀穗者看來今歲直屬蝗蝻
生發頗多時屆秋令田禾正當秀實之際恐
不無被傷現在滄州靜海飛蝗俱稱自大城
而來其從前係何人赴該處查辦究竟起自
何處著傳諭方觀承阿桂裘曰修及府尹等
速即據實查明具奏一面上緊撲捕凡係水
濱葦蕩易於藏匿長發處所務期搜滅淨盡
毋得稍留遺孽貽害田禾○又諭今日觀音
保奏滄州靜海等處飛蝗頗盛查係大城飛
來已有旨令方觀承及府尹等上緊搜捕茲
據錢汝誠等奏稱大城縣屬與文安接壤地
方已經撲淨未免與觀音保所奏互異著再

傳諭錢汝誠等查明該處有無遺蝗實在情
形務使搜除淨盡不得因有此奏稍存迴護
之見○戶部議覆調任廣東巡撫明山奏稱
各省題奏收成分數有開報至幾釐幾毫為
止者查收成分數原係約畧大概非會計錢
糧可比即以散合總例有零尾只當云幾分
以上若錙銖積算轉失覈實之道應如所奏
其適合幾分為率者則稱收成幾分如在幾
分以上計有奇零者則俱稱收成幾分有餘

向例開報釐毫之處通行畫一刪除從之○

庚午中元節遣官祭

永陵

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵

端慧皇太子園寢○欽差尚書阿桂侍郎裘
曰修會同直隸總督方觀承等奏直屬生發
蝗蝻處所臣等分道督捕因青縣續生之處
最多又界於滄州靜海之間恐其彼此推諉
臣等親身董辦淨盡始赴靜海靜海生蝻本
威分投撲打已掃除全竣但連日內又有外
來飛蝗停落據靜海縣稟報來自大城臣方

觀承親往查勘並無蝗蝻生發間有零星蝻
子搜捕易盡又據滄州近海一帶亦報有飛
蝗來自東北臣等查明天津一路西則在兩
淀葦草叢密之中東則在沿海沮洳人跡罕
到之地蓋葦根泥蕩皆有上年魚鰕遺子水
大仍成魚鰕水小涸露則蒸變為蝻訪問捕
捉之法凡淀中海邊之飛至者於其停落盡
力捕捉立得淨盡至州縣每見其來自某方
即指為起自某方之隣境互相推諉臣等通

飭各屬見有飛至停落者即行捕捉現在各
處搜查防範周密且田禾漸已結實不致受
傷其間有損傷者皆已補種仍可收得旨
大濼之後蝗蝻固所必有然不可不盡人力
也覽奏固以地方官推諉之弊然以朕視之
即爾等亦未免委之無可奈何之意矣昨已
有旨詢問尚應竭力督捕勉之慎之

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十

大清高宗法天隆運至誠先覺體元立極敷文奮武孝慈神聖純皇帝實錄卷之六百九十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

賜教官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未七月辛未諭據成衮扎

布等奏稱內附之烏梁海杜爾伯特等俱在邊卡以外居住克木齊克唐努等烏梁海俱在俄羅斯邊卡附近居住伊等雖無異心未免互相侵擾從前科布多駐劄之兵俱係屯田並未給與馬駝因會商扎拉豐阿撥送馬一千駝三百牛二百羊一千等語近因瑪木特等呈送俄羅斯文書朕以俄羅斯等狡詐叵測假此為由窺伺烏梁海俱未可定因降旨成衮扎布如有動靜斷不可使烏梁海等

受其荼毒此特令其隨時防範之意迨瑪木特解到詢問據稱伊等並無異心原係投順今成衮扎布等奏明酌撥馬駝即著留彼處收養備用再科布多地方水草豐美田土膏腴若將喀爾喀游牧向外挪移則地方開展於喀爾喀生計有裨著傳諭成衮扎布喀爾喀內如有情願挪移者酌量挪移不可抑勒○禮部議准貴州學政李敏行奏稱嗣後各省考試選拔生員刪去判語改用五言八韻排律一首應如所請並載入學政全書從之○壬申諭曰託恩多著兼管禮部侍郎事務張若澄不必署漢侍郎事務著徐以烜署理○又諭前內閣撰擬朝鮮世子誥勅朕意李祘以孫承祖其稱名仍作世子於義未安是以傳諭禮部詳覈查覆茲據奏該國王李昀本請以世子李愔之子李祘封為嫡嗣並無請封伊孫為世子之說且考之史冊現有世孫名號昭然可據今李祘既係該國王之孫

自應援例封為世孫方為名正言順。乃不詳覈典故。漫以世子加封。若非經朕指出。其何以昭天朝典制耶。禮部堂官著飭行。所有給予誥勅。即行改正頒發。○又諭曰。御史邵樹本奏。請五城吏目改為副指揮。並各給印信。以專職守等語。所奏殊屬不達事理。司坊官員。如果潔已奉法。原不在乎職分之崇卑。倘或不自愛惜。敗檢踰閑。惟責成五城御史。隨時糾劾。且吏目之於副指揮。相去無幾。安見吏目之皆不肖。副指揮之必稱職乎。若徒紛更舊制。於實政仍屬無裨。非整飭吏治之道。至於設官給印。原期大小相維。以慎職守。若必人予一印。則外省州縣佐雜。俱當由部鑄給頒發。亦復成何體制。且人各有印。取攜尤便。設遇貪墨之輩。其弊更將不可究詰。所奏俱不可行。邵樹本著傳旨申飭。○又諭。昨朱續經於巡漕復命。朕問以地方利弊。伊奏稱。直屬胥役。斂派賄放。車船業經告知地方大

吏嚴行懲治。而弊端累疊。總不能除。因傳旨詢問方觀承。據方觀承奏到。該御史並無知會道府。應行懲治之事。是以令其明白回奏。今朱續經奏稱。三月內。曾將苛派諸弊。行知司道查究。並經告知該督查辦。隨即具摺奏聞等語。既經奏聞。何用復行面奏。且面奏時。伊並未云曾經具摺奏聞也。此奏殊屬取巧。御史奉命外出。於地方弊竇。有所見聞。自當據實陳奏。朕意其必為近日新有情事。恐該督未經懲儆。是以令其查辦。若仍係三月以前已辦之案。亦何待重題復奏耶。朱續經著交部察議。○更定道府品級。并旗員武職封典。諭朕閱續文獻通考館所進職官考內。有應增改數處。俱經逐一指示。發交該館參考訂正。其有一二條沿襲舊文。於官制未協者。所當斟酌釐定。以符體制。如四川總督條下。注明兼巡撫事。而直隸總督。向無巡撫兼銜。書內亦未注出。但巡撫於地方一切考察覈

轉。皆其職任。直隸現在既不設巡撫。其所管通省事。宜與四川總督無異。嗣後直隸總督官銜。著照四川總督之例。添列兼管巡撫事務。至外省知府。向為正四品。而巡道各視兼銜為差等。則有三四五品之不同。今道員既經裁去兼銜。統為正四品。知府乃其所屬。自應量為區別。著將各省知府。改為從四品。其封典內。旗員武職六七品。有封承德郎。文林郎者。名義亦覺未當。應照漢官武職之例。六品改為武信郎。七品改為奮武郎。但漢官武職至七品而止。所有旗員之八九品武職。仍照舊制為修職郎。登仕郎。庶名實相符。而官制亦為允協。俱著該部遵照辦理。并諭令會典通考等館一體改正。○諭軍機大臣等。據熊學鵬奏。接到江蘇咨文。查拏天圓教案犯。隨將舒思硯之孫舒德至。舒元會等。并搜出之經懺木戳。解蘇質訊等語。此案前經莊有恭奏到。隨降旨傳諭該撫。及熊學鵬查明實

在創邪傳教之首犯。按律治罪。若祇係喫齋誦經。並無聚眾傳播等事。不必輾轉株連。況越人持齋祈福。乃其風俗。其經懺等號。因屬荒誕不經。但查明並無悖逆煽惑情事。則與設立官號。糾黨斂錢者不同。自可分別示懲。照例完結。不可使奸胥蠹役。借搜查邪教名色。羅致干連。以致鄉愚張皇紛擾。再將此傳諭熊學鵬知之。○癸酉。

上詣

皇太后行宮問安。○甲戌。諭據蘇昌奏。碣石鎮總兵王陳榮。私索漁船銀兩一摺。王陳榮身為海疆專閫大員。理宜潔已率屬。整飭營伍。乃敢私索漁船銀兩。至一千餘圓之多。及至事已敗露。又賄囑犯弁狡賴。希圖脫罪。貪黷敗檢。甚屬不法。王陳榮著革職。交與該督將案內應行質訊人犯。一併嚴審定擬。速奏。○又諭。據新柱等奏。稱去歲及今歲兩次入開爾山。採取成造玉磬等項。經員外郎德魁

自山河中設法起出玉石妥協造辦磬式匠作等俱遵照指示用心成造侍衛永泰引入採取甚屬奮勉健銳營之前鋒校委署章京事扎沁及千總委署守備事周兆鰲等派往照料俱竭力奮勉沙爾渾之阿奇木伯克穆喇特及伊弟巴圖爾沙布塔什渾伯克薩爾巴爾帶領衆回挖砂運石亦俱奮勉鄂對阿布都哩野木所派伯克等帶領回人挖砂運石俱無貽誤復令同知圖桑阿遊擊溫昌尚通判陳景全都司李敬簡守備陳耀德把總委署千總事張裕及徹回之遊擊于秀西安佐領常明等於各種器具內應監造者監造應督催者督催今俱於限內妥協告竣等語辦理磬式等項玉石之官員及阿奇木伯克頭目回子匠作等既各著有勞績自應施恩除阿奇木伯克頭目回子匠作等已交新柱等照例分別賞賚以示鼓勵外官員人等各該處議敘○又諭據成衮扎布等奏稱察

達克莫尼扎布等追躡霍輝沿途勦捕數戶霍輝逃脫追至色畢山不見蹤跡因馬力疲乏而回俟冬間得有消息擒拏較易所有出色奮勉以及傷亡人等開單具奏又總管哈克圖因追趕霍輝患病而回殊屬不合且除察達克之外其餘各旗遣去兵丁亦屬寥寥現在查詢情節另行具奏等語察達克等一聞霍輝逃竄即帶兵追趕勦捕數戶亦屬奮勉察達克著加恩賞緞四疋所有此次奮勉傷亡官兵均照從前車凌烏巴什等勦辦庫克新官兵賞卹至霍輝本係無關緊要之人既經逃脫不必窮追應加意詢探俟雪落後來至阿爾台時再行前往擒拏總管哈克圖因病回轉齊巴堪車根等旗出派兵丁無多固宜詢明治罪但伊等均係蠢愚無知之輩此次暫寬不必深究著成衮扎布曉諭伊等嗣後若仍如此推諉不前必當從重治罪○諭軍機大臣等據蘇昌叅奏碣石鎮總兵王

陳榮私索漁船銀兩一摺。已降旨將王陳榮革職。交與該督嚴審定擬具奏矣。王陳榮身為海疆專閫大員。乃敢私索漁船銀兩。及經敗露。又復賄囑犯弁狡賴。情罪殊屬可惡。似此貪黷不法之員。應即嚴審定擬。趕入本年秋審情實。以昭炯戒。但現在已屆秋審之期。恐辦理尚需時日。著傳諭蘇昌將案內應行質訊人犯一經查審明確。即將王陳榮定擬。趕繕招冊。一面具摺速奏。尋奏。合依官吏受

財枉法贓八十兩絞監候律。擬絞監候。秋後處決。下部議行。○又諭據蘇昌等奏請將耀安調補廣東糧驛道摺內。稱南韶道劉松齡才具平常等語。劉松齡已於五月內。據該撫明山叅奏勒索屬員寶光銀兩一案。請旨革審。是時蘇昌即未回粵。豈有巡撫叅一監司大員。而總督竟漫無聞見之理。況蘇昌拜發此摺。距明山前摺。已有月餘。何以復將劉松齡列入摺內。并與明山會銜。殊不可解。著

傳旨詢問蘇昌明山。令其明白覆奏。尋調任陝西巡撫明山覆奏。臣於七月初一日起程赴闕。先於六月二十二日督臣蘇昌回任時。已將叅奏劉松齡奏稿與看。至將耀安奏調糧驛道。係臣與督臣共商。迨督臣咨會聯銜。仍將已叅之劉松齡列入。臣因奏調耀安之摺。係已經商定之事。一時草率。未經看出。請交部嚴議。得旨。該部察議。兩廣總督蘇昌覆奏。臣於六月二十二日回粵。當據撫臣明山

將叅奏劉松齡緣由告知。至會商奏請將耀安調補糧道。應於摺內將劉松齡已叅之處聲敘。乃竟糊塗舛錯至此。罪實難逭。得旨。該部察議具奏。○又諭曰。明瑞等奏稱。從哈薩克投來伊犁之厄魯特壯丁六百餘名。並無妻室。現在察哈爾。厄魯特等婦女甚少。若將內地綠旗兵等俘獲售買。及回地所有婦女等贖出。順便送往伊犁。可以酌量給配等語。伊犁厄魯特等已編設昂吉佐領。若壯丁多

係鰥居。非長久之道。著傳諭。揚應琚除內地綠旗兵等所得厄魯特婦女。已經匹配外。其但供役使者。如年方少壯。酌量擇取。給價贖出。送往伊犁。至回部厄魯特婦女頗多。從前阿桂等雖行文各城。給價贖取。並未視為要務。并著傳諭駐劄大臣。與該伯克等會商。加意辦理。都察院議准。左副都御史張映辰奏請嗣後巡城科道。遇有出差事故。有一年以內。應行委署者。臣等公同揀選派委。不得

仍照從前按資輪派。從之。以告退奉國將軍漢章阿子祥彥。照例襲封奉恩將軍。乙亥。諭據蘊著等奏稱。右衛恩騎尉佛保。與那楞泰乘醉互毆成傷。佛保又持刀砍傷那楞泰及伊妹。請將佛保革職。交同知嚴行審擬等語。佛保身係職官。如此酗酒逞鬪。且持刀砍傷那楞泰等。甚屬不堪。除將佛保革職。嚴審定擬外。所有該管大臣官員。平日不能將佛保嚴行約束。以致恣肆妄行。該副都統協

領噶爾錫等。實難辭咎。俱著交部察議。○諭軍機大臣等。直屬六月二十八。九等日。據報得有透雨。自立秋以來。又將半月有餘。未審復得雨澤否。今歲禾稼。雖歷詢俱稱長發。豐稔。但其中是否有因得雨稀少。未能一律暢茂之處。及現在有無望雨情形。並著傳諭方觀承。據實查明速奏。尋奏各屬六月二十九日。普雨之後。七月初五。六等日。順天。保定。永平。河間。天津等府屬。遵。易。冀。趙。深。定等州屬。

復得雨三四寸。至七八寸不等。初九日。保定以南各府州屬。又報得雨二三寸。而順屬之昌平。通。薊。霸。保。房山一帶。更為優渥。此時禾稼成實。高糧穀黍。以次收穫。惟晚禾仍需雨澤。其後種之豆。荳。向前更望雨勤。乃可一律豐收。至宣屬宣化。附郭二三十里之內。並萬全。北鄉。張家口外等山地。微覺乾燥。收成恐減分數。再文安。霸州。安州。新安。積水窪地。所種稻田甚廣。俱倍常茂實。足資接濟。得旨。

晚田竟致被旱。殊為可惜。民情光景如何。有須豫為綢繆處否。速奏來。又諭據錢維城奏。查倡設邪教。舒思硯之孫舒德進等。現住蘭溪縣。家藏刷印及鈔本諸經卷。從樓梯下搜出等語。前經莊有恭。熊學鵬先後奏到。查辦天圓教一案。已有旨傳諭該撫等。令其將首先傳播邪教之犯。按律嚴懲。若祇係喫齋祈福。並無聚眾授徒情事。原可照例完結。至如舒德進。私藏天圓萬善諸經卷。從樓梯下

搜出。則是有心護匿伊祖邪教。非愚民被誘附從者可比。不可不嚴行懲究。該撫等辦理此等案件。所當權其輕重。務使情真罪當。毋枉毋縱。固勿得因有前旨。致實在傳教者。偉逃法網。亦不可將事外之人。輾轉根究。以致株連滋擾。至另摺所奏。江山縣民徐振國。分產關書內。引用漢明舊事。語句不倫一節。其人已故。固可無庸置議。但似此者。正復不少。第當隨時留心查察可耳。將此傳諭熊學鵬。

莊有恭。錢維城知之。又諭熱河一帶。自立秋以來。雨澤稀少。現在盼雨。未知京城近日曾得有透雨否。著傳諭留京辦事王大臣等。將近日曾否得雨情形。及目下田禾有無需雨之處。速即奏聞。以慰廛念。尋奏。京城自立秋後。於本月初九日。陣雨滂沱。四野俱霑。現在大田俱結穗成熟。早禾已間有收割者。目下晚稼雜豆。菽麥。現俱長發。亦尚無盼雨情形。報聞。○調廣東高廉鎮總兵黃正剛。為碭

石鎮總兵。以福建閩安水師副將裴鏡。為高廉鎮總兵。○丙子。

上詣

皇太后行宮問安。○盛京將軍舍圖肯等奏。盛京兵共計一萬七千九百餘名。每年操演。春季自正月十六日起。至三月十六日止。秋季自七月十六日起。至九月十六日止。每季操演兩月。定例一月操演六次。查盛京兵多係耕種謀生。更有居趾離城數百里者。若拘成

例未免有誤農時。且地方氣候更寒。三月內始可耕作。請嗣後春自二月初一日起至三月初一日止。秋自九月初一日起至十月初一日止。一月內逐日操演。庶不致有誤春耕秋穫之期。亦不致廢弛演習得旨。如所請行。

丁丑諭軍機大臣等。據阿桂等覆奏查辦飛蝗一摺。稱飛蝗在水窪葦蕩及淀泊之中。現屆白露。是其將盡之候。各處俱已報撲淨等語。飛蝗隱匿於淀泊水窪葦蕩之中。雖似難以人力勝。但既見有倒掛葦上者。則其留遺蝻種。恐復不少。正當及時設法淨除。為要。袁曰。修前此曾以淀中葦蕩慮占水面。議思所以剷除。而從前古慶查辦蝗蝻。亦曾有焚燒葦蕩之事。但此等葦蕩。彌望蔓延。亦近淀居民自然之利。未便因搜捕蝗蝻。盡舉而棄之。第留此沮洳之地。徒為蝗孽萌生之藪。其貽患於民生者更大。自當權其輕重。籌酌辦理。著傳諭阿桂等會同該督等。或此時亟用

火燎。或俟刈割後。將根株燒盡。毋使再留遺孽。以絕民害。至稱有蝗州縣。田禾間被損傷。皆按畝借給籽粒。補種莠麥雜糧一節。目下將交白露。秋麥尚早。若各色雜糧。此時趕種已遲。摺內所云。係久經借令補種乎。抑現在辦理之事乎。俱著查明速奏。再觀音保摺稱。前赴南皮寧津東光吳橋一帶。再為搜查。遇有停落。即親督撲捕。如無停落。即行回省等語。所奏亦未明晰。飛蝗停落。不在於此。即在於彼。即云羣飛遠颺。究竟作何歸宿。抑別有化生消滅之處。勿得謂祛除出境。遂為畢事。乃事而弛已責也。將此傳諭阿桂等。並觀音保知之。尋奏蝗蝻遺種。必須設法淨除。以杜來歲之害。現在辦理水道。應行開通蘆葦者。俱令帶報。刨挖其無礙水道之處。原應留為民間織箔之利。應俟刈割之後。亟用火燎。或用犁耕翻。總期不能萌發。以淨遺種。至觀音保所奏搜查飛蝗。傳旨詢問。作何歸宿之處。據

稱滄州南皮一帶飛蝗見有停落者已撲滅淨盡其未停落者差人尾追似係投入海內查飛蝗入海變為魚鰕臣裘曰修曾在江南親見今臣等詢之上人僉稱向至白露節近凡經倒掛者皆不復遺子其尚未倒掛者多係羣飛入海別有化生似屬可信至田禾被傷地畝據農民云京師迤北過中伏後即不能種京師迤南處暑節內仍可補種今年末伏距交處暑尚有十日是以飭令借給補種

以冀有秋得旨此補種者今秀實否即如熱河一帶七月杪頗覺旱茲於二十九日始得透雨幸不致災晚田可望有收爾等京南光景何不奏及此可謂之厯念民生乎速奏來○轉諭郡王弘慶為宗人府左宗正以信郡王如松為右宗正○戊寅諭軍機大臣等方觀承題叅石壩被衝防守疎虞之萬全縣知縣莊有昌議處一本內稱萬全縣大境門外北岸護城石壩經該縣上年領帑修理因本

年口外山水陡發新工適當頂衝致塌倒二十七丈并衝去石道經口北道玉神保查勘實屬人力難施並無工程草率修築不堅等語於事理全未明晰該縣護城石壩上年動項修築原因當頂衝而設當令永遠堅固以資堵禦若經十餘年之久或致傾頽尚可謂非工程草率之故乃於一年以內即致衝坍則去年修築時並未堅固不問可知使謂新修隄壩如式完好終不足以抵禦暴漲則估

修此項工程實為徒勞無益之舉况該道玉神保上歲查勘估修今於坍塌之後復稱工築並無草率其中不無掩飾情弊直隸吏治之不可信於此益可概見著方觀承將上年修築石壩及現在衝塌實在情形查明具奏毋得稍有徇隱若再徇隱朕將特派大臣往查矣將此傳諭知之○己卯

上詣

皇太后行宮問安○諭軍機大臣等前據觀音

保秦。滄州。靜海。飛蝗。俱自大城生發。是以降旨令欽差及該督等。上緊撲捕。并詢問錢汝誠。令其據實查奏。今據錢汝誠覆奏。靜海一帶飛蝗。多來自淀中葦蕩之地。並非起自大城。前阿桂等所奏亦大畧相同。是觀音保前此並未詳細確查。不過得之道路傳聞。率爾入告。所奏殊屬不實。觀音保著傳旨申飭。○又諭今日錢汝誠覆奏靜海一帶飛蝗。並非起於大城。多來自淀中及濱河葦草之地等語。與阿桂等所奏相同。昨經降旨令其將飛蝗停落之葦蕩。籌酌辦理。看來淀泊葦蕩。實為蝗蝻滋長之藪。但遽將葦草燒棄。又恐近淀貧民。藉刈割為生計者。未免有礙。蝗蝻遺子。大概附土而生。天氣愈寒。入土愈深。莫若俟刈割後。將根株用火燒焚。既可以淨遺種。而明年之葦蕩。益加長發。仍於民利有裨。阿桂等可會同該督酌量實在情形。熟商妥辦。再將此傳諭知之。○以山西按察使王檢為

廣西布政使。○庚辰諭曰。和碩履親王。端謹性成。勤勞匪懈。前因抱病。即派皇四子。皇五子。帶領太醫院使。馳往診視。以冀痊可。茲聞薨逝。深為震悼。即擬回京臨奠。而扈從馬匹。一時未能調集。計程往返。須在中秋前後。是以暫停親詣。俟回鑾後。再行親臨奠醊。著令皇四子。在王府穿孝。並派皇五子。及和親王。穿孝。仍派和親王。恒親王。內務府大臣。英廉。經理喪儀。一應喪事所需。俱動用官項。以展朕優崇懿親至意。○吏部議准。甘肅巡撫常鈞。奏請。張掖縣縣丞。移駐東樂。應建衙署。從之。○以湖南辰沅永靖道藍欽奎。為山西按察使。○旌表逼嫁捐軀之湖北孝感縣民黃某妻謝氏。○辛巳。諭據莊親王等奏稱。從前慎靖郡王薨逝時。六阿哥於滿月墓祭後。即行釋服。今履親王薨逝。請令四阿哥於初次墓祭後。釋服等語。慎靖郡王。雖係朕叔。然與朕同庚。履親王。年齒高邁。且六阿哥承繼慎

靖郡王時。係王薨逝後。朕所降之旨。王在日尚不知。然猶持服一月。值朕萬壽。自應釋服。至四阿哥。向蒙履親王養育多年。且為王十分鍾愛。若令於初次墓祭。即行釋服。朕心實為不忍。著仍遵前旨。令其持服百日。五阿哥著同派出王等。一同釋服。庶可少伸朕哀悼之懷。○諭軍機大臣等。開泰奏。已塘喇嘛。教唆番民聚眾滋事一案。其另摺聲敘搶劫正土司查什旺扎爾。即扎什汪結。副土司諾爾布。即羅布。此復成何語。前開泰將番民等名字。混行譯漢。業經改正。發令遵辦。并降旨飭行。今復為此奏。可見開泰徂於外省書吏行文惡習。終不知省悟。改開泰著再傳旨嚴行申飭。並著傳諭阿爾泰。嗣後番民名字。悉照改正字樣書寫。毋得仍蹈開泰故轍。所有副土司缺。即著阿爾泰另揀妥帖之人。拔補具奏。○又諭據閔鶚元奏。北地風土高燥。惟栽種卧柳。不數月間。即見茂密。期年之後。樵

採取資不竭等語。邇來生齒日繁。需用柴薪等項。倍於往日。自應廣為種植。以供炊爨之需。卧柳一項。於溝旁隴畔。隨地可栽。且一二年間。即足以資採取。在東省既著有成效。北方地土。大約相同。著傳諭各督撫。察看地利所宜。遇有應行栽種卧柳之處。即勸導令其廣為樹藝。庶於民生日用。較有裨益。○又諭據開泰奏。斬犯彭朝柱。於秋審發回時。囑魯數人。謀欲中途奪犯。經兵役協拏。該犯等竟敢行兇拒捕。以致差役受傷一摺。已交軍機大臣。會同該部覈擬速奏矣。地方大員。如果平時彈壓有方。匪徒自知斂跡。何至奪犯傷差。目無法紀。乃爾。緣開泰向來一味因循畏葸。於地方全無振作。以致囑嚕奸匪。肆無忌憚。乃摺內猶自以為從嚴辦理。此種優柔陋習。斷不可長。且因此一端。而該省吏治民風。一切廢弛。可知。著傳諭阿爾泰。嗣後須加意整頓。遇有此等敗類。立即嚴行究治。以靖奸

穴而安善良至此案內。現在脫逃之伍大漢等並著嚴拏務獲。無使倖逃法網。○陝甘總督楊應琚奏查烏魯木齊應駐挈眷兵四千名。除現在移駐一千八百餘名。尚須二千一百餘名。業經移行陝甘提鎮查詢派撥。又准旌額理咨所造兵房一千二百間。七月可竣。足敷居住。臣復行查詢。據甘肅提標及涼肅二鎮所屬挈眷兵及家口共六百五十餘名。先後抵肅。於本月初十日起程。其續行查送者俱照例辦理。報聞。○調京口副都統書山為錦州副都統。以正黃旗協領瑪爾圖為京口副都統。○壬午。諭軍機大臣等。據開泰等奏。九土司綽斯甲布等攻打金川一摺。所辦尚未得窺要。開泰向於郎卡遣人赴蜀時。每許進見。且常加慰撫。而陰縱綽斯甲布等與之攻擊。在郎卡素性狡黠。此等行為。豈能掩其耳目。即綽斯甲布見此依違兩可。亦將竊笑。甚非天朝開示誠信。駕馭番夷之道。郎卡

既於綽斯甲布等屢肆侵凌。衆土司合力報復。原不為過。督臣既聞其事。惟應明白宣示。綽斯甲布等以郎卡既得罪於衆土司。爾等悉銳往攻。倘能剿滅番碉。亦免爾等後患。但不必官為應援。而於郎卡來人嚴為拒絕。且切諭以爾既結怨鄰境。豈甘為爾蠶食。必將聯集各寨奮力復仇。此亦爾所自取。我等斷不肯曲為庇護。如此則郎卡既不敢恃以逞強。而綽斯甲布等亦可洩其積憤。於事理方為兩得。乃開泰既請以籠絡郎卡。復隱為援助土司。殊失控制大體。阿爾泰嗣後一切當以光明正大。經理得宜。毋事調停遷就。致蹈開泰故習。并將此傳諭岳鍾璜知之。○癸未上詣皇太后行宮問安。○諭軍機大臣等。據圖勒炳阿等奏。稱布魯特人等帶有馬匹羊隻前來烏什貿易。內有哈薩克三人告稱。原在西喇蘇游牧。今移於楚穆訥爾等語。看來哈薩克

等。同布魯特來烏什貿易。恐伊等至特穆爾圖諾爾游牧。昨諭明瑞等派員前往伊犁以西。吹塔拉斯等處巡查。若有哈薩克。布魯特等偷越游牧。即行驅逐。今特穆爾圖諾爾亦應一體巡查。至此次貿易哈薩克等所移之地。是否厄魯特界內。亦著查詢具奏。○命兵部尚書彭啟豐充經筵講官。○甲申。諭四川總督衙門。向設筆帖式二員。嗣後著於理藩院熟諳繙譯人員內。揀選一員。前往補授。一

應陳奏事件。如有喇嘛番民等名字。俱著斟酌對音。○又諭。據永貴等奏。稱三等侍衛海祿。索倫驍騎校委署叅領都瑪圖。帶兵將送至阿克蘇馬匹內。分給喀什噶爾馬四百匹。俱按數送到。無一倒斃。應否將海祿。都瑪圖。議敘。兵丁賞給錢糧等語。著照永貴等所奏。海祿。都瑪圖。交該部照例議敘。兵丁酌量賞給。○諭軍機大臣等。前開泰將巴塘滋事之喇嘛番人名字。混行譯漢。業已改正交發。昨

於審擬摺內。見有熟教名色。按番字對音。應作沙爾鄂。此等譯漢。設使稍肯留心。即可不至舛訛。若此前已有旨傳諭該督於額設筆帖式二員內。改設理藩院熟諳繙譯筆帖式一員補授。現今揀選派往。著傳諭阿爾泰。嗣後遇有關涉喇嘛番人名字。務須留心斟酌。音漢。勿踵開泰故習。並將現在筆帖式內。揀選酌留一員。其一員送部另補。○又諭。據李侍堯奏。湖廣今年鹽價。每包賣銀至三錢三

四分。自欽差阿永阿等到楚。暨陳宏謀及臣先後抵任。漸次遞減。現在市價每包二錢七八分不等。與高恒奏准定價一錢四分。尚屬加倍。現經札知高恒。飭令漢口總商定價一摺。已令李侍堯。將漢口增價累民之商。就近查辦矣。楚省距兩淮尚遠。鹽價陡然增落。或與淮商無涉。但既經奏定價值。豈得任意增加。即運載水腳。所需亦為數無多。何至相懸倍蓰。漢口行鹽。原係兩淮商夥。其歷來銷售

鹽觔定價偶有增添。是否隨時關白。及今年楚鹽價值昂貴。淮南有無見聞。其中或係各口岸。遙受兩淮意旨。通同擡價。抑或夥商捏稱鹽少。而鋪戶水販。又復輾轉加增。致市值日漸騰踊之處。著傳諭高恒。逐一據實查奏。向來鹽政志在銷引裕課。地方官每言價踊病民。彼此抵牾掣肘。勢所不免。此奏出自李侍堯。朕可信其毫無成見。不得不徹底根查。以肅釐政而蘇民困。並將此旨鈔寄李侍堯知之。○又諭。據李侍堯奏。湖廣鹽價昂貴一摺。該省行銷淮鹽。前經高恒奏定。每鹽一包價銀一錢四分六釐。商人行運。自應遵照出售。即水腳加費。為數無多。市價或時有低昂。亦何至頓長逾倍。且知有欽差及總督等。先後赴楚。始聞風畏懼。遽行遞減。即現在每包二錢七分。較之原定價值。尚加一倍。明係奸商貪利無厭。任意居奇。亦由談羽豐平時辦理不善所致。即此一節。楚省積年吏治廢弛。

已可概見。至奏稱現經札知高恒。飭令定價之處。往返咨商。徒多紆折。楚省距兩淮千餘里。信息豈能遽達。即就現在鹽價陡落而論。淮南自不及與聞。則前此之肆值騰踊。其為漢口商人牟利自封。已屬顯然。奸商不遵定價。輒敢額外妄增。致民間有淡食之累。實為法所難貸。著李侍堯就近查明違例增價之商。盡法懲究。并酌定鹽觔價值。使閭閻日用有資。即行悉心妥辦具奏。並將此旨及原摺鈔寄高恒知之。○又諭。舒赫德奏。山西清源縣民孫肇廷等。赴京控告清源縣歸併徐溝縣。不便於民一案。毫無確據。詢係生員秦龍光寫呈。請將秦龍光等五犯。解回晉省查辦等語。此大不可。伊等以地方公事。輒敢倡說阻撓。連名具呈。遠赴京城越控。無知愚民。易為所惑。今若解回本省。恐經由該犯等原籍辦理。稍有不善。轉致滋事。著傳諭舒赫德將秦龍光等各犯。即交刑部審訊。定擬如審

明胡應銓與該犯等實有通同商謀情事。及此外或另有主使之。人原可行文晉省。提犯質訊。至其呈內粘連胡應銓原控徐溝縣知縣朱昱發各款。自應咨明晉撫。令其逐一查究。是實是誣。照例問擬。俟晉省審訊之案完畢後。仍將胡應銓解京。并案完結。將此一併傳諭知之。○又諭據富明安奏。江省城垣現在修理完竣。請嗣後令各道府查勘具結。每年歲底。督撫據實奏聞等語。城垣為地方保障之資。自應一律完固。以資捍衛。第地方官吏。往往視為具文。或任其坍塌不問。日久因循。或修葺有名無實。徒糜帑項。皆所不免。著各省督撫。嗣後飭令該管道府。將所屬城垣細加查勘。如稍有坍塌。即隨時修補。按例保固。仍於每年歲底。將通省城垣是否完固之處。照奏報民穀數之例。繕摺彙奏一次。著於各督撫奏事之便。傳諭知之。○禮部議奏。督撫慶賀題本。既用純黃純紅紙色。其駐防將

軍都統。提鎮恭進表箋文。亦應用純黃純紅紙色。毋庸加籤。從之。○是月。兩江總督尹繼善等奏。六塘尾閘各河工程。自春間開工。陸續具報完竣。茲當汎水長發。已將上游之駱馬湖尾閘。及鹽河閘。先後開放。以資宣洩。由六塘河歸入新挑各河。循流順軌。直達於海。毫無旁溢。上下數州縣兩岸民田。二麥俱已豐收。晚禾現在暢茂。再查尾閘各河。與海相通。海潮挾沙而行。一日兩至。每易停積。向來河道淤塞。悉由於此。臣等行令該道廳不時查看。如有停淤。即照業食佃力之例。督令附近居民。疏濬深通。得旨欣慰。覽之。○河南巡撫葉存仁奏。豫省自乾隆二十六年。祥符等州縣災賑。將常社義等倉穀撥運動支。共缺額穀一十六萬六千餘石。今歲豫省秋收豐稔。趁此價平之時。查明市穀。每石在七錢以內者。各按缺額。照時價公平收買補倉。或遇市價稍昂。即行停止。得旨好。○湖廣總督

李侍堯奏楚省六月中得雨露足。惟天門潛江等州縣因上游水發。隄垸潰口。委員查勘。搶築疏洩。今據報稱。被水各垸大半原係低窪。止納漁課。其較高種稻之處。早禾俱已收穫。中晚二禾被淹者無多。現已趕種晚禾雜糧。秋收可望。至湖北撫臣輔德於七月初八到省。臣即日交印卸事。合併陳明。得旨楚省吏治大壞。專賴汝二人和衷共濟。以挽頽風。勉之。○又奏湖北省一應題官叅官。向係督

撫兩衙門輪流主稿。不但政體有礙。且覺形迹可疑。查各省在外揀選題補之官。大約海疆苗疆沿河沿江之缺。總督主政。內地衝繁疲難兼四兼三之缺。巡撫主政。其題叅劣員。由何衙門訪查。則由何衙門主稿。若司道揭報者。仍視江海內地。分別主稿。臣與撫臣輔德面商。札令兩司。將通省各缺。按沿江內地酌定。以後舉劾。公同會商。分別主稿。得旨甚是。○兩廣總督蘇昌奏潮州運同保成係按

察使赫昇額女夫之父查運同專司鹽務一切事件。悉由鹽運司覈轉。與臬司並無交涉。惟究係姻親。恐涉嫌疑。其保成應否迴避。具奏請旨。得旨不必迴避。

大清高宗法天隆運至誠先覺體元立極敷文奮武孝慈神聖純皇帝實錄卷之六百九十一

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未八月乙酉朔諭據成衮

扎布等奏俄羅斯等在衛滿河源布克圖爾
瑪庫克烏蘇地方造屋樹柵朕交軍機大臣
將瑪木特提問據稱實有其事并色畢地方
亦曾造屋樹柵布克圖爾瑪庫克烏蘇係果
勒卓輝舊游牧色畢係呼圖克舊游牧俱係
準噶爾地方俄羅斯雖已造屋樹柵並未有
人居住等語準噶爾地方此時均已內附與
俄羅斯無干伊等豈可擅自造屋樹柵觀此
足見俄羅斯漸有侵占準部地方之意著傳

諭成衮扎布車凌烏巴什等派厄魯特兵一

百名察達克等派烏梁海兵一百名令副都

統扎拉豐阿帶領莫尼扎布察達克二人前

往庫克烏蘇色畢等地方將俄羅斯木柵屋

宇盡行拆毀再瑪木特現在所居游牧與色

畢相距不遠瑪木特投誠之意甚篤因諭令

前往與察達克商酌成衮扎布將此密諭扎

拉豐阿等俟瑪木特到時伊等公同定議留

心妥協辦理○軍機大臣等奏查哈密巴里

坤伊犁葉爾羌等處官兵養廉鹽菜等項曾

經覈算每年共須銀四十三萬兩今伊犁

烏嚕木齊二處增設官兵約須增銀一二萬

兩合之各城舊額每年不過四十五萬兩

若於甘肅等處裁撤撤兵丁馬乾等項節省之

六十六萬餘兩內支用每年尚可節省十八

九萬餘兩即將來索倫察哈爾各兵一千莊

浪涼州兵三千携眷移駐後康俸鹽菜雖又

加增計尚有京口杭州所裁漢軍兵丁分例

可給索倫察哈爾等兵涼州莊浪官兵仍得原舊分例無庸議增報聞○吏部議奏查定例僉差不慎致斬絞重犯中途脫逃自應嚴加處分除尋常斬絞監候並照常發遣軍流案件仍照例查辦其決不待時之重犯遇有中途脫逃該督撫即於查叅文內聲明仍由刑部覈明該犯情罪交吏兵二部查辦將僉差長解之地方官及添差護解之文武各官俱革職留任限一年緝拏限滿不獲革任如限內拏獲准其開復至發往新疆等處人犯情節較重亦應照尋常斬絞脫逃例加等嗣後遇有中途脫逃將僉差解送文武各官降二級留任亦限一年督緝限內拏獲准其開復限滿不獲即降二級調用從之○丙戌

上奉

皇太后幸卷阿勝境侍早晚膳至壬辰皆如之○兵部議准署吉林將軍傅良奏請寧古塔伯都訥三姓拉林阿勒楚喀屯居值班兵照

吉林當差兵之例給鹽菜銀兩從之○予故和碩履親王允禔致祭加祭一次謚曰懿○丁亥祭

先師孔子遣和親王弘晝行禮○諭軍機大臣等熊學鵬奏咨駁福祿所請漢軍裁缺官員辦理出旗事竣不應在杭透支俸銀一摺所奏甚是此等候缺漢軍人員原應赴京引見另用其八月以後俸銀例應扣除且現在亦不過數十人即使辦案完竣或宜量給俸

薪福祿亦當奏明辦理何得仍循舊例輒行司全數關支甚屬糊塗不曉事理福祿著傳旨申飭所有此項候缺漢軍人員應改補者即令坐補應送京者即著送京引見將此傳諭福祿知之○兵部議覆兩淮鹽政高恒奏稱兩淮鹽課銀兩不論解京以及協撥各省俱動用腳費委員帶領人役自雇騾頭船隻管解前進近者一二千里遠者八九千里餉銀自十餘萬兩至二三十萬每不能按站行

走。以致地方接護巡防。時有歧誤遲延。及疎忽等事。應請照各關解送關稅之例。填給擡夫船隻勘合。由驛遞送。實為迅速慎重等語。應如所請。至餉銀既由驛遞。其節省腳費。應於綱竣奏明。解交內庫。報部查覈。從之。○戊子。祭。

大社

大授。遣裕親王廣祿恭代行禮。○己丑。諭。右衛恩騎尉佛保。酒醉。與馬甲那楞泰互毆。又用

腰刀。將那楞泰之妹砍傷。殊屬不法。佛保著革職治罪。其本身所襲之恩騎尉。著不必承襲。○庚寅。諭。在京兵部尚書事務。著託思多署理。吏部侍郎事務。著王際華兼署。○又諭。據恒祿奏稱。三姓副都統敦柱。現在患病。言語不清。步履艱難。請解任回京調理等語。敦柱准其解任來京調理。書通阿著調補三姓副都統。所遺熊岳副都統員缺。著薩思泰補授。○又諭。曰富德所犯之罪。皆伊福薄。未改

烏拉齊積習之所致。但富德前在軍營。曾經出力行走。著加恩寬免其罪。補放散秩大臣。効力贖罪。○兵部議准。甘肅巡撫常鈞奏稱。查奉差人員。在內由兵部。在外由督撫。覈給勘合差牌。其應給夫馬廩給。例有確數。應請嗣後。責令給發勘合衙門。一面覈給勘合。一面即將應付確數。飭知首站。即照牌移咨下站。按照備辦。書寫印花。俟差員到站。並無額外需索。即將印花交差員自貼。不必鈔寫勘牌。仍將應付無誤之處。轉移前途。并隨時呈報本省督撫存案。如差員需索。該州縣即不給印花。一面將應付過夫馬若干。無缺少遲誤。及差員如何需索。據實聲報督撫察覈。其有遺漏印花不貼。惟差員是問。若州縣有應付遲誤。准差員指名開報督撫查察。從之。○伊犁將軍明瑞等奏。前奏塔爾巴哈台駐兵。先行驅逐越境之哈薩克。因就便勘定駐劄地方。及設卡處所。暫停辦理。惟於來年秋季。

領兵巡查。榜示曉諭。本年三月。因有移駐涼州。莊浪兵一事。改議俟駐防事竣。約於後年遷移駐劄。伏思塔爾巴哈台駐兵。雖暫緩其期。仍須先為辦理。來年建造城房工程。及安插挈眷兵。恐無閒暇。此時正值秋高馬肥。臣明瑞。臣愛隆阿。於七月十七日。帶滿洲。蒙古兵五百名。令領隊大臣鄂津等。隨往學習。將從前阿桂所定塔爾巴哈台駐兵設卡之處。詳加勘驗。即有越境之哈薩克等。亦可量為

驅逐。其沙喇伯勒。特穆爾圖諾爾等處。來春令伊勒圖前往巡查。現在酌將印務交伊勒圖護理。報聞。○辛卯。葉爾羌辦事尚書都統新柱等奏。臣等前奏。請將葉爾羌和闐二城餘糧。以八分作價。換易紡絲布疋。以二分折錢。購買馬匹牲隻。續奉諭旨。停止購買回人馬匹。所折錢文。似應流通行使。臣等公議。現在駐防伊犁挈眷兵。陸續前往。雖有換易布疋。而棉花尤足供禦寒之用。據伊犁阿奇木

伯克茂薩告稱。伊犁曾經試種棉花。土性不宜等語。臣等與葉爾羌阿奇木伯克鄂對。商令購買回人棉花。即動用折糧錢文。據稱於回人生計有益。查二城折糧錢文。共八千騰格。有奇。除購買和闐金兩外。仍有七千餘騰格。棉花每觔價錢十二文。可得三萬餘觔。其二城應交正項錢文。支給官兵鹽菜。一應差務之餘。亦購買棉花。運送伊犁。報聞。○壬辰。遣官祭黑龍潭。

昭靈沛澤龍王之神。玉泉山惠濟慈佑龍王之神。○諭軍機大臣等。永貴等奏。稱哈薩克阿布賚遣使獻馬。其自帶馬九十餘匹。已准令貿易等語。哈薩克前在伊犁。烏魯木齊往來。並未至回地貿易。且伊等至喀什噶爾。必由布魯特等部落經過。沿途頗有賊盜。苟非貪圖重利。焉肯前往。現在伊犁等處貿易。上等馬匹。僅估價銀三四兩。而回地則加倍有餘。往來日久。不但伊犁等處。

貿易大減。亦恐滋生事端。但阿布賚素稱恭順。此次既經准其貿易。嗣後伊等再來。必禁絕回人私市。但從官買。較之伊犁等處價值更減。不可稍令獲利。伊即欲帶回。亦聽其便。仍曉示來人。以爾等從前並未回地貿易。況回地亦無須多購馬匹。其各項牲畜。自有巴達克山。安集延。布魯特。等處商販。爾等不必前來。如此。則貿易不得便宜。伊等自不肯遠赴。並將此傳諭伊犁。烏魯木齊。駐劄將軍。

大臣等知之。○兵部議准。江蘇巡撫莊有恭奏。稱督標所裁步戰兵五十名內。撥出三十四名。改歸蘇州城守左營。銀米照額支給。將浙省鹽務盈餘項下。每歲額支餉銀八百兩八錢零。解蘇藩庫。以充惠濟賞銀。從之。○山東巡撫阿爾泰疏報。乾隆二十六年分。鄆平。東平。海豐。利津。霑化。安邱。昌邑。濰縣。膠州。靈山。鰲山。高密。萊陽等十三州縣。衛報墾無糧旱地一百四十六頃八畝有奇。○癸巳。

太宗文皇帝忌辰遣官祭

昭陵。○諭。上年因八旗回贖旗地。積至一萬餘頃之多。降旨令戶部會同內務府及八旗大臣定議。以三四十頃。安設莊頭。餘俱賞給八旗。作為恒產。第念此項田畝。雖係旗人世產。現在貧民耕種日久。藉以資生。若改歸莊頭。於傭佃農民。未免失業。所有分設莊頭管理之處。不必行。其如何按則交租。並酌定章程之處。著軍機大臣會同方觀承。詳悉妥議具奏。尋議。現在贖回地畝。向來各該業主。每畝所收若干。雖無從一一查覈。而各該處田畝之前後左右。自必有現在旗民執業。所租地畝。應即按照各隣近田畝租數。一體徵收。但佃戶輸租業主。往往因循拖欠。或銀色低潮。未能按期清楚。既經地方官徵收報解。例應年清年款。而庫平庫色。亦較諸業主所收。無少異。應於額租內酌減。覈計佃戶所出添平補色之數。仍與原租相仿。在佃戶符其向

來應交之額。吏役亦無從僭端滋弊。請派大臣前往會同方觀承督率道府逐一履畝查勘。按其地址繪造清冊。並將租額分別上中下則實數填冊二分。一送總督衙門。一送戶部。所有每年租銀應如何解交及偶遇水旱如何酌量分數分別蠲免。統令會同熟籌妥議得旨。依議。著派英廉錢汝誠會同方觀承查辦。○又諭前因捐復知府李士遴得缺引見時詢及伊原任建寧府因事革職緣由。據

稱以揭叅建安縣知縣陳世俊縱役犯贓虛出倉收縱子婪贓等三款。經巡撫鐘音委道員李星聚查審。僅將縱役犯贓一款審實。其餘二款屬虛。將李士遴陳世俊一併叅革等語。彼時朕以知府揭一屬員既審未全虛。何致並罹叅革。其中或別有徇庇冤抑等情節。因降旨楊廷璋定長。令其據實查奏。今據楊廷璋等奏到。其所揭陳世俊縱子婪贓一款係李士遴逼勒寫供捏詞誣證其虛出倉收

一款係陳世俊接受交代時將前令已買未交之穀竟以實貯在倉冊報則李士遴所揭非盡無因。乃該司道等前後詳揭文內俱不將此款實情敘入原不足以服李士遴之心。看來李士遴乃一執膠尚氣之人。從前該撫等辦理此案既不將陳世俊虛出倉收之處一併叅劾。又未將李士遴逼供虛捏緣由審明。乃顛預了事。以府縣同案叅革實未平允。今楊廷璋等摺內悉歸咎於該司道等之偏

執不公。而於李士遴挾嫌使氣之處並無一語議及。則又未免存一揣摩之成見矣。朕辦理政務悉秉大公。每遇一事必體察其是非曲直。從不肯意為軒輊。致與銜鑑之空平。中外臣工所共知者。所有從前辦理此案之顧濟美已經革任不必交部。鐘音史奕昂俱著交部議處。並將此通行傳諭知之。○軍機大臣等議覆明瑞等奏稱揀選一切官員宜各按旗按翼驗看技藝揀選。今伊犁葉爾羌喀

什噶爾。阿克蘇駐劄換班滿兵。又烏魯木齊駐劄滿兵一百五十名。俱係合旗合甲喇移駐者。若遇官員缺出。各處大臣往返札商。徒滋繁擾。應如所奏。即由本處大臣將本處應放之人揀選。奏請補放。至烏魯木齊駐劄前鋒五十名。索倫一百名。同部各城駐劄索倫隊兵。當初俱係選派。與伊犁葉爾羌喀什噶爾。阿克蘇等處不同。每遇挑選。或有可放之人而無缺。或有缺而不得其人。若就本城現有之人揀選。其曾經出力者。不得陞遷。而庸材反得與選。實屬偏枯。亦應如所奏。遇官員缺出。仍照例由各處按旗。於應陞內。各揀二人。造冊移送伊犁將軍處。擬定正陪。會同各該處大臣奏請補放。從之。○烏魯木齊辦事副都統侍郎旌額理等奏。烏魯木齊駐劄舊城。初係土堡。周圍一里六分。現在街市房屋漸加稠密。擬將城垣加高一丈六尺。厚一丈。添建四門。八月內即可告竣。再特訥格爾新

開屯田。建造營房一千二百間。築城一座。規制相仿。計至冬初亦可竣事。仰懇照從前城堡之例。賜以嘉名。報聞。尋欽定烏魯木齊城曰迪化城。城門東曰惠孚。西曰豐慶。南曰肇阜。北曰憬惠。特訥格爾城曰阜康城。城門東曰綏惠。西曰振威。南曰麗陽。北曰寧朔。○甲午。

上奉

皇太后幸卷阿勝境。侍早晚膳。○遣官祭

關帝廟。○諭。今年直隸各屬雨暘時若。秋收頗為豐稔。惟近京各州縣中。上年被水之區。間有蝗蝻生發。雖經欽差大臣及地方官督率撲捕。於禾稼不致過損。而較諸他邑收成。終恐稍減分數。所有應徵額賦。若照例徵收。民力究未免拮据。著加恩。將通州三河固安霸州文安大城清苑安肅天津靜海滄州青縣交河等十三州縣。本年應徵錢糧俱緩至來年麥熟後徵收。俾農民益藏充裕。以資生

計。該部遵諭速行。○乙未。

太祖高皇帝忌辰遣官祭

福陵。○軍機大臣等議覆。綏遠城將軍蘊著等奏。請將綏遠城已裁副都統衙署。移建於歸化城內。即作現在留駐歸化城副都統衙署。其歸化城所遺都統衙署。四所內酌留一所。為都司把總衙署。其餘所物料。添改駐劄營兵房屋。應如所請。至前撫臣鄂弼議將歸綏道移駐綏遠城。原為綏遠同知倉庫。改令管轄。起見。今該將軍等稱。若將裁汰副都統衙署。改為道署。現據估需銀一千九百餘兩。更多糜費等語。亦應如所奏。毋庸議。從之。○又議覆。圍場總管齊凌扎布奏。稱查圍場八旗兵。每年派人赴京支領錢糧。往返需時。偶值雨水。更滋糜費。應如所請。就近在熱河道庫照數支領放給。但從前因路遠不能按季給發。是以每年赴京統領一次。今改就近在道庫關領。若仍照向例。每年一次於兵丁生計。

未便。請嗣後每年分作春秋二季放給。查熱河道庫並無餘存銀兩。其每年備賞銀俱由戶部領用。請交戶部於每年多運二萬兩。以為放給圍場兵丁之用。仍將每季所領錢糧數目人名咨報戶部。理藩院覈銷。其出缺挑補領催馬甲。仍照例按名咨報滿蒙八旗查覈。從之。○丙申。

上奉

皇太后幸卷阿勝境。侍早晚膳。至己亥皆如之。

○遣官祭昭忠祠。○諭。前因湖北縱盜寃良案內。究出幕賓徐掌絲弟兄。盧培元等盤踞多年。串通一氣。與地方官交接往來。從中關通把持。為地方之害。此等劣幕。不可不明治其罪。因降旨李侍堯。熊學鵬。查拏解京審訊。今據李侍堯已將徐掌絲之弟徐登三。盧培元等。拏獲解京。而徐掌絲一犯。先經阿永阿等遞解回籍。乃黃岡縣知縣葉世慶捏稱該犯患病。改用長解。現據熊學鵬奏到。業經將

徐掌絲盤獲訊據該犯供稱係由葉世度將長解公文令其自持回籍並無兵役解送是該縣改用長解之稟併屬欺朦上官情理更為可惡然則該犯之徑行回浙特未知有拏解刑部之信耳倘稍有風聞必致速颺該縣瞻顧同鄉玩視要犯如此與徇情私縱何異葉世度著革職拏交刑部治罪○丁酉

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵○遣官祭

顯佑宮

東嶽廟

城隍廟○

上詣

皇太后行宮行禮○御澹泊敬誠殿扈從王公大臣官員及蒙古王公台吉等行慶賀禮○賜扈從王公大臣及蒙古王公台吉等宴至己亥皆如之○戊戌吏部議覆山東巡撫崔應階奏單縣知縣葉道治因本邑革職知州盧曰德遞呈不跪出言不遜即行杖責收禁於通詳文內隱諱不報有心朦混應照例革職得旨已革知州盧曰德自恃曾為職官親身赴縣遞呈不跪復於公堂辱罵該縣不容其豪橫尚有風力葉道治不必革職○己亥陝甘總督楊應琚奏前因巴里坤地土廣衍水泉敷裕請飭該同知於現在屯田之外召募開墾荷蒙俞允隨據同知佟祿陸續開報商民認墾之地共八千二百餘畝俱照水田之例六年升科報聞

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十二

平定縣志

元

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十三

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣履程

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲副都統軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未八月庚子陝甘總督楊

應琚奏巴里坤因上年試種細糧已有成效

今種麥稞豌豆尤為蕃碩商民認墾地三千

四十餘畝照水田例升科下部知之○辛丑

秋分夕

月於西郊遣顯親王衍潢恭代行禮○

上奉

皇太后自避暑山莊啓鑾幸木蘭○詣

皇太后行宮問安○是日駐蹕中關行宮○壬

寅諭今歲直隸各屬秋收頗為豐稔前以近

京各州縣積歉之後。元氣未能驟復。業經降旨。將本年應徵錢糧。緩至來年麥熟後徵收。復念本年借欠之籽種各項。則均應及時還官。而歷年借欠籽種各項。又須完納新舊並徵。於閭閻生計。仍未免拮据。著再加恩。將霸州等七十七州縣。自乾隆二十年。至二十七年。應徵歷年借欠未完常社等倉并米麥合穀七十五萬餘石。於本年十月起。分作三年帶徵。以紓民力。該部遵諭速行。○是日。駐蹕

波羅河屯行宮。○癸卯。

上詣

皇太后行宮問安。○是日。駐蹕張三營行宮。○甲辰。諭據新柱等奏。稱由阿克蘇前往葉爾羌解送馬匹。護軍叅領蘇克棟阿等帶領兵丁沿途盡心牧養。並無倒斃。全行送到。應請獎勵等語。蘇克棟阿等解送馬匹。並無倒斃。妥協送到。護軍叅領蘇克棟阿二等侍衛烏爾圖德興著交部議敘。其兵丁三十二名。著

酌量賞給錢糧。○浙江巡撫熊學鵬疏報乾隆二十七年分各州縣具報開墾臨海縣地二十五頃二十五畝有奇。龍泉縣田一十七頃八十畝有奇。太平縣田地山塘三頃一十八畝有奇。太平。永嘉。平陽。三縣田地山塘園畝有奇。江山。開化。二縣衢州所田地一十七頃三十畝。○是日。駐蹕阿貴圖大營。○乙巳

上詣

皇太后行幄問安。○行圍。○諭曰。愛柱不勝總兵之任。著來京候旨。所遺馬蘭鎮總兵員缺。著國柱補授。○又諭蒙古王公扎薩克台吉等子弟及歲有報部授職之例。杜爾伯特王公扎薩克等因不知此例。未經報部。今貝子根敦之子扣肯既已及歲。著予以應封品級賞戴花翎。車凌烏巴什子弟內有及歲者。俱著照例報部授職。○又諭據理郡王奏稱有宗室覺羅等不繫黃紅腰帶。交納匪徒。入肆

飲酒滋事一摺。宗室覺羅等帶用黃紅者。原係表彰天潢。用昭尊尚。非常人可得而用。乃更易別色。與匪人往來交結。實屬有玷宗室。覺羅著交宗人府步軍統領衙門。即行查出。叅奏。又稱。八旗官員內。有不戴翎頂入肆飲酒者。亦應嚴加察訪。著交各該旗及步軍統領衙門。一併查拏。奏聞治罪。將此通諭八旗知之。尋奏。審明與宗室侍衛開泰同入酒肆。之和成額等定罪。得旨。所審尚未詳悉。開泰等擅入酒肆。或戴翎頂。或換衣帽。或出南城。或往戲園。殊不明晰。著原審大臣。另行審明具奏。開泰係宗室。私往所管之漢侍衛李全家內。實屬卑鄙。李全將該侍衛班領延請至家。各亦難辭。著一併審明定議具奏。○調任貴州巡撫喬光烈疏報。都勻銅仁二府。廣順一州。普安甕安。涓潭。天柱。四縣。開墾額內額外田四十一畝有奇。○是日。駐蹕海拉蘇台大營。○丙午。

上行圍。○諭前據舒赫德叅奏吏部文選司不准刑部扣缺。竟行開選。並請將該司郎中何逢僖。瑚世泰。章寶傳等。暫行解任查訊。彼時朕以事關銓選。恐其中或有弊竇。是以降旨准行。交與陳宏謀會同舒赫德秉公查辦。如果該司員等實有應行叅處弊端。陳宏謀等自必將查訊情形先行具奏。今已閱兼旬。未據奏到。看來尚無別項情弊。即將來有應行察議之處。諒亦不過罰俸而止。不至遂干罷斥。何逢僖等俱係銓曹辦事之員。今皆解任日久。恐胥吏等轉得因此乘間舞弊。何逢僖。瑚世泰。章寶傳等。仍回本任辦事。不必解任。其不准刑部留缺一事。仍聽陳宏謀舒赫德等據實秉公查辦。○又諭留京辦事王大臣等。奏據大學士史貽直之子史奕。替史奕瓌於九月初六日扶櫬歸里。著沿途文武官弁。在二十里以內者。俱至櫬前弔奠。並遣人護送。俾長途安穩。早抵故里。其京師所賞官房。

即著伊子居住不必繳還○刑部議覆山東按察使閻鶚元奏稱各省督撫學政鹽政暨藩臬兩司書吏並承差舍人等役公然戴有金頂請照違制律杖一百加枷號一個月等語查各衙門書役其吏典考滿授職者例得照職分大小頂帶其餘大小衙門未經考職書役從未許其濫邀請嗣後未經考職書吏混戴帽頂者照假冒職官杖六十徒一年如本管官未經查出照失於查察例罰俸一年倘有意故縱即照徇庇例降三級調用至地方官不能查出亦照失於查察例罰俸一年若已經察出或瞻徇情面不即舉報該地方官照徇情例降二級調用從之○命賞御前侍衛端察副都統職銜○是日駐蹕呼魯蘇台昂阿大營翌日如之○丁未

世宗憲皇帝忌辰遣官祭泰陵○戊申

上詣

皇太后行幄問安○行圍○軍機大臣等議奏據瑚爾起從前奏請將塔里雅沁回子百餘人遣往呼倫貝爾教習索倫人等挖溝種田伏思索倫原以打牲為業若使伊等專習耕種恐日久本業俱忘於邊境無益請將遣去回子撤回仍令伊等肄習打牲再所遣回子皆係獲罪人犯請免罪撤回遣往伊犁種地令國多歡量給路費就近遣至烏里雅蘇台交成衮扎布遇解送牛羊之便遣往伊犁與種地回子一併安插從之○吏部議准調任山西巡撫明德奏稱清源縣地處偏僻界僅三十里徐溝縣地方不過三十餘里請將清源縣裁汰統歸徐溝縣管理其文武生員歸併徐溝縣教職管理學額仍循其舊知縣典史教諭各缺悉裁印信學記繳銷從之○豁除浙江烏程縣坍沒荒廢田地銀八十兩有奇米一百一十石有奇○是日駐蹕納爾蘇台達巴罕大營○己酉

上行圍○諭前據舒赫德叅奏吏部文選司截缺錯誤一摺因事關銓選或其中不無弊竇是以交與陳宏謀會同刑部秉公查辦今既查明並無聽受請託情弊何逢僖等著不必交部議處○諭軍機大臣等和其衷叅奏徐溝縣知縣朱昱發派錢買穀一摺朱昱發以採買常平穀石派令縣屬有田之戶按畝出錢該撫既經查實自應據實叅奏與清源縣民孫肇廷等控告歸併縣治各款本係兩事

該撫摺內竟將孫肇廷等赴京控告情由一併敘入殊屬非是恐無知小民不知朱昱發之本應叅革而轉謂由於伊等之控告適足以長刁風其原摺已交軍機大臣刪節交部並著和其衷於審訊之時明切曉諭該縣居民以知縣朱昱發違例私派累及閭閻是以特行叅革究治俾愚民知縣令之被叅非一二刁頑所能把持方為整飭吏治之道可將此傳諭和其衷知之○山東巡撫崔應階奏

東省有商輸穀一項係將銷鹽額票分為上中下三等令商人按票輸穀通計三十九州縣共輸穀二十萬五千餘石歸地方官收貯每年春借秋還加一收息而常平倉穀則春月出借秋後免息還倉查常平現缺額二十七萬餘石商輸現存及未完民借共二十一萬餘石請將此項輸穀歸入常平既省買補之煩貧民亦免加息得旨允行○是日駐蹕都穆達烏拉岱大營○庚戌

上詣

皇太后行幄問安○行圍○是日駐蹕巴顏布爾噶蘇台大營○辛亥

上行圍○散秩大臣伍彌泰奏上年阿思哈奏品河有舊堡一座計房一百七十餘間業經修理庫爾喀喇烏蘇瑪納斯所修官兵駐劄營房一百餘間亦已告竣伏思現在屯田處所俱屬伊犁烏魯木齊要路今該處商人等陸續前來居人漸密可否照伊犁等處之例

將庫爾喀喇烏蘇等三處增修堡座計庫爾喀喇烏蘇一堡四門品河瑪納斯皆一堡三門請賜嘉名報聞尋欽定庫爾喀喇烏蘇曰綏來堡門東曰延和西曰迎顯南曰調薰北曰溥信品河曰豐潤堡門曰咸寧曰同軌曰景風瑪納斯曰遂成堡門曰即敘曰迪康曰覃化○是日駐蹕巴顏溝大營○壬子。

上詣

皇太后行幄問安○行園○諭奉

皇太后懿旨忻嬪豫嬪俱晉封為妃欽此所有應行典禮著各該衙門察例舉行○又諭據永貴等奏稱喀什噶爾辦事主事伊靈阿道員固世衡至明年三年期滿其員缺無庸於內地派人更換請將護軍校巴延岱授為通判原任防尉八十爾開復原職仍留二年員外郎挖穆齊圖再留一年健銳營前鋒委署筆帖式烏爾袞泰明賞給八品筆帖式遇缺坐補主事伊靈阿係現任職官派往辦事之

人候三年期滿著更換回京摺內既稱護軍校巴延岱實心辦事慎重錢糧著照永貴等所請將巴延岱授為通判即在彼處辦事前鋒烏爾袞泰明二人俱係曾隨將軍大臣奮勉行走之員今復懇請願留効力著加恩授為八品筆帖式遇缺即補固世衡挖穆齊圖八十爾俱係有罪發往之人俟將伊等獲罪緣由查明具奏時另降諭旨○諭軍機大臣等前據李侍堯奏湖廣鹽價驟增一摺彼時即以楚省向來吏治廢弛致商販乘間牟利高擡市價淮商相距遼遠未必與聞隨諭李侍堯就近查辦並傳諭高恒令其將漢口淮販因何輾轉加增之處逐一據實查奏今據高恒奏到漢口發販收價向由賣商經理兩淮商衆不能遙為操縱或賣商人等見鹽既暢消可以居奇設計作奸陡長市價前已咨行楚省將蠹棍吳美堂等拏究並札寄李侍堯隨時查察無使擡價累民所奏甚屬明晰

楚省地棍敢於把持鹽務致市價騰踴民間有食貴之患皆由地方官平昔不能整頓所致自當實力根究示以嚴懲俾奸蠹共知斂跡而鹽價長落尤宜隨時查察期於市價常平商民交便著傳諭李侍堯即速查訊明確從重究治以清積弊而肅鹽政高恒原摺並著鈔寄○又諭據素誠奏稱烏什派出伊犁屯田回人二百戶其應給口糧牲隻已向阿布都拉籌辦來年二月可抵伊犁等語從前各城伯克頭目等因協助屯田回人俱加恩賞賚此次派往伊犁回人頗衆該伯克等既照例協助自應一體辦理若每次必候旨遵行頗覺繁瑣著傳諭素誠即照例分別賞給仍通諭駐劄回部各大臣嗣後有似此協助之舉一面奏聞一面賞給不必仍前候旨○以福建按察使淑寶為甘肅布政使福建糧驛道朱珪為福建按察使○江蘇巡撫莊有恭疏報金山江陰丹徒丹陽乾隆二十七年

分入額升科並轉則田地蕩灘九頃七十七畝有奇○浙江巡撫熊學鵬疏報慈谿太平浦江西安開化瑞安平陽開墾額外田地塗田蕩山三百六頃十一畝有奇又慈谿浦江以地改墾田四頃四十八畝有奇又樂清縣開墾額外塗田礮田地池一百三十一頃二十九畝有奇○是日駐蹕鄂爾楚克哈達大營翼日如之○癸丑

上行圍○遣官祭賢良祠○甲寅

上詣

皇太后行幄問安○行圍○湖北巡撫輔德奏查勘隄垸籌辦事宜查湖北疆域東南遼闊境內有江二道一為荊江一為襄江俱由黃梅縣出楚境此外支河湖港不計其數施南宜昌鄖陽三府向無水患其武昌等七府屬有三十三州縣衛俱係沿江濱湖內除江夏之金沙洲蕎麥灣荊門之沙洋襄陽之老龍等隄例動生息銀歲修其餘俱民自修築復

於隄內田之四圍各築小隄一二三尺不等俗稱為垸經久達部者謂之部垸官為經理未達部者為民垸查民垸部垸各處毗連民垸被潰淹及部垸且田同一隄賦屬一制似未便歧視應概令官為經理謹酌各款開後一、隄岸宜併力合作也請嗣後定於九月望前先令該管州縣查明垸長更換殷實農民會同公正紳士將該垸各戶田數查開清冊一存垸長一存州縣按隄估計夫土均派運工無論近於某戶之隄相度何處卑薄險要即於公派夫土內通力合作伏秋大汛再於險處多備土牛同心防守其田舊隄存者總令現在業戶承值有抗違誤公等弊分別懲治一修隄宜高厚堅實也查向來歲修不過於冬春間聽各業民於殘缺處鬆堆浮土即報工竣遇雨即坍遇漲即潰應將各境內分別極險次險極險之隄先令加高二尺幫寬三尺俱行夯礮凡行礮之夫准其將應出之

土按方折抵隄外作為坦坡前植柳樹其次險者亦令幫全下年歲修照前加增一私垸宜禁也嗣後令道府大員於查辦歲修之便親履勘驗無論垸之新舊田之肥瘠但妨水路立即督令平毀仍聽其耕種不致失業再有新淤灘地不許私築歲底令印河各官親查加具印結通送院司道府查覈違者分別叅辦一淤塞宜疏也查支河湖港既賴其蓄蓄復藉以宣通應於霜降水落後責令各該水利汛官乘便逐一勘明不論外河內港或有淤淺一面報明印官一面督押頭人業民等先就仰側處設法挑濬深通即以所挖之土培補附近隄身一水利大小各官宜重責成也嗣後印官委令水利佐雜於開工之時各按本汛查勘將隄身高低寬窄殘缺之處開明丈尺限於九月內造冊報明印官一面監視頭人業戶培補高厚印官常川稽查並於二月內取具如式修固印結送印官查驗

加結申報道府廳員分路履勘由道覈明詳報院司分往抽查有怠玩草率分別叅辦一極險堤工佐雜不宜更調也查水利佐雜冬春有監修之工夏秋有防護之責必須久於其地堤工民情方能熟悉應將極險之江陵監利荊州荊左荊右潛江天門荊門沔陽文泉漢川等十一州縣衛水利佐雜停其委署別缺派委外差果能辦事實心工程堅固一年平穩記功三年內一無潰決遇應陞之缺酌量奏咨得旨所奏甚屬有見當與李侍堯和衷共理以期有濟○是日駐蹕扎克丹鄂佛囉大營翼日如之○是月江蘇巡撫莊有恭議覆布政使蘇爾德奏實蘇局歲給各鑪工料錢一萬六千六百四十餘千原照京局例以錢給匠辦料供鑄二十六年經前撫臣陳宏謀奏准將工料錢照時價給銀收買不許鑪匠攜錢出局以杜夾帶私鑄囤積居奇之弊所買錢於蘇州官役養廉工食內搭放

今查蘇局鼓鑄合計成本每銀一兩鑄出制錢九百四十餘文收買工料錢每銀一兩照時價僅換錢八百七十餘文公項反致虧折應如所奏嗣後工料仍照舊例將鑄出錢給發責成藩臬兩司不時到局查察督委員加謹稽察如有踈縱夾帶等弊叅處其收買錢現存司庫二萬六千餘千應照例存為將來差案官局之需所請搭放官役養廉工食之處毋庸議得旨允行○湖南巡撫喬光烈奏湖南省城對江有嶽麓書院一區地方靈秀有宋大儒朱熹張栻於此講學人文輩出為海內四大書院之一明季殘毀本朝修復再頒扁額復賞帑金惟房屋年久漸至傾圮負笈者日盛尤患屋少人多臣到任後親往勘估不但屋宇將圯且地逼山坡淺窄欹斜工難經久稍東數十步原屬書院故址緊傍文廟地勢平行氣局開拓改築於此可增建數十間足供諸生棲止報聞○河南巡撫葉

存仁秦豫省向多水患。自二十二年大發帑金將支幹各河普加脩治。於是節節疏通。數年以來。衆流順軌。屢慶豐登。但恐積久漸忘。所當時加策勵。以保前功。臣自到任。經由各處細加體察。其河隄溝渠實屬一律完好。大概二十二年欽工。皆由通局合籌。是以數郡之水無不一氣相承。但須守其舊制。無使淤淺。不必更加寬深。其餘各河。則一州一縣各就其境內治之。雖同加修濬。而淺深廣狹。不無參差。蓋民情見小。或彼利此害。往往各持己見。地方官即關會踏勘。而以民情不便。輒事遷延。是當倣照欽工。查其來源去路。合數境而修治之。現通飭各屬。各將境內河隄溝渠。先行勘查。何處有淤宜去。有缺宜補。其有兩境相連。數境交錯者。臣親行勘定。隨宜辦理。不許仍持偏見。妄有抗違。責成道府大員。董率報竣後。再加測量。收工務期脈絡貫通。長無淤阻。得旨為之以實。更當不擾民可耳。

○山東巡撫崔應階奏。濟寧橫壩以南。南陽昭陽湖內。茭蒲葑荻等草。一望蒙茸。不見水面。既使湖飽。不能容水。復阻水道。不得暢流。現令濟魚二州縣多撥民夫。乘船駕筏。儘力芟割。即一時不能全湖盡除。亦應開除寬五六十丈者數道。值此西北風盛之時。水道既寬。湖水自能鼓浪南下。一俟運河消落。河水低於坡水。凡可開隄放水之處。隨宜開放。以期濱湖窪地早涸。無誤春花。得旨覽奏俱悉。此係良法。甚宜竭力行之。○山西巡撫和其衷奏。大同一府。地處沿邊。城內建大有倉。現存穀豆。及應買補之數。幾及二十萬石。向係豫備軍營。其出易定例。每年不得過數萬石。積壓年久。徽變堪虞。邇年蕩平底定。似毋庸仍於大同多貯軍糧。查大同毗連之朔平府。為沿邊要隘。人煙稠密。右衛滿兵。食指浩繁。該府向未設常平倉。所徵民糧。恒不敷供支。旗兵糧餉。應請將大同現貯穀豆十萬石。作

為常平定額。每年借糶出易。不必拘定一萬石之數。以免紅腐。其溢額糶價。撥給朔平。設常平倉。並酌撥地丁銀。陸續買足糧六萬石。長為定額。於民食兵糈兩便。照例出易。該府出口二十里。即歸化城。該地糧多價平。買貯尤易。其建倉之處。已委員勘明。該府內城現有地基。足以蓋造。得旨允行。○陝甘總督楊應琚奏。新疆生聚日繁。屯糧豐獲。而烏魯木齊等處。換獲貿易馬日盈。應隨時變通。以節繁費。查各標營前次攜眷告駐烏魯木齊兵三百餘名。內馬兵應帶馬一百四十餘匹。又本年各標營派往烏魯木齊攜眷兵計一百數十名。亦應帶馬。長途滋費。臣悉心籌酌。莫若將伊等應需之馬。移咨烏魯木齊。於換獲貿易馬內撥給。其存營馬。行令各營住支草乾。擇廠牧放。俟各營遇有倒缺陸續撥補。每匹作價銀八兩。按倒馬騎操年分。分別交價解司。嗣後內地各營。尚有應派往烏魯木齊

攜眷兵。所需馬亦照此辦理。得旨甚好。○廣西巡撫馮鈴奏。潯州府屬之貴縣桂平二縣額徵糧係撥解左江鎮等標協營兵食。向俱係熟穀米。查該二縣地氣潮濕。生米貯倉。一經夏月。易致霉蛀。民間貯穀俱煮熟。是以徵收糧米亦然。取其質堅不變。可以久貯。行之已久。相安無異。但穀經煮熟。米必味淡力薄。自不若生米之力足而味甘。應請將貴縣桂平自本年為始。照各屬一例。改徵生米。民情亦便。得旨允行。○署貴州巡撫劉藻奏。查按察司司獄未建衙署。乾隆元年始置民房數間。改作衙署。距司監里許。倘查察未周。難免疎虞。查司監之側。係貴陽府經歷衙署。請改為按察司司獄衙署。所遺司獄衙署。即令府經歷居住。既於府經歷辦公無礙。而司監重地防範更密。得旨甚好。

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十三

實錄卷之六百九十三

三

一

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十四

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣履桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十八年癸未九月乙卯朔日食○兵

實錄卷之六百九十四

十

部議准貴州安籠鎮總兵焦騰漢奏稱各營
額設字識專辨移文冊籍不與差操但其名
原在額兵數內是以各營按名一體製造甲
械請嗣後將各省額設字識之甲械悉停製
造現存者遇需製時即以此項撥給從之○
以甘肅布政使淑寶廣西布政使王檢對調
○以山東按察使閔鶚元安徽按察使富尼
漢對調○予故雲南提督額爾格圖祭葬如
例謚勤恪○丙辰

上詣

皇太后行幄問安。○行圍、前署廣東巡撫明山疏報乾隆二十七年分廣州、潮州、肇慶、廉州府屬報墾額內額外荒蕪稅三十三頃五畝有奇。○雲南巡撫劉藻疏報乾隆二十七年分會澤、騰越、魯甸、昆明、嵩明、和曲、晉寧、呈貢、易門、彌勒、雲南、宣威、大關、永善、陸涼、河西、祿勸、平彝、鎮沅、麗江、鎮雄、永昌、新興等二十三府、廳、州、縣共開墾久荒并額外民屯田地一百十四頃八十六畝有奇。○是日駐蹕依綿峪大營。○丁巳。

上行圍。○諭軍機大臣等、永貴等奏稱回地水草不宜游牧、因布魯特阿瓦勒比情願移於該部落、派人照管、伊復親身督率辦理、已量給伊屬人羊茶、阿瓦勒比甚屬奮勉、可否加賞頂帶等語、阿瓦勒比夙著恭順、茲復照管牧羣、俾得蕃息、甚屬可嘉、著加恩賞給四品頂帶、以示鼓勵。○詔除江蘇鎮洋縣挖廢蘆

蕩課銀十八兩有奇。○是日駐蹕依遜薩勒巴爾哈達大營。戊午。

上行圍。○諭前據和其衷奏徐溝縣知縣朱昱發採買倉穀、按畝派錢、請革職審擬、已有旨將朱昱發革職、其違例派累情由、並交該撫一併嚴審、究擬、今既審明、朱昱發係奉原任撫臣鄂弼為本地儲積起見、並無侵漁入己情弊、著免其治罪追賠、仍予開復、其辦理不善處、照例察議。○又諭據福增格奏稱、副都統富爾松阿因修理衙署、於藩庫內動支銀三百餘兩、並未用完、又向綠營兵林宗則賒取木料、磚瓦、米石等項、共欠錢一百四十九串零、並未償還、應行叅奏等語、富爾松阿身為副都統、修理衙署、剩匿官銀、且向綠營兵林宗則賒取木磚等項、至欠錢一百四十九串、並不償還、甚屬卑鄙無恥、富爾松阿著革職、交刑部治罪。○諭軍機大臣等、據和其衷審擬徐溝縣知縣朱昱發、派錢買穀一

案未免過當。前因孫肇廷將胡應銓控告朱昱發原呈粘連投部。其中情節自不得不徹底查辦。至於違例派錢一事。所重在派累擾民。私肥已素。今既審明。原係從前鄂弼任內籌畫辦理之事。該縣並未侵漁入己。而此外胡應銓所控各款。又盡屬子虛。是朱昱發並無應得之罪。已有旨將朱昱發免其治罪追賠。原叅革職之處。並予開復矣。至胡應銓呈內所控情節。既盡屬虛誣。其有無與孫肇廷商同誣捏情弊。著將胡應銓解赴刑部。與孫肇廷對質。審明另案完結可也。著將此傳諭和其衷知之。○又諭據福德奏稱。昨理藩院行文俄羅斯薩納特衙門。俄羅斯迫於我之不肯通商一節。勢必懇請。如果情詞恭順。請將恰克圖貿易停止。移於依琿地方。或亦折伏俄羅斯之一法等語。恰克圖為兩處交界。酌行貿易。彼此屬下之人。易於約束。若移依琿。不但滋擾。設遇盜賊詞訟之事。必致妄行。

狡賴。著傳諭福德將辦理貿易之事暫且停止。俟俄羅斯回文到時。如何辦理之處。候朕降旨施行。○御史戈濤奏。每年刑部會審各省重犯招冊。臨期散給。時迫冊多。披覽不能詳細。請嗣後秋審屆期。將各省招冊於十五日前分給各衙門。俾得從容繙閱。得旨。所奏是。依議行。○吏部議覆御史王啟緒奏。請嗣後各部郎中俸滿保送。該堂官詳加察覈。分別堪膺繁簡。一體銓選。知府無庸以道府兼掣。應如所請。再各部郎中論俸截取甄別保送。記名以簡缺用者。照例歸簡缺。知府選用。記名以繁缺用者。其知府未經得缺之先。遇有道缺一體列名進呈。從之。○是日駐蹕安巴。完和羅昂阿大營。○己未。

上詣

皇太后行幄問安。協辦大學士戶部尚書劉綸。刑部尚書秦蕙田。奏。臣等恭承指示。校正韻書。竊惟古詩賦頌箴銘韻從通叶。欽定叶

韻彙輯一書義例精當久已成編惟律韻尚仍舊本謹按韻書昉隋唐分合異同源流滋別考證維艱臣等悉行參考就現在通行韻書中有應更改增損者折衷廣韻集韻禮部韻略五音集韻韻會舉要等書及諸家辯論參互得失之故列為凡例並將列韻格式先呈御覽其新編韻書請賜嘉名得旨書名著定為音韻述微○是日駐蹕僧機圖博勒齊爾大營○庚申

上行圍○吏部議覆河南巡撫葉存仁奏稱河南城守衙門筆帖式一缺請改為本處駐防旗人公缺照考試各省將軍副都統等衙門筆帖式之例於八旗兵閑散內考補與在京筆帖式一體較俸陞轉應如所請有情願改補武職者咨明吏部准改遇本處本翼驍騎校缺出俟記名領催用過三缺之後補用一員從之○是日駐蹕齊爾博庫昂阿大營○辛酉

上詣

皇太后行宮問安賜扈從王公大臣蒙古王公台吉兵丁等食○是日駐蹕阿穆呼朗圖行宮○壬戌諭軍機大臣等秋審勾到日期已定於本月十八日起著傳諭秦蕙田依期前赴行在如或病不能來不必勉強即著阿永阿前來○陝甘總督楊應琚奏陝甘各標營挈眷駐劄烏魯木齊兵俱應隨帶馬匹恐長途多費請於烏魯木齊貿易馬內撥給其存營馬又可住支草料擇廠牧放撥補缺額嗣後再有移駐兵俱照例辦理至本年派往挈眷兵五百餘名合計家口一千餘名俱於八月十六日以前全數起程報聞○是日駐蹕濟爾哈朗圖行宮○癸亥

上詣

皇太后行宮問安侍早膳○諭前審訊湖北縱盜寃良一案根究始事之由詢及知州趙泰交據供有幕友浙江人徐掌絲盧培元等第

兄親戚盤踞楚省。歷有年所。與地方官交接往來。徐掌絲在臬司沈作朋署內。伊弟徐登三。即在總督愛必達署內。伊妹夫盧培元。即在巡撫湯聘署內。彼此串通一氣。此案各衙門前後批詳。皆出伊等數人之手。等語。地方大吏承辦重案。竟至顛倒是非。行私罔上。固不得諉過旁人。稍為寬貸。而此等惡幕。暗通聲勢。從中把持。實為民生吏治之蠹。已降旨李侍堯熊學鵬等。等拳解刑部。會同軍機大臣。嚴審治罪。在外省督撫藩臬衙門。案牘紛繁。書記之任。亦不可少。然一切應准應駁。必當自為主持。豈可聽一二幕友操縱自由。且此輩賢否不一。甚至彼此潛相照應。或援引黨類。往還出入。因而媒銜招搖。轉致受其愚弄。向來勅薦幕賓。例有明禁。復經臺臣條奏。嚴定處分。乃楚省尚有敢於上下勾結。縱盜殃民。若徐掌絲等之甚者。一省如此。恐他省亦不能保其必無。著傳諭各省督撫留心密訪。

嚴查。如有此等久慣惡幕。潛居省會。倚託上司衙門。因緣為奸者。立即嚴拏重究。以昭炯戒。毋得稍存姑息。僅一遞回原籍。顛預了事。倘督撫等視為泛常。不知實力整頓。一經朕別有訪聞。惟伊等是問。並聞有新任督撫藩臬。接用舊任幕友者。徒因其經辦多年。一切多所諳習。遂爾相沿趨便。不知若輩借歷幕更事為名。始終占踞一衙門。官有去留。幕無更易。不肖之徒。易於乘間滋弊。涓涓不息。將為江河。亦不可不杜其漸。嗣後一體飭禁。並將此通諭各省督撫藩臬等知之。○以太常寺少卿達色為福州副都統。○是日駐蹕波羅河屯行宮。○甲子。諭曰。御史戈濤奏稱。所奏事件。未經領到原摺。而刑部業已紛傳。必係刑部司員之在軍機者。豫為透漏一摺。當交軍機大臣查奏。今據軍機大臣查明。戈濤條陳二摺。俱係發交刑部辦理事件。即於本日傳鈔。隨本報發回。而硃批原摺。向應存貯。

軍機處年底彙繳例不給還等語。此事原屬照例辦理。尚無透漏之處。戈濤以未接到硃批原摺。故為此奏。但軍機司員向於本部堂官及相好戚友中。豫通消息。亦不能保其必無。從前即曾有因此獲罪者。該司員等益當痛加儆戒。不得因此次查無情弊。遂罔知顧忌。設將來果有徇私洩漏等事。一經查出。必嚴加懲治。決不稍為寬貸也。伊犁副都統伊勒圖奏准新柱等咨伊犁挈眷之滿洲。索倫察哈爾等人口甚多。布疋棉花俱日用必需。請將葉爾羌折糧錢文採買棉花三萬餘觔解送等語。查現在駐劄伊犁滿洲綠旗官兵各有原來衣被。三年內尚可不須添補。其索倫察哈爾兵多用皮衣。是伊犁現在須棉無幾。而與哈薩克貿易及修補兵丁衣服所用布疋甚多。請將回城折糧錢文暫買棉花數千觔。其餘盡買布疋。尤為適用。將來必須棉花之時。又可酌量通融辦理。報聞。以江

南督標中軍副將王巍為福建福寧鎮總兵。○是日駐蹕中關行宮。○乙丑上詣皇太后行宮問安。○諭軍機大臣等連接高晉具奏洪湖水勢有消無長。五霸並未過水。所有伏秋汛內啟折清口東西壩察看水勢。隨時收口各情形俱已覽悉。惟黃河今年水勢如何。毛城舖及徐州城北新築土隄俱曾否過水。徐州城外水誌長落若干。並淮徐一帶秋禾田畝現在均已豐收否。該督俱未經奏及。著傳諭高晉令將入秋以來黃水情形速即據實詳悉奏聞。以慰厯念。○吏部議覆原任四川總督開泰疏稱查武連劍門三驛係劍州所屬。請以附近之劍鄉三甲四甲廣鄉一甲二甲地方令武連驛驛丞兼巡檢銜管理。附近之廣鄉四甲普鄉二甲四甲地方令劍門驛驛丞管理。魏城驛係綿州所屬。請以附近之東鄉北鄉地方歸魏城驛驛丞管理。

凡竊匪等事。責令就近拏解各該州審詳。逃盜案件。照例承緝。其各驛記改擬分別鑄給。應如所請從之。○是日。駐蹕避暑山莊。至己皆如之。丙寅。諭據蘇昌奏粵東田房稅契銀兩一項。原係另款存貯。以備本省建造工程等項動支。今積至一百二十餘萬之多。現在京外各處。或有需用。請即酌撥八十萬兩。解交收用。又另摺請將廣東圍基隄岸二項。鹽羨生息銀二十九萬餘兩。解交內府工程處備用各等語。各省閒款銀兩。存貯既多。原可酌量籌辦。然應存應撥。止須據實陳明。聽候勅部定議。毋庸為他處工程。總總過計。蘇昌此奏。似聞圓明園現有修葺之處。故欲將此閒款充用。所見甚小。前熊學鵬亦有請將商捐辦差餘存銀兩。解交內府之奏。兩人用意略同。殊不知圓明園工程。一切皆仍舊貫。需費無多。奚致遽煩督撫經營籌畫。況天子不言有無。外府內府均屬一體。又何必事

此挹注之勞耶。蘇昌等既為此奏。恐各省督撫。尚有未能盡喻者。著將此通行傳諭知之。蘇昌摺。並交部議奏。○又諭據蘇昌等奏。廣西象州。猺山地方。七月初旬。連日大雨。山水驟發。大樟等村莊廬舍。間有被淹。撫臣馮銓。已前往查勘撫綏。並稱所傷田禾無幾。勘不成災。毋庸再予賑卹等語。今歲粵西早稻豐收。晚禾亦俱長發。象州一隅被水。雖據該督撫查明。所傷田禾無幾。實不成災。但倉猝被水之後。小民口食。未免拮据。除已照例撫綏外。如有貧乏。不能自存之戶。仍著查明。加恩賑卹。務俾得所。並將本年應徵糧賦。酌量情形。分別緩徵。副朕軫念邊氓至意。該部遵諭速行。○諭軍機大臣等。新柱等奏。稱承辦葉爾羌鼓鑄錢文之同知圖桑阿。千總戴鵬等。自乾隆二十五年設立錢局以來。辦事頗屬勤慎等語。圖桑阿等。承辦鼓鑄錢文。已閱三載。現屆撤回。著加恩交部議叙。○戶部議覆

原任貴州布政使亢保咨稱前准部議署事官不兼本任者全支署任養廉其本任養廉留與署任支食第黔省向例署員兼本任者全支本任半支署任其一半扣作缺曠其不兼本任者半支署任半支本任是以每年缺曠足數試用人員另給一半養廉及別項腳費工食之用今署員不兼本任者概令全支署任養廉黔省以小署大遞行委署不兼本任者居多似此層層全食截曠無餘給發不足應照舊例支食等語應如所請並行知各直省仍照舊例畫一辦理從之○丁卯諭據容保奏稱江寧漢軍官兵內有領催一名生員二名兵二十四名皆係承襲勲舊佐領世管佐領世職有分之人可否將伊等送回京城該旗之處等語著傳諭容保令其詢問所有伊等佐領世職如有嫡派應襲之人情願仍回原旗即送京帶領引見酌量賞給差使行走如不過承襲有分而不能襲及無力遷

徙眷口情願為民者准其改入民籍容保查詢明確後分別咨行各該旗入於出旗冊內辦理○又諭據福德奏稱明年撤回恰克圖貿易之人請將彼處閒房令喀爾喀兵丁居住並密諭與俄羅斯之布里雅特奈瑪爾烏梁海人等令其招徠特古斯懇至依琿地方閒房由烏里雅蘇台運米一萬石前往存貯等語俄羅斯生性卑鄙兼懷譎詐撤回貿易令喀爾喀兵丁居住福德所辦尚屬留心但今年既已令伯德爾格回子前往莫若俟其貿易完畢回去之後將彼處留看房屋商民盡行撤回派喀爾喀兵丁四五百名酌令居住如此辦理之後奈瑪爾烏梁海如有前來歸附者收納亦無不可今且不必示意於眾再依琿地方既有現成閒房將米運往收貯頗為近便且貿易一開之後賣給商民亦屬便益著交成衮扎布福德等於烏里雅蘇台現有米內用現成牛駝運往一二萬石伊等

辦理此事。往返札商。務須不動聲色。亦不必
匆遽趕辦。○又諭曰。開泰既係宗室。竟敢私
往漢侍衛之家。同入酒肆。與人鬪毆。甚屬卑
鄙。有玷宗室。著交宗人府監禁。○以兵部右
侍郎蔡長濬。知武舉。左都御史張泰開。為武
會試正考官。左副都御史張映辰。為副考官。

○戊辰

上詣

皇太后行宮問安。○軍機大臣等議覆。定邊左

平奏奉旨

著

副將軍成衮扎布等奏稱。科布多地方。田畝
膏腴。水草豐美。本年所添之喀爾喀等。有不
諳耕種者。悉令綠旗兵指引。是添派蒙古。不
若添派綠旗兵。請再撥善於耕種之綠旗兵
一百名。並選派木匠。石匠。鐵匠數人前來。於
修理農具。及建築城垣倉庫諸務。頗為有益。
再科布多地畝。俱係未經開墾者。內地運來
農具易壞。應籌辦生鐵。交新添匠人等折熟
鑄造農具等語。應如所奏辦理。但此項添派

綠旗兵。若由京撥往。不但煩費。抑且有誤明
年耕期。請由烏里雅蘇台現有綠旗兵二百
內選派一百名前往。頗為近便。餘兵一百名
於看守倉庫差委。稍有不敷。儘可挑用喀爾
喀兵。應交成衮扎布於喀爾喀兵內。挑選誠
實妥當者一百名。抵補綠旗兵之缺。至所用
匠役。即於二百名內。儘數挑選。共湊一百之
數。若仍有不敷。即酌量由烏里雅蘇台現有
匠人內招募撥往。從之。○己巳。諭前因高晉
連次奏報湖水消落情形。未將黃河水勢。及
毛城鋪曾否過水緣由。一併入告。深厯朕念。
甫經降旨詢問。今據該督奏稱。毛城鋪因秋
汎水漲。過水九寸。至一尺三寸不等。下注洪
溝。以達灘河。日內已漸消落等語。灘河為毛
城鋪下游。雖據稱儘堪容納。在今年長水無
多。灘河自不致旁溢。而毛城鋪滾壩。亦自可
計日斷流。但灘河已久未疏濬。亦應乘此豫
為籌畫。侍郎裘曰修。昨曾奏。俟查辦直隸河

平奏奉旨

著

渠事竣請假回籍著於歸途之便即會同高晉託庸前往該處相度情形如有應行經畫之處即行奏明辦理○又諭曰通政使志信以陝西緩決絞犯任子玉因宋國選圖姦伊母憤毆致死情屬可憫與九卿等兩議請改入可矜區別減等發落殊屬非是此案任子玉之叔任全欠有宋國選布賬宋國選酒後扣門任全慮其索欠不納旋復潛開莊門喚伊堂兄任策勸解維時任子玉現在炕烤火

實錄卷六九五

天

宋國選進屋後即欲起意圖姦亦豈有當伊子在前面逞強暴之理況正值爭扭而任全即喚衆回家肆行攢毆在場皆任姓之人其所稱解鈕裂衣各情節亦未可盡信安知非任子玉等同謀毆斃後託之宋國選圖姦徐氏以為脫罪之地從前刑部以讞案不甚明晰曾經駁詰假使究有謀殺確情尚應以情實問擬今九卿以原案有拒姦情詞擬入緩決已屬平允而志信不明事理嘵嘵爭執意

欲改為可矜殊失審情定讞之道志信著傳旨申飭任子玉仍依前議監候緩決○又諭曰達色之父生辰鹽商王得宜父子俱往餽祝一事今據舒赫德查究屬實奏請行文詢問令其咨覆達色身為鹽政乃聽商人至私家稱祝即難辭咎不必行文詢問著將達色解任交與舒赫德查訊其巡視長蘆鹽政事務著高誠去加恩賞給員外郎銜

實錄卷六九五

天

大清高宗法天隆運至誠先覺體元立極敷文奮武孝慈神聖純皇帝實錄卷之六百九十四

大清高宗法天隆運至誠先覺體元立極敷文
奮武孝慈神聖純皇帝實錄卷之六百九十五

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭軍機處管理

吏部總纂院事務正黃旗滿洲都統世襲副都統軍功加七級隨帶加一級尋常加二級軍功紀錄一次是履歷

總纂官經筵講官太子太傅文華殿大學士文淵閣領侍衛內大臣稽察欽奉 上諭軍機處管理刑部戶部三庫事務

世襲副都統軍功加十九級隨帶加二級又加二級是董誥內大臣戶部尚書錄星滿洲都統軍功紀錄五次

尋常紀錄十四次是德瑛經筵講官太子少保內務府紀錄六次是曹振鏞等奉

敕修

乾隆二十八年。癸未九月。庚午。遣官祭

歷代帝王廟。○遣官祭

都城隍之神。○

上奉

皇太后自避暑山莊迴鑾。○詣

皇太后行宮問安。○軍機大臣等議准寧夏將

軍達色等奏稱寧夏兵丁因西路出師著有

勞績者八十四名奉旨由另記檔案作為另

戶嗣後陞轉挑選及婚喪恩賞均請照八旗

之例一體辦理從之。○是日駐蹕喀喇河屯

行宮。○辛未。兵部以武會試中額請得旨這考

試漢軍取中二名直隸取中十名陝西取中六

名廣東取中四名河南取中三名山東取中

五名江南取中三名山西取中四名湖北取

中二名湖南取中一名四川取中一名廣西

取中一名福建取中二名浙江取中二名江

西取中二名雲南取中一名貴州取中一名

○前署廣東巡撫明山疏報乾隆二十七年

分潮州肇慶廉州三府屬墾復額內遷移稅

十四頃四十三畝有奇廣州潮州肇慶三府

屬墾額外水田稅五十一頃五十三畝有奇

廣州府屬墾額外沙坦稅五十一頃九十七

畝有奇惠來新會恩平墾熟稅一頃六十八

畝有奇香山新寧清遠潮陽惠來普寧高要

墾熟稅二十二頃一十三畝有奇。○是日駐

蹕常山峪行宮。○壬申。

上御行殿勾到秋審官犯及服制並雲南貴州

四川情實罪犯停決官犯二人服制斬犯十

七人。貴州新犯八人。餘七十一人。予勾。○是日。駐蹕兩間房行宮。○癸酉。

上詣

皇太后行宮問安。○吏部議准原任甘肅布政使吳紹詩奏稱。臨洮道管理通省驛傳事務。請改為甘肅驛傳道。兼巡蘭州府字樣。洮岷道。管轄鞏昌府。暨直隸秦。階。二州。請改為分巡鞏秦階道字樣。鑄給關防。從之。○又議覆。河南布政使佛德奏稱。直省將軍。督撫。提。鎮。

等官。均有頒發坐名勅各一道。司道。副。叅。均有頒發傳勅各一道。請換寫。賞定清字官銜。頒發等語。查坐傳各勅。俱係清漢兼書。司道。副。叅等官傳勅。閱年久遠。皆係從前清字官銜。今新政清字。理應更換。其將軍。督撫。提。鎮。坐名勅書。皆於補授後。隨時移送內閣。撰給。內有未經書寫新政清字官銜。自應一律換給。仍通行各省將軍。督撫。提。鎮。報部移閣。撰給。其原勅。繳銷。從之。○是日。駐蹕要亭行宮。

○甲戌。

上御行殿。勾到福建。廣東。廣西。情實罪犯。傳決。福建新犯一人。廣東新犯二人。絞犯二人。餘九十八人。予勾。○諭朕昨加恩。將阿思哈補放廣東巡撫。阿思哈於廣東事件。未曾諳練。明山深悉彼處事體。計阿思哈由伊犁至西安時。明山亦必到任。著傳諭明山。將廣東情形。與一切應辦事宜。詳告阿思哈。並諭阿思哈知之。○諭軍機大臣等。今歲直屬間有蝗。

蝻生發。隨經撲捕淨盡。但飛蝗停落處。其種未免遺留。現在石槽附近一帶。因天氣尚暖。即有萌生之處。此時禾稼久登。霜降已屆。固無能為累。其別處。倘有伏而不發者。與其剗挖於春融。何似豫為翻耩。使一經風雪。不藉自除之為愈乎。著傳諭該督方觀承。凡今年曾有蝗蝻地方。實力飭屬速行督辦。其葦地遺孽。可以乘冬燒燎之處。並遵前降諭。肯悉心設法除治。毋致因循。稍貽農田之害。○是

日。駐蹕密雲縣行宮。○乙亥。諭曰。舍圖肯。倭陞額。永寧等。陳奏事件。止繕漢摺。舍圖肯等。俱係滿洲。一切陳奏事件。繕寫清字。方屬合宜。如所奏之事太繁。清字不能盡意。必須漢字者。亦應兼繕清文。豈可止繕漢字耶。舍圖肯等。竟染漢人習氣。有失滿洲舊風。著飭行。○是日。駐蹕南石槽行宮。○丙子。

上迴鑾奉

皇太后居暢春園。問

皇太后安。○辛酉。明園。○丁丑。

上詣暢春園。問

皇太后安。○諭曰。莊親王。現在患病調理。其所管事務。自應派人署理。宗人府事務。著誠親王署理。左翼宗學。查奏近派宗室命名指婚。奏派穿孝事務。著和親王署理。六阿哥。從前曾學算法。且現在移住外府。著派六阿哥。與秦慧田。管理算學事務。中正殿事務。著色布騰巴勒珠爾署理。武英殿事務。著福隆安署

理。經咒館事務。著扎拉豐阿署理。四譯館事務。著永貴。五吉署理。內務府當舖。及滋生銀兩事務。著英廉署理。寶諦寺事務。著四格署理。僧錄司事務。著舒赫德署理。解馬花馬箭事務。著倭赫署理。莊親王不必解任。遇有應商酌事件。仍與王商酌辦理。○又諭。據海明等奏。員外郎夔舒到阿克蘇。五年以來。凡承辦事件。俱能盡心妥協辦理。並無過犯。與從前阿桂所奏。照苗疆等處。調補官員。即行陞

用之例相符。著照所請。俟夔舒到京後。該部帶領引見。○又諭曰。鄂寧著施恩署理。正紅旗漢軍副都統。○戊寅。諭曰。旌額理。現在烏魯木齊辦事。觀保著以吏部侍郎。管理兵部侍郎事務。其吏部侍郎事務。著阿敏爾圖署理。○又諭。昨據桑寨多爾濟等奏稱。從前俄羅斯賊匪竄入。將喀爾喀裘達囉拉噶駐卡官兵。戕害刦擄。旋又持械進索倫游牧。在塔爾巴哈台地方偷竊。而俄羅斯反飾詞抵賴。

等語。朕以此等事。該邊境大臣。何以並未具奏。其曾否報部之處。令其查明具奏。今據國多歡奏稱。俄羅斯賊匪布勒綱額之事。前任駐劄呼倫貝爾副都統職銜瑪爾拜。總管巴圖。彼時並未具報將軍衙門。而伊等現俱病故。今據瑚爾起查明。前事尚未完結等語。殊屬不成事體。當時若將此呈報該部。及將軍衙門具奏。相機辦理。行文薩納特衙門。一切均可早結。而俄羅斯亦不至藉端抵賴。乃伊

等並不具奏。又不呈報將軍。專擅辦理。甚屬非是。理應查明治罪。但念年分已久。原辦之瑪爾拜等。俱已病故。著免其深究。並著傳諭國多歡。嗣後俄羅斯人等。再有此等事。應奏者。即行具奏。應隨時辦結者。即按其情形。辦理具奏。其應行報部者。即行呈報存案。仍曉諭邊境副都統官員等。如遇此等事。必須呈報將軍裁奪。不得仍前肆意專擅。○吏部議奏。戶部侍郎安泰奏稱。商人呂秉承領工部

照票砍伐木植一案。其承辦之工部堂司各員。交臣部查議一摺。得旨。吏部察議商人圍地伐木案內。畫行疎忽之原任工部侍郎張廷璩。德齡。均應於補官日。罰俸三個月。內閣亦即照議票簽入本。此皆拘牽故套。不知揆度事理之甚者。張廷璩。德齡。早以年耄退休。家居日久。試問伊等再出補官。當在何時。其為膠柱刻舟。非尋常墨守成例可比。況二人原任內。並有紀錄數次。即予按數抵銷。有何不可。乃部臣漫無區分。閣臣亦不檢點。設謂自來沿用故套如此。則依樣葫蘆。不過一胥鈔之吏。為之有餘。又安用此尚書侍郎。及大學士等為耶。此本若非經朕指出。則照簽批發。見者必將謂按例日行奏牘。朕竟全未寓目矣。又同日。閱刑部秋鞫本。將朝鮮罪犯。合入河南招冊。參錯不倫。其意必以此案原屬河南司專派承辦。是以一併彙入。不復計其於觀覽有礙。此亦拘牽過甚之一端。已令該

部另冊進呈。嗣後遇有此種案件。不得仍前混列。其張廷瑑。德齡。罰俸之處。即將紀錄抵銷。餘依議。並將此通諭各該衙門知之。○戶部議准。漕運總督楊錫紱奏稱。查定例各衛所有豫食殷丁之條。第今昔情形不同。現在各省衛幫。殷富者子孫長運。無需食換。其貧乏之幫。又無從有數十名殷富間丁。可以與選。且豫行注冊之下。或一二年後。轉為貧乏。仍不便據冊定食。徒令各衛間丁。僕僕點驗。

更恐滋吏胥抑勒稽遲濫報取利等弊。應請停止。臨期應行食換。慎選領運。從之。○已卯。

上詣暢春園。問

皇太后安。○詣

大高殿。

壽皇殿。行禮。○還宮。○諭曰。託庸奉江浙等四省。現議貢監收捐穀石。運補京通倉貯。請將安省常平穀一百六十餘萬石。先行碾米。分附糧艘帶運一摺。雖其酌劑積儲。頗見勇往。

然朕熟籌此事。於倉庾民食。實在有無裨益情形。即九卿覆准侍郎英廉條奏本案。并可無庸亟事舉行也。陳編所載餘三餘一之文。因為足食本計。第在當時。原屬地廣人稀。又列國各守其封域。持籌者可以隨宜措置耳。以今幅隕之廣。生齒之繁。歲即屢豐。而三農生穀。祇有此數。採購於官庾。捐輸於紳士。條款雖殊。其為地方所產則一。與其輾轉挹注。名異實同。又何如即以此留之民間。俾糴糴

倍為饒給乎。朕御極以來。曾議直省倉貯。寬裕買補。旋聞市價增長。即令停罷。蓋以小民未獲將來糴貸之利。而先受目前食貴之艱。譬諸日資四鬴者。先奪其一二。而語之曰。吾將為爾他日待哺計也。彼不生感而生怨矣。此中先後得失。其理較然不與。況朕念切民依。偶值偏災。即截漕動以億萬計。而年來糧艘正供自足。太倉之粟。可餘備二三年而贏。此亦足矣。計臣即總總較量。朕皆不以為然。

國家昇平富庶。內府外府。均為一體。凡官廩兵糈。歲支之數。宜關於供。若以補漕糧而議捐穀。又因議捐穀而先運常平。不獨徒費輸輓之勞。且他省聞風踵事。地方因緣壟斷。必致米價踴騰。閭閻轉滋弊累。即云不動聲色。似此多立規條。轉相仿效。其為聲色。更何待言。揆之經常不易之道。惟為民食留其有餘。國用自無不足。居今承平日久。戶口增而產米祇有此數。倘民間或遇必資通融。協濟之處。亦不過臨時善為補偏救弊耳。無他一勞永逸之計也。至執三十年制國用之說。拘文牽義。更制而事不可行。譬之封建井田諸舊法。又豈可復議於今日哉。所有託庸。碾運常平穀石之奏。不必行。其江浙四省貢監收捐本色之例。並著停止。將此通諭中外知之。

命賞給原任布政使亢保道員職銜。前往哈密辦事。更換三寶回京。○庚辰。

上御乾清門聽政。○辛巳。

孝慈高皇后忌辰。遣官祭

福陵。○河南巡撫葉存仁奏。河南滿營官署兵房。坍塌四百五間。請借餘息銀修理。分季扣還。得旨允行。○予大學士梁詩正。吏部尚書陳宏謀。各官房一所。○是日起。

上以孟冬享

太廟。齋戒三日。○壬午。諭。前御史戈濤奏。請刑部司員。分別題缺。選缺一摺。經吏部議覆。准行。第該部為直省刑名總匯。讞牘紛繁。動關

民命。辦理必需得人。較各部情形。原有不同。若概令按司分定題選。各缺。則才猷出衆之員。既因適無題缺。不免守株以待。而循分供職者。又或遇缺。僅依資俸遷就題陞。於司分人材。均多隔礙。非所以重刑名而示鼓勵。所有刑部各司員缺。仍照從前所定咨二留一舊例行。如該堂官。有不能虛公甄擇。或致瞻徇愛憎情弊。自難逃朕洞鑒。御史等亦可執其實據。即行叅奏也。○又諭。前宗人府為斐

蘇之子襲職一事。將伊家譜進呈時。朕經降旨。俟回鑾。將伊諸子帶領引見。後再定。今外間傳言。宗人府與斐蘇不合。是以將貝勒降為奉恩將軍等語。此必無之事也。伊諸子尚未引見。何遽有此捏造妄傳。若斐蘇諸子內。果有尚堪造就者。引見時。或封貝勒。貝子。公爵。皆出自朕恩。豈該衙門所能專主者耶。著交宗人府。將斐蘇之子。及襲職有分之人。照例帶領引見。○又諭曰。扎薩克圖汗巴勒達

爾。呈控副都統留保住。迎請哲布尊丹巴呼圖克圖之呼畢勒罕。遂次妄自尊大。欺凌伊等。并向番子需索金兩皮張等項一案。朕令軍機大臣詢問。據留保住稱。並無需索之事。遂次因巴勒達爾肆行滋事。曾經約束等語。詢之隨往章京等。語亦相同。巴勒達爾所控留保住需索金兩皮張。係一面之辭。並無實據。又不值因此提巴勒達爾質問。及究訊章京等。但留保住係特派前往照料之人。巴勒

達爾等即有不曉事體之處。亦祇當開示訓誡。乃謂其汗公及扎薩克等不堪。及伊等請見。復不肯見面。並令衆人下馬。不與巴勒達爾同行。令其與章京等同行。種種倨傲。俱屬不合。且伊等呈遞丹書克。原係喀爾喀之事。與留保住無涉。又何必爭坐次耶。此皆由留保住糊塗所致。至巴勒達爾亦非安分之人。伊等往迎呼圖克圖之呼畢勒罕。自應約束屬人。乃欲取巧。少給番子價銀。勒買羊隻。並

欲在現有禾苗地畝內住宿。亦屬非是。留保住著革去副都統。在理藩院郎中上行走。巴勒達爾亦著嚴行申飭。○軍機大臣等遵旨。將準噶爾家譜進呈。

御製準噶爾全部紀畧文曰。自古無不誌外夷。而實者少。舛者多。非以其方域所限。言語不通耶。得什一於千百。加以魚魯亥豕。其堪信者鮮矣。茲者平定準部。止封達瓦齊子一人。居之京都。且城伊犁。駐將軍鎮守。事耕牧馬。

念彼原一大部落。不可無紀。故就親詢實事。書之。亦以便方畧纂敘也。準噶爾四衛拉特者。綽羅斯部。杜爾伯特部。和碩特部。土爾扈特部。是其輝特一部。本附庸於杜爾伯特。後土爾扈特竄歸俄羅斯。故別輝特為一部。仍稱四衛拉特云。衛拉特。明史稱為瓦剌。其音頗近。史所載脫歡太師。蓋其始祖。元亡。而其疆臣分為三。其渠曰馬哈木者。即脫歡之父也。脫歡者。蒙古準語同為釜。今準人語釜為海蘇。而蒙古語則仍舊。蓋準人自避其祖諱。此亦一證也。自脫歡逮孛汗。其世次不可考。孛汗背正妻。與他婦野合而生子。曰烏林台巴。粗太師。其母棄之澤中。孛汗收養之。遂統部落。又十一世。而傳至賽音諾顏哈喇忽剌。是為策妄阿拉布坦之曾祖。子曰巴圖魯渾台吉。有子十二人。五曰僧格。策妄之父。六曰噶爾丹博碩克圖。其餘無事。無足稱。長曰策臣。次曰巴圖魯。策臣與巴圖魯殺其弟僧格。

噶爾丹博碩克圖始自藏中回舊部。反俗為汗。於康熙年間犯塞。戰敗走死。先是噶爾丹博碩克圖既殺兄僧格之次子索諾木阿拉布坦。僧格舊臣七人與策妄阿拉布坦同遠逃。準語所謂多倫努庫爾者是。多倫者。漢語為七。努庫爾者。漢語為友。蓋其患難相共。所謂世臣。並赦其子孫七死云。及噶爾丹為我兵敗。策妄始還和博克薩哩。收其父舊屬。及噶爾丹餘衆。復成部落。并縛噶爾丹子。獻闕下。遂自據汗位。子噶爾丹策零。噶爾丹策零子策妄多爾濟那木扎勒。其庶兄喇嘛達爾扎。執而篡之。達瓦齊復因阿睦爾撒納之計。篡奪其位。達瓦齊者。巴圖魯渾台吉之第七子。布木之子。大策零敦多布之孫。於策妄為再從姪孫。其小策零敦多布。則策妄之祖。巴圖魯渾台吉之弟。熙爾根代青之曾孫。其去策妄世派蓋已遠矣。先是康熙年間。噶爾丹博碩克圖拘繫和碩特車臣汗。收所屬人衆。

併入準噶爾鄂拓克。其時有和碩特之拉藏汗者。居唐古忒地。即顧實汗之裔也。子二人。一名丹衷。一名索爾扎。丹衷由唐古忒仍回至厄魯特。娶策妄阿拉布坦之女。博托洛克為妻。後策妄阿拉布坦知其學習哈拉爾查達術。以兩盆夾丹衷身烙死。遂令大策零敦多布領兵六千。襲西藏。擒殺拉藏。并擄伊子索爾扎我。

聖祖仁皇帝

勅諭策妄阿拉布坦。不得繹騷唐古忒地。並發大兵進剿。於是大策零敦多布。携索爾扎。逃回厄魯特。藏地復平。迨雍正年間。策妄阿拉布坦死。子噶爾丹策零。欲與唐古忒和好。給索爾扎戶十資養。並以博托洛克與韋徵和碩齊為妻。其在丹衷處所生子班珠爾。給戶五資養。彼時博托洛克。後有孕未產。適韋徵和碩齊後。乃生一子。是曰阿睦爾撒納。故阿睦爾撒納。雖為輝特台吉。實與班珠爾。皆丹

衷之子。噶爾丹策零死。策妄多爾濟那木扎勒。恐索爾扎之子納哈查。逃往唐古忒。將伊禁錮。至達瓦齊墓立。始將納哈查釋放。又和碩特羅布藏車凌者。娶策妄阿拉布坦之女達什色布騰為妻。噶爾丹策零時。因羅布藏車凌率領伊屬萬戶。欲往土爾扈特。遂遣兵擒獲羅布藏車凌囚之。以其妻給韋徵和碩齊。二子交烏魯特鄂拓克宰桑烏巴什安置。至青海居住之羅布藏丹津。於策妄阿拉布

坦時。逃至準噶爾。策妄阿拉布坦死後。羅布藏車凌。羅布藏丹津。二人謀殺噶爾丹策零。嗣因羅布藏丹津被拘。羅布藏車凌恐亦被囚。遂欲逃往土爾扈特。故雍正年間。我世宗憲皇帝索羅布藏丹津。噶爾丹策零稱已縛送。至中途。聞進兵而止者。非詐也。蓋彼業經拘繫之囚。故不靳固。而且欲以為奇貨也。噶爾丹策零於丑年死。策妄多爾濟那木扎勒年幼。其姊鄂蘭巴雅爾。同母出也。每以善

言相勸。禁其淫亂。策妄多爾濟那木扎勒年既長。遂不受其禁制。並聽讒言。謂其姊欲效俄羅斯。自立為扣肯汗。遂將鄂蘭巴雅爾拘繫。並殺戮多宰桑。其後屠狗盜妻之事。無所不為。益無忌憚。鄂蘭巴雅爾之夫薩音伯勒克。遂同噶爾丹策零庶子喇嘛達爾扎。攻執策妄多爾濟那木扎勒。喇嘛達爾扎。遂篡汗位。有噶爾丹策零幼子策旺達什者。阿睦爾撒納。班珠爾。欲誘出策旺達什立為汗。後被喇嘛達爾扎知覺。遂殺策旺達什。阿睦爾撒納。班珠爾。二人。慙。慙。達瓦齊云。喇嘛達爾扎既將與爾同讐之達什達瓦殺戮。恐禍將及爾。於是達瓦齊。阿睦爾撒納。班珠爾。三人。同逃哈薩克。至申年。達瓦齊。阿睦爾撒納。班珠爾。復回舊游牧處。阿睦爾撒納。遂殺其兄沙克都爾。據其衆。復與伊犁喇嘛等合謀。殺害喇嘛達爾扎。立達瓦齊為汗。其次即阿睦爾撒納用事。二人仍屬親厚。有達什達瓦姪訥

默庫濟爾噶勒者。欲與達瓦齊分領準噶爾。猝率兵一萬至伊犁。與達瓦齊戰。達瓦齊敗。至舊游牧額密勒處。與阿睦爾撒納會。因阿睦爾撒納計。誘執訥默庫濟爾噶勒。誅之。準噶爾衆。仍立達瓦齊為汗。達瓦齊聽伊犁衆宰桑言。與阿睦爾撒納生隙。阿睦爾撒納。垂涎汗位。既失望。遂與班珠爾。納哈查及杜爾伯特訥默庫等會同哈薩克。將額密勒一帶住牧者。肆行擄掠。且耕種額爾齊斯。為自固計。達瓦齊。凡三遣兵。勦阿睦爾撒納。皆不克。其後自領兵三萬。至阿睦爾撒納游牧之額爾齊斯。威之。阿睦爾撒納。勢不敵。始投誠來歸。此準噶爾始終構亂所由也。至準噶爾鄂拓克昂吉之名各異者。鄂拓克為其汗之部屬。昂吉為各台吉之戶下。舊鄂拓克。凡十有二。烏魯特。有四宰桑。人五千戶。為一鄂拓克。喀喇沁。有一宰桑。人五千戶。為一鄂拓克。額爾克騰。有一宰桑。人五千戶。為一鄂拓克。

克里野特有二宰桑人六千戶。為一鄂拓克。卓托魯克有一宰桑人三千戶。為一鄂拓克。布庫斯有一宰桑人三千戶。為一鄂拓克。阿巴噶斯哈丹各有一宰桑。共人四千戶。為一鄂拓克。鄂畢特有一宰桑人三千戶。為一鄂拓克。鄂羅岱有二宰桑人三千戶。為一鄂拓克。多果魯特有一宰桑人四千戶。為一鄂拓克。霍勒博斯有一宰桑人三千戶。為一鄂拓克。綽和爾有一宰桑人三千戶。為一鄂拓克。其後復立鄂拓克十有二巴爾達穆特。有三宰桑人四千戶。為一鄂拓克。庫圖齊訥爾有五宰桑人四千戶。為一鄂拓克。噶勒雜特有三宰桑人四千戶。為一鄂拓克。沙喇斯有二宰桑人三千戶。為一鄂拓克。瑪呼斯有一宰桑人五千戶。為一鄂拓克。布庫努特有一宰桑人二千戶。圖古特有一宰桑人五百戶。為一鄂拓克。烏喇特有一宰桑人三千戶。為一鄂拓克。阿勒闊沁有一宰桑人五百戶。為一

鄂拓克。扎哈沁有三宰桑人二千戶。包沁有三宰桑人一千戶。為一鄂拓克。奇爾吉斯有四宰桑人四千戶。為一鄂拓克。特楞古特有四宰桑人四千戶。鄂爾楚克有一宰桑人五百戶。烏爾罕濟蘭有一宰桑人八百戶。為一鄂拓克。明噶特有二宰桑人三千戶。為一鄂拓克。鄂拓克之外復有五集賽。阿克巴集賽有二宰桑人四千戶。賽瑪里木集賽杜勒巴集賽。推素隆集賽。伊克胡拉爾集賽。各有一宰桑人各一千戶。其後復立集賽四。溫都遜集賽。善披領集賽。各有一宰桑人各一千戶。桑堆集賽。品陳集賽。各有一宰桑人各三百戶。此九集賽。辦理喇嘛一切事務。喇嘛有六千餘。準噶爾共六十二宰桑。二十四鄂拓克。一切供賦。俱其汗公物。其外復取烏梁海及葉爾羌喀什噶爾。阿克蘇。和闐。四城。回人租其二十一昂吉。為各台吉所有。而統屬於準噶爾之汗。昂吉者。準語分支之謂也。綽囉斯

部之達瓦齊。昂吉。達什達瓦。昂吉。多爾濟丹巴。昂吉。噶勒藏多爾濟。昂吉。訥默庫濟爾噶勒。昂吉。鄂齊爾烏巴什。昂吉。杜爾伯特之車凌。昂吉。達什。昂吉。伯什阿噶什。昂吉。和碩特之沙克都爾曼濟。昂吉。輝特之塔爾巴哈沁薩音伯勒克。昂吉。和通額默根。昂吉。多羅特舍楞。昂吉。敦多克。昂吉。業克明安巴雅爾。昂吉。車凌班珠爾。昂吉。巴圖爾額默根。昂吉。察罕圖克阿睦爾撒納。昂吉。博洛果特台吉諾海奇齊克。昂吉。土爾扈特台吉巴圖爾烏巴什。昂吉。吞圖布。昂吉。共二十一。向於西師詩。稱二十一昂吉。為其汗公屬者。蓋考之而未詳。茲始詳詢。縷細如右。然各台吉雖分領其昂吉。凡出師執役。無不聽其汗之令。則初所譯者。亦未為大差也。統計其汗之二十四鄂拓克。九集賽。及各台吉之二十一昂吉。得二十餘萬戶。六十餘萬口。成一部落。

者百十餘年。語云十人成之而不足一人敗之而有餘。吾於紀準噶爾之事。益見其不與賈生所謂仁義不施而攻守之勢異。雖夷狄之有君。豈能外是道哉。○癸未。

孝敬憲皇后忌辰遣官祭

泰陵。○烏魯木齊辦事副都統侍郎旌額理等

奏。臣於上年十月。奏派兵二百名。在特訥格

爾伐木。備造房屋一千二百間。本年七月告

竣。合計六堡所造兵房四千八百間。僅敷兵

二千四百餘名居住。其陸續挈眷兵約六百

名。仍需造房一千二百間。查羅克倫以西。地

名呼圖畢。田畝廣濶。河水充裕。木植亦多。約

可駐兵二千名。相其形勢。東至寧邊城七十

一里。西至瑪納斯一百三十五里。為喀薩克

往來要路。臣等酌於本年冬季。砍伐木植。計

足工料。運至造房處所。將羅克倫換班兵六

百名。移於呼圖畢屯田。所需農具籽種口糧

亦請於冬間運往。俟房屋工成。即趨築城垣。

庶屯田兵三千名聲勢聯絡且多留地畝備給召募民人不致兵民叅雜似屬有益得旨如所請行○是月直隸按察使裴宗錫奏熱河三廳各山場徧長紅葉係菠蘿樹土人祇砍伐作薪不諳養蠶殊為可惜又八溝廳屬之難兒河與塔子溝屬之三座塔木城等處亦多長此樹應請令熱河三廳與八溝二廳地方凡有曠閒山場俱勸諭百姓廣為栽種養蠶官給印票填明花戶姓名及頃畝數目

奏奉 聖旨

著

三年後果有成效酌定租息給還地主若係官地照例升科於地利民生不無裨益得旨交方觀承實力妥辦○兩江總督尹繼善奏裁汰京口漢軍兵分別出旗為民改補綠營充伍一案經軍機大臣覆准驍騎校等以綠營千總補用筆帖式情愿改武者以千總補用候補筆帖式及記名領催皆以外委補用等因查驍騎校應改補者三十四員筆帖式改武應補千把者一員江南通省各標營共

計陸路內河千總一百十餘員每年出缺無多尚有綠營應行考拔者此項驍騎校若專補千總難以得缺臣再三斟酌江省陸路內河把總共二百三十餘員每年出缺較多似應於千把兩項內酌量借補方不致日久守候應請於通省各標營陸路內河千把所出缺內以一缺補用驍騎校仍俟有千總缺出與綠營應考拔人員輪流間補如此通融辦理約計年餘驍騎校可以補完仍於綠營拔補之途無礙至裁汰候補筆帖式三員領催一名須缺無多即於京口江寧兩標營就近補用外委千把得旨好○浙江巡撫熊學鵬奏查南岸各工現俱平穩欲防來年春伏二汛有堆積土牛一法現飭及時挑成又浙省草薪中有乾柯一種最易延蔓并令督率民夫於沿塘內外廣為栽植一交春夏即可生發根底聯結塘工既資堅固來冬民人更可採薪獲利得旨諸凡留心○山東河道總督

奏奉 聖旨

著

張師戴巡撫崔應階奏。接准工部尚書阿桂。吏部侍郎裘曰修。咨開東省四女寺減河形勢。最為得地。而下游老黃河寬暢。足資容納。若將四女寺壩口大展。則東省多減一分。直省便少受一分。現已奏明。須將口門加寬二十丈。或十五丈以外。口門以下。亦須一律展寬。接老黃河為度等因。臣等親往會勘。緣衛河發源於河南蘇門山。會合大丹。小丹。淇。湯。洹等水。至東省之南館陶。復有豫省清濁二漳。全流注入東北。達於臨清。九百四十里。沿途並無支河旁洩。至臨清板閘。又與汶水會。北流二百四十里。至恩縣之四女寺。始有此減水壩分洩。由支河入老黃河歸海。查昔年清濁二漳。在直隸境內。原有支河分洩。由威縣。達天津入海。近因直隸沙莊築土壩。截漳水分流之路。是以全漳歸衛。衛河以二十餘丈之河身。受直豫東三省之水流。復紆曲。易漲難消。遇伏秋雨大。常至陡長丈餘。東省固虞

衝溢。直屬更患淹漫。臣等詳加斟酌。衛河正面。寬二十六丈。四女寺壩門。及支河。現寬十二丈。擬再展寬十二丈。共二十四丈。較舊時加倍。足資分洩。所挑土。即於兩岸築成隄埝。遇盛漲時。先由此處掣消。則德州景州以北。水既少而勢亦平。洵於直東。均有裨益。至老黃河雖寬。但底平。水難暢流。是以節年於河心挑子河一道。現寬四五丈不等。今支河既已展寬。則子河亦應一律加寬。方足暢其入海之路。並咨直隸督臣。轉飭辦理。得旨允行。○四川總督阿爾泰。提督岳鍾璜奏。臣阿爾泰到任後。與臣岳鍾璜。詳查西南兩路。惟金川居各土司之中。地勢險峻。該土司郎卡。貪頑成性。狡黠異常。向來逞強。滋擾隣境。如綽斯甲布。革布什咱。巴旺。小金川。黨壩五土司。與金川連界。夙被欺凌。結怨已久。又有沃日。松岡。梭磨。卓克基。四土司。距金川稍遠。與綽斯甲布等五土司接壤。非親即族。唇齒相依。

九土司中。綽斯甲布勢力稍強。可與金川相敵其餘。或兵力微弱。或土司庸愚。分處各巢。只可勉力防守。聯為一氣。則可併力攻擊。此九土司共為合從之計。以遏郎卡窺伺之機也。上年九月。因郎卡侵占黨壩地方。綽斯甲布發兵相助。並約會各土司稟懇。准其攻打。以圖報復。本年五月二十九日。九土司會攻金川。分路前進。三月以來。節據兩路委員稟報。各土司或連得勝仗。或互相殺傷。數計殺擄數目。及焚燬奪卡。搶獲馬匹器械。郎卡甚為受創。臣等已飭委員。諭各土司。爾等會攻金川。乃白圖報仇洩憤。以除後患。各宜努力進攻。並飭委員。如郎卡遣人投稟求救。款關請見等事。務嚴為拒絕。並諭以郎卡滋擾隣境。致各土司公憤會擊。伊孽由自作。我等斷不肯曲為護庇。如此駕馭各土司。合力進攻。固可長除後患。即一時不克。郎卡亦必畏懼自守。不致滋擾隣近土司。報聞。

實錄卷之五

七

大清高宗法天隆運至誠先覺體元立極敷文奮武孝慈神聖純皇帝實錄卷之六百九十五

實錄卷之五

七

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十六

乾隆二十八年癸未冬十月甲申朔享

太廟

上親詣行禮 遣官祭

永陵

福陵

昭陵

昭西陵

孝陵

孝東陵

景陵

泰陵 遣官祭

孝賢皇后陵

端慧皇太子園寢 頒乾隆二十九年時憲書 諭自來

內外大臣中有奉職克勤敬歷資深者皆晉秩宮銜以示

優眷大學士梁詩正著晉加太子太傅協辦大學士尚書

公兆惠協辦大學士尚書劉綸兵部尚書公阿里衮刑

部尚書舒赫德秦惠田工部尚書阿桂俱加太子太保

吏部尚書陳宏謀晉加太子太保河道總督高晉晉加

實錄卷六百九十六

實錄卷六百九十六

二

太子太傅漕運總督楊錫綬晉加太子太保浙閩總督楊廷璋湖廣總督李侍堯兩廣總督蘇昌四川總督阿爾泰俱加太子太保江蘇巡撫莊有恭雲南巡撫劉藻俱加太子少保諭軍機大臣等前因李侍堯奏湖廣鹽價驟增一事當經傳諭高恒奏覆以楚省行鹽一切並由漢口商人經理是其增價情由當與淮商無涉今閱李侍堯摺內稱漢口賣商繳出淮商公札有囑令不可賤價輕售之語則不得專委其過於楚商矣但所奏春間每包價銀二錢一二分即謂淮商札致而然若衛鳳翥等竟行賣至二錢七八分之多又豈盡淮商教之耶看來鹽價之長落視成本之多寡物情雖本難齊而豫定價值自為節制商人之常法此則李侍堯之說終屬優於高恒也總之高恒在淮言淮其意以卹商為重而李侍堯在楚言楚亦未免以莅任伊始汲汲欲為地方以平價便民使二人易地而處亦必更無異說然此究係意見所為非虛公無我之本心也著傳諭李侍堯等辦理地方公事惟在平心靜氣和衷商榷酌中妥辦在漢口不得定價太苛致商人深苦餘息之愠在兩淮亦不得藉詞定價無餘勒捐不往運售致閭閻重貽淡食之患斯商民交便而體制尤為協宜將此詳諭知之 乙酉軍機大臣等議覆兵部奏稱發遣病故德敏係福州駐防旗人應歸駐防理葬妻子仍歸駐防該

黑龍江將軍不將該犯遺骸及妻劉氏解送福州據劉氏呈請攜骸歸旗移咨刑部刑部准其回旗正藍旗都統將不應回旗人混收俱應交部察議劉氏應交旗送福州依次子養贍德敏遺骸已葬免其遷往嗣後遇此等事即由遣所移解駐防其例得回旗該犯妻子願攜骸歸駐防者亦由遣所移解駐防埋塋從之 伊犁辦事副都統伊勒圖奏臣往特穆爾圖諾爾等處巡查哈薩克游牧并查詢楚穆訥爾地名在何境詢之前在特穆爾圖諾爾等處游牧之厄魯特據稱哈薩克游牧之前地名西喇烏蘇哈薩克呼為西喇蘇其楚穆訥爾係一泉名源在吹之左近索和羅克哈喇巴勒塔地方又聞此處常有哈薩克乘間游牧來去無定頃明瑞等業已遵旨往查嗣後應出其不意兩路前往巡查南路自特穆爾圖諾爾之南由巴勒琿嶺至塔拉斯吹地方北路沿伊犁河由古爾班阿里瑪圖至沙喇伯勒地方方能周徧再哈薩克烏默爾之弟爪特色楞伯特二人去歲入覲蒙賞五品頂翎并准移駐伊犁現在攜眷來卡應遵照所指之處居住乃妄稱與厄魯特同居不便欲於卡外和爾郭斯庫隴葵等處居住又稱無糧難度懇求給與種種虛詞惟圖僥倖臣等詳細晚諭令於章什左近居住爪特等又云去歲將軍成衮扎布曾傳諭吉烏默爾移駐伊犁後令於八月十五日至圍場朝

實錄卷六

三

見等語詳閱成衮扎布移文並未提及其妄可知臣等留心察看俟烏默爾到時再與明瑞等定議如何給與游牧辦理具奏報聞 以故多羅貝勒斐蘇子明韶照例襲爵 丙戌

上諭

雍和宮行禮 臨奠履親王允禔 諭曰御史葉啟豐以尹繼善等籌葺江省城工聽收捐輸一事具摺請杜大臣言利之漸所言非不持正可聽但其意特緣朕近日諭止蘇昌請解粵東開款銀兩而發朕不過隨事訓飭百工本無好名之心似此掀拾浮詞則不免因事揣摩摩踵事效尤於實政究何益乎且尹繼善等所請原經部覆將監當出賃情弊議駁於該御史未奏之先具奏准行設使朕欲博虛名將該御史曲加獎借將令言官視虛言為捷徑朕必不為若僅發還原摺而不為明白宣示無知者或致謬相推許竟疑為疏入不省又豈朕實心實政虛公採納之本懷乎葉啟豐所奏無庸置議 丁亥

實錄卷六

四

上諭暢春園問

皇太后安 幸圓明園 諭曰豐訥亨前在軍營甚屬奮勉材質尚可造就著加恩承襲簡親王爵補授鑲黃旗領侍衛內大臣豐訥亨所遺鑲藍旗護軍統領員缺著定桂補授仍署理鑲白旗蒙古副都統事務四達著補授鑲白旗滿洲副都

統留保住所遺正黃旗漢軍副都統員缺著黃承恩補授
戊子

上幸靜宜園駐蹕翼日如之 諭軍機大臣等成衮扎布奏稱
從哈薩克逃出之厄魯特沙羅布庫瑪木特等酌擬晚諭杜
爾伯特烏梁海等附入安插等語現在伊犁編設厄魯特佐
領著傳諭成衮扎布等即將沙羅布等解送伊犁安插嗣後再
有此等遇解送馬匹牲畜之便一體辦理不必專行送往
又諭據成衮扎布等奏稱哈薩克之俄羅斯等至烏里雅蘇
台聞知不令入覲即欲將所進馬匹帶回因遣侍衛明成等
護送出卡等語俄羅斯前欲入覲原以希圖賞賚不令入覲

實錄卷六九六

五

輒欲將馬匹帶回明係圖利取巧成衮扎布不留伊等馬匹
遣送出卡所辦甚是嗣後若係阿布魯特遣前來請安進馬
者令其來京入覲似此圖利取巧者照此辦理 已丑刑部
議覆兩淮鹽政高恒奏稱嗣後拏獲販私鹽犯承審官務究
出買自何人何地及月日數目並密提窺戶煎鹽火伏薄扇
查審確實將賣鹽民人及窺戶與本犯按律治罪若查審無
隊即屬虛誣加三等治罪承審官不能審出誣扳照不能審
出盜犯誣良例議處又私鹽不過就近收買其積慣窩頓家
必不敢賣與不相識人凡供不知賣主姓名者實係有心開
脫如在三百觔以上不據實供出者將犯於本罪上加一等

若在三三百觔以下或賣自老幼孤獨不能供出姓名仍以本
罪科斷從之 庚寅

上詣暢春園問

皇太后安 迴圓明園 杭州將軍福祿奏杭州漢軍既經裁
汰盛甲器械奏准收貯旗營查旗營原無存貯軍器公所又
滿洲副都統衙署不敷居住請移滿洲副都統居現裁之漢
軍副都統衙署其滿洲副都統衙署正房五間存貯軍器撥
兵看守餘房出租收項為修補房屋費報聞 辛卯諭曰禮
部侍郎五吉現兼署理藩院侍郎事務其所署工部侍郎不
必兼管官保著以刑部侍郎管理工部侍郎事務其刑部侍

實錄卷六九六

六

郎事務著四達署理○又諭曰侍郎裘曰修現在告假迎養
順道命勘濰河著馳驛去 諭軍機大臣等前因勘辦濰河
一事命裘曰修馳驛前往與高晉託庸會同相度籌辦但河
臣職司河道未免意主興挑而撫臣又恐工程過大則支項
浩繁不如暫緩其事此中吟域所謂易地皆然於辦公持
議參差不無隔礙今據裘曰修面奏意在厚蓄清水以刷淤
泥方為挈要因擬令河官將開座酌量隨宜啟閉遇應開黃
壩閘則堵南股河頭應開西流閘則堵北股河頭使清水匯
入濰河力足衝刷不致淤積此說不為無見如前此朕令河
臣開放清口草壩湖水暢流下河即受其益乃其明驗惟有

司見小每以開壩時折時築憚於從事工程何由而集尹繼善久司河務且兩無成見不難悉心虛公商榷以定折衷袁曰修已奏明於本月十一日自京起程著傳諭該督令其酌量表曰修將到即赴該處會同高晉託庸等屏除意見熟計妥籌務於水道民生實有裨益將此詳悉傳諭知之○禮部議准福建學政紀昀陳奏事宜一府學文武生員在百外者請照學政全書由各州縣學教官帶理月課遇舉報優秀本籍教官密行開單移交府學轉申如有失察分別處分一學政全書載增生考列二等補廩原為屢考前列而言若附甫補增增即補廩未免太優請將新增考二等者不准越補

實錄卷五十六

七

一歲科兩考生童例用教官收卷官係本省人難保無串通添改事應將生童試卷令本人自填添註塗改若干字字樣從之○壬辰

上詣暢春園問

皇太后安 還宮○諭軍機大臣等前歲沈德潛來京所進國朝詩選因有不合體制之處當令內廷諸臣裁訂後寄交尹繼善會同沈德潛刊刻成書至今已閱二載未知所刻曾否完竣並舊有板片曾否更改著劉統勳寄信尹繼善莊有恭等令其於奏事之便附摺奏聞尋莊有恭奏沈德潛親齋印就樣書二套並摺交臣代進其錯謬原板業於上年銷燬報

開吏部議准兩淮鹽政高恒等奏稱淮安分司已移駐板浦在海州地方請改稱海州分司換給印信再板浦關前經

奏明委員盤查夾帶私鹽今分司移駐儘可兼辦請停委員又永豐壩壩官向無關防請鑄給淮北永豐壩官關防從之

癸巳諭軍機大臣等現在修輯韻書聞安徽婺源縣有已故生員江永曾著四聲切韻表及音學辨微二書稿本已成未經刊刻著傳諭該撫即飭該縣就其家購覓如因一時鈔錄不及竟將原本隨奏摺之便附封送京以備采擇書竣即行發還 吏部議准湖廣總督李侍堯奏稱各省缺出需人署事該督撫於試用人員及鄰近府州縣佐雜內揀委不得

實錄卷五十六

委相距太遠者署事至緊要缺人地相需仍聽督撫酌辦有擅離職守無故赴省者查參照擅離職役例罰俸久駐省城逗遛不歸者照移駐官員應居城邑不即移駐例革職如督撫司道府不行揭參司道府降一級調用督撫降一級留任從之 甲午

上御懋勤殿勾到奉天陝西湖廣情實罪犯停決奉天斬犯一人陝西斬犯一人湖廣斬犯一人絞犯一人餘一百六人予勾 諭軍機大臣等前經傳諭方觀承於直屬今年曾有蝗蝻停落地方豫為翻構除治現在時入初冬天氣尚暖不知此時曾否尚有陸續萌生之處如果乘此冬暄蠕動出土在

此時既無可蝕齧而霜雪踵至旋即凍斃將來不復遺種可
以淨絕根株於農田豈不甚善至未經生發處所則應早布
揪犁豫杜閭閻之害該督連次奏事並未奏及著再傳諭方
觀承將現在情形及曾否實力辦理之處速即據實奏聞尋
奏九月後並無蝨子萌生惟查有遺孽形迹督率村民翻犁
蝨子透風即敗茲又再飭各屬實力遵行報聞 乙未諭軍
機大臣等陳宏謀請鎖鑰瘋人一摺所奏亦有所見向來此
等瘋人病發原定有嚴加約束之例但行之日久地方官不
能實力奉行以致旋鎖旋釋甚至任其播弄筆墨滋生事端
而匪人中實係喪心病狂者亦轉藉詞瘋病冀為訛法於風
俗人心甚有關係著於各督撫奏事之便將原摺鈔寄閱看
令其即飭所屬遇有此等瘋病之人應豫為嚴行看守防範
毋得稍有弛懈 旌表守正被戕之福建平和縣民賴其老
女賴氏 丙申

實錄卷六九六

九

上御懋勤殿勾到浙江江西安徽江蘇情實罪犯停決江西斬
犯一人安徽絞犯一人江蘇絞犯一人餘七十二人予勾
吏部議准安徽巡撫託庸奏稱懷寧縣三橋鎮桐城縣練潭
鎮俱係驛路差務絡繹離縣較遠應各添設巡檢一員查發
源縣巡檢三員一駐大鋪一駐項卽一駐太白俱非緊要且
大鋪附近設有營員不必復設巡檢請將大鋪巡檢移駐練

潭太白距項卽止四十里應歸併項卽兼辦將太白巡檢移
駐三橋各歸縣轄其俸工役食仍由發邑額項解司給發印
信換銜衙署於城工捐項內動辦從之 封閉四川平武縣
天臺山銅礦從前任總督開泰請也 丁酉
上御乾清門聽政 軍機大臣等議覆福建學政紀昀奏稱坊
本經書尚仍全刻

廟諱

御名本字應倣唐石經宋監本例凡遇

廟諱俱刊去末一筆并加有偏旁字者俱缺一筆又武英殿官
韻及各經書於

實錄卷六九六

十

御名本字尚係全刻及加有偏旁字者俱未缺筆請將本字及
加有偏旁字者並行缺筆載入科場條例如謄書者依不諳
禁例處分武英殿書板校正改刊并行文各省一體遵奉將
坊刻各經籍改刊從之 戶部議准前任四川總督開泰奏
稱擬為縣額鹽井添鑄六十七口南部縣新井二十五眼應
如例權課又擬為縣井資州歲產鹽多應增水引一百四十
三張陸引二千九百三十張均於本年起課從之 戊戌
上御太和殿視朝文武陞轉各官謝恩 諭曰愛必達周琬以
封疆大臣於歸州縱盜寃良重案獲罪論律均無可原朕畏
其成誠端委則愛必達之責尤視周琬為重蓋伊身任總督

當後案發覺時知州秦鏐已詳悉具稟愛必達何難據實檢舉即有處分亦不過革職留任凡為督撫者所常有而前案即可立時剖雪彼沈作朋等復有何伎倆敢於力遂前非乎總由愛必達迴護之見一成不變轉將稟詳斥駁以致湯聘宋邦綏等從而附和迎合勢不可解是釀成欺罔伊安得不為此案罪魁其所以如此迴護者則以前案始陷於不知終難於自檢實因周琬於承辦前案始終不令佛保住往見總督為朋比沈作朋縱盜寬良罔上欺公之禍本而後案則周琬實以離任未與其事然任其乖張之性即令在任其堅執謬迷將不知作何究竟雖然此乃誅心之論彼究未見之施行也朕凡遇臣民等細微功罪尚不肯稍苛濫而況曾經任用之大臣愛必達之罪實為法所不宥但朕念愛必達出身勲舊世家伊兄策楞以軍律已負重譴道死於兵訥親亦先以軍律早正國法今若復將愛必達正法心實為之不忍伊兄弟五人并躋通顯先世當有隱德至其兩兄並取大庆而愛必達亦重罹國憲彼種孽必更自有因此則非朕所知矣特其罪究與軍律稍間是以法外矜宥朕當先謝不能執法之咎今於愛必達既為施恩豈復過責周琬耶愛必達周琬俱著從寬釋放發往伊犁効力贖罪派乾清門行走副都統觀音保即日押令前往並將此通諭中外知之 諭軍機大

實錄卷九十六

十一

實錄卷九十六

十一

民高體榮妻甯氏

臣等刑部奏江蘇省本年秋審人犯經九卿將緩決改入情實者至有七案之多或行兇毆斃尊長或有心毒殺卑幼或惡徒兇橫致死二命或強行姦污淫縱無忌按其情節俱屬法無可貸之人該撫何僅擬以緩決必待廷議改正莊有恭在巡撫中尚屬能辦事之人乃於此等案件竟存姑息以致定擬失當非徒無以懲儆兇頑亦何以協情理之平耶著將此傳諭知之 吏部議准直隸總督方觀承奏稱磁州所屬彭城鎮密戶鱗集多係豫晉民人良莠雜處須設專員稽查請將磁州州判移駐彭城應需衙署動項興建換給磁州彭城鎮分防州判關防從之 旌表守正捐軀之直隸永清縣

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十六

實錄卷之六百九十六

七

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十七

乾隆二十八年癸未十月己亥諭據楊應琚等奏辦理奎素
也務官兵甚屬奮勉請將該屯出力之千總劉如桂等交部
議敘等語著照所請劉如桂田希華馬成宗劉廷桂楊天成
俱著交部議敘所有出力之兵丁賞給一月錢糧在屯之遣
犯著賞給一月口糧至原任佐領栢靈保十總常際春各賞
兵丁錢糧一分以示鼓勵 又諭據楊廷璋奏臺灣鎮總
兵游金輅貪黷不職各款請革職審擬一摺甚屬公正明允
游金輅及都司張廷顯俱著革職其貪黷不職情由並款內
犯証交與該撫一併嚴審定擬具奏 刑部議奏前任四川
總督開泰奏稱遂寧縣民婦閔楊氏因伊姪閔謨行竊屢訓
不悛主使伊胞弟閔訓活埋至死楊氏擬絞監候閔訓凌遲
處死得旨楊氏依擬應絞著監候秋後處決閔訓致死胞兄
原屬法無可貸但究係其伯母楊氏主使擬以凌遲於情尚
有可原而臨時處及伊兄屢次行竊恐為後累遂即聽從加
功又與迫於威命不敢不從者有間若僅改為監候亦非所
以重服制而儆兇悖閔訓著從寬改為應斬即行正法 調
福建海壇鎮總兵楊瑞為臺灣鎮總兵以浙江象山協副將
章紳為海壇鎮總兵調廣東提督黃仕簡為福建水師提督

實錄卷之六百九十七

一

以廣東左翼鎮總兵吳必達為廣東提督澄海協水師副將
陳應鍾為左翼鎮總兵 庚子吏部議准甘肅巡撫常鈞奏
稱瓦亭巡檢無緊要事而鹽茶諸務較為煩瑣請裁瓦亭巡
檢改設鹽茶廳照磨其廳監囚禁等事責令專管養廉於鹽
茶耗羨項下支領該照磨聽鹽茶廳管轄缺歸部選換鑄平
涼府鹽茶廳照磨兼管司獄司印從之 辛丑諭軍機大臣
等伊勒圖永瑞范時綬德爾格新疆辦事年久應派人更換
伊犁大臣已有多人不須派換伊勒圖著即回京副都統李
景高著往烏魯木齊頭等侍衛額爾德蒙額著往品河副都
統高廷棟著往開展更換永瑞等回京 又諭曰輕車都尉
阿勒扎泰本係旗下臣僕不能步射清語早應革職朕念伊
曾祖鄂勒哲依圖曾在軍營奮勉特加恩賞限三年再加訓
導阿勒扎泰理宜感激朕恩勉勵學習茲據鑲紅旗蒙古都
統奏現已限滿仍未勤學毫無造就著發往伊犁披甲効力
行走 理藩院奏鄂爾多斯貝勒因災請借俸銀得旨不必
借俸著賞銀一千兩由該院派出委員帶銀前赴鄂爾多斯
賞賑 命簡親王豐訥亨仍管健銳營事務 以正藍旗滿
洲副都統烏勒登為正藍旗護軍統領仍兼副都統 壬寅
諭據阿里衮奏查閱潼關等四營弁兵內竟有弓箭烏鎗生
疎者操演陣勢亦不整齊請將各該營將弁交部議處等語

實錄卷之七

二

著照所請潼關協副將和邦額長武營遊擊胡上偉著邠州
營都司試用武進士馬鎮常樂堡都司八寧阿等俱著交部
照例議處以示儆戒 又諭據佛德奏外省官員到任定例
將管事長隨開具姓名籍貫造冊通報上司存案以防奸宄
今有於長隨之外另名管理雜務之人應請一體造冊通報
一經犯法即照例分別治罪一摺佛德向歷外任此奏必實
有所見聞但所陳辦理之法不過令將姓名籍貫造冊申報
殊於事理未得緊要況造報徒事紛繁久且具文塞責保無
另立名目仍非所以杜根株而絕弊竇外省各衙門既有幕
友佐理案牘復有長隨供其驅使斯亦足矣今乃於幕友長
隨外復有辦理雜務之名甚至濫冒頂帶混廁官場侵事權
而滋奸偽莫此為甚至衙署中或子弟隨任讀書或近親依
居餬口亦常情所不能無但竟使其干涉公務出入無忌又
安保無不肖之徒藉口辦公招搖生事者耶著通諭各督撫
嚴飭所屬將辦理雜務名目力行禁止如有違犯即行據實
叅究重示懲儆以昭炯戒倘不實力奉行致所屬以私人而
代公務滋生事端惟該督撫等是問 又諭禮義廉恥居官
者立身之要雖不可妄行驕縱亦不應自處過界以為取悅
上司之計如侍衛及滿漢部屬與堂官接見回事俱有一定
體制遵行已久人所共知近聞侍衛部院司官內有見該堂

實錄卷之七

七

官輒行屈一膝者或更因有懇求之事及本身稍負愆尤即免冠叩首者至於途次相遇有彼此乘馬屬官竟行下馬者於定制甚為錯謬向來滿洲除告兵告圍之外從無長跪叩首之例況侍衛係內廷行走人員即在領侍衛內大臣前亦俱侍立回事從不屈膝通來因新留京居住之索倫達呼爾等在軍營時於將軍大臣前每行跪叩以致一時不能記憶遂成習慣殊不思伊等雖習於此其他侍衛又將何以行之況伊等既現任侍衛其本職禮儀自當學習熟嫻際此太平之時並無軍旅之事又何所求告耶若不嚴行禁止則彼此效尤何所底止著通行曉諭侍衛部屬接見本管堂官俱照

實錄卷六九七

舊例侍立回事即自行問候亦不過鞠躬致意已足達情稱禮倘傳行之後有仍蹈前轍者該堂官即行嚴加申飭訓誨誨而不悛即奏治罪如大臣等不以為事要自尊大受此諄諄恬不為怪姑容此卑鄙無恥之徒經朕查出定行從重治罪嗣後屬員等若即恃此不遵禮法率行傲慢縱肆則尤為非禮伊等務宜循分守例以協舊章再伊犁喀什噶爾等處辦事大臣前侍衛等不應過於卑屈即伊犁所設總統將軍亦不過鎮守邊地並非從前軍營將軍大臣可比侍衛等亦不應屈膝跪叩倘有似此者該將軍大臣即嚴加訓飭勿得任其日流於下再聞邇來卑鄙無恥之徒有因顧職任稱

莊親王誠親王為太王及見王等長跪請安者此皆由一二無恥之人以諂媚為謙恭至於此極若久之沿為惡習所聞非細倣如莊親王誠親王諸子內有皆封王爵而伊等已經退閒之後其屬下人等以伊為現任親王之父稱為太王尚可今無故遽稱為太王將何所指耶著嚴行禁止此後稱王等為太王及見王等長跪請安者凡王大臣遇見亦即行參奏以儆弊俗著將此通行曉諭中外知之 軍機大臣等議奏據巴爾品奏稱商都達布遜諾爾太僕寺馬共六千匹除應給察哈爾馬二千三百二十六匹外俟牧場馬駒養成仍可待二三十匹等語查現在直隸綠營缺馬皆需買補請將

實錄卷六九七

商都達布遜諾爾太僕寺所餘駒馬四千餘匹交直隸總督提督令其抵補所屬空額其應如何定價著方觀承巴爾品會議具奏再據巴爾品所稱牧場馬駒陸續長成俟二三年後可用者實係若干令其呈報從之 癸卯

上站暢春園問

皇太后安 幸圓明園 欽差刑科給事中副都統銜七十五奏剿匪侵擾青海蒙古等處路甚多其出沒要區共計五處請派兵一千名分守五下游牧探賊動靜合力追勦奮勉者報部議敘怠惰者嚴加懲治扎薩克有不遵行者指名題參治罪再查王索諾木丹津策楚克達什貝勒丹巴策凌貝子

那木扎勒策凌沙克都爾扎布皆熟識囑匪情形尚能辦事請即令伊等總管五十兵臣面飭王索諾木丹津等率屬勤習武藝明年在會盟處親閱勇惰以定賞罰從之 甲辰兵部議准閩浙總督楊廷璋奏稱標營學習世職及彭臺俸滿把總候補千總並分發候補千總之武舉均應按照缺次輪流咨補但無志者或以缺次有定不肯練習技勇請於甄別年滿千總之期一例甄別其怠怠者即休退報部俾留標各員知所策勵從之 欽差刑科給事中副都統銜七十五奏據青海扎薩克郡王索諾木丹津呈請由四川出派大臣一員聚集郭羅克百戶等帶領該扎薩克等約地會盟嗣後青海蒙古及郭羅克番子等倘有盜竊案件將為首一二人從重懲治法律既定庶盜風可以漸絕懇請代奏等語查郭羅克番子習於攘奪往往阻截西藏大路搶掠唐古忒蒙古被劫之人因距西寧西藏四川較遠走告無路前任大臣等雖曾咨拏因不知賊匪姓名從未捕獲但該番雖習於為盜然久服王化若再開導訓飭俾共知憲章或可改惡習請咨商總督阿爾泰可否照索諾木丹津所請聚集郭羅克百戶會盟之處俟阿爾泰查明移咨到日請旨辦理報聞 乙巳

上詣暢春園問

皇太后安 丙午諭曰明德奏廣豐縣劣紳潘紀洙因家人張

發偷竊銀物遂疑裁縫晏文光通同竊逃稟報該縣林樹崑給票令其自緝及潘紀洙補授浙江麗水縣知縣復差族弟執持原給緝票又差麗水縣役給與印票來江西拏獲晏文光遞解至安仁縣境內晏文光落水淹斃屢經飭令知府楊廷親提確審該府輾轉委員辦理遲延而審擬情節又多未確一招所奏甚屬公正在籍紳衿不得於地方滋事律禁茶

嚴戒

皇考臨御十三年加意整頓疊朕御極以來因事創懲提撕儆戒自宜人知畏法各思儆戒潘紀洙所失不過數十金乃以影響疑似之事竟行持票自緝復敢於莅任以後將任內印

票給與伊弟登縣役越境至本籍拘拏以致釀成人命殊屬藐法無論晏文光之影竊與否尚待察訊而身為他省之縣令輒敢拏本籍之民人若不嚴加懲治則地方一二劣紳朝登一命之榮即夕擅三尺之法此風漸不可長潘紀洙為革職及摺內有名人犯文與浙江巡撫熊學鵬委員一併解交江西巡撫明德嚴審定擬具奏至該府楊廷遇地方此等案件輾轉遲延并不親提研究明係袒庇劣紳有意玩縱僅予革職不足蔽辜著革職拏交刑部治罪其濫給緝票及混行遞解之各縣一併題參交部議處該撫明德能不瞻顧情而叅題審究按察使顏希深據實稟報秉公提審俱屬可嘉著

交部議敘。○諭軍機大臣等前因湖廣鹽價增長一事傳諭李侍堯令其和衷商推酌中妥辦在漢口不得定價太苛致商人艱於生息而在兩淮亦不得藉詞息少勒捐不往運售今據高恒奏到現在赴楚引鹽約可銷至明年二三月內是楚省鹽觔目前自不至有匱乏之虞至行銷價值自當酌計成本示以節制固不可聽其任意增長致閭閻食費滋繁若過於裁減或於鹽本不敷將來運售恐不免拮据即如米穀價值亦隨時長落豈能著之禁令概定石米數錢而強人以所不能耶總之辦理鹽務惟在虛公酌劑立定章程俾商民兩無虧擾不可任情偏聽致刁民猾商從中滋事方為平允

實錄卷六九七

八

現在楚省鹽價情形若何及如何酌中定價之處著傳諭李侍堯詳悉覆奏高恒摺并鈔寄閱看又諭據素誠奏稱自阿克蘇往伊犁之回人其口糧本須採買今阿克木伯克阿布都拉等情願於官用八百石照數採買之外再捐麥四百石摩羅和卓願捐麥一百石等語阿布都拉等感激朕恩願捐麥自効甚屬可嘉著交與素誠照例酌量獎賞又諭據舍圖肯奏裝載官豆運通船戶佟方等棄票私逃驍騎校于紹性巡檢溫覺怒向船戶訛索銀錢等語于紹性溫覺怒俱著革職交盛京刑部審明治罪至裝載官豆船隻如可攜帶米穀裝載些須至內地售賣尚屬兩有裨益但未經明白

實錄卷六九七

九

曉示以故微員胥役藉端訛索不若明示船戶等令於裝載官豆外有情願攜帶米穀者聽便則官役自無可訛索矣况船戶既載官豆又有官役押隨不過未曾領票輒行起運而已將逃之何地哉舍圖肯所奏殊不明悉著傳諭舍圖肯此項船戶究係逃往何處並行知方觀承查辦尋方觀承奏查奉天粟米高粱價值常賤且有益民生日食請嗣後豆船止准裝載粟米高粱其芝麻小豆大麻子等項概不准帶從之○又諭據明瑞奏稱哈薩克阿布勒比斯遣厄魯特台吉策伯克果懇將隨厄魯特圖倫蒙克逃來阿布勒比斯之妻達呼賞回等語此婦不識現到伊犁否著明瑞等查明如實到伊犁阿布勒比斯再遣人懇恩時朕加恩賞回亦無不可著傳諭明瑞等知之○以江西按察使顏希深為福建布政使雲南驛鹽道廖瑛為江西按察使旌表守正捐軀之雲南賓川州民趙奮飛妻朱氏○丁未

上詣暢春園問

皇太后安○還宮○諭今日閱禮部所進會試錄登科錄本內俱有恭進

皇太后及

皇后各一本等語此係沿襲具文非事關典禮者可比如慶賀表箋及進春進時憲書之類自應遵循舊例至若會試登

科錄部本原即移交內閣照例收貯此不過循例進呈在朕尚不必親加披閱況我朝宮闈肅穆不惟一切政務從不與聞即尋常細事亦無絲毫干與似此相沿舊套徒費鈔寫自應停止此外尚有類此繁文縟節未經更正者並著大學士會同該部詳查更定妥議具奏尋奏山東等十五省鄉試錄由禮部彙進

皇太后

皇后各一本通政司呈進各省文武鄉試錄內有恭進

皇太后

皇后各一本又有副鄉試錄隨本並進者均請停止從之○以

新錄卷九十七

江西南贛鎮總兵許成麟為廣西提督四川永寧協副將何思和為南贛鎮總兵○蠲緩江蘇銅山沛縣蕭縣碭山邳州睢寧海州沐陽徐州等九州縣水災飢民額賦 戊申諭曰王進泰奏稱伊母年老路遠不服水土請留京供職等語王進泰著留京署理鑲白旗漢軍都統事務 諭軍機大臣等吳達善以黔省提標藥局失火請將守備遊擊各官嚴加議處摺內並不將提督馮哲參奏殊屬非是馮哲身在同城藥局實其專管疎防之失夫復奚辭雖督臣與提臣體近平行而事關營伍則督臣原有節制提臣之責吳達善如果據理附參馮哲即有處分亦不過失察公罪豈至遂干重戾今以

此等事件已置之不問設遇地方緊要政務更有重於此者該督亦將意存瞻徇可乎吳達善著傳旨申飭並將此諭令知之 己酉工部議准江南河道總督高晉奏請嗣後河工辦料以廳員為專管以守備為兼管使互相稽察從之 以故甘肅河州撒喇族土司韓玉麟子先祖襲職 庚戌

上御懋勤殿勾到河南山東情實罪犯停決河南絞犯二人山東斬犯五人餘八十四人予勾 戶部議准御史諸徐孫奏

請申嚴成例一州縣民壯宜以壯丁勤習技勇者充補請飭督撫令捕盜廳員按年查閱知府於盤查日遇便點驗如有以老弱充數者府廳會同揭叅將州縣照濫留衙役例降一

新錄卷九十七

級留任上司查出者並將府廳照奉行不力例罰俸一年一各衙門例禁掛名書役日久玩生仍有鑽營入冊冀免徭役甚有掛充司道督撫書役脅制地方官者請飭各省嚴查確訪如仍有掛名書役滋弊者悉行斥革出具並無存留印結報部存查倘仍蹈前轍該管上司查叅將承充人斥革本管官分別徇庇失察議處從之 禮部奏

皇太后萬壽聖節慶賀禮儀得旨是照例行禮奉

皇太后懿旨今年停止筵宴 辛亥工部議准浙江巡撫熊學鵬奏請各省州縣請修各項工程費需十兩外者該管道府親估十兩內者酌派附近府廳直隸州收勘估其要工需費

浩大者督撫覆勘使承估承修互有稽覈從之○旌表守正被戕之福建惠安縣氏甘五妻陳氏○壬子

上御懋勤殿勾到山西直隸情實罪犯停決山西絞犯一人直隸絞犯二人餘六十八人予勾○諭軍機大臣等奉朝奏請暫停採買加貯倉穀一摺其意原為民間便於報捐而言今英廉條奏早降旨停罷自無可置論已於摺內批示至該省倉儲現在各案採買既有一百數十餘萬所儲已為不少將來即需酌辦亦惟隨時審量市價從容措置正不必亟亟購買以致有妨民用著傳諭喬光烈毋庸仍泥許松佑加貯原奏稍為勉強從事將此並諭奉朝知之○兵部議准河南巡

背錄卷六九七

上

撫葉存仁奏稱州縣修城遲延照修礮臺遲延例議處而汛防員弁責任尤重請將現在修整城垣照修礮臺營房例責令汛弁兵保護如有坍塌立即移縣通報修理遇員弁離任照文職離任交代取結詳報倘有隱匿將汛弁照承查遲延例議處既報後文員不依限修竣照修造遲延例議處再磚城較土城自更堅固向例保固俱以三年為限似無區別請嗣後除土城仍照原限三年保固其磚城保固定例五年限內損壞者令承辦員賠修從之○癸丑

上詣

奉先殿

背錄卷六九七

上

壽皇殿行禮○諭軍機大臣等明瑞等奏稱巡查塔爾巴哈台等處哈薩克汗阿布勒比斯來索逃往伊犁之厄魯特且言從前曾有給回之例臣等將阿布勒比斯斤貢諭以準噶爾業已平定哈薩克等所獲之厄魯特理應收取但念爾等亦係臣僕未經辦理今投至伊犁乃其故土如何稱係逃人并求降旨烏里雅蘇台將軍一體辦理等語明瑞所辦甚為得體從前雖無彼此不留逃人之言但成家扎布曾將自哈薩克逃出之厄魯特給回阿布勒比斯遂欲援以為例著傳諭成家扎布等嗣後遇此等事俱照明瑞等所辦駁之○吏部議准江西布政使富明安奏稱各省交代承查承追承變等案請照實在月日依例扣辦按限查叅議處應停止扣除封印日期例從之○是月河東鹽政李質穎奏河東姚運渠前薩哈岱奏准令南北堰居民每年出夫挑濬渠底淤墊給發半價事屬創始民力難支查姚運渠三年輪修例支銀五千兩請將輪修改作歲修即將三年輪修之項分作每年修濬之需報聞○甘肅巡撫常鈞奏甘省倉糧向貯米麥穀豆四色遇借給籽種口糧等項各照原借色樣徵還但甘省種植又有糜子一種民間種食者多價與粟穀相等而有糜無穀者情願以糜抵穀地方官因違例不准抵交民多未便請令通融交納除米麥豆仍各收原借本色外其原借粟穀一種

聽民以糜抵交。至下年借出糜子有欲以粟設還倉者亦聽從之。雲貴總督吳達善奏滇省湯丹碌碌廠採銅上年奏准每百觔加銀四錢該二廠每年辦銅六七百萬約需加價銀二萬六七十兩於本年加卯鑄息內支給外即將前年存積餘銀四萬兩逐漸添補查自乾隆二十七年十月奉文加價起至本年八月止未滿一年共辦獲銅七百二十餘萬觔是將來加卯年息及前年存積餘銀必不敷加價之需請於東川新舊二局鑪內本年冬季每旬每鑪加鑄半卯仍於銅本內借支鑄本鑄出錢文照例以一千二百文作銀一兩扣解道庫除歸還借款及支銷經費外計一季可獲息銀一萬一千九百餘兩以備來年加價之需將來每年冬季應否加鑄屆期隨宜辦理從之

實錄卷六十七

高

大清高宗法天隆運至誠先覺體元立極敷文奮武孝慈神聖純皇帝實錄卷之六百九十七

實錄卷六十七

高

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十八

乾隆二十八年癸未十一月甲寅朔諭軍機大臣等昨明瑞
奏哈薩克阿布勒比斯等索取逃入伊犁之厄魯特將阿布
勒比斯嚴行駁飭所辦甚是已降旨成衣扎布嗣後悉照明
瑞所辦毋許給回但成衣扎布等原奏因哈薩克脫逃之厄
魯特伊等自行半路追獲且並未入我境內是以給伊領回
若業經逃入內地即哈薩克再四來告亦斷然不可給與著
再傳諭成衣扎布明瑞等遵照分別辦理仍將成衣扎布原
奏寄明瑞等知之 乙卯策試天下中式武舉於太和殿前○

實錄卷六九八

一

諭軍機大臣等據高誠奏盛商朱立基等虧空永慶號應交
本利暨課帑銀二十五萬四千餘兩其經手營運之夥商魏
汝植衛純修關衛盤關衛周王晞王暉俱係山西鳳臺縣人
請敕山西巡撫和其衷將該商等原籍家產先行查封各等
語朱立基等承辦永慶號鹽務竟敢將帑本國課任意侵蝕
拖欠則其為花銷隱匿不問可知著傳諭該撫即將朱立基
等七人原籍所有資產嚴行查封毋使稍有寄頓隱匿並將
高誠原摺鈔寄閱看 又諭曰成衣扎布奏請於年前至京
帶領伊子拉旺多爾濟來京慶賀元旦其將軍印信交與參
贊大臣等語應如所請准其來京令扎拉豐阿前赴烏里雅

實錄卷六九八

二

蘇台署理將軍印務雅郎阿著暫留科布多辦事 戶部議
奏湖南巡撫喬光烈奏稱乾隆二十四年碾運京倉改撥浙
江米石經過九江關應納料稅銀二千兩零該藩司府縣並
不扣存請分別追賠得旨此項料稅銀兩湖北行之既有成
例該撫何難於支給水腳之先仿照辦理乃因給發草率迴
護前非屢次請寬就延歲月以致無憑著追其遲誤之咎實
在該撫所有應追之項照部議令許松估分賠一半外其餘
一半即著馮鈐賠補不必令承辦各員分賠 旌表守正捐
軀之四川渠縣民劉國俸妻周氏 丙辰
上御紫光閣閱中式武舉騎射 諭曰崔應階題參臨朐縣擬
入情實斬犯國子能賄囑禁卒越獄一案聞之不勝駭異向
來各省越獄之犯雖所時有而以秋讞情實應勾重犯賄卒
脫逃實為從來罕見崔應階初任封疆既不能嚴飭所屬防
範於臨時而於此等要案又不即時具摺專奏僅循例題本
請將典史竿問知縣竿職該管府道臬司亦照常聲請議處
是屬何心其玩法之禁卒應如何嚴行治罪之處全未言及
甚屬不知輕重所有該犯國子能著該撫飭屬速即嚴拏務
獲以彰國憲其賄縱之禁卒朱作彥並著嚴審定擬速奏典
史李勳著革職竿問知縣胡啟植竿職仍留任所勒限緝拏
巡撫崔應階及臬司道府等官俱著交部分別嚴加議處該

部知道。諭軍機大臣等：崔應階題參臨朐縣斬犯國子能賄囑禁卒越獄脫逃一案，已降旨將該管各員嚴加議處矣。國子能係擬斬情實業已予勾之犯，自應嚴加防範，毋致稍有疎虞。乃禁卒朱作彥等膽敢受賄縱放，向來監犯越獄之案，此為僅見。阿爾泰為巡撫時，斷無此事，即各省亦從未嘗有此可見。崔應階漫不留心整飭，且此等要案，僅照例將知縣典史題參，並不即時專摺奏聞。將臬司道府等從重議處，至受賄縱放之禁卒實屬藐法，不特本犯不獲律應抵罪，即迅就弋獲，亦非尋常疎縱可比。該撫於現在作何問擬辦理之處，亦未聲明均屬錯謬。著傳旨嚴行申飭，仍飭將越獄之

實錄卷七十八

三

犯嚴拏務獲一面專摺奏聞，即行正法，並將該禁卒嚴審定擬，速奏可將此傳諭知之。丁巳。

上御紫光閣閱中式武舉技勇畢，覆閱騎射親定甲乙。吏部議准湖北巡撫輔德奏稱：武昌黃州二府照磨無專管事件，亦無委辦差務，應請裁汰。現在黃州照磨童學詩年老勒休，武昌照磨賈銓請咨部另補從之。戊午。

上御太和殿傳臚，賜中式武舉一甲德灝、郭元凱、葉時茂三人，武進士及第二甲曾光亨等五人，武進士出身三甲李棟、繇等四十三人同武進士出身。諭曰：刑部參奏四川會理州斬犯衣戈中途脫逃，未獲一摺，與昨東省具題斬犯國子能

越獄之案，均以情實重犯冀遁，顯戮而抗王章，其事實為罕

見在此等候勾之犯，自知法所不容，潛圖竄蹟，其狡獪何所不至。然其在監在途，該管官役等職司監押，自應悉心防範，以絕疎虞。此而不于嚴懲，誰復知有三尺者。東省賄縱越獄一事，已降旨將禁卒從重擬抵該撫及司道府縣等官嚴加議處。阿爾泰在山東巡撫任內，諸事留心整頓，此案已在伊久經謝事之後，至川省脫犯事在五月，其為開泰平日政令不行，不問可知。咎固不在阿爾泰，第受任後有此藐法重案，何以不即具奏。阿爾泰著傳旨申飭，國家明刑弼教，至秋讞重犯尤為罪大惡極之人，使任其詭計漏網，則刑官猶可用。

實錄卷七十八

四

憲典猶可恃乎。現在未獲逃犯著該督等即速嚴緝，務獲一面奏聞。一面於所獲地方即行正法解役等嚴行鞫訊，即審無賄縱情事，亦應從重治罪。所有地方疎防文武各員均著交部嚴加議處。開泰石禮嘉等一併交部嚴加議處，並將此通諭各督撫知之。又諭曰：貴州遵義府知府梁敦書現在俸滿來京，引見大學士梁詩正懇請留其子以部屬用者，如其請梁敦書加恩以戶部郎中用，原任大學士蔣溥之子候選知府蔣尚桓著以戶部員外郎用。諭軍機大臣等：奏曰修奏請將山東主簿呂又祥調赴直隸教演撈泥工程一摺，著照所請。俟明歲正月東省工竣後，即令該員酌揀熟諳人

夫十餘名并帶一切器具前赴直隸聽候方觀承調撥各工教習襄事將此傳諭張師裁方觀承并將原摺鈔寄閱看

欽差侍郎襄曰修兩江總督尹繼善江南河道總督高晉安徽巡撫託庸議奏濰河源遠流長土性虛鬆原係沙底即不過黃水時但值清水盛漲兩岸坍塌淤沙停積旁出灘嘴河底淺滯應查明段落擇淺窄者酌量疏通有灘嘴者相勢挑截挑竣後遇水小年照例支歲修銀兩隨時疏濬遇黃水經由之年酌用民力按戶出夫官為指示辦理如黃水盛漲淤墊過多民力難勝仍請旨酌辦其南北二股岔河口請以每年冬月築壩堵截俾清水全歸濰河以水攻沙專力衝刷四年

年錄卷六

五

月水長仍啟壩分洩從之 命原任給事中塔坦馳赴烏里雅蘇台辦事換富勒賀回京 己未

上御乾清門聽政 庚申

上御懋勤殿勾到朝審情實罪犯停決斬犯三人絞犯八人餘十七人予勾 諭各省將軍督撫提鎮等所轄弁兵除地方辦公外不得因私事隨帶役使所以明職守慎官方也前因都察院任進京隨從弁兵數十人及遊擊安宛將綠營兵任意差遣等事屢經降旨嚴行飭禁乃昨因提督王進泰來京陛見詢知其隨來者仍有粵西千把此甚非是從來官威任使原為經理一切公務足敷調遣之用是以大員於本屬辦

差及巡查公出弁兵等自可供其驅策即遇齋摺等差事傷因公於例亦所不禁至於陛見或陞任入京則是本身私事豈無家人長隨等可用而猶一一取資於官使伊等往來道途遠離職役營伍日就廢弛於政體甚有關係著再行傳諭各將軍督撫提鎮等嗣後如有陽奉陰違仍蹈故轍者朕必重治其罪 又諭今日方觀承奏原任知州劉有餘因欠租杖責部四海斃命一摺蘇昌泰奏學政張模監准呈詞違例提審擅作威福一摺該督等據實糾劾所辦甚屬公正向來鄉紳在籍武斷橫行學臣侵撓地方公事最為吏治民生之害

年錄卷六

六

皇考世宗憲皇帝悉心整頓敝俗始得肅清所當永遠凜遵以昭法守何得日久漸弛復有滋意妄行目無法紀之事如劉有餘以退職閒居之人在家擅用刑杖酷斃人命其豪橫骫法豈復情理所有若張模以士子表率乃任性妄受士民詞訟批斷批結地方有司不得持權殊屬乖謬總由向來封疆大吏遇事不免遷就姑容以致積漸因循釀成惡習果能如方觀承蘇昌屏去瞻顧之私秉公懲創吏治何患不淳民生何憂不厚耶劉有餘著交刑部嚴審定擬從重治罪張模著交部嚴加議處方觀承蘇昌著交部議敘 諭軍機大臣等前以各省衙門有劣幕盤踞把持依倚作奸之事已降旨

通行曉諭令各該督撫實力整頓令按察使周景桂來京陛見詢據奏稱幕友中或有在就館地方另娶家室出入官署勾通作弊者有布散黨與招致本地親串狼狽為奸非其黨惡百計排擠出境者有彼此餽送往來以上司衙門延留多日為榮借聲援以圖影射者種種惡習不可不嚴行懲創著各省督撫等嚴飭所屬加意體察遇有此等劣幕即嚴行查辦毋得稍事姑息貽患地方嗣後若有故智不悛潛行盤踞滋弊者經朕訪聞或言官糾劾則惟該督撫等是問可於奏事之便再行傳諭知之 命翰林院侍讀邊繼祖提督廣東學政 辛酉諭曰崔應階奏張師載現已病故河東河道總

實錄卷之八

七

督員缺著葉存仁補授阿思哈著調補河南巡撫明山著調補廣東巡撫明德著調補陝西巡撫輔德著調補江西巡撫常鈞著調補湖北巡撫其甘肅巡撫印務著總督楊應琚暫行兼署明山著遵前降阿思哈諭旨即先赴廣西署理巡撫事務俟馮鈐陞見回任後再赴廣東新任 諭軍機大臣等素誠覆奏哈薩克前來葉爾羌貿易一摺內清語不通素誠係滿洲奴僕又在回疆辦事理宜勤學清語摺內竟有不成話者皆由素不熟習所致著嚴加申飭再各城駐劄辦事之員俱係滿洲大臣一切文移應用清語若清語不熟致失滿洲體制必為回子哈薩克諸部所笑朕從前屢經降旨訓導

現在伊犁地方滿洲索倫察哈爾厄魯特回子錯處尤當以清語為要著寄信明瑞及駐劄各城大臣亟勉肄習 軍機大臣等議奏臣等酌議由京派護軍一千名移駐健銳營等事查八旗護軍共一萬五千餘名請令健銳營大臣會同八旗護軍統領每旗選精壯者一百二十五名共一千名移往不必開缺其應學技藝充當差務及應用軍器搬家賞銀等項悉照從前派往前鋒一體辦理其官房交工程處修蓋著移駐兵居住再請於八旗添放參領二員副參領八委署參領八前鋒校二十四查現在應補放人員健銳營有額外行走之頭二等侍衛副護軍參領委署前鋒參領雲騎尉等共

實錄卷之八

八

三十員即著健銳營大臣將參領侍衛等各對品補放其雲騎尉等員以原品補放行走前鋒校亦由健銳營副前鋒校內每旗補放三員責令管理從之 陝甘總督楊應琚奏臣由巴里坤閱看營伍沿途親勘各營站俱屬妥協惟自沙州至庫克沙什地有沙磧恐馬力不繼於適中之黃墩堡設立腰站今查該處地方俱係窪下與其在黃墩堡設立腰站莫若將庫克沙什一臺移設土窰子地方道路平坦里數亦屬相倣其黃墩堡腰站即可裁汰再自沽水至哈什布拉克約一百數十里俱係戈壁原於適中之紅柳硤設立腰站因井水味鹹難供汲飲故未安設正站今於紅柳硤四十里內訪

有四道湖甜水用騾拉運一日可以往還應將紅柳硤改為正站報聞 壬戌諭曰陳宏謀奏營兵獲賊恐有到縣翻供情弊請令原獲營員會實一摺所見實切事理地方文武均有緝匪之責乃州縣捕役中之狡獪者平時以養賊為故智或經弁兵首先躡獲既不於已而有司等亦以非獲自捕役未免心存吟域輒於送審之時任其狡展巧為開脫外省積習相沿已非一日若遇翻供之案令州縣官移詢原獲弁兵據實確訊詭計自無可施而營伍緝捕責成更專於民生殊有裨益著照所請行 又諭昨赫昇額請將直省州縣同名之處概行更定一摺因其事無關緊要已於摺內批示毋庸置議今石禮嘉奏同名州縣滿漢印篆並無分別一切文移往來暨捐監稅契路票等項恐有假借影射難以稽覈所奏為別弊起見其言殊為近理國家頒給印信原以昭典守而重關防其中名目相同之處或有巧猾之徒乘間因緣為奸於吏治實有關係此奏著交九卿詳悉定議具奏尋奏各省府州縣名相同者計一百四十餘處猝換名目小民相沿日久驟難改稱轉滋錯誤其另行改擬處應無庸議從之又諭向來前鋒統領護軍統領出差左翼者以右翼署理本旗者以次旗署理但如此派署屬員等得以豫知未免存觀望逢迎之意嗣後前鋒統領護軍統領出差其印務不必拘

實錄卷六九八

九

定旗翼著兵部仍照舊例將前鋒統領護軍統領都統副都統等職名開列進呈候朕派署 癸亥

上詣暢春園問

皇太后安 幸圓明園 工部議准倉場侍郎溫福奏稱京城西北諸水俱於通惠一河宣洩必須隨時保護務關同知駐劄河西務距通八十里由通至大通橋又四十里往來既需時日且通惠河與北運河同時並漲該同知搶護外河勢難兼顧裏河查漕運通判駐張家灣距通十二里事務又簡請令專駐通惠河防守險工並將歲修搶修諸工程改令通判經管由通永道覈報其慶豐通流二閘閘官及上下汎外委

實錄卷六九八

十

河兵該通判管轄從之 甲子遣官祭

先醫之神 故河東河道總督張師載遺疏開諭曰張師載

老成謹慎辦理河務宣力有年今患病溢逝殊為軫惻著加

恩追贈太子太保所有應得卹典并著該部察例具奏 又

諭侍郎四達現在差往浙閩有查辦事件著馳驛去其隨帶

司員並著馳驛 諭軍機大臣等刑部奏審富爾松阿修理

衙署銀兩違例攤銷一案內供出將軍福僧格挾嫌參奏並

主使把總杜元龍到京不行進摺等情此事殊駭聽聞其中

情偽必須徹底根究非富爾松阿一面之詞所能定讞著傳

諭楊廷璋等速將杜元龍及案內應質人犯嚴密確訊務得

實情並詳悉體訪情由始末一面奏聞一面即將杜元龍等
各人犯遴選妥員中途詳慎防範解交刑部質審原摺一併
寄交閱看 旌表守正捐軀之直隸永清縣民高體崇妻甯
氏 乙丑

上奉

皇太后還宮問

皇太后安 丙寅

聖祖仁皇帝忌辰遣官祭

景陵

上詣

奉先殿

壽皇殿行禮 禮部議奏御史王懿德奏稱大興宛平二縣近
多本籍稍通文藝人先應府試旋將府試名售與冒籍人應
院考無憑查覈請飭順天學政嗣後考大興宛平二縣務將
取進卷與府試卷取對筆蹟有不符合者究治從之 丁卯

上詣

皇太后宮問安 故大學士梁詩正遺疏聞諭曰大學士梁詩
正老成端重奉職恪勤侍直內廷晉階綸閣方資簡任遽聞
溘逝深為軫恤命皇五子前往奠醊並加贈太保入祀賢良
祠賞給內庫銀一千兩治喪念伊子梁敦書尚未到京寓次

實錄卷一百八

二

實錄卷一百八

七

乏人著派內務府司官一員前往經理其事所有應得卹典
該部察例具奏 諭軍機大臣等現在西陲平定各該處大
臣更番駐劄非從前軍營可比嗣後伊犁烏里雅蘇台喀什
噶爾葉爾羌等處駐劄大臣有願帶家口者照各省將軍大
臣例准其攜帶如不願者聽 又諭據旌額理等奏稱特訥
格爾蓋造營房臣等派參將銜之吳士勝督率練旗兵二百
四十名於去年十一月起至今年九月止造成房屋一千三
百十四間又以餘力修補特訥格爾及烏嚕木齊兩處城郭
等語吳士勝督兵造房甚屬奮勉著加恩補授參將其兵丁
等交旌額理等酌量賞給以示鼓勵 又諭據傅恒奏桑寨
多爾濟寄伊札內具陳福德在庫掄辦事情形及應改定事
宜據稱烏里雅蘇台運米一事若聲揚辦理恐俄羅斯妄生
疑懼等語所慮尚是俄羅斯今頗恭順而我亦無辦理伊等
之意運米一事著即行停止又稱烏里雅蘇台毋庸安設軍
營惟移於塔密爾甚有裨益等語此言殊不曉事體現在開
拓疆界尚欲於科布多地方修築城池安兵屯田何反欲將
軍營米石移塔密爾耶又稱卡外閒空舖面若將喀爾喀兵
駐劄通令俄羅斯滋疑不如安設練營兵數百名等語尤屬
不合機宜喀爾喀兵與練營兵有何區別且恰克圖係蒙古
地自宜安設蒙古兵此語殊有袒護喀爾喀之意著駐劄庫

輪辦事大臣皆朕所特派他人縱加譏毀朕不惟不聽且必將譏毀人治罪福德新蒙擢用或尚未洞悉朕心桑寨多爾濟深受朕恩福德所為不得不陳然一面之詞亦未可信烏爾圖那遜現赴庫倫不日到俟其到彼詢問如福德實有倨傲等情朕即將福德調回倘桑寨多爾濟與之不睦造言陷害則桑寨多爾濟罪更難逭矣著傳諭桑寨多爾濟知之

禮部先期疏請本年冬至應行慶賀禮得旨奉

皇太后懿旨本年長至令節王妃命婦著停止行禮 理藩院

奏鄂爾多斯之齊旺班珠爾兵借支米石得旨榆林所貯之米雖為兵餉而設向無借與蒙古之例然伊等皆係朕奴僕

實錄卷六九十八

二

現屆荒旱朕甚憫之著加恩賑齊旺班珠爾所請所有貧乏之大口三千二百二十口小口五千九百八十口由榆林所貯米石內每人支給二斗十斗折價銀一兩俟明年秋熟令將銀兩交納該地方官員 欽差副都統侍郎旌額理奏總督楊應琚派員送來挈眷移駐烏魯木齊兵五百二十二戶男婦一千七百九十六名口於十月十三日以前陸續到齊臣等隨發往特納格爾令住新造兵房伊等目覩地畝收成生計豐裕皆欣然得所有應行更換之員并照例遣回本營報聞 旌表守正捐軀之山西平遙縣民雷法龍女雷氏戊辰工部議奏各省工程從前送部物價成規體例非一

江浙閩川四省一物開一價餘省開緩急二價亦有開平緩急三價者約計急價增二三成緩價減二三成平則酌緩急之中但立案久名目繁弊實即起現在各省城工不過量分先後次第興修乃竟有以先修者為急工急價次修者為緩工平價浮銷錢糧章程日紊嗣後除江浙閩川止開一價無庸議外請將多開名目者止准就緩價報銷其平急名色概令芟去若臨時果有一二物料偶昂該督撫於題估冊內將此物因何價昂緣由聲明由部覈定照本年京中工作暫時加價例酌減從之 命禮部左侍郎程景伊充續文獻通考館副總裁官 是日起

實錄卷六九十八

高

上以冬至祀

天於

圜丘齋戒三日

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十八

實錄卷之六百九十八

五

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十九

乾隆二十八年癸未十一月己巳諭前據宜昌鎮總兵吳宗
寧奏奏守備王大有經管馬價銀兩先侵後吐咆哮潛走一
摺朕以總兵參一備弁事屬尋常且該督當必即行奏到是
以但批該部知道今據李侍堯奏稱吳宗寧任內差辦營伍
公事及自買什物多有短發銀兩抑勒賠墊之處至提驗王
大有所管馬價一項時見其將銀買補麩料輒行怒罵王大
有措銀補足仍復欲行提責擅加鎖鑰是吳宗寧顯有侵借
事權擅作威福情事吳宗寧著解任交與李侍堯一併嚴審

實錄卷之六百九十九

一

定擬具奏○諭軍機大臣等明瑞等奏稱納旺前往阿布勒
比斯游牧索取厄魯特逃人鄂勒錫圖詳細諭以利害其屬
人綽特拜畏懼將鄂勒錫圖獻出隨即帶回臣等傳集衆厄
魯特數其逃竄之罪立行正法其失察之領隊大臣伍岱等
請交部察議等語納旺奮勉可嘉著賞緞二疋伍岱等係初
次失察著加恩免其交部又諭據成衮扎布奏稱公品級
扎薩克台吉丹拜因與貝子朋素克不睦唆喇嘛喇布珠爾
稱朋素克旗分之倫都克殺死商人緝捕時朋素克將伊縱
放報稱已死隨審出情節係丹拜教唆喇布珠爾誣害朋素
克等語此事殊堪駭異朋素克果將該旗犯人私縱報死自

應將朋素克治罪。倘倫都克實係身死。丹拜虛捏構陷。則丹拜之罪。更不可宥。自應確查辦理。著派尚書阿桂馳驛前往。會同成衮扎布審明。定擬具奏。此時成衮扎布若尚未起程。前來著酌量何處審事。近便即行。知阿桂若已起程。亦著就近約定地方。等待阿桂一同審辦。其應質訊之人。著成衮扎布行文調取。將此傳諭成衮扎布知之。又諭據桑寨多爾濟奏稱。哲布尊丹巴呼圖克圖先世頒給新舊冊封二道。現在呼畢勒罕。或另給新冊。或即將舊冊二道賞給。請旨等語。著交桑寨多爾濟將哲布尊丹巴呼圖克圖之先世冊封二道。送該理藩院。由該院另頒給冊封一道。又諭據桑寨多

臣等謹將

二

爾濟奏稱。公三都布多爾濟公品級格寨多爾濟從前均屬奮勉。今又留彼處辦事。三都布多爾濟現已賞戴花翎。請加恩一體賞給格寨多爾濟花翎等語。著照所請。併將格寨多爾濟賞戴花翎。伊犁將軍明瑞等奏。據阿奇木公茂薩回至伊犁。呈稱。應派各城種地回人一千五百戶。派出阿克蘇二百七十戶。烏什二百戶。喀什噶爾三百戶。葉爾羌和闐四百戶。賽哩木拜一百三十戶。庫車沙雅爾一百五十戶。哈喇沙爾多倫五十戶。同員外郎拖穆齊圖按城分驗。俱年壯可効力之人。其家口冊籍。並查覈收明。內匠役二十六戶。先行帶來製造器具。應照例給口糧。再臣等准涼州將軍巴祿咨

臣等謹將

三

稱涼州莊浪兵三千二百名。挈眷移駐伊犁。分作三年送往。此項官兵皆坐車輛路途險易。務須豫為酌定。等因。臣查品河至托和木圖臺站。尚可車行。惟呼蘇圖布拉克臺站中間。有一里不可行車。又自塔爾巴哈台伯勒齊爾臺站至闐勒奇阿瑞。亦不可行車。臣等勸諭商賈漸次修平。應再派官兵於中路崎嶇處加意平治。兵到時無卸車馱負之累。仍行知關展烏嚕木齊等處大臣報聞。又奏辦理涼州莊浪滿洲兵移駐伊犁事宜。臣揚應琚即赴涼州會同巴祿將兵行裝各項逐一查明。派員赴出產之地置備。其餘銀照例至伊犁補給。但新疆移駐滿洲與索倫察哈爾兵人衆物價未免昂貴。與其厚利歸商。莫若令旗人分獲利息。請將前項銀交臣巴祿派委妥幹旗員臣楊應琚飭令地方官將日用必需物件從內地採買載運。牲隻車輛交三起移駐官兵陸續運至伊犁。臣明瑞豫備開設店鋪。按月查訪市價酌平增減。每年所得餘利一體均散各兵。以為買補馬匹修理器具之用。報聞。庚午

上詣

南郊齋宮齋宿。定例除另戶滿洲蒙古逃犯名籍。例諭定例另戶滿洲蒙古逃走在一月內自行投回者。交該旗管束。等獲者分別初次二次鞭責枷號。交該旗管束。夫身為滿洲蒙

古世僕而至於逃走必其素行卑鄙或債負逼迫所致伊等現食錢糧尚且逃走若革去錢糧豈復能安分靜守耶即交與該旗都統大臣等亦難管轄不過仍然逃走耳與其令伊等既回復逃莫若賞給錢糧派往伊犁當差著交八旗都統等將乾隆十八年定例以後另戶滿洲蒙古逃走在一月以內自行投回及拏獲者俱行查明連家屬一併派往伊犁賞給步甲錢糧當差行走如賞給錢糧後仍不悛改復致逃走此則匪劣性成終身不能改悔者竟不必派人查拏即拏獲亦不必照軍逃例辦即行正法著於滿洲蒙古檔冊即將伊等之名刪除任其所之無庸辦理著為例 吏部議奏浙江

實錄卷之九

巡撫熊學鵬咨稱瑞安縣知縣周鼎承審竊案請改從事主認贓日起限前後矛盾請仍照獲贓日扣限照例將該縣周鼎承職得旨依議此案吏部議駁甚是州縣竊賊案件自當速行審結庶本犯可以即示懲儆而事主亦不致久滋拖累今瑞安縣知縣周鼎承審竊案該撫熊學鵬既以拏獲之日扣限咨部及經吏部按限行查復據府縣等賊憑贓定之詞遽請改以事主認贓之日起限無論其前後矛盾此風一開匪竊之徒冀圖狡展設或妄供多案必一一待質明確始行定罪遷延輾轉何所底止殊非整飭地方之道熊學鵬著嚴行申飭浙省既有此等藉詞延展之案恐他省亦有似此辦

理者著吏刑二部詳細查明具奏毋使延玩之地方官得以假借牽混尋奏查各省舊案間有以認贓起限者或首犯未獲或監斃人犯或盤獲賊盜事主無人或究出積匪多案須事主到案方可完結初參內詳明並未逾二參分限但初參既有以認贓起限之案辦理參差易致藉詞混展請嗣後初參承審限期及監斃竊犯等案俱以人犯到案日起限即犯係盤獲現無事主及究出多案必俟事主到案認贓擬罪者應照例豫咨展限如混行展限仍照例議處從之 辛未冬至祀

天於

園丘

上親詣行禮 遣官祭

永陵

福陵

昭陵

昭西陵

孝陵

孝東陵

景陵

泰陵 遣官祭

實錄卷之九

九

孝賢皇后陵

端慧皇太子園寢 詣

皇太后宮問安 以京口將軍標副將陳揖為湖北宜昌鎮總

兵 壬申

上以冬至即詣

壽康宮行慶賀

皇太后禮王大臣於

慈寧門衆官於午門行禮 御太和殿受賀 諭前命皇四子

嗣履親王後著即襲封履郡王以承王祀於明年就府 癸

酉

實錄卷六九九

上詣

皇太后宮問安 諭曰阿爾泰奏管理變開原任知府變基虧

缺稅銀七十餘兩其接任管關之知府書敏又勒收變基銀

六千五百餘兩匿不具報其中顯有朋比為奸玩帑貪詐情

弊變基書敏俱著革職並革去變基承襲之恩騎尉一併交

與阿爾泰嚴審定擬具奏 又諭曰丑達著赴庫倫辦理事

務其天津總兵事務著存泰署理 諭軍機大臣等據伍彌

泰奏稱三屯種地兵丁每兵種地二十畝現在收穫米麩十

四石至十五石不等可否將辦理屯田官員及兵丁等加恩

之處請旨等語著照所請官員等交部議叙兵丁各賞一月

實錄卷六九九

上

等知之 又諭據桑寨多爾濟奏稱福德在庫倫辦事一味

倨傲藐視喀爾喀汗王等等語朕初猶未深信及烏爾圖那

遜來京詢問據云福德在彼倨傲屬實朕猶以福德新蒙錄

用福澤難勝令以郎中降補不意福德自行陳奏狂悖不堪

即如伊所奏呈遞呼圖克圖丹書克時蒙古汗王等並未親

往索伊及塔什玉勒請安時未曾聲叙銜名不稱奴才伊等

所穿蟒袍內有黃色者皆係謬妄昔說蒙古等豈得知此耶

況伊所奏條款驕肆處不一而足則平日之倨傲不待言矣

似此乖僻不堪著即革職再開蒙古汗王等見該院大臣及

內廷行走大臣欽差大臣有屈膝跪拜者若本係親戚分本

早幼接見尊長自當如此若無故而然殊屬不合蒙古王公受朕恩施與京中王公頂帶相同不特不宜向大臣前屈膝即見京中王公亦不當跪拜著曉諭蒙古王公等嗣後凡謁見各大臣除恭請朕安外其屈膝跪拜之處永遠禁止如有違者經朕聞知將王公及各大臣一併治罪 甲戌諭軍機大臣等據阿爾泰奏管理蒙開之蒙州府知府雲基虧缺關稅七千餘兩該員業已離任來京請將該員革職解川質審等語著傳諭自川至京沿途各督撫嚴查雲基於所到之處即行鎖拏違委幹員解赴川省質審所有隨帶衣飾貲財一併查封存貯俟審訊明確分別查辦其應行回京家口並著

實錄卷五十九

八

沿途督撫委員接替押送回旗無令在途逗遛 乙亥兵部議准江南河道總督高晉奏稱河葦營添設額外委請留協辦効用名目外委協辦給頂帶補服遇把總缺出揀補外委効用止准頂帶不穿補服遇外委協辦缺出拔補從之 丙子烏魯木齊辦事散秩大臣伍彌泰奏查瑪納斯晶河為明歲所遣駐防兵經由之路所有橋梁渡筏必須修造堅固臣於三月抵庫爾喀刺烏蘇已委員陸續修造現在農務俱畢應多派兵丁乘時伐樹修造橋梁並多備大木倘有衝塌處即時修補報聞 丁丑

上詰

皇太后宮侍膳 諭曰李侍堯等奏湖北糧道王鴻勳諸事不

能振作一味模稜難勝監司之任請勒令休致一摺王鴻勳前在江南河工本非實心任事之員朕念其年力就衰尚無大過加恩調授湖北道員理應倍加奮勉以圖報稱乃不知感激遇事仍循模稜惡習實負朕恩僅予休致不足示儆王鴻勳著革職歸旗當差著該督即押令來京該旗請旨 諭軍機大臣等李侍堯奏酌定漢商鹽價一摺前因湖廣鹽價增昂是以屢經降旨令李侍堯高恒妥議酌中覈定今該督尚未接高恒札覆專就現在情形酌定價值較量自必務準公平但其中商人民人猶未免彼此各存畛域之見朕意欲定折中莫若該鹽政與該督公同面商允協始可永久遵循況漢口銷鹽口岸原屬高恒管內不妨親往巡察以裨公務著高恒自行酌量可以赴楚時帶領兩淮辦事商總一二人前往湖廣會同李侍堯詳悉籌議覈定章程彙摺奏聞摺並鈔寄閱看 又諭據明瑞奏內地存貯茶封現在運送口外散給官兵令於應領鹽菜銀兩內坐扣但伊犁駐劄滿洲索倫察哈爾既多攜帶家口此外復有厄魯特回子等聚處甚多皆需茶葉應用若准其一概承買庶於生計有益而甘省舊貯茶封亦可陸續銷售可否於現送二萬包之外再行增送數千包等語前因甘省存積茶封難以銷售是以酌令運

實錄卷五十九

九

往伊犁給發官兵今既需用甚多自應寬裕運送以資食用俾彼地人衆並得承買著傳諭楊應琚即行酌量辦理並將茶封成本每包計值若干自甘省運至伊犁每包需費腳價若干其給發官兵復於鹽菜銀兩內坐扣者是否足數折扣俱行詳悉查明具摺奏聞尋奏臣調劑茶務已於未奉旨之前添運五千封連前共二萬五千封嗣後每年照此數撥運如此外尚可多銷臨時酌定其茶例以五觔為一封每封價銀三錢由肅運至巴里坤由巴里坤運至伊犁每封腳價茶本共需一兩二錢零其由哈密撥運之二萬五千封每封需銀一兩一錢四分零如將來由內地運往自肅州出關走沙

實錄卷六九九

十

州新路較近需銀一兩一錢一分再各省兵應領鹽菜銀兩均數抵扣報聞○又諭曰成衮扎布等奏稱三等侍衛穆森泰向哈薩克勒買馬匹私許物件並未給與又蒙古密濟特勒索哈薩克馬匹許給倭緞亦未交付除將伊等原索馬匹交前來之哈薩克額德格等轉給本人外穆森泰請交部嚴加議處密濟特請枷責等語前經降旨哈薩克帶來馬匹官定價值不許私相貿易乃侍衛穆森泰輒敢私換馬匹所許之物又不給與甚屬不堪即穆森泰所稱給過羊隻並銀三十兩亦未可信伊如果給過銀物哈薩克等何以又索取轡頭等項且哈薩克豈有以馬二匹換羊二隻之理顯係穆森

實錄卷六九九

十一

泰婪索敗檢捏造虛言冀圖掩飾成衮扎布等不行細加詰問僅請交部議處何足示警穆森泰著革去侍衛即於該處枷責以昭炯戒並傳諭成衮扎布等俟哈薩克到時即諭以我處官員因私換爾等馬匹具奏治罪倘爾等捏詞陷害亦必從重辦理斷不寬恕仍即將穆森泰勒索馬匹給還其蒙古密濟特著照所請枷責又諭曰明瑞等奏稱今年伊犁綠營兵丁耕種地畝所收米麥胡麻各項俱較上年分數倍多可否將種地官兵加恩之處候旨等語著照所請將辦事官員交部議叙兵丁等照例賞賜以示鼓勵又諭曰成衮扎布等奏稱據扎拉豐阿咨稱有哈薩克十八人前來獻馬隨令筆帖式阿林保詢得來使七名跟役十一名貢馬九匹并獻出從前令哈喇巴魯克帶去厄魯特六戶等語昨成衮扎布等將哈薩克哈喇巴魯克遣使前來具奏即降旨曉諭遣回今扎拉豐阿既將來使送至烏里雅蘇台著成衮扎布等仍遵前旨曉諭遣回所進馬匹及六戶厄魯特令其帶回若情願存留即作成衮扎布意見照貿易馬匹及收贖厄魯特之例折價給與再阿布賚給哈喇巴魯克之托忒字文憑繙譯閱看乃哈喇巴魯克奏文哈喇巴魯克係小頭目不應奏事應交成衮扎布等一併曉示來使知之 戊寅

皇太后聖壽節遣官祭

太廟後殿

上詣

壽康宮行慶賀

皇太后禮王大臣於

慈寧門衆官於午門行禮 奉

皇太后幸壽安宮侍宴 已卯

上詣

皇太后宮問安 幸瀛臺 諭曰楊廷璋著補授大學士仍留

閩浙總督之任 諭軍機大臣等大學士梁詩正員缺朕念

漢軍大臣中宜力年久者莫如楊應琚及楊廷璋二人其先

實錄卷一百一

擢總督及辦事明練楊應琚實為最優是以出缺時朕即欲

加恩補放以獎賢勞第念楊廷璋現在已逾七旬其年較長

而楊應琚則猶為可待是以先將楊廷璋簡用著將此傳諭

楊應琚俾知朕意遇事益加奮勉用副倚任 直隸總督方

觀承察哈爾都統巴爾品奏商都達布遜諾爾太僕寺牧廠

內驢馬四千餘匹撥補直隸綠營缺額查綠營例馬多寡無

定應將各標營報例馬暫停買補每季底查明缺額實數彙

填印票行咨牧羣將現挑馬趕赴張家口外之波羅採吉由

張家口副將會同牧羣總管官驗交領回過關免稅應支乾

銀於接收日起支其價照滿椿馬匹除皮臟銀五錢每匹實

支銀八兩五錢開銷俟廠馬領抵完日各標營實補缺額照

舊例辦理報聞 庚辰諭前令各省保舉堪勝知府記名人

員朕量其人材較優者業已次第擢用所餘無幾著傳諭各

省督撫於所屬同知通判州縣內東公遴選保奏以備簡用

其有前次曾經保送記名而未經擢用者雖當引見時其人

未必遽見出色但人之才具不齊或非可一覽而盡在該督

撫等試看有年自必知之甚悉此內如有真知灼見信其可

勝知府之任者不妨仍列薦剡以副獎拔人才之意該部即

遵諭行 又諭曰阿克蘇阿奇木伯克散秩大臣色提巴勒

氏前隨將軍兆惠出兵曾經奮勇効力著加恩賞給公品級

實錄卷一百一

以示酬庸之典 又諭簡發滿洲蒙古人員補用綠營原以

騎射嫻熟俾為漢人表率以資訓導若將漢軍人員騎射生

疎者遣往徒貽譏誚豈能訓導人耶乃管旗大臣等不思造

就人才惟欲沽名市惠以漢軍參領等官奏請陞補綠營殊

屬不合著將主議之傅良弼伯俸三年以為沽名市惠者戒

查此事並非起自傅良前此八旗參領等即有懇求各該都

統為之陳奏者身為旗員希冀綠營得項微豐懇求大臣甚

屬無恥八旗漢軍參領等著停陞一年以為僥倖者戒其餘

扶同之大臣俱罰俸一年至廣成明知奏事並不等候委之

而去亦屬不合著罰俸半年將此通諭知之 又諭曰託恩

多之父色恒額年已九十著加恩令其在紫禁城騎馬 軍機大臣等議覆欽差副都統侍郎旌額理等奏稱羅克倫昌吉二處種地兵已陸續移駐其辦事官亦應遷移請將羅克倫巡檢移駐特訥格爾歸烏魯木齊同知管轄昌吉巡檢移駐呼圖畢歸昌吉通判管轄應如所奏辦理其巡檢圖記既經改設請令旌額理擬定字樣交禮部鑄給報聞 辛巳兵部議准湖南布政使來朝奏請酌裁可減之站船湖南紅宣船二十四隻應裁十二隻如遇差使繁多動僱雇用民船從之 壬午

上諸

實錄卷六九九

高

皇太后宮問安 幸瀛臺 諭嗣後泰本內道府州縣等官履歷夾片其有由缺改調某缺者俱於缺旁將缺之繁簡等字樣詳細註明 又諭曰瞻楚布多爾濟溥頤深為憫念著加恩派乾清門侍衛保寧看視成衮扎布齋茶酒賜奠並賞銀五百兩治喪 又諭刑部將由拉林告假來京之閑散三格赴屯與領催關保圖毆一案定擬具奏拉林阿勒楚喀派遣滿洲前往原令其耕種地畝永遠居住伊等初去時所有產業諒已變賣帶往安得復有餘剩其指稱辦理產業余掃墳墓告假來京者顯係不安本分之徒藉詞託故滿洲世僕無論派遣何處駐防即當在彼安居度日豈可藉端告假

實錄卷六九九

高

來京著將三格告假時給假之將軍副都統交部查議外併將各駐防給假之現在歷任將軍副都統等交部查議此後拉林阿勒楚喀等處駐防人等告假來京之處永遠禁止 是月湖南巡撫喬光烈奏遵旨查洞庭濱湖居民團築墾田湖地漸就堙鬱恐致水勢衝決除動帑築隄給民歲修之官團及報墾築隄無礙水道之民團外計私團七十七處其倚山傍岸障護城汛不礙水道者七處准其存留餘俱面諭各業戶利害俾開寬口聽水衝刷但恐日久漸弛應責成水利縣丞州判等不時巡查每年該管州縣巡查四次府二次道一次巡撫間年一次查明奏報如奸民再行私築嚴加治罪各官失察縱容分別查叅上司失察交部議處得旨甚好如議行 河南巡撫葉存仁奏偃師縣城北二瀧口匯聚山水水達洛河向築有隄山水暴漲漫隄為患又縣城東北湯旺溝上寬下窄又有低小石橋二座阻遏水勢山水發時漫浸城根應將城西城東溝身開寬丈餘石橋改高數尺以暢水勢併入洛河居民各願出力於明歲春和興舉報聞 陝甘總督楊應琚奏河州鎮屬舊洮營距鎮甚遠番族環列向設都司駐劄彈壓准用轅門鼓吹出入鳴砲乾隆二十三年山西撫臣塔永寧奏准遊擊以下不許僭用鼓吹該都司一體停止而該處番人漸生藐玩臨番重地體制宜崇凡駐劄

番境之營准其照舊鼓吹鳴礮從之 四川總督阿爾泰奏
查川東華陽仁壽彭山近山處隔河較遠者多墾荒地臣督
該縣開鑿引渠修築堰口土石各工止需開挖六千餘丈即
可引河灌田資州內江永川江河兩岸間有臨溜受衝處即
飭該州縣加工培築隄埝又川東界連黔楚咽喉匪出沒無時
即飭沿江文武各就水陸形勢設法查拏即以獲犯多寡分
別功過得旨一切可謂留心民計嘉悅覽之 又奏川江綿
亘數千里地險水急或頑石橫亘中流或石筍林立水底凡
商客及雲貴運解銅鉛江楚撥運官米船隻每值幫撥底動
輒覆溺查冬月水落灘石率多顯露飭沿江各屬將境內險
灘查明或應開寬或應鑿底設法籌辦乘水落石出時雇覓
夫匠將險灘怪石逐加錘鑿起除士民聞風趨事現在有方
興工者有將次完工者又飭各屬將急公紳士辦工較多者
詳請獎勵牧令辦有成效者並准記功得旨嘉獎 雲南巡
撫署貴州巡撫劉藻奏黔省鼓鑄銅劬向係威寧州承辦嗣
因移局加鑄每年採買滇銅四十餘萬觔又因滇省金銀廠
銅成分稍低適川省商銅正旺奏准採買川銅現在川銅來
黔日少價益加昂恐不能如數買足請仍照舊例採買滇銅
報聞

實錄卷六

其

大清高宗法天隆運至誠先覺體元立極敷文奮武孝慈神聖
純皇帝實錄卷之六百九十九

實錄卷六

其

大清高宗法天隆運至誠先覺體元立極敷文奮武孝慈神聖
純皇帝實錄卷之七百

乾隆二十八年癸未十二月癸未朔定邊左副將軍成衮扎
布等奏科布多修城前定於屯田之暇舉行茲據叅贊大臣
扎拉豐阿咨稱種地之綠旗兵四百名尚有餘力請酌派八
十名趕築委員監視等語原為約束兵民起見應如所咨辦
理從之 甲申

上御乾清門聽政 諭曰崔應階題審蘭山縣匪棍劉朝德等
糾黨結盟擾害地方一案稱係調任知縣沈玉琳訪聞查拏
該縣由蘭山調繁陽穀自屬能事之員即如查訪此案並見

實錄卷七百

一

其平日於地方事務俱能留心向來州縣官遇有此等匪徒
不但肯實心查辦惟恐一經發覺不能連結致干己之處
分且轉為之諱飾希圖容隱了事以致匪棍橫行其為害於
小民者甚大若悉能如該縣沈玉琳之辦理此案緝匪安良
自必人知畏法地方日以寧靖而吏治亦為整肅矣沈玉琳
著該部行文調取來京引見 又諭曰李侍堯奏審擬原任
總兵徐啟新借用民人趙溫銀兩給付千總安牌冒充頂帶
按律定擬完結一摺向來外省經制千把總之外另有外委
一項督撫提鎮等自行遴選並無定數易致名器濫觴是以
降旨令其減裁覈定報部存案以示節制其微末之員帽頂

實錄卷七百

一

金銀花素不分任意僭濫者復經飭議申禁所以重等威懲
詐偽者不啻至再至三今徐啟新一案以總兵大員受賄給
牌使平民假襲職官品服設令其人尚在朕必重治其罪今
趙溫等該督既盡法處治本案自無可置論然即此而推恐
各省體察不周或不無有陽奉陰違之弊若其他無職之人
又或取飾觀瞻忘分假借地方有司儻因其別無招搖撞騙
竇蹟一切姑息不問則惡習益難悔改其所關於朝章風教
者正復不小著通諭各該督撫等悉心訪察遇有此等情事
務即密究嚴懲俾不肖之徒知所儆惕 又諭督撫為封疆
表率地方遇有重要公務應親身前往董理者自不得簡出
養安坐乖職守前屢降諭旨甚明第大員所過之地有司皆
其本屬未免豫備館舍盤餐夫馬勞費日滋即經定制申禁
並督撫通飭裁減而陋習終難盡革朕意欲杜屬員等供應
之流弊仍當先清該督撫巡查之本源即如督撫辦公出省
輕騎減從固分所宜然惟攜帶幕友胥役及舊案卷箱二節
率視為途次必需之項以致與儔僚衛衛儲侍驛驛勢難抑制
職此之由殊不思其人既由數厯府階制撫千吏道自當明
練何至倚幕胥為行止竟至刻不可離且所巡歷不過為一
事而往豈有此一事該督撫尚不能辦而必資幕友必需通
省歷任之成例焉用如許車馬筐篋重煩牧令等疲于奔命

耶嗣後督撫等務須加意省約屏去繁文幕條中如所備一時急需繕摺之類許其酌帶一人自給資斧其緊要事件亦只自貯行笥不令屬邑供頓此外一切無益妄費概行刪除以免猾吏巧為逢迎及家人長隨借端勒索儻因防弊之故將來轉以慎重出巡託詞為下官惜費是又懲羹吹壺全不知事理之輕重豈朕委任督撫之意耶將此通諭知之○命大學士劉統勳兼翰林院掌院學士 乙酉諭曰蔡觀瀾係原任禮部侍郎蔡世遠幼子前經部議降調需次無期今伊胞兄兵部侍郎蔡長澐又已病故蔡觀瀾著加恩以刑部員外郎即用○蠲緩直隸延慶保安蔚州萬全宣化懷安西寧易州懷來龍門等十州縣電旱災飢民額賦并貸籽種 丙戌

旨錄恭摺

上詣

皇太后宮問安 幸瀛臺 吏部議准山東巡撫崔應階奏稱督糧道衙門倉大使一員並無專管之事應裁其德常二倉事請歸庫大使兼管換給鈐記從之 以故貝勒沙克都爾扎布子端多布多爾濟照例襲爵 丁亥蠲賑甘肅皋蘭撫彝張掖山丹莊浪武威永昌鎮番古浪中衛西寧碾伯等十二廳縣旱災飢民 戊子 孝惠章皇后忌辰遣官祭

孝東陵 吏部議准雲南按察使張達堯奏稱元江鎮沅鶴慶麗江順寧永北蒙化景東八府知府親轄地方與直隸州同除所屬各廳州縣審轉案件仍照定限扣算外其親轄地方審理案件應照州縣應得限審解不得照知府審轉各州縣案件限期扣展請通行直省凡知府直隸州承辦案件徑自解司者將應得嚴轉分限扣除如違叅處從之 豁除江西德化彭澤二縣坍廢田地四項七十八畝有奇額賦 己丑諭軍機大臣等據馮鈐奏東蘭州猺人糾眾劫殺拒捕傷人一案該撫已帶員親往查辦此等猺匪兇頑滋事自應嚴緝重懲以示儆戒但先經飭委之知府等督辦不前以致案犯稽延未獲該撫摺內何以並不查叅著傳諭馮鈐將現在前往所帶員弁是否幹練并有無酌帶兵丁及現在查辦情形若何猺匪曾否全獲之處一面即速奏聞並將此諭令蘇昌知之尋馮鈐奏慶遠府李振垣署東蘭州何炯副將西沖額守備鄭立遷督辦不前臣先尚望其奮勉救過擬於查辦完結日統覈辦理今日久尚無後效另摺奏至臣所帶遊擊五雲保素爾方阿通判金岳知縣舒啟尚屬幹練再帶兵一百七十名進抵大崗督緝已獲蒙二等十二犯餘犯竄匿現前抵各隘所住之磨洋三洞督飭查緝報聞 吏部議准江蘇按察使錢琦奏稱請嚴定處分一州縣胥役遇鼠牙細事

旨錄恭摺

探知兩造家道稍殷稟請給票官即以此賞差多致勒索滋事嗣後遇此等發覺者州縣官照故縱例革職道府直隸州失察知府直隸州降一級留任道罰俸一年又差票宜隨時繳銷如遇封印案未完結亦暫行繳銷俟開印差拘另給如違分別議處一佐雜例禁擅受民詞乃有陽避陰與授意書吏地棍架稱窩娼窩賭窩賊開列到官稱曰送訪滋弊無窮嗣後遇此等事印官查無實據者揭叅印官審出勾役棍陷害者將佐雜革職審出虛誣含糊代諱者將印官照徇庇例降調從之 刑部議奏直隸總督方觀承奏稱原任知州劉有餘杖斃灤州部四海該州王南珍查辦定擬具奏得旨劉有餘依擬應斬著監候秋後處決此案該州王南珍能秉公查辦殊屬可嘉著該部行文調取來京引見以為地方官實心任事不徇庇鄉紳者勸 命大學士劉統勳為尚書房總師傅 以故奉恩將軍永俊子春韶襲職 庚寅 上詣

實錄卷首

上

大高殿行禮 諭軍機大臣等前據海明等奏拏獲索倫逃兵額伊勒木保審擬治罪朕即降旨令將額伊勒木保訊明如果葉爾羌等處有伊繫戀之人事涉無恥應較尋常逃犯加倍治罪若係一時愚昧並無別故則照常例治罪今海明等仍將額伊勒木保照前擬絞監禁阿克蘇秋後處決辦理殊

不明晰或尚未接到朕旨亦未可知著傳謝海明等務遵前旨審出實情定擬具奏 兵部議奏嗣後揀發營衛官員該督撫委署試看如才具平庸尚無劣蹟未便即予叅處者該督撫出具考語咨部其或以原官選用或降等補用之處帶領引見候旨從之 旌表守正捐軀之安徽阜陽縣民申某女申氏 辛卯

上詣

皇太后宮問安 幸瀛臺 諭軍機大臣等據蘇昌奏安南夷匪剽掠捕魚寮民一摺欽州地方在在接壤安南所有行劫夷匪自應拏究以示懲創該督摺內所稱行文該國王速將

實錄卷首

下

盜匪拏究之處自應如此辦理至內地民人向例不得越境採捕今陳國監等輒於界外搭寮捕魚致被賊匪搶劫該地方官平日所司何事此案發覺時該督因何不即將約束不嚴之該管官一併叅奏著傳諭蘇昌即行據實奏聞 吏部議准雲南布政使永泰奏稱滇省經徵地丁錢糧自九月開徵至次年三月內一官徵收全完者請予議敘如在三月以後奏銷前完解者及督催之知府於所屬有一處遲延者均不准予議敘從之 又題大學士楊廷璋應授何殿閣兼何部尚書得旨楊廷璋著為體仁閣大學士兼兵部尚書 以故扎薩克頭等台吉噶布倫車凌旺扎勒孫索諾木旺扎勒

襲職 賑貸山東濟寧魚臺金鄉嘉祥城武鉅野濟寧衛臨清衛等八縣衛水災飢民 壬辰諭曰丑達現在命往庫倫辦事著賞給副都統職銜其天津總兵員缺已令存泰署理但丑達尚有應賠駝隻銀兩於伊養廉內坐扣所有天津總兵任內一切應得分例著存泰分給一半為丑達完公之用吏部議奏調任甘肅巡撫常鈞咨稱直隸階州西固地方距州甚遠文武生員多不安分應將訓導移駐西固大佛寺後院空房以資約束懇勸應如所咨從之 以大學士劉統勳充日講起居注官 予故大學士梁詩正祭葬如例謚文莊 豁除江蘇長洲嘉定寶山三縣坍廢田地六十九頃二

實錄卷七

十七畝有奇額賦 癸巳諭軍機大臣等成衮扎布等奏稱哈薩克巴勒圖比爾等因阿布賽令向烏梁海內大臣察達克講和并稱係貿易商人攜帶牛馬來至額爾齊斯地方已經察達克之子烏爾圖那遜盤詰逐回應請俟哈薩克人到京時降旨飭諭毋得擅入邊境等語哈薩克人貪鄙性成其屬下人眾聽其來往難免盜竊爭鬪之事成衮扎布等即行驅逐辦理甚妥著傳諭成衮扎布等嗣後再有貿易人來應交察達克圖布慎諭以內地商人俱在伊犁烏魯木齊爾等若欲貿易自可前往且此間並無管理貿易之員萬一滋生事端亦於爾等無益是以將軍等禁止貿易諭畢遣回並將

此交軍機大臣於哈薩克人到京時亦照此明白曉諭之予故河東河道總督張師載祭葬如例謚懿敬 甲午

上詣

皇太后宮問安 諭據輔德奏布政使富明安係伊同族例應迴避等語富明安久任司道應令出力報効著派往巴里坤辦理事務更換溫敏回京其江西布政使員缺著張逢堯補授 禮部議覆廣西左江鎮總兵蔡卜年奏稱總督巡閱按臨各鎮總兵迎送接見會典內並未開載請定儀注等語查總兵見總督與司道見總督儀同其總督按臨各鎮迎送接見照司道初見總督儀從之 豁除甘肅安定縣坍沒房租

實錄卷八

額徵銀六十兩五錢有奇 乙未諭據方觀承奏原任巡撫周人驥現在病故所有承修完縣城工銀兩除已辦工程及現存物料外家產不敷抵補應押令家屬到工督修完報等語周人驥既已病故其未竣城工銀兩著加恩寬免所有應行接修工程著該督即於直隸城工項內動用報銷 又諭聞國多歡兩耳重聽似此何能辦事國多歡回京調理俟愈後留京錄用其黑龍江將軍員缺著富僧阿調補所遺荆州將軍員缺著色克慎補授福州將軍員缺著明福調補其所遺廣州將軍員缺著楊寧補授 諭軍機大臣等阿思哈奏甘涼一帶山木出口之處請派員稽察一摺蓋為多留木植

蔭雪灌田起見所言殊切事理著將原摺鈔錄於該督楊應
琚奏事之便寄與閱看令其留心查辦以利農田 定陞用
漢典稽中書例吏部議奏漢典稽中書請於六年俸滿照漢
郎中陞用知府例按俸截取令大學士分別內用外用送部
帶領引見請旨記名以主事同知分別註冊統歸雙月照特
用人員例五缺後陞用一人從之 兵部議准調任甘肅巡
撫常鈞奏稱甘省前因軍務殷繁將驛站改移同知通判管
理請仍歸縣管紅城苦水二驛係平番縣地方靖邊大河二
驛係武威縣地方應歸各該縣管錢糧由縣支銷責令該府
覈辦從之 以左副都御史蔣楙為兵部右侍郎 以熱河

寶錄卷七

九

兵備道良卿為雲南按察使 以浙江衢州鎮總兵永泰為
直隸古北口提督雲南曲尋鎮總兵李時升為陝西固原提
督 丙申軍機大臣等議奏據巴祿奏稱莊浪派往伊犁兵
按三丁給車一輛一戶物件給車一輛由地方官及旗人等
備辦但伊犁路遠一過哈密即無地方官員須令總督由陝
西派員押送復按佐領派員分管又馬恐前後不接致有貽
誤處須豫定條例等語應如所請查烏魯木齊現有馬應令
巴祿等於兵過時將行遠疲乏者量予補換從之 吏部議
准湖北布政使柏琨奏請更正事宜一各官赴任文憑乾隆
七年部臣以繳憑遲延行令藩司齎送經原署廣西布政使

唐綏祖奏准封交撫臣轉發而楚省相沿藩司咨送嗣後請
由該藩司查明造冊聲明有無違限同文憑送撫覆覈咨部
一現在辦理捐免保舉執照應否繳銷例無明文未能盡一
請將此項執照於戶部行知後即行申繳督撫按季送部其
候補候選各員俟領憑赴任後隨將捐免保舉執照同原捐
各照并繳督撫彙送從之 兵部議准駐藏副都統富鼎泰
稱西藏三十九部番子頭目各分游牧頭目缺出西藏行文
西寧辦事大臣轉行報部給照徒勞驛站空缺久懸請將西
藏管轄之千戶百戶長缺出襲職等事即令駐藏大臣就近
查明咨部給照從之 山東巡撫崔應階疏報乾隆二十七

寶錄卷七

十

年新城維縣二縣墾水田地三十頃五十九畝有奇 旌表
守正捐軀之河南杞縣民劉二妮妻王氏 丁酉諭據託庸
秦亳州懷寧二城現在修竣將來如續有坍塌即照今次捐
修例聽民自為經理修補一摺其言雖為慎重工程起見但
此端一開有司奉行不善必致為閭閻苦累不可不防其漸
城垣所以衛民如遇應修之時士民中有急公任事出貲承
修者原有議敘之例以示鼓勵至現在完竣之處保固自在
工員與地方官使竟定為民修不惟在事者得以藉口且恐
不肖胥吏從中因緣苛派所關尤非淺鮮設現今修理之城
垣附近居民轉或有偷竊磚料作踐等情事自宜嚴禁犯者

治以應得之罪可耳何得竟定為閭閻認修之例致滋弊累耶託庸著飭行仍將此通諭各督撫知之 又諭曰健銳營前鋒富昆因將民人老兒扼吭斃命該管大臣等解送刑部由刑部審訊定罪繕摺具奏健銳營為操演之營數年以來戎行効力朕錄用多人一切施恩之處較他處加重伊等理宜感戴朕恩循分安居乃至酣飲無節將幼童扼吭斃命甚屬不堪此皆由該管翼長章京等平日約束不嚴所致該管大臣等理宜將富昆嚴審治罪示戒於眾將該翼長章京等參奏議處乃視若尋常案件送交刑部甚屬不合著將該翼長等俱交部嚴加議處其該管大臣等亦著交部查議富昆

實錄恭錄

著交該大臣嚴行夾訊定擬具奏 諭軍機大臣等莊有恭奏酌籌蘇松太三屬水利疏濬事宜一摺所奏殊未明晰而於辦理之法亦未為妥協地方應辦工程既經動帑興修即應派委幹員實心經理若以官修之項轉假手於鄉紳不獨勢有難行又安保無不肖侵漁之事若謂此種工程原為士民生計而起鄉紳等俱踴躍出貲自効則應量其工段分別酌予議敘以示獎勵又不應有支款扣還之事即云現在工程大者已取給於官其餘不得不兼資民力然摺內所支已有十八萬餘兩其餘即須增用亦不過正項中十分之一二何必更藉士民輸効以啟無窮弊端乎至於按田起夫其說

更不可行各省大小工程聽無業貧民赴工食力自於官私兩有裨益若定為按畝撥夫則吏胥保長之高下其中科派累民何所不可豈國家為民興利除弊之意著傳諭莊有恭將該處實在籌辦緣由詳悉具摺奏聞 戶部議准直隸總督方觀承奏稱樂亭縣新橋海口稅銀春夏秋由榛子鎮巡檢徵收冬季由典史徵收實不畫一請改歸該縣徵收又出入捕魚船隻向係巡檢稽查榛子鎮距新橋二百里縣治距新橋二十里請即責成該縣稽查從之 兵部議准山海關副都統富當阿奏稱山海關喜峰口永平府玉田縣三河縣等處驍騎校缺出向由各本處於本旗一二名領催內揀選甚難得人請照補放防守尉佐領防禦例由各處本旗委署驍騎校前鋒領催內揀補從之

實錄恭錄

大清高宗法天隆運至誠先覺體元立極敷文奮武孝慈神聖
純皇帝實錄卷之七百

實錄卷之七百

二

大清高宗法天隆運至誠先覺體元立極敷文奮武孝慈神聖
純皇帝實錄卷之七百一

乾隆二十八年癸未十二月戊戌諭曰崔應階奏請挑荆山
橋舊河一摺所見甚是東省南陽昭陽徽山等湖滙為巨浸
每遇水漲之時窪地常遭漫淹濟寧魚臺二屬適當下游之
衝田廬所關綦重前曾特派欽差同地方大員辦理朕上次
南巡復經親臨閱視面諭河督諸臣隨宜設法籌辦但橋畔
河淤日增日積非大加興挑何以去沮洳而資利導著派協
辦大學士公兆惠於明歲初春馳驛前往會同尹繼善葉存
仁崔應階相度會議奏請興工崔應階已於摺內批示不必

實錄卷之七百一

一

來京陛見尹繼善亦著於新正計量日期前赴荆山橋俟兆
惠到日熟籌妥辦又諭琉球國疏請購買絲舳部臣議駁
自屬遵循例禁第念該國為海濱遠藩織紉無資不足以供
章服據奏情詞懇切著加恩照喫咕喇國例准其歲買土絲
五千舳二蠶湖絲三千舳用示嘉惠外洋至意餘悉飭禁如
舊所有稽察各關口岸及出入地方仍加意覈查以杜影射
諭軍機大臣等戶部議覆薩哈岱奏請起解許墅關稅添
平一摺薩哈岱則以加平二十七兩五錢之項係久定章程
如同正項必於此外每兩添平一分方與庫平相準部議則
以銀庫原定加平二十七兩五錢即係按市平加至庫平之

數已敷添辦不便於例外議增各執一說其中委曲尚未甚明晰銀庫原定添平之項即係按市平加算起解時如果足數彈允何至尚有不敷但該關向來行用市平究與庫平輕重若干其於徵收稅銀秤兌是否毫厘不爽俱難懸定其餘雜項飯食概請加平之處果否實在情形著傳諭尹繼善逐一確查據實詳悉具奏軍機大臣等議奏據吉泰奏稱請將太僕寺兩翼由軍營撤回護軍二百一十三名護軍校八員等俟牧丁額缺出後陸續充補即可陸續裁減等語應如所奏辦理從之吏部議准浙江巡撫熊學鵬奏稱寧海縣亭旁地方現係縣丞駐劄離縣甚遠民情刁悍山徑險阻又

軍機處

一

南界臨海亂山遇有緝拏越界躲避輾轉關移動需時日請將台州府同知移駐亭旁以便緝拏其縣丞應回駐縣城從之兵部議准廣西左江鎮總兵蔡卜年奏稱各協營調集汛兵至該營駐劄城內操演兵離汛守必疎巡哨概不調驗恐荒技藝請嗣後欽差督撫提鎮巡閱營伍其經過塘汛使道閱驗無庸調集該營駐劄處合標其偏僻汛兵在十名上者調驗一半留一半防守不足十名者無庸調集該巡閱大臣委員驗詳查驗不實者叅處從之予故大學士蔣溥入祀江蘇鄉賢祠從巡撫莊有恭請也以故二等男賽桑阿叔噶魯第白寧弟白忠三等男松祿族兄蘇爾泰松齡于水

泰各襲爵以故奉恩將軍舒明子忠靈佛爾恒額弟蒙格圖薩穆達子素松額各襲職旌表守正捐軀之河南沈邱縣民張廷臣女張氏已亥

上詣

皇太后宮問安御乾清門聽政諭曰兩江總督尹繼善等合辭具奏請於乾隆乙酉年再舉南巡之典以慰臣民仰望一摺朕惟江浙地廣民殷一切吏治農功均關要計且襟江帶河濱湖近海之區籌畫澤國田廬無一不重繫宵旰前以壬午歲恭奉

安輿時巡周覽凡淮河水誌節宣牘壩啟閉以及杭屬塘工勘

軍機處

三

建柴石料段諸事宜曾與封疆大吏目擊手畫以期利濟羣生年來疊經督撫等疏報下河郡邑汎水恬流並無漫溢惟是浙中海潮漲沙雖有起機大溜尚未趨赴中壘是深所慮念而新修柴石諸塘亦當親閱其工以便隨時指示又近日特遣大臣督修水利如濉河荆山橋等處亦為數省灌輸喫緊關鍵所以驗前功而程後効正惟其時刻東南歲事預告豐登洪惟

聖母皇太后福履康寧彌臻純嘏於是承

歡行慶答士民望幸之忱稽典實為允協著照所請准於乙酉之春諏吉南巡其河工海塘應親臨省視者即行先期豫備

至前次燈綵繁文暨危從人員催覓巨冊並發占公館諸禁已屢頒諭旨即朕所過行宮道路距上屆為日匪遙祇須灑掃潔蠲足供頌總不得稍事增華勞費副朕仰承

慈豫俯順輿情之至意將此通諭各該衙門知之巴里坤辦事原任巡撫鍾音等奏巴里坤臺站由洮泰站起至那呼站止相隔一百四五十里因俱係戈壁並無水泉故未設立腰站今委員踏看掘出井水二處請即於井旁各蓋房三間從別站內通融派兵四名馬八匹分交二處作為腰站應付馳遞事件報聞以順天府府尹羅源漢為左副都御史以正紅旗滿洲副都統阿永阿鑲藍旗滿洲副都統集福對調

實錄卷七百一

以山西平陽協副將拜陵阿為浙江衢州鎮總兵廣西平樂協副將李雲標為雲南曲靖鎮總兵旌表守正捐軀之江蘇元和縣民高某妻杜氏庚子諭軍機大臣等據總兵吳應銓奏在滿城縣方順橋地方遺失硃批奏摺已報明地方官並呈報該督吳達善移咨直隸總督飭查等語該鎮既有遺失奏摺曾經報明地方官何以不即查獲該督亦何以並不奏聞著將此傳旨詢問方觀承令其查明具奏禮部奏休致左都御史梅穀成病故係奉旨休致之員例不請卹查該員休致後奉恩賞給全俸可否照原銜依一品例諭祭葬並應否與謚又遺疏請入籍江寧應否准其入籍得旨著

照原銜給與祭葬仍著與謚准其入籍江寧予祭葬謚文穆辛丑諭從前外任道府以下各官由京赴任加恩借給養廉以資路費原屬體卹伊等俾免重利揭借之累嗣因伊等竟有既借官項仍復揭借多金致市僧隨任索取遂登叅牘者是以部議停止今思外任人員得缺之始資斧維艱轉令壟斷之徒以官項既停乘間居奇行李益致拮据是豫借養廉一事本屬善政為一二不自愛惜之員輒行中止未免因噎廢食嗣後仍著加恩准其借給但赴任人員內情形各有不同從前一概准借並無區別現在應作何分晰妥辦及扣還時遇有無著人員應作何通融還項之處著該部詳定

實錄卷七百一

章程妥議具奏尋議酌借銀數扣還限期著追攤扣俱照原例外其捐班有力者不准借支丁憂終養告病起復降調前任借款扣抵未完應將未完項截算借支全未扣繳者不准續借已經借支之告病降補一年外不領文赴補者及終養丁憂養親事畢服闋後一年不領文赴補者該旗籍勒限著追陞調丁憂起復叅休告病未扣養廉病故實在無著者於原任地方攤扣從之諭軍機大臣等陳宏謀奏河工辦料責成道員稽覈及酌改叅遊並不分賠之例一摺前據高晉以河工料物繁多請定廳營互相稽察之處分議定分轄各道專司覈報曾經降旨先行第管河各道往往不能實力逐

處親驗或但委員代查據文率報徒成具文安保廳營互結之中必無朋比分肥之事又河防遇有失事仍應文武分賠而參遊同有修防之責搶護則獨邀議敘遇事則並不分賠於情理亦未允協著將陳宏謀此摺抄寄該督等令其閱看悉心妥議具奏尋直隸總督方觀承奏直隸河工原係各該道查辦但向不具結嗣後各該道查驗後具結詳報結報不實參處惟河營武弁並未設有參遊設失事應文武分賠處俱遵例辦理報聞兩江總督尹繼善江南河道總督高晉奏河工各該道查驗結報法極周詳惟河工分賠例定於雍正五年河工參遊係雍正六年添設是以原例未及沿河府州

實錄卷一百一

縣亦有防守之責請嗣後隄岸在保固限外衝決照例准銷十分之六餘四股該道府參遊廳營府州縣汛員攤賠河東河道總督葉存仁奏河工辦料做工責成該管河道親查結報立法更周如道不實力查驗請照徇庇例議處再豫東黃運兩河僅設守備千把並無參遊其失事派令分賠處無庸議均得旨如所議行又諭直隸向來各處城工有廢員出資承修並地方官自行動支罰項及撥解別省多餘之款交令應用者歷年僅有奏報興修並聲明完工之摺而報銷數實並無專業其中工節贏絀若何與開除實存確數均無從稽覈此項工款即或不行報部亦當報明軍機處查辦且如

辦理行宮等事本應取給於此而每稱出自養廉之餘伊等應得養廉亦需留以自給何不即於此項庫貯內酌量協濟即如景州現有應修行宮亦當畫一妥辦俾地方官不得藉口濟私而庫貯亦歸明晰著傳諭該督將該省辦理城工等項每年動存各款並現今實在各數詳悉奏聞如有不敷自當酌項發給嗣後每年應如何專摺彙奏以憑檢覈之處著一併酌議具奏吏部議准戶部侍郎兼管順天府府尹錢汝誠奏稱嗣後考職就職議敘及書吏年滿候選人員有籍隸大宛二縣及順天府屬各州縣不准由該地方官呈請更改姓名籍貫並取印結赴部呈請之處一概停止倘有寄籍

實錄卷一百一

改歸及出繼歸宗名同祖諱為詞混請改易者該地方官確查有假冒情弊按律治罪從之以吏部尚書陳宏謀允經筵講官以服闋禮部侍郎呂熾為左副都御史壬寅諭寧郡王弘皎既經患病朝期俱不能到著停其食俸其本年朝期不到二十五次之德瑾著革去輔國公陪祀四次不到之永順承德僧圖俱著交部察議諭軍機大臣等據納世通等奏稱道員周世衡在哈什噶爾辦事奮勉實屬稱職應請旨交部議敘等語周世衡實心辦事殊為可嘉著加恩交部議敘又諭曰旋額理等奏稱發遣烏魯木齊屯田有罪兵丁綽勒們等一百九十一名自到烏魯木齊後各奮勉耕

種甚屬安分請入於攜眷駐防之綠旗兵內俟內地各營缺出陸續坐補等語著照所請交楊應琚俟各營有缺額兵丁即令綽勒們等坐補俾得自新以觀後效 癸卯

上詣

皇太后宮問安 諭據阿桂成衮扎布將丹拜構陷朋素克一案審明具奏丹拜父色凌旺布身故後伊叔色布騰旺布謂伊非伊父之子却為屬人朕特恩查出授為扎薩克賞給公爵丹拜宜感戴朕恩循分守職且屢為人控告朕皆寬貸今復因與朋素克不睦遂唆伊屬下喇布珠爾捏稱朋素克私縱逃犯倫都克憑空構陷此事若實朋素克即當正法今既

實錄卷一百一

係丹拜捏誣自當反坐姑念愚頑蒙古朕不忍即行正法今阿桂既派人解京丹拜到時著在京監禁丹拜屬下蒙古等著移於科布多居住隸駐劄大臣管轄其屬下烏梁海等著交車布登扎布車木楚克扎布管轄與別烏梁海一體交納賦稅其移往及交納賦稅之處著成衮扎布等酌定辦理 乙巳伊犁將軍明瑞等奏臣等籌辦塔爾巴哈台駐兵之事於古爾班喀喇烏蘇地方立木為築城記號原議週圍安二十一卡每卡派兵二十五名但此卡座與哈薩克交界甚近而去伊犁雅爾河二處近者二三百里遠者千里有鞭長莫及之勢請停止週圍安卡之議惟令屯田兵俱駐劄雅爾城

再留馬兵三百名在城照管貿易餘兵即交領隊大臣裹帶口糧於週圍地方從容巡查方為有益至雅爾城既經駐兵與伊犁往返文移必設臺站請自額敏河沿至巴爾楚克沁達蘭三處每處駐兵三十名設大卡三座其庫克托木嶺等處下座或酌設或照舊兵俱於近地輪班派出則塔爾巴哈台週圍聲勢相接而哈薩克懼我軍威自不敢潛來游牧至所需兵請派京兵黑龍江兵或盛京兵前來駐防駐劄三年至換班時即可就近選派停止內地發往再現今烏魯木齊駐兵較多於巴里坤請將烏魯木齊巴里坤辦事大臣撤回其巴里坤提督移駐烏魯木齊烏魯木齊總兵移駐巴里坤

實錄卷一百一

至從前所放卡座侍衛十一員仍舊遣回分伊犁塔爾巴哈台駐劄得旨軍機大臣議奏尋議奏塔爾巴哈台與伊犁相接若不築城駐兵設卡巡查游牧則西北兩路聲勢不能聯屬今明瑞等相度形勢繪圖具奏其築城及設卡處俱合機宜應如所奏辦理至雅爾地方明年築城則塔爾巴哈台後年即需駐兵其時挈眷移駐伊犁之滿洲索倫察哈爾兵尚未全到若自京城黑龍江等處再行派往未免繁瑣應將築城事務改於三十年辦起俟三十一年移駐伊犁之兵到齊再照原議酌選精壯令駐塔爾巴哈台如移駐伊犁之兵不足自應將內地兵酌量派往查熱河有達什達瓦部厄魯特

兵六百名應派出五百名喀喇河屯有滿洲蒙古兵二千名應派出一千名又盛京有錫伯兵四五千名應派出一千名俱於明春學春遣往伊犁再塔爾巴哈台駐兵後哈薩克不至烏魯木齊貿易明瑞等所請撤回大臣改駐提督總兵及分派侍衛之處事勢俱屬可行應令與楊應琚等公同酌辦得旨雅爾地方築城駐兵應專派大臣鎮守伊犁所有將軍大臣甚少既令巴里坤提督移駐烏魯木齊即將烏魯木齊大臣移駐雅爾巴里坤既改駐總兵則巴里坤大臣可以全行撤去至出派熱河兵時所有樺榆溝駐兵二百名盡行派往再於喀喇河屯兵內揀派八百名餘依議行○丙午諭軍

實錄卷三十一

機大臣等明瑞等奏稱哈薩克阿布勒比斯等遣使策伯克等七人隨後五名已派三等侍衛拉布棟阿等伴送來京等語著傳諭拉布棟阿帶領來使能於明年正月十五日以前到京甚好遲則十九日亦可若二十五日以前不能到來即具摺奏聞亦不可令來使中途過於勞苦將此並寄知駐劄烏魯木齊哈密大臣等如來使馬匹疲乏酌量更換俾得行走迅速早抵京師○丁未

孝莊文皇后忌辰遣官祭

昭西陵

上詣

皇太后宮問安○諭軍機大臣等陳宏謀奏地方辦理匿名揭帖一摺所見殊切事理向來督撫遇有匿名告官之案立將該犯嚴密抵法其所告事款不即深究原屬懲儆刁頑之意但其中或係地方官實有干犯劣蹟若因此一概置之不問將不肖之員轉得恃揭告為護符是所謂知其一不知其二非大中正之道著將原摺俟各督撫奏事之便鈔寄閱看嗣後遇有此等案件先將該犯盡法懲儆外再將所告款內有無虛實另行嚴查按究庶宵小既不得逞其奸而庸劣有司亦得知所警懼矣○命副都統綽克托馳赴烏魯木齊辦事更換旌額理回京○戊申

實錄卷三十一

上以歲暮禱祭

太廟是日起齋戒三日○己酉定俞葵私罪革職不准承襲恩騎尉例諭恩騎尉一官襲次已盡朕念其祖父効力戎行特恩賞給者承襲人等果能感恩報効病故後仍應承襲若係本身褫革者即不宜承襲屢降諭旨今知府雲基虧空稅銀該旗猶進呈家譜請襲殊屬不合著詢該旗大臣等令將伊等作如何辦理處具奏嗣後承襲恩騎尉人等病故及因公獲罪革職者仍准承襲若貪婪獲罪及私罪革職者俱不准承襲著為例○又諭曰知府雲基書敏俱係滿洲奴僕雲基管蒙關稅務侵蝕稅銀而書敏又向雲基訛索銀數十兩入

已甚為可惡。二人居官年久，均係開泰在任時保薦管理關務。今查抄實基書敏家產，不敷賠補，侵蝕銀兩，應將開泰家產查明，令其代賠。著該旗都統等將開泰家產查察，以山東登州鎮總兵特克慎為拉林副都統。庚戌以歲暮，給祭遣官祭。

太廟中殿

後殿。諭軍機大臣等：戶部議覆李質穎奏商人范天錫酌退新野等引窩一摺，應交與該撫和其衷會同確查定議。已降旨依議。李質穎此奏，如果因范天錫實在無力兼顧，恐致貽誤引課，為此調劑分認之法，自於河東鹽務有益。若以新野

貴錄卷一百一

等五處積引難銷，不無賠墊。該鹽政意在優待范天錫，因欲責辦於殷商，則是所留善地，仍歸范商而薄瘠引窩，又誰當偏受其累？於情理豈能平允？著傳諭和其衷將此中前後實在情節，悉心確查，據實奏聞。又諭據高誠奏長蘆商人朱立基虧欠帑項銀二十五萬餘兩，伊有胞弟朱蔚現任江淮衛千總，差人送到銀五百兩，恐有隱匿寄頓情事。又有胞弟朱崙現任雲南撫標中軍參將，亦恐不無隱匿寄伊等兄弟現今並未分居，請將各任所管財一併封估解抵等語。著傳諭楊錫紱、吳達善即將朱蔚、朱崙各任所管財嚴密查封，無使稍有隱匿寄頓。軍機大臣等議奏據達桑阿奏請由駐劄

哈喇沙爾所屬哈布齊海烏拉斯圖二處卡座之庫爾勒布回子六十名內，每處抽十五名，令駐特伯爾古察罕通格等卡等語。前平定準噶爾等處因各處有逃匿之瑪哈沁，故於近界山谷安卡。今厄魯特地方悉行平定，自哈密至喀什噶爾等處皆係內地，而伊犁大兵又將山谷藏匿之瑪哈沁悉行清搜，其哈喇沙爾地方在庫車內無庸防範，請飭回疆大臣等祇留布魯特、安集延等卡外，其哈喇沙爾諸卡俱撤兵丁，各回原營本城駐劄，從之。辛亥，給祭。

太廟

上親詣行禮。遣官祭。

貴錄卷一百一

三

永陵。福陵。昭陵。昭西陵。孝陵。孝東陵。景陵。泰陵。遣官祭。孝賢皇后陵。端慧皇太子園寢。遣官祭。

太歲之神 以浙江瑞安協副將李忠為山東登州鎮總兵
士子

上詣

皇太后宮問安 御保和殿筵宴朝正外藩左翼科爾沁和碩
親王固倫額駙色布騰巴勒珠爾多羅郡王和碩額駙齊默
特多爾濟多羅畢里克圖郡王喇特納扎木素固山貝子多
羅額駙班珠爾輔國公和碩額駙喇錫納木扎勒輔國公喇
錫色旺輔國公哈達和碩額駙敏珠爾多爾濟一等台吉喇
特納二等台吉班珠爾三等台吉濟克濟扎布烏珠穆沁和
碩車臣親王朋素克喇布坦喀喇沁多羅都統郡王喇特納
錫第固山貝子多羅額駙瑚圖靈阿固山貝子多羅額駙扎
拉豐阿鎮國公丹贊達爾扎教漢多羅郡王喇錫喇布坦輔
國公固山額駙羅布藏錫喇布固山額駙旺扎勒扎魯特多
羅達爾漢貝勒阿第沙鎮國公納遜額爾克圖喀爾喀多羅
達爾漢貝勒拉旺多爾濟阿魯科爾沁多羅貝勒達克丹翁
牛特固山貝子巴爾丹巴林輔國公和碩額駙德勒克多羅
額駙丹津土默特和碩額駙納遜特古斯郭爾羅斯固山額
駙索瑪第奈曼固山額駙敦多布右翼喀爾喀和碩親王齊
巴克雅喇木丕勒多羅貝勒衮布多爾濟固山貝子敦多布
多爾濟固山貝子車布騰多爾濟貝子品級扎薩克台吉齊

御錄卷一百一

五

御錄卷一百一

五

旺多爾濟輔國公佛保輔國公策靈多約特扎薩克一等台
吉噶爾瑪扎布扎薩克一等台吉策當敦多布扎薩克一等
台吉車登阿巴噶多羅卓哩克圖郡王車凌旺布青海多羅
郡王色布騰多爾濟固山貝子納木扎勒策靈扎薩克一等
台吉納木錫哩策旺綽羅斯多羅郡王羅布扎回子郡王品
級貝勒霍集斯輔國公和什克輔國公額色尹輔國公圖爾
都扎薩克一等台吉瑪穆特蘇尼特輔國公羅壘歸化城土
默特輔國公喇嘛扎布和碩特輔國公色布騰扎薩克一等
台吉特默齊及大學士領侍衛內大臣等宴召科爾沁和碩
親王固倫額駙色布騰巴勒珠爾多羅郡王和碩額駙齊默
特多爾濟多羅畢里克圖郡王喇特納扎木素烏珠穆沁和
碩車臣親王朋素克喇布坦喀喇沁多羅都統郡王喇特納
錫第固山貝子多羅額駙瑚圖靈阿固山貝子多羅額駙扎
拉豐阿教漢多羅郡王喇錫喇布坦輔國公固山額駙羅布
藏錫喇布巴林輔國公和碩額駙德勒克喀爾喀和碩親王
齊巴克雅喇木丕勒阿巴噶多羅卓哩克圖郡王車凌旺布
青海多羅郡王色布騰多爾濟回子郡王品級貝勒霍集斯
輔國公和什克輔國公圖爾都等至
御座前賜酒成禮○是月四川總督阿爾泰奏成都等府於每
年稻收後接種豆麥菜子俗名小春收後仍可種稻惟重慶

夔州止知種稻臣飭各州縣諭農亦於收稻後接種麥豆成都潼川順慶多係土山尚可開墾飭州縣招民認墾酌借貧民社穀為墾耕資南充縣有旱地數千畝小山坡外有山泉順坡下注飭縣督民於山坡開鑿溝槽引泉注地以資種稻成都煤炭遠由嘉定運售脚重價昂飭近省州縣查尋煤線酌無礙處開井崇慶灌縣現在試採產煤甚旺再拏獲囑匪嚴治外其無業游惰勢必為匪者飭州縣發交地保酌借社穀令於山頭地角自行墾種得旨一切留心民生要計嘉悅覽之兩廣總督蘇昌奏粵東社穀出自士民捐輸前撫臣託恩多議將餘息穀數變價解繳存貯以備賑卹經部議准

實錄卷三百

六

但民捐之穀應聽民便且價賤糶出價貴糶入穀數反減而赴司領銀赴市買穀民多未便請仍將息穀併貯各州縣免其變價解繳得旨著照所請是年追予準噶爾出師陣亡之副將滿保一員守備楊朝柱一員千總賈天印一員把總呂登魁等二員外委王正邦一員馬步兵朱威武等一百二十一名卹賞俱入祀昭忠祠旌表孝子江蘇等省江國正等十四名守節合例八旗滿洲樂米妻黃佳氏等七十八口蒙古明中妻裴氏等二十三口漢軍線承杰妻白氏等二十九口盛京等處駐防和爾納妻瓜爾佳氏等五十七口直隸等省武生周瓊妻王氏等七百十六口夫亡殉節江蘇等省

單世鎬妻李氏等九口未婚守志直隸等省王元仲聘妻吳氏等二十口百歲壽民婦直隸等省王洪恩等五十四名口各給銀建坊如例一產三男直隸等省張得環等十家會計天下民穀數各省通共大小男婦二萬四百二十萬九千八百二十八名口各省通共存倉米穀三千四百四萬三千六百一十二石一升五合八勺

實錄卷三百

上

大清高宗法天隆運至誠先覺體元立極敷文奮武孝慈神聖純皇帝實錄卷之七百一

大清高宗法天隆運至誠先覺體元立極敦文奮武孝慈神聖純皇帝實錄卷之七百二

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲將軍都統功加七級隨帶加一級尋常加二級軍功紀錄一次臣廣柱

總纂官經筵講官太子太傅文學士文淵閣領閣事稽察欽奉 上諭事件處管理刑部戶部三庫事務

世襲將軍都統功加十九級隨帶加二級又加二級臣董路內大臣戶部尚書鑲藍旗滿洲都統功加五級

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆二十九年甲申春正月癸丑朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○甲

寅

上御紫光閣賜蒙古王貝勒貝子公台吉及回部郡王霍集斯等年班回部和闐公品級三品阿奇木伯克阿克伯克阿什默特等十七人博羅爾沙呼沙默特使人呼達瑪瑪特等宴○召大學士及內廷翰林等茶宴以冰嬉聯句○諭上年東省秋收俱屬豐稔惟濟寧等七州縣衛自六七月間河湖並漲低窪地畝間有被淹雖經加恩撫賑第時當春月例

賑將停而東作方興麥秋尚遠農民生計仍恐未免拮据著再加恩將濟寧魚臺金鄉城武鉅野濟寧衛臨清衛等七州縣衛成災地方無論極次貧民俱各展賑一個月該撫董率有司實心經理用副朕體恤貧黎有加無已至意該部遵諭速行○又諭甘省皋蘭等屬上年夏秋俱有偏災較重之處雖經該督撫等照例撫賑災黎自可不致失所第念該省土瘠民貧生計維艱時屆春和若使饔飧

不繼。何以課其盡力田疇。著再加恩。將夏秋兩次被災之永昌。西寧。碾伯。三縣。無論極次貧民。俱各展賑兩個月。其夏未被旱之臯蘭縣。並所屬之紅水。張掖縣。並所屬之東樂。以及撫彝廳。山丹。莊浪廳。武威。鎮番。古浪。平番。中衛。秋未被災之狄道。河州。靖遠。平涼。華亭。固原。隆德。鹽茶廳。擺羊。戎廳等。十九廳州縣。無論極次貧民。俱各展賑一個月。以資接濟。該督撫等。董率屬員。妥協經理。務俾災黎均霑實惠。副朕愛養黎元至意。該部遵諭速行。○又諭。據嵩椿奏。由西安移駐涼州。莊浪。滿兵。於本年正月十八日起。作二起。分日起程等語。昨據軍機大臣議。覆涼州。莊浪。移駐伊犁第一起兵。於本年春季前往。彼處遺有空屋。俟熱河。攜眷兵到時。暫行歇住。所有由西安遣往涼州。莊浪兵。亦暫停撥派。嵩椿想未接到此文。故已定期遣往。著即傳諭嵩椿。此時如業經全行起程。則已。否則暫行停止。仍

照軍機大臣原議辦理。○乙卯立春。順天府進土牛春山寶座。○丙辰。

上奉

皇太后幸重華宮侍宴。○諭軍機大臣等。巡視東漕御史德成。請挑運河摺內。據稱崔應階咨有。形勢不甚相宜。徒費帑金。民夫未必有濟等語。在德成新莅漕差。亟籌經理運道。亦分所應爾。但崔應階在東省年久。見聞當必更稔。現命兆惠等會同該督撫。勘辦荆山橋工。將此旨一併傳諭。令其順便悉心相度。會同妥議具奏。並將此旨即趕寄塗次。先令兆惠知之。○兩廣總督蘇昌奏。粵東社倉溢額息穀。請留各該州縣備賑。免其變價解繳。得旨。著照所請行。○封喀爾喀親王成衮扎布子額駙拉旺多爾濟為世子。○丁巳。

上詣

雍和宮行禮。○諭。去年直屬通州等十三州縣內。間有蝗蝻生發。當經降旨。將上年應徵錢

糧俱緩至本年麥熟後徵收。第念該州縣等雖勘不成災。而秋收究屬歉薄。惟望麥秋以資接濟。遽令新舊並輸。民食仍恐未能充裕。著再加恩。將通州。三河。固安。霸州。文安。大城。清苑。安肅。天津。靜海。滄州。青縣。交河等十三州縣。所有二十八年分應徵錢糧。俱緩至本年秋成後徵收。以紓民力。該部遵諭速行。○諭軍機大臣等。據方觀承奏。上年十二月二十六日。有湖南巡撫齋摺把總臧必貴。乘夜由定興至涿州。遺失摺匣。現在加緊查訪等語。該撫所奏事件。是否有關緊要。著傳諭喬光烈。即行另繕補奏。○河東河道總督葉存仁。山東巡撫崔應階奏。前巡漕御史德成請挑深運河。疏濬新店以下運河西岸民田積水。奉旨令臣等妥酌辦理。查近年運道。原屬深通。若將河底挑深。即多建涵洞。挑挖溝槽。引流入運。而所出之水。仍受韓莊滾壩。及湖口閘之水。橫截其流。且俱在八閘之內。層層

約束。以數百里湖面。僅恃涵洞宣洩。已屬來源盛而去路微。以運河十數丈之水面。又受制於僅寬二丈之八閘。更屬束其咽喉。勢必不能暢達。且新店至臺莊。河長三百餘里。計挑土數百餘萬方。事繁費重。竣工必須三月之久。即恐有誤漕運。臣等悉心籌議。荆山橋挑深之後。湖水自可掣消。濟魚窪地積水。亦自涸出。竟無庸加挑運河。得旨。昨德成摺奏。已交兆惠及爾等妥議。看來爾等所言是。將

此摺亦與兆惠看矣。○戊午。享

太廟。遣誠親王允祕恭代行禮。○遣官祭

太歲之神。○是日起

上以祈穀於

上帝。齋戒三日。○己未

世祖章皇帝忌辰。遣官祭

孝陵。○葉爾羌辦事副都統額爾景額等奏。葉

爾羌和闐。供用伊犁棉花布疋。例由二城回人餘糧折收。今布疋將次運送如數。其棉花

祇歲需數千觔。而二城回人納糧。僅敷官兵一年之用。遇歉即有不繼。請將二城餘糧。除折收伊犁需用棉花三千觔外。其餘仍納本色貯倉。俟伊犁需用棉多。再行折收。得旨。如所請行。○以候補三品京堂寶光。為順天府府尹。○庚申。

上詣

南郊齋宮齋宿。○辛酉。祈穀於

上帝。

上親詣行禮。○詣

皇太后宮問安。○壬戌。

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○兩廣總督蘇昌奏

廣西義寧一協。設有左右兩營馬步兵一千。

分駐龍勝。廣南等處。自乾隆十九年。經前任

督臣楊應琚奏准。每年秋成後。借龍勝通判

衙門領貯月餉銀五百兩。委員赴隣境融懷。長安等處。買米運回。俟次年青黃不接時。供支兵眷口食。惟十載以來。有眷之兵。生齒日繁。所買米仍多不敷。請再於月餉銀內。加借銀二百兩。多購米石。一併於各兵月餉內。扣還歸款。得旨。如所請行。○癸亥。河東河道總督葉存仁奏。運河廳屬鉅嘉汎內。觀音嘴對岸東隄。外臨蜀湖。內逼運河。形勢彎曲。頗稱險要。隄工日覺卑殘。應順勢加築直隄六十餘丈。現在運河西岸灘嘴。已興工挑挖。即以切灘之土。就近擡築直隄。另募人夫。分礮以期堅固。報聞。○甲子。諭軍機大臣等。李星垣奏。東蘭州屬徭人蒙蓬等。糾眾刦殺一事。現已派撥標營弁兵。兼程前進。會同道府相機辦理。並稱病體稍愈。聽候撫提指示。即可親往等語。此案先於上年該撫奏到。即降旨令將督辦不前之知府等查叅。昨又據該撫摺奏。辦理緣由時。尚未奉到前旨。今李星垣此

奏。或因該撫已經具奏於前。因以一奏塞責。未免意存取巧。其該鎮辦理此案。所稱飭屬派兵之處。果否奮勉妥協。並此時曾否親往該處。會同督辦。及其患病實否之處。著馮銓據實奏聞。並將現在審辦情形。一併詳細具奏。尋奏。上年十一月內。李星垣派兵五百名。至東蘭接壤之興隆地方。經臣分派堵截。復會合田州土兵。進崗搜捕。十二月內。該鎮力疾至興隆土司之平曲地方。會同右江道分路巡查。其所派弁兵。各知奮勉。該鎮患病。亦無捏飾。至審辦此案情形。另摺陳明。報聞。○乙丑。

上幸山高水長。至辛未皆如之。○諭曰。高晉奏。荆山橋水利河道。地屬江南。向經奏明歸於河工兼管。分應隨同欽差勘辦一摺。所奏自應如是。此事原係高晉分內應行辦理。且一切興挑事宜。皆該督素所熟悉。即著一併會同勘明。詳悉籌議具奏。○諭軍機大臣等。額

爾景額奏稱。海明遵旨嚴訊。索倫披甲額伊勒木保。葉爾羌有無繫戀之人。今查出委署章京星噶勒圖等。所留掠獲厄魯特回人婦女塞布騰等。據供。額伊勒木保在阿勒楚爾等處。掠獲回婦庫圖什。攜至葉爾羌生一子。因徹兵時不肯從行。遂攜庫圖什。逃往阿克蘇。已將塞布騰等四人。解送質對等語。前鐘音海明等奏稱。額伊勒木保。因毆伊族叔。畏罪脫逃。朕即謂情節未確。今果不出所料。額伊勒木保。仍照前擬絞監候。秋審入於情實。所掠回婦庫圖什。與查出之塞布騰等。俱著解送伊犁。賞厄魯特為妻。從前進兵時。因準噶爾素習。暴橫無恥。故於兵丁掠獲婦女。未經深究。今全部平定。各處駐兵。豈可仍蹈前轍。著傳諭各城大臣。嚴飭所屬兵丁。嗣後遇此等情事。一經察出。即重治其罪。額爾景額接准卞塔海咨文。即交舒泰等查究。舒泰等亦能即行查出。俱屬可嘉。著加恩獎賞。以示

鼓勵○丙寅。

上奉

皇太后幸同樂園。侍早晚膳。至巳卯皆如之。○
御奉三無私殿。賜皇子諸王等宴。○丁卯。

上詣

安佑宮行禮。○御正大光明殿。賜朝正外藩等
宴。召科爾沁和碩親王固倫額駙色布騰巴
勒珠爾多羅冰圖郡王喇特納扎木素多羅
郡王和碩額駙齊默特多爾濟烏珠穆沁和
碩車臣親王朋素克喇布坦喀喇沁多羅都
梭郡王喇特納錫第固山貝子多羅額駙瑚
圖靈阿扎拉豐阿。教漢多羅郡王喇錫喇布
坦。輔國公固山額駙羅布藏錫喇布。巴林輔
國公和碩額駙德勒克喀爾喀和碩親王齊
巴克雅喇木丕勒阿巴噶多羅卓哩克圖郡
王車凌旺布。青海多羅郡王色布騰多爾濟
回子郡王品級多羅貝勒霍集斯。輔國公和
什克圖爾都等。至御座前。賜酒成禮。○命熱

河副都統額勒登額。往烏里雅蘇台辦事。以
前鋒統領瑪琿署熱河副都統。

大清高宗法天隆運至誠先覺體元立極敷文
奮武孝慈神聖純皇帝實錄卷之七百二

大清高宗法天隆運至誠先覺體元立極敷文奮武孝慈神聖純皇帝實錄卷之七百三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級重慶內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆二十九年甲申正月戊辰

上御正大光明殿賜大學士尚書等宴。○諭據成衮扎布奏稱。科布多參贊大臣。有辦理屯田等事。一遇出差。無人承辦。請照烏里雅蘇台例。出派辦理糧餉章京一員。著照所請。交軍機大臣揀員奏派。○己巳。軍機大臣等奏。陞任湖南巡撫陳宏謀奏稱。在京部院封印後。於外省文移。概不收閱。請嗣後照常收文。飭日。緊要事用空白繕辦。並請飭吏部遇咨佐雜等缺。仍歸正月銓選等語。查向來封印

後。遇緊要事。原係畫稿先行。其尋常文移。彙存提塘。於正月十六日分送各衙門。仍飭開印日期。陸續辦稿。從不致有遲誤。惟文移彙存提塘。未為周密。請嗣後封印期內。無論緊要尋常文冊。俱隨時投遞各部院。仍飭開印日期。以次辦理。至吏部銓選。封印後所咨之缺。如開印在正月二十日。缺歸正月。開印在正月二十一日。缺歸二月。行之已久。未便更定。從之。○庚午。諭。朕於二月初二日御經筵。所有應行典禮。著各該衙門敬謹豫備。○又諭。朕於二月初九日啟蹕。恭謁泰陵。所有應行典禮。著各該衙門照例敬謹豫備。○又諭。從前朝鮮國人。有在內地強劫故殺等事。將伊等審明定罪。解回監禁。勾到後即在彼處正法。但彼處實係正法與否。無憑可查。著傳諭舍圖肯等。嗣後朝鮮國人。如有強劫故殺等案。罪應斬決者。不必解回本國。即於內地正法。但行知該國可也。○兩江總

督尹繼善議奏。陞任湖南巡撫陳宏謀條奏。硝磺事宜。經部議准。令江省將購自山西硝磺。改買楚磺。至本省產硝。照湖南設廠官收。令隣省齎價赴買。以杜民間私售等語。查江南豐沛。蕭。碭。邳。等州縣。及鳳。潁。三府各屬。俱有產硝之處。均請如湖南設廠官收。轉供營匠需用。如遇有窩囤私販。地保不報。一體治罪。並令地方官於要隘處。撥役輪巡。惟近因產薄價昂。請令產硝州縣。動支公項。照時價收買。於營匠硝船內通融辦理。試行一二年。酌中定價。再產硝既屬無多。其數本省需用與否。尚在未定。難供隣省採辦。又江省所購楚磺。既不及西磺成色。腳價亦較多費。請仍其舊。下部知之。○辛未。諭曰。李侍堯摺奏。原任總兵吳宗寧。被叅解任赴省。用小刀自扎身死。與近日游金輅。竟同一轍。其事深駭聽聞。不可為訓。專閫大員。干犯憲典。即自知罪在難逭。亦當束身伏法。明正王章。何得聽其

乘間自戕。倖逃顯戮。況吳宗寧原叅之款。勒派短價。將來獻定時。比之侵貪重辟。其罪或尚不至於死。又豈應防範疎虞。使罪案未明。遽以自盡。顛項了事。此皆該督撫等因循故習。遇此等叅案。但以派委道府。或叅遊副將。中途護解。便可自為卸責。殊不知該犯曾膺節鎮。委員職銜雖大。未必即能受其籠絡。及至檢制不周。事後嚴行叅處。揆之該解員。其情轉不無屈抑。非該督撫之責。而誰責耶。且此等狡黠之徒。詭計苟免。何所不有。此時所云。輕生自刎者。不過憑地方有司及解員查驗具報耳。伊等既不能力護之。使不自刎。又安能深察之。使不為奸。設有意外。借尸免脫情事。更復何從究詰。在督撫等。既不過據報率登奏牘。並未及親身檢視。而朕又何從據奏而信之乎。此事於官常國法。所關綦重。嗣後凡遇此等大案。一經叅劾。其看守押解之處。俱當加意設法。詳慎妥辦。如有疎脫。定將

該督撫等。一併重處。此案所有護送備弁等。著照游金輅一案。嚴叅議處完結。並將此通諭各督撫知之。○諭軍機大臣等。明瑞等奏。請將移駐伊犁涼州。莊浪。兵丁。辦給鹽菜銀兩外。應給之糧。仍照內地一半。給與本色。一半折價。又兵丁馬匹。夏秋全行牧放。冬春牧放四分。官員馬匹。四季牧放四分。其餘概令拴養。所需米麵豌豆。照巴里坤。烏魯木齊之價。酌中折給。仍於每石添給零數。以符內地。

倉石。經軍機大臣等議准。但明瑞此奏。於朕移駐兵丁本意。全未知悉。滿洲八旗。從來敦尚本業。以技勇為務。原無奢侈靡費之事。近來各處駐防。漸染漢人習氣。是以令其遠移。俾習於勞苦。庶還淳樸之舊。既已遷移。則應給之項。亦應照所駐地方酌辦。乃拘於內地成例。纖悉計算。而糧價不敷。又欲增添折給。實覺過優。朕意伊犁地甚肥饒。如田畝有餘。仍酌量分給滿洲兵丁。令其學習耕種。更為

有益。著俟兵丁到齊後。議定具奏。現在所議糧價。著照烏魯木齊價折給。伊等果得地耕種。一二年後。所給銀米。俱應停其給放。餘俱如所議行。○宗人府奏。輔國公德謹。因上朝懶惰。革退公爵。例不准承襲。其屬下五佐領。應照例徹為旗下公中。得旨。原任輔國公德謹。屬下佐領。雖應徹出。但德謹因行走怠惰。革退公爵。並無重罪。尚不至徹其屬下佐領。著宗人府於德謹之兄弟內。揀選尚堪造就

者。帶領引見。候朕酌量加恩。降等補放章京。其屬下佐領。仍著存留。○以山海關副都統富當阿。為天津都統。調黑龍江副都統傅玉。為山海關副都統。以呼倫貝爾左翼總管瑚爾起。為黑龍江副都統。齊齊哈爾副都統由屯。為呼倫貝爾左翼總管。呼倫貝爾右翼總管溫布。為齊齊哈爾副都統。協領阿爾哈勒沁。為呼倫貝爾右翼總管。○壬申。諭攜帶家眷移駐伊犁之熱河滿洲兵一千名。著由內

地行走。護送陸續至涼州。莊浪直隸著布政使觀音保。河南著布政使佛德。陝西著道員圖桑阿。甘肅著按察使海明。於各境內加意護送。○諭軍機大臣等。據額勒登額奏。現在遵旨於熱河等處挑選滿洲蒙古兵一千名。移駐伊犁。查此項兵丁。除另記檔案外。共有一千三百名。若於此內挑出一千名。所餘俱非出色之兵。再從京師派來補缺兵丁。於隨園事宜。亦未熟練。每年巡幸之時。外藩部落咸來瞻仰。殊有關係。似未可以此項兵丁。豫備差使。查另記檔案兵丁六百零四名。在旗年久。諸事熟習。請於此內一體揀選派往。經軍機大臣議。此項另記檔案兵丁。係已經出旗之人。毋庸揀選。但派往伊犁。俾伊等世世受恩。自當踴躍從事。請降旨額勒登額。詳議酌辦。其管領之協領。佐領。驍騎校等官。悉照涼州。莊浪。移駐兵丁之例派往。此項兵丁。四月間始能起程。計到烏魯木齊時。天氣已寒。

查涼州。莊浪頭起兵丁。於春季起程。遺有房屋可以居住。請令熱河兵丁。到彼暫行歇息。俟明年起程。仍行知蒿椿。將由西安往駐涼州。莊浪兵丁。暫行停止等語。此項另記檔案兵丁。久應出旗為民。朕憐其生計艱難。加恩仍令食糧。俟出缺後裁汰。今如所議。於伊等生計。頗有裨益。但其中不願派往者。未必無人。著舒赫德。新柱。前往熱河。詳細詢問。願往者。即行派出。其或不願遠行。即令出旗為民。不必勉強。○兩淮鹽政高恒奏。漢口賣商挾制拖欠。以致揚商虧本。嗣後賣商侵蝕濫賒。行店拖欠。請俱責成鹽道。如經揚商控告。照例究處。又江夏。漢陽二縣。向分別大中小鹽舖。發給印票。令商人減價售賣。名為公鹽。而賣商仍以貴價轉售。應將印票公鹽名色。曉諭革除。得旨所辦甚好。○又奏。淮南商向於漢口設立公所。公舉一二人。專司支解應酬等事。名為厘商。並不經營行銷事宜。如養廉生

息。楚省則由賣商於售鹽價內扣交匣商。以致遲延侵欠。貽累商本。至鹽務應酬沿濫日甚。查養廉各項鹽道儘可承辦。應酬例應裁減。現與督臣李侍堯商酌。將一切支解款目俱交鹽道辦理。裁去匣商。徹其公所。得旨甚好。○湖廣總督李侍堯兩淮鹽政高恒奏楚省鹽價章程。臣高恒赴楚。公同體察。緣淮南成本。各綱既不相同。即一綱亦不能畫一。如癸未綱每引實需成本。加以餘息三錢。計每包賣銀二錢三分一釐。應即照此定為限制。現在各商浮濫費用。詳加釐剔。從此成本輕一分。賣價自減一分。嗣後漢口賣價。總以淮鹽成本為準。請以甲申綱為始。每綱於綱首鹽船開江之日。查取商人成本餘息。覈定每包應賣銀若干。移明楚省。飭商遵照。得旨。如所議行。餘有旨諭。諭軍機大臣等。朕前諭高恒赴楚。面同李侍堯會議鹽務事宜。今據奏到。所辦甚屬允協。已於摺內批示。如所議行。

從前湖廣行鹽之弊。總由不按淮南成本。折衷定價。是以漢口賣商。從中意為低昂。甚至擡價賒欠。侵吞種種作奸。而揚商寫遠阻礙。遂不得不受其挾制。今高恒遵旨前往。李侍堯與之協力清釐。將成本覈定。加以餘息。明立限制。情理皆得其平。雖政可以永行無弊。且徹去匣商。節減糜費。則商力裕而民食益充。若非朕深究弊端。以會商為兩省通氣之法。安能得其要領。若此。不但該商民等當為懽忻感切。該督該鹽政公同籌辦。益當踴躍倍常。溢於言表。今覽所奏。似不過就事完事。初不以積弊有年。始得洞中窺要為喜。豈該督等彼此成見未化。僅藉此調停了局。抑以前此兩兩相待。迄無定奪。尚不足為鹽法之累耶。著傳諭李侍堯高恒。令其詳悉覆奏。再長蘆鹽政。原有每年自赴山東嚴查道庫體察商情之例。楚省距維揚。雖較山東稍遠。然究屬該鹽政統轄之區。現在一經親行。已有

明驗嗣後該鹽政或酌量於一二年中親往巡視一次之處著一併令其定議奏聞候朕降旨尋李侍堯奏上年奉旨飭高恒赴楚會商詢明現在成本加以餘息酌中定價從此商力日裕成本日輕賣價平減皆由睿慮周詳無微不至乃臣等於從前辦理未當經奉旨遵照妥辦緣由並未切實奏明實屬草率非敢稍存成見得旨覽此奏甚明矣高恒奏鹽法兩兩相持商民並累幸蒙聖恩教導與

督臣李侍堯協力清釐得以永行無弊至鹽臣赴楚巡視年限查楚省距揚稍遠請嗣後二年一次奏明前往如二年內有必須查辦會商之處隨時奏請得旨知道了不必定年限於應去之時請旨可也○以廣東督標中軍副將顧鏐為湖南永州鎮總兵○癸酉調熊岳副都統書通阿為三姓副都統以原任福州將軍福增格為熊岳副都統○甲戌諭據吳達善奏雲南江川通海寧州河西建水

等五州縣去歲十一月內均有地震之處現已照例分勘撫卹等語江川等州縣此次地震壓損房屋較多民力未免拮据著將應行賑卹之項加倍散給所有五州縣應納條公銀兩及江川河西二縣撥運兵米等項並加恩概予蠲免該督撫等務董率屬員實力奉行務俾災黎均沾實惠毋令胥吏侵蝕中飽以副朕體卹邊氓至意該部遵諭速行○以直隸河間協副將馬建學為河南河北鎮總兵○

乙亥軍機大臣等奏據盛京將軍舍圖肯等奏稱遵旨於盛京錫伯兵內挑選一千名挈眷移駐伊犁應照索倫兵丁之例派員管理請選防禦驍騎校各十員帶領出彰武臺由臺站前往仍請交理藩院派筆帖式領催各二員送至烏里雅蘇台至官員兵丁應領俸餉約須銀十萬兩就近於盛京戶部支領再每起另添派協領城守尉各一章京四前鋒一百照看約束送至邊門等語臣等酌議從

前索倫察哈爾兵移駐伊犁。派有總管協領大員直送至該處。今含圖肯所奏選派官員送至邊門。並未計及長途護送之人。應令派協領城守尉各一員送至伊犁。其章京前鋒不必派出。官員兵丁俸餉准其照例辦理。從之。○丙子。諭前次記名副都統人員內除已經錄用外其餘不甚得人著交與滿洲大學士領侍衛內大臣尚書滿洲蒙古漢軍都統照依上次保舉例不論旗分品第惟視能勝副都統之任者各保舉一員。再此次保舉人員帶領引見時將舊記名人員一併帶領引見。○又諭禮部奏朝鮮國王李昉咨貢使李烜等坐車進京議請治罪一摺。具見該國王敬事之忱。第前降諭旨欽差前往該國停止肩輿本為滿洲大臣素嫻鞍馬不得循襲養安陋套致失觀瞻。若該國進貢陪臣自沿土俗坐車原可各隨其便不在例禁之內。所有李烜等俱著加恩免其治罪。嗣後該國陪臣

進京仍准坐車。其李烜等呈請停給在館餼廩之處仍著照例給與。禮部可行文該國王知之。○諭軍機大臣等楊應琚奏涼莊官兵起程辦理車價銀兩一摺。既請將節省銀兩彌補從前長支覈減之項。俟至伊犁後於兵餉內扣還。又請賞給完公免其坐扣。而於前減應扣之項實在若干與節省之數是否相抵究竟應抵應免之處俱未明晰。著傳諭楊應琚令其詳查確議覆奏到日候朕再降諭旨。○丁丑。兵部左侍郎王際華奏近見各部旗叅處事件往往先送原奏其應議職名必待吏兵二部咨取始行開送。迨該部題奏奉旨已在叅處數月之後請嗣後無論案情大小即將應叅職名列入原奏摺內無庸一事重辦其關係歷任處分當時未能確查者仍於鈔送原奏後定限十日查送。又各部會議外省案件其出本向無定限或遲至一二月後具題恐此中有關涉實降實革各員難免

無書吏撞騙招搖等弊。請嗣後於會稿日。該部即查明應議各員。有無加級抵銷。其應實降實革者。於會齊三日內具題。仍將出本期。交科道稽查。得旨。所奏是。如所議行。○戊寅。諭。昨將由屯以副都統職銜調補呼倫貝爾總管。呼倫貝爾地方毗連俄羅斯。甚有關係。必得漢仗好。諳悉事務之人。方於地方有益。因瑚爾起不及由屯。始將伊調補。並非因由屯不勝副都統之任。調補總管也。況齊齊

實錄卷七〇三

上

哈爾副都統。不過隨將軍辦事。呼倫貝爾總管。一切事務。俱係一人專辦。較副都統更為緊要。著傳諭由屯。加意奮勉。俄羅斯現在安靜。若伊等有越境滋事等情。由屯即認真辦理。毋事姑息。○己卯。諭。軍機大臣等。今日召見常鈞。詢及陝甘二省地方情形。據奏。督臣遠駐肅州。距西安寫遠。凡遇考驗弁兵諸務。往返動逾兩月。其所屬有司。且有經年不能識面者。揆之控制事宜。均多未便。其言甚切。

事理。朕意陝甘總督駐劄肅州。原因前此辦理軍需。不得不就近調遣。今大功久已告成。而巴里坤烏魯木齊等處。屯田章程。亦經大定。現在更無緊要事件。必須在肅督辦。若準其道里適均之地。將總督移駐蘭州。撫署則東至省城。西至甘肅。程途約畧相等。一切官方吏治。皆可居中統攝。無庸更設巡撫。規制實為允協。其安西緣邊屯政。即有應行勘驗者。每隔一二年出巡一次。自不患鞭長莫及。

實錄卷七〇三

上

至督標所轄五營。向駐西安。自當畫一改正。或將固原提督回駐西安。即將督標舊轄。改歸提標。所遺提標。將涼州總兵移駐固原。管轄其涼州鎮標。則撥督標中軍副將一員統率。併蘭州撫標一體。改為督標管轄。似此調劑。則一舉而數善皆備。再西安省城。近居腹地。況有滿洲官兵駐防。其督標議改提標。弁兵或可酌量裁減。以歸實用。並著傳諭楊應琚。令其通盤籌畫。詳議覆奏。候朕降旨。其中

如有一二隔礙難行之處。亦即據實奏聞。不必勉強。○禮部題。朝鮮國王李昫。遣使表賀萬壽。冬至。元旦。三大節。及進歲貢方物。賞賚筵宴如例。○庚辰。

上詣長春仙館。問

皇太后安。奉

皇太后居暢春園。○諭。據舒赫德等奏稱。熱河現在食餉之另記檔案兵丁。不願前往伊犁者。共七十七戶。現將伊等出旗為民之處。交

齊蘇泰等

上

瑪瑞辦理等語。此等人為民後。復思入旗。皆未可定。從前鑲藍旗蒙古。有復行入旗假冒食餉之事。將該管大臣官員等。從重治罪。兵丁俱行發遣。今此項出旗為民之人。係不願前往伊犁者。更與尋常情願為民之人不同。若復行入旗。一經查出。將該管大臣官員等。從重治罪外。必將伊等正法。斷不姑貸。將此諭。瑪瑞曉示伊等。仍令留心防範稽查。○辛巳。

上詣暢春園。問

皇太后安。○還宮。○諭。曰。御前侍衛乾清門侍衛。年過六旬者。著不必幫轎。○壬午。封扎薩克貝子敦多布多爾濟弟佛保為輔國公。○是月。直隸總督方觀承奏。子牙河自大城縣屬之張家莊以下。分為正支二河。正河行水四分。支河行水六分。臣與阿桂。表曰。修上年查勘。議請深開正河。復面奉聖訓。以子牙支河既甚深通。即可改為正河。查支河之尾。歸入正河處所。形勢不順。每易停淤。若從子牙河邨南穿隄而出。斜向東北挑河二十餘里。引入正河。即以挑河之土。於東岸築成隄埝。使水無旁溢。形勢益順。得旨。如所議行。○江蘇巡撫莊有恭。浙江巡撫熊學鵬會奏。查海塘情形。如海寧城東之念里亭。城西之戴家橋。大石塘外。向未建有坦水處所。地當衝要。應估築坦水共長一百七十七丈七尺。令一律完整。春汛前分段趕築。報聞。○兩淮鹽政

高恒奏。江西一省。廣信則食浙鹽。贛州。南安。寧都。三府州。則食粵鹽。其食淮鹽者。惟南昌等府。而其中建昌一府。又與閩鹽接界。向於要隘處。委商巡緝。日久。急生。巡緝視為具文。增卡徒資浮費。今與撫臣輔德商辦。其卡與地方官署相近者。即改為官巡。如仍須商巡者。一卡祇留一商。俾專責成。至淮鹽到西。各處水販鋪戶。俱赴南昌省。畢轉販運銷。其經手交易之賣商。又不免從中那掩。是以淮商

實錄卷七十三

五

被欠仍多。現飭各賣商將本身那掩。與水販鋪戶。賒欠呈出。定限勒追。嗣後賒項。明立限期。再西省亦有公匣。專代揚商料理應酬等事。亦即裁撤。得旨。好。○河南巡撫阿思哈奏。河南撫標馬兵馬匹。每月按期操練。不過數次。步兵自圖上進。平時且可通融練習。及考拔馬糧。即將舊兵遺馬項用。原不必另設官馬。請裁額外官馬十匹。變價還項。另設生息銀一千五百兩。原為餵養之費。今仍存商營

運另備實用。得旨。如所議行。○陝甘總督楊應琚奏。涼莊第一起移駐伊犁官兵。現在定期起程。其鹽菜等銀。若沿途接續支領。事屬繁瑣。當飭涼州府將眷口盤費。覈總支給。鹽菜銀。豫支三個月。均於府庫動用。俟至伊犁後。有餘不足。覈明另辦。其官兵跟役口糧。移行涼甘肅安。暨哈密。關展烏魯木齊等處。經過地方。按站支領。至官兵眷口行走前後參差。需員協同護送。已委文武員弁。照料直送

實錄卷七十三

五

伊犁。仍飭涼州以西甘肅以東各營。每站派官二員。帶兵十名。接替護送。其哈密以西。亦移咨各處辦事大臣。照料。復恐長途車輛傷損。驟頭疲乏。一併寬餘備用。得旨。好。○又會同護理陝西巡撫方世儒奏。今於西安滿兵內。移駐涼莊二千。自本年為始。分為三起。每年移駐一起。統計移駐馬步兵二千。每年餘例支本色糧一萬三千九百餘石。請於存營八旗暨綠旗九營兵內。均勻攤給。仍按攤給

本色之數。扣除應領折色之銀。得旨如所議行。

實錄卷七百三

主

大清高宗法天隆運至誠先覺體元立極敷文奮武孝慈神聖純皇帝實錄卷之七百三

大清高宗法天隆運至誠先覺體元立極敷文奮武孝慈神聖純皇帝實錄卷之七百四

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級備帶加一級年貢加一級軍功紀錄一次臣慶桂總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次奉常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆二十九年甲申二月癸未朔軍機大臣

等議覆方觀承奏報直隸省節年城工用過協耗捐罰各項除將開報不符數目飭查覆奏外嗣後請飭該督凡有修理工工程必須興修之始即將原估細冊及動撥何項之處咨部仍於年終將一年內工程用項奏明並造四柱清冊送軍機處存案工竣報部覈銷至捐罰修城一項如係該員自行經理者無庸造報其出貲繳庫另派地方官承修者即與庫項無異亦應報部覈銷未便在外銷結從

之。○又議覆陝甘總督楊應琚奏稱。陝甘各標營內。移駐烏魯木齊兵四千名。內有原營兵少之處。統計應添補兵二千五百八名等語。查陝甘自展拓新疆以來。伊犁已駐將軍。烏魯木齊。巴里坤。久成腹地。陝甘各標營兵。不過差標巡防。足敷應用。無庸遽籌添補。至實有不敷各處。即於督標各營內酌量撥補。從之。○尚書舒赫德奏。前軍機大臣議。厄魯特兵移駐伊犁。由邊外行走。照從前察哈爾兵例。一體給與銀兩口糧。惟是從前帶領察哈爾兵之官員等。送到即回。是以僅給一年俸祿。照品級給馬匹及鹽菜銀。不給駝隻。今此次挈眷移駐。情形不同。自應給與駝隻。但恐伊犁水草不甚相宜。請改給牛馬各一。於孳生牧羣內挑用。並交察哈爾都統巴爾品酌添如數。派嚮導帶領行走。至熱河滿洲官兵。亦應照軍機大臣原議。與涼莊滿洲官兵一體給與俸餉。官員等每家口四人。給車一。

每戶給裝載什物車一。兵丁等每戶給車一。兩戶給裝載什物車一。再官員等應給之項。業經辦給。其兵丁應給銀兩。酌留三分之一。與給賞跟役之銀。俟明年由伊犁前往雅爾時。令將軍等照數給與。庶免中途花費。得旨。移駐伊犁兵丁。雖有厄魯特總管等官帶領。沿途無一大員。不能統束。著派護軍統領烏勒登。送往伊犁。交代後仍著回京。其自京往伊犁之厄魯特等。即交烏勒登帶至熱河。再厄魯特官兵。應得馬二千餘匹。牛四百餘隻。及豫備添補馬牛。若自巴爾品處送至熱河。未免長途疲乏。應令緩行。迎至伊等所經路口等候。俟厄魯特官兵到時撥給。再派出之厄魯特官兵。所欠孳生官店價銀四百餘兩。著加恩豁免。餘依議。○甲申。以舉行仲春經筵。遣官告祭奉先殿。

傳心殿。

上御文華殿。講官暨侍班之大學士九卿詹事等。行二跪六叩禮。分班入殿內序立。直講官四人出就講案前。行一跪三叩禮。復位。直講官阿桂。劉綸。進講。論語因民之所利而利之。一句講畢。

上宣御論曰。天子以四海為家。則四海之民。皆吾一家之赤子也。保赤之心。既切。因利之政。當求。制田里。教樹畜。使之知節儉。務耕桑。因五方之財。阜萬民之產。斯所謂不費之惠耳。博施濟衆。堯舜猶病。蓋孔子訓子貢以為仁之方。非謂不捐己財以與人也。且天子何得有己財乎。不達因利之旨。將謂府庫為天子之財。且捐此財以與人。則謂之費。見何小哉。夫四民之所以自謀其生理。亦已勤矣。農耕於野。工商勤於市。士雖不逐逐然。其所以為仰事俯育之資者。亦必有謀焉。使為政者。人而為之圖。給之求。則弊精勞神。且有所不能遍及。此所謂費也。此所謂不能成其惠也。

不啻此也。即因利之言。亦當有所權宜於其間。而不可以冒昧行之。今夫墾闢豈非勸農之舉。而一有不實。將致勒民承種。以納糧重為民累者矣。積儲豈非有備之圖。而行之過甚。將致踊貴於市。而艱糴饕餮莫給者矣。其他可以類推者。不可勝舉。故孔子因民之利之言。所包括者甚廣。而不可徒於不費求之。則思過半矣。大學士劉統勳奏曰。

皇上以躬行者立論。所謂實心實政也。上曰。難處正在此。惟其貴實行之。自覺不易。若作費財講。人君豈有私財乎。講官暨侍班官跪聆畢。興直講官觀保。彭啟豐進講書經。屢省乃成一句。講畢。

上宣御論曰。樂於興事者。固易至於紛更。習於姑息者。亦易至乎玩愒。屢省乃成。蓋兩致意於勅。而非一惟戒夫率作也。蓋紛更之失。如無疾而投醫。玩愒之失。如有病而不藥。其致禍雖有遲速之分。而其終至不起則一也。

故興一事焉。必謹於其初。不可為近名邀利之舉。不可用一己偏執之見。慎厥終。惟其始。使日久而可行。行之而無弊。即當無事之時。亦必朝乾夕惕。謹幾慎微。省之於不見不聞之際。而待之於無形無聲之表。夫然後氣體清明。措施咸當。以之存養斯廓然而大公。以之臨蒞斯物來而順應。解書者率致意於興事之省察。而未慮夫宴安之耽毒。此不可以不辨。講官暨侍班官跪聆畢。尚書阿桂奏曰。皇上純亦不已。不特省於用人行政之時。而省於基命宥密之地。與賡歌颺拜之旨。千古一轍也。臣等幸侍

講筵。親承

聖訓。不勝榮幸之至。奏畢。諸臣出就拜位。行二跪六叩禮。禮成。

上還宮。賜講官暨侍班官等宴於協和門。○遣官祭

先醫之神。○太常寺奏。各

壇

廟樹木。間有枯株。應諏吉補栽新樹。請簡員承辦。得旨。著阿里衮、英廉、三和五福辦理。○尚書舒赫德等奏。鄭家莊兵。除揀派福州駐防外。其餘應回京當差。得旨。鄭家莊兵丁。伊等多係親屬。共處年久。今遣往福州二百五十名。其餘三十名回京當差。殊覺不便。著將此三十名。一同派往。俟下次請人時。即入於應派數內。○乙酉。予已革輔國公德謹弟德春為鎮國將軍。○順承郡王恒昌曾祖母伊爾根覺羅氏故。予祭如例。○是日起。

上以祭

社稷壇。齋戒三日。○丙戌。諭曰。御史喀爾崇義奏。此次經筵。賞賜大臣筵宴。派出護軍叅領。並不嚴管。致不肖之徒。亂奪食物。請將查看之護軍叅領。交部察議等語。賞賜大臣筵宴。典禮攸關。查看護軍叅領。並不嚴管。以致亂奪食物。非禮實甚。著將所派之護軍叅領等

交領侍衛大臣嚴察議奏。向來太和殿豐澤園等大宴。朕俱特派王大臣看管。此等照常筵宴。亦當特派人看管。嗣後若有此等照常筵宴。該部將八旗護軍統領等職名進呈。朕親派一員。令其特管。所派之護軍統領。即領該旗之護軍參領。護軍等嚴查。若有疎懶者。朕於所派之護軍統領是問。○又諭。據舒赫德等奏。稱熱河滿洲厄魯特兵丁出派一千五百名。攜眷前往伊犁。伊等所遺房屋。除給由京移駐滿兵外。尚餘若干間。請給每年隨園之侍衛。拜唐阿居住等語。此項房屋。與其空閒。莫若給侍衛。拜唐阿居住。既便當差。又可省費。著交瑪琿派人看守。毋使坍塌。俟朕至熱河備用。○丁亥。祭

先師孔子。遣誠親王允祕行禮。○諭曰。福鼎駐藏辦事。業經三載。著派副都統阿敏爾圖前往更換。○軍機大臣等議。覆察哈爾都統巴爾品奏。稱察哈爾自乾隆二十六年設都

統。副都統。但統以張家口官兵。未議添設。額已短少。而支給分例。俸餉外並無馬乾。亦不敷當差之用。查右衛額兵三千七百有餘。既多於察哈爾。差事又輕。其分例俸餉馬乾並放。請撥右衛前鋒一百。馬兵七百。養育兵步兵各二百。匠役二十。並應得糧餉馬乾。移駐張家口。而馬兵七百內。移實兵四百。其三百俟右衛出缺裁去。補以張家口閒散。以張家口現設之四品總管。作為新設協領。現設之防禦驍騎校。改為新設之缺。不必盡由右衛移駐。兩處官員分例。各暫仍舊。俟右衛出缺裁汰。再給以右衛應得之數。所移員缺。及隨總管之筆帖式。由此處官兵補放。移兵並建瓦房居住。均應如所請。惟存右衛三百兵內。出缺盡以張家口閒散充補。於右衛尚有不便。應仍於三缺留一。從之。○輔國公彌什克故。以其子貢楚克扎布襲爵。○戊子。祭

大社。

大稷

上親詣行禮。○詣暢春園。問

皇太后安。○幸圓明園。○以奉恩將軍弘旿為

鑲黃旗蒙古副都統。○己丑。遣官祭

關帝廟。○諭曰。觀保著調補兵部侍郎。其吏

部侍郎員缺。著旌額理補授。旌額理未到京

之前。著阿永阿暫行署理。○諭軍機大臣等

前因內地絲紬綢緞等物。價值漸昂。經御史

李兆鵬等先後條奏。請定出洋絲紬之禁。以

裕民用。乃行之日久。而內地絲價。仍未見減

而且更貴者有之。可見生齒繁衍。取多用宏

蓋物情自然之勢。正如從前議免米豆關稅

而糧價如故。可為明驗。況聞出洋絲紬。本係

土絲。及二三蠶粗糙之絲。非腹地綢緞。必須

精好物料可比。徒立出洋之禁。則江浙所產

粗絲。轉不得利。是無益於外洋。而更有損於

民計。又何如照舊弛禁。以天下之物。供天下

之用。尤為通商便民乎。前暎咭喇等國。織紵

不供。已特旨准其酌帶配用。而伽喇巴等處
近復援例懇請。現勅部臣定議。該督撫等熟
悉地方情形。著傳旨令其悉心體察。應否即
行開禁。並海洋商船所配粗絲。應否仍酌定
章程。及如何設法稽查。以杜影射侵漁等弊
之處。俟妥議具奏到日。候朕明降諭旨。○禮
部議覆浙江學政錢維城奏稱。前福建學政
紀昀條奏生童試卷。照鄉會試例。自寫塗註
字數。經部議准。惟查生童試卷。並無謄錄。既
不慮有改竄。且教官受卷時。學政當堂眼同。
勢難滋弊。行之轉多窒礙。請停。應如所請。從
之。○兵部議覆山西巡撫和其衷奏稱。河東
鹽池圍牆一百二十里。設鋪三十六。鋪設弓
兵一。尚有不敷巡緝之處。請於運城。平垣。二
營撥兵六十。添駐輪巡。仍責成該管都司守
備稽查。應如所請。從之。○刑部奏查殺一家
非死罪三人之犯。其妻子緣坐。律止擬流。原
以所殺止於三人。而其子或在三四人以外。

自未便概予駢首。然此等兇惡遺孽。竟與尋常軍流等犯同科。亦不足以昭允當。請嗣後將此等緣坐之犯。除同謀加功。及有別項情罪者。仍照本律定擬。此外不分年歲老幼。人數多寡。俱發伊犁等處。給駐防索倫等兵為奴。載入例冊遵行。從之。○庚寅。諭軍機大臣等。現在伊犁官員。皆給半俸。兵丁每月支錢糧一兩。熱河官員。向例按其職銜減一等給與半俸。今令伊等移駐伊犁。應與現在伊犁者一例。著加恩准支半俸。不必減等。至兵丁在熱河時。支錢糧一兩五錢。此時甫經移駐。未免生計尚艱。著仍照原數。並給以孳生牲畜。俟將來缺出挑補之人。方照察哈爾。厄魯特兵丁例。月支錢糧一兩。烏勒登到彼時。即明白曉諭。仍交明瑞等遵照辦理。○大學士兼翰林院掌院學士劉統勳奏。纂修記注。除內閣副本各檔。及六科正本。仍照例咨領摘錄外。其各部院上年事件。請於次年開印後。

造冊送館。以杜吏胥疎畧延緩之弊。從之。○吏部議覆湖南布政使來朝奏稱。州縣遇上司批審之事。遲延不結。該上司亦不即參辦。往往別滋事端。請嗣後凡上司批審之事。即責成該上司督催。逾限詳報督撫。督撫按季彙咨。如逾限至五案以上。及經年不結者。特疏題參。應如所請。從之。○又議覆山西布政使文綬奏稱。向來巡撫陞見陞調。凡無總督省分。將撫篆交藩司護理。藩司本任。不另委署。撫藩既係一人。詳覆均出已見。究不若撫藩分任。各有專責。請嗣後遇藩司暫護撫篆。其藩司即另委臬司及道員署理。則彼此既可覈正。而體制亦覺相宜。應如所請。從之。○戶部議覆兩廣總督蘇昌等奏稱。粵省本港商船出洋。請照外洋夷商之例。准其配帶絲觔等語。查夷商配帶絲觔。係出特恩。非商販所得援照。應酌量准其配帶出洋易銅。以資內地鼓鑄。至如何立法辦理。令該督等詳細

議奏從之。○兵部議覆御史王紱奏稱五城時有竊案。營弁坊官均應晝夜巡緝。遇案彼此協拏。而專汛武職向無應得議敘處分。請照文職例一併酌定等語。應如所請。嗣後汛弁能於二叅限內獲賊二名。紀錄一次。每二名以次遞加。如限內五案以上。未獲一名。降一級留任。十五案以上。未獲一名。降一級調用。能獲一二名者免議。庶武職亦知所勸懲。並令步軍統領於年終彙冊送部查覈。至限滿緝拏之案。亦令年終查其已獲未獲案數。分記功過。從之。○御史秦燾奏。近例漢講官缺出。將翰詹人員通行開列請簡。查編纂記注責任綦重。似未可雜用新進。請嗣後或充或署。帶領少詹學士以下等官。及俸深編檢十員。引見欽定。得旨著照所請行。○翁牛特達爾漢頭等台吉親達瑪尼無嗣。以原任台吉拜桑三世孫綏和圖襲職。○子故扎薩克貝勒品級貝子巴勒珠爾致祭

如例。○辛卯上詣暢春園問皇太后安。○自圓明園啟鑒。謁泰陵。○遣官祭昭忠祠。○諭曰。吳達善查奏蔡卜年揭參布陸禮一案。因布陸禮備船接遲。責打外委。並勒令布陸禮跪門各情節。俱與布陸禮在京所供相符。其為挾嫌無疑等語。在布陸禮粗率任性。將祖姓千總改為章姓。其事甚屬可笑。不宜復膺外任。布陸禮著照部議所降之級留京。以旗員補用。至蔡卜年以迎接細故。勒令跪門。旋復挾嫌奏。假軍政以洩私憤。其為副將已狂妄若此。何以堪。專閫之任。蔡卜年著解任。交部嚴加議處。○諭軍機大臣等。據吳達善奏。陞任副將蔡卜年揭參布陸禮一案。該鎮在上江協副將任內。引見回署。因備船接遲。輒將外委責打。並勒令游擊布陸禮跪門服罪。復列入軍政糾參。其為挾嫌狂妄。已可概見。現已交部嚴加

議處。蔡卜年任副將時。已乖張任性。若此。則其陞授總兵。必更志足意滿。現在到任以來。一切舉動行事。必更過甚。該督必有見聞。著傳諭蘇昌。即行確查據實奏。○調雲南臨元鎮總兵佟國英。為昭通鎮總兵。以廣州城守營副將阿穆呼朗。為臨元鎮總兵。○是日。駐蹕黃新莊行宮。○壬辰。

皇后千秋令節。停止行禮筵宴。○軍機大臣等議覆。圍場總管齊凌扎布奏稱。圍場官俸內銀米。例由京城該佐領辦給。多有不便。請照圍場兵丁例。銀由熱河道庫支領。應扣坐扣米。由四旗通判所屬土城子。波羅河屯。掛甲屯。達呼爾等處倉。支給小米如數。各造冊報部。應如所請。從之。○是日。駐蹕半壁店行宮。○癸巳。

孝康章皇后忌辰。遣官祭。

孝陵。○以廣西鎮安協副將李經世為左江鎮總兵。○是日。駐蹕梁格莊行宮。甲午。

上謁

泰陵。未至碑亭。即降輿慟哭。步入隆恩門。詣

寶城前行禮。躬奠哀慟。王以下文武大臣官員。隨行禮。○諭軍機大臣等。前據明瑞等。將雅爾地方修城駐兵事宜具奏。經軍機大臣議。揀發熱河滿洲兵。達什達瓦部之厄魯特兵。盛京錫伯兵。約計二千五百名。現在各令挈眷陸續起程。朕意除厄魯特兵。習慣游牧。

不妨暫住帳房。至滿洲。錫伯兵。共有二千。伊犁。雅爾地方。未必有如許房屋。可以存住。理應豫先備造。再雅爾駐兵。若派現在伊犁兵丁。則此挈眷移駐之兵。即可住伊犁兵丁空閒房屋。若即派此次挈眷移駐兵丁。則雅爾亦須豫造房屋。以備兵丁到時居住。前雖議奏准行。若不明白指示。明瑞或未能籌及。著傳諭明瑞。酌量定擬具奏。○是日。駐蹕秋瀾村行宮。○乙未。諭軍機大臣等。愛隆阿。伍岱。

久在軍前。此次遣往伊犁。又將二載。應派員更替。伍岱精力尚壯。著再留一年。昨遣觀音保前往伊犁。著即留該處。更換愛隆阿來京。○軍機大臣會同直隸總督方觀承議奏。近年商力耗乏。遇有請退引地。接替甚難。其人兼以物價腳費。各項加增。而鹽價有定。運本實多不敷。應請照雍正十年之例。每觔增價一文。從之。○是日。駐蹕半壁店行宮。○丙申。諭軍機大臣等。朕聞山東地方。有因明歲南巡。現擬添建行宮之事。此舉斷斷不可。朕此次南巡。即江浙兩省駐蹕之地。已飭令該督撫等。一切皆仍舊貫。勿得稍有增飾。況東省不過往來所經。僅供頓宿。又何必踵事增華。致滋繁費。其現在所有各處行宮內。或必應補綴。如裱飾牕櫺之類。尚屬可行。若果完好整潔。即併此亦可不必。至於添建行宮之處。速即概行停止。著將此傳諭崔應階知之。○予故廣西思恩府白山司土巡檢王有樞子

暉襲職。○予故科爾沁一等子固魯扎布子茂沁襲職。○予已革翁牛特扎薩克一等台吉阿迪沙子固魯扎布襲職。○是日。駐蹕黃新莊行宮。○丁酉。諭曰。國多歡重聽過甚。難當別項差使。著在散秩大臣行走。○又諭。請轎校尉。著加恩賞給一月錢糧。○是日。駐蹕岫雲寺行宮。

大清高宗法天隆運至誠先覺體元立極敷文奮武孝慈神聖純皇帝實錄卷之七百四

大清高宗法天隆運至誠先覺體元立極敦文
奮武孝慈神聖純皇帝實錄卷之七百五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務兵部稽察都統世襲騎都尉軍功加七級隨帶加一級尋常加二級軍功紀錄一次日曆桂

總裁官經筵講官太子太傅文華殿大學士刑部尚書領閣事稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級尋常加二級軍功紀錄一次日曆滿洲都統軍功紀錄五次

尋常紀錄十四次日曆經筵講官太子少保工部尚書紀錄六次日曆稽察欽奉

秋修

乾隆二十九年甲申二月戊戌諭曰和爾精

額遇事推諉著革去總管內務府大臣不必
管理圓明園事務仍留副都統著管理萬壽
山靜宜園嗣後看伊行走若不黽勉即將副
都統一併革退塔克圖之父常明從前行走
勤敏伊亦行走有年著加恩補授總管內務
府大臣其圓明園事務著福隆安管理○軍
機大臣等覆奏查例應筵宴之處內廷係候
旨遵行會試殿試及外藩入覲請照舊筵宴
惟經筵臨雍耕藉筵宴之例似可酌裁得旨

嗣後經筵筵宴著停止○是日駐蹕靜宜園
○己亥

上迴鑒詣暢春園問

皇太后安○辛圓明園○庚子春分朝

日於東郊遣裕親王廣祿恭代行禮○諭向來
外省題請陞調人員有前此引見未滿三年
者吏部於本內聲明免其送部引見蓋因其
人平日政績尚優現經大吏推擢且經朕鑒
別未久原可無庸再行引見此乃體卹下僚

之恩也至於呈誤人員議降議革本分所應
得特以事屬因公准令送部引見候朕量其
人材或照部議降革或帶處分留任及仍以
原官錄用此又屬格外加恩愛惜人才之意
然其情事則與名列陞調之人判不相同豈
得援已經引見之例今吏部本內失察邪教
之王銘錫馬鵬飛等前已因公呈誤從寬錄
用近復以失察邪教致干例議是一誤再誤
其與黽勉供職者迥難相提並論而該部亦

以引見未滿三年。聲明雙請。內閣復依樣票擬。是於僥倖中復求僥倖。深乖患失之義。非所以教羣僚也。且此等被議人員。並此一來往之費。尚欲惜之。安望其於地方政務。留心奮勉乎。此於吏治甚有關係。嗣後凡因公呈誤。引見未滿三年。聲明免其引見之處。著停止。王銘錫。馬鵬飛。仍著送部引見。候朕再降諭旨。○又諭。牧場所有護軍校。護軍等。俱係乾隆元年自軍營撤回。給予原食錢糧。在牧

場當差之人。遇有出缺。即應裁汰。因撤回之初。並未辦理。念伊等向來俱以錢糧為生計。現在生齒日繁。若將如許護軍校。護軍。俱令遇缺裁汰。必致失所。此等皆朕世僕。朕心殊為不忍。著加恩將商都達布遜諾爾。達里剛。愛牧場。現在所有護軍校。護軍。俱著存留。照舊賞給原食錢糧。不必遇缺裁汰。再從前軍機大臣議准。吉泰所奏。太僕寺牧場之應裁護軍校。護軍等。亦與此等自軍前撤回之在

牧場行走之人無異。並著一體加恩。不必遇缺裁汰。○辛丑。禮部左侍郎程景伊奏。本年三月初二日。祭

歷代帝王廟。

皇上親詣行禮。適值易用黃瓦。工竣一新。請另撰文宣讀。以伸昭格。嗣後隨常致祭。仍用成文。報聞。○以湖南按察使五訥。擢為湖北布政使。○壬寅。

上詣暢春園。問

皇太后安。○諭軍機大臣等。楊應琚覆奏。涼莊移駐伊犁。兵未扣應完銀兩。請以節省車價彌補。俟到伊犁。分年扣還一摺。所辦殊於事理未協。此項車價。原屬官事官辦。自當覈實動用。所用既已實銷。所餘即應實貯。安得名為節省。譬如辦理工程。估報之初。數必浮多。及奏銷自以覈實為準。豈得因較從前約畧虛數稍贏。遽謂此非官項乎。朕於兵丁欠項。如果應行寬免。未嘗不加恩優恤。即如熱河

移駐兵丁。所有未完之項。現俱豁免。豈獨於該處兵丁。稍為愛惜。但伊等身為滿洲兵丁。乃於軍需馬駝。不知加意餵養。致倒斃之數。較綠營兵丁更甚。若一概免賠。衆復誰知懲儆。況該兵丁等。將來既駐伊犁。所食錢糧等項。特為寬裕。無難從容歸補。但念甫經遷移。力量猶或不足。不妨稍為展期。以示體恤。著傳諭楊應琚。現在整裝之始。祇應不動聲色。照常辦理。將此交與伊犁將軍酌量伊等移

駐二三年後。其力可以坐扣時。令其奏明請旨。分年扣補。並已有旨諭明瑞矣。○以江西驛鹽道何逢儔。為湖南按察使。○癸卯。戶部議覆。浙江巡撫熊學鵬奏稱。浙江白糧項下各款錢糧。但有奏銷限期。無地方官催徵不力處分。往往任意延緩。請照兩江徵隨漕行月錢糧例。於十月內完解六分。解不足數者。指叅展限未完。以次遞處。應如所請。從之。○兵部議覆。署福州將軍副都統長保奏稱。嗣

後福州協領缺出。請於八旗佐領內。通行保送。不必但於本翼揀選等語。查駐防滿洲蒙古漢軍協領。例應由本翼應陞人員揀選送部。如於八旗通保。既乖定例。亦覺偏枯。應請仍於本翼揀選。如本翼不得其人。再由八旗揀選保送。八旗無員可保。即咨部由京請簡。從之。○工部議覆。浙江巡撫熊學鵬疏稱。蕭山縣境內孔家埠。漁浦街二處。當上游山水頂衝。兼遇海潮逆流湍激。塘外漲沙日坍。水逼塘根。請照海寧塘工。用竹簍貯石堆疊。應如所請。從之。○甲辰。

上御勤政殿聽政。○諭。據馮鈐奏。田州土知州岑宜棟。於東蘭州徭人蒙總述等糾衆刦殺一案。能相機設法。搜獲多犯。甚屬勇往出力等語。岑宜棟著交部議叙。其協同緝拏。在事文武各員。並著該撫查明分別獎賞。以示鼓勵。尋議。岑宜棟應議叙加一級。得旨。岑宜棟以土知州奮勉緝犯。甚屬可嘉。著加恩准

其加二級。以示鼓勵。○署理宗人府事務和碩誠親王允祕奏。騎射清語。為滿洲舊業。宗室等尤當勉力學習。臣驗試襲職章京。大半生疎。皆由王貝勒貝子公襲封章京品級時。例祇將嫡子承襲。如無嫡子。始於庶子內以居長者承襲。因此嫡子恃有一定。庶子又因無分。均不用心勤習。迨襲職後。愈不知勉。若不畧為變通。則積習日下。皆至庸懦無能。查八旗襲職之例。不論嫡庶。惟以長子承襲。如

長子庸劣。家譜內以不堪入選聲註。即於衆子內揀選帶領引見。令其承襲。請嗣後王以下奉恩將軍以上。子嗣年已及歲者。仍照例考試。封以應得品級外。倘遇缺出承襲。交管理宗人府事務之王公等。不論嫡庶。惟將人去得。長於騎射清語者。揀選數人。註明嫡庶。帶領引見候旨。再年末及歲之章京等。並請入宗學習騎射清語。俟及歲後考選當差。如學藝平常。給半俸留學。一二年後再加考驗。

如尚無長進。即叅奏出缺。另於伊等弟兄內揀選承襲。得旨。此奏是。如所議行。○理藩院奏。科爾沁親王色旺諾爾布旗內。原任輔國公拉里達之公爵。應否准其承襲。得旨。拉里達之公。其從前承襲。原非軍功効力所賞。因隨朕於內廷圍場。行走多年。朕特恩予封。非軍功封爵可比。額勒哲依著承襲一等台吉。伊若能奮勉。朕仍可以施恩。○以武備院卿五霖。為內務府護軍統領。仍兼武備院卿。○

乙巳。遣官祭黑龍潭。

昭靈沛澤龍王之神。玉泉山。

惠濟慈佑龍王之神。○遣官祭賢良祠。○刑

部奏。查誣告律內。如所誣並非斬絞罪名。其被誣本人。因拖累拷禁致死。律無明文。是以條例內。比依誣告人因而致死。隨行有服親屬擬絞。但以被誣之人。竟比之隨行有服親屬。實未妥協。請改為誣告人因而致死。被誣之人。委係平人。及因拷禁身死。或將案外

之人。拖累拷禁致死一二人者。均擬絞監候。其比依隨行有服親屬數字。全行刪節。從之。
○丙午。改鑄奉天錦州理事通判關防。為管轄興京等處理事通判關防。從府尹耀海請也。○丁未。

上詣暢春園。問

皇太后安。○戶部奏查銅船運京。遇有封閉封峽起剥等事。例限不在扣算之內。而其情實所時有。請嗣後令該督撫查明取結咨部。准

其扣除。至守風守水。舊例均未議及。或遇風信陡發。水勢暴漲。必令冒險前進。於運銅所關甚重。亦請令該督撫確查咨部扣算。再滇銅運抵北河。起剥換船。時所不免。勢須分次遞進。不能全幫抵通。但自頭剥抵通後。全數運竣。向未定有限期。請嗣後責運員上緊剝運。如間遇糧船擁擠。或水淺阻滯。令運員先將實情報明地方官。加結報部。准其展限一月至兩月不等。逾限照例題參。從之。○予休

致貴州平越府黃平州重安司土吏目張純德子襲襲職。○戊申。

孝昭仁皇后忌辰。遣官祭

景陵。○光祿寺奏

聖駕祇謁

東陵。

泰陵。例備庫貯黃酒金器一分。奶酒一瓶。由兵部領取印票。委員齎送。恭查各

陵寢原有自行豫備器皿。似無庸另送。得旨是

○己酉。諭曰。翰林人員。向有外用道府之例。著大學士會同翰林院掌院學士。將材堪勝任道府者。揀選數員。帶領引見。○又諭前降旨令各督撫學政將俸滿教職。六年甄別一次。其堪膺民社者。出具考語保題。聽候錄用。老病曠職者。即行勒令休致。其餘各員。或尚有才堪任使。沈滯寒窳。及庸瑣衰頹。姑容應機者。是以亦令一體送部引見。以覈其是否確當。十餘年來。各省送到此等人員。率皆循

分供職。並無必須復加鑒別之處。即如今日吏部引見俸滿教職內。頗有龍鐘就衰之人。因其才力尚可。勉副司鐸。是以仍令回任。但念伊等官卑祿薄。或距京遙遠。跋涉亦殊不易。特限於俸滿之例。僕僕長途。伊等未必不以為苦。去歲因俸滿千總。壅滯年深。特降諭旨。令將候補候推留任等項。定以年限酌量去留。行之已有成效。今此等教職。與武職千總俸滿。大畧相等。自可仿照辦理。無庸概送引見。以示體恤。嗣後凡遇俸滿甄別之年。除保題勒休。仍照例舉行外。其年力才具。僅堪留任之員。與其徒勞往返。莫若多展數年之限。量加別擇。分定等差。按其年齒。以次遞汰。則中才尚可資策勵。而衰憊亦不致濫竽。於澄叙末僚。更為簡當。其應如何酌定章程之處。著大學士九卿詳悉定議具奏。○又諭曰。崔應階題請旌表烈婦邢氏等一本。援引雍正十三年冬季恩詔。各省皆然。未免故套相

沿於良法美意。殊未領會。國家令典。遇有孝子順孫。義夫節婦。覈其實行。如果堪膺旌獎。封疆大員。原可隨時據實題旌。以勵風化。若援遠年恩詔為例。是以激揚實政。轉成粉飾具文。致有司不過奉行故事。而小民亦且視為泛常。豈覈實表彰之意。著通諭各該督撫。嗣後旌表節孝。但應確覈事蹟。據實題請。勿得沿襲舊文。以致習焉不察。○又諭。據八旗大臣議奏。御史舒明條奏八旗文武官員兵丁。不能清語者。遇挑差使。不准列名一摺。內稱。現今遇會議回稟事件。俱用清語。如清語生疎者。概不准其保舉。舒明所奏。毋庸再議等語。清語係滿洲舊風。皆當奮勉學習。經朕屢降諭旨。今應如八旗大臣等所議行。嗣後凡有引見人員。朕親加試問。如不能清語。即為虛誣。伊等何以當之。將此明示八旗大臣。令其留心教誨。以復舊風。○諭軍機大臣等。泰寧鎮總兵賽音圖。前於行在接駕。因爾時

患病甚覺龍鍾。此時即使痊愈。其年業已衰老。恐難勝任。若復久病不痊。則

陵寢重地。豈容以病廢之人備員曠職。著即傳諭方觀承。令其查明該總兵患病情形。究竟如何。據實奏聞。以便另行簡補。○又諭日蘇昌題報逆犯楊秀園決過日期。并稱十二月二十九日。係停刑日期。應將違例決囚之海豐縣知縣劉紹汜職名。送部處分。並聲明應否免議。聽部覆一本。已批三法司知道。不必

交部議處矣。

向來刑名案件。如遇慶賀齋戒等日。例得暫行停止。原指尋常案犯而言。若叛逆重犯。情罪重大。決不待時者。自應於定擬奉旨之日。即行明正典刑。以昭炯戒。豈得拘牽時日。致稽顯戮。此輩狡黠性成。安知不因緩死須臾。致有乘間免脫。及畏罪自戕情事。於辦理重案。殊未允協。且如慶賀齋戒。按例遵行。一切政務。俱可照常辦理。處決重囚。有何闕礙。而必拘泥停止耶。著將此傳諭蘇

昌及各督撫知之。○軍機大臣會同八旗大臣。奏在京厄魯特官兵。願往伊犁者。共六十五人。除台吉宰桑之子。及現在當差者不遣外。其餘二十五人。准其移駐。惟自京起程。不無需費。請酌量給以應得俸餉。餘至熱河補給。並交兵部辦給車輛。其長途押送之大員。烏勒登請給俸一年。借俸一年。給馬十三。駝三。月給鹽菜銀十二兩。跟役十四人。各給鹽菜銀五錢。賞銀二兩。事竣馳驛回程。報聞。○

刑部奏。律有期親尊長毆卑幼至篤疾。勿論之條。伏思尊長若止依理訓責。及因事互毆。邂逅致傷。自應依律勿論。若尊長挾有嫌隙。故將卑幼致成篤疾。此其傷殘骨肉。與邂逅致傷迥殊。律例向無分別治罪明文。往往有明知可以勿論。有心殘害者。請嗣後將挾嫌毆卑幼至篤疾者。如兄姊。照毆死弟。妹。杖一百。流二千里。例減一等。杖一百。徒三年。伯叔姑。伯叔祖父母。外祖父母。照毆死姪。姪孫。外

孫杖一百徒三年。例減一等。杖九十徒二年半。不准仍照律勿論。從之。○陝甘總督楊應琚奏。臣於上年十二月內。奏覆伊犁茶封。如數運往。其茶價於該處官兵鹽菜銀兩內扣抵一摺。於本年正月十六日。奉到硃批。此係有益官兵之舉。但官項雖多節省。而陳茶變價。較此為如何。所奏尚未明晰也。查向來甘商交納官茶。如遇庫貯過多。即徵折色。每封折價銀三錢。若庫貯無幾。仍徵本色。自乾隆七年議徵本色。至二十四年。積至一百五十餘萬封。陳陳相因。易致霉爛。續經奏准調劑茶務。或搭放兵餉。或招商售變。亦以三錢為率。現在新疆需茶甚多。將官茶運往搭支。亦照內地每封扣銀三錢。並將腳價攤入茶本。於官兵鹽菜銀內扣還。較買自商人。實多減省。是官茶運至新疆各處。除應扣腳價外。其應扣茶本。亦係每封作價三錢。與內地搭放售變。均屬一例。但內地係零星銷售。而新疆

各處。係成總發運。且使遠駐官兵。同需利益。免受居奇。較內地陳茶變價。大有裨益。報聞。○蜀直隸乾隆二十八年分。蔚州被雹災地一百八十八頃七十八畝。萬全縣被旱災地六百一十四頃四十六畝。應徵額賦十之一。○庚戌。

上詣暢春園。問

皇太后安。○還宮。○辛亥。諭曰。大學士來保。前因患病辭職。已降旨令其善為調理。不必解任。原因內閣地清事簡。非專職六曹者。有必需盡諾僉行之事。自可無庸開缺也。今閱禮部本內。仍列兼管銜名。此則事近空文。殊非名實相副之義。倘該部事件。來保並未寓目。固不應率爾與名。如恐以奏牘徒列虛銜。而今在家調攝之人。每事必一一問白。又豈朕體恤老臣至意。所有來保兼管禮部及各處。俱無庸列銜。俾於大學士任內。安心頤養。副朕優眷。○又諭曰。劉藻摺奏貴州大計。應於

本年三月補行。但新任撫臣圖勒炳阿。約於二月始能到任。若不先期趕辦。勢必又請展限。現在應舉應劾人員。與督臣吳達善會商。秉公填註考語。即行具題等語。向來外省大計。督撫等於接替交代時。後任既以受事未幾。聲明展限。而前任又因受代將來。執行委卸。甚乖急公之道。該撫劉藻於圖勒炳阿未到之先。即將補行大計。先期迅速趕辦。於激揚大典。不致稽延。封疆大臣。能如此實力奉行。官事何難整頓。所奏深可嘉尚。劉藻著交部議敘。以示獎勵。○兵部奏查直省驛站奏銷。臣部先將冊開新收銀兩各款。行查戶部。與地丁冊造數目相符。然後覈算具題。戶部奏銷地丁。亦將驛站款項。行查臣部。近來驛道奏銷驛站。藩司奏銷地丁。但各沿舊式。聲叙不清。輾轉行查。一時難結。請嗣後驛道奏銷驛站。將動支藩庫地丁。及借支協撥等銀各若干。於新收項下詳細註明。藩司奏銷地

丁。亦將撥給驛站各項。逐一載入。則兩案覈對易符。可省往返駁詰。從之。○以翰林院侍講盧文弨。充日講起居注官。編修謝墉。署日講起居注官。○豁江西德化。彭澤。二縣。坍塌濱江屯地四頃七十八畝。有奇額賦。○蠲湖北沔陽。天門。二州縣。并沔陽衛。乾隆二十八年。被水災地。應徵額賦十之一。緩文泉。潛江。荊門。江陵。監利。竹谿。東湖。興山。利川。來鳳。十州縣。并荊州衛。勘不成災地畝額賦如例。○是月。江西巡撫輔德奏。豐城河道。在附省章江之南。當吉安。贛州。南安。臨江。袁州。五府之衝。其極險石隄土隄。均已改建修築。此外次險土隄段落。亦須均改石隄。惟一時經費浩繁。應於每年水涸農隙之時。將殘缺土隄。加培完整。樽節辦理。計各項歲修餘銀。歲可得二千數百金。足敷改築石隄三四十丈。即派員承修。陸續改築。或舊石隄遇有鼓裂。將酌改石工。緩俟下屆興修。次第籌辦。得旨。如

所議行。○大學士閩浙總督楊廷璋福建巡撫定長奏。泉州府西倉同知衙署勢極低窪。礙難棲止。查附近之石獅街民稠商聚。地方更屬適中。請將該同知移駐石獅。實於官民兩便。舊基舊料估抵外需費無多。毋庸動項。得旨。如所議行。○河東河道總督葉存仁奏。魚臺汎獨山湖東隄。被河波衝激。土坍石動。經前河臣張師載奏准。將坍卸最甚之一千一百餘丈。照西隄修砌碎石。惟土心未填。土項未築。碎石仍屬無靠。當諭承辦之員填築竣工。此外續被湖浪撞掣處。又有一千數百餘丈。應一律砌石簽樁。並將土心土頂在近湖水淺處。撈土填築。又滕汎朱姬莊迤北西岸隄工。臨河均係土餞。經張師載奏准。改砌碎石一百丈。今查尚有八十丈。亦應修砌碎石。上加海漫。三處均係急工。應在汎前趕辦完竣。報聞。○又奏。東省下河廳屬。向祇額設淺夫。並未設有河兵。前河臣張師載奏准。於

運捕泐三廳內。共撥河兵四十。專駐下河。自此下河遇簽椿下掃等事。有常川河兵可用。而淺夫時在工所目擊。亦多熟諳。惟是所移河兵。多係運捕泐三廳內土著之人。距下河五六百里至八百餘里不等。既不能攜帶眷屬。其餉銀又不足供兩處養贍。未免苦累。請嗣後遇運捕泐三廳有應補拔兵糧。仍將下河之兵。挨次撥回本汛頂補。所遺下河兵缺。即以淺夫選充。並請如河兵例。亦准由守拔戰。俾有進身之階。得旨。如所議行。○又奏。衛河遇伏秋水盛行。恩縣以南至臨清。館陶等州縣。全賴隄埝捍禦。查隄埝形勢太陡。亟應加幫埝根。使其底寬頂窄。惟上河下河兩廳所屬河道。共長五百餘里。計兩岸即一千餘里。若一律幫埝。工程浩大。應將河勢兜灣。頂衝受險之處。今歲先行加幫如式。並將斷缺卑窪者。一併修補。期於伏汎前完竣。其河形直順。岸高水平。段落。緩俟下次遞年加修。

得旨。覽奏俱悉。○陝甘總督楊應琚奏。甘省連城。紅山。古城。渠馬莊。四土司所屬地方。上年夏秋旱霜成災。土民向不輸納正賦。例無賑卹。今各該土司。援乾隆二十四年特恩。請借籽種。及三個月口糧。并聲明二十四年借過籽糧折色銀。緣二十八年復災。尚未全完。請將新舊借項。俱俟二十九年麥熟後。分作三年帶徵。查明實在缺乏戶口。每糧一石。折銀一兩。委員會同各該土司按戶散給。得旨。

實錄卷七十五

三

如所議行。○又覆奏。前任甘肅布政使吳紹詩。以上年甘涼等處偏災。奏請興修張掖等八州縣廳城垣。以工代賑。當飭司道查勘。內惟鎮番縣城。議請緩修。其張掖。永昌。高臺。碾伯。撫彝。隆德。涇州。七處。共需銀二十二萬八千餘兩。且各該處被災較重。均應動項興修。俾災民藉資餬口。得旨。如所議行。又奏。鎮番隣近邊塞。今東西北三面。內外砂與城齊。幾無城垣形跡。先當勸民剝運砂土。於近城處

種柳成林。俟足禦風砂之後。始可徐議修葺。

至鎮邑貧民。自可赴永昌等縣。就近傭工。得

旨。此法甚善。宣化府城。已得其利。宜亟力行

之。○署貴州巡撫劉藻奏。水城廳威寧州。兩

處年辦廠鉛甚多。向由該廳州雇馬馱運永

寧縣水次。惟相距各十有餘站。路遠鉛多。馬

易疲斃。每於畢節地方另雇接運。而該處非

其管轄。呼應不靈。查水城。威寧。畢節。皆大定

府所屬。請嗣後令水城。威寧。將不能徑達永

實錄卷七十五

三

寧鉛舫。運至畢節。交大定府接收雇運。至永

局交兌事宜。並在路未到之鉛。統令該府經

管督催。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之七百五

實錄卷七百五

七

大清高宗法天隆運至誠先覺體元立極敷文奮武孝慈神聖純皇帝實錄卷之七百六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申三月壬子朔軍機大臣

等奏由熱河派往伊犁兵一千其缺應由京

派補惟熱河八旗派兵每旗人數並未畫一

今未便倣照辦理請交八旗都統於滿洲蒙

古兵內均勻派撥報聞○又議覆護軍統領

宗室弘昫奏稱鄭家莊官兵移駐福州其空

閒房屋毀倉空地請暫交昌平州文武地方

官俟兵全數起程其屋交內務府其地仍交

昌平州兵丁原領器械城守尉佐領關防圖

記事竣後分交戶工二部查覈兵丁瑩地原

係恩賞。無庸回交。均應如所奏。至所稱現存房租。先交內務府。其恩賞兵丁銀造冊行戶部查覈等語。查房租與恩賞無二。應一併交部辦理。從之。○旌表守正捐軀之直隸安平縣民張富全妻徐氏。○癸丑祭

歷代帝王廟。以重修工成。

上親詣行禮。

御製重修

歷代帝王廟碑文曰。

歷代帝王之祀。其準古遷廟觀德遺意而推而放之者歟。書曰。七世之廟。可以觀德。疏家以謂世祧者迭遷。德盛者弗毀。蓋就一朝為言。而周禮鄭氏四類注稱。三王五帝九皇六十四氏咸祀之。繁露引為自近邇遠之明證。斯正合食所權輿。然漢魏以來。有司具儀。率求之肇迹建都。而不聞立廟。洎唐迄明。廟立而代以專祀。開初為常。其制又缺焉未備。我皇祖聖祖仁皇帝康熙六十一年。

勅諭禮官增祀。苟非失德失器。即蒙業守成者。皆得與饗。我

皇考世宗憲皇帝丕繼

先型。詳定位次。

臨御伊始。

親詣視成。著於

奎文者。慕悉。間攷舊史所紀。初守難易之辨。甚有折衷定論。以是對揚曩昔。所為法施於民者。不克兼。既其實。獨斤斤於

殿。於

門。於

坊。具顏之曰。景德景德焉爾。德故若是其偏而不舉耶。寅惟

祖

宗懋敬厥德。咸秩孔修。觀法之所存。即知戒之所寓。義至深遠。大雅不云乎。天難忱斯。不易維王。召公奭迪王祈天永命。一則云監於有夏。再則曰監於有殷。寢假入廟而徵統系。由

百世之後。等百世之王。一自昭代。概之皆名之為勝國。有不深厯夫屋與墟之微。而怵惕動容者哉。顧於其間。歷選

列辟。若稽古之化。浹烝人。治光往牒者。罔不穆穆棣棣。式在

几筵。崇異代同堂之報。故於世數之遷。而得其垂法於有永。稔乎此者。觀德之意。愈以畢然而興矣。

廟自雍正癸丑繕葺。距今且三十載。爰以乾隆壬午。出內帑金。庀而飭之。故事。瓴甌甃以純綠。茲特易蓋

正殿黃瓦。用昭烏奕。工告訖功。適屆甲申季春吉祀。祇承

家法。躬薦

新宮。已為長律述事。揭言其大指。會所司請製文。並鐫諸碑。復詳闡之如此。○幸圓明園。○太子太傅武英殿大學士來保遺疏聞。諭

曰大學士來保老成端謹。誠篤恪勤。年躋大耋。久任綸扉。宣力三朝。勤勞懋著。前以患病。特命御醫前往診視。並賜淺餌。以冀速痊。昨具摺請解閣職。降旨慰留。但令不必兼管部務。俾得從容頤養。茲聞溘逝。深為軫悼。著加贈太保。入祀賢良祠。並賞銀三千兩。辦理喪務。朕於初九日親臨奠醊。所有應得卹典。該部察例具奏。○甲寅

上詣暢春園。問

皇太后安。○諭曰。賽音圖現患足疾。年已老邁。著回京調理。俟病痊後。再行請給差使。所遺泰寧鎮總兵員缺。著滿保補授。○福建水師提督一等海澄公黃仕簡奏。廈門為商船雲集輿區。惟恐匪徒出沒滋事。及夾帶禁物。透漏課稅。故設立關部稽查。同知察覈。並輪派武職巡邏。防範已極嚴密。乃臣留心察訪。知該關於進出各船。不拘內地外洋。每船勒取番銀陋規。多寡不等。文武衙門。朋分收受。應

請簡派大員赴閩清查。得旨嘉悅。覽之。汝可謂知恩。朕亦可謂知人。○乙卯清明節。遣官祭。

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭。

孝賢皇后陵。

端慧皇太子園寢。○

上詣。

安佑宮行禮。○諭。現命尚書舒赫德侍郎。襄曰。修。馳驛會同前往福建。有查辦事件。所有隨帶司員。並著馳驛。○又諭。前因西陲辦理軍需。令陝甘總督駐劄肅州。以便調遣。迄今大

功久竣。新疆屯政。亦已酌定章程。而該督仍駐肅州。距西安會城較遠。於腹地屬員案牘。控馭轉多隔礙。朕意若將總督移駐蘭州。巡撫原署。則東西道里適均。不難居中節制。而甘肅巡撫。亦可裁汰。因於常鈞陞見。面詢情形。據奏。即應遵旨乘時移駐。始於體制允協。當經傳諭楊應琚。令其熟籌妥議。今據覆奏。與朕所見脗合。著將蘭州巡撫衙門。改為督署。令該督移駐。並兼管巡撫事。無庸更設巡

撫。所有原設撫標。即改為督標。其舊設西安督標。改為提標。即令固原提督回駐西安管轄。至所奏河州鎮總兵。改為固原總兵。並摺內條議各標營弁兵一切裁汰撥給事宜。該部詳悉定議具奏。尋議固原係平涼重鎮。應將河州鎮改駐其地。河州改設副將。以花馬池協標移駐。其花馬池改設叅將。以鎮番營移駐。又蘭州應添設城守營。請以甘肅靖遠下馬關叅將等官改駐。得旨允行。○又諭曰。

齊巴克扎布所報穆斯恰等處地方木植。派和爾精額查看。擇其可用者。給與官價運用。其餘照烏蘭布通木植。令民人砍伐作價。以爲窮蒙古生計。○又諭。據成衮扎布等奏。革退台吉諾爾丕勒。自備資斧効力。一應差務。勉勉行走。今已四年。應如何辦理之處。請旨。等語。諾爾丕勒。原係有罪。自備資斧効力之人。伊今知罪。勉勉行走。並無過失。四年已滿。著施恩寬免其罪。遣回游牧。○諭軍機大臣等。現派舒赫德。同裘曰修。有前往福建查辦事件。裘曰修。自江西起程北上。此時當已在途。著傳諭迎寄裘曰修。令其奉到諭旨。即由驛取道。迎赴舒赫德。相見時。將此事端。委告知會辦。裘曰修。直隸水利收工事宜。原應順路查勘。今已命阿桂至期。自京前往。會同方觀承辦理。裘曰修。竟可毋庸以此爲念也。○又諭。頃聞得福建閩海關。有每年勒取各船銀錢。自總督以下。朋分收受之事。現已派員

前往徹底查辦。自必水落石出。楊應琚從前曾任閩省。一切自必稔知。著傳諭該督。即將向來實在情形。據實速行覆奏。此係向行陋規。即現任朕亦不欲深究。但欲知其詳悉耳。楊應琚毋得稍存瞻顧。○又諭。福增格係前任福州將軍。管理關務。朋分陋規之事。著傳諭令其明白具奏。○又諭。據明瑞等奏。稱臣現駐伊犁。辦理將軍事務。若蒙恩留臣多効力數年。臣情願挈眷駐劄。其叅贊領隊大臣等。現在奏請挈眷者。如蒙俞允。請酌其得暇時。不拘先後。料理起程等語。所奏甚是。伊等輪替來京。領朕訓旨後。即可攜眷前往。著派阿桂往署伊犁將軍事務。阿桂到後。即令明瑞來京挈眷。再令阿桂回京。昨命觀音保往伊犁。更換愛隆阿。今愛隆阿願挈眷再往。著照所請行。觀音保仍以領隊大臣行走。但阿桂未能即赴伊犁。而鄂津。伊勒圖。伍岱。各以挈眷奏請。著交明瑞等。酌定先後。分班來

京順帶家口。回至伊犁。該處孳養官兵甚多。今若大臣亦遷移家口。可為官兵標準。甚屬有益。但路遠費多。恐力有不及。著准其馳驛前往。在內地交兵部。及各省督撫辦理。口外著楊應琚酌量辦給馬駝帳房器什。以利進行而示體恤。○又諭。據明瑞等奏索倫總管諾門察領兵五百名。至烏里雅蘇台。因馬力平常。借官駝二百五十隻。沿途倒斃一百五十隻。應於伊等月糧內坐扣賠補。可否懇恩酌定分數寬免等語。此項倒斃駝隻。例應賠補。但因攜帶家口。以致疲乏。著加恩寬免十分之五。其應賠之項。若即令坐扣。未免拮据。著俟一年後。再行扣補。將此傳諭明瑞等遵行。○又諭。伊犁厄魯特兵。食錢糧者。止二百名。餘丁皆官給孳生牲隻。今自熱河移駐之達什達瓦。厄魯特五百名。其中食錢糧者多。而餘丁無幾。似覺厚薄不均。但達什達瓦屬人。受恩已久。設該旗錢糧缺出。亦准伊犁厄

魯特餘丁挑取。伊等又覺生計稍艱。著傳諭明瑞俟阿桂到時。會同查明兩處餘丁數目。通融籌算。將來伊犁餘丁。如何酌增實在錢糧之處。定議辦理具奏。○豁江蘇江都甘泉揚州鎮江四州縣衛。挖廢田三頃七十一畝。有奇額賦。○丙辰。禮部議准。河南布政使佛德奏。稱武職四品以上。始得帶用朝珠。今各省營衛守備。及候補候推守備之千總。並防禦各員。率多僭用。請禁止。從之。○蠲山東濟

寧魚臺金鄉城武鉅野及濟寧臨清七州縣衛。乾隆二十八年分被水災地。應徵額賦有差。○予故輔國公車登扎布。致祭如例。○丁巳。

上詣暢春園。問

皇太后安。○祭

先蠶之神。

皇后親詣行禮。○諭。據託庸奏。安省應修城垣三十四處。現在收捐銀數。已敷應用。其餘具

呈未收銀兩。聽士民陸續完納等語。該省勸輸報捐。原為估修城工之需。既已報捐足數。自應即行停止。所有報捐未收銀兩。亦可聽其自便。至修理城垣。所以衛民在急公者。既得邀項帶以榮身。而無力貧民。亦可藉工餬口。其事洵屬有益。江蘇省前曾奏准一體捐修。昨浙省亦經奏明。仿照辦理。戶部以三省不便同時報捐議駁。今安省既停止收捐。則此項捐例。自應歸江蘇專辦。俟江蘇收足後。

遞及浙江。此外各直省。如有應修城工。費用浩繁。必須捐修者。亦可隨時奏聞。以次仿照遞辦。將此通諭該督撫知之。○又諭據蘇昌叅奏。遂溪縣知縣管唯木。於梁舉朝毆斃張氏一案。妄斷屍子陳國英自行挖斃母命。經委員另審。始得實情。請將該員革職審擬一摺。管唯木遇人命重情。並不悉心研鞫。竟以減倫寸磔之罪。妄行誣斷。情殊可惡。著革職交該督同案內有名人犯。一併嚴審定擬具

奏其能平反諸有司。著交部議叙。○諭軍機大臣等。蘇昌奏遂溪縣監生梁舉朝毆死陳國英之母張氏。狡稱陳國英自行毆挖致斃。該縣管唯木不加查察。妄斷屍子陳國英弑母。錄供詳報。經委員覆審。始得實情。一摺。梁舉朝毆斃人命。原係鬪毆擬抵之案。其誣斃他人。希圖脫罪。已屬狡獪。乃竟反誣屍子以減倫大逆。寸磔重辟。實係從來未有之事。且其行賄關通種種不法。均屬異常兇狡。若不

即正典刑。何以快人心而彰國憲。著傳諭該督將梁舉朝嚴加審訊。從重問擬。以昭炯戒。至該縣管唯木。於此等人命重案。並不悉心研鞫。竟以弑母重罪。妄行審斷。若非該督委員另審。幾至奇冤莫白。此等劣員。豈容僅以革職完案。著審明該員是否徇情故入。及有無入已贓私。從重治罪。其受賄之縣役等。較尋常胥吏犯贓情罪尤甚。亦著一併嚴審。從重定擬。○又諭今由熱河派出厄魯特移駐

伊犁其應用馬匹已諭令在張家口外支給。但由本處起程亦必需用車輛著交道員揆義同地方官迅速妥辦其車價即出自本人整裝銀內有不願雇車者聽其自便並著烏勒登瑪瑞會同商議。○鑲黃旗蒙古都統勒爾森奏拜唐阿齊努渾先於副都統任內在軍營支領鹽菜銀未完應將伊及伊子每月錢糧坐扣一半作速完項得旨此等銀兩若係別項朕必施恩豁免齊努渾從前同將軍徹布登扎布前往伊犁稍遇一二賊酋即退縮不前反被劫掠如許馬匹殊屬不堪伊欠此項銀兩不應豁免著該旗即照所奏坐扣完結。○緩甘肅紅水伏羌會寧碾伯高臺河州鹽茶七廳州縣乾隆二十八年分被旱災地應徵額賦。○戊午吏部議覆江西巡撫輔德奏稱州縣於地方被竊向有給事主印票自緝陋習最易滋事請飭部臣嚴定處分通飭各省應如所請嗣後地方官如濫給印票

實降一級至因票別滋事端實降二級如釀人命革職上司依失於查察例議處從之。○已未諭軍機大臣等前據阿思哈奏正月下旬以後各屬均得時雨等語距今又閱兩旬京城及直隸山東等處俱於二月十九等日以後連得透雨而豫省未見奏到未知近日曾否又得雨澤著傳諭阿思哈速即據實奏聞以慰廑念尋奏二月中旬暨三月上旬各屬均得雨二三四五寸不等麥苗菜花滋長暢茂得旨以後不可如此遲滯然得雨分數究不為優目下不致望澤乎速奏來。○豁陝西臨潼涇陽鄜州坍沒民屯地六十五頃七畝有奇應徵額賦。○庚申上詣暢春園問皇太后安。○臨故大學士來保第賜奠。○還宮。○刑部議覆廣東布政使胡文伯奏稱粵東秋審向例司道豫期會覈實為慎重而各省未能畫一請嗣後每年臬司覈辦秋審先期

主稿陸續移咨在省司道。虛衷會商。不得臨期造冊移送。視為具文。得旨依議速行。○蠲江蘇銅山。沛縣。蕭縣。邳州。睢寧。海州。沭陽。徐州。八州縣衛。乾隆二十八年。分被水災。地應徵額賦十之一。並緩蠲餘及勘不成災地畝。各項銀米如例。○豁安徽虹縣靈璧。泗州。並泗州衛。低窪田地。應徵未完俸工。漕項驛站。各項銀米。○旌表守正捐軀之浙江長興縣民阮成章妻蔣氏。○辛酉。諭軍機大臣等。前

曾降旨。涼州留副都統一員。莊浪留城守尉一員。管束西安移駐兵丁。但伊犁移駐兵丁甚多。應派大員管理。興常著授為涼州副都統。勒克現往伊犁。明年回時。應帶第二起兵丁。再往伊犁。著照新疆大臣例。攜帶家眷。一同駐劄。其將軍既已裁汰。巴祿著即來京。○士戍。

孝賢皇后忌辰。遣官祭

陵寢。○諭曰。尚書阿桂現在出差。其工部及城

工事務著兆惠署理。○又諭曰。賽音圖著在頭等侍衛上行走。○又諭曰。葉存仁等。奏署濟寧州知州陶淳。借工漁利。折收夫價。致差役毆斃民人。一摺。該州以辦理民修水利工程。濫行科派折價。自肥囊橐。情甚可惡。非尋常婪索劣員可比。陶淳著革職。交與該督撫等。將案內款犯。即嚴行鞠訊。定擬之日。一面即將陶淳。拏交刑部治罪。以昭懲創。○又諭曰。四川總督阿爾泰。著來京陛見。有面交

辦理事件。其總督印務。已令尚書阿桂馳驛前往署理。阿桂現有西寧查辦之事。阿爾泰俟其到川交代後。再行起程。○諭軍機大臣等。據七十五奏。番人郭羅克瑪克蘇爾。袞布告稱。現在郭羅克等。肆行盜竊。從前提督岳鍾琪。曾將伊父用為頭目。管束不致散處為匪。今若將瑪克蘇爾。袞布授為頭目。可以約束。應請特派大臣。前往查辦等語。此事雖據瑪克蘇爾。袞布稱。岳鍾琪曾於三部內。將伊

父授為頭目。但當時所派番目。是否足資彈壓。今若將瑪克蘇爾衮布統攝別部番衆。果否足杜盜匪之原。雖在該番不無借約束衆人。自圖自利之意。但現在地方。果有盜匪竊發。理應酌量辦理。且近年金川。與附近番寨。時相構釁。雖經該督屢次摺奏。而一切事宜。正須面為籌議。現派尚書阿桂馳驛先赴西寧。會同七十五。及章嘉呼圖克圖。將選派頭目管轄之處。辦有端緒。即令其前來四川。暫攝督篆。阿爾泰俟其到省。交代起程。任內一切應辦之事。可即告知阿桂。令其接辦。在阿爾泰到京。面奉指示。則回任辦理。更易遵循。而阿桂在川。既悉情形。將來回京籌酌。於該省事務。尤多裨益。將此詳諭阿爾泰知之。○豁浙江江山縣。坍沒田地山塘。共七十頃七十七畝。有奇。應徵額賦。○阿巴哈納爾扎薩克固山貝子班珠爾故。以其子二等台吉達克丹朋蘇克襲爵。○癸亥。

上耕耤詣

先農壇行禮。更服。至耤田所。

躬耕三推。復加一推。

御觀耕臺。命裕親王廣祿。理郡王弘曉。信郡王如松。各五推。吏部左侍郎德保。戶部右侍郎安泰。禮部左侍郎五吉。兵部右侍郎觀保。刑部右侍郎蔡鴻業。工部左侍郎范時紀。左副都御史寶麟。通政使孫灝。大理寺少卿德成。各九推畢。順天府府尹。率農夫終畝。賞資耆老農夫如例。○是日。哈薩克阿布勒巴木比。特使人亨集噶爾等十二人入覲。跪迎。

聖駕於午門外。

上溫語慰勞。賜冠服銀幣有差。○諭軍機大臣等。昨蘇昌請發知縣十員摺內。乃將候補候選兩項。分別各揀五員。甚屬膠柱鼓瑟。其意即以候選多係新任。欲得參用。候補習練之人。於地方有益。即聲明於兩項人員內。請挑十員。在部臣亦何難酌量揀發。而必強為吟

域乎。蘇昌前經歷任部院。不應拘墟若此。著於該督奏事之便。將此諭令知之。甲子。上御乾清門聽政。○詣暢春園。問

皇太后安。○幸圓明園。○綏遠城將軍宗室蘊著奏。綏遠右衛歸化三處副都統。年終輪班進京。查綏遠副都統與將軍同城。歸化雖祇副都統一員。地近綏遠。遇副都統進班。皆可無庸署理。惟右衛距綏遠歸化稍遠。其副都統進班。請令綏遠副都統前往暫署。綏遠事

歸將軍。如綏遠將軍同值進班。即停右衛副都統進班一次。得旨好。○乙丑。諭曰。明德奏。新疆佐雜俸滿。請交該處辦事大臣甄別。移咨督撫衙門。照例辦理一摺。佐雜人員。既派往新疆辦事。其人之優劣勤惰。內地原無從得悉。自應交該處大臣。就近考覈。著照所請。嗣後此等人員。遇有六年俸滿。應行甄別者。俱由新疆辦事大臣分別。移咨督撫照例辦理。以示激勸。該部即遵諭行。○丙寅。理藩院

奏鄂爾多斯多羅貝勒齊旺班珠爾二旗內。年已及歲。未得等次者。一等台吉之子三人。二等台吉之子一人。三等台吉之子三人。四等台吉之子十人。均應授為四等台吉。從之。

大清高宗法天隆運至誠先覺體元立極敷文奮武孝慈神聖純皇帝實錄卷之七百六

大清高宗法天隆運至誠先覺體元立極敷文奮武孝慈神聖純皇帝實錄卷之七百七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部總纂官經筵講官太子太傅文淵閣大學士文淵閣領閣事稽察欽奉 上諭事件處管理

世襲騎都尉軍功加十九級隨帶加二級又加二級臣董浩內大臣戶部尚書總纂官滿洲都統軍功紀錄五次

世襲騎都尉軍功加十九級隨帶加二級又加二級臣董浩內大臣戶部尚書總纂官滿洲都統軍功紀錄五次

專纂紀錄十四次臣德馨經筵講官太子少保工部尚書紀錄六次臣曹振鏞等奉

敕修

乾隆二十九年甲申三月丁卯

上詣暢春園問

皇太后安○定黑龍江佐領等官進京引見例諭聞索倫達呼爾等遇有引見該將軍大臣等不論曾否出痘即遣來京以致上兩年俱傷六七十人伊等未經出痘者當遣往木蘭圍場引見著急速行文黑龍江將軍嗣後未經出痘者不必令其來京如必應引見之佐領等官遣往木蘭圍場引見如驍騎校等官擬定人員祇須詳註履歷勞績並聲名未經出

痘緣由報部奏補如應襲世職官員者止繕綠頭牌進呈候旨其情願引見者令往木蘭引見著為例○刑部議覆廣東按察使赫昇額奏稱平人賄罪頂替定例照本犯罪名一律全科如子殺人而父認兇律例並無明文請嗣後有父代子認兇者其子俱照謀殺父母已行律斬決等語查父認子兇固由其父愛子情切而為子者竟使其父無辜入罪實為天理難容人心共憤自當嚴立科條但律例向無明文而罪名究有差等若如所請概擬斬決未免漫無區別應請照本犯罪名各加一等科斷除原犯斬絞決者無庸議外如犯斬絞候者其子即擬以斬絞決軍流徒杖各照例遞加從之○戊辰諭曰蘇昌題叅海豐縣知縣劉紹祀捏報絞犯簡爾岳在監病故一案簡爾岳以劣弁恣意勒索擬絞在監該縣既不能留心防範致令自縊疎縱之愆已難解免乃膽敢捏報病故肆行欺罔若不

嚴加懲創。將狡獪重犯。誰不思乘間自戕。而看守庸懦之員。並得以捏飾倖免處分。甚至玩法作奸。無所底止。何以儆官邪而彰國憲。劉紹紀著革職。挈交刑部治罪。其覆檢之知縣嚴源。東公究出實情。毫無瞻徇。著該督撫出具考語送部引見。候朕降旨。蘇昌辦理此案。執法公正。赫昇額能據實稟訪。俱屬可嘉。著一併交部議敘。為地方大吏實力奉公者勸。○諭軍機大臣等。昨據方觀承奏明。保定

筵宴哈薩克來使呼岱已爾氏等一摺。雖係按照往例辦理。但此等來使。迺尋常每歲所有。非伊等部內初次入覲特遣蘇勒統及大頭目等可比。所有經過地方。祇須留心照料。給與日用口食足矣。無庸特設筵宴。致滋煩費。其嗣後遇有必須加恩優待。示以觀瞻之處。則另候朕特旨遵行。著於各該督撫奏事之便。傳諭知之。○鑄給山西水泉營守備鈐記。山西渾源城守備鈐記。山西靈邱路都司

關防。從巡撫兼管提督和其衷請也。○己巳上詣

安佑宮行禮。○宗人府奏。正藍旗奉恩將軍宗室永武病故。其嗣子果中布。請旨應否承襲。得旨。宗室永武之奉恩將軍。與軍功効力承襲世職不同。今已身故。並無親子。例應不准承襲。永武奉恩將軍世職。著不必承襲。嗣後有似此者。俱不必承襲。○庚午。諭。現今京城撥兵一千。駐防熱河。伊等之缺。無庸挑補。但

八旗世僕。所賴者官米。今一年之間。將官米裁去二萬二千餘石。不但於旗人生計有虧。且使京畿米價昂貴。與衆皆無裨益。今加恩將一千兵丁。每歲應得之二萬二千餘石米糧。照從前所裁鎗營兵丁應得之米。分別賞給養育兵。應如何分給之處。八旗大臣定議具奏。○又諭。曰。九十七所遺鑲黃旗蒙古副都統員缺。著八十五補授。仍著署理正藍旗滿洲副都統烏勒登兼管正藍旗滿洲副都

統員缺。著常在署理。○予休致雲南永北府北勝州土州同章祖蔭子蔭陞襲職。○辛未上詣暢春園。問。

皇太后安。○諭。據尹繼善等奏。覆議弛洋禁絲。勛。以便民情一摺。前因內地絲勛。網緞等物。價值漸昂。經御史李兆鵬等先後條奏。請定出洋之禁。以裕民用。乃行之日久。而內地絲價。仍未見減。且有更貴者。可見生齒繁衍。取多用宏。蓋物情自然之勢。非盡關出洋之故。

曾降旨江浙閩廣各督撫。令其各就該省情形。悉心體察。將應否即行開禁之處。詳悉妥議具奏。今尹繼善等籌酌定議。奏請弛禁。而莊有恭並稱。前撫浙時。體察杭嘉湖三府民情。以絲勛弛禁。為便等語。江浙之情形如此。則餘省亦可概見。蓋緣出洋絲勛。本係土絲。及二三蠶粗糙之絲。非腹地綢緞。必須精好物料可比。徒立出洋之禁。則江浙所產粗絲。轉不得利。是無益於外洋。而更有損於民計。

又何如照舊弛禁。以天下之物。供天下之用。尤為通商便民乎。況所產粗絲。既不准出洋。勢不得不充雜於頭蠶好絲之內。一體售賣。於民間組織。尤多未便。且喫咭喇。伽喇巴等國。俱先後以織絨不供。懇請賞給貨買。俱已特旨准其酌帶配用。是外洋諸國。取給於蠶絲者。正復不少。亦宜一視同仁。曲為體卹。現在新絲將屆收成。所有出洋絲勛。即著弛禁。仍遵照舊例行。其中各省情形。或微有不同。

應如何酌定章程。及設法稽查之處。俟各該督撫奏齊時。該部詳悉妥議具奏。尹繼善等摺並發。○諭軍機大臣等。山西雁平道張耀曾。以俸滿來京引見。已有旨令其回任。該員久任監司。平日居官如何。及辦理地方一切事務。是否妥協之處。明德向在晉省。必能深悉。即和其表到任以來。於該管道員才具操守。亦必體察有素。著傳諭該撫等。即行據實具奏。○大學士九卿議奏。嗣後俸滿教職。除

分別保題休致外。其應行留任人員。請令督撫學政覈其年力才具。堪以策勵者。列為勤職。僅堪司鐸者。為循分供職。咨部註冊。俟再滿六年。其勤職中有堪膺民社者。准其保題如照常奮勉。仍為勤職。少次於前。改為循分供職。循分供職中。有較前奮勉者。准拔置勤職。如照常辦事。仍為循分供職。若才力衰庸。即令休致。每遇六年。均照此甄別。免其送部引見。再年逾七十以上。衰邁者多。如有精力尚健者。祇准展限五年。概令休致。從之。○軍機大臣等議覆雲貴總督吳達善奏稱。向隸永昌府之耿馬土司。赴府計六百三十里。始入內地。如取道順寧府之雲州地方。至內地止四百五十里。又隸永昌之孟連。猛猛二土司。亦距順寧為近。均請改隸順寧。其向由永昌徵額。一併改歸耿馬土司一切事件。向報迤西道。由道移司。請嗣後遇緊要邊情。報永順鎮道。暨順寧府會商速辦。常行事仍報迤

西兼報順寧府備案。均應如所請。得旨。依議。速行。○刑部奏查律例。因姦害命治罪各條。固已周備。惟姦夫姦婦因事敗露。相約同死。有姦婦逼令姦夫買藥同飲。及逼令持刀割死。而姦夫或因人救傷。輕得生。並有已經致死。姦婦而私行潛逃者。其姦夫作何分別治罪。律例並無專條。外省定擬。往往輕重參差。請嗣後凡商謀同死。如將姦婦致死。而姦夫並無自戕傷痕。同死確據者。覈其實情。各擬本律。不得但因同死。虛供稍貸。若確係業經自戕。或因人救傷。輕未死者。將姦夫照犯罪時雇人傷殘。因而致死。減闕殺一等律杖一百。流三千里。若另有拐逃別情。酌擬從重。從之。○又議覆左副都御史羅源漢奏稱。近來州縣自理詞訟。如戶婚田土細事。文卷審斷後。不黏連鈴印。輒行發房。日久或遺失不全。或抽換舞弊。遇舊事復發。往往查檢無據。別滋訟端。請嗣後將呈詞供勘。概令黏連成帙。

鈐印存案。應如所請。並令州縣加結造入交代。且嚴定處分。如不黏連卷宗。降一級留任。黏連而不鈐印。罰俸一年。因不黏連鈐印。致有抽換等弊。降二級調用。內外審理詞訟衙門。均一體遵照。從之。○直隸總督方觀承疏。報。乾隆二十八年。開墾順天永平宣化三府並遵化州屬熟荒地六十二頃四十八畝。順天府屬旱地六十九畝。正定府屬水地二頃七十畝。薊州老荒地四頃三十七畝。宣化縣河灘荒地一十五頃六十三畝。各有奇。分別升科。○壬申。旌表守正捐軀之福建浦城縣民關良徵妻夏氏。○癸酉。軍機大臣等奏。上年原任將軍福增格奏。請開除福州另記檔案兵一千。揀補由京派往之人。查福州駐防兵。原以五百人為一隊。如將由京撥兵一千。仍以五百人按隊前往。勢須派員押送。事涉紛繁。請以二百五十人為一隊。交該處來京便員帶往。再此項一千原額內。有步甲二百

名。專充堆撥巡更差使。原奏留於末隊出旗。今據將軍明福奏稱。若留後開缺。則前三撥到福京兵。俱得挑為前鋒領催馬甲。盡以末隊中二百人挑補步甲。未見平允。前據署將軍副都統清保奏。請於四隊內。均勻挑補。自較得宜。惟現由鄭家莊已派二百八十人。其原食錢糧。俱優於步甲。如到彼轉行裁減。亦礙難辦理。應交該將軍。將此項二百八十人。仍補前鋒領催馬甲。其步兵二百。於下次所遣兵額內。交該部八旗。酌選閒散餘丁。遣往充補。從之。○叅贊大臣納世通奏。喀什噶爾伊什罕伯克阿布都喇伊木。原係布拉呢敦。霍集占信用之人。因大兵臨城。始行降附。每令屬人赴外藩貿易。漏洩內地事務。又據阿奇木伯克噶岱默特告稱。回人噶帕爾。往霍罕貿易。與彼處買賣頭目拜默特等。言及前年為阿濟比之事。大臣遣使索還侵地。阿布都喇伊木。密遣親信屬人哈勒默特。私向額

爾德尼云。此次內地人來。專為阿濟比游牧。並未帶有兵馬。爾不必遠迎。若索取侵地。不妨應允。將來給還與否。再為商酌等語。又詢之阿奇木伯克素勒坦和卓。亦稱其人難信。臣等查阿布都喇伊木。生性奸詐。其親屬頗多富足。及現為伯克頭目者。又其婿墨氏敏。於邁喇木。呢雅斯叛案內。即已有名。亦非安靜之人。今或令阿布都喇伊木。與阿克蘇伯克薩里對調。或發往伊犁。同茂薩辦事。庶不致滋生事端。諭軍機大臣等。此次入覲之伊什罕伯克。阿布都喇伊木。據叅贊大臣納世通指名叅奏。著派侍郎五吉。馳驛前往審訊。仍寄知經過各處大臣。俟阿布都喇伊木到時。即行拏問。并其跟役。交待衛訥蘇。會同看守。五吉到時。曉諭回衆人等。阿布都喇伊木。因有事被叅。是以押赴阿克蘇質審。與爾等無涉。再納蘇帶阿布都喇伊木赴阿克蘇。沿途務須嚴加看守。勿令知覺自戕。又諭曰。

阿布都喇伊木。歸附以來。朕因將軍大臣等保奏。加恩用為伊什罕伯克。茲來京入覲。已悉其人居心叵測。如噶岱默特所告。其言果實。豈可仍行調補。應從重治罪。示衆。適詢問永貴。亦言其人難信。即應辦理。又詢之挖穆齊圖。據奏稱。伊至霍罕。額爾德尼並未遠迎。則情節相符。若不從重治罪。不足以示懲創。著五吉帶領挖穆齊圖。往阿克蘇會同納世通審訊具奏。納世通奉到此旨。計五吉等將到。即將應行詢問回人。帶至阿克蘇對質。如情罪屬實。阿布都喇伊木。著即正法。仍降旨曉諭衆回人。我大國之例。凡私將內地事務。漏洩與外藩者。其罪即同反叛。妻子亦應從坐。因阿布都喇伊木。新經歸附。將其家口免死。查明解京。至墨氏敏。亦不可留於彼處。著傳諭納世通。俟辦理阿布都喇伊木後。與噶岱默特酌議。再行解京辦理。此外如有黨惡之人。一體查明解送。○甲戌。諭軍機大臣。

等。前因閩海關有陋規番圓。各衙門朋分收受一案。因命舒赫德等前往查辦。並有旨傳詢楊應琚。福增格。令其據實具奏。旋據楊應琚覆奏。伊在閩年餘。實無其事。今福增格奏到。則稱進口出口船隻。向有汎地兵役巡哨人等掛號紙筆飯錢各費。尚有相沿未盡之陋規。此外並無抑勒侵分之事等語。前黃仕簡所奏。乃海關有各衙門朋分銀兩。為數累累。自當徹底根究。今楊應琚覆奏。並無其事。

在伊或離閩省日久。至福增格甫經離任。且關務是其專責。豈有全無見聞之理。今因傳旨詢問。伊心懷畏懼。輒將向來巡哨人役尋常等費。故舉入奏。此等陋規。各關大率相同。福增格尚且和盤托出。如果有朋分之項。諒不敢稍存隱諱。看來此事不盡屬實。現在楊廷璋陛見來京。前曾諭舒赫德。倘途遇該督。不必宣露。今既事涉疑似。不妨面詢之。楊廷璋轉可悉此中實在緣由。而楊廷璋面告情

形。亦可知大半。似更易於查辦。可將此傳諭舒赫德。並令裘曰修知之。若楊廷璋已北上。則不必致信詢問。○又諭。據成衮扎布奏。移駐科布多一摺。經軍機大臣議。科布多現駐叅贊大臣。修城屯田諸務。已足敷辦理。至卡上諸事。自應將軍管轄。請令成衮扎布。仍駐烏里雅蘇台。其發往屯田兵丁。請俟科布多修城事畢。再行酌派等語。烏里雅蘇台。係緊要之地。糧餉馬匹牲隻甚多。著成衮扎布不

必移駐科布多。如科布多尚需屯田兵丁。亦可另行酌調。不必派烏里雅蘇台兵前往。即傳諭成衮扎布等遵照辦理。○國子監奏。乾隆三年奏准。先賢有子。升配大成殿。為十二哲。應與諸賢一例。稱子不名。至今未經改書神牌。請擇吉舉行。並通行各直省學宮。一體更正。從之。○予故固山貝子羅布藏。致祭如例。○乙亥。

上詣暢春園。問

皇太后安。○諭近聞各部院辦事。惟司員說堂畫稿。而各司筆帖式。經年不得常見堂官。其所熟悉者。不過跟班數人而已。筆帖式將來俱可陞用司員。若該堂官未經謀面。遇有保題陞用之處。止以司官之言為憑。於理未協。該堂官自應於筆帖式內。留心察看。遇有堪以造就。尚能辦事者。時加訓勉。以期有成。嗣後各衙門司員說堂畫稿時。並令筆帖式隨同行走。仍就各該處筆帖式人數多寡。酌定班次。輪流上堂識認。則該堂官自可悉其才具。因材造就。如有怠惰庸劣之員。該堂官亦可隨時叅革。○又諭暢春園。聖化寺等處。皆係奉宸院管理。而補放官員。又係內務府帶領引見。似此專管無人。遇事互相推諉。轉恐貽誤。自應如圓明園。靜宜園。派員專管。嗣後此等地方。不必令奉宸院管理。補放官員。亦不必內務府帶領引見。著為例。今派四格。福隆安專管。○又諭曰。蘇昌奏安南行劫匪船

一案。現在獲解審訊。此案夷犯衆多。若必須聽候部覆。久羈關口。恐有疎縱之虞。請於審定確實後。即先行正法等語。外夷匪犯案件。辦理原與內地不同。該督既稱夷犯衆多。羈禁日久。恐有疎虞。著照所請。於定案後。即一面正法。一面奏聞。○禮部奏。朝鮮國土兵金世永等六人。殺傷披甲常德身死一案。該國王李昫審錄供情。尚屬含糊。未便遽成信讞。請簡員會審。得旨。著派刑部司官一員。前往盛京會審。餘依議。○又奏。朝鮮國民人朴厚贊等十人。犯越內地一案。據該國王李昫移咨。將朴厚贊等罪名。并疎防文武各官處分。分別定擬。請交刑部等衙門覈結。至該國王邊防疎忽。應否照例議處。得旨。依議。該國王免其處分。○工部奏報。此次恭謁泰陵。搭蓋浮橋款項。得旨。此次恭謁泰陵。所有博岸瀾窩。並未墊好。所用銀兩。不准開銷。嗣後既搭蓋浮橋。不必填墊瀾窩。○丙

子。福州將軍明福等奏。此次由鄭家莊移駐福州滿兵二百八十戶。未到之先。所需什物。俱應備辦。查有將軍養廉內幫貼賞項餘銀。可供動用。如有不敷。再於兵丁餘房租湊支。所需薪鹽等項。亦於此內動用。再京兵初到。未諳土俗。請將第一月錢糧。俟其到時。即行支給。得旨嘉獎。○予故大學士加贈太保來保祭葬如例。謚文端。○丁丑。河南巡撫阿思哈疏報。開墾南台內鄉。裕州旱荒民地一十八頃九十五畝有奇。升科如例。○旌表守正捐軀之江蘇青浦縣民徐明基妻王氏。河南伊陽縣民張詩妻武氏。○戊寅。上御勤政殿聽政。○諭軍機大臣等。和其衷奏酌移營汛一摺。已有旨交部議奏矣。至摺內畢齊克齊等地方。俱譯寫訛錯。該省所轄蒙古地方。相距不遠。對音譯漢字樣。不應傳訛舛錯。若此。已令軍機大臣改正。嗣後遇有譯漢事件。務須斟酌妥協。毋致草率訛謬。著將

此傳諭和其衷知之。○軍機大臣等奏。將軍明瑞等將熱河移駐伊犁滿洲兵需用房屋錢糧。盛京錫伯及厄魯特兵應給牲隻。錫伯兵編設佐領各事宜具奏。臣等遵旨定議。烏哈爾里克舊修綏定城房屋。不敷居住。現在伊犁河修城起屋。熱河滿洲兵。應即於此駐劄。屯田兵一千二百名。今年更換。請酌留六百名。一同修城。則十月內可竣。其熱河及涼州莊浪滿洲兵。一處居住。尤便約束。應俱如所奏。惟是熱河兵到期尚遙。儘可從容成造。不必催促。務令堅固。至所奏滿兵行糧。前經尚書舒赫德等定議奏准。其到後每年應得錢糧。及分地耕種。撙節糧餉之處。交明瑞等酌量辦理。又盛京錫伯兵及厄魯特兵。應同索倫察哈爾一體游牧。錫伯兵若需房屋。亦令自行修造。又官給孳生羊隻。索倫察哈爾應給之項。已奏明酌給外。將來厄魯特錫伯兵。照例每兵給羊二十五隻。約計需四萬餘

隻。請將上年停止解送喀爾喀四部落之羊一萬八千隻。交成衮扎布再辦一萬二千隻。於兵丁等至烏里雅蘇台時。交給帶往。仍於哈薩克貿易內。酌買一萬隻。留伊犁備用。其錫伯兵。應照索倫察哈爾厄魯特之例。立昂吉。編佐領。約計千名作一昂吉。六佐領。領催披甲。分派各佐領下。另於索倫滿洲大員內。選派總管。副總管。各一人管束。其佐領。驍騎校。各六名。即於現往之防禦驍騎校。二十名內選放。如防禦內有可任副總管者。亦即令充補。其餘官員。仍食原俸當差。俟缺出選補。領催二十四名。亦於現往之領催內挑選。餘俱照察哈爾辦理。所有昂吉佐領。應給關防圖記。請令明瑞等擬定字樣。行文該部鑄給。從之。○己卯。

上詣暢春園問

皇太后安。○還宮。○戶部議覆。漕運總督楊錫紱奏稱。江浙東豫各省漕船。雖當十運屆滿。

應行成造之年。例不准如他省聽旗丁留通變賣。如運糧抵通。仍須由通放回。及歸本處水次。此等舊板。不足以資配造。徒為丁旅苦累。請嗣後准其在通變價。再買補之船。未經滿運。或中途遇有風火。向須拆板帶回。亦徒滋運費。並請准其就地拆變。均應如所請。從之。○是日起。

上以孟夏享

太廟。齋戒三日。○庚辰。湖廣總督署湖北巡撫

李侍堯疏報。開墾咸豐縣中則民地四頃六畝。升科如例。○是日。

皇后行躬桑禮如儀。○辛巳。諭軍機大臣等。潮陽縣貢生翁啟金代子認兇一案。據該督本內聲明。此案係由赫昇額另審。始得實情等語。翁啟金以劣貢居鄉滋事。復代子認兇。情甚狡詐。該縣竟為所蒙蔽。率行詳轉。赫昇額駁飭改正。深屬可嘉。但其中情節。或係赫昇額自行訪聞。抑或別由屬員察訪告知。應酌

量加獎。以示鼓勵之處。著該督撫詳悉查明。據實具奏請旨。○工部議覆直隸總督方觀承奏稱。永定各道屬。自乾隆三年。設有埽船三百二十隻。畝夫一千八十名。其用在於撈泥疏浚。然水深五尺。爬撈即難著力。而船泥載重。水淺又復滯行。早澇皆不適用。請全裁畝夫。令歸漁業。如河淀有需用夫船之處。臨時雇覓。並裁該管之永定河。子牙河。千總各二。徹隨船外委二十。均撥河道為河兵。各給守糧二分。另設河營守備駐天津。隸天津道轄。所有南運河。河兵千把總汛務。及天津道屬各工。悉令經營。均應如所請。從之。○是月。直隸總督方觀承奏。東西兩淀。子牙河挑濬各工。計用人夫不下三數萬。河淀僻遠之地。需米既多。即恐價貴。查上年由奉天買回粟米。貯天津北倉。今尚存一萬九千餘石。其米經由海運。帶潮難資久貯。請分運工次平糶。按夫役十名。給票一張。見票發米。非做工人。

嚴禁冒買。計每石成本。加以此次運費。合銀一兩四錢上下。現在時價二兩內外不等。酌擬每石糶銀一兩七錢。力作窮民。既免貴糶。其糶價盈餘。尚可充修葺北倉之用。得旨。甚好。○又奏。現辦水利各工。內有工段相連。應行續估辦理者。如安州依城河。為望都之九龍泉河下游。即為入淀尾間。應挑長二千二百餘丈。安肅之漕河。應自龍華村起。至會入依城河止。挑長三千七百餘丈。其瀑河多灣易淤。應逐段挑切淤嘴。其上游之姜女廟。有南股支河一道。節年分水過多。以致正河淤墊。支河復窄不能容。應於正支分流處。建滾水石壩一。使水由正河刷淤歸淀。支河分減盛漲。新安大殷淀。迤西之韓家埕一帶。為西北諸水匯歸之所。應挑引河十三里零。導歸雜淀。橋梁閘座。均應隨宜修葺。得旨。自應如所議行。但須查察。毋致冒銷。俾帑歸實用可也。○長蘆鹽政高誠奏。前商人王至德。將所

有灤州。遷安樂亭。並代辦之盧龍。撫寧。昌黎。臨榆。七處引地。請退歸公。經內務府奏明飭查七處敵壞情形。及應如何整頓調劑。查七處皆永平所屬。其敵壞之故。一因賣價不敷。一因私鹽充斥。賣價不敷。甫經奏准增價。從此可期成本無虧。至其私販之多。如灤樂地多生城。居民最易私煎。遷安撫寧等處。逼近邊牆。邊鹽多有夾帶入口。今請申嚴處分。以杜私煎私販。復照雍正十年之例。於口外三十里內。派兵役巡查。絕其私帶。更嚴查邊民囤積。但口外地方。多有奉天永平。大牙相錯之處。並請勅下奉天將軍。府尹。及山海關副都統。古北口提督。一體查辦。整頓不外乎此。至調劑之法。查七處內惟灤遷樂三處額引加引。共一萬七千一百餘道。通融定例。止准通出二分。此三處情形。實難行銷八分。請通出四分代銷。如能代銷州縣。再有此盈彼絀。仍准於三處內通融行銷。得旨如所請行。

江西巡撫輔德奏。江省行使。多有翦邊砂板。及私鑄小錢。每銀一兩。可多換數十文。作奸者衆。必須錢行當舖。並米糧鹽布等鋪戶。絕不交易私錢。勢乃自止。當立限一月。令各鋪戶自行交官。買歸省局配鑄。限外查出治罪。又愚民多信鬼尚巫。每因賽會迎神。允毆啟釁。亦即通行嚴禁。除春祈秋報外。概不許慢神黷祀。又各屬間有閒曠官山。雖不堪墾作田畝。頗宜栽種楓樅茶柏木子等樹。鄉民因係官山。聽其荒棄。若令承納薄糧。認為世業。則地利興而民用裕。並以補農桑之不逮。俟飭查覆齊。應酌定章程。准民認種。得旨覽奏俱悉。可謂留心本務。勉之。○湖廣總督李侍堯奏。督撫兩標及武昌城守營額兵繁衆。差使最多。其應支糧餉。向例五月中旬後。但支折色。每米一石。折銀七錢。惟人稠糧貴。買食維艱。查常平額內。貯有南漕耗米一項。例於青黃不接時出糶。秋成買穀還倉。江夏漢陽。

二縣。共有南漕耗米一千一百九十六石有奇。請飭該二縣於每歲四月內。定價撥給各兵。由縣扣餉買補。得旨。如所議行。○山東巡撫崔應階奏。前布政使梁肅鴻。以武定府向未設有府倉。請於萊州額貯府穀十萬石內。撥出二萬。貯於武定。仍勻撥各州縣。奉旨。交臣議奏。查萊州府倉穀。較青登兩府。已多貯二萬。必須每年出陳易新。買補必須分發所屬。在各屬有本處應買倉穀。又加以府倉穀。採買四出。市價必增。不免累民。今登萊青三府。均應勻減。請照濟南東昌二府之數。各貯五萬石。二萬存府。三萬勻撥所屬州縣。即將所減之數。量撥未設倉各府存貯。武定係濱海之區。請如梁肅鴻所奏。撥穀二萬石。又沂州府界接江南。且地瘠易歉。亦應撥貯二萬石。勻撥所屬州縣。得旨。如所議行。○陝甘總督楊應琚奏。色里坤自添種豌豆小麥等項。細糧。遞年成熟有收。其提標三營兵糧。向以

該處止種青稞。是以歲支青稞二千石外。餘盡支折色。今請添撥小麥一千石。豌豆二千石。計本年可減運折價銀一萬一千兩。此後屯田益豐。邊儲日益。更可多給本色。得旨。好。○雲貴總督吳達善雲南巡撫劉藻奏。陞任雲南按察使張逢堯。奏請將滇省各屬遣犯酌撥安置。除於地方情形。不便改撥。毋庸議外。其所稱分防之州同。州判。縣丞等官。凡設有城堡者。請較各州縣安插之數。減半撥發等語。應如所請。凡佐雜分防。係腹內之地者。均減半安置。得旨。如所議行。

大清高宗法天隆運至誠先覺體元立極敷文
奮武孝慈神聖純皇帝實錄卷之七百七

實錄卷七百七

三

大清高宗法天隆運至誠先覺體元立極敷文
奮武孝慈神聖純皇帝實錄卷之七百八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務兵部旗滿洲都統世襲騎都尉軍功加七級隨帶加一級尋常加級軍功紀錄次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部二庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申夏四月壬午朔享

太廟

上親詣行禮○詣暢春園問

皇太后安○幸圓明園○癸未諭軍機大臣等

刑部覈覆雲南省周宗一毆傷郭凌雲身死

一本該部亦按例議准初不過以為闕毆常

件朕覈之案犯情由則該省原擬郭凌雲實

未得其竅要郭凌雲以搭連裝錢並非重茵

細軟可比且麪舖同食而周宗一已壓坐身

下何得佯為不知是其存心圖竊已屬顯著

今乃不揆情理。以該犯被罵不甘。因拾石擲傷殞命。遂援尋常闖毆問擬絞候。將來彙入秋審時。必更以其起釁緣由。較他犯有間。因而改列可矜。是直使竊賊因認賊而斃人者。轉得量從末減。此風尚可長乎。外省有司。問擬命案故習。往往如此。甚失明罰勅法本意。現令該部按情指駁。將此詳諭吳達善劉藻知之。尋奏。即提犯委員。詳加研鞫。按情定擬。得旨覽。外省此等姑息之風。亦不可枚舉。應

極力整頓。○又諭曰。明瑞等奏稱。現在伊犁聽差侍衛六員。除素尼勒圖一員。係効力贖罪。不在按期換班之內。其餘五員。皆三年屆滿。應請照例更換。再侍衛六員內。其三員。係奏定額缺。在京揀選。餘三員。請從索倫兵內挑選。給以虛銜頂翎。令在卡上行走。一年更換。分別等次。頭等照常行走。二等摘去頂翎。三等斥革等語。素尼勒圖。効力甫及二年。無庸即為更換。其侍衛額缺三員。在京揀選發

往。及虛銜侍衛。分別勸懲之處。俱著照所請行。○兵部議准。雲貴總督吳達善奏稱。黔省向因初開苗疆。分設武員。定以三年。邊俸報滿。即陞。歷今三十年。風土便安。未便拘泥成例。其古州。清江。上江。銅仁。都勻。丹江。朗洞。台拱。荔波。下江。長壩。各營副。叅遊。都守。千把總等官。改為五年甄別。人材弓馬可觀者。保題陞用。尋常之員。仍照常俸候推。至副將報滿。向無甄別。總兵缺出。均開列請旨。嗣後應令

該督撫分別考語。題明註冊。將保題者開列。並飭令有邊缺省分。一體遵照辦理。從之。○以尹繼善為大學士。仍兼兩江總督。○旌表守正捐軀之河南祥符縣民趙永祿妻朱氏。○甲申。諭。向來大計附薦人員。吏部查明該員與例相符者。覆本內將應否引見之處。聲明候朕降旨。其有正項錢糧未完。及革職留任。未經開復各員。部議則俱以毋庸議題。覆朕亦無從量為甄別。第思此等人員。多以才

具可造。由簡調繁。及蒞任以來。處分多而開復不易。即服官頗知奮勉。得列附薦。又以格於成例。並不獲隨衆引見。其中人材誠恐不無屈抑。嗣後此等人員中。應如何分別年例酌定章程。俾伊等得以自見之處。著該部詳悉定議具奏。尋奏附薦人員除係簡缺有錢糧處分及革職留任者。仍照例議駁外。其現蒞兼三兼四繁缺之員。人材可觀。歷俸在五年以上者。即有處分。呈明將應否引見之處。聲明請旨。其正薦人員如有處分。查係兼三兼四繁缺。亦一例聲明請旨。再該員處分有於題本到部時。現經開復者。即照合例人員一體令其送部引見。得旨允行。○又諭前以山東濟寧等七州縣衛瀕河地畝。上年間有被淹之處。業經降旨展賑。其出借籽種等項。應於本年麥熟後徵還。現在該省春雨霑足。二麥可望豐收。但念民氣初復。正資麥熟接濟。著加恩將濟寧等州縣衛所有借給

籽種俱緩至本年秋後再行徵收。以紓民力。該部即遵諭行。○乙酉

上詣暢春園問

皇太后安。○還宮。○諭甘肅省續據題報。翻種秋禾。復被偏災之金縣。沙泥州判。環縣。靈州。花馬池等處。雖經該撫照例賑卹。恐民力尚不無拮据。並著加恩照臯蘭等十九州縣之例。加賑一個月。該督撫等其各飭屬實心經理。務俾小民均霑實惠。該部遵諭速行。○是

日起

上以常雩祀

天於

圜丘齋戒三日。○丙戌。諭曰。高晉奏籌辦雲梯關黃河下游情形一摺。所見甚是。已於摺內批諭。雲梯關一帶為黃河入海尾閭。平沙漫衍。原不應設立隄岸。與水爭地。而無識者好徇浮言。或以上流清口洩水分數較多。遇海潮盛時。或不免意存顧慮。因有子埝隄防之

議殊不知清口暢洩其收利在下河州縣者不可數計。至雲梯關附近不過阜寧、安東二邑所轄地面。以此衡彼其輕重大小不待智者而知。即令一時偶值盛漲所侵溢者不敵百分之一二耳。高晉當守其定見既知下游之制防一切毋庸置議並可信清口之展放無難永遠力持於水利民生實為交有裨益。○諭軍機大臣等阿思哈奏請陞調縣令李如龍等另單所開叅罰事件俱至二三十案

之多或緣該員等地方繁劇任事多而里誤亦易原屬情理所有但伊等平日如果係急公奮勉之員公事自應不致闕茸何以屢干例議又致積款累累若此著詢問阿思哈令將該縣等實在叅罰委積緣由在彼在此確切查明覆奏尋奏李如龍在豫十三年曾署遂平、新鄭、葉縣、宜陽、補閭鄉、調河內、杜錫齡在豫八年曾署寶豐、襄城、原武、林縣、滑縣、嵩縣、補宜陽、調汲縣各有罰俸二三十案實因

地方繁劇里誤亦多該員等每年應得編俸已逐年扣抵其浮罰之俸例應聽其自行完納向不勒追以致積款累累多未銷案。臣請嗣後州縣罰俸除將每年編俸扣抵外浮罰之俸照例聽其自行完納如才堪任劇而叅罰在十案以內方准陞調現請陞署開封同知之河內令李如龍請調河內縣之汲縣令杜錫齡如蒙允准即照此例令其補完銷案得旨如所請行。○軍機大臣等議准兩江總

督尹繼善閩浙總督楊廷璋兩廣總督蘇昌等奏請弛絲船出洋之禁江蘇省販銅官商船隻每隻許配二三蠶糙絲一千二百觔按照綢緞舊額觔數抵扣各屬出洋商船攜帶糙絲准以三百觔為限閩浙出洋商船每船配土絲一千觔二蠶糙絲一千觔粵省外洋商船二十三隻除定例准帶八千觔外每船再行加帶粗絲二千觔其頭蠶湖絲緞疋仍照舊禁止從之。○刑部奏蒙古偷盜各犯向

係改發內遣。設有在配脫逃。例無加調明文。請嗣後此項逃犯。照民人例分別加調。原發山東河南者。初次脫逃。枷號一個月。調發福建湖廣等省。二次枷號兩個月。調發兩廣極邊烟瘴。至三次者。枷號三個月。仍發原處。其福建湖廣等省。以次調發。至極邊烟瘴而止。蒙古免死減軍。在配脫逃者。亦照民人例一體加調。仍各分別次數。枷責刺字。並令拏獲之州縣。究明逃後。有無行兇為匪。分別照例

定擬。再蒙古案內。例應發遣之妻子。其隨從本犯者。照例交與南省驛地當差。其本犯已經正法。妻子單行發遣者。酌發南省駐防兵為奴。至僉發遞送。悉照例應緣坐犯屬之例辦理。從之。○以署鑲白旗漢軍副都統泰璜署正白旗漢軍副都統趙啟。對調。署正藍旗蒙古副都統博永。署正紅旗滿洲副都統扎什扎木素對調。○丁亥。

上詰

南郊齋宮齋宿。○諭曰。方觀承奏。大城縣知縣羅學旦。經辦子牙河工程。弊混尅扣。並勒取婪索各款。請革職審擬一摺。河工關係水利民生。最為緊要。羅學旦以承辦之員。既不在工料理。任聽縣丞短發價值。以至民夫逃逸。甚且縱令居民占種。按畝索錢。置民瘼利害於不問。情罪重大。與辦賑侵漁肥橐者何異。此等非尋常劣員婪索可比。非立予重懲。不足示儆。羅學旦著革職拏問。嚴審定擬治罪。○諭軍機大臣等。輔德奏。叅革安義縣知縣郭孫錦。在監病故一摺。雖該犯或係適當自斃。未必盡出畏罪戕身。然以濫斃無辜。裁賊捏詳之官。犯獄案未定。典守者不知防範。竟令倖漏刑章。即經勘驗結報。又焉知不與近日山東叅革壽光縣知縣蕭應柱。聞叅自縊。同一鬼域伎倆。此風斷不可長。夫有司不能奉法。自干吏議。其在情款重大者。自當束身歸罪。自伏厥辜。其事本非重譴。原可不至

於死。甚至審屬子虛。並可立予昭雪。何致一掛彈章。輒圖乘隙自盡。抗國法而長官邪。司憲者竟爾因循膜視耶。蓋由督撫等平時姑息疎玩。於此等劣員。每謂一經叅劾。上司已無瞻徇。而監守不嚴。審擬不速。往往釀成弛懈。遂不得明正典刑。而地方無識之徒。未必不轉為官犯負屈。或且重疑執法之苛。是非封疆大臣。以寬縱之習。招嚴刻之尤乎。此於官常刑法。大有關係。著傳諭各省督撫。嗣後

務應悉心飭屬防檢。毋得甘蹈疎虞。致自取戾。可於各省奏事之便。傳諭知之。○又諭刑部奏。原任同知朱藻。應追各工覈減銀兩。行查各任所有無寄頓產業。據江南等省取結咨覆。止有直隸一省。久經該旗行查未覆。復經刑部查催。仍復遲延。請將總督方觀承交部察議等語。朱藻之子朱騰龍。現在監禁。刑部專候直隸查明咨覆。以便覈辦。且其在直隸有無貲產。非甚難於訪查之事。該督何以

疊奉咨催。竟爾遲延未覆。殊不可解。著傳諭方觀承。一面速將朱藻有無寄頓咨覆該部。一面將因何遲延緣由。據實具奏。尋奏。臣於准到部旗各咨後。檄催七次。據該司以各屬印結尚未送齊。恐訪查不周。致有遺漏。現在飛飭該司速行查明結報。請將未經結報之司道以下各官。送部議處。報聞。○戊子。常雩祀。

天於

園丘。

上親詣行禮。○詣暢春園。問。

皇太后安。○幸圓明園。○己丑。諭軍機大臣等。據素玉奏。各省將軍副都統。挑取跟班兵丁。只准於本城挑取等語。所奏尚是。各省將軍副都統。有管理一城。有兼管他城者。挑取跟班兵丁。或於數百里外兼管之處。挑取兵丁。等往來。有誤操防。且有不肖者。即於換班時。別生事端。均未可定。其兼管處挑取兵丁。著

永遠禁止。若將軍大臣等因有事赴兼管地方。臨時將彼處兵丁挑取暫充跟班。尚無不可。再各省駐防兵丁。仍註明京師本佐領名下。原使本佐領不至泯滅之意。京師佐領更換不行知會。以致該省多有錯誤。但知會時換一佐領。即行文一次。亦屬過煩。著八旗每年年終。該旗將本年更換之員。行知各省。永為例。○庚寅。吏部奏大學士尹繼善應否在議政處行走。得旨尹繼善著在議政處行走。

○禮部議准。伯都訥副都統扎隆阿奏稱。伯都訥地方監獄。應添設無俸從九品醫官一員。照吉林之例。由驛站官屯壯丁民人內挑補。給與十二人口糧。及藥價銀兩。從之。○旌表守正被戕之江蘇崇明縣民沈懷德妻王氏。○辛卯。諭。向來督撫巡查公出。攜帶幕友過多。致屬員供頓浩繁。地方不無擾累。曾經降旨申禁。祇准酌帶一人。以供繕寫。今據大學士尹繼善奏稱。督撫等巡歷所屬日期。

久暫不同。若為時既久。一應地方公務。均須沿途辦理。其檢查案牘等事。需人協助。倘因幕友不敷應用。轉假手吏胥。久之難免滋弊。惟在督撫等刻自儉約。不以舟車儲侍煩擾有司。即人數稍多。亦屬無礙。若防檢或有未周。雖輕騎減從。又安保與臺隸役之不借端擾累乎。此語頗當。嗣後督撫等因事公出。准酌帶幕友數人。自給資斧。隨行辦公。不得因有此旨。遂爾繁多無節。啟屬員逢迎供給之漸。可將此通諭知之。○又諭。前因各省將軍都統等。將所轄弁兵濫行差遣。及私事隨帶役使。漫無節制。曾經酌定額數。旋以該弁等往來道途。遠離職役。或致貽誤操防。因降旨概行飭禁。今據大學士尹繼善奏稱。將軍督撫等來京陛見。祇候宮門。僚從所不能到。若無有職人員供其使令。亦多未便。嗣後仍著照原定額數。酌帶給用。但不得任意多派。致地方營伍曠弛。著通諭各將軍都統督撫提

鎮等知之。○補行貴州省乾隆二十八年大計。不謹官一員。浮躁官一員。罷軟官二員。有疾官一員。才力不及官一員。分別處分如例。○壬辰。

上詣暢春園。問

皇太后安。○吏部奏請大學士尹繼善應定何殿閣及兼銜。得旨。尹繼善著為文華殿大學士。兼兵部尚書。○禮部議准四川學政博卿額奏稱嘉定。潼川二府。設學已歷二十三年。

歲科一十五次。原定廩增十缺。太少。且樂山三臺二縣。原係州學。廩增各三十名。設府學後。於該學擇充補年分淺者。各以十名撥入府學。仍按其原學挨次出貢。今該學舊撥廩生。各餘一二名。將來舊廩貢完。未便以各屬撥補廩生。與樂山三臺挨次出貢。嘉潼二府。應各添廩增十名。定為兩年一貢。俟人數更多。再符府學定制。至樂山三臺二縣。應照例兩年一貢。各歸各學辦理。從之。○貝子品級

輔國公三達克多爾濟故遣官致祭如例。○癸巳。以故散秩大臣鄂岱子鄂津襲職。○甲午。諭前以甘肅鞏蘭等屬。上年偶被偏災。業經降旨展賑。復念該處貧黎。或尚有應行加恩之處。並諭令該督楊應琚查明奏聞。近又降旨。令將續報成災之金縣等處。一例加賑矣。今據楊應琚奏到。該省冬春雨雪霑足。俱已借給籽種口糧。翻犁播種。惟涼州府屬之武威縣。上年被災較重。山丹縣稍次等語。該

二縣前此雖在展賑之內。足資接濟。但念其地較寒瘠。麥收尚遠。民間口食未能充裕。著加恩將武威縣再行展賑兩個月。山丹縣再行展賑一個月。該督董飭所屬。實心經理。務俾小民均霑實惠。該部遵諭速行。○諭軍機大臣等。李質穎奏。商人范清濟。現在將河東引地全行退出。變項交帑。所餘行業。若僅循例召募。一時難得其人。請將晉省實在殷實之梁開宗等六人。令其赴運認充等語。鹽引

有關民食國課。承辦商人。理宜詳加遴選。該鹽政既稱梁開宗等六人。家道殷實。堪以辦運。著傳諭該撫和其衷。令其照二十六年薩哈岱奏請選商之例。即速轉飭地方官。傳送交辦。毋得耽延時日。久懸無著。將地址各單鈔寄。○又諭據值年旗奏稱。八旗世襲官員。請於各該旗值日奏事之期。令其按旗帶領引見等語。八旗世襲官員引見。當分別優劣。編定等第。優者帶領引見。劣者具奏斥革。不

論優劣。並令引見。殊屬不合。著交軍政派出王大臣等。將此等世襲官員內。騎射清語俱佳。及差使勤者。列為頭等。帶領引見。中次者。仍留在世襲上行走。其騎射清語生疎。及怠惰者。著即具奏斥革。○又諭據巴爾品奏。自乾隆二十六年五月。派內大臣巴圖濟爾噶勒等稽查牧場。迄今已滿三年。請更派大臣。又稱伊親身前往查場。其印務。請旨著人署理等語。著派副都統集福同巴爾品前往查

商都達布遜諾爾。達里剛愛等牧場。巴爾品身係都統。出口查場。其印信。令伊帶理。毋庸另派人員。○禮部議准。山東布政使梁肅鴻奏稱。武舉人會試。由司送院。咨報兵部。文舉人則由司徑報禮部。應請文武會試。均照官員赴選起復之例。由司詳院請咨。發司轉給咨部。從之。○以故雲南景東府土知事姜繼申。子增襲職。○乙未。

上詣暢春園。問

皇太后安。○定離任人員。令原隸督撫出具考語。例。諭。向來緣事降調官員。例應引見者。俱由該督撫出具考語。送部引見。朕既覈其人之才具。亦因以覘該督撫之鑒別屬員。法至善也。其離任候補之員。因係前任內案件。至誤降調。本籍督撫。向以非現屬之員。無從出具考語。嗣後離任人員。緣事降調。例應引見者。並著原隸之督撫。一體出具考語。送部引見。著為令。○諭軍機大臣等。今日引見之原

任浙江於潛縣知縣周廷一。巡撫熊學鵬請將該員。比照才力不及。降二級調用。看來周廷一。年力尚壯。似屬小有才而無實際者。但謂之閹茸無能。不勝縣令之任。則似非當。該撫何以奏請降調。或該員別有劣跡。該撫借此避重就輕。抑或實有才不勝任之處。著傳諭熊學鵬。令其秉公據實具奏。尋奏。臣抵浙後。即聞周廷一不能辦事。及見其年力尚壯。詢以地方刑名錢穀各案。茫然不知。猶恐其訥於語言。復察治事。更復粗疎。因無劣蹟。奏請降補。報聞。○軍機大臣等議准。巴里坤辦事大臣鐘音等奏。巴里坤一帶。東自呼濟爾台。西至鄂什錫廣袤四百里。原設卡十八處。木城卡。通烏里雅蘇台大路。駐兵四十名。呼濟爾台卡。通歸化城大路。駐兵十八名。鄂什錫卡。通關展。烏魯木齊等處大路。駐兵二十名。其餘各駐兵二三名。共駐防兵一百十五名。原為看守馬廠稽查違犯。今地方寧謐。遣

犯等習於耕作。無須防範。惟路當衝要。著交城守營酌量留兵數名。各拴營馬一匹。足資稽察。其餘兵俱請裁回營。所有馬匹。撤出歸廠。其都司。把總等官。一併撤回原營。從之。○禮部議准。御史德安奏稱。凡文武鄉試。及武會試供給。向由順天府尹造冊具送。戶部覈銷。而文會試。則由禮部題銷。請嗣後文武鄉會試供給。由順天府派委治中通判總理。佐雜分辦。經由府尹造冊具題。交戶部題銷。不必會同禮部。兵部。委派司員辦理。從之。○扎魯特達爾罕貝勒阿達善故。遣官致祭。如例。○丙申。上御勤政殿聽政。○諭曰。秦蕙田患病。不必解任。所有題奏案件。照常辦理。其尋常咨行事。暫不必畫稿。俾得從容調攝。○諭軍機大臣等。據瑪瑞等奏稱。熱河一帶。賞厄魯特牧場。請令交還各該處耕種納糧。繪圖具奏。前據瑪瑞等。以賞給厄魯特滋生牲畜。皆賞給遣

往伊犁之厄魯特。請將賞給伊等牧場。交還耕種納糧。具奏時。朕以此項地畝。或在遠處。是以命伊等繪圖具奏。今閱圖。皆在行宮近邊一帶。行宮山南地方。前已降旨禁止耕種。且此項地畝。賞給厄魯特時。皆按田畝數目分給。今厄魯特兵丁。雖已咨送五百名。而玉魯斯等。仍在彼處。伊等牲畜正資牧養。瑪璫永和。乃必欲將此項地畝。仍令耕種者。特為伊等下屬。希圖獲利。慫恿故耳。此斷不可行。即伊等牧放。用之不盡。亦不可耕種。若不肖之徒。希冀私行耕種者。朕惟瑪璫永和是問。

大清高宗法天隆運至誠先覺體元立極敷文奮武孝慈神聖純皇帝實錄卷之七百八

等。朕前歲南巡在徐州閱視河工。見北岸有隄身單薄。高晉奏稱應行放淤培護。先挑倒鈎引河。俟應放時放淤等語。今閱時已久。未見該督摺奏及此。其曾否相度籌辦。並現在該處情形若何。著傳諭高晉。可即詳悉具奏。尋奏。徐屬宿虹廳之黃河北岸夏家馬路一工。係在黃河縷隄外。正當黃河頂衝。築壩臺鑲埽保護。於乾隆二十七年春將頭工尾工應開進水出水倒鈎引河。如法辦竣。緣放淤

必待黃河水勢盛長。開放始克有濟。是年伏
秋二汛開放後。計澄淤五六尺。至八九尺不
等。於奏報查勘徐屬工程情形。附摺聲明。未
經專摺具奏。上年復將該處倒鉤引河。挑挖
修整。伏秋兩汛。又經放水。因工長四百四十
餘丈。尚未一律淤成。本年督辦該工。詳加測
探。現在上段一百餘丈。下段九十餘丈。已澄
淤八九尺不等。惟中段計長二百餘丈。僅淤
二三四尺。今即於中段磨盤埽迴溜處。另挑
倒鉤引渠一道。俾黃河自中段引入。由上下
兩頭分流而出。則中段進水停淤必多。與兩
頭所澄之淤。一律相平。隄埽均培護堅厚。得
肯好。妥為之。○戊戌

孝端文皇后忌辰遣官祭

昭陵○補行湖北省乾隆二十八年大計。不謹
官一員。罷軟官二員。年老官四員。才力不及
官三員。分別處分如例。○庚子諭曰。輔德奏
江西訟案繁多。率由府省地方。斂金買產。合

族建祠。不肖之徒。妄啟事端。所至停宿。訟徒開銷祠費。甚至牽引遠年君王將相為始祖。荒唐悖謬。不可究詰。現在通飭查辦。一摺。所見甚為正當。已批如所議行矣。民間悖宗睦族。歲時立祠修祀。果其地在本處鄉城人。皆同宗嫡屬。非惟例所不禁。抑且俗有可封。若牽引一府一省。遼遠不可知之人。妄聯姓氏。竊立公祠。其始不過借以釀貲漁利。其後馴至聚匪藏奸。流弊無所底止。恐不獨江西一

省為然。地方大吏。自應體察制防。以懲儆習。況禮經所載。大夫不得祖諸侯。即譜系實有可稽。而地望既殊。尚當遠嫌守分。若以本非支派。攀援竄附。冒為遙遙華胄。則是覲顏僭越。罔知忌憚。名教尚可貸耶。各督撫等。其飭屬留心稽察。實力整頓。所轄之地。如有藉端建立府省公祠。糾合非類。健訟擾民。如江西惡俗者。一體嚴行禁治。以維風紀。而正人心。毋得僅以文告奉行故事。○諭軍機大臣等

明瑞等奏稱。伊犁現有察哈爾厄魯特官員辦事者。俱照部咨給與全俸。而陸續所派之察哈爾厄魯特。止稱照前次派往之例發給。並未聲明是否全俸。近奉諭旨。令將新派厄魯特官員。俱照察哈爾例給與半俸。辦理尚未畫一等語。前次派往伊犁之厄魯特官員。經軍機大臣議奏。令照察哈爾例給與半俸。並未將察哈爾辦事人員。給與全俸。世職人員。給與半俸之處。分別聲明。是以諭令伊等

至伊犁時。一體給與半俸。今詳閱明瑞等所奏。及軍機大臣原議。俱未明晰。朕思現在伊犁之厄魯特官員。業已給與全俸。自不便無故裁減。至新派之厄魯特官員。亦俱歸附有年。情願効力之人。不應止給半俸。著傳諭明瑞等。將厄魯特五百戶內。所有辦事及世職官員。俱照察哈爾之例。分別給俸。於伊犁生計。更有裨益。並著傳諭烏勒登曉。示厄魯特等。知朕格外加恩之意。○盛京將軍舍圖肯

等奏據兵部移咨內開軍機大臣議准盛京錫伯官兵內挑選一千名。攜眷發往塔爾巴哈台駐防。遵照索倫察哈爾之例辦理。但前次派往伊犁索倫察哈爾兵。每兵百名。有佐領驍騎校各一員。五百名。有協領一員管轄。此次所撥錫伯兵。應於伊犁滿洲大員內。揀派協領二員。分翼管理。再於現在防禦內。派數員作為佐領分管。又查從前索倫察哈爾等兵。移駐伊犁時。俱派總管協領等大員。送往。今錫伯兵。臣即揀派協領二員。防禦十員。驍騎校十員。送至該處。得旨知道了。如有私行逃走者。著嚴行查拏具奏。若未經奏聞。由他處發覺。惟爾等是問。○伊犁將軍明瑞等奏。前臣等將遷來伊犁回人三千二十戶。交阿奇木公茂薩。派往各處屯田。惟今於巴爾托輝築一小城。仍以伊犁河北固勒扎城為總匯。因回人安插甫定。又事版築。是以姑緩籌畫。今據茂薩呈稱。詳詢回人。俱稱巴爾托

輝地方。泉甘土肥。情願出力築一大城。移往駐劄。臣等詳勘形勢。如回人所種之地。稍遷迤西。可空出庫城圖。阿里瑪圖。兩處水泉。為滿洲兵屯田之用。且伊犁哈什。二水之間。築一大城。駐劄回眾。聲勢愈覺聯絡。於回人生計。亦甚有益。嗣後即再添一二千戶。亦自可容。請將伊犁河南海努克之二百戶。河北固勒扎一千九百戶內之八百戶。仍駐劄其河南和濟格爾之二百戶。河北固勒扎之一千一百戶。巴爾托輝之七百二十戶。並續派呼倫貝爾兵一百戶。共計二千一百二十戶。俱令駐劄巴爾托輝。於今年屯田之暇。先造住房。明年築城。報聞。○旌表守正捐軀之山西猗氏縣民閭保吉妻康氏。○辛丑諭。向來旗丁餘米。准其在通變賣。以資日用。現在漕艘將次抵通。而京師今歲糧價甚平。若餘米流通於民食。更為有益。所有旗丁多餘米石。聽伊等酌留食用外。如有情願出售者。仍照前

例。准其在通糴賣。該部即遵諭行。○又諭曰。原任大學士梁詩正。靈輓歸里。著照大學士蔣溥之例。沿途文武官弁。在二十里以內者。俱赴舟次弔奠。並遣人護送。俾得穩抵故里。以示優卹。○癸卯。

上詣暢春園。問

皇太后安。○諭。前經降旨。各省遇有子孫茂倫重案。令各該督撫於審擬定讞後。一面奏聞。即一面正法。原因該犯情罪重大。不便稍稽。

顯戮。但事關重辟。其中情偽多端。亦不應輕率完結。即如廣東遂溪縣監生梁舉朝。毆死陳國英之母張氏一案。初經該縣管唯木妄斷屍于陳國英。錄供詳報。及至該督蘇昌委員覆審。始究出梁舉朝自行毆死。狡稱陳國英搭斃實情。幸而獄無枉縱。若非悉心研鞠。遽爾加之寸磔。即使事後別經訪出。而其人已罹極典。豈不竟抱奇冤莫白耶。嗣後各省如遇此等重案。不可不倍加詳慎。該督

撫等。務須親提人犯。再三確審。以成信讞。毋得僅憑州縣供詳。致滋冤抑。該部遵諭速行。○吏部議准。翰林院掌院學士劉統勳奏。翰林院滿洲讀講學士。庶子。及侍讀。侍講。洗馬等官。奏留兼部行走人員。遇京察考覈。應令該部堂官分別等第。出具考語。送翰林院辦理。至遇有保送差委。令該堂官照額缺郎中。員外郎。一體覈實。分別揀派。從之。○旌表守正捐軀之山西長子縣民侯同來妻常氏。安

徽阜陽縣民趙某女趙氏。○甲辰。吏部議准。雲貴總督吳達善奏。稱雲南布政司理問。缺簡應裁。所管晉濟育嬰各堂。及收買鉛觔等事。歸併布政司經歷管理。從之。○兵部議准。山西巡撫和其衷奏。稱歸化城至薩拉齊二百四十里。地屬緊要。應於適中之多爾濟地方。設把總一員。請即以善岱營把總兵丁。移駐該地。以察素齊汛。移駐檮格穆。托和斯爾汛。移駐麥達爾橋。黑水泉汛。移駐韭菜灘。紅

沙口汛。移駐興旺鋪。韭菜莊窩汛。移駐紅沙口。畢齊克齊汛。移駐渾津橋。並由現移多爾濟兵內。撥六名駐畢齊克齊。以六名駐托和斯爾。從之。○乙巳。吏部議准。山西巡撫和其衷奏稱。潞安府屬之平順縣。原撥潞城壺關。黎城。三縣。就青羊里為治。編戶僅三十一里。環城皆山。並無井泉。鄉民每多不便。應裁其編戶及所徵錢糧。各歸原撥。從之。○丙午。諭軍機大臣等。額爾景額奏稱。明瑞等因派往

伊犁屯田回人端索丕。中途逃走。即將回人阿布都喇伊木補缺。以端索丕之妻配給。將端索丕發回葉爾羌。移咨前來。端索丕係私逃之人。今仍遣回葉爾羌。恐回人等相率效尤。不足示懲。請將端索丕賞給伊犁兵丁為奴等語。額爾景額所奏甚是。端索丕逃回本籍。一經拏獲。即應重加責處。或賞給兵丁。庶足以昭炯戒。乃遣歸故土。遂其本意。所辦殊出情理之外。著將端索丕發往伊犁給兵丁

為奴。如再有逃匿生事之處。即行正法。明瑞等辦理未協。著傳旨申飭。嗣後諸務。俱應加意妥辦。○軍機大臣等議准。察哈爾都統巴爾品等奏稱。移駐右衛兵。應裁之額。每三缺請以二缺給張家口。一缺仍挑右衛閒散幼丁。以百人編一佐領。共設滿洲佐領八。蒙古佐領二。漢軍佐領二。防禦驍騎校各十員。滿洲。蒙古。每佐領各設領催四名。前鋒四名。馬甲六十名。步甲十六名。養育兵十六名。匠役

二名。漢軍。每佐領設領催四名。馬甲五十六名。步甲二十名。養育兵二十名。滿洲八旗協領二員。蒙古。漢軍。各協領一員。分管步軍校二員。作為滿洲。蒙古之缺。合併揀選。現在右衛所存一百二十四分馬甲之缺。即請以在口之人挑補。每翼取筆帖式二名。即以張家口兵內。通曉繙譯者。咨送吏部考試。總管之缺。即請裁汰。其關防繳部。仍另鑄四旗協領印信。遇有詞訟事件。飭該同知會同該協領

辦理從之。○戶部議覆。閩浙總督楊廷璋奏。稱兩浙發帑收鹽。盈餘充餉。自乾隆十四年。至二十六年。各處陸續積欠未完。實因帑本不敷。不得不將盈餘通融轉運。延欠有因。並無侵那情弊。查此項盈餘。例應入季冊報部充餉之項。必須按年歸款。乃歷任承辦各官。拖延十有餘年。並不清完。應請議處。得旨。此項承辦拖延之文武各員。既查無侵那情弊。著加恩免其議處。向後務須年清年款。入冊報部。倘復有似此拖延者。決不再為寬貸。○科布多叅贊大臣雅郎阿奏。前因叅贊大臣扎拉豐阿。商辦築城事宜。查屯田兵四百名。內以二十名備造器具。餘三百八十名。除屯田外。派出八十名築城。又於屯田兵三百名內。派出三十人協助。本年即可完竣。但喀爾喀兵。俱依水草。離修城之地稍遠。未免有誤。工作請將烏里雅蘇台倉貯米茶賞給。城工得以速竣。報聞。○旌表守正捐軀之直隸沙

河縣民張儲貴妻元氏。河南睢州民王某女王氏。○丁未。

上詣暢春園。問

皇太后安。○諭軍機大臣等。崔應階自京回任。據奏本月十二三。直屬得有大雨之後。經過濟南。東昌各屬。地土滋潤。至省城。惟沂州。武定。二府屬。有得雨四五寸。及深透者。其餘各屬。得一二三寸不等。倘數日再得透雨。麥收必邀豐稔。等語。所奏未甚明晰。各屬雖得雨

澤。而深透皆不及沂州。武定。現在農田似有望雨之意。未知該撫抵署之後。各屬曾否續報得雨。並何處已屬霑渥。何處尚在待澤。及麥塋大田。此時實在情形若何。著即詳悉奏聞。以慰廑念。尋奏。通省惟兗州。曹州。雨澤稀少。民間望雨。省城因連日風燥。土面稍乾。麥收可有七八分。早秋青蔥均無妨礙。現在虔誠祈禱。報聞。○吏部議准。直隸總督方觀承奏。稱天津縣西沽疊道。經理須員。就近請歸

北倉大使管理其撥夫修墊等事。必得兼銜彈壓。查西沽舊有巡檢。原管七十六邨莊。嗣裁歸典史。應令北倉大使兼西沽巡檢。其印信即照兼銜鑄給。裁倉夫四名。改設弓兵。添設攢典一名。典史所管村莊酌撥管轄。即將疊道分段。令各邨認修從之。○戊申。諭軍機大臣等。據舒赫德奏。曰修奏查辦廈門船行陋規一案。訊係起自二十六年。各道府廳縣等衙門俱有收受之項。請將譚尚忠、劉增等

革審等語。該道府等既有收受陋規之事。自應如此辦理。但黃仕簡原奏俱憑參將溫泰開單送款。其所開總督一萬、巡撫八千各數。伊究何所確據。若溫泰果能指出何人交送。何人收受。鑿鑿可證。朕亦斷不肯為該督撫等稍存迴護。倘事涉影響。而溫泰並不能逐一指出。係該弁撫拾誣捏。即屬此案罪魁。自當徹底查辦。方為喫緊竅要。至此外府廳各衙門相沿陋規。原屬易於辦理之事。乃不向

緊要處根究。而徒欲張大其事。是全未識輕重之宜矣。且所開武職各衙門收受款項亦復不少。是否即在三萬兩之內。及該弁等向來如何侵用各情節。均應向溫泰究問。而舒赫德等並未詳悉查奏。殊屬疎漏。至另摺所稱知府劉增等俱係該督撫保舉之人。輒於查訊時。即傳旨令定長解任。奏曰修暫署撫篆一事。未免欲速。前曾面諭舒赫德到閩查辦此案。若該督撫等果如黃仕簡所奏。濫索

入已。則其罪自不容輕貸。應令定長解任。質訊。今摺內所奏情節。並無接收確據。定長等即有應得處分。不過失察。及保舉非人。尚不至於革職。且現在案情並無必需該撫質訊之處。何必遽令解任耶。此時想已訊得確情。著傳諭舒赫德等就案悉心分別妥辦。毋事張皇急遽。轉致畸重畸輕。所有軍機大臣查訊同知程霖等各供詞。並著一併寄去。可將此諭令知之。○詔除福建龍巖等州縣。乾隆

二十八年。銜冊田地一百六十一頃七十六畝。額賦。旌表守正捐軀之山東肥城縣民柳輝。娶妻王氏。○己酉。諭曰。忻妃薨逝。加恩。照貴妃例辦理。著四阿哥。六阿哥。八阿哥。綿恩。穿孝。其應行典禮。交該部察例具奏。○諭軍機大臣等。圖勒炳阿奏。到任後親往司庫道庫。逐項盤查一摺。巡撫接任之後。將盤查庫項緣由專摺具奏。本屬照例應行之事。但摺內祇將並無虧那。不將現在庫貯數目若干。分晰聲明。未免疎漏。著將此傳諭圖勒炳阿知之。○又諭曰。鄧文亮捏造夢譚。向學政衙門投遞詩文。實屬謬妄。但覈其情節。止緣冀倖功名。流於狂誕。尚無悖逆罪跡。鄧文亮著從寬改爲應斬監候。秋後處決。○庚戌。上詣暢春園。問。

皇太后安。○辛亥。諭曰。方觀承奏。直屬隄河工程。現在以次完竣。著派兆惠馳驛前往。會同該督赴工。次驗收。所有隨帶司員。並著馳驛。

○又諭曰。方觀承奏。張家口建蓋移駐官兵房署。一切工程。需員督辦。候補道員增福。曾任多倫諾爾同知。於宣屬邊口情形。甚為熟悉。請暫令來工。督率等語。著照所請。增福准其前往直隸。交與總督方觀承。派令督辦。張家口工程。○諭軍機大臣等。舒赫德等奏。查訊道府廳員。供有與總督楊廷璋。墊買物件銀四千餘兩一摺。此項並非黃仕簡前奏。溫泰所開總督一萬。巡撫八千之本文。係屬案外支節。但既經訊出。自不應置之不問。昨傳諭舒赫德等。一切受收實據。應向溫泰究詰。如果該督一萬之數。實無指證。而現在墊買之項。特係府廳以陋規為之墊辦。在該督原有應得之咎。朕亦不能為之迴護。即審擬之大臣。亦安得謂之吹求。況督撫等。在地方買辦物件。其勢即不能不需人代購。第以上司而派委屬員。即已自干不合。況價值更有賄墊情事。既確。安得復貸其處分。然其獲譴之

重輕。究以原叅收受本款。是實是虛。為之關鍵。舒赫德等。不將此處詳明剖悉。設使屬員等。轉將自行侵蝕之貲。希圖開入添辦之內。於事理殊未清晰。至摺內定長。並無墊買之事。於理更不應解任。此時正當交還印信。令其照常任事。若此旨未到之前。已訛出八千圓。果有染指。自當令去官。於事體方為合宜。朕所慮者。閩省濱海之區。民俗刁悍。現在劣員奸吏。已因關務釀出督撫重案。欽差大員。

正宜靜鎮安辦。不得稍涉張望。別滋株累。舒赫德等。務將本案要議。嚴訊溫恭。以辨虛實。其各件代辦之銀。雖與原叅另為一節。亦須一一查究明確。據實具奏。候朕降旨。其單內各件。應行詳詢之處。已令楊廷璋即速回閩。以便查辦。將此詳諭舒赫德等知之。○是月大學士管兩江總督尹繼善奏。明歲南巡沿途應需分設臺站。接遞文報。驛馬派應不敷。請循上例加增馬七百匹。分派沿途經由各

州縣。准於驛站項下。一體支給草料。自本年十一月初一日為始。至差竣日止。仍將原馬變價歸款。得旨允行。○又奏南巡所有隨從官兵執事人等。應需乘騎馬匹。歷次俱於綠旗各標營。及江寧京口駐防馬內派撥。因上年奉裁京口駐防馬甲二千名。即減馬二千匹。今以駐防額馬。儘數當差。不無缺誤。請照乾隆二十年之例。在於豫省旗營馬內。酌撥六百匹協濟。即以此馬。交江寧京口駐防作

補額之需。一面照原撥數目。解價還豫。令自行買補。得旨允行。○湖南巡撫喬光烈奏。長沙協守城額兵八百四十八名。存省兵二百九十餘名。分守城卡庫獄。撥護差使。均無閒曠。其餘分防十二州縣。並水陸塘汛一百二十四處。分派無多。如遇鞘犯。迭至不敷。差撥臣所轄撫標兩營額兵九百二十八名。例不派防外汛。請城守營所派防守省城庫獄兵五十名。改於撫標派守。其長沙協原派兵。另

派貼防兵少各屬以資差撥得旨甚是如議行○河南巡撫阿思哈奏豫省被水經欽差侍郎衷曰修會同江豫兩省撫臣疏濬河隄得無阻滯近年彼此各為疏濬恐年久不無壅塞請每歲農隙時安徽河南二省各派委道府大員於歸德一帶幹河出路會同親勘辦理得旨允行○四川總督阿爾泰奏邛州屬蒲江縣境內向有旱田一千餘頃與雅州府屬名山縣之龍爪灘交界從該灘開堰挑渠即可引水分注計可改水田十萬餘畝又潼川府屬三臺之涪城壩延長六十餘里舊有乾河溝一道上通涪河口若去沙石引水入溝多開支渠可灌田十萬餘畝敘州府屬屏山縣保寧府屬南江縣各有荒地地百餘里可以開墾現均督員經理得旨嘉獎○又奏建昌鎮營兵每年自正月至七月支領本色此外俱折銀查川省營制多設苗疆並非產米之地兵丁遠糶未免有曠操防請照越

萬廬寧松潘靖遠等營之例於前一年豫將次年米折銀全數支領採買米石存貯令備弁經營按月支領得旨允行

大清高宗法天隆運至誠先覺體元立極敷文奮武孝慈神聖純皇帝實錄卷之七百九

大清高宗法天隆運至誠先覺體元立極敷文
奮武孝慈神聖純皇帝實錄卷之七百十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄滿漢總

總裁官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級直轄內大臣戶部尚書鑲黃旗滿洲都統軍功紀錄六次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申五月壬子朔諭軍機大

臣等前馮鈐來京陛見業已令其回任此時

如已到粵西著明山即行交代前赴粵東本

任如馮鈐現尚未到亦著將廣西巡撫印務

交與布政使淑寶護理即日起程赴廣東任

○又諭向來粵海關官辦年貢不過尋常西

洋物件今端陽節貢乃買有珍珠記念等項

並非精好價浮於物而一經購覓行商徒藉

此居奇或猶以為抑勒官買似此無益之事

蘇昌不應為著飭行嗣後不必置辦並將此

傳諭方體浴知之○又諭昨舒赫德等兩次

奏到查訊廈門陋規一事並不將黃仕簡原

奏所開總督一萬巡撫八千及各衙門實在

有無收受本分質訊具奏所辦未識領要疊

經傳旨訓諭舒赫德等奉差赴粵閩如係朕

特欲體訪楊廷璋平日事跡伊等不拘何款

自當隨訪隨奏今此案特差舒赫德等前往

者乃緣黃仕簡據溫泰送款摺叅其喫緊關

鍵乃在督撫等收受陋規虛實為獻案本文

如一萬八千之項實係染指則舒赫德等之

令定長解任固當而朕亦必明降旨將伊等

從重治罪如此項收受原屬子虛但查出道

府廳員等以所得陋規為該督墊買物料情

事則楊廷璋亦自有難辭之咎然其獲罪自

與公然收受陋規肥橐累萬者不同而定長

則不過失察之小咎蓋為無罪之人矣朕將

此詰責楊廷璋令其明白回奏再予降旨處

分方於事體允協又何不可待之有今乃徒

尋節外生枝。而轉置案內。根原於不問。無論體裁不合。朕且何從降旨耶。況閩省海濱地方。風俗自來刁健。黃仕簡以原籍之人。為本省提督。又聞與馬龍圖為兒女姻親。今奏牘事實尚未審明。而一二欽差。立將封疆大臣一時令其解任。無知之人。將必以該督劾奏馬龍圖。而黃仕簡即構釁為之報復。其於政治人心。所關既重。況督撫之進退。不務得其實款。國體又安在乎。雖黃仕簡所奏得之溫泰。設一萬八千之數。需屬無憑。溫泰固其罪魁。而黃仕簡以不察端委。樂為藉詞入告。亦有應得之愆。然朕斷不肯加罪先發之人。以折天下敢言之氣。而舒赫德等。尚應按例附摺陳奏。辦案始為周緻。恐舒赫德等。舍本逐末。如從前之奏覆。朕仍難降諭旨。此當問其一萬八千之數。為虛為實。若虛矣。則黃仕簡所奏為不實。然道府同知。得受陋規。其中又為該督賠累者。即當據實奏候。朕降旨可

也。若此旨未到之前。仍然以別生枝節入告。則惟封侯遵此旨所辦摺到。然後降旨。不瑣瑣更降旨矣。此旨仍速回奏。○以護軍統領伊勒圖。署鑲黃旗漢軍副都統。○癸丑上詣暢春園。問皇太后安。○甲寅。孝誠仁皇后忌辰。遣官祭景陵。○諭軍機大臣等。據納世通等奏。沖噶巴什布魯特。阿瓦勒比。稟稱。去年伊犁有官一員。帶兵七人。至塔拉斯地方。遇克特滿圖伯之布魯特。盜竊哈薩克牲畜。時當昏夜。誤將八人殺害。臣等隨令阿奇木伯克素勒坦和卓等查明。即向尼沙瑪木特呼里游牧索取。戕害官兵人犯。令其即行獻出。從重治罪等語。伊犁果有巡查官兵。為外藩戕害。明瑞豈有不知。知之斷無不奏之理。此事尚未可信。納世通等。遽行差人查拏。殊屬鹵莽。著傳諭納世通。奉到此旨。如所遣伯克尚未轉回。即

續派妥員將此事虛妄之處詳悉曉示。令素勒坦和卓等速回。○軍機大臣等議奏烏里雅蘇台將軍成衮扎布等奏烏里雅蘇台舊城年久傾圯應行修築其工作等項請添派綠旗兵一百名前往等語。查科布多現在城工所撥綠旗兵一百名即係烏里雅蘇台派出至該處舊城傾圯請動工修築於收貯錢糧實為有益該處止有兵六十名看守倉庫尚屬不足自應酌復原額以資差遣其派出

綠旗兵一百名於宣化大同等處調取從之。○戶部議覆陝西巡撫明德奏稱該省駐防官員歲支粳米近來採買價值浮昂應照例覈減得旨陝西粳米出產既屬稀少則督庫所資若麥石粟米皆可隨其土宜以供日用何必拘泥採購成例以致往復覈銷徒繁案牘自後如照節次所定採購價值酌中定為折色支給在買食者一切聽其自便所獲尚有餘贏而地方官亦不致辦理拮据藉口減

銷賠墊尤為一舉兩得。摺內前次應追銀兩著加恩寬免一半還項其折色定價即行酌議具奏。尋奏每石定為二兩六錢折色支給從之。○旌表守正捐軀之河南祥符縣民李阜女李氏湖南桂陽縣民劉大崇奴妻胡氏。○乙卯諭軍機大臣等今日楊應琚奏到諸摺俱係照常辦理公務其事並不關係軍機自可循例差人齎送無庸由驛馳報著傳諭該督新疆軍務久竣其善後事宜亦俱辦有

成效嗣後凡遇此等奏摺止須妥妥協弁役或家人等齎奏不得仍前動用驛馬以重臺站。○又諭曰舒赫德等續奏審訊懷蔭布一摺與前摺仍係一事昨降諭旨甚明毋庸瑣瑣批示矣。至裴曰修另摺奏知府高靈諱病率轉請旨革職一案看來高靈諱未及躬親雖有不合然事因感患寒熱委縣代審即按例處分其罪尚不至竟行褫職况該員正在俸滿引見例應有人署理事亦不至大

誤何難於給咨送部時。隨摺聲明候朕臨時甄別。或量為降調。或酌予議處。果如摺內所稱。衰庸情形。尤屬一望可知。不必汲汲糾劾。若此。閩省習俗。易惑難曉。前旨已為詳示。欽差舉動。一切應行慎重。袁曰。修攝篆伊始。未免意存風力。而不知其實不直如此一辨也。原摺可發還。高靈仍送部引見。○又諭曰。明瑞等奏稱。此次解送伊犁之察哈爾兵丁五百名。所帶牲畜。有駝馬全未損傷。及馬匹倒斃。未至一分者。又有倒斃。雖至二分。其餘皆臃壯者。請將該員等議敘。其倒斃牲畜之數。尚未踰額。總管成果。應否議處。請旨遵行等語。著照所請。將佐領巴里瑪特等。交部議敘。佐領巴圖蒙克等。交部議處。總管成果著免其交議。○又諭曰。額勒登額奏。據阿勒坦諾爾總管扎爾納克。解到俄羅斯伯勒奇納克。及去歲同瑪木特。送文之魁庫斯等。供稱魁庫斯至熱河迎接家口。毀拆色畢等處。置

設房屋牆柵。俄羅斯在伊等邊界。安設卡座。將胡圖克納木奇等游牧。收回界內。額勒登額欲親自領兵入俄羅斯界內。將瑪木特游牧收取等語。從前派額勒登額前往色畢。特為毀拆俄羅斯設立房屋。並非迎接瑪木特游牧。去歲瑪木特情願投降。再三懇請。方令迎接。彼時儘可由俄羅斯逃出。乃俄羅斯已覺。將伊等游牧移進界內。且此項烏梁海。原係準俄二部。無賴游牧。並非正犯。著速寄信額勒登額等。伊至色畢。但拆毀俄羅斯在界內設立房屋牆柵。若瑪木特游牧未移。伊等能出。即收取前來。若俄羅斯已令伊等內徙。額勒登額。即不必入俄羅斯界內索取。將瑪木特事務。作為不知。若俄羅斯問及。向彼言特為拆爾等在各界內。私設房屋前來。凡部落人等有投降者。無不收留。若不情願。亦不勉強。如此曉諭。伊若抗拒。即不可姑容。再行酌量辦理。至瑪木特欲回俄羅斯。亦無庸勉

強伊若不同額勒登額於回程之便帶回於伊犁安插。斷不可留於俄羅斯地方。俟有定局。再將如何辦理之處。奏聞請旨。其報信之扎爾納克。酌量獎賞。○又諭據明瑞等奏。此次護送衆打牲索倫官員。沿途帶領兵丁家眷行走。九月有餘。並未休息。平安至伊犁。此內除旺阿察已授副管外。其餘可否少加鼓勵。交部議敘之處。請旨等語。著照所請。總管一員。佐領五員。驍騎校四員。俱加恩交部

議敘。○伊犁將軍明瑞等奏。四月初十日。據納世通等咨稱。聞沖噶巴什布魯特等傳聞伊犁官兵八人被害等語。查官兵果被戕害。自當領兵進剿。但現在並無此事。惟去年伊犁圖巡查邊界回營。行至吹地方。曾派三等侍衛品圖庫。領兵十名前行。遇布魯特數人。欲戕察哈爾兵。品圖庫等往擒。布魯特見有頂翎。即下馬叩首。告稱實係誤認為哈薩克人。懇求免罪。彼時因察哈爾兵並未傷損。遂

釋放遣回。臣以此事尚無甚關係。是以未經具奏。報聞。○以輔國公和碩額駙德勒克。署正紅旗滿洲副都統。鑲紅旗滿洲副都統書山。署鑲紅旗蒙古副都統。○丙辰。

上奉

皇太后幸萬方安和侍膳。○諭軍機大臣等。昨方觀承奏。上年生蝻處所。恐有遺孽為患。現在分遣標員。四出查看等語。近日天氣漸炎。低窪濕土。蝻孽易於萌動。不得以一經遣員。

遂爾少疎防範。方觀承應飭屬上緊剷挖。稍有滋生形跡。務在乘時搜剔。俾得盡絕根株。現在應會同欽差大臣。勘地查工。尤可就便悉心體察辦理。毋得稍有疎懈。至天津一帶濱海沮洳。向為蝻孽潛伏之藪。此時高誠已赴山左。並著傳諭存泰。督飭所屬盡力加緊殲除。慎勿少有因循。以杜農田貽累。○又諭據卞塔海奏。自伊犁解送葉爾羌之脫逃回人。端索不。至圖巴喇克台。經委署筆帖式雙

官保派兵李彬送交下站。現在李彬端索不俱無蹤跡。請將雙官保革退。委署職銜充當苦差。俟拏獲李彬。端索不併嚴審。加等治罪等語。雙官保解送逃犯。違例止派兵丁一名。以致復逃。實屬不職。著照所請辦理。李彬俟拏獲時。審明有無情弊。定擬至端索不兩次脫逃。情罪可惡。且李彬被其戕害。亦未可定。既係回人。必然潛匿原處。著傳諭卡塔海額爾景額。速即查拏務獲。審明正法示衆。○

舉行乾隆二十九年八旗軍政。卓異官九十八員。年老官五十員。有疾官十八員。罷軟官六員。才力不及官六員。分別議敘處分。如例。○丁巳。

上詣暢春園。問

皇太后安。○戊午。吏部議准。江西巡撫輔德奏。稱廣饒九南道。分巡四府。案牘不繁。請改為銜繁中缺。歸部選。其驛鹽道。管通省驛站。督銷十府鹽引。兼巡瑞。袁。臨。三府。應改銜繁難

要缺。請旨簡用。從之。○葉爾羌辦事副都統額爾景額等奏。據阿奇木伯克鄂對呈報。有攜眷尋歸故土回人。共一百八十餘名。係前經霍集占之亂。逃避遠出者。此內葉爾羌回人七十三戶。伊等親屬尚存。其餘一百餘戶。係喀什噶爾英吉沙爾之回人。查明並無自伊犁逃回等情。臣等伏思此項回人。復歸故土。應令仍於原處居住。但伊等離散多年。已無產業。請給以田畝籽種。暫緩徵收租賦。俾得經理生計。報聞。○己未。吏部議准。河南巡撫阿思哈奏。稱懷慶府屬之清化鎮。商賈輻輳。戶口殷繁。設有大吏一員。抽收稅務。兼巡檢銜。尚不足彈壓地方。請以懷慶府通判。移駐。其稅課大使。兼巡檢一員。應裁。通判所管水利。仍照舊從之。○庚申。諭。今日修道路之步軍領催。步軍等署。施恩賞給一月錢糧。○辛酉。

上詣暢春園。問

皇太后安。○諭曰。兆惠英廉現在出差。戶部辦事乏人。兆惠未到之前。所有戶部尚書事務。著託恩多署理。○諭軍機大臣等。據鍾音等奏稱。納世通等。以從前永貴等奏准。取用銀三萬兩。陸續支用。僅存九千餘兩。請於哈密巴里坤二處。各送銀一萬五千兩備用。隨以不能那解。咨覆等語。喀什噶爾等處需銀。原應揚應琚辦送。若巴里坤存銀不敷。鍾音等接到納世通咨文。即應行知。揚應琚今並不轉咨。僅以空文塞責。此皆外任推諉。陋習。鍾音溫敏著傳旨申飭。仍傳諭揚應琚。將應需銀兩。即行辦理解送。勿致遲誤。○以工部郎中德爾格為綏遠城副都統。○旌表守正捐軀之河南杞縣民路玠女路氏。○壬戌上御勤政殿聽政。○諭。今日御門。派出奏請折本之內閣學士赫赫。臨時不能奏請。著罰俸一年。即賞給代為奏請之學士塔永阿。○諭軍機大臣等。今日兵部將前鋒統領護軍統

領等。軍政保舉卓異之護軍叅領護軍校等。帶領引見。或一旗保至六人。或一旗止保一人。或並不保一人者。叅領等於平日進班之外。無別項奮勉之處。軍政時每旗保舉三四人。以示鼓勵足矣。何以各旗保舉互相懸殊。此皆該統領等。恣意妄為。不識事體。常福管理之旗。保舉章京一員。護軍校五員。弘昉管理之旗。保舉章京二員。護軍校四員。一旗之章京甚多。乃將護軍校多保。護軍校有何出色之處。反至優於章京耶。常福弘昉俱著交部察議。其餘前鋒統領護軍統領等。著嚴行申飭。嗣後軍政保舉人員時。著交領侍衛內大臣會同前鋒統領護軍統領等。一同揀選保舉。○吏部議准。陝甘總督楊應琚奏。稱陝西咸陽華州華陰三州縣。向為衝繁中缺。查地方衝要。糧賦繁多。且新疆差務。文報絡繹。應改衝繁難要缺。揀員調補。從之。正紅旗漢軍都統新柱等奏。叅革陝西葭州知州劉

度昭修理建安堡城工。應追覈減銀兩。無著請寬。得旨。劉度昭未完銀兩。著寬免。此項銀兩。雖與侵貪者不同。但屬應還贓項。即如州縣官侵欺錢糧。該知府應行分賠。至家產盡絕。仍未完繳者。尚應分別治罪。今劉度昭係身自獲罪。應行追繳之項。若因其家產已絕。遽行豁免。並不治罪。既不足以示懲。亦殊為幸免。劉度昭著照知府代州縣官分賠侵欺銀兩之例治罪。嗣後如有似此者。俱照此例

辦理。○癸亥。喀什噶爾叅贊大臣納世通等奏。臣等前遣回人阿克伯克等往問霍罕額爾德尼。拘留阿濟比。及私取鄂斯賦稅等事。據額爾德尼遣努爾默特比稟稱。奉到來文。詞意嚴切。懇求勿信布魯特等妄言等語。又所具呈文內稱。因阿濟比與鄂斯人等不睦。代為和解。至鄂斯布魯特等。並無頭目。恐其離散。暫遣五十戶前往居住。雖一普爾。不敢私取。其阿濟比呈文。所言畧同。且稱額爾德

尼。已將所耕水田給還。所遣五十戶。亦經撤回等語。臣伏思額爾德尼。與愛哈默特沙結好。情本叵測。今據阿克伯克等。訪知愛哈默特沙。為岱音沙所困。不足倚恃。又懼兵威。是以情詞恭順。但狡猾之性。日後難免復萌。今既給還鄂斯水田。撤去移住人戶。似可暫免深求。報聞。○甲子。

上詣暢春園問

皇太后安。○遣官祭

關帝廟。○以翰林院侍讀學士瓦爾達侍講學士李中簡。充日講起居注官。○乙丑。補行湖南省乾隆二十八年大計。不謹官二員。才力不及官六員。年老官二員。有疾官二員。分別處分如例。○旌表守正捐軀之河南南陽縣民李光宗妻劉氏。柘城縣民宋某女宋氏。守正被戕之湖北宜城縣民張寬女張氏。○丙寅。兵部議覆大學士管兩江總督尹繼善奏稱。嗣後盜案。除按限查叅。照例彙題外。該

督撫於年終將某縣新舊盜案幾件能獲幾案逐縣開列清單彙奏有能實心緝捕拏獲新舊多盜要犯及隣境盜犯者責成該督撫查覈具切實考語將文武員名逐一聲明請旨可否送部引見其強刦頻聞又不嚴緝捕亦即據實列入指叅請旨議處應如所請至竊案向止申報上司量記功過應請嗣後地方官承緝竊案其記功記過之最多者亦於年底開具清單彙奏載入例冊並通飭各省一體遵行從之

大清高宗法天隆運至誠先覺體元立極敷文奮武孝慈神聖純皇帝實錄卷之七百十

大清高宗法天隆運至誠先覺體元立極敷文奮武孝慈神聖純皇帝實錄卷之七百十一

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部主簿事務

世襲騎都尉軍功加十九級隨帶加二級又加二級 臣董誥內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆二十九年甲申五月丁卯

上詣暢春園問

皇太后安。○諭曰。達桑阿在哈喇沙爾辦事。已滿三年。著派明普前往更換。○吏部議准。陝甘總督楊應琚奏稱。哈密地方。為新疆南北兩路總匯。差務繁劇。向止設有通判。無佐理之員。應裁清風閣巡檢。改哈密巡檢。定為衝繁要缺。五年俸滿。照哈密文員之例。咨部陞用。從之。○己巳。以廣東按察使赫昇額。為湖南布政使。○庚午。

上詣暢春園問

皇太后安。○還宮。○調湖北按察使費元龍。為

廣東按察使。以浙江督糧道雷暢。為湖北按

察使。○是日起。

上以夏至祭

地於

方澤。齋戒三日。○辛未。諭軍機大臣等。前以東

省得雨。曾否霑足。及有無望雨情形。降旨詢

問。崔應階。嗣據三次奏到。自四月十三日起。

至五月初一二日。先後得雨。自一二三寸。至

四五六寸不等。迄今又逾半月。有無續得雨

澤。未據奏報。昨京師於本月初八九等日。復

得透雨。東省毗連畿輔。似應一體優霑。近據

高誠奏到。經過平原德州地方。亦於初八九

日得雨四寸。該撫何以並未奏聞。且本日現

有崔應階奏摺。亦未陳奏。及此著傳諭該撫。

將現在東省各屬得雨。曾否透足。並有無尚

需雨澤之處。即速查明。據實覆奏。以慰厯念。

尋奏。臣於五月初四日。會同督臣尹繼善。赴韓莊查勘閘壩。五月初八初九二日。該處並無雨澤。回署後。檢查各州縣申報。德州平原一帶。得雨四寸。及二三寸不等。十四日濱州一帶。得雨二三寸。通省尚未普遍。充曹泰沂等府。現在需雨。晚秋俱未播種。旬日內得有透雨。尚屬及時。得旨覽奏俱悉。○壬申。諭軍機大臣等。阿爾泰查審託雲動公修署一案。迄今一月有餘。尚未覆奏。因思託雲所動銀

數三營各止二十兩。其款本不甚大。無難刻日完結。或因阿爾泰前此曾奏託雲頗能整飭營伍。若於此案不過照常辦理。不免跡涉迴護。是以加意研求。則心存成見。轉失虛公之道矣。況前此奏請解任時。朕亦惟隨事降旨。並不以該督先經保奏。稍設成心。而該督又何所容其介介乎。專閫大員。即署理有人。其缺亦不應久懸不補。著傳諭該督即速秉公訊明具奏。如該督現已起程。即交阿桂速

行接辦完案。尋奏。臣於途次陝省沔縣地方。承准廷寄。查託雲私動公項。臣有干例議。並託雲曾請陛見。今復候旨遵行之處。俱於五月十一日具奏。俟奉到硃批後。移知阿桂辦理。得旨覽。○癸酉。夏至。祭

地於方澤。

上親詣行禮。○詣暢春園。問

皇太后安。○幸圓明園。○刑部議准。陞任廣東

按察使赫昇額奏稱。直省秋讞。各州縣將應行解審人犯。選撥衙役解省候審。不足以昭慎重。應請遴委妥員。督同差役押解。審畢後。依舊解回。倘有疎脫。即將該員叅處。以專責成。從之。○甲戌。

孝恭仁皇后忌辰。遣官祭

景陵。○諭軍機大臣等。舒赫德等奏。查辦閩省廈門陋規。有屬員為該督撫置辦貨物等因。一摺。已有旨令楊廷璋明白回奏矣。摺內所

稱楊廷璋除買燕窩呢羽外譚尚忠劉增為代買物件據開墊價四十餘兩又懷蔭布單開墊價二十餘兩各等語楊廷璋在京自云置買物件實屬無幾並未有如許之多因令該督回閩自行就近覈對其是否果係貼辦實數抑或屬員等混行指開款証俱在無難立見分明楊廷璋即可將此項墊價實在多寡之數逐一詳質確實各該員自無能裝飾非若一面之詞難成信識也著將此諭令楊

廷璋知之○又諭曰舒赫德等奏查訊廈門陋規實在情形一摺所叙緣起尚未合竅要此案查辦情由自應將前因黃仕簡叅奏奉命前往查訊敘起方得辦案之體今摺首敘述詞語竟似朕有所聞差伊等赴閩特為訪查楊廷璋等而設仍難發鈔已令軍機大臣節改明降諭旨矣至楊廷璋定長之咎情節迥不相同楊廷璋現今屬員代買物件自有應得之罪若定長既訊無他故其咎止於失

察屬員至總督即有代購物件之事巡撫亦無從逐一稽查豈能繩以袒徇同官不行舉劾乎則知伊等息息解其任為可笑矣又摺內將該督撫一例措詞轉似朕有曲護楊廷璋之意未免過於揣合殊失虛公之道各省督撫中似楊廷璋此等情事亦不能保其必無特事未舉發未便逆億吹求若一經發覺必覈實查究予以應得罪譴斷不肯稍為寬假朕辦理諸務惟期事皆得實從未嘗豫設成見或致畸重畸輕舒赫德等寧尚未稔知耶所以屢次申諭伊等者蓋為伊等所辦茫無頭緒不成政體也至楊廷璋前在京時曾奏代買之物並無如許之多所發價值數亦不符等語今摺內亦有查究底帳與原單不符之處現今該督回閩舒赫德等可就近詳悉覈對不難立見分曉各道廳等自無能復肆混供即楊廷璋亦不能稍存諱飾也軍機大臣所改摺底並著鈔寄閱看將此傳諭知

之。○軍機大臣等議准。伊犁將軍明瑞等奏雅爾駐兵事宜。一。派出屯田綠旗兵五百名。請添派一百名。除烏嚕木齊派兵四百名外。其二。由庫爾喀喇烏蘇三屯兵內抽撥。此項兵。應於冬春之交。派大臣侍衛等帶領。由齋爾擇雪少之路前往。勤力耕作。以餘暇築城。務於兩年竣事。其應給之車輛牛馬。口糧籽種器具。應自烏嚕木齊。或伊犁備辦者。如數豫備。又伊犁之索倫兵六百名。烏嚕木齊之一百名。應於明年十月換班。令回游牧。但冬令雪大。須待春草生時。方能行走。請即以此七百名兵。防護屯田兵前往。將來伊犁新派一千五百名兵到時。再行撤回。一。烏嚕木齊庫爾喀喇烏蘇之察哈爾厄魯特。三百餘戶。原議移駐雅爾。但綠旗兵行時。正值雪後。草生羊隻難收。未便一同行走。請量留幹練官一二員。俟春草生時。緩行前往。至烏嚕木齊。尚有滿洲兵二百名。應令與索倫兵

同行。如有由伊犁解往牲畜。即可交伊帶送。合併原隊。俟應撤之時。一同撤回。一。雅爾既經築城駐兵。哈薩克自必遠避。但外藩惟知自便。應酌派滿洲索倫兵九百名。分東北兩路巡察。有越境游牧者。嚴行驅逐。若有潛至烏梁海種地之華額爾齊斯等處游牧。或有換易糧米。乘隙搶奪等情。另請咨行烏里雅蘇台將軍成衮扎布。禁止驅逐。一。兵丁沿途及到後口糧。現在雖有牛馬車輛足敷裝載。但牲畜專供屯田之用。若遠行重載。難免疲瘦。請於伊犁通融辦交羊一千二百隻。派兵解送。合之烏嚕木齊存剩羊三十餘隻。分給各項兵。則可稍省載運口糧。牛馬皆有餘力。於屯田有益。一。雅爾築城以後。哈薩克商人必就近貿易。此例一開。則所用緞疋銀兩。既須從伊犁運送。而所換馬匹牲畜。又須送往伊犁。殊為煩瑣。請飭諭哈薩克商人。俱向伊犁貿易。其有攜帶牲畜數少者。如雅爾有須

補額之處亦仍令其交易。但伊等路費既省其馬匹等作價應較伊犁少減。一塔爾巴哈台駐兵原議用察哈爾今已添派錫伯請令明瑞等酌量派撥不必拘定。未到之前博囉塔拉接放之卡則另於伊犁派出馬兵暫駐額敏河沿等之三大卡即以滿洲索倫兵暫駐遞送伊犁雅爾兩處文移。又所請侍衛十一員未到之前應令暫行委派所奏烏魯木齊舊印帶往雅爾鈐用之處於體制未合亦

應令明瑞等擬定字樣交部另行鑄給從之。○伊犁將軍明瑞等奏前奉旨將烏魯木齊大臣移駐雅爾巴里坤提督移駐烏魯木齊烏魯木齊總兵移駐巴里坤其提督總兵等應於烏魯木齊大臣移駐雅爾之前互相調駐接辦後烏魯木齊大臣方帶官兵移駐均於公務有益從之。○補行四川省乾隆二十八年大計罷軟官一員年老官六員有疾官二員才力不及官三員分別處分如例。○乙

亥諭軍機大臣等圖勒炳阿奏黔省民人索思政等夥衆械鬪一案查辦既已遲延情節亦未明晰。索思政等互爭茶山事涉兩省為大吏者自應星速勘辦執法處治以戢刁風乃一任委員推諉因循致奸民糾夥滋事釀成大案該撫既聞稟報又不自赴查拏嚴審何以肅法紀而靖地方且平民夥衆妄行已屬不法甚至縣役劉元等並敢糾約入夥其事尤堪駭異司獄典者猶可長存姑息耶該撫圖勒炳阿屢獲罪愆經朕格外加恩棄瑕錄用今於此等重案仍徇外吏養安積習並不親身督辦感激懲創之意安在圖勒炳阿著傳旨嚴行申飭並令即速自行前往督同審擬完結毋得再延干咎將此詳諭知之。○丙子吏部議准青州副都統素玉奏稱德州城守尉衙門筆帖式向由京發往六年期滿復令回京更換新員於駐防旗務不甚熟悉請改德州城守尉筆帖式作為本處駐防旗

人公缺。照各將軍衙門筆帖式之例。該副都統咨請試題。於本處駐防兵內。有能繙譯清漢字者。考試繙譯。將試卷咨部辦理。其支俸即照青州筆帖式支給。從之。○戶部議准。四川總督阿爾泰奏稱。屏山縣李村。石堰。鳳村。三處產鐵。應請開礦採取。從之。○丁丑。

上詣暢春園。問

皇太后安。○諭軍機大臣等。旌額理奏稱。現駐烏魯木齊之厄魯特兵。舊例每月給銀四錢五分。單丁每月給銀三錢。自給與孳生羊隻以來。生計漸裕。甚為得所。請將所食錢糧。停其支給等語。此項厄魯特兵。皆閒散餘丁所充。現在伊犁等處者。並未給與錢糧。旌額理等請裁。甚是。但厄魯特馬甲等。在烏魯木齊者。每月俱給銀九錢。在伊犁者。每月給銀一兩。現將烏魯木齊庫爾喀喇烏蘇等處厄魯特兵。移駐雅爾城駐防。所有錢糧。應照伊犁兵丁。加恩一體給發。著傳諭明瑞等。從伊犁

至雅爾時。遵照辦理。其烏魯木齊佐領錢糧。亦著照伊犁厄魯特佐領之例給發。○又諭。前據鑲黃旗滿洲蒙古二旗。以駐防熱河兵丁內。有未帶子嗣。私留京中者。將該叅領佐領等叅奏。朕比以別旗似此者。想應不少。著八旗等詳查具奏。今據奏稱。各旗遣往熱河駐防兵丁內。均有將子弟留於京中等語。旗人係朕奴僕。無論駐防何地。均應照定例。帶領妻子前往。況熱河甚近。何所畏懼。至將家口留於京中。該旗等並不查明具奏。或別有情節。因父母年老。及妻室已故。予在襁褓者。派往時。亦當查明陳奏。乃該旗大臣等。不以為事。及朕詢問。始行奏及。除鑲黃旗滿洲蒙古大臣。係首先查叅。著免其議處外。其餘鑲黃旗滿洲章京等。及各旗大臣章京等。俱著交部分別察議具奏。再旗人遣往駐防。借端將子弟留於京中。此風斷不可長。若不嚴懲。嗣後遣往駐防時。不肖之徒。益不知忌憚。著

交軍機大臣等。現在查出此項人等。按其情節輕重。分別定擬具奏。○輔國公三丕勒故遣官致祭如例。○戊寅。戶部議准。四川總督阿爾泰奏稱。屏山縣利店。茨黎榮丁。三處產鐵。請開礦採取。從之。○庚辰。

上詣暢春園。問

皇太后安。○是月。欽差協辦大學士公兆惠直隸總督方觀承奏。臣等由淀河一帶。勘收工程。至于牙河。青縣十里窪。由格淀隄。至天津。勘收塌河淀之西隄。及海河疊道各閘座。並閘下引河。有應開隄放水。並開閘引水灌漑。俱令分別辦理。現勘老黃河。前赴寧津南皮一帶。即至景州廣平。勘牛尾河。及冀屬之衡水縣石閘。望都九龍泉河。安肅瀑河石壩。得旨覽奏俱悉。○大學士管兩江總督尹繼善。河東河道總督葉存仁奏。兆惠奏韓莊滾壩以北。拆開石隄處。應改建閘座。奉旨令臣尹繼善回任。由東會同河臣葉存仁。相度情形。

籌酌。臣等查微山一湖。水勢稍大。東省兗曹等府。及江南之沛縣低窪地畝。常慮淹浸。而水勢過小。又恐八閘邵宿等處。運道淺滯。是以湖口閘。向以金門水深一丈為度。水長則洩水。以保民田。水落則蓄水。以濟漕運。並設滾壩引渠。原係斟酌得宜。前因水大。拆開石堰。應如兆惠所議。改建閘座。得以啟閉隨時。但滾壩以北。河身畧窄。河底高於湖底。於建閘不甚相宜。應於滾壩以南。湖口閘以北。添石閘一座。金門寬深。悉與舊閘一律。即名湖口雙閘。啟閉由人。於漕運民田有益。得旨允行。○湖廣總督李侍堯奏。各省千把外委缺出。俱由該將備。於現在弁兵內。揀選數名。由提鎮考驗。轉送督臣拔補。惟湖廣於雍正六年。改為湖北二十四營千把。專隸總督考定。知會提督。湖南二十四營千把。專隸提督考定。知會總督。以免路途往返。臣查南省各弁。獨由提臣考拔。至俸滿甄別。仍須送督臣考

定而督臣新任亦有通行調試之例。惟拔補之始不由督臣考定。似無以昭慎重。應請湖南各標協營十把外委缺出。該營挑選。由提督考驗。後轉送總督考拔。得旨允行。○山東巡撫崔應階奏。沿河之武城縣境內。地勢最窪。運河東岸。有沙河一道。伏秋雨多。匯注牛蹄窩。祝官屯一帶。為東岸運隄所隔。常至淹浸。運河西岸。有蔡河一道。西通黃潞河。雨多則上游臨清。並直隸清河等處坡水。由黃潞河。蔡河。匯注武城之馮家灣。為西岸運隄所隔。東西兩岸。坡水不能入運。民間每年秋後開隄。春間堵築。多有未便。擬於東岸之牛蹄窩。祝官屯。西岸之馮家灣。三處各建石閘一座。並將馮家灣閘門展寬。分為兩空。中設礮心。開槽下板。三閘俱因水勢長落。隨時啟閉。得旨允行。○又奏。伊家河第七八段工內。下係石底。巨石錯落。水從石縫盤旋。以致通河不得暢達。現俱大加開鑿。與河底一律平坦。

開壩放水。甚屬通暢。臣前將廣運閘舊運河一帶河身挑濬。以疏積水歸湖。茲復於魚臺縣丁家樓地方。開東南岔河一道。直達南陽湖心。較廣運閘舊河更為便捷。所有運河西岸水淹村莊。漸可涸出。臣抵韓莊。經過濟南東昌。兗州。泰安等府。留心察看。並無蝻子萌動。得旨覽奏欣慰。至蝻子尤當加意搜捕。毋致為害。○又奏。東省於乾隆二十三年。裁減驛馬六百匹。明歲南巡。經臨東省。河驛兩路。均需馬匹。請暫行復額。自本年十月初一日起。照額設驛馬。支給草料。差竣停止。將馬匹變價歸款。得旨允行。○河南巡撫阿思哈奏。開封府屬賈魯河。為歸陳二郡之幹河。其惠濟河頭滾壩。原為分洩賈魯河水勢。現在測量壩面。比賈魯河底高八尺五寸。應將滾水壩改建石閘。酌量賈魯河水長落。隨時啟閉。報聞。○陝甘總督楊應琚奏。巴里坤地方。駐兵屯種。年來種植小麥豌豆。地氣日漸轉移。

近水易墾之地甚多。現在屯兵遣犯。每歲僅能種地一萬四五十畝。臣請照辦送烏魯木齊戶民之例。招募內地無業貧民。送至彼處墾種立業。現在敦煌等縣已招有六十餘戶。請將此項戶民。辦送安插。其酌給地畝。借給口糧農具籽種。悉照烏魯木齊辦理。得旨嘉獎。○四川總督阿爾泰。提督岳鍾璜奏。打箭鑪口外上瞻對土司堪卓。與其胞叔撒墩土千戶索諾木。向係分管番民。本年三月內。堪卓與土千戶索諾木。因爭番民起畔。互相放鎗。堪卓被鎗傷斃。除查辦情由外。堪卓之子哀布諾爾布。年十二。不能管理土司印信。現今伊弟索諾木諾爾布代辦。俟哀布諾爾布年歲合例。再行請襲報聞。

大清高宗法天隆運至誠先覺體元立極敷文奮武孝慈神聖純皇帝實錄卷之七百十一

大清高宗法天隆運至誠先覺體元立極敷文
奮武孝慈神聖純皇帝實錄卷之七百十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總纂官經筵講官太子太傅文華殿大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書領侍衛內大臣滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將纂修

校修

乾隆二十九年甲申六月辛巳朔兵部議准

大學士公傅恒等奏稱各省關稅解京或給
勘合兵牌或給火牌兵牌或祇給兵牌辦理
向未畫一嗣後除在京之崇文門左右兩翼
向不造報經費及距京甚近之坐糧廳起解
省便毋庸置議外其餘各關起解錢糧俱一
體填給勘合火牌兵牌由驛遞送再查兩淮
鹽課自二十八年議准由驛遞解京廣東福
建二省課銀向係為備本省兵餉如歷年存
剩積多始酌定起解報部將來遇解京之年

亦准一體填給勘合運送從之○壬午諭軍
機大臣等據陳宏謀奏向例湖南省民人不
准與苗人結姻後經弛禁近復禁止於該處
情形轉覺不便等語湖南沿邊一帶地方民
苗雜處從前因苗人歸化伊始梗頑者尚未
盡馴恐與民人交通漢奸或致構生事釁是
以定例甚嚴今苗人向化有年涵濡日深漸
習耕讀與內地民人無異若令其姻婭往來
與苗民聲息相通則各崗寨風土人情或可
得其要領於地方亦屬有益今陳宏謀既奏
及此於理似屬可行著於奏事之便傳諭李
侍堯喬光烈等令其體察現在情形應否准
其互為婚姻抑或有不可行之處查明覆奏
○旌表守正捐軀之直隸懷來縣民趙時雲
妻陸氏○癸未諭據李侍堯奏湖南武岡州
高沙市地方山水驟發衝壞田廬淹損人口
衡州府屬之衡山縣溪水陡漲沿溪民房亦
有間被衝淹之處撫臣喬光烈現往查勘等

語。山水陡發。雖止一隅受災。但田廬人口。既有傷損。朕心甚為軫念。著該督撫等。確勘被災情形。分別輕重。加意撫卹。俾貧黎均霑實惠。勿令胥吏侵蝕中飽。以副朕惠愛災氓至意。該部遵諭速行。○刑部議准。山西按察使藍欽奎奏稱。歸化城一帶。蒙古命案。向係各協廳據報詳請都統派員會驗。往返動經旬日。請嗣後悉令該通判往驗通詳。仍照例詳請都統派蒙古官員審擬。其委派會驗之處。請予停止。從之。○又議奏。山西按察使藍欽奎奏稱。命盜案內。立決人犯。審明先行刺字。其謀故各犯。則係監候奉旨之日刺字。請嗣後謀故重囚。與立決人犯。統於督撫審明具題之日。即交按察使衙門概行刺字。然後遞回原犯事地方監禁。併載入例冊。通行各省一體遵行。從之。○甲申。

上詣暢春園。問

皇太后安。○諭曰。貴妃以上薨逝。奉安時。王公

滿漢大臣。俱著步行。送往妃嬪以下。王公漢大臣等。不必步行。隨送前往奉安處所等候。滿洲大臣等。內有年力衰邁。步履維艱者。亦著先行前往。○又諭曰。扎拉豐阿。前在軍營行走。此次北路辦事。將屆三年。著派王柱前往更換。○諭軍機大臣等。據楊應琚奏。豫籌新疆等處。乙酉年應需各項綱緞。請敕三處織造。照樣織辦。解送等語。前經降旨。新疆各處應辦綱緞。下年需用者。但於上年奏聞交辦。著將楊應琚奏單鈔寄三處織造。令照各項數目。色樣。豫備製造。解送甘肅應用。毋得粗糙塞責。並延誤干咎。○乙酉。諭據阿思哈奏。信陽州知州慕豫生。盤獲楚省夥竊拒捕逸犯鄭國璽等九人。現飭解楚歸案審究。將慕豫生記功註冊。以示獎勵等語。鄭國璽等夥匪多人。肆意行竊。又於楚省拒捕傷人。劫回夥犯。此等積匪。久為閭閻之害。該州能實力緝捕。於地方公務。甚屬留心。慕豫生著該

部行文調取來京引見○又諭曰葉存仁崔應階會摺奏濟寧州知州史錦承審陶淳貪縱各款並不將借工漁利等實情審出顯有瞻徇情弊請將史錦革職知府葉崇交部嚴加議處一摺知州陶淳辦理民修水利工程乃敢濫行苛派折價自肥非尋常婪索可比前據叅到當經降旨交該督撫等嚴行研訊知州史錦係專委承審之員自應秉公究擬以成信讞乃惟瞻顧徇庇並不究出實情甚屬可惡若僅予革職不足蔽辜史錦著革職拏交刑部問罪知府葉崇著交部嚴加議處○諭軍機大臣等額爾景額等奏稱從前因葉爾羌貿易回人離散所有交官稅額俱未計算現在有二百二十人投回葉爾羌各立產業請酌量定擬每年令交錢二千騰格今年已過四月請自五月起至十二月令交錢一千三百騰格等語從前霍集占肆逆回衆散亂全部蕩平數年內始投回立業此時若

即照所定額數令其交官尚恐拮据著加恩將所定今年應交錢一千三百騰格酌免五百嗣後每年俱令交一千五百騰格以示體卹○又諭據楊桑阿等奏薩爾巴噶什之比車哩克齊等以從前布魯特等妄報官兵被害前來認罪因諭以內地妄報治罪之例斥責遣回等語楊桑阿所辦非是外部之人一有所聞即行稟知尚屬恭順若遽行斥責則將來雖有實事亦必畏懼不敢稟告此事本

係該大臣等冒昧查拏於前茲復以斥責車哩克齊為塞責之舉即傳斥之言亦未得體著傳諭楊桑阿等遇便諭知車哩克齊阿瓦勒比等爾等所報前經具奏奉旨此係我大臣不行細心查究之過爾等所報雖虛並無不是之處嗣後凡有聞見無論虛實即行稟報如此明白曉諭庶足以釋其疑刑部議覆廣西按察使袁守侗奏稱泗城鎮安二府寧明東蘭二州例不安置軍流今風土稍異

烟瘴亦輕。嗣後解到極邊烟瘴軍遣一體酌發。應如所請。至土苗地方。仍遵照定例。不得撥發。又奏稱。疎脫重犯之解役。果係依法管解。偶致疎虞。除短解兵役。仍照律問擬外。將長解二名。均暫行羈禁。本官另選幹役。押同原解之親屬。上緊躡緝。酌限一年。如能限內拏獲。仍將該役。依例減二等擬徒。或限內無獲。即將該役。照逃犯本罪減一等問擬。滿流至賄縱疎脫重犯。分別治罪各條。應於各州縣衙署頭門。刊刻木榜曉諭各役。從之。○丙戌。諭曰。河東河道總督葉存仁。現在患病。派御前侍衛索諾木車凌帶領御醫。馳驛前往。診視。○刑部議准。安徽按察使閔鶚元奏稱。臬司為一省刑名總匯。遇有叅革發審案件。無論濫刑枉法。應歸臬司。即侵貪那移等項。俱由臬司主稿。會同藩司審勘招解。以專責成。從之。○丁亥。戶部議准。戶部侍郎兼順天府府尹錢汝誠等奏稱。浙省乾隆二十三、四

年。行銷順天茶引。共計一萬九千餘道。查追無著。請嗣後浙省行銷京師茶引。令崇文門於截去中間時。即將所截引心。彙齊送部查覈。其殘引。仍給該商。准照行銷口外。殘引之例。一體免追。從之。○兵部議准。直隸總督方觀承奏稱。熱河廳應添巡防官員。請以燕河路分防倂城汛把總移駐。除原轄馬兵四名。守兵十名外。應抽撥霸州營存城馬兵六名。守兵十名。並令熱河同知督率。歸督標統轄。將樂亭營外委帶存城馬兵一名。守兵一名。劉家墩汛馬兵一名。守兵二名。抽撥開平汛守兵三名。黑洋河汛守兵二名。移駐倂城。隸天津鎮樂亭營都司管轄。其稻地一汛。即以澗河汛把總帶領兵就近巡察。改隸玉田營都司管轄。從之。○以江南淮徐河務道李宏為河東河道總督。○旌表守正被戕之四川南江縣民吳宗儒妻嚴氏。○戊子。諭軍機大臣等。學政李紱摺奏考試童生。多有冊內年

歲甚幼。而其人實已至四五十歲不等者。現發提調查辦等語。則祛弊可謂認真。但此等情弊。恐各省所在不免。易為鎗手頂冒。潛行假託。甚有關係。著傳諭各該學政。於點名之時。留心詳慎體察。務期弊竇剔清。毋少疎忽。○又諭。河東總河員缺。已著李宏補授矣。李宏久任河員。於河務情形。素所熟悉。即著速赴新任。不必來京請訓。但該督向與何謂同事日久。既身任總河。何謂又調補運河。遂於一切公務。該督須秉公查辦。不得因係舊日交好。遂稍存迴護瞻徇之見。將此傳諭李宏知之。○又諭。日葉存仁現在病故。已令李宏補授河東總河矣。此時伏汛屆期。河務最為緊要。可即令其速赴新任。該道任內。倘有經手未完事件。委員暫行辦理。不必俟李清時到任交代。可將此傳諭高晉知之。尋奏。李宏現無經手錢糧。亦無妥辦未完事件。臣即飛咨李宏。令赴新任。得旨。覽。又批。汝謂此人能

勝此任否。有積習否。據實奏來。不可因朕旨有所顧忌也。○烏喇特輔國公達爾瑪里第故遣官致祭如例。○己丑。上詣暢春園。問

皇太后安。○庚寅。

上御勤政殿聽政。○都察院奏。山東高唐州民高上忠。控知州馬而良劣蹟各款。得旨。此案著四達馳驛前往。會同該撫崔應階秉公查審。隨帶司員著一併馳驛。○以禮部尚書永貴充經筵講官。○以鑲紅旗滿洲副都統興德為莊浪副都統。○調福建福寧鎮總兵德興為四川重慶鎮總兵。○辛卯。盛京將軍舍圖肯等奏。寧遠中前所中後所兩處地方漸起蝗蝻。業經全行撲滅。仍不時派人搜捕。廣寧屬小黑山界內。高子山等處。起有蝗蝻。現派員帶領兵夫上緊撲捕。又南路各城一帶。所有蝗蝻與田畝尚遠。皆在牧場曠野等處。撲捕尚易。現添兵夫二百餘名。趕緊撲滅。得

旨。好。勉力捕盡。不可稍留餘孽。陝甘總督楊應琚奏。甘省軍需告竣。各屬庫貯一切正雜錢糧。應儘數提解司庫。第恐年例必需之項。無可支應。應將衝繁州縣廳撥貯經費銀四百兩。簡僻州縣廳撥貯銀三百兩。至若道府庫中撥貯。除平涼。甘州。涼州。西寧。寧夏。並肅州。現有存貯及備公等銀。無庸撥貯外。其蘭州。安西。鞏昌三府。應各撥銀二千兩。慶陽。秦階等府州。應各撥銀一千兩。如所屬州縣額貯經費不敷。准於該府州庫內支領。俟報銷後。赴司按數領回歸款。得旨。如所議行。○又奏。巴里坤提督烏魯木齊總兵。既互相調駐。其烏魯木齊原設鎮標中左右並城守等四營。自應改為提標。巴里坤原設提標中左右三營。自應改為鎮標。止令提臣於移駐之時。帶中軍參將前赴烏魯木齊。並令鎮臣帶中軍遊擊前赴巴里坤。其餘員弁兵額。俱無庸移易。至提督原轄之哈密。沙州。安西。靖遠。

塔勒納沁。瓜州。黃墩。卜隆吉。塔爾灣。橋灣。赤金。踏實。雙塔。惠同等。一十四營堡。俱在巴里坤以東。遇有考驗弁兵。撥發糧餉。稽查營伍等事。若仍照前送提臣覈辦。相距遙遠。難以兼顧。請就近改歸巴里坤鎮臣管轄。仍聽烏魯木齊提臣統轄節制。得旨。如所議行。○壬辰。

上詣暢春園。問

皇太后安。諭軍機大臣等。據明瑞等奏。現在涼州。莊浪。熱河移駐兵丁。需用口糧。除所存餘糧。及本年秋收。雖可多得二三萬石。僅足補數年不敷之數。未可遽以為羨。餘請於此二年內。攜眷兵未曾全到之時。於各回城。再派回人二千名。赴伊犁。屯田等語。著照所請。即行知各回城駐劄大臣。酌量派往。惟擇其情願赴屯者。不必勉強。至從前所派回人。該伯克等捐助資送。此次所派。俱著官辦起程。毋庸協助。併傳諭明瑞等知之。○又諭。據庫

車辦事原任巡撫鄂寶奏稱。從前新疆甫定。設有總管臺站六品伯克。令其約束臺站官兵回人。今官兵回人。漸已言語相通。如有關毆細事。各臺站筆帖式。俱可即時辦理。此項伯克並無應辦之事。請隨其出缺。陸續裁扣等語。著照所請行。但各回城。俱有總管臺站之伯克。若無應辦之事。自應一體裁扣。其中或有尚需人辦事者。仍准存留。不必拘泥。著傳諭各回城大臣。酌量辦理具奏。又諭遣往伊犁駐劄之厄魯特。及熱河駐防兵丁。坐扣未完備造軍器等項銀兩。均著加恩豁免。惟此次遣往熱河兵丁。將子嗣留京者。其坐扣未完銀兩。未便一體寬免。伊等派出時。該管旗大臣等。未經查明。以致辦理不善。此項銀兩。應著落該管旗大臣等賠交。嗣後八旗大臣等。不得仍委之叅領等蒙混。務將應派之人。通行傳至衙門。一一詢問。各情節辦理。○甲午。諭曰。內大臣博勒奔察。內廷行走多

年。從前病時。賞醫賜藥調治。嗣復賞銀一千兩。俾安心調養。今聞溘逝。朕心深為憫惻。著派散秩大臣一員。帶領侍衛十員。前往賜祭。○乙未。戶部議准。大學士管兩江總督尹繼善奏稱。直省各州縣常平倉。定例春糶秋還。請於出糶之時。先將價值詳明。及屆秋成買補。其在出境採買者。令將產地時價。先行詳報。其本地採買。亦將時價報明。及實在發價若干。詳本管道府。加結轉詳督撫查覈。稍有不符。即行參究。如採買價有盈餘。全數解司充公。遇有撥缺存倉米穀。應動正項採買者。其不敷時價。奏明於所存盈餘銀內撥補。從之。○刑部議准。廣西布政使淑寶奏稱。臬司為刑名總匯。其交代無論正署離任。應先將奉行欽部事件。及所屬通報未結各案。與鄰省咨查。督撫批發。並自理諸務。俱分類造冊。連各卷宗封固蓋印。一體移交接任之員。將在班書吏。照舊關防。不許藉端出署。接任臬

司於莅事一月內。將交代清楚情由。照藩司交代例。自行陳奏。並具交清文結。交督撫咨部。其或臬司離任。別因事故。不及親辦者。即責成首領官。關防造冊。封卷呈辦。凡有刑名之道府廳員。於新舊交代案卷。應一體通飭辦理。從之。○以翰林院侍講阿肅。署日講起居注官。

實錄卷七二三

王

大清高宗法天隆運至誠先覺體元立極敷文奮武孝慈神聖純皇帝實錄卷之七百十二

大清高宗法天隆運至誠先覺體元立極敷文奮武孝慈神聖純皇帝實錄卷之七百十三

監修總裁官總纂官太子太傅文淵閣大學士文淵閣領閣事領侍衛內大臣稽察奏奉 上諭事件處管理吏部理藩院事務兼管旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官總纂官太子太傅文華殿大學士文淵閣領閣事稽察奏 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛總纂官太子少保工部尚書紀錄六次臣曹振鏞等奉
敕修

乾隆二十九年甲申六月丙申。

上詣暢春園問

皇太后安。○諭軍機大臣等。阿桂奏綽斯甲布等九土司。與郎卡互相攻擊各情形。內另摺所奏。虛衷體察全局機宜。不必急急辦理之處。所見甚是。其第一摺所奏。將金酋罪在不赦。傳諭各土司。以破其疑等語。則未免跡涉張大。於現在事理未協。在金酋等讎釁相尋。正如鼠鬪穴中。本屬外番常有之事。督臣為邊方重鎮。即欲相機辦理。亦惟不動聲色。先

為體勘確情再行斟酌措置方得控馭大體。況朝廷於此等麼醜類如郎卡之垂涎鄰寨固不為之護庇而綽斯甲布等之欲除害已亦不為之抑制此正所謂光明正大之道。若如阿桂所云金首罪不可赦則似郎卡實已獲罪天朝於理即當聲罪致討又豈應假手九土司竟類常人挑構取事者所為耶。至遣官前往曉諭綽首新任總督欽命來川云云又竟明示以出自朕旨特令阿桂為總督專辦此事者然無論有乖體制且徒使首目等因此驚惶駭聽又安足以破其疑總之揆諸此時應行籌酌事宜均不免為過當也。阿爾泰現既來京請訓阿桂在彼先事悉心熟計藉巡邊以審察其動靜一切務須安詳鎮定坦然行所無事惟自守其另摺之說待阿爾泰回任商榷定局可耳。將此詳諭阿桂知之。○丁酉諭曰蘇昌等奏韶州府等屬先後間有被水之處惟英德縣地方兩次被淹情

形較重現在照例撫卹等語該處城鄉被水雖屬一隅偏災但兩經山水漲漫田廬多有淹損無力窮民口食維艱著加恩將英德縣酌賑一月口糧俾資餬口其南海三水清遠等縣民修圍基當被水之後復令裹糧趨事亦未免拮据著加恩各按在工民夫酌給口糧以資力役該督撫等其董飭所屬實心經理副朕加惠貧黎至意該部遵諭速行。○戊戌調鑲黃旗漢軍副都統伊勒圖為鑲黃旗蒙古副都統。○調福建汀州鎮總兵官德滋為閩粵南澳鎮總兵以貴州銅仁協副將魏嶠為汀州鎮總兵。○已亥諭軍機大臣等南澳鎮總兵葉相德現在丁憂其員缺已有旨令官德滋調補但官德滋係直隸人彼如福建人入籍直隸則可不然或未能熟習水師於該鎮營務無益著傳諭楊廷璋據實奏聞如官德滋實於水師不甚相宜即可於該省陸路總兵內擇其曉習水師者酌量奏明調

補將此傳諭知之。○豁除江西臨川縣沿河
坍沒田地十九畝四分額賦。○庚子

上詣暢春園問

皇太后安。○諭據方觀承奏。安肅縣知縣謝昌
言。拏獲山東賊犯馬三。請解赴山東安嶽
質訊定案一摺。此等積案行劫重犯。事連數
省。固應隨案移解質審。但以狡猾性成之犯。
又明知法在不原。其詭計圖脫。勢將何所不
至。若因隔省長途。往來跋涉。解役日久懈弛。

尤易啟疎虞之漸。向來辦理。殊未詳密。嗣後
如遇此等重案人犯。經別省拏獲。其案情有
可行文關白本省完結者。自應將該犯即就
所獲省分正法。或其中有必應解質情由。應
如何設法。令交涉省分彼此遞接防閑。及慎
簡員役以重其事。毋得但任解差。奉行文具。
致滋貽誤之處。該部詳悉定議具奏。尋奏各
省拏獲盜案重犯。其在本省犯案。供出外省
曾犯行劫者。不論罪輕罪重。皆照行文關查

之例。研訊明確。毋庸解往質審。即鄰省地方
官。自行盤獲別省盜犯。及協同失事地方差
役緝拏者。均令在拏獲地方。嚴行監禁。詳訊
移查被盜省分案情。即由拏獲省分擬題。請
旨正法。仍知照本省。將拏獲正法緣由。在失
事地方。張挂告示曉諭。如果賊蹟尚須研訊。
或失事地方。有夥盜待質。必須移解者。令拏
獲省分。照各省解送秋審重囚新例。遴派文
武官各一員。帶領解役兵丁。親身管押解送。
仍豫先知會前途經由地方。一體遴派員弁
兵役。接遞管解。遇夜寄監收禁。其道遠州縣
不及收監者。即令該地方官。豫期遴撥幹役。
前往住宿處所。傳齊地保。知會營汛。隨同押
解官弁。鎖錮防範。倘有脫逃。即將各役嚴審
治罪。官員交部嚴議。仍載入例冊。通行直省
一體遵照。從之。○諭軍機大臣等。據方觀承
奏。調任安肅縣知縣謝昌言。拏獲山東賊犯。
為連次劫殺巨盜。久經免脫。謝昌言實力躡

緝務獲。其人可謂能事。摺內稱係調任。或係由簡調繁。抑或由繁調簡。並該員平日居官如何之處。著該督據實查明奏聞。候朕再降諭旨。至所稱將該犯解赴山東安省質訊之處。恐此等惡匪長途不無疎脫之虞。已傳旨各該督撫妥協辦理。現在馬三丑一犯該督即添派妥員。慎密押解前赴東省。勿令貽誤漏網。○戶部議准廣西巡撫明山奏稱鬱林州於乾隆二十三年報墾老荒水田六頃六

十畝有奇。除已成熟田入額徵輸外。其砂石難墾者五頃十畝有奇。應請豁免額賦。從之。○辛丑諭據喬光烈奏常德府同知員缺請將候補同知王錫蕃署理。仍試看一年。另請實授等語。王錫蕃因前在貴州知縣任內。拏獲隔省年久脫逃盜犯甚屬能事。是以降旨引見。加恩以同知補用。今若令其署理。試看一年。另請實授。則該員未免需次稽遲。非獎勵激勸之本意。王錫蕃著即實授常德府同

知。該部知道。○諭軍機大臣等據額爾景額等奏巴達克山素勒坦沙遣使和濟克蘭請給伊等齊特喇爾游牧及工匠人等。又告稱受烏罕人常來侵擾。業經回文斥責。並將原文及回文呈奏等語。素勒坦沙妄思僥倖。請給游牧。並乞工匠殊屬貪詐。額爾景額回文斥責甚是。而詞氣尚覺太弱。此事若額爾景額直以不便陳奏回覆。可毋庸頒發勅諭。今文內無此語。似我大臣等並未具奏。未免視

同泛常。著另繕勅書交額爾景額派員齎送曉諭。再從前素勒坦沙稱額敏和卓為父。今伊甫離葉爾羌。素勒坦沙即呈告其過失。甚屬不堪。著將額爾景額奏摺及素勒坦沙之書俱錄寄額敏和卓閱看。亦著作書交額爾景額轉寄素勒坦沙。令知所警戒。○賜巴達克山伯克素勒坦沙勅書曰。據葉爾羌駐劄大臣進爾奏章及大臣與爾往復文書。朕俱覽悉。爾奏稱前此獻出霍集占首級。意希重

賞。因道遠未得委曲陳奏。又稱愛烏罕等時。窺伺爾游牧。齊特喇爾乃爾先世舊地。因葉爾羌大臣聽沙呼沙默特一偏之詞。勒令給還。懇恩查給。並懇賞爾所屬萬人糧餉。本年收取游牧數處。請俱為天朝臣僕等語。從前霍集占兄弟逃入爾地。爾畏我大兵。又利其所有。始決計獻馘。朕已優加賞賚。而逆賊所有資裝。皆未索取。獨非賞乎。爾以獻馘為有功。不思爾若再為容留。尚能保爾游牧乎。且年來遣使入覲。賞賚尤多。此次給還齊特喇爾游牧。復加獎賞。皆以爾恭順之故。當益加謹恪。若仍不知足。是自取咎矣。至愛烏罕等果窺爾游牧。似非無端生釁。即如爾奏收取附近游牧數處。則爾之侵擾鄰封可知。朕為天下共主。一視同仁。非於爾有所偏徇也。齊特喇爾為博羅爾所屬。在準夷時。為爾舅氏沙瑪瑪特所據。後沙呼沙默特之祖恢復故地。皆我大臣所深悉。爾肆行攘奪。尚應問罪。

因業已遵諭給還。反加獎賞。可謂寬厚之至。而爾詭詞具奏。豈以葉爾羌大臣新經更替。謂可欺飾耶。今駐劄大臣玉素布。乃故哈密國王後裔。豈不知回部舊事。且前駐大臣吐魯番郡王額敏和卓。日後仍來更替。爾斯時又將何以為詞。爾從前稱額敏和卓為父。乃伊甫回游牧。即詆其偏聽人言。亦太反覆矣。爾所稱萬眾糧餉。以天朝之廣大。何所吝惜。但賞以酬勞。非巧言可得。爾之所屬。未嘗與葉爾羌等處回人一體効力。豈可無勞而獲賞哉。朕念爾前功。欲長加保護。特降勅訓諭。爾其循理守分。勿萌僥倖無厭之心。始可永承恩澤也。勉之勿怠。○葉爾羌辦事副都統額爾景額奏。據巴達克山使人和濟克蘭稟稱。素勒坦沙令我等告知。今有布哈爾之諾羅斯伯克達雅爾伯克二人。至巴達克山。聞我等歸附後。身受重恩。其汗阿布勒噶子等情願率屬歸附。因寄字素勒坦沙。素勒坦沙

覆以應向葉爾羌將軍大人請示等語。臣等查布哈爾尚在巴達克山之外。去葉爾羌甚遠。其懇請內附。必係傳聞我朝柔遠之仁。傾心向化。否則畏懼外部侵擾。仗威懾服。但布哈爾果係誠心歸附。儘可自到邊境稟告。何必向素勒坦沙轉求。恐係素勒坦沙欲藉為己功。邀取恩澤。再或假借威聲。懾服布哈爾。俱未可定。若不明白曉諭。則外部愚人。未免受其挾制。臣等因將

皇上體恤遠人。不欲強令歸附之意。詳悉曉諭。並將希圖僥倖。不能妄邀恩賜之處。委曲開導。使之自悟。如果布哈爾頭目阿布勒噶子遣使來附。臣等詢明情由。再行具奏報聞。○旌表守正捐軀之廣東清遠縣民梁勝章妻溫氏。○壬寅黑龍江將軍富僧阿奏。打牲烏拉呼倫貝爾索倫達呼爾總管等。向滿三年。照例送部引見。去年奉旨命打牲索倫呼倫貝爾等總管輪班前赴木蘭圍場。請嗣後打

牲呼倫貝爾等總管三年期滿。輪班前赴木蘭。無庸送京引見。報聞。○癸卯遣官祭火神廟。○諭曰。英廉等奏稱確查佃種地戶。分給原佃執照。以杜包攬之弊。所奏甚為得理。但此項查辦。自應徹底清釐。若僅責成州縣等官。恐仍不免假手吏胥。轉致煩擾滋弊。即著英廉錢汝誠會同該督詳悉妥辦。務使佃無掩飾。吏不侵漁。俾農民均沾實惠。○諭軍機大臣等。李宏補授河東總河。曾經降旨。

令其速赴新任。今據阿思哈奏。現在伏汛在即。黃河工程正關緊要。現飭道廳等員前往巡視防護。務保無虞等語。李宏係專管河道之員。著再傳諭。令其奉到此旨。即由河南速赴新任。不必來京請訓。○工部議准廣東布政使胡文伯奏。稱瓊州府之海口。雷州府之海安兩處。原設有班船七隻。每船水手十四名。以濟商賈渡洋。近因行戶自置船隻。載送人貨。俱領縣照。商民多便。請裁減班船四隻。

水手五十六名從之。○甲辰

上詣暢春園問

皇太后安。○還宮。○諭曰楊廷璋現在交部嚴加議處。著解任來京候旨。蘇昌著調補閩浙總督。兩廣總督員缺著李侍堯調補。李侍堯未到任之前著明山暫行署理。吳達善著調補湖廣總督。其雲貴總督員缺著劉藻補授。○吏部議准鴻臚寺卿傅為諱奏稱外省文武官員謝恩向係鴻臚寺專司定期傳喚三

喚不到者指名查叅。嗣經塔永阿陳奏傳示由吏兵二部查叅歸鴻臚寺准行在案。傳示查叅分各衙門辦理。事不盡一。請仍舊歸鴻臚寺一律辦理。再學習序班向由直隸學政挑取生員咨送鴻臚寺充補。應請挑取後學政會同禮部堂官再加驗看從之。○廣東巡撫明山奏鹽運使王槩貪污各款得旨此奏可嘉之至。蘇昌竟為其所愚而汝不顧弟兄私情即行叅奏實不負朕任用之恩矣。勉之。

又諭曰明山叅奏鹽運使王槩於署糧道任內浮收倉米五千餘石。及勒令鋪戶加倍折收銀一萬餘兩入已。並查出潮屬各埠虧空缺餉銀兩。向盤查運同保成跪求各款。請革職嚴審等語。王槩身為運使大員兼署糧道。不思潔已奉公。表率僚屬。乃敢浮收倉米五千餘石。且勒令解米鋪戶折收銀至萬餘兩之多。甚至以上司轉向屬員長跪懇求。行止卑鄙。罔顧官箴。實堪駭異。王槩著革職交與該督撫將案內各款逐一嚴審定擬具奏。○

乙巳

上御太和殿視朝。文武陞轉各官謝恩。○幸圓明園。○諭軍機大臣等據舒赫德等奏查辦廈門陋規一摺。與前次所奏情事大概相同。此案既經徹底查明。自可即行完結。現在楊廷璋定長。明白回奏各摺。已批交部分別議處。可將此傳諭舒赫德等知之。○又諭曰明山叅奏鹽運使王槩於署糧道任內浮收倉

米。勒令鋪戶折收銀一萬餘兩。並查出潮屬各埠。虧空餉銀各款。請將王槩家產嚴行查封。以便追繳贓項等語。已降旨將王槩革職。交該督撫嚴審定擬。所有任所貲財。著明山就近查辦。其山東原籍家產。並著崔應階即速嚴行查封。毋致稍有隱匿寄頓。將此傳諭明山並崔應階知之。○丙午。諭軍機大臣等。據蘇昌奏。保成等查出長汀等一十九埠商人銀鹽。各有虧缺。實由前任正副運同姚鎔

張學舉。不能隨時體察。及叅革運使王槩。漫無知覺所致等語。昨明山以王槩浮收倉米。折收銀兩。並查出潮屬各埠。虧缺餉銀各款。同該督合詞會叅。今蘇昌此奏。似因從前曾言王槩能事。列之薦剡。未免意存迴護。不知地方大吏。統率屬員。遇有才能可用者。原可隨時獎薦。以勵其餘。或日後改操。自當立予彈劾。若稍存成見。即非大臣公正激揚之道。且保成前往查辦鹽課。本係蘇昌派委。初無

袒庇劣員情節。又何必於事後畧為瞻顧耶。現在蘇昌調任閩浙。此案已交與廣省督撫審擬。蘇昌不必與聞。其原摺著鈔寄明山。併案查辦。可將此傳諭知之。○調湖北巡撫常鈞為雲南巡撫。以甘肅布政使王檢為湖北巡撫。安西道恒光為甘肅布政使。調湖北布政使三寶為四川布政使。○丁未。

上詣暢春園問

皇太后安。○戊申。諭軍機大臣等。前據阿桂奏。

查看土司互擊情形一摺。現在金酋等不過自行蛄鬪。並無獲罪天朝之事。前降諭旨甚明。即阿爾泰到京所言。亦止於此。將來相機籌辦。竊要實亦不外乎是。亦不屑別有所設施也。但阿桂摺內。有於九月間前赴查邊之語。阿爾泰現已到京。陛見。若照常回任。八月初旬。早可抵川。朕因阿桂有應豫行前往體訪之處。是以令其待至七月。候送木蘭。再行起程。然量其程期。遲亦不過在仲秋之末。即

可到川。若阿桂俟其回川後。再行巡查。則轉似另設一總督。專辦其事。既於觀瞻未協。若竟爾停止。又未免有失信番酋之跡。莫若此時。早為部署起程。一切留心察勘。事竣回省。則阿爾泰亦即到川之時。彼時會晤。將土酋行徑詳悉告知。亦可熟籌妥辦。於事理庶為允協。而阿桂來京後。此間亦詳知番中情形矣。將此即傳諭阿桂知之。○已酉。諭軍機大臣等。據方觀承奏。調任安肅縣知縣謝昌言。

盤獲賊犯馬三丑。供係山東德平縣回民。夥同李二張八等。在江南懷遠壽州等處。屢次行劫。前經懷遠縣拏獲張八。供出馬三丑。曾與德平縣役劉如恒等。往來得贓賣放等語。該犯以積案巨盜。一經拏獲。自應解往東省。質訊賄脫實情。再解安徽審擬。但此等賊匪。狡獪異常。今往返押解。地經三省。僅委其責於解役數人。恐途次不免疎虞。著傳諭該撫。自東省起解時。務須添派妥員。嚴密防範。毋

得稍有貽誤。○禮部議覆。江蘇學政李因培奏。稱生員補考限三個月。由提調官面試。將試卷令本生親齋。赴學政按臨所在補考。易滋弊竇。請改為歲科按日。在本地送補。而於廩生欠考。及告遊趕回錄遺鄉試各生。轉多窒礙難行。應仍令隨棚補考。先於本地府廳。眼同該學教官面考。將試卷封固。另差鬥齋送學政補考。從之。○庫掄辦事大臣桑寨多爾濟奏。土謝圖汗郡王盟長達什丕勒患

上詣暢春園問

病。應請以副盟長親王齊巴克雅喇木丕勒署理。其副盟長事務。請以叅贊公品級三都布多爾濟暫署。報聞。○庚戌。皇太后安。○以湖南長沙協副將實泰為雲南鶴麗鎮總兵。○是月。欽差協辦大學士公兆惠。直隸總督方觀承奏。直隸得雨情形。得旨。實堪欣慰。京師亦霑霈。且雨後即晴。益可喜也。○江西巡撫輔德奏。查察州縣賢否。並將

司道府直隸州各員。出具考語彙奏。得旨具見留心實際。更當持之以久。則吏治自當可觀。摺留覽。○陝甘總督楊應琚。拉林阿勒楚喀副都統綽克托。烏魯木齊辦事副都統旌額理等奏。烏魯木齊同知通判倉大使巡檢等官。向俱照巴里坤同知。並安西新設經歷典史。五年俸滿之例陞轉。乾隆二十七年。烏魯木齊開展庫車。哈喇沙爾。阿克蘇。葉爾羌。喀什噶爾等處文員。奉旨照苗疆等處調補官員。三年俸滿。奏請陞用之例辦理。臣查烏魯木齊。係隣近伊犁要區。較闕展。巴里坤。道途加遠。現設同知。通判。倉大使。巡檢等官。管理糧餉貿易。及新墾民屯。一切地方供支事件。尤為緊要。應將烏魯木齊同知等官。俟任滿三年。臣等秉公甄別。以才能出衆。辦事奮勉之員。奏請以應陞之缺陞用。其循分供職者。仍照舊五年俸滿之例辦理。得旨。如所請行。○楊應琚又奏。甘省雨澤未遍。豫籌調劑

事宜。○甘省連歲歉收。各府存貯無多。倘蘭州。鞏昌。甘州。平涼。涼州等府屬。竟至小暑後無雨。則早象已成。撫卹口糧。須豫為籌酌。查陝省西。同。邠。乾等屬。與甘省北路相接。鳳翔。漢興。一帶。與甘省南路相近。請即於此數府州。酌撥倉糧十六萬石。就近運遞。以備河東賑卹之需。○甘肅河西一帶。近寧夏。西寧等府屬。撥運各該屬倉糧。尚不敷用。請於寧夏等就近未經被旱處所。於二麥登場後採買。以備河西撥運。○蘭州。鞏昌。平涼等府屬城垣。應請興修。以工代賑。○甘省糧價未平。恐益增昂。應飭地方官照米貴之年。大減價值。乘時平糶。其距城遙遠之處。計應糶數目。運赴該鄉。就近糶賣。○現在缺雨處所。已現飭地方官。購備小蘆。小穀。小菽。燕麥。及苽麥各種。○俟得雨之後。立即查明借給。並按戶借給一月口糧。勸令上緊趕種。得旨。此皆未雨綢繆之計。然即使果致成災。總宜鎮靜妥辦。

不可張皇失措。甘省皆良民。亦常遇災歎。不可不矜卹。亦不可啟以不靜也。○又奏涼莊滿營官兵。分三次攜眷移駐伊犁。經臣將應行籌辦各事條奏。本年第一次兵眷已全抵伊犁。原定章程。尚有應行酌議更定事宜。一。兵經由黑水。丹河。及昌馬。疏勒。並瑪納斯河。每當盛夏。水漲難行。請明歲第二次移駐官兵。應比今年早行十餘日。正月下旬即陸續起程。可以早渡。一。行李車輛。第一次裝載行李車輛。交旗辦理。眷口車輛。地方官辦理。嗣各旗承辦不敷。請明歲第二次。均交地方官承辦。一。盤費等銀。第一次。將眷口應需盤費。在涼州府庫。覈總支給。官兵並跟役鹽菜銀。在府庫先支三個月。俟至伊犁後。覈明另辦。請明歲第二次官兵起程。應將眷口盤費。及鹽菜等銀。均在涼州。肅州。哈密。闐展。烏嚕木齊等處。沿途陸續支領。第三次均照此辦理。得旨甚好。如所議行。○工部尚書署四川總

督阿桂奏。據駐藏副都統福鼎咨稱。在藏學經之金川喇嘛。溫布壬占噶等九名。以學經事畢。稟請回巢。解赴省城。臣思金首郎卡。怙惡滋事。其喇嘛溫布壬占噶等九名。自不應遣令回巢。或應即在成都昭覺等喇嘛寺安插。或徑解京師安插之處。請旨。得旨。暫在成都安插。事定請旨。或可問伊等郎卡情形也。

大清高宗法天隆運至誠先覺體元立極敷文奮武孝慈神聖純皇帝實錄卷之七百十三

大清高宗法天隆運至誠先覺體元立極敷文奮武孝慈神聖純皇帝實錄卷之七百十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統兼管鑲黃旗都統事務功加七級隨帶加一級尋常加二級軍功紀錄一次 臣 慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主庫

事務世襲騎都尉軍功加十九級隨帶加二級又加二級 臣 董誥內大臣戶部尚書鑲黃旗滿洲都統軍功紀

錄五次尋常紀錄四次 臣 德瑛經筵講官太子少保工部尚書紀錄六次 臣 曹振鏞等奉

敕修

乾隆二十九年甲申秋七月辛亥朔享

太廟遣和親王弘晝恭代行禮○諭曰楊應琚著補授大學士仍留陝甘總督之任從前楊廷璋補放大學士時朕原擬明歲南巡迴鑒後即令伊來京辦事因為期甚近閣務毋庸簡員協辦今楊應琚留任陝甘封疆重寄正資料理一時不能來京供職內閣辦事需人應添設協辦漢大學士一員著尚書陳宏謀協辦○又諭前黃仕簡奏廈門洋船陋規內總督每年得受銀一萬兩巡撫每年得受

銀八千兩等語朕以當此法紀肅清之日督撫受恩深重何至任意貪婪若此如果屬實則大奇之事亦必重治其罪但不得不徹底根究以覈虛實是以命舒赫德等前往據實查辦嗣據舒赫德等節次查奏該提督所索一萬八千陋規之說俱屬子虛是楊廷璋等尚不致罔顧朕用人顏面無所忌憚至購買燕窩等物定長惟沿習向例給價而楊廷璋於此外復有令屬員墊買人蔘珊瑚珍珠等物僅照所開平價給發致屬員添價墊買為婪收陋規藉口楊廷璋溺職負恩罪實難逭但此等陋習料非僅福建一省為然別省幸而不致敗露則亦姑置不究今既訊有確據豈可不示以創懲楊廷璋擢任封疆以來尚能實心任事是以簡用大學士仍留總督之任乃不能正己率屬致啟屬員巧為逢迎借端欺蝕之漸不但不堪表率封疆即令其還京供職亦有何顏面復廁綸扉耶姑念其宣

力有年。齒復衰邁。不忍遽加擯斥。著加恩賞給散秩大臣。來京効力。定長本無大過。著從寬留任。○以四川布政使三寶湖北布政使五諾璽對調。○壬子。諭軍機大臣等。蘇昌已調閩浙總督。著即速赴新任。其兩廣總督印務。著明山暫行兼署。李侍堯已調兩廣總督。著來京陛見後。再赴新任。其湖廣總督印務。著常鈞暫行兼署。俟吳達善到後。兼管湖北巡撫。常鈞再赴雲南新任。現在雲南巡撫印

務。劉藻原係同城。即著暫行兼攝。王檢亦著來京陛見後。再赴湖北巡撫之任。將此傳諭各該督撫知之。○癸丑。諭前黃仕簡奏。廈門洋行陋規。有總督每年得受銀一萬圓。巡撫每年得受銀八千圓等語。朕以此案關係督撫婪索多贓。實堪駭異。非徹底根究。無以肅法紀而昭創懲。因命舒赫德等前往查辦。舒赫德等自應向溫泰究詰原單所開總督一萬。巡撫八千之數。實在有無收受確據。如

彼毫無指證。然後逐層研究。遞及道府廳員。勒索陋規。墊買物件各情由。方合讞案重輕先後。乃舒赫德等初至閩省。置原奏一萬八千之陋規。虛實於不問。輒從起獲底簿。將屬員代買物件枝節推尋。所辦未得窺要。竟似朕差伊等赴閩。專為查訪督撫過失。毋怪乎楊廷璋前次之不能允服。轉疑舒赫德等有意吹求也。節經朕降旨。示以端緒。伊等詳悉研訊。黃仕簡據溫泰所開督撫收受陋規數

目。全屬子虛。惟究出屬員等代購物件一節。自應分別辦理。朕前命舒赫德赴閩時。曾面諭以此案如果督撫婪贓屬實。必當重治其罪。定長或有應行質訊之處。即可傳旨將伊解任聽審。其巡撫印務。令裘曰修暫行署理。原以封疆大臣。受恩深重。設罔顧國憲。貪黷公行。則其身家性命尚不能保。更何有於一官。若黃仕簡所奏既無確據。定長惟發價購買燕窩呢羽等物。亦係沿習舊例。初無不可

輕貸之處。則從前舒赫德等之遽令解任。尤為誤會朕意矣。至楊廷璋令屬員代買人蔘。珊瑚。珍珠等物。眾供僉同。固已毫無疑義。若不加之懲創。則他省或致效尤滋甚。豈可為訓。朕特念楊廷璋年齒就衰。平時尚能實心任事。不忍遽加擯棄。從寬授以散秩大臣。令其自効。此朕格外加恩。薄懲示警。伊前此曉曉剖辯。今如此辦理。尚能更置一詞耶。且知感恩抱愧否耶。督撫中似楊廷璋此等情事。

實不能保其必無。特未經發覺。朕亦不肯臆度深究。但督撫令屬員購買物件。究非體制所宜。或有謂若非委之屬員。恐假手家人胥役。益致借端滋擾。不知屬員中賢否不齊。此端一開。必啟逢迎賄謁之弊。不可不防其漸。若以土貢方物。原屬有司分內應辦之事。遂致購覓一切什物。悉託下僚。混濫皆所不免。即如程霖等代楊廷璋所買各項內。并有將自用人蔘等件。亦託名列入者。其流弊更無

所底止。豈可不早為禁飭。使不肖之員。藉口為罔利營私地乎。朕辦理庶務。一秉至公。從不豫設成見。或致稍有軒輊。此案舒赫德等查辦。入手未得關鍵。節經訓示更正。及審明定讞。則楊廷璋之罷斥總督。解退閣務。及定長之從寬仍留原任。皆視其所自取。恐中外之人。未能深晰此中就裏。特將案情原委。明白宣諭知之。○又諭據明瑞等奏稱出旗調入綠營之色克圖。從伊妻弟馬甲噶爾薩前

往伊犁。於途次將伊妻殺死。請旨將色克圖即行處絞。以昭炯戒。其擅將色克圖入於伊妻弟戶口。遣往之協領佐領。及未經查出之將軍副都統等。均應交部查議等語。伊犁地廣人稀。果有情願前往者。多多益善。色克圖並非另記檔案之人。但入於親戚戶口數內。遣往未為不可。該管官員亦無庸議處。色克圖逞忿殺妻。自有應得之罪。應絞監候。文明瑞等欽遵辦理。○甲寅

上詣暢春園問

皇太后安。○漕運總督楊錫紱奏查軍民戶籍攸分。既隸軍籍。即應聽僉辦運。乃各省衛所紳宦富戶。百計圖脫軍籍。往往豫行詭捏。為民籍張本。一或報僉。則紛紛辨訴。不變為民不已。而所僉皆無力窮民。於情理實未平允。請嗣後凡軍籍富戶。官紳之家。如本伍有人駕運。原可暫緩僉選。倘丁力已疲。實須另僉。即富戶紳宦。徑行僉報。既僉之後。如敢潛令族人捏控狡辨。或挺身自訴。一經審虛。富戶則按律治罪。紳宦即行據實題參。請旨革職。俾奸狡不得藉財勢圖脫。庶於辦運有裨。得旨。楊錫紱此奏。可謂大破情面。無瞻徇之習。著照所請行。仍著交部議敘。○陝甘總督楊應琚等奏查巴里坤提督與烏魯木齊總兵互相更調。經將軍臣明瑞等議准。於本年十一月。先令提督起程移駐。臣伏思提督原轄之哈密沙州等十四營。俱在巴里坤之東。應

就近改歸巴里坤總兵管轄。仍屬烏魯木齊提督統轄節制。從之。○乙卯。諭朕此次巡幸木蘭。著誠親王和親王。大學士劉統勳。尚書舒赫德。留京辦事。其月選之文員內。通判。州縣等官。武員內。八旗護軍校。驍騎校。及外省送到之補放水手。官驍騎校。并年滿千總等官。弁俱著王大臣照從前之例驗看。至外省督撫提鎮等奏摺。著照例自啟鑒之日為始。俱齎赴留京辦事處加封。交內閣隨本呈送。行在。候朕批示。隨本發回。仍於留京辦事處交齎摺人祇領。該部通行傳諭知之。○又諭。朕此次巡幸木蘭。啟鑒後。戶部堂官現多隨園出差。一時辦事乏人。所有戶部尚書事務著託恩多暫行署理。○又諭。朕此次巡幸木蘭。所有步軍統領事務著舒赫德暫行兼署。○丙辰。戶部議准漕運總督楊錫紱奏。回空糧船夾帶鹽觔。宜立定章程。實力搜查。一。搜查私鹽。宜有一定衙門也。揚州經過回空漕

船既有督鹽二臣委員搜查。乃復有地方文武各衙門兵役紛紛滋擾。徒致羈遲。應將揚州鹽廳查鹽專聽督鹽二臣委員實力查辦。其淮揚道及揚州將備江甘兩縣僉查兵役。一概停止。仍令此後糧船一到。承委之員。隨即搜查。不得託故他往。致令守候。大幫限一日查畢一幫。小幫限一日查畢兩幫。即促令開行。倘有指稱文武衙門藉名搜鹽。故為羈阻。及於查畢後復稱奉委攔船搜查者。令委員隨時嚴查重處。食鹽不應作為私鹽也。定例。每船准帶食鹽四十觔。查鹽時擺列船頭聽官查驗。乃喜事之員。往往以船頭之鹽為數稍多。或混以私鹽具報。應請嗣後飭令委員等除船內查出數石數十石私鹽。照例詳報外。至實係擺列船頭查驗。每船或多少不過二三觔者。不得以私鹽混報邀賞。一領運千總宜一體在幫也。向例糧船查出私鹽。如重運千總不在幫內。則專叅押空之弁。而重

運免議。於是重運之員。往往託故逗留。巧圖規避。應請嗣後領運千總交糧後。除例應引見及委辦公事。不能趕幫者。遇有私鹽事故。仍准免叅。其餘託故逗留者。無論在幫與否。一體叅處。從之。○丁巳。以雲南北勝州革職土知州高龍躍于祖培襲職。○戊午。

上詣暢春園。問

皇太后安。○諭。據貝子弘曠奏請將開泰之女賞給伊弟弘豐為妻等語。近支宗室。奏請指

婚。亦事所常有。但不應指名奏請。若尋常聯姻。必須彼此情願。不願則止。此伊等私事。何庸陳奏。看來弘曠必曾向開泰家議聘未遂。輒思請旨以為扶制。殊屬不合。宗室等指婚。出自特旨。非彼此締婚可比。若如此強制。非但宗室。即阿哥等。朕亦斷不允行也。弘曠着申飭。並將此交宗人府。通諭王公等知之。○又諭。曰。巴圖濟爾噶勒。現在患病。派侍衛烏爾圖那遜。帶領御醫。馳驛前往診視。○己未。

上御勤政殿聽政。○刑部議覆。江西按察使廖瑛奏稱。江右地方。有匪徒串黨駕船。遊走江湖。凡攬載客商入船。即行誘賭。不特銀錢騙盡。甚至折沒貨物。捐留行李。大為行旅之害。請定專條。以懲奸匪等語。應如所奏。嗣後此等沿河誘賭匪船。初犯到案。審係一二次者。僅照開場誘賭例。杖徒。如三次以上。及再犯者。均照積匪猾賊例。發極邊烟瘴充軍。並將為首之犯。先於拏獲沿河之馬頭地方。再加枷號一個月。其船戶知情分贓者。初犯仍為從論。再犯亦與犯人同罪。船隻變價入官。臣等再查此種匪船。如止係勾誘賭博。自應即照新定條例治罪。若如該按察使所奏。其中或扮作客商。或捏稱差使。設局騙害。行同搶劫者。是名為誘賭。而情罪甚重。又當按其詐欺誑騙各情。從重治罪。從之。○庚申。

孝懿仁皇后忌辰。遣官祭。

景陵。○諭軍機大臣等。圖勒炳阿覆奏。查審仁

懷縣民人袁思政等互爭茶山一摺。前據該撫摺奏此案。不免張大其詞。又不親身前往查辦。是以降旨訓飭。今復奏稱袁思政攜帶鎗弩。擅放竹箭屬實。並無放鎗情事。適阿爾泰陞見在京。詢之亦稱實係兩省民人互爭山界。並無逞兇拒闖之處。該撫即可就案嚴行審擬完結。總之地方一有為匪不法等案。自應星速勘辦。斷不可怠存姑息。致長刁風。圖勒炳阿性本異悞。遇事往往不能振作。嗣

後務將外吏養安積習。痛加湔改。倘仍復因循從事。貽誤地方。則深負棄瑕錄用之恩。斷不能曲為寬宥也。著將此傳諭該撫知之。○命翰林院侍讀翁方綱提督廣東學政。○辛酉。諭前輯周易述義詩義折中春秋直解。告成。於從來傳註離合異同之處。參稽是正。允宜津逮士林。而校刊訖工。未經頒發。著將此三書每省各頒一部。依式鈐版流傳。俾直省士子咸資誦習。其原本即庋藏學宮。以示嘉

惠廣厲至意。該衙門即遵諭行。○諭軍機大臣等。滇省銅廠事務。向係巡撫專管。劉藻經理有年。一切留心董率。今雖陞任總督。而常鈞現在甫經調任。所有廠務。仍著劉藻會同該撫悉心督辦。將此傳諭知之。○又諭。前據楊應琚奏。蘭州。鞏昌。甘肅。平涼。涼州。各府所屬州縣地方。五月以後。得雨未能遍透。時將小暑。需雨甚殷等語。嗣後奏到。六月中旬以前。蘭州等府。尚有缺雨之處。距今又將一月。

各該處曾否續得霑沛。此數府屬夏禾收成若何。並能否趕補晚秋各種。及現在農田情形。是否成災。深為廕念。著傳諭楊應琚。速即確查據實覆奏。○又諭。曰。阿思哈奏。豫省各屬。自六月中下二旬。得雨數次。在田早秋。及先種晚秋。滋長茂盛。惟河南懷慶二府所屬內。間有得雨較少之處等語。看來該省自六月以來。雖經得雨數次。其中尚未一律霑渥。現在晚種待澤甚殷。所奏雨少地方。七月初

旬內外。曾否續得透雨。加緊補種。並此時農田實在情形若何。是否實有成災之地。著傳諭阿思哈。即速查明據實覆奏。以慰廕念。○壬戌。

上詣暢春園。問。

皇太后安。○諭。據舍圖肯等奏稱。駐防塔爾巴哈台領催沙津之子固濟。聞散巴彥圖披甲娘娘保之家奴岳爾岱。逃回被獲。請交盛京刑部從重治罪等語。前舍圖肯奏。駐防塔爾巴哈台內聞散薩木布扎什逃走。朕以伊等雖係閒散。特令骨肉完聚。一體給與盤費馬匹遣往。理宜守分。乃於半途逃遁。情殊可惡。已降旨命將薩木布扎什拏獲時。即行正法示衆。今固濟等脫逃。與薩木布扎什無異。著交舍圖肯等將固濟。巴彥圖。岳爾岱。在彼處正法。并著軍機大臣。行文領隊官員。通行曉諭衆兵丁知之。○諭。軍機大臣等。方觀承題到報明事一本。貼黃內竟有年號字樣。誤寫。

之處。此豈尋常筆畫舛謬可比。此本若照例
票議批發。於觀瞻甚為未協。現經大學士等
將副本貼黃移貼進呈。該督題奏事件。於全
本即未經逐細檢閱。若貼黃片幅。何竟漫不
留意。致令錯謬若此。於心何以自安。著傳諭
嚴飭該督。令其知所深警。○甲子。諭曰。常鈞
奏黃梅廣濟。武昌黃岡。蘄水。蘄州等處。因江
水漲溢。民田廬舍。不無浸浸。其黃梅廣濟。二
縣。情形較重等語。該處一帶。因大雨時行。江
水暴長。居民田廬。猝被水淹。朕心深為軫念。
著該督撫。速行勘明。被災各屬。災重之處。所
有乏食民人。勢難緩待者。即隨查隨賑。撫恤
一月口糧。其被災稍輕者。酌量借給口糧籽
種。俾得趕種秋禾。以資接濟。俟勘明被災分
數。再行分別辦理。該督撫等。其實心督率。經
理賑恤。毋任吏胥從中侵漁滋弊。俾貧民均
霑實惠。該部遵諭速行。○又諭。從前保舉堪
勝知府人員。丁憂後。軍機處於該員姓名之

旁。黏貼黃簽。而吏部即將記名之處註銷。辦
理殊未盡一。嗣後應照軍機處之例。仍予記
名。至此等人員。由知縣一經陞用。同知知州
者。於應用知府時。即不復聲明提奏。又與軍
機處互異。朕念伊等。原因堪勝知府保奏。以
知縣去知府階級懸殊。故令其右遷稍進。若
以既晉一階。而於府缺轉不予列名。是拘例。
不知朕用人之本意也。但若未幾遇缺。又行
迭擢。則又未免過優。嗣後凡因保舉已用同
知知州之員。俟期滿五年。遇有奏請知府之
處。仍當列名。軍機處與吏部。俱一體遵照辦
理。○又諭。現在戶部堂官。多係隨園出差。已
降旨。令託恩多。暫署尚書事務。其侍郎內。辦
事亦覺人少。蔡鴻業著暫行兼署戶部侍郎
事務。俟英廉錢汝誠。勘地回京。即無庸兼署。
○伊犁將軍明瑞等。奏現在伊犁。挈眷官兵
跟役。與商民雜處。必有詞訟交涉事件。請於
兵丁全到之後。設立理事同知一員。或從甘

肅等處簡缺裁調。或照各駐劄大臣所屬管理糧餉官員。三年更換。其內地八旗蒙古律例等書。附請給發。以便查照遵行。得旨。軍機大臣議奏。尋議。查各省駐防旗民雜處之地。例設理事同知。或通判一員。承辦審理詞訟。今伊犁所駐滿洲蒙古綠旗兵。及商民回人。尤為錯雜。詞訟案件必多。應如明瑞等所奏。設立理事同知一員。但地方新定。員缺緊要。必須明白敏練。熟習滿洲蒙古言語之員。始可勝任。應請於各部院滿洲蒙古主事。及保送頭等筆帖式內。揀選發往。三年稱職。照苗疆例題調。所給俸廉。似應較內地從優。并添設吏役各事宜。均請交楊應琚會同明瑞酌覈具奏。所請律例等書。亦由各該衙門查取給發。至將軍衙門。似應照各省駐防之例。設立左右司分印房。管理糧餉倉庫管官。并令明瑞酌議具奏。從之。○乙丑中元節。遣官祭永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○諭軍機大臣等。揚桑阿

等奏。因素勒坦沙請將喀什噶爾果園一所。給還呢雅斯索丕妻子。隨行文飭駁等語。所辦尚是。但書詞稍弱。素勒坦沙貪鄙無恥。非嚴加斥責。不能杜其僥倖之心。著改撰書稿。交納世通。令其曉示素勒坦沙。嗣後伊若妄有請求。務宜嚴行斥責。不可稍事姑息。○戶部議准漕運總督楊錫紱奏。請裁減撥兌糧船一。湖北武昌左衛撥入湖南三幫船四隻。由武赴岳。道里既遠。而以四船撥入全幫。丁

孤情睽。日益拮据。每當僉選。難得殷富之丁。查湖南船。寬長與江西相等。而每船所裝米。較江西尚少二百餘石。應將此四船。竟行裁汰。其米。即分灑湖南四十八船之內。運費等銀。分給加裝之船。於幫丁既不無少補。兼可節省修造等費。一淮安三。大河前。二幫撥運蘇屬船五隻。揚屬船四隻。查該二幫係長兌淮糧。水次皆在淮北。遠派蘇揚兌運。丁情不便。應將九船裁汰。所運米。即分灑同次幫船。每船不過多裝三十餘石。不致負重。窮丁既免遠撥之苦。而加裝之船。亦可多得銀米。以資用費。均於運務丁情有益。從之。

大清高宗法天隆運至誠先覺體元立極敷文奮武孝慈神聖純皇帝實錄卷之七百十四

大清高宗法天隆運至誠先覺體元立極敷文奮武孝慈神聖純皇帝實錄卷之七百十五

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 戶部

總辦官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 戶部尚書鑲黃旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

校修

乾隆二十九年甲申七月丙寅

上詣暢春園問

皇太后安。○諭曰。喬光烈奏湖南湘陰益陽巴陵華容武陵龍陽沅江澧州安鄉岳州衛等處因湖水漫溢居民廬舍地畝各有被淹等語。該處湘陰一帶地處濱湖。因湖水盈滿。加以長江漲發。淹及居民田舍。朕心深為軫念。著該撫速行查勘。如有被水稍重之處。實在無力貧民。即行加意撫綏。俟勘明之後。再行分別具奏。該撫等其督率屬員。實心賑卹。毋

使胥吏從中滋弊。俾貧民均霑實惠。該部遵

諭速行。○諭軍機大臣等。蘇昌奏歸順州盜

犯楊亞道等在安南夾地行劫致死事。主一

摺。該犯等以內地民人在夷境行劫。其罪自

無可逭。但祇於內地按律治罪。而不就行劫

處所正法。使夷衆共曉。辦理猶未允協。即如

該督另摺所奏夷匪刦掠民人。經該國緝解

已在交界地方正法。則此案民人在外滋事

者。審明後亦當知會該國。傳集夷人即於該

處明正典刑。不惟國法得申。且使夷情折服

而地方凡遇有此等檄緝匪犯之案。該國知

中朝執法公明。恩威並著。自不敢稍有觀望

稽延也。此案已傳諭該部。俟題本到時。妥議

完結。并將此詳諭蘇昌知之。○又諭刑部議

覆雲貴總督吳達善題。叅永昌府武進士曹

國譽藉差需索一案。在該犯自當治以應得

之罪。但曹國譽以本籍土著。並非營員。可任

差遣之人。而該府率據自呈情願投効。即令

往催厥課不獨誤用滋累於體制亦屬未協嗣後凡各省附近夷人地方即有應行遣員承辦之事亦當就所屬員弁內慎選幹練明受者以重其事不得率意濫行差委致滋事端著於各督撫奏事之便傳諭知之侍郎五吉等秦臣等遵旨審訊逆犯阿布都喇伊木通書霍罕謀叛情節緣阿布都喇伊木向係喀什噶爾伯克自歸附以來因未授為阿奇木心懷背叛常與額爾德尼致書通問二

十七年冬令伊親屬摩羅郭帕和卓致書額爾德尼告以索取鄂斯游牧一事並未用兵將來遣使到日不必遠迎并約為內應同取喀什噶爾詢之郭帕和卓及伊親信家人哈勒默特呢雅斯薩木薩克等各供無異詰問阿布都喇伊木亦據實供吐臣等查阿布都喇伊木本係逆賊霍集占等親信之人因大兵迫近獻城請降乃心懷叵測通信霍罕謀為叛逆若僅予斬決不足蔽辜應請將阿布

都喇伊木凌遲梟示伊子阿布都瓜里擬斬立決郭帕和卓哈勒默特雖未起意同謀但聽從寄書情節可惡均擬斬立決呢雅斯薩木薩克知情不首應給與厄魯特為奴至員外郎挖穆齊圖二等侍衛庫納奉差同往霍罕於此等謀逆通信之人失於防範覺察伊勒圖雖調往伊犁但從前並未同永貴慎選幹員咎亦難辭俱應交部分別察議諭軍機大臣等阿布都喇伊木係逆賊霍集占黨

與本應從坐因其舉城迎降既免誅戮復加恩授為伊什罕伯克乃不知感戴反交通外藩希圖叛逆情節可惡阿布都喇伊木著即凌遲梟示伊子俱著處斬妻女及兄弟之妻俱送京備賞所有財產查明入官餘依議又諭曰噶岱默特首發逆謀著加恩賞緞十端納世通著交部議敘挖穆齊圖失於防範情尚可原但與額爾德尼相見時不能察其情形有異及伊未曾出迎之處並不告知駐劄

大臣等希圖省事甚屬怯懦著摘去所戴孔雀翎仍交部嚴加議處永貴等著交部察議○賜霍罕額爾德尼伯克勅書曰從前喀什噶爾駐劄大臣遣章京托穆齊圖率同伊什罕伯克阿布都喇伊木諭爾給阿濟比鄂斯之地阿布都喇伊木潛遣其親信郭帕和卓等致書於爾謂回部和卓木等皆見誅戮惟爾尚存此次索還侵地來使不過數人未曾派兵爾但示以不懼勿出迎候且喀什噶爾等城留兵甚少爾當領衆前來我為內應等語爾亦權詞相答謂現與丕色勒構難俟可行時再相約會此等情節皆經發覺審訊明確故將阿布都喇伊木等立寘重典家口亦皆從坐大臣等以爾心懷叵測請發兵問罪朕思阿布都喇伊木向隨霍集占等為逆本應誅戮因其獻城納款是以加恩錄用今負恩謀叛孽由自作爾歸附以來頗知恭順此次一得逆書若即行首出必重加恩賞原爾

之情蓋恐阿布都喇伊木或仍狡辯致生事端是以未敢出首姑緩言相復則與逆犯結約原非爾本心朕觀爾行止尚屬曉事設爾竟如所約襲取喀什噶爾豈不思葉爾羌阿克蘇和闐皆有官兵伊犁有將軍大兵駐劄爾能守喀什噶爾乎恐大兵一至霍罕安集延盡皆殄滅悔之何及爾蓋籌計及此故數月以來並未私遣一信知爾不敢負朕恩而罪尚可逭也今已諭駐劄大臣等不必進兵

爾荷朕包荒大度當益加恭順恪守藩服以期永保福祿於無窮倘有不逞之徒以叛逆之事誘脅爾者即據實以聞勿為所愚特諭旌表守正捐軀之直隸清樂縣民劉邦吉妻劉氏丁卯上以秋獮木蘭奉皇太后自圓明園啓鑒諭朕此次巡幸木蘭沿途經過地方所有本年應徵地丁錢糧著加恩蠲免十分之三該部即遵諭行是日

駐蹕南石槽行宮。○戊辰以荊州將軍色克慎為正黃旗蒙古都統。青州副都統素玉為荊州將軍。鑲黃旗滿洲副都統永瑞為青州副都統。山海關副都統傅玉為鑲黃旗滿洲副都統。鑲黃旗蒙古副都統伊勒圖為山海關副都統。鑲藍旗漢軍副都統弘昫為鑲黃旗蒙古副都統。頭等侍衛范時綬為鑲藍旗漢軍副都統。○是日駐蹕密雲縣行宮。○已巳以歸化城副都統德爾格為

東陵內務府大臣。正紅旗滿洲副都統集福為歸化城副都統。實授德勒克為正紅旗滿洲副都統。○是日駐蹕要亭行宮。○庚午諭軍機大臣等。從前因安西水草肥美立有孳生馬羣。自辦理軍需以來羣內驕馬多撥征兵乘騎。其兒騾馬匹亦有兼備乾糧之用者。現在軍務告竣業經數載該處地方既於牧放為宜。前此撥用所餘之馬曾否孳生蕃庶足以補立馬羣。及此時該督作何籌畫辦理之

處可傳諭楊應琚令其查明具奏。○御史羅暹春奏廣東巡撫明山叅革運使王際各贓款情罪重大實駭聽聞。伏思調任閩浙總督蘇昌在粵年久於所屬監司大員狼籍如此姑容至今直待明山再任廣撫始行敗露其不能及早舉發非年老糊塗即有心瞻徇。○已難辭。況王際近在同城該督豈真一無聞見。乃於本年大計且薦舉卓異是誠何心。將來水落石出該督自有應得處分。但以密邇

劣員不効反舉不公不明豈復堪以節制海疆表率文武臣謹繕摺糾叅得旨此奏是失察之咎蘇昌實不能辭。至節制海疆乃出自朕簡用非御史所當言。若不明降諭旨恐啓將來科道把持督撫馴致門戶之漸。羅暹春著飭行餘著蘇昌明白回奏。尋奏臣因王際不避嫌怨兩年之內催完商欠等銀七十餘萬兩。辦理尚屬奮勉是以列入薦剡。初不知其喪心病狂於糧道任內竟有婪贓之事。雖

會同明山叅奏而前此不能早為覺察罪無可逭得旨該部嚴察議奏○是日駐蹕兩間房行宮○辛未諭軍機大臣等據御史羅暹春叅奏蘇昌與王槩近在同城而該運司狼籍如此不効反舉等因一摺已批諭發鈔並令蘇昌明白回奏矣督撫大吏見屬員才能可用即加之獎薦以示鼓勵其間或中路改操出於意料之外亦屬情理所有其失於覺察之咎原與有心行私瞻徇者不同蘇昌在

粵年久於王槩之為人知之必悉乃今以鹽準虧空被叅而蘇昌前此推許即以能辦鹽務為詞甚至列入本年大計卓異則其事本難免人猜疑或因蘇昌年老實受王槩愚弄抑或另有別項情節力為保薦掩覆均未可定著傳諭明山令其據實訪查該督於王槩果否實係失察抑另有受其請託餽送情事即行據實奏聞候朕再行降旨不得以兄弟私情稍存容隱尋奏王槩蒼滑性成蘇昌受

其蒙蔽深信不疑是以不能及早舉發至請託餽送情事臣實未有見聞謹據實奏覆得旨知道了王槩究有欠項應追賠者否其家產並能完否○是日駐蹕常山峪行宮○壬申諭現在準夷回部均已平定凡從前邊境俱屬內地不必多駐兵丁各省漢軍兵有出旗之例已降旨將涼州莊浪漢軍兵出旗為民調撥綠營其右衛綏遠城二處漢軍兵亦著蘊著和其衷照例辦理詳議具奏○是日

駐蹕喀喇河屯行宮○癸酉刑部等部議准江西按察使廖瑛奏請更定接緝斬絞重犯越獄處分查定例重犯越獄有獄官革職留任一年限滿不獲降調協緝其越獄人犯交接任官亦勒限一年督緝限內全獲者不論俸次即陞如一名至四名不獲者分別罰俸自三個月至一年逃犯照案緝拏等因在案但接緝之員議敘從優而處分過減恐啟怠忽之漸嗣後接緝斬絞越獄重犯如一年

限內不獲。無論名數多寡。即照接緝兇惡盜首之例。罰俸一年。再限不獲。罰俸二年。三限不獲。降一級留任。逃犯照案緝拏。從之。○是日。駐蹕避暑山莊。至八月丁酉。皆如之。○甲戌。諭曰。輔德奏。江西德化縣。與湖北黃梅縣界。江水奔注。淹及該縣。封一。封二。桑落三鄉。現在照例撫卹等語。該處猝經江漲。致損秋禾。閭閻歲事。未免失望。深為厯念。所有應行加賑月分。以及蠲免借糶各事宜。該撫速飭所屬。迅為查辦。務俾被水災黎。均霑實惠。其彭澤等五縣。最低處所。德化之赤松一鄉。雖例不應賑者。亦著一體分別加恩。查其被水稍重。極貧戶口。量予撫卹。以示惠養。黎民至意。該部遵諭速行。○諭軍機大臣等。新任河東總河李宏。與調任運河道何燭。同官最久。今兩人同在河東。一督一道。分屬上下司。於公事甚有關係。何燭倘倚恃舊日交好。未免諸事放縱。李宏或不善駕馭。河務保無貽誤。

在李宏。朕原無令其久任河東之意。而何燭前任河南開歸道時。阿思哈於其居心行事。亦必甚悉。而今為運河道。又係崔應階屬員。著傳諭阿思哈。崔應階二人。就近悉心體察。如有前項情事。該撫即據實奏聞。毋得稍有瞻徇。○又諭曰。明德奏。西安同州二府屬六月中得雨。尚未深透等語。距今又及一月。未知該處曾否續得透雨。於秋禾有無妨礙。如將來有成災處所。一切撫賑借糶事宜。即應豫為籌畫。速行查辦。無致稍有失所。著傳諭該撫。將現在情形。速即查明具奏。以慰厯念。○又諭。前日羅暹春奏。蘇昌保舉運使王際一摺。已批諭發京傳飭。在蘇昌身任總督。於王際虧帑之事。既漫無查察。又列入卓薦。自有應得之咎。言官據實劾劾。原不得謂之非是。但其摺內。有若非年老糊塗。即屬有意瞻徇。其言忿詈矯激。若有甚不能釋於蘇昌者。當時已覺可怪。今閱劉紹汜治罪一摺。其

人即與該御史江西同鄉其中顯有愆憑報復情事不可不悉力根究以杜朋比黨援之惡習夫大臣循資進用年老者比比而是安得盡斥之為糊塗前如來保今如尹繼善陳宏謀傅森輩年齒何嘗不高而奉職無愆皆可以衰庸肆行詬詈乎劉紹汜以受蘇昌叅劾無可抒憤而假同鄉御史以直詰之名行報復之計若欲陽為不知使奸風日長莫知懲創其如人心朝政何著舒赫德等將劉紹汜詳細研詢如與羅暹春有姻姪交好屬託或羅暹春以已意瞻徇各情弊一面即傳羅暹春與之質對具奏刑部摺著暫存其原稿在京自可查檢一俟奏到之日再明降諭旨將此詳諭知之○乙亥

上詣

皇太后行宮問安○丙子諭昨聞廣成病故已經降旨加恩賞銀一千兩派五福前往奠醊茶酒其應得卹典著查例具奏該部知道○

軍機大臣等議覆工部尚書署四川總督阿桂奏請將西安移駐涼州滿兵改駐成都查成都為通藏大路番夷環居地居緊要原駐兵二千名為數尚少應如所奏添駐兵一千五百名以壯聲勢至所稱涼州無須駐防請即以西安移駐涼州之滿兵一千五百名改駐成都涼州滿兵房屋撥綠營兵居住等語查涼州雖不為衝途但彼處滿兵既移駐伊犁又以別處兵移駐於彼實為近便況綠營

亦無給與官房之例應無庸議請仍由西安另撥滿兵一千五百名安駐成都其編設佐領及均齊兵丁添建房屋各事宜另行定議又稱移駐之後成都共有兵三千餘僅副都統一員管轄恐有不周查四川督臣皆由旗員補放應請將成都滿兵即歸督臣統轄尋常案件副都統承辦其軍政保薦及整飭營伍俱令請示督臣會辦等語亦應如所奏辦理再查西安滿兵原共五千七百名現移駐

涼州莊浪二千名復移成都一千五百名所餘無多應由京撥兵一千五百名遣往其官員亦照數派撥則京師又得一千五百兵缺選人挑補於八旗生計有益從之○吏部奏請大學士楊應琚應定何殿閣及兼銜得旨楊應琚著為東閣大學士兼兵部尚書○丁丑上奉

皇太后幸卷阿勝境侍早晚膳至己卯皆如之

○賜扈從王公大臣及蒙古王公台吉等食至己卯皆如之○刑部議覆山東按察使富尼漢奏稱犯罪事發逃走及拒捕者應照越獄之例滿流改發邊衛充軍原犯軍罪者亦各加等調發原犯極邊烟瘴充軍者改發黑龍江等處給披甲人為奴等語查犯罪事發在逃原與越獄脫逃者情罪相等應如所奏嗣後流罪人犯事發在逃均照流犯越獄加等例改發至罪人拒捕則應各視其拒捕之

情形分晰定擬應請嗣後如有犯罪事發在逃被獲時拒捕其犯未至滿流及毆所捕人至折傷以上或殺人者各依本律定擬外若本罪已至滿流而拒毆在折傷以下者應照滿流人犯越獄例改發邊衛充軍犯該充軍者各以次遞加調發若犯該極邊烟瘴充軍者改發黑龍江等處給披甲人為奴從之○戊寅諭軍機大臣等明瑞奏塔爾巴哈台初駐兵下一切事宜必得歷練之人方可勝任伍岱久在軍營稽察防範素所熟悉若令其駐劄該處於諸事有益至其家口似應暫停攜帶等語伍岱著駐劄塔爾巴哈台但起程尚需時日著仍挈眷前往伊犁俟應行駐劄之日即由伊犁起程○以故雲南甕安縣草塘司土縣丞宋承勲子璉襲職○己卯工部議准河南巡撫阿思哈奏覆河內縣李封等村六窩出產銅核甚旺可煉硫磺供營汛地方之用應准開採從之○是月江南河道總

督高晉奏瓜州城外江防迴瀾壩塌卸十五丈將新修之護崖埽工再加簽椿追壓堅實。埽後築子堰仍應於埽外拋填碎石以資保護。報聞○又奏迴瀾壩埽工復塌陷九十餘丈距城僅十一二丈或三四丈不等現將崖岸設法搶護尚未續坍查江工與湖河情形不同水深莫測既不可用椿埽曩有用木樁及竹簍或大船盛石沈水者更有在對岸開引河及築壩挑溜者均無成效惟有緊靠灘邊拋填碎石以實其底復修防風以護其灘尚為有益現督率員弁將兩頭未塌之灘用埽樓護其護城河亦即煞壩堵截并於沿灘接做草壩以通緯路一面採辦石塊料土堆貯一俟大汛過後趕緊辦理得旨祇可如此與河爭地已難況與江乎○安徽巡撫託庸奏當塗銅陵無為和州含山等沿江各州縣被淹之處水勢漸退及先後撫卹情形得旨覽奏俱悉○湖廣總督李侍堯湖北巡撫常

鈞奏武昌地處下游每夏秋江漲窪處多被淹浸今年江水更大被淹者尤多乏食貧民已確勘分別撫卹惟查漢鎮後有十里長堤為通鎮捍衛外即湖面通江隄身兩頭因年久漸至低塌水從低處漫入街巷俱淹今外水漸退而內水不消必須加築高厚以免倒灌並將原有兩閘及溝渠坍塌淤塞者修築疏通隨時啟閉以免水患又省城亦屬低窪外臨大江本年二月間將舊有溝渠閘座酌動開款疏濬修築雖江水不能潰入然一遇靈雨城內之水無從宣洩街衢積水至四五尺不等查城內原有都府等湖七處年久淤淺應挑深以為儲蓄並將各門磚閘改為石閘再於漢陽門添建石閘一座正在籌項據漢口商人情願公捐銀一萬兩以資工費應准其交納分別興修報聞○湖南巡撫喬光烈奏湘陰等十州縣衛沿湖低窪村垸被淹臣親往查勘諭令掘開大隄疏消積水大半

可以補種。其民力稍拮据者。已飭地方官開倉借糶。接濟籽種口糧。其本年應徵錢糧。於開徵時查明災地。照例緩徵。得旨。覽奏俱悉。○調任湖北巡撫常鈞奏。謝調雲南巡撫。恩得旨。汝頗不通事理。切勿自用聰明。雲南亦事簡之地。汝與劉藻和衷共理。尚可勝任。勉之。○河南巡撫阿思哈奏。各省遣發軍流人犯。俱照道里表內。註定安置地方。會發查豫省各府州。現在安置數十名至一二百名不等。惟衛輝光州。二屬獨無軍衛表內。雖載湖北安陸。甘肅平涼。廣西慶遠。軍犯應配衛輝。而從未發到。三流表並未載及。至光州則二表俱不載。當係安陸等三府犯案本少。抑因道里不符。應配之數。請嗣後各省解到軍流人犯。由臣衙門覈明。如應僉之處。犯數過多。而與衛光相去不遠者。即勾撥二屬安置。庶不致集聚滋事。報聞。○山東巡撫崔應階奏。濟寧魚臺三州縣。自荆山橋河道淤塞以來。

南陽湖水淹浸地畝三千餘頃。農民失業。本年經臣奏准開通荆山河。復加濬伊家河水。勢掣消較速。查上年七月。湖口開水深一丈四尺餘。今年只深一丈八寸。濟魚地畝已涸出十之七八。臣現親往查勘。將牛頭河舊運河各處隄岸溝渠。有需經理者。酌議修濬。其可種涸地。飭地方官借給貧民牛力籽種。明歲徵還。得旨。覽奏俱悉。○河東鹽政李質穎奏。河東自大鹽池外。又有小池六處。散在解州之西。雖亦可澆曬。但去運城遙遠。查察難周。從來封禁。惟大池被淹。曾令各商就小池開曬。水退即封。乾隆二十二年。因大池衝決。修復六小池。澆曬數年來。收鹽甚少。實屬無益。而大池連歲豐收。配運有餘。應請將六小池照舊封禁。得旨。允行。○四川總督阿爾泰奏。川省向有社倉。每歲捐輸不過二三萬石。並未立有義倉。臣自上年八月到任。值秋成豐稔。因率同司道。首先捐穀一千餘石。立為

義倉。并通飭各屬量力倡捐。以為紳耆士民
勸。俾有力之家。隨宜建倉分貯。擇老成紳耆
推為義正。義副。經理出入。借穀者免息還倉。
米貴時減價出糶。續據各屬冊報。計通省官
民共捐穀一十五萬八千餘石。捐穀最多者
分別獎勵。從此再加申勸。積貯漸多。可以源
源接濟。得旨嘉獎。○廣西巡撫馮鈐奏。粵西
陡河。自乾隆十九年修理後。隄岸溝渠。不無
坍塌。應行修補。查每陡相距半里至一二里
不等。惟新陡至竹頭陡。中隔五里。路長水散。
舟行多阻。此處有舊陡基三處。應仍添設三
陡。以利行舟。估銀三千二百餘兩。應於鹽道
庫內羨餘項下動支。得旨。如所議行。但須細
為查察。毋令冒銷。工歸實濟可耳。

實錄卷之五

七

大清高宗法天隆運至誠先覺體元立極敷文
奮武孝慈神聖純皇帝實錄卷之七百十五

實錄卷之五

七

大清高宗法天隆運至誠先覺體元立極敷文奮武孝慈神聖純皇帝實錄卷之七百十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申八月庚辰朔遣官祭黑

龍潭

昭靈沛澤龍王之神玉泉山

惠濟慈佑龍王之神○諭前日御史羅暹春

叅劾蘇昌保舉運使王槩一摺在蘇昌於屬

員虧帑既漫無覺察又登之卓薦自有應得

之咎言官據實指叅乃職所應爾是以批諭

發京初不以為非是特其摺內有若非年老

糊塗即屬有意瞻徇措詞忿激幾於唾罵其

意若有必欲甘心於蘇昌者蹤跡殊為可怪

昨閱刑部審擬廣東叅草知縣劉紹汜一摺該犯即係與羅暹春江西同鄉而蘇昌又即叅處該犯之總督其為藉詞潛行報復實啟黨援朋比之風不可不悉心體究創懲以防流弊因諭刑部堂官詳悉查訊今據奏到羅暹春與劉紹汜雖無瞻徇實跡然該御史具摺叅劾不即於蘇昌失察原案發鈔之時又不於劉紹汜審擬已經定案之後該御史亦自稱形跡之間百喙莫辯等語此等以鄉情

各酬私怨其事本無實證豈對簿駁詰遽肯輸情吐露然亦不至因此即革職審問也封疆大吏果有罔上行私確據臺垣自應據實糾彈顧立言亦自有體中外大臣皆經朕簡用苟其事不干大戾即朕亦不遽加以斥咎御史雖欲自著風力亦豈得以年老大臣盡斥之為糊塗且前如來保今如尹繼善傅春陳宏謀諸臣屢經駁歷其齒安得不老而生平奉職無愆豈遂一例概以衰庸肆為詆訕

可乎。明季科道惡習。立幟分門。借敢言之號。行傾險之謀。假公濟私。無所不至。為害甚大。我朝百餘年來。整綱飭紀。朝政肅清。斷不容有營私搏擊之人。復得稍萌故智。但遏邪防弊。持之不可不堅。今羅暹春之奏。其為劉紹汜而發。本非有証佐可質。而任意詆毀。已情見乎詞。且不先不後之間。自供亦無容置喙。此而陽為不知。於人心政事所關非細。羅暹春著交部嚴加議處。○刑部奏。查積匪猾賊。

最為民害。各省案犯人數亦多。乾隆二十三年。定議發遣巴里坤。嗣因甘省歲歉。撥解匪易。奏准停遣。發往雲貴兩廣烟瘴地方。四省究係內地。未便令奸宄聚集。查現在烏魯木齊伊犁等處。派往種地及駐防兵。倍於往昔。應請嗣後將臣部及各省積匪案犯。年力精壯者。俱仍照改發巴里坤之例。與現行定例內應發新疆各項人犯一體解交陝甘總督衙門。分發烏魯木齊伊犁等處。給種地兵丁。

為奴。若數年後。原發雲貴等省人犯漸少。新疆人犯漸多。再酌量改發。再查乾隆二十三年。奏定搶竊滿貫。及三犯竊賊。數至五十兩。擬絞三次。緩決以上者。均照強盜免死發遣。例。改發巴里坤等處種地。嗣於停遣時。亦改發雲貴兩廣烟瘴在案。今此等人犯。亦應仍照原議。改發烏魯木齊伊犁等處。給兵丁為奴。以上各項人犯。惟年在六十以上。及廢疾者。仍照例發往四省。毋庸改遣新疆。從之。○

辛巳。

上奉

皇太后幸卷阿勝境。侍早晚膳。至丁亥。皆如之。○賜扈從王公大臣。及蒙古王公台吉等食。至丁亥。皆如之。○諭甘省鞏昌等府屬。前此雨水未足。時屢朕懷。今據楊應琚奏。到六月。中連次得雨。夏禾仍屬有收。秋禾亦可及時趕種。惟皋蘭等州縣。廳屬不及補種。秋禾應查勘辦理等語。該處緣邊土瘠。夏秋雨澤未

徧歲事歉收。朕心深為軫念。該督其速飭所屬悉心查勘。按例實力撫綏。無使災黎稍有失所。因念西陲辦理軍務時。歲歲加恩蠲除正賦。今大功告竣。已歷數載。甘民未受恩惠。本年秋成。既未能一律收穫。民力未免拮据。著特加恩。將被旱較重之臯蘭金縣渭源靖遠紅水縣丞沙泥州判隴西通渭會寧鹽茶廳山丹東樂縣丞等十二州縣廳並被旱稍輕之河州狄道漳縣安定平涼固原靜寧隆

德莊浪張掖武威鎮番平番古浪永昌西寧碾伯花馬池州同等十八州縣廳及靈州中衛縣屬之被災旱地。所有本年應徵地丁錢糧。概予蠲免。該督其董率有司。妥協辦理。毋致胥吏人等中飽侵漁。副朕加惠元元之至意。該部遵諭速行。○諭軍機大臣等。昨楊應琚奏甘省臯蘭等三十二州縣廳地方均有被旱之處。已降旨查勘賑卹。並加恩蠲免額賦。厚示撫綏。因念該處現在收成歉薄。緣邊

瘠土之民。生計未免拮据。年來新疆屯政屢豐。如烏魯木齊等處。糧貯甚為饒裕。且其地泉甘土沃。並無旱潦之虞。如令該省接壤居民。量其道里近便。遷移新屯各處。則腹地資生既廣。而邊隅曠土愈開。實為一舉兩得。著傳諭楊應琚。令其悉心體察。隨民情所願。設法開導。善為經理。仍一面熟籌詳議。奏聞辦理。尋奏。乾隆二十六年。經臣遵旨。在甘州肅州安西等處。招貧民四百餘戶。男婦大小一

千五百餘名。口送往烏魯木齊墾種立業。一切資送安插。俱立有章程。奏明在案。彼時臣留心體察。沿邊瘠土之民。尚有願挈妻孥。適彼沃土者。亦有佃人地畝。耕種輸租。情願遷往自墾立業者。今若照前辦送之例。給與車輛口食。則河西一帶附近新疆之安西肅州甘涼等處。大概招募一二千戶。可以不勞而集。惟熱河及涼莊。移駐官兵。明歲正月。同時起程。需用車輛較多。擬今冬先辦送五百戶。

可趕明春耕種之期。其餘俟明歲再行辦送。不特遷移戶口。謀生有路。且可使河東無業貧民。以次遷移佃種。誠為兩便。得旨嘉獎。○軍機大臣等議。覆伊犁駐防官員缺出。應引見者。奉旨以道路遙遠。加恩准其馳驛。其何項官員。應赴京引見。及如何分班前來之處。令臣等議奏。臣等酌議。伊犁駐防涼莊及熱河。滿洲蒙古官員。並錫伯官員缺出。均應照索倫察哈爾厄魯特之例。驍騎校將應補之

人。開單奏放。其佐領以上等官。多揀數員。請旨恭候欽點補放。若令其引見。則不論年限。於差遣之便。赴京未引見前。即令辦理所指任內事務。再防禦步軍校。亦與佐領一體辦理。從之。○壬午。遣官祭

關帝廟。○兵部議准。調任雲貴總督吳達善奏稱。黔省安籠鎮屬之羅斛汛。向設千總外委各一員。兵一百三十名。分守一汛十三塘。該汛距長壩營五百四十餘里。一切領餉辦

公。跋涉遼遠。未便查該汛距定廣協僅一百八十里。地界相連。應將羅斛一汛就近改歸定廣協管轄。原防羅斛之千總。仍撥歸長壩本營差操。酌撥定廣協右營千總一員。併原設之外委一員。留兵一百名。駐羅斛巡查防守。其餘兵三十名。原係續添。應於缺出時。即裁弁。兵月糧仍在羅斛州判倉內支領。應支茶餉。增入定廣兵餉內支給。從之。○癸未。遣官祭昭忠祠。○甲申。戶部議准。四川總督阿

爾泰奏稱。犍為縣開淘鹽井。并額井內添錫。共設鍋六十三口。每歲產鹽一百六十七萬餘觔。應配陸引三千六百五十張。其課稅自乾隆二十九年為始。照數徵收。從之。○卹湖南武岡州攸縣水災飢民。○乙酉。諭軍機大臣等。額爾景額等奏稱。博羅爾伯克沙呼沙默特之弟阿玉布。至葉爾羌告稱。齊特喇爾邁瑪特什丕。與海魯蘭相約。掠其村莊。請兵復讐。伊等行文詰問。仍令各吐實情。再為辦

理務服其心等語。看來邁瑪特什丕與阿玉布等俱係兄弟生隙。自相搶掠。尚非大事。額爾景額等止當如此辦理。或伊等將來再有文移。應嚴詞斥責。若能完局更善。即尚須辦理。亦第遣伯克薩里等。知其性習之人。前往曉示。若阿玉布等仍有請兵之語。當諭以大兵不可輕動。一動則經過各部落。妄生驚恐。豈有爾兄弟不和致發大兵。俾霍罕。巴達克山等處驚恐之理。此事斷不可行。則伊等自無詞復請。俱著傳諭知之。○吏部議覆貴州按察使熊繹祖奏稱。隔省交界民人互控田山界址等案。必須會審者。各該州縣往往以訟屬自理。推延捏飾。致生事端。如滇黔楚蜀兩廣等省交界地方。民苗雜處。易啟爭訟。尤當防其推延滋事之弊等語。應如所奏。凡兩省民人告爭田土者。均即一面互報兩省上司。一面移會訂期會勘。該上司各嚴督該管州縣。依期勘斷。不得藉端展延。俟會勘會審

後。即將審斷情由報明各上司存案。倘有田土寬廣。山場綿亘。界址不明。州縣難於定案者。該督撫就近專委道府帶同覆勘完結。違者照例議處。從之。○又議准廣東巡撫明山奏稱。廣東理徭同知自添設連州州判後。於民間捕務。已不相關涉。而關防篆文仍沿舊式。與官制不符。應換鑄廣東理徭軍民直隸同知駐劄三江口關防頒給。從之。○大學士管陝甘總督楊應琚疏報。乾隆二十八年分靖遠縣開墾荒地五十六畝有奇。○丙戌吏部等部議覆山東按察使富尼漢奏請定重犯脫逃。初參限內接緝處分。應如所奏。嗣後如尋常軍流等犯脫逃。接緝之員毋庸查議。外至斬絞人犯及發遣新疆要犯中途脫逃。其僉差長解及添差護解之文武各官未滿初參之限。遇有事故離任者。將接緝之文武各官以到任之日為始。限一年緝拏。限滿不獲。罰俸一年。仍限一年不獲。再罰俸一年。逃

犯照案緝拏再決不待時之重犯中途脫逃其接緝之員亦應照此定為處分從之○大學士管陝甘總督楊應琚奏准將軍明瑞咨送奏稿設立伊犁理事同知查該同知承辦旗民事務自應專設實缺查涼州莊浪官兵俱移駐伊犁其西安移駐兵數無多止須於涼州設理事通判一員其涼州理事同知即請裁移伊犁但現任同知長祿未通曉蒙古語言應請在部揀選至伊犁事務較繁一切

公費請照烏嚕木齊同知之例支給得旨軍機大臣議奏尋議伊犁為新疆要地兵民雜處必須專設理事人員以清案牘今該督請將莊浪通判移駐涼州涼州同知移駐伊犁應准其裁移改設由各部院衙門揀選通曉蒙古語言之主事等官補授照邊缺三年應陞之例陞用其養廉公費既較內地加增應令該督等會同將軍明瑞辦理從之○葉爾羌叅贊大臣額爾景額等奏近因阿奇木伯

克鄂對查出葉爾羌貿易回人二百餘名照舊例交二千騰格錢文其和闐亦飭和成詳查據報伊什罕伯克古爾班和卓等呈編查六城貿易回人共八十五名除上年派往屯田外所餘五十六名亦願照葉爾羌例酌交五百騰格錢文但伊等因從前辦理和闐田賦時已有應交正項錢糧且俱以耕織為生不似葉爾羌回人之專於貿易自不便重徵其稅若將應交錢文攤派各城回衆雖屬無

多亦覺稍有擾累似應豁免仍令專交正項錢糧以裕回人生計報聞○丁亥祭

先師孔子遣大學士劉統勳行禮○戊子祭

大社

大稷遣顯親王衍潢恭代行禮○

太宗文皇帝忌辰遣官祭

昭陵○戶部議覆陞任雲南巡撫劉藻奏稱通海縣逢里山廠產有黑鉛試採有效應准開採照多寶等廠例抽課從之○己丑諭曰

羅暹春以御史瞻徇同鄉。叅奏蘇昌一事。於朝政官方。深有關係。降旨交部議處。今吏部按例議以革職。自屬罪所應得。但其潛挾私心。為劉紹汜代抒被叅之憤。其事本無証佐可質。伊之自供。亦惟稱不能自解。非有請囑情節。若遽照議褫革。非朕廣言路本意。然以言官竟假糾彈白簡。圖逞已私。其人豈可復居臺諫之任。羅暹春著從寬免其革職。加恩以六部主事用。○庚寅。

太祖高皇帝忌辰遣官祭

福陵。○禮部議准山西巡撫和其衷奏覆清源縣歸併徐溝。改設鄉學事宜。查清源鄉學。應分設教官。請將徐溝縣訓導移駐清源鄉學。舊有

文廟。即作為鄉學

文廟。其學署令鄉學訓導居住。鑄給徐溝縣訓導管理清源鄉學鈐記。餘悉循照舊例辦

理從之。辛卯

上奉

皇太后幸卷阿勝境。侍早晚膳。至甲午。皆如之。

○賜扈從王公大臣及蒙古王公台吉等宴。至甲午。皆如之。○壬辰。

萬壽節遣官祭

太廟後殿。○遣官祭

福陵。

昭陵。

昭西陵。

孝陵。

孝東陵

景陵

泰陵。○遣官祭

孝賢皇后陵。○遣官祭

顯佑宮。

東嶽廟。

城隍廟。○

上詣

皇太后行宮行禮○御澹泊敬誠殿扈從王公大臣官員及蒙古王公台吉等行慶賀禮○諭軍機大臣等熊學鵬奏嘉松二所本年產鹽不敷接濟請借撥閩鹽運浙等語雖引舊例所見過於拘泥甚屬不諳事理嘉松二所與揚州地本接壤一水可通即其配運蘇常一帶之用協濟尤為近便自應就近咨商江省督撫及兩淮鹽政撥運接濟乃轉借撥閩鹽必由海道轉運種種艱難其事殊不可解即如奏中楊廷璋欲撥及臺灣餘鹽而熊學鵬亦稱其不必是亦知其路遠難濟也行鹽各分地面原為尋常配引而言若當閩閩淡食之時何必舍近求遠膠柱鼓瑟若此乎在該撫不過以浙閩為一總督非江督所轄因而心存畛域又豈封疆大臣權宜辦公之道著傳諭尹繼善莊有恭會同高恒於兩淮鹽舫內量其有餘就便協撥應用即一面辦理

一面奏聞以濟民食如閩鹽辦運已有先到者亦不妨量用少許餘即取給兩淮倘尚無成局則竟行文停止將此詳悉傳諭該督等及熊學鵬知之原摺併均鈔寄或實有不可行之處不必遵旨即將實情奏聞尋尹繼善莊有恭熊學鵬高恒等會奏查籌撥鹽舫在臣熊學鵬目擊春夏艱產情形遂不計遠近難易冒昧具奏今伏土已覺起旺秋間雨少就目前論似已不至大形艱絀臣等悉心籌酌擬先借撥淮鹽一萬引足敷接濟將江都甘泉上元江寧句容五縣已經納課過壩之鹽即在揚州截留每舫給錢八文就近運至行銷杭嘉引額之常鎮二府分配勻銷賣出後分別淮浙課費應還應納即以杭嘉二所應配常鎮之鹽就近分撥蘇松口岸現在趕辦不致稽遲將來旺銷之候設浙鹽仍有不敷當彼此計議或仍撥就近食鹽或另以場鹽捆運均不敢少分畛域有誤民食報聞

癸巳諭曰阿桂奏松茂道駐劄茂州有彈壓諸番之責向來道員每藉口在成都辦公駐茂之日恒少殊曠職守請分別改隸以杜推託等語著照所請將成都綿州二屬改歸驛鹽道兼巡其松茂龍安雜谷廳所屬專令松茂道員管轄並兼兵備職銜改為題調之缺其松潘鎮屬各協營都司以下均聽其節制該道駐劄地方所需賞費頗繁本任廉俸之外應於公項內量為增給之處該督阿爾泰酌議妥協辦理○諭軍機大臣等阿桂奏前往番地體察各酋情形摺內所稱即卡狡獪豈不知有內地主張但不肯明言速禍且欲以尚未見棄天朝為安慰熟番之計等語所見頗悉番酋情狀看來以番攻番自是乘機善策九土司等果能齊心協勦其勢實有可圖但各土司未經明白傳諭未免尚存觀望遲疑之見著傳諭阿桂俟阿爾泰回任時悉心會商妥議不必云奉有諭旨但稱欽差總

督之意明諭九土司即卡反覆狡詐為眾土司之害彼雖藉詞欺誑番屬自以為不見棄於天朝然天朝豈肯以眾人之靈再事曲為覆庇是以從前請頒印信現在留存成都不准給發爾土司等集眾往攻原為自除已害起見欽差及總督控制邊隅不惟不為禁制且有應行獎勵之處亦決不為之靳惜爾土司等能殄滅此酋所有金川之地就各番寨所近即令分析畫界管理如此開導土司等既可翦滅仇讐又得增開疆土自必倍加踴躍其事尤屬易成而於內地不動聲色鎮靖邊番之道亦深有裨益阿桂與阿爾泰即熟行計議一面相機妥辦一面將宣諭後該土司等情形若何據實奏聞阿桂不必在川候旨即來京可也○又諭曰阿桂奏巡邊查閱營伍摺內所稱新附雜谷蒼旺番民三千餘戶一節此事端委未甚明晰已於摺內批諭蒼旺番民自前此策楞等辦理之後其設立

土屯是否兼隸內地官員管轄抑或另設屯弁專管并現在兵制營務一切情形若何著傳諭阿桂令其詳悉查明奏聞尋奏查此項番民自乾隆十七年經策楞等辦理後改土歸流將威茂協副將都司帶兵共七百名移駐彈壓並設理番同知辦理案件又於各寨番民內設屯兵三千名土都司守備屯總及大小總旗等項頭目分隸管束平時不支糧餉遇有調遣照土兵例支給守糧每年秋間

該協點驗一次衰弱者裁汰另補土都司守備等員俱在武職衙門聽差各土弁仍聽該管文武統轄二十年督臣黃廷桂議請設法鼓勵每年秋冬調集土兵行團一月操演武藝動餘息五千餘兩以為支給一月口糧及修理軍裝賞給牛酒花紅之用嗣於二十三年督臣開泰恐礙番民耕作奏准減團十日照舊僉兵止撥銀七百餘兩分賞土備屯總等七十七員名又銀二百四十兩買辦烟茶

牛隻於僉兵時分賞屯兵現在遵照辦理臣此次巡邊查各寨番民日在該管文武衙門聽候差遣豫備夫馬為數頗覺過多已嚴飭該協丞減去十之八九並將酌定數目移咨提督行令藩司立案除額外差派報聞○又諭曰額爾景額等奏稱由葉爾羌和闐派往伊犁回人五百戶原議官辦資裝起程而阿奇木伯克鄂對等再三懇請照舊捐助已曉示鄂對等將回人現有零星什物准其協助

至衣服路費仍由官給等語各城資送回人朕惟恐稍有擾累諭令概從官辦今額爾景額等既據回衆情詞感恩圖報即照所請量行協助其衣服路費自應動支帑項至協助之回人等著查明照例給賞以示體卹○甲午補行江西省乾隆二十八年分大計卓異官五員分別議敘如例

大清高宗法天隆運至誠先覺體元立極敷文
奮武孝慈神聖純皇帝實錄卷之七百十六

實錄卷之七百十六

七

大清高宗法天隆運至誠先覺體元立極敷文
奮武孝慈神聖純皇帝實錄卷之七百十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申八月乙未諭曰新任南

澳鎮總兵官德滋係歷任陸路之員於外海
水師不甚相宜著調補福寧鎮總兵其南澳
鎮總兵員缺即著王巍調補○諭軍機大臣
等聞秦蕙田病體尚未向痊著傳諭舒赫德
將伊近日情形若何并或需撥醫調治之處
即行奏聞○丙申吏部議覆貴州學政李敏
行奏請籌酌定例一教職委署宜知照學臣
也查各學教職員缺督撫委員暫署例不知
照學臣惟該員於署事後詳報到任日期亦

往往遲延時日。於稽察之法。尚屬疎漏。請嗣後教職缺出。無論暫署委署。督撫均即咨明學臣。該員仍將到任日期。報明學政備案。一。生員承襲土司。宜裁酌定例。以杜規避也。查土司由生員承襲者。仍以生員應試。但往往以辦地方事務。詳請寬限。竟有欠考至二三次。始補考一次者。實以土司為藏拙之地。請嗣後此等生員。如土司事繁。自揣不能應試。准其告退。願應試者。飭令如期赴考。不得託

故規避。違者查照定例斥革。邊省凡有土司地方。一體遵照。均應如所奏辦理。至所稱拔貢之年。優貢宜暫停止之處。似無庸更改定例。惟黔省既稱應考之人無多。應聽其寧缺毋濫。從之。○調任湖廣總督李侍堯奏湖南北毗連八省。差使往來絡繹不絕。所有各州縣額設驛馬。遇有倒斃。向係領票出口採買。補額口馬。身高力大。堪以負重致遠。本地土馬小弱。難勝馳載。是以屢禁私購充數。嗣於

乾隆十七年。前督臣永常以赴口採買路遠費繁。楚地濕熱。口馬土性不習。易於倒斃。奏准將各營馬匹。就近採買土馬。又於十八年奉諭旨。嗣後江浙各省營驛。購買口馬之例。停止。欽遵。各在案。但自奉行辦理以來。兩省有驛各州縣。皆以土馬於驛站未宜。遇緊要差使。每多貽誤。臣自到任。細加體察。口馬初購到楚。若不善餵養。原易倒斃。各驛中俱有素識馬性之人。及額設獸醫。加意調養。一兩

月後。即可服習。現在驛站中。亦各蓄口馬數匹。應付緊要差使。及遞送六百里公文之用。往往經五六年之久。惟土馬倒斃賠累實多。應請仍准給票赴口買馬。加意節省。現定每匹價銀十六兩。亦足敷用。毋庸再請復原減一兩之價。況兩省各驛歲需馬。不過數百匹。亦無妨於馬政。至營伍購回馬匹。分給各兵。其中未識馬性。不善餵養之人。以致倒斃。亦非盡因水土不宜所致。查各營從前例買口

馬必積至一歲之久始差弁往買一次其中
空曠日多各兵於馬乾草料均不能支領遇
操演又缺馬合隊誠不若就近購買可以隨
時補額是土馬惟於營伍相宜而口馬實於
郵務有裨得旨允行○丁酉刑部議准雲南
按察使良卿奏稱滇省夷獠沾濡教化有名
列青衿者有捐納監生者冠裳既與民人無
殊應請嗣後此等改苗為民者罪犯軍流徒
遣照黔省例與民人一體辦理其實係苗民

未改苗言苗服犯軍流徒遣者仍照例折枷
完結其情罪較重或再犯不悛亦照例將本
犯折枷後仍將家口各就土流所轄一併遷
徙安插不使混入腹地從之○戊戌

上奉

皇太后自避暑山莊啟鑾幸木蘭○詣

皇太后行宮問安○諭曰尚書秦蕙田以現在
病未向痊奏請開缺給假回籍就醫一摺著
照所請准其給假南旋既可乘便就醫而江

鄉水土於伊調攝自必相宜可以日漸痊愈
所有刑部尚書不必開缺其事務著劉綸暫
行兼署○諭軍機大臣等納世通等奏稱阿
布都喇伊木之弟阿布都克呼木等俱係叛
逆親屬應行緣坐之犯擬以斬決候旨正法
等語阿布都克呼木等按律自應正法但與
阿布都喇伊木誼屬兄弟尚非子嗣可比著
加恩免死送至京師賞給王大臣等為奴仍
傳諭回衆知之○又諭據蘊著奏稱移駐張

家口之十二佐領內有二漢軍佐領官員兵
丁或仍移張家口或照右衛漢軍六佐領辦
理之處請旨等語此二佐領弁兵雖原議入
於移駐張家口數內今既將右衛漢軍官兵
出旗為民調撥綠營此二佐領自應照彼六
佐領一體辦理若謂移駐張家口官兵額缺
儘可將彼處滿洲官兵照數撥補著傳諭蘊
著知之○是日駐蹕中關行宮○己亥以福
建水師提督黃仕簡廣東提督吳必達對調

（是日駐蹕波羅河屯行宮。○庚子

上詣

皇太后行宮問安。○遣官祭賢良祠。○諭軍機大臣等。伊犁雅爾等處設領隊大臣四員。尚覺不足。著增為六員。伊犁酌派四員。雅爾酌派二員。伊勒圖鄂津觀音保勒克著駐劄伊犁。伍岱訥蘇肯著駐劄雅爾。綽克托著授為叅贊大臣。駐劄塔爾巴哈台。伍彌泰李景高仍留烏魯木齊。同五福辦理屯田貿易事務。

奏事時。伍彌泰列名在前。綠旗兵事務著五福管理。俱聽伊犁將軍節制。伍彌泰李景高或一處駐劄。或分駐庫爾喀喇烏蘇。著該將軍議奏。○軍機大臣等議准。直隸總督方觀承奏稱。右衛移駐張家口。兵除兵房現在加緊建蓋外。其協領等官四十四員。兵一千二百二十二名。歲需粟米一萬七千四百七十八石。此內有張家口原設官十三員。兵三百名。每年額支米六千九百九十三石零。即在

新移官兵應支數內。無庸另籌。實不敷米一萬四百八十五石。宣屬產米本少。採買維艱。請將宣化懷來懷安三縣現支半豆。照乾隆二十六年例。一併折給銀兩。將豆八折改徵粟米。二千六百九十一石。運交張家口倉收貯供支。又蔚州西寧二處酌撥屯豆六千六百石。照例改徵。可得粟米五千五百石。但道遠運繁。請於本地出糶。即以糶價在張家口照數買米交倉。米價不得逾原糶之數。如有

贏餘。報明充公。尚不敷米二千二百九十四石。即於移駐之領催前鋒馬兵歲支米十五石內。每名改給折色三石。以準籌撥之數。再張家口米價較右衛為貴。除舊支折色仍每石折銀一兩五分外。所有新改折色之三石。應請每石以一兩二錢增給。得旨依議。所有此項兵丁內。已經出旗之漢軍額缺。無庸另行派往。是日駐蹕濟爾哈朗圖行宮。辛丑。諭曰。奉寬在盛京年久。著回京另候簡用。

所遺盛京工部侍郎員缺著雅德補授○是日駐蹕阿穆呼朗圖行宮翼日如之○壬寅世宗憲皇帝忌辰遣官祭

泰陵○諭軍機大臣等蘇昌奏肇慶協火藥局失火一摺營中庫貯火藥豈有無故自行轟燬之理乃蘇昌並不將典守人等嚴行根究僅以查無別故為辭所奏已屬草率甚至以副將專司之員漫無約束燬及軍儲僅請叅處疎防並不責令賠完別請動項製備辦理

尤為失當此事已交與明山查辦並著傳旨申飭該督現赴閩浙新任嗣後若不知警省仍蹈前轍恐不能曲邀寬貸也○又諭曰蘇昌奏肇慶協火藥局轟燬一摺所擬開叅疎防及酌量製補之處殊未允協營中火藥如果庫貯嚴謹豈有無故自行轟燬之理其中必有乘機偷竊或看守之人遺失烟煤等事何得僅以查無別故不行根究示懲至典守專司責在副將乃以漫無約束轟燬軍儲自

應責令賠補以昭炯戒若止照例以疎防叅處誰復知所警惕所請動用修署銀兩一節尤為失當著傳諭明山令其詳悉查辦具奏○癸卯

上詣

皇太后行幄問安○行圍○兵部議准調任湖廣總督李侍堯奏稱湖南辰州府屬之乾州永綏二同知鳳凰營通判俱各分駐苗疆康熙年間乾州鳳凰二廳各撥給標兵一百名把總一員以供驅使巡緝乾隆六年又將寶慶府同知移駐長安地方專管城步綏寧二縣苗徭事務亦給標兵一百名把總一員以資護衛各在案今三廳所轄苗人久已輸誠向化與民一體該同知通判止審理詞訟催科撫字等事所有標兵三百名把總三員應裁汰飭該鎮營將各兵逐加考驗年衰技疎者先行汰除其年壯技優各兵俟該鎮營額兵缺出補伍廳標把總俟附近鎮營缺出撥

補其乾州鳳凰二廳標弁兵原撥防汛地者仍於鎮標內酌撥查管理苗務四廳內永綏同知因未有標兵額設民壯五十名乾州鳳凰二廳各止十五名長安廳止二十名今三廳兵既裁民壯不敷差遣而永綏原設五十名未免過多應請每廳分設民壯三十名除將永綏廳民壯裁撥外尚應增二十名其工食即於裁汰兵餉項下動撥從之○是日駐蹕博都爾昂阿大營○甲辰

上行圍○豁陝西朝邑縣水衝灘地二頃六十畝有奇額賦○是日駐蹕永安湃昂阿大營翼日如之○乙巳

上詣

皇太后行幄問安○行圍○丙午秋分夕

月於西郊遣理郡王弘曉行禮○

上行圍○諭軍機大臣等軍機處議奏南巡駐蹕程途內山東德州以下每處向用大城住頓者俱已間站酌添坐落數字毋庸隨帶兩

分大城更番轉替於運費深為簡省惟江南境內之林家莊魯家莊徐家渡三處俱須大城番替此段道里非遙以中間祇少數據因須隨塗多帶兩分大城馱運勞費較之小小結構相去倍蓰著傳諭尹繼善高恒於魯家莊地方酌添行宮或動辦差賞給餘銀或用高恒所奏准商等情願修理行宮之項量葺數間程站既屬適均行營倍多便益可將此傳諭知之○是日駐蹕鄂爾吉庫哈達大營

○丁未

上詣

皇太后行幄問安○行圍○諭軍機大臣等成衮扎布等奏稱解送伊犁羊三萬隻應令派往厄魯特及錫伯兵丁分領前往其烏里雅蘇台需用羊隻處頗多據台吉羅布藏齊旺願進羊三千隻可否收受或另行採買等語伊犁駐劄官兵雖需羊頗多而哈薩克布魯特等不時前來貿易所市羊隻尚可敷用著

傳諭成衮扎布等祇須辦羊一萬五千隻交厄魯特等解送錫伯兵丁不諳牧養其餘羊即留烏里雅蘇台應用羅布藏齊旺所進亦不必收受併諭明瑞等知之○吏部議准陞任甘肅布政使王檢奏稱各省大計舉劾例由藩司主稿借臬司會詳督撫察覈具題督撫到任未及一年者例得奏請展限而藩司新任並無展限之例殊非慎重考覈之道請嗣後藩司到任在三月以上者仍照例迅速

辦理如甫經到任詳明督撫奏請展限三月從之○是日駐蹕巴顏圖庫瑪大營○戊申上行圍○予故多羅寧郡王弘皎祭二次葬如例謚曰良○豁江蘇鎮洋縣坍沒蘆田蕩塗三頃二十畝有奇額賦○是日駐蹕永安湃大營翼日如之○己酉賜扈從王公大臣及蒙古王公台吉等食○諭駐劄雅爾城辦事叅贊大臣印信著用伊犁叅贊大臣字樣交該部照伊犁印信以滿洲托忒回子三體字

鑄給○是月江蘇巡撫莊有恭浙江巡撫熊學鵬會奏臣等會勘西塘之老鹽倉一帶東塘之韓家池一帶及各處盤頭等工本於沙上水邊疊土鑲柴而成年久不無蛀蟄請動支海塘經費銀五千兩行令產柴各縣陸續運至工所查明應修應鑲各工覈實動用又查戴家塘鎮海念里亭等汛之各段工內有係大石塘而未建坦水今護沙漸刷塘身已露十餘層應建坦水捍衛塘脚者有舊建坦水年久木石朽缺應添搭加料者有本係盤頭舊基今應改建坦水者均應於霜降水落後及時修建臣等相度情形分別多寡丈尺令該廳弁確估題咨辦理報聞○湖北按察使雷暢奏報到任日期得旨湖北吏治竟不可問故特用汝一切勉之○河南巡撫阿思哈奏有舞陽縣民朱狗因繼祖母與人通姦將姦夫登時毆死一案詳查律例止有父母本夫伯叔兄弟及有服親屬捉姦分別擬議

之文。至子孫應否亦許捉姦。及殺傷姦夫。作何治罪。並無明條。似子孫不應在捉姦之列。然愚民無知。竟有激於義忿如此案者。倫紀人命攸關。未敢輕率完結。請勅下法司。確加覈議。將子孫應否捉姦。致殺姦夫。或止捉姦。其子孫作何分別議擬之處。明立科條。著為定例。俾問刑衙門。不致援引失宜。所有朱狗一案。即俟部覆到日。遵照辦理。得旨。此亦偶然之事。何必定例。以啟愚民之犯法乎。竟置之不問可也。○山東巡撫崔應階奏。勘明濟寧魚臺酒地情形。查濟寧牛頭河。即北濟故瀆。上承荷澤鉅野鄆城嘉祥等邑之水。至魚臺之廣運開。會柳林涑河入舊運河。歸微山湖。濟運自湖水漲漫。此河形勢久已莫辨。今因水涸。兩岸已露隄埝。可通緯路。間有斷續處。飭該州勸民修築。使將來上游水發。皆循軌入湖。不致漫入坡地。由牛頭河而南。皆濟寧被淹之處。內惟實在窪地。尚有積水未消。

或地尚沮洳者。其餘新涸地內。野草叢生。其魚臺莊地情形亦同。凡從前四面水圍村莊。不通來往者。漸有路徑。民情歡悅。僉稱二十餘年來所未有。至新涸地畝。實緣受淹以來。民間多不務農。牛驢農具既缺。且草根盤結。必須剗挖。方可翻種。工費更倍。是以尚未墾種。現已飭該州縣。查有實在貧農。先動常社等穀。酌借口糧。並請照乾隆二十六年例。按畝借麥本銀一錢。牛具銀一錢。分年徵還。復於典鋪查有無人取贖之農器。官為收買。散給其有本戶遠出。准同莊人代墾。將來回籍。令償還墾地工費。俟下年再給種植。並諭以地畝前已豁糧。果能墾復。仍當懇恩暫緩升科。農民咸各勉力從事。自白露至立冬。尚有兩月。墾地播種。為日尚寬。倘來歲夏麥豐登。生計可期。漸裕得旨。覽奏欣慰。○工部尚書署四川總督阿桂奏。乾隆九年督臣慶復於郭羅克善後事宜案內。請令松潘泰寧派遣

千把各一員各帶兵二十名於郭羅克革賁
兩處地方偵察巡駐並派兵十五名於小阿
樹等五處安設塘遞以通消息等因在案乾
隆十八年又經督臣黃廷桂以革賁原駐把
總一員兵二十名數少難以兼顧請令泰寧
協副將轉飭德爾格等三土司加派土兵交
駐防官兵督率於夏秋數月一體巡防其駐
防郭羅克把總一員兵二十名移駐阿壩之
色佳卡地方以資防護塘兵十五名酌留九
名分設三塘以通文報等因亦在案臣此次
巡邊查得色佳卡地方在黃勝關外十有餘
日之程而革賁亦去打箭鑪窩遠自設防兵
以來不惟郭羅克搶刦如故而被刦之案亦
從未有經防兵緝獲者蓋孤懸番地力弱兵
單每歲徒費口糧鹽菜等項銀一千餘兩竟
成虛設應請將此兩處弁兵及安設臺站之
處均行停止酌令該鎮協於每年八九月夾
壩肆行之時各派諳練千把一員各帶兵二

十名酌給口糧鹽菜赴色佳卡革賁地方令
阿壩及德爾格等土司就近添撥土兵協同
於郭羅克接壤地方巡查一次其有控告盜
刦之案易於查辦者該弁即為剖斷完結倘
案情稍大即報明該管鎮協秉公速辦均於
十月內即行撤回得旨允行

大清高宗法天隆運至誠先覺體元立極敷文
奮武孝慈神聖純皇帝實錄卷之七百十七

大清高宗法天隆運至誠先覺體元立極敷文奮武孝慈神聖純皇帝實錄卷之七百十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

繕載官經筵講官太子太傅文華殿大學士文淵閣領閣事稽察欽奉 上諭事件處管理刑部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲黃旗滿洲都統軍功紀錄五次

尋常紀錄四次臣等謹將經筵講官太子少保工部尚書紀錄六次臣等謹將

敕修

乾隆二十九年甲申九月庚戌朔

上詣

皇太后行幄問安。○行圍。○豁山西平陸縣坍

沒地。十二頃有奇額賦。○是日駐蹕安巴究

和羅大營。○辛亥。

上行圍。○諭刑部奏審訊朱文呈首新選秦州

知州賴宏典書寫逆詞一案。將朱文擬以斬

決。而於賴宏典僅定以充發闡展擬議乖謬

深堪駭異。在朱文以撞騙挾制誣人叛逆擬

以斬決。自所應得。若賴宏典身膺牧民之官

乃欲行賄求陞即云字約內填寫隱語何許

不可。乃有點兵交戰不致有失軍機等字樣

此何等詞。居然著為契券。情不知所做。畏此

在市井無賴小人語稍涉此。即為亂民難宥

何況身為縣令膺國家祿命者乎。則即此隱

語。實已與悖逆無異。而其以財謀幹遷官。雖

亦干犯功令。較之本罪。特其小小末節耳。舒

赫德等。以大臣身司三尺。見此等逆詞。並不

為髮指。轉撫其末節。問擬而將此重大關係

之情罪。竟若視為兒戲。其心尚可問乎。如以

此語為無足深怪。使舒赫德自作隱語兒戲

亦可用此等語。句乎。大臣謬戾至此。不知其

具何肺腸。豈又以朕行幸木蘭。未必於此等

尋常案件。細加檢閱。遂至任情顛倒乎。著將

刑部堂官交部嚴加議處。此摺擲還另行定

擬。速奏。尋議上。得旨。朱文著即處斬。賴宏典

著改為應斬監候。秋後處決。餘依議。○諭軍

機大臣等。舒赫德等審擬賴宏典一案。甚屬

乖謬已降旨交部嚴加議處此案填寫逆詞雖供由未經到案之錢忠但覈其情形必係

圖賄之朱文暗與錢忠串通造謀以為後來扶制之計否則用銀二千何至寫為壯兵二千此亦事理之易曉者舒赫德等並未令彼二人對質何稱信讞著將此情節嚴加刑訊在朱文誣人反罪已定一得確情即一面奏聞一面將該犯正法至錢忠雖未提到而賴宏典之罪總在知此語即應重罪而現在不至立決何妨待錢忠到案質明朕於凡事惟期平允不知舒赫德等亦如此存心否乎○是日駐蹕庫爾圖察罕大營○壬子

上詣

皇太后行幄問安○行圍○浙江巡撫熊學鵬疏報乾隆二十八年分鎮海嵎縣龍游慶元安吉等五州縣開墾田地山蕩五頃四十畝有奇又嵎縣以地山改墾田地二頃有奇○是日駐蹕鄂倫索和圖大營○癸丑

上行圍○是日駐蹕額勒蘇錫納大營○甲寅上詣

皇太后行幄問安○行圍○諭軍機大臣等舒赫德等春秋讞情實人犯內將傷斃總麻尊長之杜廷順黃煊權趙亞九三犯均請改為緩決一摺辦理深為乖謬凡有關服制之犯不得改擬緩決蓋以重倫常而昭法紀正明刑弼教本義是以向來督撫原擬九卿覈定並未有輕議更張之事惟朕於勾到時量其

案情稍輕念總麻與期服有間自可酌予緩勾是以現在招冊內每年遞緩之案有積至七八次者權衡折衷固已不憚再三審慎且此等人犯緩決已久將來或遇國家大慶或特降恩旨未嘗不可省錄減等並與矜全若當秋審竟用奏贖請定緩決規條則由此推類旁通如官犯等亦將曲加議緩是臨期勾到冊內並無一二情輕之犯待朕別擇大典不幾同具文乎昔人稱皋陶曰殺之三堯曰

宥之三。是必先有皋陶之執法而後可以施
堯之矜卹。正所云忠厚之至。其理古今莫易
也。舒赫德喋喋議緩。惟恐不及。是已舉三宥
自居。朕將無所庸其矜卹。豈不轉以議殺歸
過於上乎。昨定擬賴宏典一案。舒赫德辦理
顛倒。方降旨申飭議處。此奏隨接踵而至。尤
堪駭怪。前秦蕙田以病假歸。朕意舒赫德素
性好名。必將有挾其故智。另立局面。以博庸
愚無識之人。謬為稱譽者。今果然故智復萌。

矣。且舒赫德為滿洲尚書。今乘漢尚書之南
歸。而亟亟改其章程。以博寬厚之名。庸愚者
因為稱許。而有識者且將笑罵矣。夫執法之
司。必以明允協中為尚。寬嚴本無成見。若但
存猥鄙之末見。欲以寬自處。則嚴將誰歸。其
居心行事。尚可復問乎。舒赫德屢以乖謬干
譴。均邀矜宥。不但不知懲艾。又從而加甚焉。
小有才而未聞大道。將來設自罹重辟。他人
之與秋讞者。恐未必敢於情實中為伊請改。

緩決也。舒赫德著傳旨嚴行申飭。摺擲還。
是日。駐蹕阿濟格究和羅昂阿大營。○乙卯。
上行圍。○諭軍機大臣等。昨舒赫德等請將傷
斃總麻尊長之杜廷順等三犯。改入緩決一
摺。深屬乖謬。已降旨嚴行申飭。此等服制攸
關人犯。每當秋讞。刑部九卿詳慎覈擬。歷年
具有成案。今舒赫德竟行具摺奏請。伊既稱
有例可援。著傳諭舒赫德。令其將十年以來
此種案犯。有經督撫列入情實。而刑部九卿

駁改緩決者。前後凡有若干案。即速查明覈
實覆奏。○是日。駐蹕伊綿峪大營。○丙辰。

上詣

皇太后行幄問安。○行圍。○豁免浙江仁和海
寧三縣坍沒民竈沙地六十四頃有奇。又海
寧坍沒錢江公租地十一頃有奇額賦。○是
日。駐蹕扎克丹鄂佛囉大營。○丁巳。

上行圍。○諭曰。提督李勲奏。新寧縣民劉周祐
等。控告書役舞弊。經府發縣鎖禁致街民散

帖罷市一摺。此等投散匿名揭帖。糾衆罷市。實屬莠民刁悍之尤。為從來所僅見。非按律重懲。何以靖人心而肅法紀。第覈摺內前後情節。劉周祐控告書役。其事即干連本縣。為知府者。或親提審究。或別委他縣查訊。庶為秉公合理。乃該署府王錫蕃。仍發交本縣辦理。而該縣李騰淵。因商議調處。甚將原告禁押。置其事於不問。則府之庇縣與縣之庇役。固不問可知。其實無以折服衆心。致起事端。

是固地方官之不能辭咎者。向來外省抗官之案。雖事涉有司。應行叅處。亦必首懲糾衆之人。而於官員應得處分。不即汲汲究治。誠慮匪徒因此長奸。不可不防其漸也。今該府縣等。既以心存袒護。而措置乖方。是先不能守其正已臨民之本。又豈可與僅係稽查不力。彈壓不嚴者。竟予一律論乎。使復持緩治之議。有意為之姑息。將窮簷冤抑。終無由上聞。覆盆尚可言耶。然小民畏官奉法。自屬閭閻常分。果以困吏蠹而控之府。又何難以受府縣之覆護。摧折而上控督撫乎。豈得因一朝挾忿。膽敢醵金閉戶。公然玩視王章。國家三尺具在。又豈能以一二有司之不職。遽為刁頑曲貸哉。朕治官莅民事。無鉅細。皆詳悉權衡。折衷至當。不使稍有畸重畸輕之弊。此案所有投帖罷市各情節。著該督撫即行確究。首從按法定擬。其王錫蕃李騰淵等。亦即查明叅處。以昭平允。將此通諭中外知之。

是日駐蹕巴顏溝大營。○戊午。

上詣

皇太后行幄侍早膳。○賜扈從王公大臣及蒙古王公台吉兵丁等食。○是日駐蹕鄂爾楚克哈達大營。○己未。

上行圍。○諭據喬光烈奏湖南新寧縣傳帖罷市一案。顯有徇庇屬員化大事為小事之意。若果如所奏。該縣已革蠹役而刁民猶不服。以致挾制罷市。則罪在民不在官。又何必叅

處該令。此案疑實甚多。著派刑部侍郎阿永阿。馳驛前往。會同該督吳達善。秉公查辦。所有隨帶之司員。併著馳驛。○又諭。昨據李勲奏。新寧縣民傳帖罷市一案。已明降諭旨。並傳飭喬光烈矣。今據喬光烈摺奏。於地方刁徒糾眾抗官大案。全不知事理之輕重。種種紕繆。已於摺內批示。如劉周祐具呈控府。名為控役實。即控縣。乃署府王錫蕃既不親審。又不委員。將案犯竟發本縣。是直以原告交被告矣。知府職在率屬。而庸劣無能至此。該撫僅以叅處知縣了事。而於王錫蕃並無一語指劾。且以現犯不齊。意為開脫。試問犯即不齊。何難自往提鞠乎。即喬光烈身為巡撫。於尋常案牘。固不妨在省坐理。若此等大案。即當減從星速。自行督辦。庶奸民不致漏網。庸吏亦知所提撕。乃僅卸責監司。深居不出。藉詞敦體。有意養高。是朕以封疆畀該撫。而該撫自待。曾一巡道熊學驥之不如矣。其徇

庇怯懦。實為深負簡用之恩。喬光烈著交部嚴加議處。○諭軍機大臣等。提督李勲奏。新寧縣民罷市一摺。已明降諭旨。著該督撫秉公嚴行查辦矣。地方遇有此等重案。為近來罕見之事。該撫一聞稟報。即應一面督率審究。一面具摺奏聞。雖定案未能刻期。而起案緣由。何難先行入告。況地方有司。始因書役滋弊。繼復轉相覆護。以致釀成事端。該撫即自速赴查辦。亦豈遂失封疆之體。喬光烈平日辦事尚屬公正。此案乃不速將情形奏聞。或因案情重大。一時竟無定見。耶。喬光烈著傳旨申飭。○是日。駐蹕鄂爾楚克大營。○庚申。

上行圓。○諭曰。御史李宜青條陳臺灣事宜一摺。所奏應行與否。且不具論。而其用意之取巧。器小已大。失言官之體。該御史奉差巡臺。地方之事。皆其職分所難諉。第同差滿漢二員。考成均屬一體。見聞所及。理宜和衷共酌。

會銜入告。即意見容有參差。亦應據實聲明。專摺奏請。乃李宜青既不於在臺時彼此會商。至回京復命。亦未聞一言及此。直至差滿日久。挾此為獨得之秘。羅列見長。彼以建白博名高者。存心鄙瑣。固當如是耶。此等伎倆。猶得以嘗試為得計耶。李宜青著傳旨申飭。至所請各條。亦不必以人廢言。仍著交部議奏。○諭軍機大臣等。納世通等奏厄魯特博羅齊等自瑪爾噶朗逃來。告稱額爾德尼伯克所居城外。仍有厄魯特千餘人。又今春遣使霍罕後。額爾德尼伯克領眾往侵和濟雅特丕色勒。中途忽行撤回。據伊屬人互相傳說。恐大兵前來。厄魯特必然歸附。莫若先行擒殺我等。聞風逃走。現在遣親信回人潛入霍罕偵探。如無他故。即將博羅齊等送往伊犁等語。額爾德尼伯克徹兵防範厄魯特等。不過因阿布都喇伊木交通事覺。恐大兵問罪。欲為守禦計耳。豈敢圖謀喀什噶爾。如果

有此心。則從前阿布都喇伊木潛通信息時。何不統眾相應。朕昨以阿布都喇伊木罪狀。敕諭額爾德尼伯克。伊得旨。知已免其加兵。自然安守游牧。若納世通等以全無影響之事。偵探張皇。恐喀什噶爾回眾聞之。轉啟猜疑。著傳諭納世通等。將此事姑置之。不必遣人往探。伊犁將軍明瑞等奏。此次察哈爾總管達克塔納領兵五百解送羊隻。中途馬甲朋蘇克等俱迷蹤未回。臣等正在察詢。忽朋蘇克與厄魯特男婦五人同來。告稱因馬乏落後。入哈薩克托克托郭勒等所居。被其拘留。復乘間與厄魯特等商謀脫出。臣等派兵一百名往拏。所供之哈薩克等并收其牧羣。旋據全行拏獲。又查出察哈爾車布騰因馬乏病卧。有哈薩克哈藏哈布起意欲買車布騰役使。以銀付同行之彥扎布。彥扎布貪利允從。次日遂以病故報知該管官。查彥扎布貪利無恥。應請傳集哈薩克人等將伊正

法示衆。車布騰重責枷號。滿日發往葉爾羌。給官兵為奴。哈藏哈布。重責釋放。托克托郭勒。起意拘留官兵。應請正法示衆。收其馬匹入官。其餘人馬。仍給還原主。朋蘇克因病被拘。旋行脫出。仍令照舊差操。其該管官達克塔納等。請交部分別嚴加議處。得旨。所辦甚是。如所請行。○緩徵湖北江夏武昌咸寧嘉魚蒲圻興國大冶漢陽漢川黃陂沔陽文泉黃岡蘄水黃安蘄州黃梅廣濟石首監利。

并武左。沔陽黃州蘄州二十四州縣衛水災額賦。○是日。駐蹕巴顏溝東大營。○辛酉。

上詣

皇太后行幄問安。○行圍。○吏部議覆調任兩廣總督李侍堯奏稱。州縣自理詞訟定例二十日完結。仍設循環簿。每月申報該管上司。嗣又奏准。道員分巡所至地方。即提號簿查覈。如有玩延不結等弊。詳參議處在案。今州縣率多任意延擱。或將號簿藏匿。種種蒙混。

拖累。皆由巡道不實力稽查所致。應如所奏。責成巡道。於所到各屬。查提催結。如有前項弊端。照疲玩叅處。徇情枉斷者。按所犯輕重。指叅嚴處。巡道徇庇者。照例降調。從之。○兵部議覆。伊犁將軍明瑞等奏稱。涼州莊浪熱河三處。移駐伊犁兵四千餘名。各有額設之協領佐領。請照索倫錫伯察哈爾厄魯特之例。分別給與關防圖記。應如所奏。令該將軍逐一擬定字樣。咨部鑄給。從之。○以正藍旗

蒙古副都統扎什扎木素為江寧右翼副都統。○是日。駐蹕巴顏布爾噶蘇台大營。○壬戌。

上行圍。○戶部等部議准。四川總督阿爾泰奏稱。敘州府屬之屏山縣界內。大竹堡一帶荒地甚多。委員勘明夷漢界址。離土司夷巢二三百里。俱有大山溪河界限。其間土脈水泉悉堪種植。共勘有可墾田地十萬六千六百餘畝。貧民報墾者現有一千五百餘戶。計口

授田領粟認糧分別水旱田地照例題報升科。惟是該處距縣三百餘里可墾之田倍於縣額。將來招徠既廣。烟戶日增。一切納糧輸賦。編設保甲。稽查奸匪。修築堰壩。酌增鹽引等善後事宜。俱需專員妥辦。原設馬邊縣丞不足以資彈壓。查敘州府通判管理富順縣鹽井事尚簡易。縣丞足以料理。請以敘州通判移駐馬邊。將應墾之地及附近馬邊之川秧蕎壩上下溪一帶地方劃歸管理。命盜案

由通判審擬解府勘轉。田土詞訟悉由通判管理。徵解換鑄馬邊理民督捕通判關防頒給所屬文武生童仍附入屏山縣考試。并請將宜賓縣分駐宣化巡檢裁汰。改設馬邊廳照磨以資分理。巡檢事務歸宜賓縣兼管。其馬邊縣丞調駐富順縣鄰井關管理鹽引事宜。該縣丞即歸富順縣管轄。衙署毋庸另建倉庫監獄酌量添修。官役俸工通融改撥。該通判原定養廉五百兩。請每年加增銀一百

兩。至該處應駐武弁查馬邊原設兩河汛千總一員防兵三十一名。隴勝汛把總一員防兵二十五名。又上溪汛防兵十六名。以現在情形而論。兩河隴勝均非要地。應將兩河汛弁兵移駐烟峯城。隴勝汛弁兵移駐中壩上溪汛兵酌量分設各塘。將舊有弁兵房間墩汎量給修費拆卸移建從之。○是日駐蹕都穆達烏拉岱大營。○癸亥

上詣

皇太后行幄問安。○行圍。○諭前江西德化等處因江水驟漲濱窪之地秋禾不免淹損。已降旨將德化封一等三鄉及彭澤等五縣被水之地分別加恩撫綏。今各該處積水雖次第消退。可以補植秋禾。而南昌等縣緊踞鄱湖之上。其最低處所尚未能全行涸出。秋種難期收獲。民力不無拮据。著再加恩。將南昌新建進賢三縣未涸地畝即照封一等三鄉之例一體概予蠲賑。該撫速飭所屬實力妥

辦務令均沾實惠。副朕軫念閭閻至意。該部遵諭速行。○又諭曰。御史秦馨。以戶部郎中馮光熊。刑部郎中杜玉林。俱係丁憂之員。該堂官不應奏留一摺。內稱若遇陞遷外任。又未聞以幹練留部。其持論實中事情。即該堂官等亦無辭可對。官員遇有事故。並聽離任終制。原係卹下常經。朕自臨御以來。於臣工進退。一切皆循定例。間有特旨。令仍在任署事者。本屬寥寥無幾。第以堂官而請留司員。

督撫而請留屬吏。則上官之推情瞻顧。與下僚之因事干求。其流弊將何所不有。況國家分職任才。豈必少此一二人。與此一二人。三年少待之期。而必權宜破格而為之。誠亦可以不必。若該御史遽謂因此斤斤執持。即廣為教孝。則又不然。人臣移孝作忠。原無二理。既已名通朝籍。致身之義。豈未之前聞。倘如明季科道。門戶惡習。爭論奪情。如王錫爵之於張居正等案。忿詈交攻。無所不至。而於

國是究鮮纖毫之益。此又政體所關。不可不懲其漸者。朕虛公御下。從無成見。嗣後凡朕特旨酌量。令其留任外內。而部院堂官外。而督撫等。均不得率行請留。則弊端既無。自而生。而言官之撫拾建白者。亦無從藉口。著為例。○又諭。前舒赫德等摺奏。秋讞情實人犯內。將傷斃總麻尊長之杜廷順。黃煊權。趙亞九。三犯均請改為緩決。辦理甚屬乖謬。已傳諭嚴行申飭。此等有關服制之犯。不得輕議。

更張。原以重倫常而昭法紀。是以從來督撫原擬九卿覈定。並無任意駁改。朕於勾到時。量其案情輕重。分別予勾之外。仍令監候。即如三案內。已經緩至七八次之犯。即照例仍入情實總屬不予勾者。其於緩決亦無大區別。或遇矜卹之典。未嘗不可再行議緩。議矜。若當秋審時。竟奏明先改緩決。幾若定有規條。則冊內所存。皆實係謀故難貸之人。並無一二情節稍輕。可以待朕別擇者。豈能轉於

各犯中曲法予以不勾。是伊等所進情實犯中。竟不令朕寬免一人矣。昔人稱臯陶曰。殺之三。堯曰。宥之三。是必先有臯陶之執法。而後可施帝堯之矜宥。若舒赫德等喋喋議緩。惟恐不及。是早以三宥自居。朕將何所庸其權度乎。然舒赫德之所以汲汲為此者。其亦有故。昨御史李宜青條奏臺灣事宜。不與滿御史會商。取巧獨奏。大失臺垣建言之體。然此尚係小臣。若舒赫德為滿洲尚書。如以此

等案情必應改緩。或以服制內期功之犯。停勾二年。尚令大學士會同省覈。今以總麻較輕。轉致歷次不改。奏請酌量覈定。未始不近情理。然此何不於去年漢尚書秦蕙田在部時。共為商榷奏定。而適於此時乘間更易。章程冀以示從寬。而博衆譽。在拘迂無識如寶光。鼎輩。未必不謬相推許。以今年秋審為辦理獨佳。然使舒赫德援李宜青之事。比類返觀。如出一轍。其能不有覲顏面。為有識者所

鄙薄耶。執法之司。必以明允協中為是。而秋讞大典。刑部及九卿等。並宜詳悉折衷。不得稍存畸重畸輕之見。倘因此飭諭舒赫德等。遂不量案情。私心摩揣。或致有意從嚴。則是又自取罪戾。朕豈能更為輕恕哉。將此通諭九卿。及內外問刑衙門知之。○諭軍機大臣等。輔德奏查辦寧州還俗僧人盧秉剛一案。議將寺內田產撥出歸公。仍餘二百餘畝。給還養贍之處。辦理尚未允協。盧秉剛以還俗

僧人。占寺為室。娶妻生子。捐納職銜。移毀佛像鐘鼓。并將寺中田廬據為己有。實屬緇流中之匪類。若不示以重懲。則凡叢林住持。不守清規者。尤而效之。勢將何所底止。況寺內租穀。原為常住香火之資。住僧經營有年。積贏阡陌。仍係寺中餘息所出。並非伊披剃時攜帶私貲。自行置買者。又何必給令管業。以遂其擁貲自利之心乎。其摺內所請給與養贍田二百餘畝。著概行入官充公。并將盧秉

剛定擬發遣以示炯戒可將此傳諭輔德令其另擬具奏○兵部議准調任兩廣總督蘇昌奏稱廣東澄海一協額設副將一員中軍都司一員左右兩營守備各一員副將及左營守備駐防澄海縣城都司駐蓬州右營守備駐樟林寨堡由來已久但都司為副將中軍有兼轄兩營承上轉下之責今分駐蓬州離澄海三十里遇有事件往返耽延實多未便請將左營守備移駐蓬州都司調回澄城

各就原署駐劄兵馬錢糧向係兩營守備分管者統歸都司管理每年出洋以都司為上班隨巡副將為下班統巡兩營守備輪委一員為下班隨巡左營之東湖汛向撥右營弁兵船隻貼防即改歸右營管轄右營原防弁兵船隻撤回撥往大萊蕪礮臺汛防守其大萊蕪礮臺汛改歸右營管轄將左營原防弁兵船隻撥往沙汕頭礮臺防守該協額設馬步戰守兵一千四百二十二名請每營更定

額兵七百一十一名戰馬均勻分配又將左營多派外委把總一員調入右營改為外委千總其額設戰船外海左右營各五內河左營三右營二各就本營兵配駕巡查從之○是日駐蹕烏拉岱博勒齊爾大營○甲子上行圍○予改正黃旗蒙古都統廣成祭一次謚溫勤○是日駐蹕呼魯蘇台大營

大清高宗法天隆運至誠先覺體元立極敷文奮武孝慈神聖純皇帝實錄卷之七百十八

大清高宗法天隆運至誠先覺體元立極敷文奮武孝慈神聖純皇帝實錄卷之七百十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆二十九年甲申九月乙丑

上詣

皇太后行幄問安。○行圍。廣東巡撫明山疏

報。乾隆二十八年分雷廉二府屬開墾額內

荒蕪稅八頃有奇。廣潮肇雷四府屬額外荒

蕪稅四十七頃有奇。高州府茂名縣歸併神

電衛高州所墾復屯稅二十畝有奇。○貴州

巡撫圖勒炳阿疏報。乾隆二十八年分鎮遠

銅仁二府永豐黃平麻哈三州安南甕安天

柱三縣開墾田二百五十畝有奇。○是日駐

蹕塔哩雅圖大營。○丙寅。賜扈從王公大臣

及蒙古王公台吉兵丁等食。○原任太子太

保刑部尚書秦蕙田遺疏聞。得旨秦蕙田患

病溘逝。應得卹典。著察例具奏。該部知道。又

諭曰。尚書秦蕙田奉職西曹。恪勤素著。前以

患病告假。准其回籍就醫。尚冀痊可。茲聞在

途溘逝。深為軫惻。應得卹典。已勅部察例具

奏。著再加恩賞給銀一千兩。經理喪事。以示

優卹。○又諭刑部尚書員缺。著莊有恭補授。

朕於明春南巡。莊有恭辦理一切事宜。及浙

江海塘關係緊要。屆期均需面為咨度。可暫

留江蘇巡撫之任。俟迴鑾後。候旨來京供職。

現在刑部尚書事務。仍著劉綸兼署。○是日

駐蹕張三營行宮。○丁卯。

上詣

皇太后行宮問安。○吏部議覆。河南布政使佛

德奏稱邊省烟瘴苗疆等缺。或三年。或六年。

例得報滿。分別即陞。並加銜本省題陞。此等

人員。或係熟悉夷情。或因忍耐烟瘴。自當躬親其地。至年滿分別陞用。臣前官滇時。見滇省烟瘴各缺。除正印官尚少。差委外。其佐雜等官。或委署腹缺州縣者有之。或委辦廠務者有之。本缺另委員署理。代歷烟瘴之苦。而本員優處腹地。仍得按期推陞。於情理實未平允。請嗣後此等員缺。概停差委等語。查乾隆二十五年。原奉有邊疆要缺之員。不得調辦別項工程差務之諭旨。但恐日久因循。應

如所奏。通行各省。凡屬道府以下。佐雜以上。業經調補邊疆烟瘴要缺各員。必須親莅本任。扣足年限報滿。從之。○是日。駐蹕波羅河屯行宮。○戊辰。諭軍機大臣等。據熊學鵬奏。撥運淮鹽一事。接尹繼善札。稱淮南淮北各場。均無餘鹽。可撥等語。前尹繼善高恒接到兩次傳諭。先後覆奏。江都甘泉等縣與浙鹽口岸毗連。積有餘鹽。可以就近撥運十萬石。已札商該撫會辦。何以熊學鵬所奏。接到札

寄。與尹繼善奏摺。迥不相符。殊屬難解。且熊學鵬前已停止閩省撥濟。而忽接尹繼善淮鹽並無存餘之信。絕不慮及接濟之遲誤。猶待途巡會商。尤為前後矛盾。此時該撫想已赴蘇會辦。可詳悉傳諭尹繼善。熊學鵬等。令其將實在情由。據實即速覆奏。尋熊學鵬奏。鹽在場。而商未運者。謂之場鹽。其商人已運到店者。謂之岸鹽。查兩淮場鹽一出。埭舍。即入包垣。俱係場商儘買。並無官貯餘鹽。若浙

商一旦赴買。恐場商竈戶。暗擡價值。不惟買運維艱。亦且緩不濟急。尹繼善所謂無餘鹽。可撥者。乃謂在場無官貯之餘鹽。非無鹽也。今臣等已酌議。將江甘等五縣商人已納課過壩之鹽。即在揚截留四萬石。既非存場竈鹽。亦非到岸商鹽。乃商人已起運而未到岸者。實為省便。現經撥濟在案。再查浙省各場。現在苗土起旺。臣嚴督竭力趕煎。再加此淮鹽四萬石接濟。民食已足。不致遲誤。得旨。此

奏始明白矣。○又諭據嵩椿奏稱副都統成德辦理一切事件不遵成例揀選官員獨行已見復令跟班兵丁賒取什物不肯給價反加責打等語。西安將軍副都統與巡撫同城成德果有此事明德豈無聞見著將嵩椿摺鈔寄明德令其秉公查奏毋得袒庇。○是日駐蹕中闕行宮。○己巳。

上詣

皇太后行宮問安。○是日駐蹕避暑山莊至壬

申皆如之。○庚午浙江巡撫熊學鵬疏報乾隆二十八年分雲和景寧龍游三縣台州衛衢州所開墾田地五十項有奇。○辛未諭曰明山叅奏廣東糧驛道耀安承審王槩一案徇私改供等語耀安身為監司大員現又署理臬司遇有承審案件自宜秉公查辦乃敢將運同保成用印親供擅行刑改以符王槩游移狡卸之供深為有乖職守耀安著革職其徇私改供緣由交與該督一併審擬具奏

○諭軍機大臣等楊應琚奏原任杭州織造赫達色解到貿易綢緞內有徽顯二百餘疋請發回著落經手承辦人員賠補並嗣後各織造起發時俱令委員驗同包裹一摺所奏甚是哈薩克久經內屬貿易緞疋雖物料稍次亦不敢過為爭執但國家嘉惠遠人所給之物自必令其可以適用斷無一任承辦人員便宜減省致所入不償所出之理況前此傳諭不當再三該織造自當遵照辦理何得潦草塞責以致徽顯二百餘疋之多此項即著解員帶回令原辦人員按數賠補嗣後各織造所辦綢緞一面移明督撫令派出解員公同點驗封解其到甘時該督楊應琚係總匯之處務須詳悉查檢如驗有質地澆薄丈尺短少以及徽顯等弊該督即嚴行駁回著落承辦人員賠補並將公同點驗之員交部議處如驗係中途水漬擦損即著落解員賠補還項以專責成可將此傳諭各該督撫織

造等知之。○又諭曰。雅郎阿奏稱科布多屯田計各項籽種一千二百石。共收穫四千二百石等語。看來所收分數僅三分以上。即使土性寒冷耕種已經數載。何以歉收若此。著將實在情形及上年分數若干查明具奏。○又諭曰。楊應琚覆奏廠地孳生馬匹一摺。該督前因巴里坤廠地寬廣水草豐美。是以將安西等處存剩馬匹改撥巴里坤牧放。該處自立廠以來。節年孳生自應日就蕃庶。何以

綜計各處所報為數僅及萬匹。因思烏魯木齊貿易馬匹尚多。巴里坤廠地既佳。何不陸續趕赴牧養。此處應與綽克托等會商。至奏內所稱本標暨附近各營陸續撥用一節。亦未詳明。標營馬匹缺額。合例者准其買補。過多者另應著賠。斷無營馬數虧。徑將廠馬抵數之理。或者甘省向例如此。亦應詳悉聲明。此後何以廣為孳生。設法妥辦之處。著傳諭該督令其再行詳查覆奏。○軍機大臣等奏

查磬鍾山簽立木橋之外一帶。均有山場地畝。雖不在從前查禁交界之內。但附近行宮地處高阜。未便聽旗民開種。茲據熱河道勘報磬鍾山南及東北一帶山場地共二頃三十三畝。又桃園東西一帶地十八畝。紅橋西南一帶地七頃三十三畝。共地九頃八十四畝。應請亦歸於原禁簽樁之內。交該道查照向例。如數撥給。仍不時嚴行查察。毋許私種及樵採牧放。報聞。○壬申。喀什噶爾參贊大

臣納世通等奏。近據卡上報稱。霍罕有貿易回人七名前來。臣查看貨物甚少。恐係偵探信息。因令噶岱默特等設法詢問。據稱我伯克常向和濟雅特之丕色勒爭戰。今春正在領衆前往。因聞伊什罕伯克阿布都喇伊木通信事發。遂即撤回。再瑪爾噶朗有厄魯特五人脫逃。額爾德尼伯克即欲將餘人盡戮。恐內地聞信不果。但收其馬匹軍器。今霍罕所部俱傳說有大兵前來。又聞上年赫舍勒

巴什之伯克岱音沙報愛烏罕愛哈默特沙之讎取其九城今年又取兩城愛哈默特沙力甚窮乏等語臣等查噶岱默特遣親信回人偵探未歸今將詢得霍罕來人之言先行具奏報聞○癸酉

上奉

皇太后自避暑山莊迴鑾○詣

皇太后行宮問安○遣官祭

歷代帝王廟○遣官祭

都城隍之神○諭軍機大臣等據成德奏稱嵩椿揀選佐領防禦等缺不計其人年分深淺出兵次數惟將跟班章京及訓課伊子之人入選謹將已選未選人等行走年分効力之處繕單呈覽等語昨據嵩椿叅奏成德一摺已交明德查奏今覽成德所奏嵩椿亦甚屬不公著將成德摺單鈔寄明德令將嵩椿此等情節是否屬實及從前嵩椿叅劾成德之處一併查明秉公具奏○是日駐蹕喀喇

河屯行宮○甲戌諭朕明春恭奉

皇太后聖駕南巡著照從前之例於江浙二省冬兌漕糧內各截留十萬石在水陸駐蹕地方分廠平糶即令漕運總督及各該督撫妥協辦理該部遵諭速行○總管內務府大臣等議覆熱河總管永和等奏稱熱河園內殿宇十六處近年陸續添建二十二處原設千總八員副千總十四員兵三百三十二名實在不敷差遣請添設千總二員副千總四員兵六十名以資派委等語應如所奏交該總管等揀選充補一切俸餉地畝各事宜並令照例辦理又稱兵丁餉銀前於乾隆十二年奏准口內每名月支銀一兩口外支銀五錢各給養贍地六十畝在案近年以來口外物價漸與口內相仿食用不敷所有餉銀一項請照口內兵丁例一體賞給等語應否如所奏辦理之處出自天恩得旨看守熱河等處行宮兵丁著加恩每月賞給餉銀一兩餘依

議○是日駐蹕常山峪行宮○乙亥

上御行殿勾到秋審官犯服制及雲南貴州四川情實罪犯停決官犯三人服制斬犯二十一人貴州斬犯二人四川斬犯二人餘七十一人予勾○定總麻服屬人犯照期功停勾二次改緩例諭向來期功服制情實人犯內停勾二次者曾經降旨令大學士會同刑部省錄改緩其服係總麻案件因非由立決改監候者散入各省讞冊本非前旨所概雖勾

到時有以情節稍輕酌予免勾而積至數年竟未得與服重人犯一體改緩誠實不免向隅然既有此情節刑部堂官何不早奏覈定而於秋讞時遂將傷斃總麻尊長之杜廷順等三案遽行改緩是其意在因事沽名而於條例之應加酌劑者轉未通行籌議司憲之義謂何今日勾到四川冊內覈杜廷順情罪本不甚重因子免勾可見刑部前奏之謬誤祇以意中釣譽遂致節外生枝而於明刑弼

教之本意全未體會也朕辦理庶獄事無鉅細一秉虛公詳慎從不稍存成見嗣後遇此等總麻服屬人犯亦照期功以上例於停勾二次之後著大學士會同該部一體省覈改入緩決著為例並將此通諭中外知之○又諭宗室中封授王公顯爵者或由伊等先世建立豐功是以寵列勲階世襲罔替或由分屬天潢本支誼當出就外府錫之崇秩俾備屏藩而其中惟著有軍功之王公等當國家

開基定鼎時宣猷効績載在宗盟若不為之追闡成勞昭示來許將傳世滋久不惟伊等功績莫彰無以使奕世子孫觀感奮發競知鼓勵甚至支派遠近漸亦艱於稽考即如顯親王康親王簡親王信郡王順承郡王平郡王及軍功所封公等其酬庸世及中外固所共知然受封本末事具

實錄

國史簡牒尊藏秘府未便輕事披檢重以紀載

體例不越因事繫年。難免後先參互。於一王一公之事蹟。未經衷彙成編。其令大學士會同宗人府於

實錄

國史內。如顯親王以下。各王公等。凡立功之端。委傳派之親疎。一一悉心采訂。分繕成帙。進呈。以備觀覽。○是日。駐蹕兩間房行宮。○丙子。

孝慈高皇后忌辰。遣官祭

福陵。○

上詣

皇太后行宮問安。○諭軍機大臣等。明瑞等奏。自哈薩克來投之厄魯特等。稟稱霍罕額爾德尼伯克。與哈薩克阿布賚等。遣使往來。恐有勾通情事。似應潛遣間諜。令其彼此相猜。至喀什噶爾地近霍罕布魯特。已行文納世通等。偵探信息。即行知會等語。昨據納世通等。以額爾德尼伯克。往攻和濟雅特。丕色勒

聞有大兵來信。撤回游牧。已遣回人往探具奏。朕即謂伊等。不過聞阿布都喇伊木叛情。發覺倉卒守禦耳。斷無窺伺喀什噶爾之意。業經勅諭額爾德尼伯克。伊奉勅後。自必心安。明瑞等所聞。亦不可信。以為實。哈薩克阿布賚等。尚不能約束所部。何敢與霍罕合謀。藉令相合。又誰為主。而誰為僕哉。且伊犁駐兵甚多。亦復何慮。著傳諭明瑞等。不必潛遣間諜。祇以無事處之。稍有張皇。反啟內地厄魯特回人等疑懼。此時無論伊合謀與否。惟加意練兵。積穀為要。可將節次諭旨。錄寄明瑞等閱看。此後或別有見聞。仍即具奏。毋因此旨。遂一切置之不問也。○又諭曰。明瑞等以所得霍罕哈薩克勾通信息。知會納世通。朕前諭納世通之旨。已錄寄明瑞矣。此時納世通得明瑞知會。不必張皇辦理。再前所降額爾德尼伯克勅諭。命納世通派員齎往。但所遣必須幹練之員。若似挖穆齊圖之怯懦。

隱匿實情。則於事無益。著傳諭納世通將派何人齎勅前往。及回報情形若何。即行具奏。○又諭曰。明瑞等奏稱帶領第二起索倫兵之副總管署營總色爾默勒圖。查出兵丁內有將家口重報遺漏。及多領馬銀緣由。至烏里雅蘇台。告知將軍成衮扎布等審明。移咨黑龍江將軍。又令伊等至伊犁時。即行稟報。除將伊等浮支銀兩口糧徹出。分別應行補給。及交還庫項外。應將此等辦理率混之官。

兵分別斥責。行文將軍富僧阿。照例辦理等語。此次派往索倫兵。所報家口不符。及支給俸餉。種種錯繆。皆起程時辦理不善所致。著照明瑞等所奏行。但色爾默勒圖等既經告知成衮扎布。審明咨辦。自應即行具奏。似此應奏不奏。該將軍及叅贊大臣。所司何事。著傳諭申飭。○吏部議准。山西巡撫和其衷奏。稱長治縣西火鎮。距城九十里。民稠商聚。最易藏奸。乾隆九年。曾將虹梯關巡檢移駐該

鎮。近年烟戶日繁。五方雜處。巡檢微員。不足彈壓。應將現駐府城之長治縣縣丞。移西火鎮。其巡檢。仍移回虹梯關駐劄。又黎城縣吾兒峪巡檢。亦應移石城里。印信分別鑄給。從之。○是日。駐蹕要亭行宮。○丁丑。

上御行殿。勾到廣西廣東福建奉天朝鮮情實罪犯。停決廣東斬犯四人。福建斬犯一人。奉天斬犯一人。朝鮮絞犯十人。餘七十人。予勾。○諭曰。朝鮮國違禁越江偷打貂皮之朴厚

贊等十犯。部臣照該國王所咨奏請。即行正法。原屬罪所應得。第念向來此等罪犯。曾邀格外從寬。若遽前後參差。未免或有向隅之憾。是以定擬時。已有旨改為監候。今經秋讞。復諭刑部九卿一體令入緩決。然在中朝宇小之仁恩。雖不妨過厚。而於藩服越邊之例禁。又豈可稍弛。倘日久因循。該屬不知奉教。條而輕犯法。轉非加恩該國至意。嗣後遇有似此罪犯。應將首惡之人。明正典刑。以昭國

憲其屬在脅從者。仍令分別議緩。庶情法皆無偏任。此案不即照此處分者。以未經申諭於前。事同不教而殺。所不忍為耳。該國王其約束所屬。宣示朝章。俾知守分遠讐。共承惠澤。如復不悛。著令具在。朕不能為奸民曲法。屢宥也。刑部可即行文該國王知之。○又諭曰。吳達善奏。總兵田金玉。年逾七旬。舉動雖不至衰憊。精力已不能如前等語。總兵職司專聞。自不當以年老就衰。久戀巖疆之任。田金玉著准其原品休致。如伊自忖精力尚在。不甘廢棄。情願赴京。陛見亦聽其便。所有雲南楚姚鎮總兵員缺。著書敏補授。○諭軍機大臣等。顧鎡摺奏。新寧縣罷市一案。有千總向萬功嚴切曉諭。始行開鋪之語。甚屬非是。前據李勲奏到。該千總既不能彈壓於前。又復沿街步行懇求於後。怯懦無能至此。尚安能曉諭嚴切。該總兵欲將此事奏聞。自應據實入告。或以撫提諸臣已經辦理。即不另具

摺。朕亦豈必加之責備。似此含糊取巧伎倆。朕肯容其嘗試耶。顧鎡著傳旨申飭。旌表守正捐軀之山東東平州民張天貴妻田氏。○是日。駐蹕密雲縣行宮。○戊寅。孝敬憲皇后忌辰。遣官祭泰陵。○上詣皇太后行宮問安。○諭軍機大臣等。納世通等奏稱。據遣往霍罕偵探回人所告。與從前來投之厄魯特。及霍罕貿易回人之言相似。專候奉到勅諭。即派員外郎四十七藍翎侍衛官長保等齎往等語。此事伊等初奏時。朕即鑒及額爾德尼伯克。不過倉皇自守。何敢有窺伺之意。屢降諭旨甚明。納世通等何過於疑懼若此。至齎送勅諭。必擇明白信實。尚知自愛之人。四十七久歷外任。並未習熟蒙古風俗。亦托穆齊圖之流。豈能辦事。官長保性最怯懦。前進勅厄魯特時。曾經獲咎。遣伊同

往。徒為外藩所輕。舒常鄂蘭現俱在彼。何為不遣耶。著速傳諭納世通等。額爾德尼伯克。斷不敢來窺伺。惟謹遵朕旨。靜以鎮之。如四十七等業經起程。則已。若尚未。則派舒常前往。昨明瑞等奏。額爾德尼伯克與阿布賚通和。遣使已知。會納世通等語。想納世通等一聞此信。必至於張皇失措。並著傳旨申飭。毋得仍前疑懼。○又諭近因嵩椿成德互相計叅。已降旨將伊等之摺鈔寄明德查奏矣。茲

成德復叅奏嵩椿所叅之事。關係將軍者大。明德難以獨辦。現在阿桂正由四川起程前來。著將此摺鈔寄阿桂。令其前往西安會同明德將嵩椿成德互相叅奏事件。審明具奏。○戶部議覆。工部尚書署四川總督阿桂奏稱。敘州府雷波廳四鄉分居之土民阿麥等一百三十二戶。情願以乾隆二十八年為始。入冊納糧。應准照數徵收。從之。○廣東巡撫明山疏報。乾隆二十八年分潮肇廉三府屬

墾復遷移稅三項有奇。廣惠潮肇高羅嘉七府州屬額外水田稅七十一項有奇。又香山新寧海豐海陽饒平高要新興鶴山電白東安鎮平等十一縣報墾熟稅三十七項有奇。廣州府額外沙坦稅七十九項有奇。○補行江西省乾隆二十八年分大計。不謹官一員。罷軟官一員。年老官七員。有疾官四員。才力不及官三員。分別處分如例。○是日駐蹕髻髻山行宮。○是月御史吳綬詔奏近來府道

以上收准呈詞多批本州縣自行審詳。即別委他員。亦令原問官會審。其間難免冤抑。推折扶同。徇隱之弊。訟端既無由平。刁徒因之益熾。甚至脅眾肆橫。抗官玩法。種種事端。皆由此起。請勅下直省督撫。凡收准民詞。與本州縣有干涉者。即委該管道府覆審。其道府收准者。即吊取案卷。提集人証。親行訊究。如案內遇有檢驗查勘。應行差委等事。令其遴委賢員。不得仍會同原問官。庶冤枉易伸。而

刁風可息。得旨。所奏是該部議行。○大學士管兩江總督尹繼善奏。蘇常一帶處處豐稔。收成俱有九分十分不等。為十數年來未有得旨。覽奏欣慰。京畿亦為十數年未見之豐稔。誠堪慶幸。更切惕寅。○浙江巡撫熊學鵬奏。漕糧上關天庾。理宜乾圓潔淨。漕臣楊錫紱所奏米多潮潤者。一由小戶米少。半係吏胥鄉保包攬代納。串通家丁幕友暗地作奸。一由富紳大户交米數多。並不揀擇。甚有轉將中等之米攙和者。該州縣官又礙於情面。混收。臣現飭糧道金溶不時親往嚴查。臣更與布政使索琳留心訪拏究辦。批此人於此等處斷不能破情面。爾等應留心。索琳亦斷不至如彼。可交伊查察。又稱。臣更有請者。紳衿富戶。理應守分為小民表率。即有本身應行呈明事件。自當遵例具呈。乃因私事持帖干求地方官。實為把持鄉里之漸。請嗣後在籍紳衿富戶。無論完漕及他事。敢有持帖赴

地方官干謁求情。立即將所有職銜詳揭叅革。按其夤緣情事。照律定擬治罪。倘地方官有意交結紳衿富戶。聽情受囑。一併叅革。究擬得旨。不必定例。故不交部。總在汝實心辦理耳。○福建水師提督黃仕簡奏。謝調任廣東恩。得旨。聞福建文武官皆怨汝。故調用。非有他故。汝莫懼。更宜勉力可也。○湖北巡撫常鈞奏。黃梅廣濟等屬本年夏江水潰隄。現督飭分段修築。查該處隄工向係民修。按畝出夫。官為督率。本年廣濟一帶不當頂衝。尚易辦理。惟黃梅一邑。正當鄱陽湖水橫衝阻溜。大小潰口一十三處。共長五千餘丈。需工甚多。且該縣半係災區。出夫難免遲滯。現有紳士等誼篤桑梓。念被水之戶。艱於力作。情願出貲交官。量給工作人等飯食之費。計此工需費萬金。先繳一半。餘請籌款墊發。分年完納。應如所請。辦理。報聞。○河南巡撫阿思哈奏。祥符中牟陽武滎澤河陰汲縣新鄉河

內。濟源等九縣。水衝沙壓。柳占等項地九百五十一頃七十二畝。請豁銀三千八百九十兩有奇。米價銀三百一十兩有奇。報聞。○河東河道總督李宏奏。黃河北岸下北河廳屬之蘭陽汛耿家寨。上年秋汛。因對岸灘嘴愈長。埽前溜勢險急。因將對面河灘試挑引渠一道。長六百丈。冀其稍分溜勢。今秋汛兩次長水。大溜暢分入渠。衝刷得力。寬一百一二十丈。至一百五六十丈不等。深一丈四五六尺不等。正河漸窄。溜勢平緩。工程穩固。報聞。○大學士管陝甘總督楊應琚奏。本年冬應辦送烏魯木齊等處戶民。現已招有五百一十八戶。昨與原駐烏魯木齊大臣旌額理面商。羅克倫屯兵已撥六百名。遷移呼畢圖所遺兵房倉房。可以居住。又有遺地。可以接墾。現照例給予車輛口食。分五起派員送赴羅克倫安插。報聞。○工部尚書署四川總督阿桂。四川總督阿爾泰。提督岳鍾璜會奏。查綽

斯甲布九土司會攻金酋一案。屢奉諭旨。令臣等熟籌妥辦。竊以郎卡所恃。不過地險硯堅。然合計衆土司之力。較金川多至數倍。若果奮力攻擊。必可成功。是以番攻番。實為鎮靜辦理之善策。查九土司內。如巴旺。革布什咱。地小兵單。只可藉以牽制一面。沃日。不與金川接壤。又兵少力弱。雜谷之梭磨。松岡。卓克基。三部。地勢隔絕。與金川相通者。只有一路。進攻頗難。又黨壩一部。係雜谷土舍。於乾隆二十四年。始行分設土司。地小力微。逼近金川。屢被侵陵。勢難自立。惟綽斯甲布番部。其地勢兵力。堪稱金酋勁敵。且與金川連界之處甚多。進攻頗易。綽斯甲布與黨壩。如果各思努力。再加以小金川之衆。則金酋小醜。實有可圖。第攻守之勢既異。要須持之以久。方可使金酋疲敝。愚番只顧目前。必在隨時提撥酌加賞卹。以鼓其奮往。并於每歲金番種植收穫時。四面環攻。使之顧彼失此。常時

則惟相利而進。俾各土兵亦得休息。庶為有益。查前因川省餘茶壅滯。經原任督臣開泰奏准。借動鼓鑄餘息購買。運交打箭鑪松潘兩路變賣。所獲餘息。暫為夷務賞項之費。除用外。現有餘存。臣等酌議於明歲各部土兵進攻要緊之時。量給口食之費。並照現定賞格。或割獲首級耳記及陣亡帶傷者。均予賞卹。如有不敷。另於別項通融辦理。俟事定將餘茶一項多辦數年。亦可補苴。不至另籌正項。如此庶各部番兵可期得力。數年可望成功。至於番性無常。臨事機宜。難以豫定。臣阿爾泰、臣岳鍾璜悉心辦理。隨時據實奏聞。從之。○雲貴總督劉藻等奏。耿馬土目罕朝璣係土司罕國楷之姪。緣石牛廠徒周德惠等從中誣構。彼此結怨成仇。若仍令聚居耿馬。日久必滋事端。查例載土蠻犛獍應遷徙。係土司所轄者。發六百里之外營縣安插。罕朝璣應照例同家口遷徙省城。以杜後衅。得旨。

允行。

大清高宗法天隆運至誠先覺體元立極敷文奮武孝慈神聖純皇帝實錄卷之七百十九

大清高宗法天隆運至誠先覺體元立極敷文奮武孝慈神聖純皇帝實錄卷之七百二十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事務管理理刑部戶部三庫事務

世襲騎都尉軍功加十九級隨帶加二級又加二級 重慶內大臣戶部尚書鑲藍旗滿洲都統實功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申冬十月己卯朔享

太廟遣和親王弘晝恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○頒乾隆三十年時憲書

○是日駐蹕盤山行宮至癸未皆如之○庚

辰

上詣

皇太后行宮問安○諭刑部審訊賴宏典案內

書寫逆詞之錢忠奏請即行正法一摺於事

理輕重概置不問擬議尤屬乖謬賴宏典身

受朝命為一邑長官其名分迥非齊民可比

乃因行賄求陞目擊此等狂悖隱語漠然不

動於心居然付為契券其自干重辟固不待

言若錢忠不過一充當長隨之小人而其事

又本係朱文豫設成心為將來挾制之計撰

成此稿該犯不過聽從賴宏典照寫是錢忠

不過為生事過付之人其罪斷不至與賴宏

典同科君臣大義非所責於長隨小人之流

也該堂官等直行擬以立決且將其家屬斷

令給付功臣何至此乎不獨於明允之義失

之千里。是於朕前降有意從嚴自取罪戾之旨。豈亦未及寓目耶。舒赫德等如因前此既經訓飭。遂將案內續獲之犯。悉以立決處之。則是有心混淆。故為刺謬其詞。欲益顯前此賴宏典之定讞為過當耳。其心尚可問耶。又豈以朕巡幸行在。於此等重案定罪之摺。竟不為留心衡斷耶。著將該堂官交部嚴加議處。摺擲還。另行定擬具奏。○諭軍機大臣等。烏魯木齊所有遣犯甚多。自應嚴行約束。毋任脫逃滋事。從前旌額理在彼。尚能約束安靜。今更替回京。著傳諭伍彌泰。務循照旌額理所辦章程。加意約束。若少有疎懈。以致乘間逃走。滋生事端。惟於伍彌泰是問。併傳諭五福知之。○辛巳。吏部議覆方畧館奏。平定準噶爾方畧前編五十四卷告竣。所有收掌繙譯。校對。及謄錄供事。照例分別議敘。得旨。依議。其効力謄錄八名。俱照原奏。准其頂補。此項人員。乃該館奏明。經朕降旨准行之事。

該部何因復行議駁。著該堂官查明具奏。○又議准。浙江巡撫熊學鵬疏稱。台州府寧海縣亭旁地方。崇山峻嶺。村落林立。民風刁玩。最易藏奸。實屬緊要。今以台州府同知移駐該處。恐部選初任之員。未克勝任。請改為在外調補要缺。從之。○兵部議准。調任雲貴總督吳達善奏。稱雲南昭通。維西。廣南。鎮雄等營。副參遊都守等官。共十缺。原定邊俸三年。今苗獠安化。人烟稠密。未便仍以三年俸滿。即陞。均請改為五年報滿。其永順。普洱。元江等營。仍照舊例。三年報滿。從之。○壬午。諭據給事中瑋古泰查奏。盛京各衙門逾限事件。九十六案。請交部察議一摺。官司承辦公事。自當一遵例限完竣。以免稽延。但其中有逾限僅止一二日以上者。其情尚在可原。應酌量從寬。免其交部。其在五日以上者。為時較多。如積次增加。易成闡茸之漸。其咎自屬難辭。著交部照例察議。○癸未。

上御行殿。勾到陝西。湖廣。浙江。情實罪犯。停決。陝西斬犯一人。湖廣斬犯八人。餘七十五人。予勾。○諭曰。鄂寧前奏。所管漢軍本旗內。有總兵吳應銓等。俱身在旗籍。而令伊子出旗。為民。應將伊等治罪一摺。朕即交八旗大臣。議奏。原欲各旗一體畫一。將有似吳應銓等違例之人。通行查出治罪也。今八旗大臣。查出少卿秦烱等。俱係職官。曾經降旨。不准出旗之人。伊等竟設法鑽營。令伊伯叔子弟出

旗為民。則伊等之不願在旗。不問可知。前此垂念伊等身為大員。承受國恩日久。不便遽行出旗。是以特降諭旨。迨至議覆鄂寧摺奏。八旗大臣等。理應議令伊等照舊在旗。請旨議罪。方為允協。乃轉欲將伊等一概出旗。其名似以斥令出旗。即為治罪之法。其實直如伊等所願。為之准行矣。朕豈肯任其嘗試。朦混乎。八旗大臣等。倘暗受伊等干求。故意巧為辦理。即屬營私舞弊。朕若由此深究。恐伊

等難以任受。如實係不曉事理所致。則其糊塗尤為可笑。且八旗大臣中。或有尚可將此自諉者。至王進泰所司何事。而亦可以不知自解乎。現在查出秦烱之子秦廷璽等。俱著徹歸本旗。充當苦差行走。秦烱等並著交部治罪。其從前准令伊等出旗之該管都統。及此次議令伊等出旗之八旗漢軍都統。一併交部嚴加察議。○諭軍機大臣等。李宏奏。現在蜀山馬踏。二湖水勢。較之上年存水為小

等語。東省運河。全賴各湖水櫃收蓄充盈。以濟來春重運。今既水勢畧覺微弱。自應早為經理籌辦。李清時前任運河道。於東省河務。素為熟悉。目下節令已過霜降。南河並無緊要應辦之事。著傳諭高晉。於接到此旨時。即令李清時前往山東。協同河督李宏。巡撫崔應階。將東省河湖諸務。妥協商辦。仍回本任。將此諭令李宏。崔應階知之。尋奏臣崔應階前往衛河。面同李宏。暨運河道何燭。細察河

水情形。詳覈收蓄之次第。查東省運河。汶泗之水。冬間收入諸湖。為來春助濟。須河道深通。俾重運遄往無滯。其淤淺應挑處。李清時到濟日。臣等即與商辦。尅期興挑。又泗河之水。向年冬季。由金口壩達獨山湖。春間開放。臨河十八水口。出濟南陽以下之運。查濟寧以北。有馬場一湖。無水儲蓄。是以堅築金口壩小堰。截泗水以歸馬場湖。水勢充盈。來歲濟寧上下河道。可敷濟用。其獨山湖來源。尚

有鄒縣之白馬湖。查河尾淺窄。疏挑小溝數道。俾水勢暢入獨山湖。以資儲蓄。至汶河之水。因南旺熬壩。由永泰等五閘。分入蜀山馬踏二湖。馬踏湖水。較上年尺寸相等。蜀山湖水。較上年少尺餘。今歲熬壩之期。已早十日。湖中多收十日之水。重運自可敷用。查此湖為北運要需。存水愈多。運行愈得其濟。現將永泰等閘。進水引溝。挑挖寬深。以期汶水入湖之路。倍加暢利。又查分水口以南。有南旺

一湖。原係南運之水櫃。向來夏秋汶水盛大。洩入此湖。豫為儲蓄。今年伏秋汛內。汶水不大。進水無多。較往年少二尺餘寸。此時汶河熬壩無水可收。擬俟明春頭進糧船已過。二進未臨。長河無須用水之時。即將南旺上下之開河柳林二閘閉板。使汶水由關家大閘灌入南旺湖。以濟南運。李清時於初九日。仍回本任。得旨覽奏俱悉。○甲申。

上詣

皇太后行宮問安。○工部尚書署四川總督阿桂奏。通江縣知縣劉上台。於倫紀攸關重案。任意捏供。刪改。應依律杖流。得旨。這本內玩視民命之通江令劉上台。雖據該署督訊。無徇私受賄情事。定擬杖流。但阿桂不過署事。未免有意從寬。否則承審各官。有意化大為小。以欺阿桂。亦屬易事。此等關係倫常重案。身為縣令。定讞實其專責。乃不惟檢驗草率。偏聽誑言。甚至有意刪改供詞。幾令案內凌

遲斬絞重犯。因此漏網。其顛倒乖謬。豈尋常失出者可比。所擬實不足蔽辜。此本著駁回。令該督阿爾泰嚴審定擬具奏。○是日駐蹕大新莊行宮。○乙酉駐蹕三家店行宮。○丙戌。

上迴鑾奉

皇太后居暢春園。○詣

安佑宮行禮。○幸圓明園。○山東巡撫崔應階

奏。明歲鑾輅南巡。經臨東省。自德州至郟城。

奏奉

奉

計陸路八百二里。分為十三站。內行宮四大

營。九尖營二十二。迴鑾經由運河。自嶧縣至

德州。計水路一千一百五十六里。分為十四

站。除常家莊水營。歸江省沛縣承辦外。東省

共水營十三。及

皇太后自德州至袁樓水營一。以上各處水陸

尖營。橋梁道路。臣往來查勘。內如楊家莊大

營。地勢窪下。建設未甚妥協。查費縣之萬松

山。舊係尖營。臣即添建數椽。擬備座落。其中

尖營亦酌量遠近。擇勻一二處。又如禹城縣陳家莊大營。稍南有晏子祠。泰安縣魏家莊大營。左近有四賢祠。該處地勢平坦。俱加築圍牆一道。瓦房數椽。稍供宸憩。再德州運河西岸。新挑引河一道。

聖駕到德州。如循行舊路。則相隔重河。今恭擬往南里許。繞過引河。由運河浮橋。進恩泉行宮。得旨。知道了。屢有不必修建之旨。而汝竟已措辦。所謂成事不說耳。○丁亥。

上詣暢春園問

奏奉

奉

皇太后安。○諭軍機大臣等。常鈞等審奏。新寧縣民罷市一摺。擬議甚屬玩縱。此等刁徒。糾眾重案。關係人心風俗。該撫等只將主謀首犯陳德世。定以斬決。意在歸獄一人。顛預了事。何以靖奸頑而肅法紀。且此案釀成事端。全在署府王錫蕃並不親提審鞫。直以原告發交被告所致。摺內並不為置論。亦不過援照尋常吏議完結。事理深未允協。現在已命

阿永阿前往審理。俟奏到時再降諭旨。此摺著駁回。○戊子。諭曰。官保之正白旗蒙古副都統員缺。著書山署理。素誠之正藍旗漢軍副都統員缺。著秦璜署理。○己丑。諭前因嵩椿成德互相叅奏。經朕降旨。交明德審辦。嗣因成德又補叅嵩椿。經朕降旨。令阿桂赴西安。會同明德審明具奏。茲據明德查奏各事件。著會同阿桂一併審訊辦理。○以福建臺灣道余文儀為福建按察使。○庚寅。諭軍機大臣等。李景高奏請派伊前往雅爾効力一摺。該處與烏魯木齊俱係一體辦事。並非有進兵要務。何必告請前往。若駐劄大臣。皆如此陳奏。則烏魯木齊又將以何人辦事乎。可見伊並非實心願往。特因有留伊在烏魯木齊之旨。故以一奏塞責。且以見其有志奮勉耳。著傳旨申飭。○以盛京工部侍郎奉寬為內閣學士。兼禮部侍郎。○辛卯。上詣暢春園。問。

皇太后安。○詣

大高殿。

壽皇殿行禮。○還宮。○壬辰。諭據阿永阿等奏。新寧縣罷市案內。應行審究之署知府王錫蕃。乘間自縊一摺。殊堪駭異。前經降旨。凡係應行看守重犯。倘有疎虞。惟該督撫是問。原為案情重大。恐該犯易有畏罪自戕情事。若此案王錫蕃特以不行親審。轉發錯誤。按其應得處分。至重不過止於革職。何至輒爾輕生。然王錫蕃為案內應行質訊。關係緊要之人。該撫臬等正在承審之時。竟任其乘間自縊。漫無防範。則其平日於地方諸事。不能認真辦理。已可概見。喬光烈。何逢禧著交部嚴察議奏。○癸巳。

上御太和殿視朝。文武陞轉各官謝恩。○諭朕明春恭奉

皇太后安輿。巡幸江浙。扈從人等需用船隻。俱照每船水手。按名給與雇值。第念該船戶等

在途駕駛往還實為勞動其應行抵通船隻守候更不免需時若照常價每水手一名日給口食銀五分資給或未能充裕著加恩將所有扈從船隻按照水手每名日增給銀一分抵通船隻每名日增給銀三分該督撫等即於恩賞及上屆餘存銀兩內動支並責成司船之員稽查妥辦毋任胥役人等從中侵蝕俾船戶均霑實惠○吏部等部議覆盛京將軍舍圖肯奉天府府尹耀海等奏稱奉屬十二州縣已改滿員嗣後請將旗民徒罪以下事件責令各城就近辦理俟完結之日呈報將軍府尹查覈一面知照該管旗員約束至命盜重案及實犯軍流者旗人由州縣呈送盛京刑部辦理民人由州縣詳解府尹覆覈題咨又緝兇捕盜案件均應責歸民員但奉屬地方遼闊旗民雜處稽查非易各城旗員亦有地方之責倘有匪類不法等事即令查拏移送州縣辦理疎防失察照綠營武弁

例與文員一體查叅其州縣審案內遇有應訊旗人如尋常人犯仍移關旗員查提緊要重犯一面移會旗員查拏外應令各州縣徑行緝拏又興京熊岳通判分管界址應以鳳凰城岫巖適中之哨子河為界熊岳城界於蓋平復州之間而岫巖城亦與蓋平復州寧海等州縣連界經管向有定界應照舊辦理其興京所屬撫順地方距興京城一百八十里距承德縣僅八十里向歸承德經管應照從前原定界址以二道房身為界開原鐵嶺遼陽熊岳等處以興京鳳凰城岫巖三城向定旗界為準興京鳳凰二城向未設有專管文員命盜等案俱係旗員辦理今錦州通判移駐興京地方案件應均歸該通判辦理但興京距鳳凰城三百八十里鳳凰城至哨子河一百二十里熊岳距岫巖二百餘里岫巖至哨子河一百二十里道路遙遠往返需時誠恐屍軀易腐難以相驗劫奪案件更難

及時查拏。應仍責令二城城守尉就近相驗。嚴緝兇手。一面移知該通判審訊。其緝捕不力處分。應與通判等一體查議。均應如所請。從之。○調貴州巡撫圖勒炳阿。為湖南巡撫。以陝西布政使方世儒。為貴州巡撫。起革職。湖北巡撫宋邦綏。為陝西布政使。

高宗二十二年

十一月

大清高宗法天隆運至誠先覺體元立極敷文奮武孝慈神聖純皇帝實錄卷之七百二十

敕修

乾隆二十九年。甲申。十月。甲午。

大清高宗法天隆運至誠先覺體元立極敷文奮武孝慈神聖純皇帝實錄卷之七百二十一

監修總裁官總纂撰官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官總纂撰官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛總纂撰官太子少保工部尚書紀錄六次臣曹振鏞等奉

上御乾清門聽政。○諭曰。喬光烈由司道擢用巡撫。於地方糾眾罷市大案。不能彈壓。而案內應行審究之署府王錫蕃。又復漫無防範。以致自縊。其徇庇怯懦。深負朕簡任之恩。喬光烈著照部議革職。○又諭。昨因新寧縣罷市一案。該撫臬等。漫無防範。致應行質審之署知府王錫蕃。乘間自縊。該撫喬光烈。已照部議革職。按察使何逢僊。亦難辭咎。著來京。仍以吏部文選司郎中用。其湖南按察使員

缺著湯聘補授。○諭軍機大臣等。明瑞等奏稱。自京發往伊犁。令充步甲兵丁三十三名。請附於挈眷兵丁旗分。視其悔過自新者。將伊等餘丁一同挑選等語。此等發充步甲。俱係怙惡不悛之人。即給以錢糧。亦應減半。豈可與挈眷駐防兵丁一體全給。至伊等不能度日。乃其自取。有何可憫。且自京遣發一匪人。伊犁轉增一額缺。有是理乎。如此籌辦。則涼州。莊浪。遷移之兵。又當作何辦理。惟伊等子孫罪不相及。揀補餘丁。尚屬可行。著將現在步甲三十三名。俱給與一半錢糧。其餘丁准與舊兵一體挑補。明瑞著傳旨申飭。○刑部議准。陝西按察使秦勇均奏稱。重犯自盡。司獄官例應降調。其已上扭鎖者。即得免議。誠恐司獄各官。恃有免議之條。疎於防範。嗣後凌遲斬絞重犯。在獄自盡。不論已未扭鎖。一例處分。不得倖邀免議。應如所請。載入例冊遵行。從之。○伊犁將軍明瑞等奏。前因伊

犁以北。塔爾巴哈台等處。有越界游牧之哈薩克等。旋經該頭目阿布勒比斯。約束遷移。臣等又派員查逐。雖寒冬雪盛。不能無潛來度歲之人。但來年正月。烏魯木齊大臣。移駐雅爾。自可沿途巡查。至伊犁西南沙喇伯勒吹。塔拉斯。特穆爾圖諾爾等處。今年七月。聞有潛往之哈薩克等。因辦理挈眷官兵。無暇前往。惟於前來貿易人等。嚴加申飭。九月初。沙喇伯勒一路。有來投厄魯特等五十餘口。告稱。聞貿易人等。有大兵即來驅逐之信。哈薩克等晝夜遷移。我等始得脫出。觀此。則哈薩克等畏我兵威。不敢稍抗。但出入無常。亦非體制。今冬雖不必派兵。而來歲北邊駐兵後。其西邊一帶。或每年巡查一次。或大示懲創。務令絕跡。臣等再行相機辦理。報聞。○以光祿寺卿申甫。為大理寺卿。○以雲南布政使永泰。貴州布政使錢度對調。○旌表守正被戕之廣西武緣縣民蒙父離妻韋氏。○乙

未諭曰。莊有恭奏。武進縣奸民俞念行。捏造部文。徑行本籍。拏解期親兄嫂。查封家產一案。已降旨交三法司覈擬。所有留心密拏審究之知縣王祖肅。查辦妥協。其人可謂能事。有司官果能如此實力速辦。地方奸匪復何所容。邇來州縣等官。因朕留心加恩鼓勵。頗知奮勉。是堪嘉也。王祖肅著該督撫等於明歲南巡時。帶領引見。○諭軍機大臣等。納世通等奏稱。奉到頒給額爾德尼伯克勅諭。隨派四十七等。恭齋前往。又豫備賞給緞布茶葉等語。從前納世通奏報額爾德尼情形。意涉張皇。恒怯。朕屢經訓諭。至所派四十七等。皆未經練事體。恐貽外藩嘲笑。今又豫備賞賚。尤為非體。此次勅諭。係加恩免罪。派人前往。尚當嚴詞斥責。有何應行給賞之處。看來伊等從前相機辦理。不過空言。非真有成算也。設額爾德尼。果有侵擾內地之力。何不與阿布都喇伊木。協謀舉事。而坐視其敗露耶。

且伊果欲內侵。非賞賚所能止遏。如其無力。則斥責又豈能債事。辦理邊務大臣。豈可憤憤如此。納世通等著嚴加申飭。再挖穆齊圖等前往霍罕。於額爾德尼未曾出迎。匿不具報。此次四十七官長保至彼。額爾德尼若仍不知恭敬。伊等當作何面斥之處。亦應豫為指示。曾否如此辦理。並著據實奏聞。○又諭原任布政使栢琨。著賞給副都統職銜。前往喀什噶爾。協同納世通辦事。楊桑阿在彼年久。著即回京。○又諭。據阿桂等奏稱。嵩椿成德。係現任將軍副都統。現有應行審訊事件。請解任質審。嵩椿成德。俱著革職。交阿桂等審明具奏。○以理藩院尚書新柱。為西安將軍。以頭等護衛德克精額。為西安副都統。○丙申。上御懋勤殿。勾到江西安徽江蘇情實罪犯。停決。江西安斬犯一人。安徽江蘇絞犯各一人。餘八十七人。予勾。○諭曰。喬光烈現已革職。何

逢僖又降補來京。湖南僅有藩司赫昇額一人。又係新任。若照例將撫篆交該司護理。恐難兼顧。總督吳達善現在湖南會審新寧縣案件。所有湖南巡撫印務。即著吳達善暫行兼署。俟圖勒炳阿到任交代後。再赴湖北。其湖北巡撫王檢現已起身赴任。王檢到任後。常鈞即赴雲南新任。○諭軍機大臣等。本日勾到江蘇省情實案犯。有張大緒、胡盛二人。皆以身充書役。辦差滋事。獲罪第覈其情由。

輕重各自不同。如張大緒始則誑騙王長伶雇夫錢文。繼復勾串嚇詐。以致王長伶自刎。罪無可逭。業已予勾。其胡盛一犯。初因劉方理領錢遲繳。避匿不出。及至差追。又有婦女攔阻潑糞之事。且張氏死由自縊。該犯尚無逼賊肆惡情形。是以酌量免勾。此朕準情折獄。一秉虛公。出入毫無成見。皆中外問刑衙門所共曉。惟是前此兩次南巡。俱無此等情事。可見該二犯起釁之由。究因地方有司辦

理差務。不能嚴密防範所致。封疆大吏。不可不引為前鑒者。明歲南巡在即。該督撫等。自當體朕嘉惠元元至意。一切詳慎妥辦。特恐所屬吏胥衆多。倘董戒不周。稍有藉名滋擾之處。在伊等罪由自取。固惟執法從事。而督撫大臣。不知實心飭屬彈壓。使蠹猾之徒。復萌故智。累及閭閻。又豈旬宣德意。敬慎奉公之道乎。將此傳諭尹繼善。莊有恭知之。○又諭。近因納世通辦理霍罕事務。殊乖體制。已

屢加訓示。因思喀什噶爾回人。應照蒙古情形辦理。栢琨熟習蒙古語。著賞給副都統銜。前往協辦。此特因邊陲要地。多一人則有所商榷。栢琨至彼。納世通固不當存推諉之見。栢琨亦不得以曾奉特遣。遂任意自專。除面諭栢琨外。仍傳諭納世通。務期和衷集事。辦理盡善。則伊二人之功。不善。亦伊二人之咎。若稍存彼我之見。則為回人譏笑矣。至奏事列名。仍著納世通在前。○以署戶部尚書託

恩多。為理藩院尚書。○丁酉。吏部等部議准。山西巡撫和其衷奏稱。歸化城通判。為分辦蒙古民事而設。但既有道員同知。儘可兼理。請將該通判裁汰。其蒙古民人事件。悉併歸化城同知管理。其餘清和。托薩。四通判。悉應仍舊。惟將承辦事務。徑報歸綏道。覈明移司。無庸另扣同知。覈轉限期。從之。○以散秩大臣楊廷璋。為正紅旗漢軍都統。○以翰林院侍讀張曾敝。充日講起居注官。○以故奉恩

將軍慶康子瑞。凌襲職。○戊戌。諭軍機大臣等。崔應階前奏。該省魏家莊大營。有四賢祠。陳家莊有晏子祠。其建祠時代始末。及諸賢世代事蹟。并費縣之萬松山。有無故實可稽。著即確查詳悉具奏。○以翰林院侍講周升桓。署日講起居注官。○以福建福州協副將富森布。為汀州鎮總兵。○撫卹湖北漢陽漢川。沔陽。文泉。黃梅。廣濟。監利。七州縣。武昌。武左。沔陽。蘄州。荊州。五衛。水災貧民。○己亥。

上御懋勤殿。勾到河南山東情實罪犯。停決山東斬犯五人。餘七十人。予勾。○諭曰。阿思哈奏。拏獲兇盜王鎗木扎等。審明定擬一摺。已交法司覈擬。所有密緝嚴拏之祥符縣知縣。席邑。滑縣知縣。謝寶樹。將積年惡匪。剋期就獲。尚屬能事之員。不但前此失察職名。應行免議。且應酌量獎勵。俾凡為民牧者。知所激勸。席邑。謝寶樹。著該部行文調取來京引見。候朕降旨。○諭軍機大臣等。甘省卑蘭等被

旱州縣。前經降旨蠲免正賦。並令該督等。督同地方官。實力撫綏。自當率屬遵照。妥協辦理。何以遲延至今。未見摺奏。及此殊為疎漏。朕念此等災黎。目下雖已優加存恤。而明春青黃不接之時。自應加恩展賑。第該省籌辦米糧維艱。率由陝省購運接濟。難免拮据。若於此時。現辦賑務。即為酌量銀米兼發。豫留餘米。以待將來加賑應用之資。擘畫庶為允協。該督何未思及此也。除展賑月分。俟新春

頒發恩旨外。著先傳諭楊應琚。令明悉此意。並將現在督辦情形。及所用糧石。作何前後通盤籌議之處。一併詳悉速奏。尋奏。七月後。疊獲甘霖。佈種秋禾。尚稱中稔。其夏禾被旱。與夏秋被雹水災各屬。應需賑給糧石。經臣奏明。於陝省撥運十六萬石。本省撥運二十餘萬石。再於各州縣採買四十餘萬石。統計可得七十餘萬石。初賑全給折銀。加賑銀米兼散。內夏禾被旱各屬。需加賑十八萬餘石。夏秋被雹水等屬。亦需加賑十餘萬石。約尚餘糧四十餘萬石。堪備來春展賑。暨出借籽種。現在督辦情形。及前後通盤籌議。均與諭旨相符。報聞。○命內閣學士奉寬。在尚書房行走。○庚子。

上詣暢春園。問

皇太后安。○幸圓明園。○諭據常鈞奏。監利縣孫家月隄工程。例應民修。今因該處濱江被水。民力未免拮据。籲請自修三分。暫行借帑。

七分。按三年帶徵還項等語。此等隄工。雖向係民修之項。但今年江湖驟漲。該處現在尚加賑恤。閭閻物力維艱。深為軫念。所有現請借銀一萬二千兩。加恩免其帶徵歸款。著在罰修隄費等項內動支。倘罰項不敷。即動撥正項亦可。○又諭。朕明春恭奉

皇太后安輿。巡幸江浙。於正月初九日啟鑾。所有一應事宜。著各該衙門照例豫備。○辛丑。諭軍機大臣等。山東巡撫。向來有歲進牡丹

之例。此等花卉。京師皆能蒔植。何必遠道進獻。嗣後著停止。可傳諭崔應階知之。○旌表守正捐軀之浙江西安縣民杜邦慶妻邵氏。

○壬寅。

上詣暢春園。問

皇太后安。○還宮。○賑卹江蘇上元。江寧句容。江浦。六合。海州等六州縣被災貧民。蠲緩本年漕糧漕項。各有差。○癸卯。諭軍機大臣等。巴里坤現在移駐總兵。俟駐定時。著鐘音回

京富明安既前往該處未久著調赴葉爾羌辦事舒泰著往雅爾更換訥蘇肯回京○軍機大臣等議覆大學士管陝甘總督楊應琚等議奏烏魯木齊總兵移駐巴里坤應行裁撤大臣官兵各事宜○一巴里坤原設提標中左右三營官兵今改為鎮標應聽該總兵管轄其由各標營派往辦差人員應請撤回原營○一巴里坤現無駝隻惟餘馬四百五十餘匹應用軍務文案悉交該總兵接管查駐劄大臣既撤馬匹等項應聽該總兵管理其庫貯軍械屯田軍臺効力贖罪人員遣犯等事均照原定章程辦理○一巴里坤原設滿漢檔房署筆帖式六名書役十二名請各留二名俟營伍字識熟習後再裁○一烏魯木齊總兵既經移駐其印信應換給鎮守巴里坤等處總兵之印字樣中軍遊擊關防亦一體更換以昭信守從之○以故鎮國將軍謨雲子崇敬襲封三等輔國將軍○甲辰

上御懋勤殿勾到山西直隸情實罪犯停決山西絞犯一人直隸斬犯一人絞犯二人餘五十七人予勾○諭刑部所進情實官犯本內將齊凌扎布出兵得功及雯基曾祖陣亡之處照例入於情實冊內聲敘甚屬非是齊凌扎布之祖父從前若有陣亡者朕不得而知今伊本身之事則西陲用兵始末朕日夜籌畫何事朕不熟悉又豈待部中按例問之該旗該旗按例咨達部中部中又代為按例聲敘乎况聲敘者祇應陣亡之子孫非指本身即例亦不合也且舒赫德獨非在軍前辦事歸而又在軍機行走之人乎其知齊凌扎布之事應比該旗大臣為尤詳何待咨問甚可笑也若夫齊凌扎布之在和闐時曾與噶布舒各守一城乃遇逆回搶刦不能力行拒守遽棄城而出視噶布舒之堅持不去者豈可同日而語使律以守土死綏之義不特無功且當有罪特原其兵力本單是以不復深加

責備。均從在事優敘。此事在他人或未稔悉。若舒赫德亦豈能以不知自解乎。即以犯人祖父陣亡。例當聲敘而言。其中情罪亦各自不同。如存德以鬪殺之案。本無謀故別情。故歷年秋審。諒其祖父陣亡之勞。未予勾決。至震基以知府侵稅。數至萬餘。若竟以先世陣亡倖免。又何以處同案無可聲敘之書敏乎。國家縱有原功免死之條。亦惟先論其犯案本非重大。特貸其子孫之一死則可。脫以其

祖父一經陣亡。而凡屬後裔。均可世世屈法從事。是以褒忠之過。適為誘人犯法之階矣。且該犯即與聲敘之例允符。亦當由部臣咨查事蹟。列入本後。候朕定奪。設因該犯子孫具呈懇求。即為代奏。其別無親屬申訴之犯。又將任其呈漏可乎。於事體亦深為未協。再綠營將弁中。有曾經効命疆場。如豆斌。高天喜等。為國宣勞。其功既有足嘉。朝廷初無歧視。子孫遇有罪犯。非常赦所不原。亦當並蒙

矜恤。今此例但行於八旗。亦非一視同仁之意也。嗣後遇有此等罪犯。在八旗。則由刑部先咨本旗及兵部。確查事蹟。在外綠旗。則由督撫於審擬定案之始。查明該犯祖父陣亡事實。列入秋審冊內。以憑覈定。著該部分晰規條。一一定議具奏。並將此宣諭各旗。及內外問刑衙門知之。○定離任官員督撫注考例。諭前經降旨。各省離任候補之員。有因前任案件呈誤降調者。令原隸之督撫。出具考

語。送部引見。但此等人員。離任事故不同。多有遲至二三年及數年後。始行請咨赴部。其原隸上司。早經更易代任者。又未悉其賢否。何從懸擬考覈。蓋由傳諭之後。部臣未經分晰條例。殊多隔礙。嗣後著於該員等甫經請咨回籍時。該督撫將該員居官如何。出具切實考語。即行咨明本籍督撫存案。俟例應引見時。徑由本籍督撫查照原咨考語。敘入文內。送部。無庸再赴原隸上司衙門請咨。注考

以昭畫一。著為令。○四川總督阿爾泰等奏九土司會攻金川情形。查綽斯甲布一路進攻穆康寨。儒錫寨。日旁後山寨。攻克金川水磨九座。綽斯甲布兵亡失三十名。丹壩一路同三雜谷土兵。搶金川凱立葉牛廠。博迪喇嘛寺等處。殲殺金蠻甚多。丹壩兵傷損二十餘名。小金川一路。在鄂碩覺木達關。多噶爾等處。捉獲男婦數名口。并騾馬牛隻等項。土兵帶傷五名。革布什咱一路。至郭察地方打仗。傷土目一名。土兵五名。臣等酌量給賞。並諭各委員。駕馭鼓舞。設法進攻。又據各路稟報。金川番民斯達克塔爾。磋摩。兩戶男婦十五名口。及班第母子二人。逃投小金川。阿咱納塔爾等男婦三名口。逃投丹壩。扎斯嘉等男婦三名口。逃投綽斯甲布。詰問伊等情形。僉云。金川年成荒歉。各處添修碉卡。日夜防守。番民窮苦。供詞約畧相同。臣等飭令土司。將逃番安置。寫遠之處。以防其潛通信息。如

有空閒田地。酌給安插。使番衆聞知。咸思遠害投生。以廣招徠之路。報聞。○賑卹安徽懷寧。桐城。太湖。宿松。望江。貴池。青陽。銅陵。東流。當塗。蕪湖。繁昌。無為。廬江。巢縣。和州。安慶。廬州。建陽等十九州縣。衛水災貧民。蠲緩新舊漕糧。漕項各有差。○旌表守正捐軀之廣東東莞縣民李全新女李氏。○乙巳。禮部奏。皇太后萬壽聖節。慶賀禮儀。得旨。是。照例行禮。奉

皇太后懿旨。今年停止筵宴。○命協辦大學士陳宏謀在紫禁城內騎馬。○命少詹事汪廷璣。侍讀學士劉星煒。俱在尚書房行走。○丁未。

上詣

奉先殿。

壽皇殿行禮。○命修撰王杰。提督福建學政。○旌表守正被戕之歸化城民張環妻白氏。○是月。直隸總督方觀承奏。直屬佈種秋麥之

地。牧羊在所甚忌。民間遇羊販經過。皆相率守望。而羊販則以麥苗肥羊。羣驅於京南一帶。秋麥最多之地。名為牧放荒草。距村稍遠。即潛驅麥田。恣食為害。遇有村民攔阻。即羣起攢毆。近如宛平。獻縣。冀州。屢有羊販毆斃村民之案。雖俱嚴拏律抵。但事過玩生。若不明立禁防。終恐難除擾害。應請嗣後近京近口本處民人。所販無多者。聽其隨宜牧放。如係外來羊販。千百為羣。恣令赴津屬荒窪草地。其有驅赴良涿。固霸等處。沿途營汛。即行阻回。並不許私帶繩鞭。鎚棍等械。倘敢故違。經營汛查出。或村民首報。即嚴加懲治。庶有衛農息事之益。得旨。甚是。依議速行。○陝甘總督楊應琚奏。前奉恩旨。招募緣邊瘠土民人。遷移烏嚕木齊等處。臣於肅州并張掖縣。共招有五百一十八戶。敦煌縣招有一百九十戶。俱於十月內料理起程。一面移咨烏嚕木齊大臣。料理安插。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之七百二十一

大清高宗法天隆運至誠先覺體元立極敷文奮武孝慈神聖純皇帝實錄卷之七百二十二

監修總裁官總纂講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官總纂講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛總纂講官太子少保工部尚書紀錄六次臣曹振鏞等奉

敕修

乾隆二十九年甲申十一月戊申朔軍機大

臣等議覆御史曹學閔奏稱從前纂修大清一統志於乾隆八年告成久已頒行海內近年來平定準噶爾及回部拓地二萬餘里實為振古未有之豐功前命廷臣纂修西域圖志並令欽天監臣前往測量各部經緯地度增入輿圖惟一統志尚未議及增修請飭儒臣查照體例將西域新疆敬謹增入再查一統志自成書以後迄今又二十餘年各省府廳州縣添設裁併多有不同亦應查照新定

之制逐一刊改等語查一統志自直隸各省而外外藩屬國五十有七朝貢之國三十有一凡版圖所隸無不載入我

皇上戡定西域收準夷之疆索輯回部之版章特命將軍大臣分部駐守一切制度章程與內地省分無異該御史所奏將西域新疆增入一統志以昭

聖朝一統無外之盛自屬可行至臣等奉飭所纂之西域圖志分野疆域風俗山川等類無不備具請即將一統志所應載者按類擇取增入志末以成全書再一統志甘肅部內之安西靖逆二廳即今西域圖志之安西府朝貢諸國內之葉爾欽即今西域圖志之葉爾羌他如哈密吐魯番二處兩書互見將來增纂時應於各該處發明申說其從前已經載入處俱請無庸刪裁以致更換全書但西域圖志須俟現在所纂之同文志告竣後再行增改而方畧一書善後事宜各條志內亦有

應行採用者。統俟方畧全編告成時。再行辦理。至各省府廳州縣。或奉旨更定。或經地方大吏陳奏。添設裁併。在所時有。而一統志於康熙年間開館纂輯。乾隆八年始行告竣。至今甫及二十餘載。若此時輕議重修。統行刊改。一二年後。地方情形不同。即有添併。又當隨時刊改。未免過於煩瑣。該御史所請刊改之處。應無庸議。諭曰。御史曹學閔奏。西域新疆。請增入一統志。並志成後。各省添設裁併。府廳州縣。詳悉續修。刊改一摺。軍機大臣議。覆俟方畧及西域圖志各書告成後。再行編輯。第念一統志自纂修竣事以來。迄今又二十餘載。不獨郡邑增汰沿革隨時。理宜一一彙訂。且其中紀載體例。徵引詳畧。亦多未協。其尤甚者。順天人物門內。竟將國朝諸王載入。於事理更屬紕繆。諸王事蹟。自載八旗通志。原不得與隸籍京圻者同日而道。況八旗大臣等功紀太常者。則應見昭忠賢良諸祠。

其在直省宣猷著績者。又有各省名宦可入。今乃援親藩以淆地籍。實為擬不於倫。義甚無謂。若其他考稽失實。與凡挂漏冗複者。諒均在所不免。亟應重加纂輯。以成全書。但前此修志之初。必待移取各省通志而後從事。以致曠日持久。艱於集事。此時特就已成之書。酌加釐覈。即新疆幅員遼濶。而一切事實。又有西域圖志及同文志諸書。為之藍本。館臣採撮排撰。實為事半功倍。可即令方畧館按照各條。釐訂纂輯。一俟纂出稿本。悉照續文獻通考例。隨繕隨進。候朕裁定。所有一切應行規條。著軍機大臣詳議具奏。尋奏查順天府所載諸王及八旗大臣等事蹟。均載八旗通志。自無庸再行編入。其有功業顯著者。另於各省名宦內編纂。至添設裁併之府廳州縣。所有山川田賦人物各門。悉照現在添併各處。逐一分載。至西域新疆拓地二萬餘里。除新設安西一府及哈密巴里坤烏魯木

齊設有道府州縣提督總兵等官應即附入甘肅省內其伊犁葉爾羌和闐等處現有總管將軍及辦事大臣駐劄者亦與內地無殊應將西域新疆另纂在甘肅之後至哈薩克布魯特巴達克山愛烏罕等部俱照外藩屬國之例編輯統俟平定準噶爾方畧及西域圖志同文志等書告成後查照一統志凡例詳悉考訂釐正繕寫進呈從之○予故刑部尚書秦蕙田祭葬如例謚文恭○己酉

上御乾清門聽政○陝西巡撫明德等奏沙爾圖違例放債坐扣錢糧於兵丁生計大有關係又囑伊戚協領雅爾哈實緣無忌實屬營私藐法除將沙爾圖附入嵩椿成德案內照例治罪外再將伊家產查抄入官得旨所辦甚當但何必入官著賞與兵丁○以原任禮部侍郎謝溶生為光祿寺卿○庚戌諭據富僧阿奏稱發到黑龍江給與旗人為奴人犯所有隨帶妻子部文內止稱將本犯賞給兵

丁為奴並無一併為奴字樣是以未將伊等妻子辦理為奴俱聽另居度日現在伊等妻子並無管束養育之人不但易致為匪即伊等之夫牽連室家於各該主家亦不能安心服役請將現在發到並嗣後有原主將妻子一併送部發遣者俱給兵丁為奴嚴加管束不致滋生事端等語所奏是此項發遣旗人家奴俱係不肖匪徒既經發遣賞給兵丁為奴其妻子若無人管束聽其另居於理不合

該部不過拘泥倉遣與不倉遣之條耳著照富僧阿所奏除將現在發到為奴之妻子一併給與原賞之人為奴外嗣後旗人發遣家奴如有同妻子一併送部發遣者俱著一體賞給兵丁為奴著為令○都察院奏十月十七日帶領科道引見漕差述旨錯誤請交部察議得旨前日係面降清字諭旨漢堂官未能明晰不必交部勒爾森實麟著交部察議○大學士管兩江總督尹繼善奏山東萬年

倉大營。至徐州。道路泥濘難行。請

聖駕閱河時。仍由韓莊大營起岸。往徐州。似覺
妥便。報聞。○辛亥。諭曰。阿思哈題參縱克捏
報昏庸不職之商城令璋庫一本。請將代求
免叅之南汝道張冲之一併交部議處。昨熊
學鵬有請嚴叅劾屬員。司道代求寬免之處
分一摺。已降旨交部議行。今阿思哈本內。適
將代求免叅之道員附叅。可見此等相沿積
習。由來已久。實為各省所時有。為督撫者。苟
能持已公正。嚴切申禁。不肯稍事姑容。則司
道知所儆懼。望風而戢。更何敢畧為瞻徇。若
徒定處分條例。而封疆大吏。視為奉行故事。
惟欲博寬厚之名。以邀屬僚之譽。則市恩姑
息。習為固然。在代求寬免者。比比皆是。而聽
從徇隱。莫由上聞。又安望積習之能革除。是
司道之瞻徇與否。所關於該督撫者。正非淺
鮮矣。此案知縣璋庫著革職。與案內有名人
犯。交該撫一併嚴審定擬具奏。該道張冲之

既為監司大員。不能覺察於前。又復徇庇於
後。飾說求寬。兩次稟懇。非尋常瞻徇者可比。
若僅照例議處。不足以示炯戒。著即革職。來
京候旨。併將此通諭各該督撫知之。○以科
布多叅贊大臣扎拉豐阿為正白旗滿洲副
都統。西藏辦事大臣傅景為正白旗漢軍副
都統。○壬子。賑卹甘肅皋蘭金縣渭源靖遠
平涼固原鹽茶張掖山丹莊浪武威永昌鎮
番古浪平番中衛西寧紅水縣。沙泥州判。
東樂縣丞等二十廳州縣旱災貧民。緩徵新
舊額糧有差。○癸丑。戶部奏現屆比丁之年。
八旗內有現食錢糧。應俟出缺裁汰之人。或
因在軍營著有勞績。或因技藝出眾。荷蒙特
恩。作為另戶人等。除伊父本身子嗣及親兄
弟歸入另戶丁冊造報外。其親祖及親伯叔
應否一體作為另戶。恭候欽定。得旨。伊等之
父及親兄弟。准其作為另戶。○塔爾巴哈台
叅贊大臣綽克托等奏。上年九月。臣旌額理

等請將羅克倫屯田兵移駐瑚圖畢先蓋營房一千二百間。即趨築城垣。隨派叅將吳士勝於十一月砍伐蘆葦木植。輓運口糧籽種。本年三月興工。蓋造營房。臣等續奏請將吳士勝派往塔爾巴哈台辦理城工。又派出原任主事伏魔保協辦瑚圖畢城工。至九月二十九日。瑚圖畢城垣門樓倉庫及哈薩克貿易館舍公署營房俱已告竣。得旨吳士勝伏魔保俱著交部議叙。尋欽定瑚圖畢城名曰

景化城。門東曰熙景。西曰寶成。南曰阜薰。北曰溥信。○甲寅遣官祭

先醫之神。

上御懋勤殿。勾到朝審情實罪犯。停決斬犯七人。絞犯十一人。餘五十人予勾。○諭曰。阿永阿等審擬湖南新寧縣罷市一案。內有喬光烈。將陽會菴等在省具控一節。徑行刪除。尤為謬戾荒唐等語。前喬光烈具奏此案之初。摺內語多含糊。意存迴護。朕知其不勝封疆

之任。是以降旨革職。然彼時並不知其竟有刪改情節。如阿永阿等所稱。實出情理之外。也可見身為大臣者。天良一昧。冥冥中即已陰褫其魄。而朕之予以斥革。自有不期然而然者。喬光烈甫經拔擢。而器小易盈。輒爾甘心欺罔。致干罪譴。凡為臣子者。可不知所儆乎。本案已交法司定擬。喬光烈何逢僖均已降革處分外。其餘附叅各員。俱照所請。交部分別議處。○乙卯。

上詣暢春園。問

皇太后安。○幸圓明園。○諭軍機大臣等。明瑞等奏稱。賞給副將職銜之叅將馬虎。辦理屯田事務。所收糧石較去歲為多。公茂薩辦理回人諸務。及協助城工木植。均屬奮勉等語。馬虎著加恩。即以副將用。茂薩著賞緞六疋。○又諭曰。明瑞奏。本年綠旗兵丁屯田。較去年多收糧四百餘石等語。官員著加恩。交部議敘。兵丁等分別賞給鹽菜銀兩。○又諭曰。

明瑞等以原任吉林將軍薩喇善効力三年屆滿具奏甚屬非是薩喇善獲罪發往即逗遛不前自應少為留待明瑞何以代為陳奏嗣後武職一品大臣文職二品以上大臣獲罪發往伊犁葉爾羌等處効力自贖者三年屆滿不必具奏其武職二品以下文職三品以下人員俟三年期滿之時仍照例請旨○兵部議覆調任湖北巡撫常鈞奏稱湖北應山縣北距河南信陽州為楚豫門戶向有東

西兩路西路由平靖關經應山安陸雲夢孝感等縣至楊店村為驛路通衢東路由武勝關經廣水小河溪等處至楊店村係商賈捷徑彙算程途較西路實近百里應付差使請改由東路護送餉鞘仍由西路又武昌省城至江南江西等省驛路由江夏經黃岡縣至蘄水之巴水驛地勢窪下往來差使用船裝載多致稽遲請改由江夏之長山鋪經武昌縣之華容店黃岡縣之三江口渡江至蘄水

縣之巴水驛歸入正路均應如所請從之○伊犁將軍明瑞等奏臣等欽奉諭旨伍彌泰李景高仍留烏魯木齊辦事或一處駐劄或分駐庫爾喀喇烏蘇之處交臣等議奏查庫爾喀喇烏蘇等三屯駐兵八百名分之則每屯止二百餘名俱有文武員弁管轄若仍留大臣駐劄未免煩費仍令伍彌泰等在烏魯木齊同五福辦事如有巡查事務三人更替其三屯錢糧俱歸烏魯木齊管理似有裨益

且晶河駐劄侍衛額爾德蒙額未經派調若以之總管三屯如事關重大先報伊犁其尋常案件就近報知烏魯木齊亦足以資管轄商之綽克托等意見相同如蒙俞允則庫爾喀喇烏蘇等處辦事人員亦可酌留協助從之○青海辦事大臣七十五奏去年臣至西寧防範番匪會同青海扎薩克王等定議將沙拉圖尚那克等處派兵防堵出派王索諾木丹津袁楚克達什貝勒丹巴策凌貝子那

木扎勒策凌。沙克都爾扎布。扎薩克台吉薩喇等。管轄兵丁。本年三月。郭羅克番匪。將阿哩克牲畜掠去。被守卡兵截住。殺死多人。生擒二十餘名。解送西寧。奏請正法。數月以來。並無賊匪滋擾。臣伏思防範郭羅克。原為保護青海游牧。乃衆扎薩克之事。今出派索諾木丹津等六扎薩克。自今年二月起。至明年二月止。分為三班。輪流坐卡。若明年仍派伊等。不但差使不均。而伊等坐卡辦事。一切不

無需費。青海蒙古。並無徭役。仰受天恩。習於安逸。應一併輪派學習。臣與各扎薩克會議。明年防範番匪。除索諾木丹津。袞楚克達什。丹巴策凌等。呈請情願再留一年外。仍應出派三扎薩克。臣於青海扎薩克內。將諳悉郭羅克情性。可以管轄兵丁之扎薩克。公索諾木巴勒濟。那罕。塔爾巴。扎薩克台吉貢策策凌等。出派。已嚴飭伊等。遵照原議。各按佐領多寡。出派兵丁。於明年二月起。輪班遣往。加

意防範。俟二三年後。四川督臣。將郭羅克查辦肅清。再將設卡兵撤回。報聞。〇丙辰。撫卹江西德化縣水災貧民。〇豁免湖南武岡。攸縣。被災田畝額徵銀米。并借給籽種。〇賑卹甘肅河州。渭源。安定。清水。靜寧。平涼。靈臺。撫彝。張掖。山丹。平番。巴燕戎格。西寧。碾伯。高臺等。十五廳州縣。被風雹水災貧民。緩徵本年額糧。及各年籽種口糧有差。〇丁巳。

上詣暢春園。問

皇太后安。〇幸南苑。行圍。〇調廣東高廉鎮總兵裴鏡。為雷瓊鎮總兵。以廣西新太協副將歐陽敏。為高廉鎮總兵。〇是日。駐蹕新衙門行宮。〇戊午。

上詣

永慕寺。

元靈宮行禮。〇還宮。〇己未。諭曰。李宏等奏豫省耿家寨引渠告成一摺。該處埽工。舊稱險要。今開挖引渠。全河大溜。悉行歸注。衝刷寬

深險工淤閉。甚屬可嘉。李宏阿思哈著加恩。交部議敘。其在工承辦各員。亦著查明。咨部分別議敘。○庚申。

聖祖仁皇帝忌辰。遣官祭

景陵。○

上詣

奉先殿。

壽皇殿行禮。○諭軍機大臣等。前據副都統傅

玉奏。請修理山海關一帶長城。當經降旨。交

與方觀承議覆。今經月餘。何以尚未奏到。著

傳諭方觀承。令其作速詳悉妥議具奏。尋奏

山海關南北邊牆。臣委員逐段勘估。如普行

修築。約需銀六十萬兩。所費過多。且該處悉

係浮沙。海山風勁。仍恐不能堅固。應請停緩。

惟關之南北水門。及九門之早口水口。月城

之沙堆。老龍頭等處。內外可以通行。應設立

高大柵欄。以防奸民偷越。並飭綠營官兵

丁。嚴密巡查。報聞。○辛酉。諭曰。阿思哈奏。封

邱縣知縣徐碩士。盤獲大名縣盜犯田小和

尚一摺。於尋常僉點轉遞之事。能悉心體察。

究出鄰省懸緝未獲巨盜。甚屬能事。徐碩士

著該部行文調取來京引見。候朕降旨。從來

除暴安良。為牧民者切要重務。第有司等奉

行故事。往往不能實力緝治。使積匪貽害閭

閻。莫可究詰。甚非委任親民之義。朕屢經降

旨。加意激勸。收令等近頗知所振刷。深堪嘉

尚。使凡職任長民者。果能似此交相誠勉。地

方何患不靖。民生何患不寧。自當明定獎叙

之例。俾吏治民生。均有裨益。嗣後有能盤獲

刦掠等大案者。准督撫專摺具奏。送部引見

請旨。其查出尋常逃人賊匪。自一案至數案。

令各省於年終詳具事實等差。彙摺奏明。交

部分別議叙。以示鼓勵。○又諭。從前派出王

大臣等查倉。距今已閱三載。廩糈正供。儲備

均關緊要。著派和親王。陳宏謀。舒赫德。前往

清查。以重倉務。○吏部議准浙江巡撫熊學

鵬奏稱。地方官遇有應得處分案由外結。毋論重大尋常事件。司道瞻徇。曲為求寬者。督撫即將該司道指名叅奏。交部嚴加議處。倘督撫聽從徇隱。別經發覺。一併嚴議從之。○壬戌。軍機大臣等議覆天津都統富當阿疏稱天津官兵共二千名。而馬止四百匹。其無馬兵丁。不得乘騎。未能演習騎射。請於滿洲八旗二十四佐領。設立四圍。蒙古六佐領。設立二圍。每圍派官二員。兵十二名。將官馬四百匹。均分餵養。以備每年春秋操演騎射等語。查乾隆七年。副都統達勒當阿奏請將熱河官馬。按佐領分養。奉旨准行在案。富當阿所奏。事同一體。應如所請。從之。○吏部議准調任湖北巡撫署湖廣總督常鈞奏稱。廣濟縣隄工。離城百里。該縣典史。分管江隄。計長二千四百餘丈。典史駐劄縣城。專管監獄。豈能分身遙管。黃梅縣縣丞。經管正隄。月隄約計一萬四千餘丈。實難周徧。亦且駐劄縣城。

離隄甚遠。又黃梅縣新開鎮巡檢。原兼水利。向不經管隄工。查廣濟縣之武穴鎮。於二十六年。奏准移駐同知一員。專司捕務。其駐劄地方。係廣梅二邑隄工適中之處。應將該二縣隄工。歸該同知統管。武穴巡檢。似屬閒曠。查武穴下游。有龍坪鎮。商賈聚處。建有倉廩。亦屬要地。即將該巡檢移駐龍坪。分管隄工。將廣梅二邑隄工。均勻酌派。查廣濟縣所屬自茅林蓬至龍頭蓬。計長一千九百二十丈。原係馬口巡檢經管。工段太短。將接連之窩坡穴下二蓬。計長八百四十丈。加入馬口巡檢經管。武穴巡檢。原管隄工二千七百九十丈。除撥歸馬口巡檢八百四十丈外。餘歸武穴同知經管。又自五里蓬至保賽蓬。計長二千四百三十丈。改歸龍坪巡檢經管。黃梅縣所屬隄工。自保賽口至沙灣。計長三千六百十八丈零。附近新開鎮。改歸該巡檢經管。自潘興口至馬路口。計長五千三十六丈零。附

近孔壠鎮改歸該巡檢經管。自潘興口至董家口計長六千三百七十二丈。仍由該縣丞經管。其該縣丞衙署應移駐清江鎮。所有經管隄工各員統歸武穴同知管轄從之。○旌表守正捐軀之河南睢州民李玉妻趙氏。廣東開平縣民胡永發妻陳氏。

實錄卷之七

九

大清高宗法天隆運至誠先覺體元立極敷文奮武孝慈神聖純皇帝實錄卷之七百二十二

大清高宗法天隆運至誠先覺體元立極敷文奮武孝慈神聖純皇帝實錄卷之七百二十三

監修總纂官是議官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官是議官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛是議官太子少保工部尚書紀錄六次臣曹振鏞等奉

敕修

乾隆二十九年甲申十一月癸亥諭軍機大

臣等朕巡幸所至一切供頓皆給自內府並無絲毫儲備累及地方即有應用些須柴炭之類亦必專派大臣稽查約束一遵定制不得稍有踰違乃聞扈從經臨之處竟有小人從中滋弊藉取結為名陰售其奸狡之計者在地方有司平日果屬能事自必留心體察防杜而一二庸碌之員聽信胥役長隨等詭稱行在各行檔必須取具毫無需索之結以為憑據是在取結者正以無需索巧行其需

索而在出結者。又將愚弄本官。乘此開銷侵蝕。弊將何所不至。前尹繼善在京。已詳悉面諭。令其協同總理行營處。彼此知會。嚴查力禁。近聞直隸近地。即先有蹈此惡習者。京圻為四通通衢。車駕出入必經之地。理宜釐剔肅清。以重官守。著傳諭方觀承。令其先期設法。力為禁革。仍將各該州縣辦差人等。因何潛行舞弊緣由。一面詳細確查。具摺速行奏聞。尋奏辦差州縣出結各行檔。不知起自何年。如謂全無需索。則祇應照取一結。乃聞其出直境後。一結化為數結。則利於多取可知。如謂長隨不敢侵蝕。則祇應應付本處差務。乃復隨營包攬。則利於多辦可知。嗣後只將出結一事。嚴行禁止。則取與皆無所藉口。而諸弊即不禁自止矣。至各屬長隨。去來無定。聞山東。江南。浙江。包攬支應。皆指稱直隸熟手。現在嚴禁直隸州縣接遞攬辦。併知會各該省。明春恭辦大差。務須一體查禁。得旨。此

等人最可惡。諸弊皆由此起。當嚴拏一二人重處。則其餘皆知警矣。已有旨交巡捕衙門。爾處亦宜留心。○甲子。諭據宗人府奏稱。嵩椿辦理將軍事務不妥。請革去公爵等語。嵩椿受朕恩施。自當奉公潔已。接取家眷係私事。不應差遣官人。即使差遣。亦當自捐銀兩給予。乃歛湊官兵銀兩。殊屬不合。但此等事。豈止西安為然。諒外省亦必有之。今因嵩椿與成德互相叅奏。始得發覺。否則無由聞知。然嵩椿並未將銀入已。究與貪婪者有別。革去將軍。已足蔽辜。不便併其公爵革除。著罰公俸五年。將此通行曉諭知之。○乙丑。

上詣暢春園。問

皇太后安。○辛圓明園。○臨協辦大學士戶部

尚書一等武毅謀勇公兆惠第賜奠。○還宮。

○諭曰。協辦大學士戶部尚書一等武毅謀勇公兆惠。質性精勤。材猷明練。西陲之役。稟承廟略。式畀元戎。盤錯屢經。膚功懋集。是用

酬庸晉爵。協贊禁廷。入直宣勞。正資倚任。昨偶嬰微疾。遣醫診視。方意稍加調攝。即冀就痊。遽聞溘逝。深為軫悼。即日親臨奠醊。著加恩晉贈太保。入賢良祠。并賞給內帑銀五千兩治喪。念伊子尚在年幼。著派同族工部侍郎官保。並內務府司官一員。代為經理。所有應得卹典。該部仍察例具奏。○又諭曰。劉藻奏。總兵田允中貪劣淫蕩一摺。已有旨將田允中革職拏問。交該督嚴審速擬具奏。雲南永順鎮總兵著佛成補授。○丙寅。

皇太后還宮。

上詣

皇太后宮問安。○諭。前據嵩椿奏稱。西安移駐涼莊第二起兵丁。請於明春撥往等語。現在陝省協濟甘肅米三十萬石。俱由西安等處運送。車輛牲隻需用必多。若明春又將兵丁撥往涼莊。豫備車輛。不無拮据。著傳諭新桂。明德等。應撥兵丁。或於明歲秋收後。或俟後

年春令。再行撥往。○吏部等部議准。江西巡撫輔德奏稱。瑞州一府。向築南北二城。文武官員。均駐北城。南城並無官員駐劄。其中居民稠密。且係京廣通衢。請將高安縣縣丞。及瑞州營額外外委。移駐南城。併撥兵二十名。凡該城盜賊奸匪等事。責成該縣丞管理。城門鎖鑰。交外委掌管。專司啟閉。督兵巡查。從之。○丁卯。

上詣

皇太后宮問安。○諭曰。輔德奏。吉南賴道素章阿。嘗通知縣唐開道。致令自戕一摺。素章阿身為監司大員。理應恪守廉隅。正已率屬。乃巡查所至。放縱恣肆。擾累地方。致縣令忿急自盡。深為負恩敗檢。素章阿著革職拏問。交與該撫提齊案內犯證人等。一併嚴審定擬具奏。○又諭。據輔德奏。吳城汛千總李文誥。拏獲盜犯郭太和等一摺。李文誥以微末武弁。能設法改裝。帶兵盤獲連劫兇盜。奮勉

出力實屬可嘉。李文誥著該部行文調取來京引見。○諭軍機大臣等。輔德參奏吉南贛道素章阿。詈逼知縣唐開道自戕一摺。已明降諭旨。交該撫拏問審擬。第素章阿以監司大員。巡查屬縣。任意凌虐。縱恣雖現在案情尚未質實。而以猛濟貪。已難掩飾。該道所屬之縣。豈止一唐開道。一縣如此。他縣可知。且贛關稅務。又係素章阿管理。其一切錢糧出入。安保無侵虧。那移情弊。今已經敗露。觀輔德之意。欲就案完結。不為徹底根究。大異尋常認真辦理之心。將因滿洲有所護庇乎。著傳諭輔德。令其詳細確查。即行具奏。尋奏。前經札飭臬司廖瑛。以素章阿恣睢貪詐。豈無別項劣款。贓蹟。令通飭各屬。將曾被勒索及平時餽送禮物等情。據實檢舉。若隱匿不報。即一併參處。復提到該道號簿。親加查覈。各府廳州縣。餽送者。共計三十八員。應歸前案一併嚴審。至關務錢糧。查無侵蝕虧缺。臣惟

有凜遵訓諭。實力查辦。斷不敢稍為徇隱。得旨。看汝何以嚴切查辦耳。○以兵部尚書阿里衮。為戶部尚書。協辦大學士。調理藩院尚書。託恩多。為兵部尚書。以禮部侍郎五吉。為理藩院尚書。○戊辰。以鑲紅旗滿洲副都統鄂寧。為禮部侍郎。○以戶部尚書協辦大學士阿里衮。為鑲白旗滿洲都統。理藩院尚書五吉。為正紅旗蒙古都統。鑲黃旗漢軍都統兆德。為正黃旗領侍衛內大臣。○己巳。定邊左副將軍成衮扎布等奏。前經臣等奏准。烏里雅蘇台築城一事。隨咨明山西巡撫。派兵一百名。又據扎薩克圖汗等部落。協助人夫牛隻。臣等查烏里雅蘇台。土性鬆浮。難興版築。似應照舊伐木造城。所有舊城。在齊格爾蘇特。烏里雅蘇台。二河之間。擬加高一丈六尺。厚一丈。周圍共五百丈。內外排樹木柵。中實以土。東西南三面有門。北面近河。掘溝引水。以環三面。即以溝中餘土築城。此時先行

伐木其現到兵丁。令於近山駐劄俟春融興工報聞。○庚午軍機大臣等奏。

聖駕巡幸所至。隨從各行檔向地方官取具印結一事。前奉旨傳諭方觀承設法禁革。並詳細確查具奏。今據該督將取具各行檔開單進呈。臣等詳閱所奏。有與地方官實有交涉者。亦有與地方官全無交涉。不應取結者。若不過一二州縣。偶有應付。或猶係庸懦之員。受長隨愚弄所致。今沿途經過地方。盡復如

此。其中豈無強幹能事之員。而亦甘心踵弊。必有希圖利益之處。在行檔微賤小人。借此津貼微利。而辦差人員。亦藉為開銷實據。上下相蒙。真偽莫辨。若僅將取結一項。嚴行禁革。若輩奸詭伎倆。勢必另立名目。恣其取巧。究非徹底澄清之道。查該督摺內奏稱。每次自大宛二縣出結起。沿途州縣。見結出結等語。太宛近在京城。其辦差之長隨書役。必有一二熟手。況有每次應付檔冊可據。既經嚴

革。必須水落石出。杜絕弊端。應請旨傳取太宛二縣知縣。並辦過出結之長隨書役一二名。并傳齊單內所開取結各行檔。將因何向地方官取結。並有無實在需索。是否作何侵冒各緣由。臣等會同總理行營及提督衙門。三面質對明白。俾內外共知。無可影射。臣等將來仍隨營留心查訪。如有藉端滋擾。包攬侵冒者。隨時奏明。從重治罪。庶釐剔肅清。弊端自可杜絕。得旨。理應如此辦理。○伊犁將

軍明瑞等奏。臣等會議雅爾駐兵一事。經軍機大臣議覆准行。今為期已近。臣綽克托等先派索倫官兵巡查。驅逐哈薩克等。續領官兵。帶運糧餉。籽種。器具起程。所有應行事宜。謹開列具奏。○烏嚕木齊籽種。不敷備帶。臣等議將伊犁存貯之項。協濟。仍令叅將吳士勝等。於瑚圖畢等處撥運。其軍器火藥。亦揀選帶往。○城工農務。所須器具。烏嚕木齊存貯之項。尚足敷用。仍於綠旗兵內挑選匠作。

購辦物料。以備臨時添補。一。輓運車輛。共需八百有餘。每車馬一匹。俱於牧羣撥用。仍量帶餘馬。以備疲乏。一。庫貯緞疋。除酌量存留。烏魯木齊。以備哈薩克貿易外。餘皆帶往。可省陸續運送之費。一。前議雅爾駐兵。哈薩克前來貿易者。量收牲隻。以備屯田。其大隊商販。仍令前往伊犁。但恐哈薩克等貪圖就近。不復前往伊犁。其價值應行酌減。再豫備賞給之緞布茶葉。均請照伊犁之例。報聞。○以

署正白旗蒙古副都統書山。為鑲紅旗蒙古副都統。○辛未。

上奉

皇太后幸壽安宮侍膳。○壬申。

皇太后聖壽節。遣官祭

太廟後殿。○

上詣

壽康宮行慶賀

皇太后禮。王大臣於

慈寧門。衆官於午門行禮。○奉

皇太后幸壽安宮侍宴。○癸酉。是日起。

上以冬至祀

天於

圓丘。齋戒三日。○甲戌。吏部奏。理藩院尚書五

吉。應否在議政處行走。得旨。五吉著在議政

處行走。○轉禮部右侍郎雙慶為左侍郎。○

乙亥。

上詣

南郊齋宮齋宿。○諭軍機大臣等。納世通等奏

稱。四十七等至霍罕。令額爾德尼伯克出城。

恭迎勅諭。額爾德尼隨具奏章。懇求帶回。又

遣貿易人等。投遞呈文。俟四十七轉回。再將

霍罕情形具奏等語。所辦非是。額爾德尼。既

有奏章。縱不能親身前來。亦應遣其頭目齋

送。乃僅交四十七代進。而納世通遂為陳奏。

殊乖體制。總由伊等心存怯懦。四十七等。又

必以為辦理不易。遂至一味姑息。著傳諭納

世通等。此時若霍罕貿易人等。不知四十七
接受額爾德尼咨文一事。即行文額爾德尼
云。我大皇帝頒降勅諭。尚遣侍衛前來。爾既
有奏章。理應面陳。縱爾難以輕離游牧。亦當
派一大伯克。齎捧入覲。乃附懇代進。殊屬不
合。一面將原奏駁回。倘業經准其代進。即不
必如此辦理。總之回人性習狡黠。斷不可示
以柔弱。納世通等嗣後辦理外藩諸事。務知
大體。不可存苟且塞責之見。○丙子冬至祀

天於

圜丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○詣

皇太后宮問安。○丁丑。

上詣

皇太后宮問安。○幸瀛臺。○總理行營王大臣

等奏。據錢汝誠。實光鼐奏。稱查乾隆二十七

年。駕幸江浙。臣衙門循照二十二年南巡辦

理規條。奏請將各行檔裝載什物車輛。俟行

至徐家渡水次。留住半交江南。半交山東。以

備迴鑾應用。又查上屆豫備車四百餘輛。實

用車三百六十輛。嗣因順屬原車途中間有

回空。騾馬不無疲乏。至交車時。山東留一百

三十五輛。江南留一百四十五輛。其不敷之

車。在各該省照數備足。又因江省素無車輛。

仍照二十二年之例。奏明移咨直督檄調附

近南省之景州。河間。獻縣等邑。代雇百輛。以

濟江省之用。各在案。今此次亦即飛咨直督籌備等語。查此次迴鑾。由德州登陸。情形與從前不同。自應另行酌議。臣等會同內務府大臣詳悉查覈。由京至徐家渡。共用車三百三十輛。除應回空車一百一十八輛外。其應回德州守候車。計二百一十二輛。應請各令散歸。俾得及時營生。俟迴鑾至德州時。所需車輛。交山東地方官就近雇覓。但恐山東車輛不足。應令直隸交德州相近之州縣雇車一百輛。協濟均於臨時三四日前豫備。毋得久羈。所有隨從各行檔。自徐家渡至德州所需船隻。若此時行文江省豫備。恐滋繁擾。擬俟到江省。面告尹繼善於迴鑾以前。量其敷用之數。酌撥應用。再恭查

皇太后水路至張家灣登陸。所需隨從車輛。不過三四十輛。應交坐糧廳雇備從之。○是月江南河道總督高晉奏。立冬以來。水勢未消。黃河徐城北門外誌水椿。現存水五尺七寸。

高堰誌椿。存水三尺九寸。老壩口誌椿。存水九尺八寸。每遇東北風作。黃流倒漾入運。微有停淤。一經清水暢出。淤即刷去。河身並無淺滯。臣常至清口查看。緣今歲節氣本遲。黃水未見大消。目下已過小雪。再得大霜數次。則黃水收斂歸槽。清口自無倒漾之虞。中河楊家莊一帶。自鹽河閘下板後。水勢深通。回空漕船。已全數渡黃南下。明歲春工。先委勘估。俟桃汛後。相機辦理。其差務案內。應修御路緯道。以及渡黃各馬頭。亦經督飭廳營。加謹豫備。得旨覽奏俱悉。○又奏。時踰大雪。黃河水勢日消。楊家莊運口。逼近鹽河。因東省熬壩挑河。來水消耗。清不抵黃。閘口不無黃水漾入。而時已隆冬。沙稀水弱。並無妨碍。現擬將鹽閘下板。並將鉗口草壩堵閉。楊莊口門。可期無淤。至邳宿一帶運河。每年上游來水充裕。河道深通。本年上游水小。來春聖駕南巡。由水路迴鑾。運河之水。尤宜充足。業

經奏明將駱馬湖尾閘早為堵蓄以備接濟上下河道淤淺處亟應乘此水落灘現一律挑濬通深現已勘估詳辦得旨覽奏俱悉○河南巡撫阿思哈奏前因惠濟河滾壩高於賈魯河八尺五寸淤淤不能過水奏請改建石閘一座惟是改閘洩水可免賈魯河之漫溢而去路河隄尤應籌備查惠濟河下游祥符杞縣一帶河寬隄固惟陳留縣睢州地勢窪下必須河身挖挑寬深隄岸普築高厚俟春融凍解分段挑築以收實濟報聞○山東巡撫崔應階奏臣自濟寧沿河查驗水營緯道橋座等工至邳城蘭山費縣泗水曲阜寧陽泰安長清一帶勘驗營尖道路及豫備房屋等工俱已完竣惟沂汶二河大橋尚未完工十二月初間一律可竣并將沂州兗州泰安各處泉源疏濬無淤復將汶河草橋淤沙挑挖使眾水暢流入運蘭鄆二縣低窪各鄉俱挑有支河小港再東省應行分地收養馬

匹車輛及臺站官兵俱逐一妥籌備辦得旨車輛或不似上次費籌辦軍機處即有行文爾等相商妥協料理總以不騷擾為要○大學士管陝甘總督楊應琚等奏巴里坤北山一帶地方募民前往墾種恐邊氓初至人力難施該處有泉河三道臣等公同勘定在頭二道舊渠之尾開渠二千丈併將開渠之土建堡三座一座周圍百丈兩座周圍各六十丈於八月二十一日興工至九月十八日工竣今戶民陸續齊至巴里坤因見有堡可居有渠可灌倍加欣喜從此聞風接踵而至於新疆大有裨益報聞○四川總督阿爾泰奏准部咨由西安移駐成都滿洲蒙古兵一千五百名匠役五十四名官二十五員按例覈給房間四千八百四十二間并購買地基展修城垣行令川省估辦臣即親詣滿城勘查於北門之西拆牆一百三十丈南北築牆一百八十餘丈可建房一千八百餘間又西

南隅空地。可蓋房二千餘間。尚不敷移駐官兵居住。查該處城牆外。居民僅止數家。於此處裁取建蓋八百餘間。拆建百餘丈牆垣。併作滿城。庶可從容安置。至工料所需。查有寶川局。加卯鼓鑄。平價出易。案內積有利銀二十六萬兩。即於此項內動支辦理。擬於兩年內建蓋完竣。移咨西安將軍。料理兵丁起程報聞。○雲貴總督劉藻奏。雲貴二省。督撫提五標。十三鎮。十二協。三十七營。多係苗疆。營伍事宜。俱關緊要。務期軍旅整飭。騎射優嫻。查雲南省城。督撫兩標及城守。共八營。雖中軍。副參遊守等官。俱按日操演。即督臣亦不時考校優劣。酌定賞罰。但合八營大操。向來止三年一次。照例舉行。此外竟不再舉。以總督駐劄之地。八營馬步兵。共五千七百餘名。竟未定有歲操。何以肅營伍而作士氣。應請每歲屆九月十月之交。收獲將畢。督臣會同撫臣。將八營官兵大操一次。歲以為常。則八

營將弁。必人人自顧考成。勤加訓練。於邊地營伍。不無裨益。得旨。如議行。

大清高宗法天隆運至誠先覺體元立極敷文奮武孝慈神聖純皇帝實錄卷之七百二十三

大清高宗法天隆運至誠先覺體元立極敷文奮武孝慈神聖純皇帝實錄卷之七百二十四

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

書纂輯都尉軍功加十九級隨帶加二級又加二級 董誥內大臣戶部尚書兼藍旗滿洲都統軍功紀錄五次

尋常紀錄十四次 德瑛經筵講官太子少保工部尚書紀錄六次 書纂輯等奉

秋修

乾隆二十九年甲申十二月戊寅朔諭曰奉

古賚在烏里雅蘇台軍營年久著派常復前往更換○已卯

上御乾清門聽政○詣

皇太后宮問安○諭曰甘國寶到部之日著該部帶領引見○又諭吏部議覆方畧館議叙一本已降旨依議其本內効力謄錄頂補額缺之處前經該館奏准遵行吏部何以復行指駁於尋常議覆事理迥不相符其中不無在部候補人員恐此等自備資斧者以勤勞

補缺遂致伊等得館未免遲滯因向該司官吏等暗行慫恿抑或該堂官中另有自出已見謂必應如此辦理者均未可定著舒赫德令其將此等情節即行查明據實具奏○諭軍機大臣等今日李星曜請訓召見時奏請給假回籍並稱伊兄李星聚遺子四人其二尚幼惟長子次子不免飢袴好飲若不早為約束不惟荒廢家業抑且辜負國恩懇准回家管教等語其言如果屬實具見敦睦情殷

於治家服官之義均為允協第恐其中或有家貲公產尚在未清欲藉此還家經計則措詞雖覺可聽而乘機欺抑孤姪情偽又安可遽信徐州李姓世為仕宦其子弟行徑地方耳目自所難掩著傳諭尹繼善令其不必行文委員致涉張皇形跡但就其原籍確訪李星聚二子情形據實明白奏聞在李星曜之居心誠偽既無難立辨且李衛子孫居鄉果不安分地方官亦理應加意為之防檢尹繼

善即密飭該管守令等善為教誡經理尤於保全舊家子弟之道深有裨益將此詳諭尹繼善知之○以都察院左都御史張泰開充經延講官○以光祿寺卿伍勒穆集為內閣學士兼禮部侍郎○以陝西西鳳協副將馬之騏為山東登州鎮總兵○庚辰

上詣

雍和宮行禮○幸皇四子永城第進膳○諭和其衷奏請將移駐張家口旗兵所遺餘糧撥

還大同綠旗各營一摺此項米豆從前原係綠營支食後因右衛安設駐防是以改支折色今既經移駐餘糧自應仍行撥還著照所請將餘存之米豆一萬六千七百餘石自明歲為始無論有閑無閑按照各營兵丁原食之數均勻分撥就近支食至摺內所稱餘剩豆一千四百餘石此時既無所需用併著照依定價改徵折色以紓民力再從前額徵之運脚耗糧二項本以解往右衛支食而設今

撥還綠營既可就近支領所有原徵之運脚耗糧概行免其輸納副朕體卹邊氓至意○吏部議准山西巡撫和其衷等奏稱河東鹽池禁牆外設有鹽池司長樂司聖惠司三巡檢專司巡緝私鹽不理民事凡遇大計甄別俱聽該管州縣具考申轉是舍素所切近之鹽務上司而令未能深悉之州縣鑒別揆之循名責實之義似有未符請照兩淮鹽務巡檢之例遇大計及俸滿之年均聽運司考覈

移會藩司一面詳明鹽政覈咨撫臣會題俸工養廉照舊支領無庸改易從之○戶部議准大學士管兩江總督尹繼善疏稱六塘河移駐同知專司水利請將常州府海防同知改隸六塘河等語應如所請鑄給淮徐海六塘鹽河水利同知關防從之○辛巳

上詣

皇太后宮問安○幸瀛臺○諭軍機大臣等方觀承查奏直隸辦差州縣出結一事所奏殊

屬顛預。已於摺內批諭。此等積弊。固由地方官所用胥役長隨。藉端開銷。以便其中飽之計。遂爾盤踞把持。牢不可破。及至查究根源。此等庸吏。又安肯據實開陳。自干罪戾。該督從前既據屬員之言。輒行入告。迫降旨詳查。又以無從根究為詞。殊不思若輩小人。藉名舞弊。固不足惜。而車駕所經。一切毫無供頓。而長隨人等。竟有以支應名色。從中滋為口實。其風猶可長乎。在前此官更吏易。此時即

實有難於逐一質對之處。而明春南巡在邇。現已諭總理行營王大臣。暨提督衙門。沿途加意訪察。該督務須先期嚴飭地方官。一體力行防範禁革。如有另換名色。別生弊竇者。該州縣官立即扭稟總理行營處治罪。倘或不能查禁。一經總理行營處查出。則惟該督是問。並傳諭山東。江南。浙江。各督撫知之。

壬午

上詣

皇太后宮問安。○諭吏部議駁。方畧館奏准頂補効力謄錄一摺。前經降旨。令該堂官查明具奏。並諭舒赫德將因何指駁情形。詳悉察訪。今據吏部堂官等具奏。仍鈔襲原駁數語。顛預具覆。於事理並無端緒。而舒赫德則稱該部郎中章寶傳定擬駁稿。堂司各官畫齊。惟員外郎慶桂。以其事業經奉旨。獨未畫押。且有其次候補謄錄四人。其三俱係浙籍之語。所有缺額謄錄。昨已降旨准照原奏頂補。

其司員意見不符緣由。及有無從中懲通情事之處。著劉統勳舒赫德會同該堂官等傳詢明白。據實具奏。○諭軍機大臣等。明瑞等奏稱。現在伊犁厄魯特兵一千二百名。內僅二百名。每月餉銀一兩。請再增二百二十名額餉。合計六佐領。各得月餉七十分等語。著照所請。將厄魯特六佐領。新舊共定額餉四百二十分。以裕兵丁生計。○又諭曰。明瑞等奏。哈薩克阿布勒比斯。遣厄魯特策伯克呈

稱布魯特掠伊所屬八十餘名口。布魯特百餘人亦為哈薩克所獲。今布魯特遣人與阿布魯阿布勒比斯約會。須面同理說。今阿布魯等俱往邊界。但阿布勒比斯原與額爾德尼相好。或藉口和解。陰相勾通。亦未可定。已行文納世通等密查布魯特等果否實有其事。再為相機辦理等語。額爾德尼伯克素非安靜之人。近因阿布都喇伊木通信事發。妄生疑懼。業經頒給勅諭。續據納世通奏。所遣侍衛四十七等報稱。額爾德尼伯克情形尚屬恭順。又諭將往返情節確查具奏。今布魯特哈薩克講和之說。或出於哈薩克等誇張其詞。此時宜加意偵探。若果有勾通形迹。必係額爾德尼伯克潛為煽誘。即當乘其不備。先將額爾德尼辦理。然此特留心防範之舉。不可輒自張皇。恐伊犁兵民等傳說驚疑。於事無益。併傳諭納世通等遵照辦理。四十七應亦轉回。著將額爾德尼及所屬情形作速

奏聞。栢琨亦著一體加意偵探防範。○兵部議准。四川提督岳鍾璜奏稱。四川成都城守左右二營守備。駐劄省會。巡防管轄。均關緊要。請改為題缺。建武營遊擊。及大壩營都司。地處偏僻。事務簡易。請改為選缺。應如所請從之。○旌表守正捐軀之直隸任縣民宋來聘妻梁氏。○癸未。

孝惠章皇后忌辰遣官祭

孝東陵。○諭軍機大臣等。據額爾景額等奏稱。

和闐每年所餘糧石。除折收紡絲布疋外。仍收金三十兩。今駐劄伊犁官兵頗多。布疋尤為緊要。請將金三十兩亦折收布疋。每年可多收布二千疋等語。和闐折收金兩亦遇荒土貢之意。業已照例徵解。不必折收布疋。若為官兵衣服起見。則葉爾羌應收正項錢糧俱可折給布疋。或將餘銀採買亦可。著傳諭額爾景額將應送伊犁布疋不足若干。葉爾羌等城正項錢糧及所餘普爾糧石若干。是

否足敷辦解。即行籌議具奏。○以多羅寧良郡王弘皎子永福襲封貝勒。○甲申諭曰。御史汪新奏。崇文門胥役借端需索。苦累行旅。請於查稅處。各派戶部司員彈壓一摺。御史職在風聞言事。固屬分所當然。第所聞雖與目擊不同。而其事必有端倪。其人必有指實。始可交部逐節推求。辨其真偽。若祇虛懸約畧。即以為可以釐奸剔弊。誰則不能。且無論該御史糾彈無據。不足服人。即朕亦難執其

說而概行窮治也。若不過頒一申飭嚴禁之旨。則仍是空言。何補實政。且朕向因崇文門稅務殷繁。不無滋弊。恐胥役從中需索。有累商民。是以歷來俱特派親信大臣經理。目今即係阿里衮上任。則係舒赫德。溯此而上。則為大學士傳恒。若果有此等弊端。朕不獨將胥役嚴加懲創。即司權之大臣。亦必當治其罪。斷不肯稍為曲貸。若如該御史所請。多派部員彈壓。於事理尤屬難通。司員皆有本衙

門承辦事件。安有閒曹。可供分道稽查。且司員亦斷無不用胥役之理。今以一二大臣。尚不可信。而令信如許司員。是欲杜一弊而適開衆弊也。朕於大小臣工。一切並無成見。該御史既有此奏。著交現在管理崇文門稅務大臣。明白覆奏。其摺內所稱諸弊。仍著交與汪新。令其將所聞勒索者何吏。受累者何人。且計其歲月。係在何時。雖不能一一詳記。必能摘取一二事。確切奏聞。以便交部嚴審究

治。若含糊覆奏。則是虛言邀譽塞責。自取罪戾矣。○諭軍機大臣等。蘇爾德奏。平定準噶爾碑文。各省學宮地勢不一。不必拘定尺寸。並遴委通曉清文旗員。摹寫刊刻一摺。各省府州縣衛學宮。自不能一律高敞。若必照部頒碑式豎立。轉難位置適宜。至外省士子。本不諳習國書。碑內亦可毋庸令其鐫刻。嗣後各學立碑。視該處採石難易。及學宮地勢。聽其酌量隨宜建豎。其清文竟不必刻入。兼可

省傳寫錯謾之弊。著於各督撫奏事之便。一併傳諭知之。又諭曰。馮鈐奏百色同知陸廣霖截取雲南委員胡筠辦運鹽觔抵償舊

欠吳際盛私債一摺。百色地方鹽少。有司酌扣滇鹽接濟。其事尚似因公。至總兵李星垣始令該同知扣鹽償債。繼復封貯鹽觔。抑令短價勒賣。而同知又無隻字報出。其中顯有假公濟私情弊。此案著交與李侍堯。即速自赴廣西。會同該撫馮鈐將摺內情節。秉公查

訊。如酌量李星垣情罪。有不止於革職完案。即著一面將該鎮解任質審。一面奏聞。原摺著一面鈔寄李侍堯閱看。尋李侍堯奏。伏查本案情節。李星垣似有徇情乖謬之處。現准馮鈐札會。究出吳際盛札致李仙洲。囑其轉致李星垣。關照一節。應否解任質審。容臣抵桂林。會同馮鈐。秉公查辦。報聞。○乙酉。

上詣

大高殿行禮。○諭曰。常保在福州副都統任內。

將跟班及守門兵丁額外多挑恣意妄為。不稱副都統之職。著留京仍以叅領補用。所遺員缺著柏忠補授。○丙戌。

上詣

皇太后宮問安。○幸瀛臺。○諭昨御史汪新奏崇文門胥役需索苦累一事。因其語涉空言。並無端緒。難以推尋查辦。既令該衙門明白回奏。並降旨令其指實具陳。今據覆奏。乃舉伊攜帶箱隻進城。有巡役要去飯錢三百文。

一節為詞。復令軍機大臣等問其更有何事。則稱此外別無欺蹟。果爾則其事乃係伊自為三百錢之累耳。而架詞入告。不可鄙乎。國家剔弊釐奸。凡屬蠹猾病民。雖細不宥。但此等么麼小人。遇事藉名。圖得飯食。正如吏部門皂之報喜探信。刑部隸卒之行杖手輕。乘勢冀覓微利。情事大畧相等。其約束禁止在堂官等自當有犯必懲。俾知所創艾可耳。若謂嚴行立法。使此輩盡絕陋習。勢亦所不能。

而因一二干犯。即指以為淆銓政而紊刑章。且必俟登之白簡。候朕一一為之進止。則亦日不暇給矣。使該御史當索錢之時。即告知該管之大臣阿里衮。諒阿里衮必不屑為袒庇。不過立予革役。加杖荷校。便已了事。若阿里衮竟不為責處。或抑而不發。則該御史自應具摺參奏。朕不惟嘉許。必將阿里衮議處矣。今以如此瑣言細故。張大其事。有如司課稅者。皆邀入於路而奪之者然。試問以今日

之政事觀之。司課稅者能如是乎。而其所斷斷不已者。總因被索三百錢。為累及已身起見。既非為國。兼非為人。建言者固當如是乎。但胥役勒三百錢。亦不可恕。著交阿里衮查明。自行執法處治。汪新亦不必議處。朕辦理庶務。一切鑑空衡平。從來不肯稍有偏任。可將前後情事。一併詳悉通諭知之。○諭軍機大臣等。今日新選河南南汝道蔣衡。因請訓召對。觀其言動。外雖虛有其表。而性近模稜。

兩端殊無實際。該員前任江西經巡撫。明山參奏。雖不過以辦理科場為官生豫備供給而起。然於平日不實心承辦地方事務。亦大略可見。今業經捐復。於例應得選補。是以仍行錄用。但監司職任。甚有關係。著傳諭阿思哈。令其留心體察。如自知懲創。勉勵供職。則已。倘到任之後。一味取巧苟容。不肯實心任事。即行據實參奏。毋稍姑息。貽誤吏部等部議准。河南巡撫阿思哈奏。稱開封府屬河

陰縣東西僅廣二十八里。南北袤二十二里。地僻事簡。賦少民淳。原定簡缺。該邑東至滎澤縣城十五里。滎澤境東西亦止寬十六里。南北長三十二里。糧賦相等。合計兩縣。不過一邑之地。官多役冗。廩祿虛糜。似應裁併。查滎澤縣路當通衢。地臨黃河。原定衝疲兼二沿河要缺。河陰緊接滎澤。請將該縣知縣典史裁汰。歸併滎澤。所有額徵地丁常平倉穀。併鹽引俱歸併徵收行銷。其河陰驛馬二匹。

并吏役工食一體裁汰所裁官役俸廉銀兩歸入裁存項下造報該地原設外委一馬兵一守兵十二令酌留外委一守兵五其餘撤回原營操防至該地稽查保甲緝拏盜匪等事照集鎮分員彈壓例添設巡檢一員管理給與印信以專職守俸廉役食照例於裁存項下支給倉廩穀石仍貯本城便民借糴完納責成巡檢守看仍聽知縣經理河陰原設教諭一員照江南臨淮直隸魏縣例改為河陰鄉學教諭再榮澤事務加繁應定為衝繁疲兼三沿河要缺在外揀補又河榮三縣養廉原俱歲支一千二百兩公費各二百兩今河陰裁併公事已繁請照大縣一千四百兩之數增養廉銀二百兩公費銀四十兩從之○兵部議准陝甘總督楊應琚奏稱河州改設副將應將原轄之積石等二十四關及口外起台等營歸西寧鎮就近巡查其河州鎮移駐固原所轄內地洮岷等營應令固原鎮

巡查西寧鎮屬之亦雜石營及千戶莊等處改歸南川營兼轄均應如所請從之○四川總督阿爾泰提督岳鍾璜奏遵旨指示機宜令臣等會給九土司諭稿委員分發今據稟稱親抵各土司巢穴傳示檄諭且駕馭鼓勵量為犒賞該土司土舍頭目人等俱感激踴躍或奮欲勦掠以冀復讎或亟圖攻取思除後患委員等目睹小金川黨壩三維谷綽斯甲布等土司派撥頭人土兵分路前赴金川地界明擊暗攻並將攻刦搶掠情形稟報前來臣等查各土司近日攻勦金川屢經得勝金川勢必力圖報復正不可不嚴密防範臣等飛飭綽斯甲布革布什咱巴旺等土司各於要隘添兵防守並於路通金川之處設伏巡警如有金川番衆前來便於奮力截殺報聞○戊子諭福建廈門洋行陋規一案因係舊日相沿事與婪索敗檢者不同已降旨將甘國寶帶領引見仍加恩錄用以觀後效因

思案內之譚尚忠懷蔭布李逢年事同一體著該部一併帶領引見候朕降旨其中惟劉增於二十六年各行酌議私貼公費時曾經書役開單告知伊有不出主意聽憑書役自辦之語彼時劉增若堅詞拒絕何至衆相效尤是陋例之明為定議實自彼成之其情自與三人各別著仍照部擬發往開展効力贖罪朕原情甄別一切惟視其人之所自取從來不肯稍有畸輕畸重以乖明允之道併將

此通諭知之○諭軍機大臣等圖勒炳阿奏清鎮縣劉天爵等聚衆搶犯一事最為地方不法重大之案該撫具摺即應請交法司治罪乃僅照尋常案牘叙事入告且將案內報遲逸犯之沈元龍孟興祖不即嚴叅拏問祇附摺聲明革職則是平日罷軟痼疾依然竟未悛改圖勒炳阿前此屢經獲罪經朕加恩棄瑕錄用又自黔省調任湖南事繁責重更非前任可比若仍委靡姑息並不知感愧奮

勵安望其能勝封疆之寄恐自干罪譴朕更不能為該撫曲貸矣將此傳諭知之○又諭上年順義等處蝻子入秋已經生發復令地方官乘時督率翻犁除治是以今歲農功倍稔現在近京得雪自四五寸至七寸不等而保定迤西左近未能深透將來蝻子萌動不可不豫事防維適據陳宏謀面奏江南治蝗之法俱責成田戶令其一有潛滋即行據實具報其言未始不近於理但其中督飭調度

仍在有司實力查察無論滋萌之處田戶應報不報一至飛散之後其事難以糾摘且如數家地畝毗連即一處首有煽動保無委及衆人之弊是其隨時善為經理實非徒法可以徑行也從前直隸地方作何設法辦理并可否倣照其意為之及此時該督如何悉心豫籌之處可即詳細奏聞副朕軫念農民至意尋奉直隸各屬設立護田夫役彼此互相鈐制不能私行隱匿猝有調用一呼畢至年

來辦理頗得其益。明春即飭該州縣簡覈夫冊。申明條約。并責成該管道府及各鎮營。分派員弁巡查報聞。○又諭湖北被水各州縣內。黃梅。文泉。監利。三縣最重。廣濟稍輕。其武漢。黃。荊。四府屬間有被水之處。均經降旨賑卹一月。並酌借口糧籽種。以資接濟。其湖南省內。夏間被水之武岡。衡山。暨湘陰等十州縣衛。亦經降旨分別撫卹。巡撫王檢亦奏湖北成災各屬。米價尚不甚昂。二麥已經佈種。續據李侍堯奏報。湖南涸出地畝。已經補種。可望有秋。但該二省被災之地。此時農民實在情形若何。明春當青黃不接時。是否尚有應行加恩展賑之處。著傳諭該督令其作速查明。由驛用六百里馳奏。候朕酌量降旨。尋奏。明歲青黃不接之時。應將文泉。監利。黃梅。廣濟等四縣。展賑一月。至沔陽。漢川。漢陽。江夏。武昌。咸寧。嘉魚。蒲圻。興國。大冶。黃陂。黃岡。蘄水。黃安。蘄州。石首等十六州縣。應酌借常

社等穀。為口糧籽種。其益陽。華容。龍陽。安鄉。岳州等五縣衛。亦祇須撥穀借糶。無庸展賑。報聞。○以鑒儀衛冠軍使明亮。署正紅旗滿洲副都統。○以故科爾沁頭等台吉達爾漢。明蘇克子遜達布襲職。○己丑。上詣皇太后宮問安。○諭曰。圖勒炳阿奏清鎮縣劉天爵等聚衆搶犯一案。已有旨交三法司覈擬速奏。其典史沈元龍。把總孟興祖。具報遲延。致令各犯遠颺。僅予斥革。不足示懲。著革職拏問。交與該撫審訊治罪。○諭軍機大臣等。明春南巡江浙。所過直隸。山東。及江浙等處地方。其應辦差務。原不過就屬員中酌量派委。非各屬各員皆有承辦之責。即派出人員。於緊要民事。自可先期趕辦。俾案牘速清。方為急公之道。乃聞向來有司故習。率以差務展限為詞。所有民間詞訟等案。任意稽緩。不為尅期完結。豈朕察吏安民本意。著傳諭

各該省督撫等。即行傳飭所屬。凡應理事件。毋論派委不及者。固不得因循推諉。即派出人員。其應辦之事。亦當乘此封印前後。加緊料理。倘有藉名遲滯。以易結之案。遷延貽誤。必待差竣辦理者。即應力破情面。加之創懲。使小民不致羈留拖累。以副封疆表率之任。朕於該督撫等有厚望焉。○又諭據納世通等奏。四十七等。自霍罕轉回。告稱額爾德尼迎接勅諭。甚為恭敬。以不能親身入覲。欲遣人代為齎奏。並因冬寒。不及豫備方物。俟來春料理起程等語。額爾德尼尚屬恭順。所奏亦合情理。伊呈書納世通有云。我輩人甚多。嗣後有譏謗我者。祈將其人發來質對。以辨真偽等語。雖屬畏罪之詞。究因阿布都喇伊木罪狀似未顯著。致伊蒙冤不白者。然納世通覆書。即應將審明各確據。逐一指出。並以大員等欲進兵問罪。大皇帝天恩。念爾平日尚屬守分。姑從寬免降勅訓諭。仍以嚴詞斥

責。伊自然知所儆畏。乃反云。阿布都喇伊木之事。業經蒙恩寬免。無須再述。是其意若以前事為歉然者。殊屬非是。納世通辦理此事。始終怯懦。著嚴加申飭。併傳諭栢琨。務遵陸續所降諭旨。加意奮勉。毋再以姑息從事。○又諭曰。納世通奏。准明瑞咨。巴噶什。巴雅爾。斯坦之布魯特。搶掠哈薩克人口一事。隨查投誠布魯特各部落冊籍。並無來咨名目。恐係傳聞等語。昨因明瑞奏。已傳諭納世通。令其加意偵探。雖據稱布魯特等名目未確。但阿布勒比斯呈文。亦有布魯特搶掠之語。未必非額爾德尼詐稱。辦理邊界搶掠事。而暗與哈薩克交通。此則頗有關係。著仍遵前旨。密訪確情。不得顛預了事。又四十七等。至瑪爾噶朗。查出綠旗兵劉偉。係從前隨兆惠在葉爾羌。為額爾德尼屬人所獲。屢次脫出。俱被伊卡盤獲看守等語。瑪爾噶朗之人。久經內附。遇內地官兵。理應送回。何敢拘禁看守。

著傳諭納世通於額爾德尼遣使之便。傳諭申飭。嗣後再有此等情事。即行重究。劉偉仍准回原營。○庚寅。諭曰。修琳已受家人銀兩。不准放出。轉以竊銀逃走捏控。雖有主僕名分。但曾為職官。似此不顧顏面。殊玷官箴。修琳著革職。○諭軍機大臣等。甘省被災各州縣處。地土瘠薄。災後民食未免拮据。業經降旨加意撫卹。並蠲免額賦。因念新春尚須特降諭旨。加恩展賑。曾傳諭該督將現在如何

賑卹情形。查明具奏。今據奏稱災重地方十四處。稍重地方十五處。災輕者七處。其狄道。鎮原等十州縣。據稱尚未勘覆。該十州縣秋禾既偏被電水。是否勘明成災。暨被災輕重情形如何。及災重災輕各州縣。現在作何分別撫卹加賑之處。摺內俱未經聲敘。再河州。狄道。碾伯。三州縣。既稱俱已改種秋禾。續經勘不成災。而又將河州。碾伯列入夏秋偏被電水災輕之七州縣內。狄道一州。列入尚未

勘覆之十州縣內。所奏亦未甚明晰。著傳諭該督楊應琚。將以上各情節。及明春應行展賑。并酌量予賑各州縣。速即查明具摺奏聞。俟朕臨時降旨。尋奏。明春應將災重之皋蘭。金縣等十四處。展賑兩月。稍重之固原。張掖等十五處。展賑一月。至狄道等八州縣。勘不成災。惟涇州。華亭二處。係一隅偏災。按例撫卹。無庸加賑。又河州。狄道。碾伯等三州縣。前奏列入災輕及未勘覆之內。另指夏秋間別

有被災田畝。非即改種秋禾。勘不成災之地。得旨。屆時有旨。○吏部議准。山西巡撫和其衷等奏。稱寧武府兼轄四縣。俱山邑僻壤。文風相等。內寧武。神池。五寨。三縣。各設教職一員。惟偏關縣有教諭訓導各一員。實屬閒冗。請將教諭裁汰。仍留訓導一員。專司督課。從之。○辛卯。諭曰。耀海摺奏。原任義州知州那淳有應完數減銀五百餘兩。該員現在捐陞。分發河南候補。屢經咨催。始則混請展限。繼

則請俟得有養廉扣補。輟轉延挨。請勅部議處等語。那淳係巡撫常鈞之子。既非尋常實在無力完項之人。況能出貲捐陞。豈獨艱於五百餘兩應完之款。何得輒將官帑任意懸宕。那淳著交部嚴加議處。○又諭。前因柏忠扎什扎木素承襲佐領。各旗辦理不一。交該都統查覈。據正白旗滿洲都統奏稱。柏忠佐領與什泰事同一體。照此請旨等語。據正藍旗蒙古都統奏稱。扎什扎木素佐領。應否出

缺。無例照辦。因令承襲等語。從前什泰補授遊擊。該旗請將伊之佐領。或委員署理。或另行補放等因具奏。朕即明降諭旨。嗣後八旗有似此者。將承襲家譜進呈請旨。乃該旗等於柏忠之佐領。遵旨奏請委員署理。而於扎什扎木素之佐領。令伊子承襲。甚屬錯繆。此等補授外任官員。無子嗣者。願將佐領留於本身。有子嗣者。未免貪圖多得一官。夤緣另襲。但補授駐防。與綠旗官員。同一擢用外任。

並無區別。嗣後承襲佐領。悉遵前降諭旨辦理。○諭軍機大臣等。耀海奏原任義州知州那淳。於本分應追覈減銀五百餘兩。輟轉延挨一摺。已降旨交部嚴加議處。那淳係常鈞之子。又現在捐陞。分發河南。豈尋常實在無力者可比。而應追五百餘金之數。既不甚多。且屬官項。何至如此有意延挨。始則藉詞展限。繼復欲得養廉扣補。常鈞平日不能管教之咎。復何所辭。著按應追原數。令常鈞十倍

罰出。以示懲儆。將此傳諭知之。○吏部等部議准。陝西巡撫明德等奏稱。西安省東二十里灞橋地方。係咸寧縣所轄。為晉豫川甘通衢。因往來差務繁多。設有所夫一百四十名。凡餉鞘等事。俱令按運護送。惟是所夫衆多。奸良不一。俱應稽查督率。知縣身居省會。不能兼顧。查咸寧縣設有縣丞一員。同駐省會。並無專辦事件。請將該縣丞移駐灞橋。管理董率。灞橋公館一所。改作衙署。另給鈐記。以

昭信守。再該縣丞管理所夫橋梁。關係緊要。必得幹練之員。始克勝任。應定為要缺。在外揀調。從之。○壬辰。

上御太和殿視朝。文武陞轉各官謝恩。○軍機大臣等議准。黑龍江將軍富僧阿等奏稱。二十三年。調赴西路軍營兵二千五十四名。二十七年。隨總管羅爾本泰。撤回二百一名。本年全數撤回。除留營効力。及陣亡病故。併逃兵六名外。現存兵一千五百八十三名。中途

倒斃馬駝。按例覈計。應賠馬二百八十四匹。駝七十五隻。均請於官兵俸餉內扣完。其軍器係打仗損傷。應免賠補。請將所貯額餘器械。照數抵補等語。均應如所奏辦理。得旨。依議。內有逃兵之語。若自軍營脫逃。獲譴最重。此項逃兵。究係自軍營脫逃。抑或撤回中途逃走。並未聲敘明白。著富僧阿等將伊等均自何處逃亡。此刻曾否拏獲。及拏獲後如何辦理之處。查明具奏。○以兵部尚書託恩多。

充經筵講官。

大清高宗法天隆運至誠先覺體元立極敷文奮武孝慈神聖純皇帝實錄卷之七百二十四

大清高宗法天隆運至誠先覺體元立極敷文奮武孝慈神聖純皇帝實錄卷之七百二十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆二十九年甲申十二月癸巳

上御乾清門聽政○詣

皇太后宮問安○以翰林院侍讀學士瓦爾達

為光祿寺卿○以右春坊右中允汪永錫充

日講起居注官○右春坊右贊善勵守謙署日

講起居注官○以故三等男玉保子三福襲

爵○甲午諭軍機大臣等據綽克托奏稱哈

薩克額爾類等遣愛托和卓入覲貢馬并告

稱布魯特等三次搶掠游牧隨詰問愛托和

卓云爾等一面情詞未足深信俟遣人赴布

魯特查詢若果實情自當明正其罪若係爾

等捏飾亦當以誣告論愛托和卓等辭屈即

云所掠係塔什干游牧此等愚詐之徒若准

其入覲似非體制謹酌賞綢緞酬其馬值送

出卡等語所辦甚是看來明瑞等所奏阿布

勒比斯遣人來告之語俱不可信明瑞等若

似此窮詰伊或吐露實情亦未可定乃僅以

一奏了事殊屬顛預著傳諭伊犁烏魯木齊

將軍大臣等嗣後哈薩克等有懇請入覲者

或係蘇勒統等大頭目及有奏請要事仍准

其伴送前來若僅微末回人希冀賞賚俱照

綽克托所辦飭諭遣回至大臣等辦事理宜

和衷共濟若明瑞因綽克托如此陳奏即與

之意見不合一切會商事件輒存形迹則是

伊自負造就之恩矣併著傳諭知之○又諭

曰綽克托等奏烏魯木齊等處屯田兵二千

九百名共收糧五萬七千餘石可否將辦理

屯田之總兵德昌及管屯官員交部議叙兵

丁賞給鹽菜銀兩等語。著照所請。將總兵德昌及管屯官員。交部議叙。兵丁各賞給一月鹽菜銀兩。○吏部議准宗人府府丞儲麟趾奏。嗣後宗人府京察司員筆帖式。准令府丞隨同王公考覈。列銜咨送。從之。○禮部尚書陳惠華因病解任。調工部尚書董邦達為禮部尚書。以正紅旗漢軍都統楊廷璋為工部尚書。○乙未。諭據尹繼善等奏。陞任廣東欽州知州陳廷桂。請暫留署理陽湖縣知縣。俟辦差事竣。再令前赴陞任等語。陳廷桂若俟差竣赴粵。未免要缺久懸。所有欽州知州員缺。著七十一補授。陳廷桂著留於江省。將來遇有相當缺出。該督等酌量題補。○又諭京師為四方和會之區。各省仕商。向俱僦居外城。而遠年屋宇。未免漸有傾頽。多成隙地。既恐不敷居住。且通衢廣街。觀瞻攸繫。尤宜一律整齊。著派阿里衮舒赫德陳宏謀英廉詳悉相度籌辦。一面繪圖呈覽。候朕酌量指示。

交各該衙門添建房屋。以資官民賃住。○諭軍機大臣等。前因玉古爾阿奇木伯克阿布都賚勒索屬人阿克蘇伊什罕伯克頗拉特妄行滋事。與色提巴勒氏等不和。經各該大臣等參奏。審訊明確。理應治罪。朕念阿布都賚之兄托克托。於攻取庫車時。効力捐軀。頗拉特曾率所屬回人。望風歸附。俱加恩免罪。送來京城安插。看伊等近來頗知悔過自新。而額敏和卓來京奏對。又為懇請遣往伊犁安插。因交與護送入覲回人之侍衛等照管。前往伊犁。但伊等素非安靜守分之人。且額敏和卓之子茂薩。現在伊犁管轄回衆。或伊二人倚恃額敏和卓。輒行肆志。妄為亦未可定。著傳諭明瑞等。留心管束。伊等若安分度日。則已。倘不知悔改。該將軍等即行具奏。請旨正法。○理藩院奏。已故鄂爾多斯貝子那木扎勒色楞之妻格禮克。呈控伊子拉旺衮楚克色楞。醉後將伊詬罵踢打等因。得旨。此

事倫理攸關。如果情實。自應從重治罪。但一面之詞。未可遽信。著遣尚書五吉侍郎福鼎同往審明具奏。○以故一等子齊旺子特古斯。三等子金剛保子阿爾京阿。各襲爵。○翰林院侍讀阿肅充日講起居注官。侍讀學士德風。署日講起居注官。○丙申。諭軍機大臣等。京師附近地方。俱於本月初六日得雪。自四五寸至六七寸不等。惟保定一帶。雖經霑灑。尚未深透。茲據方觀承奏到。本月十六日。省城已得雪四寸。因思河南所屬。正與保陽迤南地界毗連。本日已據布政使佛德摺奏。南陽。汝寧等屬。於初五日得雪一二寸。而該撫阿思哈。何以尚未奏聞。豈所轄遠近不同。必待通查會奏耶。著傳諭該撫。令將豫省實在得雪分寸。并各屬現在是否待澤情形。詳查速奏。以慰朕懷。○又諭本月初六日。近京一帶附近地方。俱經得雪。自四五寸至六七寸不等。惟保定迤西一帶。霑灑尚未深透。

今據方觀承奏到。省城已於十六日得雪四寸。而河南布政使佛德亦同日奏報。南陽。汝寧等屬。已得雪二寸。其山東地面。正與直隸毗連。前據該撫崔應階摺奏。於十一月二十六日。濟南。武定。萊州各屬。得雪一二三寸不等。日來尚未據續行奏聞。著傳諭該撫。令其將現在各屬。曾否普霑雪澤。並得有分寸幾何。即速詳查具奏。慰朕廑念。○理藩院議奏。扎魯特。扎薩克。多羅貝勒。固魯扎布等。二旗內。年已及歲。未得等次者。貝勒之弟三人。應授二等台吉。台吉之子十七人。應授四等台吉。從之。○以服闋。安徽按察使程燾。為安徽布政使。○鄂爾多斯。扎薩克。固山貝子。拉旺。已爾提色。楞故。遣官致祭。如例。○丁酉。諭倉場侍郎員缺。著李因培調補。其禮部侍郎員缺。著李宗文補授。李因培未到任以前。倉場侍郎事務。著裘曰修暫行署理。○又諭據值年旗奏。賴宏典家屬。已經解京。請分賞功臣。

之家為奴一摺。賴宏典所犯情罪。究與叛逆者有間。其緣坐妻子。俱著加恩寬免。不必派賞。○諭軍機大臣等。昨據尹繼善等奏稱。丹陽一帶河道淺窄。若浙省官員俱前赴鎮江接駕。誠恐船隻過多。未免壅擠。除錢陳羣聽其遠接外。其餘督撫司道等官。俱令於蘇州迎接等語。蘇州河道亦不甚寬濶。若浙省應行接駕官員俱前赴蘇州。則船隻較多。仍恐未免壅擠。浙省除將軍總督巡撫准其赴蘇迎接。然亦不得遠越蘇郡。其餘各官俱於本省嘉興交界處所祇候。概不必出境。將此傳諭蘇昌等知之。○以故喀喇沁三等子丹贊子果多布襲爵。○戊戌。

上詣

皇太后宮問安。○諭軍機大臣等。李星垣前在粵西副將任內。烟瘴俸深。右江鎮總兵缺出。經該督照例揀選。擬正題補。是以即行降旨擢用。但觀其為人。外似奮勉勇往。宜於將率

之任。及詳加體察。其中並無定見。難以遽行深信。即如前日請將土知州岑宜棟。俟該鎮邊俸屆滿時。帶領來京。引見一摺。以分所不應陳奏之事。遽行入告。尤屬好事。著傳諭李侍堯。令其留心訪查。現今在鎮。有無乖張失檢之處。如看來不甚妥協。廣東視西省較為近地。或將李星垣於東省總兵內對調。該督既便就近督察。而於營務亦可無貽誤。仍即一面據實奏聞。尋奏。現據滇省委員胡筠呈控李星垣。令百色同知陸廣霖。取運滇鹽。抵償私債。奏請查訊在案。李星垣應歸案審辦。毋庸議請調補。報聞。○又諭倉場侍郎員缺。已將李因培調補。伊學差未滿。此時且不必來京。倉場事務。現命裘曰修暫行署理。俟明歲南巡迴鑾時。隨從來京。再行接管。將此傳諭知之。○又諭。據提督衙門奏。前經派往拉林種地之閒散瑪爾泰。於乾隆十九年十一月。告假來京。屢在通州灤州等處。控爭地畝。

請交刑部治罪等語。瑪爾泰係拉林種地旗人。藉告假為名。在各處逗遛。訐訟將及十年之久。該地方官等。何以未稟方觀承。一若毫無聞見。所有失察之該都統暨將軍等。俱已令其明白回奏。著即傳詢方觀承。將該犯所經地方。各該管官。因何漫無覺察情由。即行據實奏聞。尋奏。向來旗人控告地畝等事。如係有職人員。該管衙門。俱給照定限。並知照臣衙門。轉行州縣查察。瑪爾泰係閒散旗人。

其在拉林告假。及自本旗出京呈控。該處並無知照之文。歷年所控地畝。皆非應申臣衙門之案。是以州縣並無詳稟報聞。○又諭。據桑寨多爾濟等奏稱。現與俄羅斯停止貿易。非從前可比。哲布尊丹巴呼圖克圖所居庫倫地方。距恰克圖甚近。請增設卡座。併派綠營兵一二千名。在伊綢布爾噶勒台等處屯田等語。所奏殊屬過慮。俄羅斯等果欲滋事。青滾雜卜及喀爾喀騷動之際。伊等早滋事。

矣。宣待至今日乎。從前既無動靜。是斷不敢滋事。今乃先事張皇。令伊知覺。轉謂有先發之意。適足啟其疑慮。且即辦理伊等。亦宜通盤算定。以期一舉成功。桑寨多爾濟等所奏。何濟於事。其添設卡座。移駐兵丁之處。均可不必。仍著照常辦理。○吏部等部議覆。雲貴總督劉藻奏稱。滇省湯丹大碌兩銅廠。坐落東川府屬會澤縣境內。比歲以來。產銅日旺。廠衆益增。兩廠不下二三萬人。爭端易起。案

件漸多。雖有丞倅二員。分駐廠中。刑名非其所轄。呼應不靈。移縣查辦。延誤堪虞。查東川府壤接川黔。地方遼濶。向無府佐。澂江府地居腹裏。原設通判。與知府同城。並無承辦要件。實係閒員。應裁。改設東川府湯丹通判一員。辦理兩廠刑名。擬定字樣。鑄給關防。湯丹廠原有公所。將澂江通判舊署估變。量為增修。書吏快役。撥歸聽用。俸廉工食。照額支領。該通判既理刑名。應建監獄一座。湯丹廠並

無城垣。未便久稽重犯。俟審定日。仍發會澤縣監禁。以昭慎重。應如所請。從之。○又議准江西巡撫輔德等奏稱。江西所設巡檢。多因前明舊制。而地方繁簡情形。今昔異宜。且有衙署無存。厯任各員。或僦住民舍。或僑寓縣城。離其汛守。間有仍駐原處。而民人或已遷他所。徒置閒地。或久經移駐。而印信尚仍其舊。亦於體制未宜。均應隨時酌調。有應裁。應留。應移。應駐。惟就現在確實情形。畫一定議。

查通省巡檢九十二員。除設置得宜。毋庸置議外。應請移駐八缺。豐城縣柿源司巡檢。移駐大江口。進賢縣鄔子司巡檢。移駐梅莊。廬陵縣教城司巡檢。移駐永陽鎮。井崗司巡檢。移駐固江鎮。樂安縣龍義司巡檢。移駐招攜鎮。崇仁縣周坊司巡檢。移駐坑埠。信豐縣新田司巡檢。移駐楊溪堡之坡頭墟。會昌縣湘鄉司巡檢。移駐筠門嶺。以上應移駐。併換給印信。久經移駐。因仍舊名八缺。新建縣烏山

司移駐之生米鎮巡檢。新建縣昌邑司移駐之吳城鎮巡檢。萬載縣鐵山司移駐之珠樹潭巡檢。萍鄉縣大安里移駐之蘆溪市巡檢。鉛山縣石佛司移駐之河口司巡檢。貴溪縣神前司移駐之鷹潭司巡檢。貴溪縣管界司移駐之上清鎮巡檢。浮梁縣桃樹司移駐之景德鎮巡檢。以上久經移駐。應請覈實換給印信。原駐已成閒地。應請裁七缺。寧州杉市司巡檢。歸州同兼管。進賢縣潤坡司巡檢。歸梅莊司管理。泰和縣化石司巡檢。廣昌縣秀嶺司巡檢。興國縣迴龍司巡檢。會昌縣承鄉司巡檢。各歸本縣兼管。長寧縣黃鄉司巡檢。歸新坪司兼管。以上應請裁。其存有衙署及僅存基址者。均應變價歸公。應請改繁簡三缺。新建縣吳城鎮。新昌縣黃岡司二巡檢。俱改為繁缺。新昌縣大姑司巡檢。改為簡缺。以上改繁二缺。在外揀調。改簡一缺。請歸部選從之。○兵部議覆兩廣總督李侍堯奏稱。廣

西右江鎮標及駐劄泗城西隆太平寧明東蘭等處叅都游守各官原定三年俸滿今雖人烟漸密但嵐瘴未消未便改為五年報滿應如所奏仍照舊例三年報滿從之○予故協辦大學士戶部尚書公兆惠祭葬如例謚文襄○予故甘肅伏羌縣翰林院侍讀學士鞏建豐江蘇常熟縣太僕寺少卿嚴虞惇各祀鄉賢祠從各督撫請也○賑卹江西南昌新建進賢等三縣被災貧民已亥同部阿克蘇三品阿奇木伯克公品級色提巴勒氏等二十一人入覲

上召色提巴勒氏等於重華宮以次行禮賜茶併賞賚有差○諭曰色提巴勒氏從前甚屬効力行走著加恩授為公爵○軍機大臣等奏恭照明春聖駕南巡隨往江浙大臣官員兵役執事人等前曾奏明統以六千馬匹隨往餘俱留住又經奉旨令各衙門將應行減派人員自行奏

減在案今據各該處冊報隨往渡黃上船人數共二千八百七十一人比照上屬三千二百三十人之數減去三百五十餘人臣等按其品級大小及差使緩急照從前之例酌量分派共需馬五千二百四十一匹尚未及奏明統以六千馬匹覈計之數至渡黃及各名勝處原奏派馬俱在四千匹以內今依原奏或按人減馬或按差減人渡黃時應需馬三千五百零四匹名勝處應需馬三千五百三十九匹開單進呈俟發下時行知兩江總督查照併交兵部照例辦給馬匹一面知照各該處將單內隨往名勝處所減派人數通融辦理至船隻一項令該督遵照從前原定章程將豫備

上用船隻及裝載御用什物等船敬謹豫備其隨往官兵人等需用船隻可按從前奏定船數將現在該省所有船隻照單內人數分別派撥至浙省應如何給票監放之處即照江

省一體辦理。令兩江總督轉知浙江地方遵照。從之。○辛丑。諭前經禮部奏請於正月初五日舉行祭典禮。是以降旨於初九日啟鑾恭奉。

皇太后安輿巡幸江浙。但初五日在立春以前。為時尚早。應俟春後初辛舉行。於義方協所有祈穀典禮。著於十五日舉行。啟鑾之期。著改為十六日。將此傳諭各該衙門並各該處知之。○壬寅。

孝莊文皇后忌辰。遣官祭

昭西陵。○

上詣

皇太后宮問安。○是日起

上以歲暮禋祭

太廟。齋戒三日。○癸卯。諭內閣學士現在人少。此次南巡。莊存與著不必隨往。○葉爾羌參贊大臣額爾景額等奏。十一月二十三日侍衛揚桑阿回自巴達克山。告稱十月十三日。

至巴達克山。素勒坦沙跪聆勅諭。奏云。素勒坦沙僻處邊隅。不諳體制。妄行陳奏。自知罪重。今蒙恩降勅訓諭。惟有痛改前非。以盡臣僕之分。隨遣親隨鄂斯敏伯克齋奏謝恩。并呈吐魯番郡王額敏和卓書函。十二月二十日。至葉爾羌。臣等面詢鄂斯敏所言無異。除覆書交鄂斯敏齋回外。謹將奏章書呈譯出。其奏章云。臣素勒坦沙謹奏。十月十三日。奉到訓旨。跪聆之下。不勝感戴。回人風俗凡事

急圖表白。前此所奏。今始知非。惟是痛自改悔而已。愛烏罕原有構怨之意。今似不復相侵。齊特喇爾之地。臣意欲仍行賞給。實甚糊塗。臣處有衆萬人屬實。但不知天朝無給餉之例。妄行瀆請。嗣後惟有約束部落。不敢稍存異念。以圖仰報皇恩。至額敏和卓。臣稱之曰父。何敢誹謗。或因所遣和濟克蘭。造言生事。今已嚴加懲治。一切俱凜遵勅諭。不敢稍有違悖。謹奏。其呈額敏和卓書云。巴達克山

伯克素勒坦沙奉書吐魯番郡王接來諭甚為欣悅。我原以父相稱。望王以我為子。前遣使人和濟克蘭至葉爾羌時。大概添造語言。奉諭之後。即將伊懲治。專此辯明心迹。尚望王於

大皇帝前。善言陳奏。謹呈。臣等一併恭呈御覽。報聞。○叅贊大臣綽克托等奏。本年五月內。臣等看得烏魯木齊庫爾喀喇烏蘇兩處。察哈爾。厄魯特情形。每戶牧羊四十隻。除每十

隻交羊羔三隻。及填補倒斃數目外。尚無虧缺。臣等酌照前奏。將來投之厄魯特等於安插之日。給與餉銀。一年後再行停止。七月內。烏魯木齊。雨水霑足。禾苗壯盛。招募內地民人開墾之地。收成在十分以上。又據民人王世昌等一百三十戶呈稱。我等俱係內地無業貧民。蒙恩賞給口糧。移居烏魯木齊。所有農器籽種。及種地馬匹。俱係官辦。准分年完項。今獲豐收。除來年籽種口糧外。尚有盈餘。

前日借項。情願即行交納。臣等伏思分年還官之項。並未督催。伊等既急公安納。請將借出之餘糧四百七十二斛有零。照數交倉。查民人等移居以來。伐木採煤。養育雞豚。竟成村落。與內地無異。報聞。○甲辰。以歲暮。祫祭。遣官祭

太廟中殿

後殿。○諭軍機大臣等。錢度奏。拏獲清鎮縣聚眾搶犯案內之逸犯劉上達等一摺。已交法

司覈擬速奏。但摺內所稱安順大定各府。及督提各標員會同獲犯之處。乃沿向來外吏習氣。為文武官弁規免處分起見。而於獎勵官方之實。甚為乖謬。地方緝拏要犯。必有首先出力之人。惟確切指明。加之優叙。眾人始知所激勸。若徒模稜了事。不惟能事者因此灰心。而庸懦無能之人。既可倖逃吏議。抑且濫廁分功。賞罰幾成倒置。何可為訓。此案人犯。究係何人首先拏獲。著錢度確實查明覆

奏候朕降旨。伊犁將軍明瑞等奏十一月二十五日。哈薩克阿布勒比斯遣屬人察噶賴等四名。帶領厄魯特塔爾巴噶沁鄂拓克台吉策伯克來見。譯出托忒字文書云。策伯克於阿布勒比斯父在時。曾為養子。欲來歸附。今將伊身及其幼子。先行送來。其家口俟來年春融續送。但伊母女妻子。俱未出痘。祈於伊犁就近安插。臣等詢問策伯克所告相同。察噶賴又云。阿布勒比斯欲遣使入覲。一

時不得其人。且畏哈密道遠。可否准由烏里雅蘇台行走。臣等覆書。准其代奏。查策伯克從前曾蒙恩賞二品頂孔雀翎。但係阿布勒比斯親信之人。今忽送來伊犁安插。聞策伯克有一女。於今秋同厄魯特巴朗來投。或哈薩克等疑其內向。因欲脫回。又聞哈薩克等懼我駐兵塔爾巴哈台。或令策伯克於伊犁安插。可以潛通信息。俱未可定。但看其人尚樸實。亦非大台吉。似可准其安插。伊家口至

伊犁時。策伯克仍來京朝覲。臣等暫將伊父子交總管碩通照看。或將伊安插伊犁。或乘伊入覲歸途之便。於烏里雅蘇台安插之處。伏候訓示。諭軍機大臣等。明瑞奏稱。哈薩克阿布勒比斯遣人帶領厄魯特台吉策伯克父子來投。請安插伊犁。明瑞等覆書。俟奏聞請旨。如蒙俞允。俟與使人同至京師。或在伊犁。或在烏里雅蘇台安插之處。未敢懸定等語。所見尚未甚合機宜。策伯克既誠心來投。

宜宜自定安插之地。應曉示云。厄魯特哈薩克俱大皇帝臣僕。爾在哈薩克與在伊犁並無分別。爾欲安插京師。自當代為具奏。今並不前往。未便代奏等語。即賞賚遣回亦可。今既已允其所請。雖厄魯特舊台吉不應安插伊犁。然伊不過塔爾巴噶沁之小台吉。尚非綽羅斯可比。即准其安插。亦無不可。若遷移於烏里雅蘇台。則顯示防範形迹。轉起伊等猜疑。且伊犁似策伯克之台吉亦多。來春伊

家口到時。一切支給官項。俱與伊犁之厄魯特一例辦理。並不以台吉分例相待。則久之自與衆厄魯特等一體。著傳諭明瑞等遵照辦理。○乙巳。祫祭。

太廟。

上親詣行禮。○遣官祭。

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭。

孝賢皇后陵。

端慧皇太子園寢。○遣官祭。

太歲之神。○詣。

皇太后宮問安。○諭此案辦理甚屬錯謬。家奴

用銀計圖贖身。德昌既經收受。准放。清保乃伊親弟。豈得竟謂與伊無涉。摺內並不將此處議罪。明係大學士傳恒護庇清保。而各堂官亦意存瞻徇情面。俱著交部嚴察議奏。原摺著擲還。另議具奏。○又諭曰。清保在盛京將軍任內。辦事不妥。將伊調為天津都統。後復被叅。本應治罪。朕法外施恩。令在侍衛上行走。伊當感激自新。力圖報効。伊兄受家人銀兩。放出。已屬多年。何得復行控告。甚屬不堪。著將清保所有官職。一概革去。○軍機大臣等議覆。察哈爾都統巴爾品奏。稱牧場官兵。差役較繁。向無津貼公費。請照察哈爾總管叅領。分別等次。賞給養廉。於牧場生息銀五萬兩內。將充公餘銀酌給等語。應如所奏。商都達布遜諾爾達里剛愛。二處總管。每年各給銀一百兩。太僕寺兩翼總管。各給銀六十兩。翼長十一員。各給四十兩。五品副總管二員。各給六十兩。六品翼長一員。防禦六員。

各給四十兩。應支養廉。即以本年為始從之。

○丙午。

上詣

皇太后宮問安。御保和殿。筵宴朝正外藩左翼。科爾沁和碩親王固倫額駙色布騰巴勒珠爾。多羅扎薩克圖郡王納旺色布騰。輔國公和碩額駙喇錫納木扎勒。輔國公諾昆達喇。固山額駙索諾木喀喇沁多羅都統郡王喇特納錫第。固山貝子多羅額駙扎拉豐阿。

鎮國公丹津達爾扎。輔國公溫都爾瑚。和碩額駙那木扎布。一等塔布囊格勒納薩嗎魯布。教漢多羅郡王吹濟喇錫固山貝子固山額駙吹濟扎勒。輔國公多羅額駙桑濟扎勒。和碩額駙朋蘇克喇錫。二等台吉色布騰多爾濟翁牛特多羅達爾漢岱清貝勒朋蘇克。多羅額駙班珠爾。固山額駙車布登。一等台吉諾爾布扎木素。二等台吉巴顏巴圖爾烏珠穆沁多羅額爾德尼貝勒達什衮布。輔國

公敦多布色楞鄂爾多斯多羅貝勒棟多布扎木素。土默特固山貝子哈木喀巴牙斯呼朗圖。和碩額駙納遜特古斯。歸化城土默特輔國公拉瑪扎布。郭爾羅斯扎薩克一等台吉阿拉布坦。固山額駙素瑪第巴林多羅額駙丹津右翼喀爾喀和碩親王諾爾布扎布。多羅郡王車木楚克扎布。多羅貝勒齊默特多爾濟。輔國公巴圖濟爾噶勒。輔國公德勒克多爾濟。公品級扎薩克一等台吉格彰多

爾濟。公品級扎薩克一等台吉成衮扎布。扎薩克一等台吉車魯布多爾濟。扎薩克一等台吉車登旺扎勒。厄魯特多羅郡王多羅額駙羅布藏多爾濟。吐魯番多羅郡王額敏和卓。綽羅斯多羅郡王羅布扎。回子郡王品級貝勒霍集斯。輔國公圖爾都。輔國公和什克。輔國公額色尹扎薩克一等台吉瑪穆特。科爾沁多羅貝勒庫木扎布。固山額駙多爾吉呼。一等台吉烏爾扎勒。阿巴哈納爾多羅貝

勒達什敏珠爾巴林輔國公和碩額駙德勒克敦漢輔國公固山額駙羅布藏錫喇布固山額駙旺扎勒和托輝特輔國公多爾濟車登扎魯特二等台吉朋楚克翁牛特二等台吉三濟扎布四等台吉衮布車布登歸化城土默特四等台吉巴勒丹多爾濟及大學士領侍衛內大臣等。召科爾沁和碩親王固倫額駙色布騰巴勒珠爾多羅扎薩克圖郡王納旺色布騰喀喇沁多羅都統郡王喇特納

錫第固山貝子多羅額駙扎拉豐阿土默特固山貝子哈木喀巴牙斯呼朗圖敦漢固山貝子固山額駙吹濟扎勒烏珠穆沁多羅額爾德尼貝勒達什衮布鄂爾多斯多羅貝勒棟多布扎木素喀爾喀和碩親王諾爾布扎布多羅郡王車木楚克扎布多羅貝勒齊默特多爾濟厄魯特多羅郡王多羅額駙羅布藏多爾濟吐魯番多羅郡王額敏和卓回子郡王品級貝勒霍集斯巴林輔國公和碩額

駙德勒克敦漢輔國公固山額駙羅布藏錫喇布等。至

御座前。賜酒成禮。○諭軍機大臣等。崔應階奏。韓莊現在築壩挑淺。水路不通。所有往廣州駐防兵丁。請改由王家營下船一摺。此項兵丁。不過赴廣補缺。並非不可緩待之事。著俟明年南巡迴鑾後。再令定期赴廣。著傳諭該撫。並所過之各該督撫。知之。○是月。大學士管兩江總督尹繼善奏。江蘇城垣。向於匣費

內。每年撥銀二萬兩修理。而各屬城工浩繁。所撥不敷。若不設法籌畫。恐未修各城。年復一年。愈致坍塌。查江南綠營八旗賞卹兵丁生息銀兩。原領本銀早已歸清。現以息作本。綠營銀十二萬九千六百餘兩。八旗銀七萬五千兩。經臣先後奏准裁汰兵丁。俟裁扣完。日將生息銀兩繳回司庫。請仍以一分起息。暫行營運。查綠營生息銀兩。蘇撫標原買田畝銀五千二百五十一兩零。經撫臣莊有恭

奏請變價交庫充公。并以餘銀建造營房。及賞緝匪辦公之用。除去此項。實存銀十九萬九千餘兩。以之營運。每年可得息銀二萬三千餘兩。以為添補修城之用。俟通省城工修竣。再行撤回司庫。得旨甚好。如所議行。○安徽巡撫託庸奏。安省沿江各屬。圩田居多。全賴隄壩捍衛。向係民修。本年夏間。江潮盛漲。隄壩漫缺甚多。當即通飭各屬。督民及時修竣。惟無為州一屬。地處極低。本年被水獨重。

該處隄壩綿長二百餘里。民力實有不能。請於廬鳳道庫水利餘剩銀內。動借三萬兩。修築。分作三年徵完歸款。得旨。如所議行。○又奏。淮河今春挑挖之後。夏間黃水並未過壩。惟豫水挾沙而至。多有淤積。遵於河頭築壩。藉以刷沙。但查淮河本係沙中開河。夏秋雨水淋漓。兩岸沙波坍塌。積淤漸多。霜降後水勢日小。刷沙之力甚微。且新淤灘嘴。非水所能衝去。必須人力挑修。於來春開挑。一律深

通。以備消洩。夏秋豫省諸水報聞。○江西巡撫輔德奏。前因江省各屬。間有閒曠官山。頗宜種植。臣隨通飭各屬。輕騎減從。親歷勘查。不得聽地保混報。更不得妄行出差滋擾。一有查出。即丈明畝數。編定字號。量其山地多寡。先儘無業貧民。撥給承墾。如有餘剩。始聽有力之家具認。均即分定界址。給發印照。其有私墾在先者。但能自行報出。亦准補具認狀。一體給照。惟衆姓樵牧。及義塚處所。仍酌

量存留。茲查江省共計七十九廳州縣。內止二縣據報並無官山。其餘七十七廳州縣。所報查出官山。共一千一百六十五頃五十九畝零。又經查出官田共七頃一畝零。官地共一十六頃九十四畝零。官洲共七十三頃六畝零。官塘二畝零。通計官山田地洲塘。一千二百六十二頃六十四畝零。未經查明勸墾以前。官民山地彼此錯雜。以致結訟不休。今經地方官文明弓口畝分。畫定段落。四至杜

絕爭端。查定例。水田以六年起科。旱田以十年起科。江省近年報墾。因無旱田。俱扣限六年起科。俟屆限期。即以現今所給印照為據。按照科則升徵。約計每年共應科納薄糧銀九百六十七兩零。米二百八十石零。報聞。○四川總督阿爾泰奏。灌縣都江堰。為內江來水總口。分灌成都等十五州縣田疇。每歲水落後。將堰底淘深。並接連隄身。修築魚嘴壩。橫截江流。逼水入堰。為灌田計。惟江水來源甚

遠。每逢夏雨驟漲。水勢洶湧。漫入內江。不無漲溢之患。如衝刷壩工。淤塞堰口。又有難於引灌之虞。欲期水常敷用。瀑漲不害。惟有酌開支河。以備宣洩。加工濬築。以資利導。現將魚嘴壩並堰底。修築淘濬。使內江受水充足。仍敷灌溉外。擬於堰口上游半里許。隔江對岸。地勢低窪處。開支河一道。口寬二十丈。長二百八十丈。即可使上游汎漲之水。徑達外江。仍於支河頭。按內江需水尺寸。設立滾壩。

水小則藉壩身逼溜入堰。俾敷灌漑。水大則由壩頂洩入支河。以分水勢。再自灌郛至成華等州縣。各有小堰。自數道至十餘道不等。亦一律修濬。以裕田水。報聞。○雲貴總督劉藻奏。雲南永昌順寧二府。地處極邊。界連外域。年來木梳野匪。與緬甸所屬之木邦。不時構釁。木邦又與耿馬各土司毗連。如木梳由木邦至耿馬等境。須渡滾弄江。是沿江一帶口隘。實為中外扼要之區。查滾弄江邊有鎮

康所屬之喳里上渡。耿馬相近之滾弄中渡。茂隆隣近之南外下渡。孟定所屬之南捧河口。及芒市所屬之三台山。遮放所屬之蠻坎箐。猛卯所屬之底麻河等七處。最為緊要。應設卡常川防守。所需土練。即在分隸各土司地方。就近派撥。於喳里上渡。撥鎮康壯練五十名。滾弄中渡。撥耿馬壯練一百五十名。南外下渡。撥茂隆廠壯丁五十名。南捧河口。撥孟定壯練三十名。三台山。撥芒市壯練五十

名蠻坎箐。撥遮放壯練六十名。底麻河撥猛卯壯練六十名。每處令各該土司。另選明白幹練一人。立為頭目。督率巡防。每年分委猛土巡檢。南甸安撫土司。就近查察。并於各隘建造礮臺。及哨樓卡房。再練丁遠戍江邊。口糧宜量為折給。除南外下渡係茂隆廠沙丁。應聽該廠委辦外。其餘土練。每名日給口糧鹽菜銀四分。頭目倍之。二土司按月赴卡巡查往返需時。每次各給銀五兩。以資盤費。

統計目練四百六名。每年九月十五日秋末撥防起。至次年三月十五日瘴盛止。共需口糧等銀三千零二十六兩四錢。加以犒賞。并目前建造臺卡。及將來歲修各項。通計每歲約需銀四千餘兩。未便動支正項。請於雲南省局量為加鑄。該局二十五鑪。每鑪加鑄半卯。除歸鑄本經費外。約獲息錢五千二百餘串。可易銀四千三百餘兩。移解司庫。令永順二府領給。得旨如所議行。○護理貴州巡撫

錢度奏黔省城垣共八十五座。除全行完固六十餘處外。安南普安綏陽等三縣。坍塌無多。均經修整。惟貴陽府城及鎮寧州城。應須拆修。又天柱開州廣順石阡思南永寧普安畢節甕安湄潭龍泉婺川印江等十三處城垣。均應修建。但黔省錢糧無幾。未便概行興修。俟明歲將貴陽鎮寧酌辦後。再行分別緩急。次第辦理。報聞。○是年。追予準噶爾出兵陣亡之佐領薩西爾圖一員。祭葬贈卹如例。


馬步兵謝光正等九十五名。卹賞俱入祀昭忠祠。○旌表孝子直隸等省徐克讓等六名。守節合例。八旗滿洲傅森布妻高佳氏等一百零二口。蒙古白京妻布勒忒氏等二十五口。漢軍李環妻鄭氏等二十四口。內務府鑲黃等旗桐保妻那氏等四口。奉天等省駐防三德力妻何儀氏等六十八口。直隸等省杜錫起妻王氏等三百九十七口。夫亡殉節。江蘇等省周鳳鳴妻林氏等十三口。未婚守志。

江蘇等省徐雯聘妻孫氏等二十口。百歲壽民婦。福建等省傳妹等十三名口。各給銀建坊如例。○一產三男。奉天等省五十六等十八家。○會計天下民穀數。各省通共大小男婦二萬五百五十九萬一千一十七名口。各省通共存倉米穀三千四百六十九萬八千八百四十三石一斗九升二合三勺

實錄卷之七

七

大清高宗法天隆運至誠先覺體元立極敷文奮武孝慈神聖純皇帝實錄卷之七百二十五



統一書號: 11018·1355—17

定 價: 51.00 元